

Dzam Wedeye



New Testament in Meray

# Dzam Wedeye

## New Testament in Merey

copyright © 2012 Wycliffe Bible Translators, Inc.

Language: Merey

Translation by: Wycliffe Bible Translators

Contributor: Wycliffe Bible Translators, Inc.

### Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Merey

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Mar 2025 from source files dated 29 Jan 2022  
024cb559-a7ea-5bd1-9dc9-f33abc74bfec

## Contents

Mata . . . . .	1
Markus . . . . .	69
Luka . . . . .	114
Yuhana . . . . .	186
Məsler hay . . . . .	237
Roma hay . . . . .	302
1 Korințe hay . . . . .	335
2 Korințe hay . . . . .	366
Galat hay . . . . .	386
Efez hay . . . . .	398
Filipi hay . . . . .	409
Kolosi hay . . . . .	417
1 Tesalonik hay . . . . .	425
2 Tesalonik hay . . . . .	432
1 Timote . . . . .	436
2 Timote . . . . .	445
Titus . . . . .	452
Filimon . . . . .	456
Hebrəe hay . . . . .	458
Yakuba . . . . .	482
1 Piyer . . . . .	490
2 Piyer . . . . .	499
1 Yuhana . . . . .	505
2 Yuhana . . . . .	513
3 Yuhana . . . . .	515
Yuda . . . . .	517
Məsine i Yuhana . . . . .	520

## Ngwalak i bazlam nakə

### Mata a watsa aye Məfələkwe

Wu nakə Mata a watsa a derewel nakay aye na, anan: Yesu Kəriste neŋgeye ndo mətəme ha ndo nakə Mbəlom a gwad ma sləraweeye ka mändzibəra aye. Mbəlom a dazlay mərehe ha wu nakə a gwad ma vəlatəye a Israyel ma Dzəm Guram eye na, ta neŋgeye. Tə wa na Yesu mə walaŋ i Yahuda hay, kə ndza mə walaŋ tay dərmak. Kwa andza niye bəbay na, labara nakay ka təra hərwi Yahuda hay dəkdək bay, hərwi ndo hay ka mändzibəra tebiye.

Mata kə pay gər a məwetse derewel ŋgay ka madədo ka madədo lele. A dazlay ta məwe i Yesu, madzəhuḅe i Yesu a yam, ada tə məsəpete nakə Fakalaw a səpat na Yesu aye. Kə watsa na məsler i Yesu, labara neheye a tsikawatay a ndo hay aye, matətike ada ta məmbəle tay ha ndo hay abəra ma dəvats.

Mata a ŋəna ha matətike i Yesu wal wal zlam:

- 1) A də ha labara ma tsaholok (5-7).
- 2) Gawla i Yesu hay kuro gər eye sulo ta məsler tay (10).
- 3) Dzeke i Bəy i Mbəlom (13).
- 4) Gawla i Yesu hay ta giye məsler na, kəkay (18).
- 5) Matətike ka gər i mandəve i mändzibəra tə məmaw i Yesu (24-25).

#### *Bəba tətə i Yesu hay* *Luka 3.23-38*

<sup>1</sup> Anan derewel i məzele i bəba tətə hay i Yesu Kəriste: Yesu Kəriste na, slala i Davit ada Davit na, slala i Abraham. Bəba tətə i Yesu hay na, anan:

<sup>2</sup> Abraham a lah məwe Izak. Izak a wa Zakob. Zakob a wa Yahuda ta malamar ŋgay hay.

<sup>3</sup> Yahuda a wa Fares tə Zara, may tay na, Tamar. Fares a wa Hesron. Hesron a wa Aram.

<sup>4</sup> Aram a wa Aminadab. Aminadab a wa Nason. Nason a wa Salmon.

<sup>5</sup> Salmon a wa Booz, may i Booz na, Rahab. Booz a wa Obed, may i Obed na, Rut. Obed a wa Zese.

<sup>6</sup> Zese a wa bəy Davit.

Davit a wa Salomon, may i Salomon na, ŋgwas i Uri.

<sup>7</sup> Salomon a wa Robowam. Robowam a wa Abiya. Abiya a wa Asaf.

<sup>8</sup> Asaf a wa Zozafat. Zozafat a wa Zoram. Zoram a wa Oziyas.

<sup>9</sup> Oziyas a wa Yotam. Yotam a wa Akaz. Akaz a wa Ezekiyas.

<sup>10</sup> Ezekiyas a wa Manase. Manase a wa Amon. Amon a wa Zoziyas.

<sup>11</sup> Zoziyas a wa Yekoniya ta malamar ŋgay hay. A wa tay ha na, ahəl nakə tə gəs tay beke eye hay a Babilon aye.

<sup>12</sup> Ma dəba eye nakə ti ye tay ha a Babilon aye na, Yekoniya a wa Salatiyel. Salatiyel a wa Zorobabel.

<sup>13</sup> Zorobabel a wa Abihod. Abihod a wa Eliyakim. Eliyakim a wa Azor.

<sup>14</sup> Azor a wa Sadok. Sadok a wa Akim. Akim a wa Eliyod.

<sup>15</sup> Eliyod a wa Eleyazar. Eleyazar a wa Matan. Matan a wa Zakob.

<sup>16</sup> Zakob a wa Yusufa tuk. Neŋgeye na, zal i Mari nakə a wa Yesu, tə zalay Kəriste aye.

<sup>17</sup> A gəs abəra ka Abraham hus ka Davit na, slala kuro gər eye fad. Ada a gəs abəra ka Davit hus ahəl nakə tə gəs tay ha Israyel hay a Babilon aye na, slala kuro gər eye fad. Sa na, a gas abəra ka mägəse tay ha Israyel hay a Babilon hus ka Kəriste na, slala kuro gər eye fad.

*Məwe i Yesu*

*Luka 2.1-7*

<sup>18</sup> Anan ma kəkay nakə tə wa Yesu Kəriste aye. May ɲgay na, tə zalay Mari, neŋgeye mədel i Yusufa. Ane tuk na, ahəl nakə ta zla bo zuk bay aye na, kiye a yay a Mari ta gədan i Məsəfəre Tsədanɲa eye.

<sup>19</sup> Yusufa mədel ɲgay na, neŋgeye ndo i dedək kame i Mbəlom. A say mändəde horoy ka Mari kame i ndo hay bay. A dzala mə gər ɲgay mägəre ha mədel ɲgay ta məkal.

<sup>20</sup> Həlay nakə neŋgeye faya ma dzaliye andza niye na, gawla i Mbəlom a bəzay ha bo ma məsine, a gwaday: «Yusufa, slala i Davit, kâ dzədzar məzle mədel yak Mari bay. Hərwi kiye a yay a Mari na, ta gədan i Məsəfəre Tsədanɲa eye.

<sup>21</sup> Ma wiye wawa hasləka eye, ada nəkar ka zaleyə Yesu\*, hərwi ma təmiye tay ha gwala ɲgay hay abəra mə mezeleme tay.»

<sup>22</sup> Wu neheye tebiye tə ndislew na, hərwi ada wu nakə Bəy Maduweɲ a tsik tə bazlam i ndo məde ha bazlam ɲgay aye m̄a ge bo. A gwad:

<sup>23</sup> «Anan dem nakə a sər zal zuk bay aye ma hutiyə wawa, ma wiye wawa hasləka eye, ta zaleyə Emanuyel.†»

<sup>24</sup> Yusufa a pədeke abəra ka mändzehəre na, a ge wu nakə gawla i Mbəlom a gwaday ge aye. A zla na Mari andza ɲgwas ɲgay a gay ɲgay.

<sup>25</sup> Ane tuk na, ta dzapa zuk bay hus a pat nakə Mari a wa na wawa hasləka eye. Ada Yusufa ma zaleyə na, Yesu.

## 2

*Ndo matəkay dəre a wurzla hay ti ye ka təv i Yesu*

<sup>1</sup> Tə wa Yesu na, ma Betelehem ka dala i Yahuda, a həlay nakə Herod neŋgeye bəy bagwar eye aye. Ma dəba eye tə wa na Yesu na, ndo matəkay dəre a wurzla hay ti yaw mə bəzay, tə ndislew a Zerozelem,<sup>2</sup> ta tsətsah, tə gwad: «Bəy i Yahuda hay nakə tə wa na anəke aye na, məngay? Nəmaa ɲgatay a wurzla ɲgay eye a tsaraw mə bəzay ada nəmaa yaw na, mədəslay ha gər.»

<sup>3</sup> Bəy Herod a tsəne bazlam tay niye na, a kwasay gər haladzay tə siye i ndo neheye ma Zerozelem aye tebiye.

<sup>4</sup> A zalatay a bagwar i ndo neheye tə vəlaway wu a Mbəlom aye ta ndo neheye tə dzaɲgawa bazlam i Mbəlom mapala eye, a tsətsah fataya a gwadatay: «Tə wa Kəriste na, məɲgay?»

<sup>5</sup> Ta mbəday faya, tə gwaday: «Tə wa Kəriste na, ma Betelehem, ka dala i Yahuda. Hərwi ndo məde ha bazlam i Mbəlom a watsa, a gwad:

<sup>6</sup> «Nəkar Betelehem ka dala i Yahuda, nəkar na, makətsa bo eye mə walaɲ i gəma neheye ka dala i Yahuda aye bay.

Hərwi bəy nakə ma tsəkuriye tay ha Israyel ndo ga hay aye na,

ma deyeweye abəra ma nəkar.\*»

\* **1:21** Yesu na, andza mägweđe Bəy Maduweɲ ma təmiye tay ha ndo hay. † **1:23** Andza mägweđe:

«Mbəlom tə nəkway.» Zəba ka Ezay 7.14; 8.8, 10.

\* **2:6** Zəba ka Mise 5.2; 2 Samuyel 5.2.

<sup>7</sup> Yawa! Herod a zalatay a ndo matəkay dāre a wurzla hay ta məkal. A tsətsah fataya, a gwaɗatay: «Ka ngatumay a wurzla ngay eye a tsaraw na, a həlay waray?»

<sup>8</sup> Tsa na, a slər tay ha a Betelehem, a gwaɗatay: «Dum, pəlum na wawa eye niye lele. Ka hutum na na, dumara dūmenj ha hərwi ada neŋ dərmaƙ nā ye məɗaslay ha gər.»

<sup>9</sup> Ndo neheye tə tsəne bazlam i bəy na, tə həl bo, ti ye. Ahəl nakə faya ta diye na, tə ngatay a wurzla nakə a tsaraw mə bəzay aye faya ma diye kame tay. A husa ka gər i gay nakə wawa mə dəma aye na, a lətse.

<sup>10</sup> Tə ngatay andza niye na, dārev tay a rah ta maŋgwese.

<sup>11</sup> Tə fələkwa a gay, ti ye naha, tə ngatay a wawa ta may ngay Mari. Ta dəkway gurmets, tə ɗaslay ha gər. Tsa na, tə pəla ha wu tay hay, tə vələy wu kəriye a wawa niye. Tə vələy gura, wu andaya tə zalay *enŋeŋs*<sup>†</sup> ada ta *mir*<sup>‡</sup>. <sup>12</sup> Ma dəba eye Mbəlom a tsikatay ma məsine, a gwaɗatay: «Kā mbəɗum gər ta təv i Herod sa bay.» Tə tsəne andza niye na, tə həl bo, ti ye a gəma tay ta tsəved mekeleŋ eye.

### *Mede a Ezipt*

<sup>13</sup> Ahəl nakə ndo matəkay dāre a wurzla hay ti ye wu tay na, gawla i Mbəlom a yaw ka təv i Yusufa ma məsine. A gwaɗay: «Lətse, zla na wawa ta may ngay, hwayum a Ezipt. Ndza mə dəma hus a pat nakə na gwaɗakeye maw aye, bəna Herod faya ma pəliye wawa nakay məkəɗe na.»

<sup>14</sup> Yusufa a tsəne andza niye na, a lətse, a ye tay ha wawa ta may ngay a Ezipt ta həvad.

<sup>15</sup> Tə ndza mə dəma hus a pat nakə Herod a mət aye. Wu neheye tebiye na, hərwi ada wu nakə Bəy Maduweŋ a tsik tə bazlam i ndo məɗe ha bazlam ngay aye mā ge bo parakka, a gwaɗ: «Na zalay a wawa ga mā yaw abəra mə Ezipt. §»

### *Herod a bəbazl tay ha wawa hay ma Betelehem*

<sup>16</sup> Herod a zəba faya ndo matəkay dāre a wurzla hay ta vay gər na, a ndalay haladzay. Tsa na, a slər ndo hay, a vələtay tsəved ka məkəɗe wawa haslaka eye tebiye a dazlay ka neheye a sla məve sulo bay aye ma Betelehem ada ma gəma neheye tə mbay naha aye.

<sup>17</sup> Andza niye, maa ge bo na, bazlam i Zeremi ndo məɗe ha bazlam i Mbəlom nakə a tsik aye, a gwaɗ:

<sup>18</sup> «Mawude a tsənew abəra ma gəma i Rama, mətuwe tə zlazlay haladzay mə dəma.

Rasel faya ma tuwiye wawa ngay hay.

Dada a say mægəse dārev abəra ka mətuwe bay,

hərwi wawa ngay hay andaya sa bay.\* »

### *Məməw abəra mə Ezipt a Nazaret*

<sup>19</sup> Ma dəba eye Herod a mət na, gawla i Mbəlom a yaw ka təv i Yusufa ma məsine ma Ezipt.

<sup>20</sup> A gwaɗay: «Lətse, zla na wawa ta may ngay ada mbəɗa gər a gəma i Israyel, hərwi ndo neheye ta pəla tsəved ka wawa nakay məkəɗe na aye na, ta mət.»

<sup>†</sup> 2:11 Enŋeŋs na, wu nakə tə fəkawa hərwi məɗaslay ha gər a Mbəlom aye. zə hunja lele aye. Tə gawa ka mədahaŋ ada mā ze bay. § 2:15 Oze 11.1.

<sup>‡</sup> 2:11 Mir: Mal nakə a

\* 2:18 Zeremi 31.15.

<sup>21</sup> Yusufa a tsæne andza niye na, a zla na wawa ta may ŋgay, a mbæda gær a gæma i Israyel.

<sup>22</sup> Ane tuk na, Yusufa a tsæne Arkelawos kæ ndza a bøy i bæba ŋgay Herod ka dala i Yahuda na, a dzædzar haladzay mede a dæma. Mæsine a gay sa, Mbælom a day ha wu nakæ ma giye. Tsa na, a ye a Galile.

<sup>23</sup> A ye, a ndza ma wuzlahgæma nakæ tæ zalay Nazaret aye. Andza niye wu neheye a ge bo na, andza i ndo mæde ha bazlam i Mbælom neheye tæ tsik aye. A gwad: «Ta zaley na, ndo i Nazaret.»

### 3

*Yuhana madzæhuæ ndo a yam*

*Markus 1.1-18; Luka 3.1-18; Yuhana 1.19-28*

<sup>1</sup> A hælai niye na, Yuhana madzæhuæ ndo a yam a ndohwaw mæ kæsaf i Yahuda, a dæwa ha bazlam i Mbælom,

<sup>2</sup> a gwadæwa: «Mbædum ha mede kurom, hærwi Bøy i Mbælom bæse tæ nakuröm.»

<sup>3</sup> Yuhana na, ndo nakæ Ezay ndo mæde ha bazlam i Mbælom a tsik faya, a gwad:

«Ndo faya ma wudiye mæ kæsaf, a gwad:  
Lambadumay tsæved a Bøy Maduweŋ,

lambadumay tsæved hay fehe lele tâ hædzak bay.\*»

<sup>4</sup> Yuhana a pawa ka bo na, peteked mangara eye ta mækwets i zlægweme. A barawa bæzihud ŋgay na, ta hæzlay. A ndayawa mæ kæsaf niye na, heyew ta wum.

<sup>5</sup> Ndo neheye ma Zerozelem aye, ka dala i Yahuda tebiye, ada ta ndo neheye tæ mbay naha a magayam i Yurdum aye tebiye tæ yawa ka tæv i Yuhana.

<sup>6</sup> Tæ dæwa ha mezeleme tay hay parakka kame i ndo hay, ada Yuhana a dzæhuæwaw tay ha a yam mæ magayam nakæ tæ zalay Yurdum aye.

<sup>7</sup> Yuhana a zæba dære, Farisa hay ta Saduke hay haladzay ta diye ka tæv ŋgay hærwi ada mâ dzæhuæ tay ha a yam na, a gwadatay: «Wawa i palas hay! Maa dakum ha hwayum abæra ka sariya i Mbælom nakæ bæse kæ ndzew aye na, way?»

<sup>8</sup> Anæke na, gum mæsler neheye ŋgwalak eye, ada ndo hay ta særiye ha ka mbædum ha mede kurom aye tuk.

<sup>9</sup> Kâ dzalum mæ gær kurom: “Næmay na, wawa i Abraham hay sa na, ma ta gamay mey?” bay! Særum ha na, Mbælom ma sliye faya mæge tay ha kwar neheye anaŋ aye wawa i Abraham hay.

<sup>10</sup> Ba hadzaya malæva bo eye mædæse tay ha dærizl i gærdaf hay færoð abæra ka dala. Dærizl i gærdaf neheye tebiye tæ wa hohway ŋgwalak eye bay aye na, ta dæsiye tay ha ada ta kaliye tay ha ako.»

<sup>11</sup> «Neŋ na, na dzæhuæiye kurom ha a yam tsa hærwi mæde ha na, ka mbædum ha mede kurom. Ane tuk na, ndo nakæ ma deyeweye kame ga aye na, neŋgeye a ze ga ta gædaŋ. Neŋ na sla matsakway ahaya tahærak ŋgay hay abæra mæ sik bay. Neŋgeye na, ma dzæhuæiye kurom ha ta Mæsæfære Tsædaŋŋa eye ada ta ako.

<sup>12</sup> Wu mahæve daw andaya mæ hælai. Ma ŋgæniye tay ha daw ta dzændzar. Daw na, ma hayay gær ma hælai na a de. Ada dzændzar na, ma dziye a ako nakæ ma mbatiye dæda bay aye.»

\* 3:3 Ezay 40.3.

*Yuhana a dzəhuḅ ha Yesu a yam**Markus 1.9-11; Luka 3.21-22; Yuhana 1.29-34*

<sup>13</sup> Ma dəba eye na, Yesu a yaw abəra ma Galile hus a magayam i Yurdum. A yaw ka təv i Yuhana hərwi ada Yuhana mā dzəhuḅ ha a yam.

<sup>14</sup> Yuhana a wudā bay. A gwadəy a Yesu: «Nej dūh nakə na diye naha ka təv yak ka dzəhuḅeye ga ha a yam aye tuk na, ada nəkar dūh ka deyewe ye ka təv ga na, kəkay!»

<sup>15</sup> Ane tuk na, Yesu a mbəḁay faya, a gwadəy: «Təma, mā ge bo andza niye anəke. Wu nakə Mbəlom a tsətsah aye ka gakweye andza nakə a tsik aye.»

Yuhana a təma bazlam i Yesu nakə a tsikay aye. A dzəhuḅ ha Yesu a yam tuk.

<sup>16</sup> A dzəhuḅ ha a yam tsa na, Yesu a tsalaw abəra ma yam. Kwayarḅa magərmbəlom a həndək tuwan, ada Yesu a ḅgatay a Məsəfəre i Mbəlom a mbəzlaw andza bodobodo, a yaw a ndza faya. <sup>17</sup> Tsa na, mətsike me a tsənew mə mbəlom, a gwad: «Nakay na, wawa ga, na wudā nā haladzay. Dərev ga faya ma ḅgwasiye tə neḅgeye.»

**4***A say a fakalaw masəpete na Yesu**Markus 1.12-13; Luka 4.1-13*

<sup>1</sup> Ma dəba eye na, Məsəfəre i Mbəlom a ye ha Yesu a makulkwandah hərwi ada Fakalaw mā səpat na.

<sup>2</sup> Yesu a ndza məhəne kuro kuro faḁ, həpat həvaḁ ze mənde wu mənday. Ma dəba eye na, may a wur faya.

<sup>3</sup> Fakalaw, ndo masəpete ndo a yaw, a həndzəḁka təv i Yesu, a gwadəy: «Tadə kə ge nəkar Wawa i Mbəlom na, gwadətatay a kwar neheye tā təra wu mənday ada kə nda!»

<sup>4</sup> Yesu a mbəḁay faya, a gwadəy: «Mawatsa eye mə bazlam i Mbəlom na, ndo zezeḅ ma ndziye na, ta wu mənday dəkdək tsa bay, ane tuk na, ma ndziye tə bazlam nakə Mbəlom a tsik aye tebiye.\*»

<sup>5</sup> Fakalaw a ye ha a Zerozelem, gəma tsəḁarḅa eye. A ye ha ka gər i gay i məḁaslay ha gər a Mbəlom,

<sup>6</sup> a gwadəy: «Tadə kə ge nəkar Wawa i Mbəlom na, kal ha bo abəra ka gər i gay nakay ka dala. Hərwi mawatsa eye mə bazlam i Mbəlom na, a gwad: «Mbəlom ma gwadəteye a gawla ḅgay hay tā dzəna kar.

Tā kəndawa kar hərwi ada sik yak mā ndzay a kwar bay.†»

<sup>7</sup> Yesu a mbəḁay faya, a gwadəy: «Mawatsa eye mə bazlam i Mbəlom na, a gwad: «Kā dza ha Bəy Maduweḅ yak Mbəlom bay.‡»

<sup>8</sup> Fakalaw a zla na a ye ha ka gər i məhəmba zəbol eye, a bəzay ha bəy i məndzibəra tə zlele nakə mə dəma aye tebiye.

<sup>9</sup> A gwadəy a Yesu: «Ka dəkweḅ gurmeḁs ada ka ḁəsleḅ ha gər na, na vəlakeye ha a nəkar tebiye.»

<sup>10</sup> Yesu a gwadəy: «Fakalaw, do abəra kanarḅ! Hərwi mawatsa eye mə bazlam i Mbəlom na, a gwad: «Dəslay ha gər a Bəy Maduweḅ yak Mbəlom, ada ka geye məsler na, a neḅgeye nəte ḅgweḅ.§»

<sup>11</sup> Ka təv eye niye na, Fakalaw a gər ha. Gawla i Mbəlom hay ti yaw ka təv i Yesu, tə vəlay wu mənday.

\* **4:4** Bazlam mapala eye masulo eye 8.3. † **4:6** Dəmes hay 91.11-12. ‡ **4:7** Bazlam mapala eye masulo eye 6.16. § **4:10** Bazlam mapala eye masulo eye 6.13.



*Yesu a dazlay a mäsler ma Galile*

*Markus 1.14-15; Luka 4.14-15*

<sup>12</sup> Ahəl nakə Yesu a tsəne ta gəs na Yuhana madzəhuḅe ndo a yam aye na, a ye a Galile.

<sup>13</sup> Ahəl nakə faya ma diye na, a ye ta Nazaret təday, tsa na, a ye abəra mə dəma, a ye a Kafernahum ka tsakay i dəlöv i Galile, ma gəma i Zabulon ta Naftali.

<sup>14</sup> A ge bo andza niye na, andza nakə Ezay ndo mæde ha bazlam i Mbəlom a tsik aye, a gwad:

<sup>15</sup> «Nəkurom ndo neheye ma gəma i Zabulon ta Naftali,  
ta nəkurom neheye ka tsəved mede a dəlöv, ta diye i magayam i Yurdum  
aye,  
a nəkurom neheye ma Galile mandza eye mə walaŋ i ndo neheye Yahuda  
hay bay aye!

<sup>16</sup> Nəkurom slala neheye mandza eye ma ləvoŋ aye na,  
ka ŋgatumay a dzaydzay bagwar eye.

Nəkurom neheye mandza eye ma gəma i mezek i mədahaŋ aye na,  
dzaydzay ka dəvakum.\*»

<sup>17</sup> A həlay niye kwayaŋŋa Yesu a dazlay mæde ha bazlam i Mbəlom a ndo hay. A gwadawa: «Mbədum ha mede kurom, hərwi Bəy i Mbəlom ka həndzədəw.»

*Yesu a zal gawla ŋgay kurre eye hay*

*Markus 1.16-20; Luka 5.1-11*

<sup>18</sup> Yesu faya ma diye ta tsakay i dəlöv i Galile na, a ndzay a gər a ndo wuray sulo ta malamar ŋgay. Neŋged na, Simoŋ nakə tə zalay Piyer neŋgeye ta malamar ŋgay Aŋdære. Nəteye ndo mægəse kələf hay, faya ta kaliye gadaŋ tay a dəlöv.

<sup>19</sup> Yesu a gwadatay: «Dumara, pumenj bəzay. Anəke faya ka həlumeye kələf, ane tuk na, na təriye kurom ha ndo məhələw ndo hay.»

<sup>20</sup> Kwayaŋŋa tə gər ha gadaŋ tay hay, tə pay bəzay a Yesu.

<sup>21</sup> Yesu a ye kame dəreŋ tsekweŋ sa na, a ndzatay a gər a ndo mekeleŋ eye sulo ta malamar ŋgay sa, Yakuba ta Yuhana wawa i Dzebede hay. Nəteye mə kwalalaŋ i yam tay ta bəba tay Dzebede, faya ta lambadiye gadaŋ tay hay. Yesu a zalatay.

<sup>22</sup> Tə tsəne na, kwayaŋŋa tə gər ha kwalalaŋ i yam ta bəba tay, tə pay bəzay a Yesu.

*Yesu ta ndo hay haladzay*

*Luka 6.17-19*

<sup>23</sup> Yesu a həhalawa ka dala i Galile tebiye. A tətikawatay a ndo hay mə gay i maḁuwule me i Yahuda hay. A dəwa ha Labara Ŋgwalak eye i Bəy i Mbəlom ada a mbələwa tay ha ndo i dəvats hay ta ndo neheye matəra eye hay tebiye mə walaŋ i ndo hay.

<sup>24</sup> Labara i Yesu a da zləm kwa ka dala i Siri tebiye. Tə həlayaw ndo neheye faya ta siye dəretsətseh ta dəvats hay wal wal aye, ndo neheye fakalaw mə bo tay aye, ndo neheye mahorvov a gatay aye, ada ta ndo neheye matəra eye hay. Yesu a mbəl tay ha.

<sup>25</sup> Ndo hay haladzay mbərzəzza tə paway bəzay a Yesu. Ti yaw ma Galile, ma dala i Dekapol, ma Zerozelem, abəra ka dala i Yahuda ada ka dala nakə ma diye ŋged i magayam i Yurdum aye.†

\* **4:16** Ezay 8.23-9.1. † **4:25** Gəma niye na, ta diye i bəzay i dəlöv i Galile.

## 5

*Yesu a da ha bazlam mæ gær i mahamba*

<sup>1</sup> Yesu a ngatay a ndo hay haladzay ta diye naha ka tæv ngay na, a tsal ngway a gær i mahamba. A ye naha a ndza ka dala. Gawla ngay hay ta zəngal na ti ye ka tæv ngay.

<sup>2</sup> A dazlay matətikatay, a gwadatay:

*Ngama i Mbəlom**Luka 6.20-23*

<sup>3</sup> «Məngwese ka ndo neheye tæ sær ha mæ dærev tay nəteye mətawak eye hay aye, hærwi Bəy i Mbəlom na, i nəteye.

<sup>4</sup> «Məngwese ka ndo neheye faya ta tuwiye, hærwi Mbəlom ma matay naha dærev.

<sup>5</sup> «Məngwese ka ndo neheye ta rəh ha gær tay aye, hærwi nəteye na, Mbəlom ma vəlateye mändzibəra.

<sup>6</sup> «Məngwese ka ndo neheye may a wur fataya ada yam a gatay aye hærwi marəhe ha gær a Mbəlom, hærwi Mbəlom ma vəlateye wu nakə a satay aye.

<sup>7</sup> «Məngwese ka ndo neheye faya ta giye ngwalak a siye i ndo hay aye, hærwi Mbəlom ma gateye a dəma ngwalak dərma.

<sup>8</sup> «Məngwese ka ndo neheye dærev tay tsədəŋŋa kame i Mbəlom aye, hærwi nəteye na, ta ngateye a Mbəlom.

<sup>9</sup> «Məngwese ka ndo neheye nəteye faya ta miye tay ha ka bə ndo hay hærwi ada tā ndza zay aye, hærwi Mbəlom ma zalateye na, wawa ga hay.

<sup>10</sup> «Məngwese ka ndo neheye faya ta sateye dæretsətseh hærwi nakə faya ta giye məsler nakə a yay a gær a Mbəlom aye, hærwi Bəy i Mbəlom na, i tay.

<sup>11</sup> «Məngwese ka nəkurom tadə ndo hay ta tsadakum, ta sakum dæretsətseh, ada tadə faya ta tsikiye fakuma wu neheye ngwalak eye bay ada ta rawiye fakuma me hærwi nakə ka dzalum ha ka neŋ aye.

<sup>12</sup> Ngwasum haladzay, dærev kurom mæ rah ta məngwese, hærwi Mbəlom ma ta vəlakumeye magogoy kurom bagwar eye mæ mbəlom. Sərum ha na, andza niye ta gatay dæretsətseh a ndo mæde ha bazlam i Mbəlom neheye tæ lahakumaw aye.»

*Dzeke i sluwal tæ dzaydzay**Markus 9.50; Luka 4.34-35*

<sup>13</sup> Yesu a gwadatay sa: «Nəkurom ka tərur ka mändzibəra na, andza sluwal nakə a vəd ma ala aye. Ane tuk na, tadə sluwal a vəd sa bay na, ta sliye matere ha mæ vəd hərəbəba sa na, ma kəkay? Ma giye ngama ka wuray sa bay. Ta kutsiye ha, ndo hay ta mbərasliye na tæ sik.

<sup>14</sup> «Nəkurom na, dzaydzay i mändzibəra. Hudgay nakə ta dæzl na ma tsaholok aye na, ma ngahiye bo tæta bay.

<sup>15</sup> Ta pa ako ka lalam na, ta hurəkwiye faya gæse bay. Ta piye na düh na, ka wu məpe lalam hærwi ada mæ dəvatay a ndo neheye mæ gay aye tebiye.

<sup>16</sup> Andza niye dərma, mede kurom mæ zəba kame i ndo hay andza dzaydzay nakə ma dəvateye a ndo hay aye, hærwi ada siye tā ngatay a ngwalak nakə faya ka gumeye ada tā zambaday a Bəba kurom mæ mbəlom.»

*Yesu tæ bazlam i Musa mapala eye*

<sup>17</sup> Yesu a gwadatay sa: «Kā dzalum mæ gær kurom na yaw na, hærwi məmbete ha bazlam i Musa mapala eye tæ matətike i ndo mæde ha bazlam i Mbəlom hay bay. Na yaw hærwi məmbete ha bay. Ane tuk na, na yaw na,

mandëve ha wu nakə bazlam i Musa mapala eye ada wu nakə ndo i maslanj i Mbəlom hay tə tsik mäge aye duh.

<sup>18</sup> Hərwi niye neñ faya na tsikakumeye, sərüm ha, kə ge mägərbməlom ta dala nətey andaya huya na, ndəray ma sliye məmbete ha wuray kwa tsekweñ abəra mə bazlam mapala eye bay. Kwa “i”, kəgəbay wu nakə mawatsa eye tsekweñ bəbay na, ma mbatiye bay, wu tebiye ma giye bo təday.

<sup>19</sup> Hərwi niye, ndoweye kə gər ha bazlam mapala eye nəte, kwa tsekweñ eye, ada faya ma dətay ha a ndo hay tã ge andza neñgeye na, neñgeye ma təriye tsekweñ ma Bəy i Mbəlom. Ane tuk na, tadə ndoweye ka rəhay ha gər a bazlam mapala ada ka tətikatay a siye i ndo hay tã rəhay ha gər dərma na, neñgeye ma təriye bagwar eye ma Bəy i Mbəlom.

<sup>20</sup> Hərwi niye neñ faya na gwadumeye sa: Kə ge ka rəhumay ha gər a bazlam i Musa mapala eye a zə i ndo neheye tə dzanğawa bazlam i Mbəlom mapala eye ta Farisa hay bay aye na, ka deyumeye a Bəy i Mbəlom bay.»

*Yesu a tsik ka mäge mevel*

*Luka 12.57-59*

<sup>12</sup> Yesu a gwadətay sa: «Nəkurom na, ka tsənum wu nakə tə tsikatay a bəba tətə kurom hay aye. Tə gwadətay na: “Kã kəf gər i ndo bay. Ndowneye kə kəf gər i ndo na, ta diye ha kame i sariya.\*”

<sup>22</sup> Ane tuk na, neñ faya na gwadakumeye: Tadə ndoweye kə ge mevel ka malamar ŋgay na, da ta diye ha kame i ndo mäge sariya. Tadə ndoweye kə gwaday a malamar ŋgay: “Nəkar matərakahañ eye” na, da ta diye ha kame i ndo mələve dala hay, ta geye sariya. Ada tadə ndoweye kə gwaday a malamar ŋgay: “Nəkar ka dze” na, ta kaliye ha a ako naka dādə ma mbatiye bay aye.

<sup>23</sup> «Agəla a saka mələtse məvəle wu a Mbəlom, a həlay niye wetete a makaw a gər zəgəle andaya ka bo ta malamar yak na,

<sup>24</sup> gər ha wu yak niye kame i təv məvəlay wu a Mbəlom. Do, ta pəsum ha a bo təday, zay mǎ ge mə walañ kurom ada maw, vəlay wu a Mbəlom tuk.

<sup>25</sup> «Tadə ka gum a bo wuray ta ndo, nəkurom ka tsəved faya ka deyumeye a sariya na, mum ha ka bo bazlam, sərüm bo bəna, mǎ ye kar ha kame i ndo mäge sariya təday bay. Hərwi ki ye kar ha ka təv i ndo mäge sariya hay na, ta vəlay kar ha a həlay i sidzew hay. Ta kaliye kar ha a danğay.

<sup>26</sup> Faya na gwadakeye: Sər ha na, kə ge ka hama suloy nakə kutoñ məheme, ka vəl ha bay na, ka deyeweye abəra ma danğay bay.»

*Yesu a tsik ka mäge madama*

*Mata 18.8-9; Markus 9.43,47-48*

<sup>27</sup> Yesu a gwadətay sa: «Nəkurom na, ka tsənum, tə gwad: “Kã ge madama bay.†”

<sup>28</sup> Ane tuk na, neñ faya na gwadakumeye: Ndowneye ka zəba ka ŋgwas, kə ge faya dərə a say a bor i bo ŋgay na, ba kə ge madama mə dərəv ŋgay ta ŋgwas eye niye tsiy.

<sup>29</sup> Kə ge dərə i həlay i mənday yak ma dədiye kar ha a mezeleme na, ŋgwad na ada kã kal ha dərəñ abəra tə nəkar. Nğama vərəzl i bo yak nəte mǎ dze tə bəmalə nakə ta kaliye ha bo yak tebiye a ako aye.

<sup>30</sup> Kə ge həlay i mənday yak ma dədiye kar ha a mezeleme na, dəs na ada kã kal ha dərəñ tə nəkar. Nğama vərəzl i bo yak nəte mǎ dze tə bəmalə nakə bo yak tebiye ma diye a ako aye.»

\* 5:21 Madayaw abəra ma Ezipt 20.13; Bazlam mapala eye masulo eye 5.17. † 5:27 Madayaw abəra ma Ezipt 20.14.

*Yesu a tsik ka mahəhere ŋgwas*

*Mata 19.7-9; Markus 10.4-5,10-12; Luka 16.18*

<sup>31</sup> Yesu a gwadatay sa: «Ahəl niye, tə gwad sa: “Tadə ndoweye kə say mahəhar na ŋgwas ŋgay na, kutoŋ mâ watsay dərewel i mahəhere a həlay.†”

<sup>32</sup> Ane tuk na, neŋ faya na gwadumeye: Ndowneye ka həhar na ŋgwas ŋgay kəriye kə ge madama bay na, ki ye a zal na, nengeye a tərə ha ndo mäge madama. Ada ndo nakə a zla ŋgwas nakə ta həhar na aye bəbay kə ge madama.‡»

*Yesu a tsik ka məmbede*

<sup>33</sup> Yesu a gwadatay sa: «Nəkurom ka tsənum wu nakə tə tsikatay ahəl niye a bəba tətə kurom hay aye. Tə gwad: “Kâ mbaďa tə parasay eye bay. Ane tuk na, wu nakə ka mbaďa kame i Mbəlom ka gwad ka giye na, ge na.\*»

<sup>34</sup> Ane tuk na, neŋ faya na gwadakumeye: Kâ mbaďum bay tebiye. Kâ mbaďum ta mbəlom bay hərwi Mbəlom mandza eye na, mə dəma.

<sup>35</sup> Kâ mbaďum ta dala bay hərwi dala na, təv məpe sik i Mbəlom. Kâ mbaďum ta Zerozelem bay hərwi Zerozelem na, wuzlahgəma i Bəy bagwar eye.

<sup>36</sup> Kâ mbaďa tə gər yak bay, hərwi ka sliye faya matəre ha məkwets i gər yak kudekudek kəgəbay zenzen na, ka sliye faya bay.

<sup>37</sup> Kə ge ayaw na, gwadum ayaw! Kə ge a'ay na, gwadum a'ay dekdək tsa. Wu nakə ta səkah ha faya sa aye na, a yaw abəra mə Fakalaw.»

*Kâ mum ha sewed tə sewed bay*

*Luka 6.29-30*

<sup>38</sup> Yesu a gwadatay sa: «Nəkurom na, ka tsənum wu nakə tə tsik ahəl niye aye. Tə gwad: “Tadə ndoweye ka huyaslay ha dərə a ndo na, ta huyaslay ha a dəma dərma, ada ndoweye kə həbay ha zler a ndo na, ta həbay ha a dəma zler dərma.†”

<sup>39</sup> Ane tuk na, neŋ faya na gwadakumeye: Tadə ndoweye kə gakum sewed na, kâ mumay ha a dəma bay. Duħ tadə ndoweye kə faka ka maholom i həlay i mənday na, mbəday ha maholom i həlay i gula dərma mə faka faya.

<sup>40</sup> Tadə a say a ndoweye mede kar ha kame i ndo mäge sariya hərwi məzle fakaya abəra məkelkabo yak wawa eye na, gəray ha faya kələmedze eye, mə zla na dərma.

<sup>41</sup> Tadə a say a ndoweye məgaka kutoŋ, a gwadaka: “Zleŋ na wu ga anar a mba daladal” na, səkahay ha faya zlay na dərəŋ lele.

<sup>42</sup> Ndowneye ka tsətsah fakaya wu na, vəlay. Ndowneye ka tsətsah fakaya gwedere i wu na, kâ kərahay ha bay, vəlay.»

*Mawudə bo ta ndo mənə dərə yak*

*Luka 6.27-28,32-36*

<sup>43</sup> Yesu a gwadatay sa: «Ka tsənum wu nakə tə tsik ahəl niye aye, tə gwad: “Wudə ndo i maged yak, nay dərə a ndo mənə dərə yak.†”

<sup>44</sup> Ane tuk na, neŋ faya na gwadumeye: Wudum ndo mənə dərə kurom hay. Duwulumay me a Mbəlom hərwi ndo neheye faya ta sakumeye dərətsətsəh aye.

<sup>45</sup> Ka gum andza niye na, ka tərumeye wawa i Bəba kurom Mbəlom nengeye mə mbəlom. Hərwi pat ŋgay a dəvatay a ndo i sewed hay ada a dəvatay a ndo

‡ 5:31 Bazlam mapala eye masulo eye 24.1. § 5:32 Levitik 18.6-18; Məsler hay 15.20, 29. \* 5:33 Levitik 19.12; Məpesle 30.3; Bazlam mapala eye masulo eye 23.22-24. † 5:38 Madayaw abəra mə Ezipt 21.23-25; Levitik 24.19-20; Bazlam mapala eye masulo eye 19.21. ‡ 5:43 Levitik 19.18.

i ɲɠwalak hay. A pa yam ɲɠay hærwi ndo neheye mede tay lele aye ada hærwi ndo neheye mede tay lele bay aye dærmak.

<sup>46</sup> Tadã agana ka wudum na, ndo neheye ta wuda kurom aye dækdek na, magogoy waray nakã Mbælom ma vëlakumeye? Kwa ndo matsekele dzanɠal hay tã ge a ze i kurom.

<sup>47</sup> Ada tadã faya ka tsikumateye me a malamar kurom hay dækdek na, ada wu nakã ka gum a ze ndo hay aye na, wuye mey? Kwa ndo neheye tã sær Mbælom bay aye na, tã ge a ze i kurom.

<sup>48</sup> Tærum na, ndo ɲɠwalak eye hay mã wu hay tebiye andza Bæba kurom mã mbælom, neɲgeye ɲɠwalak eye.»

## 6

### *Mævæle wu na, kækay?*

<sup>1</sup> Yesu a gwadatay sa: «Gum metsehe! A sakum mæge wu nakã bazlam mapala eye a tsætsah fakuma gum aye na, kã gum kame i ndo hay tebiye bay hærwi ada tã zæba fakuma bay. Ka gum andza niye bay na, Bæba kurom mã mbælom ma vëlakumeye magogoy kurom bay.

<sup>2</sup> «A saka mævæle wu a ndo i mætawak na, kã vëlay parakka kame i ndo hay bay. Ndo i bæbærek hay tã vëlawã andza niye mã gay i maðuwwule me ada ka mazlazlan i tsæved aye hay. Næteye ta pæla ndo hay tã dæslatay ha gær. Faya na gwadakumeye: Næteye na, ba ta huta magogoy tay tsiy.

<sup>3</sup> Nækar na, tadã ka vëleye wu a ndo i mætawak tã hælai i mænday na, hælai i gula yak mã sær faya bay.

<sup>4</sup> Andza niye, wu nakã ka vëliye na, vël ta mækal. Bæba yak Mbælom a ɲɠatay a wu nakã ka vël ta mækal aye. Neɲgeye ma vëlakeye magogoy.»

### *Maðuwwule me*

<sup>5</sup> Yesu a gwadatay sa: «Ahël nakã ka dūwulumeye me a Mbælom aye na, kã gum andza i ndo i bæbærek hay bay. Næteye na, ta wuda maðuwwule me mã gay i maðuwwule me ta mælætse ada ka mazlazlan i tsæved hærwi ada ndo hay tebiye tã ɲɠatay. Neɲ faya na gwadakumeye: Særum ha, næteye na, ba ta huta magogoy tay tsiy.

<sup>6</sup> Ane tuk na, nækar na, ahël nakã a saka maðuwwulay me a Mbælom aye, do a gay i mæhæne yak. Dæræzl ka bõ ada dūwulay me a Bæba yak Mbælom. Kwa nækar maɲɠaha eye abæra ka ndo hay na, neɲgeye andaya tã nækar ma vëlakeye magogoy yak.

<sup>7</sup> Ahël nakã faya ka dūwulumeye me na, kã dūwulum vædvæd haladzay andza i ndo neheye tã sær Mbælom bay aye bay. Tã dzala mã gær tay ta dūwulay me a Mbælom vædvæd haladzay na, Mbælom ma tsæniye tay na.

<sup>8</sup> Kã gum andza næteye bay, hærwi Mbælom Bæba kurom ba kã sær ha wu nakã a sakum aye kwa ahël nakã ka tsætsah zuk bay aye.»

### *Bæba may*

#### *Luka 11.2-4*

<sup>9</sup> Yesu a gwadatay sa: «Ka dūwulumeye me na, gwadum andza nakay: Bæba may nakã mã mbælom aye,

kwa way mã sær ha, mæzele yak na, tsædanɲa.

<sup>10</sup> Bæy yak mã yaw a walan may.

Wu nakã a saka aye mã ge ka mændzibæra andza nakã mã mbælom aye dærmak.

<sup>11</sup> Vælamay wu mænday nakã ma slameye bægom aye.

<sup>12</sup> Pæsamay ha mænese

andza nakə nəmay bəbay nəmaa pəsətay ha a ndo neheye tə gamay mənese aye.

<sup>13</sup> Tsəpa may, hərwi ada Fakalaw mâ səpat may bay.

Ane tuk na, təməmay ahaya abəra mə həlay i Fakalaw.

[Hərwi nəkar na, Bəy ka gər i bəy, nəkar gədanj ada nəkar məzlaḅ eye ka tor eye.

Amen!]

<sup>14</sup> «Andza niye, tadə kə pəsumatay ha mənese a ndo neheye tə gakum mənese aye na, Bəba kurom mə mbəlom ma pəsakumeye ha dərmak.

<sup>15</sup> Ane tuk na, ka pəsumatay ha mənese a ndo neheye tə gakum mənese aye bay na, Bəba kurom Mbəlom ma pəsakumeye ha mənese kurom bay dərmak.»

### *Daliyam*

<sup>16</sup> Yesu a gwadatay sa: «Tadə faya ka gumeye daliyam na, kâ gum andza ndo i bəbəkək hay bay. Nəteye na, ta mbədawa ha dərə tay andza ta mətiye hərwi ada ndo hay tâ zəba fataya nəteye faya ta giye daliyam. Faya na gwadumeye: Sərum ha nəteye na, ta huta magogoy tay tsiy.

<sup>17</sup> Ane tuk na, a saka ka giye daliyam na, bara dərə ada fadā mal ka məkwets i gər yak lele.

<sup>18</sup> Andza niye, ndo hay ta səriye ha nəkar faya ka giye daliyam bay. Ane tuk na, Bəba yak nakə mändza eye ma təv maŋgaha eye neŋgeye nəte ŋgewej a sər ha. Faya ma ŋgateye a wu nakə maŋgaha eye faya ka giye aye. Ada mata vəlaka magogoy yak na, neŋgeye.»

### *Zlele nakə mə mbəlom aye*

#### *Luka 12.33-34*

<sup>19</sup> Yesu a gwadatay sa: «Kâ hayumay gər a zlele ka mändzibəra bay hərwi mətul hay ta reŋgez ta nasiye ha tebiye. Məkal hay bəbay ta sləiye gay kurom hay ta həliye zlele niye.

<sup>20</sup> Hayumay gər a zlele kurom na, a mbəlom. Mə dəma na, mətul hay ta reŋgez ta nasiye ha bay, məkal hay ta sliye faya mede makəle ahaya bay.

<sup>21</sup> Hərwi dərev yak mandza eye na, ma təv nakə zlele yak mə dəma aye.»

### *Dzaydzay ta ləvonj*

#### *Luka 11.34-36*

<sup>22</sup> Yesu a gwadatay sa: «Dərə yak na, andza lalam ma dəviye dzaydzay a bo yak tebiye. Tadə dərə yak a zəba kwetseh kwetseh lele na, bo yak kətsek mə dzaydzay.

<sup>23</sup> Ane tuk na, tadə dərə yak lele bay na, bo yak kətsek ma ləvonj. Yaw, tadə dzaydzay mə nəkar kə mbata na, nəkar mandza eye ma ləvonj zəjzəj eye.»

### *Mbəlom ta suloy*

#### *Luka 16.13*

<sup>24</sup> Yesu a gwadatay sa: «Ndəray ma sliye məge məsler a ndo i gay ŋgay hay sulo bay. Hərwi pat neŋged na, ma geye sewed a ndo ŋgay neŋged, ma wudiyə na neŋged lele. Kəgəbay ma gəseye me a ndo neŋged, a ndo neŋged ma gəseye me bay tebiye. Nəkurom bəbay, ka slumeye faya məge məsler a Mbəlom ada a suloy sulo sulo bay.»

### *Məpe mədzał gər ka Mbəlom*

#### *Luka 12.22-31*

<sup>25</sup> Yesu a gwadatay sa: «Hərwi niye, neŋ faya na tsikakumeye: Kâ dzalum gər hərwi wu mənday kəgəbay hərwi wu məsay, kəgəbay hərwi peteked bay. Hərwi məsəfəre na, a ze wu mənday ada bo kurom na, a ze peteked segey.

<sup>26</sup> Zəbum ka diyen hay təday. Ta sləga bay, tə pala wu tay tə hayay gər a wuray a de bay. Ane tuk na, Bəba kurom mə mbəlom faya ma vəlateye wu mənday. Nəkurom na, ka zum tay ha diyen ha haladzay.

<sup>27</sup> «Way nakə mə walaŋ kurom ma sliye faya masəkah ha məndze ŋgay ka məndzibəra ta mədzele gər ŋgay nakə faya ma dzaliye aye na, way?

<sup>28</sup> Faya ka dzalumeye ka petekəd na, hərwi mey? Zəbum ka məvurze i guzer hay mə pesl təday. Tə ge məsler bay, tə ŋgar petekəd bay.

<sup>29</sup> Faya na gwadəkumeye, kwa Salomonj nakə zlele eye haladzay aye, daḍa kə pa ka bo petekəd andza məvurze i guzer niye hay bay.

<sup>30</sup> Andza niye Mbəlom na, faya ma pateye ka bo petekəd a guzer hay ka bəgom nakay. Tədə na, guzer niye hay ta kuliyə. Ta kula na, ta kaliye tay ha a ako. Kə ge andza niye na, nəkurom duh Mbəlom ma pakumeye petekəd ka bo ma ziye i guzer hay bəḍaw? Kwa a nəkurom neheye mədzal gər tsekweŋ aye bəḍaw!

<sup>31</sup> «Kā gwadum: Nəmaa ndiye mey? Nəmaa siye mey? Nəmaa piye ka bo mey na, kə dzalum bay.

<sup>32</sup> Maa pəla wu neheye na, ndo neheye tə sər Mbəlom bay aye. Ane tuk na, Bəba kurom mə mbəlom a sər wu nakə a sakum aye.

<sup>33</sup> Lahum mapəle na, Bəy i Mbəlom təday ada tə wu nakə a yay a gər a Mbəlom aye. Mə vəlakumeye siye i wu hay tebiye sa.

<sup>34</sup> «Kā dzalum ka wu nakə tədə aye bay. Tədə na, ma dzaleye a gər ŋgay. Ka pat məsləlaw na, dəretsətseh ŋgay eye da.»

## 7

### *Kā gumatay sariya a ndo hay bay*

*Luka 6.37-38,41-42*

<sup>1</sup> Yesu a gwadatay sa: «Kā gumatay sariya a ndo hay bay hərwi ada Mbəlom mə gakum sariya bay dərmak.

<sup>2</sup> Hərwi Mbəlom ma gakumeye sariya andza nakə faya ka gumateye a siye i ndo hay aye dərmak. Ma ləvakumeye wu tə wu nakə ka ləvawumatay wu a ndo hay aye.

<sup>3</sup> Nəkar na, ka ŋgatay a tsakwal mə dəre i malamar yak. Ane tuk na, mayako nakə mə dəre yak aye ka ŋgatay bay na, hərwi mey?

<sup>4</sup> Ma kəkay nakə ka sliye məgwaday a malamar yak: “Malamar ga, ehe gər ga ha nā zlaka ahaya tsakwal abəra mə dəre yak”, ada duh mə dəre yak eye na, mayako galawwa.

<sup>5</sup> Nəkar ndo i bəbərek, lah faya məzle ahaya mayako abəra mə dəre yak təday ada ka ŋgateye a dəre kwetseh kwetseh. Ka zlaya ahaya tsakwal abəra mə dəre i malamar yak tuk.

<sup>6</sup> «Wu nakə tsəḍaŋŋa eye na, kə vəlummatay a kəra hay bay. Ka vəlummatay na, ta mbədiye gər fakuma, ta ŋguradiye kurom ha. Wu i maslawa kurom hay na, kə kutsumatay ha a məḍaras hay bay bəna ta hatsakumeye faya tə sik.»

### *Tsətsahum, pəlum, fumay a maged*

*Luka 11.9-13*

<sup>7</sup> Yesu a gwadatay sa: «Tsətsahum, ta vəlakumeye, pəlum, ka hutumeye, fumay a maged, ta həndəkakumeye abəra ma maged.

<sup>8</sup> Hərwi kwa way ka tsətsah na, ta vəleye, kwa way ka pəla na, ma hutiye, ada kwa way kə fay a maged na, ta həndəkeye abəra ma maged.

<sup>9</sup> «Way mə walaŋ kurom tadə wawa ŋgay a tsətsah faya wu mənday na, ma vəleye kwar daw?

10 Kægəbay a tsətsah fakaya kələf na, ka vəleye dədəwə dāw?

11 Nəkurom neheye sadzak ηgwalak eye hay bay aye ka sərūm məvələ wu ηgwalak eye hay a wawa kurom hay dūh tuk na, ada Bəba kurom mə mbəlom ma siye məvələ wu ηgwalak eye a ndo neheye ta tsətsah faya aye bədaw?»

*Wu nakə bazlam mapala eye a tsik aye*

12 Yesu a gwadatay sa: «Wu nakə a sakum ndo hay tā gakum aye na, gumatay a siye i ndo hay. Nakay na, wu nakə bazlam i Musa mapala eye ta dərēwel i ndo mədə ha bazlam i Mbəlom hay faya ta tətikateye a ndo hay aye.»

*Tsəved hay sulo*

*Luka 13.24*

13 Yesu a gwadatay sa: «Fələkum ta maged nakə hala bay aye. Hərwi maged nakə zlabatam eye ada tsəved nakə a wur bo mede tə dəma bay aye na, tsəved mede ha ndo a mədze. Ndo neheye faya ta diye tə dəma aye na, nəteye haladzay.

14 Ane tuk na, maged nakə hala bay aye na, ma diye ha ndo a sifa. Tsəved mede tə dəma na, a wur bo haladzay. Ndo neheye faya ta diye tə dəma aye na, nəteye haladzay bay.»

*Dərizl i gərdaf ta hohway ηgay eye hay*

*Luka 6.43-44*

15 Yesu a gwadatay sa: «Gum metsehe ta ndo neheye tə gwad nəteye ndo mədə ha bazlam i Mbəlom aye. Ta deyeweye a walaη kurom andza təbaη hay. Azlakwa bay mə hud i bo tay na, nəteye andza kəra i pesl neheye tereηgez eye haladzay aye.

16 Ka sərūmeye tay ha ka bo abəra na, ta məsler tay nakə faya ta giye aye. Ka slumeye faya maηgəle hohway i werepezl abəra ka dərizl i gərdaf i dak dāw? Ada ka slumeye faya maηgəle hohway i gurov abəra ka dərizl i gərdaf i tsetsiv dāw?

17 Andza niye, dərizl i gərdaf nakə ηgwalak eye na, ma wiye hohway ηgwalak eye hay. Ane tuk na, dərizl i gərdaf dəvats eye na, ma wiye hohway ηgwalak eye bay dərmaκ.

18 Dərizl i gərdaf ηgwalak eye na, ma wiye hohway i dərizl i gərdaf dəvats eye bay, ada dərizl i gərdaf dəvats eye na, ma wiye hohway i dərizl i gərdaf ηgwalak eye bay.

19 Dərizl i gərdaf nakə ma wiye hohway ηgwalak eye bay aye na, ta dəsiye na ada ta kutsiye ha a ako.

20 Andza niye, ka sərūmeye ha ka bo abəra ndo mədə ha bazlam i Mbəlom ta parasay eye na, ta məsler tay nakə faya ta giye aye.»

*Dada na sər kurom ha bay*

*Luka 13.25-27*

21 Yesu a gwadatay sa: «Sərūm ha, ndo neheye faya ta tsikerəye: “Bəy Maduweη, Bəy Maduweη” tə bazlam aye na, ta diye tebiye a Bəy i Mbəlom bay. Mata de na, ndo neheye faya ta giye wu nakə a say a Bəba ga mə mbəlom aye.

22 Ahəl nakə aza na deyeweye məgatay sariya a ndo hay aye na, ndo hay haladzay ta gwederəye: “Bəy Maduweη, Bəy Maduweη, nəmaa də ha bazlam i Mbəlom ta məzele yak, nəmaa həhar fakalaw abəra ka ndo hay ta məzele yak, nəmaa ge masuwayaη hay haladzay ta məzele yak bədaw?”



<sup>23</sup> Yaw, na tsikateye parakka: “Daɗa na sər kurom ha bay, nakurom neheye ka gawum mənese aye, dum abəra ka tɔv ga.”»

### *Gay hay sulo*

*Luka 6.47-49*

<sup>24</sup> Yesu a gwadatay sa: «Andza niye, kwa way kə tsəne bazlam neheye ada ka rəhay ha gər na, neŋgeye a ndzakit bo ndo nakə a tsah, a dɔzl gay ŋgay ka pələf aye.

<sup>25</sup> Yam a pa, mazaw a rah a magayam, mətasl a vɔzl ta gədaŋ ada mazaw ta mətasl ti yaw ta gədaŋ ka gay niye. Ane tuk na, ka mbəzl bay hərwi mədok eye mapa eye lele ka pələf.

<sup>26</sup> Ane tuk na, kwa way kə tsəne bazlam, ada ka rəhay ha gər bay na, neŋgeye a ndzakit bo ndo i matərakahaŋ nakə a dɔzl gay ŋgay ka hewiyerŋ aye.

<sup>27</sup> Yam a pa, mazaw a rah a magayam, mətasl a vɔzl ta gədaŋ ada ti yaw ka gay niye ta gədaŋ. Gay niye a mbəzl hele hele.»

<sup>28</sup> Ahəl nakə Yesu a ndəv ha mətəsike me ŋgay aye na, matətike ŋgay niye a gatay hərbaɓəkka a ndo neheye ka tɔv ŋgay aye tebiye.

<sup>29</sup> Hərwi neŋgeye na, a tsikatay andza i ndo neheye tɔ dzaŋgawa bazlam i Mbəlom mapala eye bay, neŋgeye a tsik ta mɔzlaɓ i Mbəlom.

## 8

### *Yesu a mbəl ha ndo madəgwada eye*

*Markus 1.40-45; Luka 5.12-16*

<sup>1</sup> Ahəl nakə Yesu a mbəzlaw abəra mə mahəmba aye na, ndo hay haladzay tɔ pay bəzay.

<sup>2</sup> Ahəl nakə faya ta diye na, ndo wuray madəgwada eye a həndzəd naha ka tɔv ŋgay, a dəkway gurmets a huvo, a gwaday: «ŋgalaka, taɗə kə saka na, ka sliye faya matəre ga ha tsədaŋŋa.»

<sup>3</sup> Yesu a nduɗa ha həlay ŋgay, a lamay. Tsa na, a gwaday: «A seŋ na, tɔra tsədaŋŋa!» Kwayaŋŋa ndo madəgwada eye niye a tɔra tsədaŋŋa.

<sup>4</sup> Tsa na, Yesu a gwaday: «Tsəne lele: Kā tsik wu nakay a ndaray bay. Ane tuk na, do ta bəzay ha bo a ndo məvələway wu a Mbəlom ada vəl wu nakə Musa a tsik aye hərwi mədatay ha a ndo hay tebiye na, ka tɔra tsədaŋŋa.»

### *Yesu a mbəl ha ndo i məsler i bagwar i sidzew i Roma*

*Luka 7.1-10*

<sup>5</sup> Yesu a ndisl a Kafernahum. Bagwar i sidzew i Roma hay a həndzəd naha ka tɔv ŋgay, a tsətsah faya madzəne,

<sup>6</sup> a gwaday: «Bəy Maduwerŋ, ndo i məsler ga mahəna eye mətagay. Neŋgeye ɗəvats eye, ka tɔra, a wur faya haladzay.»

<sup>7</sup> Yesu a mbəɗay faya, a gwaday: «Na diye na mbəliye ha.»

<sup>8</sup> Bagwar i sidzew niye a gwaday: «Bəy Maduwerŋ, neŋ na sla ɗa nəkar kə ye a gay ga bay. Ane tuk na, ka tsik bazlam yak nəte na, ndo i məsler ga ma mbəliye.

<sup>9</sup> Neŋ na, faya na rəhay ha gər a bagwar ga ada sidzew ga hay ta rəheŋ ha gər dərmaɓ. Na gwaday a ndo nəte mə walaŋ tay “Do!” na, ma diye. Na gwaday a ndo neŋged “Dara!” na, ma deyeweye. Na gwaday a beke ga “Ge nakay!” na, ma giye.»

<sup>10</sup> Yesu a tsəne bazlam ŋgay neheye na, a yay a gər haladzay, a gwadatay a ndo neheye faya ta pay bəzay aye: «Neŋ faya na tsikakumeye, sərɔm ha, ɗaɗa na ndzay a gər a ndo ta mədzal gər eye haladzay andza nakay ma slala i Israyel hay bay.

11 Sərum ha na, ndo hay haladzay ta deyeweye abəra mə bəzay i mbəlom ada abəra ma mægəma, ta ndiye ka bo wu mənday ta Abraham, ta Izak ada ta Zakob ma Bəy i Mbəlom.

12 Ane tuk na, ndo neheye haḅe ta diye a Bəy i Mbəlom aye na, ta kutsiye tay ha abəra, a ləvonj. Mə dəma na, ta tuwiye tə mahəpəde zler eye.\*»

13 Tsa na, Yesu a gwadəy a bagwar i sidzew niye: «Do wu yak a mətəgay. Hərwi wu nakə ka dzala ha aye na, ma giye bo.» A həlay niye, kwayanḅa ndo i məsler i sidzew niye a mbəl.

*Yesu a mbəl ha mese i Piyer ada tə siye i ndo i dəvats hay*

*Markus 1.29-34; Luka 4.38-41*

14 Ma dəba eye na, Yesu a ye a gay i Piyer. A ye naha a ndzay a gər a mese i Piyer ḅgwas eye mahəna eye, marəbarəḅ a gay.

15 Yesu a ye ka təv ḅgay, a ye naha a lamay həlay. Tsa na, marəbarəḅ a ndala faya abəra, a lətse, a gay mbəlok a Yesu.

16 Huwa a ge na, tə həlaw ndo neheye fakalaw mə bo tay aye a Yesu. A həhar fataya abəra fakalaw niye hay tə bazlam ḅgay. A mbəl tay ha ndo i dəvats hay tebiye dərmaḅ.

17 Andza niye, Yesu a ge na, wu nakə Ezay ndo məde ha bazlam i Mbəlom a tsik ahəl niye, a gwadə:

«Kə zla fakwaya abəra bəle kway,

ada kə zla fakwaya abəra dəvats kway hay.†»

*Ndo neheye a satay məpay bəzay a Yesu aye*

*Luka 9.57-62*

18 Yesu a zəba faya ndo hay haladzay ka təv ḅgay na, a gwadətay a gawla ḅgay hay: «Takwa ka me i dəlov, a diye neḅged.»

19 Tə həl bo, ta diye na, ndo mədzanḅgawa bazlam i Mbəlom mapala eye a həndzəd naha ka təv ḅgay, a gwadəy: «Miter, kwa a ḅgay ka diye na, na pakeye bəzay.»

20 Yesu a mbədəy faya: «Mezerew hay na, bəd tay andaya hərwi məhəne mə dəma, diyeḅ hay dərmaḅ gay tay andaya. Ane tuk na, neḅ Wawa i Ndo na, təv ga andaya nakə na həniye mə dəma hərwi mazəzukwe bo aye bay.»

21 Ndo nəte mə walaḅ i gawla i Yesu hay a gwadəy: «Bəy Maduweḅ, vələḅ tsəved nə ye, nə la na bəba ga təday.»

22 Yesu a mbədəy faya: «Peḅ bəzay, gər ha mədahəḅ hay tə la bo tay.»

*Yesu a gay me a mətasl*

*Markus 4.35-41; Luka 8.22-25*

23 Yesu a tsal a kwalalaḅ i yam na, gawla ḅgay hay tə pay bəzay.

24 Ahəl nakə faya ta diye, tə husa a wuzlah i dəlov aye na, kwayanḅa mətasl bagwar eye a ge haladzay. Yam a tsal ka bo dəḅgwala haladzay. Kə sər mede ha kwalalaḅ i yam a hud i yam. Ane tuk na, Yesu na, neḅgeye mandzahəra eye.

25 Gawla ḅgay hay ta həndzəd naha ka təv ḅgay, ta pədeke ha, tə gwadəy: «Bəy Maduweḅ, təma may ha tey? Nəkway faya ka dzakweye.»

26 Tsa na, Yesu a gwadətay: «Ka dzədzarum andza niye na, hərwi mey? Nəkurom na, məpe mədzal gər a kətsakum.»

A lətse, a gay me a mətasl ta yam. Tsa na, tə ndza dədik.

\* 8:12 Bazlam nakay a say mægweḅe na, andza nakay: Ndo neheye ta ndziye ma bəra aye na, dərev ma ndalateye, ada ta giye sələk hərwi ta ḅgateye a məndze ḅgwalak eye i dzam i Mbəlom hay. † 8:17 Ezay 53.4.

<sup>27</sup> A gatay hərbəbəkka a ndo hay tebiye, tə gwad: «Nakay na, ndo waray nakə mətasl ta yam tə gəsay me aye na, way?»

*Yesu a mbəl tay ha ndo hay sulo, fakalaw mə bo tay*  
*Markus 5.1-20; Luka 8.26-39*

<sup>28</sup> Ahəl nakə Yesu a ye a diye i dəlov neŋged, ka dala i Gadara hay na, ndo hay sulo tə ndohwaw abəra mə walaŋ i tsəvay hay. Ti yaw mədzəgər tə Yesu. Ndo neheye sulo eye fakalaw mə bo tay aye, nəteye sewed eye hay haladzay. Ndəray a sla mede ta tsəved eye niye bay.

<sup>29</sup> Ta wuda, tə gwad: «A nəkar Wawa i Mbəlom, a saka ka nəmay na, mey? Ka yaw məgamay dəretsətseh na, həlay eye kə ndislew zuk daw?»

<sup>30</sup> Ka təv eye niye dəreŋ tsəfa ta nəteye na, madəras hay andaya haladzay faya ta ndiye wu mənday.

<sup>31</sup> Fakalaw niye hay tə gay amboh a Yesu, tə gwaday: «Tadə a saka mahəhere may na, slər may ha a bo i madəras taday eheye.»

<sup>32</sup> Tsa na, Yesu a gwadatay: «Dum!» Tsa na, tə yaw abəra mə bo i ndo neheye sulo aye, ti ye tə faləkwa a bo i madəras niye hay. Kwayaŋŋa madəras niye hay tebiye tə mbəzlaw abəra ma təv eye andaya sərpalahha, tə kuts a dəlov tebiye, tə dze a dəma.

<sup>33</sup> Ndo neheye faya ta tsəkuriye madəras niye hay aye ta hway, ti ye a wuzlahgəma. Ti ye naha ta təkəratay wu nakə a ge bo aye ada wu nakə a ge bo ta ndo neheye sulo aye.

<sup>34</sup> Tsa na, ndo neheye mə wuzlahgəma aye ti yaw mata dzəgər tə Yesu. Ti yaw, tə ŋgatay a Yesu na, tə gay amboh haladzay, tə gwaday: «Do abəra ka dala may.»

## 9

*Yesu a mbəl ha ndo matəra eye*  
*Markus 2.1-12; Luka 5.17-26*

<sup>1</sup> Ma dəba eye na, Yesu a tsal a kwalalaŋ i yam, a tasaw abəra ma dəlov niye, a ye a gəma ŋgay.\*

<sup>2</sup> Ndo hay tə zlay naha ndo wuray matəra eye mahəna eye ka sləlah. Yesu a zəba ka mədzal gər i ndo niye hay na, a gwaday a ndo niye matəra eye: «Wawa ga, dərev mā ye fakaya abəra bay. Na pəsaka ha mezeleme yak hay.»

<sup>3</sup> Siye i ndo mədzanŋawa bazlam i Mbəlom mapala eye tə dzala mə gər tay, tə gwad: «Ndo nakay na, kə tsalay ka gər a Mbəlom.»

<sup>4</sup> Yesu a sərətay naha ka wu nakə tə dzala mə gər tay aye, a gwadatay: «Ka dzalum mədzal gər nakə ŋgwalak eye bay aye na, hərwi mey?»

<sup>5</sup> Maa da me məgwede: “Mezeleme yak kə pəsa” na, waray, kəgəbay “Lətse, do” na, maa da me mə dəma na, waray?

<sup>6</sup> A seŋ na, sərūm ha neŋ Wawa i Ndo na, gədan ga andaya məpəsətay ha mezeleme a ndo hay ka məndzibəra.» Tsa na, Yesu a gwaday a ndo niye matəra eye: «Lətse, zla sləlah yak, do a mətagay.»

<sup>7</sup> Ndo niye a lətse, a ye a mətagay.

<sup>8</sup> Ndo hay tə ŋgatay andza niye na, ta dzədzar haladzay. Tə dəslyay ha gər a Mbəlom, tə gwad: «Zambadəkway a Mbəlom hərwi kə vəlatay gədan a ndo hay haladzay.»

*Yesu a zalay a Mata*  
*Markus 2.13-17; Luka 5.27-32*

\* 9:1 Niye na, wuzlahgəma i Kafernahum. Zəba ma Markus 2.1.

<sup>9</sup> Yesu a lətse, a ye abəra ma təv niye. Neŋgeye faya ma diye na, a ŋgatay ndo wuray məzele ŋgay Mata, mandza eye mə gay i matsekele dzaŋgal. Yesu a gwadāy: «Dara, peŋ bəzay!» Mata a lətse a pay bəzay a Yesu.

<sup>10</sup> Ahəl nakə Yesu faya ta ndiye wu mənday ta gawla ŋgay hay mə gay i Mata aye na, siye i ndo matsekele dzaŋgal hay ta ndo i mezeleme hay ti yaw faya tə ndiye ka bo wu mənday dziye.

<sup>11</sup> Farisa hay tə ŋgatay andza niye na, ta tsətsah ka gawla i Yesu hay, tə gwadāy: «Miter kurom faya ta ndiye wu ka bo dziye ta ndo matsekele dzaŋgal hay ada ta ndo i mezeleme hay na, hərwi mey?»

<sup>12</sup> Yesu a tsəne bazlam tay niye na, a gwad: «Ndo neheye wuray a gatay bay nətəye zayzay aye na, ta pəliye ndo i sidem bay. Mata pəle ndo i sidem na, ndo neheye dəvats eye hay aye.

<sup>13</sup> Dum, bazlam nakay a say məgwedə mey na, tətikum. Mbəlom a gwad: «A seŋ na, gumay ŋgwalak a ndo bəna gənw neheye ka kədumeŋeye bay.†» Na yaw məzalatay a ndo neheye tə gwadāy a gər tay nətəye ŋgwalak eye hay aye bay, ane tuk na, məzalatay a ndo i mezeleme hay duh.»

### *Yesu a tsik ka daliyam*

#### *Markus 2.18-22; Luka 5.33-39*

<sup>14</sup> Ma dəba eye na, gawla i Yuhana madzəhuḅe ndo a yam hay ti ye ka təv i Yesu, ti ye naha, ta tsətsah faya, tə gwadāy: «Nəmay ta Farisa hay na, nəmay faya nəmaa giye daliyam, gawla yak hay tə ge daliyam təbey na, hərwi mey?»

<sup>15</sup> Yesu a mbədatay faya, a gwadāy: «Nətəye na, ta giye daliyam bay, hərwi nətəye na, andza mə magurlom i məzle dahəlay. Ahəl nakə zal i dahəlay ka təv tay mba aye na, ndo neheye mazala eye a magurlom i məzle dahəlay aye na, ta sliye faya mətuwe bay. Ane tuk na, pat eye ma slaweye ta gasiye fataya abəra zal i dahəlay niye. Pat eye niye na, ta giye daliyam tuk.

<sup>16</sup> «Andza niye, ndəray ma nasiye ha peteked wedeye mətəpe ka peteked guram eye bay. Hərwi ahəl nakə ta bariye na aye na, peteked wedeye ma ŋgərđiye ha peteked guram eye, peteked guram eye ma səkahiye maŋgurede ma ziye nakə kurre aye.

<sup>17</sup> Sa na, ndo ma mbədiye guzom lelem eye a gwezem i həzlay guram eye bay na, ka sərūm təbədew? Hərwi ta mbədə a dəma na, guzom niye lelem eye kə kwasa na, həzlay niye guram eye ma ndohwiye. Guzom dərmaḅ səktih ma mbədiye ka dala ada gwezem ma nasiye. Ane tuk na, guzom lelem eye ta mbədiye na, a gwezem i həzlay wedeye dərmaḅ.»

### *Yesu a mbəl ha dem i bəy ada ŋgwas wuray dəvats eye*

#### *Markus 5.21-43; Luka 8.40-56*

<sup>18</sup> Ahəl nakə Yesu faya ma tsikateye andza niye na, bəy wuray a yaw ka təv i Yesu, a dəkway gurmets, a gwadāy: «Dem ga kə mət. Ane tuk na, dara pa faya həlay yak, tsa na, ma mbəliye.»

<sup>19</sup> Yesu a lətse ta gawla ŋgay hay, tə pay bəzay a bəy niye.

<sup>20</sup> ŋgwas wuray andaya dəvats eye, bambaz a mbədawayaw abəra mə huḅ. Dəvats niye kə ndza faya məve kuro gər eye sulo. A həndzəd naha ka Yesu ta dəba, a lamay a me i peteked ŋgay nets.

<sup>21</sup> Andza niye, a dzala mə gər ŋgay, a gwad: «Na lamay a peteked ŋgay nets na, na mbəliye.»

<sup>22</sup> Tsa na, Yesu a mbədə me a dəba, a ŋgatay, a gwadāy: «Tete dem ga! Mədzal gər yak kə mbəl kar ha.» Kwayaŋŋa ŋgwas niye a mbəl.

† 9:13 Oze 6.6.

<sup>23</sup> Yesu a ndisl a gay i bəy niye tuk. A ye naha a ɲgatay a ndo məfe fagam hay ta ndo hay haladzay faya ta tuwiye.

<sup>24</sup> Tsa na, a gwadətay: «Dum abəra kanan! Dem nakay kə mət bay, neɲgeye mandzahəra eye.» Ane tuk na, ndo hay tə tsəne andza niye na, wuyi tə ɲgwasa faya.

<sup>25</sup> Ta həharatay ahaya ndo hay abəra na, Yesu a fələkwa a gay. A ye naha a gəs dem niye mə həlay, dem niye a lətse.

<sup>26</sup> Labara eye a dā a zləm ma gəma niye tebiye.

### *Yesu a mbəl tay ha guluf hay sulo*

<sup>27</sup> A həlay nakə ndo neheye sulo, dərə tay a həndək ti ye abəra mə dəma na, guluf hay sulo tə pay bəzay tə mawude eye, tə gwadətay: «Yesu, Wawa i Davit, nəmaā gaka mə bo təbədəw!»

<sup>28</sup> Yesu a ndisl a gay ɲgay, a fələkwa a dəma na, guluf niye hay ta həndzəd naha ka təv ɲgay. Yesu, a tsətsah fataya, a gwadətay: «Ka dzalum na, na sliye məmbəle kurom ha dāw?»

Ta mbədəy faya, tə gwadətay: «Ayaw, Bəy Maduweɲ.»

<sup>29</sup> Yesu a lamay a dərə tay, a gwadətay: «Mbəlom mâ vələkum andza nakə faya ka həbumeye ta mədzal gər kurom nakə ka pum faya aye.»

<sup>30</sup> Tsa na, dərə tay a həndək.

Yesu a gatay me, a gwadətay: «Tsənum lele, ndəray mâ sər ha wu nakay bay.»

<sup>31</sup> Ane tuk na, ti ye tə dā ha labara i Yesu ma gəma niye tebiye.

### *Yesu a mbəl ha ndo wuray madəda eye*

<sup>32</sup> A həlay nakə ndo neheye sulo, dərə tay a həndək ti ye abəra mə dəma na, tə zlaw ndo wuray a Yesu. Ndo niye madəda eye hərwi fakalaw mə bo ɲgay.

<sup>33</sup> Yesu a həhar faya abəra məsəfəre niye ɲgwalak eye bay aye. Tsa na, a tsik me wulaɲaɲa lele. A gatay a ndo niye hay wadəɲ wadəɲ. Tə gwad: «Dadā ndo kə ɲgatay a slala i wu nakay nəte ma Israyel bay!»

<sup>34</sup> Ane tuk na, Farisa hay tə ɲgatay andza niye na, tə gwad: «Maa vələy gədan ka mahəhere fakalaw hay na, bəy i fakalaw hay!»

### *Ndo hay tə gay mə bo a Yesu*

<sup>35</sup> Yesu a həhalawa ma wuzlahgəma hay ta gəma hay. A tətikawa tay a ndo hay mə gay i maduwule me hay, a dawa ha Labara ɲgwalak eye i Bəy i Mbəlom, a mbəlawa tay ha ndo i dəvats hay tebiye ada ndo matəra eye hay tebiye.

<sup>36</sup> Yesu a zəba ka ndo neheye haladzay aye na, tə gay mə bo haladzay, hərwi mədzal gər tay makwasa eye ada ta ge bəle. Nəteye andza təbən neheye ndo mətsəkure tay andaya bay aye.

<sup>37</sup> A gwadətay a gawla ɲgay hay: «Wu mənday andaya haladzay məpele ka dala. Ane tuk ndo məpele na abəra ka dala na, nəteye haladzay bay.

<sup>38</sup> Hərwi niye, gumay amboh a ndo i guvah mâ səkah ha ndo i məsler hay hərwi məpele wu mənday abəra ka dala.»

## 10

### *Ndo i maslaɲ i Yesu hay kuro gər eye sulo*

#### *Markus 3.13-19; Luka 6.12-16*

<sup>1</sup> Yesu a zalatay a gawla ɲgay hay kuro gər eye sulo. A vələtay gədan ka mahəhere məsəfəre neheye ɲgwalak eye bay aye abəra ka ndo hay, ada məmbəle tay ha ndo i dəvats hay ta ndo neheye matəra eye aye.

<sup>2</sup> Mæzele i ndo i maslanj ngay neheye kuro gær eye sulo aye na, ananj: Təday Simonj nakə tə zalay Piyer aye ta malamari ngay Anjdəre, Yakuba ta malamari ngay Yuhana, nəteye sulo tay eye wawa i Dzebede,

<sup>3</sup> Filip ta Bartelemi, Tomas ta Mata, neŋgeye ndo matsekele dzanjal, Yakuba wawa i Alfe, Tade,

<sup>4</sup> Simonj ndo mæge vərəm hərwi dala ngay\*, Yudas Iskariyot ndo mæge daf ka Yesu.

*Yesu a slər ndo i maslanj ngay hay kuro gær eye sulo*

*Markus 6.7-13; Luka 9.1-6*

<sup>5</sup> Yesu a slər ndo i maslanj ngay neheye kuro gær eye sulo aye, a tsikatay gær i bazlam hay, a gwadətay: «Kâ yum a gay i ndo neheye nəteye Yahuda bay aye bay, kâ fələkum a gəma i Samari hay bay.

<sup>6</sup> Dum düh na, ka təv i Israyel hay, hərwi nəteye andza təbəŋ madza eye hay.

<sup>7</sup> Ka deyumeye ka tsəved na, dumətay ha, gwadumatay: “Bəy i Mbəlom ka həndzədaw mazlambar tə nəkurom.”

<sup>8</sup> Mbəlum tay ha ndo i dəvats hay, mbəlum tay ha mədahanj hay, mbəlum tay ha ndo madəgwadə eye hay, həharum fakalaw abəra mə bo i ndo hay. Ka hutum gədanj neheye na, kəriye, nəkurom dərmak vəlumətay a ndo hay kəriye.

<sup>9</sup> Ka deyumeye na, kâ zlum gura bay, kâ həlum suloy bay, kwa kwar i suloy kâ həlum a gwezem kurom hay bay.

<sup>10</sup> Kâ zlum gwezem i mahəhele kurom hay bay, kâ həlum peteked i məkelkabo kurom hay sulo sulo bay, kâ həlum tahərak bay, kwa sakwal kâ zlum bay. Andza niye ndo mæge məsler na, kutoŋ ma hutiye wu mənday ngay.»

<sup>11</sup> Yesu a gwadətay sa: «Ka ndislum a wuzlah gay kəgəbay a gəma na, pəlum ndo nakə neŋgeye maləva bo eye ka matəme kurom aye. Ndzum mə gay i ndo niye hus a pat nakə ka deyumeye kurom abəra ma təv niye aye.

<sup>12</sup> Ahəl nakə faya ka fələkumeye a gay i ndo na, gwadum: “Mbəlom mâ vəlakum zay!”

<sup>13</sup> Tadə ndo i gay niye hay ta təma kurom na, məpəse me i zay kurom ma ndziye fataya. Ane tuk na, tadə ta təma kurom bay na, muma ahaya fataya abəra məpəse me i zay kurom.

<sup>14</sup> Tadə ka fələkum a gay i ndo kəgəbay a wuzlah gay, ndo neheye mə dəma aye ta kərah matəme kurom kəgəbay məpe zləm ka bazlam kurom na, dum kurom abəra ma təv niye ada tətəkum ha bətekwew i gəma tay abəra ka sik kurom hay.†

<sup>15</sup> Neŋ faya na gwadəkumeye: Sərum ha pat i sariya i Mbəlom na, sariya tay ma diye me ma ziye i ndo i Sodom ta Gomora.‡»

*Dəretsətseh neheye ma deyeweye kame aye*

*Markus 13.9-13; Luka 21.12-17*

<sup>16</sup> Yesu a gwadətay: «Ananj, na sləriye kurom hay andza təbəŋ hay a walanj i ndo neheye andza kəra i pesl hay aye. Tərum andza dədə neheye faya ta tsəpiye bo tay aye, ada ndzum mənese mâ ge andza fakuma bay andza bodobodo.

\* **10:4** Simonj neŋgeye ndo i Yahuda. Ahəl nakə ka təra gawla i Yesu zuk bay aye na, a ge vərəm hərwi dala ngay. † **10:14** Mæge andza niye na, andza mægwede ndo i maslanj i Yesu hay ta giye wuray hərwi ndo neheye sa bay. ‡ **10:15** Gəma neheye sulo aye na, maraha eye ta mənese. Zəba mə Madazlay i wu hay 19.

<sup>17</sup> Gum metsehe, h̄arwi ndo hay ta diye kurom hay kame i sariya, ta ndaḡiye kurom ta mandalaḡa m̄a gay i maḡuwule me hay.

<sup>18</sup> Ta diye kurom ha kame i ndo m̄al̄ave dala hay ada kame i b̄ay hay h̄arwi ga, h̄arwi ada k̄a slum faya m̄ate mbal ga ta ded̄ek kame tay ada kame i ndo neheye Yahuda hay bay aye.

<sup>19</sup> Ah̄al nak̄a faya ta diye kurom ha kame i sariya aye na, ḡarev m̄a ye fakuma ab̄era bay. K̄a gwad̄um: “N̄emaa ta gwadiye k̄akay? N̄emaa tsikiye na, mey?” bay. A h̄alay niye, Mb̄alom ma v̄alakumeye bazlam neheye ka tsikumeye aye.

<sup>20</sup> Andza niye mata tsike me na, n̄akurom bay. Mata tsike me m̄a n̄akurom na, M̄as̄af̄ere i B̄aba kurom Mb̄alom.»

<sup>21</sup> Yesu a gwad̄atay sa: «Ndo hay ta v̄aliye ha malamar tay hay ada t̄a k̄ad̄ tay ha, b̄aba hay ta giye ta wawa tay hay andza niye ḡarmak. Wawa hay ta natay ḡare a b̄aba tay hay, ta k̄adiye tay ha.

<sup>22</sup> Ndo hay tebiye ta nakumeye ḡare h̄arwi ga. Ane tuk na, ndo nak̄a k̄a s̄amay naha hus k̄a mand̄ave aye na, Mb̄alom ma t̄amiye ha.

<sup>23</sup> Tad̄a aḡana ta sakum ḡarets̄atseh ma ḡama nak̄a n̄akurom m̄a ḡama aye na, hwayum a ḡama nenḡed̄. Nen̄ faya na gwad̄akumeye: S̄arum ha, nen̄ Wawa i Ndo na maweye na, ka dzum ha ḡar mah̄eh̄ele ma ḡama neheye ka dala i Israyel aye tebiye zuk bay.»

<sup>24</sup> Yesu a gwad̄atay: «Ndo nak̄a faya ma t̄atikiye wu aye na, ma ziye ndo mat̄atikay wu bay. Ndo i m̄asler ma ziye ndo i gay n̄gay bay.

<sup>25</sup> Tad̄a ndo nak̄a faya ta t̄atikiye wu aye ka t̄ara andza ndo mat̄atikay wu ada ndo i m̄asler ka t̄ara andza ndo i gay n̄gay na, niye na, ḡa. Tad̄a ta zalay a ndo i gay “Bedzabul” na, ta tsad̄ateye a ndo i n̄gay hay ma ziye i n̄gay b̄ad̄aw?»

### *K̄a dz̄adzarumay a ndo zezen̄ bay*

#### *Luka 12.2-9*

<sup>26</sup> «H̄arwi niye, k̄a dz̄adzarumatay a ndo hay bay. Wu nak̄a tebiye man̄gaha eye na, ta diye ha, ada wu nak̄a t̄a tsikawa ta m̄akal aye na, ta diye ha.

<sup>27</sup> Wu nak̄a faya na tsikakumeye ma l̄avon̄j aye na, masumay a m̄atsike parakka m̄a dzaydzay ta h̄apat. Wu nak̄a ta tsikakumeye ka zl̄am t̄a m̄as̄as̄akwe aye na, wudum ha k̄alarra ka ḡar i gay.

<sup>28</sup> K̄a dz̄adzarumatay a ndo neheye ta k̄adiye slo i bo kurom aye bay. N̄ateye na, ta sliye faya m̄adze ha m̄as̄af̄ere kurom bay. Dz̄adzarumay ḡuh a Mb̄alom nak̄a ma sliye m̄adze ha bo kurom ta m̄as̄af̄ere kurom eye dzay a ako nak̄a ma mbatiye bay ka tor eye aye.

<sup>29</sup> Sisi hay sulo ta s̄ak̄amiye t̄a dala n̄ate na, ka s̄arum t̄ab̄ad̄ew? Ane tuk na, kwa n̄ate m̄a walan̄j i diyen̄ hay ma ḡadiye bay, say k̄a yay a ḡar a B̄aba Mb̄alom m̄a ḡad̄.

<sup>30</sup> I kurom na, kwa m̄akwets i ḡar kurom b̄abay, Mb̄alom k̄a pasla na.

<sup>31</sup> H̄arwi niye, k̄a dz̄adzarum bay, n̄akurom ka zum tay ha sisi niye hay.»

<sup>32</sup> Yesu a gwad̄atay sa: «Tad̄a ndoweye k̄a tsik parakka kame i ndo hay: “Nen̄ gawla i Yesu” na, nen̄ ḡarmak na tsikiye kame i B̄aba ga m̄a mb̄alom: “Ndo nakay na, gawla ga.”

<sup>33</sup> Ane tuk na, tad̄a ndoweye k̄a tsik kame i ndo hay nen̄geye gawla ga bay na, nen̄ ḡarmak na tsikiye kame i B̄aba ga m̄a mb̄alom: “Ndo nakay na, gawla ga bay.”»

### *Yesu a zlaw zay bay, a zlaw v̄aram*

#### *Luka 12.51-53*



<sup>34</sup> «Kâ dzalum neŋ na yaw, nâ zlaw zay ka mândzibɛra na, kâ dzalum bay. Na yaw na, na zlaw zay bay, na zlaw na, maslalam dɔh.

<sup>35</sup> Na yaw na, maŋgɛne tay ha ka bo abɛra ndo hay. Wawa haslɛka eye ta bɛba ŋgay, dem ta may ŋgay, ŋgwas ta may i zal ŋgay,

<sup>36</sup> ndo hay mɛ ɔgay tay ta niye a bo dɛre.»

*Gawla i Yesu tã lɛva ha bo ta mɛvɛle mɛsɛfɛre tay andza i Yesu*

*Luka 14.26-27*

<sup>37</sup> Yesu a gwadɛtay sa: «Ndoweye ka wudɛ bɛba ŋgay ta may ŋgay ka ze neŋ na, neŋgeye ma sliye mândze ka tɔv ga bay. Ndoweye ka wudɛ wawa ŋgay haslɛka eye tɛ dem ŋgay a ze neŋ na, neŋgeye ma sliye mândze ka tɔv ga bay.

<sup>38</sup> Ndoweye kɛ zla mayako mazlɛmbadɛ eye kɛ peŋ bɛzay bay na, neŋgeye ma sliye mândze ka tɔv ga bay.

<sup>39</sup> Ndo nakɛ a say mɛtɛme ha mɛsɛfɛre ŋgay aye na, ma dziye ha dɔh. Ane tuk na, ndo nakɛ ma dziye ha mɛsɛfɛre ŋgay hɛrwi ga aye na, ma hutiyɛ a dɛma dɔh.»

*Tadɛ ndoweye ka tɛma gawla i Yesu hay na, a tɛma Yesu*

*Markus 9.41; Luka 10.16*

<sup>40</sup> Yesu a gwadɛtay sa: «Tadɛ ndoweye ka tɛma kurom na, ka tɛma na, neŋ. Ada tadɛ ndoweye ka tɛma ga na, a tɛma ndo nakɛ a slɛra ga ahaya aye.

<sup>41</sup> Ndoweye ka tɛma ndo mɛdɛ ha bazlam i Mbɛlom hɛrwi nakɛ neŋgeye ndo mɛdɛ ha bazlam i Mbɛlom aye na, ma hutiyɛ magogoy nakɛ ta vɛleyɛ a ndo mɛdɛ ha bazlam aye. Ndoweye ka tɛma ndo nakɛ ŋgwalak eye kame i Mbɛlom aye hɛrwi nakɛ neŋgeye ŋgwalak eye kame i Mbɛlom aye na, ma hutiyɛ magogoy nakɛ ta vɛleyɛ a ndo nakɛ ŋgwalak eye kame i Mbɛlom aye.

<sup>42</sup> Neŋ faya na gwadɛkumeyɛ: Sɛrum ha na, tadɛ ndoweye kɛ vɛlay yam ɔsiyɛm nɛtɛ matasla eye a ndo nakɛ makɛtsa eye mɛ walanɛ i gawla ga hay hɛrwi nakɛ neŋgeye gawla ga aye na, magogoy ŋgay ma dziye bay.»

## 11

<sup>1</sup> Yesu a ndɛv ha bazlam ŋgay neheye a tsikatay a gawla ŋgay hay kuro ɔrɛ eye sulo aye na, a hɛl bo abɛra ka tɔv niye a ye mata tɛtikatay a ndo hay ada mɛdɛtay ha ma wuzlah ɔgay neheye ka dala niye aye.

*Yesu ta Yuhana madzɛhuɛ ndo a yam*

*Luka 7.18-23*

<sup>2</sup> Ahɛl niye na, Yuhana madzɛhuɛ ndo a yam neŋgeye ma danɔay. A tsɛne ndo hay faya ta tsikiye ka Kɛristɛ ada ka mɛslɛr ŋgay nakɛ faya ma giye aye. Tsa na, a slɛr siye i ŋgal mɛ walanɛ i gawla ŋgay hay,

<sup>3</sup> hɛrwi matsɛtsehe ka Yesu: «Nɛkar na, Kɛristɛ nakɛ ma deyeweye aye dɛw? Kɛɔbay nɛmaɛ hɛba ndo mekeleŋ dɛw?» Ti ye ta tsɛtsah ka Yesu andza niye.

<sup>4</sup> Yesu a mbɛdɛtay faya: «Dum tɛkɛrumay a Yuhana wu nakɛ ka tsɛnum aye ada wu nakɛ ka ŋgatumay aye.

<sup>5</sup> Gwadumay na, guluf hay tɛ ŋgatay a dɛre, ndo matɛra eye hay ti ye lele, ndo madɛgwadɛ eye ta mbɛl suwud suwud, mandɛk hay tɛ tsɛne zlɛm, madahanɛ hay ta lɛtsew a sifa, ndo i mɛtawak ta tsɛne Labara ŋgwalak eye.

<sup>6</sup> Mɛŋgwesɛ ka ɔrɛ i ndo nakɛ kɛ ɔrɛ ha mɛdzele ɔrɛ abɛra ka neŋ bay aye!»

*Yesu a tsik ka Yuhana madzɛhuɛ ndo a yam*

*Luka 7.24-35*



<sup>7</sup> Gawla i Yuhana niye hay ti ye abəra mə dəma na, Yesu a dazlay mətsikatay a ndo neheye ka təv ɲgay aye ka Yuhana. A gwadətay: «Ka yum a kəsaf mata zəbaw na, ka mey? Ka zəbumaw ka guzer nakə mətasl faya ma bəliye ha aye daw? A'ay andza niye bay.

<sup>8</sup> Ada ka yum, ka zəbumaw na, ka mey? Ka zəbumaw na, ka ndo malambada bo eye tə peteked lele eye daw? Tsukudu kəkay? Ane tuk na, ndo neheye tə peteked ka bo lele aye na, nəteye mandza eye mə gay i bəy bagwar eye hay.

<sup>9</sup> Ka yum mata zəbaw na, ka wuye mey? Ka zəbumaw na, ka ndo mæde ha bazlam i Mbəlom daw? Ayaw, neɲgeye ndo mæde ha bazlam i Mbəlom ada neɲ faya na gwadəkumeye, neɲgeye a ze ndo mæde ha bazlam i Mbəlom.

<sup>10</sup> Yuhana na, ndo nakə tə watsa a Derewel aye, Mbəlom a gwad: “Neɲ na sləriye naha ndo mæde ha bazlam ga kame yak. Ma lambadakeye na tsəved.\*”

<sup>11</sup> «Neɲ faya na gwadəkumeye: Sərum ha na, mə walaɲ i ndo zezeɲ hay tebiye ndo nakə a ze Yuhana madzəhuḅe ndo a yam aye na, andaya bay. Ane tuk na, ndo nakə neɲgeye tsekweɲ makətsa eye ma Bəy i Mbəlom aye na, a ze Yuhana.

<sup>12</sup> Kwa ahəl nakə Yuhana madzəhuḅe ndo a yam a tsikawa bazlam i Mbəlom a ndo hay aye hus anəke na, ndo mənə dəre i Mbəlom hay faya ta giye vərəm ta Bəy i Mbəlom ada tə dzawa faya bo matsəpe na.

<sup>13</sup> Derewel i ndo mæde ha bazlam i Mbəlom hay tə derewel i Musa ta da ha Bəy i Mbəlom hus a həlay i Yuhana madzəhuḅe ndo a yam.

<sup>14</sup> Tadə a sakum mədza ha na, Yuhana neɲgeye Eliya tə watsa faya mə Derewel i Mbəlom, tə da ha tə gwad ma deyeweye.†

<sup>15</sup> Ndo nakə zləm andaya faya mətsəne aye na, mə tsəne lele!»

<sup>16</sup> Yesu a gwadətay sa: «Ndo neheye bəgom aye na, na ndzəkitiye tay ha bo na, tə way? Ta ndzəkət bo na, ta wawa neheye mandza eye ka pələd nakə ndo hay tə hayawa faya gər aye, siye hay faya ta wudətay naha a siye hay. Tə gwadətay:

<sup>17</sup> “Nəmaa fakum naha faɲam i məhetse, ka hatsum bay, nəmaa gakum naha dəmes i mədahaɲ na, ka tuwum bay.”

<sup>18</sup> Andza niye Yuhana madzəhuḅe ndo a yam a yaw, kə nda wu mənday, kə sa wu məse bay na, tə gwad: “Neɲgeye na, məsəfəre nakə ɲgwalak eye bay aye mə bo ɲgay.”

<sup>19</sup> Neɲ Wawa i Ndo, na yaw, na nda wu mənday ada na sa wu məse na, tə gwad: “Zəbum faya, ndo nakay i ɲgay a dzala na, ka wu mənday ada ka məse guzom. Neɲgeye na, dzam i ndo matsekele dzaɲgal hay ta ndo i mezeleme hay.” Ane tuk na, Metsehe i Mbəlom ma bəziye na, ta məsler neheye ma giye aye.»

*Gəma neheye ta kərah mədza ha ka Yesu aye*

*Luka 10.13-15,21-22*

<sup>20</sup> Ma dəba eye na, Yesu a pa bo ka məmatay ha mənese a gəma neheye a ge mə dəma masuwayaɲ haladzay aye, ane tuk na, ndo i gəma niye hay ta mbəda ha mede tay bay. A gwad:

<sup>21</sup> «A nəkurom ndo i gəma i Koraziɲ hay, tuwum bo kurom, hərwi dəretsətseh ka gər kurom! A nəkurom ndo i gəma i Betesayda hay, tuwum bo kurom hərwi dəretsətseh ka gər kurom. Hərwi tadə masuwayaɲ neheye na ge mə gay kurom aye nə ge ma gəma i Tir ta gəma i Sidoɲ na, atay na, ndo i gəma niye hay ta dzaliye bo tay ta tuwiye, ta pa ka bo taḅay manasa eye ada

\* **11:10** Malasi 3.1; Madayaw abəra ma Ezipt 23.20. † **11:14** Malasi 3.23-24.

ta kutsiye bātekwew malēmāts a gār hārwi mādē ha na, ta gār ha mezeleme tay.

<sup>22</sup> Hārwi niye neŋ faya na gwadākumeye: Pat nakə Mbəlom ma gateye sariya a ndo hay aye na, sariya kurom ma diye me ma ziye i ndo i gəma i Tir ta Sidon.

<sup>23</sup> «Nəkurom ndo i gəma i Kafernahum hay, ka dzalum nəkurom na, Mbəlom ma ta həliye kurom a mbəlom wal daw? A'ay! Nəkurom dūh na, Mbəlom ma ta mbəzliye kurom ha na, a təv məndze i mədahan hay. Hārwi masuwayan neheye na ge ma gəma kurom aye tā ge ma gəma i Sodom na, haḃe atay gəma nakay ma giye andaya bəgom.

<sup>24</sup> Andza niye, neŋ faya na gwadākumeye, pat nakə Mbəlom ma gateye sariya a ndo hay aye na, sariya kurom ma diye me ma ziye i ndo i gəma i Sodom<sup>‡</sup> hay.»

<sup>25</sup> Ma məndze tsekweŋ na, Yesu a gwad: «A nəkar Bəba Mbəlom, ndo mələve magərmbəlom ta dala. Na gaka sisəe hārwi nəkar ka datay ha wu nakə maŋgaha eye a ndo neheye tə sər wuray bay aye. Ada ka ŋgaha abəra ka ndo i ndaraw hay ta ndo neheye nətəye tə sər wu aye.

<sup>26</sup> Ayaw, Bəba Mbəlom, a yaka a gər a nəkar hārwi mā ge bo andza niye.»

<sup>27</sup> A gwadatay: «Bəba ga kə vələŋ wu hay tebiye. Ndəray a sər wawa bay, maa sər na, Bəba. Ndəray a sər Bəba bay, maa sər na, neŋ wawa ŋgay ada maa sər na ndo neheye a seŋ mədətay ha aye.»

<sup>28</sup> Yesu a gwadatay sa: «A nəkurom neheye faya ka zlumeye wu mamba eye ada nəkurom madagər eye, dumara ka təv ga, neŋ na vələkumeye mazəzukwe bo.

<sup>29</sup> Rəhmenŋ ha gər, na tətikakumeye wu lele eye, hārwi neŋ ndo səkeffe eye, na gakumeye dəretsətseh bay. § Ta dedək ka hutumeye mazəzukwe bo.

<sup>30</sup> Wu nakə na piye fakuma aye na, a wur bo məzle bay, wu nakə na vələkumeye, ka zlumeye na, a mba bay.»

## 12

*Maa ləvay gər a pat i mazəzukw bo na, Yesu*

*Markus 2.23-28; Luka 6.1-5*

<sup>1</sup> Pat i mazəzukw bo na, Yesu ta gawla ŋgay hay ti ye ta guvah wuray. Ma guvah eye niye tə ge a dəma na, wuye andaya tə zalay bəle. Ahəl nakə faya ta diye na, may a wur ka gawla i Yesu hay, tə pa bo ka məhəḃe wu niye tə nda.

<sup>2</sup> Farisa hay tə ŋgatatay na, tə gwadāy a Yesu: «Zəba, gawla yak hay ta giye wu nakə bazlam i Mbəlom mapala eye a ge faya me pat i mazəzukw bo aye na, hārwi mey?»

<sup>3</sup> Yesu a mbədətay faya: «Dadā ka dzaŋgum wu nakə Davit a ge aye təbədew?»\* May a wur faya ta ndo ŋgay hay.

<sup>4</sup> Tsa na, a fələkwa a madzawadzawa i mədəslay ha gər a Mbəlom ta ndo ŋgay hay. A ye naha, a zla makwala nakə tə vələy a Mbəlom aye, a nda. A vələtay a ndo ŋgay hay dərmaḃ, tə nda. Bazlam i Mbəlom mapala eye a vəl tsəved ka mənde na, a ndo məvələy wu a Mbəlom dəkdek bədaw?

<sup>5</sup> «Kəgəbay ka dzaŋgum wu nakay mə dərəwel i Musa bədaw? Pat i mazəzukw bo na, ndo məvələy wu a Mbəlom mə gay i mədəslay ha gər a Mbəlom ta rəhay ha gər a pat i mazəzukw bo bay, ta ge məsler. Ane tuk na, ta ge mənese bay.†

‡ 11:24 Zəba ma Mata 10.15. § 11:29 Yesu a tsik kanan ka pendzeŋ i məndze mekeləŋ eye. Faya ma tərīye tay ndo hay beke hay bay. \* 12:3 Zəba ma 1 Samuyel 21.2-7. † 12:5 Məpəsle 28.9-10.

<sup>6</sup> Neŋ faya na gwadakumeye, wu nakə a ze gay i mədəslay ha gər a Mbəlom aye na, andaya kanan.

<sup>7</sup> «Tə watsa a Derewel i Mbəlom na, Mbəlom a gwad: “A seŋ na, gumay ŋgalak a ndo bəna, gənaŋ neheye ka kədumeŋeye bay.”<sup>‡</sup> Tadə ka tsənum wu nakay na, ndo neheye ta ge wuray bay aye na, kə gəsum tay ha bay.

<sup>8</sup> Hərwi maa ləvay gər a pat i mazəzukw bo na, Neŋ Wawa i Ndo.»

*Yesu a mbəl ha ndo wuray maməta həlay eye*

*Markus 3.1-6; Luka 6.6-11*

<sup>9</sup> Yesu a ye abəra ka təv niye, a ye a gay i mađuwule me.

<sup>10</sup> Mə dəma na, ndoweŋe andaya həlay ŋgay maməta eye. A satay a ndo hay məmay ha mənese a Yesu, ta tsətsah faya tə gwadəy: «Tsəved andaya məmbəle ha ndo pat i mazəzukw bo daw?»

<sup>11</sup> Yesu a mbədətay faya: «Tadə ndo nəte mə walaŋ kurom təbaŋ ŋgay andaya nəte, təbaŋ ŋgay niye a dəd a bədiyem pat i mazəzukw bo na, ma zla ahaya abəra mə dəma bədaw?»

<sup>12</sup> Kə ge andza niye na, ndo zezeŋ a ze təbaŋ bədaw? Bazlam kway mapala eye kə vəl tsəved ka məge ŋgalak a ndo pat i mazəzukw bo!»

<sup>13</sup> Tsa na, Yesu a gwadəy a ndo niye: «Nduda ha həlay yak!» Ndo niye a nduda ha həlay ŋgay. Tsa na, a mbəl lele andza həlay neŋged.

<sup>14</sup> Sototo, Farisa hay ti yaw abəra mə gay, ti ye tə haya gər. Tə ma ha ka bo bazlam, ta hutiyə tsəved ka məkədə Yesu na, kəkay.

*Yesu neŋgeye ndo i məsler nakə Mbəlom a zla aye*

<sup>15</sup> Ahəl nakə Yesu a sər ha Farisa hay faya ta pəliye tsəved ka məkədə na na, a ye abəra ka təv niye. Ndo hay haladzay tə pay bəzay, a mbəl tay ha ndo i dəvats hay tebiye.

<sup>16</sup> Tsa na, a gatay me, a gwadətay: «Neŋ way na, kə tsikumay a ndəray bay.»

<sup>17</sup> A ge andza niye na, hərwi ada wu neheye Ezay ndo mədə ha bazlam i Mbəlom a tsik aye tā ge bo:

<sup>18</sup> Mbəlom a gwad:

«Ndo i məsler ga nakə na zla aye na, anaŋ,  
na wuda na haladzay,  
məŋgwese ga tebiye ka gər ŋgay.

Na sləriye naha Məsəfəre ga ka neŋgeye,  
ma dətay ha dedek ga a ndo hay tebiye.

<sup>19</sup> Ta təriye ta ndəray bay,  
ma wudiye wuray bay,

ndəray ma tsəniye faya abəra məmbəle wuray ka mazlazlan i tsəved bay.

<sup>20</sup> Guzer nakə mahədzaka eye na, ma həbiye ha bay,

Ako nakə ndözəzəzə ka lalam faya ma mbatiye na, ma ndəvay həlay ma mbatiye ha bay,

Ma giye andza niye hus ka vələtay məŋgwese a ndo neheye dedek eye hay aye.

<sup>21</sup> Ndo hay tebiye ta piye mədzal gər tay na, ka neŋgeye. §»

*Yesu a həhar fakalaw abəra mə bo i ndo wuray*

*Markus 3.20-30; Luka 11.14-23*

<sup>22</sup> Tə zlayaw ndo wuray guluf eye ada a sər mətsike me bay hərwi fakalaw mə bo ŋgay. Yesu a mbəl ha. Tsa na, ndo niye a tsik me lele ada a ŋgatay a dərə lele.

<sup>23</sup> A gatay a ndo hay hær6a6ækka, nàteye tebiye, tæ gwad: «Ndo nakay ma giye na, Wawa i Davit!»

<sup>24</sup> Farisa hay tæ ngatay a wu nakæ a ge bo aye na, tæ gwad: «Maa velay gëdan ka mahëhere fakalaw hay na, Bedzabul\* bøy i fakalaw hay!»

<sup>25</sup> Ane tuk na, Yesu a sëratay naha ka wu nakæ tæ dzala aye, a gwadatay: «Tadæ ndo i gëma hay ta ngëna, faya ta giye vëram mæ walañ tay na, gëma niye ma dziye. Tadæ ndo i wuzlahgëma hay kægëbay ndo hay ma bädgay tay faya ta kädïye bo na, wuzlahgëma niye kægëbay bädgay niye ma ndziye huya bay.

<sup>26</sup> Tadæ Fakalaw tæ Fakalaw ta hähariye bo tay, ma giye magazlëga ka bo ngay eye, ada bøy ngay ma ndziye huya na, ma kækay?

<sup>27</sup> Ka gwadum maa vëleñ gëdan ka mahëhere fakalaw na, Bedzabul. Ane tuk na, a dzam kurom hay na, maa vëlatay gëdan ka mahëhere fakalaw hay na, way? Andza niye, dzam kurom hay faya ta dïye ha na, dedëk andaya mæ näkurom bay.

<sup>28</sup> Maa vëleñ gëdan a neñ ka mahëhere fakalaw na, Mæsëfäre i Mbëlom. Andza mægwedë na, Bøy i Mbëlom 6a ki yaw tsiy hus ka tøv kurom.

<sup>29</sup> «Ndaray ma sliye mäfäläkwe a gay i ndo i gëdan mähëla ahaya wu ngay bay. Ma ta sliye faya mäfäläkwe na, ma lahiye mädzewe na tädäy. Kæ dzawa na tuk na, ma sliye faya mede a gay, mahëla ahaya wu ngay hay tuk.»

<sup>30</sup> A gwadatay sa: «Ndo naka neñgeye tæ neñ bay aye na, neñgeye ndo i vëram ga. Ndo nakæ ka dzana ga ka mähayatay gær a ndo ga hay bay aye na, ma hähariye tay ha kweye kweye.

<sup>31</sup> Hærwi niye, neñ faya na tsikakumeye: Tadæ ndo zezëñ kæ ge mezeleme kwa waray tebiye, kægëbay kæ tsalay ka gær a Mbëlom na, Mbëlom ma pësäy ha mezeleme ngay. Ane tuk na, ndoweye kæ tsalay ka gær a Mæsëfäre Tsädänña eye na, Mbëlom ma pësäy ha mezeleme ngay bay.

<sup>32</sup> Tadæ ndoweye kæ tsik wu nakæ ngwalak eye bay aye ka neñ Wawa i Ndo na, Mbëlom ma pësäy ha mezeleme ngay. Ane tuk na, tadæ kæ tsik wu nakæ ngwalak eye bay aye ka Mæsëfäre Tsädänña eye na, Mbëlom ma pësäy ha mezeleme ngay bay, kwa anæke, kwa ka mändzibëra nakæ ma deyeweye kame aye.

### *Därizl i gërdaf ta hohway ngay eye hay*

#### *Luka 6.43-45*

<sup>33</sup> «Kæ ge därizl i gërdaf ngwalak eye na, hohway ngay hay ngwalak eye. Kæ ge därizl i gërdaf eye ngwalak eye bay na, hohway ngay hay ngwalak eye bay. Andza niye ta sariye ha därizl i gërdaf nakay ngwalak eye na, abëra ka hohway ngay hay.

<sup>34</sup> A näkurom wawa i palas neheye! Näkurom ngwalak eye hay bay. Ada ka slumeye faya mätsike wu neheye ngwalak eye hay na, ma kækay? Hærwi kwa way a ndohwa ahaya na, wu nakæ maraha eye mæ dävëv ngay aye.

<sup>35</sup> Ndo nakæ ngwalak eye na, ma giye wu ngwalak eye hay hærwi mæ dävëv ngay na, wu neheye ngwalak eye därmak. Ndo nakæ sewed eye na, ma giye wu neheye sewed eye hærwi dävëv ngay maraha eye tæ wu neheye sewed eye.

<sup>36</sup> Neñ faya na tsikakumeye: Pat nakæ Mbëlom ma gateye sariya a ndo hay aye na, bazlam neheye mätsike kəriye kəriye kwa way ma mbädäy faya a gær ngay.

<sup>37</sup> Andza niye, Mbëlom ma gwadiye ka ge mænese bay kægëbay ka ge mænese ka bazlam neheye ka tsik aye.»

\* 12:24 Bedzabul na, mæzele mekeleñ eye i Fakalaw.

*Ndo hay ta tsatsah masuwayaŋ ka Yesu*

*Markus 8.11-12; Luka 11.29-32*

<sup>38</sup> Ndo mædzanŋgawa bazlam i Mbælom mapala eye ta Farisa hay, tæ gwadaŋ a Yesu: «Miter, a samay na, gamay masuwayaŋ.»

<sup>39</sup> Yesu a mbædatay faya: «Ndo neheye a haley nakay na, næteye sewed eye hay, næteye ta mbæday dæba a Mbælom, faya ta tsatsahiye masuwayaŋ. Ane tuk na, ma dæba i masuwayaŋ i Zonas ndo mæde ha bazlam i Mbælom nakæ ta ŋgatay aye na, ta ŋgateye a masuwayaŋ mekelen eye bay.

<sup>40</sup> Hærwī, Zonas kæ ndza pat eye mahkar ada hævad eye mahkar ma kutes i kælef bagwar eye. Andza niye dærmak neŋ Wawa i Ndo na ndziye pat eye mahkar ada hævad eye mahkar ma tsævay.

<sup>41</sup> Ahæl nakæ ndo i Ninive hay tæ tsæne labara nakæ Zonas a tsikatay aye na, ta mbæda ha mede tay.<sup>†</sup> Ndo andaya kanaŋ bægom a ze Zonas. Hærwī niye, ahæl nakæ Mbælom ma gateye sariya a ndo hay aye na, ndo i gæma i Ninive ta deyeweye ta lætsiye kame i ndo neheye bægom aye ta matay ha mænese.

<sup>42</sup> «ŋgwas wuray andaya, neŋgeye bæy bagwar eye, a yaw abæra ma diye i tsakay. A yaw mætsæne bazlam i Salomon neheye maraha eye ta metsehe aye.<sup>‡</sup> Ndo andaya kanaŋ a ze ha Salomon. Hærwī niye, ahæl nakæ Mbælom ma gateye sariya a ndo hay aye na, ŋgwas nakay bæy bagwar eye ma deyeweye abæra ma diye i tsakay, ma lætsiye kame i ndo neheye ma matay ha mænese aye.»

*Mæmaw i mæsfære nakæ lele bay aye*

*Luka 11.24-26*

<sup>43</sup> «Fakalaw ki yaw abæra mæ bo i ndo na, ma diye ma dzædziye mæ kæsaf, ma pæliye tæv mazæzukw bo. Kæ huta bay na,

<sup>44</sup> ma gwadeye a gær ŋgay: “Na mbædiye gær a gay ga nakæ na yaw abæra mæ dæma aye.” Ma mbædiye gær, kæ ye naha kæ ŋgatay a gay wuray mæ dæma bay, mafada eye lele ada malambada eye.

<sup>45</sup> Tsa na, ma diye ma hælaweye siye i mæsfære neheye sewed eye hay wene wene ta ze neŋgeye aye tasæla. Ta fælækwiye a gay, ta ndziye mæ dæma. Ka mandæve eye na, wu niye ma miye ka ndo niye ma ziye nakæ kurre aye. Ma giye bo ta ndo neheye ŋgwalak eye bay bægom aye na, andza niye.»

*May i Yesu ta malamar ŋgay dedek eye hay*

*Markus 3.31-35; Luka 8.19-21*

<sup>46</sup> Ahæl nakæ Yesu faya ma tsikateye me a ndo hay aye, may ŋgay ta malamar ŋgay hay ti ye naha. Tæ lætse ma bæra, ta pæla tsæved mætsikay me a Yesu.

<sup>47</sup> Ndo næte a ye ka tæv i Yesu, a gwadaŋ: «Zæba, may yak ta malamar yak hay næteye ma bæra, a satay mætsikaka me.»

<sup>48</sup> Yesu a mbædatay faya: «May ga na, way? Malamar ga hay na, way hay?»

<sup>49</sup> Tsa na, a zækwa haley ka gawla ŋgay hay, a gwad: «May ga ta malamar ga hay na, næteye anaŋ.

<sup>50</sup> Hærwī tadæ ndoweye kæ ge wu nakæ a say a Bæba ga mæ mbælom na aye, neŋgeye malamar ga, ada may ga.»

## 13

*Dzeke i ndo maslæge*

*Markus 4.1-9; Luka 8.4-8*

<sup>1</sup> Pat eye niye na, Yesu a yaw abæra mæ gay, a ye a ndza ka me i dælov.

<sup>†</sup> 12:41 Zonas 1-4. <sup>‡</sup> 12:42 1 Bæy hay 10.1-13.

<sup>2</sup> Ndo hay haladzay tə haya gər ka təv ŋgay. Hərwi niye a tsal a kwalalaŋ i yam wuray ka gər i yam a ndza a dɔma. Ndo hay tebiye tə ndza ka me i dɔlov.

<sup>3</sup> Yesu a tətikatay wu haladzay a ndo niye hay ta dzeke.

A gwadatay: «Ndo wuray a ndohwaw abəra mə gay. A həl hulfe, a ye ha a pesl mata sləge.

<sup>4</sup> A ye naha na, a dazlay a masləge. Ahəl nakə faya ma kutsiye hulfe\* ŋgay a guvah aye na, siye hay tə kuts ka tsakay i tsəved. Diyeŋ hay ti yaw, tə pala na tebiye.

<sup>5</sup> Hulfe mekeleŋ eye a dɔd ka sik i pələd, təv nakə bətekwew andaya faya haladzay bay aye. Hulfe niye hay tə ndzohwaw bəse tsa. Tə ndzohwaw bəse na, hərwi bətekwew andaya ka sik i pələd niye bay.

<sup>6</sup> Ane tuk na, pat a tsaraw, a zla faya abəra ŋgulak na, a fəka tay ha hulfe niye hay tə ndzohwaw aye. Tə kula heryew heryew hərwi ta huta bəd məpe zləlay haladzay bay.

<sup>7</sup> Nəŋged a dɔd a gay i dak. Dak niye hay tə gəl. Tsa na, dak niye hay tə ŋgədətsa na hulfe niye a ndzohwaw aye, kwa hulfe niye hay ta ge bo bay ada ta nah bay.

<sup>8</sup> Siye sa na, tə kuts ka təv lele eye, tə ndzohwaw na, lele. Tə gəl ada tə nah, gər eye həbəts həbəts lele. Mə walaŋ tay niye na, neheye hohway tay hay makwehe nətə na, wur eye a ge temerre, nəŋged sa na, kuro kuro məkwa, ada siye kuro kuro mahkar.»

<sup>9</sup> Yesu a ndəv ha andza niye na, a gwadatay: «Ndo nakə zləm andaya faya na, mə tsəne!»

*Yesu a ge məsler ta dzeke na, hərwi mey?*

*Markus 4.10-12; Luka 8.9-10*

<sup>10</sup> Ma dəba eye na, gawla ŋgay hay ta həndzəd naha ka təv ŋgay, ta tsətsah faya: «Ka tsikatay me a ndo hay ta dzeke na, hərwi mey?»

<sup>11</sup> Yesu a mbədətay faya: «Nəkurom na, Mbəlom kə dəkum ha wu nakə maŋgaha eye ma bəy ŋgay aye. Ane tuk na, a nətəye na, kə dətay ha bay.

<sup>12</sup> Andza niye, ndo nakə wu ŋgay andaya na, ta səkahay ha sa ada i ŋgay ma giye haladzay. Ane tuk na, ndo nakə wuray ŋgay andaya bay aye na, kwa tsekweŋ eye nakə andaya faya aye na, ta buwiye na.

<sup>13</sup> Hərwi niye na tsikatay me ta dzeke na, nətəye ta zəbiye faya tə dərə tay, ane tuk na, ta ŋgatəye bay. Ta pay zləm, ane tuk na, ta tsəniye tə zləm tay bay, ta səriye bay.

<sup>14</sup> Andza niye, wu nakə Ezay ndo məde ha bazlam i Mbəlom a dā ha aye na, kə ge bo dedek. Mbəlom a gwad:

“Ka tsənumeye lele,  
ane tuk na, ka sərumeye bay.

Ka zəbumeye faya lele,  
ane tuk na, ka ŋgatumeye bay.

<sup>15</sup> Ndo neheye na, ta kula ha gər tay təŋgwa təŋgwa.

Ta dəka na zləm tay,  
ta dərəzl na dərə tay.

A satay məŋgatay tə dərə tay bay,  
a satay mətsəne tə zləm tay bay,  
a satay məsəre tə metsehe tay bay.

Tadə a satay mambəde ha mede tay na,  
na mbəliye tay ha dərmaκ.†”

\* 13:4 I tay na, ta sləga tə tsəlöv təbey. Tə kuts ha məkutse məkutse. † 13:15 Ezay 6.9-10.

16 «Ane tuk na, nəkurom na, ka hutum mənɣwese. Ka ɳgatumay a dɛre, ada ka tsənum tɛ zləm kurom.

17 Neɳ faya na gwadəkumeye: Sərum ha na, ndo mɛde ha bazlam i Mbəlom hay haladzay, ndo dedək eye haladzay a satay haɓe mənɳgatay a wu nakə faya ka ɳgatumeye, ane tuk na, ta ɳgatay bay. A satay mətsəne wu nakə faya ka tsənumeye, ane tuk na, ta tsəne bay.»

*Yesu a da ha dzeke i ndo maslɛge*

*Markus 4.13-20; Luka 8.11-15*

18 «Dzeke i ndo maslɛge nakay a say mɛgwede mey na, tsənum.

19 Ndo neheye tɛ tsəne bazlam i Bəy i Mbəlom aye ada tɛ tsəne zləm bay aye na, ta ndzəkɪt bo ta tsakay tsəved nakə hulfe a dɛd faya aye. Fakalaw a yaw, a buwa na wu nakə ta slɛga a dɛrev tay aye.

20 Siye hay ta ndzəkɪt bo tɛ sik i pɛlad nakə hulfe a kuts faya aye. Tɛ tsəne bazlam i Mbəlom na, ta tɛma kwayanɳa tɛ mənɳwese eye.

21 Ane tuk na, ta gɛray tsəved a bazlam i Mbəlom ada mɛ pa zləlay a dɛrev tay bay. Tɛ dzala ha faya na, tsekwen tsa. Dɛretsətseh kɛgəbay madzəgur me a ndzatay a gɛr hɛrwi bazlam i Mbəlom. Tsa na, tɛ gɛr ha mɛdzele gɛr abɛra ka Mbəlom tɛ bɛse.

22 Siye hay sa na, ta ndzəkɪt bo ta hulfe neheye tɛ kuts a gay i dak hay aye. Tɛ tsəne bazlam i Mbəlom, ane tuk na, mɛdzal gɛr ka wu i mɛndzibɛra, bor i zlele a ye tay a bo. Wu niye hay tɛ ɳgɛdɛtsa na bazlam i Mbəlom nakə mɛ dɛrev tay aye. Tsa na, bazlam i Mbəlom kɛ wa hohway mɛ dɛrev tay bay.

23 Ndo mekelɛɳ eye hay ta ndzəkɪt bo ta dala nakə lele aye. Hulfe a kuts faya na, a ndzohw lele. Nɛteye tɛ tsəne bazlam i Mbəlom na, ta tɛma a dɛrev tay lele. Bazlam i Mbəlom a gɛl mɛ dɛrev tay lele ada a nah. Neɳɳed makwehe nɛte na, wur eye a ge temerre, neɳɳed sa na, kuro kuro mɛkwa, siye kuro kuro mahkar.»

*Guzer nakə ɳɳwalak bay aye*

24 Yesu a tsikatay dzeke mekelɛɳ eye, a gwadatay: «Bəy i Mbəlom a ndzəkɪt bo na, ta ndo wuray a slɛga hulfe lele eye a guvah ɳgay.

25 Ta hɛvad, ahɛl nakə ndo hay tebiye ka mɛndzehɛre na, ndo mɛne dɛre i ndo niye a ye a slɛgay a dɛma daw zunɳo a walaɳ i daw ɳgay niye. Tsa na, a ye ɳɳway.

26 Ahɛl nakə wu hay tɛ ndzohw, faya ta diye tɛ gɛr aye na, daw zunɳo niye hay tɛ ndzohwaw dɛrmak.

27 Ndo i mɛsler hay ti yaw tɛ gwadɛy a ndo i guvah: “Ndo i gay may, ka slɛga a guvah yak na, hulfe lele tuk na, ada daw zunɳo a yaw a dɛma na, mənɳgay?”

28 Ndo niye a mbɛdatay faya: “Maa ge wu niye na, ndo mɛne dɛre ga.” Ndo i mɛsler hay tɛ tsətsah faya, tɛ gwadɛy: “A saka nɛmaɛ ye mənɳgwede ahaya abɛra mɛ dɛma daw zunɳo daw?”

29 A gwadatay: “A’ay, kɛ ɳgwadum bay, ka ta ɳgwadumeye ka bo dziye ta daw.

30 Gɛrum tay ha tɛ nah ka bo dziye hus a hɛlay i mɛdze. A hɛlay i mɛdze na, na gwadateye a ndo i mɛsler hay: Dzum na daw zunɳo tɛday. Barum na ada kɛ dzumay a ako. Daw na, hayumay gɛr ada kɛ pum na a de ga.”»

*Wur i bɛzanɳ*

*Markus 4.30-32; Luka 13.18-19*

31 Yesu a tsikatay dzeke mekelɛɳ eye sa, a gwadatay: «Bəy i Mbəlom a ndzəkɪt bo na, wur i bɛzanɳ nakə ndo a zla a slɛga a guvah ɳgay.



<sup>32</sup> Mə walaŋ i wur i wu hay tebiye na, neŋgeye tsekweŋ. Ane tuk na, a ndzohw, a gəl na, a ze ala neheye tə sləga ka dədəŋ aye tebiye. A təra andza gardaf, diyeŋ hay tə ŋgar gay tay hay ka hawal eye hay.»

*Dzeke i gəde*

*Markus 4.33-34; Luka 13.20-21*

<sup>33</sup> Yesu a tsikatay dzeke sa, a gwadatay: «Bəy i Mbəlom a ndzəkit bo na, gəde nakə ŋgwas a həl tsekweŋ a dzapa ha ta gufa aye. Gufa niye na, haladzay. A həlaf tay ha ka bo na, gufa niye mahələbə eye a kwasa a həmbət.»

<sup>34</sup> Yesu a tətikatay wu ŋgay hay tebiye a ndo hay na, ta dzeke. A tsikawatay me ze mətsike ta dzeke bay.

<sup>35</sup> A tsikawa andza niye na, hərwi ada wu nakə ndo məde ha bazlam i Mbəlom a tsik aye mə ge bo. Mbəlom a gwad:

«Na tsikateye wu na, ta dzeke.

Na datay ha wu neheye maŋgaha eye kwa abəra ka madazlay i məge məndzibəra aye.‡»

*Yesu a da ka guzer nakə ŋgwalak eye bay aye*

<sup>36</sup> Yesu a ndəv ha mətsike me na, a gər tay ha ndo hay, a ye a gay. Ahəl nakə neŋgeye mə gay aye na, gawla ŋgay hay ti ye ka təv ŋgay. Ti ye naha, ta tsətsah faya, tə gwaday: «Damay ha dzeke i daw zuŋgo nakə ma guvah aye.»

<sup>37</sup> Yesu a mbədətay faya: «Ndo nakə a sləga wur i wu ŋgwalak eye na, neŋ Wawa i Ndo.

<sup>38</sup> Guvah na, məndzibəra. Wur i wu ŋgwalak eye na, ndo neheye ma Bəy i Mbəlom aye. Daw zuŋgo na, ndo neheye ta rahay ha gər a Fakalaw aye.

<sup>39</sup> Ndo məne dəre nakə a sləga daw zuŋgo aye na, Fakalaw. Mədze wu abəra ka dala na, məndəve i məndzibəra nakə Mbəlom ma ndəviye ha aye. Ndo i məsler hay na, gawla i Mbəlom hay.

<sup>40</sup> Andza nakə tə həl daw zuŋgo tə dzay a ako aye na, Mbəlom ma ndəviye ha məndzibəra andza niye dərmak.

<sup>41</sup> Neŋ Wawa i Ndo na sləraweye gawla i Mbəlom hay. Ta həliye tay ha abəra ma Bəy i Mbəlom ndo neheye tebiye faya ta səpatiye tay ha ndo hay a mezeleme aye ta ndo neheye faya ta giye wu nakə ŋgwalak eye bay aye.

<sup>42</sup> Ta kutsiye tay ha a ako bagwar eye. Mə dəma na, ta tuwiye tə mahəpəde zler eye.‡

<sup>43</sup> Ane tuk na, ndo neheye tə pay naha faya a Mbəlom aye na, ta dəviye wuzl wuzl andza pat ma Bəy i Bəba tay Mbəlom. Ndo nakə zləm andaya faya aye na, mə tsəne!»

*Zlele maŋgaha eye*

<sup>44</sup> Yesu a gwadatay sa: «Bəy i Mbəlom a ndzəkit bo tə zlele nakə tə la na a guvah aye. Ndo a huta na zlele eye niye ada a la na, a ŋgaha na sa. A yay a gər haladzay. A ye a səkəm ha wu ŋgay hay tebiye ada a səkəm guvah niye.»

*Wu i maslawa*

<sup>45</sup> A gwadatay sa: «Bəy i Mbəlom a ndzəkit bo sa na, ndo masəkəm ha wu hay. Ma pəliye wu i maslawa neheye a le haladzay aye.

<sup>46</sup> Kə huta wu nakə a ze tay ha siye hay tə məle aye na, ma diye ma səkəmiye ha wu ŋgay hay tebiye ka tsakala. Suloŋ aye na, ma səkəma ahaya wu i maslawa niye.»

*Gadaŋ*



<sup>47</sup> A gwadfatay sa: «Bøy i Mbəlom a ndzəkɪt bo na, ta gadaŋ. Ta kal a dəlov na, ma gəsaweye kələf wal wal haladzay.

<sup>48</sup> Gadaŋ niye kə rah tə kələf na, ta vaha ahaya abəra ma yam. Ta vaha ahaya na, ta ndziye ton, ta paliye kələf ŋgwalak eye hay. Ta piye tay ha a kəteh. Siye neheye ŋgwalak eye bay aye na, ta miye tay ha.

<sup>49</sup> Ma giye bo pat nakə Mbəlom ma ndəviye ha məndzibəra eye na, andza niye. Gawla i Mbəlom hay ta deyeweye ta ŋgəniye tay ha ka bo abəra ndo i sewed hay ta ndo ŋgwalak eye hay.

<sup>50</sup> Ndo i sewed hay na, ta kutsiye tay ha a ako. Mə dəma na, ta tuwiye tə mahəpədə zler eye.\*»

### *Mandəve i bazlam*

<sup>51</sup> Yesu a tsətsah fataya, a gwadfatay: «Wu neheye tebiye na tsik aye na, ka tsənum dāw?»

Ta mbəday faya: «Ayaw, nəmaa tsəne.»

<sup>52</sup> A gwadfatay: «Andza niye, ndo mədzanɣawa bazlam i Mbəlom mapala eye a təra gawla ma Bøy i Mbəlom na, a ndzəkɪt bo ndo i gay nakə faya ma ndohwa ahaya zlele ŋgay abəra mə wu nakə wədəye ada abəra mə wu nakə guram aye.»

### *Ndo i gəma i Nazaret hay ta kərah Yesu*

#### *Markus 6.1-6; Luka 4.16-30*

<sup>53</sup> Ahəl nakə Yesu a ndəv ha mətsikatay dzeke neheye aye na, a ye abəra ka təv eye niye.

<sup>54</sup> A ye a Nazaret, gəma nakə a gəl mə dəma aye. Mə dəma na, a ye a gay i maduwule me. A ye naha a pa bo ka matətikatay wu a ndo hay. A gatay a ndo neheye tebiye mə dəma aye hərbəbəkka. Tə gwadawa: «A hutaw metsəhe nakay na, mənɣay? Maa vəlay gədan ka məge masuwayan neheye na, way?»

<sup>55</sup> Nənɣeye na, wawa i Mari ada bəba ŋgay na, ndo matsətsede mayako bəda? Malamar ŋgay hay na, Yakuba, Yusufa, Simon ada Yuda bəda?

<sup>56</sup> Ada malamar ŋgay dem eye hay nəteye andaya mə walaŋ kway bəda? Maa vəlay gədan nakay tebiye na, way?»

<sup>57</sup> Yawa, hərwi wu neheye tebiye aye, ndo i gəma niye hay ta kərah mədzal ha ka Yesu.

Yesu a gwadfatay: «Ndo məde ha bazlam i Mbəlom na, ndo hay ta təma na ada tə dəslay ha gər kwa mənɣay. Ane tuk na, ma gəma ŋgay nakə tə wa mə dəma ada mə gay ŋgay na, ta rəhay ha gər bay.»

<sup>58</sup> Ma Nazaret na, Yesu kə ge masuwayan haladzay bay hərwi ta dzala ha bay.

## 14

### *Məməte i Yuhana madzəhuḃe ndo a yam*

#### *Markus 6.14-29; Luka 3.19-20, 9.7-9*

<sup>1</sup> A həlay niye na, Herod nənɣeye bəy ka dala i Galile, a tsəne faya ta tsikiye ka Yesu.

<sup>2</sup> Herod a gwadfatay a ndo i məsler ŋgay hay: «Ndo niye ma giye na, Yuhana madzəhuḃe ndo a yam. Kə mbəlaw abəra ma mədahaŋ. Hərwi niye nakə a huta gədan ka məge masuwayan.»

<sup>3-4</sup> Andaya kə ndza haladzay, Herod a zla Herodiyad, ŋgwas i malamar ŋgay Filip. Hərwi niye, Yuhana a gwadaway: «Ta vəl tsəved məzle ŋgwas nakay

\* 13:50 Zəba ma Mata 8.12.

bay.» Tsa na, Herod a gwad̄atay a ndo hay t̄a ḡas na Yuhana, t̄a dzawa na ada t̄a pa na a dan̄gay.

<sup>5</sup> A say a Herod mak̄ad̄e na Yuhana, ane tuk na, a dz̄adzaratay a ndo hay, h̄arwi ndo hay t̄a dzala Yuhana na, ndo mad̄e ha bazlam i Mb̄elom.

<sup>6</sup> Pat i magurlom i m̄awe Herod na, dem i Herodiyad a hats kame i ndo neheye Herod a zalatay a magurlom aye. M̄ahetse i dem niye a yay a ḡar a Herod.

<sup>7</sup> Tsa na, a mbaḁay a dem niye, a gwad̄ay: «Wu nak̄a ka ts̄atsah tebiye na v̄alakeye.»

<sup>8</sup> Dem niye t̄a ma ha ka bo bazlam ta may nḡay. Tsa na, a ye a gwad̄ay a Herod: «D̄asen̄ew ḡar i Yuhana madz̄ahuḁe ndo a yam ka b̄æḡalam.»

<sup>9</sup> Andza niye na, a yay a ḡar a b̄ay bay. Ane tuk na, ḁa k̄a mbaḁa kame i ndo neheye mazala eye hay a magurlom aye. A v̄al ts̄aved̄, t̄a ye t̄a d̄asayaw.

<sup>10</sup> A sl̄ar ndo a gay i dan̄gay, m̄a d̄asaw ḡar i Yuhana madz̄ahuḁe ndo a yam.

<sup>11</sup> Ndo a ye, a d̄asaw ḡar i Yuhana a pa ahaya ka b̄æḡalam. T̄a v̄elay a dem niye. Dem niye a v̄elay a may nḡay.

<sup>12</sup> Gawla i Yuhana hay t̄a ts̄one na, ti yaw, t̄a zla ahaya m̄adahan̄ i Yuhana ab̄era ma dan̄gay t̄a la na. Tsa na, ti ye t̄a d̄a ha wu nak̄a a ge bo aye a Yesu.

*Yesu a v̄alatay wu m̄anday a ndo hay gwezem zlam*

*Markus 6.30-44; Luka 9.10-17; Yuhana 6.1-14*

<sup>13</sup> Yesu a ts̄one labara niye na, a ye mah̄engeye t̄a kwalalan̄ i yam h̄arwi mede a t̄av d̄areḅ eye ab̄era ka ndo hay. Ane tuk na, ndo hay ta s̄ar faya. Ti yaw ab̄era ma wuzlahḡema hay, t̄a pay b̄azay a Yesu.

<sup>14</sup> A ndisil a t̄av niye na, a mb̄azlaw ab̄era m̄a kwalalan̄ i yam. A nḡatatay a ndo hay haladzay na, t̄a gay m̄a bo. A mb̄al tay ha ndo i d̄avats tay neheye t̄a h̄al naha aye.

<sup>15</sup> Huwa a ge na, gawla i Yesu hay ta h̄andz̄ad̄ ka t̄av i Yesu, t̄a gwad̄ay: «Ma-zlambar h̄evad̄ ada t̄av nakay k̄asaf. Gwad̄atay a ndo hay t̄a ye a wuzlahḡema hay h̄arwi ada t̄a ye, t̄a s̄ak̄amaw wu m̄anday.»

<sup>16</sup> Yesu a mbaḁatay faya, a gwad̄atay: «T̄a ye bay. Bo kurom eye v̄alumtay wu m̄anday.»

<sup>17</sup> T̄a gwad̄ay: «Makwala andaya fakwaya kanan̄ na, tapa zlam t̄a k̄alef sulo tsiy tuk na, k̄akay?»

<sup>18</sup> Yesu a gwad̄atay: «H̄alumen̄ ahaya.»

<sup>19</sup> Tsa na, a gwad̄atay a ndo hay: «Nd̄zum ka dala!»

Yesu a h̄al makwala neheye tapa zlam t̄a k̄alef sulo aye. A z̄aba d̄are a mb̄elom, a gay naha sis̄e a Mb̄elom. A nḡona ha makwala niye hay ada a v̄alatay a gawla nḡay hay. Gawla nḡay hay ta nḡan̄atay a ndo hay.

<sup>20</sup> Kwa way a nda ka m̄arehe. Gawla i Yesu hay t̄a hayay ḡar a siye nak̄a a l̄akaw aye na, a rah a gwan̄ kuro ḡar eye sulo.

<sup>21</sup> Ndo neheye t̄a nda makwala niye na, hasl̄aka hay ta giye gwezem zlam. Nḡwas hay ta wawa hay na, ta pasla tay ha bay.

*Yesu a ye ka ḡar i yam t̄a sik*

*Markus 6.45-52; Yuhana 6.15-21*

<sup>22</sup> Kwayan̄ḅa Yesu a gatay kuton̄ a gawla nḡay hay t̄a tsal a kwalalan̄ i yam, t̄a lahay kame mede a diye i d̄alov nen̄ged̄ h̄alay nak̄a bo nḡay eye ma gwad̄ateye a ndo hay «Dum kurom» aye.

<sup>23</sup> Ndo hay ti ye wu tay na, Yesu a tsal a tsaholok mah̄engeye h̄arwi mad̄uwulay me a Mb̄elom. H̄evad̄ a ge na, nen̄geye huya ma tsaholok niye.

<sup>24</sup> Kwalalaŋ i yam nakə gawla ŋgay hay mə dəma aye, dərəŋ ta dala, wudək wudək ma wuzlah i yam. Mətasl faya ma vəzliye haladzay, a say məme ha kwalalaŋ i yam ta dəba ada yam faya ma bəliye ha kwalalaŋ i yam haladzay.

<sup>25</sup> Ta mbəlomda na, Yesu a ye ka təv i gawla ŋgay hay ka gər i yam tə sik.

<sup>26</sup> Tə ŋgatay a Yesu faya ma diye ka təv tay ka gər i yam tə sik na, ta dzədzar haladzay, tə gwad: «Ma giye na, wu matəre ka ndo!» Ta wuda ka bo tə madzədzar eye.\*

<sup>27</sup> Ane tuk na, Yesu a gwadatay: «Tete kurom! Kā dzədzarum bay. Nakay na, neŋ!»

<sup>28</sup> Kwayaŋŋa Piyer a tsikay naha me, a gwaday: «Bəy Maduweŋ, kə ge nəkar na, vəleŋ tsəved nā ye naha ka təv yak ka gər i yam tə sik.»

<sup>29</sup> Yesu a mbəday faya, a gwaday: «Dara.»

Tsa na, Piyer a ndohwaw abəra mə kwalalaŋ i yam, a pa bo ka mede ka gər yam hərwi mədze gər tə Yesu.

<sup>30</sup> Ane tuk na, a zəba mətasl faya ma vəzliye haladzay na, a dzədzar: A dazlay məndərmede a yam. Tsa na, a wuda ka bo: «Bəy Maduweŋ, təma ga ha tey!»

<sup>31</sup> Kwayaŋŋa, Yesu a bəzay naha həlay a Piyer, a gəs na, a gwaday: «Mədzal gər yak hala bay. Ka ge ha mədzal gər yak sulo sulo na, hərwi mey?»

<sup>32</sup> Tə tsal a kwalalaŋ i yam sulo tay eye. Tsa na, mətasl a ndza dedik, a vəzl sa bay.

<sup>33</sup> Gawla ŋgay neheye mə kwalalaŋ i yam aye ta dəkway gurmets a Yesu, tə gwaday: «Nəkar na, Wawa i Mbəlom dedek!»

*Yesu a mbəl tay ha ndo i dəvats hay ma gəma i Genesaret  
Markus 6.53-56*

<sup>34</sup> Yesu ta gawla ŋgay hay tə tas abəra ma dəlov na, tə ndisl a gəma i Genesaret.

<sup>35</sup> Ndo i təv niye tə sər ha Yesu ki yaw. Ti ye tə tsikatay a ndo hay tebiye Yesu ki yaw. Ndo hay tə tsəne na, tə həlaw ndo i dəvats hay tebiye ka təv i Yesu.

<sup>36</sup> Tə gay amboh a Yesu, tə gwaday: «Ndo i dəvats hay tā ye naha tā lamay a me i peteked yak nets na, tsiy.» Tsa na, ndo i dəvats neheye ta lamay aye na, ta mbəl tebiye.

## 15

*Kule i bəba tətə hay  
Markus 7.1-13*

<sup>1</sup> Farisa hay ta ndo mədzaŋgawa bazlam i Mbəlom mapala eye ti yaw abəra ma Zerozelem, ti ye ka təv i Yesu, tə gwaday:

<sup>2</sup> «Gawla yak hay ta rəhay ha gər a kule i bəba tətə kway hay bay na, hərwi mey? Ahəl nakə ta ndiye dəf aye na, tə bara həlay andza i kule i bəba tətə kway hay təbey na, hərwi mey?»

<sup>3</sup> Yesu a mbədatay faya, a gwadatay: «Nəkurom, ka rəhumay ha gər a bazlam i Mbəlom mapala eye bay hərwi kule i bəba tətə kurom hay na, hərwi mey?»

\* **14:26** Ndo siye tə pa a mədzal gər tay na, wu matəre ka ndo andaya. I tay wu matəre ka ndo na, ndo nakə a mət ada a maw a bəra a walaŋ i ndo hay aye, a ge zluwer.

<sup>4</sup> Andza niye, Mbəlom a gwad: “Rəhay ha gər a bəba yak ta may yak.” A gwad sa: “Ndowneye kə tsaday a bəba ŋgay ta may ŋgay na, kutoŋ tã kəd na a bəd.\*”

<sup>5</sup> Ane tuk na, nəkurom faya ka gwađumateye a ndo hay: “Ka slumeye faya mægwađatay a bəba kurom hay ta may kurom hay: Hađe na, nəmaa dzəniye kurom. Ané tuk na, nəmaa vəlay ha a Mbəlom.

<sup>6</sup> Kã rəhumay ha gər a bəba kurom sa bay.” Andza niye, faya ka mbatumeye ha Derewel i Mbəlom hərwi kule kurom.

<sup>7</sup> Nəkurom na, ndo i bəberek hay! Ezay ndo məđe ha bazlam i Mbəlom a tsik fakuma na, deđek. A tsik ahəl niye, Mbəlom a gwad:

<sup>8</sup> “Ndo neheye ta zembedeŋ na, tə bazlam dekdek tsa, dərev tay na, dərəŋ tə neŋ.

<sup>9</sup> Nəteye faya ta zembedeŋeye kəriye, ane tuk na, kəriye bəna deđek bay.

Wu nakə faya ta tətikateye a ndo hay aye na, bazlam mapala eye i ndo hay tsa.<sup>†</sup>”

*Wu nakə ma nasiye ha ndo aye*  
*Markus 7.14-23*

<sup>10</sup> Tsa na, Yesu a zalatay a ndo hay haladzay, a gwađatay: «Pum zləm ada tsənum wu nakay.

<sup>11</sup> Maa nas ha ndo na, wu nakə a ye a bazlam aye bay. Ane tuk na, maa nas ha ndo na, wu nakə a yaw abəra mə bazlam aye.»

<sup>12</sup> Gawla i Yesu hay ta həndzəd naha ka təv i Yesu, tə gwađay: «Bazlam yak neheye ka tsik aye kə ndalatay a Farisa hay na, ka sər təbədəw?»

<sup>13</sup> Yesu a mbəđatay faya, a gwađatay: «Dərizl i gərđaf neheye Bəba ga nakə mə mbəlom a zəv bay aye na, ta ŋgwadiye tay ha abəra mə dəma.

<sup>14</sup> Gərurum tay ha, nəteye na, guluf neheye faya ta gəsətay həlay a guluf hay aye. Guluf ma gəseye həlay a guluf neŋged na, nəteye salamay ta dədiye a bəd.»

<sup>15</sup> Tsa na, Piyer a gwađay: «Damay ha dzeke nakay.»

<sup>16</sup> Yesu a gwađatay: «Nəkurom dərmak, ka sərurum zuk bay daw?

<sup>17</sup> Wu nakə a ye tə bazlam aye na, ma diye a kutes ada ma deyeweye abəra mə bo na, ka sərurum təbədəw?

<sup>18</sup> Ane tuk na, wu nakə a yaw abəra mə bazlam aye na, a yaw mə dərev ada maa nas ha ndo na, neŋeye.

<sup>19</sup> Andza niye, maa yaw abəra mə dərev na, mədzal gər neheye ŋgwalak eye bay aye, məkəđe gər i ndo, mäge madama, mede nakə ŋgwalak eye bay aye, mäge məkal, maraw me kame i sariya, maŋgəlay bəzay a ndo hay.

<sup>20</sup> Wu nakə ma nasiye ha ndo aye na, neheye anaŋ aye. Ane tuk na, mənde wu mənday ze məbere həlay andza kule i bəba tətə kway na, ma nasiye ha ndo bay.»

*Ŋgwas i Kanan wuray a dzala ha ka Yesu*  
*Markus 7.24-30*

<sup>21</sup> Ma dəba eye na, Yesu a lətse abəra ma təv niye, a ye ka dala i Tir ada a Sidon.

\* **15:4** Madayaw abəra mə Ezipt 20.12; Bazlam mapala eye masulo eye 5.16 ada Madayaw abəra mə Ezipt 21.17. † **15:9** Ezay 29.13.

<sup>22</sup> Mə dəma na, ɲgwas i Kanan<sup>‡</sup> wuray a ndzawa ka dala eye niye. Yesu a ndisl naha na, a ye ka tɔv ɲgay. A pa bo ka mawude, a gwaday: «Bəy Maduweɲ, Wawa i Davit, nā gaka mə bo tɔbədew! Dem ga andaya mətəgay, məsəfəre nakə ɲgwalak eye bay aye faya ma geye dəretsətseh haladzay.»

<sup>23</sup> Ane tuk na, Yesu a mbəday faya kwa tsekweɲ bay tebiye.

Gawla ɲgay hay ta həndzəd ka tɔv ɲgay, ta tsətsah faya, tə gwaday: «Həhar na ɲgwas nakay, hərwi faya ma pakweye bəzay tə mawude ɲgay neheye.»

<sup>24</sup> Yesu a mbədatay faya, a gwadatay: «Mbəlom a sləra ga ahaya na, hərwi ndo i Israyel hay, nəteye neheye andza tɔbən mədze eye hay aye.»

<sup>25</sup> Ane tuk na, ɲgwas niye a ye naha, a dəkway gurmets a huvo, a gwaday: «Bəy Maduweɲ, dzəna ga!»

<sup>26</sup> Yesu a mbəday faya, a gwaday: «Məzle wu mənday i wawa hay, məkalatay ha a kəra hay na, lele bay.»

<sup>27</sup> ɲgwas niye a gwaday faya: «Bəy Maduweɲ, ka tsik na, dedek. Ane tuk na, ta dɔ ndo i gay faya ma ndiye wu mənday na, kəra hay ta diye ta paliye neheye a kutsaw faya abəra aye.»

<sup>28</sup> Tsa na, Yesu a mbəday faya a ɲgwas niye, a gwaday: «ɲgwas, mədzal gər yak nakə ka neɲ aye na, haladzay. Wu nakə ka tsətsah aye na, mə ge bo andza nakə a saka aye.» Kwayanɲa dem ɲgay a mbəl.

### *Yesu a mbəl tay ha ndo i dəvats hay haladzay*

<sup>29</sup> Ma dāba eye na, Yesu a lətse abəra ka tɔv niye, a ye ka me i dəlöv i Galile. A ye naha a tsal a mahəmba. Mə dəma na, a ndza ka dala.

<sup>30</sup> Ndo hay haladzay ti ye naha ka tɔv ɲgay. Tə həlay naha ndo neheye ta dzəgədasla aye, guluf hay, ndo matəra eye, mandək hay ada tə siye i ndo i dəvats hay. Ti ye naha, tə həna tay ha kame i Yesu ada a mbəl tay ha.

<sup>31</sup> A gatay a ndo hay hərɔabəkka, hərwi tə ɲgatay a mandək hay faya ta tsikiye me lele, ndo matəra eye hay ta mbəl, ndo neheye ta dzəgədaslaw aye ti ye lele, guluf hay tə ɲgatay a dərə kwetseh kwetseh. Ndo niye hay tə gwad: «Nəmaa zambadaka a nəkar Mbəlom i Israyel hay!»

### *Yesu a vəlataɲ wu mənday a ndo hay gwezem fad* *Markus 8.1-10*

<sup>32</sup> Yesu a zalatay a gawla ɲgay hay, a gwadatay: «Ndo neheye na, tə geɲ mə bo haladzay hərwi anan məhəne mahkar na, nəteye ka tɔv ga ada wu mənday andaya fataya bay. A seɲ məgwadatay “Dum kurom” ze mənde wu mənday bay. Ta giye bəle ka tsəved.»

<sup>33</sup> Gawla ɲgay hay tə gwaday: «Mə kəsaf nakay na, ka hutakweye wu mənday dā məvəlataɲ a ndo neheye haladzay aye na, mənɲgay?»

<sup>34</sup> Yesu a gwadatay: «Tapa i makwala andaya fakuma na, nday?»

Ta mbəday faya, tə gwaday: «Tasəla. Ada kələf wawa eye hay andaya tsakway dərmaɲ.»

<sup>35</sup> Tsa na, Yesu a gwadatay a ndo hay tā ndza ka dala.

<sup>36</sup> Yesu a həl tapa i makwala neheye tasəla aye tə kələf niye hay, a gay naha sişə a Mbəlom. A ɲgəna ha ada a vəlataɲ a gawla ɲgay. Tsa na, gawla ɲgay hay tə vəlataɲ a ndo hay.

<sup>37</sup> Ndo hay tebiye tə nda ka mərehe andza nakə a satay aye. Tə hayay gər a siye neheye a ləkaw aye na, a rah a kətəh tasəla.

<sup>‡</sup> 15:22 ɲgwas nakay na, dem i Yahuda hay bay. Məzele Kanan na, tə zalawatay ha na, a ndo neheye mandza eye ma gəma i Tir ta Sidon aye.

<sup>38</sup> Ndo neheye tã nda wu mãnday niye na, haslãka hay nãteye gwezem faɗ, ŋgwas hay ta wawa hay mã dãma bay.

<sup>39</sup> Ma dãba eye na, Yesu a gwadãtay a ndo hay: «Dum kurom a mãtagay kurom hay tuk.» Nenɓeeye a tsal a kwalalanj i yam, a ye ka dala i Magadan.

## 16

*Farisa hay ta Saduke hay ta tsãtsah masuwayan̄ ka Yesu*

*Markus 8.11-21; Luka 12.54-56*

<sup>1</sup> Farisa hay ta Saduke hay ta hãndzãɗ ka tãv i Yesu. A satay mãhãle faya abãra suwat. Ta tsãtsah faya, tã gwadãy: «Gamay masuwayan̄ nakã ma diye ha ka yaw abãra ka tãv i Mbãlom aye.»

<sup>2</sup> Yesu a mbãɗatay faya, a gwadãtay: «Nãkurom ka zãbum ka pat faya ma dãdiye na, ka gwadũm: “Tãdœ na, pat ma dãviye lele hãrwi mbãlom a zãba ndozza.”

<sup>3</sup> Tã mekedœ pãrik ka ŋgatumay mbãlom a zãba andza pat na, ka gwadũm: “Bãgom na, yam ma piye.” Andza niye ka sãrum mangãne ha ka bo abãra hãlay nakã ma giye tã mazãbe ka mbãlom, ada wu neheye faya ta giye bo anãke aye a say mãgwede mey na, ka sãrum bay na, hãrwi mey?

<sup>4</sup> Ndo neheye a hãlay nakay na, nãteye seweɗ eye hay, nãteye ta mbãɗay dãba a Mbãlom, faya ta tsãtsahiye masuwayan̄. Ane tuk na, ma dãba i masuwayan̄ i Zonas\* ndo mãɗe ha bazlam i Mbãlom nakã tã ŋgatay aye na, ta ŋgateye a masuwayan̄ mekelẽy eye bay.»

Tsa na, Yesu a gãr tay ha, a ye ŋgway.

<sup>5</sup> Yesu ta gawla ŋgay hay tã tsal a kwalalanj i yam, ti ye ka dãlov, tã tas a diye nenɓeɗ. Ti ye na, ta mãtsa ha gãr ta mãzle makwala ka hãlay.

<sup>6</sup> Yesu a gwadãtay: «Gum metsehe! Tsãpum gãr kurom abãra ka gãɗe i Farisa hay ta Saduke hay.»

<sup>7</sup> Nãteye tã tsãne andza niye, tã kãɗ wuway mã walanj tay, tã gwad: «A tsik andza niye na, hãrwi nakã ka mãtsakwa ha gãr ta mãzlaw makwala aye.»

<sup>8</sup> Yesu a sãratay naha ka wu nakã faya ta dzaliye faya aye, a gwadãtay: «Nãkurom na, mãdzal gãr a kãtsakum. Ka kãɗum wuway ka makwala na, hãrwi mey?

<sup>9</sup> Hus anãke ki yakum a mãdzal gãr kurom zuk bay dãw? Makwala tapa zlam, ndo hay gwezem zlam tã nda ada siye ka hayumay gãr na, gwanj nday na, a makumaw a gãr tãbãɗew?

<sup>10</sup> Ada makwala nakã tapa tasãla, ndo hay gwezem faɗ tã nda aye na, kã makumaw a gãr bãɗaw? Ka hayumay gãr a siye na, kãteh nday?

<sup>11</sup> Na gwadãkum: Tsãpum gãr kurom abãra ka gãɗe i Farisa hay ada i Saduke hay. Na tsikakum ka makwala bay na, ka sãrum tãbãɗew?»

<sup>12</sup> Gawla i Yesu hay tã sãr ha tuk Yesu a tsikatay «Tsãpum gãr kurom» na, abãra ka gãɗe nakã a kwasawa ha wu aye bay. Ane tuk na, ta tsãpiye gãr tay na, abãra ka matãtike i Farisa hay ta Saduke hay.

*Piyer a da ha Yesu nenɓeeye Kãriste*

*Markus 8.27-30; Luka 9.18-21*

<sup>13</sup> Ma dãba eye na, Yesu ta gawla ŋgay hay ti ye ka dala i Sezare Filipi. Tã ndisl a dãma na, a tsãtsah ka gawla ŋgay hay, a gwadãtay: «Ndo hay tã gwadã ka nenj Wawa i Ndo na, nenj way?»

<sup>14</sup> Ta mbãɗay faya, tã gwadãy: «Ndo mekelẽy eye hay tã gwadã nãkar na, Yuhana madzãhubẽ ndo a yam. Ndo siye hay tã gwadã nãkar na, Eliya. Ndo

\* 16:4 Zãba mã Mata 12.41.

siye hay sa na, tə gwad nəkar Zeremi kəgəbay nəkar nəte mə walaŋ i siye i ndo mədə ha bazlam i Mbəlom hay.»

15 Yesu a gwadatay: «Ada nəkurom ka gwadum i kurom, neŋ na, way?»

16 Simon Piyer a mbəday faya, a gwaday: «Nəkar na, Kəriste, Wawa i Mbəlom nakə ta sifa aye.»

17 Yesu a gwaday: «Məŋgweŋe ka gər yak Simon wawa i Zonas hərwi maa daka ha dedək nakay na, ndo zezeŋ bay. Ane tuk na, maa daka ha na, Bəba ga mə mbəlom.

18 Neŋ faya na gwadakeye: Nəkar na, Piyer, andza məgwede pələd. Na hayay gər a ndo ga hay na, ka pələd eye nakay andza pələd nakə ta dəzliye faya gay aye. Gədaŋ i mədahaŋ ma sliye məgatay wuray kwa tsekweŋ bay.

19 Na vəlakeye kəle i mahəndəke məged i Bəy i Mbəlom. Wu nakə ka kərah ka məndzibəra aye na, ta kərahiye mə mbəlom. Wu nakə ka təma ka məndzibəra aye na, ta təmiye mə mbəlom.»

20 Tsa na, Yesu a gatay me a gawla ŋgay hay lele, a gwadatay: «Neŋ na, Kəriste, kə tsikumay a ndəray bay.»

*Yesu a da ha məməte ŋgay ta məmbəlaw ŋgay abəra ma mədahaŋ  
Markus 8.31-33; Luka 9.22*

21 Yesu a dazlay mədatay ha a gawla ŋgay hay parakka, a gwadatay: «Kutoŋ na diye a Zerozelem ada madugula i Yahuda hay, bagwar hay i ndo neheye tə vəlaway wu a Mbəlom aye ta ndo neheye tə dzangawa bazlam i Mbəlom mapala eye ta seŋeye dəretsatsəh. Ta kədiye ga ada məhəne sulo mamahkar eye na, na lətseweye abəra ma mədahaŋ.»

22 Piyer a zalay a Yesu kətsah mahəŋgeye, a gay me, a gwaday: «Bəy Maduweŋ, Mbəlom mə tsəpa kar. Ta dedək wuray ma gakeye bay.»

23 Ane tuk na, Yesu a mbəda me, a gwaday a Piyer: «Do abəra ka təv ga! Do a dəba, nəkar na, Fakalaw. Faya ka ŋgiye fagaya balay. Ka dzala gər andza Mbəlom bay, ka dzala gər na, andza i ndo zezeŋ.»

*Məpay bəzay a Yesu na, kəkay?  
Markus 8.34-9.1; Luka 9.23-27*

24 Yesu a gwadatay a gawla ŋgay hay sa: «A say a ndoweye məpeŋ bəzay na, mə gər ha wu nakə a say a dərəv ŋgay aye. Mə zla mayako məzləmbada eye ada mə peŋ bəzay.†

25 Andza niye, ndo nakə a say mətəme ha məsəfəre ŋgay aye na, ma dziye ha dūh. Ane tuk na, ndo nakə ma dziye ha məsəfəre ŋgay hərwi ga aye na, ma hutiyə na dūh.

26 Tadə ndoweye kə huta zlele i məndzibəra tebiye a neŋgeye, ane tuk na, kə dze ha məsəfəre ŋgay na, ŋgama eye na, mey? Wu andaya nakə ndo ma sliye mambəda ahaya məsəfəre ŋgay na, mey?

27 Neŋ Wawa i Ndo na deyeweye ta gawla i Mbəlom hay ma məzla6 i Bəba ga. Na yaw na, na vəleye kwa a way wu i madagər ŋgay andza məsler ŋgay neheye a ge aye.

28 Neŋ faya na gwadaikumeye: Sərum ha na, ndo siye hay mə walaŋ kurom neheye anəke kanaŋ aye na, ta mətiye zuk bay, ta ŋgeteŋeye a neŋ Wawa i Ndo, na deyeweye andza bəy təday.»

† 16:24 Zəba mə Mata 10.38.

## 17

*Bo i Yesu a mbəda*

*Markus 9.2-13; Luka 9.28-36*

<sup>1</sup> Ma dəba i məhəne məkwa na, Yesu a zla Piyer, Yakuba ada Yuhana malamar i Yakuba. A ye tay ha a gər i mahəmba zəbəl eye, dəren abəra ta ndo hay.

<sup>2</sup> Mə dəma na, Yesu a mbəda ka dəre tay. Dəre ŋgay a dəv andza pat, ada peteked ŋgay hay ta təra herre kudəkudek a dəv dzaydzay.

<sup>3</sup> Kwayanŋa gawla i Yesu neheye mahkar aye tə ŋgatatay a Musa ta Eliya nəteye faya ta tsikiye me tə Yesu.

<sup>4</sup> Tsa na, Piyer a gwadāy a Yesu: «Bəy Maduweŋ, lele na, ndzakwa kanan. Tadə a saka na, na kəruwakumeye madzawadzawa mahkar, nəte i yak, nəte i Musa ada nəte i Eliya.»

<sup>5</sup> Ahəl nakə Piyer faya ma tsikiye me mba aye na, pazlay herre a mbəzlaw fataya. Ma pazlay niye na, mətsike me a tsənew abəra mə dəma, a gwad: «Nakay na, wawa ga. Na wuda na haladzay. Na ŋgwasə tə neŋgeye. Pumay zləm a wu nakə ma tsikakumeye.»

<sup>6</sup> Gawla i Yesu neheye mahkar aye tə tsəne andza niye na, tə dəd dəbuz dəbuz da'ar ka dala. Zluwer a gatay haladzay.

<sup>7</sup> Yesu a həndzəd naha ka təv tay, a tətəl fataya ada a gwadətay: «Lətsum! Zluwer m̄a gakum bay.»

<sup>8</sup> Gawla i Yesu niye hay tə zla gər ka mbəlom, ta zəba dəre, tə ŋgatay na, a Yesu mahəŋgeye.

<sup>9</sup> Ahəl nakə faya ta mbəzlaweye abəra mə mahəmba aye na, Yesu a gwadətay: «Wu nakə ka ŋgatumay aye na, k̄a tsikumay a ndəray bay hus a pat nakə neŋ Wawa i Ndo na lətseweye abəra ma mədahan aye.»

<sup>10</sup> Tsa na, gawla ŋgay hay ta tsətsah faya, tə gwadāy: «Ndo neheye tə dzanŋawa bazlam i Mbəlom mapala eye tə gwad na, Eliya ma lahaweje madayaw təday na, hərwi mey?»

<sup>11</sup> Yesu a mbədətay faya, a gwadətay: «Dedek, Eliya ma deyeweje ma lambadiye tay ha wu hay tebiye.

<sup>12</sup> Ane tuk na, neŋ faya na tsikakumeye, Eliya na, 6a ki yaw. Ndo hay ta sər na bay. Ta gay wu nakə a satay aye. Nəteye ta geŋeye dəretsətseh a neŋ Wawa i Ndo andza niye dərmak.»

<sup>13</sup> Gawla ŋgay hay tə tsəne i tay na, Yesu a tsikatay ka Yuhana madzəhuḅe ndo a yam.

*Yesu a mbəl ha wawa nakə mahorvov a gay aye*

*Markus 9.14-29; Luka 9.37-43*

<sup>14</sup> Yesu ta gawla ŋgay tə ndislew ka təv i ndo hay na, ndo wuray a həndzəd ka təv i Yesu, a ye naha a dəkway gurmets kame ŋgay.

<sup>15</sup> Ada a gwadāy: «Bəy Maduweŋ, wawa ga a gaka mə bo təbədew? Mahorvov a gay, faya ma geye dəretsətseh haladzay. A kalawa ha a ako kəgəbay a yam.

<sup>16</sup> Na zlatayaw a gawla yak hay, ane tuk na, tə sla faya məmbəle ha bay.»

<sup>17</sup> Yesu a gwad: «Nəkurom neheye anəke, ka dzalom ha ka Mbəlom bay aye. Na ndziye ka təv kurom na, hadzəgay? Na zliye ŋgatay hərwi kurom mändze hadzəgay? Ahe! Zluwerŋ ahaya wawa eye kanan!»

<sup>18</sup> Tə zlay naha wawa niye. Yesu a gay me a məsəfəre nakə ŋgwalak eye bay aye. Tsa na, a ndohwaw abəra mə bo i wawa niye. Kwayanŋa wawa niye a mbəl.



<sup>19</sup> Ahəl nakə Yesu ta gawla ŋgay hay, nəteye mahəteye na, gawla ŋgay hay ta həndzəd naha ka təv ŋgay, tə gwadəy: «Ada nəmay na, nəmaa sla faya mahəhere məsəfəre nakay təbey na, hərwi mey?»

<sup>20</sup> Yesu a mbədətay faya, a gwadətay: «Hərwi nakə ka dzalum ha ka neŋ haladzay bay aye. Neŋ faya na tsikakumeye, sərūm ha tađə məpe mədzal gər kurom mā ge tsekweŋ andza wur i bəzan na, ka slumeye məgwadəy a mahamba nakay: “Lətse abəra kanan, do katadəy.” Ma lətsiye, ma diye. Wuray kwa tsekweŋ ma dakumeye me bay. [

<sup>21</sup> Ada slala i məsəfəre nakay ma ndohwaweye andza niye tsa bay. Ma ndohwaweye na, ma rəzlay a gər tə mađuwule me ada ta daliyam.]»

*Yesu a da ha masulo eye məməte ŋgay ta mələtsew ŋgay abəra ma mədahan  
Markus 9.30-32; Luka 9.43-45*

<sup>22</sup> Pat wuray na, Yesu ta gawla ŋgay hay, nəteye mahaya gər eye ma Galile. Yesu a gwadətay: «Neŋ Wawa i Ndo na, ta gəsiye ga, ta vəlateye ga ha a həlay a ndo hay.

<sup>23</sup> Ta kədiye ga mədahan eye, ada ma məhəne mamahkar eye na, na lətseweye abəra ma mədahan.» Gawla ŋgay hay tə tsəne andza niye na, a ndalatay haladzay.

*Məvəle dzanjal i gay məvəlay wu a Mbəlom*

<sup>24</sup> Ahəl nakə Yesu ta gawla ŋgay hay tə ndisl a Kafernahum aye na, ndo neheye tə hayaway gər a dzanjal i gay məvəlay wu a Mbəlom aye, ta həndzəd ka təv i Piyer, ta tsətsah faya, tə gwadəy: «Miter kurom na, ma vəliye dzanjal i gay məvəlay wu a mbəlom təbədew?»

<sup>25</sup> Piyer a mbədətay faya, a gwadətay: «Ma vəliye.»

Tsa na, Piyer a ye a gay. A ye naha kwayanŋa Yesu a lah mətsikay me, a gwadəy: «Simon, ka dzala mə gər yak na, kəkay? Bəy i məndzibəra ma hutiiye dzanjal tə wu nakə tə bər məvəle aye na, mə həlay i way? Mə həlay i ndo i dala eye niye hay tsukudu mə həlay i bərakəzan hay daw?»

<sup>26</sup> Piyer a mbədətay faya, a gwadəy: «Bərakəzan hay.»

Yesu a gwadəy: «Ndo i dala eye niye hay ta vəliye bay.

<sup>27</sup> Ane tuk na, vəlamatay bəna ma ndalateye. Hərwi niye zla wu məgəse kələf yak, do ka me i dəlov. Ka ye na, kal a dəma wu məgəse kələf. Kələf nakə a lah faya aye na, gəs na ada kə həndəkay ha bazlam. Ka hutiiye kwar i suloy nəte mə dəma, zla ahaya ada kə vəlamatay dzanjal may.»

## 18

*Mata tərə bagwar eye ma Bəy i Mbəlom na, way?*

*Markus 9.33-37,42; Luka 9.46-48*

<sup>1</sup> A həlay niye na, gawla i Yesu hay ta həndzəd ka təv i Yesu, ta tsətsah faya, tə gwadəy: «Mata tərə bagwar eye ma Bəy i Mbəlom na, way?»

<sup>2</sup> Yesu a tsəne andza niye na, a zalay a wawa, a lətse ha a wuzlah tay,

<sup>3</sup> tsa na, a gwadətay: «Neŋ faya na tsikakumeye: Sərūm ha na, tađə ka mbədum ha mede kurom, ka tərūm andza wawa nakay bay na, ka deyumeye a Bəy i Mbəlom bay.

<sup>4</sup> Tađə ndoweye ka tərə ha bo ŋgay wawa eye andza wawa nakay na, ma tərīye bagwar eye ma Bəy i Mbəlom.

<sup>5</sup> Ada ndoweye ka təma na wawa nakay lele andza wawa nakay anan eye hərwi nakə a wuda ga aye na, a təma na neŋ.

6 NdoweƷe ka sapat ndo nate ma walaŋ i wawa neheƷe ta dzala ha ka neŋ aye a mezeleme na, ŋgama ta ɓaray maɗiz i kwar a ɗay ada ta kal ha a huɗ i balay.»

### *Masape*

*Markus 9.43-48; Luka 17.1-2*

7 Yesu a gwadatay sa: «Ɗaretsatseh ka gar i ndo i mandzibera neheƷe faya ta sapatiye tay ha ndo hay a mezeleme aye. Ta dedek, wu niye hay na, ma giye andaya huya. Ane tuk na, ɗaretsatseh ka gar i ndo nakə ma sapatiye ndo a mezeleme aye.

8 Taɗa halay yak kagabay sik yak ma diye kar ha a mezeleme na, ɗas tay ha ada kuts tay ha ɗaren ta nakar. Ngama mede a sifa ta halay yak nate kagabay ta sik yak nate ta bamala nakə ta kaliye kar ha a ako nakə ma mbatiye ɗaɗa bay ta halay yak sulo kagabay ta sik yak sulo aye.

9 Taɗa ɗare yak ma diye kar ha a mezeleme na, ŋgwad na ada ka kal ha ɗaren ta nakar. Ngama mede a sifa ta ɗare yak nate ta bamala nakə ta kaliye kar ha a ako nakə ɗaɗa ma mbatiye bay ta ɗare yak sulo aye.»

### *Dzeke i tɓaŋ nakə a dze aye*

10 Yesu a gwadatay sa: «Gum metsehe! Ka zəbum ka ndo neheƷe makatsa eye hay aye andza wu kariye bay. Neŋ faya na gwadakumeye, gawla i Mbəlom tay hay nateye andaya pat pat ka taw i Bəba ga ma mbəlom. [

11 Hərwi neŋ Wawa i Ndo na yaw hərwi mətəme tay ha ndo neheƷe ta dze aye.]»

12 A gwadatay sa: «Nəkurom ka dzalum na, kəkay? Taɗa ndo tɓaŋ ŋgay andaya temerre, ada nate ma walaŋ i tɓaŋ niye a dze na, ma gariye ha kuro kuro tsid gar eye tsid ma mahamba, ma diye mapala ahaya nakə a dze aye.

13 Neŋ faya na tsikakumeye: Taɗa kə huta na na, ɗərev ŋgay ma ŋgwasiye haladzay hərwi tɓaŋ niye nate aye a ze neheƷe kuro kuro tsid gar eye tsid ta dze təbey aye.

14 Andza niye ɗərmak, Bəba kurom nakə ma mbəlom aye a say na, ndəray kway nate ma walaŋ i ndo neheƷe makatsa eye ma dze bay.»

### *Malamar yak kə gaka mənese na, ka giye na, kəkay?*

15 Yesu a gwadatay sa: «Taɗa malamar yak kə gaka mənese na, do ka taw ŋgay tsikay faya ahəl nakə nəkurom sulo ta neŋgeye aye. Taɗa ka təma bazlam yak na, kə təma ha abəra ma mezeleme.

16 Taɗa ka təma bazlam yak bay na, dum ka taw ŋgay ta ndo nate kagabay ta ndo sulo. Andza niye, maŋgəne ha sariya na, ta ndo hay sulo kagabay ndo hay mahkar.\*

17 Ane tuk na, ka təma bazlam kurom bay na, tsikatay a ndo mape mədzal gar hay ka neŋ. Ka kərah bazlam i ndo mape mədzal gar hay ka Kəriste na, gar ha zəba faya andza ndo nakə a sər Mbəlom bay aye kagabay andza ndo matsekele dzaŋgal.

18 «Neŋ faya na gwadakumeye: Sərum ha na, wu neheƷe tebiye ka kərahum ka mandzibera aye na, ta kərahiye ma mbəlom ɗərmak. Wu neheƷe tebiye ka təmum ka mandzibera aye na, ta təmiye ma mbəlom ɗərmak.

19 «Neŋ faya na gwadakumeye sa: Sərum ha na, taɗa ndo hay sulo ka mandzibera ta dzapa ayaw ka wu nakə ta tsətsahiye ta maɗuwule me aye na, Bəba ga ma mbəlom ma vətateye wu nakə ta tsətsah aye.

\* 18:16 Bazlam mapala eye masulo eye 19.15.

<sup>20</sup> Hərwi ndo sulo kəgəbay mahkar ta haya gər ka maɸuwulay me a Mbəlom ta məzele ga na, neŋ andaya mə walaŋ tay.»

*Dzeke i ndo nakə a kərah məpəsay ha mənese a ndo aye*

<sup>21</sup> Piyer a həndzəd ka təv i Yesu, a tsətsah faya, a gwadəy: «Bəy Maduweŋ, taɸə malamar ga kə geŋ mənese na, na pəsay ha sik nday? Madzəga tasəla ɸaw?»

<sup>22</sup> Yesu a gwadəy: «Na gwadəakeye madzəga tasəla bay, ane tuk na, sik kuro kuro tasəla madzəga tasəla.

<sup>23</sup> «Hərwi niye, Bəy i Mbəlom a ndzəkət bo ta bəy wuray a say matsətsehe gwedere ŋgay ka ndo məge məsler ŋgay hay.

<sup>24</sup> A dazlay a məsler na, tə gəsəy naha ndo i məsler ŋgay gwedere ŋgay faya suloy maliyoŋ haladzay a pasla bo bay.

<sup>25</sup> Ndo niye na, wuray ŋgay andaya məheme ha gwedere niye bay. Bəy niye a gwad ma səkəmiye ha andza beke, neŋgeye, ŋgwas ŋgay, wawa ŋgay hay tə wu ŋgay tebiye hərwi məheme ha gwedere ŋgay.

<sup>26</sup> Ndo məge məsler ŋgay niye a ɸəkway gurmets, a gay amboh, a gwadəy: «Amboh, zleŋ ŋgatay, na hamakeye suloy tebiye.»

<sup>27</sup> Tsa na, a gay mə bo a bəy niye, a gəray ha gwedere niye ada a gər ha a ye ŋgway.

<sup>28</sup> «Ndo məge məsler niye a ndohwaw abəra na, tə dzəgər ta mandala ŋgay nakə tə gawa məsler salamay aye. Gwedere ŋgay andaya ka mandala ŋgay niye kwar i suloy temerre. A gəs na ndo niye məmbərlew keeŋŋek, a gwadəy: «Hemeŋ gwedere ga!»

<sup>29</sup> Mandala ŋgay niye a ɸəkway gurmets, a gay amboh, a gwadəy: «Zleŋ ŋgatay, na hamakeye.»

<sup>30</sup> Ndo məge məsler niye a kərah. A gəs mandala ŋgay niye a kal ha a ɸaŋgay. Ma ndziye mə ɸəma hus a pat nakə kə hamay gwedere ŋgay aye.

<sup>31</sup> Siye i ndo məge məsler i bəy niye tə ŋgatay a wu nakə a ge bo aye na, a ndalatay. Ti ye mata təkəray a ndo i gay tay.

<sup>32</sup> «Ndo i gay tay a tsəne andza niye na, a zalay a ndo məge məsler ŋgay niye. A yaw na, a gwadəy: «Nəkar na, ŋgwalak i ndo bay. Na gəraka ha gwedere ga tebiye hərwi nakə ka geŋ amboh aye.

<sup>33</sup> Nəkar ɸərmak na, mandala yak mə gaka mə bo andza nakə nəkar ka geŋ mə bo aye ɸərmak.»

<sup>34</sup> A ndalay a ndo i gay tay haladzay. Tsa na, a slər ndo məge məsler ŋgay niye a ɸaŋgay hərwi məgay ɸəretsətseh. Ma həbiye hus kə hama gwedere ka bo bəra tebiye.»

<sup>35</sup> Yesu a gwadətəy: «Taɸə kwa way kə pəsay ha mənese a malamar ŋgay peteh abəra mə ɸərev bay na, Bəba ga mə mbəlom ma giye kurom ha andza niye ɸərmak.»

## 19

*Bazlam i Yesu ka gər i mahəhere ŋgwas*

*Markus 10.1-12*

<sup>1</sup> Yesu a ndəv ha bazlam ŋgay niye hay na, a lətse abəra ka dala i Galile, a ye ka dala i Yahuda a diye neŋged i magayam i Yurdum.

<sup>2</sup> Ndo hay məbərzəzza haladzay ta zəŋgal na. A məbəl tay ha ndo hay abəra ma ɸəvats tay hay.

<sup>3</sup> Farisa hay ta hændzəd ka tøv i Yesu. A satay mähäle faya abəra suwat. Ta tsətsah faya, tə gwaday: «Bazlam kway mapala eye kə vəl tsəved ka mahəhere ngwas hərwi kwa i wu waray waray daw?\*

<sup>4</sup> Yesu a mbədatay faya, a gwadatay: «Ka dzanġum wu nakə mawatsa eye mə Derewel i Mbəlom aye təbədew? Ka madazlay na, Mbəlom a ge hasləka ada ngwas,

<sup>5</sup> ada a gwad: «Hərwi niye hasləka ma gəriye ha bəba ngay ta may ngay, ta ndziye ta ngwas ngay. Ada nətəye ta təriye na, bo nətə.†»

<sup>6</sup> Andza niye, nətəye sulo sa bay, ane tuk na, andza ndo nətə.» Yesu a gwadatay sa: «Ndo zezeŋ mâ ngəna ha wu nakə Mbəlom a dzapa ha aye bay.»

<sup>7</sup> Farisa hay tə gwaday: «Musa a gwad hasləka ma ta həhariye na ngwas ngay na, mâ watsay derewel i mahəhere a həlay a ngwas ngay. Ada a tsik andza niye na, hərwi mey?»

<sup>8</sup> Yesu a mbədatay fay, a gwadatay: «Musa a vələkum tsəved ka mahəhere ngwas kurom hay na, hərwi dərev kurom makula eye tonġwa tonġwa. Ane tuk na, ka madazlay na, andza niye bay.

<sup>9</sup> Neŋ faya na tsikakumeye, kwa way ka həhar na ngwas ze məndzay a gər ka mäge madama na, ada kə zla a dəma ngwas mekeleŋ eye na, kə ge madama.»

<sup>10</sup> Gawla ngay hay tə gwaday: «Tadə bazlam i hasləka ta ngwas andza niye na, ngama məzle ngwas bay.»

<sup>11</sup> Yesu a mbədatay faya, a gwadatay: «Ndo hay tebiye ta sliye faya matəme matətike nakay bay. Ane tuk na, Mbəlom ma vələteye gədanj a siye hay matəme.

<sup>12</sup> Ndo siye hay tə sla faya məzle ngwas bay na, hərwi wu mekeleŋ eye hay wal wal. Ndo siye hay tə wa tay ha andza niye, bo tay a say ngwas bay. Ndo siye hay na, ta dadək tay ha hərwi ada tâ zla ngwas bay. Siye hay ta zla ngwas bay na, hərwi Bəy i Mbəlom. Ndo nakə kə sla faya matəme matətike nakay aye na, mâ təma.»

*Yesu a təma wawa hay*

*Markus 10.13-16; Luka 18.15-17*

<sup>13</sup> Ma dəba eye na, ndo hay tə həl naha wawa hay ka tøv i Yesu hərwi ada mâ pa fataya həlay ada mâ duwulay me a Mbəlom hərwi tay. Ane tuk na, gawla ngay hay tə ngatatay a ndo hay faya ta həliye naha wawa hay ka tøv i Yesu na, tə gatay me.

<sup>14</sup> Yesu a gwadatay: «Gərūm tay ha wawa hay tâ yaw ka tøv ga. Kâ həharum tay ha bay, hərwi Bəy i Mbəlom mavəla eye na, a slala i ndo neheye andza wawa neheye.»

<sup>15</sup> Yesu a pa həlay ka wawa niye hay hərwi məpe fataya ngama. Tsa na, a ye ngway abəra ka tøv niye.

*Gawla zlele eye*

*Markus 10.17-31; Luka 18.18-30*

<sup>16</sup> Ndo wuray a yaw ka tøv i Yesu, a tsətsah, a gwaday: «Miter, na giye wu ngwalak eye na, mey nakə ada na hutiyə sifa nakə ma ndəviye bay aye?»

<sup>17</sup> Yesu a mbəday faya, a gwaday: «Ka tsətsahiye fagaya wu ka gər i wu ngwalak eye na, hərwi mey? Ndo ngwalak eye na, Mbəlom nətə ngweŋ. Tadə a saka məhute sifa ka tøv i Mbəlom na, rəhay ha gər a bazlam ngay mapala eye.»

<sup>18</sup> Ndo niye a tsətsah ka Yesu: «Bazlam mapala eye waray hay?»

\* 19:3 Madazlay i wu hay 1.27; 5.2. † 19:5 Madazlay i wu hay 2.24.

Yesu a mbəday faya, a gwaday: «Kâ kəf gər i ndo bay, kâ ge madama bay, kâ ge məkal bay, kâ raw me ka ndo kame i sariya bay,

<sup>19</sup> rəhatay ha gər a bəba yak ta may yak. Ada wuda ndo i maged yak dərmak andza ka wuda na gər yak.<sup>‡</sup>»

<sup>20</sup> Gawla niye a gwaday a Yesu: «Bazlam neheye mapala eye na rəhay ha gər tebiye. Maa ləkenjəw mäge na, sa mey?»

<sup>21</sup> Yesu a gwaday: «Kə saka matəre ndo ngwalak eye na, do ta səkam ha wu yak ada kâ ngənatay suloy aye a ndo mətawak eye hay. Ka ge andza niye na, ka hutiyə zlele mə mbəlom. Tsa na, dara pen bəzay.»

<sup>22</sup> Gawla niye a tsəne andza niye na, a ye ngway ta mevel eye hərwi zlele ngay na, haladzay.

<sup>23</sup> Yesu a gwadatay a gawla ngay hay: «Nej faya na gwadəkumeye, sərūm ha, mawura bo eye hərwi ndo i zlele hay mede a Bəy i Mbəlom.

<sup>24</sup> Ada nej faya na gwadəkumeye anaj sa: Tə bəmalə nakə ndo i zlele ma diye a Bəy i Mbəlom aye na, ngama zləgweme mā ye ta bəd i ləpəre.»

<sup>25</sup> Gawla ngay hay tə tsəne bazlam ngay niye hay andza niye na, a gatay hərəbəkka, tə gwad: «Ane tuk na, kə ge andza niye na, mata sle mətəme na, way?»

<sup>26</sup> Yesu a zəba fataya, a gwadatay: «Ndəray ma sliye mətəme bay, ane tuk na, Mbəlom na, wuray a zay gədanj təbey.»

<sup>27</sup> Piyer a mbəday naha faya, a gwaday: «Tsəne! Nəmay anaj, nəmaa gər ha wu hay tebiye hərwi məpaka bəzay na, kəkay? Mata ge bo tə nəmay na, mey?»

<sup>28</sup> Yesu a gwadatay: «Nej faya na gwadəkumeye: Sərūm ha na, nej Wawa i Ndo na ndziye ka təv məndze i bəy ta məzlaḅ ma məndzibəra wədeye. Nəkurom neheye ka pumenj bəzay aye, ka ndzumeye ka təv məndze i bəy kuro gər eye sulo dərmak hərwi məgatay sariya a gwalə i Israyel hay kuro gər eye sulo.

<sup>29</sup> Ada ndo neheye tebiye tə gər ha gay tay, malamar tay hasləka eye hay ta malamar tay dem eye hay, bəba tay, may tay, wawa tay hay, guvah tay hay hərwi məzele ga aye na, ta hutiyə a dəma ma ziye madzəga temerre ada ta hutiyə sifa nakə ma ndəviye bay aye.

<sup>30</sup> Mə walañ i ndo neheye anəke nəteye ndo i me hay aye na, haladzay ta təriye ndo i dəba ada mə walañ i ndo neheye anəke nəteye ndo i dəba hay aye na, haladzay ta təriye ndo i me.»

## 20

### *Dzeke i ndo nakə a həl ndo mäge məsler hay a guvah ngay aye*

<sup>1</sup> «Bəy i Mbəlom a ndzəkit bo na, ndo wuray a ndohwaw abəra mə gay mekedə pərik hərwi məpələ ndo mäge məsler hay a guvah ngay.

<sup>2</sup> Tə ge tsakala i məfəte hwapat na, kwar i suloy nate.\*

<sup>3</sup> Ta bəre tsid i mekedə na, a ye sa. A ye a ndzatay a gər a siye hay faya ta giye məsler bay, nəteye malətsa eye kəriye.

<sup>4</sup> A gwadatay: “Nəkurom dərmak dum fətumenj guvah ga, na vələkumeye wu i madagər kurom lele.”

<sup>‡</sup> 19:19 Madayaw abəra mə Ezipt 20.12-16; Bazlam mapala eye masulo eye 5.16-20 ada Levitik 19.18.

\* 20:2 A həlay i Yesu na, kwar i suloy nate na, a sla məvələ merəfi i ndo nakə a ge məsler hwapat aye.

<sup>5</sup> Ndo niye hay tɔ tsɛne andza niye na, ti ye a guvah ɲgay niye. Ndo niye a ye mapɛle ndo i mɛsler hay ta magɛrhɛpat, ada ta bɔre mahkar i huwa a ge andza niye sa.

<sup>6</sup> Ta bɔre zɛm na, a ye sa. A ye a huta ndo hay nɛteye malɛtsa eye. A tsɛsah fataya, a gwadɛtay: “Nɛkurom mandza eye kɛnan hwapat ze mɛge mɛsler na, hɛrwi mey?”

<sup>7</sup> Ta mbɛɗay faya, tɔ gwadɛtay: “Hɛrwi ndɛray kɛ hɛl may a mɛsler bay.” A gwadɛtay: “Nɛkurom dɛrmak dumara, dum a guvah ga.”

<sup>8</sup> «Huwa a ge na, ndo i guvah a zalay a ndo mɛlɛvay gɛr a mɛsler ɲgay, a gwadɛtay: “Zalɛtay a ndo mɛge mɛsler hay, vɛlatay wu i madagɛr tay. Dazlay ta ndo neheye na hɛl tay duk aye ada kɛ ndɔv ha ta ndo neheye na lah mɛhɛle tay kurre aye.”

<sup>9</sup> Ndo neheye ta dazlay a mɛsler ta bɔre zɛm i huwa aye na, ti ye naha kwa way a tɛma kwar i suloy nɛte.

<sup>10</sup> Ndo neheye ta dazlay kurre aye ti yaw. Tɔ dzala mɛ gɛr tay na, ta tɛmiye ma ziye i ndo neheye. Ane tuk na, tɔ vɛlatay kwa way kwar i suloy nɛte.

<sup>11</sup> Ta tɛma na, ta gunɲuz ka ndo i guvah,

<sup>12</sup> tɔ gwadɛ: “Ndo neheye ti yaw ma dɛba may aye, tɔ ge mɛsler na, bɔre nɛte tsa tuk na, ada ka vɛlamay wu madagɛr may andza i tay na, kɛkay? Nɛmay na, nɛmaa sa dɛrɛtsɛtseh mɛ pat hwapat ada nɛmaa samay naha a merɛbɛ.”

<sup>13</sup> Ndo i guvah niye a mbɛɗay faya a ndo nɛte mɛ walanɲ tay, a gwadɛtay: “Dzam ga, na gaka mɛnese bay. Ka gama tsakala i mɛge mɛsler pat eye nɛte na, kwar i suloy nɛte bɛɗaw?”

<sup>14</sup> Zla wu i madagɛr, do. A seɲ na vɛliye a ndo nakɛ a yaw ma dɛba yak andza nakɛ na vɛlaka aye dɛrmak.

<sup>15</sup> Neɲ na, tsɛved ga andaya mɛge wu nakɛ a seɲ aye ta suloy ga. Kɛgɛbay nɛkar na, sɛlɛk eye hɛrwi nakɛ neɲ ɲgwalak i ndo aye dɛw?”

<sup>16</sup> Andza niye, ndo i dɛba hay ta tɛriye ndo i me hay, ndo i me hay ta tɛriye ndo i dɛba hay.»

*Yesu a dɛ ha mɛmɛte ɲgay ta mɛlɛtsew ɲgay abɛra ma mɛdahanɲ sa  
Markus 10.32-34; Luka 18.31-34*

<sup>17</sup> Ahɛl nakɛ Yesu faya ma diye a Zerozelem aye na, a hɛl gawla ɲgay hay kuro gɛr eye sulo tɛv tay wal. Nɛteye faya ta diye ka tsɛved na, a gwadɛtay:

<sup>18</sup> «Tsɛnum, anɛke na, faya ka deyekweye a Zerozelem. Mɛ dɛma na, neɲ Wawa i Ndo ta vɛlateye ga ha a hɛlay a bagwar hay i ndo neheye tɔ vɛlaway wu a Mbɛlom aye ada a ndo neheye tɔ dzanɲgawa bazlam i Mbɛlom mapala eye. Ta geɲeye sariya i mɛkɛde,

<sup>19</sup> ada ta vɛlateye ga ha a ndo neheye tɔ sɛr Mbɛlom bay aye. Ta ɲgwesɛneye dɛla abɛra mɛ gɛr, ta ndɛbiye ga ta mandalaɛa. Ta dariye ga ka mayako mazlɛlmbada eye. Ma mɛhɛne mamahkar eye na, na lɛtseweye abɛra ma mɛdahanɲ.»

*Matsɛtsehe i may i Yakuba ta Yuhana  
Markus 10.35-45*

<sup>20</sup> Ma dɛba eye na, ɲgwas i Dzebede a ye ka tɛv i Yesu ta wawa ɲgay hay. A ye naha a dɛkw gurmets kame i Yesu hɛrwi matsɛtsehe faya wu.

<sup>21</sup> Yesu a gwadɛtay: «A saka mey?»

A mbɛɗay faya a Yesu, a gwadɛtay: «Na tsɛsah fakaya na, aza ahɛl nakɛ ka ndza a bɛy yak aye na, vɛlatay tsɛved a wawa ga neheye sulo aye tɛ ndza ka tɛv yak, nɛte ta diye i hɛlay i mɛnday ada nenɲed ta diye i hɛlay i gula yak tey.»

<sup>22</sup> Yesu a mbəday faya, a gwaday: «Ka sərūm wu nakə ka tsətsahumeye aye bay. Ka slumeye faya məse dəretsətseh nakə na siye aye daw?»

Ta mbəday faya, tə gwaday: «Nəmaa sliye faya.»

<sup>23</sup> Yesu a gwadatay: «Dedek, ka sumeye dəretsətseh andza neŋ nakə na siye dəretsətseh aye. Ane tuk na, məndze ta diye i həlay i mənday ga kəgəbay ta diye i həlay i gula ga na, mata tsike na, neŋ bay. Təv məndze niye na, i ndo neheye Bəba ga a ləvatay ha bo aye wu tay.»

<sup>24</sup> Siye i gawla i Yesu hay kuro, tə tsəne bazlam niye na, tə ge mevel ka gawla i Yesu neheye sulo ta malamar ŋgay aye.

<sup>25</sup> Yesu a zalatay tebiye ka təv ŋgay, a gwadatay: «Nəkurom ka sərūm ha na, bəy bagwar eye ka məndzibəra faya ta ləviye ndo hay ta gədaŋ ada ndo bagwar eye hay ta bərakiye ha gədaŋ tay ka siye i ndo hay.

<sup>26</sup> Ane tuk na, mə ge andza niye mə walaŋ kurom bay. Duh na, kə ge ndəray mə walaŋ kurom a say matəre bagwar eye na, mə təra ndo i məsler kurom.

<sup>27</sup> Kə ge ndəray mə walaŋ kurom a say matəre ndo i me na, mə təra beke kurom.

<sup>28</sup> Andza niye, neŋ Wawa i Ndo na yaw na, hərwi ada ndo hay tə geŋ məsler bay. Na yaw duh na, hərwi məgatay məsler a ndo hay ada məvəle ha məsəfəre ga hərwi məmbəle tay ha ndo hay haladzay.»

*Yesu a mbəl tay ha gulufhay sulo*

*Markus 10.46-52; Luka 18.35-43*

<sup>29</sup> Ahəl nakə Yesu ta gawla ŋgay hay ti yaw abəra ma Zeriko aye na, ndo hay haladzay tə payaw bəzay.

<sup>30</sup> Guluf hay sulo nəteye mandza eye ka tsakay i tsəved. Tə tsəne Yesu faya ma diye ta tsəved eye niye na, tə pa bo ka mawude, tə gwad: «Bəy Maduweŋ, Wawa i Davit, nəmaā gaka mə bo təbədew?»

<sup>31</sup> Ndo hay tə gatay me hərwi ada tā ndza dīkdīk, ane tuk na, tə zaka ha mawude haladzay, tə gwad: «Bəy Maduweŋ, Wawa i Davit, nəmaā gaka mə bo təbədew?»

<sup>32</sup> Yesu a lətse, a zalatay, a tsətsah fataya: «A sakum nā ge hərwi kurom na, mey?»

<sup>33</sup> Ta mbəday faya, tə gwaday: «Bəy Maduweŋ, a samay na, həndəkamay na dəre tey.»

<sup>34</sup> Yesu a tsəne andza niye na, tə gay mə bo. A lamay a dəre tay, kwayaŋŋa ndo neheye sulo aye tə ŋgatay a dəre. Tsa na, tə pay bəzay a Yesu.

## 21

*Yesu a fəlkwa a Zerozelem*

*Markus 11.1-11; Luka 19.28-40; Yuhana 12.12-19*

<sup>1</sup> Yesu ta gawla ŋgay hay, nəteye mazlambar bəse ta Zerozelem na, tə ndisl a gəma i Betifadze ka Mahəmba i Tetədcəz. Yesu a slər gawla ŋgay sulo kame, a gwadatay:

<sup>2</sup> «Dum naha a gəma nakə kame kurom aye. Ka ndislum naha na, ka ndzumeye a gər a zuŋgo ta wawa ŋgay mağara eye. Pəluma tay ahaya ada kə yumeŋa tay ahaya.

<sup>3</sup> Tadə ta tsikakum wuray na, mbəđumatay faya: “A say a Bəy Maduweŋ.” Tsa na, ta gəriye kurom ha.»

<sup>4</sup> Wu nakay a ge bo na, andza i ndo məde ha bazlam i Mbəlom nakə a tsik aye, a gwad:

<sup>5</sup> «Gwadumatay a ndo neheye ma gəma i Zerozelem aye:



Zəba, bəy yak faya ma diye naha ka təv yak!

Neŋgeye maləba eye,

neŋgeye mandza eye ka zuŋgo ada ka zuŋgo wawa eye.\*»

<sup>6</sup> Gawla i Yesu neheye sulo aye, ti ye tə ge andza nakə Yesu a tsikatay aye.

<sup>7</sup> Ti ye, tə gəsaw zuŋgo niye ta wawa eye salamay. Ti ye ahaya, tə pa fataya peteked hay ada Yesu a ndza faya.

<sup>8</sup> Ndo hay haladzay mbarzəzza ta fətəl peteked tay hay ka tsəved, siye hay tə həbaw slambah i dərizl i gərɗaf hay ta fətəl ka tsəved.

<sup>9</sup> Ndo neheye kame i Yesu ta ndo neheye ma dəba ŋgay aye na, ta wuda, tə gwad: «Zambadəkway a Wawa i Davit! Mbəlom mâ pa ŋgama ka ndo nakə faya ma deyeweye ta məzele i Bəy Maduweŋ aye. Zambadəkway a Mbəlom, neŋgeye nakə mə mbəlom aye!»

<sup>10</sup> Ahəl nakə Yesu a ndisl a Zerozelem aye na, a gatay a ndo neheye ma wuzlahgəma aye wadəŋ wadəŋ. Ta tsətsah, tə gwad: «Ndo nakay na, way?»

<sup>11</sup> Ndo hay ta mbədatay faya: «Yesu, ndo məde ha bazlam i Mbəlom, neŋgeye ndo i Nazaret ka dala i Galile.»

*Yesu mə gay i mədəslay ha gər a Mbəlom*

*Markus 11.15-19; Luka 19.45-48; Yuhana 2.13-22*

<sup>12</sup> Yesu a ndisl a Zerozelem na, a ye a dalamətagay i gay i mədəslay ha gər a Mbəlom. A ye naha na, a həhar tay ha ndo masəkəme wu hay ta ndo neheye ta səkəmiye ha wu hay aye. A pay həlay a tabal i ndo mambəde ha suloy, a mbəzl ha təv məndze i ndo masəkəme ha bodobodo hay.†

<sup>13</sup> Tsa na, a gwadatay: «Mawatsa eye mə Derewel i Mbəlom na: “Ta zaleye a gay ga na, gay i maduwule me. Ane tuk na, nəkurom ka tərüm ha lar i məkal hay na, kəkay?‡”»

<sup>14</sup> Guluf hay ta ndo matəra eye hay, ti ye ka təv i Yesu a gay i mədəslay ha gər a Mbəlom. Yesu a mbəl tay ha.

<sup>15</sup> Bagwar hay i ndo neheye tə vəlaway wu a Mbəlom aye ta ndo neheye tə dzaŋgawa bazlam i Mbəlom mapala eye tə ŋgatay a masuwayaŋ nakə Yesu a ge aye ta mawude i wawa neheye faya ta wudiye mə gay i mədəslay ha gər a Mbəlom: «Məzlaḅ mâ ndza ka Wawa i Davit» aye na, wu neheye a ndalatay haladzay.

<sup>16</sup> Tə gwaday a Yesu: «Ka tsəne wu nakə wawa neheye faya ta tsikiye bədaw?»

Yesu a mbədatay faya: «Ayaw, na tsəne. Nəkurom na, ka dzaŋgum bazlam nakə mawatsa eye mə Derewel aye dāda təbədew? “A saka nakə wawa hay ada ta wawa neheye faya ta siye wah mba aye tā zambadaka.S”»

<sup>17</sup> Tsa na, a gər tay ha, a yaw abəra ma wuzlahgəma, a ye a Betani, a həna mə dəma.

*Gurov mawa eye bay*

*Markus 11.12-14,20-24*

<sup>18</sup> Tədə eye pərik i mekedə, ahəl nakə faya ma maweye a wuzlahgəma aye na, may a wur faya.

<sup>19</sup> A ŋgatay a gurov ka tsakay i tsəved. A ye a bəzay i dərizl i gərɗaf niye. Ane tuk na, a ŋgatay na, a slambah dəkdek, mawa eye bay. A gwaday a gurov niye: «Ka wiye hohway dāda sa bay.» Kwayaŋŋa gurov niye a kula.

\* **21:5** Zəba ma Zakari 9.9. † **21:12** Yahuda hay ti yaw ma gəma mekeləŋ eye mata mbəde ha suloy tay. Ma dəba eye, ta sliye masəkəme gəna wu hərwi kule ada məvələ dala i dzaŋgal i gay mədəslay gər a Mbəlom. ‡ **21:13** Zəba ma Ezay 56.7 ada Zeremi 7.11. § **21:16** Dəmes hay 8.3.



<sup>20</sup> Gawla ṅgay hay tɛ ṅgatay andza niye, a gatay masuwayan. Tɛ gwadaya a Yesu: «Gurov nakay a kula kwayanṅa tsa na, kəkay?»

<sup>21</sup> Yesu a gwadatay: «Neṅ faya na tsikakumeye: Sərum ha na, tadə ka dzalum ha ka neṅ ada ka gum hay mɛdzal gər kurom gərən gərən bay na, ka slumeye faya mɛge wu nakə na gay a gurov nakay aye. Kwa a mahamba, ka slumeye mɛgwaday: “Lətse abərə kanan, ta kal ha bo a bəlay”, ada ma giye bo.

<sup>22</sup> Tadə ka dzalum ha ka neṅ tɛ dɛrev kurom peteh na, ka hutumeye wu nakə ka tsətsahumeye tɛ maɖuwule me a Mbəlom aye tebiye.»

*Maa vələy gədan a Yesu na, way?*

*Markus 11.27-33; Luka 20.1-18*

<sup>23</sup> Yesu a ye, a fələkwa a gay i mɛdɛslay ha gər a Mbəlom. A ye naha a dazlay a matətikatay. Ahəl nakə faya ma tətikiye na, bagwar hay i ndo neheye tɛ vələway wu a Mbəlom aye ta madugula i Yahuda hay, ti ye naha ka tɛv ṅgay. Ta tsətsah faya, tɛ gwaday: «Ka ge wu neheye na, ta gədan waray? Maa vələka gədan aye na, way?»

<sup>24</sup> Yesu a mbədatay faya, a gwadatay: «Neṅ dərma na tsətsahiye fakuma matsətsehe nate, tadə ka mbəɖumenew faya na, na ge wu neheye ta gədan waray na, na tsikakumeye.

<sup>25</sup> Maa slər ha Yuhana madzəhuɛ ndo a yam na, way? Mbəlom tsukudu, ndo hay daw?»

Tɛ ma ha ka bo bazlam mɛ walan tay, tɛ gwad: «Ka mbəɖakweye faya na, kəkay? Tadə ka gwadəkway, maa slər ha Mbəlom, Yesu ma gwadəkweye: “Ka dzalum ha bay na, kemey?»

<sup>26</sup> Ane tuk na, tadə ka gwadəkway, maa slər wu Yuhana na, ndo hay, dzədzarakwa ta ndo hay hərwi ndo hay tebiye ta dzala ha Yuhana neṅgeye ndo mɛde ha bazlam i Mbəlom.»

<sup>27</sup> Hərwi niye ta mbəday faya a Yesu, tɛ gwaday: «Nəmaa sər bay.»

Yesu a gwadatay: «Neṅ bəbay na ge wu neheye ta gədan i way na, na tsikakumeye bay.»

*Dzeke i wawa hay sulo*

<sup>28</sup> Yesu a gwad sa: «Ka dzalum ka dzeke nakay na, kəkay? Ndoweye andaya wawa ṅgay hay sulo. A gwaday a wawa makurre eye: “Wawa ga, do bəgom ta ge mɛsler ma guvah.”

<sup>29</sup> Wawa ṅgay a mbəday faya, a gwaday: “Na diye bay.” Məndze tsekwen na, a dzala ha ka bazlam ṅgay niye, a ye a guvah.

<sup>30</sup> Bəba a ye ka tɛv i wawa masulo eye a tsikay andza niye sa. Wawa ṅgay a mbəday faya, a gwaday: “Bəba ga, na diye.” Ane tuk na, ki ye bay.

<sup>31</sup> Mɛ walan i wawa neheye sulo aye, maa ge wu nakə a say a bəba ṅgay aye na, waray?»

Ta mbəday faya, tɛ gwaday: «Wawa makurre eye.»

Yesu a gwadatay: «Neṅ faya na tsikakumeye, sərum ha ndo matsekele dzanṅal hay ta ṅgwas neheye tɛ gawa madama aye ta lahakumeye a Bəy i Mbəlom.

<sup>32</sup> Yuhana madzəhuɛ ndo a yam ki yaw kə ɖakum ha tsəved dedek eye. Ka dzalum ha faya bay. Duh ndo matsekele dzanṅal ta ṅgwas neheye tɛ gawa madama aye ta dzala ha faya. Kwa ka ṅgatumay bəbay na, ka mbəɖum ha mɛdzal gər kurom hərwi mɛdzele ha faya bay.»

*Dzeke i ndo neheye ta səkəm guvah hərwi mɛfate aye*

*Markus 12.1-12; Luka 20.9-19*

<sup>33</sup> Tsənum dzeke mekelenj eye sa: «Ndoweje andaya a dəs guvah. A zəv a dəma dərizl i gərdaf haladzay. Dərizl i gərdaf niye hay na, tə wa hohway. A lawara na ta zled, a njar a dəma təgwad\* hərwi maditse a dəma hohway ada a dəzl a dəma gay i matsəpe wu bagwar eye. Ma dəba eye a səkəmatay ha a ndo hay hərwi məve nəte. Tsa na, a ye a gəma mekelenj eye dərənj.

<sup>34</sup> «Həlay i manğəle hohway i gərdaf nğay niye hay a sla na, a slər ndo i məsler nğay hay ka təv i ndo neheye ta səkəm guvah nğay aye hərwi ada tə vəlayaw hohway i gərdaf nğay hay.

<sup>35</sup> Ane tuk na, ndo niye hay, tə nğatay na, tə gəs makurre eye tə ndaəa na lele. Tə gəs masulo eye, tə kəd na mədahanj eye ada tə kəd mamahkar eye tə kwar.

<sup>36</sup> Ndo i guvah a slər ndo i məsler mekelenj eye hay, nəteye haladzay ta ze neheye kurre aye. Ane tuk na, ndo niye hay tə ge tay andza neheye kurre eye.

<sup>37</sup> Ka mandəve nğay eye na, a slər wawa nğay. A dzala, a gwad: “Wawa ga na, ta rəhay ha gər, ta geye wuray bay.”

<sup>38</sup> Ane tuk na, ndo niye hay, tə nğatay a wawa i ndo i guvah na, tə gwad mə walanj tay: “Ananj magedze nğay nakə ma ta ndiye na guvah nğay aye, ki yaw! Takwa, kədəkwa na ada guvah nakay ma mətsakweye a nəkway!”

<sup>39</sup> Ti ye tə gəs wawa niye, ti ye ha dərənj ta guvah. Ti ye naha, tə kəd na.»

<sup>40</sup> Yesu a tsətsah fataya a gwadətay: «Ndo i guvah ki yaw na, ma giye tay ha ndo neheye na, kəkay?»

<sup>41</sup> Ta mbəday faya, tə gwaday: «Ma kədiye ndo məkədə ndo niye hay abəra mə dəma, ma sakatay naha bay tebiye. Ma həliye a dəma ndo mekelenj eye hay ada ta vəleye hohway i gərdaf nğay hay a həlay nakə kə nah aye.»

<sup>42</sup> Tsa na, Yesu a gwadətay: «Dadə ka dzanğum wu nakə tə watsa a Derewel i Mbəlom aye təbədəw? A gwad:

“Kwar nakə ndo mədəzle gay hay tə kal ha aye na,

matəra kwar lele eye a ze siye i kwar hay na, nəngeye dūh.

Maa gwad kwar niye matəra kwar nakə lele eye hərwi mədəzle gay na, Mbəlom.

Niye na, məsler i Mbəlom hərwi kway.†»

<sup>43</sup> Yesu a gwadətay sa: «Nəj faya na tsikakumeye, nəkurom na, ta zliye fakuma abəra Bəy i Mbəlom ta vəlay ha a ndo mekelenj eye hay neheye faya ta giye wu nakə a say aye.

<sup>44</sup> Kwa way kə dəd ka kwar niye na, ma toliye. Ada kwar niye kə dəd ka ndoweje na, ma ləgəriye na kərdik kərdik andza merebək.»

<sup>45</sup> Bagwar hay i ndo neheye tə vəlaway wu a Mbəlom aye ta Farisa hay tə tsəne dzeke i Yesu niye hay na, tə sar a tsik ka nəteye.

<sup>46</sup> Ta pəla tsəved məgəse na. Ane tuk na, ta dzədzaratay a ndo hay hərwi ndo hay tə dzala Yesu na, ndo mədə ha bazlam i Mbəlom.

## 22

### *Dzeke i magurlom i məzle dahəlay*

*Luka 14.15-24*

<sup>1</sup> Yesu a tsikatay dzeke mekelenj eye sa, a gwadətay:

<sup>2</sup> «Bəy i Mbəlom a ndzakit bo na, ananj andza nakay. Bəy a ge magurlom i mabəzləme gər i dahəlay i wawa nğay.

\* **21:33** Təv maditse na, tə njar təv andza təgwad hərwi maditse hohway. 118.22-23.

† **21:42** Dəmes hay

<sup>3</sup> A slər gawla ŋgay hay, tã ye tã zalatayaw a ndo hay tã yaw tã nda daf i mabəzləme gər i dahəlay. Ane tuk na, ndo neheye tə zalatay aye na, ta kərah mede.

<sup>4</sup> A slər gawla ŋgay mekeləŋ eye hay sa. A gwadətay: “Dum, gwadumatay a ndo neheye na zalatay aye na, tã yaw. Na da wu mənday anake, na kəd gəsəŋ i sla ga hay ta neheye magəla eye hay lele aye na kəd, wu hay maləva bo eye tsiy. Dumara a mənde daf i mabəzləme gər i dahəlay.”

<sup>5</sup> Ane tuk na, ndo neheye tə zalatay aye na, ta pa zləm ka bazlam tay niye bay. Ti ye ka məge məsler tay hay. Ndo neŋged a ye a guvah, ndo mekeləŋ eye a ye masəkəme ha wu ŋgay hay.

<sup>6</sup> Ndo siye hay tə gəs tay hay gawla i ndo niye, tə gatay dəretsətseh, tə kəd tay ha mədahaŋ eye hay.

<sup>7</sup> «Bəy niye a tsəne andza niye na, a ndalay. A slər sidzew hay, ti ye ka mabəbazl tay ada tə mədzay ako a gəma tay.

<sup>8</sup> Tsa na, a gwadətay a ndo i məsler ŋgay hay: “Daf i mabəzləme gər i dahəlay mada eye haladzay, ane tuk na, ndo neheye na zalatay aye na, ta sla mənde bay.

<sup>9</sup> Hərwi niye, dum ka tsəved bagwar eye hay, zalumatayaw a ndo neheye ka ndzumatay a gər aye, tã yaw ka mənde daf.”

<sup>10</sup> Ndo i məsler ŋgay hay ti ye. Ti ye naha tə hayay gər a ndo neheye tə ndzatay a gər aye tebiye, ndo ŋwalak eye hay ta ndo neheye ŋwalak eye bay aye. Gay i magurlom a rah ta ndo hay.

<sup>11</sup> «Bəy a fələkwa a gay hərwi mazəbe ka ndo neheye a zalatay aye tuk. A ye naha a ŋgatay a ndo nətə peteked i magurlom i mabəzləme gər i dahəlay andaya faya bay.

<sup>12</sup> A gwadətay: “Dzam ga, peteked i magurlom i mabəzləme gər i dahəlay andaya fakaya bay sa na, ka fələkwwə kanan ma kəkay?” Ane tuk na, ndo niye ka mbəday faya bay.

<sup>13</sup> Tsa na, bəy a gwadətay a ndo i məsler ŋgay hay: “Dum naha, dzawumay na həlay tə sik, kalum ha abəra a ləvonj. Mə dəma na, ta tuwiye tə mahəpədə zler eye.\*”»

<sup>14</sup> Andza niye, Yesu a gwad: «Ndo hay haladzay mazala eye hay, ane tuk na, ndo neheye tə pala tay ha aye na, nətəye haladzay bay.»

### *Məvələ dzəŋgal a bəy i Roma*

#### *Markus 12.13-17; Luka 20.20-26*

<sup>15</sup> Farisa hay ti ye, tə haya gər. Tə ma ha ka bo bazlam mə walaŋ tay hərwi məpələ tsəved ma kəkay nakə ta həliye suwat abəra ka Yesu tə matsətsehe faya abəra bazlam aye.

<sup>16</sup> Ta ndəv ha məhay gər na, tə slər siye i ndo hay mə walaŋ i gawla tay hay ta siye i ndo i Herod ka təv i Yesu. Ti ye naha, tə gwadətay: «Miter, nəmaa sər ha nəkar, ka tsik na, dedek. Nəkar faya ka tətikateye a ndo hay dedek ka mede nakə a say a Mbəlom aye. Ka dzədzaray a wu nakə ndo hay ta dzaliye təbey ada ka ŋgəna tay ha ka bo bəra ndo hay təbey.

<sup>17</sup> Hərwi niye, tsikamay wu nakə ka dzala faya aye: Bazlam kway məpala eye kə vəl tsəved məvələ dzəŋgal a bəy i Roma tsukuđu kə vəl tsəved məvələ bay daw?»

<sup>18</sup> Ane tuk na, Yesu a sər tay naha ka mədzal gər tay nakə ŋwalak eye bay aye. A gwadətay: «A nəkurom ndo i bəbərək hay, ka həlumeye fagaya abəra suwat na, hərwi mey?»

\* 22:13 Zəba mə Mata 8.12.

19 Ehey bəzumen̄ ha suloy nakə tə vəlawa dzaŋgal eye təday.» Tə zlayaw kwar suloy nətə, tə vəlay.

20 Tsa na, Yesu a gwadatay: «Mandəkkit bo nakay ta məzele nakay faya na, i way?»

21 Ta mbəday faya, tə gwaday: «I bəy i Roma.»

Yesu a gwadatay: «Aya! Wu i bəy i Roma na, vəlumay ha a bəy i Roma ŋway. Wu i Mbəlom na, vəlumay ha a Mbəlom ŋway.»

22 Tə tsəne andza niye na, a matay ha hərḅaḅəkka. Tə gər ha Yesu, ti ye wu tay.

*Matsətsehe ka gər i mələtsew i mədahaŋ hay abəra ma bəd  
Markus 12.18-27; Luka 20.27-40*

23 Pat eye niye, Saduke hay ti ye ka təv i Yesu. Azlakwa bay Saduke hay na, nətəye tə dzala ha tə gwad: «Ka mət na, mələtsew abəra ma mədahaŋ andaya sa bay.» Ta tsətsah ka Yesu, tə gwaday:

24 «Miter, Musa a gwad: “Tadə ndoweje a mət ze məwe wawa na, malamar ŋgay mâ zla madakway i ŋwas niye. Ma zliye na, hərwi ada hulfe i ndo niye a mət aye mâ dze bay.”<sup>†</sup>”

25 Ndo hay andaya nətəye tasəla ta malamar hay. Malamar tay makurre eye a zla dahəlay. A mət ze məwe wawa hay, malamar ŋgay masulo eye a zla ŋwas niye.

26 Malamar ŋgay masulo eye a mət ze məwe wawa dərmak. Malamar tay mamahkar a ge andza niye, nətəye niye tasəla tebiye tə mət ze məwe wawa.

27 Nətəye tebiye tə mət na, ŋwas a mət dərmak.

28 Ada pat nakə mədahaŋ hay ta lətseweje abəra ma mədahaŋ aye na, ŋwas niye ma təriye na, i way? Hərwi nətəye tebiye ta zla ŋwas niye.»

29 Yesu a mbədatay faya, a gwadatay: «Faya ka vumay gər a bo kurom hərwi ka sərūm wu nakə mawatsa eye mə Derewel i Mbəlom aye bay ada ka sərūm gədaŋ i Mbəlom bay.

30 Andza niye, ahəl nakə ta lətseweje abəra ma mədahaŋ aye na, hasləka hay ta ŋwas hay ta zliye bo sa bay. Ane tuk na, ta ndziye na, andza gawla i Mbəlom neheje mə mbəlom aye.

31 Ka bazlam i mələtsew abəra ma mədahaŋ na, dāda ka dzaŋgum wu nakə Mbəlom a tsikakum mə Derewel ŋgay aye təbədew? A gwad:

32 “Ner̄ na, Mbəlom i Abraham, Mbəlom i Izak, Mbəlom i Zakob.<sup>‡</sup>” Mbəlom na, neŋgeje Mbəlom i mədahaŋ hay bay, neŋgeje Mbəlom i ndo neheje ta ndziye huya ta sifa aye.»

33 Ndo neheje tebiye tə tsəne matətike ŋgay niye a tətikatay aye na, a gatay hərḅaḅəkka.

*Bazlam mapala eye naka a ze siye hay aye  
Markus 12.28-34; Luka 10.25-28*

34 Farisa hay tə tsəne Yesu a sla ka Saduke hay tə bazlam na, tə haya gər.

35 Ndo nətə mə walaŋ tay na, neŋgeje ndo mədzaŋgawa bazlam i Mbəlom mapala eye, a ye ka təv i Yesu, a say məhəle faya abəra suwat. A tsətsah ka Yesu, a gwaday:

36 «Miter, mə walaŋ i bazlam i Mbəlom mapala eye hay, bagwar eye na, waray?»

<sup>†</sup> 22:24 Zəba ma Madazlay i wu hay 38.8; Bazlam mapala eye masulo eye 25.5-6. <sup>‡</sup> 22:32 Madayaw abəra ma Ezipt 3.6, 15, 16.

37 Yesu a mbəday faya, a gwaday: «“Wuḍa Bəy Maduweŋ Mbəlom yak tə dərev yak tebiye, ta məsəfəre yak tebiye, ada tə metsehe yak tebiye.Š”

38 Bazlam mapala eye bagwar eye ada nakə ŋwalak eye a ze siye hay aye na, anan.

39 Bazlam mapala eye nakə a ze siye hay aye andza makurre eye anan: “Wuḍa ndo i maged yak andza ka wuḍa na gər yak.\*”

40 Bazlam i Musa mapala eye tebiye ada matətike i ndo mæde ha bazlam i Mbəlom tebiye a dzapa a huḍi bazlam neheye mapala eye sulo aye.»

### *Kəriste ta Davit*

#### *Markus 12.35-37; Luka 20.41-44*

41 Yesu a tsətsah bazlam ka Farisa neheye mahaya gər aye, a gwadatay:

42 «Ka dzalum ka Kəriste na, kəkay? Neŋgeye wawa i way?»

Tə gwaday: «Neŋgeye Wawa i Davit.»

43 Yesu a gwadatay: «Ada ma kəkay Davit a ma ha bazlam i Məsəfəre Tsədanŋa eye nakə a tsik ahəl niye, a zalay “Bəy Maduweŋ ga” aye daw? Hərwi Davit a gwad:

44 “Bəy Maduweŋ Mbəlom a gwaday a Bəy Maduweŋ ga na:

Dara ndza tə həlay i mənday ga

hus a pat nakə neŋ, na piye tay ha ndo mæne dəre hay a huḍi sik yak aye.†”

45 «Tadə Davit kə zalay a Kəriste “Bəy Maduweŋ” tuk na, ada Kəriste neŋgeye wawa i Davit na, ma kəkay?»

46 Mə walaŋ i Farisa niye hay ndəray kwa nəte ka mbəday ka bazlam ŋgay niye bay. A dazlay pat eye niye, kwa way a dzadzar matsətsehe faya matsətsehe neheye kəriye.

## 23

### *Yesu a matay ha mənese a bəy i Yahuda hay*

#### *Markus 12.38-39; Luka 11.43,46, 20.45-46*

1 Ma dəba eye na, Yesu a gwadatay a ndo hay mahaya gər eye haladzay ta gawla ŋgay hay:

2 «Ndo mədzaŋgawa bazlam i Mbəlom mapala eye ta Farisa hay məsler tay na, mədatay ha bazlam i Musa mapala eye a ndo hay.

3 Rəhumatay ha gər ada gum wu neheye tebiye faya ta tsikakumeye. Ane tuk na, kə gum andza nəteye bay, hərwi faya ta giye wu nakə faya ta tsikiye bay.

4 Nəteye faya ta hayeye gər a wu neheye tə mba a zla bo bay, faya ta piye ka gər i ndo hay. Ane tuk na, bo tay eye kwa məlamay ta wur həlay, ta kərah madzəne ndo hay.

5 «Məsler tay faya ta giye na, hərwi ada ndo hay tə zəba fataya, tə gwad nəteye ŋwalak eye hay. Mahodok neheye tə mbəkwwa ada tə ɓarawa ka bo aye na, bagwar aye hay. Ta səkahawa ha me i peteked tay ta zəbol.\*

6 Ma təv nakə ndo hay tə haya gər ka mənde wu mənday aye na, ta wuḍa mändze ka təv nakə ŋwalak eye ada mə gay i maḍuwule me, ta ndziye na, ka təv nakə ndo hay ta ŋgatateye aye.

7 A satay ndo hay tə tsikatay me mə walaŋ i ndo hay haladzay ada tə zalatay “Miter” hay.

Š 22:37 Bazlam mapala eye masulo eye 6.5. \* 22:39 Levitik 19.18. † 22:44 Dəmes hay 110.1.

\* 23:5 Yahuda hay tə mbəkwwa mahodok, tə pawa a dəma təv mədzenge hay mə Derewel i Mbəlom. Tə ɓarawa ka da'ar, ka həlay i gula. Tə mawa ahaya bazlam i Mbəlom mapala a gər na, andza niye.

8 «Ane tuk na, nakurom na, ndaray mâ zalakum ndo “Miter” hay tɔbey. Hərwi, Miter kurom na, nate tsa. Nakurom tebiye na, ta malamər hay.

9 Kâ zalumay a ndaray ka mändzibərə nakay “Bəba” bay. Hərwi Bəba kurom na, nate, neŋgeye mə mbəlom.

10 Kâ pəlum tã zalakum “bagwar may hay” bay. Hərwi bagwar kurom na, Kərıste nate tsa.

11 Ndo nakə bagwar eye mə walaŋ kurom aye na, mâ təra ndo i məsler kurom.

12 Kwa way kə say matəre bagwar eye kame i ndo hay na, Mbəlom ma təriye ha wawa eye düh. Kwa way ka təra ha gər ŋgay wawa eye na, Mbəlom ma təriye ha bagwar eye düh.»

*Dəretsətseh ka ndo mədzaŋgawa*

*bazlam i Musa mapala eye ta Farisa hay*

*Markus 12.40; Luka 11.39-42,44,47-52, 20.47*

13 «A nakurom ndo mədzaŋgawa bazlam i Mbəlom mapala eye ta Farisa hay, nakurom na, ndo i bəbərək hay, dəretsətseh ka gər kurom hərwi faya ka dərəzlumatay na tsəved mede a Bəy i Mbəlom a ndo hay. Bo kurom eye a sakum mede bay ada ndo neheye a satay mede aye, a sakum məgəre tay ha tã ye bay.

[  
14 «A nakurom ndo mədzaŋgawa bazlam i Mbəlom mapala eye ta Farisa hay, nakurom na, ndo i bəbərək hay. Dəretsətseh ka gər kurom hərwi faya ka buwumeye wu abəra ka madakway i ŋgwas hay. Ka dūwulawum me vədvdəd hərwi ada ndo hay tã gwad nakurom ndo ŋgwalak eye hay. Hərwi niye, ta gakumeye sariya kurom na, ma ziye siye i ndo hay, ta sakakumeye naha bay.]

15 «A nakurom ndo mədzaŋgawa bazlam i Mbəlom mapala eye ta Farisa hay, nakurom na, ndo i bəbərək hay. Dəretsətseh ka gər kurom hərwi faya ka həhalumeye ka dala ada ka bəlay hərwi ada ndo hay tã pakum bəzay. Ka hutum ndo nate na, ka tərumeeye ndo nakə ma hutıye sariya i Mbəlom ma ziye kurom madzəga sulo aye.

16 «A nakurom neheye ka tərüm andza guluf hay faya ka lakumeye tay ha ndo hay aye, dəretsətseh ka gər kurom. Faya ka gwadumeye: “Tadə ndoweye kə mbada tə gay i mədəslay ha gər a Mbəlom na, andza kə mbada bay, a tsik bazlam mətsıke tsa. Ane tuk na, tadə ndoweye kə mbada ta gura i gay i mədəslay ha gər a Mbəlom na, kutoŋ ma giye wu nakə a mbada ha aye.”

17 A nakurom ndo i matərakahaŋ hay, nakurom guluf eye hay. Wu nakə ŋgwalak eye düh na, mey? Gura tsukudu gay i mədəslay ha gər a Mbəlom nakə ma təriye ha gura tsadaŋŋa eye daw?

18 Faya ka gwadumeye sa: “Tadə ndoweye kə mbada ta təv məvəlay wu a Mbəlom na, andza kə mbada bay, a tsik bazlam mətsıke tsa. Ane tuk na, kə mbada tə wu nakə tə vəlay a Mbəlom mapa eye ka təv məvəlay wu a Mbəlom aye na, kutoŋ ma giye wu nakə a mbada ha aye.”

19 Nakurom na, guluf eye hay, ŋgwalak eye düh na, mey? Wu nakə tə vəlay a Mbəlom aye tsukudu, kəgəbay təv məvəlay wu a Mbəlom nakə ma təriye ha tsadaŋŋa wu nakə tə vəlay kəriye a Mbəlom aye daw?

20 Hərwi niye, ndoweye kə mbada ta təv məvəlay wu a Mbəlom na, a mbada ta təv məvəlay wu a Mbəlom ada tə wu neheye faya aye tebiye.

21 Ndowneye kə mbada tə gay i mədəslay ha gər a Mbəlom na, a mbada ta gay i mədəslay ha gər a Mbəlom ada ta Mbəlom nakə mandza eye mə dəma aye.

22 Ndowneeye kə mbəda ta magərmbəlom na, a mbəda ta təv məndze i Mbəlom ada ta ndo nakə mandza eye mə dəma aye.

23 «A nəkurom ndo mədzaŋgawa bazlam i Mbəlom mapala eye ta Farisa hay, nəkurom na, bəbək eye hay. Dəretsətseh ka gər kurom hərwi ka hayumay gər a slambah i ala kurom hay tebiye na, mə kuro na, ka zlawum nəte ka vəlawumay a Mbəlom. Ada ka gərüm ha mäge wu ŋwalak eye mə bazlam i Mbəlom mapala eye duh na, kəkay? Andza məgwede mäge wu nakə a ye ka bo mäge aye, mäge wu ŋwalak eye a ndo hay, məpe mədzał gər ka Mbəlom. Anaŋ wu nakə a ye ka bo mäge aye, ze məgər ha siye bay.

24 Nəkurom ka tərüm na, andza guluf neheye faya ta lakiye tay ha ndo hay aye. Faya ka palumeye madzendzew hay abəra ma yam kurom nakə faya ka sum aye, ane tuk na, ka gərüm ha a dəma zlgweme.

25 «A nəkurom ndo mədzaŋgawa bazlam i Mbəlom mapala eye ta Farisa hay, nəkurom na, bəbək eye hay. Dəretsətseh ka gər kurom hərwi nəkurom faya ka tsakadumeye dəba i gəsiyem ta dəba i səra lele. Ane tuk na, huđ eye maraha eye tə wu neheye ka kəlum aye ada tə wu nakə a say a bor i bo kurom aye.

26 A nəkurom Farisa neheye ka tərüm andza guluf hay aye, tsakadum na huđ i gəsiyem kurom təday ada dəba eye bəbay ma zəbiye lele dərmak.

27 «A nəkurom ndo mədzaŋgawa bazlam i Mbəlom mapala eye ta Farisa hay, nəkurom bəbək eye hay. Dəretsətseh ka gər kurom hərwi nəkurom ka ndzəkitem bo na, tsəvay neheye ta lambad tay ha dəba eye lele, a zəba kudekudek. Tə le ka dərə mazəbe fataya haladzay. Ane tuk na, mə huđ eye na, maraha eye ta mətəsł i mədahaŋ hay ada tə wu neheye maza eye tebiye.

28 Nəkurom na, andza niye dərmak. Ka dərə i ndo hay na, ka gwađum nəkurom ndo i dedek hay. Ane tuk na, mə dərəv kurom na, nəkurom maraha eye ta bəbək ada ta mənese.

29 «A nəkurom ndo mədzaŋgawa bazlam i Mbəlom mapala eye ta Farisa hay, nəkurom na, bəbək eye hay. Dəretsətseh ka gər kurom hərwi faya ka dəzlumeye tsəvay i ndo mədə ha bazlam i Mbəlom hay, ada faya ka lambadumeye tsəvay i ndo neheye tə pay bəzay a Mbəlom ta dedek aye.

30 Ada ka gwađum: “Tadə nəmaa ge andaya a həlay i bəba tətə may neheye tə kədawa ndo mədə ha bazlam i Mbəlom hay aye na, nəmaa dzapiye ta nəteye hərwi məkədə tay ha bay.”

31 Andza niye, bo kurom eye tə gər kurom ka sərüm ha nəkurom wawa i ndo neheye tə kəd tay ha ndo mədə ha bazlam i Mbəlom hay aye.

32 Lele, ndədikum ka məsler i bəba tətə kurom huya!

33 «Nəkurom na, dədə hay, wawa i palas hay! Ka slumeye mətəme abəra ka sariya i ako nakə ma mbatiye bay aye na, kəkay?

34 Hərwi niye, tsənum lele: Na slarakumeye naha ndo mədə ha bazlam i Mbəlom hay, ndo neheye ta tsah aye, ndo neheye ta tətikakumeye. Ka kədumeye tay ha siye hay, ka darumeye tay ha siye ha ka mayako mazzləmbada eye, siye ka ndađumeye tay ha ta mandalađa mə gay i mađuwule me kurom hay ada siye ka həharumeye tay ha ka gəma ka gəma.

35 Andza niye, ndo neheye ka kədum tay ahəl niye kariye ta ge mənese bay aye na, mənese eye ma dədiye na, ka gər kurom. A dazlay ka Abel ndo məpay naha faya a Mbəlom hus ka Zakari wawa i Baraki nakə ka kədum mə waləŋ i təv məvalay wu a Mbəlom ta təv nakə tsadaŋŋa eye.

36 Neŋ faya na gwađakumeye: Sərüm ha na, wu neheye tə ge ahəl niye tebiye na, sariya i Mbəlom ma dədiye ka ndo neheye anəke aye.»



*Yesu a tuwa Zerozelem*

*Luka 13.34-35*

<sup>37</sup> Yesu a dazlay mätuwe Zerozelem. A gwad: «Näkurom ndo i Zerozelem hay, näkurom ndo i Zerozelem hay. Näkurom neheye ka bəbazlum tay ha ndo mädə ha bazlam i Mbəlom hay ada ka kädum tay ha ndo neheye Mbəlom a slarakum naha aye tə kwar. Sik nday nakə a seŋ məhayakum gər ka təv ga andza mandzekwer nakə ma hayatay gər a wawa ŋgay hay a hud i gwezleviyek ŋgay aye. Ane tuk na, ka wudum bay!

<sup>38</sup> Hərwi niye, gay kurom ma təriye rəgay.

<sup>39</sup> Andza niye, neŋ faya na gwadəkumeye: Ma dazleye anəke ka ŋgatumeŋeye sa bay hus ahəl nakə ka gwadumeye: “Mbəlom mā pa ŋgama ka ndo nakə faya ma deyeweye tə məzele i Bəy Maduweŋ aye!”»

## 24

*Yesu a da ha ta mbəzliye ha gay i mädəslay ha gər a Mbəlom*

*Markus 13.1-2; Luka 21.5-6*

<sup>1</sup> Yesu a ndohwaw abara mə gay i mädəslay ha gər a Mbəlom. Ahəl nakə faya ma diye ŋgway aye na, gawla ŋgay hay ti ye naha ka təv ŋgay hərwi a satay mädəy ha ta dəzl gay i mädəslay ha gər a Mbəlom ada siye i gay hay na, kəkay.

<sup>2</sup> Yesu neŋgeye a gwadətay: «Faya ka ŋgatumeye a wu neheye tebiye na gwad ba? Sərum ha kame na, ka ŋgatumeye a kwar kwa nətə ka gər i kwar ŋged bay. Ta mbəzliye ha hele hele.»

*Ŋgodgor i mandəve i mändzibəra*

*Markus 13.3-13; Luka 21.7-19*

<sup>3</sup> Yesu a ye, a tsal a Mahəmba i Tetädəz. Ahəl nakə neŋgeye mandza eye na, gawla ŋgay hay ti ye ka təv ŋgay mahətəye, ti ye ta tsətsah faya, tə gwadəy: «Tsikamay, wu neheye ta ta giye bo na, kədəy? Ada ŋgodgor waray nakə ma diye ha mazlambar ka maweye ada mändzibəra mazlambar ma ndəviye aye?»

<sup>4</sup> Yesu a mbədətay faya, a gwadətay: «Gum metsehe! Ndəray mā səpat kurom bay.

<sup>5</sup> Hərwi ndo hay haladzay ta deyeweye ta məzele ga. Kwa way ma gwadiye: “Neŋ na, Kəriste!” Ada ta səpatiye ndo hay haladzay.

<sup>6</sup> Ka tsənəm ndo hay faya ta giye vərəm bəse tə näkurom kwa neheye dəreŋ tə näkurom aye na, kə dzədzarum bay. Hərwi wu neheye na, kuton ta ndisleweye. Ane tuk na, mandəve i mändzibəra zuk bay.

<sup>7</sup> Slala ŋged ta giye vərəm ta slala neŋged, bəy ta bəy ta giye vərəm. Mandərzlan ma giye, dala ma bəliye ma gəma hay wal wal.

<sup>8</sup> Wu neheye tebiye ta giye bo na, andza məwe wawa nakə a dazlay a ŋgwas aye.»

*Wu nakə ma ndzateye a gər a gawla i Yesu hay aye*

<sup>9</sup> «Ma dəba eye na, ndo hay ta gəsiye kurom hərwi ada tə gəkum dəretsətseh, ta kədiye kurom. Slala i ndo hay tebiye ta nakumeye dəre hərwi ga.

<sup>10</sup> A həlay niye na, ndo hay haladzay ta gəriye ha məpe mädzal gər abəra ka neŋ. Ta həliye ka bo me ada ta niye a bo dəre mə walaŋ tay nətə nətə.

<sup>11</sup> Ndo neheye tə gwad nətəye ndo mädə ha bazlam i Mbəlom aye haladzay ta deyeweye. Ta səpatiye ndo hay haladzay.

<sup>12</sup> Mənese ma səkahiye haladzay. Hərwi niye, mawudə bo i ndo hay haladzay ma nəkidiyə.



<sup>13</sup> Ane tuk na, ndoweye kə səmay naha hus ka mandəve aye na, Mbəlom ma təmiye ha.

<sup>14</sup> Ta diye ha Labara Nḡwalak eye i Bəy i Mbəlom a ndo i mändzibəra hay tebiye hərwi ada ndo neheye tə sər Mbəlom bay aye tã tsəne. Tsa na, mändzibəra ma ndəviye.»

*Ta mbəzliye ha Zerozelem*

*Markus 13.14-23; Luka 17.23-24,37, 21.20-24*

<sup>15</sup> Yesu a gwadatay: «Ka nḡgatumeye a wuray maga zluwer eye andza mazəlatonḡo, ma lətsiye a təv nakə tsədanḡa eye, andza nakə Daniyel\* ndo madə ha bazlam i Mbəlom kə tsik faya. (Ndowneye kə dzanḡa na, mã tsəne lele.)

<sup>16</sup> Ndo neheye ka dala i Yahuda aye, ta nḡgatay a wu niye na, tã hway a mahamba hay.

<sup>17</sup> Ndo nakə neḡgeye ka gər i gay aye na, mã mbəzlaw ka dala hərwi mede mähəlaw wu nḡgay hay abəra mə gay nḡgay bay.

<sup>18</sup> Ndo nakə neḡgeye ma guvah aye na, mã mbəda gər a mətəgay nḡgay məzlaw peteked nḡgay bay.

<sup>19</sup> Pat eye niye na, dəretsətseh wene wene eye na, ka gər i nḡwas neheye tə bo sulo aye ada ka nḡwas neheye faya ta vələteye wah a wawa tay hay aye!

<sup>20</sup> Duwulumay me a Mbəlom hərwi mahway nakə ka hwayumeye mã ge a həlay i mətəsl bay kəgəbay pat i mazəzukw bo bay.

<sup>21</sup> Andza niye, a həlay niye na, ndo hay ta siye dəretsətseh haladzay. Kwa ahəl nakə Mbəlom a ge mändzibəra aye hus anəke na, dāda ndəray kə sa dəretsətseh andza niye bay ada dāda ma giye bo andza niye sa bay.

<sup>22</sup> Tadə Mbəlom mã nəkid ha abəra ka pat i dəretsətseh bay na, ndəray kwa nəte ma təmiye bay. Ane tuk na, a nəkid ha hərwi ndo nḡgay neheye a pala aye.

<sup>23</sup> «Tadə ndəray kə gwadəkum: “Zəbum! Kəriste ananḡ!” kəgəbay “Neḡgeye atay!” na, kã təmum bazlam nḡgay bay.

<sup>24</sup> Andza niye, ndo masəpete ndo hay ta deyeweye. Ta gwadiye nəteye na, ndo madə ha bazlam i Mbəlom, kəgəbay ndo mətəme ha ndo nakə Mbəlom a slaraweye. Nəteye na, ta giye masuwayanḡ hay ada tə wu neheye ma giye hərbaḡəkkka aye hərwi tadə ma giye bo na, masəpete tay ha ndo neheye Mbəlom a pala aye.

<sup>25</sup> Ananḡ, na tsikakum ka bo abəra kurre. Pum a zləm lele.

<sup>26</sup> «Tadə ta gwadəkum: “Kəriste ananḡ mə pesl”, kã yum bay, kəgəbay ta gwadəkum: “Neḡgeye ananḡ manḡaha bo eye kananḡ” na, kã təmum bay.

<sup>27</sup> Neḡ Wawa i Ndo, na deyeweye na, andza mawutseḡe i mbəlom nakə ta nḡgateye kwa tə waray aye.

<sup>28</sup> Andza niye, təv nakə wu maməta eye mə dəma aye na, magoduk hay ta hayiye gər a dəma.»

*Məmwaw i Wawa i Ndo*

*Markus 13.24-27; Luka 21.25-28*

<sup>29</sup> «Kwayanḡa dəretsətseh niye hay ta ye abəra mə dəma na, pat ma giye andaya sa bay ada kiye ma dəviye bay. Wurzla hay dərmak ta kutsaweye abəra ka magərmbəlom, ada wu neheye gədanḡ eye ka magərmbəlom aye ta bəliye haladzay.

<sup>30</sup> Pat eye niye na, ndo hay ta nḡgateye a wu nakə ma diye ha neḡgeye faya ma deyeweye aye ka magərmbəlom. Ndo i mändzibəra hay tebiye ta tuwiye

\* **24:15** Zəba ma Daniyel 9.27; 11.31; 12.11.

ka bo. Ta ngeteŋeye a neŋ Wawa i Ndo na deyeweye ma pazlay ta gədan̄ ada ta məzlaḅ eye haladzay.

<sup>31</sup> Ta fa toloom bagwar eye na, ma sləraweye gawla i Mbəlom hay, ta hayay gər a ndo neheye a pala tay ha aye abəra ka kokway i məndzibəra tebiye kwa ka waray ka waray.»

*Dzeke i gurov*

*Markus 13.28-31; Luka 21.29-33*

<sup>32</sup> Yesu a gwadatay: «Tsənum dzeke i gurov təday. Ka ŋgatumay a gurov ka dūda na, ka sərūm ha gwaduvay kə ge, mazlambar yam ma piye bədaw?

<sup>33</sup> Andza niye, ka ŋgatumay a wu neheye tebiye ta ndislew na, sərūm ha neŋ Wawa i Ndo mazlambar na deyeweye, neŋ ka maged.

<sup>34</sup> Neŋ faya na gwadakumeye: Sərūm ha na, wu nakay tebiye ma giye bo na, ndo neheye anəke aye ta mət zuk bay.

<sup>35</sup> Magərmbəlom ta dala ta dziye, bazlam ga na, dāda ma dziye bay.»

*Maa sər pat nakə məndzibəra ma ndəviye na, Mbəlom nətə ŋgweŋ*

*Markus 13.32-37; Luka 17.26-30,34-36*

<sup>36</sup> Yesu a gwadatay sa: «Ma deyeweye pat waray na, ndəray kwa nətə a sər bay. Ada ma deyeweye ahəl waray na, ndəray a sər həlay eye bay sa. Kwa gawla i Mbəlom hay ma mbəlom, kwa neŋ Wawa ŋgay bəbay, nəmaa sər bay. Maa sər pat eye na, Mbəlom Bəba ga nətə ŋgweŋ.

<sup>37</sup> Wu nakə a ge bo a həlay i Nuhu aye na, pat nakə neŋ Wawa i Ndo na deyeweye na, ma ta giye bo andza niye dərmak.†

<sup>38</sup> Hərwi ahəl nakə yam ka dazlay a məpe zuk bay aye na, ndo hay tə ndayawa wu mənday, tə sawa wu məsay, tə zlawā dahəlay ada tə vəlawā dem tay hay a zal hus a pat nakə Nuhu a fələkwa a kwalalan̄ i yam aye.

<sup>39</sup> Ta sər ka bo bay hus a həlay nakə yam a yaw a həl tay ha tebiye. Ahəl nakə neŋ Wawa i Ndo na deyeweye na, ma giye andza niye dərmak.

<sup>40</sup> «A həlay niye na, ndo hay sulo ma guvah na, ta zliye nətə, ta gəriye ha nenged.

<sup>41</sup> Ŋgwas hay sulo ta ləgəriye na, ta zliye nətə ta gəriye ha nenged.

<sup>42</sup> Hərwi niye, ndzum na, tsezlezlen̄je bəna ka sərūm pat nakə Bəy Maduweŋ kurom ma maweye bay.

<sup>43</sup> «Tsənum wu nakay lele: Ndo i gay mā sər həlay nakə məkal ma deyeweye ma kəliye na aye na, ma ndzahəriye bay. Ma ndziye tsezlezlen̄je, ma gəriye ha məkal mā fələkwa a gay ŋgay bay.

<sup>44</sup> Hərwi niye, nəkurom dərmak ləvum bo, hərwi neŋ Wawa i Ndo na maweye ahəl waray na, ka sərūmeye bay.»

*Ndo i məsler ŋgwalak eye*

*Luka 12.41-48*

<sup>45</sup> Yesu a gwadatay: «Ndo i məsler ŋgwalak eye ada ma giye məsler tə metsehe lele eye na, way? Nengeye na, ndo nakə ndo i gay ŋgay a gwadāy “Gatay gər a siye i ndo mäge məsler ga hay. Vəlatay wu mənday tə həlay eye.”

<sup>46</sup> Məŋgweŋe ka gər i ndo mäge məsler niye tadə ndo i gay ŋgay ki yaw, kə ndzay a gər nengeye faya ma giye məsler andza nakə tə tsikay aye.

<sup>47</sup> Neŋ faya na gwadakumeye: Sərūm ha na, ndo i gay ŋgay ma gəray ha zlele ŋgay tebiye mā ləvay gər.

<sup>48</sup> «Ane tuk na, tadə ndo mäge məsler niye ŋgwalak eye bay na, ma gwadeye a gər ŋgay: “Ndo i gay ga faya ma gaweye mahonok, ma deyeweye bəse bay”,

† 24:37 Madazlay i wu hay 7.17-23.

<sup>49</sup> ma piye bo mǎndebe siye i ndo neheye faya ta giye mǎsler dziye. Ma ndiye wu mǎnday ada ma siye wu mǎsay ta ndo mǎkweye hay.

<sup>50</sup> Ndo i gay ɲgay ma maweye na, ka hǎlay nakǎ faya ma hǎbiye bay aye ada a sǎr bay aye.

<sup>51</sup> Ki yaw na, ma vǎleye dǎretsǎtseh haladzay, ma hǎhariye na ndo i mǎsler niye. Ma kaliye ha a tǎv i ndo i bǎbǎrek hay. Mǎ dǎma na, ta tuwiye tǎ mahǎpǎde zler eye.‡»

## 25

### *Dzeke i merehe i dem hay kuro*

#### *Luka 12.35-38, 13.25-28*

<sup>1</sup> Yesu a gwadatay: «A hǎlay niye na, Bǎy i Mbǎlom ma ndzǎkitiye bo na, tǎ merehe i dem hay kuro. Tǎ hǎl lalam tay hay, ti ye hǎrwi mǎdzǎgǎr tǎ zal i dahǎlay.

<sup>2</sup> Mǎ walan j i merehe i dem neheye kuro aye, zlam na, matǎrakahan j eye hay, siye hay zlam na, metsehe tay andaya.

<sup>3</sup> Merehe i dem neheye zlam matǎrakahan j aye, tǎ hǎl lalam tay na, ta lǎva ha bo tǎ mal bay.

<sup>4</sup> Merehe i dem neheye zlam metsehe tay andaya aye na, tǎ hǎl lalam tay ada kwa way a lǎva ha bo tǎ mal ma dos.

<sup>5</sup> Zal i dahǎlay ki yaw bǎse bay. Merehe i dem niye hay tebiye mǎndzehǎre a gatay, tǎ ndzahǎra.

<sup>6</sup> «Ta magǎrhǎvad na, mawude a tsǎne. “Anan j zal i dahǎlay kǎ ndzew! Lǎtsum ka mbǎlom, dum ta dzum gǎr.”

<sup>7</sup> Merehe i dem niye hay ta pǎdeke abǎra ka mǎndzehǎre, ta dazlay mǎlǎve bo ta lalam tay hay.

<sup>8</sup> Merehe i dem neheye matǎrakahan j aye na, ta tsǎtsah mal ka merehe i dem neheye metsehe tay andaya aye, tǎ gwadatay: “Mbǎdumamay mal a lalam may hay tsekwen j tey hǎrwi faya ta mbatiye.”

<sup>9</sup> Merehe i dem neheye metsehe tay andaya aye, ta mbǎdatay faya, tǎ gwadatay: “A’ay, andaya haladzay ma sliye a nǎmay ada a nǎkurom bay. Hwayum naha bǎse duh ka tǎv i ndo i tsakala, sǎkamumaw.”

<sup>10</sup> Ahǎl nakǎ ti ye masǎkǎmaw mal aye na, zal i dahǎlay a ndislew. Merehe i dem neheye zlam malǎva bo aye na, tǎ fǎlǎkwa ka bo tǎ nenjeyeye a gay i magurlom i mǎzle dahǎlay. A dǎrǎzl a mǎged.

<sup>11</sup> Mǎndze zǎrat na, siye i merehe i dem niye hay tǎ maw. Tǎ maw na, tǎ gwad: “Bǎy Maduwen j, Bǎy Maduwen j, hǎndǎkamay abǎra ma mǎged!”

<sup>12</sup> Ane tuk na, zal i dahǎlay a gwadatay: “Nen j faya na gwadakumeye ta dedek, na sǎr kurom bay.”

<sup>13</sup> Hǎrwi niye, ndzum tsezlezlenjǎ bǎna pat eye kwa hǎlay eye na, ka sǎrum bay.»

### *Dzeke i ndo mǎge mǎsler hay mahkar*

#### *Luka 19.11-27*

<sup>14</sup> Yesu a gwadatay sa: «Ma giye bo andza ndo i gay nakǎ a say mede a tsekene aye. A zalatay a ndo i mǎsler ɲgay hay, a gǎr ha zlele ɲgay a hǎlay tay.

<sup>15</sup> A vǎlay kwa a way ka gǎdan j ɲgay. A vǎlay a ndo ɲged kwar i suloy temerre zlam, a ndo ɲged temerre sulo, a ndo mamahkar eye temerre nǎte. Tsa na, a ye ɲgway.

‡ 24:51 Zǎba ma Mata 8.12 ada dzanǎga wu nakǎ mawatsa eye ka gǎr aye.

16 «Ndo i mäsler nakə tə vəlay kwar i suloy temerre zlam aye na, a ye a mbəda ha həlay kwayanğa. A huta faya kwar i suloy temerre zlam sa.

17 Ndo nakə tə vəlay kwar i suloy temerre sulo aye na, a ge ha andza niye dərma. A huta faya kwar i suloy temerre sulo.

18 Ane tuk na, ndo nakə tə vəlay kwar i suloy temerre nəte aye na, a ye a la bəd, a ngaha na suloy i ndo i gay ngay niye a dəma.

19 «Aza a ndzaw məve tsakway na, ndo i gay i ndo i mäsler niye hay a maw. Tsa na, a say məpesle na suloy ngay nakə a vəlatay aye.

20 Ndo nakə a vəlay kwar i suloy temerre zlam aye, a ye ka təv ngay, a gwaday: “Ndo i gay ga, ka vəleñ na, kwar i suloy temerre zlam. Anañ na huta faya kwar i suloy temerre zlam.”

21 Ndo i gay ngay a gwaday: “Lele haladzay, nəkar na, ndo i ngwalak ada ndo i dedek. Nəkar ndo i dedek kwa mə wu neheye tsekweñ aye, na pakeye wu haladzay a həlay. Dara ngwasama ka bo tə neñ.”

22 Ndo i mäsler nakə a vəlay kwar i suloy temerre sulo aye, a ye naha, a gwaday: “Ndo i gay ga, ka vəleñ kwar i suloy temerre sulo. Anañ na huta faya kwar i suloy temerre sulo.”

23 Ndo i gay ngay a gwaday: “Lele, nəkar na, ndo i ngwalak ada ndo i dedek. Nəkar ndo i dedek kwa mə wu neheye tsekweñ aye, na pakeye wu haladzay a həlay. Dara ngwasama ka bo tə neñ.”

24 Ndo nakə tə vəlay kwar i suloy temerre nəte aye, a ye naha a gwaday: “Ndo i gay ga, na sər ha, nəkar na, ndo makula gər eye. Ka dziye wu nakə ka sləga bay aye, ka hayay gər a wu nakə ka zəv bay aye.

25 Na dzədzar, hərwi niye na ye na ngaha kwar i suloy yak a bəd. Anañ suloy yak.”

26 Ndo i gay ngay a gwaday: “Nəkar na, ndo i mäsler nakə ngwalak eye bay aye ada səe eye. Ka sər na, na dziye wu nakə na sləga bay aye ada na hayay gər a wu nakə na zəv bay aye ba?”

27 Meeneñ na, peñ na suloy a bank. A həlay i məmaw ga na, na həla ahaya suloy ga ta magogoy eye faya.

28 Həlum faya abəra kwar i suloy niye temerre nəte aye. Vəlumay ha faya a ndo nakə kwar i suloy andaya faya gwezem aye.

29 Hərwi ndo nakə wu ngay andaya aye na, ta səkahay ha sa. Ane tuk na, ndo nakə wu ngay andaya bay aye na, kwa tsekweñ eye nakə andaya faya aye na, ta zliye na faya abəra.

30 Gəsüm na ndo nakay ma giye ngama bay aye. Kalum naha abəra a ləvoñ. Mə dəma na, ta tuwiye tə mahəpəde zler eye. \*”»

### *Sariya i mandəve i məndzibəra*

31 Yesu a gwadatay sa: «Ahəl nakə neñ Wawa i Ndo na deyeweye ma məzla6 ga ta gawla i Mbəlom hay tebiye aye na, na ndziye ka dzañga i bəy ga ta məzla6.

32 Ndo i məndzibəra hay tebiye ta hayiye gər ka təv ga ada na ngəniye ha ka bo abəra ndo hay ta ndo siye hay andza ndo mətsəkure ma ngəniye tay ha təbən hay ta wak hay.

33 Ka ngəna tay ha na, ma piye tay ha təbən hay a diye i həlay i mənday ngay ada ma piye tay ha wak hay a diye i həlay i gula ngay.

\* 25:30 Zəba ma Mata 8.12 ada dzañga wu nakə mawatsa eye ka gər aye.

34 «Bəy ma gwadateye a ndo neheye tə həlay i mənday ɲgay aye: “Dumara, nəkurom neheye Mbəlom Bəba ga a pa fakuma ɲgama aye, ka ndzumeye ma bəy ga nakə Mbəlom a ləvakum ha bo kwa ahəl nakə kə ge məndzibəra zuk bay aye.

35 Hərwi ahəl niye, may a wur fagaya na, ka vəlumenɲ wu mənday, yam a geɲ na, ka vəlumenɲ yam məsəy, neɲ mbəlök eye na, ka təmum ga a gay kurom,

36 peteked andaya fagaya bay na, ka pumenɲ ka bo peteked, neɲ dəvats eye na, ka gumenɲ gər, neɲ ma danɲay na, ka yum ka zəbumenɲew dəre.”

37 «Ndo neheye tə gawa wu nakə a yay a gər a Mbəlom aye na, ta mbədəye faya, ta gwadəye: “Bəy Maduweɲ, nəmaa ɲgataka may a wur fakaya ada nəmaa vəlaka wu mənday na, kədəy? Yam a gaka ada nəmaa vəlaka yam məsəy na, kədəy?”

38 Nəmaa ɲgataka nəkar mbəlök eye ada nəmaa təma kar a gay may na, kədəy? Peteked fakaya bay ada nəmaa paka ka bo peteked na, kədəy?

39 Nəmaa ɲgataka nəkar dəvats eye kəgəbay nəkar ma danɲay ada nəmaa ye mazəbakaw dəre na, kədəy?”

40 «Bəy ma mbədəteye faya, ma gwadateye: “Neɲ faya na gwadəkumeye, sərūm ha, kwa mey ka gumay a ndo wawa eye tsekweɲ mə walaɲ i malamar ga hay na, ka gum niye na, a neɲ.”

41 Ma dəba eye bəy ma gwadateye a ndo neheye tə həlay i gula ɲgay aye: “Dum abəra ka təv ga, nəkurom neheye Mbəlom a vəlakum mezeleme aye! Dum a ako nakə ma mbatiye dāda bay Mbəlom a ləvatay ha bo a Fakalaw ta gawla ɲgay hay aye.

42 Hərwi, ahəl nakə may a wur fagaya na, ka vəlumenɲ wu mənday bay. Yam a geɲ na, ka vəlumenɲ yam bay,

43 Neɲ mbəlök eye na, ka təmum ga a gay kurom bay, peteked andaya fagaya bay na, ka pumenɲ ka bo peteked bay, neɲ dəvats eye ada neɲ ma danɲay na, ka gumenɲ gər bay.”

44 «Nətəye dərmaɲ ta mbədəye faya, ta gwadəye: “Nəmaa ɲgataka may a wur fakaya, yam a gaka, nəkar mbəlök eye, dəvats eye kəgəbay ma danɲay nəmaa gaka gər bay na, kədəy?”

45 «Bəy ma mbədəteye faya, ma gwadateye: “Neɲ faya na gwadəkumeye: Sərūm ha na, wu nakə ka slum faya məgay a ndo wawa eye tsekweɲ mə walaɲ i ndo neheye bay na, ka gumenɲ a neɲ bay dərmaɲ.”»

46 Yesu a gwadətay: «Nətəye, ta diye ta hutiyə na, dərətsətəh nakə ma ndəviye bay ka tor eye. Ndo neheye tə ge wu nakə a yay a gər a Mbəlom aye na, ta diye a sifa nakə ma ndəviye bay aye.»

## 26

*Ta pəla tsəved məgəse na Yesu*

*Markus 14.1-2; Luka 22.1-2; Yuhana 11.45-53*

1 Ahəl nakə Yesu a ndəv ha matətike aye na, a gwadətay a gawla ɲgay hay:

2 «Ka sərūm ha magurlom i Pak a zəkaw na, məhəne sulo. Neɲ Wawa i Ndo ta gəsiye ga hərwi ada tā dar ga ka mayako mazləmbada eye.»

3 A həlay niye na, bagwar hay i ndo neheye tə vələway wu a Mbəlom aye ta madugula i Yahuda hay tə haya gər a gay i Kayif, bagwar i ndo məvələway wu a Mbəlom.

4 Tə ma ha ka bo bazlam mə walaɲ tay, a satay məgəse Yesu ta məkal ada məkədə na.

<sup>5</sup> Ane tuk na, tə gwad: «Kâ gəsakwa na tə magurlom nakay bay bəna, ndo hay ta gəriye kway ha bay.»

*Ngwas wuray a mbəda mal ka gər i Yesu*

*Markus 14.3-9; Yuhana 12.1-8*

<sup>6</sup> Yesu nenjeyeye ma gəma i Betani, mə gay i ndo wuray tə zalay Simon. Ndoweye niye a ndzawa na, dāvats i madəgwede a gaway.

<sup>7</sup> Ahəl nakə faya ta ndiye wu mənday aye na, ngwas wuray a ye naha ka təv i Yesu ta dos mə həlay a le haladzay, maraha eye tə mal nakə a ze huŋŋa tsakala eye haladzay aye. A mbəda mal niye ka gər i Yesu.

<sup>8</sup> Gawla ngay hay tə ngatay na, a yatay a gər bay, tə gwad: «A nas ha mal nakay na, hərwi mey?»

<sup>9</sup> Ngama meeneŋ mâ səkəm ha na, ma hutiyeye ha suloy haladzay ada ma pateyeye suloy eye a ndo i mətawak hay.»

<sup>10</sup> Yesu a sərətay naha a gər ka bazlam tay niye, a gwadətay: «Ka kwasum-eye gər a ngwas nakay na, hərwi mey? Wu nakə a ge hərwi ga aye na, lele haladzay.

<sup>11</sup> Ndo i mətawak hay na, nətəye ka təv kurom huya. Ane tuk na, neŋ na, na ndziye tə nəkurom huya bay.

<sup>12</sup> Nenjeyeye ka mbəda mal ka bo ga hərwi mələve ha bo i məzle ga a bəf.

<sup>13</sup> Neŋ faya na gwadakumeye, sərūm ha: Kwa a ngay ta diye ha Labara Ngwalak eye nakay ka məndzibəra tebiye na, ta tsikiye ka ngwas nakay hərwi wu nakə a ge aye. Ndo hay ta mətsiye ha gər bay.»

*Yudas Iskariyot a pəla tsəved məge daf ka Yesu*

*Markus 14.10-11; Luka 22.3-6*

<sup>14</sup> Ndo nətə mə walaŋ i gawla i Yesu hay kuro gər eye sulo, məzele ngay Yudas Iskariyot, a ye ka təv i bagwar hay i ndo neheye tə vələway wu a Mbəlom aye.

<sup>15</sup> A ye naha, a gwadətay: «Tadə na pəlakum tsəved məgəse Yesu na, ka vəlumeŋeye mey?» Bagwar hay i ndo neheye tə vələway wu a Mbəlom tə paslay kwar i suloy kuro kuro mahkar\*, tə vələy.

<sup>16</sup> A dazlay pat eye niye Yudas a pəla həlay nakə lele eye hərwi məge daf ka Yesu aye.

*Yesu a ləva ha bo tə dafi Pak*

*Markus 14.12-16; Luka 22.7-14*

<sup>17</sup> Pat makurre i magurlom nakə tə ndayawa wu mənday nakə gəde faya bay aye na, gawla i Yesu hay ti ye ka təv i Yesu, tə gwadəy: «A saka nəmaa daka daf i magurlom i Pak na, ka waray?»

<sup>18</sup> Yesu a gwadətay: «Dum a wuzlahgəma, a gay i ndoweye andaya, gwadumay: “Miter a gwad: Həlay eye i ga kə slaw. Na ndiye daf i Pak ta gawla ga hay na, mə gay yak.”»

<sup>19</sup> Gawla i Yesu hay ti ye tə ge wu nakə Yesu a tsikatay aye. Tə da wu mənday i Pak mə dəma.

*Yesu a da ha gawla ngay nətə ma giye faya daf*

*Markus 14.17-21; Luka 22.21-23; Yuhana 13.21-30*

<sup>20</sup> Huwa a ge na, Yesu ta gawla ngay hay kuro gər eye sulo ti ye tə ndza, ta dazlay a mənde wu mənday.

\* 26:15 Zəba ma Zakari 11.12.

<sup>21</sup> A hələy nakə nəteye faya ta ndiye wu mənday aye na, Yesu a gwadətay: «Nej faya na gwadəkumeye: Sərum ha na, ndo nəte mə walañ kurom ma giye fagaya daf.»

<sup>22</sup> A ndalatay a gawla ɲgay hay tebiye. Tsa na, ta dazlay matsətsehe faya, nəte ta nəte: «Bəy Maduweñ, neñ dāw?»

<sup>23</sup> Yesu a mbədətay faya, a gwadətay: «Mata ge fagaya daf na, ndo nakə faya nəmaa tələkiye hələy a sərə salamay aye.»

<sup>24</sup> Neñ Wawa i Ndo na mətiye andza nakə Derewel i Mbəlom a tsik aye. Ane tuk na, dəretsətseh ka gər i ndo nakə ma giye daf ka neñ Wawa i Ndo aye. Ndo niye na, ɲgama meeneñ t̄a wa na bay.»

<sup>25</sup> Yudas, ndo nakə ma giye daf ka Yesu aye, a tsətsah faya: «Neñ dāw, Miter?»

Yesu a mbədətay faya, a gwadətay: «Andza nakə ka tsik aye.»

### *Dafi Bəy Maduweñ*

*Markus 14.22-26; Luka 22.15-20; 1 Korinje hay 11.23-25*

<sup>26</sup> Ahəl nakə faya ta ndiye daf aye na, Yesu a zla peñ, a gay naha sisəe a Mbəlom. Ma dəba eye na, a ɲgəna ha peñ niye, a vəlatay a gawla ɲgay hay, a gwadətay: «Zlum, ndayum. Nakay na, bo ga.»

<sup>27</sup> Ma dəba eye a zla gəvət, a gay naha sisəe a Mbəlom. Ma dəba eye a vəlatay, a gwadətay: «Sum nəkurom tebiye.»

<sup>28</sup> Nakay na, bambaz ga nakə Mbəlom ma bəriye dzam ta ndo hay aye. Ta mbədiye ha na, hərwi məpəse ha mezeleme i ndo hay haladzay.

<sup>29</sup> Neñ faya na tsikakumeye, na ta siye wu məse nakay sa bay hus a pat nakə ka ta sakweye wədeye ma bəy i Bəba ga Mbəlom aye.»

<sup>30</sup> Ma dəba eye, ta zambadətay a Mbəlom ta dəməs† na, ti ye tə tsal a Mahəmba i Tetədəez.

### *Piyer ma gwadīye: «Na sər Yesu bay»*

*Markus 14.27-31; Luka 22.31-34; Yuhana 13.36-38*

<sup>31</sup> Ma dəba eye na, Yesu a gwadətay a gawla ɲgay hay: «Bəgom ta həvad nakay nəkurom tebiye ka gərumeye ga ha. Hərwi mawatsa eye mə Derewel i Mbəlom, a gwad: “Na ta kədiye na ndo mətsəkure tay, ada təbañ niye hay mahaya gər eye ta ɲgəniye gər kweye kweye kwa a ɲgay.‡”

<sup>32</sup> Ane tuk na, na mbəlaw abəra ma mədahañ na, na həbiye kurom ma Galile.»

<sup>33</sup> Piyer a mbədətay faya, a gwadətay: «Kwa siye i ndo hay ta gər kar ha na, neñ na gəriye kar ha dādā təbəy.»

<sup>34</sup> Yesu a mbədətay faya, a gwadətay: «Neñ faya na gwadəkəye: Sər ha na, bəgom ta həvad nakay dzagulok ma ta zlahiye na, bə ka gwad sik mahkar ka sər neñ bay.»

<sup>35</sup> Piyer a gwadətay: «Na sər kar bay na, na tsikiye dādā bay, kwa tadə ka mətameye ka bo salamay.» Siye i gawla ɲgay hay tebiye tə tsik andza niye dərmak.

### *Yesu ma Getsemene*

*Markus 14.32-42; Luka 22.39-46; Yuhana 18.1*

<sup>36</sup> Yesu ta gawla ɲgay hay tə ndisl a təv eye andaya tə zalay Getsemene. Mə dəma na, a gwadətay: «Ndzum kənañ. Na diye, na dūwulay naha me a Mbəlom katadətay.»

† 26:30 Tə ge dəməs ka mandəve i mənde daf i Pak na, mə Dəməs hay 113 ka 118. ‡ 26:31 Zakari 13.7.



<sup>37</sup> Tsa na, ti ye ta Piyer ada ta wawa i Dzebede hay sulo. Tə ndisl a dɛma na, mevel i Yesu a dazlay mɛwure faya ada a dzɛdzar haladzay.

<sup>38</sup> A gwadɛtɛy: «Dɛrev ga na, kɛ rah tɛ dɛretsɛtseh i mɛdahaŋ, Nɛkurom na, ndzum kanan, ndzakwa na, tsezlezlenɛ.»

<sup>39</sup> A ye abɛra ka tɛv niye izad tsekwen, a ye naha a kal ha bo ka dala bɛrut da'ar ka dala. A dɛwulay naha me a Mbɛlom, a gwadɛ: «Bɛba ga, tadɛ ma giye bo na, zla fagaya abɛra dɛretsɛtseh nakay na siye tey. Ane tuk na, kɛ ge andza nakɛ a seŋ a neŋ aye bay, ge andza nakɛ a saka a nɛkar aye.»

<sup>40</sup> A maw ka tɛv i gawla ŋgay neheye mahkar aye na, nɛteye mandzahɛra eye. A gwadɛy a Piyer: «Andza niye, ka slum faya mɛndze tɛ neŋ tsezlezlenɛ tɛ dɛre kwa bɛre nɛte bay na, kɛkay?»

<sup>41</sup> Ndzum tɛ dɛre tsezlezlenɛ ada dɛwulumay me a Mbɛlom hɛrwi ada kɛ dɛdum a masɛpete i Fakalaw bay. Mɛsɛfɛre na, a say mɛge wu lele eye, ane tuk na, gɛdan kurom andaya mɛsɛmay naha a masɛpete i Fakalaw bay.»

<sup>42</sup> A ye fataya abɛra masulo eye sa, a ye naha a dɛwulay me a Mbɛlom. A gwadɛ: «Bɛba, tadɛ ka sliye mɛzle fagaya abɛra dɛretsɛtseh nakay na siye bay na, vɛlen gɛdan nɛ sa andza nakɛ a saka a nɛkar aye.»

<sup>43</sup> Tsa na, a maw ka tɛv i gawla ŋgay neheye sa. A ndzatay a gɛr na, nɛteye mandzahɛra eye. Tɛ mba faya mɛndze tɛ dɛre kwa tsekwen bay tebiye.

<sup>44</sup> A gɛr tay ha, a ye sa. A dɛwulay me a Mbɛlom andza nakɛ meeneŋ eye.

<sup>45</sup> Tsa na, a maw ka tɛv i gawla ŋgay hay, a gwadɛtɛy: «Faya ka ndzahɛrumeye sa ada faya ka zɛzɛkumeye bo ba? Gum metsehe, anɛke na, hɛlay eye kɛ slaw. Neŋ Wawa i Ndo ta vɛlay ga ha a hɛlay i ndo i mezeleme hay tuk.

<sup>46</sup> Lɛtsum, takwa ta dzakwa gɛr! Zɛbum, ndo nakɛ ma giye fagaya daf aye, kɛ ndzew.»

### *Tɛ gɛs na Yesu*

*Markus 14.43-50; Luka 22.47-53; Yuhana 18.2-11*

<sup>47</sup> Ahɛl nakɛ Yesu faya ma tsikiye me mba aye na, pɛslan Yudas neŋgeye nakɛ nɛte mɛ walan i gawla i Yesu hay kuro gɛr eye sulo aye, a ye naha. Ti ye naha ta ndo hay haladzay ta maslalam tay hay ada ta sakwal tay hay. Maa slɛr tay naha na, bagwar hay i ndo neheye tɛ vɛlaway wu a Mbɛlom ta madugula i Yahuda hay.

<sup>48</sup> Yudas ndo mɛgatay daf ka Yesu aye ɛa kɛ dɛtɛy ha wu nakɛ ma giye. A gwadɛtɛy: «Ndo nakɛ na ye na gɛs na ka bo tɛmbolok tɛmbolok aye na, neŋgeye! Gɛsum na.»

<sup>49</sup> Yudas a hɛndzɛd naha kwayanɛna ka tɛv i Yesu, a gwadɛy: «Zay daw, Miter!» Tsa na, a gɛs na ka bo tɛmbolok tɛmbolok.

<sup>50</sup> Tsa na, Yesu a mbɛdɛy faya, a gwadɛy: «Dzam ga, wu nakɛ ka yaw mɛge na, ge na.» Tsa na, siye i ndo hay ti ye naha, tɛ wuya kura ka Yesu, tɛ gɛs na.

<sup>51</sup> Ndo nɛte mɛ walan i ndo neheye nɛteye tɛ Yesu aye, a ŋgadaw maslalam ŋgay mbɛhhat, a fay ha a ndo i mɛsler i bagwar i ndo mɛvɛlaway wu a Mbɛlom, a dɛsay na zlɛm fats ka dala.

<sup>52</sup> Tsa na, Yesu a gwadɛy: «Ma ha maslalam yak a gay ŋgay eye hɛrwi ndo neheye ta giye vɛram ta maslalam aye na, ta bɛbazliye tay ha ta maslalam dɛrmak.

<sup>53</sup> Neŋ na sliye mɛzalay a Bɛba ga Mbɛlom, mɛ slɛreŋew gawla ŋgay hay gwezem haladzay anɛke na, ka sɛr tɛbɛdew?»

<sup>54</sup> Ane tuk na, kɛ ge andza niye na, wu nakɛ tɛ watsa a Derewel i Mbɛlom ma giye bo na, ma kɛkay kɛla?»



<sup>55</sup> Yesu a gwadatay a ndo hay: «Ka yumaw fagaya ta maslalam kurom hay ada ta sakwal kurom hay andza ta gəsiye ndo i makal daw? Pat pat neŋ mandza eye ma gay i mädaslay ha gar a Mbälom, na tətikawa, ka gəsüm ga bay!

<sup>56</sup> Ane tuk na, wu neheye tebiye tã ge bo aye na, hãrwi ada wu nakã ndo mãde ha bazlam i Mbälom hay tã watsa mã Derewel i Mbälom aye tã ge bo.»

Tsa na, gawla ŋgay hay tã gar ha, ta hway faya abãra.

*Yesu kame i bagwar i Yahuda hay*

*Markus 14.53-65; Luka 22.54-55,63-71; Yuhana 18.12-14,19-23*

<sup>57</sup> Ma dãba eye ndo neheye tã gäs Yesu aye na, ti ye ha Yesu a gay i Kayif bagwar i ndo mãvãlaway wu a Mbälom. Mã dãma na, ndo mãdzanƷawa bazlam i Mbälom mapala eye ta madugula i Yahuda hay, nãteye mahaya gar eye.

<sup>58</sup> Ahãl nakã faya ta diye ha Yesu aye na, Piyer a pay bãzay ma dãba dãren hus a dalamãtagay i gay i bagwar i ndo mãvãlaway wu a Mbälom. A ye naha a fãlãkwa a dalamãtagay, a ndza ka tãv i ndo niye hay faya ta tsãpiye mãged aye. A say mazãbe faya ta giye ha tã Yesu na, kãkay.

<sup>59</sup> Bagwar hay i ndo neheye tã vãlaway wu a Mbälom aye ta madugula i Yahuda hay tebiye ta pãla ndo hay hãrwi maraw faya me hãrwi mãgay sariya i mãkãde na.

<sup>60</sup> Ndo hay haladzay ti ye naha ta raw faya me. Ane tuk na, ta huta tsãved mãkãde na bay. Ka mãdãve ŋgay eye na, ndo hay sulo ti ye naha, tã gwad:

<sup>61</sup> «Ndo nakay a gwad: “Na sliye faya mambãzle ha gay i mãdãslay ha gar a Mbälom ada ma mãhãne mahkar na, na dãzliye na wedeye.”»

<sup>62</sup> Tã tsãne andza niye na, bagwar i ndo mãvãlaway wu a Mbälom a lãtse, a gwaday a Yesu. «Ka mãbãdatay faya a ndo neheye tãbãdew? Tã tsik fakaya na, mey?»

<sup>63</sup> Ane tuk na, Yesu a ndza ŋgway tete. Bagwar i ndo mãvãlaway wu a Mbälom a gwaday: «Neŋ faya na tsãtsahiye fakaya tã mãzele i Mbälom nakã ma ndziye ka tor eye, mãbãdenjew faya: Nãkar na, Kãriste Wawa i Mbälom daw?»

<sup>64</sup> Yesu a gwaday faya: «Andza nakã ka tsik aye. Ane tuk na, sãrum ha, ma dazlay anãke, ka ŋgatumeŋeye a neŋ Wawa i Ndo na ndziye tã hãlay i mãnday i Mbälom, neŋgeye nakã gãdan eye ka gar i wu hay tebiye aye. Ka ŋgatumeŋeye sa na, ma mãgãrmbãlom na deyeweye ma pazlay.»

<sup>65</sup> Bagwar i ndo mãvãlaway wu a Mbälom a tsãne andza niye na, a ndalay haladzay. A ŋguradã ha peteked ŋgay, a gwad: «Kã tsalay ka gar a Mbälom! Ka pãlakweye na, sa mey, na gwad ka tsãnum wu nakã a tsik aye.

<sup>66</sup> Nãkurom ka dzalum na, kãkay?»

Ndo hay ta mãbãday faya, tã gwaday: «Neŋgeye ndo mãge mãnese, tãde mãkãde na.»

<sup>67</sup> Tsa na, ta tufay slesle6 ka dãre a Yesu, tã fay ta mãpede hãlay, siye hay tã fay ka maholom.

<sup>68</sup> Tã gwaday: «Kãriste, nãkar ndo mãde ha bazlam i Mbälom ba! Tsikamay, maa faka na, way?»

*Piyer a gwad: «Na sãr Yesu bay»*

*Markus 14.66-72; Luka 22.56-62; Yuhana 18.15-18,25-27*

<sup>69</sup> Piyer na, neŋgeye mandza eye ma dalamãtagay ma bãra. ŋgwas wuray a gawa mãsler mã gay i bagwar i ndo mãvãlaway wu a Mbälom niye, a hãndzãd ka tãv i Piyer, a gwaday: «Nãkar dãrmak na, ndo i Yesu, ndo i Galile.»

<sup>70</sup> Ane tuk na, Piyer a ɗay b̄arakazan a Yesu kame i ndo niye hay tebiye, a gwad: «A'ay, na s̄ar wu nak̄a a saka m̄atsiken̄ aye bay.»

<sup>71</sup> Ma d̄aba eye Piyer a ye a ndza sl̄ap ka h̄alay maged̄. Ngwas wuray a ye ka t̄av ngay, a gwadatay a ndo neheye ka t̄av niye aye: «Ndo nakay t̄a ndzawa t̄a Yesu ndo i Nazaret!»

<sup>72</sup> Piyer a ɗay b̄arakazan a Yesu masulo eye. A mbada, a gwad: «A'ay, na gwadum na s̄ar ndo niye bay tiya!»

<sup>73</sup> Ma d̄aba i m̄andze tsekwen̄ na, ndo neheye ka t̄av niye aye, ta h̄andzad̄ ka t̄av i Piyer, t̄a gwaday: «Ta dedek, n̄akar d̄armak na, n̄ate m̄a walan̄ i gawla i Yesu hay. H̄arwi m̄atsike me nak̄a faya ka tsikiye na, a ɗa ha t̄av yak nak̄a ka yaw ab̄ara m̄a d̄ama aye.»

<sup>74</sup> Tsa na, Piyer a gwad: «K̄e ge na raw me na, Mb̄elom m̄a gen̄ d̄arets̄atseh. Na mbada na, ta dedek na s̄ar na ndo nakay bay.»  
Kwayan̄na dzagulok a zlaha.

<sup>75</sup> Bazlam i Yesu nak̄a a tsik aye a mayaw a ḡar a Piyer. Yesu a gwaday: «Dzagulok ma ta zlahiye na, ɓa ka gwad̄ s̄ik mahkar ka s̄ar nen̄ bay.» Tsa na, Piyer a yaw ab̄ara ma dalam̄atagay, a tuwa tsid̄uk tsid̄uk.

## 27

### *Ti ye ha Yesu a gay i Pilat*

#### *Markus 15.1; Luka 23.1; Yuhana 18.28-32*

<sup>1</sup> P̄arik i meked̄e na, bagwar hay i ndo neheye t̄a v̄alaway wu a Mb̄elom aye ta madugula i Yahuda hay t̄a ma ha ka bo bazlam tebiye h̄arwi m̄ak̄ade na Yesu.

<sup>2</sup> T̄a dzawa na Yesu ada ti ye ha a gay i Pilat ngomna i dala i Yahuda, ndo i Roma. T̄a v̄alay ha a Pilat.

### *Yudas a k̄ad̄bo ngay*

#### *M̄asler hay 1.18-19*

<sup>3</sup> Yudas, ndo nak̄a a ge ɗaf ka Yesu aye, a z̄aba ta ḡas na Yesu a sariya na, a dzala ka wu nak̄a a ge aye na, ngwalak eye bay. A h̄al kwar i suloy nak̄a t̄a v̄alay kuro kuro mahkar aye, a matay naha a bagwar hay i ndo neheye t̄a v̄alaway wu a Mb̄elom ta madugula i Yahuda hay.

<sup>4</sup> A ye naha a gwadatay: «Na ge m̄anese, h̄arwi na ge ɗaf ka ndo nak̄a k̄e ge m̄anese bay aye.»

Ta mbaday faya, t̄a gwaday: «Bazlam yak b̄ana, i may mey tey.»

<sup>5</sup> Yudas a kutsatay naha suloy niye m̄a gay i m̄ad̄aslay ha ḡar a Mb̄elom. Tsa na, a ye a h̄aruwa bo ta l̄aber, a m̄at.

<sup>6</sup> Bagwar hay i ndo neheye t̄a v̄alaway wu a Mb̄elom t̄a h̄al sulo niye, t̄a gwad: «Suloy nakay na, bazlam kway mapala eye k̄a v̄alakway tsaved̄ m̄ape na a gay i m̄ad̄aslay ha ḡar a Mb̄elom bay. Suloy nakay na, i m̄ak̄ade ḡar i ndo.»

<sup>7</sup> Ma d̄aba eye, madugula i Yahuda hay t̄a ma ha ka bo bazlam m̄a walan̄ tay h̄arwi suloy niye na, ta s̄ak̄am guvah ab̄ara ka ndo m̄angere ḡarwa. A guvah eye niye na, ta liye a d̄ama slele hay.

<sup>8</sup> H̄arwi niye, hus ka b̄egom t̄a zalay a guvah eye niye na, Guvah i Bambaz.

<sup>9</sup> Andza niye, a ɗa ha na, bazlam i Zeremi ndo m̄ad̄e ha bazlam i Mb̄elom nak̄a a tsik aye. A gwad: «T̄a h̄al kwar i suloy kuro kuro mahkar, niye na tsakala nak̄a ndo i Israyel hay t̄a gwad̄ ta v̄aliye h̄arwi ngay aye.»

<sup>10</sup> Ada ta s̄ak̄am ha guvah ab̄ara ka ndo m̄angere ḡarwa andza nak̄a B̄ay Maduwen̄ Mb̄elom a gweden̄ ge aye.\*»

\* 27:10 Z̄aba ma Zakari 11.12-13; Zeremi 18.2-3; 19.1-2; 32.6-15.

*Yesu kame i Pilat**Markus 15.2-5; Luka 23.3-5; Yuhana 18.33-38*

<sup>11</sup> Yesu nenjeyeye kame i Pilat. Pilat a tsatsah faya, a gwaday: «Nəkar na, bəy i Yahuda hay dedek daw?»

Yesu a gwaday faya: «Nəkar ka tsik segey.»

<sup>12</sup> Bagwar hay i ndo neheye tə vəlaway wu a Mbəlom aye ta madugula hay tə dəs parasay ka Yesu haladzay. Ane tuk na, Yesu ka mbədatay faya bay.

<sup>13</sup> Pilat a gwaday: «Wu neheye faya ta tsikiye fakaya tebiye aye na, ka tsəne təbədəw?»

<sup>14</sup> Ane tuk na, Yesu ka mbəday faya kwa tsekwen bay. Niye na, a gay wadəŋ wadəŋ a Pilat.

*Tə gay sariya a Yesu i məkəde**Markus 15.6-15; Luka 23.13-25; Yuhana 18.3-19.16*

<sup>15</sup> Magurlom i Pak kə ndzew na, ŋgomna a gərawa ha ndo i danjay nəte, ndo nakə a satay a ndo hay aye.

<sup>16</sup> A həlay niye na, ndoweye andaya nenjeyeye sewed eye ma danjay, tə zalay Barabas.

<sup>17</sup> Ndo hay tə haya gər haladzay. Pilat a tsatsah fataya, a gwadatay: «A sakum nā gərakum ha na, way? Barabas tsukudu Yesu nakə tə zalay Kəriste aye daw?»

<sup>18</sup> Pilat a sər ha tə gəsay naha Yesu na, tə ge faya na, sələk kəriye.

<sup>19</sup> Ahəl nakə Pilat mandza eye ka təv mäge sariya aye na, ŋgwas ŋgay a slər ndo ka təv ŋgay, a ye naha a gwaday: «Kā gay wuray a ndo nakay bay, hərwi kə ge mənese bay. Ta həvad nakay, na sa dərətsətseh haladzay ma məsine hərwi ŋgay.»

<sup>20</sup> Bagwar hay i ndo neheye tə vəlaway wu a Mbəlom aye ta madugula hay tə vəlatay gədan a ndo hay, ta tsatsah ka Pilat mā gəratay ha Barabas. Yesu na, mā kəd na.

<sup>21</sup> Pilat a gwadatay: «Na gərakumeye ha ndo i danjay nəte. Mə walaŋ tay nəte a sakum nā gərakum ha na, way?»

Ta mbəday faya. «Gəramay ha na, Barabas!»

<sup>22</sup> Pilat a tsatsah fataya, a gwadatay: «Ada na geye a Yesu nakə tə zalay Kəriste aye na, mey?»

Nəteye tebiye tə gwaday: «Dar na ka mayako mazləlmbada eye!»

<sup>23</sup> Pilat a gwadatay: «Nenjeyeye a ge na, mənese waray?»

Ane tuk na, ta səkah ha mawude haladzay ta gədan, tə gwad: «Dar na ka mayako mazləlmbada eye!»

<sup>24</sup> Pilat a zəba faya ma sliye mäge wuray kwa tsekwen bay ada ndo hay faya ta dazleye mawude haladzay na, a təd yam, a bara həlay kame i ndo niye hay, a gwadatay: «Mənese i məkəde ndo nakay na, ka gər ga bay. Mənese eye na, ka gər kurom.»

<sup>25</sup> Ndo hay tebiye ta mbəday faya, tə gwaday: «Ayaw, nəmaa təma. Mənese i məkəde ndo nakay mā yaw ka gər may ada ka wawa may hay.»

<sup>26</sup> Tsa na, Pilat a gəratay ha Barabas. Yesu na, a ndaḅa na ta mandalaḅa, a vəlatay ha a sidzew hay hərwi ada tā ye tā dar na ka mayako mazləlmbada eye.

*Sidzew hay tə ŋgwasa ka Yesu**Markus 15.16-20; Luka 19.2-3*

<sup>27</sup> Ma dəba eye na, sidzew i Pilat hay ti ye ha Yesu a gay i ŋgomna. Ti ye naha, tə haya gər a sidzew hay tebiye.

28 Ta tsəkw faya abəra peteked ŋgay hay. Tə pa faya peteked ndozza eye.†

29 Tə dəsaw dak tə slapa na ka bo, ta pay a gər a Yesu andza dzagwa i bəy. Tə vəlay sakwal‡ a həlay. Ta dəkway gurmets a huvo ada tə ŋwasa faya, tə gwadāy: «Zay daw, bəy i Yahuda hay?»

30 Ta tuf faya slesleḫ ada ta buwa faya abəra sakwal nakə mə həlay aye, tə fay ha ka gər.

31 Ta ndəv ha məŋgweŋe faya na, ta tsəkw faya abəra peteked ndozza eye niye, tə ma ha faya peteked ŋgay hay. Ti ye ha hərwi madar na ka mayako mazlələmbada eye.

*Ta dar na Yesu ka mayako mazlələmbada eye  
Markus 15.21-32; Luka 23.26-43; Yuhana 19.17-27*

32 Ahəl nakə sidzew hay faya ta diye ha Yesu, ta tasiye abəra mə walaŋ gay aye na, tə dzəgər ta ndo i Siren, məzele ŋgay Simon. Tə gay kutoŋ ka məzle mayako mazlələmbada eye nakə ta dariye faya Yesu aye.

33 Tə ndisl a təv eye andaya tə zalay Golgwata, andza məgwede: «Təv i mətasl i gər».

34 Tə vəlay guzom madzapa eye tə wuyə dūwekeke eye. Yesu a ndzaka na, a say bay.

35 Ma dāba eye na, ta dar na Yesu ka mayako mazlələmbada eye. Tə ge tsakwal ka peteked ŋgay hərwi məsəre mata hute na, way. Tsa na, ta ŋgəna ha a bo mə walaŋ tay.

36 Tsa na, tə ndza mə dāma hərwi matsəpe na Yesu.

37 Tə watsa gər i bazlam nakə tə kəd na faya Yesu aye, tə gwad: «Nakay na, Yesu bəy i Yahuda hay.» Ta law na zal ka gər ŋgay.

38 Ta dar ndo i makal hay sulo ka tsakay i Yesu, nəte tə həlay i mənday, neŋged tə həlay i gula.

39 Ndo neheye ti yawa ta təv niye na, tə bələwa ha gər tay hay tekəm tekəm tə mətsaday pələslesle.

40 Tə gwadāway: «Hey! Nəkar haḫe a saka mambəzl ha gay i mədəslay ha gər a Mbəlom ada ka gwad ma məhəne mahkar na, ka dəzl na aye na, təv i wu yak aye na, məŋgay tuk? Nəkar təma ha bo yak eye tey! Kə ge nəkar Wawa i Mbəlom na, mbəzlaw abəra ka mayako nakay mazlələmbada eye.»

41 Bagwar hay i ndo neheye tə vəlaway wu a Mbəlom aye ta ndo mədzəŋgawa bazlam i Mbəlom mapala eye ada ta madugula i Yahuda hay tə ŋwasa ka Yesu. Tə gwad:

42 «Kə təma tay ha siye i ndo hay tuk na, a sla faya mətəme ha gər ŋgay təbədew? A gwad neŋgeye bəy i Israyel hay sa na, mə mbəzlaw abəra ka mayako mazlələmbada eye ada nəmaa dzaliye ha.

43 A dzala ha ka Mbəlom sa na, a gwad neŋgeye Wawa i Mbəlom. Kə ge Mbəlom a wuda na na, mə təma ha anəke.»

44 Ndo i makal neheye sulo ta dar tay naha ka tsakay ŋgay aye, tə tsadāy andza niye dərmak.

*Məmate i Yesu  
Markus 15.33-41; Luka 23.44-49; Yuhana 19.28-30*

45 A dazlay ta magərḫəpat, ləvoŋ a ge ka dala niye tebiye tekədəgəm. A ge na, hus a bəre mahkar i huwa.

† 27:28 Peteked ndozza eye: Peteked nakə sidzew i Roma hay tə pawa ka bo andza peteked i bəy aye.

‡ 27:29 Sakwal niye na, a bəram i sakwal i bəy bagwar eye.

<sup>46</sup>Ma giye b̄are mahkar i huwa, Yesu a wuda ta magala k̄al̄erra, a gwad: «*Eli, Eli, lama sabaktani?*» Andza m̄agwede: «Mb̄alom ga, Mb̄alom ga, ka ḡar ga ha na, h̄arwi mey?Š»

<sup>47</sup>Siye i ndo neheye ka t̄av aye niye t̄a ts̄ane na, t̄a gwad: «Faya ma zaleye a Eliya!»

<sup>48</sup>Kwayan̄na ndo n̄ete m̄a walañ tay niye a hway, a ye naha a zla wuye andaya kofkoffa. A ts̄aħūb ha a wuye guyakaka. A hak ka gwav̄akw. Tsa na, a pay naha ka bazlam a Yesu h̄arwi ada m̄a d̄av̄atse.

<sup>49</sup>Ane tuk na, siye i ndo hay t̄a gwad: «*Ɔgatay, z̄abakwa faya t̄aday, Eliya ma deyeweye ma t̄amiye ha d̄aw?*»

<sup>50</sup>Ane tuk na, Yesu a wuda ta magala k̄al̄erra. Tsa na, a m̄at.

<sup>51</sup>A h̄alay niye kwayan̄na, peteked̄ nak̄a a nḡana ha gay i m̄ad̄aslay ha ḡar a Mb̄alom sulo aye, a ta ka bo b̄era sulo tsan̄na kwa ab̄era m̄a ḡama hus ka dala. Dala a b̄al, hotokom hay ta nḡama wud̄aḡar wud̄aḡar.

<sup>52</sup>Ts̄avay hay ta h̄and̄ak, ndo m̄ape m̄adzal ḡar hay ka Mb̄alom haladzay neheye t̄a m̄at aye t̄a mb̄alaw.

<sup>53</sup>T̄a ndohwaw ab̄era ma ts̄avay. Ma d̄aba i m̄al̄atsew i Yesu ab̄era ma m̄adahañ na, ti ye a Zerozelem, ḡama ts̄ad̄an̄na eye. M̄a d̄ama na, ndo hay haladzay ta nḡatatay.

<sup>54</sup>Bagwar i sidzew ta sidzew niye hay faya ta h̄abiye ka Yesu dziye, t̄a nḡatay dala a b̄al t̄a wu neheye a ge bo aye tebiye na, zluwer a gatay haladzay, t̄a gwad: «*Ta dedek, ndo nakay na, Wawa i Mb̄alom!*»

<sup>55</sup>Nḡwas hay haladzay n̄eteye mal̄tsa eye d̄aren̄ faya ta z̄abiye naha faya. T̄a payaw b̄azay a Yesu kwa ab̄era ma ḡama i Galile, t̄a gaway m̄asler.

<sup>56</sup>M̄a walañ tay niye hay na, Mari nak̄a a yaw ab̄era ma ḡama i Maḡadala aye, Mari maya i Yakuba ta Yusufa ada ta maya i wawa i Dzebede hay.

### *T̄a pa na Yesu a ts̄avay*

*Markus 15.42-47; Luka 23.50-56; Yuhana 19.38-42*

<sup>57</sup>Huwa a ge na, ndo wuray zlele eye a yaw. Nen̄geye ndo i ḡama i Arimate, m̄azele nḡay Yusufa. Nen̄geye d̄armak, gawla i Yesu.

<sup>58</sup>A ye ka t̄av i Pilat, a ts̄atsah faya m̄adahañ i Yesu. Pilat a v̄alay ts̄aved̄ ka m̄azle m̄adahañ i Yesu.

<sup>59</sup>Yusufa a ye a zla na m̄adahañ i Yesu ab̄era ka mayako mazl̄almbad̄a eye, a zla r̄akwat a mb̄akwa na.

<sup>60</sup>A pa na a ts̄avay nak̄a a la ka geseh wedeye h̄arwi nḡay eye nḡway aye. Tsa na, a b̄ad̄an̄gwal beber bagwar eye h̄arwi mad̄ar̄azle faya. A d̄ar̄azl faya na, a ye nḡway.

<sup>61</sup>Mari i Maḡadala ta Mari nen̄ged̄ n̄eteye andaya mandza eye d̄agerger b̄ase ta ts̄avay.

### *Sidzew ha ta ts̄apa na ts̄avay*

<sup>62</sup>T̄ad̄e eye andza m̄agwede pat nak̄a a mbay naha a pat i m̄al̄ave bo i maz̄azukw bo aye, bagwar hay i ndo neheye t̄a v̄alaway wu a Mb̄alom aye ta Farisa hay, ti ye dziye a gay i Pilat.

<sup>63</sup>Ti ye naha, t̄a gwad̄ay: «*Ɔgalaka, n̄amaa yaw ka t̄av yak na, h̄arwi wu nak̄a ndo i parasay nakay a tsik ah̄al niye aye na, ka mamayaw a ḡar. A gwad: “Ma d̄aba i m̄ah̄ane mahkar na, na l̄atseweye ab̄era ma m̄adahañ.”*

<sup>64</sup>Gwad̄atay a sidzew hay na, t̄a ts̄apa na ts̄avay lele hus a m̄ah̄ane mamahkar eye b̄ana gawla nḡay hay ta deyeweye ta k̄aliye na. Ma d̄aba eye

ta gwadateye a ndo hay: “Yesu kə lətsew abəra ma mədahanj.” Parasay ηgay ma səkahiye wene wene eye ma ziye nakə kurre aye.»

<sup>65</sup> Pilat a gwadatay: «Halum sidzew hay anan̄ dum tay ha ka tsəvay, t̄a tsəpa andza nakə a sakumeye.»

<sup>66</sup> Tə həl bo ti ye. Ti ye naha tə ləva bo tə matsəpe tsəvay. Tə slərəba na me i tsəvay, tə gəs na ən̄gəts lele. Tsa na, tə pa sidzew hay ka matsəpe na.

## 28

### *Yesu a lətsew abəra ma mədahanj*

*Markus 16.1-10; Luka 24.1-12; Yuhana 20.1-10*

<sup>1</sup> Ma dəba i pat i mazəzukuw bo na, pat i luma i sidzew ta mekedə, Mari i Magdədala ta Mari nen̄ged ti ye mazəbe ka tsəvay.

<sup>2</sup> Tə ndisl naha kwayan̄na na, dala a bəl haladzay dzekiḡ dzekiḡ hərwi gawla i Mbəlom a mbəzlaw mə mbəlom, a yaw a bədən̄gwal beber abəra ka tsəvay, toṅ a ndza faya.

<sup>3</sup> Gawla i Mbəlom niye na, a dəv andza mawutsədə ada peteked̄ ηgay a slədə haladzay herre.

<sup>4</sup> Zluwer a gatay a sidzew neheye faya ta tsəpiye tsəvay aye. Ta dzədzar haladzay, ta təra andza nəteye maməta eye hay tsədək tsədək.

<sup>5</sup> Gawla i Mbəlom a gwadatay a ηgwas niye hay: «K̄a dzədzarum bay. Na sər nəkurom faya ka pəlumeye Yesu, ndo nakə ta dar na ka mayako mazləlmbada eye aye.

<sup>6</sup> Nen̄geye andaya kanan̄ bay, kə lətsew abəra ma mədahanj andza nakə a tsik aye. Dumara zəbum ka təv nakə tə həna ha faya kwa.

<sup>7</sup> Dum bəse ta gwadumatay a gawla ηgay hay na: “Yesu kə lətsew abəra ma mədahanj, ma lahakumeye a Galile. Ka ηgatumeye mə dəma.” Anan̄ wu nakə na tsikakum aye.»

<sup>8</sup> ηgwas niye hay ta hway abəra ka tsəvay bəse. Zluwer a gatay, ane tuk na, dərəv tay man̄gwas a eye. Ta hway mədatay ha labara eye a gawla i Yesu hay.

<sup>9</sup> Kwayan̄na, Yesu a yaw tə dzəgər ta nəteye, a gwadatay: «Na tsikakum me!» ηgwas niye hay ta həndzəd̄ naha ka təv ηgay, ta dəkway gurmets a huvo. Tə gəs na abəra mə sik ada tə dəslay ha gər.

<sup>10</sup> Yesu a gwadatay: «K̄a dzədzarum bay. Dum gwadumatay a malamara ga hay na, t̄a ye a Galile. Ta ηgeten̄eye mə dəma.»

### *Wu nakə sidzew hay ta təkər aye*

<sup>11</sup> Ahəl nakə ηgwas hay faya ta diye abəra ka tsəvay, nəteye ka tsəved̄ aye na, siye i sidzew neheye faya ta həbiye ka tsəvay aye ti ye a walan̄ j gay. Ti ye naha ta təkər wu nakə a ge bo aye tebiye a bagwar hay i ndo neheye tə vələway wu a Mbəlom aye.

<sup>12</sup> Bəy hay i ndo neheye tə vələway wu a Mbəlom aye tə haya gər ta madugula i Yahuda hay. Tə ma ha ka bo bazlam mə walan̄ tay. Tə vələtay suloy haladzay a sidzew neheye ta tsəpa tsəvay aye.

<sup>13</sup> Tə gwadatay: «Wu nakə ka təkərumatəye a ndo hay aye na, anan̄: “Ahəl nakə nəmay mandzahəra eye ta həvad̄ aye na, gawla i Yesu hay ta yaw, ta kəla na mədahanj i Yesu.”

<sup>14</sup> Taḡ ηgomna kə tsəne na, ma gakumeye wuray bay. Nəmaa səriye wu nakə nəmaa tsikiye.»

<sup>15</sup> Sidzew hay tə həl suloy nakə tə vələtay aye. Ti ye tə dəs parasay andza nakə tə tsikatay aye. Andza niye, bazlam nakay a ḡa zləm a Yahuda hay tebiye hus ka bəgom.

*Yesu a bəzatay ha bo a gawla ŋgay hay*

*Markus 16.14-18; Luka 24.36-49; Yuhana 20.19-23; Məsler hay 1.6-8*

<sup>16</sup> Ma dəba eye na, gawla i Yesu hay kuro gər eye nətə ti ye a Galile. Ti ye naha, tə tsal a mahəmba nakə Yesu a gwadətay «Tsalum a dəma» aye.

<sup>17</sup> Tə ndisl a dəma na, tə ŋgatay a Yesu, tə dəslay ha gər. Ane tuk na, siye mə walaŋ tay ta dzala ha faya ta dedek eye bay.

<sup>18</sup> Yesu a həndzəf ka təv tay, a gwadətay: «Mbəlom kə vələŋ gədaŋ mə mbəlom ada ka məndzibəra.

<sup>19</sup> Hərwi niye, dum ha bazlam ga ka təv i ndo i gəma hay tebiye, tərūm tay ha gawla ga hay. Dzəhuḅum tay ha a yam ta məzele i Bəba Mbəlom, tə məzele i Wawa ŋgay ada tə məzele i Məsəfəre Tsədaŋŋa eye.

<sup>20</sup> Tətikumətatay bazlam neheye na tsikakumeye. Tā rəhay ha gər tebiye, tā dzala ha faya. Ada neŋ, na ndziye tə nəkurom pat pat hus ka mandəve i məndzibəra.»

## N̄gwalak i bazlam nakə

### Markus a watsa aye

### Məfələkwe

Markus a dazlay mawetse labara nakay na, a gwad nakay na: «Labara n̄gwalak eye nakə a tsik ka Yesu Kəriste Wawa i Mbəlom». A da ha Yesu na, ndo mæge mæsler, a sla faya mæge wu hay. Ka tətikatay a ndo hay, ka həhar fakalaw abəra mə bo i ndo hay, kə pəsətay ha mezeleme a ndo hay. Yesu a gwad nen̄geye Wawa i Ndo, a yaw a vəl ha məsəfəre n̄gay hərwi mətəme tay ha ndo hay abəra mə mezeleme tay.

Markus a watsa ka mæsler i Yesu, i Yuhana madzəhuḅe ndo a yam, ka gər i madzəhuḅe i Yesu tə mäsəpete nakə a say a Fakalaw mäsəpat na aye, a da ha mæsler i Yesu ta məmbəle tay ha ndo i dəvats hay tə matətike nakə a tətikatay a ndo hay aye. A watsa ka gər i mändze madük i duk eye ka mändzibəra, ka gər i məmäte n̄gay ka mayako mazləmbada eye, mələtsew n̄gay abəra ma mədahañ.

Madazlay i labara 1.1-13

Mæsler i Yesu ma Galile 1.14-9.50

Yesu a lətse abəra ma Galile a ye a Zerozelem 10.1-52

Madük i duk i mähəne i Yesu 11.1-15.47

Mələtsew i Yesu abəra ma mədahañ 16.1-8

Yesu a bəz ha bo ada mede n̄gay a mbəlom 16.9-20

*Yuhana madzəhuḅe ndo a yam*

*Mata 3.1-12; Luka 3.1-18; Yuhana 1.19-28*

<sup>1</sup> Labara n̄gwalak eye nakə a tsik ka Yesu Kəriste Wawa i Mbəlom aye, a dazlay

<sup>2</sup> andza nakə mawatsa eye mə dərewel i Ezay ndo məde ha bazlam i Mbəlom aye, a gwad:

«Nəñ Mbəlom, na sləriye naha ndo məde ha bazlam ga kame yak. Ma lambadakeye na tsəved.

<sup>3</sup> Faya ma wudiye mə kəsaf, a gwad:

Lambadumay tsəved a Bay Maduweñ,

lambadumay tsəved hay fehe lele, tã hədzak bay.\* »

<sup>4</sup> Andza niye, Yuhana madzəhuḅe ndo a yam a ndohwaw mə kəsaf. A tsikatay me a ndo hay, a gwadatay: «Mbədum ha mede kurom. Dzəhuḅum bo a yam ada Mbəlom ma pəsakumeye ha mənese kurom hay.»

<sup>5</sup> Ndo nəheye ma Zerozelem ada ka dala i Yahuda ti ye tebiye. Tə yawa ka təv i Yuhana. Tə dawa ha mezeleme tay hay parakka kame i ndo hay ada Yuhana a dzəhuḅawa tay ha a yam mə magayam nakə tə zalay Yurdum aye.

<sup>6</sup> Yuhana niye na, peteked n̄gay man̄gara eye ta məkweṭs i zlagweme ada a barawa bəzihud n̄gay na, ta həzlay. A ndayawa mə kəsaf niye na, heyew ta wum.

<sup>7</sup> Anan̄ labara nakə a tsik aye sa, a gwad: «Ndo mekelen̄ eye ma deyeweye kame ga, nen̄geye na, gədan̄ eye a ze ga. Na sliye mahəndzədə ka təv n̄gay, məpəlay ha ləber i taharak n̄gay bay tebiye.

<sup>8</sup> Nəñ na, na dzəhuḅ kurom ha a yam tsa. Nəñgeye na, ma dzəhuḅeye kurom ha ta Məsəfəre Tsədan̄na eye.»

\* 1:3 Ezay 40.3.



*Madzahuḅe i Yesu a yam, a say a Fakalaw masəpete Yesu*

*Mata 3.13-4.11; Luka 3.21-22, 4.1-13*

<sup>9</sup> Ma məhəne niye na, Yesu a yaw ma Nazaret ka dala i Galile. A ndislew na, Yuhana a dzəhuḅ na a yam mə magayam nakə tə zalay Yurdum aye.

<sup>10</sup> A həlay nakə faya ma tsalaweye abəra ma yam aye na, a ngatay a magərmbəlom a ta ka bo bəra ndzadədədə. Tsa na, Məsəfəre i Mbəlom a mbəzlaw ka Yesu andza bodbodo.

<sup>11</sup> Ada mətsike me a tsənew abəra mə mbəlom, a gwad: «Nəkar na, wawa ga. Na wuda kar haladzay. Dərev ga faya ma ngwasiye tə nəkar.»

<sup>12</sup> Kwayanḅa Məsəfəre i Mbəlom a zla na a makulkwandah.

<sup>13</sup> Yesu a ndza mə kəsaf məve kuro kuro fad. Mə dəma na, a say a Fakalaw masəpete na ada mədəde ha a mezeleme. Mə kəsaf niye na, wu i pesl hay mə dəma haladzay. Gawla i Mbəlom hay ti yaw ka təv i Yesu, tə vəlay wu mənday.

*Yesu ma gəma i Kafernahum*

*Mata 4.18-22; Luka 5.1-11*

<sup>14</sup> Ma dəba eye na, tə gəs na Yuhana a danḅay. Tə gəs na Yuhana na, Yesu a ye a Galile. A da ha Labara Ngwalak eye i Mbəlom mə dəma.

<sup>15</sup> A gwad: «Həlay eye kə ndislew tuk, mbəḅum ha mede kurom. Təmum Labara Ngwalak eye i Mbəlom a dərev kurom hərwi Bəy i Mbəlom ka həndzədaw.»

<sup>16</sup> Yesu a zəḅgal me i dəlov i Galile. Ahəl nakə faya ta zəḅgaliye me i dəlov niye aye na, a ngatay a ndo məgəse kələf hay sulo. Niye hay na, Simonḅ ta malamar ḅay Anḅəre, faya ta kaliye gadanḅ tay a dəlov.

<sup>17</sup> Tsa na, Yesu a gwadətay: «Dumara, pumeḅ bəzay. Anəke faya ka həlumeye kələf, ane tuk na, na təriye kurom ha ndo məhəlaw ndo hay.»

<sup>18</sup> Tə tsəne na, tə gər ha gadanḅ tay hay, tə pay bəzay a Yesu.

<sup>19</sup> Yesu a ye kame tsekweḅ na, a ngatay a Yakuba ta malamar ḅay Yuhana. Nəteye na, wawa i Dzebede hay. A ngatətatay na, nəteye mə kwalalanḅ i yam faya ta lambadiye gadanḅ tay hay.

<sup>20</sup> Kwayanḅa Yesu a zalətatay. Tə tsəne məzele i Yesu na, tə gər ha bəba tay Dzebede mə kwalalanḅ i yam ta ndo i məsler ḅay hay, tə pay bəzay a Yesu.

*Yesu a mbəl tay ha ndo hay abəra ma dəvats tay hay wal wal*

*Mata 8.14-17; Luka 4.31-44*

<sup>21</sup> Yesu ta gawla ḅay hay ti ye a wuzlahgəma i Kafernahum. Pat i mazəzukw bo na, Yesu a ye a gay i maḅuwule me. Mə dəma na, a tətikatay a ndo hay.

<sup>22</sup> Ndo hay tə tsəne matətike ḅay nakə a tətikatay aye na, a gatay hərəbəḅka. Hərwi neḅgeye a tətikatay andza i ndo neheye tə dzanḅgawa bazlam i Mbəlom mapala eye bay. Ane tuk na, i ḅay a tətikatay na, ta məzlaḅ eye. Hərwi bazlam niye hay ti yaw na, abəra mə neḅgeye ḅway.

<sup>23</sup> Ahəl nakə faya ma tətikatəye a ndo hay aye na, ndo wuray məsəfəre lele bay eye, paf a ye naha a gay i maḅuwule me niye. Tsa na, a wuda ta magala kələrra.

<sup>24</sup> A gwad: «Nəkar Yesu ndo i Nazaret, meḅ yak ka nəmay na, meḅ? Ka yaw na, mata dze may ha ḅaw? Nəkar way na, na sər ha lele: Nəkar na, ndo nakə tsədanḅa Mbəlom a sləraw aye.»

<sup>25</sup> Tsa na, Yesu a gay me, a gwadətay: «Ndza dīkdīk. Dara abəra mə bo i ndo nakay.»

<sup>26</sup> Kwayanḅa məsəfəre lele bay eye a ḅəl ha ndo niye ta gədanḅ tə mawude eye kələrra. Tsa na, a yaw abəra mə bo i ndo niye.

<sup>27</sup> Ka tɔv niye na, a gatay a ndo hay daɓɓak daɓɓak, hɔrɓaɓɓakka. Tɔ gwad mɔ walaŋ tay: «Eh! Eh! Nakay na, wu wuray? Labara nakay a tsik aye na, ta mɔzlaɓ eye. Nakay na, ndo waray, a gatay me a mɔsɔfɔre lele bay eye hay ada tɔ gɔsay me na, ndo waray.»

<sup>28</sup> Labara i Yesu a ɗa a zɓɓm kwayaŋŋa ka dala i Galile tebiye.

<sup>29</sup> Ma ɗaba eye na, Yesu ta gawla ŋgay hay ti ye abɔra mɔ gay i maɗuwule me niye, ti ye a gay i Simon ta Anɗare. Nɔteye ti ye dziye ta Yakuba ada ta Yuhana.

<sup>30</sup> Tɔ ndisl naha na, mese i Simon mahɔna eye mɔ gay, maraɓaraɓ a gay. Tsa na, tɔ gwadɔy a Yesu: «Mese i Simon lele bay.»

<sup>31</sup> Yesu a ye ka tɔv ŋgay a gay. A ye naha na, a gɔs na abɔra mɔ hɔlay, a lɔtse ha ka mbɔlom. Tsa na, maraɓaraɓ a ndala faya abɔra. A ye, a gatay mbɔlok.

<sup>32</sup> Ta huwa ma ɗaba i pat mɔɗaɗe na, ndo hay tɔ hɔlaw ndo i ɗɔvats hay haladzay ta ndo neheye fakalaw mɔ bo tay aye.

<sup>33</sup> Ndo i gɔma niye hay tebiye tɔ haya gɔr ka maged i gay nakɔ Yesu mɔ ɗama aye.

<sup>34</sup> Ndo neheye ɗɔvats a gatay wal wal aye na, Yesu a mbɔl tay ha ada a hɔhar fakalaw abɔra ka ndo hay haladzay ɗarmak. Ane tuk na, Yesu a ŋgɔrɔz fataya, a gwadɔy: «Kɔ tsikum me bay.» Hɔrwi nɔteye na, Yesu nengeye way na, tɔ sɔr na.

<sup>35</sup> Pɔrik, mbɔlomɗa i dzagulok mɔzlehe na, Yesu a lɔtse, a ndohwaw abɔra mɔ gay. Tsa na, a ye ɗarenj abɔra ma wuzlahgɔma. A ye na, a tɔv nakɔ ndɔray andaya mɔ ɗama bay aye. A ye a ɗama mata ɗuwule me.

<sup>36</sup> Simon ta siye i gawla ŋgay hay ta pɔɗeɗe abɔra ka mɔndzehɔre na, ta ŋgatay a Yesu bay. Tsa na, ti ye ta pɔla na Yesu.

<sup>37</sup> Ka tɔv nakɔ faya ta pɔliye na aye na, ta huta na. Tɔ gwadɔy: «Ndo hay haladzay faya ta pɔliye kar.»

<sup>38</sup> Yesu a gwadɔy: «Kwa ta pɔliye ga bɔbay na, takwa a tɔv mekelen. Ka deyekweye na, a gɔma neheye bɔse bɔse aye. Na ɗiye ha bazlam i Mbɔlom mɔ ɗama ɗarmak. Na yaw na, hɔrwiye.»

<sup>39</sup> A ndɔv ha mɔtsike me ŋgay niye na, a lɔtse a ye a hɔhal ka dala i Galile tebiye. A ɗawa ha bazlam i Mbɔlom mɔ gay i maɗuwule me ada a hɔharawa fakalaw abɔra ka gɔr mavuwe hay.

*Yesu a mbɔl ha ndo madɔgwada eye*

*Mata 8.1-14; Luka 5.12-16*

<sup>40</sup> Pat wuray na, ndo wuray madɔgwada eye a ye ka tɔv i Yesu. A ye naha na, a ɗɔkw gurmets kame i Yesu. A tsɔtsah ka Yesu, a gwadɔy: «Kɔ saka na, ka sliye faya matere ga ha tsɔɗaŋŋa.»

<sup>41</sup> Yesu a zɔba faya na, a gay mɔ bo. A nduda ha hɔlay ŋgay, a lamay. Tsa na, a gwadɔy: «A seŋ na, tɔra tsɔɗaŋŋa!»

<sup>42</sup> Tsa na, ɗɔvats i madɔgwede a ye faya abɔra. A mbɔl suwud suwud lele.

<sup>43</sup> Ane tuk na, Yesu a gay me, ada a gwadɔy:

<sup>44</sup> «Do, ka diye wu yak na, tsɔne lele hɔdzakay zɓɓm.» Tsa na, Yesu a gwadɔy: «Tsɔne lele: Kɔ tsik wu nakay a ndɔray bay. Ane tuk na, do ta bɔzay ha bo a ndo mɔvɔlay wu a Mbɔlom ada vɔl wu nakɔ Musa a tsik aye hɔrwi mɔɗatay ha a ndo hay tebiye na, ka tɔra tsɔɗaŋŋa.»

<sup>45</sup> Ma ɗaba eye na, ndo niye a ye. A ye naha ɗuh na, a pa bo ka matɔkɔratay wu nakɔ a tɔra tɔ nengeye aye a ndo hay. Yesu kɔ sla faya mabɔz ha bo ma wuzlahgɔma sa bay. A ndzawa na, ɗarenj ta wuzlahgɔma, ma tɔv neheye ndo

hay mə dəma haladzay bay aye. Ada huya, ndo hay ti yawa ka təv ηgay kwa mənḡay, kwa mənḡay.

## 2

### *Yesu a mbəla ha ndo matəra eye Mata 9.1-8; Luka 5.17-26*

<sup>1</sup> A ndza məhəne tsakway na, Yesu a mbəda gər a Kafernahum. Ndo hay tə tsəne Yesu kə maw a Kafernahum, neḡgeye mə gay nakə a ndzawa mə dəma aye na,

<sup>2</sup> ndo hay ti ye, tə haya gər haladzay ka təv ηgay. Tə rah a gay niye bərits. Kwa mə bəra, ka me i məged bəbay, təv andaya bay hərwi ndo hay. Tə haya gər andza niye na, hərwi Yesu a tətikawatay bazlam i Mbəlom.

<sup>3</sup> Ahəl nakə Yesu faya ma tətikateye bazlam i Mbəlom a ndo hay aye na, ndo hay fad tə zlay naha ndo matəra eye madzawa eye ka sləlah.

<sup>4</sup> Ta pəla tsəved mede ha ka təv i Yesu na, ta huta tsəved bay, hərwi ndo hay haladzay ka tsəved. Tsa na, tə tsal ka gər i gay niye. Gər i gay niye na, fatata. Tə sləl bəd. Ta dənḡar ha ta təv nakə Yesu mə dəma aye. Tə mbəzla ha ndo matəra eye niye ta ləber ka təv i Yesu ta sləlah ηgay niye dzay.

<sup>5</sup> Yesu a zəba ka mədzal gər tay nakə tə dzala ha faya na, a gwadəy a ndo niye matəra eye: «Wawa ga, na pəsaka ha mezeleme yak hay.»

<sup>6</sup> Mə gay niye na, ndo mədzanḡawa bazlam i Mbəlom mapala eye, nəteye andaya mandza eye dərmak. Tə tsəne andza niye na, tə dzala mə gər tay, tə gwad:

<sup>7</sup> «Ndo nakay a tsik me i ηgay andza niye na, kəkay? Nakay na, a tsalay ka gər a Mbəlom. Bana way nakə də məpəsay ha mezeleme a ndo aye? Maa sla məpəsay ha mezeleme a ndo na, Mbəlom nəte ηḡweḡ bəna, way?»

<sup>8</sup> Tsa na, Yesu a sər wu nakə tə dzala mə gər tay aye, a gwadətay: «Ka dzalum andza niye mə gər kurom na, hərwi mey?»

<sup>9</sup> Maa da me məgwadəy a ndo matəra eye: “Mezeleme yak kə pəsa” na, waray, kəḡəbay “Lətse zla sləlah yak do” na, maa da me mə dəma na, waray?

<sup>10</sup> A seḡ na, sərur ha neḡ Wawa i Ndo na, ḡədanḡ ga andaya məpəsətay ha mezeleme a ndo hay ka mändzibəra.»

Tsa na, a gwadəy a ndo niye matəra eye:

<sup>11</sup> «Faya na gwadəakeye, lətse, zla sləlah yak, do a mətagay.»

<sup>12</sup> Yesu a tsikay andza niye na, kwayanḡa a lətse, a zla sləlah ηgay. A ye kame i ndo niye hay mahaya gər eye duwak duwak lele, a yaw abəra. Ndo niye hay mbərzazza eye tə ηḡatay na, a gatay hərbaḡəkka. Ta zambaday a Mbəlom tə gwad: «Eh! Eh! Nakay na, ḡədanḡ i Mbəlom bəna, ka ηḡatakway a wu andza nakay dādā bay.»

### *Yesu a zalay Levi Mata 9.9-13; Luka 5.27-32*

<sup>13</sup> Ma dəba eye na, Yesu a mbəda gər, a ye ka me i dəlōv nakə tə zalay dəlōv i Galile aye. Ndo hay haladzay tə yawa naha ka təv ηgay. A tətikawatay bazlam i Mbəlom.

<sup>14</sup> Yesu a ndəv ha matətike, a lətse faya ma diye ka tsəved na, a ndzay a gər a ndo matsekele dzanḡal ka təv i məsler ηgay. Ndo niye na, tə zalay Levi. Neḡgeye na, wawa i Alfe. Yesu a gwadəy: «Dara, peḡ bəzay!» Tsa na, Levi a lətse a pay bəzay.

15 Pat wuray na, Yesu ta gawla ngay hay tã nda wu mânday mæ gay i Levi. Ndo matsekele dzaŋgal hay ada ta ndo i mezeleme hay tã nda wu mânday dziye tage Yesu. Næteye tebiye tã pay bæzay a Yesu.

16 Mæ dæma na, ndo neheye tã dzaŋgawa bazlam i Mbølom mapala eye a ndo hay aye ta Farisa hay, næteye andaya dærmak. Tã ngatay a Yesu faya ma ndiye wu mânday ta ndo i mezeleme hay na, tã gwadatay a gawla i Yesu hay: «A nda wu mânday ka tæv eye næte ta ndo matsekele dzaŋgal hay ada ta ndo i mezeleme hay na, hærwi mey?»

17 Yesu a tsæne bazlam tay niye na, a gwadatay: «Ndo neheye wuray a gatay bay næteye zayzay aye na, ta pæliye ndo i sidem bay. Mata pæle ndo i sidem na, ndo neheye dævats eye hay aye. Na yaw mæzalatay a ndo neheye tã gwadáy a gær tay næteye ngwalak eye hay aye bay, ane tuk na, mæzalatay a ndo i mezeleme hay duh.»

### *Mæge daliyam*

*Mata 9.14-17; Luka 5.33-39*

18 Pat wuray na, gawla i Yuhana hay ta Farisa hay, ta ge daliyam andza nakæ tã gawa ma slala tay aye. Ndo hay tã yaw ta tsætsah ka Yesu, tã gwadáy: «Gawla i Yuhana ta Farisa hay næteye na, ta ge daliyam. Ada hærwi mey gawla yak hay tã ge daliyam bay na, kemey?»

19 Yesu a mbædatay faya, a gwadatay: «Næteye na, ta giye daliyam bay, hærwi næteye na, andza mæ magurlom i mæzle dahalay. Ahæl nakæ zal i dahalay ka tæv tay mba aye na, ndo neheye mazala eye a magurlom i mæzle dahalay na, ta giye daliyam daw? Ahæl nakæ zal i dahalay andaya mba na, ta sliye faya mæge daliyam bay.

20 Ane tuk na, pat eye ma slaweye na, ta gæsiye fataya abæra zal i dahalay niye. Pat eye niye na, ta giye daliyam tuk.

21 «Bazlam nakay na, andza peteked guram eye tã wedeye. Ta nasiye ha peteked wedeye nætepe ka peteked guram eye bay. Hærwi tadã ta tapa peteked wedeye ka guram eye na, peteked wedeye ma ngærdiye ha peteked guram eye. Tsa na, ma nguradiye. Peteked guram eye niye ma sækahiye maŋgurede haladzay.

22 «Sa na, ndo ma mbædiye guzom lelem eye a gwezem i hæzlay guram eye bay na, ka særum ha tæbædew. Hærwi ta mbæda a dæma na, guzom niye lelem eye kã kwasa na, hæzlay niye guram eye ma ndohwiye. Guzom dærmak sækthi ma mbædiye ka dala. Ane tuk na, guzom lelem eye ta mbædiye na, a gwezem i hæzlay wedeye dærmak.»

### *Mælavay gær a pat i mazæzukw bo na, Yesu*

*Mata 12.1-8; Luka 6.1-5*

23 Pat i mazæzukw bo na, Yesu ta gawla ngay hay ti ye ta guvah wuray. Ma guvah niye tã ge a dæma na, wuye andaya tã zalay bæle. Gawla i Yesu hay tã hæb wu niye, tã nda.

24 Farisa hay tã ngatatay na, tã gwadáy a Yesu: «Zæba, gawla yak hay ta giye wu nakæ bazlam i Mbølom mapala eye a ge faya me pat i mazæzukw bo aye na, hærwi mey?»

25 Yesu a mbædatay faya, a gwadatay: «Dadã ka dzaŋgum wu nakæ Davit a ge ahæl niye aye tæbædew?» May a wur faya ta ndo ngay hay.

26 Tsa na, a ye a fælækwa a madzawadzawa i mædæsly ha gær a Mbølom. A ye naha, a zla makwala nakæ tã velay a Mbølom aye. A nda. A velatay a ndo ngay hay dærmak, tã nda. Bazlam i Mbølom mapala eye a vøl tsæved ka mænde

\* 2:25 Zæba ma 1 Samuyel 21.2-7.

na, a ndo mævəlay wu a Mbəlom dəkdək bədaw? Wu nakay a ge bo na, ahəl nakə Abiyatar neŋgeye bagwar eye i ndo mævəlaway wu a Mbəlom aye.»

<sup>27</sup> Yesu a gwadatay sa: «Mbəlom a vəl pat i mazəzukw bo na, ada mâ dzəna ndo zezeŋ bəna, Mbəlom a ge ndo zezeŋ hərwi məpay bəzay bay.»

<sup>28</sup> A gwadatay: «Maa ləvay gər a pat i mazəzukw bo na, neŋ Wawa i Ndo.»

### 3

#### *Yesu a mbəl ha ndo pat i mazəzukw bo Mata 12.9-14; Luka 6.6-11*

<sup>1</sup> Pat eye andaya na, Yesu a ye a gay i mađuwule me. Mə dəma na, ndoweye andaya həlay ŋgay maməta eye.

<sup>2</sup> Ndo mekelenj eye hay andaya mə gay i mađuwule me niye dərma. Tə dzala mə gər tay, tə gwad: «Zəbakwa faya lele, ŋgatay ma mbəliye ha ndo nakay maməta həlay eye pat i mazəzukw bo daw?» Tə tsik andza niye na, hərwi məhəle faya bəra suwat.

<sup>3</sup> Yesu a gwaday a ndo niye həlay ŋgay maməta eye: «Lətse ka niye kame i ndo hay tebiye.»

<sup>4</sup> Tsa na, Yesu a tsətsah ka ndo neheye ta zəbiye faya aye. A gwadatay: «Bazlam kway mapala eye a vəl tsəved məge na, mey? A gwad: Gum ŋgwalak pat i mazəzukw bo tsukudu, gum na, sewed daw? Məmbəle ha ndo tsukudu məgər ha mâ mət daw?» Ane tuk na, ta mbəday faya bay.

<sup>5</sup> Yesu a zəba fataya na, a ndalay haladzay, hərwi ta kula ha mədzele gər tay. Tsa na, a gwaday a ndo niye həlay maməta eye: «Nduda ha həlay yak.» A nduda ha na, həlay ŋgay a mbəl suwuđ suwuđ.

<sup>6</sup> Tsa na, Farisa hay ti yaw a bəra mə gay i mađuwule me niye. Tə haya gər ta ndo i Herod hay. Tə haya gər na, hərwi ta hutije tsəved ka məkəde Yesu na, kəkay.

#### *Yesu ta ndo hay haladzay*

<sup>7</sup> Yesu ta gawla ŋgay hay ti yaw abəra mə gay i mađuwule me niye dərma. Ti ye ka me i dəlov nakə tə zalay dəlov i Galile aye. Ndo hay haladzay tə patay bəzay. Ndowneye neheye na, ti yaw abəra ma Galile, ti yaw abəra ka dala i Yahuda

<sup>8</sup> kwa ndo neheye ma Zerozelem aye dərma. Ti yaw abəra ka dala i Idume ada ta ndo neheye ta diye i magayam i Yurdum aye, ti yaw abəra ma gəma neheye tə mbay naha a Tir ta Sidonj aye. Ndo neheye ti yaw haladzay ka təv i Yesu aye na, hərwi tə tsəne wu nakə Yesu a gawa aye.

<sup>9</sup> Yesu a ŋgatay a ndo neheye haladzay ti ye naha ka təv ŋgay aye na, a gwadatay a gawla ŋgay hay: «Ləvum bo ta kwalalanj i yam. Na tsaliye a dəma, hərwi ada ndo hay tâ dzəgəd ga ha bay.»

<sup>10</sup> Andza nakə Yesu a mbəlaway tay ha ndo i dəvats hay haladzay aye na, ndo i dəvats hay tebiye ta hway ka təv ŋgay hərwi matətele faya.

<sup>11</sup> Ndo neheye fakalaw mə bo tay aye tə ŋgatay a Yesu na, tə kal ha bo kame i Yesu. Ta wuda, tə gwad: «Nəkar na, Wawa i Mbəlom.»

<sup>12</sup> Ane tuk na, Yesu a gatay me, a gwadatay: «Neŋ way na, kâ tsikumay a ndəray bay.»

#### *Yesu a pala ndo i maslanj ŋgay hay Mata 10.1-4; Luka 6.12-16*

<sup>13</sup> Tsa na, Yesu a zalatay a ndo neheye a say mə dərev ŋgay aye. Tə tsal a tsaholok.

<sup>14</sup> Ma tsaholok niye na, a pala ndo i maslan ɲgay hay kuro gər eye sulo abəra mə walaɲ tay niye. A pala tay ha na, hərwi ada ta ndziye dziye ada ma sləriye tay ha mata da ha labara i Mbəlom.

<sup>15</sup> Ma vələtay gədan ka mahəhere fakalaw abəra ka ndo hay dərmak.

<sup>16</sup> Məzele i ndo neheye Yesu a pala tay ha kuro gər eye sulo aye na, anan; Simon nakə Yesu a pa faya məzele Piyer,

<sup>17</sup> Yakuba ta malamar ɲgay Yuhana, nəteye wawa i Dzebede, a pa fataya məzele na, Bowenerges, andza mægweɗe wawa i maləve i Mbəlom,

<sup>18</sup> ada Anɗare, Filip, Bartelemi, Mata, Tomas, Yakuba wawa i Alfe, Tade, Simon ndo mäge vəram hərwi dala ɲgay,

<sup>19</sup> ada Yudas Iskariyot ndo mäge daf ka Yesu.

*Yesu: Mbəlom kəgəbay Fakalaw*

*Mata 12.22-32; Luka 11.14-23, 12.10*

<sup>20</sup> Ma dəba eye na, Yesu a maw a gay nakə a ndzawa mə dəma aye. Tsa na, slala i ndo neheye tə yawa naha ka təv ɲgay haladzay aye na, ti ye naha ka təv ɲgay haladzay sa. Hərwi niye, Yesu ta gawla ɲgay hay tə huta həlay i mənɗe daf kwa tsekwen bay tebiye.

<sup>21</sup> Ndo ɲgay hay tə tsəne andza niye na, ti ye mata gəsa ahaya Yesu. Hərwi tə gwad: «Nerɲgeye na, andza gər mavuwe.»

<sup>22</sup> Ndo neheye tə dzanɲgawa bazlam i Mbəlom mapala eye ti yaw abəra ma Zerozelem, tə gwadawa: «Yesu na, Bedzabul mə bo ɲgay.» Siye hay tə gwadawa: «Maa vəlay gədan ka mahəhere fakalaw na, bəy i fakalaw hay.»

<sup>23</sup> Yesu a zalatay a ndo niye hay a tsikatay me ta dzeke, a gwadatay: «Bəy i Fakalaw tə Fakalaw ta həhariye bo tay na, ma kəkay?

<sup>24</sup> Tadə gəma ka ɲgəna, faya ta giye magazlaga mə walaɲ tay na, gəma niye ma hutiyə gədan mənɗe huya daw?

<sup>25</sup> Tadə ndo hay mə gay tay faya ta giye magazlaga mə walaɲ tay na, ndo neheye mə gay niye na, ta hutiyə gədan mənɗe huya daw?

<sup>26</sup> Ka dzalum na, bəy i Fakalaw ma həhariye bo ɲgay daw? Ka həhar bo ɲgay na, gədan ɲgay ma ndziye bay, ma dziye.

<sup>27</sup> «Ka sərur təbədew ndo ma sliye faya məfələkwe a gay i ndo i gədan məhəla ahaya wu ɲgay bay. Ma ta sliye məfələkwe na, ma lahiye mədzewe na təday. Kə dzawa na tuk na, ma sliye faya mede a gay, məhəla ahaya wu ɲgay hay tuk.

<sup>28</sup> «Sərur ha na, Mbəlom ma pəsətay ha mezeleme a ndo hay. Kwa bazlam tay nakə ta tsik leləbay ka Mbəlom aye na, Mbəlom ma pəsətay ha.

<sup>29</sup> Ane tuk na, anan ndo kə tsalay ka gər a Məsəfəre Tsədanɲa eye na, dafa ma hutiyə məpəse me təbey. Mezeleme ɲgay ma ndziye ka tor eye.»

<sup>30</sup> Yesu a tsikatay andza niye na, hərwi tə gwadawa: «Nerɲgeye na, gər mavuwe.»

*May i Yesu ta malamar i Yesu hay*

*Mata 12.46-50; Luka 8.19-21*

<sup>31</sup> May i Yesu ta malamar i Yesu hay tə ndisl naha tuk. Tə ndisl naha na, tə lətse mə bəra. Tsa na, tə slər ndo məzalay naha a Yesu.

<sup>32</sup> Ka təv eye niye na, ndo hay haladzay mandza eye. Tə lawara na Yesu a wuzlah. Ndo nakə tə slər naha aye a gwaday a Yesu: «Pa zləm təday. May yak ta malamar yak hay faya ta tsətsahiye kar ma bəra.»

<sup>33</sup> Yesu a mbədaj faya, a gwaday: «May ga ta malamar ga hay na, way hay?»

<sup>34</sup> Tsa na, a zəba ka ndo niye hay, a dzaha gər tuwzik ada a gwad: «May ga ta malamar ga hay na, nəteye anan.

<sup>35</sup> Hərwi matəra malamar ga ta may ga na, ndo neheye faya ta giye wu nakə a say a Mbəlom aye.»

## 4

### *Dzeke i ndo masləge*

#### *Mata 13.1-9; Luka 8.4-8*

<sup>1</sup> Yesu a ye mata dā ha labara i Mbəlom ka me i dəlov nakə tə zalay dəlov i Galile aye sa. Ndo hay haladzay tə haya gər ka təv ŋgay. Tsa na, Yesu a tsal a kwalalan i yam ada a ndza a dəma. Kwalalan i yam niye na, ka gər i dəlov i Galile niye. Ndo neheye haladzay tə haya gər ka təv ŋgay aye na, nəteye mandza eye ka dala bəse ka pəpəz i dəlov.

<sup>2</sup> A tətikawatay wu hay haladzay ta dzeke. Ada matətike ŋgay nakə faya ma tətikateye na, a gwadawatay:

<sup>3</sup> «Tsənum! Ndo wuray a ndohwaw abəra mə gay. A həl hulfe ŋgay, a ye ha a pesl mata sləge.

<sup>4</sup> A ye naha na, a dazlay a masləge.\* Ahəl nakə faya ma kutsiye hulfe ŋgay a guvah aye na, siye hay tə kuts ka tsakay i tsəved. Diyeŋ hay ti yaw, tə pala na tebiye.

<sup>5</sup> Hulfe mekelen eye a dəd ka sik i pələd, təv nakə bətekwew andaya faya haladzay bay aye. Hulfe niye hay tə ndzohwaw bəse tsa. Tə ndzohwaw bəse na, hərwi bətekwew andaya ka sik i pələd niye bay.

<sup>6</sup> Ane tuk na, pat a tsaraw, a zla faya abəra ŋgulak na, a fəka na hulfe neheye tə ndzohwaw aye. Tə kula heryew heryew hərwi ta huta bəd məpe zləlay haladzay bay.

<sup>7</sup> Neŋged a dəd a gay i dak. Dak niye hay tə gəl. Tsa na, dak niye hay tə ŋgədətsa na hulfe niye a ndzohwaw aye, kwa hulfe niye hay ta ge bo bay ada ta nah bay.

<sup>8</sup> Siye sa na, tə kuts ka təv lele eye, tə ndzohwaw na, lele. Tə gəl ada tə nah, gər eye həbəts həbəts lele. Mə walaŋ tay niye na, neheye hohway tay hay makwehe nətə na, wur eye kuro mahkar, siye hay a ge kuro məkwa, mekelen eye hay a ge temerre.»

<sup>9</sup> Yesu a ndəv ha andza niye na, a gwadatay: «Ndo nakə zləm andaya matsəne aye na, mātə tsəne lele!»

### *Yesu a ge məsler ta dzeke na, hərwi mey?*

#### *Mata 13.10-17; Luka 8.9-10*

<sup>10</sup> Ahəl nakə Yesu ta ndo neheye tə ndzawa ka təv ŋgay ada ta gawla ŋgay hay ti ye abəra ka təv i ndo niye hay haladzay aye, ka təv nakə nəteye mahateye na, gawla ŋgay hay ta tsətsah faya tə gwadāy: «Dzeke niye a say məgwədə na, mey?»

<sup>11</sup> Yesu a mbədātay faya, a gwadatay: «Nəkurom na, Mbəlom kə dākum ha wu nakə maŋgaha eye ma bəy ŋgay aye. Ane tuk na, ndo siye hay ta tsəniye wu hay na, ta dzeke.

<sup>12</sup> Andza niye nəteye na,  
 «Ta zəbiye faya tə dərə tay ada ta ŋgateye bay.  
 Ta tsəne tə zləm tay ada ta səriye ha andza məgwədə mey na, ta səriye ha bay.  
 Bəna ta ta maweye ka təv i Mbəlom  
 ada Mbəlom ma ta pəsātay ha mezeleme tay.†»

\* 4:4 Ma gəma niye i tay na, ta slagawa tə tsəluv təbey. Tə kutsawa ha na, məkutse məkutse. † 4:12 Ezay 6.9-10.



*Yesu a datay ha dzeke i ndo maslæge*

*Mata 13.18-23; Luka 8.11-15*

<sup>13</sup> Tsa na, Yesu a gwadatay: «Nækurom, ka tsænum dzeke nakay a say mægweðe mey na, ka tsænum bəðaw? Ka tsænum dzeke nakay bay na, ada ka særumeye siye i dzeke mekelenj eye hay na, ma kəkay tuk?»

<sup>14</sup> A say mægweðe na, anarj: Ndo maslæge a slæga bazlam i Mbəlom.

<sup>15</sup> Ndo mekelenj eye hay ta ndzəkit bo andza tsakay i tsæved. Bazlam i Mbəlom a dəð ka tsakay i tsæved eye niye. Ndo neheye tə tsæne aye na, Fakalaw a yaw a buwa na bazlam i Mbəlom niye maslæga eye ma nətəye.

<sup>16</sup> «Siye hay ta ndzəkit bo sik i pəlad nakə hulfe a kuts faya aye. Nətəye tə tsæne bazlam i Mbəlom kwayanŋa na, ta təma tə mənŋgweŋe.

<sup>17</sup> Ane tuk na, ta gəray tsæved a bazlam i Mbəlom ada mā pa zləlay a dərev tay bay. Tə dzala ha faya na, tsekweŋ tsa. Ma dəba eye dəretsətseh kəgəbay madzəgur me a ndzatay a gər hərwi bazlam i Mbəlom. Tsa na, tə gər ha mədzele gər abəra ka Mbəlom ta bəse.

<sup>18</sup> «Ndo mekelenj eye hay ta ndzəkit bo ta hulfe nakə a dəð a gay i dak aye. Tə tsæne bazlam i Mbəlom,

<sup>19</sup> ane tuk na, mədzał gər ka wu i məndzibəra, bor i zlele ada ta bor i wu mekelenj eye hay wal wal yuh a ye tay a bo. Wu niye hay tə ŋgədətəsa na bazlam i Mbəlom nakə mə dərev tay aye. Tsa na, bazlam i Mbəlom dərmał kə wa hohway mə dərev tay bay.

<sup>20</sup> «Ndo mekelenj eye hay ta ndzəkit bo ta dala nakə lele aye. Hulfe a kuts faya na, a ndzohw lele. Nətəye tə tsæne bazlam i Mbəlom na, ta təma a dərev tay lele. Bazlam i Mbəlom a gəl mə dərev tay lele ada a nah. Neŋged, makwehe nətə na, wur eye kuro kuro mahkar, neŋged sa na, wur eye kuro kuro məkwa ada siye temerre.»

*Dzeke i lalam*

*Luka 8.16-18*

<sup>21</sup> Tsa na, Yesu a tsikatay dzeke sa, a gwadatay: «Ndo ma zlaweye lalam ŋgay ma piye faya ako ada ma hurəkwiye faya gəse dāw? Kəgəbay, ma piye na a dəba i sləlah dāw? Ma piye na dūh na, ka wu məpe lalam bəðaw?»

<sup>22</sup> Ma piye na ka wu məpe lalam na, hərwi ada dəre mā zəba dzaydzay ada wu neheye dəre a ŋgatay bay aye na, mā zəba lele. Wu neheye manŋgaha eye ta ta zəbiye mə dzaydzay.

<sup>23</sup> Ndo nakə zləm andaya mətəne aye na, mā tsæne lele!»

<sup>24</sup> Yesu a gwadatay sa: «Gumay metsehe a wu nakə ka tsænum aye! Ndoweye kə pay zləm lele na, Mbəlom ma səkaheye ha mətəne, hərwi ada mā tsæne lele. Hərwi Mbəlom ma ləvakumeye wu tə wu nakə ka ləwawumatay wu a ndo hay aye.

<sup>25</sup> Hərwi ndo nakə wu ŋgay andaya na, ta səkahay ha sa. Ane tuk na, ndo nakə wuray ŋgay andaya bay aye na, kwa tsekweŋ eye nakə andaya faya aye na, ta buwiye na.»

*Dzeke i hulfe*

<sup>26</sup> Yesu a gwadatay sa: «Anarj Bəy i Mbəlom a ndzəkit bo na, andza ndo wuray a həl hulfe a ye a slæga na a guvah ŋgay.

<sup>27</sup> Ma dəba eye huwa a ge na, ndo niye a ye ŋgway a mətəgay. Ta həvad na, a ndzahərawa ada ta həpat na, a pədekawa abəra ka məndzəhəre, a lətsawa ka mbəlom. Ahəl nakə faya ma giye andza niye na, hulfe nakə maslæga aye a ndzohw ada faya ma gəliye. Neŋgeye na, wu nakə a slæga aye faya ma gəliye ma kəkay na, a sər bay.



<sup>28</sup> Dala a ndzohwa ahaya wu niye ka gər bo ɲgay. A ndzohw a dazlay na, səmber aye ka me i bəd. Tsa na, a ye tə gər. Ma dəba eye na, a pa wur ada a nah lele.

<sup>29</sup> A nah tsa na, ndo i guvah a zla bembek ɲgay a ye mata dze na wu ɲgay niye hərwi həlay məpele wu abəra ka dala kə sla.»

*Dzeke i wur i bəzan*

*Mata 13.31-32,34; Luka 13.18-19*

<sup>30</sup> Yesu a gwadatay sa: «Ka ndzəkitakway ha Bəy i Mbəlom sa tə mey? Ka dədəkwatay ha labara nakay a zləm a ndo hay na, ta dzeke waray?

<sup>31</sup> Anan Bəy i Mbəlom a ndzəkit bo sa na, andza wur i bəzan. Ahəl nakə ta sləgiye mba na, mə walaŋ i wur i wu neheye ka məndzibəra tebiye na, neŋgeye tsekweŋ.

<sup>32</sup> Ane tuk na, ta sləga na, ma ndzohwiye. Kə ndzohw na, ma gəliye a ze ala neheye tə sləga ka dədan aye tebiye. A təra andza gərɗaf, dīyen hay ta ɲgariye faya gay tay ada mezek eye ma gateye ɲgama.»

<sup>33</sup> Andza niye, Yesu a tsikawatay labara ɲgay a ndo hay tebiye na, ta dzeke andza nakay anan eye. A tsikawatay na, wu nakə ndo neheye ta sliye faya matsəne lele aye.

<sup>34</sup> Yesu a tsikawatay wu hay na, ze matsike ta dzeke bay. A tsikawatay na, ta dzeke. Ane tuk na, ahəl nakə nəteye mahəteye ta gawla ɲgay hay aye na, dzeke eye a say məgwede mey na, a dawatay ha tebiye.

*Yesu a gay me a vavəray*

*Mata 8.23-27; Luka 8.22-25*

<sup>35</sup> Pat eye niye huwa a ge na, Yesu a gwadatay a gawla ɲgay hay: «Lətsakwa! Takwa! Tasakwa a diye i dəlɔv neŋged.»

<sup>36</sup> Tə lətse, tə gər tay ha ndo hay ka niye. Gawla ɲgay hay tə zla na ta kwalalaŋ i yam nakə neŋgeye mə dəma aye. Siye i kwalalaŋ i yam mekeləŋ eye hay andaya bəse ka təv ɲgay sa.

<sup>37</sup> Ahəl nakə faya ta diye, ta tasiye a diye i dəlɔv neŋged aye na, vavəray bagwar eye a ge haladzay. Yam a tsal ka bo dāŋgwala wekit wekit ada faya ma viye a kwalalaŋ i yam niye, mazlambar ma rahiye a dəma.

<sup>38</sup> Yesu na, neŋgeye ɲgway duk ma dəba, mə huɗi kwalalaŋ niye ada neŋgeye mandzahəra eye. Gər ɲgay mapa eye ka təv gər. Gawla ɲgay hay ta dzədzar haladzay, ta pədəke ha abəra ka məndzəhəre tə gwadaf: «Ndo matətike ndo, faya ka mətakweye na, a gaka mə gər təbədew?»

<sup>39</sup> Tsa na, Yesu a pədəke abəra ka məndzəhəre. A lətse, a ɲgərəz ka mətasl, a gay me ada a gwadaf a dəlɔv niye: «Ndza dīkdīk!» Kwayanŋa mətasl a gər ha mäge. Məbəle i wuray kwa tsekweŋ andaya sa bay.

<sup>40</sup> Tsa na, Yesu a gwadatay a gawla ɲgay hay: «Ka dzədzarum kate na, hərwi mey? Ka dzalum ga ha zuk bədaw?»

<sup>41</sup> Kwayanŋa ta dzədzar haladzay, tə gwad a bo mə walaŋ tay: «Nakay i ɲgay ndo waray nakə a gay me a mətasl ta yam na, tə gəsay me aye?»

## 5

*Yesu a mbəl ha gər mavuwe*

*Mata 8.28-34; Luka 8.26-39*

<sup>1</sup> Ma dəba eye na, Yesu ta gawla ɲgay hay tə ndisl a diye i dəlɔv niye. Təv eye niye ti ye a dəma aye na, dala i Geraseni hay. Tə ndisl a dəma na, tə mbəzlaw abəra mə kwalalaŋ i yam.

<sup>2</sup> Yesu a mbəzlaw abəra mə kwalalan i yam na, kwayanŋa ndo wuray a ndohwaw abəra mə walan i tsəvay hay, hərwi mede ka təv i Yesu. Ndowneye niye na, məsəfəre lele bay eye mə bo.

<sup>3</sup> A ndzawa na, mə walan i tsəvay hay. Ndəray kwa nəte a mba faya məgəse ada mədzewe na bay. Kwa mədzewe tə tsalalaw bəbay na, ndəray a mba faya bay.

<sup>4</sup> Haḡe tə dzawaway na sik tə səselek ada tə paway tsalalaw a həlay. Wu neheye tə dzawa ha aye na, a ŋəzlah ndərtsətsətse. Ndəray kwa nəte a mba faya məgəse na bay.

<sup>5</sup> Ta huwa, kwa ta həpat a həhalawa na, mə walan i tsəvay hay ada mə mahamba. A həhalawa na, tə mawude eye ada a tawa bo ŋgay tə kwar tsuraḡ.

<sup>6</sup> Gər mavuwe niye a ŋgatay naha a Yesu dərəŋ na, a hway ka təv ŋgay. A hway naha na, a dəkway gurmets a huvo.

<sup>7</sup> Tsa na, a wuda ta gədan, a gwad: «Nəkar Yesu Wawa i Mbəlom Fetek, ka wuda ka neŋ na, mey? Amboh tə məzele i Mbəlom, kə geŋ wuray bay.»

<sup>8</sup> A tsik andza niye na, hərwi Yesu a gwadaŋway: «Nəkar fakalaw, dara abəra mə bo i ndo nakay!»

<sup>9</sup> Yesu a tsətsah faya, a gwadaŋ: «Məzele yak way?»

Fakalaw a mbədaŋ faya a Yesu, a gwadaŋ: «Məzele ga Haladzay, hərwi nəmay haladzay.»

<sup>10</sup> Tsa na, a gay amboh a Yesu haladzay hərwi ada Yesu mə həhar na dərəŋ abəra ka dala niye bay tey.

<sup>11</sup> Azlakwa bay, mə mahamba wuray ka təv eye niye na, madəras hay andaya faya ta tsəkuriye tay ha.

<sup>12</sup> Fakalaw niye hay mə bo i ndo niye tə gay amboh a Yesu, tə gwadaŋ: «Amboh, gər may ha nəmaə ye a bo i madəras taḡaheye.»

<sup>13</sup> Yesu a vəlatay tsəved. Tsa na, məsəfəre lele bay eye ti yaw abəra mə bo i ndo niye ti ye tə fəlakwa a bo i madəras niye hay. Madəras niye hay haladzay ta giye gwezem sulo ta hwayaw abəra ma tsaholok niye ti ye tə kuts a dəlov, tə dze a dəma.

<sup>14</sup> Ndo mətsəkure madəras neheye tə ŋgatay andza niye na, ta hway, ti ye a wuzlahgəma mata daŋay ha labara niye a ndo hay ada a ndo neheye nəteye dərəŋ ta wuzlahgəma aye. Tsa na, ndo hay ti yaw mata zəbe naha ka wu nakə a ge bo aye.

<sup>15</sup> Ndo niye hay tə ndislew ka təv i Yesu na, tə ŋgatay a ndo nakə fakalaw hay tə ndzawa mə bo ŋgay haladzay aye. Tə ŋgatay na, mandza eye, peteked ka bo ada neŋgeye lele bəna andza nakə a ndzawa aye bay. Tə ŋgatay andza niye na, ta dzədzar.

<sup>16</sup> Ndo neheye labara i gər mavuwe ta madəras hay a ge bo ka dəre tay aye na, nəteye dərmak ta təkəratay labara eye a ndo neheye ti ye naha, nəteye ta ŋgatay təbey aye.

<sup>17</sup> Tə tsəne na, tə gay amboh a Yesu, tə gwadaŋ: «Amboh, do abəra ma gəma may.»

<sup>18</sup> Ahəl nakə Yesu faya ma tsaliye a kwalalan i yam aye na, ndo niye a mbəl hərwi fakalaw hay ti yaw abəra mə bo ŋgay na, a gwadaŋ a Yesu: «Amboh nə paka bəzay tey?»

<sup>19</sup> Ane tuk na, Yesu kə vəlay tsəved ka məpay bəzay bay. Yesu a gwadaŋ: «Do! Ta bəzay ha bo a ndo yak hay. Təkəratay ŋgwalak nakə Bəy Maduweŋ a ge hərwi yak aye.»

<sup>20</sup> A tsəne andza niye na, a lətse a ye a dala nakə tə zalay Dekapol\* aye. A ndisl a dəma na, a dazlay matəkəratay wu nakə Bəy Maduweŋ a ge hərwi ŋgay aye. Ndo neheye tebiye tə tsəne labara niye na, a gatay masuwayaŋ.

*Yesu a mbəl ha dem i Dzayrus abəra ma mədahaŋ*

*Ŋgwas wuray dāvats eye məve kuro gər eye sulo  
Mata 9.18-26; Luka 8.40-56*

<sup>21</sup> Ma dəba eye na, Yesu ta gawla ŋgay hay tə maw tə kwalalaŋ i yam ka dəlov niye. Tə maw a diye neŋged. Tə ndisl a dəma na, ndo hay haladzay ti ye ka təv ŋgay. Ndo hay ti ye ka təv ŋgay na, neŋgeye ka me i dəlov niye mba.

<sup>22</sup> Bəy i gay i mađuwule me wuray tə zalay Dzayrus, a ye naha dərma. A ŋgatay a Yesu na, a dəkway gurmets a huvo.

<sup>23</sup> A gay amboh a Yesu, a gwaday: «Dem ga wuray hala bay faya ma mətiye. Amboh, dara ta peŋ faya həlay ada mā mbəl tey.»

<sup>24</sup> Yesu a tsəne andza niye na, a həl bo, ti ye salamay.

Ahəl nakə faya ma diye na, ndo hay haladzay gədəbille tə pay bəzay ada faya ta ŋgədətsiye na kwa tə waray, tə waray.

<sup>25</sup> Ŋgwas wuray andaya dərma. Ŋgwas eye niye na, dāvats eye. Bambaz a mbədawayaw abəra mə huđ. Dāvats eye niye kə ndza faya məve kuro gər eye sulo.

<sup>26</sup> Ki ye ha a gay i ndo i sidem hay wal wal haladzay. A sa dərətsətseh kəriye bəna, kə huta zay bay. Kə dze ha suloy ŋgay haladzay ka sidem ada kə gay ŋgama kwa tsekweŋ bay. Duh dāvats niye a zaka faya.

<sup>27-28</sup> Ŋgwas niye a tsəne wu nakə ndo hay faya ta tsikiye ka gər i Yesu aye na, a ye a walaŋ i ndo niye hay Yesu mə dəma aye. A dzala mə gər ŋgay, a gwad: «Na lamay a peteked ŋgay na, na mbəliye segey.» Tsa na, a ye tsərid tsərid mə walaŋ i ndo niye hay. A ndisl bəse ka təv i Yesu ta dəba na, a lamay a peteked i Yesu.

<sup>29</sup> A ye a lamay nets na, kwayaŋŋa bambaz niye a mbədawayaw faya abəra a tərəts tsandzaŋ. A sər ha mə bo ŋgay na, kə mbəl abəra ma dāvats ŋgay niye.

<sup>30</sup> Kwayaŋŋa Yesu a sər ha gədaŋ ki yaw abəra mə bo ŋgay. Tsa na, a mbədə me a diye i ndo neheye faya ta pay naha bəzay ma dəba aye. A tsətsah, a gwad: «Maa lamay a peteked ga na, way?»

<sup>31</sup> Gawla ŋgay hay ta mbədəy faya, tə gwaday: «Ka gwadiye “Maa lemeŋ way” na, ka ŋgatay a ndo neheye haladzay faya ta ŋgədətsiye kar təbədew?»

<sup>32</sup> Ane tuk na, Yesu a zəba dərə ka təv niye pərwasla hərwi ada mā ŋgatay a ndo nakə a lamay a peteked ŋgay aye.

<sup>33</sup> Ŋgwas niye a lamay a peteked i Yesu aye na, a dzədzar slaḅ slaḅ, hərwi a sər ha wu nakə a ge bo tə neŋgeye. A ye a dəkway gurmets a huvo a Yesu. Tsa na, a day ha wu nakə dedek aye a Yesu.

<sup>34</sup> Yesu a gwaday: «Dem ga, mədzal gər yak kə mbəl kar ha. Do wu yak barbarra. Kə mbəl abəra ma dāvats yak nakay na, ka tor eye.»

<sup>35</sup> Ahəl nakə Yesu faya ma tsikeye a ŋgwas niye andza niye na, ndo hay ti yaw mə gay i Dzayrus. Ti yaw na, ka təv i Dzayrus. Tə gwaday: «Dem yak kə mət, ka wurdəye me a miter na, sa meriye?»

<sup>36</sup> Ane tuk na, Yesu na, kə pa gər ka bazlam tay niye bay. Yesu a gwaday a Dzayrus: «Kā dzədzar bay, dzala ha ka neŋ tsa na, tsiy.»

\* 5:20 Dekapol na, gəma nakə dala mə dəma kuro aye.

<sup>37</sup> Tsa na, a lətse, a ye. Ahəl nakə faya ma diye na, a gatay me a ndo hay ada tã zəŋgal na bay. A vələy tsəved mede ka bo dziye na, a Piyer, a Yakuba ta malamar ŋgay Yuhana.

<sup>38</sup> Tə ndisl naha a gay i Dzayrus bəy i gay i maɖuwule me na, Yesu a zəba ɖəre na, ndo hay faya ta tuwiye taŋgof taŋgof, siye hay faya ta tuwiye tə mawude eye ndəŋndəŋ.

<sup>39</sup> Yesu a ŋgatay andza niye na, a fələkwa a gay, a ye naha a gwadətay a ndo neheye mə gay aye: «Mədzəɖay ta mətuway nakay na, kemey? Wawa nakay na, kə mət bay, neŋgeye mandzahəra eye.»

<sup>40</sup> Ndo hay wuyi tə ŋgwasa faya. Tsa na, a həharataya ahaya abəra. Maa ləkaw ka təv ŋgay mə gay na, bəba ta may i wawa ta gawla ŋgay neheye mahkar ti ye ka bo dziye. Nəteye, ti ye tə fələkwa a gay nakə wawa mahəna eye mə ɖəma aye.

<sup>41</sup> Tə ndisl naha na, Yesu a gəs dem niye abəra mə həlay ada a gwadəy: «*Talita kum!*» (Andza məgwede: «Dem, faya na gwadakeye, lətse!»)

<sup>42</sup> Tsa na, dem niye kwayaŋŋa hurum a lətse. A ye tə sik ŋgay kuteŋ kuteŋ. Məve i dem niye na, kuro gər eye sulo. Tsa na, ndo niye hay tə ŋgatay a wu niye a ge bo aye na, a gatay masuwayaŋ.

<sup>43</sup> Tsa na, Yesu a gwadətay: «Wu nakay na ge aye na, kã ɖumay ha a ndəray bay.» A gwadətay a bəba ta may i dem niye: «Vələmay wu mənday ada mā nda.»

## 6

### *Yesu ka dala i Nazaret*

#### *Mata 13.53-58; Luka 4.16-30*

<sup>1</sup> Ma ɖəba eye na, Yesu ta gawla ŋgay hay, tə lətse abəra ka təv niye, ti ye a gəma nakə Yesu a gəl mə ɖəma aye.

<sup>2</sup> Pat i mazəzukw bo na, a ye a gay i maɖuwule me. Mə ɖəma na, ndo hay haladzay. A ɖatay ha bazlam i Mbəlom. Tə tsəne bazlam i Mbəlom nakə a tsikatay aye na, a gatay hərəbəkka. Tə gwad: «A hutaw labara nakay na, məŋgay? Maa vələy ndaraw nakay na, way? Masuwayaŋ nakay faya ma giye na, a yaw məŋgay?»

<sup>3</sup> Neŋgeye na, ndo matsətsede mayako bəɖa? Ada neŋgeye na, wawa i Mari bəɖa? Malamar ŋgay hay na, Yakuba, Zozes, Yuda ada Simon bəɖa? Malamar ŋgay dem aye hay ɖərmak nəteye ka təv kway kanaŋ, nəkway dziye bəɖaw?» Hərwi wu neheye tebiye ndo i Nazaret hay ta kərəh məpe məɖzal gər ka Yesu.

<sup>4</sup> Yesu a gwadətay: «Ndo məde ha bazlam i Mbəlom na, ndo hay ta təma na ada tə ɖəslay ha gər kwa məŋgay. Ane tuk na, ma gəma ŋgay mə walaŋ i ndo ŋgay hay ta malamar ŋgay hay na, tə ɖəslay ha gər bay.»

<sup>5</sup> Hərwi niye, Yesu kə sla mäge masuwayaŋ i wuray kwa tsekweŋ bay tebiye. Wu nakə a ge aye na, a pa həlay ka ndo wuray hay ɖəvats eye hay ada tã mbəl abəra ma ɖəvats.

<sup>6</sup> Ka təv eye niye, a gay wadəŋ wadəŋ a Yesu hərwi nakə ta dzala ha bay aye. Tsa na, a lətse a ye a gəma mekelen eye hay bəse ta gəma ŋgay niye. A ye na, mata ɖatay ha bazlam i Mbəlom a ndo hay.

### *Yesu a slər gawla ŋgay hay kuro gər eye sulo*

#### *Mata 10.1,5-15; Luka 9.1-6*

<sup>7</sup> Pat wuray na, Yesu a zalatay a gawla ŋgay hay kuro gər eye sulo, a gwadətay: «Na sləriye kurom ha a gəma hay wal wal. Ka deyumeye na, sulo

sulo.» Tsa na, a vɔlatay gɛdan̄ ka mahəhere məsəfəre neheye ŋgwalak eye bay aye abəra ka ndo hay.

<sup>8</sup> A gwadatay: «Ka deyumeye na, kâ zlum wuray a hɔlay bay. Sakwal na, ka zlumeye kɔla. Ane tuk na, kâ zlum wu mɛnday bay. Kwa bəbɔro, kwa suloy kâ pum a gwezem bay.

<sup>9</sup> Taharak na, pum a sik, ane tuk na, kâ hɔlum peteked i məkɛlkabo kurom hay sulo, sulo bay.»

<sup>10</sup> Yesu a gwadatay sa: «Ka ndislum a gəma nakə ka deyumeye a dɛma aye na, ndzum mɛ gay nakə ta tɛma kurom tɛ mɛŋgwese aye. Kâ yum kurom abəra mɛ gay niye bəse tsa bay. Ndzum mɛ dɛma hus a pat nakə ka deyumeye a gəma mekelɛŋ eye.

<sup>11</sup> Tadɛ ndo i gəma niye ka deyumeye a dɛma, ta tɛma kurom bay ada agəna ta kərəh mɛpɛ zɔm ka bazlam kurom na, dum kurom abəra ma gəma niye. Ahɛl nakə ka yumaw kurom, nəkurom ka tsəved mazlambar ka gərume ye ha tsəved i gəma niye na, tətəkum ha bətɛkwew i gəma niye abəra ka sik kurom hay. Niye na, ta səriye ha ta tɛma kurom bay.»

<sup>12</sup> Yesu a ndəvatay ha mɛ ŋgay niye a tsikatay aye na, tɛ hɛl bo ti ye. Tɛ ndisl a gəma niye hay na, ta dazlay a mɛdɛ ha bazlam i Mbəlom a ndo hay. Tɛ gwadatay a ndo i gəma niye hay: «Mbədum ha medɛ kurom»

<sup>13</sup> ada ta hɛhar fakalaw abəra ka ndo hay. Tɛ faɖa mal ka ndo neheye dɛvats eye hay aye. Tɛ mbɛl tay ha abəra ma dɛvats niye. Ndo neheye tɛ mbɛl tay ha aye na, nəteye haladzay.

### *Herod ta Yuhana madzəhuɓe ndo a yam*

*Mata 14.1-12; Luka 3.19-20, 9.7-9*

<sup>14</sup> Yesu a dɛ a zɔm haladzay a gəma hay wal wal tebiye. Kwa bəy nakə tɛ zalay Herod aye kɔ tsəne labara i Yesu dərma k.

Ndo mekelɛŋ eye hay tɛ gwad ka Yesu: «Nɛŋgeye na, Yuhana madzəhuɓe ndo a yam kɔ lətsew abəra ma mɛdahaŋ. Hərwi niye nakə a huta gɛdan̄ ka mɛge masuwayaŋ.»

<sup>15</sup> Siye hay na, tɛ gwad: «Nɛŋgeye na, Eliya ndo mɛdɛ ha bazlam i Mbəlom niye ahɛl niye.»

Siye hay tɛ gwad: «Nɛŋgeye na, ndo i maslaŋ i Mbəlom nəte mɛ walaŋ i ndo mɛdɛ ha bazlam i Mbəlom neheye ahɛl niye aye.»

<sup>16</sup> Herod a tsəne andza niye na, a gwad: «Ndo niye na, Yuhana nakə ahɛl niye na dɛs faya abəra gər eye na, kɔ lətsew abəra ma tsəvay.»

<sup>17</sup> Herod a tsik andza niye na, hərwi maa vɔl tsəved ka mɛgəse Yuhana na, bo ŋgay eye. Tɛ gəs na ada tɛ pa na a dan̄gay. Tɛ pay sɛselek a sik. Herod a ge andza niye na, hərwi Yuhana a gay me ka mabuwe Herodiyad ŋgwas i malamar ŋgay nakə tɛ zalay Filip aye.

<sup>18</sup> A gəs Yuhana a pa na a dan̄gay na, hərwi Yuhana a gwaday: «Bazlam i Mbəlom a ge me ka mabuwe ŋgwas i malamar yak.»

<sup>19</sup> Yuhana a tsik andza niye na, a ndalay a Herodiyad. A say haɓɛ məkɛdɛ Yuhana. Herodiyad a sla məkɛdɛ na Yuhana bay na, hərwi Herod.

<sup>20</sup> Hərwi mey na? Herod na, a dzɛdzaraway a Yuhana. A dzɛdzaraway na, a sər ha Yuhana na, nɛŋgeye ndo lele eye, kɔ ge mənese bay. Herod a ge faya me hərwi ada tɛ kɛd na bay. A tsəne andza niye na, a dzɛdzar haladzay. Haɓɛ duh a pawa zɔm ka bazlam i Yuhana na, lele. Aya ane a sla faya matəme bay.

<sup>21</sup> Pat eye andaya na, Herodiyad a huta tsəved ka məkɛdɛ Yuhana tuk. Pat eye niye na, Herod a ge magurlom i pat i mɛwe ŋgay. A zalatay a ndo ŋgay neheye bagwar eye ma məsler ka dala ŋgay aye. A zalay a bagwar i sidzew

hay ada ta ndo neheye ka dala i Galile mæzele tay a ɗa a zləm aye. Ti ye naha tebiye a magurlom niye.

<sup>22</sup> Anæke na, dem i Herodiyad niye a ye, a fələkwa ka tøv i ndo neheye mahaya gær eye. A ye naha na, a dazlay a mæhetse. Mæhetse i dem niye a hats eye na, a le ka bøy ta ndo neheye a zalatay a magurlom aye. Bøy a zalay a dem niye a gwadáy: «Nəkar na, tsətsah fagaya wu nakə a saka aye, na vələkeye.»

<sup>23</sup> A mbaday tsad tsad, a gwadáy: «Kwa mey mey! Ka tsətsah na, na vələkeye. Kwa dala, na dəsakeye faya abəra, na vələkeye ha a nəkar ka laviye.»

<sup>24</sup> Tsa na, dem niye a yaw abəra, a ye ka tøv i may ŋgay. A gwadáy a may ŋgay: «May ga, bøy a gwedeŋ “Tsətsah wu nakə a saka aye, na vələkeye” na, na tsətsah faya na, mey?»

May ŋgay a gwadáy: «Tsətsah na, mâ dəsaka gær i Yuhana madzəhuɓe ndo a yam.»

<sup>25</sup> Dem niye a ma ta bəse ka tøv i bøy. A ye naha a tsətsah wu nakə a say aye tuk. A gwadáy a bøy: «A seŋ na, vələŋ gær i Yuhana madzəhuɓe ndo a yam ka bəgəlam anæke kiye.»

<sup>26</sup> Bøy a tsəne andza niye na, a ndalay haladzay, hærwi a say məkəde na Yuhana bay. Kwa a ndalay bəbay na, a sla makərahay ha bay hærwi ɓa ka mbərəm məmbede kame i ndo neheye mazala eye a magurlom aye.

<sup>27</sup> A zalay a sidzew ŋgay nəte, a gwadáy: «Do bəse! Tā dəsaw gær i Yuhana madzəhuɓe ndo a yam ada kâ pa ahaya ka bəgəlam.» Sidzew niye a ye. A ye naha na, a fələkwa a gay i danɣay, a dəs gær i Yuhana.

<sup>28</sup> Tsa na, a pa ahaya ka bəgəlam. A zla ahaya a vələy a dem niye. Dem niye a təma, a ye ha a vələy a may ŋgay dərma.

<sup>29</sup> Gawla i Yuhana hay tə tsəne, ta dəs gær abəra ka Yuhana na, ti yaw tə zla ahaya madahan i Yuhana abəra ma danɣay, tə pa na a bəd.

### *Tapa i ɗaf zləm tə kələf sulo*

#### *Mata 14.13-21; Luka 9.10-17; Yuhana 6.1-14*

<sup>30</sup> Yesu kə slər ndo i maslan ŋgay hay mata ɗa ha bazlam i Mbəlom. Anæke na, tə maw tuk. Tə maw ka tøv i Yesu, ta təkəray wu nakə tə gaw aye ada tə matətike nakə ta tətikatayaw a ndo hay aye.

<sup>31</sup> Azlakwa bay ka tøv nakə nətəye mə ɗəma aye na, ndo hay haladzay faya ta diye naha ka tøv tay ada siye hay haladzay faya ta mbədiye gær wu tay. Yesu ta gawla ŋgay hay ta huta həlay i mände wu mənday kwa tsekweŋ bay tebiye. Yesu a zəba faya andza niye na, a gwadətay a gawla ŋgay hay: «Takwa kway abəra kanan, takwa a tøv nakə ndo hay andaya bay aye ta zəzəkwa bo mə ɗəma.»

<sup>32</sup> Tsa na, tə lətse, tə tsal a kwalalan i yam, ti ye a tøv nakə ndəray andaya mə ɗəma bay aye.

<sup>33</sup> Ahəl nakə faya ta diye na, ndo hay haladzay ta ŋgatay faya ta diye. Tə sər ha faya ta diye wu tay. Tsa na, ndo hay ti yaw abəra ma gəma hay wal wal ta hway tə sik, ka məndisla a tøv nakə Yesu ta gawla ŋgay hay ta diye a ɗəma aye.

<sup>34</sup> Yesu ta gawla ŋgay hay tə ndisl naha na, Yesu a mbəzlaw abəra ma kwalalan i yam. A zəba ɗere na, ndo hay mbərzəzza mahaya gær eye. A zəba fataya na, tə gay mə bo haladzay. Hærwi ndo neheye ta ndzəkkit bo na, andza təban neheye ndo matsəkure tay andaya bay aye. Tsa na, a dazlay mətəsikataɣ labara hay wal wal haladzay.

<sup>35</sup> Mazlambar huwa faya ma giye na, gawla a Yesu ta həndzəd ka tøv i Yesu tə gwadáy: «Anæke huwa kə ge ada tøv nakay kəsaf na, kəkay? Ndo neheye tebiye ta ndeyeweye wu mənday na, mənɣay?»

36 Ngama gwadatay tâ ye mata səkəməw wu mənday ma wuzlahgəma ada mə gay i ndo neheye tə mbay naha a wuzlahgəma aye.»

37 Yesu a mbədatay faya, a gwadatay: «Nəkurom eye vəlumatay wu mənday!»

Gawla ngay hay ta tsətsah faya, tə gwadāy: «Nəmaa hutaweye dala masəkəməw wu mənday a ndo neheye dā ta rahiye na, mənḡgay?»

38 Yesu a gwadatay: «Tapa i makwala nakə andaya fakuma aye na, nday? Ehey! Dum, zəbum ahaya təday!» Tə tsəne andza niye na, ti ye ta zəba ka makwala niye, nəteye tapa nday.

Ta zəbaw faya na, ti yaw tə gwadāy a Yesu: «Makwala andaya na, tapa zlam tə kələf sulo.»

39 Ma dəba eye, Yesu a gwadatay: «Dum naha gwadumatay a ndo hay tâ ndza ka bərək ka bərək, ka guzer.» Guzer niye na, beremeffe a ndzohwaw mba.

40 Gawla i Yesu hay tə tsikatay a ndo niye hay andza niye. Tə ndza ka guzer niye. Ta nar bo na, siye nəteye temerre temerre. Siye hay kuro kuro zlam kuro kuro zlam.

41 Tə ndza na, Yesu a həl tapa i makwala niye zlam tə kələf niye sulo aye. Tsa na, a zəba dərə a mbəlom, a gay naha sīsə a Mbəlom. A ndəv ha məgay naha sīsə a Mbəlom na, a ngəna ha makwala niye. A vəlātay a gawla ngay hay, a gwadatay: «Vəlumatay a ndo hay.» Tsa na, ti ye ta ngənatay a ndo neheye mandza eye tebiye. Yesu a həl kələf neheye sulo aye, a ngənatay ha faya a ndo niye hay mandza eye tebiye sa.

42 Kwa way a nda makwala niye tə kələf eye ka mərəhe.

43 Ma dəba eye na, gawla i Yesu hay, ti ye naha, tə hayay gər a siye i makwala tə kələf eye nakə a ləkaw aye. Tə hayay gər na, a rah a gwanj kuro gər eye sulo.

44 Ndo neheye tebiye tə nda makwala niye aye na, hasləka hay na, gwezem zlam.

*Yesu a ye ka gər i yam tə sik*

*Mata 14.22-33; Yuhana 6.15-21*

45 Ma dəba eye kwayanḡna na, Yesu a gwadatay a gawla hay ngay: «Tsalum a kwalalanj i yam, dum ka gər i dəlōv nakay a diye nenḡed. Ka deyumeye na, a diye i gəma i Betesayda. Dum kame! Na ndziye kurom naha a dəma.» Tsa na, tə lətse ti ye. Yesu na, a tsikatay me a ndo neheye a ndatay ha wu mənday aye. A gwadatay: «Dum kurom a mətəgay kurom hay tuk.»

46 Ma dəba eye na, ndo neheye ti ye wu tay na, Yesu a tsal a tsaholok. A ye na, mata dūwule me.

47 Həvad a ge na, ahəl nakə gawla i Yesu hay faya ta diye, tə ndisl a wuzlah i dəlōv. Yesu na, nenḡeye mahənḡeye ka dala mba, kə həl bo mede zuk bay.

48 Gawla ngay hay faya ta giye dərətsətseh hərwi mətəsl a ge ta gədanj ta diye tay, a say məme ha kwalalanj i yam ta dəba. Yesu a ngatay na, nəteye faya ta siye dərətsətseh. Mbəlomda i dzagulok məzlehe na, Yesu a həl bo a ye ka təv tay tsəpak tsəpak ka gər i yam tə sik. A həndzəd bəse ta nəteye na, a say məlahatay kame.

49 Tə ngatay a Yesu faya ma diye ka gər i yam tə sik na, tə gwad ma giye na, wu matəre ka ndo. Ta wuda.

50 Nəteye niye tebiye tə ngatay na, ta dzədzar haladzay.

Ane tuk na, nenḡeye a tsikatay naha me, a gwadatay: «Tete kurom! Kā dzədzarum bay. Nakay na, nenḡ!»

51 Tsa na, a həndzəd ka təv i kwalalanj i yam. A tsal ka təv tay a kwalalanj i yam na, mətəsl a ndza dedik. Tsa na, a gatay hərbaəbəkka a gawla ngay hay.



<sup>52</sup> A gatay hærbaþækka na, hærwi ta sær ha gëdanj i Yesu zuk bay. Kwa masuwayan nakë Yesu a ge ta wu mënday aye bəbay na, huya ta pa na a mædzele gær tay bay, hærwi ta kula ha gær tay.

*Yesu a mbəl tay ha ndo i dəvats hay ma Genesaret*

*Mata 14.34-36*

<sup>53</sup> Ma dəba eye nakë Yesu ta gawla ŋgay hay tə tas abəra ma dəlov niye aye na, tə ndisl a gəma eye andaya tə zalay Genesaret. Tə ndisl a dəma na, tə ɓar na, kwalalanj i yam tay ka pəpəz i dəlov niye.

<sup>54</sup> Tə mbəzlaw abəra ma kwalalanj i yam na, ndo neheye ma gəma niye aye tə sær na Yesu.

<sup>55</sup> Ta hway məzalatayaw a ndo hay kwa mənḡgay kwa mənḡgay, ta həlatay ahaya ndo i dəvats hay a Yesu. Kwa ma gəma waray waray Yesu a yawa na, tə həlaway naha ndo i dəvats hay ta sləlah.

<sup>56</sup> Kwa Yesu a ye na, a ŋgay, kwa a gəma wawa eye, kwa a gəma bagwar eye, kwa ndo neheye mandza eye ma dəba i gəma aye bəbay na, ndo hay tə haya gær ka təv məhay gær. Tə həlawayaw ndo i dəvats hay. Tə gaway amboh a Yesu hærwi ada mā vəlatay tsəved a ndo i dəvats hay tã lamay na, a me i peteked ŋgay tsa. Ndo neheye ta lamay aye na, nəteye tebiye ta mbəl.

## 7

*Farisa hay tə kule tay*

*Mata 15.1-20*

<sup>1</sup> Pat wuray na, Farisa hay ta ndo mædzanḡgawa bazlam i Mbəlom mapala eye, tə yaw ma Zerozelem. Tə yaw tə haya gær ka təv i Yesu.

<sup>2</sup> Tə ŋgatay a siye i gawla i Yesu hay na, tə nda wu mënday andza niye ze məbere həlay. Andza mægweðe na, ta bara həlay andza nakë kule i bəba tətə tay hay a tsikatay aye bay.

<sup>3</sup> Hærwi mey na, Farisa hay nəteye ta Yahuda hay tebiye na, tə dəsławay ha gær a kule i bəba tətə tay hay. Ta bara həlay lele andza nakë mə kule tay bay na, ta ndiye daf bay.

<sup>4</sup> Taðə ta maw mə luma na, ta bariye həlay təday ada ta ndiye daf. Sa na, tə dəsławay ha gær a siye i kule tay hay wal wal, andza matsekede gəse, gəzla ta səŋgəle i ɓare.

<sup>5</sup> Anəke na, Farisa hay ta ndo mædzanḡgawa bazlam i Mbəlom mapala eye ta tsətsah ka Yesu, tə gwaday: «Gawla yak hay tə dəsłay ha gær a kule i bəba tətə kway təbey na, kemey? Tə nda daf ze məbere həlay andza i kule i bəba tətə kway hay na, kemey?»

<sup>6</sup> Yesu a tsəne andza niye na, a mbədətay faya, a gwadatay: «Nəkurom na, ndo i bəbərek hay andza nakë Ezay ndo maslanj i Mbəlom a watsa ahəl niye! A watsa na, Mbəlom a gwad:

“Ndo neheye ta zembədeŋ na, tə bazlam dəkdek tsa, dərev fay na, dərəŋ tə neŋ.

<sup>7</sup> Nəteye faya ta zembədeŋeye kəriye, ane tuk na, kəriye bəna deðek bay.

Wu nakë faya ta tətikateye a ndo hay aye na, bazlam mapala eye i ndo hay tsa.\*»

<sup>8</sup> Yesu a gwadatay sa: «Ka gərũm ha bazlam i Mbəlom mapala eye hærwi mædəsłay ha gær a kule i ndo hay duh na, kəkay!»

\* 7:7 Ezay 29.13.



<sup>9</sup> A gwadatay sa: «Asah! Ka gərũm ha bazlam i Mbəlom mapala eye na, dərən tə nəkurom, hərwi mægay gər a kule i bəba tətə kurom hay lele dũh!

<sup>10</sup> Musa a gwad: “Rəhay ha gər a bəba yak ta may yak bədaw!<sup>†</sup>” A gwad sa: “Ndoweye kə tsaday a bəba ŋgay ta may ŋgay na, kutorŋ tã kəd na bədaw!<sup>‡</sup>”

<sup>11</sup> Nəkurom na, ka təmun bazlam nakay bay. Nəkurom faya ka tətikumatay a ndo hay na, kule i *kurban* tə mægweđe a bəba kurom ta may kurom na: “Wu nakə na sliye faya məvələka ha bə hərwi madzəne kar aye na, *kurban*” (andza mægweđe zlele nakə mavələ eye hərwi Mbəlom aye).

<sup>12</sup> Ma dəba eye na, a sakum ndo m̃a dzəna bəba ŋgay ta may ŋgay sa bay.

<sup>13</sup> Andza niye, faya ka nasumeye ha bazlam i Mbəlom tə kule nakə faya ka tətikumatay a ndo hay aye. Ada faya ka gumeye wu hay haladzay andza nakay sa.»

<sup>14</sup> Ma dəba eye na, Yesu a zalatay a ndo hay. Ti ye naha ka təv ŋgay. Ti ye naha na, a gwadatay: «Nəkurom tebiye pum zlam ada tsənum wu nakay.

<sup>15</sup> Wu nakə ndo ma ndiye a huď aye na, ma nasiye ha ndo ka təv i Mbəlom bay. Mata nas ha ndo na, wu nakə a yaw abəra mə dərēv i ndo aye.

<sup>16</sup> [Ndo nakə zləm andaya faya na, m̃a tsəne!]

<sup>17</sup> Yesu a ndəv ha andza niye na, a ye ŋgway a gay. Gawla ŋgay hay ta zəŋgal na a gay. Ti ye naha ta tsətsah tə gwadāy: «Dzeke nakə meeneŋ ka tsik aye na, mbədaw bo na, kəkay?»

<sup>18</sup> Yesu a gwadatay: «Nəkurom dərma na, ka sərũm bədaw? Wu mənday nakə ndo ma ndiye a huď eye na, ma nasiye ha dərēv i ndo zezēŋ bay.

<sup>19</sup> Hərwi wu mənday nakə ndo zezēŋ a nda aye na, a ye a dərēv bay. A ye na, a kutes tsa ada ma deyeweye abəra mə bo.»

Bazlam i Yesu nakay a dā ha na, kwa wu mənday waray waray na, ndo ma ndiye.

<sup>20</sup> Yesu a gwadatay sa na: «Wu nakə ma nasiye ha ndo ka təv i Mbəlom aye na, wu nakə a yaw abəra mə dərēv aye.

<sup>21</sup> Hərwi mədzał gər lelebay eye a yaw na, abəra mə dərēv. Ta diye a mede nakə ŋgwalak eye bay aye, mäge məkal, məkəde gər i ndo,

<sup>22</sup> mäge madama, məwe bor ka wu i ndo, mäge sewed, məvatay gər a ndo hay, mäge zlərwek, mäge salək, maŋgəlay bəzay a ndo hay, mədəsłay ha gər a bo, matəre ha bo andza gər mavuwe.

<sup>23</sup> Wu neheye tebiye lelebay aye na, a yaw abəra mə bo i ndo zezēŋ. Wu neheye lelebay aye na, ma nasiye ha ndo ka təv i Mbəlom.»

### *Ŋgwas Kanan wuray a dzala ha ka Yesu*

#### *Mata 15.12-28*

<sup>24</sup> Ma dəba eye na, a lətse a ye abəra ka təv niye. A ye ka dala i Tir ada a Sidon. A ye a gay eye andaya mə dəma. A ye a dəma na, a say ha bə ndərāy m̃a sər ha nengeye ka niye bay. Ane tuk na, nengeye na, a slā məngehe bo bay.

<sup>25-26</sup> Ŋgwas wuray andaya ka dala i Tir eye niye. Nengeye na, slala i Yahuda hay təbey. Tə wa na ma gəma nakə tə zalay Fenisi aye. Fenisi na, nengeye ka dala i Siri. Ŋgwas eye niye na, dem ŋgay andaya mahorvov a gay. A tsəne labara i Yesu nakə ndo hay faya ta tsikiye na, a ye ka təv i Yesu ta bəse. A ye naha a dəkway gurmets a Yesu, a gwadāy: «Amboh! Fakalaw faya ma giye ha dərətsətsəh tə dem ga, həhar faya abəra tey.»

<sup>27</sup> Ane tuk na, Yesu a gwadāy a ŋgwas niye na, «Gər ga ha! Neŋ na, na dzəniye slala ga tədāy andza nakə ta vələteye wu mənday a wawa hay aye tədāy ada

<sup>†</sup> 7:10 Madayaw abəra ma Ezipt 20.12; Bazlam mapala eye masulo eye 5.16. <sup>‡</sup> 7:10 Madayaw abəra ma Ezipt 21.17; Levitik 20.9.

tâ rah. Mæzle wu mânday i wawa hay mækalatay a wawa i kæra hay na, lele bay.»

<sup>28</sup> Nḡwas a mbəday faya, a gwaday: «Andza niye, bəy ga. Kwa neḡ Yahuda hay bay bəbay na, ka sliye faya madzəne ga segey. Hərwi kwa wawa hay faya ta ndiye wu mânday na, nakə a dədaw fataya abəra mə bazlam aye na, wawa i kəra hay ta paliye, ta ndiye bədaw?»

<sup>29</sup> Yesu a tsəne andza niye na, a gwaday a nḡwas: «Bazlam yak nakə ka mbədeḡew faya ye na, lele. Do a mətagay, fakalaw ki yaw abəra mə bo i dem yak.»

<sup>30</sup> Tsa na, nḡwas niye a maw a mətagay na, dem nḡgay mahəna eye ka təw məhəne. Fakalaw ki ye faya abəra.

### *Yesu a mbəl ha ndo wuray madəḡgəzlak eye*

<sup>31</sup> Ma dəba eye na, Yesu a lətse abəra ma gəma i Tir. A həl bo, a ye ta gəma eye andaya tə zalay Sidon ada ta dala nakə tə zalay Dekapol aye. A yaw tə dəma na, hərwi məmaw ka tsakay i dəlov i Galile.

<sup>32</sup> A ndislew a dəma na, tə zlay naha ndo wuray mandək aye. Tə gay amboh a Yesu, tə gwaday: «Amboh! Pa həlay ka ndo may nakay ada mə mbəl abəra ma dəvats nḡgay nakay tey.»

<sup>33</sup> Tsa na, Yesu a gay wiyaw a mandək niye mahəḡgeye, ti ye dərenj abəra ka təw i ndo hay. Ti ye naha na, a pay wur həlay a zlam i mandək niye. A pay wur həlay na, a zləm sulo sulo. A tuf slesleḡ ka wur həlay a lamay ha a dərneh i ndo niye.

<sup>34</sup> Tsa na, a zəba dərə a mbəlom. A ma ha məsəfərə nḡək a bəzihud. Tsa na, a gwaday a ndo niye: «*Effata!*» Andza məgwede: «Zləm yak mə həndək!»

<sup>35</sup> Kwayanḡa zləm i ndo niye a həndək. A tsəne zləm lele tuk. Wu nakə a baray na dərneh a tsik ha me lelebay eye na, a pəla tuk. A tsik me wulanḡa lele tuk.

<sup>36</sup> Ma dəba eye na, Yesu a gatay me a ndo niye hay tebiye, a gwadatay: «Kā dūm ha wu nakə na ge aye a ndəray bay.» Yesu a gatay me mədə ha na, nəteye tə zaka ha mədə ha wu i Yesu niye a giye dūh.

<sup>37</sup> Wu nakə Yesu a ge aye na, a gatay masuwayanḡ a ndo hay. Tə gwad: «Wu nakə Yesu a ge tebiye aye na, lele haladzay. Neḡgeye na, kwa ndo mandək eye hay, ka həndəkatay na zləm, tə tsəne zləm lele. Kwa ndo neheye tə tsik me bay aye na, ka lambadatay ha dərneh tay, tə tsik me lele.»

## 8

### *Ndo hay gwezem fad Yesu a vlatay wu mânday*

#### *Mata 15.32-39*

<sup>1</sup> Pat wuray na, ndo hay haladzay tə haya gər ka təw i Yesu sa. Yesu a zəba fataya na, may a wur fataya. Ada wu mânday andaya fataya bay. Yesu a zalatay a gawla nḡgay hay, a gwadatay:

<sup>2</sup> «Ndo neheye na, tə geḡ mə bo haladzay, hərwi ananḡ məhəne mahkar na, nəteye ka təw ga ada wu mânday andaya fataya bay.

<sup>3</sup> Na gwadatay: “Dum kurom ze mände wu mânday” na, may ma kədiye tay ha ka tsəved, ta ndisliye a mətagay tay hay bay. Hərwi ndo siye hay mə walanḡ tay na, nəteye dərənḡ.»

<sup>4</sup> Gawla nḡgay hay ta mbəday faya, tə gwaday: «Anəke mə kəsaf nakay na, ka hutakweye wu mânday dā məvlatay a ndo neheye na, mənḡgay?»

<sup>5</sup> Yesu a tsətsah ka gawla nḡgay hay, a gwadatay: «Makwala andaya fakuma na, tapa nday?»

Tsa na, ta mbəday faya, tə gwadəy: «Makwala andaya famaya na, tapa tasəla.»

<sup>6</sup> Tsa na, Yesu a gwadatay a ndo niye hay t̄a ndza ka dala. A ye, a həlaw makwala neheye tapa tasəla aye. A gay naha sisəe a Mbəlom. A gay naha sisəe a Mbəlom na, a ngəna ha daf niye, a vəlatay a gawla ngay ada t̄a vəlatay a ndo hay tebiye. Gawla ngay hay tə vəlatay makwala niye a ndo hay.

<sup>7</sup> Kələf andaya ka gawla ngay hay tsakway sa. Yesu a həl kələf niye, a gay naha sisəe a Mbəlom. A vəlatay a gawla ngay hay. A gwadatay: «Ŋgənumatay a ndo hay dərma.»

<sup>8</sup> Makwala tə kələf niye na, kwa way a nda bəh bəh ka mərehe. Gawla i Yesu hay tə hayay gər a bəmalə nakə a ləkaw aye na, kətəh tasəla.

<sup>9</sup> Ndo neheye tə nda daf aye na, ta giye gwezem fad.

Ma dəba eye na, Yesu a gwadatay: «Dum kurom tuk!»

<sup>10</sup> Tsa na, Yesu a tsal ngway a kwalalan i yam ta gawla ngay hay. Ti ye a gəma wuray tə zalay Daləmanuta.

### *Farisa hay ta tsətsah masuwayan ka Yesu*

#### *Mata 16.1-12*

<sup>11</sup> Tə ndisl a Daləmanuta na, Farisa hay ti ye naha ka təv tay. Ti ye naha na, ta dazlay mətsike me ta Yesu, hərwi a satay məhəle faya abəra suwat. Ta tsətsah ka Yesu, tə gwadəy: «Gamay masuwayan nakə ma diye ha ka yaw abəra ka təv i Mbəlom aye.»

<sup>12</sup> Yesu a tsəne bazlam tay nakə tə tsik aye na, a ma ha məsəfəre ngək a bəzilhud, a gwadatay: «Nəkurom ndo neheye tə dəre ka tsətsahumeye masuwayan sa na, kemey? Anan na tsikakumeye ta dedək: Dada ndəray ma gakumeye masuwayan bay!»

<sup>13</sup> Tsa na, Yesu a gər tay ha. A tsal ngway a kwalalan i yam, a ye a tas abəra ma dəlov niye a diye nengəd.

<sup>14</sup> Gawla i Yesu hay ta zəba wu tay hay na, ta mətsa ha gər tə masəkəme makwala. Andaya fataya mə kwalalan i yam na, tapa nəte tsa.

<sup>15</sup> Ahəl nakə faya ta diye na, Yesu a gatay daf, a gwadatay: «Gum metsehe! Tsəpum gər kurom abəra ka gədə i Farisa hay tə bəmalə i Herod.»

<sup>16</sup> Gawla ngay hay tə tsəne andza niye na, tə ma ha ka bo bazlam mə walan tay. Tə gwad: «A tsikakway na, hərwi nakə makwala andaya fakwaya bay aye!»

<sup>17</sup> Tsa na, Yesu a sərətay naha ka wu nakə faya ta miye ha a bo mə walan tay aye. A gwadatay: «Ka ngurumeye bo kurom hərwi makwala nakə andaya fakuma bay aye na, kemey? Ada ka tsənum zuk bədaw? Ka pun a mədzal gər kurom təbədew? Mədzal gər kurom na, mədərəzla eye kəla daw?»

<sup>18</sup> «Dəre andaya fakuma ada k̄a ngatumay a dəre bədaw? Zləm andaya fakuma hərwi mətsəne ada k̄a tsənum bədaw?»

«Ada kə makumaw a gər təbədew?»

<sup>19</sup> Na ge tə makwala na, kəkay? Na ngəna ha makwala tapa zlam na, ndo hay gwezem zlam tə nda bədaw? Ada nakə a ləkaw ka hayumay gər na, gwaj nday?»

Ta mbəday faya, tə gwadəy: «Gwan kuro gər eye sulo.»

<sup>20</sup> Yesu a gwadatay sa: «Makwala neheye tapa tasəla aye na ngənatay a ndo hay gwezem fad aye na, nakə a ləkaw a rah na, kətəh nday?»

Ta mbəday faya, tə gwadəy: «Kətəh tasəla.»

<sup>21</sup> Yesu a gwadatay: «Aya! Ada ka sərūm ha sa bədaw?»

### *Yesu a mbəl ha guluf*

<sup>22</sup> Tsa na, tə ndisl a gəma wuray tə zalay Betesayda. Mə dəma na, tə gəsay naha həlay a ndoweye andaya guluf eye ka təv i Yesu. Tə gay amboh a Yesu. Tə gwaday: «Tətal ka ndo may anan̄ ada mâ n̄gatay a dərə tey.»

<sup>23</sup> Yesu a gəs ndo niye guluf eye mə həlay, a ye ha abəra ma wuzlahgəma. Ti ye naha na, Yesu a tuf slesleḅ ka dərə i guluf niye. A pa faya həlay, a tsətsah faya a gwaday: «Ka n̄gatay a wu dāw?»

<sup>24</sup> Guluf niye a zəba dərə na, a gwaday a Yesu: «Na n̄gatay a ndo hay. Na n̄gatatay na, andza gərdaf hay, ane tuk na, faya ta diye.»

<sup>25</sup> Tsa na, Yesu a pay həlay ka dərə sa. Dərə i guluf niye na, a mbəl lele. A n̄gatay a dərə kulir kulir tuk.

<sup>26</sup> Yesu a gwaday: «Anəke na, do wu yak a mətəgay tuk. Kā ye ta wuzlahgəma bay kəla.»

*Piyer a da ha Yesu nengəye Kəriste*

*Mata 16.13-20; Luka 9.18-21*

<sup>27</sup> Ma dəba eye na, Yesu ta gawla n̄gay hay tə lətse, ti ye abəra ma gəma niye. Ti ye a gəma neheye bəse tə mbay naha a gəma i Sezare Filipi aye. Ahəl nakə nətəye ka tsəved faya ta diye na, Yesu a tsətsah ka gawla n̄gay hay, a gwadatay: «Ndo hay tə gwad fagaya neṅ na, way?»

<sup>28</sup> Ta mbəday faya tə gwaday: «Siye hay tə gwad nəkar na, Yuhana madzəhuḅe ndo a yam, ndo mekeləṅ eye hay tə gwad nəkar na, Eliya, siye hay tə gwad nəkar na, nətə mə walaṅ i ndo mədə ha bazlam i Mbəlom hay.»

<sup>29</sup> Yesu a tsətsah fataya, a gwadatay: «Ada nəkurom ka gwadum i kurom, neṅ na, way?»

Tsa na, Piyer a mbəday faya, a gwaday: «Nəkar na, Kəriste.»

<sup>30</sup> Tsa na, Yesu a gatay me, a gwadatay: «Kā tsikumay a ndəray bay.»

*Yesu a da ha məməte n̄gay*

*Mata 16.21-28*

<sup>31</sup> Tsa na, Yesu a pa bo ka mətsikatay me a zləm. A gwadatay: «Neṅ Wawa i Ndo na, kutoṅ na siye dərətsətseh haladzay. Bagwar hay i ndo neheye tə vələway wu a Mbəlom ta ndo neheye tə dzangawa bazlam i Mbəlom mapala eye ada siye i madugula hay na, nətəye ta wudiye ga bay. Ta kaliye ga ha, ta ta kədiye ga. Ane tuk na, na həniye sulo mamahkar eye na, na lətseweye abəra ma madahaṅ.»

<sup>32</sup> A datay ha parak parak lele ka həmbər mətsikatay bay.

Tsa na, Piyer a zalay kətsah mahəngəye, a gay me.

<sup>33</sup> Yesu a mbəda me ka təv i gawla n̄gay siye hay. A zəba naha fataya. A gay me a Piyer, kutik kutik, a gwaday: «Do abəra ka təv ga. Do a dəba, nəkar na, Fakalaw. Ka dzala gər andza Mbəlom bay, ka dzala gər na, andza i ndo zezeṅ.»

<sup>34</sup> Tsa na, Yesu a zalatay a ndo hay ta gawla n̄gay hay. A gwadatay a nətəye tebiye: «A say a ndoweye məpeṅ bəzay na, mâ gər ha wu nakə a say a dərəv n̄gay aye. Mâ zla mayako mazləlmbada eye ada mâ peṅ bəzay.\*

<sup>35</sup> Andza niye, ndo nakə a say mətəme ha məsəfəre n̄gay aye na, ma dziye ha duh. Ane tuk na, ndo nakə ma dziye ha məsəfəre n̄gay hərwi ga ada hərwi Labara Ngwalak eye na, ma təmiye ha duh.

<sup>36</sup> Tadə ndoweye kə huta zlele i məndzibəra tebiye a nengəye, ane tuk na, ka dze ha məsəfəre n̄gay na, n̄gama n̄gay aye na, mey?

\* **8:34** Məzle mayako mazləlmbada eye na, andza məgwədə: Məndze maləva bo eye məvələ ha məsəfəre n̄gay andza Yesu.

<sup>37</sup> Wu andaya nakə ndo zezen ma sliye faya məvəle hərwi mambəda ahaya məsafəre n̄gay aye daw?

<sup>38</sup> «Nəkurom ndo neheye anəke aye, nəkurom na, mə walaŋ i ndo neheye tə sər Mbəlom bay, faya ta giye mezeleme aye. Tada ndoweye ka kərah ga ada kə datay ha bazlam ga a ndo hay bay na, neŋ dərmak na ta kərahiye na. Na ta kərahiye na na, ahəl nakə neŋ Wawa i Ndo na deyeweye ta məzlaḥ i Bəba Mbəlom ada ta gawla i Mbəlom hay aye.»

## 9

<sup>1</sup> Yesu a gwadatay sa: «Sərum ha na, ndo siye hay mə walaŋ kurom neheye anəke kanaŋ aye, nəteye na, ta mətiye zuk bay. Ta ta mətiye na, ta n̄gateye tə dəre tay a Bəy i Mbəlom nakə ma ləviye bəy n̄gay ta gədaŋ aye təday.»

*Bo i Yesu a mbəda*

*Mata 17.1-13; Luka 9.28-36; 2 Piyer 1.16-18*

<sup>2</sup> Ma dəba i məhəne məkwa na, Yesu a zalay a Piyer, a Yakuba ta Yuhana, ti ye tə tsal a mahamba zəbol eye. Ahəl nakə nəteye mə mahamba niye məhəteye na, bo i Yesu a mbəda ka dəre tay.

<sup>3</sup> Peteked n̄gay a mbəda herre kuḍekuḍek. Məsləde i peteked niye na, ndəray kwa nəte ka məndzibəra ma sliye məsləde ha andza niye na, andaya bay.

<sup>4</sup> Kwayaŋŋa gawla i Yesu neheye mahkar aye tə n̄gatatay a Eliya ta Musa nəteye faya ta tsikiye me tə Yesu.

<sup>5</sup> Tsa na, Piyer a gwadaŋ a Yesu: «Miter ga! Lele na, ndzakwa kanaŋ. Nəmaa kəruwakumeye madzawadzawa mahkar, nəte i yak, nəte i Musa ada nəte i Eliya.»

<sup>6</sup> Piyer a tsik andza niye na, hərwi a sər wu nakə ma tsikiye bay. Hərwi nəteye neheye mahkar aye na, ta dzədzar haladzay.

<sup>7</sup> Pazlay a mbəzlaw mə mbəlom, a dərəzl tay ha. Ma pazlay niye na, bazlam a tsənew abəra mə gəma, a gwad: «Nakay na, wawa ga. Na wuda na haladzay. Pumay zləm a wu nakə ma tsikakumeye!»

<sup>8</sup> Tsa na, gawla i Yesu neheye mahkar aye ta zəba dəre na, ndəray andaya sa bay. Andaya ka təv niye na, Yesu mahəŋgeye.

<sup>9</sup> Ahəl nakə faya ta mbəzlaweye abəra mə mahamba aye na, Yesu a gwadatay: «Wu nakə ka n̄gatumay aye na, kâ təkərumay a ndəray bay hus a pat nakə neŋ, Wawa i Ndo na lətsew abəra ma mədahaŋ aye təday.»

<sup>10</sup> Ta təma bazlam nakə Yesu a tsikatay aye. Anəke na, ta tsətsah mə walaŋ tay, tə gwad: «Mələtsew abəra ma mədahaŋ na, andza məgwede mey?»

<sup>11</sup> Tsa na, gawla n̄gay hay ta tsətsah faya, tə gwadaŋ: «Ndo neheye tə dzaŋgawa bazlam i Mbəlom mapala eye tə gwad na, Eliya ma lahaweye madayaw təday na, hərwi mey?»

<sup>12</sup> Yesu a mbədatay faya, a gwadatay: «Andza niye, Eliya ma lahaweye madayaw. Ma lambadiye tay ha wu hay tebiye təday. Ta watsa ka gər i Wawa i Ndo dərmak. Tə watsa na, tə gwad: “Neŋgeye na, ma siye dəretsətseh haladzay ada ta zəbiye faya andza ndo bay” bədaw?»

<sup>13</sup> Na tsikakumeye parakka: Eliya na, 6a ki yaw tsiy. Ndo hay ta gay wu nakə a satay aye. Bazlam i Mbəlom kə tsik faya andza niye.»

*Yesu a mbəl ha wawa*

*Mata 17.14-21; Luka 9.37-43*

<sup>14</sup> Tə ndisl ka təv i siye i gawla n̄gay hay na, tə ndzay naha a gər a ndo hay haladzay tə lawara tay ha a wuzlah. Ndo neheye tə dzaŋgawa bazlam i Mbəlom mapala eye aye ta gawla i Yesu hay faya ta kədiye wuway a bo.

<sup>15</sup> Ndo hay tə ɲgatay a Yesu faya ta diye naha ka təv tay ta gawla ɲgay neheye mahkar aye na, a gatay hərbəbəkka. Tsa na, ta hway ka təv ɲgay mata tsikay me.

<sup>16</sup> A gwadatay: «Ka kədum wuway ta nəteye ka wuye mey?»

<sup>17</sup> Tsa na, ndoweye andaya mə walaɲ i ndo niye hay a mbədayaw faya, a gwaday: «Miter, neɲ na zlakaw wawa ga, hərbwi mahorvov a gay. A gay na, a bəraway ka bazlam ɲgəts.

<sup>18</sup> Mahorvov a gəsawa na. A gəsawa na na, kwa ka waray. A kalawa ha ka dala bəra bəra. Makukufay a yawaw faya abəra ada a hərbəfawa zler ada a sarawa ha. Na tsətsah ka gawla yak neheye ta həhar faya bəra mahorvov tey na, tə mba faya mahəhere bay.»

<sup>19</sup> Yesu a tsikatay parakka a ndo niye hay, a gwadatay: «Nəkurom neheye anəke ka dzalum ha ka Mbəlom bay aye! Na ndziye ka təv kurom na, hadzəgay? Na zliye ɲgatay hərbwi kurom na, məndze hadzəgay? Ahe! Zlumenj ahaya wawa eye kananj.»

<sup>20</sup> Ti ye, tə zlayaw wawa niye.

Fakalaw niye mə bo i wawa niye a ɲgatay a Yesu na, a bəl ha wawa niye ta gədaɲ. Wawa niye a dəf. Tsa na, a tambolom ha ka dala tambolom tambolom. Makukufay a yaw ka bazlam.

<sup>21</sup> Yesu a gwaday a bəba i wawa niye: «Wu nakay a gay na, kə ndza faya hadzəgay?»

Bəba i wawa niye a mbəday faya, a gwaday: «Wu nakay a dazlay na, neɲgeye wawa eye mba.

<sup>22</sup> Fakalaw a kalawa ha a ako ada a yam hərbwi ada mɑ mət. Tadə ka sliye faya na, amboh dzəna may tey.»

<sup>23</sup> Yesu a mbəday faya, a gwaday: «Ka gwad na, “Tadə ka sliye faya na, dzəna may tey” ba! Ane tuk na, hərbwi ndo nakə kə dzala ha ka neɲ aye na, wuray andaya ma giye bo hərbwi ɲgay bay na, andaya bay.»

<sup>24</sup> Tsa na, bəba i wawa niye a wuda ta magala, a gwad: «Na dzala ha! Səkeheɲ ha mədzele ka nəkar.»

<sup>25</sup> Ahəl nakə Yesu ta bəba i wawa niye faya ta tsikiye me aye na, ndo hay ta hway naha haladzay ka təv tay. Yesu ka zəba ndo hay faya ta diye naha na, a ɲgəz ka fakalaw, a gwad: «Nəkar fakalaw nakay matəra ha ndo mandək eye ada mətsike me bay aye na, faya na gwadakeye dara abəra mə bo i wawa nakay. Kɑ ma faya mede a bo i wawa nakay dɑdɑ sa bay!»

<sup>26</sup> Fakalaw niye a wuda, a bəl ha wawa niye ta gədaɲ. Tsa na, a ndohwaw abəra mə bo i wawa niye. Wawa niye ma kaleyə zləva andza ma mətiye. Ndo hay haladzay ka niye tə gwad: «Wawa nakay na, kə mət.»

<sup>27</sup> Yesu a gəs na mə həlay, a lətse ha. Wawa niye a lətse ka mbəlom.

<sup>28</sup> Tsa na, Yesu ta gawla ɲgay hay, ti ye abəra ka niye, ti ye a mətagay. Ahəl nakə nəteye mahəteye mətagay na, ta tsətsah faya tə gwaday: «Nəmay, nəmaa mba faya mahəhere fakalaw abəra ka wawa niye təbey na, hərbwi mey?»

<sup>29</sup> Yesu a mbədatay faya: «Ka dūwulumay me a Mbəlom bay na, ka slumeye faya mahəhere slala i Fakalaw niye bay.»

*Yesu a dɑ ha məməte ta mələtsew ɲgay abəra ma tsəvay*

*Mata 17.22-23; Luka 9.43-45*

<sup>30</sup> Yesu ta gawla ɲgay hay tə lətse, ti ye abəra ma təv niye. Ti ye a təv mekelenj eye ta dala i Galile. Yesu a say na, ndo hay tā sər ha təv nakə neɲgeye mə dəma aye bay.

<sup>31</sup> A say ndo hay tâ sər faya bay na, hərwi faya ma tətikateye a gawla ngay hay.

A tətikawatay a gawla ngay hay na, a gwadawatay: «Nej Wawa i Ndo na, ta gəsiye ga, ta vələteye ga ha a həlay a ndo hay. Ta kədiye ga mədahañ eye, ada ma məhəne mamahkar eye na, na lətseweye abəra ma mədahañ.»

<sup>32</sup> Ane tuk na, gawla ngay hay ta tsəne me ngay niye a say məgwede mey na, ta tsəne bay. Ada ta dzədzar matsətsehe faya.

### *Matəme wawa hay*

#### *Mata 18.1-5; Luka 9.46-48*

<sup>33</sup> Tsa na, tə ndisl a Kafernahum. Ti ye naha, ti ye a gay nakə tə ndzawa mə dəma aye. Ahəl nakə nəteye mə gay niye na, Yesu a tsətsah fataya, a gwadatay: «Meenej faya ka deyekweye ka tsəved na, ka tsikum mə walañ kurom na, ka wuyə mey?»

<sup>34</sup> Ta mbəday faya a Yesu bay. Hərwi ahəl nakə faya ta diye ka tsəved aye na, ta tsətsah ka bo mə walañ tay, tə gwad: «Ndo nakə neñgeye bagwar eye a ze ndo mə walañ kway nakay aye na, way?»

<sup>35</sup> Yesu a ndza ka dala. Tsa na, a hayay gər a gawla ngay hay kuro gər eye sulo ka təv ngay. A gwadatay: «Ndo nakə a say matəre bagwar eye ka gər i ndo hay aye na, mâ həna ha gər dūh. Sa na, mâ təra ndo məgay məsler a ndo hay tebiye.»

<sup>36</sup> Tsa na, Yesu a zla wawa tsekweñ, a lətse ha a wuzlah tay. A gəs na wawa niye kurup kurup ka bo lele.

<sup>37</sup> Tsa na, a gwadatay: «Ndowne ka təma na wawa nakay lele andza wawa nakay anañ eye hərwi nakə a wudə ga aye na, a təma na, neñ. Ndowne ka təma ga na, a təma neñ mahəgeye bay. A təma na, ndo nakə a sləra ga ahaya dərmak.»

### *Ndo nakə kə neñ dəre bay aye na, ndo ga*

#### *Luka 9.49-50*

<sup>38</sup> Ma dəba eye na, Yuhana a gwaday a Yesu: «Miter, nəmaa ngatay a ndowne faya ma həhariye fakalaw abəra mə bo i ndo ta məzele yak. A samay həbe məgay me hərwi neñgeye na, ndo kway bay.»

<sup>39</sup> Yesu a mbəday faya, a gwaday: «Kā gumay me bay. Hərwi ndowne kə ge masuwayañ tə məzele ga na, ma tsikiye fagaya wu nakə lelebay aye bay.

<sup>40</sup> Hərwi ndo nakə kə nakway dəre bay aye na, neñgeye ndo kway.»

<sup>41</sup> Yesu a gwadatay sa: «Ndowne kə vələkum yam məse hərwi nakə ka pumenə bazay a neñ Kəriste aye na, sərūm ha ta dedək, magogoy ngay ma dziye bay.»

### *Masəpete*

#### *Mata 18.6-9; Luka 17.1-2*

<sup>42</sup> Yesu a gwadatay sa: «Ndowne ka səpat ndo nəte mə walañ i wawa neheye tə dzala ha ka neñ aye a mezeleme na, ngama tâ baray madiz i kwar a day ada tā kal ha a hud i bəlay.

<sup>43</sup> Tadə həlay yak ma dədiye kar ha a mezeleme na, dəs na. Ngama huta məsəfəre ka təv i Mbəlom tə həlay yak nəte tə bəmalə nakə ta kaliye kar ha a ako nakə ma mbatiye dāda bay tə həlay yak sulo aye. [

<sup>44</sup> Mə dəma na, mətul neheye tə nda ndo aye na, tə mət bay, ada ako nakə dāda ma mbatiye bay aye.]

<sup>45</sup> Tadə sik yak ma dədiye kar ha a mezeleme na, dəs na. Ngama dūh na, fələkwa a Bəy i Mbəlom tə sik yak nəte tə bəmalə nakə ta kaliye kar ha a ako tə sik yak sulo aye. [



<sup>46</sup> Hərwi mə dəma na, mətul neheye tə nda ndo aye na, tə mət bay, ada ako nakə dəda ma mbatiye bay aye.]

<sup>47</sup> Ada kə ge tadə dəre yak ma dəfiye kar ha a mezeleme na, ɲgwad na. ɲgama dūh na, fələkwa a Bəy i Mbəlom tə dəre yak nəte tə bəmalə nakə ta kaliye kar ha a ako nakə dəda ma mbatiye bay tə dəre yak sulo aye.

<sup>48</sup> Mə dəma na, mətul neheye tə nda ndo aye na, tə mət bay, ada ako nakə dəda ma mbatiye bay aye.»

<sup>49</sup> Yesu a gwadatay sa: «Andza ako nakə ndo məvədə ma vədiye ha wu aye na, ndo neheye tə dzala ga ha ta siye dəretsətseh hərwi mede tay. Sluwal dərmak andza niye, ta giye ka ala na, ada mə vəd.

<sup>50</sup> Sluwal na, wu nakə lele aye. Ane tuk na, tadə sluwal a tsəhən bay na, ta giye ha sa kəkay ada mə tsəhən na? Wewer andaya matəra ha lele sa bay. Nəkurom dərmak na, tarum andza sluwal nakə a tsəhən lele aye. Mə walaɲ kurom na, ndzum barbarra.»

## 10

*Yesu a tsik ka mahəhere ɲgwas*

*Mata 19.1-12; Luka 16.18*

<sup>1</sup> Ma dəba eye na, Yesu ta gawla ɲgay hay tə lətse, ti ye abəra ma Kafer-nahum, ti ye ka dala i Yahuda. Tsa na, tə lətse, ti ye tə tas magayam i Yurdum. Mə dəma na, ndo hay haladzay tə haya gər ka təv ɲgay sa. Tsa na, a tsikatay bazlam i mbəlom andza nakə a tsikawatay aye.

<sup>2</sup> Farisa hay ti ye naha ka təv ɲgay. Ti ye naha ka təv ɲgay na, hərwi a satay məhəle faya abəra suwat. Ta tsətsah faya tə gwaday: «Bazlam kway mapala eye kə vəl tsəved a ndo ka mahəhere ɲgwas ɲgay daw?»

<sup>3</sup> Yesu a mbədatay faya na, tə matsətsehe dərmak. A gwadatay: «Bazlam mapala eye waray nakə Musa a vəlakum a tsik ka mahəhere ɲgwas na?»

<sup>4</sup> Tə gwaday: «Musa a gwad na, tadə ndoweye a say mahəhere ɲgwas ɲgay na, mə watsay dərewel i mahəhere a həlay. Kə watsay na, ada mə həhar na tuk. Ndo hay ta səriye ha manarɲ ka həhar na ɲgwas ɲgay na, ka dərewel niye.»

<sup>5</sup> Tsa na, Yesu a gwadatay: «Musa a watsakum gər i bazlam mapala eye nakay andza nakay na, hərwi dərev kurom nakə makula eye tonɲwa tonɲwa.

<sup>6</sup> Ahəl niye ka madazlay na, andza niye bay. Hərwi mawatsa eye ka madazlay i məge məndzibəra na: «Mbəlom a ge hasləka ada ɲgwas.

<sup>7</sup> Hərwi niye hasləka ma gəriye ha bəba ɲgay ta may ɲgay, ta ndziye ta ɲgwas ɲgay.

<sup>8</sup> Ada nəteye ta təriye na, bo nəte.\*» Andza niye, nəteye sulo sa bay, ane tuk na, andza ndo nəte.»

<sup>9</sup> Yesu a gwadatay sa: «Ndo zezeɲ mə ɲgəna ha wu nakə Mbəlom a dzapa ha aye bay.»

<sup>10</sup> Yesu ta gawla ɲgay hay ti ye wu tay. Ahəl nakə nəteye mə gay ta gawla ɲgay hay aye na, gawla ɲgay hay ta tsətsah sa, tə gwaday: «Bazlam niye ka tsik eye na, andza məgweđe mey?»

<sup>11</sup> Yesu a mbədatay faya, a gwadatay: «Tadə ndoweye ka həhar na ɲgwas ɲgay ada kə zla a dəma ɲgwas mekeleɲ eye na, kə ge madama. Kə gay mənese a ɲgwas ɲgay kurre eye.

<sup>12</sup> Tadə ɲgwas a wuda na zal ɲgay sa bay, a zla zal mekeleɲ eye dərmak na, kə ge madama.»

\* 10:8 Madazlay i wu hay 1.27, 2.24.



*Yesu a tɔma wawa hay**Mata 19.13-15; Luka 18.15-17*

<sup>13</sup> Ma dɔba aye na, ndo hay tɔ hɛl naha wawa hay a Yesu hɛrwi ada mɔ pa fataya hɛlay ada tɔ huta ɛgama. Ane tuk na, gawla ɛgay hay tɔ gatay me a ndo niye hay tɔ hɛlay naha wawa hay aye.

<sup>14</sup> Yesu a ɛgatay andza niye na, a yay a gɛr bay. A ndalay. A gwadatay a gawla ɛgay hay: «Gɛrum tay ha wawa hay tɔ yaw ka tɔv ga! Kɔ hɛharum tay hay bay, hɛrwi Bɔy i Mbɛlom mavɛla eye na, a slala i ndo neheye andza wawa neheye.

<sup>15</sup> Sɛrum ha na, ndoweye ka tɔma Bɔy i Mbɛlom andza wawa neheye bay na, ma diye a Bɔy i Mbɛlom bay.»

<sup>16</sup> Tsa na, a zla wawa niye hay a hɛlay nɛte ta nɛte. A pa fataya ɛgama.

*Ndo i zlele ta Bɔy i Mbɛlom**Mata 19.16-30; Luka 18.18-30*

<sup>17</sup> Yesu ta gawla ɛgay hay tɔ lɛtse, ta diye na, ndoweye a yaw ka tɔv ɛgay mahway mahway. A ndisl ka tɔv ɛgay na, a dɛkway gurmets kame ɛgay, a gwaday: «Miter lele eye, na hutiyɛ sifa nakɔ ma ndɛviye bay aye na, na giye na, kɛkay?»

<sup>18</sup> Yesu a gwaday: «Ka zelenɛ ndo lele eye na, kemey? Ndo lele eye na, Mbɛlom nɛte ɛgwenɛ.

<sup>19</sup> Ka sɛr bazlam i Mbɛlom mapala eye dɛw? Bazlam i Mbɛlom mapala eye a gwad na: “Kɔ kɛd gɛr i ndo bay, kɔ ge madama bay, kɔ ge mɛkal bay, kɔ raw me ka ndo kame i sariya bay, kɔ vay gɛr a ndo bay, rɛhatay ha gɛr a bɔba yak ta may yak.†”»

<sup>20</sup> Ndo niye a gwaday: «Miter, gɛr i bazlam mapala eye neheye ka paslaweye na, na hɛnay ha gɛr kwa ma wawa.»

<sup>21</sup> Yesu a ndazl na na, a wuda na haladzay. Tsa na, a gwaday: «A lɛkaw fakaya abɛra na, wu nɛte. Anɛke na, do ta sɛkɛm ha zlele yak hay tebiye ada kɔ ɛgɛnatay suloy aye a ndo i mɛtawak hay. Ka ge andza niye na, ka ta hutiyɛ zlele mɔ mbɛlom. Tsa na, dara, pɛɛ bɛzay.»

<sup>22</sup> Ndo niye a tsɛne bazlam niye na, dɛrev a hɛɔay. A ye ɛgway ta mevel eye, hɛrwi zlele ɛgay na, haladzay.

<sup>23</sup> Yesu a ɛgatay a ndo niye a ye ɛgway na, a zɔba ka gawla ɛgay niye hay tɔ lawara na a wuzlah aye. A gwadatay: «Kay! Hɛrwi ndo i zlele na, mede a Bɔy i Mbɛlom i ɛgay na, mada me eye haladzay.»

<sup>24</sup> Gawla ɛgay hay tɔ tsɛne bazlam niye na, a vɛlatay madzɛdzere. Ane tuk na, Yesu a gwadatay sa: «Wawa ga hay! Mede a Bɔy i Mbɛlom na, mada me eye haladzay!

<sup>25</sup> Tɔ bɛmalɛ nakɔ ndo i zlele ma diye a Bɔy i Mbɛlom aye na, ɛgama zlagweme mɔ ye ta bɛd i lɛpɛre.»

<sup>26</sup> Tsa na, a gatay wadɛɛ wadɛɛ a gawla ɛgay hay. Tɔ gwad mɔ walaɛ tay: «Ane tuk na, kɔ ge andza niye na, mata sle mɛtɛme na, way?»

<sup>27</sup> Yesu a zɔba fataya, a gwadatay: «Nɛdaray ma sliye mɛtɛme bay. Ane tuk na, Mbɛlom ma sliye mɛtɛme ha ndo. Hɛrwi nɛngɛye na, wuray a zay gɛdan tɔbey.»

<sup>28</sup> Tsa na, Piyɛr a gwaday: «Tsɛne! Nɛmay anaɛ, nɛmaa gɛr ha wu hay tebiye hɛrwi mɛpaka bɛzay na, kɛkay?»

† 10:19 Madayaw abɛra ma Ezipt 20.12-16; Bazlam mapala eye masulo eye 5.16-20.

<sup>29</sup> Yesu a mbədatay faya a gwadətay: «Sərum ha! Ndoweye kə gər ha gay ŋgay, malamar ŋgay hasləka eye hay ta malamar ŋgay dem eye hay, may ŋgay, bəba ŋgay, wawa ŋgay hay, guvah ŋgay hərwi ga ada hərwi Labara Ŋgwalak eye na,

<sup>30</sup> anəke ahəl kway nakay ma hutiyə a dəma gay hay, malamar hasləka eye hay, malamar dem eye hay, maya hay, wawa hay, guvah hay na, haladzay a ze nakə a gər ha aye. Kəla na, ta geyə dəretsətseh haladzay dərmak. Aza kame na, ma hutiyə sifa nakə ma ndəviyē bay aye.

<sup>31</sup> Mə walaŋ i ndo neheye anəke nəteyē ndo i me hay aye na, haladzay ta təriyē ndo i dəba ada mə walaŋ i ndo neheye anəke nəteyē ndo i dəba hay aye na, haladzay ta təriyē ndo i me.»

*Yesu a da ha məməte ŋgay*

*Mata 20.17-19; Luka 18.31-34*

<sup>32</sup> Yesu ta gawla ŋgay hay, tə həl bo, tə lətse hərwi mede a Zerozelem. Anəke na, nəteyē ka tsəved faya ta diyē. Kame tay na, Yesu. Gawla ŋgay niyē hay ta dzədzar. Ndo neheye tə patay bəzay faya ta diyē ka bo dziyē ta dzədzar haladzay.

Yesu a zalatay a gawla ŋgay niyē hay kuro gər eye sulo aye abəra mə walaŋ i ndo niyē hay kətsah sa. Ka təv niyē na, a tsikatay wu nakə ma ta təriyē ka gər ŋgay aye.

<sup>33</sup> A gwadətay: «Tsənum, anəke na, faya ka deyekweyē a Zerozelem. Mə dəma na, neŋ Wawa i Ndo ta vəlateyē ga ha a həlay a bagwar i ndo neheye tə vəlaway wu a Mbəlom aye ada a ndo neheye tə dzaŋgawa bazlam i Mbəlom mapala eye. Ta geŋeyē sariya i məkədə. Ta vəlay ga ha a həlay i ndo neheye tə sər Mbəlom bay aye.

<sup>34</sup> Nəteyē na, ta ŋgwesəŋeyē dəla abəra mə gər. Ta tufəŋeyē slesləb a dəre. Ta ndəviyē ga ta mandalaḅa. Tsa na, ada ta kədiyē ga tuk. Aya ane, ma dəba i məhəne mahkar na, na lətsewəyē abəra ma mədahaŋ.»

*Ndo bagwar eye ta ndo i məsler*

*Mata 20.20-28; Luka 22.25-27*

<sup>35</sup> Ma dəba aye na, Yakuba ta Yuhana wawa i Dzebede hay ta həndzəd ka təv ŋgay, tə gwadətay: «Bəy Maduweŋ may, a samay na, gamay wu nakə a samay matsətsehe fakaya aye?»

<sup>36</sup> Yesu a gwadətay: «A sakum nā ge hərwi kurom na, wuyē mey?»

<sup>37</sup> Ta mbəday faya tə gwadətay: «Wu nakə nəmaa tsətsah fakaya aye na, ahəl nakə aza ka ndziyē ma bəy yak na, vəlamay tsəved nəmaa ndza ka təv yak, nəte ta diyē i həlay i mənday ada neŋged ta diyē i həlay i gula yak tey.»

<sup>38</sup> Ane tuk na, Yesu a gwadətay: «Ka sərum wu nakə ka tsətsahumeyē aye bay? Ka slumeyē məsə dəretsətseh nakə na siyē aye daw? Ka slumeyē faya matəme tā dzəhuḅ kurom ha a dəretsətseh nakə ta dzəhuḅiyē ga ha a dəma aye ŋgway daw?»

<sup>39</sup> Ta mbəday faya, tə gwadətay: «Nəmaa sliyē faya.»

Yesu a gwadətay: «Andza niyē dədək, dəretsətseh nakə na ta siyē na, ka ta sumeyē. Dəretsətseh nakə ta dzəhuḅiyē ga ha a dəma aye na, ta dzəhuḅiyē kurom ha a dəma.

<sup>40</sup> Ane tuk na, məndze ta diyē i həlay i mənday ga kəgəbay ta diyē i həlay i gula ga na, mata tsike na, neŋ bay. Təv məndze niyē na, i ndo neheye Mbəlom a ləvatay ha bo aye wu tay.»

<sup>41</sup> Siyē i gawla ŋgay neheye kuro aye tə tsəne bazlam niyē na, a ndalatay haladzay. Tə ge mevel ka Yakuba ta Yuhana.

<sup>42</sup> Hərwi niye Yesu a zalatay tebiye ka təv ɲgay, a gwadatay: «Ka sərūm ha na, ndo neheye ta zəba fataya andza bəy bagwar eye ka məndzibəra faya ta ləviye ndo hay ta gədan̄ ada ndo bagwar eye hay ta bəɾəkkiye ha gədan̄ tay ka siye i ndo hay.

<sup>43</sup> Ane tuk na, m̄a ge andza niye mə walaɲ kurom bay. Duh na, kə ge ndəray mə walaɲ kurom a say matəre bagwar eye na, m̄a təra ndo i məsler kurom.

<sup>44</sup> Ada tadə ndo mə walaɲ kurom a say matəre ndo i me na, m̄a təra beke i ndo hay tebiye duh.

<sup>45</sup> Kwa neɲ Wawa i Ndo na yaw na, hərwi ada ndo hay t̄a geɲ məsler bay. Na yaw duh na, hərwi məgatay məsler a ndo hay ada məvəle ha məsəfəre ga hərwi məmbəle tay ha ndo hay haladzay.»

*Yesu a mbəl ha ndo guluf eye  
Mata 20.29-34; Luka 18.35-43*

<sup>46</sup> Yesu ta gawla ɲgay hay tə ndisl a gəma i Zeriko. Ahəl nakə ti yaw abəra ma gəma niye na, ndo hay haladzay tə patayaw bəzay. Faya ta diye na, tə ndzay a gər a guluf wuray faya ma rəkiye wu mandza eye ka tsakay i tsəved. Məzele ɲgay na, Bartime, andza məgwədə wawa i Time.

<sup>47</sup> Guluf niye a tsəne tadakay faya ma diye na, Yesu ndo i Nazaret na, a wuda, a gwad: «Yesu, Wawa i Davit, n̄a gaka mə bo təbədew?»

<sup>48</sup> Ndo hay haladzay tə gay me, tə gwaday: «Ka bəbəl mey? Ndza d̄ikd̄ik!»  
Neɲgeye na, a səkah ha mawude sa duh: «Wawa i Davit, n̄a gaka mə bo təbədew?»

<sup>49</sup> Tsa na, Yesu a lətse, a gwadatay: «Dum zalumenɲayaw, m̄a yaw.»

Ti ye tə zalay a guluf niye, tə gwaday: «Dərev m̄a ye fakaya abəra bay. Lətse! Dara, faya ta zalakeye.»

<sup>50</sup> Tsa na, a lətse hurum, a kal ha peteked i mətasl ɲgay əvez ka dala. A ndapa a mbəlom, tsa na, a ye ka təv i Yesu.

<sup>51</sup> Yesu a tsətsah faya, a gwaday: «A saka n̄a ge hərwi yak na, mey?»

Guluf niye a mbəday faya, a gwaday: «Miter, a seɲ na, n̄a ɲgatay a dəre sa tey.»

<sup>52</sup> Tsa na, Yesu a gwaday: «Ka pa mədzal gər yak ka neɲ ta dedek. Do, ka mbəl!»

Tsa na, guluf niye a ɲgatay a dəre kwetseh kwetseh lele. A pay bəzay a Yesu.

## 11

*Yesu a ndisl a Zerozelem  
Mata 21.1-11; Luka 19.28-40; Yuhana 12.12-19*

<sup>1</sup> Anəke na, Yesu ta gawla ɲgay hay, nəteye bəse ta Zerozelem. Nəteye mə mahəmba nakə tə zalay Mahəmba i Tetədəez aye. Ka mahəmba eye niye na, gəma i Betifadze ta Betani andaya. Mə dəma na, Yesu a slər tay ha gawla ɲgay hay sulo, a gwadatay:

<sup>2</sup> «Dum a gəma nakə kame kurom aye. Ka ndislum naha a dəma na, ka ndzumeye a gər a zuɲgo wawa eye d̄a məzle ndo məb̄ara eye. Ndəray kə ndza faya d̄ada zuk bay. Pəlumaw ada k̄a yumen̄ ahaya.

<sup>3</sup> Ndəray kə gwadakum: “Ka pəlumeye zuɲgo eye məge ha mey?” na, gwadumay: “A say a Bəy Maduweɲ. Ma ta ma ahaya kanəɲ bəse, ma ndziye bay.”»

<sup>4</sup> Tsa na, ti ye a gəma niye. Ti ye naha a dəma na, tə huta zuɲgo niye wawa aye məb̄ara eye ma bəra ka məged, ka tsakay i tsəved. Tsa na, tə pəla ha zuɲgo niye.

<sup>5</sup> Mā dāma na, ndo hay andaya mandza eye. Tə gwadātay: «Ka gumeye ka niye mey? Ka pələmeye zungo eye mäge ha mey?»

<sup>6</sup> Tsa na, ta mbədatay faya andza nakə Yesu a tsikatay naha aye. Ndo niye hay tə tsəne andza niye na, tə gər tay ha. Tsa na, ti ye ha zungo niye.

<sup>7</sup> Ti ye ahaya zungo niye a Yesu na, ta fətəl faya peteked tay hay. Tsa na, a ndza ka zungo niye.

<sup>8</sup> Ndo hay haladzay ta fətəl peteked tay hay ka tsəved. Siye hay tə pa hawal i gərdaf neheye tə dāsaw ma guvah hay aye hərwi mādəslay ha gər a Yesu dərma.

<sup>9</sup> Ndo neheye kame i Yesu ta ndo neheye ma dāba ngay aye na, ta wuda, tə gwad: «Zambadəkway a Mbəlom! Mā pa ngama ka ndo nakə faya ma deyeweye tə məzele i Bəy Maduweŋ aye!

<sup>10</sup> Mbəlom mā pa ngama ka bəy i bəba kway Davit! Zambadəkway a Mbəlom, neŋgeye nakə mā mbəlom aye!»

*Yesu a vələy mezeleme a gərdafi gurov  
Mata 21.18-19*

<sup>11</sup> Tsa na, tə ndisl a Zerozelem. Tə ndisl naha a Zerozelem na, ti ye a gay i mādəslay ha gər a Mbəlom. A ndisl naha na, a zəba ka wu nakə ndo hay faya ta giye mā dāma aye. Ma dāba eye na, ti ye ta gawla ngay hay a gəma i Betani. Ti ye a dāma na, hərwi mazlambar pat faya ma dādiye.

<sup>12</sup> Tədəe eye na, Yesu ta gawla ngay hay tə lətse abəra ma gəma i Betani, tə ma a Zerozelem. Ka tsəved faya ta diye na, may a wur ka Yesu.

<sup>13</sup> A ngatay naha a dərizl i gərdaf wuray andza gurov slambah faya haladzay. Tsa na, a ye mata zəbaw faya. A gwad: «Ingedhay na hutiyehohway ngay eye na ndiye.» A ye, a ndisl naha ka təv i dərizl i gərdaf niye na, kakupkupa slambah dekdek bəna, hohway andaya bay. Hərwi kə ndisl ahl ngay məwe bay.

<sup>14</sup> Tsa na, Yesu a gwadāy a dərizl i gərdaf niye: «Ndəray mā nda hohway yak dāda sa bay!» Tsa na, gawla ngay hay ta tsəne.

*Yesu mə gay i mādəslay ha gər a Mbəlom  
Mata 21.12-17; Luka 19.45-48; Yuhana 2.13-22*

<sup>15</sup> Ma dāba eye na, tə ndisl a Zerozelem sa. Yesu a ye naha na, a ye a dālamətagay i gay i mādəslay ha gər a Mbəlom. A ye naha na, a dazlay mahəhere tay ha ndo masəkəme wu hay ta ndo neheye ta səkəmiye hay wu hay aye. A pay həlay a tabal i ndo mambədə ha suloy, a mbəzl ha təv mändze i ndo masəkəme ha bodobodo hay.

<sup>16</sup> A gatay me a ndo məzle wu i tsakala kwa waray waray mede ha ta dālamətagay i gay i mādəslay ha gər a Mbəlom.

<sup>17</sup> A dātay ha lele, a gwadātay: «Mawatsa eye mə Derewel i Mbəlom na: “Ta zaleyehay a gay ga na, gay i mađuwule me i slala i ndo hay wal wal tebiye.\*” Ane tuk na, nəkurom ka tərüm ha lar i məkal hay na, kəkay?†»

<sup>18</sup> Bagwar hay i ndo neheye tə vələway wu a Mbəlom ta ndo mādzaŋgawa bazlam i Mbəlom mapala eye, tə tsəne wu nakə Yesu a gawa aye na, ta dzədzar hərwi ndo hay ta wuda bazlam i Yesu niye a tsikatay aye. Ta pəla tsəved ka məkədə na Yesu.

<sup>19</sup> Ta huwa pat pizze na, Yesu ta gawla ngay hay tə lətse, ti ye abəra ma Zerozelem.

\* 11:17 Ezay 56.7. † 11:17 Zeremi 7.11.

*Mape mædzal gær ka Yesu tæ maduwule me**Mata 21.20-22*

<sup>20</sup>Tædæ eye pærik i mekedæ na, Yesu ta gawla ngay hay tæ ma a Zerozelem. Ahæl nakæ faya ta diye na, tæ ngatay a dærizl i gærdaf niye andza gurov aye. Dærizl i gærdaf niye na, makula eye hus ta zlælay eye dzay.

<sup>21</sup>Piyer a ngatay na, bazlam i Yesu nakæ a tsikay a dærizl i gærdaf niye a mayaw a gær. Tsa na, a gwadáy a Yesu: «Miter, zæba ka dærizl i gærdaf nakæ ka vëlay mezeleme aye na, kæ kula.»

<sup>22</sup>Yesu a mbædatay faya, a gwadátay: «Gærumay ha mædzal gær kurom a Mbælom!

<sup>23</sup>Særum ha lele, ndoweye kæ gwadáy a mahæmba nakay: “Lætse abæra kanaj, ta kal ha bo a bælay”, kæ ge a tsik ta mædzal gær næte na, Mbælom ma tæmiye na. Ada mâ sær ha na, ma giye bo andza nakæ a tsætsah aye.

<sup>24</sup>Hærwi niye faya na tsikakumeye: Tædæ ka dūwulum me, ka tsætsahum wu ka Mbælom na, dzalum ha na, 6a ka hutum tsiy. Mbælom ma vëlakumeye.

<sup>25</sup>Agæna nækurom ta magum eye ta ndo na, ka ta dūwulumeye me a Mbælom na, dum pæsum ha bo tæday. Ada Mbælom Bæba kurom mæ mbælom ma pæsakumeye ha dærmak. [

<sup>26</sup>Tædæ nækurom mandza eye huya ta magum eye na, Bæba kurom nakæ mæ mbælom aye ma pæsakumeye ha bay dærmak.]»

*Gædanj i Yesu**Mata 21.23-27; Luka 20.1-8*

<sup>27</sup>Ma dæba eye na, tæ ma a Zerozelem tuk. Yesu a ye a dalamættagay i gay i mædæslay ha gær a Mbælom. Ahæl nakæ faya ma hæhaliye mæ dæma aye na, bagwar hay i ndo neheye tæ vëlaway wu a Mbælom aye ta ndo mædzanngawa bazlam i Mbælom mapala eye ada ta madugula siye hay, ti ye ka tæv i Yesu.

<sup>28</sup>Ti ye naha na, ta tsætsah faya, tæ gwadáy: «Ka ge wu neheye na, ta gædanj waray? Maa vëlaka gædanj eye na, way?»

<sup>29</sup>Yesu a mbædatay faya, a gwadátay: «Næj dærmak na tsætsahiye fakuma matsætsehe næte, tædæ ka mbædumænnew faya na, na ge wu neheye ta gædanj waray na, na tsikakumeye.

<sup>30</sup>Maa slæraw Yuhana madzæhuþe ndo a yam na, way? Maa slæraw na, Mbælom tsukudu ndo hay daw? Mbædumænnew faya tey.»

<sup>31</sup>Tsa na, tæ tsik mæ walanj tay, tæ gwad: «Ka mbædækweye faya na, kækay? Tædæ ka gwadækwa, maa slær ha Mbælom, Yesu ma gwadækweye: “Ka dzalum ha ka wu nakæ Yuhana a tsik aye bay na, kemey?”

<sup>32</sup>Ada ka mbædækweye faya mægwedæ maa slæraw Yuhana na, ndo hay, ka tsikakweye tæta bay.» Tæ tsik tæta bay na, hærwi ndo hay tæbiye tæ sær ta dedek Yuhana na, ndo mæde ha bazlam i Mbælom. Ta dzædzar mætsike andza niye hærwi ndo hay.

<sup>33</sup>Ta mbæday faya a Yesu, tæ gwadáy: «Næmaa sær bay.»

Yesu a gwadátay: «Næj bæbay na ge wu neheye ta gædanj i way na, na tsikakumeye bay.»

**12***Dzeke i ndo neheye tæ hæl tay ha a guvah næteye sewed eye hay aye**Mata 21.33-46; Luka 20.9-19*

<sup>1</sup>Ma dæba eye na, Yesu a tsikatay me ta dzeke, a gwadátay: «Ndoweye a dæs guvah. A zæv a dæma dærizl i gærdaf haladzay. Dærizl i gærdaf niye hay na, tæ wa hohway aye. A ndæv ha mazæve na, a lawara na hændits ta zled. Tsa na, a lambad a dæma tægwad hærwi maditse a dæma hohway i dærizl i gærdaf niye

hay. A dɔzl a dɔma tɔv matsɔpe wu. A ndɔv ha malembede guvah ŋgay niye na, a hɛl ndo i mɛfɔte hay ada tɔ fɛtay na. Bo ŋgay aye a ye a tsekene.

<sup>2</sup> «Hɔlay i maŋgɔle hohway i dɛrizl i gɛrdaf niye hay kɔ sla. A slɛr ndo nɔte mɛ walan j ndo i mɛsler ŋgay hay hɛrwi ada tɔ vɔlayaw faya abɛra i ŋgay.

<sup>3</sup> Tsa na, ndo i mɛsler niye a ye. A ye naha na, ndo neheye faya ta tsɔpiye guvah aye tɔ gas na. Tɛ ndaɓa na ada ta hɔhara ahaya hɔlay kɛriye.

<sup>4</sup> Ndo i guvah a ŋgatay andza niye na, a slɛr ndo nenɛged. A ye naha na, kurah tɔ wuya faya mɛkɛde na. Tɛ kɛd na ka gɛr, tɛ tsaday pɛleslesle.

<sup>5</sup> Ndo i guvah niye a zla ndo i mɛsler ŋgay mamahkar eye, a slɛr na sa. Nenɛgeye na, tɛ kɛd na mɛdahan eye. Ndo i guvah niye a slɛr ndo wal wal sa. Tɛ ge tay ha andza niye dɛrmak. Siye hay tɛ ndaɓa tay ha, siye tɛ kɛd tay mɛdahan eye hay.

<sup>6</sup> «Anɛke a zɛkayaw a ndo i guvah niye na, wawa ŋgay nɔte nakɛ a wuda na haladzay aye. A slɛr na wawa ŋgay niye nɔte aye. Hɛrwi a dzala a gwad: “Wawa ga na, ta rɛhay ha gɛr, ta geye wuray bay.”

<sup>7</sup> «Wawa niye a ye. Tɛ ŋgatay na, tɛ gwad mɛ walan tay: “Aya! Anan magedze ŋgay nakɛ ma ta ndiye na guvah ŋgay aye, ki yaw! Takwa, kɛdakwa na, ada guvah nakay ma mɛtsakweye a nɛkway!”

<sup>8</sup> Tsa na, ti ye faya, tɛ gas na. Tɛ kɛd na. Tɛ kal ha mɛdahan eye dɛrenj abɛra ma guvah niye.»

<sup>9</sup> Tsa na, Yesu a tsɛtsah fataya a gwadatay: «Ndo i guvah ma giye anɛke na, kɛkay? Ndo i guvah niye ma deyewe ye na, ma gɛsiye tay ha ndo niye hay, ma kɛdiye tay ha. Ada ma hɛliye a dɛma ndo mekelɛn eye hay.

<sup>10</sup> Ka dzanɟum bazlam nakay mɛ Dɛrewel i Mbɛlom bɛdaw? Mɛ dɛma mawatsa eye na, a gwad:

“Kwar nakɛ ndo madɛzle gay hay tɛ kal ha aye na, maa tɛra kwar lele eye a ze siye kwar hay na, nenɛgeye dɛh.

<sup>11</sup> Maa gwad kwar niye mɛ tɛra kwar nakɛ lele eye hɛrwi madɛzle gay na, Mbɛlom.

Niye na, mɛsler i Mbɛlom hɛrwi kway.\*»

<sup>12</sup> Madugula i Yahuda hay tɛ sɛr ha a tsik andza niye na, ka nɔteye. Tsa na, ta pɛla tsɛved mɛgɛse na. Ane tuk na, tɛ gɛr ha, ti ye wu tay hɛrwi ta dzɛdzar ma ta ndalateye a ndo hay.

### *Mɛvɔlay dzanɟal a bɛy i Roma*

*Mata 22.15-22; Luka 20.20-26*

<sup>13</sup> Ma dɛba eye na, tɛ slɛr Farisa hay ta ndo hay ŋgal mɛ walan j ndo i Herod. Ti ye ka tɔv i Yesu hɛrwi mɛhɛle faya abɛra suwat.

<sup>14</sup> Ti ye naha tɛ gwaday: «Miter, nɛmaa sɛr ha nɛkar ka tsik na, dedek. Ka dzɛdzaray a wu nakɛ ndo hay ta dzaliye tɛbey ada ka ŋgɛna tay ha ka bo bɛra ndo hay tɛbey. Faya ka tɛtikateye a ndo hay dedek ka mede nakɛ a say a Mbɛlom aye. Ane tuk na, a samay matsɛtsehe fakaya: Bazlam kway mapala eye kɛ vɛl tsɛved mɛvɛle dzanɟal a bɛy i Roma tsukudu kɛ vɛl tsɛved mɛvɛle bay? Lele mɛvɛle bay tsukudu, lele mɛvɛle daw?»

<sup>15</sup> Yesu a sɛr ha a satay mɛhɛle faya abɛra suwat. Tsa na, a gwadatay: «A sakum mɛhɛle fagaya abɛra suwat na ka mey? Ehe zlumenɛw kwar i suloy tɛday, a seɲ mazɛbe faya.»

<sup>16</sup> Tɛ zlay naha kwar i suloy nɔte. Tɛ vɔlay.

A tɛma kwar i suloy niye a zɛba faya. Tsa na, a tsɛtsah, a gwadatay: «Mandzakit bo nakay ta mɛzele nakay faya na, i way?»

\* 12:11 Dɛmes hay 118.22-23.

Tə gwaɖay: «I bəy i Roma ada mawatsa eye faya na, məzele ŋgay.»

<sup>17</sup> Tsa na, Yesu a gwaɖatay: «Aya! Wu i bəy i Roma na, vəlumay ha a bəy i Roma ŋgway. Wu i Mbəlom na, vəlumay ha a Mbəlom ŋgway.»

Tə tsəne bazlam i Yesu niye na, a gatay hərɓaɓakka.

*Mələtsew abəra ma mədahaŋ*

*Mata 22.23-33; Luka 20.27-40*

<sup>18</sup> Ma dəba eye na, Saduke hay ti ye ka təv i Yesu. Azlakwa bay Saduke hay na, nəteye tə dzala ha tə gwad: «Ka mət na, mələtsew abəra ma mədahaŋ andaya sa bay.»

<sup>19</sup> Ti ye ta tsətsah ka Yesu, tə gwaɖay: «Miter, bazlam nakə Musa a watsamay a bazlam i Mbəlom mapala eye na, anan. A gwad: “Tadə ndo a mət a gər ha ŋgwas ŋgay, ta wa zuk bay na, mata zle na madakway i ŋgwas niye na, malamar i ndo niye a mət aye bəɖaw? Ma zliye na, hərwi ada hulfe i ndo niye a mət aye mə dze bay.”<sup>†</sup>»

<sup>20</sup> Aya andaya ahəl niye ndo ta malamar ŋgay hay tasəla. Malamar tay bagwar eye a zla dahəlay. A zla dahəlay na, a mət. A mət na, ta wa ta dahəlay ŋgay niye a zla aye bay.

<sup>21</sup> Məmbager ŋgay a zla na madakway i ŋgwas niye. Tsa na, a mət ze məwe wawa ta ŋgwas niye. Malamar tay mamahkar eye a ge ha andza niye dərma.

<sup>22</sup> Nəteye niye tasəla tə zla ŋgwas niye na, tə mət tebiye. Ndəray nəte mə walaŋ tay ta wa wawa ta ŋgwas niye bay. Ma dəba eye nəteye niye tebiye tə mət na, ŋgwas a mət dərma.

<sup>23</sup> Pat nakə aza ndo hay ta lətseweye abəra ma mədahaŋ aye na, ŋgwas niye ma mətseye na, a way? Hərwi mey na, nəteye niye tasəla aye ta zla na ka ŋgwas!»

<sup>24</sup> Yesu a mbəɖatay faya, a gwaɖatay: «Andza niye bay. Kā vumay gər a mədzal gər kurom bay. Ka tsikum andza niye na, hərwi ka sərūm wu nakə mawatsa eye mə Derewel i Mbəlom aye bay ada ka sərūm gadaŋ i Mbəlom bay.

<sup>25</sup> Ahəl nakə ta lətseweye abəra ma mədahaŋ aye na, hasləka hay ta ŋgwas hay ta zliye bo sa bay. Ane tuk na, ta ndziye na, andza gawla i Mbəlom neheye mə mbəlom aye.

<sup>26</sup> Bazlam nakə a tsik ka mələtsew abəra ma mədahaŋ aye na, ka dzangum ɖaɖa mə ɖerewel i Musa təbəɖew? A ɖa ha na, bazlam nakə Mbəlom a tsikayaw mə gay i dak niye dzaydzay andza faya ma təmiye na aye. Ka təv eye niye na, Mbəlom a gwaɖay a Musa: “Neŋ na, Mbəlom i Abraham, Mbəlom i İzak, Mbəlom i Zakob.»<sup>‡</sup>

<sup>27</sup> Mbəlom na, neŋgeye Mbəlom i mədahaŋ hay bay, neŋgeye Mbəlom i ndo neheye ta ndziye huya ta sifa aye. Nəkurom ka dzum tsəved hərwi nakə ka gwadam mələtsew abəra ma mədahaŋ andaya bay aye.»

*Bazlam mapala eye bagwar eye*

*Mata 22.34-40; Luka 10.25-28*

<sup>28</sup> Ahəl nakə Yesu ta Saduke hay faya ta tsikiye me aye na, ndo mədzaŋgawa bazlam i Mbəlom mapala eye andaya dərma, faya ma piye zləm. A tsik ma mədzele gər ŋgay, a gwad: «Yawa! Yesu a mbəɖatay faya a Saduke hay na, lele.» Tsa na, a həndzəɖ ka təv i Yesu. A tsətsah ka Yesu a gwaɖay: «Bazlam i Mbəlom mapala eye nakə a ze siye hay aye na, waray?»

<sup>†</sup> 12:19 Madazlay i wu hay 38.8; Bazlam mapala eye masulo eye 25.5-10. <sup>‡</sup> 12:26 Madayaw abəra ma Ezipt 3.2-4, 6, 15-16.



<sup>29</sup> Yesu a gwadaɣ: «Bazlam i Mbəlom nakə mapala eye a ze siye hay aye na, anan: “Nəkurom İsrayel hay, pum zləm! Bəy Maduweŋ Mbəlom kway na, neŋgeye Bəy Maduweŋ nətə ŋweŋ.

<sup>30</sup> Wuda Bəy Maduweŋ Mbəlom yak tə dərev yak tebiye, ta məsəfəre yak tebiye, tə metsehe yak tebiye, ada ta gədan yak peteh.<sup>§</sup>”

<sup>31</sup> Bazlam mapala eye masulo eye anan sa: “Wuda ndo i maged yak dərmak andza ka wuda na gər yak.\*” Bazlam i Mbəlom mapala eye maze neheye sulo aye na, andaya sa bay.»

<sup>32</sup> Tsa na, ndo mədzaŋgawa bazlam i Mbəlom mapala eye a gwadaɣ a Yesu: «Lele haladzay ŋalaka! Wu nakə ka tsik aye na, dedek. Bəy Maduweŋ na, neŋgeye Mbəlom nətə. Ma dəba ŋgay na, Mbəlom mekeleŋ eye andaya bay.

<sup>33</sup> Kwa way mâ wuda Mbəlom tə dərev ŋgay tebiye, ta ndaraw ŋgay tebiye. Ada mâ wuda ndo i maged ŋgay dərmak andza a wuda na gər ŋgay. Niye na, a ze məkəy naha slo i gənaŋ a Mbəlom tə məvəlay naha siye i wu hay wal.»

<sup>34</sup> Yesu a ŋgatay ndo niye a mbəday faya na, tə metsehe lele. Tsa na, a gwadaɣ a ndo niye: «Nəkar na, bəse tə mede a Bəy i Mbəlom.»

Ma dəba eye na, horoy a gatay a ndo hay matsətsehe faya bazlam.

### *Kəriste na, Wawa i Davit daw?*

*Mata 22.41-46; Luka 20.41-44*

<sup>35</sup> Ahəl niye na, Yesu a tətikawatay a ndo hay mə gay i mədəslay ha gər a Mbəlom. A tsətsah ka ndo hay, a gwadatay: «Ndo mədzaŋgawa bazlam i Mbəlom mapala eye tə gwad Kəriste neŋgeye na, Wawa i Davit na, kəkay?

<sup>36</sup> Hərwi kwa Davit na, a tsik ta Məsəfəre Tsədanŋa eye, a gwad:

“Bəy Maduweŋ Mbəlom a gwadaɣ a Bəy Maduweŋ ga na:

Dara, ndza tə həlay i məday ga,

hus a pat nakə neŋ, na piye tay ha ndo mənə dəre yak hay a huɗ i sik yak aye.†”

<sup>37</sup> «Davit tə gər ŋgay na, kə zalay a Kəriste “Bəy Maduweŋ” tuk na, Kəriste ma təriye wawa ŋgay na, kəkay?»

Bazlam i Yesu niye a tsik eye na, a yatay a gər a ndo niye hay faya ta pay zləm aye.

### *Məgay metsehe a masəpete*

*Mata 23.1-14; Luka 20.45-47*

<sup>38</sup> Wu nakə faya ma tətikateye aye na, anan. A gwadatay: «Həbum gər kurom abara ka ndo mədzaŋgawa bazlam i Mbəlom mapala eye hay. Nətəye i tay ta wuda mahəhele na, ta rəkwaɗ eye. Ka təv məhay gər na, a satay ndo hay tâ tsikatay me ta mədəslatay ha gər.

<sup>39</sup> Kwa mə gay i maɗuwule me na, ta pələwa i tay na, təv məndze nakə kame i ndo hay aye, ndo hay ta ŋgatateye lele. Mə magurlom, ta wuda na, təv məndze ŋgwalak eye.

<sup>40</sup> Wu nakə tə vələwatay a madakway i ŋgwas hay aye na, tə ndayawa na. Tə ɗuwulawa me na, vədɗəd a ndəv bəse bay hərwi ada ndo hay tâ gwad fataya nətəye ndo ŋgwalak eye hay. Slala i ndo neheye andza nakay aye na, Mbəlom ma giye fataya sariya na, ma ziye ndo siye hay!»

### *Madakway i ŋgwas mətawak eye*

*Luka 21.1-4*

§ 12:30 Bazlam mapala eye masulo eye 6.4-5. \* 12:31 Levitik 19.18. † 12:36 Dəmes hay 110.1.



<sup>41</sup> Ma dæba eye na, Yesu a ndza bæse ta tøv nakæ ndo hay tæ pawa a dæma suloy mæ gay i mædæslay ha gær a Mbælom. Ahæl nakæ ndo hay faya ta piye suloy a wu mæpe suloy aye na, Yesu faya ma zæbiye ka ndo hay ta piye suloy eye na, kækay. Ndo i zlele hay haladzay tæ pa a dæma suloy haladzay.

<sup>42</sup> Madakway i ngwas wuray mætawak eye a ye naha dærmak. A ye naha a pa a dæma kobo sulo. Kobo ngay niye na, a sla dala næte bay.

<sup>43</sup> Yesu a ngatay a madakway i ngwas niye na, a zalatay a gawla ngay, a gwadatay: «Særum ha, madakway i ngwas nakay na, maa vël dala haladzay a ze i ndo hay na, nengeye.

<sup>44</sup> Hærwi ndo mekelej eye hay tæ vël na, abæra ka siye. A gatay mæ gær sa bay. Ane tuk na, madakway i ngwas nakay mætawak eye na, a vël ha tebiye, siye andaya sa bay.»

## 13

*Yesu a da ha ta mbæzliye ha gay i mædæslay ha gær a Mbælom*

*Mata 24.1-2; Luka 21.5-6*

<sup>1</sup> Ahæl nakæ Yesu a yaw abæra ma dalamætagay i gay i mædæslay ha gær a Mbælom aye na, ndo næte mæ walaŋ i gawla hay a gwadatay: «Miter! Zæba ka gay nakay tey. Ma dæzliye na, bagwar eye ada kwar neheye ta dæzl ha aye na, bagwar eye hay ada tæ le haladzay!»

<sup>2</sup> Yesu a mbæday faya a gwaday: «Zæba gay nakay na, ka ngatumeye a kwar kwa næte ka gær i kwar nged bay. Ta mbæzliye ha hele hele.»

*Ngodgor i mandæve i mændzibæra*

*Mata 24.3-14; Luka 21.7-19*

<sup>3</sup> Ma dæba eye na, Yesu a tsal a mahæmba nakæ tæ zalay Mahæmba i Tetædæz aye. A ye naha na, a ndza dægger tæ gay i mædæslay ha gær a Mbælom. A mahæmba niye ti ye na, tage Piyer, Yakuba, Yuhana, ta Anðære tsa bæna ndo hay tebiye bay. Mæ mahæmba niye na, ta tsætsah faya tæ gwaday:

<sup>4</sup> «Tsikamay, wu neheye ta ta giye bo na, kæday? Ada ngodgor waray nakæ næmaa særiye ha na, wu neheye tebiye ta ndisleweye aye?»

<sup>5</sup> Tsa na, a dazlay mætsikatay, a gwadatay: «Gum metsehe lele! Ndæray mâ sæpat kurom bay.

<sup>6</sup> Hærwi ndo hay haladzay ta deyeweye ta mæzele ga. Kwa way ma gwadiye: «Neŋ na, Kæriste!» Ada ta sæpatiye ndo hay haladzay.

<sup>7</sup> Ka tsænum ndo hay faya ta giye væram bæse tæ nakurom kwa neheye dæreŋ tæ nakurom aye na, kâ dzædzarum bay. Wu neheye na, kutoŋ ta ndisleweye. Ane tuk na, niye na, mandæve i mændzibæra zuk bay.

<sup>8</sup> Slala nged ta giye væram ta slala nenged, bæy ta bæy ta giye væram. Dala ma bæliye ma gæma hay wal wal, ada mændærzlaŋ ma giye. Wu neheye ta giye bo na, andza mæwe wawa nakæ a dazlay a ngwas aye.

<sup>9</sup> «Dæretsæseh neheye ta ndzakum a gær na, gumay metsehe a gær lele. Hærwi mey na, hærwi ndo hay ta gæsiye kurom, ta diye kurom ha a gay i særiya. Ta ndæbiye kurom ta mandalæba mæ gay i maðuwule me hay. Ta diye kurom kame i ndo mælæve dala hay ada kame i bæy hay, hærwi nakæ ka pumæŋ bæzay a neŋ aye. Niye na, ta særiye ha ka pumay bæzay na, a Mbælom dedæk.

<sup>10</sup> Wu neheye ta giye bo andza niye na, hærwi ada ndo i mændzibæra hay tebiye tâ tsæne Labara Ngwalak eye.

<sup>11</sup> Tadæ ta gæs kurom, ta diye kurom ha kame i ndo mæge særiya hay na, kâ dzalum næmaa ta gwadiye kækay na, kâ dzædzarum bay. Ta ye kurom ha na, tsikum wu nakæ a yakumaw a mædzal gær aye. Hærwi ma deyeweye na,

abəra mə nəkurom bay. Mata dəkum ha wu nakə ka tsikumeye na, Məsəfəre Tsədəŋŋa eye.

<sup>12</sup> Həlay eye ma slaweye na, ndo hay ta vəliye ha malamar tay hay ada tā kəf tay ha, bəba hay ta giye ta wawa tay hay andza niye dərmak. Wawa hay ta natay dəre a bəba tay hay, ta kədiye tay ha.

<sup>13</sup> Ndo hay tebiye ta nakumeye dəre hərwi ga. Ane tuk na, ndoweye kə səmay naha hus ka mandəve aye na, Mbəlom ma təmiye ha.»

*Ta mbəzliye ha Zerozelem*

*Mata 24.15-28; Luka 21.20-24*

<sup>14</sup> Yesu a gwadatay sa: «Ka ŋgatumeye a wuray maga zluwer eye andza mazəlatonŋo. Wuye niye na, ma ta ndziye ka təv nakə haḃe ma ndziye faya bay aye. (Ndowneye kə dzaŋga na, mâ tsəne lele.) Ndo neheye ka dala i Yahuda aye, ta ŋgatay a wu niye na, tâ hway a mahəmba hay.

<sup>15</sup> Ndo naka neŋgeye ka gər i gay aye na, mâ mbəzlaw hərwi məzlaw wu mə gay bay. Kə mbəzlaw na, mâ hway dūh.

<sup>16</sup> Ada ndo nakə neŋgeye ma guvah aye na, mâ mbəda gər a mətagay ŋgay məzlaw petekəd ŋgay bay.

<sup>17</sup> Pat eye niye na, dəretsətseh wene wene eye na, ka gər i ŋgwas neheye tə bo sulo aye ada ka ŋgwas neheye faya ta vəlatəye wah a wawa tay hay aye!

<sup>18</sup> Gumay amboh a Mbəlom, hərwi ada wu neheye mâ ge bo a həlay i mətasl bay.

<sup>19</sup> Hərwi mey na, pat eye niye na, dəretsətseh bagwar eye. Slala i dəretsətseh niye ma ta deyeweye na, kə ge bo dāda bay kwa ka gər nakə Mbəlom a ge mändzibəra aye hus anəke. Ada slala i dəretsətseh niye na, dāda ma ta giye andaya sa bay.

<sup>20</sup> Tadə Mbəlom mâ zla həlay eye bəna, ndəray kwa nəte ma təmiye bay. Ane tuk na, a nəkid ha hərwi ndo ŋgay neheye a pala aye.

<sup>21</sup> «Tadə ndəray kə gwadakum: “Zəbum! Kəriste anan!” kəgəbay “Zəbum! Neŋgeye atay!” na, kə təmum bazlam ŋgay bay.

<sup>22</sup> Andza niye, ndo masəpete ndo hay ta deyeweye. Ta gwadiye nəteye na, ndo mədə ha bazlam i Mbəlom, kəgəbay ndo mətəme ha ndo nakə Mbəlom a sləraweye. Nəteye na, ta giye masuwayan hay ada tə wu neheye ma giye hərbaḃəkka aye hərwi tadə ma giye bo na, masəpete tay ha ndo neheye Mbəlom a pala aye.

<sup>23</sup> Nəkurom na, gum metsəhe lele! Na tsikakum ka bo abəra kurre.»

*Madayaw i Wawa i Ndo*

*Mata 24.29-35; Luka 21.25-33*

<sup>24</sup> «Ma dāba i dəretsətseh neheye na, pat eye niye na, pat ma giye andaya sa bay ada kiye ma dəviye bay.

<sup>25</sup> Wurzla hay dərmak ta kutsaweye abəra ka magərmbəlom ada wu neheye gədan eye ka magərmbəlom aye ta ḃəliye haladzay.

<sup>26</sup> Tsa na, ndo hay ta ŋgetəŋeye a neŋ Wawa i Ndo na deyeweye ma pazlay ta gədan haladzay ada ta məzlaḃ eye.

<sup>27</sup> Kwayanŋa ma sləraweye gawla i Mbəlom hay, ta hayay gər a ndo neheye a pala tay ha aye abəra ka kokway i mändzibəra tebiye kwa ka waray ka waray ka təv ŋgay.»

*Dzeke i gurov*

<sup>28</sup> A gwadatay: «Tsənum dzeke i gurov təday. Ka ŋgatumay a gurov ka dūda na, ka sərum ha gwaduvay kə ge, mazlambar yam ma piye bədaw?»

<sup>29</sup> Andza niye ahəl nakə ka ngatumay a wu neheye ta ndislew na, sərurum ha neŋ Wawa i Ndo mazlambar na deyeweye, neŋ ka maged.

<sup>30</sup> Neŋ faya na gwadakumeye: Sərurum ha na, wu nakay tebiye ma giye bo na, ndo neheye anəke aye ta mət zuk bay.

<sup>31</sup> Magərmbəlom ta dala ta dziye, bazlam ga na, daɗa ma dziye bay.»

*Maa sər pat nakə məndzibəra ma ndəviye na,*

*Mbəlom nəte ngweŋ*

*Mata 24.36-44*

<sup>32</sup> «Ma deyeweye pat waray na, ndəray kwa nəte a sər bay. Ada ma deyeweye ahəl waray na, ndəray a sər həlay eye bay sa. Kwa gawla i Mbəlom hay mə mbəlom, kwa neŋ wawa ngay bəbay, nəmaa sər bay. Maa sər pat eye na, Mbəlom Bəba ga nəte ngweŋ.

<sup>33</sup> Gum metshe bəna, kâ dzədzarum bay, hərwi ka sərurum ma deyeweye kəɗay na, ka sərurum həlay eye bay.

<sup>34</sup> Ma deyeweye na, andza ndo i gay nakə a say mede a tsekene aye. A ye na, a gəratay ha gay ngay a ndo i məsler ngay hay ada tã gay gər a bəɗgay ngay lele. A vəl məsler kwa a way. A ndo matsəpe maged na, a gwaday: “Tsəpa na lele, kâ ndzahəra bay.”

<sup>35</sup> Nəkurom dərma andza niye. Ndzum na, tsezlezleŋŋe, hərwi ka sərurum ndo i gay ma deyeweye ta huwa, agəna ta magərħəvad, agəna ta mbəlom da, agəna ta mekedə, ndəray a sər bay.

<sup>36</sup> Agəna ma deyeweye həf na, ma ndzakum a gər nəkurom mandzahəra eye bay.

<sup>37</sup> Wu nakə faya na tsikakumeye na, na tsikateye a ndo hay tebiye. Na gwadateye: Kâ ndzahərurum bay! Ndzum tsezlezleŋŋe!»

## 14

*Ta pəla tsəved magese na Yesu*

*Mata 26.1-5; Luka 22.1-2; Yuhana 11.45-53*

<sup>1</sup> A zəkaw məhəne sulo nakə Yahuda hay ta hatsiye magurum i Pak ada ta mände wu mənday nakə tə zalay peŋ aye na, gəde faya bay. Ahəl niye na, bagwar hay i ndo neheye tə vələway wu a Mbəlom aye ta ndo mədzanɗawa bazlam i Mbəlom mapala eye faya ta pəliye tsəved ka magese Yesu ta məkal hərwi ada tã kəf na.

<sup>2</sup> Tə gwad mə walaŋ tay: «Kâ gəsakwa na tə magurum nakay bay bəna, ndo hay ta gəriye kway ha bay.»

*Ngwas wuray a mbəɗa mal ka Yesu*

*Mata 26.6-13; Yuhana 12.1-8*

<sup>3</sup> Ahəl niye na, Yesu ma gəma i Betani, mə gay i ndo wuray tə zalay Simon. Ndowne niye a ndzawa na, dəvats i madəgwede a gaway. Ahəl nakə faya ta ndiye wu mənday aye na, ngwas wuray a ye a fələkwa ka təv tay dos ngay mə həlay maraha eye tə mal nakə a ze huŋŋa aye. Mal niye na, tsakala eye haladzay. A ye naha na, a həb ha me i dos niye məɗakw. Tsa na, a mbəɗa mal niye ka gər i Yesu.

<sup>4</sup> Ndo neheye ka təv i Yesu aye na, siye hay a ndalatay haladzay. Tə gwad mə walaŋ tay: «Asah! Ngwas nakay a nas ha mal nakay na, kemey?»

<sup>5</sup> Ta səkəm ha na, ta hutiyə dala haladzay segey? Ada dala aye na, ta sliye məvələtay a ndo i mətawak hay bəɗaw!» Tə may ha mənese haladzay a ngwas niye.

<sup>6</sup> Yesu a gwad̄atay: «Duh bay, ḡorum ha ɲgwas nakay na, s̄afek. Ka kwasumeye ḡar a ɲgwas nakay na, h̄arwi mey? Wu nak̄a a ge h̄arwi ga aye na, lele haladzay.

<sup>7</sup> Ndo i m̄atawak hay na, n̄ateye ka t̄av kurom huya. K̄a sakum m̄agatay ɲgwalak a m̄atawak hay na, ka mbumeye faya m̄agatay kwa k̄ad̄ay. Ane tuk na, neɲ na, na ndziye t̄a n̄akurom huya bay.

<sup>8</sup> ɲgwas nakay a geɲ na, wu nak̄a ḡad̄aɲ ɲgay a mba faya m̄age aye. Neɲgeye na, k̄a lah mamb̄ede ka bo ga mal nak̄a haɓe ta giye fagaya pat nak̄a ta piye ga a b̄ad̄ aye.

<sup>9</sup> Neɲ faya na gwad̄akumeye, s̄arum ha: Kwa a ɲgay ta diye ha Labara ɲgwalak eye ka m̄andzib̄era tebiye na, ta tsikiye ka ɲgwas nakay h̄arwi wu nak̄a a ge aye. Ndo hay ta m̄atsiye ha ḡar bay.»

*Yudas a ge d̄af ka Yesu*

*Mata 26.14-16; Luka 22.3-6*

<sup>10</sup> Ndo n̄ate m̄a walaɲ i gawla i Yesu niye hay kuro ḡar eye sulo aye, a ye ka t̄av i bagwar hay i ndo neheye t̄a v̄alaway wu a Mb̄elom aye. M̄ezele ɲgay na, Yudas Iskariyot. A ye h̄arwi a say m̄age d̄af ka Yesu.

<sup>11</sup> Bagwar hay i ndo neheye t̄a v̄alaway wu a Mb̄elom aye t̄a ts̄ane labara nak̄a a tsikatay aye na, a yatay a ḡar haladzay. Tsa na, t̄a gwad̄ay: «N̄amaa v̄alakeye dala.» Yudas a maw ab̄era ka t̄av tay na, a yaw a p̄ela wewer ada h̄alay nak̄a lele eye h̄arwi m̄age d̄af ka Yesu aye.

*Yesu t̄a ge magurlom i Pak ta gawla ɲgay hay*

*Mata 26.17-30; Luka 22.7-23; Yuhana 13.21-30; 1 Korin̄te hay 11.23-25*

<sup>12</sup> Pat makurre i magurlom nak̄a t̄a ndayawa wu m̄and̄ay nak̄a ḡede faya bay aye na, t̄a k̄ad̄awa t̄abaɲ h̄arwi m̄ade wu m̄and̄ay i Pak. Pat eye niye na, gawla i Yesu hay ta ts̄atsah, t̄a gwad̄ay a Yesu: «A saka n̄amāa ye mata daka d̄af i magurlom i Pak na, ka waray?»

<sup>13</sup> Yesu a ts̄ane andza niye na, a sl̄ar gawla ɲgay hay sulo ka me, a gwad̄atay: «Dum a wuzlahḡema! Ka yum naha na, ka ndzumeye a ḡar a ndo faya ma zliye yam ta ḡezla eye. Ka ɲgatumay na, pumay b̄azay.

<sup>14</sup> Gay nak̄a ma f̄al̄ekwiye a d̄ama aye na, f̄al̄ekum d̄ermak ada k̄a ts̄atsahum ka ndo i gay niye, gwad̄umay: “Miter a gwad̄aka: Gay nak̄a n̄amaa ndiye m̄a d̄ama wu m̄and̄ay i magurlom i Pak ta gawla ga hay aye na, m̄aɲgay?”

<sup>15</sup> Ka ts̄atsahum andza niye na, ma d̄akumeye faya ka gay nak̄a ka ḡar i gay neɲged̄ aye. Hud̄ i gay niye na, bagwar eye. Wu hay m̄a d̄ama mal̄ava bo eye tsiy. Wu neheye ka gakweye ha m̄asler aye tebiye andaya m̄a d̄ama. Ka dumeye wu m̄and̄ay i magurlom i Pak na, m̄a d̄ama.»

<sup>16</sup> Gawla ɲgay niye hay sulo aye t̄a l̄etse, ti ye a wuzlahḡema. Ti ye naha na, t̄a ndzay a ḡar andza nak̄a Yesu a tsikatay aye. Tsa na, t̄a da wu m̄and̄ay i Pak m̄a d̄ama.

<sup>17</sup> Huwa a ge na, Yesu ta gawla ɲgay hay kuro ḡar eye sulo, ti ye a gay niye tuk.

<sup>18</sup> Ah̄al nak̄a faya ta ndiye wu m̄and̄ay aye na, Yesu a gwad̄atay: «Neɲ faya na gwad̄akumeye: S̄arum ha na, ndo n̄ate m̄a walaɲ kway nakay ka ndayakweye wu m̄and̄ay dziye na, ma giye fagaya d̄af.»

<sup>19</sup> Gawla ɲgay hay t̄a ts̄ane andza niye na, a ndalatay. Tsa na, kwa way a ts̄atsah faya, t̄a gwad̄ay: «Neɲ daw? Neɲ daw?»

<sup>20</sup> Yesu a mb̄ad̄atay faya a gwad̄atay: «Ndo n̄ate m̄a walaɲ kurom neheye kuro ḡar eye sulo aye. Mata ge fagaya d̄af na, ndo nak̄a faya ka ndayakweye wu m̄and̄ay dziye aye.

<sup>21</sup> Neŋ Wawa i Ndo na mətiye andza nakə Derewel i Mbəlom a tsik aye. Ane tuk na, dəretsətseh ka gər i ndo nakə ma giye dəf ka neŋ Wawa i Ndo aye. Ndo niye na, ŋgama meeneŋ t̄a wa na bay.»

<sup>22</sup> Ahəl nakə faya ta ndiye dəf aye na, Yesu a zla peŋ, a gay naha sisœ a Mbəlom. Ma d̄aba eye na, a ŋəna ha peŋ niye, a v̄olatay a gawla ŋgay hay, a gwadatay: «Zlum. Nakay na, bo ga.»

<sup>23</sup> A zla ḡəvet maraha eye t̄ə wu məse, a gay naha sisœ a Mbəlom. Ma d̄aba eye a v̄olatay t̄ə sa tebiye tay eye.

<sup>24</sup> Yesu a gwadatay sa: «Nakay na, bambaz ga nakə Mbəlom ma b̄ariye dzam ta ndo hay aye. Ta mb̄adiye ha na, h̄ərwi ndo hay haladzay.

<sup>25</sup> Neŋ faya na tsikakumeye, na ta siye wu məse nakay sa bay hus a pat nakə na ta siye wedeye ma B̄əy i Mbəlom aye.»

<sup>26</sup> Ma d̄aba eye, ta zambad̄ay a Mbəlom ta d̄ames na, ti ye t̄ə tsal a Mah̄amba i Tet̄ad̄œz.

*Yesu a d̄a ha Piyer ma ta gwad̄iye: «Na s̄ər Yesu bay»*

*Mata 26.31-35; Luka 22.31-34; Yuhana 13.36-38*

<sup>27</sup> Ahəl nakə faya ta diye ka ts̄əved aye na, Yesu a gwadatay a gawla ŋgay hay: «N̄akurom neheye tebiye ka ḡərumeye ga ha, ka h̄wayumeye kurom. Mawatsa eye mə bazlam i Mbəlom na: “Na ta k̄adiye na ndo məts̄əkure tay ada t̄əbaŋ hay ta ŋganiye ḡər kweye kweye kwa a ŋgay.\*”»

<sup>28</sup> Yesu a gwadatay sa: «Ane tuk na, na mb̄əlaw ab̄əra ma mədahaŋ na, na h̄əbiye kurom ma Galile.»

<sup>29</sup> Piyer neŋgeye na, a gwad̄ay: «Kwa siye i ndo hay ta ḡər kar ha na, neŋ na, na ḡəriye kar ha bay.»

<sup>30</sup> Tsa na, Yesu a mb̄əd̄ay faya a Piyer a gwad̄ay: «Neŋ faya na gwad̄akeye: S̄ər ha na, b̄əgom ta həvad̄ nakay, dzagulok ma ta zlahiye sik sulo na, 6a ka gwad̄ sik mahkar ka s̄ər neŋ bay.»

<sup>31</sup> Piyer a mb̄əd̄ay faya sa: «Na s̄ər kar bay na, na tsikiye d̄ada bay, kwa tad̄ə ka məfameye ka bo salamay.» Siye i gawla ŋgay hay tebiye t̄ə tsik andza niye d̄ərmak.

*N̄əteye ka Mah̄amba i Tet̄ad̄œz*

*Mata 26.36-46; Luka 22.39-46*

<sup>32</sup> Tsa na, t̄ə ndisl a t̄əv wuray t̄ə zalay Getsemene. T̄ə ndisl naha na, Yesu a gwadatay a gawla ŋgay hay: «Ndzum kanaŋ! Neŋ na, na diye na ta d̄uwuliye me.»

<sup>33</sup> Yesu a ye na, n̄əteye ti ye dziye tage Piyer, Yakuba ada Yuhana. T̄ə ndisl naha na, d̄ərev a ye ab̄əra ka Yesu, a dz̄ədzar haladzay.

<sup>34</sup> A gwadatay: «D̄ərev ga na, k̄ə rah t̄ə d̄əretsətseh i mədahaŋ. N̄əkurom na, ndzum kanaŋ t̄selezleŋe!»

<sup>35</sup> A ye izad̄ abara ka t̄əv i gawla ŋgay neheye mahkar aye. A ye naha na, a kal bo ka dala b̄ərut t̄ə huđ. A d̄uwulay naha me a Mbəlom a gwad̄: «Tad̄ə ma giye bo na, h̄əlay i d̄əretsətseh nakay m̄a ye fagaya ab̄əra vuw tey.»

<sup>36</sup> A gwad̄: «Abba, B̄əba ga, n̄əkar na, wuray a wuraka bo t̄əbey. Zla fagaya ab̄əra d̄əretsətseh nakay na siye tey. Kwa mey na, andza nakə a saka a n̄əkar aye b̄əna, andza nakə a seŋ a neŋ aye bay.»

<sup>37</sup> Ma d̄aba eye, a maw ka t̄əv i gawla ŋgay neheye mahkar aye. A maw a ndzatay a ḡər na, n̄əteye mandzah̄əra eye. Tsa na, a zalay a Piyer a gwad̄ay: «Simon, ka ndzah̄əra d̄aw? N̄əkar na, ka mba faya m̄əndze t̄ə d̄əre kwa b̄əre n̄əte t̄əb̄əf̄ew?»

\* 14:27 Zakari 13.7.

<sup>38</sup> Ndzum tã dãre tsezlezlenjje ada ðuwulumay me a Mbəlom hãrwi ada kã dãdum a masəpete i Fakalaw bay. Məsəfãre na, a say mäge wu lele eye, ane tuk na, gãdan kurom andaya mäsəmay naha a masəpete i Fakalaw bay.»

<sup>39</sup> Yesu a ndəv ha na, a ye abəra ka təv tay izad sa. A ye mata ðuwule me. A ye naha a tsik na, bazlam ŋgay neheye a tsik kurre aye.

<sup>40</sup> Tsa na, a maw ka təv i gawla ŋgay neheye sa. A ndzatay a gər na, nəteye mandzahəra eye. Tã mba faya mändze tã dãre kwa tsekwenj bay tebiye. Ta pãdeke abara ka mändzehəre na, tã sər wu nakə ta tsikiye bay. Yesu a ye mata ðuwule me sa.

<sup>41</sup> A maw mamahkar eye na, a gwadatay: «Huya faya ka ndzahərumeje dāw? Nəkurom faya ka zəzəkumeye bo kurom ba? Anəke na, ka ndəv tsiy, həlay eye kə ndisləw tuk! Neŋ Wawa i Ndo ta vəlay ga ha a həlay i ndo i mezeleme hay tuk.

<sup>42</sup> Lətsum, takwa, ta dzakwa gər! Zəbum, ndo nakə ma giye fagaya daf aye, kə ndzew.»

*Tã gəs na Yesu*

*Mata 26.47-56; Luka 22.47-53; Yuhana 18.3-12*

<sup>43</sup> Ahəl nakə Yesu faya ma tsikiye me mba aye na, pəslanj Yudas neŋgeye nakə nəte mə walanj i gawla i Yesu hay kuro gər eye sulo aye, a ye naha. Ti ye naha ta ndo hay haladzay ta maslalam tay hay ada ta sakwal tay hay. Maa slər tay naha na, bagwar hay i ndo neheye tã vəlaway wu a Mbəlom aye ta ndo mädzanğawa bazlam i Mbəlom mapala eye ada ta madugula hay.

<sup>44</sup> Yudas ndo mägatay daf ka Yesu aye ɓa kə datay ha wu nakə ma giye. A gwadatay: «Ndo nakə na ye, na gəs na ka bo təmbolok təmbolok aye na, neŋeye! Gəsum na. Ka deyumeye ha na, tsəpum na lele.»

<sup>45</sup> Yudas a ndisl naha na, a händzəd kwayanŋa ka təv i Yesu, a gwaday: «Miter!» Tsa na, a gəs na ka bo təmbolok təmbolok.

<sup>46</sup> Ndo niye hay tã ŋgatay andza niye na, kwayanŋa tã gəs na Yesu.

<sup>47</sup> Ka təv niye ndo nəte mə walanj tay, pəkata a ŋgwadaw maslalam ŋgay. Tsa na, a fay ha a ndo i məsler i bagwar i ndo məvəlaway wu a Mbəlom, a dəsay na zləm fats ka dala.

<sup>48</sup> Yesu a gwadatay: «Ka yumaw fagaya ta maslalam kurom hay ada ta sakwal kurom andza ta gəsiye ndo i məkal dāw?

<sup>49</sup> Pat pat na ndzawa ka təv kurom. Na tətikawa mə gay i mädəslay ha gər a Mbəlom na, ka gəsom ga bay. Wu neheye a ge bo na, hãrwi ada mã ge bo andza nakə Derewel i Mbəlom a tsik aye.»

<sup>50</sup> Tã gəs na Yesu na, gawla ŋgay hay ta hway kweye kweye tã gər ha.

<sup>51</sup> Faya ta diye ha Yesu na, ndo wuray gawla aye a zəŋgal na Yesu. Ka bo ŋgay na, gwedere tsa. Ndo neheye faya ta diye ha Yesu aye tã ge andza ta gəsiye na gawla niye na,

<sup>52</sup> a gər ha gwedere ŋgay ŋgudek, a hway ŋgway bo kəriye.

*Yesu kame i bagwar i ndo neheye tã vəlaway wu a Mbəlom aye*

*Mata 26.57-68; Luka 22.54-55,63-71; Yuhana 18.13-14,19-24*

<sup>53</sup> Ti ye ha Yesu na, a gay i bagwar i ndo məvəlaway wu a Mbəlom aye. Mə dəma na, bagwar hay i ndo neheye tã vəlaway wu a Mbəlom tebiye, madugula hay ta ndo mädzanğawa bazlam i Mbəlom mapala eye tebiye nəteye mahaya gər eye.

<sup>54</sup> Piyer neŋgeye na, a zəŋgal naha Yesu dərən ma dəba. A ye naha a fələkwa a dalamətagay i bagwar i ndo məvəlaway wu a Mbəlom niye. Mə dəma na, a ndza ka təv i ndo niye hay faya ta tsəpiye magedf aye. A ye naha a ndza ka ako ka təv tay niye.

<sup>55</sup> Bagwar hay i ndo neheye tã vɛlaway wu a Mbɛlom aye ta madugula i Yahuda hay tebiye ta pɛla ndo hay hɛrwi maraw faya me hɛrwi mɛgay sariya i mɛkɛdɛ na. Ane tuk na, ta huta faya mɛnese bay.

<sup>56</sup> Ndo hay haladzay ta raw faya me. Ane tuk na, maraw me tay niye ki ye tay faya bay. Kwa way a tsik i ŋgay wal.

<sup>57</sup> Siye i ndo mekelɛŋ aye hay tã lɛtse, ta raw me ka Yesu, tã gwad:

<sup>58</sup> «Nɛmaa tsɛne faya abɛra a gwad: “Na mbɛzliye ha gay i mɛdɛslay ha gɛr a Mbɛlom nakay ndo hay ta dɛzl eye ada ma mɛhɛne mahkar na, na dɛzliye a dɛma mekelɛŋ nakɛ tã hɛlay i ndo zezeŋ bay aye.”»

<sup>59</sup> Kwa tã tsik andza niye bɛbay na, huya bazlam tay niye ki ye tay ka bo bay.

<sup>60</sup> Tsa na, bagwar i ndo mɛvɛlaway wu a Mbɛlom a lɛtse tsɛkwad kame i ndo hay. A tsɛtsah ka Yesu, a gwaday: «Ka mbɛdatay faya a ndo neheye tɛbɛdɛw? Tɛ tsik fakaya na, mey?»

<sup>61</sup> Ka bazlam tay niye na, Yesu ka mbɛdatay faya bay. Kɛ tsikatay faya kwa tsekweŋ bay tebiye.

Bagwar i ndo mɛvɛlaway wu a Mbɛlom niye a tsɛtsah faya sa: «Nɛkar na, Kɛriste Wawa i Mbɛlom nakɛ nɛmay faya nɛmaa zambadɛye dɛw?»

<sup>62</sup> Yesu a mbɛdɛy faya a gwaday: «Nɛŋ na, nɛŋgeye. Ma dazlay anɛke, ka ŋgatumeŋgeye a nɛŋ Wawa i Ndo na ndziye tã hɛlay i mɛnday i Mbɛlom, nɛŋgeye nakɛ gadɛŋ eye ka gɛr i wu hay tebiye aye. Ka ŋgatumeŋgeye sa na, ma magɛrmbɛlom na deyeweye ma pazlay.»

<sup>63</sup> Bagwar i ndo mɛvɛlaway wu a Mbɛlom a tsɛne andza niye na, a ndalay haladzay. A ŋguradɛ ha petekɛd ŋgay. Tsa na, a gwad: «Ka pɛlakweye na, sa mey?»

<sup>64</sup> Ka tsɛnum wu nakɛ a tsik aye bɛdɛw? A tsalay ka gɛr a Mbɛlom. Niye na, ka dzalum na, kɛkay?» Ndo niye hay tebiye tã gay sariya i mɛkɛdɛ na.

<sup>65</sup> Kwayanŋa siye i ndo mekelɛŋ eye hay tã wuya faya kurah. Ta tufay slesleɓ a dɛre. Tɛ mbuzay na dɛre ada tã kɛd na. Tɛ gwaday: «Nɛkar ndo mɛdɛ ha bazlam i Mbɛlom ba! Tsikamay, maa faka na, way?» Tsa na, tã vɛlatay ha a hɛlay a ndo matsɛpe gay i bɛy i ndo mɛvɛlaway a Mbɛlom. Nɛteye tã gɛs na ada tɛ fay ka maholom pura pura.

*Piyer a gwad: «Na sɛr Yesu bay»*

*Mata 26.69-75; Luka 22.56-62; Yuhana 18.15-18,25-27*

<sup>66</sup> Piyer na, nɛŋgeye andaya huya ma dalamɛtagay ka dala. Ŋgwas nakɛ a gawa mɛsler mɛ gay i bagwar i ndo mɛvɛlaway wu a Mbɛlom aye, a ye naha a ndzay a gɛr a Piyer.

<sup>67</sup> A ŋgatay a Piyer mandza eye ka ako. A zɛba faya ndzuzle, a gwaday: «Nɛkar dɛrmak na, ndo i Yesu, ndo i Nazaret na gwad bɛdɛ?»

<sup>68</sup> Piyer a tsɛne na, a gwaday a ŋgwas niye: «A'ay! Na sɛr wu nakɛ a saka matsike aye bay. Na sɛr bay tebiye.» Tsa na Piyer a ye abɛra ma dalamɛtagay. A ye a lɛtse slɛp ka hɛlay i mɛgedɛ madayaw abɛra. [Kwayanŋa dzagulok a zlahɛ.]

<sup>69</sup> Piyer a ye a ndza slɛp ka hɛlay i mɛgedɛ na, ŋgwas niye kɛ ŋgatay naha. Tsa na, a masay ha slala i bazlam ŋgay nakɛ a tsikay a Piyer kame i ndo neheye mɛ dɛma aye. «Ndo nakay na, nɛte mɛ walaŋ tay.»

<sup>70</sup> Piyer a tsɛne na, a gwad: «Na sɛr ndo niye bay.»

Mɛndze tsekweŋ na, ndo neheye ka tɛv eye niye tã gwaday sa: «Nɛkar na, mɛ walaŋ tay, nɛkurom dziye. Nɛkar na, ndo i Galile!»



<sup>71</sup> Piyer a mbaɗa a gwad: «Na sər ndo nakə ka tsikum faya aye bay. Kə ge na raw me na, Mbəlom mā geŋ ɗaretsətseh.»

<sup>72</sup> Kwayanŋa dzagulok a zlahā masulo aye. Tsa na, bazlam i Yesu nakə a tsik aye a mayaw a gər a Piyer tuk. Yesu a gwaday: «Dzagulok ma ta zlahiye sik sulo na, ɓa ka gwad sik mahkar ka sər neŋ bay.» Piyer a dzala ha ka bazlam i Yesu nakə a tsikay aye na, a hwayaw abəra. A ye a tuwa tsiduk tsiduk.

## 15

### *Yesu kame i Pilat*

*Mata 27.1-2,11-26; Luka 23.1-5,13-25; Yuhana 18.28-19.16*

<sup>1</sup> Pərik i mekedɔ, bagwar hay i ndo neheye tə vələway wu a Mbəlom aye ta madugula hay ta ndo mɗzanŋawa bazlam i Mbəlom mapala eye ada ta madugula hay tebiye, tə haya gər. Tə haya gər na, hərwi mətsike mə walaŋ tay mage ha Yesu na, kəkay? Ta ndəv ha məhay gər na, tə dzawa na Yesu ada ti ye ha a gay i Pilat. Ti ye naha na, tə vələy ha a Pilat.

<sup>2</sup> Pilat, neŋgeye na, a tsətsah ka Yesu, a gwaday: «Nəkar na, bəy i Yahuda hay dedek ɗaw?»

Yesu a mbəɗay faya, a gwaday: «Nəkar ka tsik segey.»

<sup>3</sup> Bagwar hay i ndo neheye tə vələway wu a Mbəlom aye tə ɗəs parasay haladzay ka Yesu.

<sup>4</sup> Ma ɗaba eye na, Pilat a tsətsah faya sa, a gwaday: «Nəkar na, ka mbəɗa faya bay na, kəkay? Ka tsəne wu neheye faya ta tsikiye fakaya haladzay aye təbədew!»

<sup>5</sup> Ada kwa Yesu ka həndək bazlam ndɔ mambəɗay faya sa bay tebiye. Tsa na, a gay wadəŋ wadəŋ a Pilat.

<sup>6</sup> Ka məve, ta giye magurlom nakə tə zalay Pak aye na, Pilat a gərawa ha ndo i ɗanŋay nəte. A gər ha na, ndo nakə ta tsətsahawa aye.

<sup>7</sup> Azlakwa ahəl niye na, ndoweye andaya tə zalay Barabas, neŋgeye ma ɗanŋay. Neŋgeye mə walaŋ i ndo neheye tə nay ɗəre a bəy i dala i hay aye. Tə gəs tay na, hərwi tə kəɗ ndo ahəl i magazləga tay niye.

<sup>8</sup> Anəke na, ndo hay tebiye ti ye a gay i Pilat. Ti ye naha a ɗəma na, kwa way a tsətsah ka Pilat wu nakə a təməwatay na andza nakə ta tsətsahawa aye.

<sup>9</sup> Tsa na, Pilat a mbəɗatay faya a gwadatay: «A sakum nā gərakum ha na, bəy i Yahuda hay ɗaw?»

<sup>10</sup> Pilat a sər ha bagwar hay i ndo neheye tə vələway wu a Mbəlom aye tə gəsay naha Yesu na, tə ge faya na, sələk kəriye.

<sup>11</sup> Bagwar hay i ndo neheye tə vələway wu a Mbəlom aye, nəteye ɗuh na, tə vələtay gəɗaŋ a ndo hay ada məgwaday a Pilat mā gəratay ha na, Barabas bəna, Yesu bay.

<sup>12</sup> Pilat a gwadatay a ndo hay sa: «A sakum nā ge ha ta ndo nakay ka zalumay bəy i Yahuda hay aye na, kəkay?»

<sup>13</sup> Tsa na, ndo hay ta mbəɗay faya tə mawude, tə gwaday: «Dar na ka mayako mazlələmbaɗa eye!»

<sup>14</sup> Pilat a tsətsah fataya, a gwadatay: «Neŋgeye a ge na, mənese waray?»

Ane tuk na, ta səkah ha mawude haladzay ta gəɗaŋ, tə gwad: «Dar na ka mayako mazlələmbaɗa eye!»

<sup>15</sup> Pilat a say mənŋwasatay ha ɗərev a ndo niye hay. Andza niye a gəratay ha Barabas. Yesu na, a ndaɓa na ta mandalaɓa, a vələtay ha a sidzew hay hərwi ada tā ye tā dar na ka mayako mazlələmbaɗa eye.



*Tə gay sariya a Yesu i məkədə  
Mata 27.27-31; Yuhana 19.2-3*

<sup>16</sup> Sidzew hay ti ye ha Yesu a hud i gay i ngomna ada tə zalatay a siye i sidzew hay tebiye, ti ye dərmak.

<sup>17</sup> Mə dəma na, ta tsəkw faya abəra peteked ngay hay. Tə zla peteked ndozza eye, tə kalay ka bo. Tə də saw dak tə slapa na ka bo, tə pay a gər a Yesu andza dzagwa i bəy.

<sup>18</sup> Tsa na, ta dazlay mətsikay me. Tə gwaday: «Zay daw? A nəkar bəy i Yahuda hay!»

<sup>19</sup> Tə tsikay andza niye na, ada tə fay ka gər ta sakwal. Ta tufay slesle6 a dəre. Ta dəkway gurmets kame ngay hərwi mətsikay me andza bəy.

<sup>20</sup> Ta ndəv ha mənğwese faya na, ta tsəkw faya abəra peteked nakə tə kalay ka bo ndozza aye ada tə may ha ka bo peteked ngay hay. Tsa na, tə gəs ahaya abəra hərwi mede ha mata dar na ka mayako mazləlmbada eye.

*Mata 27.33-44; Luka 23.26-43; Yuhana 19.17-27*

<sup>21</sup> Ahəl nakə faya ta diye ha Yesu mata dar na ka mayako mazləlmbada eye na, pəsəlan ndo wuray məzele ngay Simon. Nənğeye na, ndo i Siren, nənğeye bəba i Aləgəzəndər ta Rufus. Nənğeye faya ma diye ta təv niye. Nənğeye a maw abəra mə pesl. Sidzew hay tə ngatay na, tə gay kutoŋ ka məzle mayako mazləlmbada eye nakə ta dariye faya Yesu aye.

<sup>22</sup> Tsa na, ti ye ha Yesu a təv eye andaya tə zalay Golgwata, andza məgwede: Təv i mətasl i gər.

<sup>23</sup> Tə ndisl naha a dəma na, a satay a sidzew niye hay məvəlay guzom madzapa eye tə wuye andaya tə zalay *mir*. Ane tuk na, a say a Yesu bay, a kərah məse.

<sup>24</sup> Ma dəba eye na, ta dar na Yesu ka mayako mazləlmbada eye. Ta dar na na, tə ge tsakwal ka peteked ngay hay. Tə ge andza niye na, məsəre ha mata zle na, way?

<sup>25</sup> Ta dar na Yesu ka mayako mazləlmbada eye na, ta mekedə tə 6əre tsid.

<sup>26</sup> Tə watsa ka palalam eye andaya gər i bazlam nakə tə kəd na faya Yesu aye. Gər i bazlam nakə tə watsa aye na, anan: «Nənğeye na, bəy i Yahuda hay.»

<sup>27</sup> Pat niye na, ta dar məkal hay sulo ka mayako mazləlmbada eye ka tsakay i Yesu dərmak. Ta dar tay na, nəte tə həlay i mənɔday, nənğed tə həlay i gula. [

<sup>28</sup> Anan andza nakay wu nakə bazlam i Mbəlom a tsik aye na, a gwad: «Nənğeye na, tə pasla na a walaŋ i ndo i sewed hay.\* »]

<sup>29</sup> Ndo neheye ti yawa ta təv niye na, tə 6əlawa ha gər tay hay tekəm tekəm tə mətsaday pəleslesle. Tə gwaday: «Hey! Nəkar həbe a saka mambəzl ha gay i mədəslay ha gər a Mbəlom ada ka gwad ma məhəne mahkar na, ka dəzl na aye na, təv i wu yak aye na, mənğay tuk?»

<sup>30</sup> Nəkar təma ha bo yak aye tey! Mbəzlaw abəra ka mayako nakay mazləlmbada eye!»

<sup>31</sup> Bagwar hay i ndo neheye tə vələway wu a Mbəlom aye ta ndo madzəngawa bazlam i Mbəlom mapala eye a ndo hay tə ngwasa ka Yesu andza niye dərmak. Tə tsik mə walaŋ tay, tə gwad: «Kə təma tay ha siye i ndo hay tuk na, a sla faya mətəme ha gər ngay təbədew?»

<sup>32</sup> Kəriste, Bəy i Israyel hay mə mbəzlaw abəra ka mayako mazləlmbada eye anəkə! Tadə nəmaa ngatay kə mbəzlaw abəra ka mayako mazləlmbada eye na, nəmay nəmaa dzaliye ha ka nənğeye.»

Ndo neheye ta dar tay ka tsakay i Yesu aye tə tsada na Yesu dərmak.

\* 15:28 Ezay 53.12.

*Məmäte i Yesu**Mata 27.45-56; Luka 23.44-49; Yuhana 19.28-30*

<sup>33</sup> Magər̄həpat a ge na, ləvoŋ a ge ka dala niye tebiye tekədəgəm. A ge na, hus a bəre mahkar i huwa.

<sup>34</sup> Ta bəre mahkar eye niye na, Yesu a wuda ta magala kəlerra, a gwad: «*Eluya, Eluya, lama sabaktani?*» Andza məgwede: «Mbəlom ga, Mbəlom ga, ka gər ga na, hərwi mey?†»

<sup>35</sup> Siye i ndo neheye ka təv aye niye tə tsəne na, tə gwad: «Pum zləm təday, faya ma zaleyə a Eliya!»

<sup>36</sup> Tsa na, ndo nəte mə walaŋ tay niye, a hway, a ye a zlaw wuye kofkoffa. A tələka ha a wuye andaya guyakaka, wu niye a rah a dəma. Tsa na, a hak na ka gwavəkw zəbol eye, a pay naha ka bazlam a Yesu ada mā dəvətse abəra mə dəma wu niye. Ndoweye niye a gwad: «*Ŋgatay, zəbakwa faya təday, aza Eliya ma deyeweye mambəzla ahaya daw?*»

<sup>37</sup> Ane tuk na, Yesu a wuda ta magala kəlerra. Tsa na, a mət.

<sup>38</sup> A mət na, kwayaŋŋa peteked nakə a ŋgəna ha gay i mədəslay ha gər a Mbəlom sulo aye, a ta ka bo bəra sulo tsanŋa kwa abəra mə gəma hus ka dala.

<sup>39</sup> Bagwar i sidzew i Roma hay, neŋgeye andaya malətsa eye kame i Yesu, Yesu a mət ma kəkay na, a ŋgatay. Tsa na, a gwad: «*Ta dedək, ndo nakay na, Wawa i Mbəlom!*»

<sup>40</sup> Ŋgwas wuray hay andaya ka təv eye niye dərmak. Nəteye dəreŋ faya ta zəbiye naha faya. Mə walaŋ tay niye andaya na, Mari nakə a yaw ma gəma i Magədala aye, Salome ada ta Mari may i Yakuba nakə gawla aye, may tay ta Zozes.

<sup>41</sup> Nəteye na, ta zəŋgalawa na Yesu ada tə gaway məsler ahəl nakə Yesu, neŋgeye ka dala i Galile aye. Ka təv eye niye na, siye i ŋgwas hay andaya haladzay. Nəteye, tə yaw ka bo dziye tage Yesu abəra ma Zerozelem.

*Tə pa na Yesu a tsəvay**Mata 27.57-61; Luka 23.50-56; Yuhana 19.38-42*

<sup>42</sup> Huwa 6a ka mbərəm mäge tsiy. Pat eye niye na, pat mələve bo i Yahuda hay, andza məgwede pat məhəne mə gay i pat i mazəzukw bo.

<sup>43</sup> Ta huwa eye niye na, ndo wuray tə zalay Yusufa a yaw. Neŋgeye ndo i gəma i Arimate. Yusufa na, neŋgeye nəte mə walaŋ i bagwar i ndo mäge sariya dərmak. Neŋgeye dərmak faya ma həbiye Bəy i Mbəlom. A gəs dərev ka dzədzar bay, a ye a gay i Pilat mata tsətsahaw mədahan i Yesu.

<sup>44</sup> Pilat a tsəne 6a Yesu kə mət na, a gay wadəŋ wadəŋ. Tsa na, a zalay a bagwar i sidzew niye. A tsətsah faya abəra, a gwadəy: «*Yesu a mət na, kə ndza haladzay daw?*»

<sup>45</sup> Ma dəba eye bagwar i sidzew niye a mbədəy faya na, tsa na, a vələy tsəved a Yusufa ka məzle mədahan i Yesu.

<sup>46</sup> Yusufa a ye a səkəməw rəkəwat. A səkəməw na, a məw a mbəzla ahaya mədahan i Yesu abəra ka mayako mazləlmbada eye. Tsa na, a mbəkwa na mədahan a dəma. A zla na a ye, a pa na a tsəvay. Tsəvay niye na, tə la ka geseh ka təv nakə sərpalahha aye. A pa na a dəma na, a bədəŋgwalaw faya beber bagwar eye ka madərəzl na tsəvay niye.

<sup>47</sup> Mari i Magədala ta Mari may i Zozes na, faya ta zəbiye ka təv nakə tə pa na Yesu aye.

---

† 15:34 Dəmes hay 22.2.

## 16

*Yesu a lətsew abəra ma tsəvay*

*Mata 28.1-8; Luka 24.1-12; Yuhana 20.1-10*

<sup>1</sup> Pat i mazəzükw bo a ye abəra mə dəma na, Mari i Magədala, Mari may i Yakuba ta Salome, ti ye ta səkəm mal hunḡa eye, hərwi a satay məwetse ka mədahaḡ i Yesu.

<sup>2</sup> Pat i luma i sidzew i mekedə ɲgwas neheye ti ye ka me tsəvay. Tə husa na, pat faya ma tsaraweye tərɗassa.

<sup>3</sup> Ahəl nakə faya ta diye na, ta tsətsah ka bo mə walaḡ tay, tə gwad: «Mata bəɗəḡwalakway na beber abəra ka me i tsəvay na, way?»

<sup>4</sup> Tə ndisil naha na, ta zəba dərə. Ta zəba dərə na, tə ɲgatay a beber niye bagwar eye ta dərəzl ha ka tsəvay aye na, ɓa məbəɗəḡwala eye faya abəra, madzaka eye ka tsakay tsiy.

<sup>5</sup> Ti ye naha na, tə fələkwa a tsəvay niye. Ti ye na tə ɲgatay a ndo gawla aye. Neḡgeye mandza eye ta diye i həlay i mənday. Ndoweye niye na, tə peteked kwedek kwedek eye ka bo. Peteked eye niye faya na, zəbol eye təzl. ɲgwas niye hay tə ɲgatay andza niye ta dzədzar slaɓ slaɓ.

<sup>6</sup> Ane tuk na, a gwadatay: «Kā dzədzarum bay. Faya ka pələmeye na, Yesu ndo i Nazaret, neḡgeye nakə ta dar na ka mayako mazləmbada eye. Neḡgeye andaya kahaḡ bay, kə mbəlaw abəra ma mədahaḡ. Ehey! Zəbum, təv nakə tə həna ha faya aye na, anaḡ.

<sup>7</sup> Dum anəke ta tsikummatay faya a gawla ɲgay hay ada kə dūmay ha a Piyer lele. Gwadumatay na, ma lahakumeye a Galile. Ka ɲgatumeye mə dəma andza nakə a tsikakum eye.»

<sup>8</sup> Tə tsəne andza niye na, tə ndohwaw abəra na, ta hway dərəḡ abəra ka təv i tsəvay niye. Ta hway na, hərwi zluwer a gatay, faya ta dzədzariye. Ta təkəray a ndəray kwa tsekweḡ bay tebiye hərwi zluwer a gatay.

*Yesu a bəzatay ha bo a gawla ɲgay hay*

*Mata 28.9-10,16-20; Luka 24.36-49; Yuhana 20.11-23; Məsler hay 1.6-8*

<sup>9</sup> Pat i luma i sidzew pərik i mekedə na, Yesu a lətsew abəra ma mədahaḡ. A lətsew na, a bəzay ha bo kurre a Mari nakə a yaw abəra ma Magədala aye. Neḡgeye na, ɲgwas nakə Yesu a həhar faya abəra fakalaw hay tasəla aye.

<sup>10</sup> A ye a təkəratay a ndo neheye tə ndzawa tage Yesu aye. A ye naha na, faya ta tuwiye hərwi mədahaḡ i Yesu. A təkəratay wu nakə a ge bo tə neḡgeye.

<sup>11</sup> Tə tsəne wu nakə a tsikatay aye, a gwadatay: «Yesu na, kə mbəlaw abəra ma mədahaḡ, neḡ na, na ɲgatay bəna mey na!» Ndo neheye ta təma bazlam ɲgay niye a tsikatay aye bay.

<sup>12</sup> Ma dəba eye na, Yesu a mbəda ha bo ɲgay wal a bəzatay ha bo a gawla ɲgay hay sulo. A bəzatay ha bo na, ahəl nakə nəteye ka tsəved faya ta diye a gəma aye.

<sup>13</sup> Ndo niye hay sulo aye tə maw a Zerozelem. Tə maw na, ta təkəray wu nakə tə ɲgatay aye a siye i gawla i Yesu hay. Nəteye ta təmatay na bay ɲgway huya.

<sup>14</sup> Ma dəba eye sa na, Yesu a bəzatay ha bo a gawla ɲgay hay kuro gər eye nəte. A bəzatay ha bo na, ahəl nakə nəteye faya ta ndiye daf aye. Tsa na, a gatay me hərwi mədzele gər tay nakə andaya bay aye, ada hərwi ta dzala ha ka wu nakə ndo neheye tə tsikatay kurre, tə gwadatay: «Nəmaa ɲgatay a Yesu kə lətsew abəra ma mədahaḡ» aye na, ta dzala ha bay.

<sup>15</sup> Tsa na, a gwadatay: «Anəke na, dum ka kokway i məndzibəra tebiye. Dum ha Labara ɲgwalak eye a ndo zezeḡ tebiye ka məndzibəra.

<sup>16</sup> Ndo nakə kə tsəne ada kə dzala ga ha tə dərev nəte ada ta dzəhu6 ha a yam aye na, ma təmiye. Ndo nakə kə dzala ga ha bay aye na, Mbəlom ma ta giye faya sariya

<sup>17</sup> Ta ta səriye ha ndo neheye ta dzala ga ha ta dedek na, ma kəkay? Nəteye na, ta sliye faya mahəhere fakalaw abəra mə bo i ndo tə məzele ga. Ta tsikiye me tə bazlam i gəma hay wal wal.

<sup>18</sup> Kwa tadə ta gəs dədœ tə həlay, kwa tə sa muwar na, ma gateye wuray kwa tsekwen bay tebiye. Ta piye həlay ka ndo i dəvats hay na, ta mbəliye.»

*Yesu a tsal a Mbəlom*

*Luka 24.50-53; Məsler hay 1.9-11*

<sup>19</sup> Yesu Bəy Maduwenj a tsikatay andza niye na, a tsal ηgway a mbəlom. A ye na, a ndza tə həlay i mənday i Mbəlom.

<sup>20</sup> Gawla ηgay hay dərmak ti ye mata dā ha bazlam ηgwalak eye niye Yesu a tsikatay aye kwa a ηgay. Bəy Maduwenj a dzənawa tay ha ada a vəlawatay gədanj ka mäge wu neheye a ge masuwayanj aye. Maa dā ha tə tsik bazlam i Mbəlom ta gədanj i Yesu na, masuwayanj nakə tə gawa aye.

## Ngwalak i bazlam nakə

### Luka a watsa aye Məfələkwe

Luka a da ha Yesu na, neŋgeye ndo mətəme ha ndo nakə Mbəlom ma sləratayawe ye a ndo i Israyel hay aye. Ane tuk na, neŋgeye ndo mətəme ha ndo i məndzibəra hay tebiye. Məsəfəre i Mbəlom a zalay a Yesu hərwi ada mā dātay ha labara i məŋgwese a mətawak hay. Labara eye nakay na, labara i mawuɗe bo hərwi ndo i mezeleme hay wal wal tebiye ada labara i məŋgwese. A dazlay na, a tsik ka məmaw i Yesu, ka mede i Yesu a mbəlom.

Ka ndzay a gər a bazlam i Luka mə Mata, ma Markus ada ma Yuhana. Ka da ha ka gər i məwe Yuhana madzəhuɓe ndo a yam ada ka gər i məwe Yesu.

Madazlay 1.1-4

Məwe ta mægəle i Yuhana tə Yesu 1.5–2.52

Bazlam i Yuhana nakə a tsik aye 3.1-20

Madzəhuɓe i Yesu a yam tə masəpete 3.21-43

Məsler ta labara i Yesu ma Galile 4.14–9.50

Yesu a lətse abəra ma Galile a ye a Zerozelem 9.51–19.27

Maduk i duk i məhəne i Yesu ka məndzibəra 19.28–23.56

Mələtsew, mabəz ha bo tə mede i Yesu a mbəlom 24.1-53

<sup>1</sup> A nəkar Tiyofil ŋgwalak i ndo, ndo hay haladzay 6a ta wəl ha gər tay mawetse labara nakə Yesu a ge mə walaŋ may aye.

<sup>2</sup> Tə watsa na, wu nakə nəteye tə tsəne abəra ka ndo neheye tə da ha bazlam i Mbəlom aye. Nəteye neheye na, ta ŋgatay tə dərə tay kwa ka madazlay ŋgay aye.

<sup>3</sup> Aya! Neŋ dərmaƙ a seŋ məwatsaka naha ka gər i bazlam eye nakay, hərwi na pəla na bəzay i bazlam nakay kwa ka madazlay ŋgay eye.

<sup>4</sup> Anəke na, nəkar dərmaƙ ka sliye faya məsəre ha bazlam nakay ta tətikaka aye na, dedek.

#### *Gawla i Mbəlom a yaw a da ha məwe i Yuhana*

<sup>5</sup> Ahəl nakə Herod neŋgeye bəy ka dala i Yahuda aye na, ndowe ye andaya tə zalay Zakari. Neŋgeye na, gwala i Abiya, ndo məvəlay wu a Mbəlom aye. Məzele i ŋwas ŋgay na, Elizabet. Neŋgeye dərmaƙ na, gwala i Aron bagwar i ndo məvəlaway wu a Mbəlom.

<sup>6</sup> Nəteye salamay tay eye kame i Mbəlom na, ndo lele eye hay. Wu neheye Mbəlom a tsik aye tə bazlam mapala eye na, tə pay bəzay tə mətsehe lele.

<sup>7</sup> Ane tuk na, wawa tay andaya bay. Hərwi Elizabet na, a wa bay. Dəlay eye. Sa na, nəteye guram eye tsiy.

<sup>8-9</sup> Anəke na, həlay i ndo neheye tə zalatay Abiya hay aye kə sla hərwi məfəƙay naha wu a Mbəlom. Andza nakə ndo neheye tə vələway naha wu a Mbəlom tə pawa faya bo aye na, tə ge duk a way. Duk a way nakə tə ge aye na, a dəd ka Zakari. Mata fəƙay naha wu ma təv niye tsədəŋŋa eye mə gay i mədəslay ha gər a Mbəlom na, neŋgeye. Tsa na, a fələkwa a təv niye mata fəƙay naha wu a Mbəlom.

<sup>10</sup> Ahəl nakə Zakari faya ma fəƙay naha wu a Mbəlom mə gay aye na, ndo hay haladzay ma bəra faya ta dūwuliye me.

11 A hələy niye na, gawla i Mbəlom a yaw a bəzay ha bo a Zakari. A lətse ta hələy i mənday i təv nakə tə fəkaway naha faya wu a Mbəlom aye.

12 Zakari a nğatay na, a dzədzar haladzay, zluwer a gay.

13 Ane tuk na, gawla i Mbəlom niye a gwaɗay: «Zakari, kâ dzədzar bay. Ba Mbəlom kə tsəne maɗuwule me yak. Elizabet, nğwas yak ma ta wakeye wawa haslaka eye. Ka ta zəleye Yuhana.

14 Dərev yak ma ta nğwasiye haladzay. Pat i məwe nğay na, ndo hay haladzay ta nğwasiye hərwi nğay.

15 Nəngeye na, ma ta təriye bagwar eye, ndo məgay məsler a Bəy Maduweŋ. Dada ma ta siye guzom bay. Kwa wu nakə makwasa eye na, ma ndzakiye bay. Məsəfəre Tsədəŋŋa eye ma ndziye faya kwa mə hud i may nğay.

16 Ma ta matay ahaya İsrayel hay haladzay ka təv i Bəy Maduweŋ tay Mbəlom.

17 Maa lahayaw madayaw kame a Bəy Maduweŋ na, nəngeye. Ma tsikateye me a ndo hay ta məzlaɓ bagwar eye andza i Eliya hərwi ada bəba hay tã sər bo ta wawa tay hay. Ma matay ahaya ndo neheye ta rəhay ha gər a Mbəlom bay aye ka təv i Mbəlom. Ma təriye tay ha ndo nğwalak eye hay. Ma ta tsətsaliye tay ha ndo neheye nəteye maləva bo eye hərwi Bəy Maduweŋ aye.\*»

18 Ane tuk na, Zakari a gwaɗay a gawla i Mbəlom: «Na səriye ha wu nakay ka tsiken aye dedek na, kəkay? Neŋ na, ɓa guram eye, nğwas ga dərmak na, guram eye tuk na, kəkay?»

19 Gawla i Mbəlom a mbəɗay faya, a gwaɗay: «Neŋ Gabəriyel. Neŋ na, ka təv i Mbəlom. A slərə ga ahaya mətsikaka bazlam nakay ada nã zlakaw Labara Nğwalak eye.

20 Ane tuk na, ka dzala ha ka bazlam nakay bay sa na, wu nakay ma giye bo ka səriye mətsike me bay hus a pat nakə ta wiye na wawa niye aye.»

21 Ndo neheye faya ta həbiye Zakari ma bəra aye na, a gatay wadəŋ wadəŋ. Tə gwad: «Zakari kə yaw abəra bay, kwa meeneŋ na, hərwi mey?»

22 Zakari a yaw abəra na, a sla faya mətsike me bay. Tsa na, ndo neheye ma bəra aye tə sər wu ka bəzay ha bo a Zakari mə gay. A tsikatay me na, tə hələy tsa. Nəngeye huya mandək eye.

23 Hələy i məge məsler i Zakari mə gay i Mbəlom a ndəv na, a ye a mətagay.

24 Ma dəba i kiye tsakway na, wawa a dəɗay a hud a Elizabet. Kiye zlam na, a nğahawa bo mə gay. A gwad mə dərev nğay:

25 «Anəke na, Bəy Maduweŋ kə ngeteŋ. Kə vələŋ wawa. Ndo hay ta nğwasiye fagaya sa bay.»

### *Gawla i Mbəlom a da ha məwe i Yesu*

26 Kiye a yay a Elizabet məkwa na, Mbəlom a slər gawla nğay Gabəriyel a gəma wuray tə zalay Nazaret ka dala i Galile.

27 A slər ha na, a gay i dem eye andaya mədel i ndo wuray tə zalay Yusufa gwala i Bəy Davit. Tə zalay a dem eye niye na, Mari.

28 Gawla i Mbəlom niye a fələkwa a gay i Mari, a ye naha a gwaɗay: «Na tsikaka me Mari, Bəy Maduweŋ kə gaka nğwalak.»

29 Mari a tsəne andza niye na, a dzədzar a gwad mə dərev nğay: «Mətsike me niye na, andza məgwede mey?»

30 Gawla i Mbəlom a gwaɗay: «Kâ dzədzar bay Mari, Mbəlom a wuɗa kar.

31 Wawa ma dədəkeye a hud. Ka ta wiye wawa niye na, haslaka eye. Ka ta zəleye Yesu.

\* 1:17 Zəba ma Malasi 3.23-24.

<sup>32</sup> Nenḡeyey na, ma ta t̄ariye bagwar eye. Ta ta zaleyey Wawa i Mb̄alom Fetek m̄a ḡama. B̄ay Maduweḡ Mb̄alom ma t̄ariye ha b̄ay bagwar eye andza b̄aba t̄ate ḡgay Davit:

<sup>33</sup> Nenḡeyey ma ta l̄aviye tay ha Israyel hay ka tor eye. B̄ay ḡgay na, ma nd̄aviye bay.»

<sup>34</sup> Mari a gwad̄ay a gawla i Mb̄alom niye: «Wuyey ma ta giyey bo na, k̄akay? Neḡ na, na s̄er zal zuk bay tuk na, k̄akay!»

<sup>35</sup> Gawla i Mb̄alom a mb̄ed̄ay faya: «M̄as̄af̄are Ts̄ad̄anḡa eye ma mb̄azlaweyey fakaya. Ḡad̄anḡ i Mb̄alom Fetek ma nd̄ziyey fakaya andza mezek. Yawa! Wawa niyey ka ta wiyyey na, ta zaleyey Ts̄ad̄anḡa, Wawa i Mb̄alom.

<sup>36</sup> Z̄aba dem i b̄aba yak Elizabet kwa nenḡeyey guram eye b̄abay na, an̄ake kiyyey k̄a yay m̄akwa.

<sup>37</sup> H̄arwi wuray a zay ḡad̄anḡ a Mb̄alom t̄abey.»

<sup>38</sup> Tsa na, Mari a gwad̄ay a gawla i Mb̄alom: «Neḡ ndo i m̄asler i B̄ay Maduweḡ. M̄a ge bo andza nak̄a ka tsik aye.»

Tsa na, gawla i Mb̄alom a ye ḡgway.

### *Mari a ye a gay i Elizabet*

<sup>39</sup> Ma d̄aba i m̄andzey tsekweḡ na, Mari a l̄atsey a ye ta b̄as̄ey a ḡama eye andaya m̄a mah̄amba i Yahuda.

<sup>40</sup> A ye na, a gay i Zakari. A ye naha a nd̄isl na, a f̄al̄akwa a gay. A tsikay me a Elizabet.

<sup>41</sup> Elizabet a ts̄an̄ey m̄atsik̄ey me i Mari na, wawa a hats m̄a huḡ ḡgay. M̄as̄af̄are Ts̄ad̄anḡa eye a mb̄azlaw ka Elizabet.

<sup>42</sup> Tsa na, Elizabet a wuda, a gwad̄: «N̄akar na, Mb̄alom k̄a pa fakaya ḡgama a zey siyyey i ḡgwas hay tebiyyey. ḡgama m̄a nd̄za ka wawa niyyey ka wiyyey.

<sup>43</sup> May i B̄ay Maduweḡ ga a yaw ka t̄av ga na, k̄akay! Neḡ t̄eday na, way!

<sup>44</sup> Na gwad̄ ka ḡgatay ba! Ah̄al nak̄a ka tsik̄ey me ayyey na, wawa a b̄al ta m̄anḡwesey eye m̄a huḡ ga.

<sup>45</sup> N̄akar na, d̄arev yak m̄anḡwasa eye h̄arwi wu nak̄a B̄ay Maduweḡ a tsik̄ey ayyey na, ka t̄ama, ma giyyey bo!»

<sup>46</sup> Tsa na, Mari a gwad̄:

«Na zambad̄eyey a B̄ay Maduweḡ t̄a d̄arev ga peteh.

<sup>47</sup> D̄arev ga k̄a ḡgwas haladzay h̄arwi Mb̄alom nak̄a a t̄ama ga ha ayyey.

<sup>48</sup> Ka z̄aba fagayay tsekweḡ m̄a walanḡ i ndo neheyyey neḡ ndo i m̄asler ḡgay.

Ndo neheyyey an̄ake ayyey ta ndo neheyyey ta ta wiyyey tay ha ayyey na, ta gwed̄en̄eyey  
“N̄akar na, d̄arev yak m̄anḡwasa eye.”

<sup>49</sup> H̄arwi Mb̄alom bagwar eye k̄a ge wu nak̄a leley ayyey h̄arwi ga.

Nenḡeyey na, Mb̄alom ts̄ad̄anḡa eye.

<sup>50</sup> Nenḡeyey na, ḡgwalak ḡgay d̄ada a nd̄av t̄abey.

Ndo neheyyey ta r̄ahay ha ḡer ayyey na, ḡgwalak ḡgay ma nd̄ziyey huyay ta n̄ateyyey.

<sup>51</sup> Ka b̄az ha ḡad̄anḡ ḡgay,

ka h̄ahar tay ha ndo neheyyey t̄a d̄aslay ha ḡer a bo tay ayyey.

<sup>52</sup> Ka h̄ahar tay ha b̄ay hay ab̄ara ka t̄av m̄andzey i b̄ay tay hay.

K̄a v̄elatay ḡad̄anḡ a ndo i m̄atawak hay.

<sup>53</sup> Ndo neheyyey may a gatay ayyey na, k̄a v̄elatay wu m̄anday.

Ndo i mezeleme hay na, ka h̄ahar tay ha.

<sup>54</sup> Ki yaw madz̄an̄ey tay hay Israyel hay, ndo i m̄asler ḡgay hay.

Mb̄alom na, k̄a m̄atsa ha ḡer ta ḡgwalak ḡgay bay.

<sup>55</sup> K̄a ge andza nak̄a a tsikatay a b̄aba t̄ate kway hay ah̄al niyyey ayyey.

A tsikay a Abraham ada a gwala i Abraham hay tebiye ka tor eye.»

<sup>56</sup> Mari a ndza mə gay i Elizabet kiye mahkar. Tsa na, a ye a mətagay.

### *Məwe i Yuhana*

<sup>57</sup> Anəke na, kiye i Elizabet kə sla məwe. A wa wawa hasləka eye.

<sup>58</sup> Ndo ɲgay hay ta ndo i məged ɲgay hay tə tsəne Mbəlom kə gay ɲgwalak a Elizabet na, ti ye mata ɲgwese ka bo dziye.

<sup>59</sup> Wawa a həna tsamahkar na, ndo hay ti yaw mata dase na wawa niye. A satay həbe məpe faya məzele na, Zakari, tə məzele i Bəba ɲgay.

<sup>60</sup> Ane tuk na, may i wawa niye, a gwadətay: «A'ay! Ta zaleyə na, Yuhana.»

<sup>61</sup> Tə gwadəy: «Məzele andaya andza niye ma gwala yak bay tuk na, kəkay!»

<sup>62</sup> Tsa na, ta tsətsah ka bəba ɲgay wulək wulək tə həlay. Tə gwadəy: «A saka məpe məzele ka wawa na, way?»

<sup>63</sup> Zakari a tsətsah fataya palalam nakə tə watsawa faya aye. Tə zlayaw. Tsa na, a watsa: «Məzele ɲgay na, Yuhana.» Tsa na, a gatay wadəɲ wadəɲ tebiye tay eye.

<sup>64</sup> Kwayaɲɲa bazlam i Zakari a həndək ka mətsike me. Tsa na, a zambadəy a Mbəlom.

<sup>65</sup> Ndo i məged hay tebiye ta dzədzar. Ndo i gəma niye hay tebiye hus a mahəmba i Yahuda tə tsikawa faya.

<sup>66</sup> Kwa way a tsəne bazlam niye na, tə dzalawa faya mə gər tay, tə gwadəwa: «Wawa nakay ma ta təriye na, mey?» Ta dedek, gədaɲ i Bəy Maduweɲ ka gər ɲgay.

### *Zakari a zambadəy a Mbəlom*

<sup>67</sup> Məsəfəre Tsədəɲɲa eye a mbəzlaw ka Zakari, bəba i wawa niye. Tsa na, a da ha, a gwad:

<sup>68</sup> «Zambadəkway a Bəy Maduweɲ kway Mbəlom i Israyel hay.

Neɲgeye kə mbəzlaw a walaɲ kway hərwi məmbəle kway hay.

<sup>69</sup> Neɲgeye kə slərakwayaw ndo gədaɲ eye hərwi mətəme kway hay.

Neɲgeye na, gwala i Davit ndo i məsler i Mbəlom.

<sup>70</sup> Bazlam nakay na, Mbəlom 6a kə tsikatay a ndo məde ha bazlam ɲgay tsədəɲɲa eye hay ahəl niye.

<sup>71</sup> A gwad na, ma ta təmiye kway ha abəra mə həlay i ndo i vərəm kway hay, ada mə həlay i ndo neheye tebiye tə nakway dərə aye.

<sup>72</sup> Kə gatay ɲgwalak ɲgay a bəba kway hay.

Ma mətsiye ha gər ta dzam nakə a 6ar eye bay.

<sup>73</sup> Mbəlom 6a ka mbərəm məmbadəy a bəba tətə kway Abraham.

<sup>74</sup> A gwad: Ma ta təmiye kway ha abəra mə həlay i ndo i vərəm kway hay na, hərwi ada kə sləkwa faya məgay məsler tə madzədzar eye sa bay.

<sup>75</sup> A ge andza niye na, hərwi ada kə tərakwa ndo ɲgay hay.

Ka tərakweye na, ndo ɲgay tsədəɲɲa eye hay huya ma məndze kway.

<sup>76</sup> Nəkar na, wawa ga, ta ta zalakeye na, ndo məde ha bazlam i Mbəlom Fetek, hərwi nəkar na, ka laheye kame a Bəy Maduweɲ, ka lambadəye na tsəved.

<sup>77</sup> Ka ta tsikatəye a ndo ɲgay hay ma deyeweye mətəme tay ha.

Ma ta pəsətay ha mənese tay hay.

<sup>78</sup> Mbəlom kway na, ɲgwalak ɲgay a ndəv bay.

Andza niye, dzaydzay ɲgay ma dəvakweye andza pat nakə faya ma tsaraweye.

<sup>79</sup> Tsa na, ma dəvatəye dzaydzay a ndo neheye ma mezek i mədahan aye.



Ma lakiye kway ka tsəved i zay.»

<sup>80</sup> Yawa! Yuhana a gəl na, metsehe ŋgay a sakah kame kame. A lətse a ye a kəsaf. A ndza mə dəma hus a pat nakə a bəzatay ha bo parakka a Israyel hay aye.

## 2

### *Məwe i Yesu Mata 1.18-25*

<sup>1</sup> Ahəl niye tə wa Yuhana madzəhube ndo a yam na, Agustus nengeye bəy i Roma. Anəke na, a gwadətay a ndo hay tā pasla ndo hay ka dala ŋgay tebiye.

<sup>2</sup> Nakay na, makurre i məpesle ndo nakə tə pasla ahəl niye Kiriniyus a ləwawa gəma i Siri ka dala i Roma aye.

<sup>3</sup> Kwa way a ye mata wetse məzele ŋgay na, ma gəma ŋgay.

<sup>4</sup> Andza niye, Yusufa nengeye ma ndziye ma gəma i Nazaret ka dala i Galile. A tsəne na, a ye ka dala i Yahuda ma gəma nakə tə zalay Betelehem aye. Gəma nakə tə wa mə dəma bəba tate ŋgay Davit aye.

<sup>5</sup> A ye na, ta Mari mədel ŋgay tə bo sulo eye mata wetse məzele tay.

<sup>6</sup> Ahəl nakə nəteye ma Betelehem aye na, həlay i məwe wawa i Mari kə sla.

<sup>7</sup> A wa malkwara ŋgay niye na, hasləka eye. A mbuza na a peteked, a həna ha a təv mände wu mənday i gənaw hay hərwi ta huta təv mə gay i mbəlok hay bay.

### *Gawla i Mbəlom hay ta bəzatay ha bo a ndo mətsəkure gənaw hay*

<sup>8</sup> Ma gəma niye na, ndo mətsəkure gənaw hay andaya tə hənawa mə pesl, tə tsəkurawa gənaw tay hay ta həvad.

<sup>9</sup> Gawla i Mbəlom a mbəzlaw a bəzatay ha bo. Təv niye nəteye mə dəma aye na, a dəv dzaydzay ta gədan i Bəy Maduwej. Tsa na, ndo mətsəkure gənaw niye hay ta dzədzar.

<sup>10</sup> Ane tuk na, Gawla i Mbəlom niye a gwadətay: «Kā dzədzarum bay! Na zlakumaw na, Labara ŋwalak eye. Ndo hay haladzay ta ŋgwasiye hərwi bazlam nakay.

<sup>11</sup> Bəgom ta həvad nakay ta wakum ndo mətəme kurom ha ma Betelehem, ma gəma i Davit. Nengeye na, Kəriste, Bəy Maduwej.

<sup>12</sup> Dum ta zəbumaw faya. Ka ŋgatumeye a wawa eye. Ka sərumeye ha nengeye na, hərwi mambuza eye mə peteked. Ma həniye ma təv mənday wu i gənaw hay.»

<sup>13</sup> Kwayanə, gawla i Mbəlom hay haladzay tə yaw ka təv i gawla i Mbəlom niye ta zambaday a Mbəlom tə gwad:

<sup>14</sup> «ŋgama mâ təra mə mbəlom məgəma, ka gər i ndo hay tebiye.

Zay mâ təra ka məndzibəra mə walaŋ i ndo neheye Mbəlom a wuda tay ha aye.»

<sup>15</sup> Tsa na, gawla i Mbəlom hay ti ye wu tay a mbəlom. Ti ye wu tay na, ndo mətsəkure gənaw hay tə gwad mə walaŋ tay: «Lətsakwa, takwa hus a Betelehem ta zəbakwaw ka wu nakə a ge bo aye, nakə Bəy Maduwej a dəkway ha aye.»

<sup>16</sup> Ti ye ta bəse a Betelehem. Tə ndisl naha a dəma na, tə ŋgatay a Mari ta Yusufa ada ta wawa ndəriz niye mahəna eye ma təv mənday wu i gənaw hay.\*

<sup>17</sup> Tə ŋgatay andza niye na, ta təkəratay wu nakə gawla i Mbəlom a tsikatay ka gər i wawa niye aye.

\* 2:16 Zəba mə Luka 2.7.

18 Kwa way a tsәне wu nakә ndo mәtsәkure gәnaw hay ta tәkәr aye na, a gatay hәrбaбәkka.

19 Mari na, wu neheye tә tsik aye na, a pa na tebiye a gәr a dzalawa faya.

20 Tsa na, ndo mәtsәkure gәnaw hay tә maw wu tay. Tә dәslyay ha gәr a Mbәlom ta zambaday hәrwi wu nakә tә tsәне ada tә ngatay aye na, kә ge bo andza nakә tә tsikatay aye.

21 Mәhәne tasәla a ge matsamahkar eye na, hәlay i mәdәse wawa kә sla. A pa faya mәzele Yesu. Mәzele niye na, mәzele nakә gawla i Mbәlom a tsikay a Mari ahәl niye kә huta hud zuk bay aye.

*Yusufa ta Mari ti ye ha Yesu a Zerozelem*

22 Hәlay i mәbere bo tay ka dәre i Mbәlom kә sla andza bazlam i Mbәlom mapala eye nakә Musa a watsa aye. Andza niye, Yusufa ta Mari tә zla wawa, ti ye ha a Zerozelem mata bәzay ha a Bәy Maduweҗ,

23 hәrwi mawatsa eye mә dәrewel i Musa na: «Malkwara i wawa haslәka eye na, i Mbәlom.»†

24 Ada andza nakә mawatsa eye mә dәrewel i Musa na, ti ye tә vәlay maydagwar sulo kәgәbay bodobodo sulo a Mbәlom.‡

25 Yawa! Ndoweye andaya ma Zerozelem, mәzele ngay Simeyоҗ. Neҗgeye na, ngwalak i ndo, ka tәma bazlam i Mbәlom lele. Faya ma hәbiye ndo mәtәme tay ha Israyel hay. Simeyоҗ na, Mәsәfәre Tsәdәnҗna eye ka neҗgeye.

26 Mәsәfәre Tsәdәnҗna eye бa kә tsikay, a gwaday: «Ka ta mәtiye na, ka ngateye a Kәriste nakә Bәy Maduweҗ ma slәraweye taday.»

27 Anәke na, Simeyоҗ a ye a gay i mәdәslyay ha gәr a Mbәlom ta gәdәnҗ i Mәsәfәre i Mbәlom. Ahәl niye na, bәba i Yesu hay ti ye naha tә fәlәkwa a gay ta wawa mәge andza nakә bazlam i Musa mapala eye a tsik aye.

28 Tsa na, Simeyоҗ a zla wawa niye a hәlay, a zambaday a Mbәlom, a gwad:

29 «Bәy Maduweҗ ga, anәke na, gәr ha ndo i mәsler yak mә ye ngway, mә mәt tә zay, hәrwi ka ge wu nakә ka tsik aye.

30 Na ngatay tә dәre ga a ndo mәtәme ha ndo yak nakә ka slәraw aye.

31 Ka lәva ha bo na, hәrwi ndo hay tebiye.

32 Ndo nakә ka slәraweye na, neҗgeye na, dzaydzay nakә ma dәvateye a ndo hay tebiye ka mәndzilbәra ada neҗgeye ma vәlateye mәzlaб a ndo yak hay Israyel hay.»

33 Bәba ta may i Yesu na, a gatay hәrбaбәkka hәrwi bazlam i Simeyоҗ niye a tsik aye.

34 Tsa na, Simeyоҗ a pa fataya ngama i Mbәlom. A gwaday a Mari may i wawa niye: «Wawa nakay na, Israyel hay haladzay ta dәdiye faya. Andza niye, ndo hay haladzay ta maweye ka tәv i Mbәlom hәrwi ngay. Ma ta datay ha mәsler i Mbәlom na, neҗgeye. Ane tuk na, ndo hay ta kәrahiye na.

35 Wu nakә mangaha eye ma mәdzal gәr kwa i way i way na, ma bәziye ha parakka. Nәkar dәrmak Mari, dәretsәtseh ma ta ngәniye ha ka bo bәra dәrev yak andza maslalam.»

36 Ngwas wuray andaya guram eye ketef ketef, mәzele ngay Anna. Neҗgeye na, ndo mәde ha bazlam i Mbәlom. Dem i Fanuwel gwala i Aser. Ahәl nakә neҗgeye dem eye na, a ye a zal. A ndza mә zal mәve tasәla na, zal ngay niye a mәt.

37 Tsa na, ki ye a zal sa bay, a ndza ngway madәgway i ngwas eye. Mәve ngay na, kuro kuro tsamahkar gәr eye fad. Ma mәndze ngay na, a gaway mәsler a

† 2:23 Madayaw abәra ma Ezipt 13.2, 12. ‡ 2:24 Levitik 12.8.

Mbəlom. A yawa a gay i mədəslay ha gər a Mbəlom ta həvad kwa ta həpat pat pat. A dūwulaway me a Mbəlom. A gawa daliyam.

<sup>38</sup> A ye a gay i mədəslay ha gər a Mbəlom na, ahəl nakə Simeyən faya ma tsikiye me mba aye. A ye naha, a gay naha sisœ a Mbəlom. A tsik ka wawa niye a ndo neheye faya ta həbiye madayaw i ndo mətəme ha ndo nakə ma tamiye ha Zerozelem aye.

<sup>39</sup> Yusufa ta Mari ta ndəv ha mäge wu nakə mawatsa eye mə bazlam i Mbəlom mapala eye na, ta mbəda gər a gəma tay a Nazaret ka dala i Galile.

<sup>40</sup> Wawa niye faya ma gəliye na, gədan tə metsehe ŋgay a səkah kame kame, ŋgama i Mbəlom tə neŋgeye.

### *Yesu ta madugula i Yahuda hay*

<sup>41</sup> Ka məve na, Yusufa ta Mari ti yawa a magurlom i Pak a Zerozelem.

<sup>42</sup> Yesu a ge məve kuro gər eye sulo na, ti ye dziye ta bəba ŋgay hay andza nakə ti yawa aye.

<sup>43</sup> Magurlom a ndəv na, tə maw a mətəgay. Yesu na, kə mətəsa ma Zerozelem. Bəba ŋgay hay ta sər faya bay.

<sup>44</sup> Nətəye tə dzala mə gər tay na, Yesu neŋgeye ta ndo neheye ti ye ka bo dziye. Tə ndza hwapat ka mede. Ta huwa na, tə pa bo ka mapəle na mə walaŋ i gwala tay hay ada mə walaŋ i dzam tay hay.

<sup>45</sup> Ta pəla na na, ta huta na bay. Ta mbəda gər a Zerozelem tə mapəle na haladzay.

<sup>46</sup> Ma dəba i məhəne mahkar, ti ye naha tə huta na mə gay i mədəslay ha gər a Mbəlom. Neŋgeye ma ndziye mə walaŋ i ndo mədzaŋgawa bazlam i Mbəlom mapala eye, faya ma piye zləm ka bazlam ada faya ma tsətsahiye fataya bazlam hay.

<sup>47</sup> Ndo niye hay tə tsəne wu nakə faya ma tsikiye na, a gatay hərəbəkka hərwi ndaraw ŋgay ada tə mambəde ka bazlam nakə a mbədawatay faya aye.

<sup>48</sup> Bəba ŋgay hay tə ŋgatay andza niye na, a gatay hərəbəkka. May ŋgay a gwaday: «Wawa ga, ka gamay andza niye na, hərwi mey? Nəmay ta bəba yak na, faya nəmaa pəliye kar. Mədzal gər may ka dzədzə haladzay.»

<sup>49</sup> A gwadətay: «Ka pəlume ye ga na, hərwi mey? Neŋ na, na ndziye mə gay i bəba ga na, ka sərūm təbədew.»

<sup>50</sup> Ane tuk na, ta tsəne wu nakə Yesu a tsikatay aye bay.

<sup>51</sup> Tsa na, Yesu a lətse ti ye ta bəba ŋgay hay a Nazaret. Yesu na, a hənawatay ha gər lele. May ŋgay a pa na bazlam niye a gər ŋgay.

<sup>52</sup> Yesu a gəl na, metsehe ŋgay a səkah kame kame. A yay a gər a Mbəlom haladzay ada ndo hay ta zambadəway haladzay.

## 3

### *Yuhana madzəhuəbe ndo a yam na, ndo məde ha bazlam i Mbəlom Mata 3.1-12; Markus 1.1-8; Yuhana 1.19-28*

<sup>1</sup> Ahəl niye na, Tiber neŋgeye bəy i Roma. Kə va ma bəy kuro gər eye zlam. Poŋos Pilat, bəy nakə ka dala i Yahuda aye. Herod neŋgeye a ləva dala i Galile. Malamar ŋgay Filip na, a ləva dala i Iture ta Trakonitit, Lisaniyas i ŋgay na, a ləva dala i Abilen.

<sup>2</sup> Bagwar i ndo məvələway wu a Mbəlom na, Han ta Kayif. Ahəl niye na, Yuhana wawa i Zakari na, mə makulkwandah. Mbəlom a tsikayaw me a slər na.

<sup>3</sup> Tsa na, Yuhana a dazlay mahəhele gəma neheye tə mbay naha a magayam i Yurdum aye tebiye. A gwadawatay a ndo hay: «Mbədum ha mede kurom. Dzəhuβum bo a yam ada Mbəlom ma pəsakumeye ha mənese kurom hay.»

<sup>4</sup> Andza niye, nakay na, wu nakə mawatsa eye mə dərewel i Ezay ndo məde ha bazlam i Mbəlom aye, a gwad: «Ndo faya ma wudiye mə kəsaf, a gwad:

“Lambadumay tsəved a Bəy Maduweŋ,

lambadumay tsəved hay fehe lele, tâ hədzak bay!

<sup>5</sup> Loləŋ hay tebiye ta ta rahiye fədəde!

Mahəmba hay ta tsaholok hay ta ta miye ka dala fədəda!

Tsəved neheye mahədzaka eye hay ta ta lambadiye tay hay dandər dandər lele!

Tsəved neheye tsərsloslo tə kwar aye hay ta ta ləviye fehe lele!

<sup>6</sup> Mbəlom ma təmiye tay ha ndo hay kəkay na, ndo hay tebiye ta ŋgateye.\*»

<sup>7</sup> Ndo hay haladzay ti yawa naha ka təv i Yuhana hərwi ada mâ dzəhuβ tay ha a yam. Yuhana a gwadawa tay: «Wawa i palas hay! Maa dəkum ha hwayum abəra ka sariya i Mbəlom nakə bəse kə ndzew aye na, way?

<sup>8</sup> Anəke na, gum məsler neheye ŋgwalak eye ndo hay ta səriye ha ka mbədum ha mede kurom aye tuk. Kə dzalum mə gər kurom “Nəmay na, wawa i Abraham hay sa na, ma ta gamay mey bay!” Sərum ha na, Mbəlom ma sliye faya məge tay ha kwar neheye anəŋ aye wawa i Abraham hay!

<sup>9</sup> Ba hadzaya maləva bo eye mədəse tay ha dərizl i gərdaf hay ta zləlay eye dzay tebiye. Dərizl i gərdaf neheye tebiye tə wa hohway ŋgwalak eye bay aye na, ta dəsiye tay ha ada ta kaliye tay ha ako.»

<sup>10</sup> Ndo hay ta tsətsah faya, tə gwaday: «Nəmaa giye na, mey?»

<sup>11</sup> A mbədətay faya, a gwadətay: «Ndo nakə məkelkabo ŋgay sulo aye na, mâ vəlay nəte a ndo nakə i ŋgay andaya bay aye. Ndo nakə wu mənday ŋgay andaya na, tâ ŋgəna ta ndo nakə i ŋgay andaya bay aye.»

<sup>12</sup> Ndo matsekele dzəŋgal hay ti ye naha hərwi madzəhuβe bo a yam dərma. Ta tsətsah ka Yuhana tə gwaday: «Miter, nəmaa giye na, mey!»

<sup>13</sup> A mbədətay faya a gwadətay: «Kâ təmum wu abəra ka ndo mâ ze nakə bəy i dala a gwadəkum təmum aye bay.»

<sup>14</sup> Sidzew hay ta tsətsah andza niye dərma: «Ada nəmay na, nəmaa giye mey tey?»

A gwadətay: «Kâ buwum suloy abəra ka ndo ta gədan bay. Kâ rawum me ka ndo hərwi matəme faya bəra suloy bay. Duh həbum na, madagər kurom nakə ta vəlakumeye ka giye aye.»

<sup>15</sup> Ndo hay ta dazlay mədzele ka wu nakə ma giye bo aye, tə dzalawa mə gər tay tə gwad: «Ma giye Yuhana na, Kəriste.»

<sup>16</sup> Yuhana a gwadətay a nəteye niye tebiye: «Neŋ na, na dzəhuβiye kurom ha a yam tsa. Ndo mekeleŋ eye ma deyeweye kame ga, neŋgeye na, gədan eye a ze ga. Na sliye mahəndzəde ka təv ŋgay məpəlay ha ləber i tahərak ŋgay bay tebiye. Neŋgeye, ma dzəhuβiye kurom ha ta Məsəfare Tsədəŋŋa eye ada ta ako. <sup>17</sup> Wu mahəve daw andaya mə həlay. Ma ŋgəniye tay ha daw ta dzəndzar. Daw na, ma hayay gər ma həliye na a de. Ada dzəndzar na, ma dziye a ako nakə ma mbatiye dədə bay aye.»

<sup>18</sup> Yuhana a dawatay ha Labara ŋgwalak eye tə məvəlatay gədan tə bazlam hay wal wal.

<sup>19</sup> Yuhana kə gay me a Herod hərwi a zla Herodiyad ŋgwas i malamər ŋgay. Ada Yuhana kə gay me ka wu hay wal wal.

\* 3:6 Ezay 40.3-5.

<sup>20</sup> Herod a sakah ha mæge mænese sa. A gæs na Yuhana a dangay.

*Madzəhuḅe i Yesu a yam  
Mata 3.13-17; Markus 1.9-11*

<sup>21</sup> Ma dəba aye Yuhana a dzəhuḅ tay hay ndo hay tebiye a yam na, a dzəhuḅ ha Yesu a yam dərmaḅ. A həlay nakə faya ma dūwuliye me aye na, magərmbəlom a həndək tuwaŋ.

<sup>22</sup> Tsa na, Məsəfəre Tsədəŋŋa a mbəzlaw faya, dəre a ŋgatay andza bodobodo. Tsa na, mətsike me a tsənew abəra mə mbəlom a gwad: «Nəkar na, wawa ga. Na wuda kar haladzay. Dərev ga faya ma ŋgwasiye tə nəkar.»

*Bəba tətə i Yesu hay  
Mata 1.1-17*

<sup>23</sup> Yesu a dazlay a mæge məsler na, məve ŋgay ma giye kuro kuro mahkar. Ndo hay tə dzala tə gwad nəngeye na, wawa i Yusufa. Yusufa wawa i Heli

<sup>24</sup> Heli wawa i Matat, Matat wawa i Levi, Levi wawa i Melki, Melki wawa i Zanay, Zanay wawa i Yusufa,

<sup>25</sup> Yusufa wawa i Matat, Matat wawa i Amos, Amos wawa i Nahum, Nahum wawa i Esəli, Esəli wawa i Nagay,

<sup>26</sup> Nagay wawa i Maat, Maat wawa i Matat, Matat wawa i Semeyin, Semeyin wawa i Zozek, Zozek wawa i Zoda,

<sup>27</sup> Zoda wawa i Yohanan, Yohanan wawa i Resa, Resa wawa i Zorobabel, Zorobabel wawa i Salatiyel, Salatiyel wawa i Neri,

<sup>28</sup> Neri wawa i Melki, Melki wawa i Addi, Addi wawa i Kozam, Kozam wawa i Elmadam, Elmadam wawa i Er,

<sup>29</sup> Er wawa i Zozowe, Zozowe wawa i Eliyezer, Eliyezer wawa i Zorim, Zorim wawa i Matat, Matat wawa i Levi,

<sup>30</sup> Levi wawa i Simeyən, Simeyən wawa i Yahuda, Yahuda wawa i Yusufa, Yusufa wawa i Zonam, Zonam wawa i Eliyakim,

<sup>31</sup> Eliyakim wawa i Meliya, Meliya wawa i Mena, Mena wawa i Matata, Matata wawa i Natan, Natan wawa i Davit,

<sup>32</sup> Davit wawa i Zese, Zese wawa i Obed, Obed wawa i Booz, Booz wawa i Salmon, Salmon wawa i Nason,

<sup>33</sup> Nason wawa i Aminadab, Aminadab wawa i Admin, Admin wawa i Arni, Arni wawa i Hesron, Hesron wawa i Fares, Fares wawa i Yahuda,

<sup>34</sup> Yahuda wawa i Zakob, Zakob wawa i Izak, Izak wawa i Abraham, Abraham wawa i Tara, Tara wawa i Nakor,

<sup>35</sup> Nakor wawa i Serok, Serok wawa i Ragu, Ragu wawa i Falek, Falek wawa i Eber, Eber wawa i Sala,

<sup>36</sup> Sala wawa i Kaynam, Kaynam wawa i Arfadzad, Arfadzad wawa i Sem, Sem wawa i Nuhu, Nuhu wawa i Lamek,

<sup>37</sup> Lamek wawa i Matosalem, Matosalem wawa i Henok, Henok wawa i Iyaret, Iyaret wawa i Maleleyel, Maleleyel wawa i Kaynam.

<sup>38</sup> Kaynam Wawa i Enos, Enos wawa i Set, Set wawa i Adam, Adam nəngeye na, Wawa i Mbəlom.

## 4

*A say a Fakalaw masəpete na Yesu  
Mata 4.1-11; Markus 1.12-13*

<sup>1</sup> Ma dəba eye Məsəfəre Tsədəŋŋa a rahay a bo i Yesu na, a ye abəra ka təv i magayam i Yurdum niye. Tsa na, Məsəfəre Tsədəŋŋa eye a ye ha a makulkwandah.

<sup>2</sup> Mə dəma na, Yesu kə ndza məhəne kuro kuro faɸ, Fakalaw a say masəpete na. Ma məndze niye na, Yesu kə nda wu mənday kwa tsekwenj bay tebiye. Ka mandəve i məhəne niye hay na, may a wur faya tuk.

<sup>3</sup> Tsa na, Fakalaw a yaw ka təv ŋgay, a gwaɸay: «Tadə kə ge nəkar Wawa i Mbəlom na, gwaɸay a kwar nakay mā təraka wu mənday.»

<sup>4</sup> Yesu a mbəɸay faya: «Mawatsa eye mə bazlam i Mbəlom na: “Ndo zezenj ma ndziye na, ta wu mənday dekdək bay.\*”»

<sup>5</sup> Fakalaw a ye ha ka gər i gəma. Kwayanŋa a bəzay ha bəy i məndzibəra tebiye.

<sup>6</sup> A bəzay ha na, a gwaɸay: «Na vəlakeye a nəkar hərwi gədanj ta zlele neheye ma bəy i dala neheye tebiye mavəla eye a neŋ. Na sliye faya məvəle kwa a way andza nakə a seŋ aye.

<sup>7</sup> Tadə ka dəkwenj gurmets na, na vəlakeye ha tebiye a nəkar.»

<sup>8</sup> Yesu a mbəɸay faya: «Mawatsa eye mə bazlam i Mbəlom na, a gwaɸ: “Dəslay ha gər a Bəy Maduwenj yak Mbəlom, ada ka geye məsler na, a neŋgeye nəte ŋwenj.”»

<sup>9</sup> Fakalaw a ye ha a gəma i Zerozelem, ka gər i gay i mədəslay ha gər a Mbəlom. Tə ndisl a dəma na, a gwaɸay a Yesu: «Tadə kə ge nəkar Wawa i Mbəlom sa na, kal ha bo abəra ka gər i gay nakay ka dala.

<sup>10</sup> Hərwi mawatsa eye mə bazlam i Mbəlom na, a gwaɸ: “Mbəlom ma gwaɸateye a gawla ŋgay hay na, t̄a dzəna kar, t̄a tsəpa kar.

<sup>11</sup> T̄a kəndawa kar, hərwi ada sik yak mā ndzay a kwar bay.†”»

<sup>12</sup> Yesu a mbəɸay faya a gwaɸay: «Mawatsa eye mə bazlam i Mbəlom na, a gwaɸ: “K̄a dza ha Bəy Maduwenj yak Mbəlom bay.‡”»

<sup>13</sup> Fakalaw a ndəv ha wewer ŋgay tebiye hərwi masəpete Yesu. Ma dəba eye na, a ye ŋgway abəra ka təv i Yesu hus a pat mekeləŋ eye.

*Yesu a ge məsler ma Galile*

*Mata 4.12-17; Markus 1.14-15*

<sup>14</sup> Ma dəba eye na, Yesu a mbəɸa gər a Galile. A ye na, neŋgeye maraha eye ta gədanj i Məsəfəre i Mbəlom. Mə dəma na, məzele ŋgay a d̄a zləm a gəma hay tebiye.

<sup>15</sup> A tətikawatay bazlam i Mbəlom a ndo hay mə gay i maɸuwule me. Ndo hay tebiye ta zambadaway.

*Ndo i gəma i Nazaret hay ta kərah Yesu*

*Mata 13.53-58; Markus 6.1-6*

<sup>16</sup> Ma dəba eye Yesu a lətse, a ye a gəma i Nazaret. Nazaret na, gəma nakə a gəl mə dəma aye. Pat i mazəzükw bo na, a lətse a ye a gay i maɸuwule me andza nakə a gawa ha aye. Mə dəma na, a lətse hərwi mədzenge bazlam i Mbəlom.

<sup>17</sup> Tsa na, ti ye naha tə zlayaw derewel i Ezay ndo məɸe ha bazlam i Mbəlom, tə vəlay. Tsa na, a pəla ha derewel niye. A pəla ha na, a huta təv nakə mawatsa eye, a gwaɸ:

<sup>18</sup> «Məsəfəre i Bəy Maduwenj ka gər ga.

A zla ga, a sləra ga ahaya na, hərwi məzlatayaw Labara ŋgwalak eye a ndo i mətawak hay.

A sləra ga ahaya na, hərwi məɸatay labara i mətəme a ndo i danjay hay.

A sləra ga ahaya hərwi mahəndəkətatay na d̄əre a guluf hay.

\* 4:4 Bazlam mapala eye masulo eye 8.3. † 4:8 Bazlam mapala eye masulo eye 6.13. ‡ 4:11 Dəmes hay 91.11-12. § 4:12 Bazlam mapala eye masulo eye 6.16.

A slära ga ahaya na, mätäme tay ha, ndo neheye faya ta gateye dāretsätseh aye.

<sup>19</sup> Mäde ha mäve nakə Mbəlom ma gateye ŋwalak ŋgay a ndo hay aye na, kə ndislew.\* »

<sup>20</sup> Yesu a ndəv ha mädzenge andza niye na, a pađa na derewel niye. A may ha a ndo mäge mäsler i gay i mađuwule me niye. Tsa na, a ye a ndza ŋway. Ndo niye hay tebiye mə gay i mađuwule me aye na, ta zəba ka Yesu.

<sup>21</sup> Tsa na, Yesu a dazlay mätsikatay, a gwadatay: «Nəkurom neheye faya ka pumay zləm a wu nakə faya na tsikakumeye na, wu nakə na dzanga mə Derewel i Mbəlom aye na, ɓa kə ge bo bəgom tsiy.»

<sup>22</sup> Ndo niye hay tebiye tə tsik faya, tə gwad: «Ndo nakay na, lele.» Ada Bazlam i Yesu niye a tsikatay aye na, bazlam niye ŋwalak eye a gatay hərbəbəkka. Tə gwad: «Neŋgeye na, wawa i Yusufa na gwad bəda?»

<sup>23</sup> Yesu a gwadatay sa: «Ta dedək, nəkurom ka tsikumeneye bazlam i dzeke nakay anan aye. Ka gwedumeneye: “Nəkar ndo mätäme ha ndo, təma ha bo yak aye tey.” Nəmaa tsəne wu neheye ka ge ma Kafernahum aye. Anəke na, ge ma gəma yak andza neheye ka ge ma Kafernahum aye dərma.»

<sup>24</sup> Tsa na, a gwadatay sa: «Sərum ha ndo mäde ha bazlam i Mbəlom na, kwa nətə ta təma na ma gəma ŋgay nakə tə wa na mə dəma aye bay.

<sup>25</sup> Sa tsa na, sərum ha ahəl i Eliya ndo i maslanj i Mbəlom na, madakway i ŋgwas hay haladzay ma Israyel. Ahəl niye na, yam kə pa bay mäve mahkar ta kiye məkwa. Mandarzanj bagwar eye a ge ka dala niye tebiye.

<sup>26</sup> Madakway i ŋgwas hay andaya ma Israyel, ane tuk na, Mbəlom kə slər Eliya a gay i madakway i ŋgwas hay kwa nətə bay tebiye. Ane tuk na, Mbəlom a slər Eliya na, a gay i madakway i ŋgwas wuray a ndzawa ka dala i Səripta ma gəma i Sidon.†

<sup>27</sup> Ahəl i Elize ndo mäde ha bazlam i Mbəlom na, ndo madəgwada eye hay haladzay ka dala i Israyel. Mbəlom kə mbəl tay ha ndo niye madəgwada eye hay kwa nətə bay, a mbəl ha na, Namaŋ ndo i gəma i Siri.‡»

<sup>28</sup> Ndo niye hay tebiye mə gay i mađuwule me aye tə tsəne bazlam ŋgay niye na, a ndalatay haladzay.

<sup>29</sup> Tsa na, tə lətse, tə pay həlay a Yesu. Ti ye ahaya abəra ma wuzlahgəma, ti ye ha a gər i mahəmba i Nazaret. Gəma i Nazaret ma geye na, ka mahəmba eye niye. Tə tsal ha a dəma na, hərwi madzəgəda ahaya a zavay.

<sup>30</sup> Ane tuk na, Yesu a ye mə walanj tay tsərid tsərid a ye ŋway.

*Yesu a mbəl ha ndo nakə məsəfəre lele bay mə bo aye*

*Markus 1.21-28*

<sup>31</sup> Ma dəba eye na, Yesu a lətse a ye a Kafernahum. Kafernahum na, wuzlahgəma i Galile. Pat i mazəzukuw bo na, pat pat a tətikawatay a ndo hay.

<sup>32</sup> Ndo hay tə tsəne matətike ŋgay niye na, a gatay hərbəbəkka. Hərwi matətike ŋgay nakə a tətikatay aye ta məzlaɓ eye.

<sup>33</sup> Azlakwa bay mə gay i mađuwule me niye na, ndoweye andaya gər a wuway. A wuda ta gədanj kəlerra, a gwad:

<sup>34</sup> «Nəkar Yesu ndo i Nazaret, mey yak ka nəmay na, mey? Ka yaw na, mata dze may ha daw? Nəkar way na, na sər ha lele: Nəkar na, ndo nakə tsədanja Mbəlom a sləraw aye!»

<sup>35</sup> Tsa na, Yesu a gay me, a gwadāy: «Ndza dīkdīk! Dara abəra mə bo i ndo nakay!»

\* 4:19 Ezay 61.1-2. † 4:26 1 Bəy hay 17.8-16. ‡ 4:27 2 Bəy hay 5.1-14.



Tsa na, fakalaw a kal ha ndo niye kame i ndo niye hay ɔ̄erra. Tsa na, a ndohwaw ab̄era m̄a bo i ndo niye. K̄a gay wuray a ndo niye kwa tsekwenj bay.

<sup>36</sup> Ka t̄av niye na, a gatay a ndo hay dāb̄ak dāb̄ak, h̄ar̄bāb̄akka. T̄a gwad̄ m̄a walañ tay: «Eh! Eh! Nakay na, bazlam waray! Nakay i ŋgay na, ndo waray a tsik me ta m̄azlāb̄ eye! A gatay me ta ḡeɗaŋ a m̄əsəf̄are lele bay eye hay na, t̄a ḡəsay me ada t̄a ndohwaw ab̄era m̄a bo ndo nakay aye!»

<sup>37</sup> Labara i Yesu a ɗa a zlam ma ḡama niye tebiye.

*Yesu a mb̄al tay ha ndo hay ab̄era ma ɗavats tay hay wal wal*

*Mata 8.14-17; Markus 1.29-34*

<sup>38</sup> Ma ɗaba eye na, Yesu a yaw ab̄era m̄a gay i maɗuwule me niye. A h̄al bo a ye a gay i Simonj. A ye naha na, mese i Simonj lele bay. Maraɓaraɓ a gay haladzay. Tsa na, t̄a gwad̄ay a Yesu: «Maraɓaraɓ a gay a mese i Simonj, ɗz̄ena na tey!»

<sup>39</sup> Yesu a l̄atse, a ye ka t̄av ŋgay. A ye naha na, a guɗuk faya. A ŋḡer̄ez ka maraɓaraɓ niye ta ḡeɗaŋ. Tsa na, maraɓaraɓ niye a ndala ab̄era ka ŋgwas niye. Kwayaŋŋa a gatay mb̄elok.

<sup>40</sup> Ma ɗaba eye pat a ɗeɗ na, ndo hay t̄a h̄alayaw ndo neheye ɗavats m̄a bo tay tebiye a Yesu. Kwa slala i ɗavats waray waray na, t̄a h̄alayaw a Yesu. Yesu a pa fataya h̄alay n̄ate n̄ate tay eye. A mb̄al tay ha ab̄era ma ɗavats tay niye hay.

<sup>41</sup> A h̄ar̄ fakalaw hay ab̄era m̄a bo i ndo hay haladzay ɗermak. Fakalaw niye hay ta wuda, t̄a gwad̄ay: «N̄akar na, Wawa i Mb̄elom!»

Ane tuk, na, Yesu a ŋḡer̄ez fataya. A gwad̄atay: «K̄a tsikum me bay.» H̄arwi n̄ateye na, t̄a s̄ar ha Yesu na, K̄ariste.

*Yesu a ɗa ha bazlam i Mb̄elom m̄a gay i maɗuwule me*

*Markus 1.35-39*

<sup>42</sup> ɗ̄ere a tsada kwayaŋŋa na, Yesu a l̄atse a ndohwaw, a yaw ab̄era m̄a gay. A ye ɗ̄erenj ab̄era ma wuzlahḡema. A ye a t̄av nak̄e nd̄eray andaya m̄a ɗama bay aye. Ndo hay haladzay ta z̄eba ɗere na, ta ŋgatay a Yesu bay. Tsa na, ta pa na. T̄a huta na Yesu na, a satay Yesu m̄a ye fataya ab̄era bay, m̄a ndza ta n̄ateye huya.

<sup>43</sup> Ane tuk na, Yesu a gwad̄atay: «Na diye a ḡama mekelenj eye hay, na ta ɗatay ha Labara ŋgwalak eye i B̄ey i Mb̄elom ɗermak. Mb̄elom a sl̄era ga ahaya na, h̄arwiye.»

<sup>44</sup> Tsa na, a l̄atse, a ye a ɗawa ha bazlam i Mb̄elom m̄a gay i maɗuwule me neheye ka dala i Yahuda aye.

## 5

*Makurre i gawla i Yesu hay*

*Mata 4.18-22; Markus 1.16-20*

<sup>1</sup> Pat wuray na, Yesu a ye ka me i ɗalov i Genesaret. A ye na, a l̄atse ka me i ɗalov i Genesaret niye. Ka t̄av eye niye na, ndo hay haladzay faya ta lawariye na h̄arwi m̄ats̄ane bazlam i Mb̄elom.

<sup>2</sup> Yesu a ŋgatay a kwalalanj i yam hay sulo ka ɗakal. Ndo m̄aḡəse k̄alef hay t̄a mb̄azlaw ab̄era m̄a ɗama, faya ta bariye gadañ tay hay.

<sup>3</sup> Tsa na, Yesu a ye, a tsal a kwalalanj i yam nen̄geɗ. Kwalalanj i yam niye na, i Simonj. Tsa na, a gay amboh a Simonj, a gwad̄ay: «Amboh, h̄andz̄aɗ ga ha tsekwenj a b̄era ka ɗakal.» Simonj a ge ha andza niye. Yesu a ndza a kwalalanj i yam niye na, a pa bo ka mat̄atikatay bazlam i Mb̄elom a ndo niye hay.



<sup>4</sup> A ndøv ha matətikatay a ndo hay na, a gwadáy a Simon; «Həndzəd ha kwalalan i yam dərən, a tøv nakə siduk aye, a wuzlah i dəlöv. Ka ye ha na, nəkar ta ndo məpaka bəzay yak hay kalum gadan kurom hay a yam hərwi məgəse kələf.»

<sup>5</sup> Simon a mbədáy faya, a gwadáy: «Ŋgalaka, nəmaa ye gər haladzay ta həvad hərwi məgəse kələf ada kwa nəte nəmaa gəs bay. Aya ane nəkar ka tsiken, nə ge sa na, na kaliye gadan hay a yam.»

<sup>6</sup> Tsa na, tə kal gadan tay niye hay a yam. Tə kal a dəma na, kələf hay ti ye a gadan tay niye hay haladzay. Gadan tay niye hay a dazlay a manğazlehe ndərtsətse hərwi kələf kə rah a dəma ka zal naha.

<sup>7</sup> Tsa na, tə gatay naha wiyaw a mandala tay neheye mə kwalalan i yam neŋged aye hərwi ada tã yaw tã dzəna tay tey. Mandala tay niye hay ti yaw. Tə vaha ahaya gadan niye hay abəra ma yam. Tə rah ha, kwalalan i yam niye hay sulo aye tə kələf. Kwalalan i yam niye hay ta sər masəleme a hud i yam hərwi maraha eye hay haladzay.

<sup>8</sup> Simon Piyer a ngatay andza niye na, a ye a dəkway gurmets a huvo a Yesu. A gwadáy: «Do wu yak abəra ka tøv ga Bəy Maduwej, hərwi neŋ na, ndo i mezeleme!»

<sup>9</sup> Simon a dzədzar haladzay. Ndo niye hay nəteye dziye ta dzədzar andza Simon dərma. Ta dzədzar na, hərwi kələf niye tə gəs haladzay aye.

<sup>10</sup> Andza niye, ndo məpay bəzay a Simon, ta dzədzar dərma. Ndo neheye tə paway bəzay a Simon aye na, Yakuba ta Yuhana wawa i Dzebede hay.

Ane tuk na, Yesu a gwadáy a Simon; «Kã dzədzar bay. Nəkar na, ka ta həlaweye ndo hay ka tøv ga.»

<sup>11</sup> Tsa na, tə ma tay ahaya kwalalan i yam tay hay ka dəkak. Tə gər ha wu tay niye hay tebiye tə pay bəzay a Yesu.

*Yesu a mbəl tay ha ndo i dəvats hay ada a pəsətatay ha mezeleme*

*Mata 8.1-4; Markus 1.40-45*

<sup>12</sup> Pat wuray na, Yesu a ye a wuzlahgəma wuray. Ahəl nakə neŋgeye mə dəma aye na, paf ndo wuray madəgwada eye a ye naha. A ngatay a Yesu na, a kal ha bo kame ŋgay. Dəbuz da'ar ka dala, a gay amboh a Yesu, a gwadáy: «Ŋgalaka, tadə kə saka na, ka sliye faya matəre ga ha tsədanŋa.»

<sup>13</sup> Yesu a tsəne andza niye na, a ndudə ha həlay ŋgay, a lamay. Tsa na, a gwadáy: «A seŋ na, təra tsədanŋa!» Kwayanŋa dəvats i madəgwede a ndala abəra ka ndo niye.

<sup>14</sup> Yesu a gwadáy: «Tsəne lele: Kã tsik wu nakay a ndəray bay. Ane tuk na, do ta bəzay ha bo a ndo məvəlaway wu a Mbəlom ada vəl wu nakə Musa a tsik aye hərwi mədatay ha a ndo hay tebiye na, ka təra tsədanŋa.»

<sup>15</sup> Kwa andza niye bəbay na, labara i Yesu a dā a zləm haladzay. Ndo hay haladzay tə hayawa gər ka tøv ŋgay hərwi məpay zləm a bazlam ŋgay. Siye hay ti yawa ka tøv ŋgay hərwi ada mā mbəl tay ha abəra ma dəvats tay hay.

<sup>16</sup> Ane tuk na, Yesu na, a yawa a tøv neheye dərən aye. A yawa a dəma mata dūwule me.

*Yesu a mbəl ha ndo matəra eye*

*Mata 9.1-8; Markus 2.1-12*

<sup>17</sup> Pat wuray na, Yesu faya ma tətikateye a ndo hay. Farisa hay ta ndo mədzaŋgawa bazlam i Mbəlom mapala eye, nəteye andaya dərma. Ti yaw na, ma gəma neheye ka dala i Galile aye tebiye, ma Zerozelem ada abəra ma Yahuda. Yesu a mbəlawa tay ha ndo i dəvats hay ta gədan i Bəy Maduwej Mbəlom.

<sup>18</sup> Ahəl nakə Yesu faya ma tətikateye a ndo hay aye na, ndo hay, tə zlay naha ndo wuray matəra eye madzawa eye ka sləlah. Ta pəla tsəved mede ha məpe kame i Yesu.

<sup>19</sup> Ane tuk na, ta huta tsəved mede məfələkwa ha a gay bay, hərwi ndo hay haladzay ka tsəved. Tsa na, tə tsal ka gər i gay niye. Tə sləl bəd dəgerger tə Yesu. Tə mbəzla ha ndo niye ta sləlah eye dzay tə walaŋ i ndo niye hay kame i Yesu.

<sup>20</sup> Yesu a ŋgatay a mədzal gər i ndo niye hay na, a gwadāy a ndo matəra eye niye: «Dzam ga, na pəsaka ha mezeleme yak hay.»

<sup>21</sup> Ndo mədzaŋgawa bazlam i Mbəlom mapala eye ta Farisa hay tə tsəne bazlam i Yesu niye na, tə tsik mə walaŋ tay, tə gwad: «Nakay na, ndo waray i ŋgay a tsalay ka gər a Mbəlom aye! Way nakə da məpəsay ha mezeleme a ndo na, way. Maa sla məpəsay ha mezeleme a ndo na, Mbəlom nətə ŋgweŋ bəna, way?»

<sup>22</sup> Tsa na, Yesu a sər wu nakə tə dzala mə gər tay aye, a gwadātay: «Ka dzalum andza niye mə gər kurom na, hərwi mey?»

<sup>23</sup> Maa da me məgwede: “Mezeleme yak kə pəsa” na, waray, kəgəbay “Lətse, do” na, maa da me mə dəma na, waray?»

<sup>24</sup> A seŋ na, sərūm ha neŋ Wawa i Ndo na, gədaŋ ga andaya məpəsətay ha mezeleme a ndo hay ka məndzibəra.»

Tsa na, a gwadāy a ndo matəra eye: «Faya na gwadakeye, lətse, zla sləlah yak do a mətəgay!»

<sup>25</sup> Kwayaŋŋa ndo niye a lətse hurum kame i ndo niye hay tebiye. A zla sləlah ŋgay niye tə zla ahaya. A ye kame i ndo niye hay duwak duwak tə mazambađay a Mbəlom. A ye a mətəgay.

<sup>26</sup> Ndo niye hay mbərzəzza aye tə ŋgatay andza niye na, a gatay hərbəbəkka. Ta zambađay a Mbəlom. Tə dzədzar haladzay ada tə gwad: «Bəgom na, ka ŋgatakway a wu məge masuwayaŋ eye!»

*Yesu a zalay a Levi  
Mata 9.9-13; Markus 2.13-17*

<sup>27</sup> Ma dəba eye na, Yesu a lətse a yaw abəra mə gay niye. Yesu faya ma diye na, a ŋgatay a ndo matsekele dzaŋgal mandza eye ka təv i məsler ŋgay. Ndo niye na, tə zalay Levi. Yesu a gwadāy: «Dara, peŋ bəzay!»

<sup>28</sup> Tsa na, Levi a lətse, a gər ha wu ŋgay hay tebiye, a pay bəzay a Yesu.

<sup>29</sup> Ma dəba eye ti ye a gay i Levi. Ti ye naha na, Levi a datay wu mənday. Tə nda wu mənday niye na, nətəye haladzay tə ndo matsekele dzaŋgal ha ada tə siye i ndo hay haladzay.

<sup>30</sup> Farisa hay ta ndo mədzaŋgawa bazlam i Mbəlom mapala eye tə ŋgatay a Yesu faya ma ndiye daf ta ndo i mezeleme hay na, tə tsik faya wu nakə lelebay aye. Tə gwadātay a gawla i Yesu hay: «Ka ndayum wu mənday ada ka sum wu ka təv manətə eye ta ndo matsekele dzaŋgal hay ada ta ndo i mezeleme hay na, hərwi mey?»

<sup>31</sup> Yesu a tsəne bazlam tay niye na, a mbədātay faya, a gwadātay: «Ndo neheye wuray a gatay bay nətəye zayzay aye na, ta pəliye ndo i sidem bay. Mata pəle ndo i sidem na, ndo neheye dəvats eye hay aye.

<sup>32</sup> Na yaw məzalətay a ndo neheye tə gwadāy a gər nətəye ŋgwalak eye hay aye bay, ane tuk na, məzalətay a ndo i mezeleme hay dūh, hərwi ada tə mbəda ha mede tay.»

*Wu wedeye ta wu guram eye  
Mata 9.14-17; Markus 2.18-22*

<sup>33</sup> Ta tsətsah ka Yesu, tə gwadafay: «Gawla i Yuhana ta gawla i Farisa hay tə gawa daliyam ada ta dūwulawa. Ane tuk na, gawla yak hay i tay tə ndayawa wu mənday ada tə sawa wu məse na, kəkay?»

<sup>34</sup> Yesu a mbədatay faya: «Ka dzalom na, nəteye na, ta giye daliyam daw? Ta giye bay hərwi nəteye na, andza mə magurlom i məzle dahəlay. Ahəl nakə zal i dahəlay ka təv tay mba aye na, ndo neheye mazala eye a magurlom i məzle dahəlay na, ta giye daliyam bay.

<sup>35</sup> Ane tuk na, pat eye ma slaweye na, ta gəsiye fataya abəra zal i dahəlay niye. Pat eye niye na, ta giye daliyam tuk.»

<sup>36</sup> Yesu a tsikatay dzeke nakay sa. A gwadafay: «Dada ndəray ma dəsiye peteked wedeye mətepe ka peteked guram eye bay. Hərwi tadə ta tapa peteked wedeye ka guram eye na, peteked wedeye ma ngərdiye ha peteked guram eye niye. Ta nasiye ha peteked wedeye. Peteked wedeye ta guram eye ta diye ka bo bay.

<sup>37</sup> Sa na, ndo ma mbədiye guzom lelem eye a gwezem i həzlay guram eye bay na, ka sərūm təbədew? Hərwi ta mbəda a dəma na, guzom niye lelem eye kə kwasa na, həzlay guram eye ma ndohwiye. Guzom dərmak səktih ma mbədiye ka dala ada gwezem ma nasiye.

<sup>38</sup> Ane tuk na, guzom lelem eye ta mbədiye na, a gwezem i həzlay wedeye dərmak.

<sup>39</sup> Sərūm ha ndo kə sa guzom makwasa eye na, ma dəba eye na, ma siye lelem eye sa bay. Hərwi tə gwad: «Guzom makwasa eye na, lele.»

## 6

*Yesu na, a ləvay gər a pat i mazəzukw bo*

*Mata 12.1-8; Markus 2.23-28*

<sup>1</sup> Pat i mazəzukw bo na, Yesu ta gawla ngay hay ti ye ta guvah wuray. Ma guvah eye niye tə ge a dəma na, wuye andaya tə zalay bəle. Gawla i Yesu hay tə həb wu niye. Ta gugwah na wu niye ada tə nda.

<sup>2</sup> Siye i Farisa hay ta ngatay. Tsa na, tə gwadafay: «Ka gum wu nakə bazlam i Mbəlom mapala eye a ge faya me pat i mazəzukw bo aye na, hərwi mey?»

<sup>3</sup> Yesu a mbədatay faya a gwadafay: «Dada ka dzanğum wu nakə Davit a ge ahəl niye aye təbədew?»\* May a wur faya ta ndo ngay hay.

<sup>4</sup> Tsa na, a ye, a fələkwa a madzawadzawa i mədəslay ha gər a Mbəlom. A ye naha, a zla makwala nakə tə vəlay a Mbəlom aye. A nda. A vəlatay a ndo ngay hay dərmak, tə nda. Bazlam i Mbəlom mapala eye a vəl tsəved ka mənde na, a ndo məvəlaway wu a Mbəlom dekdək bədaw?»

<sup>5</sup> Yesu a gwadafay sa: «Maa ləvay gər a pat i mazəzukw bo na, Wawa i Ndo.»

*Yesu a mbəl ha ndo wuray maməta həlay eye*

*Mata 12.9-14; Markus 3.1-6*

<sup>6</sup> Pat eye andaya pat i mazəzukw bo na, Yesu a ye a gay i mađuwule me. A ye naha a pa bo ka matətkatay a ndo hay. Mə dəma na, ndoweye andaya həlay i mənday ngay maməta eye.

<sup>7</sup> Mə gay i mađuwule me niye na, ndo mədzanğawa bazlam i Mbəlom mapala eye ta Farisa hay nəteye andaya. Faya ta zəbiye ka Yesu. Tə dzala mə gər tay, tə gwad: «Zəbakwa faya lele, ngatay ma mbəliye ha ndo nakay maməta həlay eye pat i mazəzukw bo daw?» Tə tsik andza niye na, hərwi məhəle faya bəra suwat.

\* 6:3 1 Samuyel 21.2-7.

<sup>8</sup> Ane tuk na, Yesu a sər ha mədzał gər tay. A gwadəy a ndo niye həlay ɲgay maməta eye: «Lətse, do, lətse ka niye, kame i ndo hay tebiye.» Ndo niye a lətse ka niye.

<sup>9</sup> Tsa na, Yesu a gwadətay: «Na tsətsahiye fakuma: Bazlam kway mapala eye a vəl tsəved məge na, mey? A gwad: Gum ɲgwalak pat i mazəzukw bo tsukufu, gum na, sewed daw? Məmbəle ha ndo pat i mazəzukw bo tsukufu məgar ha mâ mət daw?» Ane tuk na, ta mbədəy faya bay.

<sup>10</sup> Yesu a zəba fataya. Tsa na, a gwadəy a ndo niye həlay maməta eye «Nduda ha həlay yak.»

A nduda ha na, həlay ɲgay a mbəl a təra lele suwud suwud.

<sup>11</sup> Tsa na, a ndalatay a ndo mədzaɲgawa bazlam i Mbəlom mapala eye ta Farisa hay. Tə tsik ma walaɲ tay ta hutie tsəved ka məkəde Yesu na, kəkay.

*Yesu a pala ndo i maslaɲ ɲgay hay*

*Mata 10.1-4; Markus 3.13-19*

<sup>12</sup> Ahəl niye Yesu a ye, a tsal a tsaholok hərwi maɲuwule me. A ndza ma tsaholok niye huyup ka maɲuwulay naha me a Mbəlom.

<sup>13</sup> Dəre a tsada na, a zalatay a gawla ɲgay hay ka təv ɲgay. Ti ye naha. Tsa na, a pala mə walaɲ tay niye ndo kuro gər eye sulo. A zalatay ndo i maslaɲ hay.

<sup>14</sup> Nəteye na: Simoɲ nakə a pa faya məzele Piyer aye, ta malamər ɲgay Aɲdərə, Yakuba ta Yuhana, Filip ta Bartelemi,

<sup>15</sup> Mata ta Tomas, Yakuba wawa i Alfe, Simoɲ ndo məge vəram hərwi dala ɲgay,

<sup>16</sup> Yuda wawa i Yakuba, Yudas Iskariyot ndo məge dəf ka Yesu.

*Yesu ta ndo hay haladzay*

*Mata 4.23-25*

<sup>17</sup> Yesu ta gawla ɲgay niye hay, tə mbəzlaw abəra ma tsaholok niye. Ti yaw tə ndza ka təv eye andaya barbara eye fatata. Gawla ɲgay hay ka təv eye niye haladzay. Ndo hay haladzay mbərzəzza andaya ka təv eye niye dərmak. Ndo niye hay na, ti yaw abəra kwa ma Zerozelem ka dala i Yahuda ada mə Tir ta Sidoɲ gəma neheye tə mbay naha a bəlay aye.

<sup>18</sup> Ndo niye hay ti yaw ka təv ɲgay na, mata pay zləm a bazlam ɲgay ada hərwi mâ mbəl tay ha abəra ma dəvats tay hay wal wal. Ndo neheye məsəfəre lele bay eye hay mə bo tay aye na, kə mbəl tay hay.

<sup>19</sup> Kwa way a pəla tsəved məlamay nets tsa hərwi gədaɲ a yaw abəra mə bo ɲgay. Ndo neheye ta lamay aye na, a mbəl tay ha tebiye.

*Ngama ta marava*

*Mata 5.1-12*

<sup>20</sup> Yesu a zəba ka gawla ɲgay hay na, a gwadətay:

«A nəkurom ndo i mətawak hay, ɲgwasum  
hərwi Bəy i Mbəlom na, i kurom.

<sup>21</sup> A nəkurom neheye may a wur fakuma anəke aye, ɲgwasum  
hərwi Mbəlom ma vəlakumeye wu nakə a sakum aye.

A nəkurom neheye faya ka tuwumeye anəke aye, ɲgwasum  
hərwi ka ta ɲgwasumeye.

<sup>22</sup> Nəkurom neheye ndo hay faya ta gakum eye dəretsətseh aye,  
kwa ta kal kurom ha,

kwa ta tsadəkum,

kwa ta tsik fakuma wu nakə lelebay eye hərwi nakə ka dzalum ha Wawa  
i Ndo aye na,

ŋgwasum.

- <sup>23</sup> Aza pat nakə wu neheye ta ndzakum a gər aye na, mbərzlum tə mənḡwese eye hərwi Mbəlom ma ta vəlakumeye magogoy kurom bagwar eye mə mbəlom.
- Aya ane, sərüm ha na, bəba tətə tay hay tə gatay a ndo mədə ha bazlam i Mbəlom hay na, andza niye.
- <sup>24</sup> A nəkurom ndo i zlele hay, dəretsətseh ka gər kurom hərwi ɓa ka hutum magogoy kurom tsiy.
- <sup>25</sup> A nəkurom neheye hawa i wu a gakum bay aye wu kurom andaya anəke haladzay aye, dəretsətseh ka gər kurom hərwi may ma ta wuriye fakuma.
- A nəkurom neheye faya ka ŋgwasumeye anəke aye, dəretsətseh ka gər kurom hərwi ka ta ndzumeye ta mədzal gər aye ada ka tuwumeye.
- <sup>26</sup> A nəkurom neheye ndo hay tə gwad fakuma nəkurom ŋgwalak i ndo hay aye, dəretsətseh ka gər kurom. Hərwi bəba tətə tay hay tə gwadawa ka ndo neheye tə gwad nəteye ndo mədə ha bazlam i Mbəlom aye ta səpatawa ndo hay ahəl niye na, andza niye.»

*Wudum ndo mənə dəre kurom hay  
Mata 5.38-48, 7.12*

<sup>27</sup> «Ane tuk na, na tsikakumeye a nəkurom neheye faya ka pumeneye zləm aye: Wudum ndo mənə dəre kurom hay. Gumatay ŋgwalak a ndo neheye tə nakum dəre aye.

<sup>28</sup> Pum ŋgama ka ndo neheye faya ta vəlakumeye mezeleme aye. Duwulumay me a Mbəlom hərwi ndo neheye faya ta gakumeye dəretsətseh aye.

<sup>29</sup> «Tadə ndoweye kə faka ka maholom na, mbəday ha maholom i diye nenḡed. Ndowneye ka buwa faka abəra kələmedze yak na, gər ha m̄a zla na faya məkelkabo yak i huf aye.

<sup>30</sup> «Ndo ka tsətsah fakaya wu na, vələy ada tadə ndoweye kə zla faka abəra wu yak na, k̄a tsətsah faya bay.

<sup>31</sup> «Ka gwadum ndo hay t̄a gakum ŋgwalak na, gumatay ŋgwalak a ndo hay dərma.

<sup>32</sup> «K̄a wudum ndo neheye ta wud̄a kurom aye d̄ekd̄ek bay. Tadə ka wudum ndo neheye ta wud̄a kurom aye d̄ekd̄ek na, ka dzalum na, ka hutumeye merəbe kurom daw? Kwa ndo i mezeleme hay ta wud̄a ndo neheye ta wud̄a tay ha aye dərma!

<sup>33</sup> Ada tadə ka gumatay ŋgwalak a ndo neheye faya ta gakumeye ŋgwalak aye d̄ekd̄ek na, ka dzalum na, ka hutumeye merəbe kurom daw? Kwa ndo i mezeleme hay na, t̄ə ge andza niye.

<sup>34</sup> «Tadə ka vələmat̄eye wu a ndo neheye ka sərüm ha nəteye ta sliye məmakum ha aye na, ka dzalum na, ka hutumeye merəbe kurom daw? Kwa ndo i mezeleme hay t̄ə vələwa wu na, a ndo i mezeleme hay andza nəteye hərwi ada t̄a matay ha andza nakə t̄ə vələtay aye!

<sup>35</sup> Duh bay, wudum ndo mənə dəre kurom hay! Gumatay ŋgwalak. Ka vələmat̄ay wu na, k̄a gwadum t̄a makum ha a d̄əma bay. Mbəlom ma ta vəlakumeye a d̄əma magogoy kurom na, haladzay. Nəkurom ka ta tərume wawa i Mbəlom Fetek. Hərwi nenḡeye na, a wud̄a ndo i həzay hay ta ndo i sewed hay dərma.

<sup>36</sup> Tərum ndo məge ɲgwalak hay andza Bəba kurom Mbəlom, neŋgeye ndo i ɲgwalak.

*Kâ gumatay sariya a ndo hay bay*

*Mata 7.1-5*

<sup>37</sup> «Kâ gum sariya ka ndo bay. Mbəlom dərmaƙ ma gakuƙumeƙe sariya bay. Kâ rawum me ka ndo hay bay. Mbəlom bəbay ma rawiye fakuma me bay. Pəsumatay ha mənese a ndo hay, Mbəlom dərmaƙ ma pəsakuƙumeƙe ha mənese kurom.

<sup>38</sup> «Vəlumataƙ wu a ndo hay, Mbəlom dərmaƙ ma vəlakuƙumeƙe. Mbəlom ma vəlakuƙumeƙe na, ma rahakuƙumeƙe ha lele. Ma dzədzaƙakuƙumeƙe ha a gwezem kurom hay na, madzədzeke madzədzeke. Mbəlom ma ləvakuƙumeƙe wu tə wu nakə ka ləvawumatay ha wu a ndo hay aye dərmaƙ.»

<sup>39</sup> Yesu a tsikatay ta dzeke meƙeleŋ eye sa, a gwadatay: «Guluf ma sliye məgasay həlay a guluf neŋged daw? Nətəye salamay tay eye ta dədiye a bəd.

<sup>40</sup> Ndo nakə faya ma tətikiye wu aye na, ma ziye ndo matətikay wu bay. Ane tuk na, ndo nakə faya ta tətikay wu kə sər tsiy na, ma təriye andza ndo matətikay wu.»

<sup>41</sup> A gwadatay sa: «Nəkar na, ka ɲgatay a tsakwal mə dərə i malamar yak. Ane tuk na, mayako nakə mə dərə yak aye ka ɲgatay bay na, hərwi meƙe?

<sup>42</sup> Kəkay, ka sliye məgweƙe: “Malamar ga, ehey nā zlaƙa ahaya tsakwal abəra mə dərə yak” na, duh i yak aye mayako gələwƙa ka ɲgatay bay na, kəkay? Nəkar ndo i bəbərəƙ, lah faya məzle ahaya mayako abəra mə dərə yak təday ada ka ɲgateƙe a dərə ƙwetseh ƙwetseh. Ka zlaya ahaya tsakwal abəra mə dərə i malamar yak tuk.»

*Dərizl i gərdaf ta hohƙay ɲgay eye hay*

*Mata 7.16-20, 12.33-35*

<sup>43</sup> Yesu a gwadatay sa: «Sərum ha na, dərizl i gərdaf lele eye na, ma wiye hohƙay i dərizl i gərdaf nakə lele bay aye bay, andza niye dərizl i gərdaf lele bay eye ma wiye hohƙay i gərdaf nakə lele eye bay aye.

<sup>44</sup> Ka sərakƙa ka bo abəra dərizl i gərdaf hay ta hohƙay tay hay. Ka slumeye faya maŋgəle hohƙay i gurow abəra ka wuradak bay ada ka slumeye maŋgəle hohƙay i təroz abəra ka dzəgew bay.

<sup>45</sup> Sərum ha na, ndo nakə ɲgwalak eye na, ma giye wu ɲgwalak eye hay hərwi mə dərəv ɲgay na, wu neheye ɲgwalak eye dərmaƙ. Ndo nakə sewed eye na, ma giye wu neheye sewed eye hərwi dərəv ɲgay maraha eye tə wu neheye sewed eye. Hərwi ƙwa way a ndohƙa ahaya na, wu nakə maraha eye mə dərəv ɲgay aye.»

*Gay hay sulo*

*Mata 7.24-27*

<sup>46</sup> Yesu a gwadatay sa: «Ka zalumeŋ a neŋ “Bəy Maduƙweŋ, Bəy Maduƙweŋ” na, hərwi meƙe? Ada wal faya ka gumeƙe wu nakə na tsikakuƙumeƙe bay sa tuk na, kəkay?

<sup>47</sup> Tsənnum, na dakuƙumeƙe ha ndo nakə a peŋ bəzay ta dədik aye. Neŋgeye na, a pay zləm a bazlam ga lele. Kə pay zləm na, a ge ha məsler tə bazlam nakə a tsəne aye.

<sup>48</sup> Neŋgeye a ndzəƙit bo na, ta ndo nakə a say madəzle gay aye. A dazlay na, a la na mədök i gay siƙuk lele. A ndəv ha məle na, a dəzla ahaya mədök i gay ɲgay niye ma bəd tə ƙwar lele. Tsa na, a ɲgar na gay niye tuk. Yam a pa na, mazaw a yaw ɲgaf ka gay ɲgay niye na, dādā a mba faya mambəzle ha bay, hərwi madəzla eye lele.

<sup>49</sup> Aya ane tuk na, ndo nakə a tsəne bazlam ga ada kə ge ha məsler bay na aye, neŋgeye dərmaḱ a ndzəkɪt bo ndo nakə a say məge gay aye. Ane tuk na, a dazlay kwayaŋŋa ze məle na mədok eye. A pa na mədok eye təhas ka dala tsa. A ndəv na, yam a pa. Mazaw i magayam hay ŋgaf ti yaw ka gay niye na, kwayaŋŋa bərem a mbəzl, tsekək yam a həl na gay niye. A mbəzl na, liyeh liyeh kwa tsekweŋ ka ləkaw bay.»

## 7

### *Gədaŋ i Yesu a ze mədahaŋ* *Mata 8.5-13*

<sup>1</sup> Yesu a ndəv ha mətsikatay a ndo niye hay ka təv ŋgay aye na, a həl bo a ye a Kafernahum.

<sup>2</sup> Ma Kafernahum na, ndo i Roma wuray andaya neŋgeye bagwar i sidzew. Ndo i məsler ŋgay andaya a wuda na haladzay. Ndowe ye niye na, bo a wur faya haladzay.

<sup>3</sup> Bagwar i sidzew niye a tsəne ndo hay faya ta tsikiye ka Yesu na, a slər ndo hay mə walaŋ i madugula i Yahuda hay. A slər tay ha na, hərwi ada tā zalayaw mā yaw mā mbəl ha ndo i məsler ŋgay niye.

<sup>4</sup> Ndo niye hay ti ye, tə ndisl ka təv i Yesu na, ta dazlay məgay amboh haladzay. Tə gwaday: «Bagwar i sidzew may a gwadaka: “Dara mbələŋ ha ndo i məsler ga tey.” Ka ye, ka dzəna na ndowe ye niye na, lele.

<sup>5</sup> Neŋgeye na, ndo lele eye. A wuda slala kway haladzay. Ada maa dəzlakway gay i maɖuwule me na, neŋgeye.»

<sup>6</sup> Yesu a tsəne andza niye na, a lətse, ti ye ka bo dziye. Mazlambar nəteye bəse tə gay i bagwar i sidzew. Bagwar i sidzew niye a slər aw ndo hay ka təv i Yesu. Ti yaw tə gwaday: «Bəy Maduweŋ, tə gwadaka na, kə ye gər madayaw sa bay. Neŋ na sla da, nəkar kə ye a gay ga bay.

<sup>7</sup> Hərwi niye, neŋ həreŋ na sla mede naha ka təv yak bay. Ane tuk na, ka tsik bazlam yak nəte na, ndo i məsler ga ma mbəliye segey.

<sup>8</sup> Neŋ na, faya na rəhay ha gər a bagwar ga ada sidzew ga hay ta rəheŋ ha gər dərmaḱ. Na gwaday a ndo nəte mə walaŋ tay “Do!” na, ma diye. Na gwaday a ndo neŋgeɖ “Dara!” na, ma deyewe ye. Na gwaday a beke ga “Ge nakay!” na, ma giye.»

<sup>9</sup> Yesu a tsəne bazlam i bagwar i sidzew niye na, a yay a gər lele. A mbəda me a diye i ndo neheye tə zəŋgal naha aye. A gwadatay: «Sər um ha na, daɖa neŋ na huta slala i mədzal gər nakay bay, kwa ma Israyel.»

<sup>10</sup> Tsa na, ndo neheye tə sləra tay ahaya aye ta mbəda gər a gay i bagwar i sidzew niye. Ti ye naha na, ndo i məsler i sidzew niye kə mbəl tsiy. Neŋgeye zay zay!

<sup>11</sup> Ma dəba eye na, Yesu a ye a gəma eye andaya tə zalay Nay. Gawla ŋgay hay tə ndo hay haladzay tə pay bəzay.

<sup>12</sup> Ahəl nakə mazlambar ta ndisliye ta fələkwiye a wuzlahgəma niye na, tə dzəgər ta ndo hay faya ta zliye mədahaŋ ta diye ha ka me tsəvay. Maa mət na, wawa i madakway i ŋgwas wuray. Wawa ŋgay na, nəte eye niye. Ndo i gəma niye haladzay tə laka na ŋgwas niye ka da tsəvay.

<sup>13</sup> Yesu a ŋgatay na, madakway i ŋgwas niye a gay mə bo, a gwaday: «Kə tuwa sa bay.»

<sup>14</sup> Tsa na, a ye a lamay a hubok niye faya ta zliye ha mədahaŋ aye. Ndo məzle mədahaŋ hay tə lətse. Yesu a gwad: «Gawla, faya na gwadakeye, lətse!»



15 Mədahaŋ niye a lətse, a ndza. Tsa na, a dazlay a mətšike me. Yesu a zla na a vəlay a may ŋgay.

16 Ndo niye hay tebiye ka təv eye niye ta dzədzar. Nəteye tebiye ta zambadəy a Mbəlom, tə gwad: «Ndo mədəe ha bazlam i Mbəlom bagwar eye ki yaw a walaŋ kway! Mbəlom ki yaw madzəne ndo ŋgay hay.»

17 Wu niye Yesu a ge aye a dā zləm ka dala i Yahuda tebiye ta dala neheye a mbay naha aye.

*Yesu ta Yuhana  
Mata 11.2-19*

18 Gawla i Yuhana hay ta təkər wu neheye Yesu a ge aye a Yuhana. Yuhana a tsəne na, a zal ndo hay mə walaŋ i gawla ŋgay niye hay sulo.

19 Tsa na, a slər tay ha ka təv i Bəy Maduwerŋ Yesu. A slər tay ha na, tā ye tātətsah faya, tā gwadəy: «Nəkar na, Kəriste nakə ma deyeweye aye dāw? Kəgəbay nəmaā həba ndo mekeleŋ dāw?»

20 Gawla i Yuhana niye sulo eye ti ye. Tə ndisl ka təv i Yesu na, tə gwadəy: «Yuhana madzəhube ndo a yam a sləramaya ahaya ka təv yak matsətsehe fakaya, a gwad nəmaā gwadaka: Nəkar na, Kəriste nakə ma deyeweye aye dāw? Kəgəbay nəmaā həba ndo mekeleŋ dāw?»

21 Ahəl eye niye, Yesu faya ma mbəliye tay ha ndo hay haladzay abəra ma dəvats ada tə bo nakə a wurawa fataya aye. A mbəl tay ha gər mavuwe hay, a həndəkətay na dərə a guluf hay.

22 Tsa na, Yesu a mbədətay ka bazlam i ndo niye hay Yuhana a slər tay naha ka təv ŋgay aye tuk, a gwadətəy: «Gwadumay na, guluf hay tə ŋgatay a dərə, ndo matəra eye hay ti ye lele, ndo madəgwadə eye ta mbəl suwud suwud, mandək hay tə tsəne zləm, mədahaŋ hay ta lətsew a sifa, ndo i mətəwak ta tsəne Labara Ŋgwalak eye.»

23 Yesu a gwadətəy sa: «Məŋgwese ka gər i ndo nakə kə gər ha mədzal gər abəra ka neŋ bay aye!»

24 Gawla i Yuhana hay ti ye wu tay na, Yesu a dazlay mətšike ka gər i Yuhana. A tsikatay a ndo hay haladzay, a gwadətəy: «Ka yum a kəsaf mata zəbaw na, ka mey? Ka zəbumaw ka guzer nakə mətasl faya ma bəliye ha aye dāw? A'ay andza niye bay.

25 Aya anə kəla ka yum ka zəbumaw na, ka mey? Ka zəbumaw na, ka ndo malambadə bo eye tə peteked lele eye dāw? Tsukudu kəkay? Ane tuk na, ndo neheye tə pa ka bo peteked lele eye ada wu tay hay lele eye na, nəteye mandza eye na, mə gay i bəy hay.

26 Ka yum mata zəbaw na, ka wuye mey? Ka zəbumaw na, ka ndo mədəe ha bazlam i Mbəlom dāw? Ayaw, neŋgeye ndo mədəe ha bazlam i Mbəlom ada neŋ faya na gwadəkumeye, neŋgeye a ze ndo mədəe ha bazlam i Mbəlom.

27 Yuhana na, ndo nakə tə watsa a Derewel aye, Mbəlom a gwad: «Neŋ na sləriye naha ndo mədəe ha bazlam ga kame yak.

Ma lambadəakeye na tsəved.\*»

28 Yesu a gwadətəy sa: «Sərum ha na, mə walaŋ i ndo zezeŋ hay tebiye ndo nakə a ze Yuhana aye na, andaya bay. Ane tuk na, ndo nakə neŋgeye tsekweŋ makətsa eye ma Bəy i Mbəlom aye na, a ze Yuhana.»

29 Ndo hay tebiye tə pa zləm ka bazlam ŋgay, kwa ndo matsekele dzaŋgal hay. Hərwi tə sər wu nakə a tsik aye na, bazlam i Mbəlom dedək. Ada Yuhana ka dzəhüb tay ha a yam dedək.

\* 7:27 Malasi 3.1, Madayaw abəra ma Ezipt 23.20.



30 Ane tuk na, Farisa hay ta ndo mædzanḡawa bazlam i Mbəlom mapala eye ta kal ha wu nakə a say a Mbəlom haḡe mæge hærwi tay aye ada ta kərah Yuhana madzəhuḡe tay hay a yam.

31 Yesu a gwadatay sa: «Na ndzəkitiye tay hay ndo neheye bəgom aye na, tə mey? Na ndzəkitiye tay ha bo na, tə mey?»

32 Ta ndzəkīt bo na, ta wawa neheye mandza eye ka pələd nakə ndo hay tə hayawa faya gər aye. Siye hay faya ta wudatay naha a siye hay, tə gwadatay: “Nəmaa fakum naha fagam i məhetse, ka hatsum bay, nəmaa gakum naha dəmes i mədahan na, ka tuwum bay.”

33 Andza niye, Yuhana madzəhuḡe ndo a yam, a ndayawa wu mənday bay, a sawa guzom bay. Nəkurom ka gwadum: “Nenḡeye na, məsəfəre nakə nḡwalak eye bay aye mə bo nḡay.”

34 Neḡ Wawa i Ndo na yaw, na nda wu mənday ada na sa wu məse, ka gwadum: “Zəbum ka ndo nakay. A dzala i nḡay na, ka wu mənday ada ka məse guzom. Nenḡeye na, dzam i ndo matsekele dzanḡal hay ta ndo i mezeleme hay.”

35 Ane tuk na, wawa i Mbəlom hay tebiye tə sər ha, metsehe i Mbəlom na, dedək.»

### *Mawudə bo na, hohway i mape se mezeleme*

36 Farisa wuray a zalay a Yesu mata nde wu mənday mə gay nḡay. Yesu a ye a gay i ndo niye. Ti ye naha na, ta dazlay a mənde wu mənday.

37 Ma gəma niye na, nḡwas wuray andaya mezeleme aye. A tsəne Yesu andaya mə gay i Farisa niye faya ta ndiye wu mənday na, a ye a gay i ndo niye. Dos nḡay mə həlay maraha eye tə mal nakə a ze huḡḡa aye.

38 A ye naha, a lətse a dəba i Yesu bəse tə sik nḡay hay. Tsa na, a tuwa ta yam dərə. A bara na sik i Yesu ta yam dərə nḡay niye. Tsa na, a takad na ta məkwets i gər nḡay. A gəs na ka bo sik niye ada a mbəda faya mal nḡay niye tuk.

39 Farisa niye a zalay a Yesu ka wu mənday aye a nḡatay andza niye na, a tsik ma mədzele gər nḡay, a gwad: «Ndo nakay na, ndo mədə ha bazlam i Mbəlom bay! Nḡwas nakay faya ma tətaliye faya aye na, mezeleme eye. Ada nḡwas nakay mezeleme eye na, a sər ha bədaw!»

40 Tsa na, Yesu a sər wu nakə Farisa niye a dzala aye. A gwaday a Farisa niye: «Simon, a seḡ mət sikaka wu andaya.»

Simon a mbəday faya: «Tsik me, Miter.»

41 Yesu a gwaday: «Ndowe ye hay andaya sulo. Ndowe ye niye hay sulo aye na, gwedere i ndo fataya. Ndo nenḡed na, ma hamiye kwar i suloy temerre zlam. I ndo nenḡed ma hamiye suloy kuro kuro zlam.

42 Ane tuk na, ndo neheye sulo aye na, tə sla məheme gwedere i ndo niye bay. Ndo niye a gəratay ha gwedere nḡay a nəte ye neheye sulo aye tebiye.» Yesu a təkəray andza niye na, a gwaday: «Mə walan tay neheye sulo aye mata wudə ndo niye ka zal na, way?»

43 Simon a mbəday, a gwaday: «Na dzala maa wuda ndo niye ka zal na, ndo nakə kwar i suloy faya temerre zlam aye.»

Yesu a gwaday faya: «Dedək, ka mbəda faya na, lele.»

44 Tsa na, Yesu a mbəda me a diye i nḡwas. A gwaday a Simon: «Simon ka nḡatay a nḡwas nakay ba? Na yaw na, a gay yak dūh bədaw? Ada nəkar ka tadenew yam hærwi məbere ha sik ga bay. Aya ane, nḡwas nakay na, kə beren na sik ga ta yam dərə nḡay ada ka takad na ta məkwets i gər nḡay bədaw?»

<sup>45</sup> Nəkar, ka təma ga a gay yak tə mægəse ga ka bo bay. Ane tuk na, neŋgeye na, kwa i madayaw ga kananə na, faya ma gəsiye ka bo sik ga.

<sup>46</sup> Nəkar na, ka mbədeŋ mal ka gər bay. Ane tuk na, neŋgeye na, ka mbədeŋ mal ka sik.

<sup>47</sup> Hərwi niye sər ha na, mawuđe bo ŋgay nakə a wuda ga haladzay aye. A da ha na, mezeleme ŋgay neheye a ge haladzay aye na, na pəsay ha tebiye. Ane tuk na, i ndo nakə tə pəsay ha mezeleme ŋgay tsekweŋ aye na, neŋgeye dərma k a wuda ndo na, tsekweŋ dərma k.

<sup>48</sup> Tsa na, Yesu a gwada y a ŋgwas niye: «Ŋgwas, mezeleme yak kə pəsa.»

<sup>49</sup> Ndo niye hay faya ta ndiye wu mənday dziye, tə tsik mə walaŋ tay, tə gwad: «Nakay i ŋgay ndo wuray a dza bo ka məpəsay ha mənese a ndo aye?»

<sup>50</sup> Aya ane, Yesu a gwada y a ŋgwas niye: «Mədzal gər yak kə mbəl kar ha. Do wu yak barbarra.»

## 8

### *Ndo neheye tə pay bəzay a Yesu aye*

<sup>1</sup> Ma dāba eye na, Yesu a ye a walaŋ i gay hay ta gəma hay. A ye a həhal mə dəma na, a da ha Labara Ŋgwalak eye i Bəy i Mbəlom mə dəma tebiye. Gawla ŋgay hay kuro gər eye sulo tə paway bəzay.

<sup>2</sup> Ŋgwas neheye Yesu a həhar fataya abəra fakalaw aye ta neheye a mbəl tay ha abəra ma dāvats aye ta zəŋgal na dərma k. Nəteye na: Mari nakə tə zalay Mari Magədala eye, Yesu a həhar faya abəra Fakalaw hay tasəla aye;

<sup>3</sup> Zan ŋgwas i Kuza neŋgeye ndo mægəse dala i Herod; Suzan; ada ta ŋgwas hay wal wal neheye ta dzənawa Yesu ta gawla ŋgay hay tə wu tay hay aye.

### *Dzeke i ndo masləge*

#### *Mata 13.1-9; Markus 4.1-9*

<sup>4</sup> Ndo hay haladzay ti ye naha ma gəma hay wal wal. Yesu a ŋgatay a ndo niye hay ti ye naha haladzay tə haya gər ka təv ŋgay na, a tsikatay me ta dzeke a gwada y a y:

<sup>5</sup> «Ndo wuray a ndohwaw abəra mə gay. A həl hulfe ŋgay a ye ha a pesl mata sləge. A ye naha na, a dazlay a masləge. Ahəl nakə faya ma kutsiye hulfe ŋgay a guvah aye na, siye hay tə kuts ka tsakay i tsəved. Hulfe niye na, ndo hay ta mbərasla na, diyeŋ hay tə pala na tebiye.

<sup>6</sup> Siye a dəf ka sik i pələf. Tə ndzohwaw na, kwayaŋna tə kula heryew heryew. Tə kula na, hərwi ta huta yam ma bəf bay.

<sup>7</sup> Neŋged a dəf a gay i dak. Dak niye hay tə gəl. Tsa na, dak niye hay tə ŋgədatəsa na hulfe niye a ndzohwaw aye, kwa hulfe niye hay ta ge bo bay ada ta nah bay.

<sup>8</sup> Ane tuk na, siye hay tə kuts ka təv lele eye. Tə ndzohwaw ada tə gəl. Tə gəl na, tə nah lele. Makwehe nəte na, wur eye faya temerre.»

Yesu a gwada y a sa: «Ndo nakə zləm andaya faya mətəne aye na, mā tsəne lele!»

### *Yesu a ge məsler ta dzeke na, hərwi mey?*

#### *Mata 13.10-17; Markus 4.10-12*

<sup>9</sup> Ma dāba eye na, gawla ŋgay hay ta tsətsah faya, tə gwada y a: «Dzeke nakə ka tsik aye na, a say məgwede mey?»

<sup>10</sup> Yesu a mbədatay faya, a gwada y a: «Nəkurom na, Mbəlom kə dākum ha wu nakə maŋgaha eye ma bəy ŋgay aye. Ane tuk na, ndo siye hay ta tsəniye wu hay na, ta dzeke. Andza niye:

“Ta sliye mazəbe faya, ane tuk na, ta ɲgateye bay.

Ta sliye faya mətəne, ane tuk na, andza məgwede mey na, ta tsəniye bay.\*”»

*Yesu a da ha dzeke i ndo maslāge  
Mata 13.18-23; Markus 4.13-20*

<sup>11</sup> Yesu a gwadatay sa: «Dzeke nakay a say məgwede na, anarj: Hulfe na, bazlam i Mbəlom

<sup>12</sup> Ndo siye hay ta ndzəkit bo ta tsakay i tsəved nakə hulfe a kuts faya aye. Nəteye na, tə tsəne bazlam i Mbəlom. Tsa na, Fakalaw a yaw a buwa na bazlam i Mbəlom niye tə tsəne aye abəra mə dərev tay. A buwa na na, hərwi ada tā dzala ha faya bay ada tā təma bay.

<sup>13</sup> Siye hay ta ndzəkit bo ta təv nakə bətekwe andaya faya haladzay bay aye. Tə tsəne bazlam i Mbəlom ada ta təma tə məɲgwese eye lele. Ane tuk na, ta huta mape zləlay mə bazlam i Mbəlom bay. Dəretsətseh tə masəpete i Fakalaw a ndzatay a gər na, tə gər ha mədzele gər abara ka Mbəlom.

<sup>14</sup> Hulfe neheye tə kuts a gay i dak hay aye na, ta ndzəkit bo ta ndo neheye tə tsəne bazlam i Mbəlom aye. Ane tuk na, bor i mändzibəra, bor i zlele, ta bor i wu mekelej eye hay wal wal a ye tay a bo. Wu niye hay tə ɲgədatsa na bazlam i Mbəlom nakə mə dərev tay aye. Bazlam i Mbəlom dərma kə huta məvəle hohway bay.

<sup>15</sup> Hulfe nakə a kuts ka təv lele eye na, ta ndzəkit bo ta ndo neheye tə tsəne bazlam i Mbəlom aye na, tə pa na a dərev tay lele. Tə gay metsehe lele. Bazlam i Mbəlom a gəl mə dərev tay, tə nah lele.»

*Dzeke i lalam  
Mata 4.21-25*

<sup>16</sup> Yesu a tsikatay dzeke sa, a gwadatay: «Dadā ndo ma zlaweye lalam ɲgay ma piye faya ako ada ma hurəkwiye faya gəse daw? Kəgəbay ma piye na a dəbə i sləlah daw? Duh ma piye na na, ka wu mape lalam hərwi ada ndo neheye ta fələkwiye a gay aye mē dəvatay dzaydzay.

<sup>17</sup> Sərūm ha na, wu neheye mənɲgaha eye hay aye na, ta zəbiye ɲgəray ɲgəray ta həpat. Ada wu neheye ndo hay tə sər bay aye na, ndo hay ta ta səriye mə dzaydzay.»

<sup>18</sup> A gwadatay sa: «Gumay metsehe a mətəne wu nakə ka pawumay zləm aye. Hərwi ndoweye kə pay zləm lele na, Mbəlom ma səkahiye ha mətəne ada mē tsəne lele. Ane tuk na, ndo nakə a say mətəne bay aye na, kwa tsekweɲ eye nakə a tsəne aye na, ta buwiye na.»

*Ndo i Yesu hay  
Mata 12.46-50; Markus 3.31-35*

<sup>19</sup> May i Yesu ta malamar i Yesu hay ta pəla na Yesu. Ta pəla na na, ta huta na Yesu. Ane tuk na, ta ndisl ka təv ɲgay bay hərwi ndo hay haladzay ka tsəved.

<sup>20</sup> Tə gwadāy a Yesu: «May yak ta malamar yak hay, nəteye ma bəra faya ta tsətsahiye kar. A satay mənɲgataka.»

<sup>21</sup> Ane tuk na, Yesu a mbədātay faya, a gwadatay: «May ga ta malamar ga hay na, ndo neheye faya ta pay zləm a bazlam i Mbəlom ada faya ta giye wu nakə bazlam i Mbəlom a tsik aye.»

*Gədaɲ i Yesu na, a ze mətasl  
Mata 8.23-27; Markus 4.35-41*

<sup>22</sup> Pat wuray na, Yesu a gwadatay a gawla ɲgay hay: «Tsalakwa a kwalalaɲ i yam takwa a diye i dəlöv nənɲged.» Tsa na, tə tsal a kwalalaɲ i yam, ti ye.

\* 8:10 Ezay 6.9.

<sup>23</sup> Ahəl nakə faya ta diye ka gər i yam aye na, Yesu a ndzahəra. A ndzahəra na, kwayan̄na mətasl a vəzl ka gər i dəlov niye ta gədan̄. Tsa na, kwalalan̄ i yam a rah ta yam mazlambar ta kutsiye a yam.

<sup>24</sup> Gawla ŋgay hay ta həndzəd ka təv ŋgay. Ta wuda ka bo, ta pədeke ha Yesu abəra ka məndzehəre. Tə gwadəy: «Bəy may, Bəy may, ka mətakweye!»

Tsa na, Yesu a pədeke, a gay me a mətasl ada a yam. Kwayan̄na mətasl a ndza dədik. Məbəle i wuray kwa tsekweŋ andaya sa bay.

<sup>25</sup> Yesu a gwadətay a gawla ŋgay hay: «Ka yum ha mədzal gər kurom aye a ŋgay!»

Ane tuk na, ta dzədzar haladzay. A gatay hərbəbəkka. Tə gwad mə walan̄ tay: «Nakay na, ndo wuray? A gatay me a mətasl ta yam na, tə gəsəy me aye!»

*Gədan̄ i Yesu na, a ze i Fakalaw*

*Mata 8.28-34; Markus 5.1-20*

<sup>26</sup> Yesu ta gawla ŋgay hay tə ndisl a gəma i Geraseni nakə ta diye i dəlov niye tə zalay dəlov i Galile aye. Niye na, bəse kame i dala i Galile.

<sup>27</sup> Yesu a mbəzlaw abəra mə kwalalan̄ i yam na, ndo wuray a ndzawa ma wuzlahgəma, a ŋgatay a Yesu na, a yaw ka təv ŋgay. Ndoweje niye na, gər a wuway. Kə ndza haladzay a pawa ka bo peteked sa bay ada a hənawa mə gay bay sa tsa. Ane tuk na, a hənawa mə walan̄ i tsəvay hay.

<sup>28</sup> A ŋgatay a Yesu na, kwayan̄na a wuda ta gədan̄. A kal ha bo kame i Yesu. Tsa na, a gwadəy: «Nəkar na, Yesu Wawa i Bəy Mbəlom Fetek. Ka wuda ka neŋ na, mey? Amboh kə geŋ wuray bay tey.»

<sup>29</sup> A tsik andza niye na, hərwi Yesu a gwadəway a fakalaw: «Dara abəra mə bo i ndo nakay.»

Tə dzawaway na sik tə səselek ada tə paway tsalalaw a həlay. Ane tuk na, a ŋgəzlahawa ha wu niye hay tə dzawawa na aye ndərtsətsətse ada fakalaw a yawa ha a təv dərəŋ aye hay abəra mə walan̄ i gay, a kəsaf.

<sup>30</sup> Yesu a tsətsah faya, a gwadəy: «Məzele yak na, way?»

Fakalaw niye a mbəday faya a gwadəy: «Məzele ga na, Haladzay.» A tsikay a Yesu andza niye na, hərwi nəteye haladzay mə bo i ndo niye.

<sup>31</sup> Fakalaw niye hay tə gay amboh a Yesu hərwi ada mə kuts tay a bəd nakə kutsik bagwar eye aye bay.

<sup>32</sup> Ka təv eye niye na, madəras hay andaya faya ta pəliye wu mənday tay hay ma tsəholok wuray. Fakalaw niye hay mə bo i ndo niye tə gay amboh a Yesu hərwi ada mə vəlataŋ tsəved məfələkwe a bo i madəras niye hay. Yesu a vəlataŋ tsəved mede a bo i madəras niye hay.

<sup>33</sup> Tsa na, fakalaw niye hay ti yaw abəra mə bo i ndo niye ti ye, tə fələkwa a bo i madəras hay. Madəras niye haladzay aye ta hwayaw abəra ka mahəmba niye. Ti yaw tə kuts a dəlov niye tebiye, tə dze a dəma.

<sup>34</sup> Ndo mətəkure madəras niye hay tə ŋgatay andza niye na, ta hway, ti ye a wuzlahgəma mata dətay ha labara niye a ndo hay ada a ndo neheye nəteye dərəŋ ta wuzlahgəma aye hay.

<sup>35</sup> Tsa na, ndo hay tə tsəne na, ti yaw mata zəbe naha ka wu nakə a ge bo aye. Ti yaw tə ndislew ka təv i Yesu na, tə ŋgatay a ndo niye fakalaw hay ti yaw abəra mə bo ŋgay aye mandza eye ka təv i Yesu. Anəke na, peteked ka bo ada neŋgeye lele, andza nakə a ndzawa aye sa bay. Tə ŋgatay andza niye na, ta dzədzar.

<sup>36</sup> Ndo neheye labara i gər mavuwe a ge bo ka dərə tay aye nəteye dərmaŋk ta təkəratay labara eye a ndo niye hay ti ye naha, nəteye ta ŋgatay təbey aye. Gər mavuwe niye a mbəl kəkay na, ta təkəratay.

<sup>37</sup> Tə tsəne na, ndo i dala i Geraseni niye tebiye ta tsətsah ka Yesu tə gwaday: «Do abəra ka dala may» hərwi ta dzədzar haladzay. Tsa na, Yesu a tsal a kwalalan i yam hərwi mede abəra ka dala niye.

<sup>38</sup> Ndo nakə fakalaw hay ti yaw abəra mə bo ɲgay aye, a gay amboh a Yesu ada Yesu mə vəlay tsəved mə zəɲgal na. Ane tuk na, Yesu kə vəlay tsəved ka məpay bəzay bay. A gwaday:

<sup>39</sup> «Do a mətagay yak! Təkəratay a ndo hay wu nakə Mbəlom a ge hərwi yak aye, kwa tsekweɲ ka gər ha faya abəra bay.» Tsa na, ndo niye a ye a təkər wu nakə Yesu a ge hərwi ɲgay aye ma wuzlah gay tebiye.

*Gədan i Yesu na, a ze dəvats hay ada a ze mədahan*

*Mata 9.18-26; Markus 5.21-43*

<sup>40</sup> Yesu a maw ma diye i dəlov a diye neɲged na, ndo hay haladzay faya ta həbiye na. Ndo niye hay tə ɲgatay a Yesu na, ta təma na lele.

<sup>41</sup> Tsa na, ndo wuray tə zalay Dzayrus a ye naha dərmak. Neɲgeye na, bəy i gay i maɖuwule me. A ye naha a dəkway gurmets a huvo a Yesu. A gay amboh a Yesu, a gwaday: «Amboh kə ma a gay ga tey.»

<sup>42</sup> A say Yesu mə ye a gay ɲgay na, hərwi dem ɲgay andaya nəte məve ɲgay ma giye kuro gər eye sulo. Dem eye niye na, bo a wur faya ma mətiye.

Ahəl nakə Yesu faya ma diye na, ndo hay haladzay faya ta ɲgədətsiye na kwa tə waray kwa tə waray.

<sup>43</sup> ɲgwas wuray andaya dərmak. ɲgwas eye niye na, dəvats eye. Bambaz a mbədəwayaw abəra mə huɖ. Dəvats eye niye kə ndza faya məve kuro gər eye sulo. Kə dze ha ziele ɲgay haladzay a gay i ndo i sidem hay. Ane tuk na, ndəray nəte kə sla faya məmbəle ha bay.

<sup>44</sup> A ye a walaɲ i ndo niye hay. Tsa na, a həndzəɖ ka təv i Yesu ta dəba, a lamay a me i peteked i Yesu. Kwayaɲna bambaz nakə a mbədəwayaw faya abəra aye a tərəts. A huta zay.

<sup>45</sup> Yesu a tsətsah, a gwad: «Maa lemeɲ, way?» Nəteye tebiye tə sər maa lamay way na, tə sər bay.

Piyer a gwaday: «Bəy ga, ka gwadiye “Maa lemeɲ way” na, ka ɲgatay tə lawara kar ada faya ta ɲgədətsiye kar kwa tə waray kwa tə waray təbədəw.»

<sup>46</sup> Aya ane tuk na, Yesu a gwad: «Ndəray kə lemeɲ, hərwi na sər ha gədan ki yaw abəra mə bo ga.»

<sup>47</sup> ɲgwas niye a sər ta huta na na, a ye ka təv i Yesu tə madzədzere eye. A ye a dəkway gurmets a huvo a Yesu. A təkəray, a lamay hərwi mey ada a mbəl kwayaɲna na, a təkəray kame i ndo niye hay tebiye.

<sup>48</sup> Yesu a gwaday: «Dem ga, mədzal gər yak kə mbəl kar ha. Do wu yak barbarra.»

<sup>49</sup> Ahəl nakə Yesu faya ma tsikeye a ɲgwas niye andza niye na, ta sləraw ndo abəra mə gay i bəy i gay i maɖuwule me niye tə zalay Dzayrus aye. A yaw a gwaday: «Dem yak kə mət. Kə wurdəy me a Miter sa bay.»

<sup>50</sup> Ane tuk na, Yesu kə tsəne, a gwaday a Dzayrus: «Kə dzədzar bay, dzala ha ka neɲ tsa na tsiy, dem yak ma mbəliye.»

<sup>51</sup> Tə ndisl naha a gay i Dzayrus na, kə vəlatay tsəved a ndo hay məfələkwe a gay bay. Ti ye na, ta Piyer, Yuhana ta Yakuba dekdek tsa ta bəba ada ta may i wawa.

<sup>52</sup> Mə gay i mədahan niye na, ndo hay tebiye taɲgof taɲgof, siye faya ta ndəviye kuɖa hərwi wawa niye a mət aye. Yesu a ye naha na, a gwadatay: «Kə tuwum bay. Dem nakay na, kə mət bay, neɲgeye mandzahəra eye.»

<sup>53</sup> Ane tuk na, ndo niye hay tɛ ɲɔwasay dɛla mɛ gɛr, tɛ sɛr lele dem niye na, kɛ mɛt.

<sup>54</sup> Yesu a ye naha na, a gɛs na dem niye mɛ hɛlay ada a gwadɛy ta gɛdanɲ: «Wawa, lɛtse!»

<sup>55</sup> Dem niye a mbɛl. Kwayaɲɲa a lɛtse tsɛkwadɛ. Yesu a gwadatay: «Vɛlumay wu mɛnday.»

<sup>56</sup> Tsa na, bɛba ta may i wawa a gatay hɛrɛbɛkka. Ane tuk na, Yesu a gwadatay: «Wu nakay a tɛra aye na, kɛ tsikumay a ndɛray bay.»

## 9

*Yesu a slɛr gawla ɲgay hay kuro gɛr eye sulo*

*Mata 10.5-15; Markus 6.7-13*

<sup>1</sup> Pat wuray na, Yesu a zalatay a gawla ɲgay hay kuro gɛr eye sulo, a hayatay gɛr. A vɛlatay gɛdanɲ ta mɛzlɛbɛ ka mahɛhere fakalaw hay abɛra ka ndo hay tebiye ada mɛmbɛle tay ha abɛra ma dɛvats tay hay.

<sup>2</sup> Ma slɛriye tay ha na, mata dɛ ha Bɛy i Mbɛlom ada mɛmbɛle tay ha ndo hay.

<sup>3</sup> A tsikatay me a zlɛm, a gwadatay: «Ka deyumeye na, kɛ zlum wuray a halay bay tebiye. Kwa sakwal, kwa gwezem, kwa wu mɛnday, kwa suloy ada kwa way mɛ zla petekedɛ i mɛkelkabo sulo bay.

<sup>4</sup> Ka ndislum a gɛma nakɛ ka deyumeye a dɛma aye na, ndzum mɛ gay nakɛ ta tɛma kurom tɛ mɛɲɔwese aye. Kɛ yum kurom abɛra mɛ gay niye bɛse tsa bay. Ndzum mɛ dɛma hus a pat nakɛ ka deyumeye a gɛma mekelɛɲ eye.

<sup>5</sup> Ada ma gɛma nakɛ ta wudɛ matɛme kurom tɛbey aye na, dum abɛra ma gɛma tay. Ahɛl nakɛ nɛkurom ka tsɛved mazlambar ka gɛrumeye ha tsɛved i gɛma niye na, tɛtɛkum ha bɛtekwey i gɛma tay abɛra ka sik kurom hay. Niye na, ta sariye ha ta tɛma kurom bay.»

<sup>6</sup> Yesu a ndɛvatay ha bazlam ɲgay niye na, tɛ hɛl bo ti ye tuk. Ti ye na, ta hɛhal ma gɛma hay tebiye. Tɛ dɛ ha Labara ɲɔwalak eye. Tɛ mbɛl tay ha ndo i dɛvats hay kwa mɛɲɔgay mɛɲɔgay.

*Herod a dzɛdzar*

*Mata 14.1-12; Markus 6.14-16*

<sup>7</sup> Azlakwa bay, Herod nɛɲɔgeye bɛy ka dala i Galile, a tsɛne wu nakɛ faya ma giye bo aye na, a vɛlay mɛdzal gɛr haladzay. Hɛrwi ndo hay tɛ gwadɛ: «Yuhana madzahuɛ ndo a yam kɛ mbɛlaw abɛra ma mɛdahaɲ.»

<sup>8</sup> Siye hay tɛ gwadɛ: «Ma giye maa yaw na, Eliya.»

Siye hay tɛ gwadɛ sa: «Nɛɲɔgeye na, ndo mɛdɛ ha bazlam i Mbɛlom nɛte mɛ walaɲ i ndo mɛdɛ ha bazlam i Mbɛlom niye hay ahɛl niye a lɛtsew abɛra ma mɛdahaɲ.»

<sup>9</sup> Ane tuk na, Herod a gwadɛ: «Yuhana na, maa dɛs faya abɛra gɛr na, nɛɲ. Ada ndo nakay na tsɛne ndo hay faya ta tsikiye faya na, way?»

Tsa na, a pɛla tsɛved mɛɲɔgatay a Yesu.

*Tapa i dɛfzlam tɛ kɛlɛf sulo*

*Mata 14.13-20; Markus 6.30-44; Yuhana 6.1-14*

<sup>10</sup> Anɛke na, ndo i maslaɲ hay tɛ maw tuk. Tɛ maw ka tɛv i Yesu ta tɛkɛray wu nakɛ tɛ gaw aye. Ma dɛba aye na, Yesu ta ndo i maslaɲ ɲgay hay ti ye abara ka tɛv niye. Ti ye a tɛv aye andaya bɛse ta gɛma nakɛ tɛ zalay Betesayda aye.

<sup>11</sup> Ane tuk na, ndo hay ta sɛr fataya. Tsa na, tɛ patay bɛzay. Yesu a ɲgatatay na, a tɛma tay ha. A dɛtay ha Bɛy i Mbɛlom ada a mbɛl tay ha ndo i dɛvats hay.

12 Mazlambar huwa faya ma giye na, gawla i Yesu hay ta hændzəf ka təv i Yesu. Ti ye naha tə gwadəy: «Gwadətay a ndo neheye na, tã ye a wuzlahgəma ada a gay i ndo neheye tə mbay naha a wuzlahgəma aye. Tã ye mata həne mə dəma ada mata nde wu mənday bəna, kəkay? Hərwi nəkway anəŋ na, ma təv nakə dərəŋ aye.»

13 Ane tuk na, Yesu a gwadətay: «Nəkurom eye vələumatay wu mənday!»

Ta mbəday faya, tə gwadəy: «Tapa i makwala andaya na, zlam ada kələf hay sulo tsa. A saka na, nəməā ye mata səkəməw wu mənday hərwi ndo neheye tebiye daw?»

14 Ndo neheye tebiye ka təv i Yesu aye na, hasləka hay ta giye gwezem zlam.

Yesu a gwadətay a gawla ŋgay hay: «Dum gwadəumatay a ndo hay tã ndza ka dala. Tã ndza bəruk i ndo kuro zlam, kuro kuro zlam.»

15 Tsa na, gawla ŋgay hay ta təma wu nakə a tsikatay aye. Ti ye tə tsikatay a ndo niye hay andza niye. Tə ndza bəruk kuro kuro zlam, kuro kuro zlam.

16 Tsa na, Yesu a həl tapa i makwala zlam tə kələf niye hay sulo aye. A zəba dərə a mbəlom ada a gay naha sişə a Mbəlom hərwi wu mənday niye. A ŋgəna ha ada a vələtay a gawla ŋgay hay hərwi ada nəteye dərma tã ŋgənatay a ndo hay.

17 Gawla i Yesu hay ta ŋgənatay wu mənday niye a ndo hay. Kwa way a nda wu mənday niye ka mərəhe. Tə hayay gər a bəmalə nakə a zəkaw aye na, a rah gwaŋ hay kuro gər eye sulo.

*Dedək eye Yesu na, way?*

*Mata 16.13-19; Markus 8.27-29*

18 Pat wuray na, Yesu faya ma dūwuliye me mahəŋgeye. Gawla ŋgay hay ti ye ka təv ŋgay. Tə ndisl naha na, Yesu a tsətsah fataya, a gwadətay: «Ndo hay tə gwad fagaya, neŋ na, way?»

19 Ta mbəday faya, tə gwadəy: «Siye hay tə gwad nəkar na, Yuhana madzəhuḃe ndo a yam. Ndo mekeleŋ eye hay tə gwad nəkar na, Eliya. Siye hay tə gwad nəkar na, nəte mə walaŋ i ndo mədə ha bazlam i Mbəlom niye hay ahəl niye a lətsew abəra ma mədahaŋ.»

20 Yesu a tsətsah fataya, a gwadətay: «Ada nəkurom ka gwadum i kurom, neŋ na, way?»

Tsa na, Piyer a gwadəy: «Nəkar na, Kəriste, ndo nakə Mbəlom a sləraw aye.»

21 Tsa na, Yesu a gatay me, a gwadətay: «Kã dūmay ha a ndəray bay.»

22 A gwadətay sa: «Neŋ Wawa i Ndo na, kutoŋ na siye dərətsətseh haladzay. Madugula i Yahuda hay, bagwar hay i ndo neheye tə vələway wu a Mbəlom aye ta ndo mədzaŋgawa bazlam i Mbəlom mapala eye na, nəteye ta wudiye ga bay. Ta kaliye ga ha, ta ta kədiye ga. Ane tuk na, na həniye sulo mamahkar eye na, na lətseweye abəra ma mədahaŋ.»

*Məpay bəzay a Yesu na, kəkay?*

*Mata 16.20-28; Markus 8.30-9.1*

23 Tsa na, Yesu a zalatay a ndo hay ta gawla ŋgay hay ka təv ŋgay. A gwadətay a nəteye tebiye: «A say a ndoweye məpeŋ bəzay na, mə gər ha wu nakə a say a dərəv ŋgay aye. Mã zla mayako mazləlmbada eye ada mã peŋ bəzay pat pat.

24 Andza niye, ndo nakə a say mətəme ha məsəfəre ŋgay aye na, ma dziye ha dūh. Ane tuk na, ndo nakə ma dziye ha məsəfəre ŋgay hərwi ga aye na, ma təmiye ha dūh.

25 Tadə ndoweye kə huta zlele i məndzibəra tebiye a neŋgeye, ane tuk na, kə dze ha məsəfəre ŋgay na, ŋgama ŋgay aye na, mey?



<sup>26</sup> «Tadə ndoweyə ka kərah ga ada kə datay ha bazlam ga a ndo hay bay na, neŋ dərmak na ta kərahiye na. Na ta kərahiye na na, ahəl nakə neŋ Wawa i Ndo na deyeweyə ta məzlaḅ ga ada ta məzlaḅ i Bəba Mbəlom ada ta gawla i Mbəlom hay aye.»

<sup>27</sup> Yesu a gwadatay sa: «Sərum ha na, ndo siye hay mə walaŋ kurom neheye anəke kanaŋ aye, nəteye na, ta mətiye zuk bay. Ta ta mətiye na, ta ŋgateye tə dəre tay a Bəy i Mbəlom nakə ma ləviye bəy ŋgay ta gədan aye təday.»

*Bo i Yesu a mbəda*

*Mata 17.1-8; Markus 9.2-8*

<sup>28</sup> Ma dəba i bazlam ŋgay niye a tsik aye a ndza məhəne tsamahkar na, a zalay a Piyer, a Yuhana, ada a Yakuba, ti ye tə tsal a mahəmba. Ti ye a dəma na, mata dūwule me.

<sup>29</sup> Ahəl nakə Yesu faya ma dūwuliye me aye na, dəre ŋgay a mbəda. Peteked ŋgay a mbəda herre kuḁekuḁek, a sləda haladzay.

<sup>30</sup> Kwayanŋa, ndo hay sulo ti yaw ka təv ŋgay. Nəteye faya ta tsikiye me. Ndowneyə niye hay na, Musa ta Eliya.

<sup>31</sup> Ti yaw na, tə dzaydzay i Mbəlom. Tə tsik ka məsler i Yesu nakə ma ta ndaviye ha ta mədahaŋ ŋgay ma Zerozelem aye.

<sup>32</sup> Ahəl nakə ndo niye hay sulo aye faya ta tsikiye me ta Yesu aye na, Piyer ta ndo neheye nəteye dziye na, nəteye mandzahəra eye. Ane tuk na, ta pədeke abəra ka mandzehəre. Ta pədeke na, tə ŋgatay a dzaydzay i Yesu ada tə ndo niye hay sulo malətsa eye hay ka təv i Yesu aye.

<sup>33</sup> Ka təv nakə ndo niye hay ta diye wu tay abəra ka təv i Yesu aye na, Piyer a gwaday a Yesu: «Bay ga! Lele na, ndzakwa kanaŋ. Nəmaa karuwakumeyə madzawadzawa mahkar, nəte i yak, nəte i Musa ada nəte i Eliya.» Piyer a tsik andza niye na, a sər wu nakə ma tsikiye bay.

<sup>34</sup> Ahəl nakə faya ma tsikiye andza niye na, pazlay a mbəzlaw a dərəzl tay ha dezəgələm. Gawla i Yesu niye hay mahkar eye tə ŋgatay a pazlay niye a dərəzl tay ha aye na, ta dzadzar haladzay.

<sup>35</sup> Ma pazlay niye na, mətsike me a tsənew abəra mə dəma, a gwad: «Nakay na, wawa ga. Na zla na, neŋgeye. Pumay zləm a wu nakə ma tsikakumeyə!»

<sup>36</sup> Ma dəba i bazlam niye, tə ŋgatay na, a Yesu mahəŋgeye. Gawla i Yesu niye mahkar aye wu nakə tə ŋgatay aye na, ta təkəray a ndəray zuk bay. Tə ndza wu tay tete.

*Yesu a mbəl ha wawa wuray mahorvov a gay*

*Mata 17.14-18; Markus 9.14-27*

<sup>37</sup> Tədə eye na, Yesu ta gawla ŋgay niye hay mahkar aye, tə mbəzlaw abəra mə mahəmba. Faya ta mbəzlaweyə na, ndo hay haladzay ti yaw mədze gər tə Yesu.

<sup>38</sup> Mə walaŋ i ndo niye haladzay aye na, ndoweyə andaya a pa bo ka mawude. A gwad: «Miter! Amboh zəba ka wawa ga nakay tey! Wawa ga mekeleŋ eye andaya bay. Neŋgeye nəte ŋwenəŋ.

<sup>39</sup> Fakalaw a gəsawa na. A gəsawa na na, ta gədan. A wudawa ka bo ada a kalawa ha ka dala bəra bəra. Makukufay a yawaw ka bazlam. A gawa ha dəretsətəseh haladzay ada a yawa faya abəra bəse bay.

<sup>40</sup> Na gatay amboh a gawla yak hay tā həhar faya abəra fakalaw tey na, tə mba faya bay.»

<sup>41</sup> Yesu a tsəne andza niye na, a wuda, a gwad: «Nəkurom neheye anəke, ka dzalum ha ka Mbəlom bay aye. Na zliye ŋgatay hərwi kurom na, məndze hadzəgay. Ahe! Do, zla ahaya wawa yak eye kanaŋ!»



42 Tsa na, Bəba i wawa a ye a zla ahaya wawa niye. Ahəl nakə wawa niye ma ta husiye naha ka təv i Yesu kədiyya na, mahorvov a kal ha ka dala bəra. A tambolom ha ka dala ta gədaŋ.

Kwayaŋŋa Yesu a ŋgəraz ka mahorvov niye. A mbəl ha wawa ada a vəlay ha a bəba ŋgay.

43 Ndo niye hay tebiye ka təv niye a gatay hərbaəbəkka. Tə gwad: «Ta dedek Mbəlom na, gədaŋ eye.»

*Yesu a da ha madahan ŋgay*

*Mata 17.22-23; Markus 9.30-32*

Nəteye tebiye a gatay hərbaəbəkka. Yesu a gwadatay a gawla ŋgay hay:

44 «Wu nakə na dakumeye ha anəke aye na, pum na a wuzlah i mədzaŋ gər kurom lele: Neŋ Wawa i Ndo na, ta gəsiye ga, ta vəlateye ga ha a həlay a ndo hay.»

45 Ane tuk na, gawla ŋgay hay ta tsəne bazlam ŋgay niye bay. Mətsəne ŋgay eye andza məgweđe kəkay na, maŋgaha eye hərwi ada tā tsəne bay. Ada zluwer a gatay matsətsehe ka Yesu ka gər i bazlam eye niye.

*Matəme wawa hay*

*Mata 18.1-5; Markus 9.33-37*

46 Gawla i Yesu hay ta dazlay məkəde wuway mə walaŋ tay. Tə kəf wuway na, məsər ha bagwar eye mə walaŋ tay na, way?

47 Ane tuk na, Yesu a sərətay naha ka wu nakə tə dzala aye. Tsa na, a zla wawa. A lətse ha ka təv ŋgay.

48 A gwadatay: «Ndowneye ka təma na wawa nakay lele hərwi nakə a wuđa ga aye na, a təma na, neŋ. Ndowneye ka təma ga na, a təma na, ndo nakə a sləra ga ahaya aye. Hərwi ndo nakə wawa eye mə walaŋ kurom aye, maa təra bagwar eye na, neŋgeye duh.»

*Ndo nakə kə neŋ dəre bay aye na, ndo ga*

*Markus 9.38-40*

49 Ma dəba eye na, Yuhana a gwaday: «Bəy Maduweŋ, nəmaa ŋgatay a ndowneye faya ma həhariye fakalaw abəra ka ndo ta məzele yak. A samay həbe məgay me hərwi neŋgeye na, mə walaŋ kway bay.»

50 Ane tuk na, Yesu a mbəday faya a gwaday: «Kā gumay me bay. Hərwi ndo nakə kə nakum dəre bay aye na, neŋgeye ndo kurom.»

*Yesu aye a Zerozelem*

51 Həlay nakə kutoŋ Yesu ma diye abəra ka məndzibəra aye mazlambar kə ndislew. Tsa na, a həl bo ta dedek eye mede a Zerozelem.

52 A slər ndo i məsler ŋgay hay kame. Ti ye naha tə fələkwa a gəma i Samari hərwi mede mələve ha bo tə mede i Yesu nakə ma diye a dəma aye.

53 Ane tuk na, ndo i gəma niye hay ta wuđa mā ye naha a gəma tay bay. Ta wuđa bay na, hərwi nakə faya ma diye ta diye i Zerozelem aye.

54 Yakuba ta Yuhana tə tsəne andza niye na, tə gwaday a Yesu: «Bəy Maduweŋ! A saka na, nəmaə tsətsahaw ako mə mbəlom mā mbəzlaw fataya matəma tay ha abəra mə dəma daw?»

55 Yesu a tsəne me tay niye na, a mbəda me ka təv tay a gatay me.

56 Tsa na, ti ye a gəma mekelen eye.

*Gawla i Yesu hay tə vəl bo tay peteh ka məpay bəzay a Yesu*

*Mata 8.19-22*

57 Ahəl nakə nəteye ka tsəved faya ta diye na, ndo wuray a yaw ka təv i Yesu, a gwaday: «Kwa a ŋgay ka diye na, na pakeye bəzay.»

<sup>58</sup> Yesu a gwaday: «Mezerew hay na, bəf tay andaya hərwi məhəne mə dəma, diyen hay dərmak gay tay andaya. Ane tuk na, neŋ Wawa i Ndo na, təv ga andaya nakə na həniye mə dəma hərwi mazəzükwe bo aye bay.»

<sup>59</sup> Yesu a gwaday a ndo mekelen eye: «Peŋ bəzay.»

Ane tuk na, ndo niye a gwaday a Yesu: «Bəy ga! Vələŋ tsəved nā ye, nā la na bəba ga təday.»

<sup>60</sup> Yesu a mbəday faya a gwaday: «Gər ha mədahan hay tā la bo tay. Nəkar, do ta da ha Bəy i Mbəlom.»

<sup>61</sup> Ndo mekelen eye a yaw ka təv i Yesu sa a gwaday: «Bəy Maduweŋ, neŋ na, na pakeye bəzay. Aya ane, vələŋ tsəved nā ye, nā tsikatayaw me a ndo i gay ga hay təday.»

<sup>62</sup> Yesu a da ha parakka, a gwaday: «Ndowne faya ma fətiye tə sla hay na, ma sliye faya mazəbe dəre ta dəba bay. Andza niye ndowe ye niye na, ma sliye faya məge məsler i Bəy i Mbəlom bay.»

## 10

### *Yesu a slər tay ha gawla ŋgay hay kuro tasəla gər eye sulo*

<sup>1</sup> Ma dəba eye na, Yesu a pala gawla ŋgay mekelen eye hay kuro kuro tasəla gər eye sulo hərwi məsləre tay ha. A slər tay ha na, sulo sulo kame ŋgay, a wuzlahgəma hay tebiye ada a təv neheye bo ŋgay eye a say mede a dəma aye dərmak.

<sup>2</sup> A pala tay ha na, a gwadatay: «Wu mənday andaya haladzay məpele ka dala. Ane tuk na, ndo məpele na abəra ka dala na, nəteye haladzay bay. Hərwi niye, gumay amboh a ndo i guvah mā səkah ha ndo i məsler hay hərwi məpele wu mənday abəra ka dala.

<sup>3</sup> «Dum! Na sləriye kurom ha na, nəkurom ka tərüm andza wawa i təbaŋ hay a wuzlah i ndo neheye nəteye andza kəra i peŋ hay aye.

<sup>4</sup> Ka deyumeye na, kâ həlum suloy a həlay bay, kâ zlum bəboro bay, kâ həlum tahərak kurom hay a sik bay, kâ ləsum ka tsəved hərwi mətsikay me a ndo bay.

<sup>5</sup> «A gay nakə ka deyumeye a dəma aye na, lahum məgwədə: “Zay mā ndza ka gay nakay.”

<sup>6</sup> Tadə ndəray ka təma kurom mə gay niye lele na, zay kurom ma ndziye ka gay niye. Tadə ka təma zay kurom bay na, mum ha zay kurom.

<sup>7</sup> Ndo nakə ka təma kurom aye na, ndzum mə gay ŋgay. Wu nakə ta vəlakumeye na, ndayum, ada sum wu məse nakə ta vəlakumeye, hərwi ndo mäge məsler na, kutoŋ ma hutiyə mərəbe ŋgay.

<sup>8</sup> «Tadə ka ndislum a wuzlahgəma waray waray ta təma kurom na, ndayum wu nakə ta vəlakumeye.

<sup>9</sup> Mbəlum tay ha ndo i dəvats niye hay ma gəma niye ada kâ gwadumatay a ndo i gəma niye hay: “Bəy i Mbəlom ka həndzədaw fakuma.”

<sup>10</sup> Ane tuk na, kâ yum kwa a gəma waray, waray, ta təma kurom bay na, dum kurom abəra ma gəma niye. Dum ka tsəved ada gwadumatay a ndo hay tebiye:

<sup>11</sup> “Burhway i gəma kurom nakay a mətsamay ka sik aye na, nəmaa tətəkwaqum na kurom. Duh bay! Sərüm ha na, Bəy i Mbəlom ka həndzədaw fakuma.”

<sup>12</sup> Sərüm ha pat i sariya i Mbəlom na, sariya i ndo i gəma niye na, ma ziye i gəma i Sodom.\*»

\* 10:12 Madazlay i wu hay 19.1-29.

*Dāretsətseh ka gəma neheye ta təma Yesu bay aye*

*Mata 11.20-24*

<sup>13</sup> Yesu a gwad sa: «A nəkurom ndo i gəma i Korazin hay, tuwum bo kurom, hərwi dāretsətseh ka gər kurom! A nəkurom ndo i gəma i Betesayda hay, tuwum bo kurom hərwi dāretsətseh ka gər kurom. Hərwi tađə masuwayaŋ neheye na ge mə gay kurom aye nā ge ma gəma i Tir ta gəma i Sidon na, atay na, ndo i gəma niye hay ta dzaliye bo tay ta tuwiye, ta pa ka bo tađay manasa eye ada ta kutsiye bətekwew maləməts a gər hərwi məde ha na, ta gər ha mezeleme tay.

<sup>14</sup> Hərwi niye, pat nakə Mbəlom ma gateye sariya a ndo hay aye na, sariya kurom ma diye me ma ziye i ndo i gəma i Tir ta Sidon.

<sup>15</sup> «Nəkurom ndo i gəma i Kafernahum hay, ka dzalum nəkurom na, Mbəlom ma ta həliye kurom a mbəlom wal daw? A'ay! Nəkurom duh na, Mbəlom ma ta mbəzliye kurom ha na, a təv mēndze i mədahaŋ hay.»

<sup>16</sup> Yesu a gwadatay a gawla ŋgay sa: «Ndoweje kə pa zləm ka bazlam kurom ada ka təma na, a təma na, neŋ. Ndoweje ka təma kurom bay na, a təma bay na, neŋ. Ndoweje ka təma ga bay na, a təma bay na, ndo nakə a sləra ga ahaya aye.» Ndoweje neheye kuro kuro tasəla gər eye sulo aye ti ye.

*Gawla i Yesu neheye kuro kuro tasəla gər eye sulo aye tə maw*

<sup>17</sup> Anəke na, gawla i Yesu niye hay kuro kuro tasəla gər eye sulo aye tə maw tuk. Tə maw na, tə mənŋwese eye mə dərev tay lede. Tə gwadaj a Yesu: «Bəy Maduweŋ, kwa fakalaw hay ta rəhamay ha gər tə məzele yak.»

<sup>18</sup> Yesu a mbədatay faya a gwadatay: «Na ŋgatay a Fakalaw a dədaw mə gəma andza mawutsədə i Mbəlom.

<sup>19</sup> Anar tsənum! Na vəlakum gədaŋ ka mandəresle tay ha dədəe hay ta hərdəde hay ada ka mandəresle na gədaŋ i ndo mənə dəre kurom tebiye. Wuray kwa tsekweŋ ma gakumeye bay.

<sup>20</sup> Ane tuk na, kə ŋgwasum hərwi nakə fakalaw hay ta rəhakum ha gər aye bay. ŋgwasum duh na, hərwi məzele kurom hay mawatsa eye mə mbəlom.»

*Yesu a ŋgwasa*

*Mata 11.25-27, 13.16-17*

<sup>21</sup> Kwayaŋŋa Məsəfəre Tsədaŋŋa eye a rahay a bo a Yesu. Tsa na, a wuda tə mənŋwese eye, a gwad: «A nəkar Bəba Mbəlom, ndo mələve magərmbəlom ta dala, na gaka sisəe hərwi nəkar ka datay ha wu nakə mənŋgaha eye a ndo neheye tə sər wuray bay aye, ada ka ŋgaha abəra ka ndo i ndaraw hay ta ndo neheye nəteye tə sər wu aye. Ayaw, Bəba Mbəlom, a yaka a gər a nəkar hərwi mē ge bo andza niye.»

<sup>22</sup> Yesu a gwad sa: «Bəba ga kə vəleŋ wu hay tebiye. Wawa i Mbəlom way na, ndaray a sər bay. Maa sər na, Bəba Mbəlom nəte ŋgweŋ. Ada Bəba way na, ndaray a sər bay. Maa sər na, neŋ wawa ŋgay ada maa sər na ndo neheye a seŋ mədatay ha aye.»

<sup>23</sup> Tsa na, Yesu a mbəda me ka təv i gawla ŋgay hay, a gwadatay a nəteye mahəteye: «ŋgwasum hərwi wu nakə faya ka ŋgatamay aye!

<sup>24</sup> Hərwi sər um ha na, ndo məde ha bazlam i Mbəlom hay ta bəy hay haladzay a satay həbe mənŋgatay a wu nakə faya ka ŋgatumeye, ane tuk na, ta ŋgatay bay. A satay mətsəne wu nakə faya ka tsənumeye, ane tuk na, ta tsəne bay.»

*Dzeke i ndo i Samari*

<sup>25</sup> Ndo mədzanŋawa bazlam i Mbəlom mapala eye andaya ka təv eye niye dərmak. A lətse a tsətsah ka Yesu, a gwadaj: «Miter, na giye na mey, nakə ada

nâ huta sifa nakə ma ndəviye bay aye? A tsikay andza niye na, hərwi məhələ faya abəra suwat.»

<sup>26</sup> Yesu a gwadəy: «Ka dzaŋga mə derewel i Musa, a gwad na, kəkay?»

<sup>27</sup> Ndo niye a mbədəy faya: «A gwad na: “Wuda na Bəy Maduweŋ Mbəlom yak tə dərev yak tebiye, ta məsəfəre yak tebiye, ta gədan yak peteh, ada tə metsehe yak tebiye.” Adə: “Wuda ndo i maged yak dərma andza ka wuda na gər yak.”»

<sup>28</sup> Yesu a gwadəy: «Tədə! Ka mbədə faya lele. Ge andza niye ada ka hutiyə məsəfəre.»

<sup>29</sup> Ane tuk na, ndo mədzaŋgawa bazlam i Mbəlom mapala eye niye a say məgwadəy a gər ŋgay na, neŋgeye ndo i dedək. A tsətsah ka Yesu a gwadəy: «Ada matəra ndo nakə na wudiye andza neŋ aye na, way?»

<sup>30</sup> Yesu a mbədəy faya a gwadəy: «Ndo wuray a yaw abəra ma Zerozelem ma diye a Zeriko. Məkal hay tə mbəzla faya. Ta buwa faya abəra wu ŋgay hay tebiye. Tə kəd na lehhe. Tsa na, ta hway wu tay. Tə gər ha ndo niye məbərzla eye.

<sup>31</sup> «Ndo məvəlay wu a Mbəlom wuray andaya a mbəzlaw ta tsəved eye niye. A ŋgatay a ndo niye na, a ŋgadəy tsəŋgəhha dəreŋ. A ye ta tsəved mekeleŋ eye.

<sup>32</sup> «Andza niye, ndo i Levit wuray a ndisl ka təv eye niye, a ŋgatay a ndo niye na, a ŋgadəy dəreŋ. A ye ŋgway ta tsəved mekeleŋ eye.

<sup>33</sup> «Ane tuk na, ndo i Samari wuray a ye naha. Faya ma diye a mahəhele, a ndisl ka təv niye. A ŋgatay a ndo niye na, a gay mə bo haladzay.

<sup>34</sup> A həndzəd naha ka təv i ndo niye lele. A pəla ha gwezem ŋgay. A zlaw guzom a baray na abəra ka mbəlak. A mbədə faya mal ada a baray faya lele. A ndəv ha na, a zla na ka gər i zuŋgo ŋgay a ye ha a gay i mbəlok hay. A gay gər mə dəma lele.

<sup>35</sup> «Tədə eye ma ta diye ŋgway na, a tələka həlay a gwezem, a zlaw kwar i suloy sulo. A vəlay a ndo mäge məsler mə gay i mbəlok niye hay. A gwadəy: “Gay gər a ndo nakay lele. Aza na maweye tə fanəŋ na, na makeye ha wu nakə ka dze ha haladzay hərwi ŋgay aye.”»

<sup>36</sup> Yesu a gwadəy sa: «Ka nəkar na, mə walaŋ i ndo neheye mahkar aye, matəra ndo i maged i ndo nakay məkal hay tə kəd na aye na, way?»

<sup>37</sup> Ndo mədzaŋgawa bazlam i Mbəlom mapala eye niye a mbədə faya a Yesu a gwadəy: «Ndo nakə a gay ŋgwalak aye.»

Yesu a gwadəy: «Aya! Nəkar dərma do ge andza niye.»

### *Wu lele eye nakə ndo ma hutiyə aye*

<sup>38</sup> Yesu ta gawla ŋgay hay tə həl bo, ti ye a gəma mekeleŋ eye. Ahəl nakə nəteye ka tsəved faya ta diye na, a ye a gəma wuray. Mə dəma na, ŋgwas eye andaya tə zalay Marta a təma na a gay ŋgay.

<sup>39</sup> ŋgwas niye na, malamar ŋgay andaya tə zalay Mari. Neŋgeye na, a ndza ka təv i Yesu faya ma piye zləm ka matətike i Yesu.

<sup>40</sup> Azlakwa bay Marta i ŋgay na, faya ma giye məsler hay wal wal ma ləver. A yaw ka təv i Yesu. A yaw na, a gwadəy: «Bəy Maduweŋ, na gaka mə bo təbədew? Malamar ga a gər ga ha mahəgeye ka mäge məsler hay wal wal tebiye na, kəkay. Gwadəy m̄a yaw, m̄a dzəna ga.»

<sup>41</sup> Bəy Maduweŋ a mbədəy faya a gwadəy: «Marta, Marta nəkar na, ka vəlay ha mədzal gər ada ka hatsay düh a məsler haladzay na, kəkay?»

<sup>42</sup> Ane tuk na, wu nàte ka nàkar na, kà màtsa fakaya abàra. Mari ùh na, kà zla wu nakà lele aye. Dàdà ndàray ma shiye màzle faya abàra bay.»

## 11

*Maduwulay me a Mbàlom na, kàkay?*

*Mata 6.9-13, 7.7-11*

<sup>1</sup> Pat wuray na, Yesu a ùwulay me ma tøv eye andaya. A ndàv ha maduwule me na, ndo nàte mà walañ i gawla ngay hay a tsàtsah faya, a gwàday: «Bøy Maduwerñ, tètikamay maduwule me a Mbàlom andza i Yuhana nakà a tètikatay a gawla ngay hay ahàl niye.»

<sup>2</sup> Yesu a gwàdatay: «Ka ùwulumay me na, ka gwàðumeye: Bèba may,

kwa way mà sàr ha, màzele yak na, tsàdàñña.

Ndo hay tebiye tà zambàdàka.

Bøy yak mà gèma mà ge bo ka tøv may dèrmak,

<sup>3</sup> vèlamay wu mànday nakà ma slameye pat pat aye,

<sup>4</sup> Pàsamay ha mànese may,

hàrwi nàmày dèrmak nàmaa pàsàtay ha a ndo neheye tə gamay mànese aye.

Tsəpa may hərəwi ada Fakalaw mà səpat may bay.»

<sup>5</sup> Yesu a gwàdatay sa: «Agəla ndo nàte mà walañ kurom dzam ngay andaya. Ane tuk na, a ye ka tøv i dzam ngay niye ta magər həvad. A ye naha a tsàtsah a gwàday: “Dzam ga amboh vèlən tapa i daf mahkar tey.

<sup>6</sup> Hərəwi ndo nàte mà walañ i dzam ga hay a yaw a mahəhele. A ndislew anəke a gay ga. Ane tuk na, wuray andaya màvəlay bay.”

<sup>7</sup> Ndo niye mà gay aye a mbədayaw faya, a gwàday: “Gər ga ha, kà wurdeñ me bay! Na dərəzl na maged ga tsiy. Neñ ta wawa ga hay nàmaa həna tsiy. Na shiye faya màlètse màvəlaka daf sa bay.”»

<sup>8</sup> Yesu a gwàdatay sa: «Sərum ha na, kwa tadə a say màlètse bay bəbay na, ma lətsiye mà vəleye wu nakà a say aye. Ma vəleye na, hərəwi a gay amboh haladzay bəna hərəwi dzam bay.

<sup>9</sup> «Neñ faya na tsikakumeye: Tsətsahum, ta vèlakumeye, pəlum, ka hutum-eye, fumay a maged, ta həndəkakumeye abəra ma maged.

<sup>10</sup> Hərəwi kwa way ka tsətsah na, ta vəleye, kwa way ka pəla na, ma hutiyè, ada kwa way kə fay a maged na, ta həndəkeye abəra ma maged.

<sup>11</sup> «Way mà walañ kurom tadə wawa ngay ka tsətsah faya kəlef na, mà vəleye dədə dāw?

<sup>12</sup> Kəgəbay ka tsətsah faya dəsle na, mà vəleye hərdədə dāw?

<sup>13</sup> Nəkumom neheye sadzək ngwalak eye hay bay aye ka sərum màvəle wu ngwalak eye hay a wawa kurom hay ùh tuk na, ada Bəba kurom mà mbəlom ma ziye kurom ha ta màvəle Məsəfəre Tsàdàñña eye a ndo neheye ta tsətsah faya aye bədaw!»

*Mbàlom kəgəbay Fakalaw*

*Mata 12.22-30; Markus 3.20-27*

<sup>14</sup> Pat wuray na, Yesu faya ma həhariye fakalaw abəra mà bo i ndoweye andaya a təra ha mandək eye. Fakalaw a yaw abəra mà bo i ndo niye na, ndo niye a tsik me lele. A gatay a ndo niye hay mahaya gər eye hərəbàbəkka.

<sup>15</sup> Ndo mekelèñ eye hay mà walañ tay niye na, tə gwad: «Maa vəlay gədan ka mahəhere fakalaw hay na, Bedzabul bøy i fakalaw hay.»

16 Ndo mekelen eye hay na, a satay mähäle faya abëra suwat. Ta tsətsah faya tə gwadāy: «Gamay masuwayan nakə ma diye ha ka yaw abëra ka təv i Mbəlom aye.»

### *Ngama Mbəlom*

17 Ane tuk na, Yesu a sərətay naha ka mədzał gər tay. A gwadətay: «Tadə ndo i gəma hay ta ngəna, faya ta giye varam mə walaŋ tay na, gəma niye ma dziye. Gəma mekelen eye ma dufiye na. Tadə ndo hay mə gay tay faya ta giye magazləga mə walaŋ tay na, ndo niye hay mə gay niye ta hutiyə gədaŋ mändze huya bay.

18 Tadə Fakalaw tə Fakalaw ma giye magazləga ka bo ngay na, ka dzalum na, bəy ngay ma ndziye huya na, ma kəkay? Sa na, ka gwadum maa vələŋ gədaŋ ka mahəhere fakalaw na, Bedzabul.

19 Ka gwadum maa vələŋ gədaŋ ka mahəhere fakalaw na, Bedzabul. Ane tuk na, a dzam kurom hay na, maa vələtəy gədaŋ ka mahəhere fakalaw hay na, way? Andza niye, dzam kurom hay faya ta diye ha na, dedek andaya mə nəkurom bay.

20 Maa vələŋ gədaŋ a neŋ ka mahəhere fakalaw na, gədaŋ i Mbəlom. Andza məgwədə na, Bəy i Mbəlom 6a ki yaw tsiy hus ka təv kurom.»

21 Yesu a gwadətay sa: «Ndo gədaŋ eye tə wu həlay ngay na, ma tsəpiye gay ngay lele wuray ma tətaliye ka zlele ngay kwa tsekweŋ bay.

22 Ane tuk na, tadə ndo mekelen eye a ze neŋgeye ta gədaŋ ki yaw na, ma buwiye faya abëra wu həlay ngay niye hay a səmawa ha ka bo aye. Ada ma həliye zlele i ndo niye ma ngənatay ha a ndo hay tebiye.»

23 Yesu a gwadətay sa: «Ndo nakə neŋgeye tə neŋ bay aye na, neŋgeye ndo mənəŋ dərə. Ndo nakə ka dzəna ga bay aye na, neŋgeye duh ndo mənəsəŋ ha məsler.»

### *Məməw i məsəfərə nakə lele bay aye*

#### *Mata 12.43-45*

24 Yesu a gwadətay sa: «Fakalaw ki yaw abëra mə bo i ndo na, ma diye ma dzədziye mə kəsaf ma pəliye təv mazəzukw bo. Kə huta bay na, ma gwadəye a gər ngay: “Na mbədiye gər a gay ga nakə na yaw abëra mə dāma aye.”

25 Ma mbədiye gər, kə ye naha kə ngatay a gay mafadā eye lele ada malambadā eye.

26 Tsa na, ma diye ma həlaweye siye i məsəfərə neheye sewed eye hay wene wene ta ze neŋgeye aye tasəla. Ta fələkwiye a gay, ta ndziye mə dāma. Ka mandəve eye na, wu niye ma miye ka ndo niye ma ziye nakə kurre aye.»

27 Ahəl nakə faya ma tsikiye andza niye na, ngwas wuray mə walaŋ i ndo niye hay haladzay aye, a wuda a gwad: «Məngwese ka gər i ngwas nakə a wa kar aye ada ka sa wah ngay aye.»

28 Ane tuk na, Yesu a mbəday faya a gwadāy: «Məngwese duh na, ka gər i ndo neheye faya ta pay zləm a bazlam i Mbəlom ada faya ta giye andza nakə a tsik aye.»

### *Masuwayan tə dzaydzay*

#### *Mata 12.38-42; 5.15, 6.22-23*

29 Ka təv nakə ndo hay faya ta səkahiye naha haladzay ka təv i Yesu aye na, Yesu a pa bo ka mətsike, a gwad: «Ndo neheye anəkə aye na, lele eye hay bay. Ta tsətsahiye nā gatay masuwayan na, kəkay! Asah! Ma dəba i masuwayan i Zonas ndo mədə ha bazlam i Mbəlom nakə tə ngatay aye na, ta ngateye a masuwayan mekelen eye bay.

<sup>30</sup> Hərwi Zonas a təra na, masuwayaŋ ka gər i ndo i gəma i Ninive hay.\* Andza niye neŋ Wawa i Ndo na təriye masuwayaŋ a ndo neheye anəke aye dərmaŋ.

<sup>31</sup> Nğwas wuray andaya neŋgeye bəy bagwar eye, a yaw abəra ma diye i tsakay. A yaw mətsəne bazlam i Salomon neheye maraha eye ta metsəhe aye.† Ndo andaya kanaŋ a ze ha Salomon. Hərwi niye, ahəl nakə Mbəlom ma gateye sariya a ndo hay aye na, nğwas nakay bəy bagwar eye ma deyeweye abəra ma diye i tsakay, ma lətsiye kame i ndo neheye mamatay ha mənese.

<sup>32</sup> Pat i sariya i Mbəlom na, ndo i gəma i Ninive hay ta deyeweye. Ta lətsiye kame i ndo neheye anəke aye ta matay ha mənese. Hərwi ndo i gəma i Ninive hay tə tsəne bazlam i Mbəlom nakə Zonas a tsikatay aye na, ta gər ha mezeleme. Ndo andaya kanaŋ a ze Zonas bədaŋ?»

<sup>33</sup> Yesu a gwaɗatay sa: «Dada ndo ma zlaweye lalam nğay ma piye faya ako ma nğahiye na kəgəbay ma hurəkwiye faya gəse daŋ? Ma piye na duh na, ka wu məpe lalam hərwi ada ndo neheye ta fələkwiye a gay aye mə dəvatay dzaydzay.

<sup>34</sup> «Dəre yak na, andza lalam ma dəviye dzaydzay a bo yak tebiye. Tada dəre yak a zəba kwetseh kwetseh lele na, bo yak kətsek mə dzaydzay. Ane tuk na, tada dəre magulufa eye na, bo yak mə ləvonj.

<sup>35</sup> Ge metsəhe lele bəna, wu nakə ma vəlakeye dzaydzay aye mə təra ləvonj bay.

<sup>36</sup> Tada bo yak kətsek mə dzaydzay, təv kwa tsekweŋ mə ləvonj bəna, niye na bo yak tebiye mə dzaydzay. Niye na, andza lalam nakə dzaydzay nğay aye faya ma dəvakeye dzaydzay aye.»

### *Yesu a matay ha mənese a Farisa hay*

*ta ndo mədzanğawa bazlam i Mbəlom mapala eye*

#### *Mata 23.1-36; Markus 12.38-40*

<sup>37</sup> Yesu a ndəv ha mətsike me na, Farisa wuray a zalay ka mənde wu mənday a gay nğay. Ti ye ta dazlay a mənde wu mənday.

<sup>38</sup> Farisa niye a zəba ka Yesu na, a gay wadəŋ wadəŋ. A gay wadəŋ wadəŋ na, hərwi Yesu kə bara həlay andza i kule tay nakə a tsik aye bay.

<sup>39</sup> Bəy Maduweŋ a gwaɗay: «Nəkurom Farisa hay na, ka tsakadum na, dəba i gəsiyem ta dəba i bəgəlam, ane tuk na, nəkurom maraha eye ta mədzele ka makəle, ka məge sewed.

<sup>40</sup> Nəkurom na, mətərakahaŋ eye hay. Sərum ha na, Mbəlom nakə a ge dəba i wu hay aye na, maa ge hud'eye na, neŋgeye dərmaŋ bədaŋ?

<sup>41</sup> Duh na, wu neheye ma gəse ada neheye ka bəgəlam kurom hay na, vəlumataŋ a mətawak hay ada wu hay tebiye mə təriye hərwi kurom tsədaŋja.

<sup>42</sup> «Ane tuk na, nəkurom Farisa hay na, dəretsətseh ka gər kurom. Hərwi ka hayumay gər a slambah i ala kurom hay tebiye na, mə kuro na, ka zlawum nəte ka vəlawumay a Mbəlom. Azlakwa duh faya ka gərumeye ha dedek tə mawudə bo i Mbəlom eye. Anaŋ gum wu nakə a ye ka bo məge aye, ze məgər ha siye bay.

<sup>43</sup> «Nəkurom Farisa hay, dəretsətseh ka gər kurom. Hərwi mə gay i məduwule me na, ka wudum məndze ka təv məndze nakə nğwalak aye. Ada ka wudum tə tsikakum me ta mədəslakum ha gər ka təv məhay gər i ndo hay tebiye.

<sup>44</sup> «Nəkurom na, dəretsətseh ka gər kurom. Nəkurom na, ka ndəkəkitum bo andza tsəvay neheye ndo hay faya ta həhaliye faya tə nğatay bay aye!»

\* 11:30 Zonas 1-4. † 11:31 1 Bəy hay 10.1-13.



<sup>45</sup> Ndo nāte mā walaŋ i ndo mādzaŋgawa bazlam i Mbəlom mapala eye hay a gwaday a Yesu: «Miter, ka tsik andza niye na, ka tsada nəmay dərmak.»

<sup>46</sup> Yesu a mbəday faya a gwaday: «Nəkurom ndo mādzaŋgawa bazlam i Mbəlom mapala eye hay dərmak, dəretsətseh ka gər kurom! Nəkurom na, faya ka pumeye wu mamba eye ka ndo hay. Nəkurom eye kwa ta wur həlay nets ka lamumay madzəne tay ha bay.

<sup>47</sup> «Dəretsətseh ka gər kurom! Hərwi nəkurom faya ka dəzlumeye tsəvay male eye hay. Tsəvay niye hay na, i ndo mādə ha bazlam i Mbəlom niye hay ahəl niye bəba tətə kurom hay tə kəd tay ha aye.

<sup>48</sup> Andza niye, ka bəzum ha na, nəkurom ma məsler i bəba tətə kurom niye ahəl niye. Nətəye ta kəd tay hay ndo mādə ha bazlam i Mbəlom. Nəkurom i kurom na, faya ka dəzlumeye ka tsəvay tay aye hay.

<sup>49</sup> Hərwi niye Mbəlom ta ndaraw ŋgay kə tsik ahəl niye, a gwad: “Neŋ Mbəlom na sləratay naha ndo mādə ha bazlam ga hay ta ndo i məsalaŋ ga hay. Na slər tay naha na, ta kədiye tay hay siye mā walaŋ tay, ada siye hay ta gateye dəretsətseh.”

<sup>50</sup> A nəkurom ndo neheye bəgom aye, Mbəlom ma ta tsətsahiye fakuma ndo mādə ha bazlam ŋgay neheye ka kədum tay ha zla anəke bay, kwa ka gər nakə Mbəlom a ge məndzibəra aye.

<sup>51</sup> Mbəlom ma tsətsahiye na, kwa ka məkədə i Abel<sup>‡</sup> hus ka Zakari nakə tə kəd na mā walaŋ i təv məvəlay wu a Mbəlom tə gay i mədəslay ha gər a Mbəlom aye. §

<sup>52</sup> «Nəkurom ndo mādzaŋgawa bazlam i Mbəlom mapala eye, dəretsətseh ka gər kurom. Nəkurom na, ka dərəzlumatay na maged i məsərə wu a ndo hay. Nəkurom eye na, ka deyumeye a dəma bay. Ada ndo neheye a satay məfələkwe a dəma aye na, faya ka kərahumatay eye tsəved məfələkwe a dəma.»

<sup>53</sup> Yesu a ndəv ha mətsike me na, a yaw abəra mə gay niye. Ndo mādzaŋgawa bazlam i Mbəlom mapala eye ta Farisa hay ta payaw bəzay abəra. Ti yaw na, tə wuya ka Yesu tə bazlam i terengez hay wal wal. Ta tsətsah faya gər i bazlam hay wal wal tebiye.

<sup>54</sup> Ta tsətsah faya andza niye na, hərwi ada mā tsik bazlam nakə ŋgwalak eye bay aye. Ada a satay məhəle faya abəra suwat.

## 12

### *Məvəlay ha bo tebiye a Yesu*

#### *Mata 10.26-33, 12.32; 10.19-20*

<sup>1</sup> Ahəl niye na, ndo hay haladzay ta haya gər. Nətəye ta giye gwezem wiye. Faya ta mbərəsliye bo ka sik tay hay. Ka təv eye niye na, Yesu a lah mətsikatay me a gawla ŋgay hay təday. A gwadatay: «Tsəpum gər kurom abəra ka gədə i Farisa hay. Andza məgwədə bəbəkək tay nakə faya ta giye aye.

<sup>2</sup> Wu nakə tebiye maŋgaha eye na, ta diye ha, ada wu nakə tə tsikawa ta məkal aye na, ta diye ha.

<sup>3</sup> Hərwi niye wu nakə ka tsikum ma ləvəŋ aye na, ma ta diye a zləm mə dzaydzay. Wu nakə ka tsikumay a zləm a ndo ta suksuk mə gay aye na, ndo hay ta ta tsəniye ka zavay.

<sup>4</sup> «Malar ga hay, neŋ faya na gwadəkumeye: Kā dzədzarumay a ndo neheye ta dziye ha slo i bo aye bay. Nətəye na, ta sliye faya məge wu mekeləŋ ma ziye nakay bay.



<sup>5</sup> Ndo nakə ka dzədzarumeye na, na ɔakumeye ha: Dzədzarumay na, a Mbəlom. Ma dəba i mədahaŋ na, neŋgeye duh ma kaliye kurom ha a ako nakə ma mbatiye ɔaɔa bay aye. Ayaw! Sərum ha lele! Dzədzarumay na, a neŋgeye.

<sup>6</sup> «Ka sərum təbədew, sisi hay zlam na, ta səkam ta dala sulo bədaw? Mbəlom na, kwa nətə a mətəsa ha gər bay.

<sup>7</sup> Nəkurom na, ka zum tay ha diyeŋ hay. Kwa məkwets i gər kurom na, Mbəlom kə pasla na. Aya ane kə dzədzarum bay.

<sup>8</sup> «Sərum ha na, ndoweye kə ɔa ha kame i do hay kə gwad: “Neŋ gawla i Yesu” na, neŋ Wawa i Ndo na ta diye ha neŋgeye gawla ga kame i gawla i Mbəlom hay dərma.

<sup>9</sup> Ane tuk na, taɔə ndoweye kə ɔa ha kame i ndo hay parakka a sərga ha bay na, neŋ na tsikiye kame i gawla i Mbəlom hay, na sərga na bay dərma.

<sup>10</sup> «Kwa kə tsik wu nakə lelebay aye ka neŋ Wawa i Ndo na, Mbəlom ma pəseye ha. Ane tuk na, ndoweye kə tsalay ka gər a Məsəfəre Tsəɔaŋŋa eye na, ma hutiyə məpəse me bay.

<sup>11</sup> «Taɔə ta diye kurom ha a gay i maɔuwule me ada kame i ndo mələve dala hərwi məge sariya na, kə dzalum “Nəmaa ta giye kəkay” bay, kəgəbay “Nəmaa ta gwadiye mey” bay.

<sup>12</sup> Mata ɔakum ha wu nakə ka tsikumeye na, Məsəfəre Tsəɔaŋŋa eye.»

### *Zlele eye hay tə zlele eye bay aye hay*

*Mata 6.25-34, 6.19-21*

<sup>13</sup> Tsa na, ndoweye mə walaŋ i ndo niye hay a yaw ka təv i Yesu a gwaday: «Miter, gwaday a malamara ga na, nəmaə ŋgəna zlele nakə bəba may a gəramay ha aye.»

<sup>14</sup> Yesu a mbəɔay faya a gwaday: «Dzam ga, maa pa ga məgakum na sariya i wu kurom hay kəgəbay maŋgənakum ha zlele kurom na, maa pa ga way?»

<sup>15</sup> Tsa na, a gwadətay a ndo hay tebiye: «Gum metsehe! Həbum gər kurom abəra ka bor i zlele. Hərwi kwa ndo neŋgeye zlele eye bəbay na, sifa ŋgay mə zlele ŋgay niye bay.»

<sup>16</sup> Yesu a təkəratay dzeke, a gwadətay: «Ndowneye andaya zlele eye, wu ŋgay məpele abəra ka dala na, haladzay.

<sup>17</sup> A dzala ada a tsəsa hay a gər ŋgay, a gwad: “Na giye kəkay? Təv andaya hərwi məhayay gər a wu ga hay bay.”

<sup>18</sup> «A gwad sa: “Wu nakə na giye na, anaŋ: Na mbəzliye ha de ga hay. Na ŋgariye a ɔəma bagwar eye hay neheye ta sliye ɔa məhayay gər a ɔəma a wu mənday ga hay tə siye i wu ga hay aye.

<sup>19</sup> Na ge andza niye na, na gwadaye a bo ga: Bo ga! Wu ga na, haladzay. Ma ndziye məve weɔe weɔe. Anəke na, zəzəkw bo tuk! Nda wu mənday, sa wu məsay ada ŋgwasa.”

<sup>20</sup> «Ane tuk na, Mbəlom a gwaday a ndo niye: “Nəkar na, matərahaŋ eye! Bəgom ta həvad nakay na, ka mətiye. Ada wu neheye tebiye ka hayay gər aye na, i way tuk!”»

<sup>21</sup> Yesu a gwadətay sa: «Andza niye, hərwi ndo nakə a hayay gər a zlele a bo ŋgay eye ŋgway aye. Ane tuk na, ka ɔəre i Mbəlom na, zlele eye bay.»

<sup>22</sup> Yesu a gwadətay a gawla ŋgay hay: «Hərwi niye neŋ faya na tsikakumeye: Kə dzalum gər hərwi wu mənday kəgəbay hərwi peteked bay.

<sup>23</sup> Hərwi məsəfəre na, a ze wu mənday ada bo kurom na, a ze peteked segey.

<sup>24</sup> Zəbum ka maŋgəhak hay təday: Nətəye na, ta sləga bay, tə pala wu tay tə hayay gər andaya bay. De tay andaya məpe a ɔəma wu tay hay bay. Kwa ada

sewene tay andaya bay. Ane tuk na, Mbəlom faya ma vəlateye wu mənday. Nəkurom na, ka zum diyen hay bədaw?

<sup>25</sup> «Way nakə mə walaŋ kurom ma sliye faya masakah ha məndze ŋgay ka məndzibəra ta mədzele gər ŋgay nakə faya ma dzaliye aye na, way?

<sup>26</sup> Aya! Ka wu nakə tsekweŋ aye na, ka slum faya mäge düh bay tuk na, ka dzalumeye ka wu siye na hərwi mey?

<sup>27</sup> Ehey zəbum ka guzer neheye mavurza eye təday! Nəteye na, tə ge məsler i wuray bay, tə ŋgar peteked bay. Faya na gwadəkumeye, kwa Salomon nakə zlele eye haladzay aye, dāda kə pa ka bo peteked andza məvurze i guzer neheye bay.

<sup>28</sup> Andza niye Mbəlom na, faya ma pəteye ka bo peteked a guzer hay ka bəgom nakay. Tədcə na, guzer niye ta kuliye. Ta kula na, ta kaliye tay ha ako. Kə ge andza niye na, nəkurom düh Mbəlom ma pakumeye peteked ka bo ma ziye i guzer hay bədaw? Kwa a nəkurom neheye mədzał gər tsekweŋ aye bədaw!

<sup>29</sup> «Ka ndədikum gər huya ka mədzele ka wu nakə ka ta ndayumeye tə wu məse aye bay.

<sup>30</sup> Maa pəla wu neheye na, ndo neheye tə sər Mbəlom bay aye. Nəteye na, ta zəzukway bo a məpəle bay tebiye. Ane tuk na, Bəba kurom mə mbəlom a sər wu nakə a sakum aye.

<sup>31</sup> Lahum məpəle na, Bəy i Mbəlom ada wu siye hay na, Mbəlom ma vəlakumeye.

<sup>32</sup> Nəkurom neheye haladzay bay aye, kə dzədzarum bay! Hərwi ki yay a gər a Mbəlom Bəba kurom kə vəlakum təv məndze ma bəy ŋgay.

<sup>33</sup> «Nəkurom düh səkəmmum ha wu kurom hay ada vəlumətatay suloy eye a ndo i mətawak hay. Ngarum gwezem neheye ta nasiye bay aye. Ada ka hayumay gər a dəma a zlele kurom nakə mə mbəlom aye. Mə dəma na, məkal ma sliye mede faya bay. Kwa mətul ma ndisliye faya bay.

<sup>34</sup> Hərwi dərev kurom mandza eye na, ma təv nakə zlele kurom mə dəma aye.»

### *Ndzum tsezlezleŋŋe mahəbe məmaw i Yesu*

#### *Mata 24.45-51*

<sup>35</sup> «Barum na bəzihud kurom hərwi mäge məsler. Pum ako ka lalam kurom hay mə mbata bay.

<sup>36</sup> Tərum na, andza ndo mäge məsler neheye ndo i gay a gərətatay ha gay ŋgay, a ye məzle dahəlay aye. Nəteye na, ta həbiye na hus ahlə nakə ma maweye abəra ma məzle dahəlay aye. Kə maw kə fay a maged na, ta həndəkeye na maged.

<sup>37</sup> Məŋgwese ka gər i ndo i məsler niye hay ndo i gay tay kə ndislew na, ma ndzateye a gər nəteye mandzahəra eye bay. Sərum ha lele! Ndo i gay niye ma bariye bəzihud ŋgay ta wu i məbere bəzihud. Ma zalateye a ndo i məsler ŋgay hay. Ma ndziye tay ha ka təv məndzay. Ma vəlateye wu mənday.

<sup>38</sup> Kwa tadə a maw na, ta məgərəhəvad kwa kə gaw mahonok ka zay məgərəhəvad, ki yaw kə ndislew fataya faya ta həbiye na ta ndzahəra bay na, məŋgwese ka gər tay.»

<sup>39</sup> Yesu a gwadətay sa: «Tsənum wu nakay lele: Ndo i gay mə sər həlay nakə məkal ma deyeweye ma kəliye na aye na, ma gəriye ha gay ŋgay məkal mə yaw mə sləlay na bay.

<sup>40</sup> Nəkurom dərmak ləvum bo, hərwi neŋ Wawa i Ndo na maweye ahlə waray na, ka sərumeye bay.»

<sup>41</sup> Tsa na, Piyer a tsatsah faya a gwaday: «Bəy Maduweŋ, dzeke nakay ka ndzakit ha bo na, hərwi may dekdək tsukudu hərwi ndo hay tebiye daw?»

<sup>42</sup> Bəy Maduweŋ a mbəday faya, a gwaday: «Ndo i məsler ŋgwalak eye ada ma giye məsler tə metsehe lele eye na, way? Neŋgeye na, ndo nakə ndo i gay ŋgay a gwaday: “Gatay gər a siye i ndo mäge məsler ga hay. Vəlatay wu mənday tə həlay eye.”

<sup>43</sup> Məŋgweŋe ka gər i ndo mäge məsler niye tadə ndo i gay ŋgay ki yaw, kə ndzay a gər neŋgeye faya ma giye məsler andza nakə tə tsikay aye.

<sup>44</sup> Neŋ faya na gwadəkumeye: Sərum ha na, ndo i gay ŋgay ma gəray ha zlele ŋgay tebiye m̄ə ləvay gər.

<sup>45</sup> «Ane tuk na, ndo i məsler kə gwaday a gər ŋgay: “Maka! Ndo i gay ga ma maweye bəse bay.” Tsa na, a pa bo ka məndebe ndo i məsler haslaka eye siye hay ta ndo i məsler ŋgwas eye hay. Tadə a nda wu mənday, a sa wu məsay ada a kwaya,

<sup>46</sup> ndo i gay ŋgay ma maweye na, ka həlay nakə faya ma həbiye bay aye ada a sər bay aye. Ki yaw na, ma vəleye dəretsətseh haladzay, ma həhariye na ndo i məsler niye. Ma kaliye ha a təv i ndo neheye ta təma bazlam i Mbəlom bay aye.

<sup>47</sup> «Tadə ndo i məsler a sər ha wu nakə ndo i gay ŋgay a say m̄ə gay aye, ane tuk na, ndo i məsler kə ləva ha bo bay kəgəbay kə ge andza nakə a say a ndo i gay ŋgay aye bay na, ta geye dəretsətseh haladzay.

<sup>48</sup> Aya ane tuk na, ndo i məsler nakə a sər wu nakə a say a ndo i gay ŋgay m̄ə gay na bay na, ada kə ge wu nakə də i məndebe na na, ta ndabiye na haladzay bay. Ndo nakə tə vəlay haladzay aye na, ta tsatsahiye faya haladzay dərmak. Ndo nakə tə gəray ha wu a həlay haladzay aye na, ta tsatsahiye faya haladzay wene wene aye.»

*Maŋgəne ta sariya*  
*Mata 10.34-36*

<sup>49</sup> «Neŋ na yaw na, na zlaw ako məkele ka dala. A seŋ na, m̄ə vat anəke.

<sup>50</sup> Ane tuk na, ta dzəhūbiye ga ha a dəretsətseh təday, a seŋ mə dərev ga na, kə ge bo tsiy.

<sup>51</sup> Ka dzalum na zlaw ka məndzibəra na, zay daw? Na gwadəkumeye a'ay! Na zlaw na, maŋgəne.

<sup>52</sup> Ma dazleye anəke, ndo hay zlam mə gay na, ta ŋgəniye ndo mahkar ta kədiye bo ta ndo neheye sulo aye. Ndo hay sulo ta kədiye bo ta ndo neheye mahkar aye.

<sup>53</sup> Bəba ta wawa ŋgay ta səriye bo bay, wawa ta bəba ŋgay ta səriye bo bay. Maya tə dem ŋgay ta səriye bo bay ada dem ta may ŋgay ta səriye bo bay. Maya i zal ta dahəlay i wawa ŋgay ta səriye bo bay ada dahəlay i wawa ta may i zal ŋgay ta səriye bo bay.»

*Məsəre ha ka bo abəra wu*  
*Mata 16.2-3, 5.25-26*

<sup>54</sup> Yesu a gwadawatay a ndo niye hay tebiye dərmak sa: «Nəkurom na, ka ŋgatumay a pazlay kə lətsew tə məgəma na, ka gwadum bəse tsa, yam ma piye ada yam ma piye dedek.

<sup>55</sup> Tadə ka ŋgatumay a mətasl ka vəzlaw ta diye i Salawa na, ka gwadum merəbe ma giye. Ada merəbe ma giye dedek.

<sup>56</sup> Nəkurom na, ndo məvay gər a ndo hay. Ka sərüm maŋgəne tay ha wu i dala tə wu i mağərmbəlom na, tə waray. Ada həlay nakə anəke aye ka sərüm bay na, kəkay?

<sup>57</sup> «Hərwi mey, nəkurom na, ka sərüm maŋgəne ha ka bo abəra wu nakə lele bay aye tə wu nakə dedek aye bay na, ka mey?

<sup>58</sup> Tadə ndo ka wuda fakaya, faya ka deyumeye kame i ndo mäge sariya na, lambadum ha bazlam eye ka tsəved ahəl nakə faya ka deyumeye mba aye. Kə ge andza niye bay na, ndo niye ki ye kar ha ka təv i ndo mäge sariya na, ndo mäge sariya ma vəliye kar ha a həlay i sidzew. Sidzew ma kaliye kar ha a daŋgay.

<sup>59</sup> Sər ha na, kwa a ləkaw fakaya dala nətə ka hama na bay na, ka deyeweye abəra ma daŋgay bay.»

## 13

### *Mambəde tsəlök*

<sup>1</sup> Ahəl niye na, ndo hay ti yaw ka təv i Yesu. Ti ye naha ta təkəray tə gwadəy: «Ahəl niye na, Pilat kə kədf siye i ndo i Galile hay. A kədf tay ha ahəl nakə faya ta vəlay wu a Mbəlom aye. A dzapa ha bambaz tay tə bambaz i gənwə neheye tə kədəy a Mbəlom aye.»

<sup>2</sup> Yesu a mbədətay faya a gwadətay: «Ka dzalum na, Galile neheye ta bəbazl tay ha aye na, ta ze siye i Galile hay tə mezeleme dəw?

<sup>3</sup> Neŋ faya na tsikakumeye, a'ay andza niye bay! Ane tuk na, tadə ka gərüm ha mezeleme kurom bay na, nəkurom tebiye ka mətumeye andza nətəye dərma.

<sup>4</sup> Tsukudu ndo niye hay kuro gər eye tsamahkar aye gay zəbol eye a mbəzl fataya ma Silowe ka dala i Zerozelem aye na, ka dzalum na, ta ze tay ha siye i ndo i dala i Zerozelem tə mezeleme dəw?

<sup>5</sup> Neŋ faya na tsikakumeye andza niye bay. Ane tuk na, tadə ka gərüm ha mezeleme kurom bay na, nəkurom tebiye ka mətumeye andza nətəye.»

<sup>6</sup> Tsa na, Yesu a tsikatay dzeke, a gwadətay: «Ndowne anda ya a zəv dərizl i gərdaf wuray andza gurov a guvah ŋgay. Pat wuray na, a ye mata ŋəlaw hohway i gərdaf niye. A ye naha na, dərizl i gərdaf niye kə wa bay.

<sup>7</sup> Ndo i guvah niye a gwadəy a ndo matsəpay na guvah niye: “Zəba! Kə ge anəke məve mahkar na yawaw mata pəle naha hohway i dərizl gərdaf nakay. Ane tuk na, na huta faya hohway bay. Ma nesəneye ha təv ma guvah kəriye na, hərwi mey? Dəs na abəra mə dəma!”

<sup>8</sup> Ane tuk na, ndo matsəpay na guvah niye a mbədəy faya a gwadəy: “Ndo i gay ga, biyen na, gər ha. Na leye bədf ka tsakay eye tuwwe. Na lay na, na peye bərbur.

<sup>9</sup> Na ge ha andza niye na, a gəna ka viye neŋged na, ma wiye. Kə wa bay na, ka dəsiye na tuk.”»

### *Yesu a mbəl ha ndo abəra ma dəvats pat i mazəzukw bo*

<sup>10</sup> Yesu faya ma tətikatay a ndo hay mə gay i mađuwule me pat i mazəzukw bo.

<sup>11</sup> ŋgwas wuray anda ya dəvats eye mə dəma dərma. Dəvats niye kə ndza faya məve kuro gər eye tsamahkar. Fakalaw a təra ha. A guđuk ha a mba faya mələtse dzik bay.

<sup>12</sup> Yesu a ŋgatay a ŋgwas niye na, a zalay. Tsa na, a gwadəy: «Ka mbəl abəra ma dəvats yak.»

<sup>13</sup> Yesu a pa faya həlay. A pa faya həlay na, kwayaŋŋa a lətse dzik lele. Tsa na, ŋgwas niye a zambaday a Mbəlom.

<sup>14</sup> Ane tuk na, wu nakə Yesu a ge, a mbəl ha ndo pat i mazəzukw bo aye na, a ndalay a bəy i gay i mađuwule me. A tsikatay a ndo hay a gwadətay: «Pat andaya məkwa hərwi məge məsler. Kā mbələmay ha ndo na, pat niye hay bəna, pat i mazəzukw bo bay!»

<sup>15</sup> Bəy Maduweŋ a mbədaj faya a gwadaj: «Nəkurom tebiye na, ndo neheye ta məvay gər a ndo aye! Pat i mazəzukw bo na, kwa way a pəla ha sla ŋgay kəgəbay zuŋgo ŋgay mede ha ka məse yam bədaw?»

<sup>16</sup> Ŋgwas nakay gwala i Abraham, Fakalaw a dzawa na na, neŋgeye məve kuro gər eye tsamahkar. A ye ka bo məpəle ha abəra ma mədzewe pat i mazəzukw bo bədaw?»

<sup>17</sup> Bazlam i Yesu niye a mbədətay faya andza niye na, horoy a gatay a ndo mane dəre ŋgay niye hay tebiye. Ane tuk na, ndo hay tebiye na, məsler i Yesu niye a gawa aye, a ye tay a gər haladzay.

### *Dzeke i wur i bəzanj ta gəde*

#### *Mata 13.31-33; Markus 4.30-32*

<sup>18</sup> Yesu a gwad: «Bəy i Mbəlom a ndzəkkit bo na, wuye mey?»

<sup>19</sup> Bəy i Mbəlom a ndzəkkit bo na, andza wur i bəzanj nakə ndo a zla a sləga ka dədanj aye. A sləga na na, a ndzohw. A gəl, a təra andza gərdaf, diyeŋ hay tə ŋgar gay tay hay ka hawal eye hay.»

<sup>20</sup> Yesu a gwadətay sa: «Na ndzəkkit ha Bəy i Mbəlom sa na, ta wuye mey?»

<sup>21</sup> Bəy i Mbəlom a ndzəkkit bo na, gəde nakə ŋgwas a həl tsekweŋ a dzapa ha ta gufa aye. Gufa niye na, haladzay. A hələb tay ha ka bo na, gufa niye mahələba eye a kwasa a həmbot.»

### *Mede a Bəy i Mbəlom*

#### *Mata 7.13-14, 21-23*

<sup>22</sup> Yesu a həl bo ma diye a Zerozelem na, a ye ta wuzlahgəma ada ta gəma hay. Faya ma diye na, a dawa ha bazlam i Mbəlom.

<sup>23</sup> Ahəl nakə faya ma tsikateye bazlam i Mbəlom aye na, ndoweje a tsətsah faya a gwadaj: «Bəy Maduweŋ, mata təme na, ndo ma i ŋgal eye daw?»

Yesu a mbədə faya a tsikatay a ndo niye hay tebiye, a gwadətay:

<sup>24</sup> «Gum gədanj məfələkwe ta tsəved nakə mənğədətse aye. Faya na gwadəkumeye ndo hay haladzay ta pəliye tsəved məfələkwe ada ta hutiyeye tsəved sa bay.

<sup>25</sup> Hərwi ndo i gay kə lətse ka dərəzl a məged na, ka ndzumeye ma bəra. Ka fumeye a məged ŋgay. Ka gwadumeye naha: “Bəy Maduweŋ, həndəkamay na məged tey.”

«Ma mbədəkumaweye faya, ma gwadəkumeye: “Ka yumaw mənğay, na sər kurom ha bay.”

<sup>26</sup> «Aya! Ka gwadumeye: “Ka ndayakwa wu məndaj ada ka sakwa wu məsay dziye tə nəkar. Ka tətikamay bazlam i Mbəlom ka təv neheye ma gəma may aye.”

<sup>27</sup> «Ma gwadəkumeye sa: “Ka yumaw mənğay na, na sər kurom ha bay, a nəkurom ndo məge mezeleme hay. Dum abəra ka təv gal!”

<sup>28</sup> «Mə dəma na, ta tuwiye tə mahəpədə zler eye. Ka ŋgatumeye a Abraham, a Izak, a Zakob ta ndo məde ha bazlam i Mbəlom hay ma Bəy i Mbəlom. Nəkurom na, ta dərəzliye fakuma abəra.

<sup>29</sup> Ndo hay ta deyeweye ab̄era m̄a b̄azay, ma m̄aḡama ta deyeweye ma diye i yam ada ta deyeweye ma diye i tsakay. N̄ateye tebiye ta diye a B̄ay i Mb̄alom. Ta ndziye ta ndiye wu m̄anday m̄a d̄ama.

<sup>30</sup> Ane tuk na, ndo neheye n̄ateye ndo i d̄aba hay an̄ake aye na, ta t̄ariye ndo i me hay, ndo i me hay ta t̄ariye ndo i d̄aba hay.»

*Yesu nen̄geye ka ts̄aved faya ma diye a Zerozelem*

*Mata 23.37-39*

<sup>31</sup> Yesu a nd̄av ha m̄atsike me na, kwayan̄ḡa Farisa wuray ta h̄andz̄ad naha ka t̄av ḡgay, t̄a gwad̄ay: «L̄atse do a b̄era kanan̄! Do a t̄av mekeleḡ eye b̄ana, a say a Herod m̄ak̄ade kar.»

<sup>32</sup> Yesu a mb̄ad̄atay faya a gwad̄atay: «Dum gwad̄umay a mezerew niye na, na h̄ahariye fakalaw ab̄era ka ndo hay ada na mb̄aliye tay ha ndo hay ab̄era ma d̄avats b̄egom t̄a t̄ad̄e t̄aday. Ka pat mamahkar eye na, na nd̄aviye ha m̄asler ga.

<sup>33</sup> Ane tuk na, na ndisliye ha mede ga b̄egom, t̄ad̄e ada t̄ad̄e tad̄ay t̄aday. H̄arwi ta k̄adiye ndo m̄ade ha bazlam i Mb̄alom ma t̄av mekeleḡ na, a ye ka bo bay. A ye ka bo ta k̄adiye na ma Zerozelem.»

<sup>34</sup> Yesu a dazlay m̄atuwe Zerozelem. A gwad̄: «N̄akurom ndo i Zerozelem hay, n̄akurom ndo i Zerozelem hay. N̄akurom neheye ka b̄abazlum tay ha ndo m̄ade ha bazlam i Mb̄alom hay ada ka k̄adum tay ha ndo neheye Mb̄alom a sl̄arakum naha aye t̄a kwar! Sik nday nak̄a a seḡ m̄ahayakum ḡar ka t̄av ga andza mandzekwer nak̄a ma hayatay ḡar a wawa ḡgay hay a h̄ud̄ i gwezleviyek ḡgay aye. Ane tuk na, ka wudum bay!

<sup>35</sup> Andza niye, neḡ faya na gwad̄akumeye: Ma dazleye an̄ake ka ḡgatumeḡeye sa bay hus ah̄al nak̄a ka gwad̄umeye: “Mb̄alom m̄a pa ḡgama ka ndo nak̄a faya ma deyeweye ta m̄azele i B̄ay Maduweḡ aye! \*»

## 14

*Yesu a mb̄al ha ndo pat i maz̄zukw bo sa*

<sup>1</sup> Pat i maz̄zukw bo na, Yesu a ye a gay i b̄ay i Farisa wuray hay mata ndayaw wu m̄anday. Ndo hay niye tebiye m̄a d̄ama aye faya ta z̄azuriye na Yesu.

<sup>2</sup> Ndo wuray andaya d̄avats eye, bo ḡgay mazlambara eye. Nen̄geye mal̄tse eye kame i Yesu.

<sup>3</sup> Yesu a dazlay a m̄atsike me, a ts̄atsah ka ndo m̄adzan̄gawa bazlam i Mb̄alom mapala eye hay ta Farisa hay. A gwad̄atay: «Bazlam kway mapala eye k̄a v̄al ts̄aved m̄amb̄ale ha ndo pat i maz̄zukw bo tsukudu k̄a v̄al b̄ad̄aw?»

<sup>4</sup> Ane tuk na, a satay mamb̄ad̄ay faya bay.

Yesu a ḡas ndo niye d̄avats eye m̄a h̄alay. Tsa na, a mb̄al ha. A gwad̄ay: «Do wu yak a m̄atagay.»

<sup>5</sup> Tsa na, a gwad̄atay a ndo niye hay: «Tad̄a ndo m̄a walan̄ kurom, wawa ḡgay k̄aḡabay sla ḡgay k̄a d̄ad̄ a b̄adiyem pat i maz̄zukw bo na, ma diye kwayan̄ḡa ma zla ahaya ab̄era m̄a d̄ama b̄ad̄aw?»

<sup>6</sup> Ndo niye hay ta mba faya mamb̄ad̄ay faya bay.

*M̄ah̄ane ha ḡar*

<sup>7</sup> Yesu a ge ḡgodgor ka ndo neheye t̄a zalatay ka wu m̄anday aye. A ge fataya ḡgodgor na, h̄arwi t̄a lah ka t̄av m̄andzay lele eye. H̄arwi niye a tsikatay a ndo niye hay tebiye ta dzeke.

\* 13:35 D̄ames hay 118.26.

<sup>8</sup> A gwadātay: «Tadā ndo kə zalaka a magurlom i mæzle dahəlay na, kâ ye kâ ndza ka tæv mändzay lele eye bay. Ka ndza ka tæv mändzay lele eye na, agəna ta zalay a ndo nakə a ze kar aye dərma.

<sup>9</sup> Ada ndo nakə a zalakum ta ndo niye, ki yaw na, ma gwadakeye: “Lətse! Gəray ha tæv mändzay a ndo nakay.” Ka lətseye, ka diye ka tæv mändze nakə duk aye na, horoy ma gakeye.

<sup>10</sup> Duh bay, tadā ta zalaka na, do ndza ka tæv mändzay nakə lelebay duk ma dəba aye, hərwi ada ahəl nakə ndo nakə a zalaka ki yaw na, ma gwadakeye: “Dzam ga, dara ndza ka tæv mändzay lele eye. Andza niye, nəkar, ka təriye kame i ndo niye mazala eye hay tebiye na, ndo bagwar eye.”

<sup>11</sup> Hərwi ndoweye ka səgər ha bo ŋgay na, ta təriye ha wawa eye. Ndowneye kə həna ha gər, a təra ha bo ŋgay wawa eye na, ta səgəriye ha bagwar eye.»

<sup>12</sup> Tsa na, Yesu a gwadāy a ndo nakə a zalay aye: «Tadā ka vəliye wu mänday a ndo hay na, kâ zalatay a dzam yak, a malamər yak hay, a gwala yak hay, a ndo i zlele hay bay, hərwi nəteye na, ta sliye faya məzalaka. Ta hamakeye wu mänday nakə ka vəlatay aye.

<sup>13</sup> Ane tuk na, tadā ka vəlateye wu mänday i magurlom a ndo hay na, zalatay a ndo i mətawak hay, a ndo videl eye hay, a ndo matəra eye hay, ada a guluf hay.

<sup>14</sup> Ka ge andza niye na, ka ta hutiyə mənḡwese pat nakə ndo i ŋwalak hay ta lətseye abəra ma mədahaŋ aye. Nəteye na, wu tay andaya məvəlatay a dəma bay. Mata vəlatay a dəma na, Mbəlom.»

### *Dzeke i ndo mazala eye hay*

#### *Mata 22.1-10*

<sup>15</sup> Ndo niye hay tebiye tə tsəne bazlam i Yesu niye na, ndo nəte mə walaŋ tay a gwadāy a Yesu: «Mənḡwese ka ndo nakə ma ta ndiye wu mänday ma Bəy i Mbəlom aye.»

<sup>16</sup> Yesu a mbədāy faya a gwadāy: «Pat wuray na, ndoweye andaya a da wu mänday haladzay. A da wu mänday niye na, a zalatay a ndo hay haladzay ka mände.

<sup>17</sup> Həlay i mände wu mänday a sla na, a slər ndo i məsler ŋgay mata zalatayaw a ndo hay. Mā gwadātay tā yaw anəke hərwi wu mänday maləva bo eye tsiy.

<sup>18</sup> «Ndo i məsler a həl bo a ye a gwadātay dumara. Ane tuk na, kwa way a may ha me. Ndo makurre eye a gwadāy a ndo i məsler: “Na slay mede naha bay. Na səkəm guvah anəke na zəbaweye faya təday. Pəsa ga ha, mâ ndalaka bay.”

<sup>19</sup> «Ndo neŋged a gwadāy: “Na səkəm sla hay anəke sulo sulo zləm, na diye na ta dziye tay ha təday. Amboh pəsa ga ha, na slay naha bay. Mā ndalaka bay.”

<sup>20</sup> «Ndo mekeləŋ eye a gwadāy sa: “Na zla dahəlay anəke hərwi niye na slay naha mede naha bay.”

<sup>21</sup> «Ndo i məsler niye a maw a mətəgay. A ye ka tæv i ndo i gay ŋgay. A təkəray bazlam i ndo niye hay a ndo i gay ŋgay. Ndo i gay ŋgay a tsəne andza niye na, a ndalay haladzay. A gwadāy a ndo i məsler ŋgay: “Do bəse ka tæv məhay gər hay, ka tsəved i walaŋ i gay hay. Zalātayaw a ndo i mətawak hay, a ndo videl eye hay, a guluf hay, a ndo matəra eye hay, tā yaw kanaŋ.”

<sup>22</sup> «Ndo i məsler a ye a zalātayaw a slala i ndo niye hay. A maw a gwadāy a ndo i gay ŋgay: “Ndo i gay ga na ge məsler nakə ka tsikenj aye, ane tuk na, tæv andaya ndo hay ta rah a dəma bay.”



<sup>23</sup> «Tsa na, ndo i gay ngay a gwaday: “Do ka tsaved neheye a ye a gema wawa eye hay ada ka tsaved neheye a ye ta tsakay i dzal aye. Gatay kutonj tâ yaw ada gay ga mâ rah ta ndo hay birtsitse.

<sup>24</sup> Neŋ faya na gwadakum eye: Ndo neheye tã lah mæzalatay kurre ta yaw bay aye na, ndaray kwa nãte mæ walaŋ tay ta ndzakiye daf ga bay.”»

*Matære gawla i Yesu ta dedek eye  
Mata 10.37-38, 5.13; Markus 9.50*

<sup>25</sup> Ndo hay haladzay tã paway bæzay a Yesu. Ahəl nakə faya ta diye ka tsaved aye na, Yesu a mbəda me ka tøv i ndo niye hay faya ta pay bæzay aye, a gwadatay a nateye niye tebiye:

<sup>26</sup> «Ndo nakə a say matære gawla ga aye na, mâ wuda bəba ngay, may ngay, ngwas ngay, wawa ngay hay, malamar ngay haslaka eye hay kwa malamar ngay dem eye hay, mâ wuda tay ha mâ ze neŋ bay, kwa mægwaday a gər ngay neŋ eye mâ ze neŋ bay, bəna, ma sliye faya matære gawla ga bay.

<sup>27</sup> Ndowne kə zla mayako mazləmbada eye kə peŋ bæzay bay na, ma sliye faya matære gawla ga bay.

<sup>28</sup> «Tadə ndo mæ walaŋ kurom a say mæge gay na, ma ndziye ada ma pasliye suloy nakə ma dziye ha ka mæge gay, ma zəbiye faya ma sleye dā mandəve ha mæsler daw.

<sup>29</sup> Andza niye tadə kə dzala faya dze bay. A pa naha mədok eye dekdək tsa, ka ndəv ha madəzle bay na, ndo hay ta ngatay na, ta ngwasiye faya.

<sup>30</sup> Ta gwadiye: “Ndo nakay a dazlay a madəzle gay tuk na, kə mba faya mandəv ha mæsler eye bay!”

<sup>31</sup> «Andza niye bay nakə sidzew ngay hay gwezem kuro aye na, ma diye mata ge vəram ta bəy nakə sidzew ngay hay gwezem kuro kuro sulo aye daw? Ma ta diye madazlay a vəram na, ma ndziye ma dzaliye gər lele təday. Ma tsətsahiye a gər ngay: “Anəke na, ta sidzew ga hay gwezem kuro na, na sliye faya mæge vəram ta bəy nakə sidzew ngay hay gwezem kuro kuro sulo aye daw?”

<sup>32</sup> Tadə ma sliye faya bay na, ma sləriye ndo hay ka tøv i bəy niye ahəl nakə nengeye dərəŋ mba aye. Ma tsətsahiye naha faya mändze zay.»

<sup>33</sup> Yesu a gwadatay sa: «Andza niye mæ walaŋ kurom dərma, tadə ndowne kə gər ha wu ngay tebiye bay na, ma sliye faya matære gawla ga bay.»

<sup>34</sup> Yesu a tsikatay dzeke mekeləŋ eye sa, a gwadatay: «Ayaw sluwal na, wu nakə lele aye. Ane tuk na, tadə sluwal a vəd sa bay na, ta sliye matære ha mâ vəd hərəbəba sa na, ma kəkay?»

<sup>35</sup> Ta sliye faya mæge ha mæsler sa bay. Kwa məkutse a guvah andza bərbur bəbay na, ma giye ngama bay. Ta kutsiye ha a bəra. Ndo nakə zləm andaya faya mətsəne aye na, mâ tsəne lele!»

## 15

*Dzeke i təbaŋ nakə a dze aye  
Mata 18.12-14*

<sup>1</sup> Pat wuray na, ndo matsekele dzanŋal hay ta siye i ndo i mezeleme hay tebiye ti ye ka tøv i Yesu. Nateye niye tebiye ti ye na, mata pay zləm a bazlam i Yesu.

<sup>2</sup> Farisa hay ta ndo mədzanŋawa bazlam i Mbəlom mapala eye tã ngatay a Yesu ta ndo niye hay na, tã may ha mənese a Yesu, tã gwad: «Ndo nakay i ngay a təma tay ha ndo i mezeleme hay ada ta ndiye ka bo wu mənday ka tøv manəte eye na, kəkay?»



<sup>3</sup> Yesu a sərətay naha ka wu nakə faya ta tsikiye. A mbədatay faya ta dzeke, a gwadatay:

<sup>4</sup> «Tadə ndaray mə walaŋ kurom təbaŋ ŋgay hay andaya temerre ada a dze faya abəra nəte mə walaŋ i təbaŋ ŋgay niye hay na, ma gəriye ha kuro kuro tsid gər eye tsid eye niye hay, ma diye mapəla ahaya nəte eye niye a dze aye ma huta ahaya təday bədaw?»

<sup>5</sup> Tadə kə huta na na, dərev ŋgay ma ŋgwasiye haladzay. Ma pa ahaya təbaŋ ŋgay niye ka dzegwem,

<sup>6</sup> ma zla ahaya a mətəgay. Kə zla ahaya na, ma zalateye a dzam ŋgay hay ta ndo i maged ŋgay hay ada ma gwadateye: “Dumara ŋgwasakwa ka bo dziye hərwi təbaŋ ga nakə a dze aye na, na huta na.”»

<sup>7</sup> Yesu a gwadatay sa: «Tadə ndo nəte kə gər ha mezeleme ŋgay na, sərūm ha na, mənḡwese ma giye andaya ka təv i Mbəlom mə mbəlom andza niye dərma, a ze ndo neheye kuro kuro tsid gər eye tsid ta zəba ka bo tay andza mezeleme andaya fataya təbey, a satay məḡare ha mezeleme tay bay aye.»

#### *Dzeke i kwar i suloy nakə a dze aye*

<sup>8</sup> Yesu a gwadatay sa: «Kəḡəbay, ŋgwas waray nakə kwar i suloy andaya kuro ada a dze faya abəra nəte na, ma piye ako ka lalam, ma fadiye na gay ŋgay ada ma pəliye na tə marəzlay a gər eye lele ma hutiyə na təday.

<sup>9</sup> Kə huta na na, ma zalateye a dzam ŋgay hay ta ndo i maged ŋgay hay. Ma gwadateye: “Dumara, ŋgwasakwa ka bo dziye hərwi na huta na kwar i suloy ga nakə a dze aye.”»

<sup>10</sup> Yesu a gwadatay sa: «Sərūm ha, tadə ndo nəte kə gər ha mezeleme ŋgay na, mənḡwese andaya mə walaŋ i gawla i Mbəlom hay.»

#### *Dzeke i bəba nakə a pəsay ha mənese a wawa ŋgay aye*

<sup>11</sup> Yesu a gwadatay sa: «Ndowne andaya na, wawa ŋgay hay sulo.

<sup>12</sup> Pat wuray na, bo wawa eye nakə a tsətsah ka bəba ŋgay, a gwaday: “Bəba ga, zlele yak nakə ka ŋḡənamay ha aza ta malamar ga aye na, vələŋ faya abəra i ga anəke.” Bəba tay a tsəne andza niye na, a ŋḡənatay ha zlele ŋgay a wawa ŋgay niye hay sulo aye.

<sup>13</sup> «A ndza məhəne tsekweŋ na, wawa niye bo wawa eye a həl zlele nakə bəba ŋgay a vələy aye, a səkam ha. Ma dəba eye na, a həl bo a ye ha ka bo ta suloy niye a ḡəma dəreŋ eye. A ndisl a ḡəma niye na, a dazlay a məḡe wu nakə lelebay aye. A nas ha suloy niye tebiye.

<sup>14</sup> «Suloy niye a ndəv faya abəra tebiye na, mandərzlan bagwar eye a ge ma ḡəma eye niye. Wawa niye a huta wu mənday sa bay.

<sup>15</sup> Tsa na, a ye mata pəle məsler. A huta məsler niye na, mə gay i ndo wuray ma ḡəma eye niye. Ndo niye a slər ha a pəsl mata tsəkure madəras hay.

<sup>16</sup> Ahəl nakə neŋḡeye faya ma tsəkuriye madəras hay aye na, may a wur faya. A say həbe mənde wu mənday nakə tə vələwatay a madəras hay aye na, ndaray kə vələy bay.

<sup>17</sup> «Tsa na, a dazlay mədzele ka dəretsətseh ŋgay. A dzala ka məndze ŋgay nakə mə gay i bəba ŋgay aye, a gwad: “Mə gay i bəba na, ndo i məsler ŋgay hay faya ta ndiye wu mənday lele ada a ze naha fataya abəra. Ada neŋ tuk na, na mətiye tə may kanaŋ na, kəkay!

<sup>18</sup> Nḡəma anəke na, na həliye bo na miye ka təv i bəba ga. Na ye na, na gwadeye: Bəba ga, na ge mənese kame i Bəba Mbəlom ada kame yak.

<sup>19</sup> Anəke na, na sla tə zelen wawa yak sa bay. Təra ga ha andza ndo i məsler yak tsa.”

<sup>20</sup> A dzala andza niye na, a hæl bo a mbæda gær a gay i bæba ngay.

«Mazlambar ma ndisliye a gay i bæba ngay na, bæba ngay a ngatay naha dæreŋ. A ngatay naha na, a gay mæ bo haladzay. Tsa na, a hway ka tæv ngay. A ye naha a gas na ka bo tæmbolok tæmbolok tæ mængwese eye lele.

<sup>21</sup> Yawa! Wawa niye a gwaday: “Bæba ga, neŋ na, na ge mænese kame i Mbælom ada kame yak. Neŋ na, na sla tâ zeleŋ wawa yak sa bay.”

<sup>22</sup> «Ane tuk na, bæba ngay a zalatay a ndo i mæsler ngay hay, a gwadatay: “A niye bæse! Dum naha, zlumaw rækwat nakæ a le haladzay aye ada kalumay ka bo. Dum naha, zlumaw matsærad, pumay a wur i hælây ada hælumaw tahærak, pumay a sik.

<sup>23</sup> Gæsumaw sla niye magæla eye, kædum. Ndayakwa ada ka hatsakweye.

<sup>24</sup> Hærwi wawa ga nakay na, hæbe na gwad kæ mæt, anæke na, neŋgeye andaya tæ dære. Hæbe kæ dze, anæke na, na huta na. Anæke na, dærev ga kæ ngwasa.” Tsa na, ta dazlay a mæhetse tuk.

<sup>25</sup> «Ahæl nakæ faya ta hatsiye aye na, wawa ngay bagwar eye mæ pesl ma guvah. Hælây i madayaw ngay a mættagay a sla na, a hælaw bo abæra ma guvah. A yaw mazlambar bæse tæ gay i bæba ngay na, a tsæne mæhetse ta ganŋan eye dæbtsim dæbtsim.

<sup>26</sup> Tsa na, a zalay a ndo næte mæ walarŋ i ndo i mæsler i bæba ngay hay, a tsætsah faya a gwaday: “Maa ge mæ gay kway bægom na, mey?”

<sup>27</sup> Ndo i mæsler i bæba ngay niye a mbæday faya a gwaday: “Faya ta hatsiye hærwi malamar yak kæ maw ma tæv eye. Ada bæba yak a kæf sla niye magæla eye hærwi kæ huta na wawa ngay, neŋgeye andaya zayzay lele, wuray kæ gay bay.”

<sup>28</sup> «Wawa bagwar eye a tsæne andza niye na, a ndalay haladzay. A kærah mede a mættagay. Bæba ngay a yaw ka tæv ngay, a gay amboh. A gwaday: “Dara a mættagay.”

<sup>29</sup> Ane tuk na, wawa ngay a mbæday faya a gwaday: “Tsæne wu nakæ na tsikakeye tæday. Kwa anæke bay, na gaka mæsler na, mæve haladzay ada dæda na kærah bazlam yak daw? Ka væleŋ wawa i vo’ar ada nâ ge ha magurlom ta dzam ga hay tey na, ka væleŋ daw?”

<sup>30</sup> Ane tuk na, ananŋ wawa yak nakay a nasaka ha zlele ka ngwas hay aye na, anæke a maw na, ka kæday sla sa na, kækay?”

<sup>31</sup> «Bæba ngay a mbæday faya a gwaday: “Wawa ga, mâ ndalaka bay. Nækar mandza eye na, huya ka tæv ga ada zlele ga hay tebiye na, i yak bædaw?”

<sup>32</sup> A ye ka bo tæde mæge magurlom tæ mængwese eye na, lele ngway. Hærwi malamar yak nakay na gwad na, kæ mæt. Anæke na, neŋgeye andaya tæ dære. Hæbe kæ dze, anæke na, na huta na!”»

## 16

### *Mbælom ta suloy*

### *Mata 6.24, 11.12-13, 5.31-32; Markus 10.11-12*

<sup>1</sup> Ma dæba eye na, Yesu a gwadatay a gawla ngay hay sa: «Ndowneye andaya zlele eye, ndo mæpesle suloy ngay andaya. Ti ye naha tæ gwaday a ndo i zlele niye: “Ndo mæpaslaka na suloy yak na, faya ma nasakeye ha zlele yak.”

<sup>2</sup> «Ndo i zlele niye a tsæne andza niye na, a zalay a ndo mæpesle suloy ngay niye a gwaday: “Na tsæne ndo hay tæ tsik ka nækar na, mey? Suloy nday na, pesleŋ na ka ge ha na, wu waray wu waray, hærwi nækar na, ka sliye faya matære ndo i mæsler ga sa bay.”»

<sup>3</sup> «Ndo mæpesle suloy niye a tsik mæ gær ɲgay, a gwad: “Ndo i gay ga ma hähariye ga abära ma mæsler ɲgay ada na giye na, kəkay? Ada kwa gədan ga andaya mæfäte sa bay tuk na, kəkay? Na gwad na rəkiye na, horoy ma geɲeye.

<sup>4</sup> Ah! Na sər na giye hərwi ada ndo hay ta təmiye ga a gay tay tadə ta kal ga ha abära ma mæsler na!”

<sup>5</sup> «A ye a zalatay a ndo neheye gwedere i ndo i gay ɲgay andaya fataya aye nəte ta nəte. Ti ye naha. Tsa na, a gwaday a ndo kurre eye: “Gwedere i ndo i gay ga fakaya na, nday?”

<sup>6</sup> «Ndo niye a mbəday faya a gwaday: “Dos i mal temerre.” Ndo mæpesle suloy niye a gwaday: “Derewel i gwedere yak anaj. A niye ndza bəse, watsa a dəma na, dos i mal kuro kuro zləm tsa.”

<sup>7</sup> «Tsa na, a gwaday a ndo nənɲed: “Ada nəkər na, gwedere i ndo i gay ga fakaya na, nday?” Ndo niye a mbəday faya a gwaday: “Tabay i bəle temerre.”

«Ndo mæpesle suloy niye a gwaday: “Derewel i gwedere yak anaj. A niye ndza bəse, watsa a dəma tabay i bəle kuro kuro tsamahkar tsa.”

<sup>8</sup> «Ndo i gay ɲgay a ɲgatay andza niye na, a zambaday a ndo mæpesle suloy ɲgay hərwi a ge mæsler ta bəbəkək. Andza niye, ndo neheye tə sər Mbəlom bay aye na, tə dzala ka wu nakə ma ta giye bo kame aye. Ta wuda bo mæ walaɲ tay. Nəteye bəbəkək eye hay ta ze ha ndo i Mbəlom hay.»

<sup>9</sup> Yesu a səkah ha me ɲgay niye, a gwadatay: «Nəɲ faya na gwadumeye sa: Gum ɲgwalak tə zlele i mändzibəra nakay lele. Hərwi tadə ka ndəv fakuma abära na, ka ta hutumeye sifa nakə ma ndəviye bay aye.

<sup>10</sup> «Ndo nakə a ge wu wawa eye hay ta tsəved eye na, ma giye wu bagwar eye hay ta tsəved eye dərma. Ndo nakə kwa wu wawa eye hay a ge na ta tsəved eye bay aye na, wu bagwar eye hay dərma ma giye na ta tsəved eye bay.

<sup>11</sup> Ada tadə ka mbum faya mäge mæsler ta tsəved eye lele tə zlele i mändzibəra nakay bay na, mata vəlakum zlele lele eye na, way?

<sup>12</sup> Tadə ka sərüm məgay gær a wu i ndo hay bay na, mata vəlakum wu kurom neheye ka ləvumay gær aye na, way?

<sup>13</sup> «Ndəray ma sliye mäge mæsler a ndo i gay ɲgay hay sulo bay. Hərwi pat nənɲed na, ma geye sewed a ndo i gay ɲgay nənɲed, ma wudiye na nənɲed lele. Kəgəbay ma gəseye me a ndo nənɲed, a ndo nənɲed na, ma gəseye me bay tebiye. Nəkurom bəbay ka slumeye faya mäge mæsler a Mbəlom ada a suloy sulo sulo bay.»

<sup>14</sup> Farisa hay tə tsəne bazlam i Yesu neheye a tsik aye tebiye. Tə ɲgwasə ka Yesu hərwi nəteye na, ta wuda suloy haladzay.

<sup>15</sup> Yesu a gwadatay a Farisa niye hay: «Nəkurom ka təv dərə i ndo hay na, ka gwadum nəkurom ndo lele eye hay. Ane tuk na, Mbəlom na, a sər dərəv kurom hay. Hərwi wu nakə ndo hay tə gwad bagwar eye na, ka təv dərə i Mbəlom na, lele bay tebiye.

<sup>16</sup> Həlay i bazlam i Musa mapala eye tə dərewel i ndo mədə ha bazlam i Mbəlom hay kə ndza hus a həlay i Yuhana madzəhuḅe ndo a yam. Kwa abära ahəl niye na, tə dawa ha Labara ɲgwalak eye i Bəy i Mbəlom. Həlay nakay na, kwa way a ge gədan hərwi məfələkwe a Bəy i Mbəlom.

<sup>17</sup> Magərmbəlom ta dala na, ta ndəviye. Ane tuk na, kwa wu tsekweɲ ma dziye abära mə bazlam ga mapala eye bay.

<sup>18</sup> «Ndoweye ka həhar na ɲgwas ɲgay ada kə zla a dəma ɲgwas mekeləɲ eye na, kə ge madama. Ada ndoweye kə zla ɲgwas nakə zal ɲgay a həhar na aye na, kə ge madama dərma.»

### *Ndo i zlele ta Lazar*

<sup>19</sup> Yesu a gwad̄atay sa: «Ndoweye andaya zlele eye. Nen̄geye a pawa ka bo peteked̄ nak̄a a le haladzay aye ada mas̄ak̄ame n̄gay eye na, suloy haladzay. Nen̄geye mandza eye pat pat ma wiya ada wu m̄anday n̄gay na, lele.

<sup>20</sup> Ndoweye andaya d̄armak m̄azele n̄gay Lazar. Nen̄geye na, m̄atawak eye, wuray n̄gay andaya bay. Bo n̄gay tebiye na, mb̄alak eye d̄ekd̄ek. A yaw ka m̄aged̄ i ndo i zlele niye. A h̄anawa m̄a d̄ama.

<sup>21</sup> A say hābe m̄ande batatuk i wu m̄anday nak̄a a kutsawa ab̄era ka t̄ov m̄ande wu m̄anday i ndo i zlele niye. Ane tuk na, k̄era hay t̄o yawa naha ka t̄ov n̄gay mandeked̄e mb̄alak n̄gay niye d̄uh.

<sup>22</sup> «Ma d̄aba eye na, Lazar a m̄at. Gawla i Mb̄alom hay t̄o zla na ka t̄ov i Abraham. Ndo niye zlele eye a m̄at d̄armak. Tsa na, t̄o la na.

<sup>23</sup> Ndo niye zlele eye na, a sawa d̄arets̄atseh haladzay ma t̄ov m̄andze i m̄adahan̄ hay. A z̄aba d̄are, a ma hā d̄are a ḡama na, a n̄gatay naha a Abraham ta Lazar n̄ateye ka t̄ov man̄ate eye d̄arej̄ t̄o nen̄geye.

<sup>24</sup> A zalay naha a Abraham, a gwad̄ay: “B̄aba ga Abraham, na gaka m̄a bo t̄ab̄ed̄ew? Amboh sl̄ar Lazar na, m̄a t̄al̄eka wur h̄alay n̄gay a yam ada m̄a t̄akwen̄ew ka d̄arneh̄ magen̄ zayya tey. H̄arwi nen̄ faya na siye d̄arets̄atseh haladzay ma ako nakay.”

<sup>25</sup> «Ane tuk na, Abraham a gwad̄ay naha: “Wawa ga, s̄ar hā na, ka huta ka m̄andzib̄era na, haladzay. Lazar nen̄geye na, k̄o sa d̄arets̄atseh haladzay. An̄eke na, nen̄geye mandza eye barbarra, ma ndiye i n̄gay tey. An̄eke n̄akar na, ka siye d̄arets̄atseh d̄armak tey.

<sup>26</sup> Ada sa tsa na, b̄ad̄ z̄abol eye m̄a walan̄ kway. Andza niye ndo neheye a satay mede naha a diye kurom aye na, ta sliye faya mede naha bay. Ada madayaw ab̄era ka t̄ov kurom a t̄ov may b̄abay na, ma tasiye bo bay.”

<sup>27</sup> «Ndo i zlele niye a gwad̄ay naha a Abraham: “Amboh, sl̄ar Lazar a gay i b̄aba ga,

<sup>28</sup> malamar ga hay andaya zlam. M̄a ye m̄a gatay d̄af na, t̄a yaw a t̄ov i d̄arets̄atseh nakay bay.”

<sup>29</sup> «Abraham a mb̄ed̄ay faya, a gwad̄ay: “Malamar yak hay na, Musa ta ndo m̄ad̄e ha bazlam i Mb̄alom hay andaya ta d̄atay ha. T̄a pay zl̄am a bazlam tay.”

<sup>30</sup> «Ndo i zlele niye a gwad̄ay a Abraham: “Niye na, ma sliye d̄a bay, b̄aba ga Abraham. Ane tuk na, tad̄e nd̄aray a maw ab̄era ma b̄ad̄, a ye ka t̄ov tay na, ta mb̄adiye ha mede tay.”

<sup>31</sup> «Abraham a gwad̄ay: “Tad̄e ta pay zl̄am a Musa ta ndo m̄ad̄e ha bazlam i Mb̄alom hay bay na, kwa ndo m̄a l̄atsew ab̄era ma m̄adahan̄, m̄a ye ka t̄ov tay b̄abay na, ta ts̄aniye bay.”»

## 17

### *Mezeleme*

#### *Mata 18.6-7,21-22; Markus 9.42*

<sup>1</sup> Yesu a gwad̄atay a gawla n̄gay hay: «Wu hay andaya haladzay ta s̄apatiye tay ha ndo hay ka m̄age mezeleme. Kut̄on̄ ma giye bo andza niye. Ane tuk na, d̄arets̄atseh ka ḡar i ndo nak̄a ma s̄apatiye ndo hay ka m̄age mezeleme aye.

<sup>2</sup> N̄gama t̄a b̄aray mad̄iz i kwar a d̄ay ada t̄a kal ha a hud̄ i b̄alay t̄o b̄amal̄o nak̄a ma s̄apatiye n̄ate m̄a walan̄ i wawa neheye tsekwen̄ tsekwen̄ ka m̄age mezeleme aye.

<sup>3</sup> An̄eke na, gum metsehe lele, h̄abum ḡar kurom.

«Tadə malamar yak kə gaka mənese na, tsikay faya ta tsəfetsəfe aye. Ada tadə kə gər ha mezeleme ŋgay na, pəsay ha mezeleme ŋgay.

<sup>4</sup> Tadə a gaka mənese mə walaŋ i məhəne nəte sik tasəla ada faya ma deyeweye ka təv yak məgwadaka: “Na nasaka, amboh pəsa ga ha” na, pəsa ha.»

*Məgəle ha mədzal gər  
Mata 17.20*

<sup>5</sup> Ndo i maslaŋ i Yesu hay ta tsətsah, tə gwaday a Yesu: «Bəy Maduweŋ, səkahamay ha mədzal gər ka nəkar tey.»

<sup>6</sup> Bay Maduweŋ a mbədətay faya a gwadətay: «Tadə ta dedek mədzal gər kurom mâ ge andaya tsekweŋ andza wur i bəzaŋ na, ka slumeye faya məgwaday a dərizl i gərdaf i kuvoray nakay: “Ŋgwad abəra kanaŋ, do ta zəv bo a bəlay” na, ma gəsakumeye me.»

*Ndo mäge məsler neheye ta hutiyə magogoy bay aye*

<sup>7</sup> Yesu a gwadətay sa: «Way nakə mə walaŋ kurom, ndo i məsler ŋgay faya ma fəteye ma guvah aɡəna ma tsəkureye na gənaŋ ŋgay hay, kə maw a matagay na, ndo i gay ŋgay ma gwadeye: “Dara bəse, nda daf” daw?»

<sup>8</sup> Ane tuk na, ma gwadeye duh na: “Do naha, deŋew daf ga. Mbədaw ka bo peteked mekeleŋ hərwi məhəleŋew daf ga. Ahəl nakə neŋ faya na ndiye ada na siye wu məse aye na, ma dəba eye nəkar dərmak ka sliye faya mənde wu mənday ada ka siye wu məse.” Ndo i gay ŋgay ma tsikəye andza niye bədaw?»

<sup>9</sup> Ka dzalum na, ma geye sişce a ndo i məsler ŋgay niye hərwi kə gay na wu nakə a tsikalay ge aye daw?»

<sup>10</sup> «Nəkurom dərmak andza niye, tadə ka gum məsler nakə Mbəlom a gwadakum “gum” aye na, gwadum duh na: “Nəmay ndo mäge məsler tsa hərwi nəmay, nəmaa ge na, məsler nakə təde a ye ka bo nəmaa giye.”»

*Yesu a mbəl tay ha ndo madəgwada eye hay kuro*

<sup>11</sup> Yesu faya ma diye a Zerozelem na, a ye tə kokway nakə a ŋəna ha dala i Samari ta dala i Galile aye.

<sup>12</sup> Mazlambar ma ta ndisiye a gəma wuray na, ndo madəgwada eye hay kuro ta hway naha a satay mədzəgər tage Yesu. Tə lətse dərəŋ.

<sup>13</sup> Tsa na, ta wuda ta gədaŋ, tə zalay naha a Yesu, tə gwad: «Yesu, Bəy! Nəmaa gaka mə bo təbədew!»

<sup>14</sup> Yesu a ŋgatatay, a gwadətay naha: «Dum ta bəzumay ha bo a ndo neheye tə vəlaway wu a Mbəlom aye.» Nəteye faya ta diye mata bəzatay ha bo a ndo məvələway wu a Mbəlom na, tə mbəl suwud suwud.

<sup>15</sup> Ndo nəte mə walaŋ tay a zəba ka bo ŋgay na, kə mbəl suwud suwud. A mbədə gər ka təv i Yesu pəlasl. A ye tə mazambaday naha a Mbəlom ta magala.

<sup>16</sup> A ye naha na, a kal ha bo kame i Yesu ta da’ar luz ka dala. A gay sişce haladzay a Yesu. Ndowne niye na, ndo i Samari hay.

<sup>17</sup> Yesu a gwad: «Na gwad tə mbəl na, kuro tebiye bədaw? Neheye tsid eye na, nəteye mənəgay?»

<sup>18</sup> Ndərəy kə dzala mə walaŋ tay madayaw məgay naha sişce a Mbəlom bay. Duh mayaw na, bərakəzaŋ nakay daw?»

<sup>19</sup> Tsa na, Yesu a gwaday a bərakəzaŋ niye: «Lətse! Do wu yak, mədzal gər yak nakə ka dzala ha ka neŋ aye kə mbəl kar ha.»

*Maa sər pat i mandəve i məndzibəra na, Mbəlom nəte ŋgwəŋ  
Mata 24.23-28,37-41*

<sup>20</sup> Pat wuray na, Farisa hay ta tsətsah ka Yesu, tə gwadəy: «Bəy i Mbəlom ma ta deyeweyə na, kədəy?»

Yesu a mbədatay faya a gwadətay: «Bəy i Mbəlom ma deyeweyə na, ndo hay ta ŋgatey bay.

<sup>21</sup> Ta gwadiye: “Zəbum neŋgeye anan kanan” kəgəbay “Neŋgeye atay” bay. Hərwi sərūm ha Bəy i Mbəlom na, neŋgeye mə walaŋ kurom.»

<sup>22</sup> Tsa na, a gwadətay a gawla ŋgay hay: «Həlay eye ma deyeweyə ma sakumeyə mənġatay a Wawa i Ndo kwa pat eye nəte tsa, ane tuk na, ka ŋgatumeyə bay.

<sup>23</sup> Ta gwadumeyə: “Zəbum atay!” Kəgəbay “Zəbum neŋgeye anan!” Ane tuk na, kâ yum bay, kâ hwayum faya bay.

<sup>24</sup> Pat eye ma deyeweyə neŋ Wawa i Ndo na deyeweyə na, andza mawutsede i mbəlom nakə a wutsede na, dzaydzay ŋgay eye a dəv kwa abəra mə bəzay i mbəlom hus a məgəma aye. Na deyeweyə na, andza niye.

<sup>25</sup> Ane tuk na, na siye dəretsətseh haladzay təday ada ndo neheye anəke aye ta kaliye ga ha.»

<sup>26</sup> «Wu nakə a ge bo a həlay i Nuhu aye na, pat nakə neŋ Wawa i Ndo na deyeweyə na, ma ta giye bo andza niye dərmak.\*

<sup>27</sup> Ahəl niye na, ndo hay tə ndayawa wu mənday ada tə sawa wu məsay, tə zlaw dahəlay hay ada tə vəlawə dem tay hay a zal hus a pat nakə Nuhu a fəlakwa a kwalalaŋ i yam aye. Yam bagwar eye a rah ka məndzibəra a dze tay ha siye i ndo hay tebiye.

<sup>28</sup> «Sa na, ma ta təriye andza a həlay i Lot: Ndo hay tə ndayawa wu mənday ada tə sawa wu məsay. Ta səkəmawa wu hay ada ta səməkawa ha. Ta zəvawa dərizl i gərdaf hay ada ta dəzlawa gay tay hay.

<sup>29</sup> Ane tuk na, pat nakə Lot a lətse a yaw abəra ma gəma i Sodom aye na, ako a paw abəra mə mbəlom andza yam ada tə wuyə andaya a təma wafafafa, a dze tay ha ndo i gəma niye hay tebiye.†

<sup>30</sup> Pat nakə neŋ Wawa i Ndo na deyeweyə na, ma ta təriye andza niye dərmak.

<sup>31</sup> «Pat eye niye na, ndo nakə ka gər i gay ada wu ŋgay hay mə gay aye na, mə mbəzlaw hərwi məzlaw wu mə gay bay. Andza niye ndo nakə ma guvah aye na, mə maw a mətəgay bay.

<sup>32</sup> Wu nakə a ge bo ta ŋgwas i Lot aye na, mə mətsakum gər bay!‡

<sup>33</sup> Ndo nakə ka pəla mətəme ha məsəfəre ŋgay aye na, ma ta dziye ha dūh. Ane tuk na, ndo nakə ma dziye ha məsəfəre ŋgay hərwi ga aye na, ma təmiye ha dūh.

<sup>34</sup> «Sərūm ha pat eye niye ta həvad na, ndo hay sulo mahəna eye ka sləlah na, ta zliye nəte, ta gəriye ha neŋged.

<sup>35</sup> ŋgwas hay sulo ta ləgəriye salamay ka ber, ta zliye nəte, ta gəriye ha neŋged. [

<sup>36</sup> Hasləka hay sulo ma guvah ta fətiye, ta zliye nəte, ta gəriye ha neŋged.]»

<sup>37</sup> Gawla ŋgay hay ta tsətsah faya tə gwadəy: «Wu niye ma ta giye bo andza niye na, ka waray Bəy Maduweŋ.»

Yesu a mbədatay faya a gwadətay: «Təv nakə wu maməta eye mə dəma aye na, magoduk hay ta hayiye gər a dəma.»

\* **17:26** Madazlay i wu hay 6.5-12, 7.6-23. † **17:29** Madazlay i wu hay 19.24-25. ‡ **17:32** Madazlay i wu hay 19.26.

## 18

### *Maduwulay me a Mbəlom tə marəzlay a gər*

<sup>1</sup> Ma dəba eye, Yesu a tsikatay dzeke hərwi məde tay ha na, tã dıwulay me a Mbəlom huya tã ye gər maduwule me bay.

<sup>2</sup> A gwadətay:

«Ndo mäge sariya wuray ma gəma eye andaya. Ndowne niye na, madzədzeri i Mbəlom mə dərev ɲgay təbey, ada ndo a gay mə gər bay sa.

<sup>3</sup> Madakway i ɲgwas andaya ma gəma eye niye dərma. Madakway i ɲgwas niye a yawa ka təv ɲgay pat pat hərwi m̄a gay na sariya ɲgay tey. A gwadaya a ndo mäge sariya niye: “Gamay na sariya ta ndo m̄ane d̄are ga anan̄ tey.”

<sup>4</sup> «Kə ndza haladzay ndo mäge sariya a kəma mäge sariya i madakway i ɲgwas niye bay. A dzala mə gər ɲgay a gwad: “Ayaw! Neɲ na dzala gər ka Mbəlom bay ada kwa ndo a geɲ mə gər bay,

<sup>5</sup> ane tuk na, madakway i ɲgwas nakay faya ma wurdeɲeye me, ɲgama na geye na sariya ɲgay təday bəna, ma gəriye ha madayaw ka təv ga bay.”»

<sup>6</sup> Bəy Maduweɲ a gwadətay sa: «Tsənum wu nakə ndo mäge sariya niye ɲgwalak eye bay a tsik aye!

<sup>7</sup> Ada Mbəlom neɲgeye na, ma dzəniye ndo ɲgay hay bədaw? Tadə faya ta tuway naha bo na, ma giye mahonok madzəne tay d̄aw?

<sup>8</sup> Sərum ha na, ma dzəniye tay ta bəse. Ane tuk na, aza neɲ Wawa i Ndo na deyewe ye na, na hutieye ndo m̄adzal gər hay ka neɲ ɲgway d̄aw?»

### *Ndo i Farisa ta ndo matsekele dzanɲal*

<sup>9</sup> Yesu a tsikatay dzeke mekeleɲ eye sa. Dzeke niye na, hərwi ndo neheye tə dzala tə gwad nəteye ka d̄are i Mbəlom na, ɲgwalak eye hay ada nəteye ta zəba ka siye i ndo hay na, andza ndo hay bay.

<sup>10</sup> A gwadətay:

«Ndowne hay andaya sulo, ti ye a gay i m̄adəslay ha gər a Mbəlom mata dıwulay me a Mbəlom. Ndo neɲged na, ndo Farisa, neɲged na, ndo matsekele dzanɲal.

<sup>11</sup> «Ti ye naha na, ndo Farisa niye a lətse təv ɲgay wal. A gwad mə d̄arev ɲgay: “A! A! Mbəlom ga, na gaka naha sisə hərwi neɲ na, andza siye i ndo hay təbey. Nəteye na, m̄akal eye hay, ndo ɲgwalak eye hay bay. Tə gawa madama. Neɲ na, na gaka naha sisə hərwi neɲ andza ndo matsekele dzanɲal nakay təbey.

<sup>12</sup> Mə luma nəte na, na gawa daliyam sik sulo. Wu ga kuro na, na vələwa nəte.”»

<sup>13</sup> «Ndo matsekele dzanɲal neɲgeye na, a lətse d̄areɲ. Kwa kə lətse ha gər mazəbe d̄are a mbəlom bay tebiye. Ane tuk na, a gwad: “Mbəlom! Na gaka mə bo tey hərwi neɲ na, ndo i mezeleme.”»

<sup>14</sup> Yesu a gwadətay: «Sərum ha na, ndo matsekele dzanɲal nakay a ye a ɲgway a m̄atagay na, neɲgeye ka təv i Mbəlom na, lele. Ane tuk na, ndo Farisa niye neɲgeye na, andza niye təbey. Hərwi ndo nakə a say tã gwad neɲgeye bagwar eye na, Mbəlom ma təriye ha wawa eye d̄uh. Ndo nakə a t̄era ha bo ɲgay wawa eye kame i ndo hay aye na, Mbəlom ma təriye ha bagwar eye d̄uh.»

### *Yesu a t̄ema wawa hay*

#### *Mata 19.13-15; Markus 10.13-16*

<sup>15</sup> Ma dəba eye na, ndo hay t̄ə həl naha wawa tsekweɲ tsekweɲ eye hay a Yesu hərwi ada m̄a pa fataya həlay ada tã huta ɲgama. Ane tuk na, gawla ɲgay hay t̄ə gatay me a ndo niye hay t̄ə həlay naha wawa hay aye.



16 Yesu a gwad̄atay a wawa hay: «Həndzəd̄umaw ka təv ga.» A gwad̄atay a gawla ŋgay hay: «Gər̄um tay ha wawa hay, t̄a yaw ka təv ga! K̄a h̄əharum tay ha bay, h̄ərwi B̄əy i Mb̄əlom mav̄əla eye na, a slala i ndo neheye andza wawa neheye.

17 Sər̄um ha na, ndoweye ka t̄əma B̄əy i Mb̄əlom andza wawa neheye bay na, ma diye a B̄əy i Mb̄əlom bay.»

*Ndo i zlele ta B̄əy i Mb̄əlom*

*Mata 19.16-30; Markus 10.17-31*

18 B̄əy i Yahuda wuray a tsətsah ka Yesu, a gwad̄ay: «Miter lele eye, na hut̄iye sifa nak̄ə ma nd̄əviye bay aye na, na giye na, k̄əkay?»

19 Yesu a gwad̄ay: «Ka zeleŋ ndo lele eye na kemey? Ndo lele eye na, Mb̄əlom n̄əte ŋgweŋ.

20 Ka sər̄ bazlam i Mb̄əlom mapala eye d̄aw? Bazlam i Mb̄əlom mapala eye a gwad̄ na: K̄a ge madama bay, k̄a k̄əd̄ gər̄ i ndo bay, k̄a ge m̄əkəl bay, k̄a raw me ka ndo kame i sariya bay, r̄əhatay ha gər̄ a b̄əba yak ta may yak.\*»

21 Ndo niye a mb̄əd̄ay faya a gwad̄ay: «Gər̄ i bazlam mapala eye neheye ka paslaw aye na, na h̄ənay ha gər̄ kwa ma wawa.»

22 Yesu a ts̄əne andza niye na, a gwad̄ay: «A zəkaw fakaya ab̄əra wu n̄əte sa: An̄əke na, do ta s̄ək̄əm ha zlele yak hay tebiye ada k̄a ŋḡən̄atay suloy eye a ndo i m̄ətawak hay. Ka ge andza niye na, ka ta hut̄iye zlele m̄ə mb̄əlom. Tsa na, dara, peŋ b̄əzay.»

23 Ane tuk na, ndo niye a ts̄əne bazlam niye na, a ndalay haladzay h̄ərwi zlele ŋgay na, haladzay.

24 Yesu a z̄əba faya na, a ndalay, a gwad̄: «H̄ərwi ndo i zlele na, mede a B̄əy i Mb̄əlom i ŋgay na, mada me eye haladzay.

25 T̄ə b̄əmal̄ə nak̄ə ndo i zlele ma diye a B̄əy i Mb̄əlom aye na, ŋgama z̄əgweme m̄a ye ta b̄əd̄ i l̄əp̄əre.»

26 Ndo neheye t̄ə ts̄əne bazlam i Yesu nak̄ə a tsik aye na, t̄ə gwad̄: «Ane tuk na, k̄ə ge andza niye na, mata sle m̄ət̄əme na, way?»

27 Yesu a mb̄əd̄atay faya, a gwad̄atay: «N̄dəray ma s̄liye m̄ət̄əme bay. Ane tuk na, Mb̄əlom ma s̄liye m̄ət̄əme ha ndo.»

28 Tsa na, Piyer a gwad̄ay: «Ts̄əne! N̄əmay an̄əŋ, n̄əmaa gər̄ ha gay may h̄ərwi m̄əpaka b̄əzay na, k̄əkay?»

29 Yesu a gwad̄atay: «Sər̄um ha, ndoweye k̄ə gər̄ ha gay ŋgay, ŋgwas ŋgay, malamar ŋgay hasl̄əka eye hay ta malamar ŋgay dem eye hay, b̄əba ŋgay ta may ŋgay, wawa ŋgay hay h̄ərwi B̄əy i Mb̄əlom na,

30 an̄əke ah̄əl kway nakay ma hut̄iye a d̄əma haladzay ada kame na, ma hut̄iye sifa nak̄ə ma nd̄əviye bay aye.»

*Yesu a d̄a ha m̄əməte ŋgay*

*Mata 20.17-19; Markus 10.32-34*

31 Yesu a zalatay a gawla ŋgay niye hay kuro gər̄ eye sulo aye ab̄əra m̄ə walaŋ i ndo hay k̄ətsah. Tsa na, a gwad̄atay: «Ts̄ənum! An̄əke na, ka tsalakweye a Zerozelem. M̄ə d̄əma na, wu nak̄ə ndo m̄əd̄e ha bazlam i Mb̄əlom hay t̄ə watsa ah̄əl niye ka gər̄ i neŋ Wawa i Ndo aye na, ma giye bo tuk.

32 Ta v̄əlat̄eye ga ha a ndo neheye t̄ə sər̄ Mb̄əlom bay aye. Ta ŋgwasiye fagaya, ta tsed̄ənye, ta tuf̄er̄eye sleslēf a d̄əre.

\* 18:20 Madayaw ab̄əra ma Ezipt 20.12-16; Levitik 5.16-20.



<sup>33</sup> Ta ndaɓiye ga ta mandalaɓa ada ta kaɗiye ga. Ane tuk na, ma mæhæne mamahkar eye na, na lætseweye abæra ma mædahaŋ.»

<sup>34</sup> Ane tuk na, gawla ŋgay hay ta tsæne wu nakæ a tsik aye bay. A ge fataya bazlam nakæ Yesu a tsik aye a say mægweɗe mey na, maŋgaha eye. A tsik na, ka gær i wu waray na, tæ sær bay.

*Yesu a mbæl ha ndo wuray guluf eye ma gæma i Zeriko  
Mata 20.29-34; Markus 10.46-52*

<sup>35</sup> Mazlambar Yesu ma ndisliye a Zeriko na, guluf wuray andaya mandza eye ka tsakay i tsæved, a rækawa wu ka ndo hay.

<sup>36</sup> A tsæne ndo hay faya ta diye ka tsæved na, a gwadåtay: «Labara i mey?»

<sup>37</sup> Ta mbæday faya, tæ gwadáy: «Yesu ndo i Nazaret ma diye tæ fa'anaŋ.»

<sup>38</sup> Guluf niye a tsæne andza niye na, a wuda ta magala, a gwad: «Yesu, Wawa i Davit, nâ gaka mæ bo tæbæɗew?»

<sup>39</sup> Ndo neheye tæ lah naha kame aye na, tæ gay me a guluf niye hærwi ada mæ bæbæl wuray bay, mâ ndza dîkðik.

Duh a zaka ha mawude haladzay ta magala, a gwad: «Wawa i Davit, nâ gaka mæ bo tæbæɗew!»

<sup>40</sup> Yesu a ndisl naha na, a lætse, a gwadåtay: «Dum gæsumayaw hælai kanaŋ.» Tsa na, ti ye tæ gasayaw hælai. A ndisl naha ka tæv i Yesu na, Yesu a tsætsah faya, a gwadáy:

<sup>41</sup> «A saka nâ ge hærwi yak na, mey?»

Guluf niye a mbæday faya, a gwadáy: «Bæy ga, a seŋ na, nâ ŋgatay a dære sa tey.»

<sup>42</sup> Tsa na, Yesu a gwadáy: «Yawa lele, mædzal gær yak nakæ ka dzala ga ha aye na, kæ mbæl kar ha.»

<sup>43</sup> Kwayaŋŋa guluf niye a ŋgatay a dære. A pay bæzay a Yesu. A zambadáy a Mbælom. Ndo niye hay haladzay aye tæ ŋgatay a wu nakæ a ge bo aye na, næteye tebiye ta zambadáy a Mbælom.

## 19

*Yesu ta Zase*

<sup>1</sup> Yesu a ndisl a Zeriko na, a ye ta wuzlahgæma i Zeriko niye.

<sup>2</sup> Ahæl nakæ faya ma diye na, ndoweeye andaya tæ zalay Zase, neŋgeye andaya dærmak. Neŋgeye na, zlele eye. Neŋgeye bagwar i ndo matsekele dzanjal hay.

<sup>3</sup> A pæla tsæved maŋgatay a Yesu na, way. Ane tuk na, kæ ŋgatay bay hærwi ndo hay haladzay ada neŋgeye na, dakwel eye.

<sup>4</sup> A hway ka me, a ye naha a tsal a gærðaf i kuvoray. A tsal a gærðaf na, hærwi maŋgatay a Yesu nakæ ma diye ta tsæved niye aye.

<sup>5</sup> Yesu a ndisl naha a bæzay i gærðaf i kuvoray niye na, a zla gær ka mbælom, a zæba dære a gærðaf niye. A ŋgatay naha a Zase. Tsa na, a gwadáy naha: «Zase, mbæzlaw bæse. Bægom na diye na ta ndziye mæ gay yak.»

<sup>6</sup> Zase a tsæne andza niye na, a mbæzlaw bæse. Tsa na, ti ye ka bo a gay ŋgay. Ti ye naha na, a tæma tay ha tæ maŋgwele lele.

<sup>7</sup> Ndo hay tæ ŋgatay andza niye na, a ndalatay. Ta ŋgælai bæzay a Yesu. Tæ gwad: «Ndo nakay a ye mata ndze mæ gay i ndo i mezeleme ðaw!»

<sup>8</sup> Zase neŋgeye a lætse kame i Bæy Maduweŋ a gwadáy: «Tsæne Bæy Maduweŋ ga! Anæke na, na ŋgæniye ha zlele ga wudak, na ŋgænatay ha a mætawak hay.

Ada tadə na zla suloy abəra ka ndoweye ka zal na, na may ha ngway a dəma madzəga fad.»

<sup>9</sup> Yesu a tsəne andza niye na, a gwadāy: «Bəgom mətəme ki yaw a gay yak hərwi nəkar na, wawa i Abraham dərma.

<sup>10</sup> Hərwi neŋ Wawa i Ndo na yaw na, mapəle ndo neheye madza eye hay ada mətəme tay ha.»

*Dzeke i suloy nakə ndo a ngənatay a ndo i məsler ngay hay aye*  
*Mata 25.14-30*

<sup>11</sup> Ndo niye hay faya ta pay zləm a bazlam ngay niye hay na, Yesu a tsikatay dzeke sa. A tsik dzeke niye na, mazlambar ma ndisliye a Zerozelem. Ndo hay tə dzala na, tə gwad: «Mazlambar Bəy i Mbəlom ma deyeweye tuk.»

<sup>12</sup> Wu nakə Yesu a tsikatay aye na, anaŋ, a gwadāy:

«Ndowneye andaya neŋgeye na, gwala i bəy hay. A ye a gəma dəreŋ eye hərwi ada tā pa ahaya a bəy. Ta pa na a bəy na, ma maweye ma ləviye ndo ngay hay.

<sup>13</sup> Ma ta həliye bo ma diye na, a zalatay a ndo i məsler ngay hay kuro. Nəteye niye kuro aye ti ye naha. Ti ye naha na, a ngənatay kwar i suloy. A vəlatay kwar i suloy nəte nəte tay aye. Kwar i suloy niye nəte na, suloy mə dəma haladzay. A gwadāy: “Mbədum ha həlay hus a pat nakə na maw aye.”

<sup>14</sup> «Ane tuk na, ndoweye niye a say bəy aye na, ndo i gəma ngay hay ta wuda na bay. Tə slər ndo hay ma dəba ngay hərwi tā ye tā gwadāy na: “A samay ndo nakay mā təra bəy may bay.”

<sup>15</sup> «Ada dūh huya ta pa na a bəy. Tə pa na a bəy na, a maw a gəma ngay tuk. A maw na, a zalatay a ndo i məsler ngay niye hay a ngənatay kwar i suloy aye hərwi məsəre ha magogoy nakə tə huta faya aye.

<sup>16</sup> «Ndo makurre eye a ye naha, a gwadāy: “Ndo i gay ga, kwar i suloy nakə ka vəleŋ aye na, na huta faya kuro.”

<sup>17</sup> «Bəy niye a gwadāy: “Nəkar na, ndo i məsler lele eye defək. Anəke na, na piye kar a bəy, ka ləviye gəma kuro hərwi məsler nakə tsekweŋ aye ka ge na ta tsəved eye.”

<sup>18</sup> «Ndo masulo eye a ye naha a gwadāy: “Ndo i gay ga, suloy niye ka vəleŋ eye na, na huta faya zlam.”

<sup>19</sup> «Bəy a gwadāy a ndo niye: “Nəkar na, na piye kar bəy eye, ka ləviye gəma zlam.”

<sup>20</sup> «Ma dəba eye na, ndo neŋged a ye naha a gwadāy: “Ndo i gay ga, kwar i suloy yak nakə ka vəleŋ aye anaŋ. Na ləva faya bo lele na mbuza na a peteked, na ngaha na lele.

<sup>21</sup> Na dzədzaraka haladzay, hərwi nəkar na, ndo makula gər eye. Wu yak bay na, ka zliye tsa, ka sləga bay na, ka dziye tsa.”

<sup>22</sup> «Bəy niye a mbədāy faya a gwadāy: “Nəkar na, ndo i məsler nakə ngwalak eye bay aye. Maa gəs kar a sariya na, bazlam yak eye wu yak. Ka sər ha kurre neŋ na, ndo makula gər eye, ada kwa wu ga bay na, na zliye, na sləga bay na, na dziye tsa na,

<sup>23</sup> ada ka mey, meeneŋ na, peŋ na suloy a gay nakə tə pawə a dəma suloy aye. Atay ka məmaw ga na, na diye na həlaweye abəra mə dəma na, na hutiye faya magogoy.”

<sup>24</sup> «Tsa na, a gwadāy a ndo neheye ka təv aye niye: “A niye zlum faya abəra kwar i suloy niye. Vəlumay faya a ndo nakə kwar i suloy andaya faya kuro aye.”

<sup>25</sup> «Ndo niye hay ta mbədāy faya tə gwadāy: “Bəy may, neŋgeye na, kwar i suloy ngay andaya kuro segey!”

26 «Bəy niye a gwadatay: “Sərum ha na, ndo nakə wu ɲgay andaya na, ta səkahay ha sa. Ane tuk na, ndo nakə wu ɲgay andaya bay aye na, kwa tsekweɲ eye nakə andaya faya aye na, ta zliye na faya abəra.

27 Ane tuk na, ndo neheye a satay nâ təra bəy tay bay aye na, dum naha, gəsumatay ahaya ada kâ kədum tay ha ka dəre ga kanan.”»

*Məfələkwe i Yesu a Zerozelem*

*Mata 21.1-11; Markus 11.1-11; Yuhana 12.12-19*

28 Yesu a ndəv ha mətsike me niye andza niye na, a ye a ndzatay kame a ndo hay mede a Zerozelem.

29 Mazlambar ta husiye a gəma i Betifadze ta Betani bəse ta mahamba nakə tə zalay Mahamba i Tetədəz aye na, a slər gawla ɲgay hay kame sulo.

30 A gwadatay: «Dum a gəma nakə kame kurom aye. Ka ndislum naha na, ka ndzumeye a gər a zuɲgo wawa eye maɓara eye ndəray kə ndza faya dāda zuk bay. Pəlumaw ada kâ yumeɲ ahaya kanan.

31 Tadə ndəray ka tsətsah fakuma: “Ka pəlumeye na zuɲgo eye a ɲgay” na, gwadumay: “A say a Bəy Maduweɲ.”»

32 Ndo i məsler niye hay sulo aye tə həl bo ti ye. Ti ye naha na, tə ndzay a gər andza nakə Yesu a tsikatay aye.

33 Tsa na, ta dazlay a məpəle zuɲgo niye. Ahəl nakə nəteye faya ta pəliye zuɲgo niye na, ndo i zuɲgo niye a gwadatay: «Ka pəlumeye na zuɲgo eye hərwi mey?»

34 Ta mbəday faya tə gwaday: «A say a Bəy Maduweɲ.»

35 Gawla i Yesu neheye sulo aye, ti ye ahaya zuɲgo niye a Yesu. Ti ye ahaya na, ta fətəl faya peteked tay hay. Tsa na, tə tsal ha faya Yesu.

36 Faya ta diye na, ndo hay ta fətəl peteked tay hay ka tsəved nakə Yesu faya ma diye tə dəma aye.

37 Mazlambar faya ta ndisliye a Zerozelem ta tsəved nakə ma mbəzlaw ta Mahamba i Tetədəz aye na, gawla ɲgay hay tebiye ta dazlay a mazambaday a Mbəlom tə mənɲwese eye lele ada tə mawude ta magala ɲgələkaka hərwi masuwayaɲ nakə tə ɲgatay Yesu a ge aye.

38 Tə gwadawa: «Mbəlom mâ pa ɲgama ka Bəy nakə faya ma deyeweye tə məzele i Bəy Maduweɲ aye!»\*

«Zay mə mbəlom, ada zambadəkway a Mbəlom, neɲgeye nakə mə mbəlom aye!»

39 Mə walaɲ i ndo niye hay haladzay aye na, Farisa hay andaya. Tə gwaday a Yesu: «Miter, gwadatay a gawla yak hay tã gər ha məbəbəle wuray.»

40 Yesu a mbədatay faya a gwadatay: «Sərum ha na, kwa nəteye ta ndza dikdik bəbay na, kwar hay ta wudiye!»

*Yesu a tuwa dəretsətseh i Zerozelem*

41 Ahəl nakə Yesu a ndisl neɲgeye bəse tə wuzlahgəma i Zerozelem aye na, a ɲgatay na, a tuwa. 42 A gwad: «A nəkar Zerozelem, tadə bəgom ka sər wu nakə ma sliye faya məvələka zay aye na, haɓe ka tamiye abəra mə dəretsətseh. Ane tuk na, anəke na, maɲgaha eye faka abəra, ka sliye faya mənɲgatay bay!

43 Pat i dəretsətseh hay ta deyeweye fakaya. Ndo mənə dəre yak hay ta deyeweye tə wu həlay tay ta lawariye kar tuwzik, ta dərəzliye kar. Ta ɲgədətsiye kar kwa tə waray tə waray.

44 Ta bəbazliye kurom ta ndo yak hay tebiye. Kwa kwar ka gər i kwar ta gəriye ha bay, ta mbəzliye ha tebiye hele hele. Hərwi mey andza niye na?

\* 19:38 Dames hay 118.26.

Hərwi nəkar na, pat nakə Mbəlom ma yaw mata dzəne kar aye na, ka sər ha bay!»

*Yesu a tsikatay bazlam i Mbəlom a ndo hay*

*Mata 21.12-17; Markus 11.15-19; Yuhana 2.13-22*

<sup>45</sup> Yesu a ndisl a Zerozelem na, a ye a dalamətagay i gay i mədəslay ha gər a Mbəlom. A ye naha na, a dazlay mahəhere ndo məge tsakala hay abəra ma dalamətagay i gay i mədəslay ha gər a Mbəlom niye. A gwadatay:

<sup>46</sup> «Mawatsa eye mə Derewel i Mbəlom na: “Gay ga ma ta təriye na, gay i maduwule me.†” Ane tuk na, nəkurom ka tərüm ha lar i məkal hay na, kəkay?‡»

<sup>47</sup> Yesu a tsikawatay bazlam i Mbəlom a ndo hay pat pat mə gay i mədəslay ha gər a Mbəlom. Bagwar hay i ndo neheye tə vəlaway wu a Mbəlom aye ta ndo mədzaŋgawa bazlam i Mbəlom mapala eye hay ada ta madugula hay, ta pəla tsəved ka məkədə na Yesu.

<sup>48</sup> Ane tuk na, ta gəsiye na ma kəkay na, tə sər bay. Ta huta faya tsəved məgəse na bay. Hərwi ndo hay tebiye faya ta pay zləm a wu nakə faya ma tətikateye na, tə metsehe eye lele.

## 20

*Gədanj i Yesu*

*Mata 21.23-27; Markus 11.27-33*

<sup>1</sup> Pat wuray na, Yesu faya ma tətikateye a ndo hay ada faya ma dəteye ha Labara Nŋwalak eye ma dalamətagay i gay i mədəslay ha gər a Mbəlom. Ahəl nakə faya ma tətikateye na, bagwar hay i ndo neheye tə vəlaway wu a Mbəlom aye ta ndo mədzaŋgawa bazlam i Mbəlom mapala eye hay ada ta madugula hay ti ye ka təv i Yesu.

<sup>2</sup> Ti ye naha ta tsətsah faya tə gwadāy: «Ka ge wu neheye na, ta gədanj waray? Maa vəlaka gədanj aye na, way, tsikamay?»

<sup>3</sup> Yesu a mbədətay faya, a gwadatay: «Nəŋ dərmak na tsətsahiye fakuma:

<sup>4</sup> Maa sləraw Yuhana madzəhuḃe ndo a yam na, way? Maa sləraw na, Mbəlom tsukuḃu ndo hay dāw?»

<sup>5</sup> Ane tuk na, tə tsik mə walaŋ tay tə gwad: «Ka mbədəkweye faya na, kəkay? Tadə ka gwadəkwa, maa slər ha Mbəlom, Yesu ma gwadəkweye: “Ka dzalum ha ka wu nakə Yuhana a tsik aye bay na, kemey?”

<sup>6</sup> Ada tadə ka gwadəkwa maa sləraw Yuhana na, ndo hay, ndo hay tebiye ta kaliye kway tə kwar, ta kədiye kway. Hərwi tə sər ha ta dedək Yuhana na, ndo mədə ha bazlam i Mbəlom.»

<sup>7</sup> Ta mbədāy faya a Yesu, tə gwadāy: «Maa sləra ahaya Yuhana ndo madzəhuḃe ndo a yam way na, nəmaa sər bay.»

<sup>8</sup> Yesu a gwadatay: «Nəŋ bəbay na ge wu neheye ta gədanj i way na, na tsikakumeye bay.»

*Dzeke i ndo wuray a zəv dərizl i gərđaf a guvah ŋgay*

*Mata 21.33-46; Markus 12.1-12*

<sup>9</sup> Ma dəba eye na, Yesu a tsikatay me a ndo hay ta dzeke, a gwadatay: «Ndowe ye andaya a dəs guvah. A zəv a dəma gərđaf hay haladzay. Dərizl i gərđaf niye hay na, tə wa hohway. A ndəv ha mazəve na, a həl ndo i məfəte hay ada tā fətay na. Bo ŋgay aye a ye a tsekene. A ye na, ma ndzaweye haladzay.

<sup>10</sup> «Həlay i maŋgəle hohway i gərđaf niye hay kə sla. A slər ndo nəte mə walaŋ i ndo i məsler ŋgay hay hərwi ada tā vəlayaw faya abəra i ŋgay. Ndo

† 19:46 Ezay 56.7. ‡ 19:46 Zeremi 7.11.

i mäsler ngay a hæl bo a ye. A ye naha na, ndo neheye faya ta tsäpiye guvah aye, tæ gæs na. Tæ ndaþa na ada ta hæhar na hælai kəriye.

<sup>11</sup> «Ndo i guvah a ngatay andza niye na, a slær ndo nenjed sa. Ndo niye a hæl bo a ye. A ye naha na, tæ gæs na ada tæ ndaþa na dærmak. Tæ tsaday pæleslesle, ta hæhar na. Ta vëlai wuray kwa tsekwen bay.

<sup>12</sup> Ndo i guvah a slær ndo mamahkar eye sa. Ndo niye a ye na, tæ gay mbælak. Tsa na, tæ kala ahaya abæra ma guvah niye.

<sup>13</sup> «Ndo i guvah niye a gwad: “Na giye anæke na, kækay? Na slæriye wawa ga nakay næte na wuda na haladzay aye taday. Agæla nengeye na, ta ræhay ha gær, ta ge ye wuray bay.”

<sup>14</sup> «Ane tuk na, tæ ngatay a wawa niye na, tæ tsik mæ walañ tay tæ gwad: “Aya! Anañ magedze ngay nakæ ma ta ndiye na guvah ngay aye, ki yaw! Kædakwa na, ada guvah nakay ma mætsakweye a nækway!”

<sup>15</sup> Tsa na, ti ye faya, tæ gæs na. Tæ kæd na. Tæ kal ha mædahan eye abæra ma guvah niye.»

Tsa na, Yesu a tsætsah fataya a gwadatay: «Ndo i guvah ma giye tay ha anæke na, kækay?

<sup>16</sup> Ndo i guvah niye ma deyeweye ma gæsiye tay ha ndo niye hay, ma kædiye tay ha. Kæ kæd tay ha na, ma hæliye a dæma ndo mekeleñ eye hay.»

Ndo hay tæ tsæne wu niye hay a tsik aye na, tæ gwad: «Wu niye andza niye na, ma giye bo bay.»

<sup>17</sup> Ane tuk na, Yesu a zæba fataya a gwadatay: «Dzeke nakay mæ Derewel i Mbælom aye a say mægwede na, kækay?

“Kwar nakæ ndo madæzle gay hay tæ kal ha aye na,

matæra kwar lele eye a ze siye i kwar hay na, nengeye duh.\*”

<sup>18</sup> «Kwa way kæ dæd ka kwar niye na, ma toliye. Ada kwar niye kæ dæd ka ndoweye na, ma lægæriye na kærdik kærdik andza merebek.»

<sup>19</sup> Ndo mædzanğawa bazlam i Mbælom mapala eye hay ta bagwar hay i ndo neheye tæ vælaway wu a Mbælom aye hay ta pæla tsæved kwayanña ka mægæse na Yesu hærw i tæ sær ha Yesu a tsik dzeke niye na, ka næteye. Ane tuk a, ta dzædzaratay a ndo hay.

### *Mævæle dzanğal a bæy i Roma*

#### *Mata 22.15-22; Markus 12.13-17*

<sup>20</sup> Ma dæba eye na, ta dazlay a matsæpe na Yesu. Tæ slær ndo ka tæv ngay. Ndo niye hay tæ slær tay ha aye na, tæ ge ha gær tay andza næteye ndo lele eye hay kame i Mbælom. Ndo niye hay na, a satay mapæle mænese abæra ka Yesu mæ bazlam ngay neheye ma tsikiye aye. Tadæ ta huta faya abæra mænese na, ta sliye faya mævælay a hælai a ndo mævæle dala tuk. Hærw i bæy i Roma na, nengeye gædan eye ada maa læva dala i Roma na, nengeye.

<sup>21</sup> Ndo neheye tæ slær tay ha aye na, ti ye ka tæv i Yesu. Ti ye naha ta tsætsah faya andza nakay, tæ gwad: «Miter, næmaa sær ha nækar ka tsik na, dedek. Ka ngæna tay ha ka bo bæra ndo hay tæbey. Ka gwad ada faya ka tætikateye a ndo hay na, wu neheye dedek aye.

<sup>22</sup> Ane tuk na, a samay matsætsehe fakaya, bazlam kway mapala eye kæ væl tsæved mævæle dzanğal a bæy i Roma tsukudu kæ væl tsæved mævæle bæy daw?»

<sup>23</sup> Ane tuk na, Yesu a sær ha, a satay mæhæle faya abæra suwat. Tsa na, a gwadatay:

<sup>24</sup> «Ehey bæzumen ahaya kwar i suloy taday.» Ta bæzay ha kwar i suloy niye. A gwadatay: «Mandæk it bo nakay ta mæzele nakay faya na, i way?»

\* **20:17** Dæmes hay 118.22.

Ta mbəday faya, tə gwaday: «I bəy i Roma.»

<sup>25</sup> Tsa na, Yesu a gwadatay: «Aya! Wu i bəy i Roma na, vəlumay ha a bəy i Roma ŋgway. Wu i Mbəlom na, vəlumay ha a Mbəlom ŋgway.»

<sup>26</sup> Ka gər i bazlam niye Yesu a tsikatay kame i ndo hay tebiye na, ta huta faya abəra mənese bay tebiye. Duh bazlam ŋgay nakə a tsikatay aye na, a gatay hərbəbəkka, a dərəzlatay ka bazlam.

*Tə tsik ka gər i mələtsew abəra ma mədahanj*

*Mata 22.23-33; Markus 12.18-27*

<sup>27</sup> Ma dəba eye na, siye i Saduke hay ti ye ka təv i Yesu. Saduke hay na, ndo neheye tə gwad: «Ka mət na, mələtsew abəra ma mədahanj andaya sa bay» aye.

<sup>28</sup> Ti ye naha, ta tsətsah ka Yesu, tə gwaday: «Miter, bazlam nakə Musa a watsamay a bazlam i Mbəlom mapala eye na, anan. A gwad: “Tadə ndo a mət a gər ha ŋgwas ŋgay ta wa zuk bay na, mata zle na madakway i ŋgwas niye na, malamar i ndo niye a mət aye!” bədaw? Ma zliye na, hərwi ada hulfe i ndo niye a mət aye mā dze bay.

<sup>29</sup> Yaw! Andaya ahəl niye ndo ta malamar ŋgay hay tasəla. Malamar tay makurre eye a zla dahəlay. A zla dahəlay na, a mət. A mət na, ta wa ta dahəlay ŋgay niye a zla aye bay.

<sup>30</sup> Məmbager ŋgay a zla na madakway i ŋgwas niye. A zla na, a mət.

<sup>31</sup> Malamar tay mamahkar eye a zla. A zla na, a mət. Siye hay tebiye tə ge andza niye dərma. Nəteye neheye tasəla aye tə zla ŋgwas niye na, tə mət tebiye. Ndəray kwa nəte mə walaŋ tay ta wa ta ŋgwas niye bay.

<sup>32</sup> Ka mandəve ŋgay eye na, ŋgwas niye a mət dərma.

<sup>33</sup> Pat nakə aza mədahanj hay ta lətseweye abəra ma mədahanj aye na, ŋgwas niye ma mətseye na, a way? Hərwi nəteye niye tasəla eye ta zla na ka ŋgwas!»

<sup>34</sup> Yesu a mbədatay faya, a gwadatay: «Hasləka ta ŋgwas neheye ka məndzibəra nakay anan aye na, ta zliye bo.

<sup>35</sup> Ane tuk na, ndo neheye Mbəlom a pala tay ha, nəteye ta ndziye ka məndzibəra nakə wedeye na, ta lətseweye abəra ma mədahanj na, ta zliye bo nakay na, zal kəgəbay, ŋgwas na, ta zliye bo sa bay.

<sup>36</sup> Nəteye na, ta mətseye sa bay. Ta ndziye na, andza gawla i Mbəlom hay. Nəteye wawa i Mbəlom hay, hərwi ta lətsew abəra ma mədahanj a məsəfəre.

<sup>37</sup> «Mələtsew abəra ma mədahanj na, ka sərakwa ha mədahanj hay ta lətseweye abəra ma bəd na, hərwi bazlam i Musa nakə a tsik ahəl niye aye. A da ha na, bazlam nakə Mbəlom a tsikayaw mə gay i dak niye dzaydzay andza faya ma təmiye na aye. A zalay a Bəy Maduweŋ na, “Mbəlom i Abraham, Mbəlom i Izak, Mbəlom i Zakob.‡”

<sup>38</sup> A tsik andza niye na, hərwi Mbəlom na, nəngeye Mbəlom i mədahanj hay bay, nəngeye Mbəlom i ndo neheye ta ndziye huya ta sifa aye. Ta ndziye ma sifa na, hərwi Mbəlom.»

<sup>39</sup> Siye i ndo mədzanğawa bazlam i Mbəlom mapala eye tə tsəne andza niye na, tə gwad: «Miter, bazlam yak niye ka tsik aye na, tədē.»

<sup>40</sup> Tə tsikay andza niye na, hərwi horoy a gatay matsətsəhe faya wu hay.

*Yesu a yaw na, ma gwala i way?*

*Mata 22.41-46; Markus 12.35-37*

<sup>41</sup> Yesu a gwadatay: «Ndo hay tə gwad ka Kəriste na, nəngeye Wawa i Davit na, kəkay?

† 20:28 Bazlam mapala eye masulo eye 25.5-6. ‡ 20:37 Madayaw abəra ma Ezipt 3.6.

<sup>42</sup> Duh Davit tã gær ñgay a gwad ma dërewel i Dames hay na:  
 “Bøy Maduwej Mbəlom a gwadáy a Bøy Maduwej ga na:  
 Dara, ndza tã hálai i mənday ga,

<sup>43</sup> hus a pat nakə na piye tay ha ndo məne däre yak hay a huf i sik yak aye.Š”

<sup>44</sup> «Ane tuk na, Davit na, kə zalay a Kəriste “Bøy Maduwej” tuk na, ada ndo hay ta gwadiye wawa ñgay na, ma kəkay?»

*Sariya ka gær i ndo mädzanğawa  
 bazlam i Mbəlom mapala eye hay  
 Mata 23.1-36; Markus 12.38-40*

<sup>45</sup> Ahəl nakə ndo hay faya ta pay zləm a bazlam ñgay nakə faya ma tsikateye na, Yesu a gwadatay a gawla ñgay hay:

<sup>46</sup> «Həbum gær kurom abəra ka ndo mädzanğawa bazlam i Mbəlom mapala eye hay. Nəteye i tay ta wudá mahəhele na, ta rəkwat eye. Ka təv məhay gær na, ta wudá ndo hay tã tsikatay me ta mädəslatay ha gær. Mə gay i maduwule me na, ta pələwa i tay na, təv mändze nakə kame i ndo hay aye, ndo hay ta ñgatateye lele. Mə magurlom, ta wudá na, təv mändze ñgwalak eye.

<sup>47</sup> Wu nakə tə vələwatay a madakway i gwas hay aye na, tə ndayawa na. Tə duwulaway me a Mbəlom na, vədvdəd a ndəv bəse bay hərwi anda ndo hay tã gwad fataya nəteye ndo ñgwalak eye hay. Slala i ndo neheye anda nakay aye na, Mbəlom ma giye fataya sariya na, ma ziye i ndo siye hay.»

## 21

*Məvəlay wu a Mbəlom tã dərev nəte eye  
 Mata 12.41-44*

<sup>1</sup> Ma dəba eye, Yesu a zəba ka bo bəra däre na, a ñgatay a ndo i zlele hay ta piye suloy a wu məpe suloy mə gay i mädəslay ha gær a Mbəlom.

<sup>2</sup> Yesu a ñgatay a madakway i ñgwas wuray mətawak eye, a ye naha a pa a dəma kobo sulo dərma.

<sup>3</sup> Yesu a gwadatay: «Sərum ha madakway i ñgwas nakay na, kə vəl dala haladzay a ze i ndo hay tebiye.

<sup>4</sup> Hərwi ndo mekeləñ eye hay tə vəl na, abəra ka siye. A gatay mə gær sa bay. Ane tuk na, madakway i ñgwas nakay mətawak eye na, a vəl ha tebiye, siye andaya sa bay.»

*Yesu a da ha ta mbəzliye gay i mädəslay ha gær a Mbəlom  
 Mata 24.1-2; Markus 13.1-2*

<sup>5</sup> Ndo mekeləñ eye hay tã tsik ka gay i mädəslay ha gær a Mbəlom. Tə gwad: «Gay nakay na, a le. Kwar neheye ta dəzl ha aye na, tə le. Ada wu neheye tə vələy a Mbəlom aye, tə le.»

Ane tuk na, Yesu a gwadatay:

<sup>6</sup> «Wu nakə faya ka zəbumeye faya aye na, pat mekeləñ eye na, ka ñgatumeye a kwar kwa nəte ka gær i kwar ñged bay. Ta mbəzliye ha hele hele.»

*Ñğodgor i mandəve i mändzibəra  
 Mata 24.3-14; Markus 13.3-13*

<sup>7</sup> Ndo niye hay ka təv eye niye ta tsətsah faya, tə gwadáy: «Miter, wu neheye ka tsik aye ta giye bo na, kədáy? Ñğodgor waray nakə nəmaa səriye ha na, wu neheye tebiye ta ndisleweye aye?»



<sup>8</sup> Yesu a mbədatay faya, a gwadatay: «Gum metsehe lele! Ndəray mâ səpat kurom bay. Hərwi ndo hay haladzay ta deyeweyə ta məzele ga. Kwa way ma gwadiye: “Neŋ na, Kəriste, həlay eye kə ndislew!” Ane tuk na, kâ pumatay bəzay bay.

<sup>9</sup> Ka tsənum ndo hay faya ta giye vərəm ta ndo neheye ta niye dəre a bo aye na, kâ dzədzarum bay. Wu neheye na, kutoŋ ta ndislewəyē təday. Ane tuk na, niye na, mandəve i məndzibəra zuk bay.»

<sup>10</sup> Yesu a gwadatay sa: «Slala ŋged ta giye vərəm ta slala nənġed, bəy ta bəy ta giye vərəm.

<sup>11</sup> Dala ma bəliye, ada mändərzlan ma giye, dəvats i magədama haladzay ma gateye a ndo hay ma gəma hay wal wal. Wu neheye a ge masuwayaŋ eye tə wu mekeleŋ eye hay wal wal ma dzədzariye tay ha ndo hay, ta ta deyeweyə mə mbəlom.

<sup>12</sup> «Ane tuk na, wu niye hay ta deyeweyə na, ta gakumeyə dəretsətseh. Ta gəsiye kurom a gay i mađuwule me, ta gakumeyə sariya ada ta dərəzliye fakuma a gay i danġay. Ta gəsiye kurom, ta diye kurom ha kame i bəy hay ada kame i ndo mələve dala hay hərwi ga.

<sup>13</sup> Niye na, həlay eye i kurom məhəle mbal i gər ga tuk.

<sup>14</sup> Pat eye kə ndislew na, gəsum dərev lele. Kâ dzədzarum mə dərev kurom anəke na: “Mata mbəde famaya abəra me way?” na, kâ dzalum bay.

<sup>15</sup> Neŋ eye na dəkumeyə ha bazlam nakə ka tsikumeyə ada ndaraw nakə kwa ndo mənə dəre kurom hay ta sliye faya mədəde kurom ha ta sariya bay aye.

<sup>16</sup> «Kwa bəba kurom hay ta may kurom hay ta giye fakuma dəf. Malamar kurom hay, wurbəba kurom hay ta dzam kurom hay ta giye fakuma dəf. Ta gəsiye kurom ada ta gakumeyə sariya i mədahaŋ a siye hay haladzay mə walaŋ kurom.

<sup>17</sup> Ndo hay tebiye ta nakumeyə dəre hərwi ga.

<sup>18</sup> Ane tuk na, sərum ha na, məkwets i gər kurom kwa nəte ma dziye bay.

<sup>19</sup> Gum gədan lele. Ka ta mbəlumeyə ha məsəfəre kurom hay na, andza niye.»

### *Ta mbəzliye ha Zerozelem*

#### *Mata 24.15-21; Markus 13.14-19*

<sup>20</sup> «Tadə ka ŋgatumay a vərəm kə lətsew, ta lawara Zerozelem na, sərum ha mazlambar ta mbəzliye ha bəse tuk.

<sup>21</sup> Ndo neheye ka dala i Yahuda aye, ta ŋgatay a wu niye na, tã hway a mahamba hay. Ndo neheye nəteyə ma wuzlah gay i Zerozelem aye na, tã hwayaw abəra mə dəma dəreŋ ada ndo neheye mə gəma aye na, tã hway a wuzlah gay bay.

<sup>22</sup> «Hərwi pat eye niye na, pat nakə Mbəlom ma giye sariya ŋgay aye tuk. Niye na, andza nakə ndo i maslaŋ hay tə sik faya mə Derewel i Mbəlom ma ta giye bo aye.

<sup>23</sup> Pat eye niye na, dəretsətseh wene wene eye na, ka gər i ŋgwas neheye tə bo sulo aye ada ka ŋgwas neheye faya ta vələteyē wah a wawa tay hay aye! Ayaw! Ndo i gəma neheye ta ta siye dəretsətseh haladzay hərwi Mbəlom ma ta gateyē dəretsətseh.

<sup>24</sup> Ndo niye hay tə sər Mbəlom bay aye siye hay ta kədiye tay ha ta maslalam. Siye hay ta gəsiye tay ha beke eye hay, ta diye tay ha a gəma hay wal wal. Ndo neheye tə sər Mbəlom bay aye ta deyeweyə, ta mbəzliye ha Zerozelem hele hele. Ta ndziye mə dəma na, hus ahəl tay nakə ka ndəv aye.»



*Madayaw i Wawa i Ndo**Mata 24.29-31; Markus 13.24-27*

<sup>25</sup> Yesu a gwadafatay sa: «Pat eye niye wu niye hay ta dazlay na, ka pat, ka kiye, ka wurzla hay, wu mæge masuwayan wal wal ta bæziye ha bo. Ma ta giye na, andza mætasl nakæ a væzl haladzay vævæva a bæl ha dælov i yam wekit wekit aye. Ndo i mændzibæra hay tebiye ta dzædzariye, ma vælateye mædzal gær.

<sup>26</sup> Ndo hay haladzay ta ta mætiye tæ zluwer i wu niye hay. Andza niye wu neheye gædan eye ka magærmælom aye ta bæliye haladzay.

<sup>27</sup> «Ma dæba eye na, ndo hay ta ngeteneye a neŋ Wawa i Ndo na deyeweye ma pazlay ta gædan ada ta mæzlaæ eye haladzay.

<sup>28</sup> Aza ka ŋgatumay a wu niye hay ta dazlay mændislew na, lævum bo lele ada zlum gær kurom ka mbælom, hærwi Mbælom ma ta tæmiye kurom ha bæse tuk.»

*Dzeke i gurov**Mata 24.32-35; Markus 13.28-31*

<sup>29</sup> Yesu a tsikatay dzeke sa, a gwadafatay: «Zæbum ka gurov ada ka dærizl i gærdaf hay tebiye kwa!

<sup>30</sup> Ka ŋgatumatay ta gægar ha ka bo abæra slambah hay ada ta dazlay a madude na, ka særum ha gwaduvay kæ ge, mazlambar yam ma piye bædaw!

<sup>31</sup> Andza niye ka ŋgatumay a wu neheye ta ndislew na, særum ha Bæy i Mbælom nengeye bæse tæ nækurom.

<sup>32</sup> «Neŋ faya na gwadækumeye: Særum ha na, wu nakay tebiye ma giye bo na, ndo neheye anæke aye ta mæt zuk bay.

<sup>33</sup> Magærmælom ta dala ta dziye, bazlam ga na, dæda ma dziye bay.»

*Gumay metsehe a bo kurom*

<sup>34</sup> «Gumay metsehe a bo kurom. Kâ gærumay ha dærev kurom a wu mæse bay, kâ kwayum bay ada kâ vælumay ha mædzal gær kurom a wu i mændzibæra bay. Ka gumeye metsehe a bo kurom na, hærwi ada sariya i Mbælom mâ ndzakum a gær hæf bay.

<sup>35</sup> Hærwi pat eye ma deyeweye na, ndo hay tebiye ka mændzibæra ta særiye ka bo bay. Ma mbæzliye tay ha tæbæts andza bælay nakæ a mbæzl wu aye.

<sup>36</sup> Ndzum tsezlezleŋne, duwulumay me a Mbælom pat pat. Ka gum andza niye na, ka hutumeye gædan ka mæsamay naha a wu neheye tebiye ta ndzakumeye a gær aye. Andza niye ka mbumeye faya mælætse ka tæv ga, neŋ Wawa i Ndo.»

<sup>37</sup> Ta hæpat na, Yesu a tætikawa tay ha ndo hay ma dalamætagay i gay i mædæslay ha gær a Mbælom, ta huwa na, a yawa mata hæne ma tsaŋolok nakæ tæ zalay Mahæmba i Tetædæz aye.

<sup>38</sup> Pærik i mekedæ na, ndo hay ti yawa a gay i mædæslay ha gær a Mbælom mata pay zlæm a matætike i Yesu.

**22***Yudas a ge dafka Yesu**Mata 26.1-5,14-16; Markus 14.1-2,10-11; Yuhana 11.45-53*

<sup>1</sup> Magurlom nakæ tæ zalay magurlom i Pak aye na, mazlambar ta hatsiye. Ahæl i magurlom tay niye na, tæ ndayawa wu mænday tay nakæ tæ zalay «peŋ» aye na, gæde faya bay.

<sup>2</sup> A həlay i magurlom eye niye na, bagwar hay i ndo neheye tə vəlaway wu a Mbəlom aye ta ndo neheye tə dzaŋgawa bazlam i Mbəlom mapala eye aye ta pəla tsəved ka məkəde na Yesu. Ane tuk na, ta dzədzar ta ndo hay.

<sup>3</sup> Fakalaw a fələkway a bo a Yudas nakə tə zalay Iskariyot aye. Neŋgeye na, nate mə walaŋ i gawla i Yesu niye hay kuro gər eye sulo, aye.

<sup>4</sup> Yudas a həl bo a ye ka təv i bagwar hay i ndo neheye tə vəlaway wu a Mbəlom aye ada ka təv i bagwar i sidzew neheye ta tsəpawa gay i mədəslay ha gər a Mbəlom aye. A ye na, hərwi mapəle tsəved ka mäge dəf ka Yesu.

<sup>5</sup> A yatay a gər a ndo niye hay haladzay, tə gwadəy: «Nəmaa vəlakeye dala.»

<sup>6</sup> Yudas a tsəne andza niye na, a təma bazlam tay niye. Tsa na, a maw abara ka təv tay, a ye a pəla wewer ada həlay nakə lele eye hərwi mäge dəf ka Yesu ndo hay ta səriye faya bay aye.

*Yesu ta gawla ŋgay hay, tə ge magurlom i Pak*

*Mata 26.17-25; Markus 14.12-21; Yuhana 13.21-30*

<sup>7</sup> Yaw! Ahəl nakə tə ndayawa wu mənday nakə gəde faya bay aye na, pat i məkəde tədəŋ hərwi məde wu mənday i Pak aye kə husaw tuk.

<sup>8</sup> Yesu a slər Piyer ta Yuhana, a gwadətay: «Dum ta dumakway wu mənday i magurlom i Pak nakə ka ndayakweye.»

<sup>9</sup> Piyer ta Yuhana ta tsətsah faya, tə gwadəy: «A saka nəmaâ daka dəf na, ka waray?»

<sup>10</sup> Yesu a mbədətay faya, a gwadətay: «Tsənum lele! Tadə faya ka deyumeye, ka ndislum a wuzlahgəma na, ka ndzumeye a gər a ndo faya ma zliye yam ta gəzla aye. Pumay bəzay hus a gay nakə ma fələkwiye a dəma aye,

<sup>11</sup> ada gwadəmay a ndo i gay niye: “Miter a tsətsah fakaya, a gwədəka: Gay nakə nəmaa ndiye wu mənday i magurlom i Pak ta gawla ga hay aye na, məŋgay?”

<sup>12</sup> Ka tsətsahum andza niye na, ma dəkumeye faya ka gay nakə ka gər i gay neŋged aye. Hud i gay niye na, bagwar eye. Wu hay maləva bo eye mə dəma. Ka dumeye wu mənday i magurlom i Pak na, mə dəma.»

<sup>13</sup> Gawla i Yesu niye hay sulo eye tə həl bo ti ye. Ti ye naha na, tə ndzay a gər andza nakə Yesu a tsikatay aye. Tsa na, tə da wu mənday i Pak mə dəma.

*Wu mənday i Bəy Maduwer*

*Mata 26.26-30; Markus 14.22-26; 1 Korinje hay 11.23-25*

<sup>14</sup> Həlay i mənde wu mənday niye a sla na, Yesu ta ndo i maslaŋ ŋgay hay ti ye naha, tə ndza hərwi mənde wu mənday.

<sup>15</sup> A gwadətay: «Na ta giye dəretsətseh na, a seŋ haladzay mənde wu mənday i magurlom i Pak nakay tage nəkurom təday.

<sup>16</sup> Ayaw! Neŋ faya na tsikakumeye, dəda na ta ndiye wu mənday nakay sa bay hus a pat nakə dedək ŋgay eye ma giye bo ma Bəy i Mbəlom aye.»

<sup>17</sup> Ma dəba eye na, a zla gəvet, a rah ha ta wu məsay. A gay naha sisəe a Mbəlom. Tsa na, a gwad: «Zlum gəvet nakay ada kâ sum wu məsay nakay mə dəma aye.

<sup>18</sup> Neŋ faya na tsikakumeye, na ta siye wu məse nakay sa bay ka madazlay anəke hus a pat nakə Bəy i Mbəlom ma deyeweye aye.»

<sup>19</sup> Tsa na, a zla peŋ, a gay naha sisəe a Mbəlom. Ma dəba eye na, a ŋgəna ha peŋ niye, a vəlatay a gawla ŋgay hay, a gwadətay: «Nakay na, bo ga, mavəla eye hərwi kurom. Gum ha andza nakay huya hərwi ada kâ dzalum ha ka neŋ.»

<sup>20</sup> Ma dɔba i mɛnde wu mɛnday niye na, a zla gɔvet, a gwadɔtay: «Wu mɛse nakay na, bambaz ga nakɛ Mbɛlom ma ɓariye dzam ta ndo hay aye. Ta mbɛdiye ha na, hɛrwi kurom.

<sup>21</sup> Ane tuk na, zɛbum ndo nakɛ ma giye fagaya daf aye na, faya ka ndayakweye wu mɛnday dziye.

<sup>22</sup> Neɲ Wawa i Ndo na mɛtiye andza nakɛ Derewel i Mbɛlom a tsik aye. Ane tuk na, dɛretsɛtseh ka gɛr i ndo nakɛ ma giye fagaya daf aye.»

<sup>23</sup> Gawla ɲgay hay tɛ tsɛne andza niye na, ta dazlay a matsɛtsehe ka bo mɛ walaɲ tay, tɛ gwad: «Way nakɛ mata ge andza niye mɛ walaɲ kway na, way?»

### *Bagwar eye na, way?*

<sup>24</sup> Ma dɔba eye na, gawla i Yesu hay ta dazlay mɛkɛfɛ wuway mɛ walaɲ tay haladzay, tɛ gwad: «Way nakɛ mɛ walaɲ kway nakay neɲgeye bagwar eye na, way?»

<sup>25</sup> Yesu a gwadɔtay: «Bɛy bagwar eye i gɛma hay faya ta lɛviye bɛy hay. Ndo neheye gɛdaɲ tay andaya aye na, a satay dzam ta ndo hay.

<sup>26</sup> Ane tuk na, nakurom na, kɛ gum andza nɛteye tɛbey! Duh na, ndo nakɛ bagwar eye na, mɛ tɛra andza wawa eye tsekweɲ ada ndo nakɛ ma lɛviye ndo hay aye na, mɛ tɛra ndo i mɛsler.

<sup>27</sup> «Ayaw! Bagwar eye na, way tuk? Ndo nakɛ neɲgeye mandza eye ta geye mɛsler ka hɛlay aye tsukuɗu ndo mɛge mɛsler ba? Bagwar eye na, ndo nakɛ ta geye mɛsler aye bɛdaw? Andza niye, neɲ nakay anaɲ mɛ walaɲ kurom anaɛ aye, neɲ na, andza ndo i mɛsler.

<sup>28</sup> «Nakurom na, ka ndzum ka tɛv ga. Ka zlum ɲgatay ma wuzlah i dɛretsɛtseh nakɛ tɛ geɲ aye haladzay.

<sup>29</sup> Neɲ bɛbay na, na vɛlakumeye Bɛy i Mbɛlom andza bɛba ga Mbɛlom nakɛ a vɛleɲ aye.

<sup>30</sup> Ka ndayumeye ada ka sumeye wu mɛsay tage neɲ ma Bɛy ga, ada ka ta ndzumeye ka tɛv mɛndze i bɛy hɛrwi mɛge sariya ka gwala i Israyel neheye kuro gɛr eye sulo aye.»

### *Piyer ma gwadɛye: «Na sɛr Yesu bay»*

#### *Mata 26.31-35; Markus 14.27-31; Yuhana 13.36-38*

<sup>31</sup> Yesu a gwadɔy a Simoɲ Piyer: «Simoɲ, Simoɲ tsɛne! Fakalaw kɛ huta gɛdaɲ mɛbɛle kurom ha, ma hɛviye kurom andza mahɛve daw nakɛ ta hɛvawa hɛrwi manɲane tay ha ka bo abɛra ta dzɛndzar aye.

<sup>32</sup> Ane tuk na, neɲ na dɛwulay me a Mbɛlom hɛrwi yak. Na dɛwulay me a Mbɛlom na, hɛrwi ada mɛdzal gɛr yak ka neɲ mɛ ge bɛle bay. Ka tsɛtsah mɛpɛse me na, vɛlatay gɛdaɲ a malamar yak hay.»

<sup>33</sup> Piyer a gwadɔy: «Bɛy Maduweɲ, neɲ na, malɛva bo eye kwa mede a danɲay ka deyemeye salamay. Kwa mɛmɛte, ka mɛtameye salamay!»

<sup>34</sup> Yesu a mbɛday faya, a gwadɔy: «Ka tsik na, dedek ɲgway dɛw Piyer. Tsɛne! Na tsikakeye, bɛgom nakay dzagulok ma ta zlahiye na, ɓa ka gwad sik mahkar ka sɛr neɲ bay.»

### *Mɛlɛve bo ta suloy ada ta maslalam*

<sup>35</sup> Yesu a gwadɔtay a gawla ɲgay hay sa: «Ahɛl niye na slɛr kurom ha ze dala, ze gwezem, ze tahɛrak mɛ sik na, wuray kɛ kɛtsakum dɛw?»

Ta mbɛday faya: «Wuray kwa tsekweɲ kɛ kɛtsamay bay.»

<sup>36</sup> Yesu a gwadɔtay: «Anɛke dɛh na, ndo nakɛ suloy ɲgay andaya aye na, mɛ hɛl. Ndo nakɛ gwezem ɲgay andaya aye na, mɛ zla dɛrmak. Ada ndo nakɛ maslalam ɲgay andaya bay aye na, mɛ sɛkɛm ha rɛkwat ɲgay ada mɛ sɛkɛm maslalam.

<sup>37</sup> Hərwi mawatsa eye mə Derewel i Mbəlom na, tə gwad: “Nenğeye na, ndo hay tə pasla na a walaŋ i ndo i məkəde ndo hay.\*” Na tsikakumeye: Wu nakə Derewel i Mbəlom a tsik aye na, ma giye bo tebiye.»

<sup>38</sup> Gawla ŋgay hay tə gwaday: «Bəy Maduweŋ, maslalam hay anaŋ sulo.»  
Yesu a mbədatay faya, a gwadatay: «Niye na, da kə sla.»

*Yesu a ye mata dūwulay me a Mbəlom ma tsaholok i tetədxəz  
Mata 26.36-46; Markus 14.32-42*

<sup>39</sup> Ma dəba aye na, Yesu a ye abəra ka təv niye, a ye a tsal a Mahəmba i Tetədxəz andza nakə a gawa ha aye. Gawla ŋgay hay tə pay bəzay.

<sup>40</sup> Tə ndisl naha a dəma na, Yesu a gwaday: «Dūwulumay me a Mbəlom hərwi ada kâ dəđum a masəpete i Fakalaw bay.»

<sup>41</sup> Tsa na, a gər tay ha gawla ŋgay hay. A ye abəra ka təv tay əzad dərən tsekweŋ tsa. A ye naha a dək w gurmets ka dala, a dūwulay me a Mbəlom,

<sup>42</sup> a gwad: «Bəba, tadə ka wuda na, zla fagaya abəra dəretsətseh nakay na siye tey! Ane tuk na, ge na, andza nakə a saka aye bəna, andza nakə a seŋ a neŋ aye bay.»

[<sup>43</sup> Tsa na, gawla i Mbəlom a mbəzlaw mə mbəlom, a yaw a bəzay ha bo hərwi məvəlay gədaŋ.

<sup>44</sup> Yesu a dzədzar, mədzal gər ŋgay a mbəda haladzay. A dūwulay me a Mbəlom ta gadaŋ sa. Merəbe nakə faya aye na, a təra andza bambaz nakə a tək w ka dala təluk təluk aye.]

<sup>45</sup> A ndəv ha madūwulay me a Mbəlom na, a mbəda gər ka təv i gawla ŋgay hay. A ye naha a ndzatay a gər na, nəteye mandzahəra eye. Madagər a gatay hərwi dərev a ndalatay.

<sup>46</sup> A gwadatay: «Lətsum, dūwulumay me a Mbəlom hərwi ada kâ dəđum a masəpete i Fakalaw bay.»

*Tə gəs na Yesu*

*Mata 26.47-56; Markus 14.43-50; Yuhana 18.3-11*

<sup>47</sup> Ahəl nakə Yesu faya ma tsikiye me mba aye na, ndo hay haladzay ti ye naha. Maa ndzatay naha kame na, Yudas nenğeye nakə nəte mə walaŋ i gawla i Yesu hay kuro gər eye sulo aye. A ye naha bəse ka təv i Yesu hərwi məgəse na ka bo təmbolok təmbolok.

<sup>48</sup> Ane tuk na, Yesu a gwaday: «Yudas, ka giye dəf ka neŋ Wawa i Ndo na, ta məgəse ga ka bo təmbolok təmbolok dəw?»

<sup>49</sup> Gawla i Yesu hay tə ŋgatay a wu niye hay faya ma giye bo andza niye na, ta tsətsah faya, tə gwaday: «Bəy Maduweŋ, nəmaa watsa tay ta maslalam dəw?»

<sup>50</sup> Tsa na, ndo nəte mə walaŋ tay a fay a ndo i məsler i bagwar i ndo məvəlaway wu a Mbəlom, a dəsay na zləm i həlay i mənday fats ka dala.

<sup>51</sup> Ane tuk na, Yesu a gwadatay a gawla ŋgay hay: «Gər um tay ha, niye na, da.»

Tsa na, a lamay a zləm i ndo niye, a paha suwuđ suwuđ.

<sup>52</sup> Tsa na, Yesu a tsikatay a bagwar i ndo neheye tə vəlaway wu a Mbəlom aye, a bagwar hay i ndo matsəpe gay i mədəslay ha gər a Mbəlom hay ada a madugula i Yahuda niye hay ti ye naha faya mata gəse na aye, a gwadatay: «Ka yumaw fagaya ta maslalam kurom hay ada ta sakwal kurom andza ta gəsiye ndo i məkal dəw?»

\* 22:37 Ezay 53.12.

<sup>53</sup> Ada pat pat ka ndzawakwa ka bo dziye mə gay i mədəslay ha gər a Mbəlom na, ka pəlum tsəved məgəse ga bay. Ane tuk na, i kurom na, həlay eye ka sla tuk, ada həlay i ndo nakə ma ləvonj aye ma bəziye ha gədanj ηgay.»

*Piyer a gwad: «Na sər Yesu bay»*

*Mata 26.57-58,69-75; Markus 14.53-54,66-72; Yuhana 18.12-18,25-27*

<sup>54</sup> Tə gəs na Yesu, ti ye ha a gay i bagwar i ndo məvələway wu a Mbəlom. Piyer na, a patay naha bəzay ma dəba dərən.

<sup>55</sup> Ma dalamətagay i gay niye na, ta vat ako ma wuzlah eye. Ndo hay nəteye mandza eye ka ako eye niye. Piyer a ye naha a ndza ka təv tay dərma.

<sup>56</sup> Ngwas wuray andaya a gawa məsler mə gay eye niye a ηgatay a Piyer mandza eye ka ako. A zəba faya, a ndazl na Piyer lele. Tsa na, a gwad: «Nəkar dərma na, ndo i Yesu.»

<sup>57</sup> Ane tuk na, Piyer a mbədəy faya a ηgwas niye, a gwaday: «A'ay! Na sər na bay!»

<sup>58</sup> Məndze tsekwenj na, ndo mekelən eye a ηgatay a Piyer, a gwaday: «Nəkar dərma na, nəte mə walañ i gawla i Yesu hay!»

Piyer a gwaday a ndo niye: «A'ay! Neñ na mə walañ tay bay.»

<sup>59</sup> A ndza ma dəba eye tsekwenj mazlambar bəre nəte na, ndo mekelən eye a tsik sa, a gwad: «Ta dedək ndo nakay na, tə ndzawa tə Yesu dərma! Sa tsa na, neñgeye ndo i Galile hay.»

<sup>60</sup> Ane tuk na, Piyer a mbədəy faya, a gwaday: «A saka məgwede mey na, na sər bay.»

Kwayanña ahəl nakə faya ma tsikiye me mba aye na, dzagulok a zlaha.

<sup>61</sup> Bəy Maduwenj a mbədə bo, a ndazl naha Piyer nduzle a dərə. Tsa na, wu nakə Yesu a tsikay a Piyer aye na, a mayaw a gər tuk. A gwaday na: «Bəgom dzagulok ma ta zlahiye na, ba ka gwad sik mahkar ka sər neñ bay.»

<sup>62</sup> Tsa na, Piyer a yaw abəra ma dalamətagay, a tuwa tsiduk tsiduk.

*Ndo hay tə ηgwasa ka Yesu*

*Mata 26.67-68; Markus 14.65*

<sup>63</sup> Ndo neheye ta tsəpawa Yesu aye, tə ηgwasawa ka Yesu ada tə kədawa na.

<sup>64</sup> Tə mbuzaway na dərə ada ta tsətsahawa faya, tə gwadaway: «Nəkar na, Kəriste ba! Tsikamay, maa faka na, way?»

<sup>65</sup> Ada tə tsikaway wu siye hay haladzay hərwi mətsadəy a Yesu.

*Yesu kame i madugula i Yahuda hay*

*Mata 26.59-66; Markus 14.55-64; Yuhana 18.19-24*

<sup>66</sup> Dərə a tsada na, madugula i Yahuda hay, bagwar hay i ndo neheye tə vələway wu a Mbəlom aye ta ndo mədzanğawa bazlam i Mbəlom mapala eye hay tə haya gər. Tsa na, ti ye ha Yesu kame i sariya tay.

<sup>67</sup> Ti ye naha ta tsətsah faya, tə gwaday: «Nəkar na, Kəriste daw? Tsikamay tey!»

Yesu a mbədətay faya, a gwadətay: «Kwa tadə na tsikakum bəbay na, ka tamumeye bay,

<sup>68</sup> ada tadə na tsətsah fakuma na, ka mbədumənəye faya bay.

<sup>69</sup> Ane tuk na, sərur ha kwa anəke Wawa i Ndo ma ndziye tə həlay i mənday i Mbəlom gədanj eye.»

<sup>70</sup> Tsa na, nəteye niye tebiye tə gwaday: «Azlakwa nəkar na, Wawa i Mbəlom daw?»

Yesu a mbədətay faya, a gwadətay: «Bo kurom eye ka gwadum neñ neñgeye.»

<sup>71</sup> Tə tsəne andza niye na, tə gwad: «Ka pəlakweye na, sa mey. Ba bo kway eye ka tsənakwa wu neheye a tsik tə bazlam ŋgay aye.»

## 23

*Tiye ha Yesu kame i Pilat ada kame i Herod*

*Mata 27.1-2,11-14; Markus 15.1-5; Yuhana 18.28-38*

<sup>1</sup> Ma dəba eye na, ndo niye hay tebiye tə lətse, ti ye ha Yesu a gay i Pilat.

<sup>2</sup> Tə ndisl naha a dəma na, ta dazlay a mədəse parasay ka Yesu haladzay, tə gwad: «Nəmaa ndzay a gər a ndo nakay na, faya ma tsəviye tay ha ndo may hay a pesl. A gwadətay na: “Kā vəlumay dzanḡal a bəy i Roma bay” ada a gwad nənḡeye Kəriste, bəy bagwar eye.»

<sup>3</sup> Pilat a tsətsah ka Yesu, a gwadəy: «Nəkar na, bəy i Yahuda hay dedək dāw?»

Yesu a mbədəy faya, a gwadəy: «Nəkar ka tsik seḡey.»

<sup>4</sup> Pilat a gwadətay a bagwar hay i ndo neheye tə vəlaway wu a Mbəlom aye ada a ndo hay tebiye: «Nəŋ na, na huta mənese nakə ma ḡəsiye na ndo nakay a sariya aye na, na huta bay.»

<sup>5</sup> Ane tuk na, ndo hay tebiye tə gwadəy ta magala: «Faya ma tsəviye tay ha ndo hay tə matətike ŋgay nakə a tətikawatay aye. A dazlay məḡe andza niye na, ka dala i Galile. A həhal ha ka dala i Yahuda tebiye ada kə ya ahaya kanan anəke a Zerozelem sa.»

<sup>6</sup> Pilat a tsəne bazlam tay niye na, a tsətsah, a gwad: «Ndo nakay na, ndo i Galile dāw?»

<sup>7</sup> Tə gwadəy faya: «Yesu na, ndo i Galile.»

Azlkwa maa ləva Galile na, bəy nakə tə zalay Herod aye. Pat eye niye na, nənḡeye andaya ma Zerozelem. Tsa na, Pilat a gwadətay: «Dum ha Yesu ka təv i Herod.»

<sup>8</sup> Herod a ŋgatay a Yesu na, dərev ŋgay a ŋgwasə haladzay. Kə tsəne ndo hay tə tsikawa ka Yesu ada a say mənḡatay a Yesu na, kwa anəke bay. A say na, Yesu mā gay masuwayan ka təv ŋgay.

<sup>9</sup> A tsətsah wu hay haladzay ka Yesu. Ane tuk na, Yesu ka mbədəy faya wuray kwa tsekweŋ bay.

<sup>10</sup> Bagwar hay i ndo neheye tə vəlaway wu a Mbəlom ta ndo mədzanḡawa bazlam i Mbəlom mapala eye, ta ye naha dərmaḡ. Tə dəs parasay ka Yesu haladzay ta ḡədan.

<sup>11</sup> Herod ta sidzew ŋgay hay tə tsəne andza niye na, tə tsadəy a Yesu ada tə ŋgwasə faya haladzay. Tə pa faya peteked nakə a le haladzay aye. Tsa na, tə ma ha a gay i Pilat.

<sup>12</sup> Kurre na, Herod ta Pilat na, ta wuda bo bay, tə nay dəre a bo. Pat eye niye na, ta təra ta dzam eye tuk.

*Mata 27.15-26; Markus 15.6-15; Yuhana 18.39-19.16*

<sup>13</sup> Ma dəba eye na, Pilat a zalatay a bagwar hay i ndo neheye tə vəlaway wu a Mbəlom aye, a bəy i dala hay ta ndo i ḡəma hay tebiye.

<sup>14</sup> A gwadətay: «Ka ḡəsūmənḡew ndo nakay ka gwadum na, faya ma tsəviye tay ha ndo hay a pesl ba! Ada na tsətsah faya bazlam, ane tuk na, na huta faya mənese nakə ma ḡəsiye na ta sariya aye bay. Ka dəsūm faya parasay.

<sup>15</sup> Herod Antipas bəbay kə huta faya mənese bay, hərwi niye kə makwaya ahaya kway. Ndo nakay na, kə ḡe wuray kwa tsekweŋ nakə məkəde na aye bay.

<sup>16</sup> Hərwi niye, na ndəḡiye na ta mandalaḡa ada na ḡəriye ha.»

[

17 Ka viye ka viye na, Pilat a gərawatay ha ndo abəra ma danɔay nəte hərwi magurlom i Pak.]

18 Andza niye ndo hay tə tsəne bazlam i Pilat niye na, tə pa bo ka mawude ta gədan, nəteye tebiye tə gwad: «Kəɗ na ndo nakay, gəramay ha na, Barabas!»

19 Barabas na, tə gəs na hərwi a kəɗ ndo ahəl nakə tə ge magazləga ma wuzlahgəma aye.

20 A say a Pilat məgər ha Yesu. A tsikatay a ndo niye hay sa.

21 Ndo niye hay tebiye ta wuda, tə gwad: «Dar na ka mayako mazləmbada eye! Dar na ka mayako mazləmbada eye!»

22 Pilat a gwadatay mamahkar eye sa: «Nenɔeye a ge na, mənese waray? Nen na, na huta faya mənese nakə məkəde na aye na, na huta bay. Hərwi niye, na ndaɓiye na ta mandalaɓa na, ada na gariye ha.»

23 Ane tuk na, ndo hay tə tsəne andza niye na, ta səkah ha mawude haladzay ta gədan, tə gwad: «Dar na ka mayako mazləmbada eye!» Tsiy mawude tay niye a gay zləm a Pilat.

24 Tsa na, a təma andza i ndo hay nakə a satay aye.

25 A garatay ha Barabas andza nakə a satay aye. Azlakwa duh Barabas tə gəs na a danɔay na, hərwi a kəɗ ndo ahəl nakə tə ge magazləga ta ndo i Roma hay aye.

Yesu na, Pilat a vəlatay ha a ndo hay, a gwadatay: «Gumay wu nakə andza a sakum məgay aye!»

### *Ti ye ha Yesu mata kəde na*

*Mata 27.32-44; Markus 15.21-32; Yuhana 19.17-27*

26 Ahəl nakə faya ta diye ha Yesu ka təv nakə ta kəɓiye na mə dəma aye na, tə dza gər ka tsəved ta ndoweye andaya tə zalay Simoŋ a maw abəra mə pesl. Nenɔeye na, ndo i gəma i Siren. Sidzew hay tə gəs na tə gay kutoŋ ka mazole mayako niye mazləmbada eye hərwi ada m̄a zla naha ma dəba i Yesu.

27 Ndo hay haladzay tə pay bəzay a Yesu. Nɔwas hay haladzay faya ta tuwiye hərwi nɔgay.

28 Yesu a mbəda bo ka təv i nɔwas niye hay faya ta tuwiye, a gwadatay: «A nəkurom nɔwas i Zerozelem hay, k̄a tuwum hərwi ga bay. Duh na, tuwum hərwi bo kurom ada hərwi wawa kurom hay.

29 Hərwi həlay eye ma deyeweye, ta gwadiye: “Mənɔwese ka gər i nɔwas neheye dāda ta wa bay aye ada neheye dāda wawa k̄a sa wah tay bay aye!”

30 Ndo hay ta gwadeye a mahəmba hay: “Amboh mbəzlaw famaya tey!” Ada ta gwadeye a tsaholok hay: “Amboh nɔgaha may tey!”\*

31 Ayaw! Ta gay wu nakay andza nakay a mayako nɔgəɗiz eye na, ada mayako makula eye na, ma giye na, kəkay?»

32 Ti ye ha Yesu ka təv nakə ta kəɓiye na aye na, ta gəs naha ndo wuray hay sulo tə ge mənese hərwi madar tay ha ka mayako tage Yesu dziye.

33 Tə ndisl naha ka təv niye tə zalay Təv i Mətasl i Gər aye. Sidzew hay ta dar na Yesu ka mayako mazləmbada eye na, ka təv eye niye. Ta dar tay ha ndo niye hay sulo tə ge mənese aye dərma, nəte tə həlay i mənɔday, nenɔged tə həlay i gula.

34 Yesu a gwad: «Bəba ga, pəsətay ha mənese tay hərwi wu nakə ta giye na, tə sər bay.»

Sidzew hay tə ge tsakwal ka peteked nɔgay hərwi məsəre ha peteked mamətsa eye na, a way. Tsa na, ta nɔgəna ha a bo peteked niye.

\* 23:30 Oze 10.8.



<sup>35</sup> Ndo hay tebiye n̄teye ka t̄əv eye niye faya ta z̄əbiye ka Yesu. Bagwar i madugula i Yahuda hay t̄ə ŋgwas̄a ka Yesu, t̄ə gwad: «N̄ŋgeye na, k̄ə t̄əma tay ha siye i ndo hay sa na, m̄a t̄əma ha bo ŋgay tey. Tada k̄ə ge n̄ŋgeye na, K̄ariste, n̄ŋgeye nak̄ə Mb̄əlom a zla na aye na, m̄a t̄əma ha ḡər ŋgay tey.»

<sup>36</sup> Sidzew hay t̄ə ŋgwas̄a ka Yesu d̄ərmak, ta h̄əndz̄əd naha ka t̄əv ŋgay t̄ə v̄əlay wuye andaya guyakaka.

<sup>37</sup> T̄ə gwad̄ay: «K̄ə ge n̄əkar b̄əy i Yahuda hay na, t̄əma ha bo yak aye tey!»

<sup>38</sup> Ka mayako niye mazl̄əmbada eye na, ta law naha faya palalam wuray zal ka ḡər i Yesu, t̄ə watsa: «Nakay na, b̄əy i Yahuda hay.»

<sup>39</sup> Ndo n̄əte m̄ə walan̄ i ndo niye sulo t̄ə ge m̄ənese, ta dar tay ka bo dziye tage Yesu aye a tsaday a Yesu. A gwad̄ay: «Ka gwad̄ n̄əkar na, K̄ariste sa na, t̄əma ha ḡər yak ada k̄a t̄əma may ha tey!»

<sup>40</sup> Ane tuk na, ndo n̄əŋged̄ a may ha m̄ənese a gwad̄ay: «Ka s̄ər Mb̄əlom t̄əb̄ədew? N̄əkar an̄əke ta k̄ədiye kar andza n̄əŋgeye d̄ərmak.

<sup>41</sup> Ane tuk na, i may ta k̄əd̄ may na, t̄əd̄e b̄əna, ta k̄ədiye may ka wu nak̄ə ka gama lele bay aye. N̄əŋgeye na, k̄ə ge m̄ənese kwa tsekwen̄ bay.»

<sup>42</sup> Tsa na, a gwad̄ay a Yesu: «Pat nak̄ə ka deyeweye andza b̄əy bagwar eye na, k̄a m̄ətsa ga ha ḡər bay, dzala fagaya tey.»

<sup>43</sup> Yesu a mb̄əd̄ay faya, a gwad̄ay: «N̄əŋ faya na tsikakeye: S̄ər ha na, b̄əgom nakay ka ta ndzameye t̄ə n̄əkar m̄ə mb̄əlom.»

### *M̄əm̄əte i Yesu*

#### *Mata 27.45-46; Markus 15.33-41; Yuhana 19.28-30*

<sup>44</sup> Ma giye mazlambar maḡər̄h̄əpat, l̄əvon̄ a ge ka dala niye tebiye tek̄əd̄əḡəm. A ge na, hus a b̄ərə mahkar i huwa.

<sup>45</sup> Pat a ndarmada a t̄əv eye. Tsa na, peteked̄ nak̄ə a ŋḡəna ha ka bo ab̄əra gay i m̄əd̄əslay ha ḡər a Mb̄əlom sulo aye a ŋgurada tsan̄ŋa ma wuzlah.

<sup>46</sup> Yesu a wuda ta magala k̄əl̄ərra, a gwad̄: «B̄əba, na ḡər ha m̄əs̄əf̄əre ga a h̄əlay yak.†»

A tsik andza niye na, a m̄ət tuk.

<sup>47</sup> Bagwar i sidzew i Roma hay a ŋgatay a wu niye a ge bo aye na, a zambad̄ay a Mb̄əlom, a gwad̄: «Ta dedek̄ ndo nakay na, ndo lele eye.»

<sup>48</sup> Ndo neheye haladzay ti ye mata z̄əbaw faya aye, t̄ə ŋgatay a wu nak̄ə a ge bo aye na, a ndalatay haladzay, ti ye wu tay a m̄ətagay.

<sup>49</sup> Dzam i Yesu hay ta ŋgwas̄ neheye t̄ə payaw b̄əzay kwa ab̄əra ma Galile aye n̄əteye mal̄ətsa eye d̄əren̄ faya ta z̄əbiye ka wu nak̄ə ma giye bo aye.

### *T̄ə pa na m̄əd̄ahan̄ i Yesu a ts̄əvay*

#### *Mata 27.57-61; Markus 15.42-47; Yuhana 19.38-42*

<sup>50</sup> N̄doweye andaya t̄ə zalay Yusufa. N̄əŋgeye ŋgwalak i ndo. N̄əŋgeye n̄əte m̄ə walan̄ i ndo m̄əge sariya hay d̄ərmak.

<sup>51</sup> N̄əŋgeye na, k̄ə ndza ta n̄əteye ka m̄əge b̄əb̄ərek tay ada ka m̄əsler tay niye t̄ə ge aye na, k̄ə ndza ta n̄əteye bay. N̄əŋgeye na, ndo i ḡəma i Arimate. Ḡəma eye niye m̄ə d̄əma na, Yahuda hay. N̄əŋgeye faya ma h̄əbiye B̄əy i Mb̄əlom.

<sup>52</sup> A ye a gay i Pilat. A ye naha a ts̄ətsah faya ts̄əved̄ ka m̄əzle m̄əd̄ahan̄ i Yesu.

<sup>53</sup> Pilat a v̄əlay ts̄əved̄ ka m̄əd̄ahan̄ i Yesu. Tsa na, a ye a mb̄əzla ahaya m̄əd̄ahan̄ i Yesu ab̄əra ka mayako mazl̄əmbada eye. A mb̄əkwa na m̄əd̄ahan̄ niye ta r̄ək̄wat. A zla na a ye ha, a pa na a ts̄əvay nak̄ə mala eye ka geseh aye. Ts̄əvay eye niye na, ta pa a d̄əma m̄əd̄ahan̄ d̄ada zuk bay.

† 23:46 D̄əmes hay 31.6.



<sup>54</sup> Pat eye niye na, pat i luma i dezele. Andza mægweđe pat i mələve bo i pat i mazəzukw bo ada pat i mazəzukw bo ma dazleye.

<sup>55</sup> Nğwas neheye tə pay naha bəzay a Yesu kwa abəra ma Galile aye, ti ye ka bo dziye ta Yusufa. Ta zəba ka tsəvay ada ta zəba faya Yusufa a pa na mədahaŋ i Yesu na, kəkay.

<sup>56</sup> Tsa na, tə maw a mətəgay. Tə maw na, tə ləva ha bo tə mal ada tə wurdə hərwi mambəde ka mədahaŋ i Yesu. Ane tuk na, pat i mazəzukw bo na, ta zəzukw bo. Hərwi bazlam i Mbəlom mapala eye a ge me mäge məsler pat i mazəzukw bo.

## 24

*Yesu a lətsew abəra ma tsəvay*

*Mata 28.1-10; Markus 16.1-8; Yuhana 20.1-10*

<sup>1</sup> Pat i luma i sidzew pərik i mekedə na, nğwas niye hay ti ye ka me tsəvay. Tə zla mal tay niye hay tə ləva ha bo aye ka həlay.

<sup>2</sup> Tə ndisl naha na, tə nğatay a beber nakə ta dərəzl ha ka tsəvay aye məbədəŋwala eye faya abəra, madzaka eye dzakka ka tsakay aye.

<sup>3</sup> Tə fələkwa a dəma na, ta nğatay a mədahaŋ i Bəy Maduwerŋ Yesu bay.

<sup>4</sup> Tə sər wu nakə ta dzaliye bay.

Kwayaŋŋa ndo hay sulo ti yaw dzərik kame tay ta bəzatay ha bo. Petekəd tay hay ka bo na, a dāv haladzay.

<sup>5</sup> Tə nğatay a ndo niye hay sulo aye na, ta dzədzar haladzay. Ta rəh gər tay hay ka dala rəhe rəhe.

Ndo niye hay sulo aye tə gwadatay: «Ka pəlumeŋe ndo nakə neŋgeŋe andaya tə dərə mə walaŋ i mədahaŋ hay na, hərwi mey?

<sup>6</sup> Neŋgeŋe andaya kanaŋ bay, kə lətsew abəra ma mədahaŋ. Wu nakə a tsikakum ahəl niye neŋgeŋe ma Galile mba aye na, m̄a makumaw a mədzal gər.

<sup>7</sup> A gwad na: “Kutoŋ neŋ Wawa i Ndo na, t̄a vələy ga ha a həlay i ndo i mezeleme hay. Ta dariye ga na, ka mayako mazləmbədə eye, ada kə həna sulo ma mamahkar eye na, na lətseweŋe abəra ma mədahaŋ.”»

<sup>8</sup> Tə tsəne andza niye na, bazlam i Yesu niye a tsikawatay aye a matayaw a gər tuk.

<sup>9</sup> Tsa na, ti ye abəra ka me tsəvay niye. Ti ye ta təkəratay labara niye a gawla i Yesu niye hay ta zəkaw kuro gər eye nəte aye ada a siye i ndo neheye tə paway bəzay a Yesu aye dərma.

<sup>10</sup> Mə walaŋ i nğwas niye hay na, Mari nakə a yaw ma gəma i Magədala aye, Zan ta Mari may i Yakuba ada nğwas neheye nəteŋe ka bo dziye ta təkəratay labara i bazlam aye niye a ndo i maslaŋ i Yesu hay.

<sup>11</sup> Ane tuk na, ndo niye tə tsəne bazlam tay niye hay ta təkəratay aye na, ta təma bay, ta zəba faya andza bazlam i matarakahaŋ.

<sup>12</sup> Ane tuk na, Piyer a lətse a hway ka me tsəvay mata zəbaw. A ndisl naha ka me tsəvay na, a zəba dərə a tsəvay niye zərəd. A nğatay naha na, a rəkwaŋ nakə tə mbəkwa ha Yesu aye dəkdek. Tsa na, a mbədə gər a mətəgay. Wu niye a ge bo aye na, a gay hərbəbəkka.

*Yesu a bəzatay ha bo a gawla nğay hay*

*Markus 16.12-13*

<sup>13</sup> Pat eye niye gawla i Yesu hay sulo mə walaŋ tay niye hay, tə həl bo ti ye a gəma nakə tə zalay İmayus aye. Gəma niye na, dərəŋ tsəfa ta Zerozelem. Tadə ka diye tə sik abəra ma Zerozelem na, ka giye ka tsəved bərə sulo.

14 Ahəl nakə faya ta diye na, faya ta tsikiye ka wu nakə a ge bo aye tebiye.

15 Ahəl nakə nəteye faya ta tsikiye me ada faya ta kədiye wuway ka gər i wu nakə a ge bo aye na, Yesu a yaw a həndzəd ka təv tay. Ti ye ka tsəved eye nətə.

16 Faya ta ŋgateye a Yesu ane tuk na, tə sər na bay hərwi wuye a gwadatay ta sər na bay.

17 Yesu a tsətsah fataya, a gwadatay: «Ka sikum na, ka gər i bazlam i mey?»

Tə tsəne andza niye na, tə lətse. Dərev a ndalatay haladzay.

18 Ndo nətə mə walaŋ tay niye sulo aye na, məzele ŋgay Kəleyopas, a gwaday: «Wu nakə a ge bo ma məhəne neheye ka sər bay na, nəkar mbəlok eye ma Zerozelem kəla dāw?»

19 A mbəday faya, a gwaday: «Maa ge mey?»

Ta mbəday faya, tə gwaday: «Wu nakə a ge tə Yesu ndo i Nazaret aye na, ka tsəne təbədəw? Neŋgeye na, ndo mədə ha bazlam i Mbəlom. Məsler nakə a gawa aye tə bazlam nakə a tsikawa kame i Mbəlom ada kame i ndo aye hay na, ta gədaŋ eye

20 Bagwar hay i ndo neheye tə vəlaway wu a Mbəlom aye ta bagwar kway hay tə gəs na. Tə vəlay ha a Pilat, a gay sariya i məkədə. Ma dəba aye na, ta dar na ka mayako mazləmbada eye.

21 Nəmaa dzala haḃe mə gər may na, nəmaa gwad mata təma tay ha Israyel hay na, neŋgeye. Ane tuk na, zle ka wu neheye a ge bo aye, kə ge məhəne mahkar bəgom.

22 Sa tsa na, siye i ŋgwas neheye mə walaŋ may ta vəlamay madzədzere. Kə ma may ha hərḃaḃəkka. Hərwi ta wula pərek i mekedə ka me tsəvay,

23 ane tuk na, ta huta na mədahaŋ i Yesu bay. Ta mbədaw gər, tə maw ka təv may na, ta təkəramay, tə gwad gawla i Mbəlom hay ta bəzatay ha bo ada gawla i Mbəlom niye hay tə gwadatay na, Yesu andaya tə dərə.

24 Nəmaa tsəne andza niye na, siye i ndo mə walaŋ may hay ti ye ka me tsəvay sa. Ti ye, tə huta na, andza i ŋgwas niye hay ta təkəramay aye. Ane tuk na, ta ŋgatay a Yesu bay.»

25 Yesu a gwadatay: «Nəkurom ndo neheye mətsehe andaya fakuma bay aye. Wu neheye ndo mədə ha bazlam i Mbəlom hay tə dā ha kurre na, a mbakum a mədzał gər kurom təbədəw?»

26 Ka sərūm təbədəw, Kəriste ma diye a bəy ŋgay na, ma giye dərətsətseh haladzay təday.»

27 Tsa na, a datay ha wu nakə tə tsik ka neŋgeye mə Derewel i Mbəlom aye tebiye. Ma dazlay mə dərəwel i Musa ada mede ha hus a dərəwel i ndo mədə ha bazlam i Mbəlom hay.

28 Ahəl nakə faya ta diye, tə ndisl bəse ta gəma nakə faya ta diye a dəma aye na, Yesu a ge andza ma zliye tsəved ŋgay.

29 Ane tuk na, ndo niye hay tə gwaday: «Kā ye a təv eye bay, ndza tə nəmay. Hərwi dərə faya ma gəsiye ada mazlambar həvad segey.» Tsa na, tə fələkwa a gay wuray, a ndza ta nəteye.

30 Yesu a pa bo ka mənde wu mənday ta nəteye. A zla peŋ, a gay naha siḃe a Mbəlom. Tsa na, a ŋganatay ha peŋ niye ada a vəlatay.

31 Kwayaŋŋa dərə tay a həndək, tə sər na tuk. Ane tuk na, ta zəba dərə na, neŋgeye andaya ka təv tay sa bay kə gər tay ha.

32 Tə gwad mə walaŋ tay: «Ahəl nakə faya ma dəkway ha Derewel i Mbəlom ka tsəved aye na, wuye mə dərəv may andza ako!»

33 Ndo niye sulo aye tə lətse kwayaŋŋa ta mbəda gər a Zerozelem. Tə ndisl naha a wuzlah gay na, tə ndzay a gər a gawla i Yesu neheye kuro gər eye nətə aye tə siye i ndo mekeləŋ eye hay nəteye mahaya gər eye.

<sup>34</sup> Ndo niye hay tɛ ɲgatatay a ndo neheye sulo aye na, tɛ gwadɔfatay: «Ta dedek Bɛy Maduwen ƙway ƙɛ lɔtsew abɛra ma mɔdahaɲ, Simoɲ ƙɛ ɲgatay!»

<sup>35</sup> Nɔteye dɛrmaƙ ta tɛƙɛratay wu nakɛ a ge bo ta nɔteye ka tsɛved aye. Tɛ gwadɔfatay: «Nɛmaa ɲgatay a Yesu ada nɛmaa sɛr na na, ahɛl nakɛ a ɲgɛnamay peɲ aye.»

*Yesu a bɛzatay ha bo a gawla ɲgay hay ƙuro gɛr eye sulo*

*Mata 28.16-20; Markus 16.14-18; Yuhana 20.19-23; Mɛsler hay 1.6-8*

<sup>36</sup> Ahɛl nakɛ nɔteye faya ta tsikiye me mba aye na, Yesu a yaw a walaɲ tay sleƙɛrtik. Tsa na, a gwadɔfatay: «Zay mɔ ndza fakuma!»

<sup>37</sup> Gawla ɲgay niye hay ta dzɛdzar, zluwer a gatay haladzay. Hɛrwi tɛ dzala ma giye na, manakasla.

<sup>38</sup> Ane tuk na, Yesu a gwadɔfatay: «Ƙa dzɛdzarum andza niye na, hɛrwi mey? Ada ka dzalum mɛ gɛr ƙurom andza niye na, kemey?

<sup>39</sup> Zɛbum ka hɛlay ga tɛ sik ga. Na gwadɛnɛ dedek ɲgway bɛdaw? Tɛtalum fagaya ada zɛbum fagaya lele. Hɛrwi sɛrum ha manakasla na, slo faya bay ada mɛtasl mɛ dɛma andza neɲ nakɛ faya ka zɛbumeye fagaya aye bay.»

<sup>40</sup> A tsikatay andza niye na, a bɛzatay ha waway nakɛ ka hɛlay ɲgay hay ada ka sik ɲgay hay.

<sup>41</sup> Mɛɲgwese a rah a dɛrev i gawla ɲgay niye hay ada a gatay hɛrɛabɛƙƙa. Ada huya ta dzala ha faya zuk bay. Tsa na, Yesu a tsɛtsah fataya, a gwadɔfatay: «Wu mɛnday andaya fakuma daw?»

<sup>42</sup> Ti ye naha tɛ zlayaw siye i ƙɛlef mafɛka eye nɔte, tɛ wɛlay.

<sup>43</sup> Yesu a tɛma ƙɛlef niye ada a hɛpɛd kame tay.

Tsa na, a gwadɔfatay:

<sup>44</sup> «Ahɛl niye neɲ tɛ nɛkurom mba aye na, na tsikakum, na gwadawakum: Wu nakɛ tɛ watsa ka gɛr ga mɛ dɛrewel i Musa, mɛ dɛrewel i ndo mɛdɛ ha bazlam i Mbɛlom hay ada mɛ dɛrewel i Dɛmes hay aye na, kutoɲ wu niye ma giye bo.»

<sup>45</sup> Tsa na, Yesu a hɛndɛkatay ha metsehe hɛrwi ada tɛ sɛr Dɛrewel i Mbɛlom.

<sup>46</sup> A gwadɔfatay sa: «Wu nakɛ tɛ watsa mɛ Dɛrewel i Mbɛlom aye na, ananɲ: Ƙɛriste na, ma ta giye dɛretsɛtseh, ada mɛhɛne sulo mamahƙar eye na, ma lɔseweye abɛra ma mɔdahaɲ.

<sup>47</sup> Ada ma slɛriye ndo hay ka mɛdatay ha bazlam i Mbɛlom a slala i ndo i mɛndzibɛra hay tebiye tɛ gɛr ha mezeleme hɛrwi ada Mbɛlom mɛ pɛsatay ha mɛnese tay hay. Tɛ dazlay na, ma Zerozelem.

<sup>48</sup> Maa tɛra ndo i mɛhɛle mbal i wu nakay ma giye bo tebiye na, nɛkurom.

<sup>49</sup> Ada neɲ eye na slɛraweye fakuma wu nakɛ Bɛba a gwadɛ ma wɛlakumeye. Nɛkurom na, ndzum ma wuzlah gay. Hɛbum gɛdaj i Mbɛlom nakɛ ma wɛlakumeye mɛ mbɛlom aye.»

*Yesu a tsal a mbɛlom*

*Markus 16.19-20; Mɛsler hay 1.9-11*

<sup>50</sup> Ma dɛba eye na, Yesu a hal gawla ɲgay hay abɛra ma gɛma niye, a ye tay ha a tɛv nakɛ bɛse ta gɛma i Betani aye. Mɛ dɛma na, a zla hɛlay ka mbɛlom. Tsa na, a pa fataya ɲgama.

<sup>51</sup> Ahɛl nakɛ faya ma piye fataya ɲgama aye na, a ye fataya abɛra, a tsal ka tɛv i Mbɛlom.

<sup>52</sup> Nɔteye na, tɛ dɛslay ha gɛr ada ta mbɛda gɛr a Zerozelem ta mɛɲgwese eye haladzay mɛ dɛrev tay.

<sup>53</sup> Ti yawa a gay i mǎdǎslay ha gǎr a Mbǎlom pat pat, ta zambadǎway a Mbǎlom.

## Ngwalak i bazlam nakə Yuhana a watsa aye Məfələkwə

Ngwalak i bazlam nakay Yuhana a watsa na, hərwi ndo məpe mədzal gər hay ka Yesu neheye mandza eye ma Siri kəgəbay ma Azi, ma Turki nakə anəke aye.

Wu nakə mawatsa eye mə dəma aye na, wal abəra ka Mata, ka Markus ada ka Luka. A vəlay məzlaḅ haladzay a bazlam neheye matsika eye ta dzeke ada a məsler i Yesu.

Madədo 1 ka 12 faya ma tsikiye ka məsler neheye a ge masuwayən a ge aye.

Madədo 13 ka 21 faya ma ləviye ha bo ada faya ma tsikiye ka həlay nakə Yesu ma diye ka təv i Bəba ngay aye.

Labara i məməte i Yesu aye (madədo 18 ada 19) ta ndzəkit bo tə wu neheye mə Mata, ma Markus, ada mə Luka aye, tə tsik ka wu eye nəte ngwej.

Pat i Magurlom i Pak na, Yesu a bəzatay ha a gawla ngay (madədo 20 ada 21).

Ngwalak i bazlam i Yuhana na, kə tsik ka məwe i Yesu bay. Ane tuk na, ka madazlay na, a ɗa ha Yesu Kəriste na, neŋgeye bazlam i Mbəlom, neŋgeye andaya huya ta Mbəlom (1.1-18). Yesu neŋgeye bazlam i Mbəlom, a yaw mändze ta ndo zezeŋ hay.

### *Bazlam i Mbəlom a təra ndo*

<sup>1</sup> Ahəl nakə Mbəlom kə ge mändzibəra zuk bay aye na, ndo nakə tə zalay bazlam i Mbəlom aye na, neŋgeye andaya. Neŋgeye na, ta Mbəlom ada neŋgeye na, Mbəlom.

<sup>2</sup> Ahəl nakə Mbəlom kə ge mändzibəra zuk bay aye na, neŋgeye andaya ta Mbəlom

<sup>3</sup> Mbəlom a ge wu hay tebiye na, tə həlay ngay. Wu kwa nəte nakə Mbəlom a ge ze neŋgeye na, andaya bay.

<sup>4</sup> Maa vəl sifa a ndo hay na, neŋgeye. Sifa niye na, a vəlatay dzaydzay a ndo hay.

<sup>5</sup> Dzaydzay niye ma dəviye ma ləvoŋ ada ləvoŋ kə mbata ha bay.

<sup>6</sup> Ahəl niye na, Mbəlom a sləraw ndoweye andaya tə zalay Yuhana.

<sup>7</sup> A yaw na, mədatay ha dzaydzay eye niye a ndo hay hərwi ada ndo hay tebiye tə tsəne bazlam ngay ada tə dzala ha ka bazlam ngay.

<sup>8</sup> Yuhana neŋgeye na, dzaydzay niye ma dəvateye a ndo hay aye bay. Neŋgeye a yaw na, mata datay ha a ndo hay tsa.

<sup>9</sup> Dzaydzay niye na, dzaydzay dedek eye ma deyeweye ka mändzibəra, ma dəvateye dzaydzay a ndo hay tebiye.

<sup>10</sup> Ndo nakə tə zalay bazlam i Mbəlom aye na, ki yaw ka mändzibəra. Kwa taɗa Mbəlom a ge mändzibəra tə həlay ngay bəbay na, ndo hay ta sər na bay.

<sup>11</sup> A yaw na, a təv ngay, ane tuk na, ndo ngay hay ta təma na bay.

<sup>12</sup> Ane tuk na, ndo mekeləŋ eye hay na, ta təma na ada ta dzala ha. Nəteye na, ka vəlatay tsəved matəre wawa i Mbəlom hay.

<sup>13</sup> Ta təra wawa i Mbəlom hay na, andza nakə ndo hay faya ta wiye bo ka mändzibəra aye bay ada hərwi nakə a satay a ndo hay aye bay. Ane tuk na,

ta tæra wawa i Mbælom hay na, hærwi Mbælom eye ngway a vølatay mæsæfære wedeye.

14 Nenŋeye nakæ tæ zalay bazlam i Mbælom aye na, ka tæra ndo zezenj ada ki yaw kænza mæ walaŋ kway. Nenŋeye na, a gatay ngwalak a ndo hay haladzay. Ka bæzakway ha dedek i Mbælom. Næmaa ngatay a mæzlaß ngay. Maa vølay mæzlaß niye na, Mbælom Bæba ngay. A vølay na, a wawa ngay niye næte aye.

15 Yuhana faya ma datay ha a ndo hay, a wuda kælarra a gwad: «Ndo nakæ na tsik faya aye na, nenŋeye anaŋ. Ahæl niye na gwad na: “Ndo weye andaya ma deyewe ye ma dæba ga a ze ga, hærwi nenŋeye na, andaya kwa ahæl nakæ ta wa ga zuk bay aye.”»

16 Andza niye nækway tebiye ka hutakwa ngwalak ngay, kæ pa fakwaya ngama ada ma piye fakwaya ngama ngay huya.

17 Mbælom a vølakway bazlam ngay mapala eye na, tæ hølay i Musa. Ane tuk na, ngwalak ngay ta dedek ngay a vølakway na, tæ hølay i Yesu Kæriste.

18 Ndæray dæda kæ ngatay a Mbælom bay. Ane tuk na, wawa ngay niye næte aye mandza eye ka tæv i bæba ngay aye, nenŋeye na, Mbælom. Mbælom nenŋeye kækay na, ka bæzakway ha.

*Bazlam nakæ Yuhana madzæhuße ndo a yam a tsik aye*

*Mata 3.1-12; Markus 1.1-8; Luka 3.1-18*

19 Pat wuray na, bagwar i Yahuda neheye ma Zerozelem aye tæ slær ndo mævølay wu a Mbælom hay ta Levit hay ka tæv i Yuhana mata tsætsehe faya: «Nækar tæday na, way?»

20 Ti ye ta tsætsah faya na, ka kærah mambædatay faya bay. Ane tuk na, a tsikatay parakka kame i ndo hay tebiye. A gwadatay: «Neŋ na, Kæriste bay.»

21 Ta tsætsah faya, tæ gwaday: «Ada nækar na way? Nækar na, Eliya ndo mæde ha bazlam i Mbælom niye ahæl niye daw?»

Yuhana a mbædatay faya, a gwadatay: «A'ay.»

Ta tsætsah faya sa, tæ gwaday: «Nækar na, ndo mæde ha bazlam i Mbælom nakæ faya næmaa hæbiye daw? \*»

Yuhana a mbædatay faya, a gwadatay: «A'ay.»

22 Tæ gwaday: «Ada tebiye nækar kæla na, way? Damay ha tey hærwi næmaa ta tsikatæye a ndo neheye tæ slæra may ahaya aye. Bo yak eye ka gwad nækar na, way?»

23 Yuhana a gwadatay: «Neŋ na, ndo nakæ Ezay ndo mæde ha bazlam i Mbælom a tsik faya ahæl niye, a gwad ka neŋ na:

“Ndo nakæ faya ma wudiye mæ kæsaf a gwad:

Lambadumay tsæved a Bøy Maduweŋ fehe lele,

mâ hædzak bay.†”»

24 Mæ walaŋ i ndo neheye tæ slær tay naha ka tæv i Yuhana aye na, Farisa hay andaya mæ walaŋ tay.

25 Ti ye naha tæ gwaday: «Tædæ nækar na, Kæriste bay, nækar Eliya bay, nækar ndo mæde ha bazlam i Mbælom nakæ faya næmaa hæbiye bay na, ada faya ka dzæhußiye tay ha ndo hay a yam na, hærwi mey?»

26 Yuhana a mbædatay faya, a gwadatay: «Neŋ na, na dzæhußiye ndo hay na, a yam tsa, aya ane ndo andaya mæ walaŋ kurom ka særum na bay.

27 Nenŋeye na, ma deyewe ye kame ga. Na sliye mahændzæde ka tæv ngay mæpølay ha læber i tahærak ngay bay tebiye.»

\* 1:21 Bazlam mapala eye masulo eye 18.15. † 1:23 Ezay 40.3.

<sup>28</sup> Wu niye a ge bo tebiye na, ma gəma i Betani, ma diye i magayam i Yurдум ka təv nakə Yuhana a dzəhuḅawa a dəma ndo hay a yam aye.

### *Yesu na, wawa i təḅaŋ i Mbəlom*

<sup>29</sup> Tədə eye na, Yuhana a ŋgatay a Yesu faya ma deyeweye ka təv ŋgay. Tsa na, a gwad: «Wawa i təḅaŋ nakə Mbəlom ma vəliye hərwi məpəsatay ha mezeleme i ndo hay aye na, atay ma deyeweye.

<sup>30</sup> Na gwad: “Ndo ma deyeweye ma dəba ga, neŋgeye a ze ga, hərwi neŋgeye na, kwa ahəl nakə ta ge məndzibəra zuk bay aye na, neŋgeye andaya.” Na tsik na, ka neŋgeye.

<sup>31</sup> Neŋ kurre na, neŋgeye way na, na sər na bay. Ane tuk na, neŋ na yaw na, madzəhuḅe tay ha ndo hay a yam tsa, ada mədatay ha a Israyel hay hərwi ada tā sər na.»

<sup>32</sup> Yuhana a datay ha, a gwadatay sa: «Na ŋgatay a Məsəfəre i Mbəlom faya ma mbəzlaweye abəra mə mbəlom andza bodobodo. A yaw a ndza ka gər ŋgay.

<sup>33</sup> Ahəl niye na, neŋgeye way na, na sər ha zuk bay. Ane tuk na, Mbəlom nakə a sləra ga ahaya madzəhuḅe ndo hay a yam aye na, a gwedəŋ: “Ka ta ŋgateye a Məsəfəre ma mbəzlaweye abəra mə mbəlom ma ndziye ka gər i ndo. Mata dzəhuḅe tay ha ndo hay ta Məsəfəre Tsədaŋŋa eye na, neŋgeye.”

<sup>34</sup> Ada neŋ na, na ŋgatay, na dā ha. Ta dedək neŋgeye na, Wawa i Mbəlom.»

### *Gawla i Yesu kurre eye hay*

<sup>35</sup> Tədə eye na, Yuhana ta gawla ŋgay hay sulo ti ye ka təv eye niye sa.

<sup>36</sup> A ŋgatay a Yesu faya ma diye na, a gwad: «Nakay na, wawa i təḅaŋ i Mbəlom nakə a vəl aye.»

<sup>37</sup> Gawla i Yuhana niye hay sulo aye tə tsəne andza niye na, tə pay bəzay a Yesu.

<sup>38</sup> Faya ta diye na, Yesu a zəba dərə a dəba, a ŋgatay faya ta pay bəzay. A tsətsah fataya, a gwadatay: «Ka pəlum mey?»

Tə gwaday: «*Rabi*, təv yak nakə ka ndzawa mə dəma aye na, ka waray?» (*Rabi* na, andza məgwedə «Miter»).

<sup>39</sup> Yesu a mbədatay faya, a gwadatay: «Dumara, takwa, ka ŋgatumeye a təv ga nakə neŋ na ndzawa mə dəma aye.»

Tsa na, ti ye. Ti ye naha tə ŋgatay a təv nakə neŋgeye mandza eye mə dəma aye. Ti ye na, ma giye ɓəre fad. Tə ndza ka bo dziye hus a həvad.

<sup>40</sup> Ndo nəte mə walaŋ tay niye tə tsəne bazlam i Yuhana niye a tsik aye ada tə pay bəzay a Yesu aye na, məzele ŋgay Aŋdərə. Neŋgeye malamar i Simoŋ Piyer.

<sup>41</sup> Aŋdərə a ndzay a gər kurre na, a malamar ŋgay Simoŋ. A gwaday: «Nəmaa ŋgatay a ndo nakə Mbəlom a pay dzagwa i bəy a gər aye.» Andza məgwedə, Kəriste.

<sup>42</sup> A laka ha Simoŋ ka təv i Yesu. Tsa na, Yesu a zəba faya, a gwaday: «Nəkar na, Simoŋ, wawa i Yuhana. Ta ta zalakeye na, Sefas.» Andza məgwedə Piyer‡.

### *Yesu a zal Filip ta Nataniyel*

<sup>43</sup> Tədə eye na, a say a Yesu mede a Galile. Ahəl nakə faya ma diye na, a ndzay a gər a Filip, a gwaday: «Dara, peŋ bəzay!»

<sup>44</sup> Filip neŋgeye na, ndo i gəma i Betesayda, gəma nakə Aŋdərə ta Piyer ti yaw abəra mə dəma aye dərma.

‡ 1:42 Piyer: Tə bazlam i Mere na, pələf.



<sup>45</sup> Ma dɛba aye na, Filip a ye a ndzay a gɛr a Nataniyel, a gwadɛy: «Ndo nakɛ Musa a watsa faya mɛ dɛrewel ɲgay ada ndo mɛdɛ ha bazlam i Mbɛlom hay tɛ watsa faya ahɛl niye aye nɛmaa ɲgatay. Nɛɲgeye na, Yesu, ndo i gɛma i Nazaret wawa i Yusufa.»

<sup>46</sup> Nataniyel a gwadɛy faya: «Ka dzala na, wu lele eye ma sliye faya madayaw abɛra ma gɛma i Nazaret daw?»

Filip a mbɛday faya, a gwadɛy: «Dara, ka ɲgateye.»

<sup>47</sup> Yesu a ɲgatay a Nataniyel faya ma diye naha ka tɛv ɲgay na, a tsik ka Nataniyel, a gwadɛ: «Ndo i Israyel nakɛ dɛdɛɲ eye na, anɲ. Nɛɲgeye na, maraw me andaya faya kwa tsekwen bay.»

<sup>48</sup> Nataniyel a tsɛtsah faya, a gwadɛy: «Ka sɛr ga ha na, ma kɛkay?»

Yesu a mbɛday faya a gwadɛy: «Ahɛl nakɛ Filip kɛ zalakaw zuk bay aye na, na ɲgataka, nɛkar mɛ bɛzay i gurov.»

<sup>49</sup> Tsa na, Nataniyel a gwadɛy: «Miter, nɛkar na, Wawa i Mbɛlom, nɛkar Bɛy bagwar eye i Israyel hay!»

<sup>50</sup> Yesu a mbɛday faya, a gwadɛy: «Andza niye, ka dzala ha ka nɛɲ na, hɛrwi na gwadaka na ɲgataka naha mɛ bɛzay i gurov aye daw? Nɛkar na, ka ta ɲgateye a wu bagwar eye hay ta ziye nakay anɲ aye!»

<sup>51</sup> Yesu a gwadɛy sa: «Sɛrum ha na, ka ɲgatumeye a magɛrmbɛlom ma hɛndɛkiye tuwan. Gawla i Mbɛlom hay ta tsaliye ada ta mbɛzlaweye ka gɛr ga, nɛɲ Wawa i Ndo!»

## 2

### *Mabɛzlamɛ gɛr i dahɛlay ma gɛma i Kana*

<sup>1</sup> Mɛhɛne sulo ma dɛba i mɛdzɛgɛr i Yesu ta Nataniyel na, mabɛzlamɛ gɛr i dahɛlay a ge bo ma gɛma i Kana, ka dala i Galile. May i Yesu andaya mɛ dɛma.

<sup>2</sup> Ta zalay a Yesu ta gawla ɲgay hay dɛrmak.

<sup>3</sup> Faya magurlom ma giye na, guzom a ndɛv fataya abɛra. May i Yesu a gwadɛy a wawa ɲgay Yesu: «Guzom andaya sa bay. Ka ndɛv na, kɛkay?»

<sup>4</sup> Yesu a mbɛday faya, a gwadɛy: «May ga, wu nakɛ nɛɲ na giye na, mata tsikɛɲ na, nɛkar daw? Hɛlay ga kɛ slaw zuk bay.»

<sup>5</sup> May i Yesu a tsɛne andza niye na, a ye a gwadatay a ndo i mɛsler hay: «Gum wu nakɛ ma tsikakumeye tebiye.»

<sup>6</sup> Ka tɛv eye niye na, gah hay andaya mɛkwa. Gah niye hay mɛkwa aye na, Yahuda hay ta mbɛdawa a dɛma yam ka mɛbere wu hay ada tɛ hɛlay andza nakɛ bazlam tay mapala eye a tsik aye. Gah niye hay na, yam ma diye a dɛma ma giye kalawah zlam, zlam.

<sup>7</sup> Yesu a gwadatay a ndo i mɛsler hay: «Dum naha tɛdumaw yam, rahum ha a gah neheye tseslɛsle tseslɛsle.» Ndo i mɛsler niye hay ti ye tɛ tɛdaw yam. Tɛ rah ha a gah niye hay tseslɛsle tseslɛsle. <sup>8</sup> Yesu a gwadatay: «Anɛke na, tɛdum yam nakay, zlumay naha a ndo mɛlɛvay gɛr a magurlom, mɛ ndzaka na.» Ndo i mɛsler hay tɛ zlay naha yam niye.

<sup>9</sup> Ndo mɛlɛvay gɛr a magurlom niye a ndzaka na, yam niye a tɛra guzom aye. A ndzaka na, guzom eye a yaw mɛɲgay na, a sɛr bay. Ane tuk na, ndo i mɛsler neheye tɛ tɛd yam aye na, nɛteye tɛ sɛr ha. Yesu a zalay a zal i dahɛlay,

<sup>10</sup> a gwadɛy: «Kwa way kɛ zalatay a ndo hay na, ma vɛlateye guzom nakɛ a tsɛhɛn aye tɛday. Ta sa haladzay na, ma vɛlateye nakɛ a tsɛhɛn bay aye tuk. Ane tuk na, nɛkar na, ka pa na nakɛ lele eye wu yak hus anɛke na, kɛkay!»

<sup>11</sup> Nakay na, makurre i masuwayan nakə Yesu a lah mæge aye. A ge na, ma Kana ka dala i Galile. Andza niye Yesu a bəz ha mæzlaɓ ɲgay. Hərwi niye gawla ɲgay hay tə dzala ha ka Yesu.

<sup>12</sup> Ma dəba aye na, Yesu a ye a Kafernahum ta may ɲgay, ta malamar ɲgay hay ada ta gawla ɲgay hay. Tə ndza mə dəma məhəne tsakway.

*Yesu a həhar ndo hay abəra mə gay məvəlay wu a Mbəlom*

*Mata 21.12-13; Markus 11.15-17; Luka 19.45-46*

<sup>13</sup> Magurlom i Yahuda hay nakə tə zalay Pak aye na, mazlambar kə ndzew bəse. Hərwi niye, Yesu a həl bo a ye a Zerozelem.

<sup>14</sup> A ndisl a Zerozelem na, a ye a dalamətagay i gay i mədəslay ha gər a Mbəlom. A ye naha a dəma na, a ndzay a gər a ndo masəkəme ha sla hay, ta təbaɲ, ta maydagwar hay. A ndzay naha a gər a ndo mambəde suloy hay mandza eye hay ka wu mape wu tay hay dərma.

<sup>15</sup> Tsa na, a zla ləber, a slapa ha ka bo, a təra ha mandalaɓa. A ye a həhar tay ha ndo niye hay abəra dərəɲ, tə sla tay hay, ta təbaɲ tay hay tebiye abəra mə gay i mədəslay ha gər a Mbəlom. A kwats ha suloy i ndo mambəde suloy ka dala, a pay həlay a wu mape wu tay niye hay. <sup>16</sup> A gwadatay a ndo masəkəme ha maydagwar hay: «Həlum wu kurom neheye abəra kanan! Kā tərūm ha gay i Bəba ga, gay i mæge tsakala mə dəma bay.»

<sup>17</sup> Gawla ɲgay hay tə ɲgatay andza niye na, wu nakə mawatsa eye mə Derewel i Mbəlom aye a matayaw a gər. Tə watsa na, tə gwad: «Gay yak nakay na, na wuda na haladzay. Mədzal gər ga peteh, na pa na a dəma.\*»

<sup>18</sup> Bagwar i Yahuda hay ta tsətsah faya, tə gwaday: «Ka sliye faya mæge na, masuwayan waray nakə ada nəmay nəmaa səriye ha ta vəlaka tsəved ka mæge wu andza nakay aye?»

<sup>19</sup> Yesu a mbədatay faya, a gwadatay: «Mbəzlum ha gay i mədəslay ha gər a Mbəlom nakay. Ma məhəne mahkar na, na lətsiye ha ka mbəlom.»

<sup>20</sup> Tə gwaday: «Gay nakay nəmaa ndza faya ka mədazle na, məve kuro kuro faɗ gər eye məkwa tuk na, ada nəkar i yak na, ma məhəne mahkar tsa na, ka dəzl na, kəkay?»

<sup>21</sup> Ane tuk na, gay i mədəslay ha gər a Mbəlom niye Yesu a tsik faya aye na, a tsik dzeke ka bo ɲgay.

<sup>22</sup> Ahəl nakə Yesu a mət ada a lətsew abəra ma mədahan aye na, bazlam ɲgay niye a tsik aye a matayaw a gər a gawla ɲgay hay. Pat eye niye na, tə dzala ha ka wu nakə mawatsa eye mə Derewel i Mbəlom aye ada ka bazlam ɲgay nakə a tsik aye.

<sup>23</sup> Ahəl nakə Yesu neɲgeye ma Zerozelem ada neɲgeye mə magurlom i Pak aye na, kə ge wu neheye a ge masuwayan haladzay aye. Andza niye, ndo hay haladzay ta ɲgatay a masuwayan niye hay ada ta dzala ha ka Yesu.

<sup>24</sup> Ane tuk na, Yesu na, kə pa mədzal gər ɲgay ka nəteye bay hərwi neɲgeye a sər tay ha tebiye,

<sup>25</sup> ada neɲgeye na, ndo məday ha wu nakə mə bo i ndo zezeɲ aye ka həlay təbey hərwi bo ɲgay eye a sər ha wu nakə mə dərev i ndo zezeɲ aye.

### 3

*Yesu ta Nikodem*

<sup>1</sup> Ndoweje andaya məzele ɲgay Nikodem. Neɲgeye na, bagwar eye mə walaɲ i ndo neheye tə ləwawa Yahuda hay aye. Neɲgeye na, Farisa hay.

\* **2:17** Dəmes hay 69.10.

<sup>2</sup> Pat wuray na, a ye ka tøv i Yesu ta həvəf. A ye naha, a gwəday: «Miter, nəmaa sər ha Mbəlom a sləra kar ahaya na, ka matətikamay wu hay dedek, hərwi ndəray ma sliye faya məge masuwayəŋ andza nakə ka ge aye bay tadə gədaŋ i Mbəlom andaya faya bay na, ma sliye faya bay.»

<sup>3</sup> Yesu a mbəday faya, a gwəday: «Sər ha na, ndoweye kə wa bo wedeye bay na, ma sliye faya mede a Bəy i Mbəlom bay.»

<sup>4</sup> Nikodem a tsətsah faya a gwəday: «Ndo guram eye tsiy tuk na, ma wiye bo wedeye sa na, kəkay? Ma sliye faya məme a huđ i may ŋgay ada ta wiye na masulo eye sa dāw?»

<sup>5</sup> Yesu a mbəday faya, a gwəday: «Sər ha na, ta dzəhuđ kar ha a yam ada ta Məsəfəre i Mbəlom bay na, ka sliye faya mede a Bəy i Mbəlom bay.»

<sup>6</sup> Ndo nakə ndo zezeŋ a wa aye na, ndo zezeŋ ŋgway. Ada ndo nakə tə wa na ta Məsəfəre i Mbəlom aye na, məsəfəre ŋgway.

<sup>7</sup> Bazlam nakə na gwəfaka “wum bo masulo” aye na, m̄a gaka wadəŋ wadəŋ bay.

<sup>8</sup> Mətasl a vəzl a tøv nakə a say aye. Ka tsəne mavəzle ŋgay eye, ane tuk na, a yaw məŋgay ada ma diye a ŋgay na, ka sər bay. Ma giye bo ta ndo nakə tə wa na ta Məsəfəre i Mbəlom aye na, andza nakay.»

<sup>9</sup> Nikodem a gwəday: «Ada tebiye wuye ma giye bo na, kəkay?»

<sup>10</sup> Yesu a mbəday faya a gwəday: «Nəkar ndo matətikay wu a ndo hay nakə bagwar eye ma gwala i Israyel aye. Ane tuk na, ka sər wu neheye bay na, kəkay?»

<sup>11</sup> Sər ha na, nəmaa tsikakum na, wu nakə nəmaa sər aye ada ka gər i wu nakə nəmaa ŋgatay aye. Ane tuk na, a sakum matəme wu nakə nəmaa dākum ha aye bay.

<sup>12</sup> Na tsikakum ka wu nakay ka məndzibəra aye ka təmum bay. Ada kəkay tadə na tsikakum ka wu nakə m̄a mbəlom aye na, ka təmumeye dāw?

<sup>13</sup> «Ndəray dāda kə tsal a mbəlom bay. Ndo nakə neŋ Wawa i Ndo aye nətə ŋgweŋ.»

<sup>14</sup> Andza nakə ahəl niye Musa a lətse ha bərə nakə tə vəf na andza dədəc ka mayako m̄a makulkwandah aye na, andza niye neŋ Wawa i Ndo kutəŋ ta lətəsiye ga ha ka mayako dərma<sup>\*</sup>,

<sup>15</sup> hərwi ada kwa way kə dzala ha ka neŋ Wawa i Ndo na, ma hutəsiye sifa nakə ma ndəviye bay aye.

<sup>16</sup> Hərwi Mbəlom a wudə məndzibəra na, haladzay. Hərwi niye a sləraw Wawa ŋgay felik eye hərwi ada kwa way kə dzala ha faya na, ma dziye sa bay. Ane tuk na, ma hutəsiye sifa nakə ma ndəviye bay aye.

<sup>17</sup> Mbəlom a sləraw Wawa ŋgay ka məndzibəra na, hərwi ada m̄a ge sariya ka ndo hay bay. A sləra ahaya na, hərwi ada ndo hay tā təma dūh.

<sup>18</sup> «Ndo nakə kə dzala ha ka Wawa i Mbəlom aye na, sariya ma ta gəsiye na bay. Ane tuk na, ndo nakə kə dzala ha bay aye na, bə sariya kə gəs na, hərwi kə dzala ha ka felik i Wawa i Mbəlom bay.»

<sup>19</sup> Sariya ma ta gəsiye ndo hay ta tsəvəf waray na, ma ta gəsiye tay ha na, andza nakay: Dzaydzay ki yaw ka məndzibəra. Ane tuk na, ndo hay ta wudə dzaydzay niye bay. Nətəye ta wudə dūh na, ləvəŋ, hərwi tə gawa na, wu neheye lele bay aye hay.

<sup>20</sup> Kwa way kə ge mənese na, a ma nay dərə a dzaydzay. Ma həndzədiye ta tøv i dzaydzay bay, hərwi a say wu ŋgay neheye a gawa lele bay aye na, m̄a zəba bay, a dzədzar.

\* 3:14 Məpesle 21.

21 Ane tuk na, ndo nakə a gawa wu lele eye hay aye na, nenɣeye ma zəbiye mə dzaydzay hərwi ada ndo hay tã nɣatay a wu neheye lele a ge aye, ada tã sər ha maa ge məsler mə nenɣeye na, Mbəlom.»

*Yesu ta Yuhana madzəhuḅe ndo a yam*

22 Ma dəba aye na, Yesu ta gawla nɣay hay tə lətse ti ye ka dala i Yahuda. Tə ndza mə dəma ada ta dzəhuḅawa ndo hay a yam.

23 Ahəl niye na, Yuhana a dzəhuḅawa ndo hay a yam dərma. A dzəhuḅawa tay ha ndo hay na, ma gəma i Enon bəse ta gəma i Salim hərwi dəlov andaya haladzay ma təv eye niye. Ndo hay ti yawa naha ka təv nɣay ada a dzəhuḅawa tay ha a yam.

24 Ahəl niye na, ta gəs na Yuhana a danɣay zuk bay.

25 Pat wuray na, siye i gawla i Yuhana hay ta dazlay a məkəde wuway ta ndo i Yahuda wuray ka məbere wu hay ta məndze tsədanɣa.

26 Gawla i Yuhana niye hay ti ye ka təv i Yuhana, ti ye naha tə gwaday: «Miter, ndo niye ahəl niye ka dzum gər ma diye i magayam i Yurdum ka tsik faya aye na, faya ma dzəhuḅaye tay ha ndo hay a yam ada ndo hay tebiye faya ta diye ka təv nɣay tuk na, kəkay?»

27 Yuhana a mbədətay faya a gwadətay: «Tadə Mbəlom kə vələy bay na, ndrəy ma sliye məhute bay tebiye.

28 Bo kurom eye ka slumeye faya məhəle mbəl ga, na gwadəkum: “Neɣ na, Kəriste bay. Ane tuk na, Mbəlom a slərə ga ahaya, nã lahayaw kame tsa.”

29 Ndo nakə a zla dahəlay aye na, dahəlay niye na, i nɣay nɣway. Ane tuk na, dzam i zal i dahəlay niye na, ma lətsiye sləp ka tsakay nɣay ada ma piye zləm ka bazlam nɣay. Kə tsəne bazlam nɣay niye faya ma piye faya zləm aye na, ma nɣwasiye haladzay. Andza niye mənɣwese niye anəke na, i ga haladzay dərma.

30 Nenɣeye na, m̄ səkah kame kame, neɣ na, na nəkid.

31 «Ndo nakə a yaw abərə mə mbəlom aye na, nenɣeye ka gər i ndo hay tebiye. Ndo nakə nenɣeye ka məndzibərə aye na, nenɣeye ndo i məndzibərə nɣway ada ma tsikiye na, ka wu i məndzibərə hay. Ane tuk na, ndo nakə a yaw abərə ka təv i Mbəlom aye na, nenɣeye ka gər i ndo hay tebiye.

32 Ma tsikiye na, ka wu nakə a nɣatay ada a tsəne aye. Ane tuk na, wu nakə a tsik aye na, ndrəy ma təmiye bay.

33 Ndoweje ka təma bazlam nɣay nakə a tsik aye na, niye na, faya ma diye ha wu nakə Mbəlom a tsik aye na, dedək.

34 Ndo nakə Mbəlom a slərəw aye na, faya ma tsikiye na, bazlam i Mbəlom, hərwi Mbəlom kə rah ha ta Məsəfərə nɣay.

35 Bəba nɣay a wuda na wawa nɣay ada kə vələy mələve i bəy nɣay.

36 Ndo nakə kə dzala ha ka Wawa i Mbəlom aye na, ma hutiyə sifa nakə ma ndrəviye bay aye. Ndo nakə a kərəh mədzala ha ka Wawa i Mbəlom aye na, ma hutiyə sifa niye təbey. Mevel i Mbəlom ma ta ndrziye faya.»

## 4

*Yesu ta nɣwas i Samari wuray*

1 Farisa hay tə tsəne, ndo hay tə pay bəzay a Yesu ada a dzəhuḅawa tay ha ndo hay a yam na, haladzay a ze i Yuhana.

2 Azlakwa ta dedək eye na, Yesu a dzəhuḅawa tay ha ndo hay a yam bay. Maa dzəhuḅawa tay ha ndo hay a yam na, gawla nɣay hay bəna, bo nɣay eye bay.

<sup>3</sup> Ahəl nakə Yesu a tsəne wu nakə Farisa hay tə tsik faya na, a həl bo abəra ka dala i Yahuda a ye ka dala i Galile.

<sup>4</sup> Tsəved mede a Galile na, ta dala i Samari.

<sup>5</sup> Ahəl nakə faya ma diye na, a ndisl a təv aye andaya ka dala i Samari tə zalay Sikar. Təv niye na, bəse ta guvah nakə Zakob a vəlay a wawa ŋgay Yusufa ahəl niye aye.\* <sup>6</sup> Ada bədiyem nakə Zakob a la ahəl niye andaya ka təv aye niye.

Yesu a ndisl ka bədiyem niye na, ki ye gər, a ndza ka tsakay i bədiyem niye. Məndisle nakə Yesu a ndisl naha ka təv aye niye na, ma giye magərhapat.

<sup>7-8</sup> Ahəl nakə gawla i Yesu hay ti ye mata səkamaw wu mənday mə walaŋ gay na, ŋgwas i Samari wuray a ye naha mata təde yam. A yaw na, Yesu a gwaday: «Tədəŋew yam nā sa tey.»

<sup>9</sup> ŋgwas i Samari niye a gwaday a Yesu: «Na gwad nəkar na, Yahuda hay bəda! Ada ka tsətsahiye yam ka neŋ ŋgwas i Samari na, kəkay?» ŋgwas niye a tsik andza niye na, hərwi Yahuda hay tə dzawa gər a bo ta Samari hay bay.

<sup>10</sup> Yesu a mbəday faya, a gwaday: «Tədə ka sər wu nakə Mbəlom ma vəliye ada ka sər neŋ nakə na tsətsah fakaya yam aye na, nəkar dūh ka tsətsahiye fagaya yam nakə ma vəliye sifa aye ada na vəlakeye.»

<sup>11</sup> ŋgwas niye a gwaday faya: «Bəy ga, wu mətəde yam andaya fakaya bay ada bədiyem eye na, siđuk tuk na, ka hutiyeyam yam nakə ma vəliye sifa a ndo aye na, ma kəkay?»

<sup>12</sup> Maa lamay bədiyem nakay na, bəba tətə kway Zakob. Bo ŋgay eye kə sa yam ma bədiyem nakay. Wawa ŋgay hay ta gənwaw ŋgay hay ta sa yam ma bədiyem nakay dərmak. Ada nəkar ka dzala na, ka ze na Zakob daw?»

<sup>13</sup> Yesu a mbəday faya, a gwaday: «Kwa way kə sa yam nakay na, yam ma geyey sa.»

<sup>14</sup> Ane tuk na, ndoweyey kə sa yam nakə neŋ na vəleyey na, dāda yam ma geyey sa bay. Yam nakə na vəleyey na, ma təriyey andza bədiyem nakə a ŋgəz wad wad aye ada ma vəleyey sifa nakə ma ndəviyey bay aye.»

<sup>15</sup> ŋgwas niye a gwaday: «Bəy ga, vəleŋ yam eye niye tey hərwi ada yam mē geŋ sa bay ada nā yaw dāda mətəde naha yam kənaŋ sa bay.»

<sup>16</sup> Yesu a gwaday: «Do, pəla ahaya zal yak ada kə yumaw kənaŋ.»

<sup>17</sup> ŋgwas niye a mbəday faya, a gwaday: «Zal ga andaya bay.»

Yesu a gwaday: «Ka gwad zal yak andaya bay na, ka tsik na, dedek.»

<sup>18</sup> Hərwi zal yak hay na, zlam ada ndo nakə anəke nəkurom mandza eye salamay aye na, zal yak bay. Ka tsik na, dedek.»

<sup>19</sup> Tsa na, ŋgwas niye a gwaday: «Ah! Bəy ga, na sər ha nəkar na, ndo məde ha bazlam i Mbəlom.»

<sup>20</sup> Bəba tətə may Samari hay tə dəslaway ha gər a Mbəlom na, mə gər i gəma nakay. Ane tuk na, nəkurom Yahuda hay na, ka gwadum i kurom təv mədəslay ha gər a Mbəlom na, ma Zerozelem.»

<sup>21</sup> Yesu a gwaday: «ŋgwas nakay, dzala ha ka wu nakə na tsikakeyey, həlay eye ma deyeweyey na, ndo hay ta dəslay ha gər a Bəba Mbəlom na, mə gər i gəma nakay dekdək kəgəbay ma Zerozelem dekdək tsa bay.»

<sup>22</sup> Nəkurom Samari hay ka sər wu nakə ka dəslumay ha gər aye bay. Nəmay Yahuda hay na, nəmaa sər, hərwi Mbəlom a bəzatay ha tsəved i mətəme a ndo hay na, ta Yahuda hay.

<sup>23</sup> Ane tuk na, həlay eye ma deyeweyey bə həlay eye anaŋ tsiy, Məsəfəre i Mbəlom ma vəliyey gədaŋ a ndo neheyey a satay mədəslay ha gər a Bəba

\* 4:5 Madazlay i wu hay 33.19.

Mbəlom ta dedek eye na, ta dəslay ha gər ta dedek Mbəlom ma pəliye na, slala i ndo niye hay.

<sup>24</sup> Mbəlom na, məsəfəre. Hərwi niye ndo neheye ta dəslay ha gər aye na, tã dəslay ha gər na, ta dedek ada ta gədan̄ i məsəfəre.»

<sup>25</sup> N̄gwas niye a gwad̄ay: «Na sər ha na, ndo nakə Mbəlom a pay dzagwa i bəy a gər aye ma deyeweye (andza mægweđe Kəriste). Aza ki yaw na, ma dākway ha wu hay tebiye.»

<sup>26</sup> Yesu a mbəd̄ay faya, a gwad̄ay: «Neñ nakə faya na tsikakeye me anəke, neñ eye.»

<sup>27</sup> Ahəl nakə Yesu ta n̄gwas niye faya ta tsikiye me na, gawla i Yesu hay tə maw tuk. Tə n̄gatay a Yesu faya ta tsikiye me ta n̄gwas niye na, a gatay hərbəbəkka. Ane tuk na, ndəray kwa nəte mə walañ tay ka tsətsah ka Yesu, kə gwad̄ay: «Ka pəla abəra ka n̄gwas eye mey?» kəgəbay «Ka tsikumeye me ta n̄gwas eye na, hərwi mey?» na, ndəray ka tsətsah faya bay.

<sup>28</sup> N̄gwas niye a gər ha kalawah n̄gay ka bədiyem, a mbəda gər a walañ gay. A ye naha a gwad̄atay a ndo hay:

<sup>29</sup> «Dumara, zəbum ka ndo wuray anan̄ eye təday, a pesleñ na wu nakə na gawa ahəl niye aye tebiye. Ma giye na, Kəriste nakə Mbəlom a gwad̄ ma slaraweye aye.»

<sup>30</sup> Ndo hay tə tsəne bazlam i n̄gwas niye a tsikatay aye na, ti yaw abəra mə walañ gay, ti yaw ka təv i Yesu.

<sup>31</sup> Ahəl nakə n̄gwas niye a ye a walañ gay aye, gawla i Yesu hay nəteye faya ta geye amboh a Yesu m̄a nda wu mənday, tə gwad̄ay: «Miter may, nda wu mənday!»

<sup>32</sup> Ane tuk na, Yesu a mbəd̄atay faya a gwad̄atay: «Wu mənday ga andaya nakə na ndiye, nəkurom ka sərurum bay.»

<sup>33</sup> Gawla n̄gay hay tə tsəne andza niye na, tə tsik mə walañ tay, tə gwad̄: «Ma giye na, ndəray kə zlayaw wu mənday kəla dāw?»

<sup>34</sup> Yesu a gwad̄atay: «Wu mənday ga na, mäge wu nakə a say a ndo nakə a sləra ga ahaya aye ada mändəve ha məsler nakə a vələñ a gwedəñ ge aye. Matəra wu mənday ga na, neñgeye.»

<sup>35</sup> Yesu a gwad̄atay sa: «Dzeke andaya, a gwad̄: “A ləkaw kiye fad̄ na, ta dziye wu mənday abəra ka dala.” Ane tuk na, neñ d̄uh na gwad̄akumeye: Ehey, zəbum ka guvah hay lele, təday. Wu hay na, ta nah tsiy. Kə sla mədze.

<sup>36</sup> Ndo nakə ma dziye na wu mənday abəra ka dala aye na, ma hutiyə mərəbe n̄gay ada ma hayay gər a wu mənday niye. Wu mənday na, andza mægweđe ndo neheye ta huta sifa nakə ma ndəviye bay ka tor aye. Andza niye ndo masləge ta ndo mədze wu abəra ka dala na, ta n̄gwasiye salamay.

<sup>37</sup> Hərwi dzeke nakə a gwad̄: “Ndo neñged̄ ma sləgiye, ndo neñged̄ na, ma dziye na abəra ka dala”, a tsik na, dedek.

<sup>38</sup> Na slər kurom a guvah mata dze na wu mənday nakə ka fətumay bay aye, ka təmumay a həlay a ndo hay tsa.»

<sup>39</sup> Ndo i dala i Samari niye hay haladzay tə dzala ha ka Yesu. Tə dzala ha na, hərwi n̄gwas niye a d̄atay ha parakka a gwad̄atay: «A pesleñ wu nakə na gawa ahəl niye tebiye.»

<sup>40</sup> Samari niye hay tə ndisl naha ka təv i Yesu na, ta tsətsah ka Yesu, tə gwad̄ay: «Ndza ka təv may tey.» Yesu a təma bazlam tay niye, a ndza ka təv tay məhəne sulo.

<sup>41</sup> Yesu a tsikawatay bazlam i Mbəlom. Tə tsəne na, ndo siye hay haladzay tə dzala ha ka Yesu sa.

<sup>42</sup> Ndo niye hay tə gwaday a ɲgwas niye: «Anəke nəmaa dzala ka Yesu na, hərwi wu nakə ka təkəramay aye sa bay. Nəmaa dzala ha na, hərwi nakə nəmaa tsəne wu nakə bo ɲgay eye a tsik aye. Ada nəmaa sər ha nənɲeɲe na, ndo mətəme ha ndo i məndzibəra hay dedək.»

*Yesu a mbəl ha wawa i ndo mäge məsler i bəy bagwar eye*

<sup>43</sup> Yesu a ndza ka təv niye məhəne sulo na, a həl bo a ye abəra ka təv niye, a ye a Galile.

<sup>44</sup> Bo i Yesu eye a tsik, tə gər ɲgay, a gwad: «Ndo mədə ha bazlam i Mbəlom na, ta rəhay ha gər ma gəma ɲgay bay.»

<sup>45</sup> Azlakwa düh Yesu a ndisl a Galile na, ndo i dala niye hay ta təma na lele tə mənɲwese eye hərwi nəteye dərmak ta ye a magurlom i Pak niye ma Zerozelem aye ada a həlay i magurlom niye na, ta ɲgatay a wu nakə Yesu a ge aye.

<sup>46</sup> Andza niye, Yesu a mbədə gər a Kana ka dala i Galile sa, gəma nakə a təra ha yam guzom eye. Ndo mäge məsler i bəy bagwar eye wuray andaya, wawa ɲgay dəvats eye ma gəma i Kafernahum.

<sup>47</sup> A tsəne Yesu kə maw abəra ma Yahuda nənɲeɲe ka dala i Galile na, a həl bo a ye ka təv i Yesu. A ye naha a gay amboh a Yesu, a gwaday: «Amboh tama a Kafernahum, ta mbələɲ ahaya wawa ga andaya dəvats eye faya ma mətiye tey.»

<sup>48</sup> Yesu a gwaday: «Nəkurom na, tədə na ge masuwayaɲ eye bay na, ka dzalumeye ha bay na, kəkay?»

<sup>49</sup> Ndo mäge məsler niye a mbədəy faya, a gwaday: «Bəy ga, tama bəse bəna wawa ga ma ta mətiye.»

<sup>50</sup> Yesu a gwaday: «Mbədə gər a mətəgay, wawa yak ma mbəliye.»

Ndo niye a dzala ha ka bazlam i Yesu niye a tsikay aye. A ma a mətəgay.

<sup>51</sup> Ahəl nakə ndo niye faya ma diye a mətəgay, nənɲeɲe ka tsəved mba na, ndo i məsler ɲgay hay ti yaw, tə ɲgəlayaw gər həf ka tsəved tə gwaday: «Wawa yak kə mbəl!»

<sup>52</sup> A tsətsah fataya, a gwadatay: «Wuye a gay ɲgama na, kədəy?»

Ta mbədəy faya, tə gwaday: «A gay ɲgama na, məvenəɲ ta bəre nate i huwa.»

<sup>53</sup> A sər ha həlay niye na, tits həlay nakə Yesu a gwaday: «Wawa yak ma mbəliye» aye. Tsa na, nənɲeɲe ta ndo i gay ɲgay hay tebiye tə dzala ha ka Yesu.

<sup>54</sup> Nakay na, masuwayaɲ masulo eye nakə a ge ma Galile aye. A ge na, ahəl nakə a maw abəra ma Yahuda aye.

## 5

*Yesu a mbəl ha ndo wuray matəra eye ma Zerozelem*

<sup>1</sup> Ma dəba eye na, magurlom i Yahuda hay andaya ma Zerozelem. Hərwi niye, Yesu a ye a magurlom i Yahuda niye hay ma Zerozelem aye.

<sup>2</sup> Ma Zerozelem niye na, dəlov wuray andaya bəse ta Məged i Təbaɲ hay nakə ti yawa tay ha tə dəma a walaɲ gay aye. Tə zalay a dəlov eye niye tə bazlam i Yahuda hay na, Baytidzata. Ka tsakay i dəlov niye na, galak andaya mənɲəna eye zlam.

<sup>3</sup> Ndo i dəvats hay haladzay tə hənawa mə dəma: Guluf hay, ndo matəra eye, ndo neheye sik tay maməta eye hay. [Ta həbawa yam nakə ma bəliye wekit aye.

<sup>4</sup> Hərwi həlay eye andaya gawla i Mbəlom a mbəzlawaw, a bəlawaw ha. Kə bəl ha na, ndo nakə kə lah kurre məkal ha bo a yam niye gawla i Mbəlom a bəl



ha aye na, kə mbəl abəra ma dāvats ηgay. Kwa dāvats eye na, kəkay kəkay, ma mbəliye.]

<sup>5</sup> Mə walaŋ i ndo i dāvats niye hay na, ndoweye andaya kə ndza ma dāvats məve kuro kuro mahkar gər eye tsamahkar.

<sup>6</sup> Yesu a ndisl a təv i ndo i dāvats niye hay na, a ηgatay a ndo niye mahəna eye ada a tsəne na, ndo niye kə ndza ma dāvats məve haladzay. A tsətsah faya, a gwaday: «A saka məmbəle dāw?»

<sup>7</sup> Ndo niye dāvats eye a gwaday: «Ahəl nakə yam faya ma bəliye na, ndəray andaya məzle ga, məkele ga ha a dəma bay. Na gwad na dziye faya bo məkele ha bo a dəma na, ndo mekeleŋ eye a leheŋ a dəma.»

<sup>8</sup> Yesu a tsəne andza niye na, a gwaday: «Lətse, zla təv məhəne yak, do wu yak!»

<sup>9</sup> Kwayaŋŋa ndo niye a mbəl. A zla təv məhəne ηgay ada a pa bo ka mede. Azlakwa bay, wu niye a ge bo na, pat i mazəzukw bo.

<sup>10</sup> Bəy i Yahuda hay tə ηgatay a ndo niye a mbəl eye faya ma zliye təv məhəne na, tə gwaday: «Bəgom na, pat i mazəzukw bo sa na, tsəved andaya məzle hubok pat i mazəzukwe bay.»

<sup>11</sup> A mbədətay faya, a gwadatay: «Ndo nakə a mbəl ga ha aye, a gwedeŋ: “Zla təv məhəne yak do wu yak.”»

<sup>12</sup> Ndo niye hay ta tsətsah faya: «Ndowneye i ηgay way nakə ma gwadakeye: “Zla təv məhəne yak ada kə ye ha” pat i mazəzukw bo na, way?»

<sup>13</sup> Ane tuk na, ndo niye a sər ndo nakə a mbəl ha aye bay, hərwi Yesu ki ye ηgway abəra ka təv niye, kə gər tay ha ndo niye hay haladzay aye.

<sup>14</sup> Ma dəba aye na, Yesu tə dza gər ta ndo nakə a mbəl ha aye mə gay i mədəslay ha gər a Mbəlom, a gwaday: «Anəke na, ka mbəl tuk. Kə ge mənese sa bay. Ka ge mənese na, wu ma ta gakeye ma ziye nakə a gaka aye.»

<sup>15</sup> Ma dəba eye ndo niye a ye, a gwadatay a bəy i Yahuda hay: «Maa mbəl ga ha na, Yesu.»

<sup>16</sup> Tsa na, bəy i Yahuda niye hay ta dazlay məgay sewed a Yesu hərwi nakə a mbəl ha ndo pat i mazəzukw bo aye.

<sup>17</sup> Ane tuk na, Yesu a mbədətay faya, a gwadatay: «Bəba ga faya ma giye məsler na, pat pat ada neŋ na giye andza niye dərma.»

<sup>18</sup> Bəy i Yahuda hay tə tsəne bazlam i Yesu niye na, ta səkah ha məpəle tsəved məkədə na. A satay məkədə na Yesu na, hərwi a rəhay ha gər a pat i mazəzukw bo bay, dekdek bay. Ane tuk na, hərwi nakə a gwad Mbəlom na, bəba ηgay aye. Andza məgwede a lava ha gər ηgay ta Mbəlom.

### *Bəba Mbəlom kə vələy gədan a wawa ηgay tebiye*

<sup>19</sup> Yesu a mbədətay faya, a gwadatay: «Sərūm ha na, neŋ na sliye faya ka məge wu tə həlay ga aye tsa bay. Na giye na, wu nakə na ηgatay Bəba ga a gawa aye. Wu nakə Bəba ga a gawa aye na, neŋ wawa ηgay na giye dərma.»

<sup>20</sup> Bəba ga a wuda neŋ wawa ηgay, ada ma deŋeye ha wu nakə a gawa aye tebiye. Ma deŋeye ha məsler bagwar eye sa a ze wu neheye ada aza ma gakumeye hərbaḅakka.

<sup>21</sup> «Andza nakə Bəba Mbəlom a mbəl ha ndo hay abəra ma mədahaŋ ada faya ma vəlateye sifa aye na, andza niye neŋ wawa ηgay na vəliye sifa a ndo neheye a seŋ aye.

<sup>22</sup> «Ada sa na, Bəba ma giye sariya tə həlay ηgay aye bay. Kə vəleŋ gədan a həlay ga ka məge sariya.

<sup>23</sup> A ge ha andza niye na, hərwi ada ndo hay tebiye tā dəsleŋ ha gər andza nakə ndo hay faya ta dəslyay ha gər a neŋeye Bəba Mbəlom aye. Tadə ndoweye



kə dəsleŋ ha gər a neŋ wawa ŋgay bay na, kə dəslay ha gər a Bəba ga nakə a sləra ga ahaya bay dərmaŋ.»

<sup>24</sup> Yesu a gwadətay sa: «Sərum ha na, ndoweŋye kə pay zləm a bazlam ga neheŋye na tsik aye ada kə dzala ha ka Mbəlom nakə a sləra ga ahaya aye na, kə huta sifa nakə ma ndəviŋye bay aye. Mbəlom ma ta geŋye sariya bay. Neŋgeŋye na, ɓa ki ye abəra ka tsəved i məməte. Ka dazlay a məndze ma sifa nakə ka tor eye.

<sup>25</sup> «Ayaw! Sərum ha na, pat eye ma deyeweŋye, ɓa dūh pat eye anəŋ ki yaw tsiŋ, ahəl nakə ndo neheŋye nəteŋye andza mədahaŋ hay ta tsəniŋye wu nakə Wawa i Mbəlom a tsik aye. Ndo neheŋye ta pay zləm ada ta dzala ha ka wu nakə na tsik aye na, ta mbəliŋye.

<sup>26</sup> Mbəlom na, gədaŋ ŋgay andaya ma vəliŋye sifa a ndo. Andza niŋye kə vəleŋ gədaŋ a neŋ wawa ŋgay ma vəliŋye sifa a ndo dərmaŋ.

<sup>27</sup> Ada kə vəleŋ gədaŋ a neŋ wawa ŋgay məge sariya ka ndo hay. A vəleŋ gədaŋ məge sariya ka ndo hay na, hərwi neŋ Wawa i Ndo.

<sup>28</sup> «Mâ gakum masuwayaŋ bay, hərwi pat eye ma deyeweŋye na, mədahaŋ neheŋye ma bəd ta tsəniŋye bədidaŋ ga.

<sup>29</sup> Ta tsəne na, ta lətseweŋye abəra ma mədahaŋ. Ndo neheŋye ahəl niŋye tə gawa wu ŋgwalak eye na, ta lətseweŋye abəra ma mədahaŋ, ta hutiyə sifa nakə ma ndəviŋye bay aye. Ada ndo neheŋye tə gawa wu ŋgwalak eye bay aye na, ta lətseweŋye abəra ma mədahaŋ i tay na, ta gəsiŋye tay a sariya.

<sup>30</sup> Neŋ na, na sliŋye faya məge wuray ka gər bo ga bay. Na giŋye sariya na, andza nakə Mbəlom a tsikenŋ aye ada sariya ga nakə na giŋye na, dedek hərwi na pəla na, wu nakə a yeŋ a gər a neŋ eye bay. Ane tuk na, na giŋye na, wu nakə a yay a gər a ndo nakə a sləra ga ahaya aye.»

### *Ndo neheŋye ta həliŋye mbal i Yesu aye*

<sup>31</sup> Yesu a gwadətay sa: «Tadə na ta mbal i gər ga na, ndo hay ta gwadiŋye dedek bay.»

<sup>32</sup> Ane tuk na, mata həle mbal i gər ga na, ndo mekeleŋ eye ada na səh ha ndo məhəle mbal ga na, ma həliŋye, ta dedek.

<sup>33</sup> Ka slərum ndo hay ka təv i Yuhana ada kə tsikakum wu nakə dedek eye.

<sup>34</sup> Neŋ na, na pa gər ka məhəle mbal i ndo təbey. Duh na tsikakum andza niŋye na, hərwi ada kə hutum mətəme.

<sup>35</sup> Ahəl niŋye, Yuhana na, a tara andza lalam nakə ta piŋye faya ako hərwi ada mâ ɗakum ha dedek aye. Ma məndze tsakway na, ka təmum bazlam ŋgay ada ka ŋgwasum hərwi dzaydzay ŋgay niŋye.

<sup>36</sup> «Ane tuk na, i ga na, wu mekeleŋ eye neheŋye a ze bazlam i Yuhana nakə a tsik ta həliŋye mbal i gər ga aye na, anəŋ. Neŋ faya na tsikiŋye ka masler nakə Bəba ga a vəleŋ a gwedeŋ “ge” aye. Wu neheŋye faya ta bəziŋye ha masləra ga ahaya na, Mbəlom dedek.

<sup>37</sup> «Ada Bəba ga nakə a sləra ga ahaya na, ma həliŋye mbal ga. Ane tuk na, ka tsənum bədidaŋ ŋgay ɗada bay ada ka ŋgatumay ɗada bay.

<sup>38</sup> Ka təmum bazlam ŋgay hay, ta ndza mə ɗərev kurom bay hərwi ka dzalum ha ka neŋ wawa ŋgay nakə a sləraw aye bay.

<sup>39</sup> «Ada nəkurom na, faya ka dzaŋguməŋye Derewel i Mbəlom pat pat hərwi ka pum mədzal gər kurom na, ka gwadum ka hutuməŋye mə ɗəma sifa nakə ma ndəviŋye bay aye. Bazlam i Mbəlom neheŋye tə həl mbal na, i gər ga.

<sup>40</sup> Azlakwa dūh a sakum madayaw ka təv ga məhute sifa nakə dedek aye bay na, kəkay?»

41 Yesu a gwadatay: «Ka dzalum na, a seŋ ndo hay tâ zembedeŋ daw? A'ay! Neŋ na, mædzal gær ga a ye ka mazembede nakæ ndo hay ta zambadawatay a siye i ndo hay aye tæbey.

42 Ane tuk na, nækuroŋ na, andza neŋ tæbey. Na sær ha ta dedek, ka wudum Mbælom bay.

43 Na yaw na, maa slæra ga ahaya na, Bæba ga Mbælom ada ka wudum matæme ga bay. Ane tuk na, tadæ ndo mekelen eye mâ yaw ta gædan ŋgay na, ka tæmumeye na.

44 A sakum na, ndo hay tâ zambadakum. Duŋ Mbælom nakæ dedek eye na, ka wudum mazambaday bay. Ada tadæ nækuroŋ andza niye dedek na, ka dzalumeye ha fagaya ma kækay?

45 «Ane tuk na, kâ dzalum na, na ta makumeye ha mænese kame i Bæba ga bay. Mata makum ha mænese na, Musa neŋgeye nakæ ka pum faya mædzal gær kurom aye.

46 Tadæ ka dzalum ha ka Musa ta dedek na, haæe ka dzalum ha ka neŋ, hærwi Musa a watsa na, ka neŋ.

47 Tadæ ka dzalum ha ka wu nakæ Musa a watsa aye bay na, ka dzalumeye ka wu nakæ faya na tsikiye na, ma kækay?»

## 6

*Yesu a walatay wu mænday a ndo hay ta giye gwezem zlam*

*Mata 14.13-21; Markus 6.30-44; Luka 9.10-17*

1 Ma dæba aye na, Yesu a lætse, a ye a tas a diye i dælov i Galile. Dælov niye na, tæ zalay dælov i Tiber dærmak.

2 Ndo hay haladzay tæ paway bæzay. Tæ paway bæzay na, hærwi nakæ tæ ŋgataway a masuwayaŋ neheye a gawa aye. Masuwayaŋ niye a gawa aye na, a mbælawa tay ha ndo i dævats hay.

3 Yesu ta gawla ŋgay hay tæ tsal a mahæmba, ti ye tæ ndza mæ dæma.

4 Magurlom i Yahuda hay nakæ tæ zalay Pak aye na, mazlambar kæ ndzew.

5 Yesu a zæba dære na, a ŋgatay a ndo hay haladzay ta diye naha ka tæv ŋgay. Tsa na, a tsætsah ka Filip, a gwaday: «Ka hutakwaweye mæsækamaw wu mænday dæ mæwælatay a ndo neheye tebiye na, mæŋgay?»

6 Yesu a tsikay a Filip andza niye na, mazæbe ka mædzal gær i Filip. Hærwi Yesu na, a sær wu nakæ ma giye.

7 Filip a mbæday faya a gwaday: «Kwa tadæ ka sækæmakwaw wu mænday ta *dinar*\* sulo, kwa way ada mâ huta tsekweŋ tsekweŋ bæbay na, ma slateye bay.»

8 Ndo mekelen eye mæ walaŋ i gawla ŋgay hay, mæzele ŋgay Aŋdære malamar i Simon Piyer, a gwaday:

9 «Wawa wuray anaŋ kanaŋ na, tapa i makwala andaya faya zlam tæ kælef hay sulo. Ane tuk na, hærwi ndo neheye haladzay aye na, ma sliye mey?»

10 Tsa na, Yesu a gwadatay a gawla ŋgay hay: «Dum gwadumatay a ndo hay tâ ndza tebiye ka dala.»

Ka tæv eye niye na, guzer andaya haladzay beremeffe a ndzohwaw mba. Gawla ŋgay hay ti ye, tæ gwadatay a ndo hay, ndzum ka dala. Ndo niye hay tebiye tæ ndza ka dala. Haslæka hay dekdæk ta giye gwezem zlam.

11 Ndo niye hay tebiye tæ ndza na, Yesu a zla makwala niye, a gay naha sisæ a Mbælom, a ŋgæna ha. A ŋgæna ha na, a wælatay a ndo niye hay mandza eye.

\* 6:7 Dinar: Kwar i suloy temerre sulo, ma hamiye meræbe i ndo mæge mæsler pat næte. Zæba mæ Mata 20.2.

A hæl kælef niye hay, a ge ha andza niye sa. Tə nda makwala niye tə kælef aye ka mærehe tay.

<sup>12</sup> Tə nda makwala niye tə rah lele na, Yesu a gwadatay a gawla ŋgay hay: «Hayumay gær a siye nakə a zaw aye kwa tsekweŋ m̄a dze bay.»

<sup>13</sup> Tsa na, tə hayay gær a makwala nakə a zaw abəra ka ndo neheye tə nda aye. Tə hayay gær na, a rah a gwanj kuro gær eye sulo.

<sup>14</sup> Ndo hay tə ŋgatay a masuwayaŋ niye Yesu a ge nakə a bəz ha gədaŋ i Yesu aye na, tə gwad: «Ndo nakay na, ndo mæde ha bazlam i Mbəlom dedek. Neŋgeye na, ndo mæde ha bazlam i Mbəlom nakə tə tsik faya ahəl niye tə gwad ma deyeweye ka mændzibəra aye.»

<sup>15</sup> Yesu a sər ha ndo niye hay ta deyeweye ta piye na a bəy ta gədaŋ na, a mbəda gær, a tsal ŋgway a tsaholok niye sa. A tsal na, mahəŋgeye.

*Yesu a ye ka gær i yam tə sik  
Mata 14.22-33; Markus 6.45-52*

<sup>16</sup> Huwa a ge na, gawla i Yesu hay tə mbəzla ka me i dəlov.

<sup>17</sup> Ti ye naha na, tə tsal a kwalalaŋ i yam, ta dazlay mætese a diye neŋged mede a gəma i Kafernahum. Ahəl nakə faya ta diye na, həvad kə ge fataya tsiy, ada Yesu kə husa ka təv tay zuk bay.

<sup>18</sup> Dəlov niye a dazlay mæbəle haladzay wekit wekit hərwi mətasl a ge ta gədaŋ.

<sup>19</sup> Ta ye ma giye kilometer zlam kəgəbay məkwa na, tə ŋgatay a Yesu faya ma diye naha ka təv i kwalalaŋ yam tay, ka gær i yam tə sik. Tə ŋgatay na, ta dzədzar haladzay.

<sup>20</sup> Ane tuk na, Yesu a gwadatay: «K̄a dzədzarum bay. Nakay na, neŋ!»

<sup>21</sup> Gawla ŋgay hay a satay mægəsay naha mə həlay a kwalalaŋ i yam. Kwayaŋŋa kwalalaŋ i yam niye a husa dənuts ka me i dəlov ka dala, ka təv nakə a satay mede a dəma aye.

*Wu mənday nakə ma vəliye sifa aye*

<sup>22</sup> Tədæ eye na, ndo niye hay haladzay eye tə ze naha ma diye i dəlov niye ta pəla Yesu. Ta sər ha na, kwalalaŋ i yam ka təv eye niye na, nəte. Tə sər ha na, Yesu kə tsal a kwalalaŋ i yam niye bay. Ane tuk na, gawla ŋgay hay ti ye na, mahətay eye.

<sup>23</sup> Siye i ndo hay ti yaw tə kwalalaŋ i yam tay hay abəra ma gəma i Tiber, tə ndislew tə ndzay a gær a ndo hay ka me i dəlov niye bəse ta təv nakə ndo hay tə nda wu mənday mæ dəma aye, wu mənday nakə Yesu a zla a gay naha sise a Mbəlom ada a vəlatay a ndo niye hay aye.

<sup>24</sup> Ndo hay ta zəba dære na, Yesu andaya bay ada gawla ŋgay hay bəbay nəteye andaya ka təv niye bay na, tə tsal a kwalalaŋ i yam niye hay, ti ye a Kafernahum mata pəle na Yesu.

<sup>25</sup> Ti ye tə huta na Yesu ka me i dəlov niye ta diye neŋged. Ti ye tə gwaday: «Miter, ka ndislew kanaŋ na, sa kəday?»

<sup>26</sup> Yesu a mbədətay faya, a gwadatay: «Ayaw! Sərum ha na, ka pəlum ga na, hərwi nakə ka ndayum wu mənday ka rahum bəh bəh lele aye bəna, hərwi nakə ka tsənum masuwayaŋ nakə na giye a say mægwede mey na, ka tsənum bay.

<sup>27</sup> K̄a gum mæsler hərwi wu mənday nakə ma nasiye aye bay. Duh gum mæsler na, hərwi wu mənday nakə ma nasiye bay ma ndziye huya ada ma vəliye sifa nakə ma ndəviye bay ka tor eye. Wu mənday niye na, neŋ Wawa i Ndo na vəlakumeye. Na vəlakumeye na, hərwi Bəba Mbəlom kə vələŋ gədaŋ ka mæge.»

28 Ta tsətsah faya tə gwaday: «Nəmaa giye na, məsler waray nakə ma deyeye a gər a Mbəlom aye?»

29 Yesu a mbədatay faya, a gwadatay: «Məsler nakə a yay a gər a Mbəlom ka gumeyə na, dzalum ha ka neŋ ndo nakə a sləra ga ahaya aye.»

30 Tə gwaday: «Kə ge andza niye na, nəmaa ta dzaliye ha fakaya na, ka bəzamaŋ ha masuwayaŋ waray? Kəgəbay ka giye na, məsler waray?»

31 Hərwi ahəl niye bəba tətə kway hay ti yaw abəra mə Ezipt, nəteye mə makulkwandah na, tə nda wu mənday nakə a yaw mə mbəlom tə zalay *man* aye†. Andza nakə tə watsa mə Derewel i Mbəlom aye na, tə gwad: «Mbəlom kə vəlatay wu mənday nakə a yaw mə Mbəlom aye, tə nda.‡»

32 Yesu a mbədatay faya, a gwadatay: «Sərum ha na, wu mənday nakə ahəl niye Musa a vəlakum mə makulkwandah aye na, wu mənday nakə a yaw abəra mə mbəlom aye ta dedek bay. Ane tuk na, wu mənday nakə bəba ga Mbəlom ma vəlakumaweye abəra mə mbəlom aye na, nakə ta dedek aye.»

33 Hərwi wu mənday niye Mbəlom ma vəlakumeyə na, neŋ ndo nakə na mbəzlaw abəra mə mbəlom aye, ada wu mənday niye na, ma vəlateye sifa a ndo i mənzbərə haŋ.»

34 Tə gwaday: «Bəy may, vəlamay wu mənday niye huya tey.»

35 Yesu a tsikatay parakka, a gwadatay: «Wu mənday nakə ma vəliye sifa a ndo hay aye na, neŋ. Ndowneyə ki yaw ka təv ga ada kə dzala ha ka neŋ na, may ma wuriye faya dāda bay, yam ma geye dāda sa bay.»

36 Ane tuk na, 6a na tsikakum ka ŋgatumeŋ ada ka dzalum ga ha wal bay.

37 Ndo neheye Bəba ga a vəleŋ tay ha aye na, ta deyeweyə ka təv ga. Ada ndo nakə ki yaw ka təv ga aye na, dāda na kaliye ha bay.

38 Hərwi na mbəzlaw abəra mə mbəlom na, ka mäge wu nakə a yeŋ a gər a neŋ aye bay, ane tuk na, mäge məsler nakə a yay a gər a ndo nakə a sləra ga ahaya aye.

39 Məsler nakə a say a ndo nakə a sləra ga ahaya aye na, waray? Ndo neheye a vəleŋ tay ha a həlay aye na, kwa nəte na dziye tay ha bay tebiye. Ane tuk na, na ta mbəliye tay ha abəra ma mədahaŋ pat i sariya.

40 Wu naka a say a Bəba ga na, anaŋ: Ndo neheye ta zəba ka neŋ wawa ŋgay ada ta dzala ha fagaya aye na, t̄a huta sifa nakə ma ndəviye bay ka tor eye. Pat i sariya na, neŋ na ta mbəliye tay ha abəra ma mədahaŋ.»

41 Yahuda niye hay ta dazlay məse bazlam ka Yesu, hərwi nakə a gwadatay: «Neŋ na, wu mənday nakə a mbəzlaw abəra mə mbəlom aye.»

42 Tə gwad: «Na gwad Yesu neŋgeye na, wawa i Yusufa bədaw? Ka sarakwa bəba ŋgay ta may ŋgay lele tuk na, ada ma sliye faya anəke məgwede neŋgeye na, a mbəzlaw abəra mə mbəlom na, kəkay?»

43 Yesu a mbədatay faya, a gwadatay: «Gərum ha məse fagaya bazlam mə walaŋ kurom!»

44 Tadə Bəba ga ki ye ahaya ndoweyə ka təv ga bay na, ma sliye faya madayaw ka təv ga bay. Bəba ga nakə a sləra ga ahaya aye ki ye ahaya ndoweyə ka təv ga na, neŋ na ta mbəliye ha abəra ma mədahaŋ pat i sariya.

45 Ahəl niye ndo məde ha bazlam i Mbəlom hay tə watsa mə Derewel i Mbəlom, tə gwad: «Mbəlom neŋgeye ma ta datay ha bazlam ŋgay a ndo hay.§» Ndowneyə kə tsəne bazlam i Mbəlom Bəba ga ada ka tətik na, ma deyeweyə ka təv ga.

46 Azlakwa andza məgwede ndəray dāda kə ŋgatay a Bəba ga bay, maa ŋgatay na, neŋ ndo nakə na yaw abəra ka təv ŋgay aye nəte ŋwenj.

† 6:31 Madayaw abəra ma Ezipt 16.13-15, 31. ‡ 6:31 Madayaw abəra ma Ezipt 16.4. § 6:45 Ezay 54.13.

<sup>47</sup> «Sərum ha na, ndo nakə kə dzala ha ka neŋ aye na, kə huta sifa nakə ma ndaviye bay ka tor eye.

<sup>48</sup> Neŋ na, wu mənday nakə ma vəliye sifa a ndo hay aye.

<sup>49</sup> Ahəl niye na, bəba tətə kurom hay tə nda wu mənday nakə tə zalay *man* aye mə makulkwandah\*, ada huya tə mət ŋgway.

<sup>50</sup> Ane tuk na, ndoweye kə nda wu mənday nakə a yaw abəra mə mbəlom aye na, ma ta mətiye bay.

<sup>51</sup> Neŋ na, wu mənday nakə ma vəliye sifa, a mbəzlaw abəra mə mbəlom aye. Ndowneye kə nda wu mənday nakay na, ma mətiye bay, ma ndziye ka tor eye. Wu mənday nakə na vəliye na, bo ga. Na vəliye na, hərwi ada ndo i məndzibəra hay t̄a huta sifa.»

<sup>52</sup> Yahuda hay tə kəf faya wuway mə walaŋ tay haladzay hərwi bazlam i Yesu niye a tsik aye. Ta tsətsah tə gwad: «Ndo nakay ma vəlakweye bo ŋgay ada ka ndayakweye na, ma kəkay?»

<sup>53</sup> Yesu a gwadatay: «Ayaw! Sərum ha na, tadə ka ndayum bo ga, neŋ Wawa i Ndo, bay ada ka sum bambaz ga bay na, ka hutum sifa bay.

<sup>54</sup> Ndowneye kə nda bo ga ada kə sa bambaz ga na, kə huta sifa nakə ma ndaviye bay aye ada pat i sariya na, na ta mbəliye ha abəra ma mədahaŋ.

<sup>55</sup> Hərwi bo ga na, wu mənday nakə dedək aye ada bambaz ga na, wu məse nakə dedək aye.

<sup>56</sup> Ndowneye ma ndiye bo ga ada ma siye bambaz ga na, ma ndziye huya mə neŋ ada neŋ na ndziye mə neŋgeye.

<sup>57</sup> Bəba ga nakə a slara ga ahaya na, neŋgeye ma ndziye huya ada neŋ na ndziye huya na, hərwi neŋgeye. Andza niye ndoweye kə nda bo ga na, neŋgeye dərmak ma ndziye huya hərwi neŋ.

<sup>58</sup> «Wu mənday nakə a mbəzlaw mə mbəlom aye na, anan; Neŋgeye andza nakə bəba tətə kurom hay tə nda ahəl niye mə makulkwandah aye təbey. Tə nda wu mənday niye na, huya tə mət ŋgway. Ane tuk na, ndoweye kə nda wu mənday nakay na, ma ndziye ka tor eye.»

<sup>59</sup> Yesu a tsik bazlam neheye na, ahəl nakə neŋgeye faya ma tətikateye a ndo hay mə gay i mađuwule me ma gəma i Kafernahum aye.

<sup>60</sup> Gawla i Yesu niye hay tə tsəne bazlam i Yesu niye a tsik aye na, siye hay haladzay mə walaŋ tay tə gwad: «Bazlam nakay na, mawura bo eye. Mata mbe faya məpay zləm na, way?»

<sup>61</sup> Yesu a sərətay naha faya ka wu nakə faya ta tsikiye ka gər ŋgay aye. Hərwi niye a gwadatay: «Bazlam ga nakə na tsik aye na, a ndalakum daw?»

<sup>62</sup> Tadə ka ŋgatumay a neŋ Wawa i Ndo faya na tsaliye a təv ga nakə na mbəzlaw abəra mə dəma aye na, ada ka gwadumeye kəkay?»

<sup>63</sup> Mata vəle sifa a ndo hay na, Məsəfəre i Mbəlom. Ndo hay na, ta sliye faya məhute sifa niye ta gədan tay bay. Bazlam neheye na tsikakum aye maa vəleŋ na, Məsəfəre i Mbəlom ada bazlam neheye ta vəliye sifa a ndo hay aye.

<sup>64</sup> Ane tuk na, siye hay mə walaŋ kurom na, ta dzala ha ka neŋ bay.»

Ayaw! Ba kwa ka madazlay na, Yesu a sər ha neheye ta dzaliye ha faya bay aye ada a sər ha ndo nakə ma ta giye faya dəf aye.

<sup>65</sup> Yesu a gwadatay sa: «Hərwi niye na gwadakum: Tadə Bəba ga kə vəlay tsəved bay na, ndəray ma sliye faya madayaw ka təv ga bay.»

<sup>66</sup> Ma dəba eye na, gawla ŋgay hay haladzay tə gər ha ti ye wu tay. Ta pay bəzay sa bay.

\* 6:49 Zəba ma Madayaw abəra ma Ezipt 16.

<sup>67</sup> Tsa na, Yesu a tsatsah ka ndo i maslan ngay hay kuro gər eye sulo, a gwadatay: «Nəkurom dərma a sakum mede wu kurom daw?»

<sup>68</sup> Simoŋ Piyer a gwaday: «Bəy ga, bazlam yak nakə faya ka tsikiye na, ma vəlameye sifa nakə ma ndəviye bay aye. Nəmaa pay bəzay na, a way sa way?»

<sup>69</sup> Nəmay nəmaa dzala kar ha ada nəmaa sər ha nəkar na, ndo nakə tsəfanŋa Mbəlom a sləraw aye.»

<sup>70</sup> Yesu a mbədatay faya, a gwadatay: «Na gwad mapala kurom kuro gər eye sulo na, neŋ bədaw? Ada azlakwa ndo nəte mə walaŋ kurom neŋgeye na, Fakalaw.»

<sup>71</sup> A tsik andza niye na, ka Yudas wawa i Simoŋ Iskariyot. Hərwi Yudas na, kwa neŋgeye nəte mə walaŋ i ndo i maslan i Yesu hay kuro gər eye sulo bəbay na, ma ta giye daf ka Yesu na, neŋgeye.

## 7

### *Magurlom i madzawadzawa*

<sup>1</sup> Ma dəba aye na, Yesu a həhal ka dala i Galile tebiye a say mede ka dala i Yuda bay hərwi a satay a bagwar i Yahuda hay məkədə na.

<sup>2</sup> Ahəl niye na, magurlom i Yahuda hay nakə tə zalay Magurlom i Madzawadzawa aye kə ndzew mazlambar.

<sup>3</sup> Hərwi niye malamar ngay hay tə gwaday: «Do abəra kanaŋ do a dala i Yahuda hərwi ada gawla yak hay nəteye tā ŋgatay a məsler nakə ka giye dərma.

<sup>4</sup> Tadə a say a ndoweje ndo hay tā sər na na, ma sliye faya məngehe na wu nakə ma giye bay. Faya ka giye məsler neheye andza nakay sa na, ge wu neheye, ada ndo hay tebiye tā sər kar ha.»

<sup>5</sup> Malamar ngay niye hay tə tsikay andza niye na, kwa bo tay eye bəbay ta dzala ha ka Yesu bay.

<sup>6</sup> Yesu a gwadatay: «I ga na, həlay eye kə slaw zuk bay. Ane tuk na, i kurom na, kwa həlay waray waray, lele tsa.

<sup>7</sup> Nəkurom na, ndo i mənədzibəra hay ta sliye faya mənəkum dərə təbey. Ane tuk na, neŋ na, ta neŋgeye dərə hərwi na gwadawa məsler tay nakə faya ta giye na, lele bay.

<sup>8</sup> Nəkurom eye, dum a magurlom niye. Neŋ na, na diye bay, hərwi ga na, həlay eye kə ndislew zuk bay.»

<sup>9</sup> A tsikatay ka bo abəra bazlam niye andza niye na, a ndza ŋgway ma Galile.

<sup>10</sup> Malamar ngay hay ti ye a magurlom i madzawadzawa niye na, Yesu a ye dərma. A zəŋgal tay naha ma dəba. Ane tuk na, a ndisl naha a dəma na, ka bəz ha bo parakka bay. A ŋgaha bo.

<sup>11</sup> Bagwar i Yahuda hay mə magurlom niye, ta pəla na Yesu, ta tsatsah ka ndo hay, tə gwad: «Neŋgeye i ngay tebiye na, mənəgay?»

<sup>12</sup> Ndo hay haladzay tə kəd faya wuway haladzay. Siye hay tə gwad: «Ndo nakay na, neŋgeye ndo lele eye.» Siye hay tə gwad: «A'ay! Neŋgeye na, faya ma səpatiye tay ha ndo hay.»

<sup>13</sup> Ane tuk na, ndəray kwa nəte a sla faya mətsike bazlam niye parakka bay hərwi ndo hay tebiye ta dzədzar ta bagwar i Yahuda hay.

<sup>14</sup> Magurlom niye məzaw ngay eye mazlambar ka ndəv na, Yesu a ye a gay i mədəslay ha gər a Mbəlom. A ye naha a pa bo ka matətikatay a ndo hay.

<sup>15</sup> Bazlam ngay niye faya ma tətikateye a ndo hay aye na, a gatay a bagwar i Yahuda hay hərəbəkka, tə gwad: «Ndo nakay kə dzaŋga bay tuk na, ada a sər wu haladzay na, kəkay?»

16 Yesu a mbədatay faya a gwadətay: «Bazlam nakay faya na tsikakumeye na, a yaw mə neŋ bay. A yaw mə Mbəlom neŋgeye nakə a sləra ga ahaya aye.

17 Ndo weye kə say mäge wu nakə a yay a gər a Mbəlom aye na, ma səriye bazlam ga nakə na tsik aye a yaw abəra mə Mbəlom kəgəbay a yaw ma mədzal gər ga.

18 Ndo nakə a tsik bazlam nakə a yaw ma mədzal gər ŋgay aye na, a say ndo hay tā dəslyay ha gər. Ane tuk na, ndo nakə faya ma tətikateye a ndo hay hərwi ada ndo hay tā dəslyay ha gər a ndo nakə a sləra ahaya na, neŋgeye ndo i dedek. Neŋgeye na, maraw me andaya mə neŋgeye bay.

19 Na gwad maa vəlakum bazlam i Mbəlom mapala eye na, Musa bədaw? Ada ndəray kwa nəte mə walaŋ kurom ka rəhay ha gər bay. Ada a sakum məkədə ga na, hərwi mey?»

20 Ndo hay ta mbəday faya a Yesu, tə gwad: «Nəkar na, fakalaw mə bo yak kəla daw? Mapəla tsəved məkədə kar na, way?»

21 Yesu a gwadətay: «Na ge masuwayaŋ nəte pat i mazəzükw bo na, a gakum hərbaḅəkka a nəkurom tebiye.

22 Sərum ha, Musa kə tsikakum dəsüm tay ha wawa kurom hay. Maa dazlay mäge andza niye na, bəba tətə kurom hay bəna Musa bay. Andza niye na, ka dəsawum wawa kurom hay pat i mazəzükw bo.

23 Ka dəsüm wawa pat i mazəzükw bo na, hərwi ada marəhay gər a bazlam i Mbəlom mapala eye nakə Musa a vəlakum aye. Ada na mbəl ha ndo abəra ma dəvats pat i mazəzükw bo düh na, ka gum fəgaya mevel na, hərwi mey?»

24 Kā gum sariya ka ndo tə wu nakə ka ŋgatumay tə dərə aye tsa bay. Duh gum na, ta tsəved dedek eye.»

25 Siye i ndo i Zerozelem hay, tə gwad: «Ndo nakə ta pəla məkədə na aye na, neŋgeye bədaw?»

26 Zəbum faya tey: Faya ma tsikiye me parakka mə walaŋ i ndo hay tebiye, ada ta gwaday wuray kwa tsekweŋ bay tebiye. Ma giye na, bəy kway hay tə sər neŋgeye Kəriste nakə Mbəlom a gwad ma sləraweye kəla daw?»

27 Ane tuk na, ma giye na, andza niye bay bəna Kəriste ma deyeweye na, a yaw məŋgay na, ndəray ma səriye bay. Ndo nakay a yaw məŋgay na, ka sərakwa.»

28 Andza niye, Yesu faya ma tətikateye a ndo hay mə gay i mədəslyay ha gər a Mbəlom mba, a tsik me ta magala, a gwad: «Ka sərüm ga ha azlakwa daw? Neŋ na yaw məŋgay na, ka sərüm ha. Ane tuk na, na yaw na, ka gər bo ga bay. Ndo nakə a sləra ga ahaya na, neŋgeye ndo i dedek. Nəkurom ka sərüm na bay.

29 Neŋ na, na sər na hərwi na yaw na, abəra ka təv ŋgay ada maa sləra ga ahaya na, neŋgeye.»

30 Andza niye, tə pəla tsəved məgəse na Yesu. Ane tuk na, ndəray kə gəs na bay hərwi həlay ŋgay aye kə ndisl a dəma zuk bay.

31 Ndo hay haladzay tə dzala ha ka Yesu. Tə gwad: «Ndo nakay ma giye na, Kəriste. Ndo mekeləŋ eye ma deyeweye ma giye masuwayaŋ ma ziye i ndo nakay daw?»

### *A satay a Farisa hay məgəse na Yesu*

32 Farisa hay tə tsəne wu neheye ndo hay faya ta tsikiye ka Yesu tə masasəkwe aye. Nəteye ta bagwar hay i ndo neheye tə vəlaway wu a Mbəlom hay tə haya gər, tə slər sidzew neheye ta tsəpawa gay i mədəslyay ha gər a Mbəlom aye hərwi ada tā ye, tə gəsaw Yesu.



<sup>33</sup> Yesu a ngatay andza niye na, a gwad: «Nej andaya ka tøv kurom ma mändze tsekweņ mba. Tsa na, na miye gwa ka tøv i ndo nakə a sləra ga ahaya aye.

<sup>34</sup> Ka ta pəlumeye ga ada ka ta hutumeye ga bay hərwi ka slumeye faya mede a tøv nakə nej na diye a dəma aye bay.»

<sup>35</sup> Tsa na, Yahuda hay ta tsətsah mə walaņ tay, tə gwad: «Ma diye na, a ngay nakə ada ka slakweye faya məhute na bay aye. Ma diye na, a walaņ i Yahuda neheye nəteye mandza eye mə walaņ i Gərek hay aye kəla daw? Ada ma ta tatikateye a Gərek hay kəla daw?

<sup>36</sup> Bazlam ngay niye a gwad: «Ka ta pəlumeye ga, ada ka ta hutumeye ga bay hərwi ka slumeye faya mede a tøv nakə nej na diye a dəma aye bay.» A tsik andza niye na, andza məgwede mey?»

### *Yam nakə ma vəliye sifa a ndo hay aye*

<sup>37</sup> Pat i mandəve i magurlom na, pat nakə bagwar aye. Pat eye niye Yesu a lətse, a tsik me ta magala, a gwad: «Tadə ndoweye yam a gay na, mə yaw ka tøv ga mə sa.

<sup>38</sup> Ndowneye kə dzala ha ka nej na, “yam nakə ma vəliye sifa aye ma ngəziye wad wad mə dərev ngay” andza nakə tə watsa ahəl niye mə Derewel i Mbəlom.»

<sup>39</sup> Yesu a tsik andza niye na ka Məsəfəre i Mbəlom. Ndo neheye ta dzala ha ka Yesu aye na, ta hutiyə Məsəfəre niye. Ahəl nakə Yesu a tsik andza niye na, Məsəfəre ki yaw zuk bay hərwi Yesu kə tsal a tøv nakə Mbəlom ma dəslay ha gər aye zuk bay.

### *Bazlam ki ye tay ka bo a ndo hay bay*

<sup>40</sup> Ndo hay tə tsəne bazlam i Yesu nakə a tsik aye na, siye i ndo hay tə gwad: «Ta dedek ndo nakay na, ndo mədə ha bazlam i Mbəlom nakə faya ka həbakweye aye!»

<sup>41</sup> Siye hay tə gwad: «Neņgeye na, Kəriste!» Ane tuk na, siye hay tə gwad sa: «Kəriste na, ma deyeweye abəra ka dala i Galile daw?

<sup>42</sup> Tə watsa mə Derewel i Mbəlom na, tə gwad Kəriste ma deyeweye na, abəra ma gwala i Davit ada ma Betelehem, gəma nakə Davit a ndzawa mə dəma aye.\*»

<sup>43</sup> Andza niye, bazlam a ye tay ka bo a ndo hay bay hərwi Yesu.

<sup>44</sup> Ndo siye hay a satay məgəse na Yesu. Ane tuk na, ndəray kwa nəte kə lamay bay.

### *Bagwar i Yahuda hay ta təma Yesu bay*

<sup>45</sup> Sidzew neheye ta tsəpawa gay i mədəslay ha gər a Mbəlom hay, tə maw ka tøv i bagwar hay i ndo neheye tə vəlaway wu a Mbəlom aye ta Farisa hay. Anəke tə maw na, ndo neheye ta tsətsah fataya, tə gwadatay: «Ka gəsumaw Yesu bay na, hərwi mey?»

<sup>46</sup> Sidzew matsəpe gay i mədəslay ha gər a Mbəlom niye hay ta mbədətay faya, tə gwadatay: «Ndəray kə tsik me dāda andza ndo nakay bay!»

<sup>47</sup> Farisa hay tə gwadatay: «Nəkurom dərma kə səpat kurom daw?

<sup>48</sup> Ka ngatamay a ndəray mə walaņ may bəy i Farisa hay ada mə walaņ i bəy hay i ndo neheye tə vəlaway wu a Mbəlom aye hay kə dzala ha ka ndo niye daw?

<sup>49</sup> Ane tuk na, maa dzala ha ka Yesu eye na, ndo kəriye hay, tə sər bazlam i Musa mapala eye bay. Nəteye na, Mbəlom kə vəlatay mezeleme.»

\* 7:42 Zəba ma 2 Samuyel 7.12; Dəmes hay 89.4-5; Zeremi 23.5; Mise 5.1.



<sup>50</sup> Nikodem nenḡeyeye nāte mā walaŋ i Farisa niye hay dərmaḡ. Nenḡeyeye ndo nakə a ye ka təv i Yesu ahəl niye aye. A ḡwadātay a siye i Farisa niye hay:

<sup>51</sup> «Bazlam kway mapala eye kə vələkway tsəved məḡay sariya a ndo andza niye kəriye tsa bay. Tsənakwa wu nakə ma tsikiye ada wu nakə a ge aye taday.»

<sup>52</sup> Ta mbəḡḡay faya, tə ḡwadḡay: «Nəkar na, ndo i Galile dərmaḡ ḡaw? Dzaŋḡa bazlam i Mbəlom lele taday ada ka səriye ha na, ndo məḡḡe ha bazlam i Mbəlom kwa nāte ma deyeweye abəra ma Galile bay.»

[

<sup>53</sup> Kwa way a tsəne andza niye na, a ye ḡḡway a mətḡay.

## 8

### *Ngwas nakə a ge madama aye*

<sup>1</sup> Yesu a tsal a Mahəmba i Tetəḡḡez.

<sup>2</sup> Ta mekedə pərik na, a mbəḡḡawa ḡər a ḡay i məḡəslay ha ḡər a Mbəlom. A ye naha a ndza ka dzaŋḡa. Ndo hay haladzay ti ye naha ka təv ḡḡay. Tsa na, a ḡazlay a matətikatay.

<sup>3</sup> Ahəl nakə faya ma tətikateye a ndo hay aye na, ndo məḡdzaŋḡawa bazlam i Mbəlom mapala eye ta Farisa hay tə ḡəsay naha ḡḡwas wuray tə tatsa na ka məḡe madama. Tə ḡəs naha, tə lətse ha kame i ndo hay tebiye.

<sup>4</sup> Tə ḡwadḡay a Yesu: «Miter, ḡḡwas nakay tə tatsa na na, nenḡeyeye faya ma giye madama.

<sup>5</sup> Bazlam i Musa mapala eye a ḡwad na, ka ndzumay a ḡər a slala i ḡḡwas andza nakay na, kəḡum na tə kwar. Ada nəkar ka ḡwad faya na, kəkay?»

<sup>6</sup> Tə tsikay andza niye na, məhəle faya abəra suwat hərwi ada məhute faya mənese.

Ane tuk na, Yesu a tsəne andza niye na, a rəh ḡər ḡḡay ka dala. A pa bo ka məzehe ka dala ta wur həlay.

<sup>7</sup> Ndo neheye na, nāteye ta tsətsahiye faya huya. Hərwi niye Yesu a lətse, a ḡwadātay: «Mə walaŋ kurom nakay ndo nakə ḡḡḡa kə ge mezeleme bay aye mā lahay ha məkəlay kwar taday.»

<sup>8</sup> Tsa na, Yesu a rəh ḡər ka dala sa. A ma ka məzehe ka dala.

<sup>9</sup> Tə tsəne bazlam i Yesu niye a tsikatay aye na, tə ḡəḡ nāte ta nāte. Maa lah mede na, madugula hay.

Yesu ta ḡḡwas niye tə ze naha sulo tsiy. Ngwas niye malətse eye huya kame i Yesu.

<sup>10</sup> Yesu a lətse, a ḡwadḡay: «Iḡwas nakay, ndo neheye tə ḡəsə kar ahaya na, nāteye mənḡay? Ndəray kə ḡəs kar ta sariya bay sadzək ḡaw?»

<sup>11</sup> Ngwas niye a mbəḡḡay faya, a ḡwadḡay: «A'ay bəy.»

Yesu a ḡwadḡay: «Neḡ bəbay na, sariya ḡa ma ḡəsiye kar bay. Do wu yak, ane tuk na, kə ge mezeleme sa bay.»]

### *Yesu na, dzaydzay nakə ma ḡəviye ka məndzibəra aye*

<sup>12</sup> Ma ḡəba eye na, Yesu a tsikatay a ndo hay, a ḡwadātay: «Neḡ na, dzaydzay nakə ma ḡəviye ka məndzibəra aye. Ndoweye kə peḡ bəzay na, ma ndziye ma ləvoŋ sa bay, ma hutiyeye dzaydzay, dzaydzay nakə ma vəliye sifa a ndo hay aye.»

<sup>13</sup> Farisa hay tə ḡwadḡay: «Nəkar na, bo yak eye ka həl mbal i ḡər yak eye tsa ḡaw? Bazlam yak nakə ka tsik aye na, dedək bay.»

<sup>14</sup> Yesu a mbəḡḡatay faya, a ḡwadātay: «Kwa neḡ eye na həl mbal i ḡər na, wu nakə na tsik aye na, dedək. Hərwi na sər təv nakə na yaw abəra mə ḡəma aye

ada tɔv nakə na diye a dɔma aye. Ane tuk na, nəkurom na, tɔv ga nakə na yaw abɔra mɔ dɔma aye ada tɔv nakə na diye a dɔma aye na, ka sɔrum bay.

<sup>15</sup> Nəkurom na, faya ka gumateye sariya a ndo hay na, andza i ndo i mɔndzibɔra hay. Neŋ na, na giye sariya a ndɔray tɔbey.

<sup>16</sup> Kwa tadɔ na giye sariya bɔbay na, sariya ga na giye ta tsɔved eye. Hərwi na giye sariya na, mahɔgeye bay. Nɔmaa giye na, ta Bɔba ga. Maa slɔra ga ahaya na, neŋgeye.

<sup>17</sup> Mawatsa eye mɔ bazlam kurom mapala eye na, a gwad: “Tadɔ ndo hay sulo bazlam tay kɔ ge nɔte na, wu niye na, dedek.\*”

<sup>18</sup> Andza niye, neŋ na, na tsikiye ka bo ŋgway ada Bɔba nakə a slɔra ga ahaya ma tsikiye ka neŋ.»

<sup>19</sup> Ta tsɔtsah faya, tɔ gwadɔy: «Bɔba yak eye na, mɔŋgay?»

Yesu a mbɔdatay faya, a gwadɔy: «Ka sɔrum ga ha bay ada ka sɔrum Bɔba ga bay. Tadɔ ka sɔrum neŋ na, ka sɔrumeye Bɔba ga.»

<sup>20</sup> Yesu a tsik bazlam niye hay na, ahɔl nakə faya ma tɔtikateye bazlam ŋgay a ndo hay mɔ gay i mɔdɔslay ha gɔr a Mbɔlom aye. Neŋgeye mandza eye ta tɔv nakə tɔ paw a dɔma wu kɔriye a Mbɔlom aye. Ndɔray kɔ gɔs na bay hɔrwi hɔlay ŋgay eye kɔ sla zuk bay.

<sup>21</sup> Yesu a gwadɔy sa: «Na diye gwa. Na ye na, ka pɔlumeye ga. Ane tuk na, ka mɔtumeye mɔ mezeleme kurom. Ka slumeye faya mede a tɔv nakə neŋ na diye a dɔma aye bay.»

<sup>22</sup> Yahuda hay tɔ gwad mɔ walaŋ tay: «A gwad ka slakweye mede a tɔv nakə ma diye a dɔma aye bay na, ma kɔdiye bo ŋgay kɔla daw?»

<sup>23</sup> Yesu a gwadɔy: «Nəkurom ka wum bo na, ka mɔndzibɔra. Neŋ na yaw na, mɔ mbɔlom. Nəkurom na, ndo i mɔndzibɔra hay. Ane tuk na, neŋ na, ndo i mɔndzibɔra tɔbey.

<sup>24</sup> Hərwi niye na gwadakum na: “Ka mɔtumeye mɔ mezeleme kurom.” Kɔ ge ka dzalum ha neŋ ndo nakə neŋgeye aye bay na, ta dedek ka mɔtumeye mɔ mezeleme kurom.»

<sup>25</sup> Ta tsɔtsah faya, tɔ gwadɔy: «Nɔkar na, way?»

Yesu a mbɔdatay faya, a gwadɔy: «Neŋ na, ndo nakə na tsikakum kwa ahɔl nakə na dazlay mɔtsikakum bazlam ga aye.

<sup>26</sup> Wu andaya haladzay mɔtsike ka gɔr kurom ada sariya ma gɔsiye kurom tɔ wu niye hay. Ane tuk na, ndo nakə a slɔra ga ahaya na, neŋgeye ndo i dedek ada wu nakə na tsikateye a ndo hay aye, maa tsikenj na, neŋgeye.»

<sup>27</sup> Yesu a tsikatay ka Bɔba Mbɔlom na, nɔteye ta tsɔne bay.

<sup>28</sup> Yesu a gwadɔy sa: «Ka lɔsum ga ha, ka kɔdum neŋ Wawa i Ndo na, neŋ ndo nakə neŋgeye aye ka sɔrumeye ha. Ka sɔrumeye ha wu nakə na ge aye na, ka gɔr bo ga tsa bay. Na tsik na, wu nakə Bɔba a tsikenj aye dɔkdɔk tsa.

<sup>29</sup> Ndo nakə a slɔra ga ahaya na, neŋgeye tɔ neŋ. Kɔ gɔr ga ha mahɔgeye bay hɔrwi faya na giye na, wu nakə a yay a gɔr aye.»

<sup>30</sup> Kwayanŋa ndo hay haladzay tɔ dzala ha ka Yesu hɔrwi bazlam ŋgay niye a tsik aye.

<sup>31</sup> Yesu a gwadɔy a Yahuda neheye tɔ dzala ha faya: «Ka pumay bɔzay a bazlam ga na, ka tɔrumeye gawla ga hay ta dedek.

<sup>32</sup> Andza niye ka sɔrumeye dedek. Ada ma tɔma kurom ahaya abɔra ma beke dedek.»

\* 8:17 Zɔba mɔ Bazlam mapala eye masulo eye 17.6; 19.15.

33 Tə tsəne andza niye, ta mbəḍay faya, tə gwadəy: «Nəmay na, gwala i Abraham hay ada dāḍa nəmaa təra beke hay bay. Ane tuk na, ka gwad nəmaa təmaweye abəra ma beke na, kəkay?»

34 Yesu a mbəḍatay faya, a gwadətay: «Ayaw! Sərum ha na, ndo nakə faya ma giye mezeleme aye na, neŋgeye ka təra beke i mezeleme.

35 Beke na, ma ndziye huya mə gay i ndo i gay ŋgay bay. Wawa, neŋgeye na, ma ndziye huya mə gay i bəba ŋgay.

36 Andza niye, neŋ wawa Mbəlom na təma kurom ahaya abəra ma beke na, ka tərume ye beke hay sa bay.

37 Na sər ha nəkurom na, gwala i Abraham hay. Ane tuk na, faya ka pəlume ye tsəved ka məkəde ga hərwi ka kərahum bəzlam ga.

38 Neŋ, na tsik na, wu nakə na ŋgatayaw abəra ka təv i Bəba aye. Nəkurom ka gum na, wu nakə bəba kurom a tsikakum aye.»

39 Ta mbəḍay faya, tə gwadəy: «Bəba may na, Abraham.»

Yesu a gwadətay: «Tadə nəkurom wawa i Abraham hay na, ka gumeye andza Abraham bəḍaw?

40 Neŋ, na tsikawakum na, dedək nakə na tsənew ka Mbəlom aye. Kwa mā ge andza niye bəbay na, nəkurom faya ka pəlume ye tsəved məkəde ga. Abraham na, neŋgeye kə ge andza niye təbey.

41 Nəkurom na, faya ka gumeye wu nakə bəba kurom a gawa aye.»

Tə gwadəy: «Nəmay na, madazla hay bay. Wawa neheye madazla aye hay na, ndəray a sər bəba tay hay bay. Bəba may na, Mbəlom nəte ŋgeweŋ.»

42 Yesu a gwadətay: «Tadə Mbəlom Bəba kurom na, ka wuḍume ye ga. Hərwi neŋ na, na yaw mə Mbəlom ada neŋ kənaŋ na, hərwi ŋgay. Na yaw ka gər bo ga bay, maa sləra ga ahaya na, neŋgeye.

43 Wu nakə faya na tsikiye ka tsənum bay na, hərwi mey? Ka tsənum bay na, hərwi ka slum faya matəme bəzlam ga bay.

44 «Bəba kurom na, Fakalaw ada a yakum a gər məge na, wu nakə bəba kurom a wuḍa aye. Neŋgeye ndo məkəde ndo kwa anəke bay. Neŋgeye na, a say dedək təbey hərwi dedək andaya mə neŋgeye bay. Maraw me na, wu ŋgay hərwi neŋgeye ndo i maraw me. Maraw me waray waray na, a yaw abəra na, ma neŋgeye.

45 «Ane tuk na, neŋ na, na tsik dedək. A sakum mədzele ha ka neŋ bay na, hərwi nakə na tsik dedək aye.

46 Way nakə mə walaŋ kurom ma gwadiye ka neŋ, na ge mənese na, way? Na tsikakum dedək na, ka dzalum ha faya bay na, hərwi mey?

47 Kə ge ndoweye wawa i Mbəlom na, ma pay zləm a bəzlam i Mbəlom. Nəkurom ka pumay zləm a bəzlam ga bay na, hərwi nakə nəkurom wawa i Mbəlom hay bay aye.»

### *Yesu tə Abraham*

48 Bagwar i Yahuda hay tə gwadəy a Yesu: «Nəmaa gwad nəkar ndo i Samari ada fakalaw mə bo yak na, nəmaa tsik na, dedək.»

49 Yesu a mbəḍatay faya, a gwadətay: «Fakalaw andaya mə bo ga bay. Neŋ faya na dəslyay ha gər a Bəba ga. Nəkurom na, ka wuḍum məḍəsleŋ ha gər bay.

50 Neŋ na, na dəslyay gər a bo ga bay. Duh ndo nakə a say məḍəsleŋ ha gər aye na, andaya. Mata ge sariya eye na, neŋgeye.

51 Ayaw! Sərum ha na, tadə ndoweye ka rəhay ha gər a bəzlam ga na, ma mətiye dāḍa bay.»

52 Yahuda hay tə gwadəy: «Anəke nəmaa sər ha tuk. Fakalaw andaya mə bo yak. Abraham kə mət, ada ndo məde ha bəzlam i Mbəlom hay ta mət tuk

na, ada nàkar ka gwad ndoweye ka rəhay ha gər a bazlam yak na, ma mətiye dadā bay na, kəkay?

<sup>53</sup> Nəkar na, ka ze bəba may Abraham daw? Neŋgeye na, kə mət ada ndo mède ha bazlam i Mbəlom hay ta mət dərma. Nəkar na, way?»

<sup>54</sup> Yesu a mbədatay faya, a gwadətay: «Tadə neŋ na dəslay ha gər a bo ga na, ma geŋeye ŋgama bay. Maa dəsleŋ ha gər na, Bəba ga. Neŋgeye na, ndo naka ka gwadum Mbəlom kurom aye.

<sup>55</sup> Ane tuk na, ka sərūm na bay. Neŋ na, na sər na. Tadə na gwadawa na sər na bay na, neŋ ndo i maraw me andza nəkurom. Ane tuk na, na sər na ada neŋ faya na rəhay ha gər a bazlam ŋgay.

<sup>56</sup> Mbəlom kə tsikay a bəba tate kurom Abraham ma ŋgateye a pat i madayaw ga ada Abraham na, dərev ŋgay kə ŋgwasa. Abraham a ŋgatay a pat eye na, məŋgwese kə rah a dərev ŋgay.»

<sup>57</sup> Yahuda hay tə gwadəy: «Nəkar məve kə husa məve kuro kuro zlam zuk bay tuk na, ka ŋgatayaw a Abraham aye na, məŋgay?»

<sup>58</sup> Yesu a mbədatay faya, a gwadətay: «Ayaw! Sərūm ha na, kwa ahəl nakə ta wa na Abraham zuk bay aye na, neŋ andaya.»

<sup>59</sup> Tə tsəne andza niye na, tə pala kwar, a satay məkele na Yesu. Ane tuk na, Yesu a ŋgaha bo, ada a gadaw abəra mə gay i mədəslay ha gər a Mbəlom.

## 9

### *Yesu a mbəl ha ndo wuray guluf eye*

<sup>1</sup> Pat wuray Yesu faya ma diye ka tsəved na, a ŋgatay a ndo wuray guluf eye. Tə wa na na, guluf eye.

<sup>2</sup> Gawla i Yesu hay tə ŋgatay a guluf niye na, ta tsətsah ka Yesu, tə gwadəy: «Miter, tə wa na ndo nakay guluf eye na, hərwi mezeleme ŋgay ŋgway tsukudu hərwi mezeleme i bəba ŋgay hay daw?»

<sup>3</sup> Yesu a mbədatay faya, a gwadətay: «Tə wa na guluf eye na, hərwi mezeleme ŋgay bay, ada hərwi mezeleme i bəba hay ŋgay wal bay. Neŋgeye guluf eye na, hərwi ada ndo hay tə ŋgatay a gadəŋ i Mbəlom nakə ma giye bo tə neŋgeye aye.

<sup>4</sup> Anake pat andaya mba na, kutoŋ ka gakweye məsler i ndo nakə a sləra ga ahaya aye. Mazlambar həvad ma giye. Həvad kə ge na, ndəray ma sliye faya məge məsler sa bay.

<sup>5</sup> Ahəl nakə neŋ andaya ka məndzibəra mba aye na, neŋ na, dzaydzay nakə ma dəviye ka məndzibəra aye.»

<sup>6</sup> Yesu a ndəv ha mətsike me na, a tuf slesleḅ ka dala, a həlaḅ bətekwew tsekweŋ ta slesleḅ ŋgay niye. Tsa na, a ndad, a fadəy ka dərə i guluf niye.

<sup>7</sup> A gwadəy: «Do ta bara dərə a dəlov nakə tə zalay Silowe aye.» Silowe na, andza məgwede «Masləra eye».

Guluf niye a ye. A ye naha a bara dərə ŋgay. A maw na, a ŋgatay a dərə tuk.

<sup>8</sup> Ndo i məged ŋgay hay ta ndo neheye tə ŋgataway ka tsəved faya ma rəkiye na, tə gwad: «Nakay na, ndo niye a ndzawa ka tsəved a rəkawa aye bədaw?»

<sup>9</sup> Ndo siye hay tə gwad: «Dedək, neŋgeye.»

Ndo mekeleŋ eye hay tə gwad: «A ay! Neŋgeye bay. Ane tuk na, a ndzək it bo neŋgeye.»

Ndo niye a gwadətay: «Neŋ eye dedək ŋgway.»

<sup>10</sup> Ta tsətsah faya, tə gwadəy: «Dərə yak a həndək na, ma kəkay?»

<sup>11</sup> A mbədatay faya, a gwadətay: «Ndo nakə tə zalay Yesu aye a həlaḅ bətekwew tsekweŋ, a fedəŋ ka dərə ada a gwedəŋ: “Do a dəlov i Silowe ta

bara dɛre mɛ dɛma.” Tsa na, na hɛl bo na ye. Na ye naha, na bara dɛre ga na, dɛre ga a hɛndɛk, na ŋgatay a dɛre!»

12 Ta tsɛtsah faya sa, tɛ gwadɛy: «Ndoweye niye anɛke nenɛgeye mɛnɛgay?»

A mbɛdatay faya, a gwadɛy: «Nenɛgeye ka waray na, na sɛr bay.»

13 Ma dɛba aye na, ti ye ha ndo niye dɛre ŋgay a hɛndɛk aye ka tɛv i Farisa hay.

14 Azlakwa Yesu a hɛlaɓ bɛtekwew ada a hɛndɛkay na dɛre a guluf niye na, pat i mazɛzukur bo i Yahuda hay.

15 Hɛrwi niye Farisa hay, nɛteye dɛrmak ta tsɛtsah faya, tɛ gwadɛy: «Dɛre yak a hɛndɛk sadzɛk na, ma kɛkay?»

Ndo niye a gwadɛy: «Yesu a fedɛn bɛtekwew ka dɛre ada na bara dɛre. Tsa na, na ŋgatay a dɛre tuk.»

16 Siye hay mɛ walaŋ i Farisa hay, tɛ gwadɛ: «Ndo niye a ge wu niye na, a yaw abɛra ka tɛv i Mbɛlom bay. Bazlam kway mapala eye a gwadɛ nakɛ a ge mɛsler pat i mazɛzukur bo aye. Ka rɛhay ha gɛr tɛbey.»

Ane tuk na, ndo mekelɛn eye hay mɛ walaŋ tay tɛ gwadɛ: «Ndo i mezeleme ma sliye faya mɛge slala i masuwayan nakay na, ma kɛkay?»

Mɛ walaŋ tay niye na, bazlam a ye tay ka bo bay, nɛteye mawuna eye.

17 Farisa niye hay ta tsɛtsah ka ndo niye dɛre ŋgay a hɛndɛk aye sa, tɛ gwadɛy: «Ada nɛkar ka gwadɛ ka ndo niye a hɛndɛkaka ha dɛre aye, nenɛgeye na, way?»

A mbɛdatay faya, a gwadɛy: «Nenɛgeye na, ndo mɛdɛ ha bazlam i Mbɛlom.»

18 Ndo niye a ndzawa ahɛl niye guluf eye ada anɛke dɛre ŋgay ka hɛndɛk na, bagwar i Yahuda hay ta dzala ha dedɛk bay. Hɛrwi niye tɛ zalay a bɛba ŋgay ta may ŋgay hɛrwi matsɛtsehe fataya.

19 Ta tsɛtsah fataya, tɛ gwadɛy: «Nakay na, wawa kurom dedɛk dɛw? Ka gwadɛm ka wum na guluf eye na, dedɛk dɛw? Ada anɛke a ŋgatay a dɛre na, ma kɛkay?»

20 Bɛba ta may i ndo niye ta mbɛdatay faya, tɛ gwadɛy: «Nɛmaa sɛr ha ta dedɛk nenɛgeye na, wawa may ada nɛmaa wa na guluf eye.

21 Ane tuk na, wu nakɛ a tɛra tɛ nenɛgeye ada anɛke a ŋgatay a dɛre tuk aye na, nɛmaa sɛr bay. Ndo nakɛ a hɛndɛkay na dɛre aye na, nɛmaa sɛr wal bay. Tsɛtsahum ka bo ŋgay eye. Nenɛgeye na, wawa eye sa bay, ma sliye faya mambɛdakum ka bazlam nakɛ ta tsɛtsahumeye faya aye.»

22 Tɛ tsik andza niye na, hɛrwi ta dzɛzar ta bagwar i Yahuda hay. Hɛrwi ba bagwar i Yahuda hay ta ɓar bazlam nɛte. Ndo nakɛ kɛ gwadɛ Yesu na, nenɛgeye Kɛriste na, tɛ hɛhara ahaya abɛra mɛ gay i maduwule me tay.

23 Hɛrwi niye ta mbɛday faya bay. Ane tuk na, tɛ gwadɛ: «Nenɛgeye wawa eye sa bay, tsɛtsahum ka bo ŋgay eye.»

24 Farisa hay tɛ zalay a ndo niye dɛre ŋgay a hɛndɛk aye masulo eye sa, tɛ gwadɛy: «Tsikamay dedɛk kame i Mbɛlom, hɛrwi nɛmaa sɛr ha ndo niye na, ndo i mezeleme.»

25 A mbɛdatay faya, a gwadɛy: «Nenɛgeye ndo i mezeleme, na sɛr bay, ndo i mezeleme bay na sɛr bay. Ane tuk na, wu nakɛ na sɛr aye na, haɓɛ na ndzawa na, guluf eye, anɛke na, na ŋgatay a dɛre.»

26 Ta tsɛtsah faya, tɛ gwadɛy: «Ka ŋgatay a dɛre na, a ge ka nɛkar na, kɛkay? A hɛndɛkaka ha dɛre yak na, kɛkay?»

27 A mbɛdatay faya, a gwadɛy: «Ba na tɛkɛrakum tsiy, ka wudum mɛpay zlɛm bay. A sakum matsɛne sa na, hɛrwi mey? A sakum matɛre gawla ŋgay hay dɛrmak kɛla dɛw?»

28 Tə tsəne andza niye na, tə tsadəy pələslesle. Tə gwadəy: «Gawla i ndo niye na, nəkar! Nəmay na gawla i Musa hay.

29 Nəmaa sər Mbəlom a tsikay me ahəl niye na, a Musa. Ane tuk na, ndo niye düh a yaw mənğay na, nəmaa sər na bay.»

30 Ndo niye a mbədəy faya, a gwadəy: «Wu nakə na tsəne aye na, a geŋ hərəfəbəkka! Ndo nakə a həndəkeŋ na dəre aye ka gwadəm ka sərurum təv ŋgay nakə a yaw abəra mə dəma aye bay na, kəkay!

31 Ka sərakwa ha Mbəlom na, ma pay zləm a bazlam i ndo i mezeleme hay bay. Ane tuk na, faya ma pay zləm kwa a way ka rəhay ha gər ada faya ma giye wu nakə a say aye.

32 Dada ndəray kə tsəne ta həndəkay na dəre a ndo nakə tə wa na guluf eye bay.

33 Tadə ndo nakay a yaw na, abəra ka təv i Mbəlom bay na, ma sliye faya məge wuray bay.»

34 Ta mbədəy faya, tə gwadəy: «Nəkar kwa ahəl nakə tə wa kar aye na, nəkar mə mezeleme. A saka matətikamay dərmak dəw?»

Tsa na, ta həhar na abəra mə gay i maduwule me.

35 Yesu a tsəne ta həhar na ndo niye a həndəkay na dəre aye abəra mə gay i maduwule me na, a pa bo ka mapəle na. A huta na ndo niye na, a gwadəy: «Ka dzala ha neŋ Wawa i Ndo dəw?»

36 Ndo niye a mbədəy faya a Yesu, a gwadəy: «Bəy Maduweŋ ga, Wawa i Ndo nakə a seŋ na dzaliye ha faya aye na, way. Deŋ ha tey.»

37 Yesu a mbədəy faya, a gwadəy: «Nəkar ka ŋgatay. Neŋgeye nakə faya ma tsikakeye me anəke aye.»

38 Ndo niye a gwadəy: «Bəy Maduweŋ, na dzala kar ha.» Tsa na, a dəkway gurmets a huvo a Yesu.

39 Yesu a gwad: «Na yaw ka məndzibəra na, hərwi mənğəne tay ha ndo neheye faya ta pay bəzay a Mbəlom abəra ta ndo neheye tə pay bəzay a Mbəlom bay aye. Ada ndo neheye tə ŋgatay a dəre bay aye na, ta ŋgateye a dəre, ndo neheye tə ŋgatay aye na, ta təriye guluf eye hay.»

40 Farisa niye hay ka təv ŋgay aye tə tsəne na, ta tsətsah faya, tə gwadəy: «Nəkar ka gwad nəmay na, guluf eye hay dərmak dəw?»

41 Yesu a mbədəy faya, a gwadəy: «Tadə nəkurom guluf eye hay na, həbe ka gumeye mezeleme bay. Aya ane ka gwadəm düh na, nəkurom guluf eye hay bay sa na, hərwi niye ka ndzumeye huya mə mezeleme.»

## 10

### *Ndo matsəkure təbaŋ lele eye*

1 Yesu a gwadəy sa: «Sərurum ha na, ndoweye kə fələkwa a gay i təbaŋ ta məged bay, a fələkwa ta təv mekelen eye wal na, neŋgeye məkal ada ndo mabuwe tay ha təbaŋ hay.

2 Ane tuk na, ndo nakə ma fələkwiye ta məged aye na, neŋgeye ndo matsəkure təbaŋ hay.

3 «Ndo matsəpe məged i gay i təbaŋ hay ka həndək na məged a ndo matsəkure təbaŋ hay na, ma fələkwiye a dəma. Kə fələkwa a dəma na, ma zaliye a təbaŋ ŋgay hay ta məzele. Ta tsəne məzele tay na, ma pəla tay ahaya abəra.

4 Kə pəla tay ahaya abəra tebiye na, ma ndzateye kame. Kə ndzatay kame na, ta pay bəzay hərwi tə sər bədiday ŋgay.

5 Ane tuk na, ndo nakə tə sər na bay aye na, ta pay bəzay bay. Ta pay bəzay bay na, hərwi tə sər bədiday ŋgay bay.»

<sup>6</sup> Yesu a tsikatay bazlam niye ta dzeke. Ane tuk na, wu nakə Yesu a say mət̄sike aye na, ta tsəne bay.

<sup>7</sup> Hərwi niye Yesu a gwadatay sa: «Sər̄um ha na, məged̄ i gay i təban̄ hay na, neŋ.

<sup>8</sup> Ndo neheye tə leheŋew madayaw aye nət̄eye na, məkal hay, ndo mabuwe ndo hay. Təban̄ hay ta piye zləm ka bazlam tay bay.

<sup>9</sup> Neŋ na, məged̄. Ndowne kə fələkwa tə neŋ na, na ta təmiye ha. Neŋgeye na, ma sliye faya məfələkwe a gay ada ma deyeweye abəra andza nakə a say aye. Ma ndziye na, barbarra, ma hut̄iye wu mənday.

<sup>10</sup> Məkal ma deyeweye i ŋgay na, hərwi makəle təban̄ hay, məkəde tay ha ada hərwi mənese tay dekdək tsa. Neŋ na yaw na, hərwi ada ndo hay tā huta sifa. Sifa niye ta hut̄iye na, ma ndəviye bay ka tor eye.

<sup>11</sup> «Neŋ na, ndo mət̄səkure təban̄ hay ta lele eye. Ndo mət̄səkure təban̄ ta lele eye na, neŋgeye maləva bo eye məvəle məsəfəre ŋgay hərwi təban̄ ŋgay hay.

<sup>12</sup> Ndo nakə a ge məsler hərwi suloy aye na, neŋgeye ndo mət̄səkure wu ta lele eye bay. Kə ŋgatay a kəra i pesl faya ma deyeweye ka təban̄ hay na, ma huye ma gəriye tay ha təban̄ hay. Kəra i pesl niye ma həhariye tay ha təban̄ niye hay ma gəsiye tay ha, siye hay ta hwiye kweye kweye a təv eye. A ge andza niye na, hərwi təban̄ niye na, i ŋgay bay.

<sup>13</sup> Andza niye, ndo nakə a ge məsler hərwi suloy aye na, ma gateye gər a təban̄ hay lele bay.

<sup>14</sup> «Neŋ na, ndo mət̄səkure təban̄ hay ta lele eye. Na sər̄ tay ha təban̄ ga hay, nət̄eye dərmak tə sər̄ ga ha.

<sup>15</sup> Andza nakə Bəba ga a sər̄ ga ha andza neŋ na sər̄ Bəba ga aye. Ada na vəliye məsəfəre ga hərwi təban̄ ga hay.

<sup>16</sup> Təban̄ ga mekeləŋ eye hay nət̄eye andaya ma zləget nakay bay, nət̄eye ma təv eye. Ane tuk na, kutoŋ na hayateye gər ka təv ga dərmak. Ta tsəniye na, bədiday ga. Ta dzapiye ka təv ma nət̄e eye, ndo mət̄səkure tay ha na, nət̄e dərmak.

<sup>17</sup> «Bəba ga a wuda ga. A wuda ga na, hərwi nakə neŋ na vəliye ha məsəfəre ga aye. Ada na sər̄ ha na hut̄iye na məsəfəre ga sa.

<sup>18</sup> Ndəray ma sliye faya məzle fagaya abəra məsəfəre ga ta gədan̄ bay. Mata vəle ha na, neŋ eye. Neŋ na, gədan̄ andaya məvəle ha məsəfəre ga ada gədan̄ andaya məhute na. Nakay na, wu nakə bəba ga a gwedeŋ ge aye.»

<sup>19</sup> Bagwar i Yahuda hay tə tsəne bazlam i Yesu niye a tsik andza niye na, ta ŋgəna.

<sup>20</sup> Ndo siye hay haladzay mə walaŋ tay tə gwad̄: «Ma giye na, fakalaw mə bo ŋgay! Ka pakweye zləm a bazlam i gər̄ mavuwe na, hərwi mey?»

<sup>21</sup> Ndo mekeləŋ eye hay tə gwad̄: «Ndo nakə fakalaw mə bo ŋgay aye na, ma tsikiye me andza niye bay. Ada fakalaw na, ma sliye faya məhəndəkay na dəre a guluf daw?»

### *Bagwar i Yahuda hay ta təma Yesu bay*

<sup>22</sup> Ahəl niye na, Yahuda hay tə pa magurlom i gay i mədəslyay ha gər a Mbəlom nakə tə ma ha ka mbəlom ma Zerozelem aye sa. Tə hatsawa magurlom niye na, ka məve. Tə hatsawa na, ahəl i mət̄asl. Anəke na, həlay i məhetse magurlom niye kə sla tuk.

<sup>23</sup> Pat wuray na, Yesu andaya mə magurlom niye dərmak faya ma həhaliye. Faya ma həhaliye na, mə mazambal i gay i mədəslyay ha gər a Mbəlom nakə tə zalay mazambal i Salomon̄ jaye.



<sup>24</sup> Bagwar i Yahuda hay tə lawara na Yesu, tə gwad̄ay: «Tad̄ə nəkar Kəriste na, tsikamay parakka. Nəmaa həbiye nakə ada ka tsikameye na, hus kəday?»

<sup>25</sup> Yesu a mbədatay faya, a gwadatay: «Ba na tsikakum tsiy, ane tuk na, ka dzalum ha bay. Məsler nakə faya na giye na, na ge na, ta gədan̄ i Bəba ga. Mata bəzakum ha neŋ way na, məsler nakə faya na giye.

<sup>26</sup> Ane tuk na, nəkurom ka dzalum ha bay, hərwi nəkurom na, ndo ga hay bay.

<sup>27</sup> «Ndo ga hay na, ta pay zləm a bazlam ga andza təbən̄ neheye ta pay zləm a ndo mətsəkure tay ha aye. Na sər tay ha ada nəteye ta peŋeye bəzay dərmak.

<sup>28</sup> Na vələteye sifa nakə ma ndəviye bay aye. Nəteye na, dāda ta mətiye bay ada ndəray ma sliye faya mabuwe tay ha abəra mə həlay ga bay.

<sup>29</sup> Bəba ga a vələŋ tay ha a həlay ga, neŋgeye na, bagwar eye a ze wu hay tebiye. Ada ndəray ma sliye faya mabuwe wuray abəra mə həlay i Bəba ga bay.

<sup>30</sup> Bəba tə neŋ na, nəmay nəte.»

<sup>31</sup> Bagwar i Yahuda hay tə tsəne bazlam ŋgay niye na, tə həl kwar a həlay, a satay məkədə na tə kwar sa.

<sup>32</sup> Yesu a gwadatay: «Na ge wu lele eye hay haladzay ta gədan̄ i Bəba ga ada ka ŋgatumay tə dərə kurom. Mə walaŋ i wu neheye na ge aye, a sakum məkele ga tə kwar faya aye na, wu waray?»

<sup>33</sup> Bagwar i Yahuda niye hay ta mbəday faya tə gwad̄ay: «Nəmaa kədiye kar tə kwar dūh na, hərwi məsler lele eye nakə ka giye aye bay. Nəmaa kədiye kar tə kwar na, hərwi ka tsalay ka gər a Mbəlom. Nəkar na, ndo zezən̄ tuk na, ka gwad̄ nəkar Mbəlom na, ma kəkay?»

<sup>34</sup> Yesu a mbədatay faya, a gwadatay: «Mawatsa eye mə dərəwel kurom na, Mbəlom a gwad̄: “Nəkurom mbəlom hay.\*”

<sup>35</sup> Ka sərakwa ha na, wu nakə mawatsa eye mə Dərəwel i Mbəlom aye na, ma ndziye andza niye huya. Ndo neheye a tsikatay bazlam aye tad̄ə Mbəlom a zalatay mbəlom hay aye na,

<sup>36</sup> neŋ nakə Mbəlom a zla ga ada a sləra ga ahaya ka məndzibəra aye na, na ze tay ha bədaw? Neŋ na gwad̄ neŋ Wawa i Mbəlom. Nəkurom ka gwad̄um faya na tsaleye ka gər a Mbəlom, na tsalay ka gər na, ma kəkay?

<sup>37</sup> Tad̄ə faya na giye məsler i Bəba ga bay na, ka dzalum ha ka bazlam ga nakə na tsikakumeye bay.

<sup>38</sup> Ane tuk na, tad̄ə faya na giye məsler ŋgay na, kwa ka təmum bazlam ga bay bəbay na, dzalum ha ka neŋ hərwi məsler nakə faya na giye aye hərwi ada ka sərumeye ha parakka neŋ ta Bəba ga na, nəmay nəte.»

<sup>39</sup> Tə tsəne bazlam i Yesu niye na, kwayan̄ŋa ta pəla tsəved məgəse na sa. Ane tuk na, kə təma fataya abəra.

<sup>40</sup> Ma dəba aye na, Yesu a həl bo, a ma a diye i magayam i Yurdum, magayam nakə Yuhana madzəhuḅe ndo a yam a dzəhuḅawa ndo hay a dəma aye. Yesu a ndza ŋgway mə dəma.

<sup>41</sup> Ndo hay ti ye naha ka təv ŋgay haladzay. Ti ye naha na, tə gwad̄awa: «Yuhana kə ge masuwayan̄ kwa nəte bay. Ane tuk na, wu nakə a tsik tebiye ka ndo nakay aye na, dedək.»

<sup>42</sup> Ndo hay haladzay tə dzala ha ka Yesu.

## 11

### Lazar a mət

\* 10:34 Dəmes hay 82.6.

1-2 Ndoweye andaya tə zalay Lazar. A ndzawa na, ma gəma i Betani. Malamar ngay hay Marta ta Mari tə ndzawa ma gəma eye niye. Mari na, ngwas nakə ma ta mbədiye mal ka sik i Yesu ada ma ta takadiye na ta məkwets i gər ngay aye. Pat wuray na, Lazar a dəf a dəvats.

3 Hərwi niye malamar ngay niye hay sulo eye tə slər ndo ka Yesu. Ndo niye a ye a gwadəy: «Bəy Maduweŋ, dzam yak nakə ka wuđa na haladzay aye na, dəvats a gay.»

4 Yesu a tsəne andza niye na, a gwad: «Lazar ma mətiye ta dəvats niye bay. Dəvats niye a gay na, hərwi ada ndo hay t̄a ngatay a məzlaḁ i Mbəlom ada ta zembədeŋeye a neŋ Wawa i Mbəlom dərmaŋ.»

5 Yesu na, a wuđa Marta ta malamar ngay Mari ada a wuđa Lazar.

6 Yesu a tsəne Lazar neŋgeye dəvats eye na, ki ye bəse bay. A ndza ma təv ngay niye neŋgeye mə dəma aye məhəne sulo.

7 Ma dəba i məhəne niye sulo eye na, a gwadətay a gawla ngay hay: «Takwa abəra kanan, makwa ka dala i Yahuda.»

8 Gawla ngay hay ta mbəday faya, tə gwadəy: «Eh! Miter may, kə ndza haladzay bay nakə ndo niye hay mə dəma aye a satay məkəde kar tə kwar tuk na, ada ka makweye a dəma sa na, kəkay?»

9 Yesu a gwadəy: «A dazlay ka mekedə hus a huwa na, pat a dəv dzaydzay bədaw? Tadə ndoweye ma həhaliye ta həpat na, ma ndəfiye sik bay hərwi dzaydzay i mənɔzibəra faya ma dəviye ka təv ngay.»

10 Ane tuk na, tadə ndoweye ma həhaliye ta həvad na, ma ndəfiye sik hərwi ləvoŋ zəŋzəŋ, dzaydzay andaya ka təv ngay bay.»

11 Yesu a tsikatay bazlam niye hay na, ma dəba aye a gwadəy sa: «Dzam kway Lazar na, kə ndzahəra. Ane tuk na, na diye na ta pədekiye abəra ka mənɔzehəre.»

12 Gawla ngay hay ta mbəday faya, tə gwadəy: «Bəy Maduweŋ, kə ge neŋgeye mənɔzehəre eye na, ma mbəliye.»

13 Yesu neŋgeye a say məgwede duh na, Lazar kə mət. Ane tuk na, nəteye tə dzala na, tə gwad Yesu a tsik ka mənɔzehəre nakə dedek aye.

14 Andza niye Yesu a tsikatay parakka, a gwadəy: «Lazar kə mət bay.

15 Ane tuk na, dəvats a gəs Lazar na, neŋ andaya ka təv ngay bay. Na ye bay na, hərwi kurom. A ge bo andza niye na, hərwi ada nəkurom k̄a dzalum ha ka neŋ. Hərwi niye dərev ga maŋgwasə eye. Lətsakwa, takwa ta zəbakwaw faya.»

16 Tomas ndo nakə tə zalay Mawsa aye, a gwadəy a siye i gawla i Yesu hay: «Takwa, mətakwa ka bo ta Bəy Maduweŋ kway.»

17 Yesu ta gawla ngay hay tə husa a gəma niye na, 6a Lazar kə ge məhəne fad ma tsəvay.

18 Gəma i Betani na, bəse ta Zerozelem. Ka diye abəra ma Betani a Zerozelem na, a sla kilomiter mahkar bay.

19 Yahuda hay haladzay ta ye naha mata gatayaw azekw a Marta ta Mari i mədahan i malamar tay Lazar.

20 Marta a tsəne Yesu kə ndzew, neŋgeye bəse ka tsəved faya ma deyeweye na, a lətse, a ye mata dzəgər tə Yesu. Mari neŋgeye na, mandza eye mətagay.

21 Marta a ye naha tə dzəgər tə Yesu na, a gwadəy a Yesu: «Bəy Maduweŋ ga, tadə ka ge andaya kanan na, həbe malamar ga ma mətiye bay.

22 Na sər ha kwa anəke bəbay na, wu nakə ka tsətsah aye na, Mbəlom ma vəlakeye.»

23 Yesu a mbəday faya, a gwaday: «Malar yak ma lətseweye abəra ma mədahan.»

24 Marta a mbəday faya, a gwaday: «Na sər, ahəl nakə aza məndzibəra ma ndəviye, ndo hay tebiye ta lətseweye abəra ma mədahan aye na, nengeye dərmak ma lətseweye abəra ma mədahan.»

25 Yesu a gwaday: «Nej na, ndo mətəme ha ndo abəra ma mədahan ada ndo məvəle sifa a ndo hay. Ndowe ye kə dzala ha ka nej na, kwa kə mət bəbay na, ma hutiyə a dəma sifa nakə ma ndəviye bay aye.

26 Ndo kə dzala ha ka nej na, məsəfəre ŋgay ma dziye bay. Ma ndziye ka tor eye. Ka dzala ha bədaw Marta?»

27 Marta a gwaday faya: «Ayaw Bəy Maduweŋ, na dzala nəkar na, Kəriste. Nəkar na, Wawa i Mbəlom niye tə gwad ma deyeweye ka məndzibəra aye.»

### *Yesu a tuwa*

28 Marta a tsik ka bo abəra andza niye na, a mbəda gər a mətagay mata zalayaw a malar ŋgay Mari. A ye naha a tsikay me ta suksuk eye, a gwaday: «Bəy Maduweŋ ki yaw, faya ma zalakeye. A gwadaka dara.»

29 Mari a tsəne andza niye na, kwayanŋa a lətse, a ye bəse ka təv i Yesu.

30 Azlakwa Yesu na, kə husa a gəma niye zuk bay. Nengeye huya ka təv nakə tə dzəgər ta Marta aye.

31 Ndo neheye ti ye naha a gay i Mari mata gatay azekw aye, tə ŋgatay a Mari a lətse, a yaw abəra na, tə payaw bəzay. Tə gwad ma giye na, ma diye ka tsəvay mata tuwe.

32 Mari a ye na, ka təv i Yesu. A husa ka təv nakə Yesu mə dəma aye. A ŋgatay a Yesu na, a dəkw gurmets kame ŋgay, a gwaday: «Bəy Maduweŋ, tadə ka ge andaya kanan na, ha bə malar ga ma mətiye bay.»

33 Yesu a zəba ka Mari na, faya ma tuwiye ada ndo neheye ti ye naha dziye faya ta tuwiye dərmak. Tsa na, dərev a ndalay haladzay, a mbəday ha mədzal gər.

34 A tsətsah fataya, a gwadatay: «Ka lum na na, ka waray?»

Ta mbəday faya, tə gwaday: «Bəy Maduweŋ, dara nəmaa dəkeye faya.»

35 Yesu a tuwa.

36 Ndo niye hay tə gwad: «Zəbum faya tey, a wudə Lazar haladzay!»

37 Ane tuk na, ndo siye hay mə walaŋ tay, tə gwad: «Ka həndəkay ha dəre a guluf, Lazar mə mət bay na, a sla faya məge təbədew?»

### *Yesu a mbəl ha Lazar abəra ma mədahan*

38 Dərev a ndalay a Yesu sa. A ye ka tsəvay. Tsəvay niye na, andza lar. Tə pa na mədahan i Lazar na, a lar niye. Ta dərəzl me i tsəvay niye na, ta beber bagwar eye.

39 Yesu a gwadatay: «Həndəkum faya abəra beber nakay.»

Marta malar i mədahan niye a gwaday: «Bəy Maduweŋ, kə ge ma tsəvay məhəne fad tuk na, anəke na, ma ziye bədaw?»

40 Yesu a mbəday faya, a gwaday: «Na tsikaka bədaw? Ka dzala ha ka nej na, ka ŋgateye a məzla b i Mbəlom.»

41 Ta həndək faya abəra beber niye. Ta həndək faya abəra na, Yesu a zəba dəre a mbəlom. A gwad: «Bəba ga na gaka naha sisə haladzay hərwi wu nakə na tsətsah naha fakaya na, ka tsəneŋ na.

42 Na sər ha wu nakə na tsətsahiye naha fakaya aye na, ka tsəneŋeye na huya. Na tsik wene wene aye na, hərwi ndo neheye kanan ka təv ga aye, tə dzala ha maa sləra ga ahaya na, nəkar.»

<sup>43</sup> A tsikay naha a Mbəlom andza niye na, a zalay a Lazar ta magala, a gwad: «Ndohwaw abəra.»

<sup>44</sup> Tsa na, Lazar a ndohwaw abəra. A ndohway na, tə peteked niye tə pa na ka bo a tsəvay aye tebiye. Həlay tə sik ŋgay hay mambəkwa eye ada gər ŋgay mambəkwa eye dərmak.

Yesu a gwadatay: «Pəlum faya abəra peteked niye ada kə gərurum ha m̄a ye ŋgway.»

*Bagwar i Yahuda hay ta pəla tsəved ka məkədə na Yesu  
Mata 26.1-5; Markus 14.1-2; Luka 22.1-2*

<sup>45</sup> Ndo neheye ta ye mata gayaw azekw a Mari ada ta ŋgatay a masuwayan niye Yesu a ge aye na, ndo hay haladzay ta dzala ha ka Yesu.

<sup>46</sup> Ane tuk na, ndo siye hay ti ye ka təv i Farisa hay. Ti ye naha ta təkəratay wu nakə Yesu a ge aye.

<sup>47</sup> Bagwar hay i ndo neheye tə vəlaway wu a Mbəlom hay ta Farisa hay tə hayay gər a bagwar i Yahuda hay tebiye. Tə haya gər na, tə gwad: «Ndo nakay na, faya ma giye masuwayan hay haladzay huya. Ka gakweye ha na, kəkay?»

<sup>48</sup> Tadə ka gərakwa ha andza niye na, ndo hay tebiye ta dzaliye ha faya. Ndo hay tebiye ta pay bəzay na, ndo i Roma hay ta deyeweye ta mbəzliye ha gay i mədəslay ha gər a Mbəlom ada ta bəbazliye tay ha ndo kway hay.»

<sup>49</sup> Ndowne andaya mə walaŋ tay, məzele ŋgay Kayif. Bəy i bagwar i ndo məvəlaway wu a Mbəlom ka viye aye niye na, neŋgeye. A gwadatay: «Ka sərurum wuray kwa tsekweŋ bay.

<sup>50</sup> ŋgama ndo nətə m̄a mət hərwi ndo hay tebiye tə bəmalə nakə ndo kway hay tebiye ta dziye aye.»

<sup>51</sup> Wu nakə a tsik aye na, a yaw abəra ma mədza gər ŋgay bay. Ka viye eye niye na, neŋgeye bagwar i ndo məvəlaway wu a Mbəlom. Hərwi niye Mbəlom a vəlay gədaŋ mətsike ka wu nakə ma giye bo kame aye, Yesu ma mətiye hərwi Yahuda hay tebiye.

<sup>52</sup> Ane tuk na, ma mətiye na, hərwi Yahuda hay dəkdək bay. Ma mətiye hərwi ndo i Mbəlom neheye kweye kweye ka mändzibəra tebiye dərmak aye, hərwi ada m̄a həla tay ahaya tebiye t̄a ndza ka təv eye nətə.

<sup>53</sup> Hərwi bazlam i Kayif niye a tsik aye na, pat eye niye ta dazlay mapəle tsəved ka məkədə na Yesu.

<sup>54</sup> Hərwi niye Yesu a həhalawa na, a bəzawa ha bo parakka mə walaŋ i Yahuda hay sa bay. Ane tuk na, a ye ŋgway dərən a gəma wuray tə zalay Efrayim. Gəma niye na, bəse tə kəsaf. Tə ndza mə dəma ta gawla ŋgay hay.

<sup>55</sup> Magurlom i Yahuda hay nakə tə zalay Pak aye mazlambar kə ndzew. Ndo hay haladzay ti yaw abəra ma gəma hay wal wal, ti ye a Zerozelem. Ti ye na, magurlom niye kə sla zuk bay. Ti ye hərwi ada t̄a bara bo andza i kule tay nakə a tsik aye.

<sup>56</sup> Ahəl nakə nətəye mə dəma aye na, ta pəla Yesu. Ta tsətsah ka bo mə walaŋ tay ma gay i mədəslay ha gər a Mbəlom niye, tə gwad: «Ma deyeweye a magurlom bədaw? Ka dzalum na, kəkay?»

<sup>57</sup> Tə tsik andza niye na, hərwi bagwar hay i ndo neheye tə vəlaway wu a Mbəlom aye ta Farisa hay tə gwad: «Ndowne kə sər təv i Yesu nakə neŋgeye mə dəma aye na, m̄a datay ha hərwi ada ta diye faya ta gəsiye na.»

## 12

*Mari a mbəda mal ka sik i Yesu  
Mata 26.6-13; Markus 14.3-9*

<sup>1</sup> Məhetse i magurlom i Pak a zəkaw məhəne məkwa na, Yesu a mbəda gər, a ye a gəma i Betani. Betani na, gəma nakə Lazar mandza eye mə dəma aye. Lazar na, ndo nakə Yesu a mbəl ha abəra ma mədahaŋ aye.

<sup>2</sup> Yesu a husa naha a Betani na, tə day wu mənday. Marta na, neŋgeye faya ma vəleye wu mənday a Yesu. Lazar na, neŋgeye mə walaŋ i ndo neheye tə nda wu mənday dziye tə Yesu aye.

<sup>3</sup> Ahəl nakə faya ta ndiye wu mənday aye na, Mari a zla dos maraha eye tə mal nakə a ze huŋŋa aye. Mal niye na, tsakala eye haladzay. Mal niye na, tə ge ta dərizl i gərdaf aye andaya tə zalay *nardi*. A zla mal niye, a mbəda ka sik i Yesu. A takad na mal niye ta məkwets i gər ŋgay. Məze i mal niye huŋŋa eye a rah a gay niye nəteye mə dəma aye.

<sup>4</sup> Yudas Iskariyot na, neŋgeye nəte mə walaŋ i gawla i Yesu hay, neŋgeye ma ta giye daf ka Yesu. A ŋgatay a mal niye Mari a mbəda ka sik i Yesu aye na, a gwad:

<sup>5</sup> «Ass! Ta səkəm ha mal niye bay na, hərwi mey? Həbe ta səkəm ha na, ka hutakweye ha suloy haladzay segey? Ada dala eye na, ta sliye məvəlatay a mətawak hay bədafw!»

<sup>6</sup> A tsik andza niye na, hərwi neŋgeye məkal. Maa gəsa ha dala na, neŋgeye. Ane tuk na, a həlawa faya abəra ka dala aye niye. A dzala andza niye na, ka mətawak hay dəkdək bay.

<sup>7</sup> Yesu a gwaday: «Gər ha ŋgwas nakay na, səfek. A ge andza niye na, hərwi neŋgeye a ge fagaya na, wu nakə ta zliye ga ha a bədf aye.

<sup>8</sup> Ndo i mətawak hay na, nəteye ka təv kurom huya. Ane tuk na, neŋ na, na ndziye tə nəkurom huya bay.»

### *A satay a bagwar i Yahuda hay məkəde Lazar*

<sup>9</sup> Yahuda hay haladzay tə tsəne Yesu neŋgeye ma Betani na, tə həl bo ti ye. Ti ye na, ka təv i Yesu dəkdək bay. Ti ye na, a satay məŋgatay a Lazar nakə Yesu a mbəl abəra ma mədahaŋ aye.

<sup>10</sup> Hərwi niye bagwar hay i ndo neheye tə vəlaway wu a Mbəlom aye tə haya gər hərwi a satay məkəde na Lazar dərmak.

<sup>11</sup> A satay məkəde na Lazar na, hərwi ndo hay haladzay tə patay bəzay sa bay, tə dzala ha ka Yesu hərwi ŋgay.

### *Yesu a ye a Zerozelem*

#### *Mata 21.1-11; Markus 11.1-11; Luka 19.28-40*

<sup>12</sup> Tədcə eye na, ndo neheye haladzay ti ye naha a magurlom i Pak aye na, tə tsəne Yesu faya ma diye naha a Zerozelem dərmak.

<sup>13</sup> Ti ye tə dəsaw hawal i gərdaf wuray a ndzəkit bo təbah məgəse ha mə həlay. Ti ye mata dzəgər tə Yesu ka tsəved. Ahəl nakə faya ta diye na, ta wuda, tə gwad: «Zambadəkway a Mbəlom! Mbəlom mâ pa ŋgama ka ndo nakə faya ma deyeweye ta məzele i Bəy Maduweŋ aye! Mbəlom mâ pa ŋgama ka Bəy i Israyel hay!»

<sup>14</sup> Yesu a ŋgatay a zungo wuray na, a ndza faya andza nakə mawatsa eye mə Derewel i Mbəlom, Mbəlom a gwad:

<sup>15</sup> «Nəkar gəma i Zerozelem, kâ dzədzar bay!

Zəba, bəy yak faya ma diye naha

mandza eye ka zungo wawa eye.\* »

<sup>16</sup> Ahəl niye na, gawla i Yesu hay tə sər bazlam niye a tsik ka Yesu na, tə sər zuk bay. Ahəl nakə Mbəlom a bəz ha məzlaḅ i Yesu, a matayaw a gər aye na,

\* 12:15 Zakari 9.9.

bazlam i Mbəlom kə tsik faya andza niye dedək ada ndo hay tə ge andza niye dərma.

17 Ahəl nakə Yesu a zalay naha a Lazar a tsəvay, a mbəl ha abəra ma mədahan aye na, ndo hay andaya haladzay ka təv eye niye. Ndo niye hay ta təkər wu nakə tə ɲgatay Yesu a ge aye a ndo hay.

18 Hərwi niye ndo hay haladzay ti ye mata dzəgər tə Yesu. Ndo niye hay tə tsəne Yesu na, kə ge masuwayan niye.

19 Farisa hay tə ɲgatay andza niye na, tə tsik mə walaɲ tay, tə gwad: «Zəbum kwa, wu nakə faya ka gakweye tebiye na, ma gakweye ɲgama bay! Ndo hay tebiye ta pay bəzay.»

### *Gərek wuray hay ta pəla Yesu*

20 Ahəl nakə ndo hay ti ye a magurlom i Pak mata dəslay ha gər a Mbəlom aye na, Gərek hay andaya mə walaɲ tay.

21 Gərek niye hay ti ye ka təv i Filip. Filip neɲgeye ndo i gəma i Betesayda ka dala i Galile. Ti ye naha tə gwaday a Filip: «ɲgalaka, a samay məɲgatay a Yesu tey.»

22 Filip a tsəne na, a ye a tsikay a Aɲdərə. Tsa na, ti ye tə tsikay a Yesu.

23 Yesu a gwadatay: «Həlay eye kə sla anəke tuk, Mbəlom ma datay ha məzlaḅ ga i neɲ Wawa i Ndo, a ndo hay.»

24 Yesu a gwadatay sa: «Sərum ha na, ta sləga hulfe i wu nəte a bəd bay na, ma ndziye andza niye ma səkahiye bay. Tadə ta sləga na, ma ndzohwiye. Nakay a ndzohwaw abəra aye na, ma gəliye ada ma giye wur haladzay.

25 Ndowne ka wuda sifa ɲgay na, ma dziye ha dūh. Ndowne ka karah məgay gər a sifa ɲgay hərwi ga na, ma hutiyə sifa nakə ma ndəviye bay aye.

26 Tadə kə say a ndoweye məgeɲ məsler na, mā peɲ bəzay. Andza niye ndo i məsler ga na, ma ndziye ka təv nakə neɲ na ndziye mə dəma aye dərma. Ndo nakə ma geɲeye məsler aye na, Bəba ga ma dəslay ha gər.»

### *Yesu a da ha məməte ɲgay*

27 Yesu a gwadatay sa: «Anəke na, dərəv ki ye fagaya abəra. Ada na gwadiye na, kəkay? Na gwadeye a Bəba: “Bəba ga, zla fagaya abəra dərətsətseh nakay tey” na, na tsikiye daw? A’ay! Na tsikiye andza niye bay, hərwi na yaw ka mändzibəra na, hərwi ada nā sa dərətsətseh nakay.

28 Na gwadiye dūh na, Bəba, ge wu nakə ndo hay ta səriye na na, nəkar bagwar eye.»

A tsik andza niye na, mətsike me a tsənew abəra mə mbəlom, a gwad: «Ba na mbərəm məda ha məzlaḅ ga nakə ndo hay ta dəsleɲeye ha gər aye ada na dətay ha məzlaḅ ga sa.»

29 Ndo neheye nəteye haladzay ka təv eye niye, tə tsəne mətsike me niye a tsənew mə mbəlom aye, tə gwad: «Maa ləv na, maləve i mbəlom.»

Siye hay tə gwad: «Maa tsikayaw me na, gawla i Mbəlom!»

30 Ane tuk na, Yesu a mbədətay faya, a gwadatay: «Mətsike me nakay a tsənew mə mbəlom aye na, hərwi kurom bəna hərwi ga bay.

31 Nakay na, həlay nakə Mbəlom ma gateye sariya a ndo hay aye tuk. Anəke na, Mbəlom ma həhariye na bəy i mändzibəra nakay.

32 Neɲ na, ta gəsiye ga, ta dariye ga ka mayako mazləlmbadā eye, ta lətsiye ga ha ka bo ka mbəlom. Ta lətse ga ha na, na zalateye a ndo hay tebiye tā yaw ka təv ga.»

33 Yesu a tsik andza niye na, ka məməte ɲgay. Ma ta mətiye kəkay na, a da ha neɲgeye.

<sup>34</sup> Ndo hay tə gwadáy: «Mə dərəwel i Mbəlom na, tə watsa, tə gwad: “Kəriste na, ma ndziye na, huya.” Ada ka gwadiye Wawa i Ndo na, ta ta dariye na ka mayako na, ma kəkay? Wawa i Ndo na, way?»

<sup>35</sup> Yesu a gwadatay: «Anəke na, dzaydzay andaya mə walaŋ kurom. Ane tuk na, ma ndziye na, tsekweŋ tsa. Ahəl nakə dzaydzay andaya mba aye na, dum kame hərwi ada ləvoŋ mâ ndzakum a gər həf bay. Hərwi ndo nakə faya ma diye ma ləvoŋ aye na, a sər təv nakə ma diye a dəma aye bay.

<sup>36</sup> Ahəl nakə dzaydzay niye faya ma dəviye na, dzalum ha faya hərwi ada kâ tərüm ndo i dzaydzay hay.»

Yesu a tsik bazlam niye andza niye na, a ye a ŋgaha bo abəra ka nəteye.

### *Yahuda hay haladzay ta dzala ha ka Yesu bay*

<sup>37</sup> Kwa tadə kə ge masuwayaŋ haladzay ka dərə tay bəbay na, Yahuda hay haladzay ta dzala ha faya bay.

<sup>38</sup> Wu nakay a ge andza niye na, hərwi ada wu nakə Ezay ndo mədə ha bazlam i Mbəlom a tsik ahəl niye mâ ge bo. A gwad:

«Bəy Maduweŋ, maa təma bazlam yak nakə nəmaa dā ha aye na, way?

Bəy Maduweŋ, ka bəzay ha gədaŋ yak na, a way?»<sup>†</sup>

<sup>39</sup> Hərwi niye ndo hay tə dzala ha ka Yesu bay na, hərwi mey? Ezay a gwad:

<sup>40</sup> «Mbəlom ka təra tay ha guluf eye hay,  
ka dərəzlatay ka metsehe tay.

A satay mənŋgatay tə dərə bay,

a satay məsəre tə metsehe tay bay.

Tadə a satay mambədə ha mede tay na,

na təmiye tay ha dərma.<sup>‡</sup>»

<sup>41</sup> Ezay a tsik wu niye na, hərwi neŋgeye kə ŋgatay a məzla6 i Yesu ada a tsikawa faya. §

<sup>42</sup> Kwa Ezay kə tsik andza niye bəbay na, baŋwar i Yahuda hay haladzay ta dzala ha ka Yesu. Ane tuk na, tə dzala ha ka Yesu na, ta məkal. Ta dā ha bay hərwi ta dzədzaray a Farisa hay. Ta dzədzar na, hərwi ta həhariye tay abəra mə gay i mađuwule me tay.

<sup>43</sup> A satay na, ndo tā zambadətay, duh Mbəlom mâ zambadətay bay.

### *Wu nakə Yesu a tsik aye na, ma gəsiye ndo hay a sariya*

<sup>44</sup> Ma dəba eye na, Yesu a wuda kələrə, a gwad:

«Ndowneyə kə dzala ha ka neŋ na, ta dedək a dzala ha ka neŋ bay. Ane tuk na, a dzala ha na, ka ndo nakə a sləra ga ahaya aye.

<sup>45</sup> Ndowneyə kə ŋgeteŋ na, a ŋgatay a ndo nakə a sləra ga ahaya aye.

<sup>46</sup> Neŋ na, na yaw ka məndzibəra andza dzaydzay nakə a dəv aye, hərwi ada kwa way kə dzala ha ka neŋ na, ma ndziye ma ləvoŋ sa bay.

<sup>47</sup> «Tadə ndowneyə kə tsəne bazlam nakay ada kə pay bəzay bay na, mata gay sariya na, neŋ bay. Hərwi neŋ na yaw ka məndzibəra na, mata gatay sariya a ndo hay bay, ane tuk na, hərwi mətəme tay ha.

<sup>48</sup> Tadə ndowneyə ka təma ga bay ada ka kərəh bazlam ga na, sariya ma ta gəsiye na. Sariya ma ta gəsiye na pat nakə məndzibəra ma ndəviye na, hərwi a kərəh bazlam ga.

<sup>49</sup> «Andza niye, bazlam nakay na tsik aye na, na tsik ta mədzal gər ga bay. Ane tuk na, maa gwedeŋ tsik nakay na, Bəba ga nakə a sləra ga ahaya aye.

<sup>50</sup> Ada na sər wu nakə a gwedeŋ aye na, ma vəliye sifa nakə ma ndəviye bay a ndo hay. Andza niye wu nakə na tsikiye aye na, na tsik na, andza nakə Bəba ga a gwedeŋ tsik aye.»



## 13

*Yesu a bara sik i gawla ngay hay*

<sup>1</sup> Həlay i magurlom i Pak mazlambar kə husaw a dəma. Yawa! Yesu a sər həlay ngay nakə ma diye abəra ka məndzibəra aye kə sla. Ma miye ngway ka təv i Bəba ngay. Yesu a wuda ndo ngay neheye ka məndzibəra aye huya. Anəke Yesu ka bəzatay ha na, a wuda tay ha tə dərev ngay peteh.

<sup>2</sup> Pat eye niye ta huwa na, Yesu ta gawla ngay faya ta ndiye daf. Ba Fakalaw ka mbərəm məvəlay bazlam a Yudas wawa i Simon İskariyot hərwi ada mə ge daf ka Yesu.

<sup>3</sup> Yesu a sər ha Bəba ngay kə vəlay gədan ka mələve wu hay tebiye. Yesu a sər ha neŋgeye a yaw abəra ka təv i Mbəlom ada ma miye na, ka təv i Mbəlom.

<sup>4</sup> Hərwi niye Yesu a gər ha mənde wu mənday, a lətse. A tsəkw ka bo abəra peteked. A ye naha a zla peteked i matekede yam abəra ka bo, a bar ha bəzay i hud.

<sup>5</sup> Ma dəba aye na, a mbədə yam a gandayah. Tsa na, a dazlay məbere tay na sik a gawla ngay hay. A ndəv ha məbere tay na sik na, a pəla haya peteked matekede yam niye abəra mə bəzay i hud, a takad yam abəra ka sik.

<sup>6</sup> A ndisl ka təv i Simon Piyer na, Simon Piyer a gwaday: «Bəy Maduweŋ, mata berəŋ na sik dūh na, nəkar dāw?»

<sup>7</sup> Yesu a mbədəy faya, a gwaday: «Wu nakə faya na giye anəke aye na, ka səriye bay, ane tuk na, ka səriye mba.»

<sup>8</sup> Piyer a gwaday: «A'ay! Ka ta berəŋeye na sik dāda bay.»

Yesu a mbədəy faya, a gwaday: «Tadə na baraka na sik bay na, ka dzapam-eye nəte tə nəkar sa bay.»

<sup>9</sup> Simon Piyer a tsəne andza niye na, a gwaday: «Bəy Maduweŋ, kə berəŋ na sik dəkdek tsa bay. Berəŋ na həlay ga hay ta gər ga dərmak.»

<sup>10</sup> Yesu a gwaday: «Ndo nakə kə bara na bo ngay aye na, ndəluḅ andaya ka bo ngay bay. Ma bariye bo sa bay. Ma bariye na, sik dəkdek tsa. Nəkurom, ndəluḅ andaya fakuma bay, nəkurom tsədanja. Ane tuk na, ndo nəte na, ndəluḅ faya.»

<sup>11</sup> Yesu a sər ndo nakə ma ta giye faya daf aye. Hərwi niye a gwad nəteye tebiye mabara eye hay bay.

<sup>12</sup> A ndəv ha məbaratay na sik na, a zla peteked ngay a ma ha ka bo. A ye, a ma ka təv mənde daf tay niye, a ndza. Tsa na, a gwadatay: «Ka sərūm wu nakə na gakum aye dāw?»

<sup>13</sup> Nəkurom faya ka zaluməŋeye “ndo mədzeŋge ndo” ada “Bəy Maduweŋ”. Ka tsikum andza niye na, lele dedek. Neŋ na, andza niye dedek.

<sup>14</sup> Neŋ dūh ndo mədzeŋge ndo ada Bəy Maduweŋ, na barakum na sik, nəkurom dərmak kutoŋ barum sik kurom hay a bo nəte nəte mə walaŋ kurom.

<sup>15</sup> Na bəzakum ha wu nakə ka gumeye hərwi ada nəkurom dərmak kə gum a bo mə walaŋ kurom andza nakə neŋ na ge aye.

<sup>16</sup> Ayaw! Sərūm ha na, ndo i məsler ma ziye ha ndo i gay ngay bay, ada ndo i məsler na, ma ziye ha ndo nakə a slər na aye bay.

<sup>17</sup> Anəke na, ka sərūmeye ha tuk. Tadə ka gum ha məsler tə wu neheye na, ka hutumeye məŋgwese.

<sup>18</sup> «Na tsik na, ka nəkurom tebiye kurom aye bay. Neŋ na, na sər ndo neheye na pala tay aye. Ane tuk na, bazlam nakə tə watsa mə Derewel i Mbəlom aye

na, ma giye bo andza nakə tə watsa aye. Mawatsa eye na, a gwad: “Ndo nakə nəmaa nda daf salamay aye na, ka təra ndo mənə dəre ga.\*”

<sup>19</sup> Na tsikakum ka bo abəra anəke na, hərwi ada wu nakay aza kə husaw na, ka dzalumeye ha neŋ na, neŋ.

<sup>20</sup> «Neŋ faya na tsikakumeye parakka: Sərum ha, ndoweye ka təma ndo nakə neŋ na slər ha aye na, a təma na, neŋ dərma. Ada ndo nakə ka təma ga aye na, a təma na, ndo nakə a sləra ga ahaya aye.»

*Ndo mäge daf ka Yesu*

*Mata 26.20-25; Markus 14.17-21; Luka 22.21-23*

<sup>21</sup> Ma dəba i bazlam niye Yesu a tsik aye na, dərev ŋgay a ye faya abəra. A tsikatay parakka, a gwadətay: «Neŋ faya na gwadəkumeye: Sərum ha na, ndo nəte mə walaŋ kurom ma giye fagaya daf.»

<sup>22</sup> Gawla ŋgay hay tə tsəne andza niye na, tə ma ha ka bo dəre mə walaŋ tay tebiye. Ane tuk na, Yesu a tsik ka way na, tə sər kwa tsekweŋ bay tebiye.

<sup>23</sup> Ndo nəte mə walaŋ i gawla i Yesu hay, ndo nakə Yesu a wuda na haladzay aye, neŋgeye mandza eye ka təv i Yesu.

<sup>24</sup> Simoŋ Piyer a gay naha mbətsekw tə dəre hərwi ada mâ tsətsah ka Yesu, a tsik andza niye na, ka way.

<sup>25</sup> Mandərkwasla i Yesu niye a həndzəd naha gər ka təv i Yesu, a tsətsah faya, a gwadətay: «Bəy Maduweŋ, ka tsik na, ka way?»

<sup>26</sup> Yesu a mbədəy faya, a gwadətay: «Na dəsiye peŋ ada na giye faya ala. Ndo nakə na vəlay aye na, mata ge fagaya daf na, neŋgeye.» Tsa na, Yesu a dəs peŋ, a ge faya ala, a vəlay a Yudas wawa i Simoŋ Iskariyot.

<sup>27</sup> Yudas a təma peŋ niye na, kwayaŋŋa Fakalaw a yay a mədzał gər. Yesu a gwadətay: «Wu nakə ka giye na, ge na anəke bəse!»

<sup>28</sup> Ndo neheye nəteye mandza eye tage Yesu aye, Yesu a tsik andza niye hərwi mey na, ndəray kwa nəte mə walaŋ tay niye a sər bay.

<sup>29</sup> Yudas na, neŋgeye ndo mäge se suloy. Hərwi niye siye i gawla i Yesu hay tə dzala na, Yesu a gwadətay mâ ye mata səkəmakwayaw wu məndəy hərwi magurloḿ i Pak. Kəgəbay a gwadətay mâ ye mâ vəlatay wu a mətawak hay.

<sup>30</sup> Ahəl nakə Yudas a təma peŋ niye na, kwayaŋŋa a yaw abəra. Niye na, ta həvad.

*Bazlam mapala eye wədəye*

<sup>31</sup> Ma dəba eye Yudas a yaw abəra na, Yesu a gwad: «Anəke na, məzlaḅ ga i Wawa i Ndo ma bəziye parakka ada ndo hay ta ŋgateye a məzlaḅ i Mbəloḿ hərwi ga dərma.

<sup>32</sup> Na bəzatay ha məzlaḅ i Mbəloḿ a ndo hay, Mbəloḿ dərma ma bəzatay ha məzlaḅ i wawa ŋgay a ndo hay tə wu nakə faya ma giye aye. Ma giye mahonok mabəzatay ha bay.

<sup>33</sup> Wawa ga hay, na ndziye tə nəkurom haladzay sa bay. Na ye fakuma abəra na, ka pəlumeye ga. Ane tuk na, wu nakə na tsikatay a baḡwar i Yahuda hay aye na, na tsikakumeye anəke. “Təv nakə neŋ na diye a dəma aye na, ka slumeye faya mede a dəma bay.”

<sup>34</sup> Na tsikakumeye bazlam mapala eye wədəye. Bazlam mapala eye wədəye na, waray? Wuḍum bo nəte nəte mə walaŋ kurom. Andza neŋ nakə na wuda kurom aye na, kutoŋ wuḍum bo nəte nəte mə walaŋ kurom dərma.

<sup>35</sup> Taḍə ka wuḍum bo nəte nəte mə walaŋ kurom na, ndo hay tebiye ta səriye ha nəkurom gawla ga hay.»

\* 13:18 Dəmes hay 41.10.

*Piyer ma gwadfiye: «Na sər Yesu bay»*

*Mata 26.31-35; Markus 14.27-31; Luka 22.31-34*

<sup>36</sup> Simon Piyer a tsatsah faya, a gwaday: «Bəy Maduwen, ka diye na, a ηgay?»

Yesu a mbəday faya, a gwaday: «Anəke na, ka sliye faya məpeη bəzay a təv nakə na diye a dəma aye bay. Ane tuk na, həlay eye ma slaweye aza ka peηeye bəzay.»

<sup>37</sup> Piyer a gwaday: «Bəy Maduwen, na sliye faya məpaka bəzay anəke bay na, hərwi mey? Neη maləva bo eye məvəle ha məsəfəre ga hərwi yak.»

<sup>38</sup> Yesu a mbəday faya, a gwaday: «Nəkar maləva bo məvəle ha məsəfəre yak hərwi ga ta dedek ηgway daw? Na tsikakeye parakka, sər ha na, dzagulok ma ta zlahiye na, 6a ka gwad sik mahkar ka sər neη bay.»

## 14

*Yesu na, tsəved i ndo hay mede a Mbəlom*

<sup>1</sup> Yesu a gwadatay a gawla ηgay hay: «Dərev mā ye fakuma abəra bay. Dzalum ha ka Mbəlom ada dzalum ha ka neη dərmaκ.

<sup>2</sup> Gay hay andaya haladzay mə gay i Bəba ga. Tadə təv andaya bay na, haβe na gwadəkumeye bədaw? Na diye na ta lambadəkumeye təv nakə ka ta ndzumeye mə dəma aye.

<sup>3</sup> Na ye, na lambadəkumaw təv na, na maweye mata həle kurom ka təv ga, hərwi ada nəkurom dərmaκ ka ndzumeye ma təv nakə neη mə dəma aye.

<sup>4</sup> Nəkurom na, ka sərurum tsəved nakə a ye a təv nakə na diye a dəma aye.»

<sup>5</sup> Tomas a gwaday: «Bəy ga, təv nakə ka diye a dəma aye na, nəmaa sər bay. Nəmaa sliye faya məsəre tsəved niye na, ma kəkay?»

<sup>6</sup> Yesu a mbəday faya, a gwaday: «Neη na, tsəved, dedek ada sifa. Ndowneye ki yaw ta təv ga bay na, ma sliye faya mede ka təv i Bəba ga bay.

<sup>7</sup> Tadə ka sərurum neη na, ka sərurumeye Bəba ga dərmaκ. Kwa anəke ka sərurum na ka ηgatamay.»

<sup>8</sup> Filip a gwaday: «Bəy ga, damay ka Bəba yak tsa na, tsiy dā may.»

<sup>9</sup> Yesu a mbəday faya, a gwaday: «Na ndza ka təv kurom na, haladzay ada ka sər ga ha bay ηgway huya daw Filip? Ndowneye kə ηgeteη a neη na, a ηgatay na, a Bəba ga. Ada ka gwad: “Damay ka Bəba yak” na, hərwi mey?

<sup>10</sup> Neη ta Bəba ga, nəmay mandza eye nəte na, ka dzala ha təbədew? Bazlam neheye na tsikawakum a nəkurom tebiye na, ti yaw abəra mə neη dekdek bay. Na tsik na, i Bəba ga nakə nəmay mandza eye nəte aye. Maa ge məsler mə neη na, neηgeye.

<sup>11</sup> Tadə na gwadəkum: “Neη ta Bəba, Bəba ga tə neη, nəmay nəte” na, dzalum ha faya. Dzalum ha ka məsler neheye na gawa aye kwa.

<sup>12</sup> «Ayaw! Neη faya na gwadəkumeye: Sərurum ha na, ndowneye kə dzala ha ka neη na, ma giye məsler neheye neη faya na giye dərmaκ. Ma ta giye na, ma ziye neheye anəke aye, hərwi neη na, na diye ka təv i Bəba ga.

<sup>13</sup> Ka tsətsahum kwa mey ta məzele ga na, na gakumeye na tebiye, hərwi ada neη Wawa i Mbəlom nā bəz ha məzlaβ i Bəba.

<sup>14</sup> Ka tsətsahum kwa mey ta məzele ga na, na vələkumeye.»

*Yesu a gwad ma sləraweye Məsəfəre Tsədanηa eye*

<sup>15</sup> Yesu a gwadatay sa: «Tadə ka wudum ga na, ka rəhumeye ha gər a bazlam ga mapala eye.

<sup>16</sup> Neη, na geye amboh a Bəba ga mā slərakumaw ndo mekeleη mā dzəna kurom hərwi ada mā ndza huya ka təv kurom.

<sup>17</sup> Ma slarakumaweye na, Məsəfəre nakə ma dəkumeye ha dedek aye. Məndzibəra na, ma sliye faya məhute təbey hərwi kə ngatay bay, ma səriye na bay sa. Nəkurom na, ka sərumeye hərwi ma ndziye na, ka təv kurom ada ma ndziye huya mə nəkurom.

<sup>18</sup> Hərwi niye, na gəriye kurom ha mahəkuromeye andza wur mətawak hay bay. Na maweye ka təv kurom.

<sup>19</sup> Ma məndze tsekweŋ na, ndo i məndzibəra hay ta ngeteŋeye sa bay. Nəkurom na, ka ta ngatumeŋeye hərwi neŋ na ndziye ta sifa ga huya ada nəkurom dərmak ka ndzumeye ma sifa huya.

<sup>20</sup> Pat eye niye na, ka sərumeye neŋ madzapa eye ta Bəba ga, nəkurom madzapa eye tə neŋ ada neŋ madzapa eye tə nəkurom.

<sup>21</sup> «Ndowneye kə pa na bazlam ga mapala eye a gər, ada ka rəhay ha gər na, neŋeye na, a wuda ga. Bəba ga ma wudiyə na ndo nakə a wuda ga aye, neŋ dərmak na wudiyə na ada na bəzay ha bo ga.»

<sup>22</sup> Gawla i Yesu andaya məzele ŋgay Yuda. Neŋeye na, Yudas Iskariyot bay. A gwaday a Yesu: «Bəy ga, ka bəziye ha bo a nəmay dəkdek, ka bəziye ha bo a ndo i məndzibəra hay bay na, ma giye bo ma kəkay?»

<sup>23</sup> Yesu a mbəday faya, a gwaday: «Ndowneye ka wuda ga na, ma rəheye ha gər a bazlam ga. Bəba ga ma wudiyə na. Nəmaa deyeweye ka təv ŋgay. Neŋ ta Bəba nəmaa ndziye mə gay ŋgay.

<sup>24</sup> Ndo nakə a wuda ga bay aye na, ma rəheye ha gər a bazlam ga bay. Kā mətsum ha gər tə wu nakə na tsik aye bay. Wu nakə ka tsənum na tsik aye na, a yaw mə neŋ bay. A yaw na, ka təv i Bəba ga neŋeye nakə a sləra ga ahaya aye.

<sup>25</sup> Na tsikakum ka bo abəra bazlam nakay anəke na, hərwi neŋ andaya ka təv kurom mba.

<sup>26</sup> Mazlambar Bəba ga ma sləraweye Məsəfəre Tsədanŋa eye a bərəm ga, ma dzəniye kurom. Neŋeye na, ma tətikakumeye wu hay tebiye ada bazlam ga neheye na tsikawakum aye na, mā makum ahaya a gər tebiye.

<sup>27</sup> «Anəke na diye gwa na, na vəlakumeye məndze zay a dərev kurom. Məndze nakə dərev kurom ma ndziye zay aye na, na vəlakumeye andza i məndzibəra bay. Dərev mā ye fakuma abəra bay. Kā dzədzarum bay.

<sup>28</sup> Ba ka tsənum, na gwadakum: Na diye gwa. Ane tuk na, na maweye ka təv kurom. Tadə ka wudum ga na, ka ŋgwasumeye hərwi na diye na, ka təv i Bəba ga. Bəba ga, neŋeye na, bagwar eye a ze ga.

<sup>29</sup> «Wu neheye ta ndislew zuk bay. Na tsikakum ka bo abəra anəke na, hərwi ada aza ta ndislew na, kā dzalum ha ka wu neheye na tsikakum aye.

<sup>30</sup> Na ta tsikakumeye wuray andaya haladzay sa bay. Na tsikakumeye wuray haladzay sa bay na, hərwi mey? Hərwi bəy i ndo i məndzibəra hay faya ma deyeweye. Ane tuk na, gədan ŋgay andaya kwa tsekweŋ mələve ga bay.

<sup>31</sup> Ane tuk na, ndo i məndzibəra hay tā sər ha na, na wuda Bəba ga ada neŋ faya na giye andza nakə Bəba a gwedeŋ ge aye.

«Anəke na, lətsum takwa abəra kənan!»

## 15

### *Yesu na, dərizl i gərɗaf*

<sup>1</sup> Yesu a gwadatay a gawla ŋgay hay sa: «Neŋ na, andza dərizl i gərɗaf dedek eye. Bəba ga na, a təra andza ndo i guvah.

<sup>2</sup> Hawal neheye tə wa bay aye na, ma dəsiye tay ha. Hawal neheye tə wa aye na, ma kəkaliye fataya abəra hərwi ada tã wa hohway haladzay.

<sup>3</sup> Wu neheye na tətikakum aye na, ka təra kurom ha tsədan̄na, andza dərizl i gərdaf nakə ta kəkal na aye.

<sup>4</sup> Ndzum na, madzapa eye ka neñ andza neñ nakə madzapa eye tə nəkurom aye. Hawal kə ge neñgeye ka dərizl ŋgay eye bay na, ma sliye faya məwe ka gər bo ŋgay bay, mǎ ndza ka dərizl ŋgay. Andza niye, nəkurom ka dzapum tə neñ bay na, ka mbumeye faya məge wuray lele eye bay.»

<sup>5</sup> Yesu a gwadatay sa: Neñ na, andza dərizl i gərdaf, nəkurom hawal eye hay. Ndowneye kə dzapa tə neñ ada na dzapa ta neñgeye na, ma wiye hohway haladzay andza dərizl i gərdaf. Hərwi ze neñ na, ka slumeye məge wuray lele eye bay. <sup>6</sup> Ndowneye kə dzapa tə neñ bay na, Mbəlom ma kərahiye na. Ma təriye andza hawal i dərizl i gərdaf nakə tə dəs faya abəra aye. Ta kaliye ha ada ma kuliye. Kə kula na, ta hayay gər ada ta dziye a ako, ma təmiye.

<sup>7</sup> «Tadə ka ndzum nəkurom madzapa eye ka neñ ada ka pum na bazlam ga a dərev na, tsətsahum wu nakə a sakum aye, ka hutumeye.

<sup>8</sup> Tadə faya ka gumeye ŋgwalak huya na, faya ka bəzumətatay ha a ndo hay, nəkurom gawla ga hay. Kə ge andza niye na, ndo hay ta zambadəye a Bəba ga.

<sup>9</sup> «Na wudə kurom andza nakə Bəba a wudə ga aye. Ndzum huya madzapa eye ka neñ ada ka sərume ye ha na, na wudə kurom.

<sup>10</sup> Tadə ka rəhumay ha gər a bazlam ga mapala eye na, ka ndzumeye nəkurom madzapa eye ka neñ ada ka sərume ye ha na wudə kurom huya, andza neñ nakə na rəhay ha gər a bazlam i Bəba ga mapala eye ada neñ madzapa eye tə neñgeye ada na sər ha a wudə ga huya.

<sup>11</sup> Na tsikakum wu neheye na, hərwi ada dərev kurom mǎ ŋgwasə andza neñ nakə dərev ga mǎŋgwasə eye dərma k. Andza niye mǎŋgwesə ma rahiye a dərev kurom lele.

<sup>12</sup> «Bazlam ga nakə na tsikakumeye na, waray? Bazlam nakə na tsikakumeye na, wudum bo nətə nətə mə walañ kurom andza neñ nakə na wudə kurom aye.

<sup>13</sup> Ndowneye kə dze ha məsəfərə ŋgay hərwi dzam ŋgay hay na, mawudə bo maze niye na, andaya sa bay.

<sup>14</sup> Tadə ka gum wu nakə na gwadum gum aye na, nəkurom dzam ga hay.

<sup>15</sup> Na zalakumeye ndo i məsler ga hay sa bay hərwi ndo i məsler na, a sər wu nakə ndo i gay ŋgay ma giye bay. Duh na zalakumeye dzam ga hay hərwi na dākum ha wu nakə Bəba a dən̄ ha aye tebiye.

<sup>16</sup> Nəkurom ka zlum ga bay. Duh maa pala kurom na, neñ hərwi ada kǎ puməñ bəzay. Na slər kurom ha dərma k, kǎ yum mata ge wu nakə lele eye ada wu niye lele eye ma ndziye huya. Andza niye, ka tsətsahum wu hay tebiye ta məzele ga na, Bəba ga ma vəlakumeye.

<sup>17</sup> Wu nakə na tsikakumeye anəke aye na, wudum bo nətə nətə mə walañ kurom.»

### *Ndo i mǎndzibəra hay ta nateye dərə a gawla i Yesu hay*

<sup>18</sup> Yesu a gwadatay sa: «Tadə ndo i mǎndzibəra ta nakum dərə na, sərume ha ba kurre tə nay dərə na, a neñ.

<sup>19</sup> Tadə nəkurom ndo i mǎndzibəra hay na, ta wudīye kurom hərwi nəkurom ndo tay hay. Ane tuk na, ka təra andza niye bay. Na pala kurom abəra mə walañ tay. Nəkurom ka tərume ndo tay hay sa bay. Tə nakum dərə na, hərwi nakə nəkurom ndo tay hay sa bay aye.

<sup>20</sup> «Kâ mætsum ha gær tæ bazlam nakæ na tsikakum aye bay. Na gwad ndo i mæsler na, a ze ndo i gay ngay bay. A seŋ mægwaðakum na, tadæ ta geŋ dæretsætseh na, ta gakumeye dæretsætseh a nakurom dærmak. Ndo neheye ta ræhay ha gær a bazlam ga aye na, ta dzaliye i kurom dærmak.

<sup>21</sup> Dæretsætseh nakæ ta gakumeye na, hærwi nakæ nakurom gawla ga hay aye. Tæ ge andza niye na, hærwi tæ sær ndo nakæ a slæra ga ahaya aye bay.

<sup>22</sup> «Tadæ na yaw na tsikatay bazlam i Mbælom bay na, sariya ma gæsiye tay ha hærwi mezeleme tay bay. Ane tuk na, anæke na yaw, na tsikatay. Anæke ta sliye faya matsike “næmaa sær mezeleme bay” na, ta sliye faya bay.

<sup>23</sup> Ndoweye kæ neŋ dære na, a nay dære a Bæba ga dærmak.

<sup>24</sup> Tadæ 6a na mbæræm mæge mæsler neheye ndæray dæda kæ ge bay aye na, hæbe Mbælom ma gæsiye tay ha a sariya ngay bay. Azlakwa anæke na, ta ngatay a mæsler ga hay ada faya ta namay dære ta bæba ga.

<sup>25</sup> Ane tuk na, a ge andza niye na, hærwi ada mâ tæra andza nakæ ndo tay hay ta watsa mæ Derewel i Mbælom aye. Tæ watsa, tæ gwad: “Tæ neŋ dære na, kæriye bæna na ge mænese bay.\*”»

<sup>26</sup> Yesu a gwadätay sa: «Ndo nakæ ma deyeweye madzæne kurom aye na, ma deyeweye. Ma deyeweye na, mæ hælai i Bæba ga. Na ye ka tæv i Bæba ga na, na slærakumaweye. Ndoweye niye na, Mæsæfære Tsædæŋŋa aye. Neŋgeye ma dateye ha dedek a ndo hay. Ki yaw na, ma tsikiye ka neŋ.

<sup>27</sup> Nækurom dærmak ka ta tsikumeye ka neŋ hærwi ahæl nakæ na dazlay a mæsler aye na, nækurom tæ neŋ hus bægom.»

## 16

<sup>1</sup> «Na tsikakum wu neheye ka bo abæra anæke na, hærwi ada kâ gærum ha mædzele ka neŋ bay.

<sup>2</sup> Ta ta hæhara kurom ahaya abæra mæ gay i maðuwule me. Hælai eye ma deyeweye, ndo hay ta kæðiye kurom, ada ta dzaliye mæ gær tay na: “Næmaa ge na, wu nakæ a yay a gær a Mbælom aye.”

<sup>3</sup> Ta giye andza niye na, hærwi næteye tæ sær Bæba ga bay ada tæ sær neŋ bay.

<sup>4</sup> Na tsikakum ka bo abæra anæke na, hærwi ada ahæl nakæ faya ta gakumeye andza niye na, bazlam nakæ na tsikakum aye mâ makumaw a gær.»

### *Mæsler nakæ Mæsæfære Tsædæŋŋa ma giye*

Yesu a gwadätay sa: «Na tsikakum kurre bay na, hærwi neŋ ka tæv kurom mba.

<sup>5</sup> Anæke na, na miye gwa ka tæv i ndo nakæ a slæra ga ahaya aye. Ndæray kwa næte mæ walaŋ kurom ma tsatsahiye tæv ga nakæ na diye a dæma aye bay.

<sup>6</sup> Ane tuk na, ma ndalakumeye haladzay hærwi nakæ na gwadækum na, na diye gwa aye.

<sup>7</sup> Ayaw! Særum ha lele, na ye fakuma abæra ðuh i kurom na, lele. Andza niye tadæ na ye gwa bay na, ndo nakæ ma deyeweye mata dzæne kurom aye na, ma deyeweye sa bay. Ane tuk na, na ye na, na slæra ahaya.

<sup>8</sup> «Ki yaw na, ma bæzatay ha a ndo i mændzibæra hay na, næteye faya ta giye mezeleme, ma bæzatay ha tsæved nakæ dedek aye, ada ma bæzatay ha sariya i Mbælom nakæ ma ta giye.

<sup>9</sup> Mezeleme nakæ ma bæzatay ha aye, a ða ha na, næteye ta dzala ga ha bay.

<sup>10</sup> Ta særiye ha tsæved nakæ dedek eye na, tsæved mæpeŋ bæzay a neŋ hærwi na miye ka tæv i Bæba ga. Ka ta ngatumerjeje sa bay.

\* 15:25 Dæmes hay 35.19; 69.5.

11 A bəzatay ha sariya na, hərwi 6a Mbəlom kə gəs bəy i məndzibəra nakay a sariya.»

12 Yesu a gwadətay sa: «Wu neheye na tsikakum zuk bay aye na, andaya haladzay. Ane tuk na, na tsikakum anəke na, ka slumeye faya mətsəne bay.

13 Məsəfəre niye ma dətay ha tsəved i dedək a ndo hay. Ki yaw na, ma dəkumeye ha tsəved niye dedək eye tebiye. Ma ta tsikiye na, ka gər bo ɲgay bay. Ane tuk na, ma ta tsikiye na, wu nakə a tsənew ka Mbəlom aye. Ma dəkumeye ha wu nakə ma giye bo kame aye.

14 Ndo hay ta dəsleɲeye ha gər hərwi ɲgay. Hərwi wu neheye ma dəkumeye ha aye na, ti yaw abəra mə neɲ.

15 Wu neheye mə həlay i Bəba ga tebiye na, i ga dərma. Hərwi niye na gwadəkum na, wu nakə Məsəfəre ma ta dəkumeye ha aye na, ma deyeweye abəra na, mə neɲ.»

### *Gawla i Yesu hay ta ɲgwasiye haladzay*

16 Yesu a gwadətay: «Məndze tsekweɲ na, ka ɲgatumeɲeye sa bay. Ada məndze tsekweɲ na, ka ɲgatumeɲeye sa.»

17 Siye hay mə walaɲ i gawla ɲgay hay tə tsəne andza niye na, tə gwad mə walaɲ tay: «A say məgwədə na, kəkay? A gwad: “Məndze tsekweɲ na, ka ɲgatumeɲeye sa bay ada məndze tsekweɲ na, ka ɲgatumeɲeye sa.” Ada a gwadəkway sa na: “Ka ɲgatumeɲeye sa bay, hərwi na miye ka təv i Bəba” na, hərwi mey?

18 “Məndze tsekweɲ” niye a tsik aye na, andza məgwədə mey? Ka sərakwa wu nakə a say mətsike aye bay.»

19 Yesu a sər ha a satay a gawla ɲgay hay matsətsehe faya bazlam. A gwadətay: «Ka tsikum mə walaɲ kurom na, ka bazlam nakə na gwad “məndze tsekweɲ na, ka ɲgatumeɲeye sa bay ada məndze tsekweɲ na, ka ɲgatumeɲeye sa” daw?

20 «Ayaw! Sərüm ha na, ka ta tuwumeye, ka wudumeye ka bo haladzay. Ndo i məndzibəra hay na, ta ɲgwasiye. Dərev ma ndalakumeye haladzay, ane tuk na, dəretsətseh kurom ma təriye məɲgwese.

21 Ma giye na, andza məwe wawa nakə a dazlay a ɲgwas aye. Ahəl nakə wawa a dazlay a ɲgwas aye na, dərev a ndalay hərwi dəretsətseh. Ane tuk na, kə wa na wawa tsiy na, ma mətsiye ha gər tə dəretsətseh. Ma ɲgwasiye hərwi wawa nakə a wa, a yaw ka məndzibəra aye.

22 Andza niye nəkurom mə dəretsətseh anəke dərma. Ane tuk na, na ta ɲgatakumeye, ka ta ɲgwasumeye haladzay, ndəray ma sliye faya mabuwe fakuma abəra məɲgwese niye bay.

23 «Pat eye niye na, ka ta tsətsahumeye fagaya sa bay. Sərüm ha na, kwa mey ka tsətsahum ta məzele ga na, Bəba ma vəlakumeye.

24 Hus anəke ka tsətsahum wuray ta məzele ga zuk bay. Tsətsahum, ka hutumeye ada məɲgwese ma rahiye a dərev kurom lele.»

### *Yesu a ɲgwas a ka məndzibəra*

25 Yesu a gwadətay: «Na tsikakum wu neheye tebiye na, ta dzeke. Həlay eye ma deyeweye, na tsikakumeye ta dzeke sa bay. Ane tuk na, na ta tsikakumeye ka gər i Bəba ga parakka.

26 Pat eye niye na, ka tsətsahumeye wu hay ka Bəba ga ta məzele ga. Ağəla ka gwadumeye na, na ta tsətsahiye faya wu hərwi kurom. A'ay! Bo kurom eye ka tsətsahumeye tə bazlam kurom.



<sup>27</sup> Bəba, bo ɲgay eye a wuɗa kurom. A wuɗa kurom na, hərwi nəkurom ka wuɗum ga ada ka dzalum ha neɲ na yaw na, abəra ka tɔv i Mbəlom.

<sup>28</sup> Na yaw na, ma tɔv i Bəba ga ada na yaw ka məndzibəra. Anəke na, na gəriye ha məndzibəra, na miye ka tɔv i Bəba ga.»

<sup>29</sup> Gawla ɲgay hay tɔ gwadɔy: «Yawa! Anəke faya ka tsik me na, parakka tuk. Ka tsik ta dzeke sa bay.

<sup>30</sup> Anəke nəmaa sər ha, ka sər wu hay tebiye. Ndo ma ta tsətsahiye fakaya bazlam na, ɓa ka sər tsiy. Hərwi niye nəmaa dzala kar ha, nəmaa sər ka yaw na, abəra ka tɔv i Mbəlom dedek.»

<sup>31</sup> Yesu a mbəɗatay faya, a gwadɔy: «Ka dzalum ha na, anəke ɗaw?

<sup>32</sup> Pat eye ma deyeweye, ɓa ka mbərəm madayaw tsiy. Pat eye niye na, ka ɲgənumeye gər kweye kweye kwa way ma miye a mətəgay ɲgay. Ka gərumeye ga ha mahəgeye. A'ay! Ta dedek na, neɲ mahəgeye bay. Bəba ga, neɲgeye tɔ neɲ.

<sup>33</sup> «Na tsikakum wu neheye kurre ada nəkurom neheye madzapa eye tɔ neɲ aye na, hərwi ada kâ ndzum zay. Ka məndzibəra na, ka gumeye ɗəretsətseh. Ane tuk na, ɗərev mâ ye fakuma abəra bay, hərwi neɲ na, na ɲgwasa ka məndzibəra.»

## 17

### *Yesu a ɗuwulay me a Mbəlom hərwi gawla ɲgay hay*

<sup>1</sup> Yesu a tsikatay ka bo abəra bazlam niye na, a zəba ɗəre a mbəlom, a gwad: «Bəba ga, i ga na, həlay eye ka husaw tuk. Bəzatay ha məzlaɓ ga a ndo hay ada neɲ wawa yak nâ bəzatay ha məzlaɓ yak ɗərmak.

<sup>2</sup> Nəkar na, ka vələɲ gəɗaɲ ka gər i ndo hay tebiye hərwi ada nâ vələtəy sifa nakə ma ndəviye bay aye a ndo neheye ka vələɲ tay naha a həlay aye.

<sup>3</sup> Sifa niye ma ndəviye bay aye na, andza məgwede ta sər kar ha, nəkar na, Mbəlom dedek eye nətə ɲgwenɲ, ada ta sər neɲ Yesu Kəriste nakə ka sləratayaw aye.

<sup>4</sup> «Ahəl nakə neɲ ka məndzibəra aye na, na ɗa ha məzlaɓ yak a ndo hay, hərwi na ndəv ha məsler nakə ka sləra ga ahaya faya məge aye.

<sup>5</sup> Anəke na, Bəba ga, vələɲ məzlaɓ ka ɗəre yak andza məzlaɓ ga ahəl nakə nəmay salamay, məndzibəra andaya zuk bay aye.

<sup>6</sup> «Ndo neheye ka pala tay ha abəra ka məndzibəra aye ada ka vələɲ tay ha a həlay ga aye, tɔ sər kar ha na, hərwi ga. Nətəye tebiye na, i yak hay ada ka vələɲ tay ha a həlay ga. Nətəye faya ta rəhay ha gər a bazlam yak.

<sup>7</sup> Tɔ sər ha wu neheye ka vələɲ tebiye aye na, a yaw mə nəkar.

<sup>8</sup> Bəna na tsikatay bazlam nakə ka gwedeɲ tsikatay aye. Ta təma lele. Ta sər ha ta dedek na yaw na, abəra ma nəkar. Ada ta dzala ha maa sləra ga ahaya na, nəkar.

<sup>9</sup> «Na ɗuwulakeye naha me hərwi tay, bəna hərwi ndo i məndzibəra hay bay. Na ɗuwulakeye naha me na, hərwi ndo neheye ka vələɲ tay ha aye. Nətəye na, ndo yak hay.

<sup>10</sup> Ndo ga hay na, ndo yak hay ɗərmak, ada ndo yak hay na, ndo ga hay. Nətəye ta ɗatay ha məzlaɓ ga a ndo hay.

<sup>11</sup> Anəke na, na miye naha ka tɔv yak. Na gəriye ha məndzibəra, nətəye ta ndziye ka məndzibəra. Bəba ga, nəkar nakə tsəɗaɲɲa eye, tsəpa tay ha ta gəɗaɲ yak nakə ka vələɲ aye. Tsəpa tay ha hərwi ada tã təra madzapa eye nətəye andza nəkar tɔ neɲ, nəmay madzapa eye nətə.

<sup>12</sup> Ahəl nakə nəmaa ndzawa huya dziye na, neɲ na tsəpawa tay ha. Na tsəpawa tay ha ta gəɗaɲ yak nakə ka vələɲ aye. Na tsəpa tay lele, ndəray kwa

nəte kə dze bay. Maa dze na, ndo nakə tə watsa faya mə Derewel i Mbəlom ta gwaf ma ta dziye a ako nakə ma mbatiye bay aye.

<sup>13</sup> «Anəke na, na diye naha ka təv yak. Na tsik andza niye na, ahəl nakə neŋ ka məndzibəra mba aye hərwi ada mənŋwese ga mâ rah a dərev tay.

<sup>14</sup> Na tsikatay bazlam yak nakə ka gwedeŋ tsikatay aye. Ane tuk na, ndo i məndzibəra hay faya ta natay dəre hərwi nəteye na, ndo tay hay bay andza neŋ nakə neŋ ndo tay bay aye.

<sup>15</sup> Na dūwulakeye naha me na, hərwi nakə kâ həl tay naha abəra ka məndzibəra aye bay. Duh na dūwulakeye naha me na, tsəpa tay ha hərwi ada Fakalaw mâ gatay wuray bay.

<sup>16</sup> Hərwi nəteye na, ndo i məndzibəra hay bay andza neŋ nakə ndo i məndzibəra bay aye.

<sup>17</sup> «Bəzatay ha dedək hərwi ada tâ təra kətsek tebiye i yak hay. Hərwi bazlam yak na, dedək.

<sup>18</sup> Andza nəkar nakə ka sləra ga ahaya ka məndzibəra aye na, neŋ kanan dərmak faya na sləriye tay ka məndzibəra ka məge məsler.

<sup>19</sup> Na vələka ha bo ga tebiye hərwi tay hərwi ada nəteye tebiye tâ təra ndo yak hay.

<sup>20</sup> «Na dūwulakeye naha me na, hərwi nəteye dekdək tsa bay. Na dūwulakeye naha me hərwi ndo neheye ta piye zləm ka bazlam tay ada aza ta dzaliye ha ka neŋ.

<sup>21</sup> Na dūwulakeye naha me hərwi ada nəteye tebiye tâ təra nəte. Bəba, tâ ndza madzapa eye tə nəmay andza nəkar nakə madzapa eye tə neŋ aye ada neŋ madzapa eye tə nəkar aye. Tâ təra na, nəte madzapa eye tə nəmay hərwi ada ndo i məndzibəra hay tâ dzala ha maa sləra ga ahaya na, nəkar.

<sup>22</sup> Na vələtay məzlaḅ nakə ka vələŋ aye hərwi ada tâ təra nəte andza nəkar tə neŋ, nəmay nəte.

<sup>23</sup> Neŋ madzapa eye ta nəteye andza nəkar nakə madzapa eye tə neŋ aye hərwi ada tâ təra nəte, ada ndo i məndzibəra hay tâ sər na, nəkar ka sləra ga ahaya ada ka wuda tay ha andza nakə ka wuda neŋ aye.

<sup>24</sup> «Bəba, a seŋ na, ndo neheye ka vələŋ tay ha a həlay aye na, ta ndziye ma təv nakə na ta ndziye mə dəma aye dərmak hərwi ada tâ ŋgatay a məzlaḅ ga. Ka wuda ga na, kwa ahəl nakə məndzibəra andaya zuk bay aye ada hərwi niye ka vələŋ məzlaḅ aye.

<sup>25</sup> «Bəba ga nəkar na, ndo i dedək. Ndo i məndzibəra hay tə sər kar ha bay. Ane tuk na, neŋ na sər kar ha ada ndo neheye mə həlay ga aye tə sər maa sləra ga ahaya na, nəkar.

<sup>26</sup> Tə sər kar ha na, hərwi ga ada ta səriye kar ha hərwi ga dərmak hərwi ada tâ wuda siye i ndo mekeleŋ eye hay andza nakə ka wuda ga aye ada neŋ dərmak nâ ndza mə dərev tay.»

## 18

### *Tə gəs na Yesu*

### *Mata 26.47-56; Markus 14.43-50; Luka 22.47-53*

<sup>1</sup> Yesu a ndəv ha ma dūwulay naha me a Mbəlom na, a həl bo ta gawla hay, ti ye a diye i magayam wuray tə zalay Sedron. Ka təv aye niye na, dədan andaya ta zəv a dəma gərdaf hay. Tsa na, ti ye a dəma ta gawla ŋgay hay.

<sup>2</sup> Yudas ndo nakə a ge dəf ka Yesu aye a sər təv eye niye. A sər na, hərwi Yesu ta gawla ŋgay hay ti yawa a dəma.

<sup>3</sup> Yudas a ye a dādan niye ta sidzew i Roma hay, tə siye i sidzew neheye ta tsəpawa gay i mādəslay ha gər a Mbəlom. Maa slər tay naha na, bagwar hay i ndo neheye tə vələway wu a Mbəlom aye ada ta Farisa hay. Ti ye na, tə wu i həlay hay, ta lalam tay hay ada siye ta dāv ako. Maa həl tay naha na, Yudas.

<sup>4</sup> Azlakwa bay Yesu na, 6a kə sər wu nakə ma ta giye bo tə neŋgeye. Mazlambar faya ta ndisliye naha ka təv tay na, Yesu a həndzəd naha ka təv tay. A tsətsah fataya, a gwadatay: «Ka pəlum way?»

<sup>5</sup> Ta mbəday faya, tə gwaday: «Nəmaa pəla Yesu ndo i Nazaret.»

Yesu a gwadatay: «Yesu na, neŋ eye.»

Yudas ndo nakə a gatay daf ka Yesu aye malətsa eye ka təv i sidzew niye hay.

<sup>6</sup> Tə tsəne i Yesu nakə a gwadatay: «Yesu na, neŋ eye» ta ma ta dəba, tə dəd ka dala tolololo.

<sup>7</sup> Yesu a tsətsah fataya sa, a gwadatay: «Ka pəlum way?»

Tə gwad: «Yesu ndo i Nazaret.»

<sup>8</sup> Yesu a mbədatay faya, a gwadatay: «Ba na gwadəkum Yesu na, neŋ tsiy. Tadə ka pəlum neŋ na, gərūm tay ha siye i ndo hay, tā ye wu tay.»

<sup>9</sup> Andza niye, wu nakə Yesu a tsik aye na, ma giye bo andza nakə a tsik aye. A gwad: «Bəba, ndo neheye ka vələŋ tay ha a həlay aye na, kwa nəte kə dze fagaya abəra bay.»

<sup>10</sup> Simoŋ Piyer na, maslalam andaya faya. A ŋgwadaw maslalam ŋgay niye a fay ha a ndo i məsler i bagwar i ndo məvələway wu a Mbəlom. A dəsay na zləm i həlay i mənday fats ka dala. Ndo i məsler niye tə zalay na, Malkus.

<sup>11</sup> Ane tuk na, Yesu a gwaday a Piyer: «Ma ha maslalam yak a gay ŋgay eye. Dəretsətseh nakə Bəba a vələŋ aye na, na siye bədaw?»

<sup>12</sup> Sidzew niye hay ta bəy tay ada ta ndo neheye ta tsəpawa gay i mādəslay ha gər a Mbəlom aye, tə gəs na Yesu. Tsa na, tə dzawa na.

### *Sidzew hay ti ye ha Yesu a gay i Han*

<sup>13</sup> Tə lah mede ha Yesu na, a gay i Han təday. Han na, neŋgeye mese i Kayif. Anəke ka viye niye na, Kayif neŋgeye bagwar i ndo məvələway wu a Mbəlom.

<sup>14</sup> Kayif na, ndo nakə a gwadatay a bagwar i Yahuda hay: «Tə bəmalə nakə ndo hay tebiye ta dziye na, ŋgama ndo nəte mā mət.»

### *Piyer a dāy bərakəzan a Yesu*

*Mata 26.69-70; Markus 14.66-68; Luka 22.55-57*

<sup>15</sup> Simoŋ Piyer ta gawla i Yesu neŋged nəte ta zəŋgal na Yesu. Bagwar i ndo məvələway wu a Mbəlom a sər na gawla i Yesu niye neŋged eye. Hərwi niye neŋgeye na, ti ye a dalamətagay i bagwar i ndo məvələway wu a Mbəlom tə Yesu salamay.

<sup>16</sup> Ane tuk na, Piyer neŋgeye na, a ndza ma bəra, sləp ka həlay i məged i dalamətagay niye. Gawla i Yesu niye bagwar i ndo məvələway wu a Mbəlom a sər na aye na, a maw. A yaw ka təv i dem nakə faya ma tsəpiye məged aye a tsikay me a dem niye hərwi ada mā vələy tsəved a Piyer. Piyer a fələkwa a dalamətagay tuk.

<sup>17</sup> Ahəl nakə faya ta diye na, ŋgwas nakə a gawa məsler mə gay i ndo məvələway wu a Mbəlom aye, a gwaday a Piyer: «Nəkar na, gawla i ndo nakay dərma ba?»

Piyer a mbəday faya a gwaday: «A'ay neŋ na, gawla ŋgay bay!»

<sup>18</sup> Mətasl a ge haladzay. Hərwi niye ndo i məsler hay ta ndo neheye ta tsəpawa gay i mādəslay ha gər a Mbəlom ta vat ako. Nəteye mandza eye faya. Piyer neŋgeye mandza eye ka ako niye dərma ta nəteye dziye.

*Bagwar i ndo mǎvǎlaway wu a Mbǎlom a tsǎtsah ka Yesu*

*Mata 26.59-66; Markus 14.55-64; Luka 22.66-71*

<sup>19</sup> Ma dǎba aye na, bagwar i ndo mǎvǎlaway wu a Mbǎlom a tsǎtsah ka Yesu ka gǎr i gawla ngay hay ada ka matǎtike ngay nakǎ a tǎtikawa aye.

<sup>20</sup> Yesu a mbǎday faya a gwaday: «Na tsikawatay bazlam parakka kame i ndo hay tebiye. Na tǎtikawatay a ndo hay na, mǎ gay i maǎuwule me ada mǎ gay i maǎdsalay ha gǎr a Mbǎlom ma tǎv nakǎ Yahuda hay tǎ hayawa gǎr a dǎma aye. Na tsik wuray dǎdǎ ta mǎkal bay.

<sup>21</sup> Ada ka tsǎtsahiye faɣaya bazlam na, hǎrwi mey? Wu nakǎ na tsikawa aye na, tsǎtsah ka ndo neheye tǎ tsǎne aye. Nǎteye na, tǎ sǎr wu nakǎ na tsik aye.»

<sup>22</sup> Yesu a tsik andza niye na, kwayanɣa ndo nǎte mǎ walaɣ i ndo matsǎpe gay i maǎdsalay ha gǎr a Mbǎlom a fay a Yesu. A gwaday: «Ta mbǎdaway ka bazlam a bagwar i ndo mǎvǎlaway wu a Mbǎlom na, andza niye dǎw?»

<sup>23</sup> Yesu a gwaday a ndo niye: «Kǎ ge na tsik wu nakǎ lele bay aye na, dǎ ha wu nakǎ na tsik lele bay aye. Tadǎ na tsik lele na, ka kǎd ga hǎrwi mey?»

<sup>24</sup> Tsa na, Han a slǎr ha Yesu a gay i Kayif bagwar i ndo mǎvǎlaway wu a Mbǎlom. Ti ye ha Yesu na, madzawa eye huya.

*Piyer a dǎy bǎrakǎzan a Yesu sa*

*Mata 26.71-75; Markus 14.69-72; Luka 22.58-62*

<sup>25</sup> Ahǎl nakǎ ti ye ha Yesu a gay i Kayif aye na, Piyer nenɣeye ma dalamǎtagay, mandza eye ka ako. Ta tsǎtsah faya, tǎ gwaday: «Nǎkar na, gawla i ndo nakay dǎrmǎk bǎdǎw?»

Piyer a dǎy bǎrakǎzan a Yesu, a gwad: «A'ay, nenɣawla ngay bay!»

<sup>26</sup> Ndo mǎ walaɣ i ndo i mǎsler i bagwar i ndo mǎvǎlaway wu a Mbǎlom andaya ka tǎv eye niye. Ndoweye niye na, gwala i ndo nakǎ Piyer a dǎs faya abǎra zlǎm ahǎl nakǎ tǎ gǎs na Yesu aye. A gwaday: «Nǎkar na, gawla ngay. Na ngataka nǎkurom tǎ Yesu ma dǎdan bǎdǎw?»

<sup>27</sup> Ane tuk na, Piyer a dǎy bǎrakǎzan a Yesu sa, a gwaday: «A'ay, nenɣ bay!»

Piyer a ndǎv ha mǎtsike andza niye na, kwayanɣa dzagulok a zlaha.

*Yesu kame i Pilat*

*Mata 27.1-2,11-14; Markus 15.1-5; Luka 23.1-5*

<sup>28</sup> Dǎre a tsadǎ pǎrik i mekedǎe na, tǎ ma ahaya Yesu abǎra mǎ gay i Kayif. Ti ye ha a gay i Pilat ndo i sik i bǎy i Roma hay. Ane tuk na, bǎy i Yahuda hay ta fǎlǎkwa a gay i Pilat bay. Ti ye a dǎma bay na, hǎrwi a satay mǎndze tsǎdanɣa ada ta sliye faya mǎnde wu mǎnday i Pak.

<sup>29</sup> Hǎrwi niye Pilat ndo i sik i bǎy i Roma hay, a yaw abǎra mǎ gay. A yaw ka tǎv tay, a tsǎtsah fataya, a gwadatay: «Ka gǎsum ahaya ndo nakay na, a gakum mey?»

<sup>30</sup> Ta mbǎday faya, tǎ gwaday: «Tadǎ kǎ ge mǎnese bay na, nǎmaa gǎsaka ahaya dǎw?»

<sup>31</sup> Hǎrwi niye Pilat a mbǎdatay faya, a gwadatay: «Kǎ ge andza niye na, bo kurom eye dum ha ta gumay sariya andza nakǎ bazlam kurom mapala eye a tsikakum aye.»

Ta mbǎday faya, tǎ gwaday: «Nǎmay na, tsǎved may andaya mǎge sariya i mǎkǎde ndo bay.»

<sup>32</sup> Andza nakay bazlam nakǎ Yesu a tsik ahǎl niye a ge bo aye. Ba kǎ dǎ ha mǎmǎte ngay nakǎ ma ta mǎtiye.

<sup>33</sup> Pilat a mbǎdǎ gǎr a gay. A ye naha a zalayaw a Yesu, a tsǎtsah faya, a gwaday: «Nǎkar na, bǎy i Yahuda hay dedǎk dǎw?»

<sup>34</sup> Yesu a mbəday faya, a gwaday: «Ka tsik andza niye na, bo yak eye ka dzala tsukudu, siye i ndo hay tə tsikaka daw?»

<sup>35</sup> Pilat a gwaday: «Ka tsikenj andza niye na, neŋ Yahuda hay tədəw? Maa gəsa kar ahaya na, ndo yak hay ta bagwar hay i ndo neheye tə vəlaway wu a Mbəlom aye bəna neŋ tədəw? Tə gəsa kar ahaya na, ka ge na, mey?»

<sup>36</sup> Yesu a mbəday faya, a gwaday: «Bəy ga na, ka məndzibəra nakay bay. Tadə bəy ga ka məndzibəra nakay na, ndo i məsler ga hay ta giye vəram hərwi ada ndəray mâ gəs ga məvəlay ga ha a bəy i Yahuda hay bay. Ane tuk na, bəy ga na, ka məndzibəra nakay bay.»

<sup>37</sup> Pilat a gwaday: «Azlakwa nəkar na, bəy daw?»

Yesu a gwaday: «Maa tsik na, nəkar. Neŋ bəy dedek. Tə wa ga, na yaw ka məndzibəra na, ka mədə ha dedek. Ndo neheye tə sər dedek aye na, ta təmiye bazlam ga.»

<sup>38</sup> Pilat a gwaday a Yesu: «Dedek na, wuye mey?»

*Tə gay sariya a Yesu i məkədə*

*Mata 27.15-31; Markus 15.6-20; Luka 23.13-25*

Pilat a tsik bazlam ŋgay niye na, a yaw abəra mə gay sa. A ye ka təv i bəy i Yahuda niye hay ma bəra aye. A gwadatay: «Neŋ na, na huta faya abəra mənese bay.

<sup>39</sup> Ane tuk na, a say a kule kurom, nā gərakum ha ndo i danŋay nətə hərwi magurlom i Pak. A sakum nā gərakum ha na, bəy i Yahuda hay daw?»

<sup>40</sup> Tə tsane andza niye na, ta wuda ta magala, tə gwad: «Gəramay ha na, Barabas bəna neŋgeye bay!»

Azlakwa Barabas na, ndo i galak dūh.

## 19

<sup>1</sup> Pilat a vəlatay tsəved a sidzew hay tâ gəs na Yesu ada tâ ndaḡa na ta mandalaḡa.

<sup>2</sup> Sidzew hay tə dəsaw dak tə slapa na ka bo, ta pay a gər a Yesu andza dzagwa i bəy. Tə kalay ka bo peteked ndozza eye.

<sup>3</sup> Tsa na, ta həndzəd naha ka təv ŋgay, tə gwaday: «Zay daw, bəy i Yahuda hay!» Tə fay ka maholom.

<sup>4</sup> Pilat a yaw abəra mə gay sa, a gwadatay a ndo hay: «Tsənum təday! Na gəsakuma ahaya Yesu abəra. Sərum ha neŋ na, na huta faya abəra mənese bay.»

<sup>5</sup> Tə gəsa ahaya Yesu abəra tuk. Dzagwa i dak mə gər ada peteked ka bo ndozza. Pilat a gwadatay: «Ndo nakay na, anan!»

<sup>6</sup> Bagwar hay i ndo neheye tə vəlaway wu a Mbəlom aye ta ndo matsəpe gay i mədəslay ha gər a Mbəlom hay tə ŋgatay a Yesu na, tə pa bo ka mawude ta magala. Tə gwad: «Dar na ka mayako mazləmbada eye! Dar na ka mayako mazləmbada eye!»

Ane tuk na, Pilat a gwadatay: «Bo kurom eye gəsum na ada kâ yum kâ darum na ka mayako mazləmbada eye. Neŋ na, na huta faya mənese bay.»

<sup>7</sup> Bəy i Yahuda hay ta mbəday naha faya, tə gwaday: «Nəmay na, bazlam may mapala eye andaya, ada andza bazlam may mapala eye a tsik na, kutoŋ məkədə na, hərwi a gwad: “Neŋ na, Wawa i Mbəlom.”»

<sup>8</sup> Pilat a tsəne bazlam tay neheye faya ta tsikiye na, a dzədzar haladzay.

<sup>9</sup> A fələkwa a gay sa, a ye naha a tsətsah ka Yesu, a gwaday: «Ka yaw na, mənŋay?»

Ane tuk na, Yesu ka mbəday faya bay.

10 Andza niye Pilat a gwaday: «A saka mætsikenj me a neŋ bədaw? Neŋ na, gədanj ga andaya mægər kar ha ada gədanj ga andaya madere kar ka mayako mazləmbada eye na, ka sər təbədeŋ?»

11 Yesu a mbəday faya, a gwaday: «Kə ge Mbəlom kə vəlaka ga ha a həlay bay na, ka sliye faya mæŋ wurray kwa tsekwenj bay tebiye. Hərwi niye ndo mægəsa ga ahaya məvəlaka ga ha a həlay na, mənese ŋgay a ze i yak.»

12 Ka təv eye niye kwayanŋa na, Pilat a pəla tsəved mægər ha Yesu. Ane tuk na, bəy i Yahuda hay ta wuda ta magala, tə gwad: «Ka gər ha ndo nakay na, nəkar dzam i bəy i Roma sa bay. Ndoweje kə gwad neŋgeye bəy na, neŋgeye ndo mənə dəre i bəy i Roma.»

13 Pilat a tsəne bazlam tay niye hay na, a ye ahaya Yesu abəra. A ye ka təv nakə dala eye madəzla eye tə beleler aye. Tə bazlam i Yahuda hay na, Gabata. A ndza ka təv niye hərwi mægə sariya.

14 Pat niye na, pat i luma i dezele, mazlambar magərħəpat. Ada həlay i magurlom i Pak.

Pilat a gwadatay a Yahuda hay: «Bəy kurom ananj.»

15 Ane tuk na, tə tsəne bazlam i Pilat niye na, tə pa bo ka mawude, tə gwaday: «Kəd! Kəd! Dar na ka mayako mazləmbada eye!»

Pilat a gwadatay: «Nā dar na bəy kurom ka mayako mazləmbada eye daw?»

Bagwar hay i ndo neheye tə vəlaway wu a Mbəlom aye ta mbəday faya: «Bəy may na, bəy i Roma nate ŋwenj.»

16 Andza niye, Pilat a vəlatay ha Yesu a həlay a sidzew hay hərwi ada tā ye tā dar na ka mayako mazləmbada eye.

*Ta dar na Yesu ka mayako mazləmbada eye  
Mata 27.32-44; Markus 15.21-32; Luka 23.26-43*

Sidzew hay ti ye ha Yesu mata kədə na.

17 Yesu a zla mayako mazləmbada eye niye ta ta dariye na faya aye, a ye ahaya abəra ma wuzlah gay. A ye ha a təv nakə tə zalay Təv i Mətasl i Gər aye. Tə zalay tə bazlam i Yahuda hay na, Golgwata.

18 Mə dəma na, sidzew hay ta dar na Yesu ka mayako mazləmbada eye. Ta dar naha ndo hay sulo ka mayako mazləmbada eye ka tsakay i Yesu, nəte tə həlay i mənday, neŋged tə həlay i gula, Yesu ma wuzlah.

19 Pilat a watsa bazlam ŋgay nakə tə kəd na faya ka palalam. A law zal ka gər i Yesu. A watsa na, a gwad: «Yesu ndo i Nazaret, bəy i Yahuda hay.»

20 Yahuda hay haladzay tə dzaŋgawa bazlam niye mawatsa eye, hərwi təv nakə ta dar faya Yesu aye na, bəse ta wuzlah gay. Ada wu niye tə watsa aye na, tə bazlam i gəma hay wal wal mahkar: Tə bazlam i Yahuda hay, i Roma hay ada ta Gərek hay.

21 Bagwar hay i ndo neheye tə vəlaway wu a Mbəlom aye tə dzaŋga bazlam niye na, ti ye ka təv i Pilat, tə gwaday: «Ka watsa faya “Bəy i Yahuda hay” meriye. Watsa faya na: “Ndo nakay a gwad: Neŋ na, bəy i Yahuda hay.”»

22 Pilat a gwadatay: «Wu nakə neŋ na watsa aye na, ma ndziye andza niye.»

23 Sidzew hay ta dar na Yesu ka mayako mazləmbada eye na, tə zla peteked ŋgay aye. Ta ŋgəna ha fađ, kwa way a zla nəte. Tə zla məkelkabo ŋgay nakə maŋgara eye andza niye məmbele andaya faya bay aye sa.

24 Tə tsik mə walanj tay, tə gwad: «Peteked nakay na, kə ŋguradakwa ha bay. Ane tuk na, gakwa faya tsakwal hərwi məsəre ha mata zle na, way.»

Andza niye, wu nakay a ge bo aye na, andza nakə mawatsa eye mə Derewel i Mbəlom aye, tə gwad:

«Ta ŋgəna ha peteked ga mə walanj tay

ada tə ge faya tsakwal ka məkelkabo ga.\*»

Wu nakə sidzew hay tə ge aye na, anan.

<sup>25</sup> Bəse ta təv i mayako niye mazləmbada eye ta dar faya Yesu aye na, may i Yesu ta malamar i may nğay, Mari nğwas i Kəlopas ada ta Mari nakə a yaw ma gama i Magadala aye, nəteye maləsa eye ka təv eye niye.

<sup>26</sup> Yesu a nğatay a may nğay ta gawla nğay nakə a wuda na haladzay aye. A gwaday a may nğay: «May ga, wawa yak anan.»

<sup>27</sup> Ma dəba aye a gwaday a gawla nğay niye a wuda na haladzay aye: «May yak anan.» Pat eye niye gawla i Yesu niye a wuda na haladzay aye a zla na Mari a gay nğay.

### *Məməte i Yesu*

*Mata 27.45-56; Markus 15.33-41; Luka 23.44-49*

<sup>28</sup> Ma dəba eye na, Yesu a sər ha wu nakə Mbəlom a sləra ahaya faya məge aye na, ka ndəv tebiye tuk. Yesu a gwad: «Yam a geŋ.» A tsik andza niye hərwi ada wu nakə tə dzangawa mə Derewel i Mbəlom aye m̄a ge bo.†

<sup>29</sup> Gəzla wuray andaya maraha eye tə wuye andaya guyakaka. Sidzew niye hay tə zla wuye kofkoffa, tə tələka a wu niye. Tsa na, ta hak na a mayako. Tə pay naha ka bazlam a Yesu.

<sup>30</sup> Yesu a dəvətse wu niye na, a gwad: «Wu tebiye ka ndəv!»

Gər nğay a kal gəzuk. Tsa na, a mət.

### *Sidzew nəte a gay naha suwal a Yesu a dzəham*

<sup>31</sup> Tə kəd na Yesu na, pat i məhəne mə gay i mazəzukw bo. Pat i mazəzukw bo eye niye na, a ze ha siye hay, hərwi magurlom andaya pat eye niye. Hərwi niye a satay a bəy i Yahuda hay mədahan m̄a ndza ka mayako mazləmbada eye pat i mazəzukw bo bay. Ti ye ta tsətsah ka Pilat m̄a vələtay tsəved ka məhəbe sik i ndo niye hay ada məzla ahaya abəra ka mayako.

<sup>32</sup> Tsa na, sidzew hay ti yaw ka təv i ndo neheye ta dar ka mayako mazləmbada eye tage Yesu aye. Tə həbəy ha sik a ndo makurre eye. Tsa na, tə həbəy ha a ndo nengeđ.

<sup>33</sup> Tə ndisl ka təv i Yesu na, ta zəba faya na, kə mət tsiy. Nengeye na, ta həbəy ha sik nğay hay təbey.

<sup>34</sup> Ane tuk na, ndo nəte mə walaŋ i sidzew hay a ye naha a təz na dzəham i Yesu ta suwal. Kwayanŋa bambaz ta yam ta mbədəw.

<sup>35</sup> Neŋ nakə na watsa na bazlam neheye na, na nğatay tə dərə ga ada wu nakə na watsa aye na, dedek eye. Na nğatay tə dərə ga, na sər ha na tsik na, dedek. Na watsa na, hərwi ada nəkurom dərmak k̄a dzalum ha faya.

<sup>36</sup> Wu neheye a ge bo na, hərwi ada wu nakə mawatsa eye mə Derewel i Mbəlom aye m̄a ge bo, a gwad: «Mətasl nğay hay na, kwa nəte ta həbiye ha bay.‡»

<sup>37</sup> Tə watsa mə Derewel i Mbəlom sa, tə gwad: «Ta ta zəbiye na, ka ndo nakə ta təzay na aye.§»

### *Yusufa ta Nikodem tə pa Yesu a bəd*

*Mata 27.57-61; Markus 15.42-47; Luka 23.50-56*

<sup>38</sup> Ndowne andaya tə zalay Yusufa, nengeye ndo i gəma i Arimate. Nengeye gawla i Yesu, ane tuk na, ta məkal, hərwi a dzədzar ta bəy i Yahuda hay. A ye a tsətsah tsəved məzle mədahan i Yesu ka Pilat. A ye a tsətsah na, Pilat a gwaday faya ayaw. Yusufa a maw, a zla na mədahan i Yesu.

\* 19:24 Dəmes hay 22.19. † 19:28 Dəmes hay 22.16, 69.22. ‡ 19:36 Madayaw abəra ma Ezipt 12.46, Məpesle 9.12. § 19:37 Zakari 12.10.



<sup>39</sup> Nikodem ndo nakə a ye ka tɔv i Yesu ta həvad aye, a ye naha dərma. Nənɣeye a zla naha mal madzapa eye a ze hunŋa. Wuye niye hay tebiye ma giye kilo kuro kuro mahkar.

<sup>40</sup> Yusufa ta Nikodem nətɣe salamay tɔ zla mədahan i Yesu. Tə mbəkwa ta rəkwaɗ ada ta wats faya mal niye hay hunŋa eye andza nakə Yahuda hay tɔ gawa ahəl nakə tɔ lawa mədahan hay aye.

<sup>41</sup> Ma tɔv niye ta dar na Yesu ka mayako mazləmbada eye na, guvah andaya. Ma guvah niye na, tsəvay wedeye mala eye mə dɔma. Ta pa a dɔma mədahan dɔda zuk bay.

<sup>42</sup> Pat eye niye na, pat i mələve bo i pat i mazəzukuw bo i Yahuda hay ada tsəvay niye na, bəse. Hərwi niye Yusufa ta Nikodem tɔ zla Yesu tɔ pa na a tsəvay.

## 20

### *Tsəvay kəriye*

#### *Mata 28.1-8; Markus 16.1-8; Luka 24.1-12*

<sup>1</sup> Pərik i mekedɔ pat i luma i sidzew na, Mari i Magədala a ye ka me tsəvay. A ye na, həvad mə dɔma mba, dɔre a zəba bay. Ta dərɔzl ka tsəvay niye na, tɔ beber bagwar eye. Mari a ye naha na, beber madərɔzla eye ka tsəvay sa bay, ta həndək faya abəra.

<sup>2</sup> Mari a ŋgatay andza niye na, a hway ka tɔv i Simon Piyer ta gawla nakə Yesu a wuda na haladzay aye. A ye naha a gwadətay: «Bəy Maduwer andaya ma tsəvay sa bay, ta zla na. Ada nɔmaa sər tɔv nakə tɔ pa na a dɔma aye bay.»

<sup>3</sup> Tsa na, Piyer ta gawla i Yesu niye nənɣed eye tɔ lətse, ti ye ka tsəvay niye.

<sup>4</sup> Nətɣe salamay ta hway ka me tsəvay. Ane tuk na, gawla i Yesu niye nənɣed eye a hway bəse a ze Piyer. Nənɣeye a lah mändisle ka tsəvay.

<sup>5</sup> A ndisl ka tsəvay na, a zəba dɔre a dɔma zərɔd. A ŋgatay na, a peteked neheye tɔ mbəkwa na Yesu aye mə dɔma. Ane tuk na, kə fələkwa a dɔma bay.

<sup>6</sup> Simon Piyer na, a ndisl naha ma dɔba. A ye naha a fələkwa a tsəvay, a zəba ka peteked neheye tɔ mbəkwa na Yesu aye na, mə dɔma.

<sup>7</sup> Piyer a zəba ka peteked nakə ta nduday ha gər a Yesu aye dərma. Peteked niye na, madzapa eye tɔ siye hay bay. Mapada eye, tɔv ŋgay wal.

<sup>8</sup> Tsa na, gawla i Yesu nənɣed eye, ndo nakə a lah naha kurre, a fələkwa a tsəvay dərma. A zəba faya andza niye na, a dzala ha.

<sup>9</sup> Gawla i Yesu hay na, wu nakə mə Derewel i Mbəlom a tsik, a gwad Yesu na, kutoŋ ma lətseweye abəra ma mədahan aye na, ta sər zuk bay.

<sup>10</sup> Tsa na, gawla i Yesu niye sulo eye ta mbəda gər a mətəgay.

### *Yesu a bəzay ha bo a Mari i Magədala*

#### *Mata 28.9-10; Markus 16.9-11*

<sup>11</sup> Mari nənɣeye na, malətse eye ma bəra bəse ka tɔv i tsəvay faya ma tuwiye. Faya ma tuwiye na, a rəh ha gər a tsəvay, a zəba dɔre a dɔma.

<sup>12</sup> A ŋgatay naha a gawla i Mbəlom hay sulo tɔ peteked ka bo kudəkudək. Nətɣe mandza eye ka tɔv nakə tɔ pa faya mədahan i Yesu aye. Nənɣed ta diye i gər ada nənɣed ta diye i sik.

<sup>13</sup> Gawla i Mbəlom niye hay sulo aye ta tsətsah ka Mari, tɔ gwadətay: «ŋgwas niye, ka tuwa mey?»

Mari a mbədətay faya, a gwadətay: «Na tuwa na, hərwi ta zla na Bəy Maduwer ga ada na sər tɔv nakə tɔ pa na a dɔma aye bay.»

<sup>14</sup> Mari a ndəv ha mətəsike andza niye na, a mbəda bo, a ŋgatay a Yesu malətse eye ka tɔv niye. Mari a sər ha nənɣeye bay.

<sup>15</sup> Yesu a tsətsah faya, a gwadáy: «Ŋgwas ka tuwa mey? Ka pəla way?»

Mari a dzala mə gər ŋgay na, ma giye na, ndo i guvah. Hərwi niye a gwadáy: «Sadək bay, kə ge maa zla na nəkar na, dəŋ ha təv nakə ka pa na a dəma aye. Na diye na ta zla ahaya.»

<sup>16</sup> Yesu a gwadáy: «Mari!»

Mari a mbəda me ka təv ŋgay, a gwadáy tə bazlam i Yahuda hay: «*Raboni!*» Andza məgwede: «Miter ga!»

<sup>17</sup> Yesu a gwadáy: «Kâ lemen bay, hərwi na tsal ka təv i Bəba ga zuk bay. Ane tuk na, do gwadatay a malamara ga hay na, na tsaliye ka təv i Bəba ga, neŋgeye Bəba kurom dərma, Mbəlom ga, neŋgeye Mbəlom kurom dərma.»

<sup>18</sup> Tsa na, Mari i Magədəla a ye ka təv i gawla i Yesu hay. A ye a gwadatay: «Na ŋgatay a Bəy Maduweŋ kway!» A təkəratay wu nakə Yesu a tsikay aye.

### *Yesu a bəzatay ha bo a gawla ŋgay hay*

*Mata 28.16-20; Markus 16.14-18; Luka 24.36-49*

<sup>19</sup> Ta huwa eye niye pat i luma i sidzew, gawla i Yesu hay nəteye mahaya gər eye mə gay. Ta dərəzl ka bo a gay lele hərwi ta dzədzar ta bəy i Yahuda hay.

Tsa na, Yesu a ye naha slekərtik a wuzlah tay. A gwadatay: «Zay mâ ndza fakuma!»

<sup>20</sup> A tsikatay andza niye na, a bəzatay ha vavay nakə ka həlay ŋgay hay ada ka dzəham ŋgay aye. Gawla ŋgay hay tə ŋgatay andza niye na, dərəv tay a ŋgwasa haladzay hərwi tə ŋgatay a Bəy Maduweŋ.

<sup>21</sup> Yesu a gwadatay sa: «Zay mâ ndza fakuma! Andza nakə Bəba a sləra ga ahaya aye na, neŋ na sləriye kurom dərma.»

<sup>22</sup> Ma dəba i bazlam ŋgay niye na, a vəzl fataya, a gwadatay: «Təmum Məsəfəre Tsədəŋŋa eye!»

<sup>23</sup> Ndo neheye ka pəsumatay ha mezeleme tay hay aye na, Mbəlom ma pəsateye ha mezeleme tay hay. Ndo neheye ta kərah məpəse ha mezeleme aye na, Mbəlom ma kərahiye məpəsatay ha mezeleme tay dərma.»

### *Yesu a bəzay ha bo a Tomas*

<sup>24</sup> Tomas nakə tə zalay Mawsa neŋgeye nəte mə walaŋ i gawla i Yesu. Azlakwa bay ahəl nakə Yesu a ye a bəzatay ha bo a gawla ŋgay aye na, neŋgeye andaya bay.

<sup>25</sup> Siye i gawla i Yesu hay tə gwadáy: «Nəmaa ŋgatay a Bəy Maduweŋ.»

Ane tuk na, Tomas a mbədatay faya, a gwadatay: «Na ŋgatay a vavay i mbəlak i ponŋte ka həlay ŋgay bay, na pa wur həlay ga a bəd i ponŋte bay ada na pa wur həlay ga a bəd i suwal nakə ka dzəham ŋgay aye bay na, na dzaliye ha faya bay.»

<sup>26</sup> A ndza ma dəba eye luma nəte na, gawla i Yesu hay tə haya gər sa. Pat eye niye na, Tomas andaya ta nəteye tuk. Ta dərəzl na məged lele. Yesu a ye naha a lətse a wuzlah tay, a gwad: «Zay mâ ndza fakuma!»

<sup>27</sup> Tsa na, a gwadáy a Tomas: «Tələkaw wur həlay kanaŋ ada zəba ka həlay ga hay. Zlaw həlay yak ada tələkaw a dzəham ga. Gər ha mədzele gər sulo sulo, dzala ha ka neŋ nəte ŋweŋ.»

<sup>28</sup> Tomas a mbədatay faya, a gwadáy: «Ta dedək, nəkar na, Bəy Maduweŋ ga ada Mbəlom ga.»

<sup>29</sup> Yesu a gwadáy: «Ka dzala ha ka neŋ na, hərwi nakə ka ŋgeteŋ aye. Məŋgwese ka ndo neheye tə dzala ha ka neŋ ze məŋgeteŋ aye.»

<sup>30</sup> Yesu a ge masuwayan̄ siye hay haladzay kame i gawla ngay hay. Ane tuk na, na watsa tay ha a d̄erewel nakay bay.

<sup>31</sup> Na watsa wu neheye na, h̄arwi ada k̄a dzalum ha Yesu nen̄geye na, K̄ariste, nen̄geye Wawa i Mb̄alom, ada ka hutumeye sifa ma nen̄geye h̄arwi ka pum m̄adzal ḡar ka nen̄geye.

## 21

### *Yesu ka me i d̄alov i Tiber*

<sup>1</sup> Ma d̄aba aye na, Yesu a b̄ezetay ha bo a gawla ngay hay sa. A b̄ezetay ha bo na, ka me i d̄alov i Tiber\* . A b̄ezetay bo na, k̄akay?

<sup>2</sup> Pat eye niye siye i gawla i Yesu hay n̄ateye ka t̄av man̄ate eye. N̄ateye na, Simoŋ Piyer, Tomas nak̄a t̄a zalay Mawsa aye, Nataniyel ndo i ḡama i Kana ka dala i Galile, wawa i Dzebede hay ada t̄a siye i gawla i Yesu hay sulo.

<sup>3</sup> Simoŋ Piyer a gwad̄atay: «Na diye na ta gasiye k̄alef.»

Siye hay t̄a gwad̄ay: «N̄amay d̄armak n̄amaa diye, takwa dziye.»

Tsa na, t̄a h̄al bo ti ye, t̄a tsal a kwalalan̄ i yam. Ta dazlay a m̄aḡase k̄alef. Ane tuk na, ta h̄evad̄ eye niye na, ta ḡas k̄alef kwa n̄ate bay tebiye.

<sup>4</sup> D̄are a dazlay a m̄atsede na, Yesu a ye naha a l̄atse ka me i d̄alov niye. Ane tuk na, gawla ngay hay ta s̄ar ha Yesu bay.

<sup>5</sup> Tsa na, Yesu a gwad̄atay: «Ka ḡasum k̄alef d̄aw, wawa ga hay?»

Ta mb̄ad̄ay faya, t̄a gwad̄ay: «A'ay!»

<sup>6</sup> Yesu a gwad̄atay: «Kalum gadan̄ ta diye i h̄alay i m̄anday kurom t̄eday, ka ḡasumawe.»

T̄a kal gadan̄ a yam na, t̄a ḡas k̄alef haladzay. T̄a mba faya m̄avahaw gadan̄ ab̄ara ma yam bay.

<sup>7</sup> Tsa na, gawla i Yesu nak̄a Yesu a wuda na haladzay aye a gwad̄ay a Piyer: «Nakay na, B̄ay Maduwen̄!»

Simoŋ Piyer a ts̄ane andza niye: «Nakay na, B̄ay Maduwen̄» na, a zla peteked ngay a kal ka bo h̄arwi ̄ba ka tsoloka ka bo ab̄ara. Tsa na, a kal ha bo a yam.

<sup>8</sup> Gawla i Yesu siye hay t̄a maw ta kwalalan̄ i yam ta m̄avaha ahaya gadan̄ niye maraha eye t̄a k̄alef aye. N̄ateye hābe na, d̄aren̄ t̄a d̄akal bay. Ta ze ka bo ab̄ara na, dal tsa.

<sup>9</sup> T̄a ndislew, t̄a mb̄ezlaw ka dala na, t̄a ngatay a ako ka t̄av eye niye k̄alef faya ada pen̄ andaya d̄armak.

<sup>10</sup> Yesu a gwad̄atay: «H̄alumaw ab̄ara ka k̄alef kurom niye hay ka ḡasumaw aye, f̄akakwa.»

<sup>11</sup> Simoŋ Piyer a tsal a kwalalan̄ i yam. A ye naha, a vaha ahaya gadan̄ niye maraha eye t̄a k̄alef bagwar eye hay. K̄alef neheye na, n̄ateye temerre t̄a kuro kuro zlam ḡar eye mahkar. Gadan̄ niye kwa tsekwen̄ ka nḡazlah bay, ada azlakwa k̄alef m̄a d̄ama maraha eye haladzay.

<sup>12</sup> Yesu a gwad̄atay a gawla ngay hay: «Dumara ndayakwa!» Ndo kwa n̄ate m̄a walan̄ tay ka ts̄atsah faya, k̄a gwad̄ay: «N̄akar way?» na, ka ts̄atsah bay. H̄arwi t̄a s̄ar ha nen̄geye na, B̄ay Maduwen̄.

<sup>13</sup> Yesu a h̄andz̄ad̄ naha ka t̄av tay, a zla a v̄elatay a gawla ngay hay. A zla k̄alef d̄armak a v̄elatay.

<sup>14</sup> Kwa ah̄al nak̄a Yesu a l̄atsew ab̄ara ma m̄adahan̄ aye, a b̄ezetay ha bo a gawla ngay hay aye na, nakay na, mamahkar eye.

### *Yesu ta Piyer*

\* 21:1 Tiber: M̄azele meken̄ eye i d̄alov i Galile.

<sup>15</sup> Ma dɔba i mɛnde dɔf na, Yesu a gwadɔy a Simoŋ Piyer: «Simoŋ wawa i Yuhana, ka wudɔ ga a ze i ndo neheye dɔw?»

Simoŋ Piyer a mbɔdɔy faya, a gwadɔy: «Ayaw Bɔy Maduwen! Ka sɔr ha na wudɔ kar segey.»

Yesu a gwadɔy: «Gatay gɔr a wawa i tɔbaŋ ga hay lele.»

<sup>16</sup> Yesu a tsɛtsah faya masulo eye sa, a gwadɔy: «Simoŋ wawa i Yuhana, ka wudɔ ga dɔw?»

Simoŋ Piyer a mbɔdɔy faya, a gwadɔy: «Ayaw Bɔy Maduwen, ka sɔr ha na wudɔ kar segey.»

Yesu a gwadɔy: «Gatay gɔr a tɔbaŋ ga hay.»

<sup>17</sup> Tsa na, a tsɛtsah mamahkar eye sa: «Simoŋ wawa i Yuhana ka wudɔ ga dɔw?»

Yesu a masay ha a Piyer mamahkar eye: «Ka wudɔ ga dɔw?» aye na, a ndalay. A mbɔdɔy faya, a gwadɔy: «Bɔy Maduwen, nɔkar na, ka sɔr wu tebiye. Ka sɔr ha na wudɔ kar!»

Yesu a gwadɔy: «Gatay gɔr a tɔbaŋ ga hay.»

<sup>18</sup> Neŋ faya na gwadɔakeye: Sɔr ha na, ahɛl niye nɔkar gawla eye na, ka barawa bɛzihud tɛ hɛlay yak eye ada ka yawa na, a tɔv nakɛ a saka aye. Ahɛl nakɛ ka ge guram aye na, ka gɛsiye na hɛlay ka mbɛlom, ada ndo mekelen eye ma barakeye na bɛzihud ada ma diye kar ha a tɔv nakɛ a saka bay aye.»

<sup>19</sup> Yesu a tsik bazlam neheye na, a dɔy ha mɛmɛte nakɛ Piyer ma ta mɛtiye na, kakay. Mɛmɛte ŋgay niye na, ma bɛziye ha mɛzlaɓ i Mbɛlom.

Tsa na, Yesu a gwadɔy a Piyer: «Peŋ bɛzay.»

### *Yesu ta gawla ŋgay nakɛ a wudɔ na aye*

<sup>20</sup> Piyer a mbɔdɔ bo a zɛba dɔre a dɔba na, a ŋgatay a gawla i Yesu nakɛ Yesu a wudɔ na haladzay aye. Ahɛl niye, ahɛl nakɛ faya ta ndiye dɔf aye, maa hɛndzɔd ka tɔv i Yesu ada maa tsɛtsah: «Bɔy Maduwen mata ge fakaya dɔf way?» na, neŋgeye.

<sup>21</sup> Piyer a ŋgatay na, a tsɛtsah ka Yesu, a gwadɔy: «Bɔy Maduwen, mata gay a neŋgeye mey?»

<sup>22</sup> Yesu a mbɔdɔy faya, a gwadɔy: «Tadɔ a seŋ mɛ ndza ka bɛra hus ahɛl nakɛ na maweye na, me yak faya mey tey? Nɔkar na, peŋ bɛzay!»

<sup>23</sup> Labara nakay a dɔdatay a zlɛm a ndo mɛpe madzal gɔr hay ka Yesu na, gawla i Yesu niye Yesu a tsik faya andza niye na, ma mɛtiye bay. Azlakwa Yesu ka gwadɔy a Piyer ma mɛtiye bay na, kɛ tsikay bay. Ane tuk na, a gwadɔy na: «Tadɔ a seŋ mɛ ndza ka bɛra hus ahɛl nakɛ na maweye na, me yak faya mey tey?»

<sup>24</sup> Wu neheye tebiye Yesu a ge aye na, maa dɔ ha ada maa watsa na, gawla i Yesu niye Yesu a wudɔ na haladzay aye. Ada nɛmaa sɔr ha na, wu neheye a dɔ ha aye na, dedek.

<sup>25</sup> Siye i wu neheye Yesu a ge na, nɛteye haladzay. Tadɔ ta watsa tebiye ka derewel nɛte ta nɛte na, derewel niye hay tɔv ma slateye ka mɛndzibɛra bay.

## Derewel i məsler i ndo i maslañ hay

### Məfələkwe

Ka Luka na, Derewel i məsler i ndo i maslañ hay a tsik na, huya ka Labara Nğwalak eye. Faya ma tsikiye Yesu a slər tay ha ndo i maslañ hay kəkay, tə də ha bazlam nğay kwa a nğay. Tə də ha təday na, ma Zerozelem ada ma gəma neheye tə mbay naha aye, ada a dala neheye tə lawara na bəlay nakə tə zalay Mediterane aye. Ta ge na məsler nakə Yesu a vələtay aye (Luka 24.47-48; Derewel i ndo i maslañ hay 1.8).

Ka madazlay i dərewel nakay na, Yesu a tsal ka təv i Mbəlom (1.9). Anəke na, nənğeye andaya ka təv tay sa bay, ane tuk na, a slərav Məsəfəre Tsədəñña eye a ndo i maslañ hay (Məsler hay 2). Məsəfəre niye a vələtay tsəved məde ha wu neheye bagwar eye Mbəlom faya ma giye, ada Məsəfəre Tsədəñña eye faya ma həlaweye ndo wədeye hay ka məpe mədzal gər ka Yesu.

Hus ka madədo 12 na, Piyer ndo i maslañ i Yesu nənğeye ndo nakə dərewel nakay a tsik faya haladzay aye.

Gawla i Yesu hay tə hutawa dərətsətseh ta təv i bagwar i Yahuda hay andza Yesu (Madədo 3 hus ka 8).

Tə də ha Labara Nğwalak eye a ndo neheye Yahuda hay bay aye (Madədo 8 hus ka 12).

A dazlay ka madədo 13 na, Pol ndo i maslañ i Yesu a zəvay naha faya a Piyer. Yesu Kəriste a zalay a Pol (madədo 9). Madədo 13 hus ka 28 faya ma tsikiye ka mahəhele i Pol nakə a dawa ha Labara Nğwalak eye aye.

<sup>1</sup> A nəkar Tiyofil, mə dərewel ga nakə kurre na watsaka naha aye na, məsler i Yesu nakə a ge, tə matətike nakə a tətik tay ha ndo hay aye tebiye, na pasla a dəma, kwa ka madazlay i məsler nğay,

<sup>2</sup> hus ka mede nğay a mbəlom. Ahəl nakə ki ye nğway a mbəlom zuk bay aye na, kə dətay ha wu hay ta gədan i Məsəfəre Tsədəñña eye a ndo neheye a pala tay andza ndo i maslañ hay aye.

#### *Yesu a gwad ma slərawaye Məsəfəre Tsədəñña eye*

<sup>3</sup> Ma dəba i məməte nğay na, kə lətsa abəra ma mədahan ka bəzatay ha bo a ndo i maslañ nğay hay lele, a dətay ha na, nənğeye andaya. Kə ndza ka təv i gawla nğay hay məhəne kuro kuro fad. Ma məhəne niye kuro kuro fad eye na, a tsikawatay bazlam i Bəy i Mbəlom nakə ma ta ləviye.

<sup>4</sup> Pat eye andaya Yesu faya ta ndiye wu mənday ta gawla nğay hay na, a gwadətay: «Kā yum abəra ma Zerozelem zuk bay. Həbum wu nakə na gwadəkum Bəba Mbəlom a gwad ma vələkumeye.

<sup>5</sup> Yuhana nənğeye a dzəhuəwa tay ha ndo hay na, a yam. Ane tuk na, nəkurom na, ma məndze aza mba tsekweñ na, nəkurom ta dzəhuəbiye kurom ha a Məsəfəre Tsədəñña eye.»

#### *Yesu a tsal a mbəlom*

<sup>6</sup> Ndo neheye ka təv i Yesu aye, ta tsətsah faya, tə gwadətay: «Bəy Maduweñ, ka ta matay ha bəy a ndo i İsrayel hay na, pat eye niye dāw?»

<sup>7</sup> Yesu a mbədətay faya, a gwadətay: «Pat eye kəday na, mata sərə na, nəkurom bay. Mata tsike na, Bəba ga, nənğeye nəte nğweñ gədan nğay andaya məge.

<sup>8</sup> Ane tuk na, ka ta hutumeye gədan ahəl nakə Məsəfəre Tsədəñña eye ma mbəzlaweye fakuma aye. Ka ta tərumeye ndo məde ha labara ga ma

Zerozelem, ka dala i Yahuda, ka dala i Samari ada ka kokway i mändzibəra tebiye.»

<sup>9</sup> Ma dəba i bazlam ŋgay niye hay na, a tsal ha a mbəlom. Ahəl nakə gawla ŋgay hay faya ta zəbiye faya na, pazlay a ŋgaha na abəra ka dəre tay.

<sup>10</sup> Yesu faya ma tsaliye na, nəteye faya ta zəbiye naha faya huya. Tsa na, ndo hay sulo tə peteked kwedek kwedek eye hay ti yaw ka təv tay,

<sup>11</sup> tə gwadatay: «A nəkurom Galile hay, faya ka mətsumeye mazəbe dəre a magərmbəlom na, hərwi mey? Yesu na, ki ye fakuma abəra a mbəlom. Ma ta maweye na, andza nakə ka ŋgatumay, a ye fakuma abəra aye.»

### *Bərük i ndo i maslaŋ hay*

<sup>12</sup> Ndo i maslaŋ i Yesu hay tə tsəne andza niye na, tə mbəzlaw abəra ma tsaholok niye tə zalay Mahəmba i Tetədöz aye, ta mbəda gər a Zerozelem. Tsaholok niye na, bəse ta wuzlah gay. Mede abəra ma Zerozelem a dəma na, ma sliye bəre nəte bay.

<sup>13</sup> Ahəl nakə tə ndisl a Zerozelem aye na, ti ye naha tə tsal a gay nakə ka gər i gay neŋged aye. Tə ndzawa pat pat na, mə dəma. Məzele i ndo neheye tə ndzawa mə gay niye na, Piyer, Yuhana, Yakuba ta Aŋdare, Filip ta Tomas, Bartelemi tə Mata, Yuda wawa i Alfe, Simoŋ ndo məge vəram hərwi dala ŋgay\* ada Yahuda wawa i Yakuba. <sup>14</sup> Nəteye tebiye tə hayawa gər pat pat, ta ŋwas hay, ta Mari may i Yesu ada ta malamar i Yesu. Tə hayawa gər hərwi maduwulay naha me a Mbəlom.

### *Tə pa Matiyas a bəram i Yudas*

<sup>15</sup> Pat wuray na, ndo məpe mədzal gər hay ka Mbəlom tə haya gər. Nəteye tebiye ta giye na, temerre tə kuro kuro sulo. Piyer a lətse a wuzlah tay, a gwadatay:

<sup>16</sup> «Malamar ga hay, wu nakə Məsəfəre Tsədəŋna eye a tsik mə Dərewel i Mbəlom aye na, kə ge bo. A tsik tə bazlam i Davit. A tsik kurre ka Yudas nakə a təra ndo mədatay tsəved a ndo neheye tə gəs Yesu aye.

<sup>17</sup> Yudas na, neŋgeye nəte mə walaŋ may, kə huta məsler andza nəmay.»

<sup>18</sup> Suloy nakə tə vəlay hərwi məkəde gər i ndo aye na, Yudas a səkəm ha guvah. Mə dəma na, a dəd tə hud. Hud ŋgay a nduzl, dende ŋgay hay ti yaw a bəra tebiye.

<sup>19</sup> Ndo i gəma i Zerozelem hay tə tsəne labara niye na, tə zalay a guvah niye tə me i gəma tay guvah i Hakeldama, andza məgwede: Guvah i Bambaz.

<sup>20</sup> Piyer a gwadatay sa: «Azlakwa mawatsa eye mə dərrewel i Dəmes hay na, a gwad:

“Gay ŋgay mâ təra na, rəgay,

ndəray mâ ndza mə gay ŋgay bay.†”

«Mawatsa eye sa na, a gwad:

“Ndo mekelen eye

mâ zla məsler ŋgay.‡”

<sup>21</sup> «Anəke na, a ye ka bo nakə ka zlakweye ndo nəte mə walaŋ i ndo neheye ta zəŋgalawa kway ahəl nakə Bəy Maduweŋ tə nəkway ka həhalawakwa ka gəma ka gəma aye.

<sup>22</sup> Kwa ahəl nakə Yuhana madzəhuḃe ndo a yam a dzəhuḃ Yesu a yam aye hus ahəl ŋgay nakə a ye abəra mə walaŋ kway a tsal a mbəlom aye na, nəteye

\* **1:13** A həlay i Yesu na, Yahuda hay tə gəsawatay me a Roma hay bay, a satay mələve gər tay. Roma ma ləva dala tay bay. † **1:20** Dəmes hay 69.26. ‡ **1:20** Dəmes hay 109.8.

tə nəkway. Ndoweye niye ka zlakweye na, ma ndziye tə nəkway. Ma diye ha labara i mələtsew i Yesu abəra ma mədahaŋ.»

<sup>23</sup> Mə walaŋ i ndo niye hay na, tə pala ndo hay sulo. Ndo niye hay sulo eye na, neŋged məzele ŋgay Yusufa nakə tə zalay Barsabas aye. Tə pa faya məzele mamahkar eye sa, tə zalay Zustus. Ada ndo neŋged tə zalay Matiyas.

<sup>24</sup> Tsa na, ndo niye hay mahaya gər eye ta dūwulay me a Mbəlom, tə gwad: «Bəy Maduweŋ, nəkar nakə ka sər dərev i ndo zezeŋ aye na, dəmay ha way nakə mə walaŋ i ndo neheye sulo ka zla,

<sup>25</sup> hərwi mäge məsler yak aye, a bəram i Yudas nakə a gər ha, a ye a təv nakə a say a neŋgeye aye.»

<sup>26</sup> Ta ndəv ha maduwule me na, tə ge tsakwal. Tsakwal a zla Matiyas, Matiyas a təra makuro gər eye sulo i ndo i maslaŋ hay.

## 2

### *Məsəfəre i Mbəlom a yaw*

<sup>1</sup> Magurlom i Peŋtekot\* a slaw na, gawla i Yesu hay nəteye mahaya gər eye ka təv manəte eye.

<sup>2</sup> Ahəl nakə nəteye mahaya gər eye na, kwayaŋŋa maləve i wuye a tsənew ma magərmbəlom. Maləve i wuye niye na, andza mətasl bagwar eye. A ye fataya, mavəzle ŋgay eye a rah a gay nakə nəteye mandza eye mə dəma aye.

<sup>3</sup> Kwayaŋŋa tə ŋgatay andza dərneħ i ako a yaw, a ŋgəna bo, ti ye tə ndza ka gər i ndo niye hay nəte nəte tebiye.

<sup>4</sup> Nəteye tebiye tə rah ta Məsəfəre Tsədəŋŋa eye ada ta dazlay a mətsike me tə me hay wal wal. Kwa way a tsik andza nakə Məsəfəre Tsədəŋŋa eye a gwaday tsik aye.

<sup>5</sup> Azlakwa pat eye niye na, Yahuda neheye tə paway bəzay a Mbəlom ta tsəved eye, nəteye andaya. Ti yaw ma gəma neheye wal wal ka məndzibara aye mata ndze naha məhəne tsekweŋ ma Zerozelem.

<sup>6</sup> Tə tsəne maləve i wu niye na, tə haya gər tebiye. Nəteye niye tebiye a gatay wadəŋ wadəŋ. Ti ye naha na, tə ŋgatay a ndo niye hay mə gay aye. Kwa way a tsəne mətsike me i ndo məpe mədzal gər niye hay faya a tsik me tə me ŋgay ŋgway.

<sup>7</sup> Nəteye neheye ti ye naha tebiye aye faya ta zəbiye fataya, ada a gatay hərəbəkka. Tə gwad: «Ndo neheye faya ta tsikiye me aye nəteye tebiye na, Galile hay bədəw?»

<sup>8</sup> Ada kwa way kway eye ka tsənakwa nəteye faya ta tsikiye me tə me kway na, ma kəkay?

<sup>9</sup> Mə walaŋ kway na, siye hay ti yaw ma dala i Partiya, ma Madiya ada ma Elam. Siye hay ti yaw ma dala i Mizapotami, ma Yahuda ta Kapados ada ma dala i Poŋtus, ma dala i Azi,

<sup>10</sup> ma dala i Firigiya, ma dala i Pamfeli, ma dala i Ezipt, ta dala Libiya nakə bəse ta gəma i Siren aye. Siye hay ti yaw ma Roma,

<sup>11</sup> ma dala i Kəret ta Arabi. Mə walaŋ tay niye hay na, siye hay tə wa tay nəteye Yahuda hay, siye hay madurlon hay ta təra Yahuda hay matəre. Ada azlakwa ka tsənakwa nəteye faya ta diye tə bazlam i gəma kway hay wu neheye bagwar eye Mbəlom a ge aye.»

<sup>12</sup> Nəteye tebiye a gatay wadəŋ wadəŋ, tə sər wu nakə ta dzaliye bay. Tə tsik mə walaŋ tay, tə gwad: «Wu nakay na, andza məgwede mey?»

\* **2:1** Peŋtekot na, tə me i Gərek. Magurlom i gər i ndzuhosl. Tə ge magurlom eye na, məhəne 50 ma dəba i Pak. I ndo məpe mədzal gər ka Yesu magurlom i məhute Məsəfəre Tsədəŋŋa eye.



13 Siye hay tə ɲgwasə ka ndo məpe gər niye hay ka Yesu aye, tə gwad: «Ndo neheye na, ta kwaya.»

*Piyer a tsik me*

14 Piyer a tsəne bazlam niye na, a lətse. Tə lətse tə siye i ndo i maslan i Yesu niye hay kuro gər eye nətə aye tebiye. Piyer a lətse na, a tsik ta magala, a gwadatay a ndo niye hay: «Nəkurom Yahuda hay ada tə nəkurom neheye tebiye mandza eye ma Zerozelem aye, pumay zləm a bazlam ga neheye na tsikakumeye ada tsənum wu nakə a ge bo aye lele təday.

15 Andza nakə ka dzalum aye na, ndo neheye ta kwaya bay. Hərwi anəke na, mekedə mba zlezle ta kwaya tsa daw?

16 Ane tuk na, wu nakə Zowel ndo mədə ha bazlam i Mbəlom a tsik ahəl niye mə Derewel i Mbəlom aye na, ma giye bo anəke tuk.

17 «Mbəlom a gwad:

Mata dayaw ka mändəve i mändzibəra na, wuye mey?

Na vələteye Məsəfəre ga a ndo hay tebiye.

Wawa kurom hasləka eye hay tə dem kurom hay ta təriye ndo i maslan ga hay.

Na ta bəzatay ha wu wedəye a gawla kurom hay.

Məsi ne ma ta gateye a bagwar kurom hay, na tsikiye me ma nətəye.

18 Ayaw! Pat eye niye na,

na sləratayaweye Məsəfəre ga

a ndo i məsler ga hay,

ta təriye ndo i maslan ga hay.

19 Na ta giye masuwayan mə mbəlom,

ada wu neheye ta gateye hərbaəbəkka a ndo hay aye ka mändzibəra.

Ndo hay ta ɲgateye a bambaz, ta ɲgateye a ako ta genjis eye tərɔələɲɲa.

20 Pat ma ta dəviye sa bay

ada kiye ma təriye ndozza andza bambaz.

Pat eye niye na, pat bagwar eye, pat mədəslay ha gər.

Wu neheye kə ge bo tebiye na,

Bəy Maduweɲ ma deyeweye tuk.

21 Kwa way ka duwulay me a Bəy Maduweɲ mā təma ha na,

Bəy Maduweɲ ma təmiye ha.†»

22 «A nəkurom Israyel hay, pumay zləm a wu nakə na tsikakumeye: Yesu ndo i Nazaret na, ndo nakə Mbəlom a dəkum ha gədan ɲgay tə neɲgeye. Kə ge masuwayan hay wal wal mə walaɲ kurom, kə dəkum ha neɲgeye way na, ka sərɔum.

23 Yesu, neɲgeye Mbəlom a vələkum ha a həlay na, andza nakə a say aye. Wu nakə ka gum ta neɲgeye na, 6a Mbəlom a sər kurre. Nəkurom ka vələmay ha a ndo neheye lele bay aye hay hərwi ada tə dar na ka mayako mazləlmbada eye, ada kə mət.

24 Ane tuk na, Mbəlom kə lətse ahaya abəra na mədahan. Kə mbəla ahaya abəra mə dəretsətseh i mədahan. A ndza ma mədahan huya bay na, hərwi mədahan a sla faya bay.

25 Hərwi Davit kə tsik faya ahəl niye, a gwad:

«Na ɲgataway a Bəy Maduweɲ ga huya kame ga.

Neɲgeye ka tsakay ga

hərwi ada nə dzədzar bay.

26 Hərwi niye dərev ga kə rah ta məɲgwese,

ada bazlam ga faya ma giye dəmes ta məɲgwese.

† 2:21 Zowel 3.1-5.

Bo ga ma zəzukwiye bo lele, na dzaliye wuray sa bay.

<sup>27</sup> Bəy Maduweŋ, ka gəriye ga ha ma təv məndze i mədahaŋ hay bay. Ka gəriye ha neŋ ndo məpe mədzal gər ka nəkar nā ze ma tsəvay bay.

<sup>28</sup> Ka dəŋ ha tsəveď nakə na zəŋgaliye, ma diye ga ha a sifa aye, Ka tərə ga ha ndo maŋgwasə eye hərwi nəkar tə neŋ.<sup>†</sup>»

<sup>29</sup> Piyer a gwadətay sa: «Malar ma ga hay, ka bəba tətə kway Davit na, na sliye faya mətsikakum parakka lele. Neŋgeye na, kə mət. Ta la na ada ka sarakwa ha tsəvay ŋgay andaya bəgom ma təv kway.

<sup>30</sup> Ane tuk na, ahəl niye na, neŋgeye ndo məde ha bazlam i Mbəlom. A sər ha 6a Mbəlom kə tsikay kurre, a gwadətay: «Aza ma dəba yak na, na ta vəliye bəy yak a ndo nəte mə walaŋ i wawa yak hay.<sup>§</sup>»

<sup>31</sup> «Neŋgeye na, 6a kə sər ha kurre Kəriste na, ma lətseweye abərə ma mədahaŋ.

“Mbəlom ma gəriye ha ma təv məndze i mədahaŋ hay bay,

ada bo ŋgay ma ziye ma tsəvay bay.<sup>\*</sup>”»

<sup>32</sup> Piyer a gwadətay sa: «Yesu nakə na tsik faya aye na, Mbəlom kə lətse ahaya abərə ma mədahaŋ. Nəmay tebiye nəmaa həliye na mbal ŋgay.

<sup>33</sup> Ma dəba eye na, Mbəlom kə zla na Yesu, a pa na tə həlay i mənday ŋgay. Mbəlom kə vəlay Məsəfəre Tsədəŋŋa eye nakə Mbəlom a tsik kurre a gwadətay ma ta vəleye aye. Neŋgeye dərmak kə vəlamayaw wu nakə anəke ka ŋgatumay ada ka tsənəm aye.

<sup>34</sup> Davit na, neŋgeye kə tsal a mbəlom təbey, ane tuk na, a gwadətay: “Bəy Maduweŋ Mbəlom a gwadətay a Bəy Maduweŋ ga na:

Dara, ndza tə həlay i mənday ga,

<sup>35</sup> hus a pat nakə neŋ, na piye ndo mənə dəre yak hay a huď i sik yak hay andza wu məpe faya sik aye təday.<sup>†</sup>»

### *Ndo məpe mədzal gər hay ka Yesu ta səkah*

<sup>36</sup> «Nəkurom İsrayel hay tebiye sərüm ha ta dedək, Yesu nakə ka darum na ka mayako mazləmbadə eye na, Mbəlom a tərə ha Bəy Maduweŋ ada ndo mətəme ha ndo hay na, neŋgeye.»

<sup>37</sup> Ndo niye hay tebiye tə tsənə bazlam niye na, dərev a ye fataya abərə. Ta tsətsah ka Piyer ada ka siye i ndo i maslaŋ hay, tə gwadətay: «Malar ma hay, anəke nəmaa giye na, kəkay?»

<sup>38</sup> Piyer a mədətətay faya, a gwadətay: «Gərüm ha mezeleme kurom ada tã dzəhuď kurom ha a yam ta məzele i Yesu Kəriste hərwi ada Yesu ma pəsakumeye ha mezeleme kurom hay. Ka gum andza niye na, Mbəlom ma vəlakumeye Məsəfəre ŋgay Tsədəŋŋa eye.

<sup>39</sup> Hərwi Mbəlom kə tsik kurre, a gwadətay: «Ma vəlakumeye a nəkurom ada a wawa kurom hay. A gwadətay mə vəliye a ndo neheye nəteye mandza eye dəreŋ aye dərmak. Ayaw! Bəy Maduweŋ kway Mbəlom ma vəliye Məsəfəre ŋgay a ndo neheye ma zalateye hərwi ada tã pay bəzay aye.»

<sup>40</sup> Piyer a tsikatay bazlam mekeleŋ eye hay haladzay hərwi məmatay naha dərev ada tã dzala ha. A gwadətay: «Dumara abərə mə walaŋ i ndo neheye səweď eye hay. Gərümay ha bo kurom a Mbəlom mã təma kurom ha.»

<sup>41</sup> Ndo hay haladzay mə walaŋ i ndo niye hay ta təma bazlam i Piyer. Tsa na, ta dzəhuď tay ha a yam. Pat eye niye na, ndo hay ta giye gwezem mahkar tə pa mədzal gər ka Yesu, ta səkah tay ha ndo məpe mədzal gər hay ka Yesu.

‡ 2:28 Dəmes hay 16.8-11. § 2:30 Dəmes hay 132.11. \* 2:31 Dəmes hay 16.10. † 2:35 Dəmes hay 110.1.

### *Məndze i ndo məpe mədzal gər ka Yesu*

<sup>42</sup> Nəteye niye tebiye tə paway zləm a matətike i ndo i maslanj i Yesu neheye ta tətikawatay aye tə metsehe lele. Tə ndzawa ka təv manəte eye, tə ndayawa wu mənday ka təv manəte eye ada ta dūwulaway me a Mbəlom ka təv manəte eye.

<sup>43</sup> Kwa way a ndzawa na, tə madzədzere eye hərwi Mbəlom a gawa masuwayan wal wal tə həlay i ndo i maslanj i Yesu hay.

<sup>44</sup> Ndo məpe mədzal gər hay ka Yesu tebiye, nəteye madzapa eye nəte, wu tay hay tebiye ta ngənawa ha a bo mə walanj tay.

<sup>45</sup> Ta səkamawa ha wu tay hay ada ta ngənawa ha a bo suloy eye kwa a way da ka məge wu ngay nakə a say aye.

<sup>46</sup> Tə hayawa gər pat pat a gay i mədəslay ha gər a Mbəlom, kwa tsekweŋ ta tərətsawa ha bay. Tə ndayawa wu mənday ka təv manəte eye mə gay tay hay. Tə ndayawa wu mənday niye na, ta mənğwese eye, maguŋguze kwa tsekweŋ andaya bay.

<sup>47</sup> Ta zambadəway a Mbəlom ada nəteye niye hay tebiye tə yatay a gər a ndo hay. Andza niye, Bəy Maduweŋ a təmawa tay ha ndo hay pat pat, a səkah tay ha ndo məpe mədzal gər hay ka Yesu ta ndo neheye faya ma təmiye tay ha aye.

## 3

### *Piyer ta Yuhana tə mbəl ha ndo matərə eye*

<sup>1</sup> Pat wuray Piyer ta Yuhana ti ye a gay i mədəslay ha gər a Mbəlom mata dūwulay me a Mbəlom. Ti ye ta bəre mahkar i huwa. Ndo hay ti yawa ta dūwulaway naha me a Mbəlom na, ta bəre mahkar eye niye.

<sup>2</sup> Ndowneye andaya bəse ta məged i gay i mədəslay ha gər a Mbəlom niye. Məged nakə tə zalay məged nakə a le aye. Ndowneye niye na, matərə eye kwa abəra ka məwe ngay. Tə zlawə naha, tə hənawa ha bəse ta məged niye pat pat. A tsətsahawa dala ka ndo neheye ti yawa naha a gay i məvələy wu a Mbəlom aye.

<sup>3</sup> Pat eye niye na, a ngatay a Piyer ta Yuhana ta diye, ta fələkwiye a gay i mədəslay ha gər a Mbəlom. Tsa na, a tsətsah fataya dala.

<sup>4</sup> Piyer ta Yuhana ta ndazl na lele. Tsa na, Piyer a gwadəy: «Zəba famaya lele.»

<sup>5</sup> Tsa na, ndo niye a zəba fataya, a zəzur tay ha tə metsehe lele. Nəngeye a dzala na, ta vələŋeye wu.

<sup>6</sup> Piyer a gwadəy: «Dala andaya fagaya bay tebiye, ane tuk na, na vələkeye na, wu nakə andaya fagaya aye. Neŋ faya na gwadəkeye ta gədanj i Yesu Kəriste i Nazaret lətse, do!»

<sup>7</sup> Tsa na, Piyer a gəs na abəra mə həlay i mənday hərwi madzəne na ka mələtse ha ka mbəlom. Kwayanŋa sik ngay hay tə mandərkukwasl ngay hay tə huta gədanj.

<sup>8</sup> A ndapa a mbəlom tə sik ngay hay lele. Tsa na, a pa bo ka mede. A ye, tə fələkwa ka bo dziye ta ndo i maslanj i Yesu niye hay a gay i mədəslay ha gər a Mbəlom. Ndo niye na, a ye lele ta mandepe a mbəlom tsadəw tsadəw ada tə mazambadəy a Mbəlom.

<sup>9</sup> Ndo hay tebiye tə ngatay faya ma diye kuteŋ kuteŋ lele ada faya ma zambadəye a Mbəlom.

<sup>10</sup> Tə sər ha, nəngeye ndo nakə a rəkawa bəse ta məged nakə a le haladzay i gay i mədəslay ha gər a Mbəlom aye na, nəteye niye tebiye ta dzədzar ada a gatay hərəbəkkə hərwi wu nakə a ge bo ta ndo niye aye.

11 Piyer ta Yuhana nəteye mə mazambal i gay i mədəslay ha gər a Mbəlom nakə tə zalay Mazambal i Salomon ayə. Ndo nakə a mbəl abəra mə matərə aye na, a wudə məgərə tay ha sa bay. Ndo hay haladzay ti ye naha mahway mahway hərwi nəteye tebiye a gatay hərbaəkkə.

12 Piyer a ngatay a ndo neheye ti ye naha haladzay aye na, a gwadətay andza nakay: «Nəkurom ndo i İsrayel hay, ndo nakay a mbəl na, a gakum hərbaəkkə na, hərwi mey? Nəkurom faya ka zəbumeye famaya andza niye na, hərwi mey? Nəkurom faya ka dzalumeye mə gər kurom na, maa mbəl ha ndo nakay na, Piyer ta Yuhana hərwi bo tay eye gədan eye. Tə mbəl ha na, nəteye tə pay bəzay a Mbəlom lele. Ane tuk na, a'ay andza niye bay.

13 Mbəlom i Abraham, Mbəlom i Izak ada Mbəlom i Zakob nakə nəteye neheye ta dıwulay me aye, a bəz ha məzlaə i ndo i məsler ngay Yesu. Nəkurom eye, ka vəlumay ha a halay i Roma hay hərwi ada tã kəf na ada ka kalum ha kame i Pilat. Pilat na, haəe a say məgərə ha.

14 Nəkurom ka kalum ha ndo nakə dādā neŋgeye kə ge mənese bay. Neŋgeye ndo dedək eye. A yakum a gər dıh matsətsehe tã gərakum ha na, ndo məkədə ndo.

15 Andza niye, ka kəfəm na, ndo nakə mə vəliye sifa a ndo hay aye. Ane tuk na, Mbəlom kə lətse ahaya abəra mə walaŋ i mədahaŋ hay. Nəkway tebiye ka sərakwa ha.

16 Ndo nakay anaŋ ka ngatumay, ka sərüm ha aye na, maa vəlay gədan na, məzele i Yesu hərwi nakə nəmaa pa mədzal gər may ka Yesu aye. Ayaw! Ndo nakay a mbəl lele ka ngatumay tə dərə kurom aye na, hərwi nakə nəmaa pa mədzal gər ka Yesu aye.

17 «Malar ga hay, ahəl nakə nəkurom ta bəy kurom hay ka kalum ha Yesu aye na, neŋ na sər ha wu nakə ka gum aye na, ka sərüm bay.

18 Ane tuk na, Mbəlom a ge na, wu nakə a tsik ahəl niye tə bazlam i ndo mədə ha bazlam ngay aye. A gwad: Kəriste na, ma ta giye dərətsətseh.

19 Anəke na, mbədüm ha mede kurom, mbədümaw me ka təv i Mbəlom hərwi ada mã mbatakum ha mənese kurom hay.

20 Ka gum andza niye na, Bəy Maduweŋ Mbəlom mə vəlakumeye zay ada ma ta slərakumaweje Yesu ndo mətəme ha ndo nakə a zla na kurre hərwi kurom aye.

21 Anəke na, kutoŋ Yesu Kəriste ma ndziye mə mbəlom təmad hus a pat nakə Mbəlom ka tərə ha wu hay tebiye andza nakə a dā ha ahəl niye tə bazlam i ndo mədə ha bazlam ngay hay aye.

22 Musa, neŋgeye a gwadətay a bəba tətə kway hay: “Bəy Maduweŋ kurom Mbəlom ma ta slərakumaweje ndo mədə ha bazlam ngay andza neŋ na gwad bəfaw? Neŋgeye na, slala kurom. Ka ta pumay zləm a wu nakə ma ta tsikakumeye tebiye.

23 Ndo weye kə pay zləm a bazlam i ndo mədə ha bazlam i Mbəlom niye bay na, ma ndziye mə walaŋ i ndo i Mbəlom hay bay. Ta kədiye na mədahaŋ eye.\*”

24 «Siye i ndo mədə ha bazlam i Mbəlom hay dərək ta tsik andza i Musa. Ta tsik ka wu nakə mə giye bo ahəl kway nakay anaŋ aye. Kwa Samuyel ada kwa siye i ndo maslaŋ i Mbəlom neheye ti yaw ma dəba ngay aye.

25 Malar ga hay, Mbəlom a tsik wu neheye tə bazlam i ndo mədə ha bazlam ngay hay na, a nəkurom. Andza niye dərək, ahəl nakə Mbəlom a bər dzam ta bəba tətə kurom hay aye na, a gwaday a Abraham: “Na ta piye

\* 3:23 Madayaw abəra ma Ezipt 18.15, 18-19.

ngama ka ndo i mändzibəra hay tebiye tə həlay i wawa i huđ yak hay. Dzam nakə Mbəlom a ɓar aye na, i kurom.<sup>†</sup>

<sup>26</sup> Andza niye, Mbəlom a sləraw ndo i məsler ngay na, hərwi kurom təday. A sləraw na, hərwi məpe fakuma ngama, ada mətsoya kurom ahaya abəra ka tsəved i mənese.»

## 4

### *Piyer ta Yuhana kame i bagwar i Yahuda hay*

<sup>1</sup> Ahəl nakə Piyer ta Yuhana, nəteye faya ta tsikatəye me a ndo hay mba aye na, ndo məvələy wu a Mbəlom hay, bəy i ndo matsəpe gay i mədəslay ha gər a Mbəlom ada ta Saduke hay ti ye naha ka təv tay.

<sup>2</sup> Ti ye naha na, tə ge dərev haladzay ka Piyer ta Yuhana hərwi nəteye faya ta tətikiye tay ha ndo hay, tə gwadatay: «Yesu kə lətsew abəra ma mədahaŋ ada mələtsew i Yesu niye a lətsew aye na, ndo hay ta sliye faya mələtsew abəra ma mədahaŋ.»

<sup>3</sup> Ndo niye hay tə gəs tay ha Piyer ta Yuhana, ta dərəzl fataya a daŋgay. Ta dərəzl fataya na, ta gatay sariya zuk bay, hərwi həvad kə ge tsiy.

<sup>4</sup> Mə walaŋ i ndo neheye tə tsəne matətike i Piyer ta Yuhana aye na, ndo hay haladzay ta dzala ha ka Yesu. Ndo məpe mədzal gər ka Yesu ta səkah, ndo hay tebiye ma giye gwezem zlam.

<sup>5</sup> Tədœ eye i mekedœ na, bəy i Yahuda hay, madugula i Yahuda hay ta ndo mədzanğawa bazlam i Mbəlom mapala eye tə haya gər a Zerozelem.

<sup>6</sup> Mə walaŋ tay niye hay tə haya gər aye na, bagwar i ndo məvələway wu a Mbəlom nakə tə zalay Han aye andaya, Kayif, Yuhana, Aləgəzandər ada tə siye i ndo neheye ma bədgay i bagwar i ndo məvələway wu a Mbəlom tebiye nəteye andaya.

<sup>7</sup> Tə həlataya ahaya ndo i maslaŋ i Yesu niye hay sulo eye kame tay. Tsa na, ta tsətsah fataya, tə gwadatay: «Ka mbəlum ha ndo nakay na, ma kəkay? Ka hutumaw gədaŋ eye na, mənğay? Ada ka mbəlum ha na, ta məzele i way?»

<sup>8</sup> Ta tsətsah fataya andza niye na, kwayaŋŋa Piyer a rah ta Məsəfəre Tsədaŋŋa eye, a gwadatay: «Nəkurom bəy mələve ndo hay ta madugula hay,

<sup>9</sup> ka tsətsahuməye famaya bazlam bəgom na, hərwi nakə nəmaa gay ŋwalak a ndo matəra eye, a mbəl ma kəkay ka tsətsahum famaya andza niye na gwad ba?

<sup>10</sup> Ayaw lele! Kə ge andza niye na, nəkurom sərum ha, nəkurom tebiye tə siye i ndo i İsrayel hay, sərum ha na, ndo nakə a lətse kame kurom neŋgeye zay lele aye na, ta məzele i Yesu Kəriste nakə a yaw abəra na Nazaret aye. Neŋgeye ndo nakə ka darum na ka mayako mazləlmbada eye ada Mbəlom a lətse ahaya abəra ma mədahaŋ aye na, neŋgeye.

<sup>11</sup> Derewel i Mbəlom a tsik faya, a gwad: «Kwar nakə nəkurom ndo madəzle gay hay ka kalum ha aye na,

ka təra kwar nakə ma vəleye gədaŋ a gay aye duh.\*»

<sup>12</sup> «Ka mbakweye faya mətəme na, tə neŋgeye nəte ŋwen. Hərwi ka mändzibəra tebiye Mbəlom kə vəl ndo mekeləŋ eye nakə ma təmiye kway ha aye na, andaya bay.»

<sup>13</sup> Ndo niye hay tə haya gər aye na, a gatay wadəŋ wadəŋ. Hərwi ta zəba ka Piyer ta Yuhana na, ta dzədzar bay, tə tsik me parakka. A gatay wadəŋ wadəŋ wene wene eye na, hərwi nəteye ta tətik wuray kwa tsekwen bay tebiye. Tə sər ha nəteye na, ndo məpay bəzay a Yesu tsa.

† 3:25 Madazlay i wu hay 22.18; 26.4. \* 4:11 Dəmes hay 118.22. Kwar eye niye na, Yesu.

14 Ane tuk na, nəteye faya ta ɲgateye a ndo nakə a mbəl aye dərmak, neɲgeye malətsa eye ka təv tay. Tə sər wu nakə ta mbədatay faya a Piyer ta Yuhana aye bay.

15 Tsa na, tə gwadətay: «Dum abəra mə gay.» Piyer ta Yuhana ti yaw wu tay abəra mə dəma na, nəteye tə mətsa mə gay tə ma ha ka bo bazlam.

16 Tə gwad a bo mə walaɲ tay: «Ndo neheye ka gəkwəye tay ha na, kəkay? Ndo i Zerozelem hay tebiye tə sər ha masuwayaɲ nakə tə ɲgatay aye parakka, maa ge na, Piyer ta Yuhana. Ka slakweye faya məmbədə bay.

17 Ane tuk na, gəkwatay me ada pakwa fataya zluwer na, t̄a tətikatay bazlam nakay a ndo hay tə məzele i Yesu Kəriste bay hərwi ada siye i ndo hay t̄a tsəne labara i masuwayaɲ nakə tə ge aye bay.»

18 Ti ye tə zalatayaw. Piyer ta Yuhana ta mbəda naha gər ka təv tay. Ti ye naha na, tə gatay me, tə gwadətay: «K̄a tsikumətay kəgəbay k̄a tətikumətay a ndo hay tə məzele i Yesu sa bay.»

19 Ane tuk na, Piyer ta Yuhana ta mbədatay faya, tə gwadətay: «Nəkurom na, dzalum ha wu nakə dedek eye kame i Mbəlom aye təday. Lele marəhay ha gər na, a nəkurom tsukuɗu a Mbəlom daw?

20 Nəmaa sliye faya məgər ha matətike wu nakə nəmaa ɲgatay ada nəmaa tsəne aye bay. Nəmaa tsikiye huya.»

21 Ndo niye hay mahaya gər eye tə tsəne andza niye na, tə pa fataya zluwer haladzay sa. Tsa na, tə gər tay hay, ti ye wu tay. Tə gər tay ha na, ta huta fataya məneşe nakə da məgatay dəretsətseh aye bay, hərwi siye i ndo hay nəteye tebiye faya ta zambadəye a Mbəlom hərwi wu nakə Piyer ta Yuhana tə ge aye.

22 Ndo niye tə mbəl ha ta masuwayaɲ aye na, məve ɲgay ma ziye məve kuro kuro fad.

### *Maduwule me i ndo məpe mədzal gər hay*

23 Tə gər tay ha Piyer ta Yuhana. Tə gər tay ha na, ta mbəda gər, ti ye ka təv i ndo məpe mədzal hay ka Yesu. Ti ye naha na, ta təkəratay wu nakə bagwar hay i ndo neheye tə vəlaway wu a Mbəlom aye ta madugula hay i Yahuda hay tə tsik aye.

24 Tə tsəne bazlam niye na, kwayaɲɲa nəteye tebiye tə dzapa nəte, tə pa bo ka maduwulay me a Mbəlom. Tə gwadəy naha a Mbəlom: «Bəy Maduweɲ, maa ge məgərmbəlom ta dala, ta bəlay ada tə wu neheye mə dəma tebiye aye na, nəkar.

25 Maa tsik me tə bazlam i bəba tətə may Davit ndo i məsler i yak na, nəkar. Neɲgeye a tsik ta gədaɲ i Məsəfəre Tsədəɲɲa eye, a gwad:  
“Ndo hay tebiye tə ge mevel na, kemey?

Tə ma ha ka bo bazlam na, hərwi mey?

26 Bagwar i bəy i dala i məndzibəra hay ta ləva bo məge vəram.

Bəy hay ta haya gər məge vəram ta Bəy Maduweɲ Mbəlom ada ta ndo nakə a pay dzagwa i bəy a gər aye.”

27 «Andza niye dedek, ta haya gər ma gəma nakay. Herod tə Poyos Pilat ta gəma hay ada ndo i Israyel hay ta haya gər məge vəram ka Yesu ndo i məsler yak tsədəɲɲa eye. Neɲgeye nakə ka pay dzagwa i bəy a gər aye.

28 Wu nakə tə ge andza nakay aye na, andza i yak nakə ka tsik kurre a saka məge ta gədaɲ yak aye.

29 Anəke na, Bəy Maduweɲ may, dzəna may abəra ka təv i sewed tay neheye tə gamay aye tey. Vələmay gədaɲ yak ada nəmaâ da ha bazlam yak ta dedek.

30 Vələmay gədaɲ hərwi ada nəmaâ mbəl tay ha ndo hay, hərwi ada nəmaâ ge masuwayaɲ hay wal wal ta məzele i Yesu, ndo i məsler yak tsədəɲɲa eye.»

<sup>31</sup> Ta ndəv ha mađuwulay me a Mbəlom na, təv nakə nəteye mahaya gər eye mə dəma aye a bəl haladzay dzeki6 dzeki6. Nəteye niye tebiye, Məsəfəre Tsədanğa eye a rahatay a bo. Kwayanğa tə pa bo ka məde ha bazlam i Mbəlom ze madzədzere.

### *Məndze nəte i ndo məpe mədzal gər hay ka Mbəlom*

<sup>32</sup> Ndo neheye ta tərə ndo məpe mədzal gər hay ka Yesu aye na, nəteye tebiye tə ndzawa na, nəte, ta wuda bo lele ada mədzal gər tay nəte. Ndəray kwa nəte mə walaŋ tay mətsike nakay na, wu ga na, andaya bay. Mə walaŋ tay wu tay hay tebiye ta ŋgənwawa ha a bo mə walaŋ tay.

<sup>33</sup> Ndo i maslaŋ i Yesu hay tə dəwa ha bazlam i mələtsew i Bəy Maduweŋ Yesu abəra ma mədahaŋ ta gədaŋ haladzay. Tə gwadawa: «Nəmaa ŋgatay kə lətsew abəra ma mədahaŋ.» Ada Mbəlom a pa ŋgama haladzay ka ndo məpe mədzal gər hay.

<sup>34</sup> Ndəray mə walaŋ tay kwa tsekweŋ wu a kətsay bay. Ndo neheye guvah tay hay kəgəbay gay tay andaya na, ta səkəmawa ha. Suloy i wu nakə ta səkəm ha aye na, ti yawa ahaya

<sup>35</sup> ada tə vəlawatay a ndo i maslaŋ i Yesu hay. Ma dəba eye na, ta ŋgənwawa ha suloy eye kwa a way da andza nakə a say aye.

<sup>36</sup> Andza niye ndoweje andaya tə zalay Yusufa. Ndo i maslaŋ i Yesu hay tə pa faya məzele na, Barnabas, andza məgwede: Ndo nakə ma gwadije tete a siye i ndo hay aye. Neŋgeje slala ŋgay na, Levit hay. Tə wa na ma gəma nakə tə zalay Sipəre aye.

<sup>37</sup> Neŋgeje a ye, a səkəm ha guvah ŋgay. Tsa na, a zla ahaya suloy eye, a vəlatay a ndo i maslaŋ i Yesu hay.

## 5

### *Maraw me i Ananiyas ta Safira*

<sup>1</sup> Ane tuk na, ndoweje andaya tə zalay Ananiyas. Tə zalay a ŋgwas ŋgay Safira. Pat wuray na, ta səkəm ha guvah tay tə gwad ayaw mə walaŋ tay.

<sup>2</sup> Ananiyas a həl faya abəra ka suloy i guvah niye, a ye ha siye a vəlatay a ndo i maslaŋ i Yesu hay. Suloy nakə a həl faya abəra aye na, ŋgwas ŋgay a sər faya lele.

<sup>3</sup> A ye naha na, Piyer a gwaday: «Ananiyas, ka gəray ha dərev yak a Fakalaw na, hərwi mey? Ka gər ha siye i suloy i guvah yak a mətagay, ka zlaw tsekweŋ, ka raway me a Məsəfəre Tsədanğa eye na, hərwi mey?

<sup>4</sup> Ahəl nakə ka səkəm zuk bay aye na, guvah yak wu yak bəna i ndəray daw? Ada suloy i guvah nakə ka səkəm ha aye na, i yak bədaw? Ka dzala mə gər yak məge wu andza nakay na, ma kəkay? Ka raway me na, a Mbəlom bəna, a ndo hay bay.»

<sup>5</sup> Ananiyas a tsəne bazlam niye hay na, a dəd abəra ka mbəlom. Kwayanğa a mət tsədək tsədək. Ndo neheye tə tsəne labara niye aye na, nəteye tebiye ta dzədzar haladzay.

<sup>6</sup> A mət na, gawla hay ti yaw tə mbəkwa na mədahaŋ. Tsa na, tə zla na, ti ye tə la na.

<sup>7</sup> Mazlambar ma giye bəre mahkar na, ŋgwas i Ananiyas a yaw a fələkwa a gay. A yaw na, kə sər ka wu nakə a ge bo aye bay.

<sup>8</sup> A fələkwa naha a gay na, Piyer a tsətsah faya, a gwaday: «Tsikeŋ, suloy i guvah kurom nakə ka səkəmum ha ta zal yak aye na, andza nakay daw?»

Ŋgwas niye a mbəday faya, a gwaday: «Ayaw! Nəmaa səkəm ha na, suloy eye andza nakay.»



<sup>9</sup> Piyer a gwadáy: «Ka mum ha ka bo bazlam mə walañ kurom hərwi madzəgur me ka Məsəfəre i Bəy Maduweñ na, kəkay? Tsəne, ndo neheye tə la zal yak aye, nəteye andaya malətsa eye ka mæged tsiy ada ta deyeweye ta zliye kar dərmak.»

<sup>10</sup> Piyer a tsikay andza niye na, kwayañña a dəd ka sik i ndo i maslañ i Yesu niye hay. Tsa na, a mət. Gawla hay ti yaw, tə fələkwa naha a gay. Ti ye naha na, kə mət. Tə zla na, ti ye ha tə la na ka tsakay i zal ŋgay.

<sup>11</sup> Ndo mæpe mædzal gər hay ka Yesu Kəriste tebiye ada tə siye i ndo neheye tə tsəne labara niye aye na, ta dzədzar haladzay.

### *Ndo i maslañ hay tə gawa masuwayaŋ wal wal haladzay*

<sup>12</sup> Ndo i maslañ hay tə gawa masuwayaŋ wal wal haladzay mə walañ i ndo hay. Ndo mæpe mædzal gər hay ka Yesu tə hayawa gər a dalamətagay i gay i mædəslay ha gər a Mbəlom, mə Mazambal i Salomon.

<sup>13</sup> Ndo neheye tə pa mædzal gər ka Yesu təbey aye na, zluwer a gatay mede ka təv tay. Ane tuk na, ndo hay tebiye tə dəslatay ha gər.

<sup>14</sup> Ndo hay haladzay faya ta səkañhiye, hasləka hay ta ŋgwas hay tə dzala ha ka Bəy Maduweñ. Ndo mæpe mædzal gər hay ta səkah haladzay.

<sup>15</sup> Hərwi masuwayaŋ neheye ndo i maslañ hay tə ge aye na, ndo hay tə həlawa naha ndo i dəvats hay. Tə həlawa tay naha ka slələh kəgəbay ka hubok. Tə pawa tay ha ka tsakay i tsəved hərwi ada ahəl nakə Piyer ma diye tə dəma aye na, kwa kəkay mezek ŋgay kə husa ka ndo nəte mə walañ tay ma mbəliye.

<sup>16</sup> Ndo hay haladzay ti yawaw abəra mə gəma neheye tə mbay naha a Zerozelem aye. Tə həlawa naha ndo i dəvats ta ndo neheye məsəfəre lele bay eye hay mə bo tay aye. Ndo i maslañ hay tə mbəl tay ha tebiye.

### *Tə gəs tay ha ndo i maslañ hay*

<sup>17</sup> Bagwar i ndo məvələway wu a Mbəlom ta ndo neheye tə paway bəzay aye, andza mægwede ta Saduke hay, tə tsəne ndo i maslañ hay faya ta giye masuwayaŋ haladzay na, a ndalatay, dərev tay a rah ta sələk. Tə ma ha ka bo bazlam, tə gwad: «Gəsakwa tay ha!»

<sup>18</sup> Tsa na, ti ye tə gəs tay ha. Ti ye tə pa tay a daŋgay.

<sup>19</sup> Ane tuk na, ta həvad ahəl nakə ndo i maslañ hay nəteye ma daŋgay aye na, gawla i Mbəlom a ye, a həndəkətatay na mæged i gay i daŋgay niye. A həlatay ahaya ndo i maslañ niye hay abəra mə dəma, a gwadətay:

<sup>20</sup> «Dum ta dumatay ha labara i sifa wədəye a ndo hay ma dalamətagay i gay i mædəslay ha gər a Mbəlom!»

<sup>21</sup> Ndo i maslañ hay ta təma bazlam i gawla i Mbəlom nakə a tsikatay aye. Pərik i mekedə na, tə həl bo ti ye a dalamətagay i gay i mædəslay ha gər a Mbəlom. Ti ye naha tə pa bo ka matətikatay a ndo hay.

Bagwar i ndo məvələway wu a Mbəlom ta ndo neheye nəteye dziye, tə zalatay a madugula i Yahuda hay, tə haya gər. Tə ma ha ka bo bazlam mə walañ tay. Tsa na, tə slər ndo hay ka ndo i maslañ hay a gay i daŋgay, tə ye tə həlatay ahaya.

<sup>22</sup> Ane tuk na, ndo neheye ti ye, tə husa a dəma na, ta huta tay ha mə gay i daŋgay bay. Tə maw ka təv i ndo neheye tə slər tay naha aye, tə matay ha labara eye.

<sup>23</sup> Tə gwadətay: «Nəmaa ye naha, nəmaa ndzay a gər a gay i daŋgay na, madərəzla eye lele ada ndo matsəpe mæged hay nəteye andaya faya ta tsəpiye. Ane tuk na, nəmaa həndək na mæged na, nəmaa huta ndəray kwa nəte bay!»

<sup>24</sup> Tə tsəne labara niye andza niye na, bəy i ndo matsəpe gay i mədəslay ha gər a Mbəlom ta bagwar hay i ndo neheye tə vəlaway wu a Mbəlom aye tə sər wu nakə ta dzaliye bay. Ta tsəsay a gər tay, tə gwad: «Matəra ta ndo i məsler niye hay na, wuye mey?»

<sup>25</sup> Ahəl naka nəteye faya ta dzaliye andza niye na, ndoweye a yaw ka təv tay, a gwadatay: «Təsum! Ndo neheye ka pum tay a daŋgay aye na, nəteye faya ta tətikateye a ndo hay mə gay i mədəslay ha gər a Mbəlom!»

<sup>26</sup> Tə tsəne andza niye na, kwayanŋa bəy i ndo matsəpe gay i mədəslay ha gər a Mbəlom ta ndo ŋgay hay, ti ye mata ma tay ahaya ndo i maslanj niye hay. Ane tuk na, ti ye tə ma tay ahaya na, ta gatay dəretsətseh bay hərwi ta dzədzar ta ndo hay, ta ta kaliye tay ha tə kwar.

### *Ndo i maslanj hay kame i sariya*

<sup>27</sup> Ti ye tə həlatay ahaya na, ti ye tay ha kame i madugula i Yahuda hay. Bagwar i ndo məvəlaway wu a Mbəlom a pa bo ka matsətsehe fataya abəra bazlam.

<sup>28</sup> A gwadatay: «Nəmaa gakum me ka matətikatay a ndo hay ta məzele i Yesu bədaw? Ada ka gum na, mey? Nəkurom na, tsəkam matətikatay a ndo hay ma wuzlahgəma i Zerozelem tebiye na, kəkay? Ada a sakum məgwede maa kəd na ndo niye na, nəmay daw?»

<sup>29</sup> Piyer tə siye i ndo i maslanj hay ta mbədatay faya, tə gwadatay: «Marəhay ha gər na, a Mbəlom bəna a ndo hay bay.

<sup>30</sup> Ka darum na Yesu ka mayako mazləmbada eye hərwi ada mâ mət. Ane tuk na, Mbəlom i bəba tətə kway hay kə lətse ahaya abəra ma mədahanj.

<sup>31</sup> Mbəlom kə lətse ahaya abəra ma mədahanj ta gədanj ŋgay. Kə pa na a bəy, nəŋgeye ndo mətəme ha ndo hərwi ada İsrayel hay tâ mbəda ha mede tay. Ta huta, Mbəlom ma pəsatay ha mezeleme tay hay.

<sup>32</sup> Nəmay na, ndo məhəle mbal i wu neheye a ge bo aye, nəmay ta Məsəfəre Tsədanj aye nakə Mbəlom a vəlatay a ndo neheye ta rəhay ha gər aye.»

<sup>33</sup> Tə tsəne bazlam niye na, a ndalatay haladzay. A satay mədəke tay ha ndo i maslanj hay.

<sup>34</sup> Ane tuk na, Farisa wuray andaya məzele ŋgay Gamaliyel. Nəŋgeye na, ndo mədzanğawa bazlam i Mbəlom mapala eye. Ndo hay tebiye ta təmawa bazlam ŋgay. A lətse mə walaŋ i ndo niye hay mahaya gər eye, a gwadatay: «Ndo neheye tâ ye abəra kənanj tsekweŋ təday.»

<sup>35</sup> Ndo i maslanj hay ti yaw abəra mə dəma na, a gwadatay: «İsrayel hay, gum metsehe hərwi wu nakə a sakum məgatay a ndo neheye.

<sup>36</sup> Ndo niye məzele ŋgay Tiyodas aye na, mâ makumaw a gər. A yaw ahəl niye a gwad nəŋgeye na, bagwar i ndo. Ndo hay ta giye temerre fad ta pay bəzay. Ane tuk na, ta kəd na. Ndo neheye tə pay bəzay aye ta ŋgəna gər tebiye. Kwa ndəray ka ləkaw bay.

<sup>37</sup> «Ma dəba ŋgay na, ndoweye andaya dərmak, məzele ŋgay Yudas. Nəŋgeye ndo i Galile. Nəŋgeye a ndohwaw ahəl i məpesle ndo, kə zalatay a ndo hay haladzay ka məpay bəzay. Nəŋgeye dərmak ta kəd na ada ndo neheye tə pay bəzay aye ta ŋgəna gər tebiye kweye kweye.

<sup>38</sup> Neŋ faya na tsikakumeye anəke, kâ mətsum ka ndo neheye bay, gərüm tay ha tâ ye wu tay. Hərwi kə ge mədzal gər tay, ta məsler tay, ti yaw ma ndo hay na, ta ndziye bay. Ta dziye.

<sup>39</sup> Ane tuk na, kə ge məsler tay a yaw abəra mə həlay i Mbəlom na, ka slumeye faya məmbete ha bay. Gum metsehe lele, faya ka gumeye vərəm na, ka Mbəlom duh!»

<sup>40</sup> Ndo niye hay mahaya gər eye ta təma bazlam i Gamaliyel. Tə zalatay a ndo i maslan hay sa. Ti ye naha, tə ndaşa tay ha. Tə gwadətay: «Dada kâ tsikumay me a ndəray tə məzele i Yesu sa bay.» Tsa na, tə gər tay ha.

<sup>41</sup> Ndo i maslan i Yesu niye hay ti yaw abəra mə walañ i məhay gər tay niye tə mənğwese hərwi dəretsətseh nakə tə gatay hərwi məzele i Yesu aye.

<sup>42</sup> Duh ta tətikawa ada tə dawa ha mə gay i madəslay ha gər a Mbəlom ada mə gay tay hay pat pat tə gərawa ha bay, Yesu na, Kəriste.

## 6

### *Tə pala ndo hay tasəla hərwi madzəne ndo i maslan i Yesu hay*

<sup>1</sup> Ahəl niye na, ndo məpe mədzal gər hay ka Yesu faya ta səkahiye haladzay. Ane tuk na, ndo məpe mədzal gər neheye tə tsik me i Gərek aye na, tə ge dərev ka ndo məpe mədzal gər neheye nəteye tə tsik bazlam i Yahuda hay aye. Tə ge dərev na, hərwi ahəl nakə ta nğənatwatay wu mənday a madakway i nğwas hay aye na, tə vəlawatay a madakway i nğwas tay hay təbey.

<sup>2</sup> Ndo i maslan neheye kuro gər eye sulo aye, tə hayatay gər a ndo məpe mədzal gər hay ka Yesu, tə gwadətay: «Nəmaa gəriye ha məde ha bazlam i Mbəlom hərwi məmətse mənğəne wu mənday bay.

<sup>3</sup> Hərwi niye malamar hay, pəlum ndo hay tasəla mə walañ kurom. Ka pəlumeye na, ndo i nğwalak hay, ndo neheye nəteye maraha eye ta Məsəfəre Tsədənğa eye ada tə sər gər lele aye. Nəmaa vəliye məsler i mənğəne wu mənday na, a həlay tay.

<sup>4</sup> Nəmay, nəmaa dūwulay me a Mbəlom ada ta məde ha bazlam nğay a ndo hay.»

<sup>5</sup> Bazlam tay niye a yatay a gər a ndo hay tebiye. Tsa na, tə pala ndo hay tasəla. Ndo makurre eye na, Etiyen, ndo nakə ta mədzal gər lele ada maraha eye ta Məsəfəre Tsədənğa eye, Filip, Pərakor, Nikanor, Timon, Parmenas ada Nikolaz ndo i gəma i Ançiyos nənğeye a gawa kule, ane tuk na, ahəl niye na, ka dazlay a məpay bəzay a kule i Yahuda hay.

<sup>6</sup> Tsa na, ti ye tay ha ka təv i ndo i maslan i Yesu hay. Ndo i maslan i Yesu hay tə pa fataya həlay ada ta dūwulay me a Mbəlom.

<sup>7</sup> Bazlam i Mbəlom a dā a zləm haladzay. Ndo məpe mədzal gər hay ta səkah haladzay ma Zerozelem ada ndo məvəlay wu a Mbəlom hay haladzay tə dzala ha ka Yesu.

### *Tə gəs na Etiyen*

<sup>8</sup> Etiyen na, ndo nakə nəte mə walañ i ndo neheye tə pala tay tasəla aye. Nənğeye na, Mbəlom kə pa faya nğama haladzay. Ka tsəved i Mbəlom na, nənğeye gədan eye haladzay. A gawa masuwayañ hay mə walañ i ndo hay.

<sup>9</sup> Siye i Yahuda hay nəteye andaya, tə haya gər a gay i madūwule me nakə tə zalay gay i madūwule me i beke neheye tə gər tay ha aye. Ti yaw ma gəma i Siren ada ma gəma i Aləgəzəndəri, ti yaw ma dala i Silisi ada ma dala i Azi. Nəteye niye tebiye ta təma bazlam i Etiyen bay, faya ta kədiye wuway ta nənğeye.

<sup>10</sup> Ane tuk na, ndo niye hay tə mba ka Etiyen tə bazlam bay, hərwi maa vəlay ndaraw ka mətsike me na, Məsəfəre i Mbəlom.

<sup>11</sup> Tə vəlatay wu a ndo hay, hərwi ada ndo niye hay tā raw me tā gwad na: «Nəmaa tsəne faya abəra bazlam, faya ma tsəleye ka gər a Musa ada faya ma tsəleye ka gər a Mbəlom.»

<sup>12</sup> Tə suta faya ndo hay, madugula hay ada ta ndo mədzaŋgawa bazlam i Mbəlom mapala eye ka Etiyen. Tsa na, tə wuya kurah ka Etiyen, tə gəs na. Ti ye ha kame i madugula i Yahuda hay.

<sup>13</sup> Tə həl naha ndo mədəse faya parasay hay, tə gwad: «Ndo nakay na, faya ma tsikiye wu lele bay eye ka gay i mədəslay ha gər a Mbəlom ada ka bazlam i Musa mapala eye.

<sup>14</sup> Nəmaa tsəne faya abəra a gwad: Yesu ndo i Nazaret ma deyeweye, ma mbəzliye ha gay i mədəslay ha gər a Mbəlom ada ma mbədiye ha kule kway nakə Musa a vəlakway aye.»

<sup>15</sup> Ndo niye hay tebiye nəteye mandza eye mə gay i məhay gər aye, tə ma ha dəre ka Etiyen. Ta zəba faya, tə ŋgatay na, da'ar ŋgay a dəv andza i gawla i Mbəlom.

## 7

### *Bazlam i Etiyen*

<sup>1</sup> Bagwar i ndo məvəlaway wu a Mbəlom a tsətsah ka Etiyen, a gwaday: «Wu nakə tə tsik fakaya na, dedək dəw?»

<sup>2</sup> Etiyen a mbəday faya, a gwaday: «Malamar ga hay ta bəba ga hay, tsənum wu nakə na tsikakumeye təday. Mbəlom nakə a ze wu hay tebiye ta məzlaḅ aye a bəzay ha bo a bəba tətə kway Abraham ka dala i Mizapotami kurre ahəl nakə ki ye a Haran zuk bay aye,

<sup>3</sup> ada a gwaday: “Lətse abəra ma gəma yak ada gər ha ndo yak hay, do a gəma nakə na dəkeye faya aye.\*”

<sup>4</sup> «Yaw! Abraham a tsəne bazlam i Mbəlom na, a lətse abəra ma Kaladeyen hay, a ye mata ndze ma Haran. Ma dəba eye bəba ŋgay a mət na, Mbəlom a zla na abəra ma Haran, a ye ha a gəma nakay anan nəkway mandza eye mə dəma aye.

<sup>5</sup> Mə dəma na, Mbəlom kə vəlay guvah i məda ŋgay kwa tsekweŋ bay, kwa dala tsekweŋ bəbay na, kə dəsay bay. Ba Mbəlom kə tsikay kurre, a gwaday: “Gəma nakay na, na ta vəlakeye ha tebiye. Aza nəkar andaya sa bay na, wawa i huḍ yak hay ta ndziye mə dəma, ma təriye i tay.” Ahəl niye Mbəlom a tsikay a Abraham na, wawa ŋgay andaya kwa nəte zuk bay.

<sup>6</sup> Wu nakə Mbəlom a tsikay aye na, a gwaday: “Wawa i huḍ yak hay ta diye, ta ndziye mə gəma i ndo hay. Mə dəma na, ta təriye tay beke eye hay. Ta gateye dəretsətseh. Ta ndziye məve temerre fad mə dəretsətseh.

<sup>7</sup> Ane tuk na, na ta giye sariya ka ndo i gəma niye hay tə gatay dəretsətseh aye. Ma dəba eye na, ta diye abəra ma gəma nakay, ta diye ta dəslən ha gər ma təv nakə ta ndziye mə dəma aye.†”

<sup>8</sup> Mbəlom a bər dzam ta Abraham, a day ha na, ta mədəse bo. Ma dəba eye, Abraham a wa Izak, a ge məhəne tsamaḥkar na, a dəs na. Izak a wa Zakob, Izak a dəs na. Zakob dərmak a wa wawa hay kuro gər eye sulo. Nəteye neheye ta tərə bəba tətə kway hay na, Zakob a dəs tay ha dərmak.

<sup>9</sup> «Bəba tətə kway hay tə nay dəre a malamar tay nakə nəte mə walaŋ tay tə zalay Yusufa aye. Tə gəs na ta səkəm ha beke eye a gəma i Ezipt. Ane tuk na, Mbəlom ka tsəpa na.

<sup>10</sup> Mbəlom kə təma ahaya Yusufa abəra mə dəretsətseh hay tebiye. A vəlay mətsehe ta ŋwalak i bo ka dəre i bəy nakə a ləva Ezipt tebiye, tə zalay Farawon aye. Nəgəye a pa na bəy eye ka dala i Ezipt ada a ləvay gər a ndo neheye mə gay ŋgay aye tebiye.

\* 7:3 Madazlay i wu hay 12.1. † 7:7 Zəba mə Madazlay i wu hay 15.13-14 ada mə Madayaw abəra ma Ezipt 3.12.

11 «Ma dəba eye na, mandərzlan a ge ka dala i Ezipt tebiye ada ka dala i Kanan. Mandərzlan niye a ge na, mandərzlan bagwar eye. Ndo hay ta sa dəretsətseh haladzay. Bəba tətə kway hay tə huta wu mənday kwa tsekwen bay tebiye.

12 Zakob a tsəne wu mənday andaya ma Ezipt na, a slər wawa ngay niye hay ta tərə bəba tətə kway aye. A slər tay ha makurre eye.

13 Ta mbəda gər masulo eye na, Yusufa a dətay ha bo ada Farawon bəy bagwar eye a sər ha nəteye na, gwala i Yusufa hay.

14 Tsa na, Yusufa a slər ndo hay ka bəba ngay Zakob ta ndo i gay ngay hay tebiye. Nəteye tebiye na, kuro kuro tasəla gər eye zləm.

15 Zakob tə həl bo, ti ye a Ezipt ta ndo i gay ngay hay. Zakob a mət mə dəma ada bəba tətə kway hay dərma tətə mət mə dəma.

16 Mədahan tay na, tə həlawa a gəma nakə tə zalay Sisem aye. Tə pawa a tsəvay nakə Abraham a səkəm abəra ka wawa i Hamor ma gəma i Sisem ta suloy aye.

17 «Wu nakə Mbəlom a tsikay kurre a Abraham aye na, mazlambar həlay eye kə ndislew. Gwala kway hay tə wa bo. Ta səkah məwe bo haladzay ma Ezipt.

18 Bəy nakə a sər Yusufa aye na, andaya sa bay. Tə pa na bəy wədəye nakə faya ma ləviye dala i Ezipt aye. Nəngəye na, a sər Yusufa bay.

19 Bəy niye bagwar eye a vatay gər a bəba tətə kway hay. A gawatay dəretsətseh haladzay ada a gawatay kuton ka məkwetse wawa tay a pesl ada tətə mət.

20 Həlay niye na, tə wa na Musa. Musa a le haladzay ada a yay a gər a Mbəlom. Tə wa na na, tə gəl na kiye mahkar mə gay i bəba ngay.

21 Ma dəba eye na, tə gər ha. Dem i Farawon a ndzay a gər, a zla na. A ye ha a gəl na andza wawa ngay.

22 Andza niye, Musa a gəl bo na, a zla metsehe ta ndaraw i Ezipt hay. A tərə ndo ta məzlaḅ eye hərwi bazlam ngay neheye a tsikawa aye ta məsler neheye a gawa aye.

23 «Musa a ge məve kuro kuro fad na, a say mede mata dzəne tay ha gwala ngay Israyel hay.

24 A ye na, a ngatay a ndo i Ezipt faya ma gəye dəretsətseh a ndo nəte mə walan i Israyel hay. Tsa na, a ye naha a dzəna na ndo niye faya ta gəye dəretsətseh aye. A kəf na ndo i Ezipt niye mədahan eye.

25 Musa a dzala na, Israyel malamar ngay hay tə sər ha Mbəlom ma ta təmiye tay ha abəra mə dəretsətseh tətə həlay ngay. Ane tuk na, tətə sər bay.

26 Tədə eye Musa a ndzatay a gər a Israyel hay sulo faya ta kədiye bo. A say a Musa manğəne tay ha ada tətə ndza zay mə walan tay. A gwaday: “Dzam ga, nəkurom ta malamar tuk na, ada ka guməye dəretsətseh a bo kurom ta məkədə bo na, hərwi mey?”

27 Ane tuk na, ndo nakə faya ma gəye dəretsətseh a malamar ngay aye na, a pay həlay a Musa, a gwaday: “Maa pa kar bəy ada ndo məge may sariya na, way?”

28 A saka məkədə ga andza nakə ka kəf ndo i Ezipt məvenəy aye sa daway?”

29 Musa a tsəne andza niye na, a hway, a ye ngway ka dala i Madiyan. Mə dəma na, a zla ngwas. Tə wa wawa hasləka eye hay sulo.

30 «Ma dəba i məve kuro kuro fad na, Musa nəngəye huya ma gəma niye mə makulkwandah aye. Pat wuray na, nəngəye bəse ta mahəmba i Sinay. Gawla

i Mbəlom a yaw, a bəzay ha bo. Musa a ɲgatay na, ma ako ka gay i dak nakə faya ma təmiye aye.

<sup>31</sup> Musa a ɲgatay andza niye na, a gay hərbaəəkka. Ane tuk na, ahəl nakə neɲgeye faya ma həndədiye naha faya bəse mazəbe faya na, a tsəne mətsike me i Bəy Maduweɲ, a gwadayaw:

<sup>32</sup> “Neɲ Mbəlom i bəba tətə yak hay, Mbəlom i Abraham, Mbəlom i Izak, ada Mbəlom i Zakob.” Musa a tsəne andza niye na, a dzədzar, zluwer a gay. Tsa na, a say mazəbe dəre ka ako niye sa bay.

<sup>33</sup> Mbəlom a gwadayaw sa: “Musa, tsok na tahərak abəra mə sik, hərwi təv nakay nəkar mə dəma aye na, təv tsədanɲa eye.

<sup>34</sup> Faya ta gateye dəretsətseh a ndo ga hay ma Ezipt kəkay na, na ɲgatay. Na tsəne mətuwe tay ada na yaw na, mata mbəle tay ha. Na sləriye kar ha, do anəke a Ezipt.<sup>‡</sup>”

<sup>35</sup> «Musa neɲgeye nakə Israyel hay tə kal ha, tə gwaday: “Maa pa kar bəy ada ndo məge may sariya na, way?” aye. Ane tuk na, Mbəlom a slər ka təv tay hərwi ada mə tərə bəy tay ada ndo mətəme tay ha abəra mə dəretsətseh na, neɲgeye. Mata slərə na ka məsler niye na, gawla i Mbəlom nakə a bəzay ha bo ma ako ka gay i dak aye.

<sup>36</sup> Maa ndzatay kame a Israyel hay məndohwaw abəra ma Ezipt na, neɲgeye. Kə ge masuwayaɲ hay wal wal mə dəma. Kə ge kame i Bəlay Ndozza eye ada mə makulkwandah dərmak hus a məve kuro kuro faɖ.

<sup>37</sup> «Maa gwadatay a Israyel hay: “Mbəlom ma ta slərakumaweɲe ndo məde ha bazlam ɲgay andza neɲ. Ma zliye na, abəra ma gwala kurom<sup>S</sup>” na, Musa.

<sup>38</sup> Sa na, ahəl nakə Israyel hay nəteɲe mahaya gər eye mə makulkwandah aye na, maa lətse mə walaɲ i bəba tətə kway ta gawla nakə a tsikawatayaw me mə mahəmba i Sinay aye na, Musa. Gawla i Mbəlom ma tsikataweɲe bazlam nakə ma vəliye sifa aye ada neɲgeye ma makweye ha.

<sup>39</sup> «Ane tuk na, bəba tətə kway hay ta kərah mətəme bazlam ɲgay. Ta kal na a pesl. A satay mambəde gər ka dala i Ezipt.

<sup>40</sup> Tə gwaday a Aronɲ: “Lambadamay mbəlom hay hərwi məzle kame kway. Hərwi ka sərəkwa wu nakə a ndzay a gər a Musa, ndo məhələkway ahaya abəra mə Ezipt na, ka sərəkwa bay.<sup>\*</sup>”

<sup>41</sup> Tsa na, ta lambad kule andza sla wawa eye andza mbəlom tay. Tə vəlay wu a kule tay niye. Tə ge magurlom tə mənɲwese eye lele hərwi wu nakə bo tay eye ta lambad aye.

<sup>42</sup> Ane tuk na, Mbəlom a mbədatay dəba. Ma dəba eye tə dəslay ha gər a wurzla hay. Mbəlom a vəlay tsəved andza nakə mawatsa eye mə derewel i ndo məde ha bazlam i Mbəlom hay, Mbəlom a gwad:

“A nəkurom Israyel hay,  
wu neheɲe hay ka vəlawum wal wal  
ada ta gənaɲ hay  
məve kuro kuro faɖ aye na, a neɲ bəɖaw?”

<sup>43</sup> Ka zlum madzawadzawa i gay i mbəlom kurom Molok,  
ka zlum mandzəkkit bo i wurzla i mbəlom kurom Refam.

Kule kurom neheɲe ka gum aye na,  
hərwi mədəslay ha gər.  
Hərwi niye na həliye kurom abəra ma gəma nakay,

<sup>‡</sup> 7:34 Zəba mə Madayaw abəra ma Ezipt 2.14–3.10. § 7:37 Bazlam mapala eye masulo eye 18.15.

<sup>\*</sup> 7:40 Madayaw abəra ma Ezipt 32.1, 23.

na diye kurom ha dəreŋ abəra ta gəma i Babilon.†”»

44 Etiyen a gwadatay sa: «Aħəl niye bəba tətə kway hay nəteye mə makulk-wandah na, madzawadzawa i mədəslay ha gər a Mbəlom andaya fataya hərwi ada tã sər ha Mbəlom andaya ta nəteye. Gay niye mapa eye na, andza nakə Mbəlom a tsikay a Musa aye. Mbəlom a gwaday a Musa tã ge na gay niye na, andza nakə a ŋgatay aye.

45 Ma dəba eye na, bəba tətə kway hay ta vəlataŋ ha madzawadzawa i mədəslay ha gər a Mbəlom niye a wawa i huđ tay hay. Ndo mändzatay kame a wawa i huđ tay niye hay na, Zozowe. Ti ye a gəma niye na, ta zla na gay i madzawadzawa niye. Mbəlom ka həhar tay ha ndo i gəma niye abəra kame tay. Ta sla fataya. Andza niye gay i madzawadzawa a ndza ma gəma niye hus a həlay i bəy Davit.

46 Davit na, a yay a gər a Mbəlom haladzay. A tsətsah tsəved ka Mbəlom ka mədəslay gay nakə wawa i huđ i Zakob hay ta sliye faya mədəslay ha gər a Mbəlom mə dəma aye.

47 Maa dəzlay gay na, Salomon.

48 «Ane tuk na, Mbəlom Fetek ma ndziye mə gay neheye ndo hay ta dəzl aye bay. Andza nakə mawatsa eye mə derewel i ndo məde ha bazlam i Mbəlom aye na, Mbəlom a gwad:

49 “Təv mändze i bəy ga na, mbəlom,  
ada mändzibəra na, təv sik ga.

Gay nakə ka dəzlumenəye na, slala i gay waray?

Təv nakə ma sliye mändze mə dəma aye na, waray?

50 Maa ge wu neheye tebiye na, neŋ bədaŋ?‡”»

51 Etiyen a gwadatay sa: «A nəkurom neheye sewed eye hay. Ka dərəzlum na dərev kurom ta zləm kurom hay a məzele i Mbəlom nakə faya ma zalakumeye. A sakum mahəndəkay na dərev kurom a Məsəfəre Tsədaŋŋa eye bay. Nəkurom na, andza bəba tətə kurom hay.

52 Ndo məde ha bazlam i Mbəlom waray nakə bəba tətə kurom hay ta gay dəretsətəh bay aye? Kwa məkəde ta kəd tay ha ndo neheye tə da ha madayaw i ndo nakə neŋgeye ndo i dedək nəte ŋgweŋ aye. Ndo nakə anəke ka gum faya dəf ada ka kədum na aye na, neŋgeye.

53 Mbəlom kə vəlakuŋ bazlam ŋgay mapala eye tə həlay i gawla ŋgay hay§, ane tuk na, ka rəhumay ha gər bay.»

### *Tə kəd na Etiyen*

54 Ndo niye hay mahaya gər eye tə tsəne bazlam i Etiyen niye na, a ndalatay haladzay, ta həpəd zler ka Etiyen kəraw kəraw.

55 Ane tuk na, Etiyen na, a rah ta Məsəfəre Tsədaŋŋa eye. Tsa na, a zəba dəre a mbəlom. A ŋgatay naha a dzaydzay i Mbəlom ada a ŋgatay naha a Yesu malətsa eye tə həlay i mənday i Mbəlom.

56 A gwadatay a ndo niye hay: «Tsənum! Neŋ faya na ŋgateye a mbəlom mahəndəka eye ada Wawa i Ndo neŋgeye malətsa eye tə həlay i mənday i Mbəlom.»

57 Tə tsəne andza niye na, nəteye tebiye ta wuda haladzay ada ta dərəzl na zləm tay hay. Nəteye tebiye ka manəte eye tə mbəzla ka Etiyen məgəse.

† 7:43 Amos 5.25-27. Molok, tə zalay Molek ma Dzam Guram, mbəlom i Kanan hay. Tə dzala, məvəlay a mbəlom tay niye na, ndo zezəŋ. Refam mbəlom zlezle eye i Babilon hay. ‡ 7:50 Ezay 66.1-2. § 7:53 Andza nakə kule i Yahuda a tsik aye na, Mbəlom a dəy ha bazlam mapala eye a Musa tə həlay i gawla ŋgay hay.



<sup>58</sup> Tə gəs na, tə vaha na abəra mə wuzlah gay. Ti ye naha, tə pa bo ka məkele na tə kwar hərwi məkəde na. Ndo məhəle mbal hay ta tsok na peteked tay hay, tə gər ha ka təv i gawla eye andaya tə zalay Sol.

<sup>59</sup> Ahəl nakə nəteye faya ta kaliye Etiyen tə kwar aye na, Etiyen nəngeye faya ma dıwuleye me a Mbəlom. Mə mađuwule me niye faya ma dıwuliye na, a gwad: «Bəy Maduweñ ga Yesu, zla na məsəfəre ga.» <sup>60</sup> Tsa na, a dəkw gurmets, a wuda ta magala, a gwad: «Bəy Maduweñ ga, mezeleme nakay tə ge aye na, kâ matay ha mənese bay.» A tsik andza niye na, ma dəba eye a mət.

## 8

<sup>1</sup> Məkəde Etiyen nakə tə kəd aye na, a yay a gər a Sol.

Pat eye niye na, kwayaŋja ta dazlay a məgatay dəretsətseh a ndo məpe mədzal gər hay ka Yesu Kəriste neheye ma Zerozelem aye. Ndo məpe mədzal gər hay ka Yesu ta ŋəna gər, ta hway tebiye. Ta hway a gəma i Yahuda ada siye hay a Samari. Maa ze naha na, ndo i maslaŋ hay.

<sup>2</sup> Siye neheye tə pa mədzal gər tay dedək ka Yesu aye, ti ye tə zla na mədahaŋ i Etiyen, tə la na. Tə tuwa na haladzay.

<sup>3</sup> Sol na, a zaka ha mabəbeze tay ha ndo məpe mədzal gər hay ka Yesu. A yawa ka gay ka gay, a gəsawa ndo məpe mədzal gər hay ka Yesu, hasləka hay kwa ŋwas. A pawa tay ha a gay i danğay.

### *Filip a da ha labara wədeye ma Samari*

<sup>4</sup> Ndo neheye ta hway, ta ŋəna gər aye na, ta həhal ka gəma ka gəma. Tə dawa ha bazlam i Mbəlom.

<sup>5</sup> Filip nəngeye na, a ye a wuzlah i dala i Samari. A ye naha, a da ha Yesu ndo mətəme ha ndo nakə Mbəlom a sləraweye.

<sup>6</sup> Ndo i gəma niye hay tebiye tə tsəne bazlam i Filip ada tə ŋgatay a masuwayaŋ neheye a ge aye na, tə pay zləm a bazlam ŋgay ta səkeffe eye lele.

<sup>7</sup> Fakalaw hay tə yawaw abəra mə bo i ndo i dəvats hay. Tə yawaw abəra mə bo tay na, ta wudawa ka bo haladzay. Ndo neheye vərəzl i bo tay maməta eye hay ta ndo neheye ta dzəgədəsla sik tay matəra eye hay aye, ta mbəl.

<sup>8</sup> Andza niye mənğwese bagwar eye a ge ma gəma niye.

<sup>9</sup> Ahəl niye na, ndoweye andaya ka dala i Samari eye niye. Ndowneye niye na, tə zalay Simonj. Nəngeye na, a gawa maharam zla anəke bay ada maharam ŋgay nakə a gawa aye na, a gawatay a ndo i gəma niye hay hərbaəəkka. Ma mədzal gər ŋgay na, a gwad nəngeye ŋgwalak i ndo.

<sup>10</sup> Ndo hay tebiye, gawla hay ta bagwar hay, tə pa zləm na, ka nəngeye. Tə gwad: «Ndo nakay na, gədanj i Mbəlom bagwar eye nakə tə zalay Gədanj Bagwar eye.»

<sup>11</sup> Tə pawa zləm ka wu ŋgay nakə a gawa aye na, lele. Hərwi maharam ŋgay nakə a gawatay masuwayaŋ a ndo hay aye na, kə ndza haladzay.

<sup>12</sup> Ane tuk na, Filip a ye naha mata da ha Labara ŋgwalak eye ka Bəy i Mbəlom ada ka Yesu Kəriste na, tə dzala ha ka Yesu. Hasləka hay, ŋwas hay, Filip a dzəhuđ tay ha a yam.

<sup>13</sup> Simonj nəngeye dərmak a dzala ha ka Yesu, ta dzəhuđ ha a yam. Nəngeye na, a ndzawa ka təv i Filip. A ŋgataway a masuwayaŋ tə wu hay wal wal neheye Filip a gawa aye na, a gay hərbaəəkka.

<sup>14</sup> Ndo i maslaŋ neheye nəteye ma Zerozelem aye tə tsəne ndo i gəma i Samari hay ta pa mədzal gər tay ka bazlam i Mbəlom na, tə sləratay naha Piyer ta Yuhana.

15 Tə həl bo, ti ye. Tə ndisl naha a dəma na, ta dūwulay me a Mbəlom hərwi ada ndo i gəma i Samari niye hay tə pa gər ka bazlam i Mbəlom aye tā huta Məsəfəre Tsədənğa eye.

16 Ahəl nakə ta dzəhuḅ tay ha a yam aye na, ta dzəhuḅ tay ha tə məzele i Yesu Bəy Maduweñ. Ndo kwa nəte mə walañ tay Məsəfəre Tsədənğa eye kə mbəzlaw faya zuk bay.

17 Hərwi niye, Piyer ta Yuhana tə pa fataya həlay, ta dūwulay me a Mbəlom. Tsa na, tə huta Məsəfəre Tsədənğa eye.

18 Simonğ a nğatay a ndo məpe mədzal gər hay ka Yesu tə huta Məsəfəre Tsədənğa eye hərwi nakə ndo i maslañ hay tə pa fataya həlay aye na, a vəlatay suloy a Piyer ta Yuhana.

19 A gwadatay: «Vəlumenğ gədañ eye dərmak hərwi ada ndo neheye na piye fataya həlay aye na, tā huta Məsəfəre Tsədənğa eye.»

20 Ane tuk na, Piyer a mbədəy faya, a gwaday: «Dze ta suloy yak tebiye, hərwi nəkar ka dzala mə gər yak masəkəme gədañ i Mbəlom na, ta suloy!

21 Ka məsler nakay nəmay faya nəmaa giye na, ka sliye faya mədzepe tə nəmay bay hərwi dərev yak tsədənğa kame i Mbəlom bay.

22 Da ha mezeleme yak, dūwulay me a Bəy Maduweñ ada agəna ma pəsakeye ha mədzal gər yak neheye lele bay eye.

23 Na zəba faya na, dərev yak maraha eye ta bor i bo ada mezeleme kə pa kar a dāngay.»

24 Simonğ a tsəne bazlam niye hay na, a gwadatay a Piyer ta Yuhana: «Bo kurom eye, dūwulumay me a Bəy Maduweñ hərwi ga hərwi ada wu nakay ka tsikum aye mā təra tə neñ bay tey.»

25 Ma dəba eye na, Piyer ta Yuhana tə da ha Yesu ada tə da ha bazlam nğay a ndo hay. Tsa na, tə həl bo, ta mbədə gər a Zerozelem. Nəteye ka tsəved faya ta diye na, tə da ha Labara Nğwalak eye me gəma hay wal wal ka dala i Samari.

### *Filip ta ndo i Etiyopi wuray*

26 Ma dəba eye na, gawla i Mbəlom a gwaday a Filip: «Do, ka diye na, ka zəngaliye tsəved nakə a ye ta diye i tsakay aye, ta tsəved nakə a yaw abəra ma Zerozelem a ye a gəma i Gaza aye. Tsəved eye niye na, a ye tə kəsaf.»

27 Filip a tsəne na, kwayanğa a həl bo, a ye. A husa ka tsəved, faya ma diye na, a nğatay a ndo wuray, neñgeye bagwar i ndo məge məsler i Bəy i Etiyopi Kandəs. Məsler nğay na, mələvay gər a suloy i bəy. Bəy i Etiyopi niye na, nğwas eye. A ye a Zerozelem mata dəslay ha gər a Mbəlom.

28 Anəke na, faya ma maweye abəra ma Zerozelem, ma diye a mətagay. Neñgeye mandza eye mə muta i pələs nğay faya ma diye ha. Neñgeye faya ma dzañgiye dərewel i Ezay ndo məde ha bazlam i Mbəlom.

29 Filip a nğatay a ndo niye na, Məsəfəre Tsədənğa eye a gwaday: «Hway bəse ka tsakay i muta i pələs anday faya ma diye aye.»

30 Filip a tsəne andza niye na, a hway, a ye a həndzəd naha faya. Nəteye faya ta diye na, a tsəne ndo i Etiyopi niye faya ma dzañgiye dərewel i Ezay ndo məde ha bazlam i Mbəlom. Filip a tsətsah faya, a gwaday: «Wu nakə faya ka dzañgiye na, ka tsəne nğway daw?»

31 Ndo niye a mbədəy faya, a gwaday: «Kə ge ndəray kə deñ ha bay na, na sliye faya mətsəne na, ma kəkay?» Tsa na, a gwaday a Filip: «Tsalaw a muta i pələs ada ndza ka tsakay ga.»

32 Ndo niye faya ma dzañgiye mə dərewel niye na, wuye mey? Təv nakə faya ma dzañgiye mə dəma aye na, a gwad:

«Nenğeye a təra andza təbən nakə tə gəs,  
ta diye ha ka təv nakə tə kəfəwə wu mə dəma aye.

Nenğeye a təra andza təbən nakə ta dəsiye faya abəra məkwets na,  
a tuwa bay aye.

Ka həndək abəra ka bazlam bay tebiye.

<sup>33</sup>Tə pasla na a walañ i ndo hay na, kəriye  
ada ta gay sariya i dedək bay.

Mata tsike me ka wawa nğay hay na, way?  
Ndəray kwa nəte andaya bay!

Nenğeye ta dze ha məsəfəre nğay abəra ka məndzibəra.\*»

<sup>34</sup>Ndo məge məsler niye a tsətsah ka Filip a gwađay: «Ambəh, tsikenj tey, ndo məde ha bazlam i Mbəlom a tsik niye na, ka way? A tsik na, ka bo nğay eye nğway tsukuđu ka ndo mekelən dāw?»

<sup>35</sup>Yawa! Filip a dazlay a məđay ha ka təv nakə a dzanğa aye. A đay ha Labara Nğwalak eye i Yesu.

<sup>36</sup>Ahəl nakə nəteye faya ta diye aye na, tə ndisl a təv eye andaya yam mə dəma. Ndo məge məsler niye a gwađay a Filip: «Yam anañ, anəke mata geñ nğtatay abəra ka madzəhuə bo a yam na, mey sa mey?»

<sup>37</sup>Filip a gwađay: «Tadə ka pa mədzal gər yak ka Yesu na, ka sliye faya madzəhuə bo a yam.»

Ndo niye a mbəđay faya, a gwađay: «Na pa mədzal gər ka Yesu Kəriste. Nenğeye na, Wawa i Mbəlom.»]

<sup>38</sup>Tsa na, a lətse ha muta i pələs nğay niye, tə mbəzlaw abəra mə dəma ta Filip. Filip ta nenğeye salamay tə mbəzla a yam, Filip a dzəhuə ha a yam.

<sup>39</sup>Tə tsalaw abəra ma yam na, Məsəfəre i Bəy Maduweñ a zla na Filip. Ndo məge məsler niye kə nğtatay a Filip sa bay. Ane tuk na, nenğeye a ye nğway tə mənğwese eye. <sup>40</sup>Filip a zəba dəre na, nenğeye ma gəma i Azot. Tsa na, ahəl bo ma diye a Sezare. Faya ma diye na, a də ha Labara Nğwalak eye ka gəma, ka gəma hus a həlay nakə a ndisl ka dala i Sezare aye.

## 9

### *Bəy Maduweñ a zalay a Sol*

<sup>1</sup>Ahəl niye na, Sol nenğeye a dzala huya ka məzlatay zay a ndo məpe mədzal gər hay ka Yesu huya hərwi məkədə tay ha. A ye ka təv i bagwar i ndo məvəlaway wu a Mbəlom.

<sup>2</sup>A ye naha a tsətsah faya dərewel nakə ma diye ha ka təv i bagwar i gay i mađuwule me neheye ma Damas aye hərwi ada tadə ndo hay andaya faya ta pay bəzay a tsəved i Bəy Maduweñ, hasləka hay kwa nğwas hay na, ma gəsiye tay ha ada ma diye tay ha a Zerozelem.

<sup>3</sup>Tə watsay dərewel niye tə vəlay na, a həl bo a ye a Damas.

Pol faya ma ndisliye bəse ta Damas na, dzaydzay a mbəzlaw abəra mə mbəlom, a dəv ka təv nğay niye. A lawara na a wuzlah.

<sup>4</sup>A dəf ka dala. Tsa na, a tsəne mətsike me, a gwađay: «Sol, Sol, nəkar faya ka geñeye dəretsətseh andza niye na, hərwi mey?»

<sup>5</sup>Sol a mbəđay faya, a gwađay faya: «Nəkar eye na, way, Bəy Maduweñ?»

Mətsike me niye a mbəđayaw faya, a gwađay: «Neñ na, Yesu nakə faya ka geñeye dəretsətseh aye.

\* 8:33 Ezay 53.7-8.

6 Ane tuk na, lətse do a walaŋ gay. Ka ye a dəma na, ta tsikakeye wu nakə ka giye.»

7 Ndo neheye ti ye naha ka bo dziye tə Sol aye, tə lətse ka təv niye. Kwa mətsike me, ta sla faya mətsike bay tebiye. Mətsike me nakə a tsənew mə mbəlom aye na, tə tsəne. Ane tuk na, nəteye ta ŋgatay a ndəray bay.

8 Sol a lətse abəra ka dala. A həndək abəra ka dərə na, a ŋgatay a dərə bay tebiye. Tə gəsay həlay, ti ye ha a Damas.

9 A ye naha a dəma na, məhəne mahkar neŋgeye mandza eye guluf eye, a ŋgatay a dərə kwa tsekweŋ bay. Məhəne mahkar eye niye na, kə nda wu mənday bay ada kə sa yam bay.

10 Ndo məpe mədzal gər wuray ka Yesu andaya ma Damas, məzele ŋgay Ananiyas. Bəy Maduweŋ a zalay ma məsine, a gwaday: «Ananiyas, Ananiyas!» Ananiyas a mbəday faya, a gwaday: «Neŋ anan!»

11 Bəy Maduweŋ a gwaday: «Do anəke ka tsəved nakə tə zalay “Mahədzaka eye bay” aye ada kə ye a gay i Yudas. Ka ye naha na, tsətsah ndo i gəma i Tarsis wuray, tə zalay Sol. Neŋgeye faya ma dūwuleye me a Mbəlom,

12 ada a ŋgatay a Ananiyas ma məsine faya ma diye naha ka təv ŋgay ada ma piye faya həlay hərwi ada m̄a ŋgatay a dərə.»

13 Ananiyas a mbəday faya, a gwaday: «Bəy Maduweŋ, ndo niye na, ndo haladzay ta təkəreŋ dərətsətseh nakə faya ma gateye a ndo yak hay ma Zerozelem aye tebiye.

14 Ada a yaw kənaŋ na, bagwar hay i ndo neheye tə vəlaway wu a Mbəlom aye ta vəlay tsəved ka məgəse ndo neheye faya ta pakeye bəzay kənaŋ aye tebiye dərma. A yaw na, hərwi niye.»

15 Ane tuk na, Bəy Maduweŋ a gwaday: «Do, hərwi na zla na ndo niye hərwi məge məsler ga. Neŋgeye na, ma diye ha məzele ga a siye i gəma hay ada a bəy tay hay. Ada ma ta dətəye ha a ndo i Israyel hay dərma.

16 Bo ga eye na ta dətəye ha wu nakə ma giye dərətsətseh hərwi ga aye tebiye.»

17 Ananiyas a tsəne andza niye na, a həl bo a ye. A ye naha a fələkwa a gay nakə Sol mə dəma aye. A ye naha a pa həlay ka Sol, a gwaday: «Sol malamar ga, maa sləra ga ahaya ka təv yak na, Bəy Maduweŋ Yesu. Maa bəzaka ha bo ka tsəved nakə faya ka diye ahaya aye na, neŋgeye. A sləra ga ahaya hərwi ada kə ŋgatay a dərə andza nakə kurre aye ada kə rah ta Məsəfəre Tsədanŋa eye.»

18 Kwayanŋa wuye hay tə kutsayaw abəra ka dərə i Sol andza dəba i kələf, a ŋgatay a dərə tuk. Tsa na a lətse, a ye ta dzəhuə ha a yam.

19 Ma dəba eye, a nda wu mənday ada gədanŋ ŋgay a maw tuk.

Sol a ndza məhəne tsakway ta ndo məpay bəzay a Yesu neheye ma Damas aye.

20 Kwayanŋa a dazlay a məde ha bazlam i Mbəlom mə gay i madūwule me hay. A dā ha parakka Yesu na, Wawa i Mbəlom.

21 Ndo neheye tebiye tə tsəne bazlam ŋgay niye na, a gatay hərəbəkka. Ta tsətsah, tə gwad: «Maa gatay dərətsətseh haladzay a ndo məpay bəzay a Yesu hay ma Zerozelem na, ndo nakay bədaw? Ada a yaw kənaŋ na, hərwi məgəse tay ha ada mede tay naha a bagwar hay i ndo neheye tə vəlaway wu a Mbəlom aye ba?»

22 Sol neŋgeye dūh gədanŋ ŋgay a səkah ka məde ha bazlam i Mbəlom pat pat. A dətay ha a Yahuda neheye ma gəma i Damas aye parakka Yesu na, Kəriste. Nəteye niye tə sər wu nakə ta tsikeye faya aye sa bay.

<sup>23</sup> Ma dəba i məhəne tsakway na, Yahuda hay tə ma ha ka bo bazlam ka təv manəte eye hərwi məkədə na Sol.

<sup>24</sup> Ane tuk na, Sol a sər tay naha ka wu tay nakə a satay mäge aye. Ta tsəpawa na məged i walañ i gay ta həpat kwa ta həvad hərwi ada tadə ta gəs na na, ta kədiye na.

<sup>25</sup> Sol ta gawla ngay hay ti ye ta həvad ka bəf i mavavar i zled i walañ gay niye. Tə zla na Sol tə pa na a kəteh. Tə mbəzla ahaya tə mavavar niye dərəñ tə walañ gay.

### *Sol ma Zerozelem*

<sup>26</sup> Sol a ye a Zerozelem. A ndisl naha a dəma na, a say mədzepe ta ndo məpe mədzal gər ka Yesu hay. Ane tuk na, ndo hay tebiye ta dzədzaray, hərwi tə dzala na, tə gwad nəngeye ka təra ndo məpe mədzal gər ka Yesu ta dedək bay.

<sup>27</sup> Ane tuk na, Barnabas, nəngeye a zla na, a ye ha ka təv i ndo i maslañ i Yesu hay. Ti ye naha na, a təkəratay kəkay nakə Sol a ngatay a Bəy Maduweñ ka tsəved i mede a Damas ada kəkay nakə Bəy Maduweñ a tsikay me aye, ada Sol a da ha bazlam i Yesu kwa ka dzədzar bay ma Damas na, kə tsikatay dərmaç.

<sup>28</sup> Pat eye niye kwayañña Sol a ndza ka təv tay. A yawa ta nəteye a Zerozelem ada tə mawa ka bo dziye, a dawa ha bazlam i Bəy Maduweñ parakka lele.

<sup>29</sup> A tsikawatay bazlam i Yesu a Yahuda neheye tə tsik me i Gərek aye dərmaç. Tə kədawa wuway haladzay. Ane tuk na, ta pəla tsəved a satay məkədə na.

<sup>30</sup> Ndo məpe mədzal gər hay ka Yesu ta təra malamar hay, tə tsəne na, tə zla na Sol abara ka təv niye. Ti ye ha a gəma i Sezare. Ma dəba eye na, ti ye ha a gəma i Tarsis.

<sup>31</sup> Yawa! Ndo məpe mədzal gər hay ka Yesu ma gəma i Yahuda, ma Galile, ada ma Samari, nəteye tebiye mandza eye zay zay lele. Nəteye faya ta hutiiye gədañ pat pat. Ta rəhay ha gər a Bəy Maduweñ lele. Məsəfəre Tsədañña eye a vəlawatay gədañ, a səkahawa tay ha haladzay.

### *Piyer a mbəl ha Ene*

<sup>32</sup> A həlay niye na, Piyer a yawa a gəma hay tebiye. Pat wuray na, a ye a gəma i Lida.

<sup>33</sup> Mə dəma na, ndoweye andaya tə zalay Ene, nəngeye matəra eye. Məve tsamahkar nəngeye məhəna eye. Ahəl nakə Piyer a ye naha aye na, a ngatay.

<sup>34</sup> Piyer a gwaday: «Ene! Yesu Kəriste ma mbəliye kar ha, lətse, zla sləlah yak.» Kwayañña Ene a lətse.

<sup>35</sup> Ndo i gəma i Lida hay ta ndo neheye ka bərrbar i Saron aye tebiye tə ngatay andza niye na, ta mbəda ha mədzal gər tay. Tə pa mədzal gər tay ka Bəy Maduweñ.

### *Piyer a mbəl ahaya Tabita abəra ma mədahar*

<sup>36</sup> Ngwas məpe mədzal gər ka Yesu andaya məzele ngay Tabita. Tə zalay tə bazlam i Gərek na, Dorkas. Andza məgwədə: Mawene. A ndzawa i ngay na, ma gəma i Zope. Nəngeye a gawa ngwalak a ndo hay huya ada a dzənaawa tay ha mətawak hay.

<sup>37</sup> A həlay niye na, a dəd a dəvats ada a mət. A mət na, tə bara na. Tsa na, tə tsal ha a gay nakə ka gər i gay niye aye.

<sup>38</sup> Gəma i Lida na, bəse ta gəma i Zope. Ndo məpe mədzal gər ka Yesu neheye ma Zope aye tə tsəne Piyer nəngeye ma Lida na, tə slər ndo hay sulo ka təv i Piyer, mə yaw. Tə gwaday naha: «Nəmaa gaka naha amboh, dara bəse təday.» Ndo neheye sulo aye ti ye ka təv i Piyer.

<sup>39</sup> Piyer a tsəne bazlam tay niye na, kwayanğa a həlaw bo, ti yaw ta ndo niye hay.

Piyer a husaw na, tə laka ha a gay nakə ka gər i gay nənğed mədahan mə dəma aye. Madakway i nğwas hay tə nğatay na, ta həndzəd naha ka təv nğay ta mətuwe eye. Ta bəzay ha peteked neheye Tabita a nğarawa ahəl nakə nənğeye andaya tə dəre mba aye.

<sup>40</sup> Tsa na, Piyer a həhar tay ahaya ndo hay tebiye abəra. A dəkw gurmets, a dıwulay naha me a Mbəlom. A mbəda me ka təv i mədahan. A gwad: «Tabita lətse!» Tabita a həndək abəra ka dəre. A nğatay a Piyer na, a lətse, a ndza.

<sup>41</sup> Piyer a gəs na abəra mə həlay, a dzəna na mələtse ha ka mbəlom. Tsa na, a zalatay a madakway i nğwas niye hay ta siye i ndo məpe mədzal gər hay ka Yesu tebiye. Ta ma naha ka təv nğay a gay. Ti ye naha na, a gwadatay: «Anan ndo kurom kə mbəl.»

<sup>42</sup> Masuwayan nakə a ge bo aye na, a da a zləm ma gəma i Zope tebiye. Ndo hay haladzay tə dzala ha ka Bəy Maduweñ.

<sup>43</sup> Piyer a ndza haladzay ma Zope. A ndza na, mə gay i ndo wuray a lambadawa mbal, məzele nğay Simon.

## 10

### *Gawla i Mbəlom a bəzay ha bo a Korney*

<sup>1</sup> Ndo wuray ma gəma i Sezare, məzele nğay Korney. Nənğeye na, bagwar i sidzew i Roma hay. Sidzew niye hay na, tə zalatay Sidzew i Itali hay.

<sup>2</sup> Ndo niye na, a paway bəzay a Mbəlom ada a rəhaway naha gər a Mbəlom ta ndo i gay nğay hay tebiye. A dzənawa tay ha Yahuda neheye mətawak eye hay aye ada a dıwulaway me a Mbəlom pat pat.

<sup>3</sup> Pat wuray ta huwa ma giye bəre mahkar na, məsine a gay. Ane tuk na, nənğeye tə dəre. A nğatay a gawla i Mbəlom parakka lele faya ma diye naha a gay ka təv nğay. A ye naha a zalay, a gwaday: «Korney!»

<sup>4</sup> Korney a zəba ka gawla i Mbəlom niye tə madzədere eye, a gwaday: «Ka yaw na, labara i mey Bəy Maduweñ ga?»

Gawla i Mbəlom a mbəday faya, a gwaday: «Mbəlom kə tsəne məduwule me yak hay. Wu nakə ka vəlay a mətawak hay aye na, a yay a gər haladzay. Nənğeye faya ma dzaliye ka nəkar, ma mətsiye kar ha gər bay.

<sup>5</sup> Anəke na, slər ndo hay a gəma i Zope, t̄a ye t̄a zalayaw a ndoweye andaya məzele nğay Simon nakə tə zalay Piyer aye.

<sup>6</sup> Nənğeye mə gay i ndoweye andaya məzele nğay Simon, a lambadawa mbal. Gay nğay na, ka me i dəlöv.»

<sup>7</sup> Gawla i Mbəlom niye a tsikay ka bo abəra na, a ye nğway. Korney a zalatay a ndo i məsler nğay hay sulo ada a zalay a sidzew nəte mə walan i sidzew neheye tə gaway məsler aye. Sidzew eye niye na, ndo məpay naha faya a Mbəlom.

<sup>8</sup> A ye naha a təkəratay wu nakə a ge bo tebiye aye. Tsa na, a slər tay ha a Zope.

### *Piyer a nğatay a wuye andza ma məsine*

<sup>9</sup> Yaw! Ndo niye hay tə həl bo, ti ye. Tədə eye na, nəteye huya ka tsəved faya ta diye. Magərħəpat na, nəteye faya mazlambar ta ndisliye a Zope. Ta magərħəpat eye niye Piyer nənğeye dərmak a tsal ka gər i gay wuray fatata mata dıwulay me a Mbəlom.

<sup>10</sup> Tsa na, may a wur faya, a say mənde wu mənday. Ahəl nakə faya ta deye wu mənday aye na, wuye a gay andza məsine.

<sup>11</sup> A ɲgatay a mbəlom mahəndəka eye ada wuye faya ma mbəzlaweye abəra mə dəma. Wuye niye na, andza petekəd mafətəla eye, bagwar eye, magəsa eye ka me eye wal wal təv fəd, faya ma mbəzlaweye ka dala.

<sup>12</sup> Mə dəma na, wu hay haladzay. Wu i pesl hay, gənwaw hay, wu neheye tə va tə hüd aye, ada tə diyən hay.

<sup>13</sup> Piyer a tsəne mətsike me, a gwadəy: «Lətse Piyer, kəd wu neheye ada kâ həpəd!»

<sup>14</sup> Ane tuk na, wu niye hay na, Yahuda hay tə ge faya me mände. Hərwi niye Piyer a mbədəy faya, a gwadəy: «Ah! A'ay Bəy Maduweŋ ga, wu nakə tə ge faya me, ka tərə tsədəŋŋa bay aye na, na nda dədə bay. A seŋ bay.»

<sup>15</sup> Mətsike me niye a tsikayaw sa, a gwadəy: «Wu nakə Mbəlom a gwad tsədəŋŋa eye na, kâ zəba faya andza mandzadək bay.»

<sup>16</sup> A ma ahaya bazlam niye sik mahkar. Ma dəba eye na, kwayaŋŋa wu niye a ma ɲgway a mbəlom.

<sup>17</sup> Piyer a tsətsahay a gər ɲgay, a gwad: «Wu nakay na ɲgatay aye na, a say məgwədə mey?»

Azlakwa ahəl nakə Piyer faya ma dzaliye andza niye na, ndo neheye Korney a slər tay naha aye 6a ta tsətsah gay i Simon ada nəteye anəke ka maged i məfaləkwe.

<sup>18</sup> Tə zal ta gədan, ta tsətsah hərwi məsəre ha ta dedek Simon ndo nakə tə zalay Piyer aye neŋgeye andaya kanan dāw.

<sup>19</sup> Ane tuk na, Piyer neŋgeye faya ma dzaliye ka wu nakə a ɲgatay aye. Ahəl nakə neŋgeye faya ma dzaliye aye na, Məsəfəre i Mbəlom a gwadəy: «Piyer, tsəne! Ndo hay anan mahkar faya ta pəliye kar.

<sup>20</sup> Lətse, mbəzla ka təv tay. Do ta nəteye. Kâ dzala faya gər sulo sulo bay, hərwi maa slərataya ahaya na, neŋ.»

<sup>21</sup> Piyer a tsəne andza niye na, a mbəzlaw ka təv i ndo niye hay. A gwadətay: «Neŋ na, ndo nakə faya ka pəlumeye aye. Ka yumaw na, hərwi mey?»

<sup>22</sup> Ta mbədəy faya, tə gwadəy: «Nəmaa yaw, maa sləramaya ahaya na, bəy i sidzew, məzele ɲgay Korney. Neŋgeye na, ndo mədəslay ha gər a Mbəlom. Neŋgeye ndo i dedek ada Yahuda hay tebiye tə gwad faya neŋgeye na, lele. Gawla i Mbəlom a gwadəy: “Slər ndo hay ka təv i Piyer hərwi ada mâ yaw a gay yak. Ki yaw na, pay zləm a wu nakə ma tsikiye aye.”»

<sup>23</sup> Tsa na, Piyer a ye tay ha a gay, a vəlatay təv məhəne hərwi həvad kə ge. Tədəc eye na, tə həl bo ti ye ka bo dziye. Siye i ndo neheye tə tərə ta malamar hay ma məpe mədzal gər ka Yesu aye, tə laka tay ha.

<sup>24</sup> Tədəc təday eye na, tə ndisl a gəma i Sezere. Korney neŋgeye na, kə haya tay gər a ndo ɲgay hay, ta dzam ɲgay, nəteye faya ta həbiye.

<sup>25</sup> Ahəl nakə tə ndisl, Piyer faya ta fələkwiyə a gay i Korney aye na, Korney a yaw ka təv tay. A guduk ka dala kame i Piyer ta mədəslay ha gər.

<sup>26</sup> Ane tuk na, Piyer a lətse ha ka mbəlom, a gwadəy: «Lətse, hərwi neŋ na, ndo zezen andza nəkar dərmak.»

<sup>27</sup> Tsa na, ti ye ka bo a gay ta Korney nəteye faya ta tsikiye me. Ti ye naha na, ndo hay mahaya gər eye haladzay.

<sup>28</sup> A gwadətay: «Sərum ha na, i may Yahuda hay mede a gay i slala mekeləŋ eye hay wal kəgəbay məndəz ka təv manəte aye na, lele bay a wesl. Ane tuk na, Mbəlom kə dəŋ ha mazəbe ka ndo neŋgeye tsədəŋŋa təbey kəgəbay mede a gay ɲgay lele bay na, kə dəŋ ha andza niye bay.

<sup>29</sup> Hərwi niye, ahəl nakə ka zalumeŋ aye na, na kərah madayaw bay. Na yaw bəse. A seŋ məsəre ha, ka zalumeŋew na, hərwi mey?»



<sup>30</sup> Korney a mbəday faya, a gwaɗay: «Nəŋ nakə na zalaka naha aye, anəke kə ge məhəne mahkar ta bəre mahkar andza nakay, faya na dūwuleye me a Mbəlom kənaŋ mə gay ga. Nəŋ faya na dūwuliye me na, kwayaŋŋa ndo tə peteked eye ka bo herre a yaw kame ga.

<sup>31</sup> Tsa na, a gwedeŋ: “Korney, Mbəlom kə tsəne maɗuwule me yak ada kə mətsa ha gər tə madzəne yak nakə ka dzənawa tay ha mətawak hay aye bay.

<sup>32</sup> A gwedeŋ slər ndo hay a gəma i Zope mata zalayaw a Simon nakə tə zalay Piyer aye. Neŋgeye mandza eye mə gay i ndo wuray a lambaɗawa mbal, məzele ŋgay Simon. Gay ŋgay na, ka me i dəlov.”

<sup>33</sup> Hərwi niye, na slər naha fakaya ndo hay kwayaŋŋa ada kə yaw. Sisəc yak, ka təma ka yaw bəse. Anəke nəkway tebiye kənaŋ kame i Mbəlom hərwi məpay zləm a bazlam i Bəy Maduweŋ nakə a vəlaka, a gwaɗaka tsik aye.»

### *Piyer a ɗa ha bazlam i Mbəlom*

<sup>34</sup> Piyer a dazlay a mətsike me, a gwaɗay: «Anəke na, na sər tuk. Ndo hay tebiye kame i Mbəlom na, nəte, ka ŋgəna tay ha ka bo bəra bay.

<sup>35</sup> Ndo zezəŋ tebiye, kwa neŋgeye na, ndo i gəma wuray wuray ka rəhay ha gər a Mbəlom ada kə ge wu nakə dedək aye na, neŋgeye ka təv i Mbəlom na, lele.

<sup>36</sup> Ka sərūm ha Mbəlom a slərəw bazlam ŋgay na, a Israyel hay ada tā huta zay i Mbəlom tə həlay i Yesu Kəriste. Neŋgeye na, Bəy Maduweŋ i ndo hay tebiye.

<sup>37</sup> Bazlam nakay a dazlay ma Galile ahəl nakə Yuhana madzəhuḅe ndo a yam a dzəhuḅawa tay ha ndo hay a yam aye. A gwaɗawatay a ndo hay: “Dzəhuḅum bo a yam.” Wu nakə a ge bo ma ɗəba eye, ma Yahuda ada ma təv mekələŋ eye tebiye na, ka sərūm.

<sup>38</sup> Ka sərūm ha labara i Yesu ndo i Nazaret. Mbəlom ka dzərif ha faya gədaŋ i Məsəfəre Tsəɗaŋŋa eye. Ada sa na, Yesu ka həhal gəma ha, kə ge ŋgwalak ada kə mbəl tay ha ndo neheye Fakalaw a dzawa tay ha aye. A ge andza niye na, hərwi Mbəlom andaya tə neŋgeye.

<sup>39</sup> «Nəmay na, nəmaa təra ndo məhəle mbal i wu neheye a ge aye tebiye ma gəma i Yahuda ada ka dala i Zerozelem aye. Ta kəɗ na, ka mayako mazləmbaɗa eye.

<sup>40</sup> Ane tuk na, a ge məhəne sulo, mamahkar eye na, Mbəlom kə lətse ahaya abəra ma bəɗ. Kə vələy tsəved mə bəzəmay ha bo a nəmay ndo i maslaŋ ŋgay hay,

<sup>41</sup> bəna ka bəzatay ha bo a ndo neheye tebiye ta ŋgatay aye bay. Ane tuk na, a bəz ha bo na, a nəmay neheye Mbəlom a pala may kurre andza ndo məhəle mbal ŋgay hay aye. Ma ɗəba eye nakə Mbəlom a lətse ahaya abəra ma mədahaŋ aye na, nəmaa nda wu mənday ada nəmaa sa wu məse ta neŋgeye ka təv manəte eye.

<sup>42</sup> Neŋgeye a gwaɗamay: “Dum dumatay ha bazlam ga a ndo hay ada dumatay ha nəŋ na, ndo nakə Mbəlom a pa na hərwi məgatay sariya a ndo neheye nəteye andaya tə ɗəre ada a ndo neheye ta mət aye hay.”

<sup>43</sup> Ndo məɗe ha bazlam i Mbəlom tebiye ta tsik faya. Taɗa ndoweye kə dzala ha ka Yesu na, Mbəlom ma pəsəy ha məzeleme ŋgay hay hərwi wu nakə Yesu a ge aye.»

### *Məsəfəre Tsəɗaŋŋa eye mavəla eye a ndo neheye Yahuda hay bay aye*

<sup>44</sup> Ahəl nakə Piyer faya ma tsikiye me mba aye na, Məsəfəre Tsəɗaŋŋa eye a mbəzlaw ka ndo neheye nəteye faya ta pay zləm a bazlam ŋgay aye tebiye.

<sup>45</sup> Ndo məpe mədzal gər hay ka Yesu, neheye nəteye Yahuda hay ti yaw tage Piyer aye a gatay wadəŋ wadəŋ hərwi nakə tə ŋgatay a Məsəfəre Tsədəŋŋa eye a mbəzlaw ka ndo neheye nəteye Yahuda hay təbey aye.

<sup>46</sup> Hərwi niye tə tsəne nəteye faya ta tsikiye me tə bazlam neheye nəteye tə tsəne bay aye ada faya ta zambadəye a Mbəlom bagwar eye.

Tsa na, Piyer a gwad:

<sup>47</sup> «Mata sle faya məge me ka madzəhuŋe tay ha ndo neheye anəke tə huta Məsəfəre Tsədəŋŋa eye andza nəkway na, wuye mey?»

<sup>48</sup> Tsa na, a gwadatay: «Dzəhuŋum tay ha a yam ta məzele i Yesu Kəriste.» Ndo niye hay ta tsətsah faya mâ ndza ka təv tay məhəne tsakway tey.

## 11

### *Piyer a datay ha wu nakə a ge bo aye a ndo məpe mədzal gər hay ka Yesu ma Zerozelem*

<sup>1</sup> Ndo i maslaŋ i Yesu hay ta malamar tay neheye ma Yuda aye tə tsəne na, ndo neheye nəteye Yahuda hay təbey aye ta təma bazlam i Mbəlom dərmak.

<sup>2</sup> Piyer a maw a Zerozelem na, ndo məpe mədzal gər hay ka Yesu nəteye neheye Yahuda hay aye tə gay me a Piyer.

<sup>3</sup> Tə gwadāy: «Ka ye ka təv i ndo neheye nəteye Yahuda hay təbey aye ada ka nda wu mənday ta nəteye na, hərwi mey?»

<sup>4</sup> Piyer a tsəne andza niye na, a təkəratay wu nakə a ge bo aye ka madazlay hus ka mandəve aye. A gwadāy:

<sup>5</sup> «Kurre eye na, neŋ ma gəma i Zope. Ahəl nakə neŋ faya na dūwuliye me aye na, wuye a geŋ andza məsine. Na ŋgatay a wuye faya ma mbəzlaweye ta təv ga. Wu niye na, andza petekəd mafətəla eye, bagwar eye, magəsa eye ka me eye wal wal təv fađ, faya ma mbəzlaweye abəra mə mbəlom. A yaw na, bəse ta təv ga.

<sup>6</sup> Na zəba dəre a dəma ada na ŋgatay a wu i pesl hay, a gənaŋ hay, wu neheye tə va tə huđ aye, ada diyeŋ hay.

<sup>7</sup> «Tsa na, na tsəne mətsike me, a gwedeŋ: “Lətse Piyer, kəd wu neheye ada kâ həpəd!”

<sup>8</sup> «Na mbədəy faya, na gwadāy: “Ah! A’ay Bəy Maduweŋ, dəfa na həpəd wu nakə tə ge faya me aye kəgəbay wu nakə tsədəŋŋa bay aye na, na həpəd dəfa bay.”

<sup>9</sup> «Na tsəne mətsike me sa, a gwedeŋ: “Wu nakə Mbəlom a gwad tsədəŋŋa aye na, kâ zəba faya andza mandzadək bay.”

<sup>10</sup> A meseŋ ha bazlam sik mahkar. Tsa na, wu niye a ma a mbəlom tebiye.

<sup>11</sup> «Azlakwa bay ndo hay mahkar ti ye naha kwayaŋŋa a həlay niye a gay nakə nəmay mə dəma aye. Tə slərataya ahaya abəra ma Sezare.

<sup>12</sup> Məsəfəre Tsədəŋŋa eye a gwedeŋ: “Ka ge mahonok bay, do bəse.” Malamar neheye məkwa na həlataya ahaya kənaŋ aye na, tə laka ga ahaya a Sezare ada nəmaa ye a gay i Korney ta nəteye tebiye.

<sup>13</sup> Tsa na, a təkəramay kəkay nakə a ŋgatay a gawla i Mbəlom aye. Gawla i Mbəlom a gwadāy: “Slər ndo a Zope, tâ ye tâ zalayaw a Simonj nakə tə pa faya məzəle Piyer aye.

<sup>14</sup> Ki yaw na, ma tsikakeye bazlam i mətəme ada a ndo yak hay tebiye.”

<sup>15</sup> «Na dazlay a mətsike me na, Məsəfəre Tsədəŋŋa eye a mbəzlaw fataya andza nakə a mbəzlaw fakwaya ahəl niye aye.

16 Wu nakə Bəy Maduweŋ a tsik ahəl niye na, a meŋaw a gər: “Yuhana a dzəhuḅ tay ha ndo hay na, a yam dəkdek tsa. Ane tuk na, nəkurom na, ta dzəhuḅiye kurom a Məsəfəre Tsədanŋa eye.”

17 Ta dedək, Mbəlom kə vələtay Məsəfəre ŋgay, andza nakə a vələkway ahəl nakə ka dzalakwa ha ka Bəy Maduweŋ Yesu Kəriste aye. Neŋ da məgay me a Mbəlom na, neŋ way?»

18 Tə tsəne bazlam niye na, ta may ha maŋgok a Piyer sa bay. Ta zambadaŋ a Mbəlom, tə gwad: «Mbəlom kə vələtay tsəved a ndo neheye nəteye Yahuda hay təbey aye mambəde ha mede tay ada tā huta sifa nakə dedək aye.»

### *Ndo məpe mədzal gər hay ka Yesu ma Anŋiyos*

19 Ahəl nakə tə kəf Etiyen aye na, ta dazlay məgatay dəretsətseh a ndo məpe mədzal gər hay ka Yesu. Nəteye, ta dazlay mahway a gəma mekeleŋ eye həy. Siye hay mə walaŋ tay, ti ye a Fenisi, a Sipəre, siye hay a gəma i Anŋiyos. Ane tuk na, nəteye niye hay tə dəwatay ha bazlam i Mbəlom a Yahuda hay dəkdek.

20 Siye i ndo məpe mədzal gər neheye ma gəma i Sipəre ta Siren aye ti ye a Anŋiyos. Ti ye tə datay ha labara i Bəy Maduweŋ Yesu a ndo neheye nəteye Yahuda hay bay aye dərmak.

21 Gədan i Bəy Maduweŋ andaya fataya. Hərwi niye ndo hay haladzay ta dzala ha ka Bəy Maduweŋ.

22 Ndo məpe mədzal gər ka Yesu neheye ma Zerozelem aye tə tsəne labara i malamar neheye ma Anŋiyos aye na, tə slər Barnabas ka təv tay.

23 Barnabas a həl bo, a ye a dəma, a ye naha a ŋgatay ma kəkay nakə Mbəlom a pa ŋgama ka ndo məpe mədzal gər aye na, a yay a gər haladzay. Tsa na, a vələtay gədan a nəteye niye hay tebiye ta ndza huya ka tsəved i Bəy Maduweŋ.

24 Andza niye, Barnabas na, ndo lele eye. Neŋgeye maraha eye ta Məsəfəre Tsədanŋa eye ada kə pa mədzal gər peteh ka Yesu. Ndo hay haladzay ta səkah, tə pa mədzal gər ka Bəy Maduweŋ.

25 Ma dəba eye na, Barnabas a həl bo a ye a gəma i Tarsis mata pəlaw Sol.

26 A ndisl naha a dəma na, a huta Sol. Ti yaw ka bo salamay a Anŋiyos. Nəteye salamay tə ndza ma Anŋiyos məve nəte ta ndo məpe mədzal gər hay ka Yesu. Ta tətik tay ha ndo hay haladzay ka məpe mədzal gər ka Yesu. Tə lah məzele a ndo məpay bəzay a Yesu hay ndo i Kəriste hay na, ma Anŋiyos.

27 Pat wuray na, ndo məde ha bazlam i Mbəlom hay tə həl bo abəra ma Zerozelem, ti ye a Anŋiyos.

28 Ndo nəte mə walaŋ tay məzele ŋgay Agabus, a da ha ta gədan i Məsəfəre Tsədanŋa eye, a gwad: «Mandərzaŋ ma giye ka məndzibəra tebiye.» Slala i mandərzaŋ niye na, kə ge ahəl nakə Kələd neŋgeye bəy i Roma aye.

29 A tsik andza niye na, ndo məpe mədzal gər hay ka Yesu, tə gwad: «Kwa way m̄a vəl wu nakə ma sliye faya məvəle aye hərwi məsləre tay naha madzəne a malamar neheye ma Yahuda aye.»

30 Tsa na, ta tsakal wu, tə sləratay naha a madugula neheye ma Yahuda aye tə həlay i Barnabas tə Sol.

## 12

### *Tə kəd na Yakuba ada tə gəs Piyer*

1 A həlay niye na, bəy nakə tə zalay Herod aye a pa bo ka məgatay dəretsətseh a ndo məpe mədzal gər hay ka Yesu.

2 A kəd na Yakuba malamar i Yuhana ta maslalam.

<sup>3</sup> A zəba faya ka məkəde Yakuba nakə a kəf na aye, a yay a gər a Yahuda hay. A gəs na Piyer a həlay i magurlom nakə tə zalay magurlom i peñ nakə tə kwasa ha bay aye.

<sup>4</sup> Herod a gəs na Piyer na, a pa na a danğay. A həl sidzew hay fad fad madzəga fad matsəpe na. A dzala mə gər ngay na, aza mǎ gəsa ahaya kame i ndo hay ma dəba i magurlom ada ma geye sariya.

<sup>5</sup> Sidzew hay faya ta tsəpiye na Piyer ma danğay. Ane tuk na, ndo məpe mədzal gər hay ka Mbəlom nəteye faya ta duwuleye me a Mbəlom pat pat hərwi Piyer.

### *Gawla i Mbəlom a təma ahaya Piyer abəra ma danğay*

<sup>6</sup> Ta həvad eye niye dəre ma ta tsadiye na, Herod ma ta geye sariya a Piyer kame i ndo hay. Piyer mandzahəra eye ma wuzlah i sidzew hay sulo. Nənğeye madzawa eye tə tsalalaw hay sulo ada sidzew mekelən eye hay sulo faya ta tsəpiye məged i gay i danğay niye.

<sup>7</sup> Kwayanña gawla i Mbəlom a yaw a gay nakə Piyer mə dəma aye, wuye a dəv dzaydzay mə gay niye. Gawla i Mbəlom a lamay a Piyer, a danğwazla ha, a pədeke ha. A gwaday: «Lətse bəse!» Tsa na, tsalalaw hay ta nğəzlah ndəruts ndəruts abəra mə həlay.

<sup>8</sup> Tsa na, gawla i Mbəlom a gwaday: «Pa wu i bəzay i huđ yak ada bər tahərak yak a sik.» Piyer a ge andza nakə gawla i Mbəlom a tsikay aye. Gawla i Mbəlom a gwaday sa: «Pa ka bo məkelkabo yak ada dara peñ bəzay.»

<sup>9</sup> Piyer a zənğal ahaya gawla i Mbəlom, ti yaw abəra mə gay i danğay. Kə dzala ha wu nakə gawla i Mbəlom faya ma giye dedek na, kə dzala ha bay. A dzala ha mə gər ngay na, məsine a gay.

<sup>10</sup> Tə tawadaw abəra ka sidzew neheye ka məged makurre aye, tə ndislew ka masulo eye. Tsa na, tə ndislew ka məged i bəre nakə madayaw a walañ gay aye. Tə ndisl naha faya na, məged niye a həndək bo mahənğeye bətañ kame tay. Tsa na, tə ndohwaw abəra. Ti ye ka tsəved na, kwayanña gawla i Mbəlom a gər ha Piyer.

<sup>11</sup> Wu nakə a ge bo aye na, Piyer a sər tuk. Tsa na, a gwad: «Anəke na, na sər ta dedek Mbəlom kə sləraw gawla nğay ka təv ga, kə təma ga ahaya abəra mə həlay i bəy Herod ada mə dərətsətseh i Yahuda neheye tə dzala məgen aye.»

<sup>12</sup> Ahəl nakə Piyer a sər ha wu nakə a ge bo aye lele tuk na, a ye a gay i Mari maya i Yuhana nakə tə zalay Markus aye. Mə dəma na, ndo hay mahaya gər eye haladzay, nəteye faya ta duwuleye me a Mbəlom.

<sup>13</sup> Tsa na, Piyer a ye naha a fay a məged. Ndo i məsler dem eye, məzele nğay Rodi a tsəne, a həndzəd naha ka məged hərwi mahəndəke abəra ma məged.

<sup>14</sup> A tsəne mətsike me i Piyer na, a sər ha bədiday nğay. Dərev nğay a nğwasa haladzay. Ka həndək abəra mə gay sa bay. Duh a hway mata datay ha a ndo hay, Piyer ma bəra.

<sup>15</sup> Tə gwaday: «Gər a vuwaka daw?»

Ane tuk na, a gwadatay sa: «Ta dedek Piyer ma bəra, maraw me bay.»

Tə gwad: «Agəla ma giye na, gawla i Mbəlom nakə a həbawa na aye.»

<sup>16</sup> Piyer na, nənğeye faya ma feye a məged huya. Ta həndək abəra ma məged na, tə nğatay a Piyer. Tsa na, a gatay hərbaəbəkka.

<sup>17</sup> A gatay kət kət tə həlay, tǎ bəbəl wuray bay, tǎ ndza dıkdıkdı. Tsa na, a təkəratay ma kəkay nakə Bəy Maduweñ a laka ahaya abəra mə gay i danğay

aye. A gwađatay sa: «Dumay ha a Yakuba\* ada a siye i malamar hay.» Tsa na, a yaw abəra mə gay, a ye a təv eye.

<sup>18</sup> Dəre a tsada na, sidzew hay ta ɲgatay a Piyer bay. Wadəɲ wadəɲ a ge mə walaɲ tay haladzay. Ta tsətsah ka bo mə walaɲ tay, tə gwad: «Piyer a təra mey?»

<sup>19</sup> Herod a tsəne Piyer kə təmaw abəra ma daɲgay na, a gwađatay a ndo hay: «Dum ta pəlum ahaya.» Ndo hay ti ye ta pəla na, ta huta na bay. A zalatay a ndo matsəpe niye hay, a tsətsah fataya abəra, a gwađatay a ndo hay: «Kəđum tay ha sidzew neheye abəra mə dəma.»

Ma dəba eye na, Herod a lətse abəra ma Yahuda, a ye a Sezare. A ndza mə dəma tsakway.

### *Məməte i Herod*

<sup>20</sup> Ndo i wuzlahgəma i Tir ta Sidon tə ndza ta dala i Herod. Tə huta wu mənday tay na, mə dəma. Ahəl niye na, wu a ndalay a Herod ka ndo i gəma i Tir ta Sidon. Ndo hay tə ma ha ka bo bazlam. Tsa na, ti yaw ka təv i ndoweje andaya məzele ɲgay Bəlastus, neɲgeye ndo i sik i bəy. Tə slər na ka təv i Herod, mə ye mə gwaday: «Barakwa məndze zay mə walaɲ kway.»

<sup>21</sup> Herod a tsəne bazlam tay niye na, a patay pat hərwi məma ha ka bo bazlam mə walaɲ tay lele. Məpesle həlay tay kə ndisl a dəma tuk. Pat eye niye na, Herod a pa ka bo peteked i mələve bəy ɲgay. A ndza ka təv məndze i bəy ɲgay, kame i ndo hay tebiye. A tsikatay bazlam neheye a ləva ha bo aye.

<sup>22</sup> Tsa na, ndo hay ta wuda haladzay, tə gwad: «Maa tsik me na, mbəlom bəna ndo zezeɲ bay!»

<sup>23</sup> Herod a tsəne andza niye na, a dəslay ha gər a bo, kə dəslay ha gər a Mbəlom bay. Kwayaɲɲa gawla i Mbəlom a yaw a fay a Herod, səɲ hay tə way a hud. Tsa na, a mət.

<sup>24</sup> Azlakwa duh, bazlam i Mbəlom a da a zləm kame kame haladzay.

<sup>25</sup> Barnabas tə Sol ta ndəv ha məsləre tay nakə tə slər tay ha a Zerozelem aye na, ta mbədə gər a Aɲtiyos. Tə zla ahaya Yuhana nakə tə zalay Markus aye ka həlay.

## 13

### *Məsəfəre Tsədəɲɲa eye a zla Barnabas tə Sol*

<sup>1</sup> Ahəl niye mə walaɲ i ndo məpe mədzal gər ka Yesu neheye ma gəma i Aɲtiyos aye na, ndo məde ha bazlam i Mbəlom hay ta ndo matətikawatay bazlam i Mbəlom a ndo hay andaya. Ndo i maslaɲ eye niye hay na, Barnabas, Simeyon nakə tə zalay Zeɲzeɲ eye aye, Lukiyus ndo i Siren, Manayen ndo nakə ta həhalawa ta Herod bəy i Galile ahəl nakə nəteye wawa eye hay mba aye, ada Sol. Herod a ləvawa na, gəma i Galile.

<sup>2</sup> Pat wuray nəteye faya ta dəsleye ha gər a Bəy Maduweɲ ada faya ta giye daliyam na, Məsəfəre Tsədəɲɲa eye a gwađatay: «Pum tay ha Barnabas tə Sol təv tay wal hərwi məge məsler ga nakə na zalatay faya aye.»

<sup>3</sup> Ta ndəv ha daliyam tə maduwule me na, tə pa həlay ka Barnabas tə Sol. Tsa na, tə gər tay ha, ti ye mata ge məsler i Mbəlom tuk.

### *Barnabas tə Sol mə Sipəre*

<sup>4</sup> Andza nakə Məsəfəre Tsədəɲɲa eye a slər tay ha Barnabas tə Sol aye na, tə həl bo ti ye a gəma i Selosi. Mə dəma na, tə tsal a kwalalaɲ i yam, ti ye ha a gəma i Sipəre gəma nakə ma wuzlah i dəlov aye.

\* 12:17 Kanaɲ a tsik na, ka bəy i ndo məpe mədzal gər hay ka Yesu neheye ma Zerozelem aye.

<sup>5</sup> Tə ndisl a gəma wuray tə zalay Salamin na, tə pa bo ka məde ha bazlam i Mbəlom mə gay i maduwule me i Yahuda hay. Nəteye dziye ta Yuhana Markus, a dzənawa tay ha.

<sup>6</sup> Tə tas abəra ma gəma niye ma wuzlah i yam aye na, tə husa a gəma i Pafos. Mə dəma na, tə ndzay a gər a maharam wuray tə zalay Bar-Yesu. Ndoweye niye na, neŋgeye ndo i Yahuda, ndo nakə a gwađ neŋgeye ndo məde ha bazlam i Mbəlom aye.

<sup>7</sup> A ndzawa na, ka təv i bəy i gəma niye ma wuzlah i dəlov nakə tə zalay Sipəre aye. Bəy niye tə zalay na, Serqiyos Polus. Neŋgeye na, a tsah lele, a sər wu. Barnabas tə Sol tə ndisl naha na, a zalatay hərwi a say tã tsikay bazlam i Mbəlom.

<sup>8</sup> Ane tuk na, Bar-Yesu maharam nakə tə zalay Elenas dərmak aye, a ye a gaw maləved ka təv i bəy. A say bəy mâ təra ndo məpe mədzal gər ka Yesu bay.

<sup>9</sup> Məsəfəre Tsədaŋŋa eye a yaw a rah a bo i Sol nakə tə zalay Pol aye dərmak. A ndazl na maharam niye.

<sup>10</sup> Tsa na, a gwađay: «Nəkar ndo nakə bəbərek mə bo yak haladzay aye ada nəkar sewed eye haladzay. Nəkar na, wawa i Fakalaw. Wu nakə lele aye na, ka nay dəre tebiye. Nəkar na, a saka matəra ha bazlam i Bəy Maduweŋ maraw me na, hərwi mey?»

<sup>11</sup> Tsəne, anəke! Bəy Maduweŋ ma giye fakaya mevel. Ma təriye kar ha guluf eye, ka ndziye tsakway ka ŋgateye a pat sa bay.»

Tsa na, kwayaŋŋa Elanas a ge guluf dedək tətərgam həvad. A ŋgatay a dəre bay. A mbəda bo tewelewele mapəle ndo məgəsay həlay.

<sup>12</sup> Bəy niye a ŋgatay a wu nakə a ge bo aye na, a dzala ha ka Yesu hərwi matətike i Pol nakə a tətik ka Bəy Maduweŋ aye kə gay hərbaəbəkka.

### *Barnabas tə Pol ma Aŋtiyos i Pizidi*

<sup>13</sup> Pol ta ndo ŋgay hay, tə həl bo abəra ma Pafos. Tə tsal a kwalalanj i yam, ti ye a gəma i Perge ka dala i Pamfeli. Mə dəma na, Yuhana Markus a gər tay ha, a mbəda gər a Zerozelem.

<sup>14</sup> Barnabas tə Pol na, ti ye kame kame. Ti ye abəra mə Perge, ti ye a Aŋtiyos ka dala i Pizidi ta tsəved. Pat i mazəzukw bo na, ti ye a gay i maduwule me. Ti ye naha tə ndza ka dala.

<sup>15</sup> Ti ye naha na, faya ta dzaŋgateye mə dərewel i Musa ada mə dərewel i ndo məde ha bazlam i Mbəlom hay. Ma dəba eye ta ndəv ha mədzenge na, bəy hay i gay i maduwule me niye tə gwađatay: «Malamar ga hay, tadə bazlam kurom andaya mətsikatay a ndo hay hərwi məvələtatay gədaŋ na, ka slumeye faya mətsike me anəke tuk.»

<sup>16</sup> Pol a lətse, a zla həlay ka mbəlom, a gatay həlay kət kət, andza məgwede: «Ndzum dikdik.» A gwađatay: «Nəkurom ndo i Israyel hay ada ta nəkurom siye i ndo neheye ka dzədzarumay a Mbəlom aye dərmak. Pumay zlam a bazlam nakə na tsikakumeye.

<sup>17</sup> «Mbəlom kway nəkway ndo i Israyel hay kə pala bəba tətə kway hay ahəl niye. Ahəl nakə nəteye tə ndzawa ma gəma i Ezipt aye na, Mbəlom ka səkah tay ha haladzay. Ma dəba eye na, kə həlatay ahaya ta gədaŋ i həlay ŋgay.

<sup>18</sup> Mbəlom kə gatay gər ma kəsaf məve kuro kuro fad.

<sup>19</sup> Ma dəba eye na, ka bəbazl tay ha gəma hay tasəla abəra ka dala i Kanan. A vəlatay dala niye a ndo ŋgay Israyel hay andza i tay wu tay.

<sup>20</sup> Wu niye tebiye kə ndza ma giye məve kuro kuro fad gər eye zlam. Ma dəba eye na, kə pa tay ndo məge sariya hay a bəba tətə kway hay. A ge andza niye na, hus a həlay nakə Samuyel neŋgeye ndo məde ha bazlam i Mbəlom aye.

21 «Ma dəba eye na, ta tsətsah bəy ka Mbəlom. Mbəlom a vəlatay Sayul, wawa i Kis, ma ləver i Bendzamej. Sayul a ndza ma bəy məve kuro kuro fad.

22 «Tsa na, Mbəlom a kal ha Sayul, a patay Davit andza bəy. Mbəlom a gwad: “Na sər ha Davit wawa i Zese, neŋgeye na, a yej a gər. Ma giye na, wu nakə a seŋ aye tebiye.”»

23 Pol a gwadətay sa: «Ndo nəte mə walaŋ i gwala i Davit hay Mbəlom a pa na ndo mətəme tay ha İsrayel hay na, Yesu. Ba kə tsik kurre, a gwad ma vəliye.

24 Ahəl nakə Yesu ki yaw zuk bay aye na, Yuhana madzəhuəbe ndo a yam kə də ha bazlam i Mbəlom. Kə zalatay a ndo i İsrayel hay tebiye tā mbəda ha mede tay ada tā dzəhuəb bo a yam.

25 A ndisl a həlay nakə Yuhana madzəhuəbe ndo a yam ma ndəviye ha məsler ŋgay aye na, a gwadawa: “Ka dzalum mə gər kurom, neŋ na, way? Neŋ na, ndo nakə nəkurom faya ka həbumeye bay. Ane tuk na, tsənum: Neŋgeye na, ma deyeweye kame ga. Neŋ na sla də kwa məpəlay ha ləber i təhərək ŋgay bay.”

26 «A nəkurom malamar ga hay, nəkurom wawa i Abraham hay ada a nəkurom siye neheye ka dzədzarumay a Mbəlom aye, Mbəlom a slərəw labara nakay na, a nəkway, kəkay nakə a təma kway ha aye.

27 Andza niye, ndo i Zerozelem hay ta bəy tay hay, Yesu neŋgeye way na, ta sər ha bay. Bazlam i ndo məde ha bazlam i Mbəlom neheye tə dzaŋgawa pat i mazəzukw bo aye na, ta tsəne bay. Ahəl nakə tə kəd Yesu aye na, bazlam i ndo i məde ha bazlam i Mbəlom hay kə ge bo tuk.

28 Kwa tadə ta huta faya abəra mənese nakə də məkəde aye bay bəbay na, ta tsətsah ka Pilat m̄a kəd na ka mayako mazləlmbadə aye.

29 Tə ge wu nakə Derewel i Mbəlom a də ha ka gər ŋgay aye. Ma dəba na, ti ye tə mbəzla ahaya mədahaŋ i Yesu abəra ka mayako mazləlmbadə aye. Ti ye ha, tə pa na a tsəvay.

30 Ane tuk na, Mbəlom kə mbəla ahaya abəra ma mədahaŋ.

31 Ma məhəne halədzay, ka bəzatay ha bo a ndo neheye ti yaw ka bo ma Galile, ti ye ka bo a Zerozelem aye. Anəke nəteye niye ta həhal ka bo dziye na, nəteye ta tərə ndo məhələ mbal ŋgay hay kame i ndo i İsrayel hay.

32 «Nəmay eye, nəmaa yakum ahaya Labara Ŋgwalak eye. Wu nakə Mbəlom a tsik kurre a gwad ma vəlateye a bəba tətə kway hay aye na,

33 kə ge na hərwi kway. A ge na, a lətse ahaya Yesu abəra ma mədahaŋ. Mawatsa eye mə Derewel i Dəmes hay 2, a gwad: “Nəkar wawa ga.

Bəgom neŋ na tərə Bəba yak.\*»

34 «Mbəlom a lətse ahaya Yesu abəra ma mədahaŋ. A də ha kurre, a gwad ma ziye ma tsəvay bay. Kə tsik andza nakay, a gwad:

“Na ta vəlakumeye wu nakə tsədaŋŋa eye ada dedək eye andza nakə na tsikay a Davit, na gwaday na vəlakeye aye.†”

35 «Hərwi niye, kə tsik ma Dəmes hay sa, a gwad:

“Nəkar Mbəlom na, ka gəriye ha ndo i məsler yak m̄a ze ma tsəvay bay.‡”

36 «Davit a həlay i məndze ŋgay na, kə ge wu nakə a yay a gər a Mbəlom aye. Ma dəba eye Davit a mət. Ta la na ka təv i bəba tətə ŋgay hay ada kə ze ma tsəvay.

37 Ane tuk na, ndo nakə Mbəlom a lətse ahaya abəra ma mədahaŋ aye na, kə ze ma tsəvay təbey.

\* 13:33 Dəmes hay 2.7. † 13:34 Ezay 55.3. ‡ 13:35 Dəmes hay 16.10.



38 «Malamar hay, sərüm na, nəmay faya nəmaa dākumeye ha Mbəlom a pəsətay ha mezeleme i ndo hay na, hərwi Yesu.

39 Ndoweye kə dzala ha ka Yesu na, Mbəlom ma pəseye ha mənese ηgay tebiye. Bazlam i Musa mapala eye, neŋgeye na, gədan ηgay andaya mərəsakum ha mənese bay.

40 «Gum metshe, wu nakə ndo mədə ha bazlam i Mbəlom hay tə watsa ahəl niye na, mâ ndzakum a gər bay. Tə watsa na, tə gwad:

41 «A həlay kurom nakay, na giye məsler nakə ka dzalumeye ha faya bay kwa tadə ndəray mâ təkərakum aye.

Zəbum, nəkurom neheye ka zəbum ka bazlam ga andza wu lele aye bay aye, mâ gakum hərəbəəkka, dum mətum.Ş»

42 Pol ta Barnabas ta ndəv ha bazlam tay na, ti yaw abəra mə gay i maduwule me. Ti yaw abəra na, ta tsətsah fataya, tə gwadətay: «Mumaw pat i mazəzukw bo mekeləŋ eye sa ada ka tsikumameye ka gər i labara nakay sa.»

43 Ahəl nakə ndo hay faya ta ηgəniye gər aye na, Yahuda hay haladzay ta ndo neheye tə dəsławay ha gər a kule i Yahuda hay aye, tə patay bəzay a Pol ta Barnabas. Pol ta Barnabas tə vəlatay gədan hərwi ada tâ gər ha ηgwalak i Mbəlom sa bay.

44 Pat i mazəzukw bo mekeləŋ eye a slaw na, həlay a vay a ndo i gəma niye hay tebiye tə haya gər hərwi mətsəne bazlam i Bəy Maduweŋ.

45 Siye i Yahuda hay tə ηgatay a ndo neheye hay haladzay tə haya gər aye na, a ndalatay haladzay. Tə ge fataya sələk. Ta dazlay mətsike wu nakə lele bay aye ka Pol ada tə tsaday pələslesle.

46 Pol ta Barnabas tə tsik me tə zluwer eye bay tebiye, tə gwadətay: «Həbe nəmaa dākumeye ha bazlam i Mbəlom na, a nəkurom təday. Ane tuk na, ka dzalum na, lele bay nakə kâ hutum sifa nakə ma ndəviye bay aye. Anəke na, nəmaa diye wu may, nəmaa ta dətəye ha a ndo neheye Yahuda hay bay aye.

47 Bəy Maduweŋ a gwadəmay na, kəkay? A gwad:

“Nəkar na, na pa kar andza dzaydzay ma dəvətəye a ndo i məndzibəra hay tebiye,

hərwi ada kâ ye ka təv neheye dərəŋ eye ka tsikatay a ndo hay,

neŋ Bəy Maduweŋ na mbəliye\* tay ha na, kəkay?”»

48 Ndo neheye nəteye Yahuda hay bay aye, tə tsəne bazlam niye na, dərev tay a ηgwasa haladzay, a yatay a gər. Ta dazlay a mazambaday a bazlam i Bəy Maduweŋ. Ndo neheye Mbəlom a pala tay ha hərwi məhute sifa nakə ma ndəviye bay aye na, nəteye tebiye tə dzala ha ka Mbəlom.

49 Andza niye, bazlam i Mbəlom a ηgəna gər ka gəma niye tebiye.

50 Ane tuk na, Yahuda hay tə patay me a ηgwas zlele eye neheye tə dəsławay ha gər a Mbəlom aye ta ndo neheye bagwar eye, tə gatay dərətsətseh a Pol ta Barnabas. Ta həhar tay ha abəra ka dala niye.

51 Pol ta Barnabas ta tətək w ha burhway i gəma tay abəra ka sik tay.† Ti ye a gəma wuray tə zalay lkoniyyom.

52 Ndo məpe mədzal gər hay ka Yesu neheye tə zaw ma Anŋtiyos aye na, dərev tay a rah ta məŋgwese ada ta Məsəfəre Tsədanŋa eye.

Ş 13:41 Habakuk 1.5. \* 13:47 Ezay 49.6. † 13:51 Matətək w ha burhway abəra ka sik andza məgwədə Pol ta Barnabas ta giye wuray hərwi ndo i wuzlahgəma nakay sa bay. Wu i wuzlahgəma niye ma matsa fataya bay kwa burhway nakə ka sik aye.

## 14

*Pol ta Barnabas ma Ikoniyyom*

<sup>1</sup> Pol ta Barnabas tə husa a Ikoniyyom na, ti ye tə fələkwa a gay i maduwule me i Yahuda hay andza nakə ma Anṭiyoş aye dərmaḱ. Ta tətikatay bazlam i Yesu a ndo hay. Yahuda hay haladzay ta ndo neheye Yahuda hay bay aye tə dzala ha ka Yesu.

<sup>2</sup> Ane tuk na, Yahuda neheye ta təma bazlam i Yesu bay aye na, tə patay me a ndo neheye Yahuda hay bay aye hərwi ada tə dzala wu nakə lele bay aye ka ndo məpe mədzal gər hay ka Yesu.

<sup>3</sup> Duh Pol ta Barnabas tə ndza ma Ikoniyyom haladzay. Tə tsikatay me tə zluwer eye bay ka gər i Bəy Maduwerj. Tə dawa ha ɲgwalak ɲgay ada bəy Maduwerj na, a vəlawatay gədanj ka məge masuwayanj hay hərwi məde ha bazlam tay nakə faya ta tsikiye na, dedək.

<sup>4</sup> Ndo i gəma niye hay ta ɲgəna sulo. Ndo siye hay nəteye ta diye i Yahuda hay, siye hay ta diye i ndo i maslanj i Yesu hay.

<sup>5</sup> Tsa na, Yahuda siye hay ta ndo neheye nəteye Yahuda hay bay aye, tə ləva bo hərwi məge dəretsətseh a Pol ta Barnabas ada məkəde tay ha abəra mə dəma tə kwar.

<sup>6</sup> Pol ta Barnabas tə sər, ta kədiye tay ha na, ta hway. Tə zla tsəved nakə a ye a gəma i Listəre ada a ye a gəma i Derbe. Gəma neheye sulo aye na, ka dala i Likawni salamay.

<sup>7</sup> Tə dawa ha Labara ɲgwalak eye ka dala eye niye.

*Pol ta Barnabas mə Listəre*

<sup>8</sup> Ma gəma i Listəre na, ndəweye andaya matəra eye mə sik. Neɲgeye matəra eye kwa ka məwe ɲgay. Kə lətse, ki ye dāda tə sik ɲgay bay.

<sup>9</sup> Pat wuray na, neɲgeye faya ma pay zləm a bazlam i Pol, Pol a zəba faya. Kwayanṅa Pol a sər neɲgeye na, tsəved andaya məmbəle ha hərwi kə pa mədzal gər ka Yesu.

<sup>10</sup> Pol a tsikay me ta magala, a gwaday: «Lətse tə sik yak dzək lele.» Tsa na, a lətse tsəkwad, a mbərəzla tə sik ɲgay. A pa bo ka mede duwak duwak.

<sup>11</sup> Ndo hay tə ɲgatay a wu nakə Pol a ge aye na, ta wuda tə bazlam i gəma tay Likawni, tə gwad: «Mbəlom hay ta təra andza ndo zezeɲ, ta mbəzlaw ka təv kway.»

<sup>12</sup> Tə pa məzele ka Barnabas «Zeus», mbəlom tay ada ka Pol «Hermes» \* hərwi neɲgeye na, ndo i maslanj.

<sup>13</sup> Gay i məvəlay wu a mbəlom nakə Zeus aye bəse ka tsəved məfələkwe a gəma niye. Tsa na, ndo məvəlay wu a Zeus tay niye a ye a gəsaw sla bagwar eye hay, a pa fataya məvurze i wu neheye lele haladzay aye. A gəsa tay ahaya ka məged i gay i məvəlay wu a mbəlom tay niye. A say na, ndo hay tə vəlatay a Pol ta Barnabas andza wu nakə tə vəlawa kəriye a mbəlom tay aye.

<sup>14</sup> Ane tuk na, Pol ta Barnabas tə tsəne na, a ndalatay haladzay. Ta ɲgurada ha peteked tay, ti ye a walanj i ndo niye hay, ta wuda, tə gwaday:

<sup>15</sup> «Ndo neheye, ka gum wu nakay na, hərwi mey? Nəmay na, ndo zezeɲ hay andza nəkurom dərmaḱ. Nəmaa yaw na, nəmaa zlakumaw Labara ɲgwalak eye ada mədakum ha na, gərur ha kule kurom neheye ɲgama andaya mə dəma bay aye. Ada məbəduḱumaw me ka təv i Mbəlom ma ndziye ka tor eye. Neɲgeye nakə a ge magərmbəlom, dala, dəlov ada tə wu neheye mə dəma aye tebiye.

\* 14:12 Mə kule i Gərek hay na, Zeus neɲgeye bəy i mbəlom tay hay ada Hermes na, ndo i maslanj.

16 Ahəl niye na, kə gər tay ha ndo hay tâ pay bəzay a wu tay neheye faya ta paway bəzay aye.

17 Ane tuk na, kə dətay ha a ndo hay na, nəngeye andaya ta nəteye. A dətay ha na, ta ɲgwalak ɲgay nakə faya ma gateye aye. A pakumaw yam ada kə palakumaw wu mənday abəra ma guvah tə həlay eye. Ka hutum wu mənday ada a ɲgwasakum ha dərev kurum.»

18 Kwa Pol ta Barnabas tə tsikatay andza niye bəbay na, ta təma bay. A satay məkədə tay sla niye huya.

19 A həlay niye na, Yahuda hay ti yaw abəra ma Aɲtiyos i Pizidi, siye hay ti yaw ma Ikoniyyom, tə ndislew a gəma i Listəre. Tsa na, tə patay me a ndo hay. Tə kal na Pol tə kwar hərwi mədəke na. Tə vaha na dəreɲ abəra mə walaɲ gay. Tə dzala na, tə gwad ma giye kə mət.

20 Ane tuk na, ndo məpe mədzal gər hay ka Yesu tə haya faya gər, tə lawara na a wuzlah. Pol a lətse, a mbədə gər a walaɲ gay. Tə dœ eye na, a həl bo, ti ye ta Barnabas a gəma i Derbe.

### *Pol ta Barnabas tə ma a Aɲtiyos*

21 Pol ta Barnabas tə ndisl naha a dəma na, tə da ha Labara ɲgwalak eye mə walaɲ i gəma i Derbe. Ndo hay haladzay tə pa mədzal gər ka Yesu. Ma dəba eye na, ta mbədə gər a Listəre, ti ye abəra ma Listəre, ti ye a Ikoniyyom. Ti ye abəra ma Ikoniyyom, ti ye a Aɲtiyos i Pizidi.

22 A gəma nakə ta ndisl a dəma aye na, tə vələwatay gədaɲ a dərev a ndo məpe mədzal gər hay ka Yesu ka mədzele ha huya ka Yesu. Tə gwadawatay: «Ka deyekweye a Bəy i Mbəlom na, kutoɲ ka sakweye dəretsətsəh haladzay.»

23 Tə pala ndo hay mə walaɲ tay, ta təra tay ha madugula hay. Tsa na, tə ndza, tə ge daliyam, ta duwulay me a Mbəlom hərwi ndo məpe mədzal gər hay ka Yesu tebiye. Tə pa tay ha a həlay i Bəy Maduweɲ nakə tə dzala ha faya aye. Tsa na, ti ye wu tay.

24 Ti ye, tə tas abəra ma gəma i Pizidi, tə ndisl a gəma i Pamfeli.

25 Ti ye naha tə da ha bazlam i Mbəlom ma Perge. Tsa na, ti ye a gəma i Ataliya.

26 Tə tsal a kwalalaɲ i yam, ti ye a Aɲtiyos. Aɲtiyos na, gəma nakə tə pa tay a həlay i Mbəlom mə dəma aye hərwi ada mâ vələtatay ɲgwalak ka məge məsler ɲgay. Anəke tə ge na, məsler eye niye tuk.

27 Tə ndisl naha a Aɲtiyos na, tə hayatay gər a ndo məpe mədzal gər hay ka Yesu. Ta təkəratay wu nakə Mbəlom a ge hərwi tay aye tebiye, ada ma kəkay nakə a həndəkətatay tsəved a ndo neheye Yahuda hay bay aye ka məpe mədzal gər ka Yesu aye dərmak.

28 Pol ta Barnabas tə ndza haladzay ta ndo məpe mədzal gər hay ka Yesu ma Aɲtiyos.

## 15

### *Məkədə wuway ka mədəse bo*

1 Ma dəba eye na, ndo hay ti yaw abəra ma Yahuda a Aɲtiyos. Ti yaw na, ta dazlay a matətikatay a malamar hay. Tə gwadətay: «Ka dəsüm bo andza i bazlam i Musa mapala eye nakə a tsik aye bay na, ka slumeye faya mətəme bay.»

2 Pol ta Barnabas, tə gwadətay: «Ka tsikum andza niye na, ka rawum me.» Bazlam niye a zlatayaw məkədə wuway haladzay ta nəteye. Tə ma ha ka bo bazlam mə walaɲ tay, tə gwad: «Anəke na, slərakwa Pol ta Barnabas ada ta

siye i ndo i Anıtyos hay a Zerozelem hərwi mətsikaw ka wu nakay ta ndo i maslan hay ada ta madugula hay.»

<sup>3</sup> Tsa na, məhay gər i ndo məpe mədzal gər hay ka Yesu ta dzəna tay ha hərwi mede tay. Tə həl bo, ti ye. Tə tas abəra ma gəma i Fenisi, tə tas a bəra ma Samari. Nəteye faya ta diye na, ta təkəratay a ndo məpe mədzal gər hay ka Yesu ma kəkay nakə ndo neheye Yahuda hay bay ta təma bazlam i Bəy Maduwey aye. Ndo məpe mədzal gər hay ka Yesu tə tsəne labara niye na, dərev tay a ɲgwasa, a yatay a gər haladzay.

<sup>4</sup> Tə ndisl a Zerozelem na, ndo məpe mədzal gər ka Yesu, ndo i maslan hay ta madugula hay ta təma tay lele. Tsa na, ta təkəratay wu nakə Mbəlom a ge ta nəteye aye.

<sup>5</sup> Ane tuk na, siye i ndo neheye ta təra nəteye ma bəruk i Farisa hay ta təra ndo məpe mədzal gər ka Yesu aye na, tə zla bazlam, tə gwad: «Kutoy ndo neheye Yahuda hay bay aye, ta təra ndo məpe mədzal gər hay ka Yesu aye na, tã dəs bo ada tã rəhay ha gər a bazlam i Musa mapala eye.»

<sup>6</sup> Ndo i maslan hay ta madugula hay tə haya gər hərwi məzəbe ka bazlam eye niye.

<sup>7</sup> Tə kəf wuway ka bazlam eye niye haladzay. Piyer a lətse, a gwadətay: «Malar ga hay, ka sərüm ha Mbəlom a zla ga na, hərwi ada nã dətay ha Labara ɲgwalak eye a ndo neheye Yahuda hay bay aye, hərwi ada tã tsəne. Ta tsəne na, ta dzaliye ha ka Yesu bədaw?»

<sup>8</sup> Mbəlom nakə a sər dərev i ndo zezey aye kə dətay ha na, ka təma tay ha. Na gwad kə vələtay Məsəfəre Tsədanɲa eye andza nakə a vələkway ahəl niye aye bədaw?

<sup>9</sup> Ka ɲgəna ha ka bo abəra nəteye tə nəkway bay. A təra ha dərev tay tsədanɲa na, hərwi nakə tə dzala ha aye.

<sup>10</sup> Anəke a sakum məgatay kutoy a ndo məpe mədzal gər neheye tə pa mədzal gər ka Yesu marəhay ha gər a bazlam i Musa mapala eye na, hərwi mey? Kwa bəba tətə kway, kwa bo kway eye ka slakwa faya marəhay gər a bazlam i Musa mapala bay tuk na, kəkay? Kã dzum ha Mbəlom bay.

<sup>11</sup> Dzalakwa ha düh na, Bəy Maduwey a təma kway ha na, ta ɲgwalak ɲgay andza nakə a təma tay nəteye.»

<sup>12</sup> Ndo hay tebiye tə ndza dıkdıf. Tsa na, Barnabas tə Pol ta təkəratay masuwayay ta wu neheye Mbəlom a ge ta nəteye mə walaɲ i ndo neheye Yahuda hay bay aye.

<sup>13</sup> Ta ndəv ha mətsike me na, Yakuba a zla bazlam, a gwadətay: «Malar gay hay, tsənum wu nakə na tsikakumeye təday.

<sup>14</sup> Piyer ka təkər ma kəkay nakə Mbəlom a gatay gər a ndo neheye Yahuda hay bay aye. Ahəl nakə bəruk kway a dazlay mba aye na, 6a tsiy a say a Mbəlom məpele siye i ndo hay hərwi ada tã təra ndo ɲgay hay.

<sup>15</sup> Bazlam i ndo məde ha bazlam i Mbəlom neheye tə sik aye na, a ye ka bo tə wu nakə a ge bo aye:

<sup>16</sup> «Aza kame na, gay i Davit ma mbəzliye.

Ane tuk na, aza kame, na ta dəzliye na.

Kwa kə nas bəbay na, na lambadiye na.

<sup>17</sup> Hərwi ada siye i ndo hay tebiye tã pəla ga,

ada ndo i gəma hay tebiye dərmak.

Nakay na, wu nakə Bəy Maduwey a tsik aye.\*

<sup>18</sup> A dā ha wu neheye na, kurre.»

\* 15:17 Amos 9.11-12.

19 Hərwi niye, Yakuba a gwaɗatay sa: «Na dzala na, kâ kwasakwatay gər a ndo neheye Yahuda hay bay aye ta tãma Mbəlom aye bay.

20 Watsakwatay naha hərwi mægweɗe tay na, kâ həpəɗum slo nakə ndo hay tə kəɗay a kule aye bay. Hərwi slo niye na, tsəɗanɲa bay. Tã ge mezeleme bay. Wu nakə ta mburoɗ mamburoɗe aye na, tã həpəɗ slo eye bay, kâ ndayum bambaz bay.†

21 Hərwi bazlam i Musa mapala eye na, zla anəke bay, ndo hay faya ta diye ha mə walaɲ i gay ada mə gay i maɗuwule me i Yahuda hay pat i mazəzukw bo pat pat.»

### *Derewel i məvəle gəɗaɲ*

22 Ndo i maslaɲ hay ta madugula hay ta məhay gər i ndo məpe məɗzal gər hay ka Yesu tə ma ha ka bo bazlam, tə gwad: «Palakwa ndo hay mə walaɲ tay ada kâ slərakwa tay ha a Anɲiyos tə Pol ada ta Barnabas.» Tsa na, tə zla Yuda nakə tə zalay Barsabas aye ada ta Silas. Ndo neheye sulo aye nəteye bagwar eye hay mə walaɲ i ndo məpe məɗzal gər hay ka Yesu.

23 Tə watsa ɗerewel, tə vələtay a həlay. Tə watsa ɗerewel eye niye na, tə gwad:

«Nəmay ndo i maslaɲ hay ta madugula hay, nəmay na, malamar kurom hay. Nəmaa tsikakum naha me a nəkurom ndo məpe məɗzal gər hay ka Yesu, ma slala mekeleɲ eye hay ma Anɲiyos ada ma gəma i Siri ta Silisi.

24 «Nəmaa tsəne ndo siye hay mə walaɲ may ta ye naha ka təv kurom, ta kwasakum ha məɗzal gər tə bazlam hay ada bazlam tay niye na, a gakum hiyem hiyem. Kwa tsekweɲ nəmaa vələtay naha tsəveɗ bay.

25 Hərwi niye, nəmaa dzapa ha məɗzal gər may ka təv manəte eye, nəmaa pala ndo hay ada məsləre tay naha. Ta lakiye naha dzam kurom hay, Pol ta Barnabas.

26 Nəteye neheye ta səkəm ha məsəfəre tay hərwi məsler i Bəy Maduweɲ Yesu Kəriste aye.

27 Nəmaa sləriye naha Yuda ta Silas, bo tay eye ta tsikakumeye wu nakə nəmaa watsa a ɗerewel nakay aye.

28 «Məsəfəre Tsəɗanɲa eye ta nəmay, nəmaa ma ha ka bo bazlam na, nəmaa gwad: Nəmaa piye fakuma wu mamba eye bay. A samay na, pumay bəzay a wu neheye ɗekɗek tsa.

29 Kâ həpəɗum slo neheye ta təzay a kule aye bay, kâ ndayum bambaz bay, kâ həpəɗum slo i wu neheye ta mburoɗ mamburoɗe aye bay, kâ gum mezeleme bay.‡ Ka gum wu neheye bay na, niye na, ka gum lele.

«Nəmay malamar kurom hay, nəmaa tsikakum naha me.»

30 Tə vələtay ɗerewel niye a ndo neheye tə slər tay ha aye. Ti ye, tə ndisl a Anɲiyos na, tə hayatay gər a ndo məpe məɗzal gər hay. Tsa na, tə vələtay ɗerewel niye.

31 Tə dzaɲga na ɗerewel niye na, a vələtay gəɗaɲ haladzay, ɗərev tay a ɲgwasa.

32 Yuda ta Silas, nəteye neheye ndo məɗe ha bazlam i Mbəlom hay aye, tə pa bo ka mətsike bazlam i məvələtay gəɗaɲ a malamar hay məndze haladzay. Tə vələtay gəɗaɲ məndze huya ka məpe məɗzal gər ka Yesu.

33 Tə ndza ma Anɲiyos məndze tsakway na, tə ləva bo mede wu tay, malamar hay tə tsikatay me, tə gwaɗatay: «Dum tə zay hərwi ada tã maw ka təv i ndo neheye tə slər tay naha aye.» [

34 Ane tuk na Silas na, a gwad ma ndziye mə ɗəma.]

† 15:20 Zəba ma Levitik 18.6-18 ada 17.10-16. ‡ 15:29 Zəba mə Məsler hay 15.20 ada zəba wu nakə tə watsa ka gər i bazlam eye nakay aye.

<sup>35</sup> Pol ta Barnabas tə ndza ma Anıtyos. Nəteye ta siye i ndo hay haladzay ta tətikawatay a ndo hay ada tə dəwa ha Labara Nğwalak eye i Bəy Maduweŋ a ndo hay.

### *Pol ta Barnabas ta nğəna gər*

<sup>36</sup> Ma dəba eye na, Pol a gwađay a Barnabas: «Anəke na, mbəđama gər ta zəbamatay dəre a malamar hay ma gəma neheye ka dəma ha bazlam i Bəy Maduweŋ mə dəma aye hərwi məsərə nəteye andaya zay bəbay daw?»

<sup>37</sup> Barnabas a gwađay faya ayaw a Pol, ada a say məzle Yuhana-Markus ka həlay.

<sup>38</sup> Ane tuk na, a say a Pol Barnabas m̄a zla Yuhana-Markus bay, hərwi kə gər tay ha ahəl niye ma Pamfeli. Mə mahəhele tay neheye faya ta həhaliye na, kə ge məsler ta nəteye sa bay.

<sup>39</sup> Tə kəd wuway haladzay. Tsa na, Pol ta Barnabas ta nğəna gər. Barnabas a zla Markus, tə həl bo ti ye a Sipəre.

<sup>40</sup> Pol na, neŋgeye a zla Silas. Ndo məpe mədzal gər hay ka Yesu ta dıwulay me a Mbəlom hərwi ada Mbəlom m̄a gatay nğwalak huya. Tsa na, Pol ta Silas tə həl bo, ti ye.

<sup>41</sup> Ti ye, tə tas ta Siri ada ta Silisi. Tə vələtay gədaŋ a ndo məpe mədzal gər hay ka Yesu.

## 16

### *Timote a laka ha Pol ta Silas*

<sup>1</sup> Pol ta Silas tə ndisl a Derbe ada a Listəre. Mə dəma na, ndoweye andaya kə pa mədzal gər ka Yesu, məzele nğay Timote. May nğay na, dem i Yahuda hay, ka tara ndo məpay bəzay a Kəriste. Ane tuk na, zal nğay, bəba i Timote na, Gərek hay.

<sup>2</sup> Timote na, malamar neheye ma Listəre aye ada ma İkoniyom aye na, tə tsikawa faya wu lele eye haladzay.

<sup>3</sup> A say a Pol məzle na ta diye ka bo dziye. A zla na, a dəs na hərwi Yahuda neheye hay ma gəma niye hay aye. Ndo haladzay tə sər ha bəba i Timote na, Gərek hay.

<sup>4</sup> Ahəl nakə ta diye na, ti ye ka gəma ka gəma. Tə dətay ha bazlam neheye ndo i maslanj i Yesu hay ta madugula hay ma Zerozelem tə tsik aye. Ta tsətsah fataya, tə gwađatay: «Rəhumay ha gər lele.»

<sup>5</sup> Ndo məpe mədzal gər hay ka Yesu ta huta gədaŋ ada ndo hay ta səkah pat pat tə dzala ha ka Yesu.

### *Ndo i Masedowan*

<sup>6</sup> Ma dəba eye na, a satay mede mata da ha bazlam i Mbəlom ka dala i Azi. Ane tuk na, Məsəfəre Tsədaŋŋa eye a gwađatay: «K̄a yum bay.» Tsa na, tə tas abəra ma gəma i Firigiya ada Galat.

<sup>7</sup> Ahəl nakə tə ndisl a gəma i Mizi aye na, tə dzala mə gər tay mede a Bitini. Ane tuk na, Məsəfəre i Yesu kə vələtay tsəved mede a dəma bay.

<sup>8</sup> Tsa na, tə tas abəra ma Mizi ada ti ye a wuzlahgəma i Tərowas.

<sup>9</sup> Ta həvađ na, məsine a gay a Pol. A nğatay a ndo i Masedowan, malətsa eye. Ndo i Masedowan niye a gay amboh, a gwađay: «Tasaw a Masedowan, ta məmay bo tey!»

<sup>10</sup> Ma dəba i məsine niye na, kwayaŋŋa nəmaa pəla tsəved mede a Masedowan. Hərwi nəmaa sər ta dedək Mbəlom a zalamay mata da ha Labara Nğwalak eye a ndo i gəma niye hay.

### *Lidiya a pa mədzal gər ka Bəy Maduwerj*

11 Tsa na, nəmaa həl bo abəra ma Tərowas, nəmaa ye kwayanña a Samotaras ta wuzlah i yam. Tədcə eye na, nəmaa həndzəd a Neyapoli.

12 Abəra mə dəma na, nəmaa həl bo nəmaa ye a gəma i Filip, wuzlahgəma nakə a ze siye hay ka dala i Masedowan aye. Maa ndzawa ma gəma eye niye na, Roma hay. Nəmaa ndza məhəne haladzay mə walañ gay niye.

13 Pat i mazəzukw bo na, nəmaa yaw abəra mə walañ gay, nəmaa ye ka me i magayam. Nəmaa dzala na, nəmaa hutıye təv mađuwulay me a Mbəlom i Yahuda hay. Nğwas wuray hay andaya mahaya gər eye ka təv niye. Nəmaa ndisl naha a dəma na, nəmaa ndza ka dala hərwi mətsikatay me.

14 Mə walañ i nğwas niye hay na, nğwas eye andaya tə zalay Lidiya. A yaw abəra ma gəma i Tiyatir. A səkəmawa peteked lele eye hay, ndozza mə luma. Nəñgeye na, a dəsławay ha gər a Mbəlom. Bəy Maduwerj a həndəkay ha dərev hərwi ada mə pay zləm a bazlam i Pol. Tsa na, a dzala ha.

15 Pol a dzəhu6 ha a yam ta ndo neheye mə gay nğay aye tebiye. Lidiya a gwađatay: «Tədə ka dzalum, nəmaa dzala ha ka Bəy Maduwerj ta dedek na, dumara ta ndzum mə gay ga.» A gatay kutoñ, ta təma məndze mə gay nğay.

### *Tə gəs Pol ta Silas a dañgay*

16 Pat wuray nəmay faya nəmaa diye a təv i mađuwule me na, dem wuray a yaw mata dzəgər ta nəmay. Məsəfəre nakə lele bay eye mə bo nğay, a tsikawa wu nakə ma deyeweye kame aye. Ndo neheye a gawatay məsler aye na, tə hutawa suloy haladzay tə wu nğay nakə a tsikawa aye.

17 A dazlay məpamay bəzay a Pol ta nəmay. A gwađawa: «Ndo neheye na, ndo i məsler i Mbəlom nakə bagwar eye mə gər eye. Nəteye na, faya ta dəkumeye ha tsəved nakə Mbəlom ma təmiye kurom ha aye.»

18 A pəmay bəzay ma giye məhəne haladzay.

Ka mandəve eye na, a ndalay a Pol. A mbəda bo ta təv i dem niye, a nğəz ka məsəfəre niye lele bay eye, a gwađay: «Ta məzele i Yesu Kəriste, dara abəra mə bo i dem nakay bəse.» Kwayanña məsəfəre niye a yaw abəra mə bo i dem niye.

19 Ndo i gay nğay niye hay tə nğatay, məsəfəre niye tə hutawa ha suloy andaya sa bay na, tə gəs tay ha Pol ta Silas, ti ye tay ha kame i bəy i dala hay.

20 Ti ye tay ha kame i sariya. Ti ye naha, tə gwađatay: «Ndo neheye na, nəteye faya ta zlamayaweye mawesewes a gəma. Nəteye na, Yahuda hay,

21 ada nəteye faya ta tətikiye kule tay nakə nəkway Roma hay tə vəlakway faya tsəved məpay bəzay bay aye.»

22 Ndo hay tebiye ta mbəda fataya me tə bazlam. Bagwar tay hay ta buwa peteked abəra ka Pol ta Silas, tə gwađatay: «Ndabum tay ha ta mandala6a.»

23 Tə nda6a tay ha ledede. Ma dəba eye na, tə gəs tay ha, ti ye tay ha a dañgay. Tə gwađay a ndo matsəpe gay i dañgay: «Tsəpa tay ha lele.»

24 Ndo matsəpe gay i dañgay a tsəne andza niye na, kwayanña a ye a pa tay ha a hud i gay i dañgay. A tələkatay ha sik tay hay a səsəlek hay.

25 Magər həvad a ge na, Pol ta Silas tə duwulawa me ada tə gawa dəmes hərwi mazambađay a Mbəlom. Siye i ndo neheye ma dañgay aye nəteye faya ta piye fataya zləm.

26 Ahəl nakə nəteye faya ta giye dəmes aye na, kwayanña dala a 6əl. A 6əl ha gay i dañgay niye hus ka mədok eye. Məged i gay i dañgay ta həndək tebiye ada tsalalaw i ndo neheye ma dañgay aye ta nğəzlah abəra mə sik tebiye.

27 Tsa na, ndo matsəpe gay i dañgay niye a pədeke abəra ka məndzəhəre. A nğatay a məged i gay i dañgay hay məhəndəka eye hay tebiye na, a zla



maslalam ɲgay a say məkədə bo ɲgay abəra mə dəma, hərwi a dzala a gwad ma giye na, ndo neheye mə gay i daɲgay aye ta hway.

<sup>28</sup> Pol a ɲgatay na, a wuda ta gədaɲ ɲgay peteh, a gwaday: «Kâ kəf bo yak bay. Nəmay andaya tebiye kənaɲ, ndəray ka hway bay.»

<sup>29</sup> A tsəne bazlam i Pol niye na, a tsətsah ako. Tsa na, a ye ha a huf i gay i daɲgay tə madzədzere eye haladzay, zluwer a gay. A ye naha, a kal ha bo kame i Pol ta Silas.

<sup>30</sup> Tsa na, a həlatay ahaya abəra mə gay i daɲgay, a tsətsah fataya, a gwadətay: «A nəkurom, na ta təmiye na, na giye kəkay?»

<sup>31</sup> Ta mbəday faya, tə gwaday: «Dzala ha ka Bəy Maduweɲ Yesu ada ka təmiye ta ndo i gay yak hay tebiye.»

<sup>32</sup> Tə tsikay bazlam i Bəy Maduweɲ ada a ndo neheye mə gay ɲgay aye tebiye.

<sup>33</sup> Tsa na, ndo matsəpe gay i daɲgay niye a həl Pol ta Silas ta həvad eye niye, a ye a baratay na mbəlak i mənəbe tay nakə tə ndəba tay ha aye. Pol ta Silas ta dzəhuɓ ha ndo niye a yam ta ndo i gay ɲgay hay tebiye.

<sup>34</sup> Ma dəba eye a həl Pol ta Silas a gay ɲgay. A vəlatay wu mənday, tə nda. Ndo niye ta ndo i gay ɲgay hay tebiye, dərev tay a rah ta mənɟwese hərwi nakə tə dzala ha ka Mbəlom aye.

<sup>35</sup> Dəre a tsadə na, bagwar i Roma hay tə slər ndo hay ka təv i ndo matsəpe gay i daɲgay, ta gwaday na, mə gər tay ha Pol ta Silas abəra ma daɲgay.

<sup>36</sup> Ndo matsəpe gay i daɲgay niye, a ye a tsikay a Pol, a gwaday: «Bagwar i Roma hay ta slər aw ndo hay, tə gwədəɲ na, nə gər kurom ha. Anəke na, ka slumeye madayaw abəra ada dum kurom tə zay.»

<sup>37</sup> Ane tuk na, Pol a gwadətay a ndo neheye tə slər tay naha aye: «Ta ndəba may kame i ndo hay tebiye, ta gamay sariya bay. Ada nəmay na, Roma hay dərmak tuk na, ta gəriye may ta məkal na, kəkay? Andza niye na, nəmaa wuda bay. Bo tay eye tə yaw tə gər may ha.»

<sup>38</sup> Ndo neheye tə slər tay naha aye, ta mbədə gər ka təv i bagwar i Roma hay. Ti ye, ta təkəratay wu nakə Pol a tsik aye. Tə tsəne Pol ta Silas nəteye Roma hay na, ta dzadzər haladzay.

<sup>39</sup> Tsa na, ti ye tə gatay amboh. Tə həlatay ahaya abəra mə gay i daɲgay, tə gwadətay: «Amboh, dum kurom abəra ma walaɲ i gay.»

<sup>40</sup> Pol ta Silas ti yaw abəra ma daɲgay na, ti ye a gay i Lidiya. Ti ye naha, tə ndzatay a gər a malamar hay. Tə vəlatay gədaɲ. Tsa na, ti ye wu tay.

## 17

### *Pol ta Silas ma Tesalonik*

<sup>1</sup> Ma dəba eye na, Pol ta Silas ti ye ta gəma i Amfipolis ada ta gəma i Apoloni. Tə ndisl a gəma i Tesalonik. Mə dəma na, gay i maɟuwule me i Yahuda hay andaya.

<sup>2</sup> Pol a ye a dəma andza nakə a gawa aye. Pol a yawa, a mba ha ka bo pat i mazəzukuw bo sik mahkar. Tə kədəwa wuway ka Dərewel i Mbəlom ta ndo neheye mə dəma aye.

<sup>3</sup> A dəwa tay ha, a gwadawatay: «Kəriste na, kutoɲ ma siye dəretsətseh, ta kədiye na. Ma lətseweye abəra ma mədahaɲ. Yesu nakə neɲ faya na dəkumeye ha anəke aye na, Kəriste.»

<sup>4</sup> Tə tsəne bazlam niye na, siye mə walaɲ i Yahuda hay ta təma bazlam i Pol ta Silas. Tə patay bəzay. Siye i Gərek hay haladzay neheye tə dəslaway ha

gər a Mbəlom aye ta ɲgwas neheye tə da a zləm aye, nəteye haladzay ta təma bazlam niye dərmak.

<sup>5</sup> Ane tuk na, siye i Yahuda neheye ta təma təbey aye na, tə ge səlak ka Pol ta Silas. Ti ye ta pəlaw ndo neheye tə sər wuray bay nəteye faya ta həhaliye ka tsəved kəriye, tə hayatay gər. Tə ma ha ka bo bazlam ka gər i Pol ta Silas. Ta ɲgəna ha bazlam niye a wuzlahgəma tebiye. Tsa na, ndo hay ti ye tə lawara na gay i Zason. Ta pəla Pol ta Silas hərwi məhəla tay ahaya kame i ndo hay.

<sup>6</sup> Ta pəla tay na, ta huta tay ha bay. Tsa na, tə gəsətay ahaya Zason ta malamar neheye tə pa mədzal gər ka Yesu aye. Tə həlatay ahaya kame i ndo i sariya hay. Tə ndislew ka təv tay na, ta wuda, tə gwad: «Ndo neheye na, nəteye faya ta kwasatay gər a ndo hay tebiye ka məndzibəra, ada anəke na, ta ndislew kanan na, kəkay!

<sup>7</sup> Zason a təma tay ha ada ndo neheye tebiye faya ta tsikiye na, wu nakə wal tə bazlam i bəy i Roma aye a gay ɲgay. Nəteye tə gwad: Bəy bagwar eye andaya mekeləy eye, tə zalay Yesu.»

<sup>8</sup> Siye i ndo hay ta ndo məge sariya hay tə tsəne bazlam niye hay na, a ndalatay haladzay.

<sup>9</sup> Zason tə siye i ndo hay tə hamatay a ndo i sariya hay təday ada tə gər tay ha.

### *Pol ta Silas ma Bere*

<sup>10</sup> Həvad a ge na, malamar neheye tə pa mədzal gər ka Yesu aye, tə laka tay ha Pol ta Silas a gəma i Bere. Tə ndisl a dəma na, ti ye a gay i maɟuwule me i Yahuda hay.

<sup>11</sup> Ndo i gəma i Bere hay na, nəteye ɲgwalak i ndo hay abəra ka Yahuda neheye ma gəma i Tesalonik aye. Ta təma bazlam i Mbəlom tə dərev tay peteh. Tə dzaɲgawa Derewel i Mbəlom pat pat hərwi məsəre ha wu nakə Pol a tsik aye na, dedək dəw?

<sup>12</sup> Ndo hay haladzay mə walaɲ tay tə dzala ha ka Yesu ada mə walaɲ i Gərek hay ta ɲgwas neheye məzele tay a da a zləm haladzay aye nəteye haladzay tə dzala ha ka Yesu dərmak.

<sup>13</sup> Ane tuk na, Yahuda neheye ma Tesalonik aye tə tsəne Pol faya ma diye ha bazlam i Mbəlom ma Bere na, tə həl bo, ti ye mata kwasatay gər a ndo hay ka Pol.

<sup>14</sup> Malamar neheye nəteye mapa mədzal gər eye ka Yesu aye ta zəba faya andza niye na, kwayaɲa, ti ye ha Pol ta diye i dəlov. Silas ta Timote na, tə ndza ma Bere.

<sup>15</sup> Ndo neheye tə laka ha Pol aye, tə tsal a kwalalaɲ i yam. Ti ye a gəma i Aten. Tsa na, Pol a gwadatay: «Ka mbədum gər a Bere na, gwadumatay a Silas ta Timote na, tə yaw, tə ndza ga ahaya a kanan bəse.» Tsa na, ndo neheye ta mbəda gər a Bere.

### *Pol ta Silas ma Aten*

<sup>16</sup> Ahəl nakə Pol faya ma həbiye Silas ta Timote aye na, a zəba ka gəma i Aten na, a ndalay haladzay hərwi maraha eye tə kulə hay.

<sup>17</sup> Tə kədawa wuway mə gay i maɟuwule me ta Yahuda hay ada ta ndo neheye Yahuda hay bay, nəteye tə dəslaway ha gər a Mbəlom aye. Ada ka təv məhay gər nakə tə hayawa gər a dəma aye na, tə kədawa wuway pat pat ta ndo neheye ta diye ta təv eye niye aye.

<sup>18</sup> Ndowneyə hay andaya tə pawa bəzay a matətike i Epikuriyən hay ta Sətosiyən hay. Pat wuray tə tsik me tə Pol. Siye hay mə walaɲ tay, tə gwad: «Ndo nakay faya ma bəbəliye wu andza nakay na, mbədaw bo na, kəkay?» Siye hay tə tsəne Pol faya ma diye ha labara i Yesu ada mədahaɲ hay ta

lətseweye abəra ma mədahan na, tə gwad: «Ma giye faya ma diye ha na, mbəlom i bərakəzan hay kəla daw?»

<sup>19</sup> Ma dāba eye na, ti ye ha kame i madugula hay ka təv nakə tə zalay Ayəropaz aye. Ti ye naha na, ta tsətsah faya, tə gwadāy: «Damay ha matətike nakay wedeye nəkar faya ka tsikiye tey.

<sup>20</sup> Nəkar faya ka tsikameye wu neheye dāda nəmaa tsəne bay aye. A say məgwedə kəkay na, a samay nəmaā sər tey.»

<sup>21</sup> Ndo i Aten hay ta madurlon hay tə dzawa ha həlay i məndze tay tebiye ka məpay zləm a wu neheye wedeye tsa ada ka matəkəre wu wedeye hay.

<sup>22</sup> Pol a lətse kame i ndo niye hay, a gwadātay: «Nəkurom Aten hay, na zəba faya nəkurom na, a sakum məpay bəzay a mbəlom hay wal wal haladzay.

<sup>23</sup> Hərwi na həhal ma wuzlahgəma kurom na, na ngatay a təv neheye ka tawalawum kule kurom hay mə dāma aye. Na ngatay a təv eye andaya nəte tə watsa faya: “Təv nakay na, hərwi mbəlom nakə ndo hay tə sər bay aye.” Ayaw! Mbəlom nakə nəkurom faya ka dəslumay ha gər ka sərüm bay aye na, ney na yaw anay mata dākum ha.

<sup>24</sup> «Maa ge məndzibəra tə wu neheye mə dāma aye na, neŋgeye. Neŋgeye bəy i magərmbəlom ta dala. Neŋgeye na, ma ndziye mə gay neheye ndo hay ta dəzəl aye bay.

<sup>25</sup> Ada neŋgeye na, a say ndo zezeŋ mə rəzlay a gər məvalay wuray bay. Hərwi maa vəl sifa, məsəfəre ada tə siye i wu hay tebiye a ndo hay na, neŋgeye.

<sup>26</sup> «Ta ndo nəte na, a ge slala hay tebiye hərwi ada tā ndza ka məndzibəra tebiye. Ahəl nakə kə ge məndzibəra zuk bay aye na, bə kə pa na kokway i həlay i təv məndze tay, kə pa na kokway i gəma neheye ta ndziye mə dāma aye.

<sup>27</sup> A ge andza niye na, hərwi ada ndo hay tā pəla na. A say tā bəzay naha həlay ada ta hutiyə na. Ta dedək Mbəlom na, neŋgeye dərəŋ ta nəkway bay.

<sup>28</sup> Andza ndoweye andaya a gwad:

“Maa vəlakway sifa na, neŋgeye.

Nəkway kanan, wu nakə faya ka gakweye na, hərwi ngay.”

«Siye i ndo məvədə bazlam kurom hay bə ta tsik:

“Ayaw, nəmay wawa ngay hay.”

<sup>29</sup> «Tadə nəkway tebiye wawa i Mbəlom hay na, kə dzalakwa mə gər kway, Mbəlom na, a ndzəkət bo i kule i gura, i bəre kəgəbay i kwar bay. Wu neheye ndo zezeŋ ta lambad tə metsehe ngay hərwi matəre ha kule hay. Ane tuk na, wu neheye na, Mbəlom bay.

<sup>30</sup> Mbəlom na, kə pa mezeleme niye hay ahəl niye ka məda bay hərwi ahəl niye ndo hay tə sər wuray bay. Ane tuk na, anəke na, neŋgeye faya ma zalateye kwa məngay tə yaw, tə mbədə ha mede tay.

<sup>31</sup> Bə Mbəlom ka mbərəm məpe pat i sariya nakə ma giye. Sariya nakə ma giye na, sariya i dedək. Ndo nakə ma gateye sariya a ndo hay aye na, Yesu. A dā ha na, ahəl nakə a lətse ahaya abəra ma mədahan aye.»

<sup>32</sup> Tə tsəne bazlam i Pol nakə a tsik ma mələtsew abəra ma mədahan aye na, siye hay tə ngwasa faya ada siye hay tə gwadāy: «A samay na, ka tsikameye wu nakay nəmaa piye faya zləm pat mekeleŋ eye sa.»

<sup>33</sup> Tsa na, Pol a yaw abəra mə walaŋ tay, a ye ngway.

<sup>34</sup> Siye i ndo mekeleŋ eye hay ta dzala ha ka bazlam i Pol, tə pay bəzay. Mə walaŋ tay niye na, Dənīs ndo məgawa sariya ka təv i məge sariya tay nakə tə zalay Ayəropaz aye, ngwas eye andaya tə zalay Damaris ada siye i ndo mekeleŋ eye hay sa.

## 18

*Pol ma gəma i Koriñte*

<sup>1</sup> Ma dəba eye na, Pol a lətse abəra ma gəma i Aten, a ye a gəma i Koriñte.

<sup>2</sup> A ye naha a dəma na, a ndzay a gər a Yahuda wuray məzele ñgay Akelas. Neñgeye tə wa na ka dala i Poñtus. A yaw abəra ma gəma i Itali ta ñgwas ñgay Pərisil hərwi Kələd bəy i Roma a gwad: «Yahuda hay tebiye tã lətse, tã ye abəra ka dala i Roma.» Pol a ye ka təv tay mata tsikatay me.

<sup>3</sup> Pol na, a ñgarawa peteked i mäge ha madzawadzawa. Məsler i Akelas ta ñgwas ñgay na, məñgere peteked eye niye dərma. Hərwi niye Pol a ndza ma gay tay, tə ge məsler dziye.

<sup>4</sup> Pat i mazəzukw bo na, Pol a yawa a gay i mađuwule me i Yahuda hay. A tsikawatay a Yahuda hay kwa a Garek hay dərma tã dzala ha ka Yesu.

<sup>5</sup> Ane tuk na, ahəl nakə Silas ta Timote ti yaw abəra ka dala i Masedowan aye na, Pol kə ge məsler i wuray sa bay. A dawa ha bazlam i Mbəlom dekdek tsa. A dawatay ha a Yahuda hay Yesu na, Kəriste.

<sup>6</sup> Ane tuk na, Yahuda hay ta təma bazlam ñgay bay. Tə tsaday pələslesle. Tsa na, Pol a yaw abəra mə walañ tay. A bəzlum ha burhway i gəma tay abəra ka peteked ñgay, a gwadatay: «Tadə ka dzum na, mənese gə sa bay. Mənese eye ka gər kurum. Anəke kwayañña na diye na ta datay ha bazlam i Yesu a ndo neheye Yahuda hay bay aye.»

<sup>7</sup> A lətse, a ye abəra ma təv niye. A ye a gay i ndo wuray tə zalay Titus Zustus. Neñgeye na, a dəslaway ha gər a Mbəlom ada gay ñgay na, ka tsakay i gay i mađuwule me i Yahuda hay.

<sup>8</sup> Kərispus na, neñgeye bəy i gay i mađuwule me niye. A dzala ha ka Bəy Mađuwen ta ndo i gay ñgay hay tebiye. Koriñte hay haladzay, neheye tə pawa zləm ka bazlam i Pol aye tə dzala ha ka Yesu dərma. Pol a dzəhuđ tay ha a yam.

<sup>9</sup> Pat wuray ta həvad na, Bəy Mađuwen a tsikay me a Pol ma məsine, a gwaday: «Pol kã dzədzar bay, dā ha bazlam ga huya, kã ndza tete bay.

<sup>10</sup> Neñ andaya tə nəkar, ndəray ma sliye faya məgaka wuray kwa tsekwen bay, hərwi ma gəma nakay na, ndo ga hay haladzay mə dəma.»

<sup>11</sup> Tsa na, Pol a ndza ma Koriñte məve nəte ta məzaw. A tətikawatay bazlam i Mbəlom a ndo hay tebiye.

<sup>12</sup> A həlay wuray Gayoñ neñgeye a ləva dala i Akay eye na, Yahuda hay tə haya gər ka Pol. Tə gəs na ti ye ha kame i Sariya.

<sup>13</sup> Tə gwaday a bəy niye: «Ndo nakay na, faya ma tsəviye tay ha ndo hay a pəsl tə matətkatay mədəslay ha gər a Mbəlom ta tsəved wedeye wal. Wu naka faya ma tsikateye na, a ye ka bo tə bazlam mapala eye bay.»

<sup>14</sup> A say həbe a Pol mətsike me, Gayoñ a mbədatay naha faya a Yahuda hay, a gwadatay: «Tadə ndo nakay kə tsik wuray ka bəy i dala kəgəbay a ge mənese nakə ka zal naha aye na, nəkurom Yahuda hay na sliye faya məzle həlay eye mətsənakum na.

<sup>15</sup> Ane tuk na, ka kəđum wuway na, ka wu hay, ka məzele hay kəriye ada ka bazlam kurom mapala eye hay. Wu neheye a zəbakum naha dərə aye na, a nəkurom eye kurom bəna, neñ na giye sariya i wu neheye andza nakay aye bay. A señ bay, bazlam ga mə dəma bay.»

<sup>16</sup> Tsa na, a həhar tay ahaya abəra ma təv mäge sariya.

<sup>17</sup> Ti yaw abəra na, tə gəs Sosten bəy i gay i mađuwule me, tə ndađa na kame i sariya. Ane tuk na, a gay mə gər kəset a Gayoñ bay.

*Pol a ma a Añtiyos*

18 Pol a ndza məhəne haladzay ma Korinje. Ma dəba eye, a lətse abəra ma Korinje, a gər ha malamar hay. A ye a gəma i Senkəre ta Pərisil ada ta Akelas. Mə dəma na, Pol a həz na gər hərwi 6a kə gwad kurre: «Na vəl ha bo ka mäge məsler i Mbəlom.» Tsa na, tə lətse abəra ma Senkəre, tə tsal a kwalalanj i yam ti ye ta Akelas ada ta Pərisil a Anqiyos ka dala i Siri.

19 Tə ndisl a Efez na, Pol a gər ha Pərisil ta Akelas. Nənqeyə a ye a gay i mađuwule me mata kədə wuway ta Yahuda hay.

20 Mə dəma na, Yahuda hay ta tsətsah faya, tə gwaday: «Ndza ka təv may məhəne haladzay.» Pol a wuda məndze bay.

21 A lətse, a gər tay ha, a gwadatay: «Tadə kə say a Mbəlom na, na maweyə ka təv kurom mba.» A tsal a kwalalanj i yam ma Efez a ye a Sezare.

22 A lətsew abəra ma Sezare na, a ye a Zerozelem təday. A ye a tsikatayaw me a ndo məpe mədzal gər hay ka Yesu. Tsa na, a ye a Anqiyos.

23 A ndza mə dəma məhəne tsakway. A mbəda gər ta dəba, a ye a tas ta Galat ada ta Firigiya. A vəlatay gədanj a ndo məpe mədzal gər hay ka Yesu tebiye mə dəma.

### *Apolos a da ha bazlam i Mbəlom ma Efez*

24 A həlay niye na, Yahuda wuray andaya məzele nğay Apolos, tə wa na ka dala i Aləgəzəndəri. Nənqeyə kə ndislew a Efez. Nəwəyeyə niye na, a sər matətike wu a ndo hay lele. A sər Derewel i Mbəlom lele.

25 Nənqeyə ka tətik bazlam i Yesu. A dəwatay ha a ndo hay ada a tətikawatay na, ta tsətsuḅ tsətsuḅ eye lele. A dəwa ha na, wu nakə a tsik ka Yesu ta dedek aye. Ane tuk na, a sər na, madzəhuḅe nakə Yuhana a dzəhuḅawa ha ndo hay a yam aye tsa.

26 A dazlay a məsike me parakka mə gay i mađuwule me i Yahuda hay, zluwer a gay bay. Pərisil tə zal nğay Akelas tə tsəne bazlam nğay niye na, tə zla na ka təv tay. Tə day ha tsəved i Mbəlom peteh.

27 Ma dəba eye na, a say a Apolos mede a gəma i Akay.\* Ndo məpe mədzal gər hay ka Yesu tə vəlay gədanj ada tə watsay derewel a həlay hərwi ada ndo məpe mədzal gər hay ka Yesu neheye ma Akay aye tā təma na lele. Tə watsa a ndo məpe mədzal gər hay ka Yesu neheye ma Akay aye hərwi məgwadatay naha: «Apolos ki ye naha na, təmum na lele.» Tsa na, Apolos a ye a Akay. A ye naha na, a dzəna tay ha ndo məpe mədzal gər hay ka Yesu ta nğwalak i Mbəlom.

28 Hərwi niye, a dzanğawatay Derewel i Mbəlom a Yahuda hay, a dəwatay ha parakka Yesu na, Kəriste. Andza niye a dərəzlawatay ka bazlam i Yahuda kame i ndo hay tebiye.

## 19

### *Pol ma Efez*

1 Ahəl nakə Apolos ma Korinje aye na, Pol a ye a Efez. A ye ta mahəm̄ba i dala i Galat. A ye naha na, a ndzatay a gər a ndo neheye tə pa mədzal gər ka Yesu aye.

2 A ye naha a tsətsah fataya, a gwadatay: «Ahəl nakə ka dzalum ha ka Yesu aye na, ka hutum Məsəfəre Tsədanjəna eye daw?»

Ta mbəday faya, tə gwaday: «Nəmaa tsəne dāda ndəray kə tsikamay ka Məsəfəre Tsədanjəna eye bay.»

3 Pol a tsətsah, a gwadatay: «Ka hutum na, madzəhuḅe waray?»

Ta mbəday faya, tə gwaday: «Madzəhuḅe nakə Yuhana a dātay ha a ndo hay aye.»

\* 18:27 Məsler hay 18.12.

<sup>4</sup> Pol a gwadatay sa: «Yuhana a dzəhuḅawa na, ndo neheye a satay mambəde ha mede tay aye. A gwadatay a Israyel hay na: “Dzalum ha ka ndo nakə ma deyewe kame ga aye”, andza məgwede, Yesu.»

<sup>5</sup> Tə tsəne bazlam ḡgay na, Pol a dzəhuḅ tay ha yam ta məzele i Bəy Maduweḡ Yesu.

<sup>6</sup> Pol a pa fataya həlay. Kwayanḡa kwa way a huta Məsəfəre Tsədanḡa eye. Tsa na, tə pa bo ka mətsike me tə bazlam i gəma hay wal wal, tə da ha bazlam i Mbəlom.

<sup>7</sup> Ndowne neheye na, ta giye kuro gər eye sulo.

<sup>8</sup> Ahəl nakə Pol neḡgeye ma Efez aye na, a yawa a gay i maduwule me i Yahuda hay. Kiye mahkar na, a tsikawa me mə dəma, zluwer a gay bay. A tsikawatay a ndo hay ka gər i Bəy i Mbəlom. A say na, ndo neheye faya ta pay zləm aye tā təma bazlam ḡgay.

<sup>9</sup> Ane tuk na, siye i Yahuda hay haladzay ta kula ha dərev tay. Ta təma bazlam i Pol bay. Tə tsik wu nakə lele bay aye ka tsəved i məpay bəzay a Bəy Maduweḡ kame i ndo niye hay tebiye. Tsa na, Pol a gər tay ha, a həl ndo məpe mədzal gər hay ka Yesu a lekwal i ndoweye andaya tə zalay Tiranus. Nəteye niye tebiye, tə kədawa wuway ta ndo hay pat pat.

<sup>10</sup> Niye na, kə ndza məve sulo. Ndo neheye nəteye mandza eye ka dala i Azi niye, Yahuda hay ada Gərek hay tə tsəne bazlam i Bəy Maduweḡ Yesu.

### *Wawa i Seva hay*

<sup>11</sup> Mbəlom a gawa masuwayan neheye a gatay hərḡabəkka a ndo hay aye tə həlay i Pol.

<sup>12</sup> Tə zlawatay naha a ndo i dəvats peteked neheye ta lamay a bo i Pol aye. Tə lamawatay ha a ndo i dəvats hay. Ndo i dəvats hay tə mbəlawada ndo neheye məsəfəre lele bay eye hay mə bo tay aye, ti yawa abəra mə bo tay.

<sup>13</sup> Siye i Yahuda hay andaya ta həhalawa ka gəma ka gəma hərwi mahəhere fakalaw abəra ka ndo hay. Nəteye dərmak tə dze ha mahəhere fakalaw tə məzele i Bəy Maduweḡ Yesu. Tə gwadawatay a məsəfəre neheye lele bay aye: «Ndohumaw abəra mə bo i ndo nakay tə məzele i Yesu nakə Pol faya ma diye ha bazlam ḡgay aye.»

<sup>14</sup> Tə gawa wu niye na, nəteye tasəla. Nəteye wawa i bagwar i ndo neheye tə vəlaway wu a Mbəlom aye, tə zalay Seva.

<sup>15</sup> Pat wuray tə tsikay a məsəfəre nakə lele bay eye andza niye, a gwadatay: «Neḡ na, na sər Yesu, ada Pol neḡgeye way na, nə sər. Nəkurom na, məhey tey?»

<sup>16</sup> Tsa na, ndo niye fakalaw mə bo ḡgay aye a mbəzla fataya dədavdav ta gədan. A ze tay ha ta gədan, a gatay mbəlak ada a buwa fataya abəra peteked tay hay. Ta hway bo kəriye.

<sup>17</sup> Yahuda hay ta Gərek neheye ma gəma i Efez aye tebiye tə tsəne wu nakə a ge bo aye na, ta dzədzar haladzay. Tə dəslay ha gər a məzele i Bəy Maduweḡ Yesu haladzay.

<sup>18</sup> Ndo hay haladzay ta təra ndo məpe mədzal gər hay. Ti yawa, tə dəwa ha mənese tay neheye tə gawa aye kame i ndo hay tebiye.

<sup>19</sup> Ndo hay haladzay, nəteye neheye tə gawa maharam aye tə həlaw dərewel i maharam tay, tə fəka tay ha kame i ndo hay tebiye. Tə pasla na andza ta səkəm ha na, suloy eye ma giye kwar i suloy gwezem kuro kuro zlam.

<sup>20</sup> Andza niye bazlam i Bəy Maduweḡ a ye kame kame, a səkah ta gədan.

### *Magazlaga ma Efez*

21 Ma dəba i wu neheye a ge bo aye na, Pol a dzala mə gər ɲgay mede a Zerozelem. Ma diye ta Masedowan ada ta dala i Akay.\* A gwad: «Na ye a Zerozelem na, na diye a Roma dərmaç.»

22 Tsa na, a slər ndo madzəne ɲgay hay, Timote ta Erast a Masedowan. Ane tuk na, bo ɲgay eye a ndza ka dala i Azi tsakway sa.

23 A həlay niye na, magazləga a lətse haladzay ma gəma i Efez hərwi bazlam i Yesu Bəy Maduweɲ.

24 Ndowneye andaya a lambadawa wu hay ka suloy. Məzele ɲgay na, Demetəriyos. Wu neheye a lambadawa aye na, wawa i gay hay tsekweɲ tsekweɲ neheye a ndzəkit bo gay bagwar eye nakə ndo hay ta dūwulaway me a mbəlom tay nakə a ndzəkit bo ɲgwas, tə zalay Artemis aye. Andza niye neɲgeye ta ndo i məsler ɲgay hay tə hutawa ha suloy haladzay.

25 A ye, a hayatay gər a ndo i məsler ɲgay hay ta ndo neheye tə gawa slala i məsler niye aye, a gwadatay: «Dzam ga hay sərūm ha, ka hutakweye zelele haladzay na, hərwi məsler nakay.

26 Ane tuk na, nəkurom faya ka ɲgatumeye ada faya ka tsənumeye wu nakə faya ma giye bo aye. Pol faya ma tsikatəye a ndo hay na, kule neheye nəkway faya ka ɲgarakweye aye nəteye mbəlom hay bay. Ndo hay haladzay ta təma bazlam ɲgay. Kanarɲ ma gəma i Efez dəkdək bay, ka dala i Azi tebiye.

27 Tadə kə ge andza niye na, ndo hay ta tsikiye wu nakə lele bay eye ka məsler kway. Ada ta tsikiye na, ka məsler kway dəkdək bay. Ta tsikiye wu nakə lele bay aye ka gay i maduwule me i bagwar i mbəlom kway Artemis. Kwa neɲgeye na, ndo hay ta zəbiye faya bagwar eye sa bay. Azlakwa ndo hay tebiye ka dala i Azi ada ka mandzibəra tə dəslay ha gər na, a neɲgeye dūh.»

28 Ndo hay tebiye tə tsəne andza niye na, a ndalatay haladzay. Ta wuda, tə gwad: «Bagwar eye na, Artemis mbəlom i Efez hay.»

29 Gəma a ndza na, huɓuya, huɓuya. Ndo hay tə gəs Gayus ta Aristark. Nəteye neheye sulo aye na, Masedowan hay, tə lakawa ha Pol. Ti ye tay ha a təv i həbad tay nakə tə gawa mə dəma aye.

30 A say a Pol mede a təv i ndo niye hay. Ane tuk na, ndo məpe mədzal gər hay ka Yesu tə gay me, ta vəlay tsəved mede bay.

31 Siye i ndo neheye nəteye ma məsler bagwar eye ka dala i Azi ta tərə dzam i Pol aye, tə slər ndo ka təv i Pol, tə gwad mə ye a təv i həbad tay niye bay.

32 Nəteye niye hay tebiye mahaya gər eye na, nəteye mə wadəɲ wadəɲ hərwi siye hay faya ta wudiye wu mekeləɲ, siye hay ta wuda hərwi wu neɲged. Siye haladzay mə walarɲ tay niye tə haya gər hərwi meɲ na, tə sər bay.

33 Ndo Yahuda wuray andaya ka təv eye niye. Məzele ɲgay Aləgəzandər. Siye i Yahuda hay ti ye ha Aləgəzandər kame. Ta təkəray bazlam eye niye. Tsa na, a zla həlay ka mbəlom, a say mətsike me ada mədatay ha.

34 Ane tuk na, ndo niye hay ta zəba faya neɲgeye ndo i Yahuda na, ta wuda tebiye tay eye, tə gwad: «Bagwar eye na, Artemis i Efez hay.» Tə ndza faya ka mətsike andza niye ɓəre sulo.

35 Ka mandəve ɲgay eye na, ndo mələve gəma niye kə sla faya məgwadatay tā ndza tete. Ndo niye hay tebiye tə ndza tete. Tsa na, a gwadatay: «A nəkurom Efez hay, Efez na, gəma i mbəlom bagwar eye Artemis, maa sər bay na, way? Ada kwa way ma dəslay ha gər a mandzəkit bo ɲgay nakə a kalaw mə mbəlom aye.

\* 19:21 Məsler hay 18.12.



<sup>36</sup> Kwa way na, a sər. Nəkurom ndzum dıkdık. Kâ gum wu neheye lele bay aye bay.

<sup>37</sup> Ndo neheye ka gəsumatay ahaya kanarj aye na, tə gaw məkal mə gay i mbəlom kway bay ada ta tsadəy a mbəlom kway wal bay tuk na, kəkay?

<sup>38</sup> Tadə Demetəriyos ta ndo i məsler nğay hay bazlam tay andaya mətsıke ka ndo na, tã ge ta tsəved eye. Ndo məge sariya hay andaya, tã ye tã wuda ka təv tay.

<sup>39</sup> Tadə wu mekeleñ eye hay andaya a sakum bəbay na, bagwar neheye anəke kanarj aye tã nğənakum ha bazlam eye.

<sup>40</sup> Ka gakwa metsehe bay na, Roma hay ta makway ha mənese, ta gwadəkweye “Ka dazlumay na, a vərəm.” Hay hutəkweye gər i bazlam kwa tsekweñ məfatay ha nəmay haya gər hərwi wu nakay na, ka sləkweye faya mətsikatay bay.» Tsa na, a gwadətay a ndo hay: «ñğənum gər.» Ndo hay ta nğəna gər, ti ye wu tay tuk.

## 20

### *Pol ma Masedowan ada ma Akay*

<sup>1</sup> Haya haya i bazlam niye hay a ndəv na, Pol a hayatay gər a ndo məpe mədzal gər hay ka Yesu. A vələtay gədarj tə məmatay naha dərev. A gwadətay na: «Ndze gwa.» Tsa na, a ye nğway ka dala i Masedowan.

<sup>2</sup> A həhal ma gəma niye, a vələtay gədarj a ndo məpe mədzal gər hay ta məmatay naha dərev. Ma dəba eye, a ye a gəma i Gərek.

<sup>3</sup> Mə dəma na, a ndza kiye mahkar. Həbe a say a Pol mede a gəma i Siri. Ane tuk na, a tsəne a satay a Yəhuda hay məkəde na. Hərwi niye a ma nğway ta Masedowan.

<sup>4</sup> Ndo neheye tə laka ha aye na, Sopater wawa i Pirrus, nənğeye ndo i gəma i Bere, Aristark ta Sekondus, nəteye ndo i gəma i Tesalonik hay, Gayus nənğeye a yaw abəra ma Derbe, Timote ada Tisik ta Tərofime nəteye ka dala i Azi.

<sup>5</sup> Nəteye neheye na, tə lahamay kame, ti ye a Tərowas mata həbe may mə dəma.

<sup>6</sup> Ma dəba i magurlom i Pak, nəmay nəmaa tsal a kwalalanj i yam, nəmaa ye abəra ma Filipi. Nəmaa ge məhəne zləm ka tsəved na, nəmaa ndisl a gəma i Tərowas tuk. Nəmaa ndza mə dəma luma nəte.

### *Awtis a lətsew abəra ma mədaharj*

<sup>7</sup> Pat i luma i manğəzla ta huwa na, nəmaa haya gər hərwi mənđe dəf i matəkəre məməte i Yesu.\* Tədcə eye na, Pol ma gəriye tay ha, ma diye nğway. Hərwi niye, a tsikatay bazlam i Mbəlom hus a magər həvad.

<sup>8</sup> Nəmay mahaya gər eye na, ka gər i gay nənğed. Gay nakə nəmay mə dəma aye na, lalam hay haladzay mavata eye.

<sup>9</sup> Mə gay eye niye na, wawa eye andaya gawla eye, məzele nğay Awtis. Nənğeye mandza eye ka mavavar faya ma piye zləm ka bazlam i Pol niye a tərəts ha bay, faya ma tsikiye huya aye. Tsa na, məndzəhəre a gəs na, a bərəzl a məndzəhəre. A sər ka bo sa bay, səkwat a dədaw abəra mə gay ka gər i gay mamahkar eye ka dala. Ndo hay tə mbəzlaw tə lətse ha ka mbəlom na, kə mət tsiy.

<sup>10</sup> Pol a mbəzlaw, a ye ka təv nğay. A gudük naha faya, a zla na a həlay, a gwadətay: «Dərev mâ ye fakuma abəra bay, kə mət bay.»

<sup>11</sup> Tsa na, Pol a tsal a gay niye sa. A ye naha a zla makwala, a nğəna ha. Tsa na, tə nda. A ma ka mətsıke me haladzay sa hus a mekedə, a ye nğway.

\* 20:7 Məsler hay 2.42.

<sup>12</sup> Ndo hay tə laka ahaya gawla nakə meeneŋ aye a mətagay. Ndo hay tebiye dərev tay a ŋgwasə.

<sup>13</sup> Nəmaa ye, nəmaa tsal a kwalalanŋ i yam hərwi məhələ may a Asos. Pol neŋgeye, a say mede tə sik. Nəmay, nəmaa gwad na, nəmaa zliye na ka me i dəlov mə dəma.

<sup>14</sup> A ndzamay naha a gər ma Asos na, a tsal a kwalalanŋ i yam, nəmaa zla na ka me i dəlov. Nəmaa ye a gəma i Metilen.

<sup>15</sup> Tədœ eye na, nəmaa ndisl a Siyo. Tədœ taday eye na, nəmaa ndisl a Samos. Tədœ tadəkay eye na, nəmaa ndisl a gəma i Melet.

<sup>16</sup> Niye andza məgwede na, a say a Pol məndze ma Efez bay hərwi ma ta mətsiye ka dala i Azi, ma ndisliye a Zerozelem bəse bay. Tadə ma giye bo na, a say məndisle a Zerozelem pat i Peŋtekot.†

*Pol a tsikatay me a ndo i Efez hay*

<sup>17</sup> Ahəl nakə nəmaa ndisl a Melet aye na, Pol a slər ndo ka madugula neheye tə ndzatay kame a ndo məpe mədzal gər hay ka Yesu ma Efez aye ada tə yaw ka təv ŋgay. Ndo niye a ye, a zalatayaw.

<sup>18</sup> Ndo niye hay tə həlaw bo, tə ndislew ka təv ŋgay na, a gwadətay: «Kwa i mede naha ga a gay kurom ka dala i Azi na, ka sərurum ha məndze ga mə walaŋ kurom.

<sup>19</sup> Na gay məsler a Bəy Maduweŋ tə marəhay ha gər, tə mədzal gər eye ada na sa dəretsətseh haladzay hərwi Yahuda hay a satay məkədə ga.

<sup>20</sup> Ka sarum ha, wu naka mə gakumeye ŋgama aye na, na ŋgaha na bay. Na dəkum ha tebiye. Na tətikakum kame i ndo hay ada mə gay kurom hay.

<sup>21</sup> Na tsikatay a Yahuda hay ada a ndo neheye Yahuda hay bay aye, tə gər ha mezeleme tay, tə yaw ka təv i Mbəlom. Tə yaw, tə pa mədzal gər tay ka Bəy Maduweŋ kway Yesu Kəriste.

<sup>22</sup> «Anəke na, na diye a Zerozelem. Maa geŋ kutoŋ mede a dəma na, Məsəfəre Tsədəŋŋa eye ada na sər wu nakə ma ta ndzeŋeye a gər mə dəma aye bay.

<sup>23</sup> Wu nakə na sər aye na, gəma nakə na ye a dəma aye na, Məsəfəre Tsədəŋŋa eye faya ma deŋeye ha. A gwedeŋ: “Məgəse kar a daŋgay tə dəretsətseh faya ma həbiye kar.”

<sup>24</sup> Ane i ga na, na ndziye ma bəra mba, a’ay düh na mətiye na, wuray andaya a yeŋ a gər ka zal bay. Wu nakə a seŋ aye na, na ndəviye ha məsler i bəy Maduweŋ Yesu nakə a vəleŋ aye hus ka mandəve ŋgay eye. Məsler nakə a vəleŋ aye na, mədə ha Labara ŋgwalak eye i ŋgama i Mbəlom.

<sup>25</sup> «Məndze ga nakə na ndza mə walaŋ kurom aye, na tsikawakum na, labara i Bəy i Mbəlom. Na sər ha anəke na, ka ta ŋgatumeŋeye dədə sa bay.

<sup>26</sup> Hərwi niye, na tiye mbal abəra ka gər kurom. Tadə ndəray nəte kə dze abəra mə walaŋ kurom na, mənese ga sa bay.

<sup>27</sup> Hərwi na dəkum ha wu nakə a say a Mbəlom məge aye tebiye. Na ŋgaha fakuma abəra wuray kwa tsekweŋ bay tebiye.

<sup>28</sup> Tsəpum gər kurom, ada wene wene eye na, tsəpum ndo məpe mədzal gər hay ka Yesu neheye Məsəfəre Tsədəŋŋa eye a gwadəkum tsəpum aye. Gumatay gər a ndo məpe mədzal gər hay ka Yesu. Wawa i Mbəlom, bo ŋgay eye a mət na, hərwi ada tə təra ndo məpe mədzal gər hay ka Yesu.

<sup>29</sup> Hərwi, na sər ha, na ye gwa na, ndo hay ta deyeweye a walaŋ kurom. Nəteye ta ndzəkkit bo na, andza kəra i pesl hay, ta gəriye ha ndo məpe mədzal gər hay ka Yesu bay.

† 20:16 Məsler hay 2.1.

<sup>30</sup> Ada kwa mə walaŋ kurom ndo hay ta dazleye a maraw me hərwi masəpete tay ha ndo məpe mədzal gər hay ka Yesu ka məpatay bəzay.

<sup>31</sup> Gum metsehe lele, sərüm ha na, məve mahkar, ta həvad ta həpat neŋ faya na day ha metsehe kwa a way nəte ta nəte ta mətuwe eye.

<sup>32</sup> «Anəke na, na gəriye ha a həlay i Mbəlom. Neŋgeye ma gakumeye ŋgwalak andza nakə a tsik aye. Neŋgeye na, ma səkahakumeye ha mədzele ka Yesu kame kame ta gədarŋ ŋgay ada ma vəlakumeye wu neheye a ləva ha bo ma ta vəlateye a ndo neheye ta təra i ŋgay hay aye.

<sup>33</sup> Neŋ na, dəda na tsətsah suloy, gura kəgəbay peteked ka ndəray bay.

<sup>34</sup> Bo kurom eye ka sərüm ha, na ge məsler na, tə həlay ga eye hərwi məhute wu mənday may a neŋ ta ndo neheye tə lakawa ga ha aye.

<sup>35</sup> Na dəkum ha na, ada kə gum məsler nakə ma dzəniye ndo i mətawak hay aye. Bazlam i Bəy Maduweŋ kway Yesu nakə a tsik aye na, mə makumaw a gər. A gwad: «Ka vəlay wu a ndo na, ka hutiyə məŋgwese a ze ndo nakə a təma aye.»»

<sup>36</sup> Pol a ndəv ha bazlam niye na, a dəkw gurmets, a dūwulay naha me a Mbəlom ta nəteye tebiye.

<sup>37</sup> Ta ndəv ha mədūwule me na, nəteye tebiye tə pa bo ka mətuwe haladzay. Ti ye naha, tə gas na ka bo təmbolok təmbolok, tə tsikay me ta mətuwe eye, tə gwaday: «Do tə zay.»

<sup>38</sup> Wu nakə a ndalatay wene wene aye na, Pol a gwadətay: «Dəda ka ta ŋgatumeŋeye sa bay» aye. Tsa na, tə laka ha Pol hus ka təv i kwalalaŋ i yam.

## 21

### *Pol ma diye a Zerozelem*

<sup>1</sup> Nəmaa ŋgəna gər na, nəmaa ye, nəmaa tsal a kwalalaŋ i yam. Nəmaa ye kwayaŋŋa a gəma i Kos. Tədcə eye na, nəmaa ndisl a Rodes. Nəmaa lətse abəra ma Rodes, nəmaa ye a Patara.

<sup>2</sup> Nəmaa ye naha a dəma na, nəmaa huta kwalalaŋ i yam nakə ma diye a gəma i Fenisi aye. Tsa na, nəmaa tsal a dəma, nəmaa ye ha.

<sup>3</sup> Ahəl nakə nəmay ma wuzlah i dəlov aye na, nəmaa ŋgatay a gəma i Sipəre tə həlay i gula. Nəmaa ye a gəma i Siri. Nəmaa ndisl a gəma i Tir. Mə dəma na, tə mbəzla ahaya wu hay abəra mə kwalalaŋ i yam.

<sup>4</sup> Nəmaa ndzatay a gər a ndo məpe mədzal gər hay ka Yesu mə dəma. Nəmaa ndza ka bo dziye luma nəte. Məsəfəre Tsədarŋŋa eye a dətay ha wu nakə ma ta ndzay a gər a Pol aye. Tsa na, tə gwaday: «Pol, kə ye a Zerozelem bay.»

<sup>5</sup> Ane tuk na, məhəne tasəla ka ndəv tsiy, nəmaa həl bo, nəmaa ye. Tə laka may ha tebiye tay eye, ŋgwas tay hay, ta wawa hay hus ka me i bəlay dəreŋ tə walaŋ gay. Nəmaa ndisl ka me i bəlay na, nəmaa dəkw gurmets, nəmaa dūwulay me a Mbəlom.

<sup>6</sup> Tsa na, nəmaa tsik me a bo nəte nəte. Nəmay nəmaa tsal a kwalalaŋ i yam, nəteye na, ta mbəda gər a mətagay tay hay.

<sup>7</sup> Nəmaa ye abəra mə Tir tə kwalalaŋ i yam, nəmaa ye a Pətəlməyis. Mə dəma na, nəmaa tsikatay me a ndo məpe mədzal gər hay ka Yesu, nəmaa ndza mə dəma məhəne nəte ta nəteye.

<sup>8</sup> Tədcə eye na, nəmaa həl bo, nəmaa ye ada nəmaa ndisl a Sezare. Mə dəma na, nəmaa ye a gay i Filip. Neŋgeye ndo mətətikawa bazlam i Mbəlom. Neŋgeye na, nəte mə walaŋ i ndo neheye tasəla tə pala tay ha ahəl niye ma Zerozelem aye.\*

\* 21:8 Məsler hay 6.5 ada 8.5-40.

<sup>9</sup>Dem ɲgay hay andaya faɖ, ta ye a zal zuk bay. Tə dawa ha bazlam i Mbəlom a ndo hay.

<sup>10</sup>Nəmaa ndza məhəne haladzay na, ndo məde ha bazlam i Mbəlom wuray tə zalay Agabus a yaw abəra ma Yahuda, a ye naha ka təv may.

<sup>11</sup>Tsa na, a zla wu məbere bəzay i huɖi Pol. A dzawa ha sik tə həlay ɲgay. Tsa na, a gwad: «Məsəfare Tsədanja eye a gwad na, kəkay? A gwad na: “Ndo nakə na zla wu i bəzay i huɖ ɲgay aye na, bəy i Yahuda hay ta dzawiye na andza nakay ma Zerozelem. Ta dzawa na na, ta vəlateye ha a həlay a ndo neheye Yahuda hay bay aye.”»

<sup>12</sup>Bo may eye ta malamar neheye ma Sezare aye nəmaa tsəne bazlam niye na, nəmaa gay amboh a Pol. Nəmaa gwaday: «Kā ye a Zerozelem bay.»

<sup>13</sup>Ane tuk na, a mbədamay faya, a gwadamay: «Ka tuwumeye ada faya ka daɖumeɲeye ha dərev na, hərwi mey? Neɲ na, neɲ maləva bo eye tə gəs ga a danjay kə ge dɨh bay tə kəɖ ga, nə mət hərwi Bəy Maduweɲ Yesu ma Zerozelem.»

<sup>14</sup>Nəmaa zəba faya na, ma gəsiye bazlam may bay. Nəmaa rəzlay a gər mətsikay sa bay. Nəmaa gwad: «Bəy Maduweɲ mə ge wu nakə a say aye.»

<sup>15</sup>Nəmaa ndza məhəne tsakway ma Sezare na, nəmaa həl bo, nəmaa ye a Zerozelem tuk.

<sup>16</sup>Siye i ndo məpe mədzal gər hay ka Yesu tə lakamay ha. Nəmaa ye a gay i ndoweye andaya məzele ɲgay Mənasəɲ. Neɲgeye ndo i gəma i Sipəre, a pa mədzal gər ka Yesu na, kurre. Nəmaa ndziye na, mə gay ɲgay.

### *Pol ta Yakuba*

<sup>17</sup>Ndo məpe mədzal gər hay ka Yesu ta təma may tə məɲgwese eye lele.

<sup>18</sup>Təɖə eye na, Pol ta nəmay, nəmaa ye a gay i Yakuba. Mə dəma na, madugula neheye tə ndzatay kame a ndo məpe mədzal gər hay ka Yesu aye tə haya gər tebiye.

<sup>19</sup>Pol a tsikatay me ada a təkəratay wu nakə Mbəlom a ge tə neɲgeye ma məsler ɲgay nakə a ge mə walaɲ i ndo neheye Yahuda hay bay aye tebiye.

<sup>20</sup>Tə tsəne andza niye na, ta zambaday a Mbəlom. Tsa na, tə gwaday a Pol: «Pol, malamar, zəba Yahuda hay haladzay ma pasliye bo bay, ta dzala ha ka Yesu, nəteye huya faya ta pay bəzay a bazlam i Musa mapala eye nakə Mbəlom a vəlay a Musa aye.»

<sup>21</sup>Azlakwa bay, ta tsəne nəkar na, ka tətikateye a Yahuda neheye tebiye nəteye mandza eye mə walaɲ i bərakəzan hay ta gər ha bazlam mapala eye nakə Mbəlom a vəlay a Musa aye. Ka gwadateye: “Kā dəsəm tay ha wawa kurum hay bay ada kā pumay bəzay a kule i Yahuda hay bay sa.”

<sup>22</sup>Ada məge kəkay? Ta səriye ha ta dedek nəkar andaya ka ndislew kanaɲ.

<sup>23</sup>Ge wu nakə nəmaa tsikaka anəke aye. Ndo hay anaɲ faɖ, ta vəl ha bo tay hərwi məsler i Mbəlom.

<sup>24</sup>Həlay tay mede hərwi məbere bo tsədanja ada məhəze gər andza nakə tə gawa aye mazlambər kə sla. Dum ka bo dziye a gay i mədəslay ha gər a Mbəlom hərwi məbere bo yak dərmak. Səkəmmumatay wu hay a həlay. Ka ge andza niye na, wu nakə ndo hay ta təkər ka nəkar aye na, andza dedek andaya mə bazlam tay niye ta təkər aye bay. Ada ta gwadiye nəkar dərmak faya ka rəhay ha gər a bazlam i Musa mapala eye.

<sup>25</sup>Ndo neheye Yahuda hay bay aye ada ta tərə ndo məpe mədzal gər hay ka Yesu aye na, ɓa nəmaa watsa tay naha bəɖaw? Nəmaa watsa tay naha, nəmaa gwadatay: “Tə həpəɖslo nakə tə kəɖay a kule aye bay. Tə nda bambaz bay kwa

gənwaw nakə a mət məməte aye tã həpəđ slo eye bay. Tã tsəpa bo tay abəra ka mezeleme.<sup>†</sup>»

<sup>26</sup>Təđəe eye na, Pol a ye ta ndo neheye fad aye, ti ye mata bere bo tsəđanŋa. Tsa na, Pol a ye a gay i məđəslay ha gər a Mbəlom, a gwaday a ndo məvəlay wu a Mbəlom: «Məhəne tasəla ka ndəv abara mə đama na, məbere bo kway ma ndəviye, nəmaa maweye hərwi ada kwa way mâ vəlay wu a Mbəlom.»

### *Tə gəs na Pol*

<sup>27</sup>Məhəne niye tasəla eye ma ta ndəviye kədayya na, Yahuda neheye ti yaw abəra ka dala i Azi aye tə ŋgatay a Pol mə gay i məđəslay ha gər a Mbəlom. Tə patay me a ndo hay ada tã ye tã gəs na. Ti ye faya tə gəs na.

<sup>28</sup>Ta wuda, tə gwad: «İsrayel hay, hwayumaw! Ndo nakə a tsikawa wu nakə lele bay ka İsrayel hay, ka bazlam i Musa mapala eye ada ka gay i məđəslay ha gər a Mbəlom aye na, neŋgeye anan. Anəke na, neŋgeye faya ma zakiye ha wene wene eye na, kə həlaw ndo neheye Yahuda hay bay aye a gay i məđəslay ha gər a Mbəlom. Kə nas ha təv nakə tsəđanŋa eye.»

<sup>29</sup>Tə tsik andza niye na, tə ŋgatay a Tərofime ndo i Efez tə Pol mə walaŋ gay. Tə dzala mə gər tay ma giye Pol kə zla ahaya a gay i məđəslay ha gər a Mbəlom.

<sup>30</sup>Ndo hay tebiye mə walaŋ gay tə tsəne labara niye. Ndo hay ta hwayaw kwa mənŋay mənŋay. Tə gəs na Pol, tə vaha na abəra dərəŋ tə gay i məđəslay ha gər a Mbəlom. Tsa na, kwayanŋa ta dərəzl na maged.

<sup>31</sup>Ahəl nakə ta pəla tsəved a satay məkəde na Pol aye na, bagwar i bəy i sidzew i Roma a tsəne ndo hay tebiye ma Zerozelem mə wadəŋ wadəŋ.

<sup>32</sup>Kwayanŋa, a ye ta bagwar i sidzew ada sidzew siye hay ta hway ka təv i ndo niye hay. Ndo hay tə ŋgatay a bagwar i bəy i sidzew ta sidzew siye hay na, tə gər ha məkəde Pol.

<sup>33</sup>Bagwar i bəy i sidzew niye a həndzəd naha ka təv i Pol, a gəs na. Tsa na, a gwadatay: «Dzawum na lele tə tsalalaw sulo.» Tsa na, a tsətsah ka ndo hay, a gwadatay: «Ndo nakay neŋgeye na, way? A ge na, mey?»

<sup>34</sup>Ane tuk na, ndo niye hay tebiye faya ta wudiye ta gədan. Siye hay ta wuda, tə tsik wal, ada siye hay ta wuda, tə tsik wu mekelən. Bagwar i bəy i sidzew niye a sla faya mətsəne wuray dedək eye bay, hərwi faya ta wudiye haladzay. Tsa na, a gwadatay a sidzew hay: «Dum ha Pol a təv kway nakə ka ndzawakwa mə đama aye.» Tsa na, ti ye ha Pol a đama.

<sup>35</sup>Ahəl nakə faya ta diye na, Pol a ndisl ka təv nakə maga madədo aye na, sidzew hay tə zla na hərwi ndo hay faya ta ŋgəđətsiye na ka zal.

<sup>36</sup>Hərwi ndo hay tebiye faya ta pay bəzay tə mawude eye, tə gwad: «Kəđum na!»

### *Pol a tsikatay me a ndo hay*

<sup>37</sup>Ahəl nakə faya ta fələkwiye ha Pol a gay tay niye na, Pol a gwaday a bagwar i bəy i sidzew niye tə bazlam i Gərek: «Ka vələŋeye tsəved ka mətsikaka wu ga andaya tədəw?»

Bagwar i bəy i sidzew niye a tsətsah faya, a gwaday: «Nəkar na, ka sər bazlam i Gərek dāw?»

<sup>38</sup>Na gwad nəkar ndo i Ezipt wuray patakay a zlaw mawesewes a hudgay aye ada a həlaw ndo hay gwezem fad tə wu həlay a patay ha a kəsaf hərwi məbəbazl tay ha ndo hay aye bəđaw?»

<sup>39</sup>Pol a məbəday faya, a gwaday: «Nəŋ na, ndo i Yahuda. Tə wa ga ma gəma i Tarsis ka dala i Silisi. Nəŋ ta dedək wawa i gəma niye lele eye. Amboh vələŋ tsəved ka mətsike me, na tsikateye me a ndo hay.»

† 21:25 Məsler hay 15.20.

40 Bagwar i bəy i sidzew niye a vəlay tsəved ka mətsike me. Pol a lətse ka dakakal i gay, a gatay tə həlay kət kət ada ndo hay tebiye tā ndza tete. Tsa na, ndo hay tebiye tə ndza tete. Pol a dazlay mətsikatay me tə bazlam i Yahuda hay.

## 22

1 «Malamar ga hay ta bəba ga hay, bazlam ga nakə anəke na tsikakumeye, na mbədiye ha ka bo abəra me aye na, tsənum təday.»

2 Ndo niye hay tə tsəne Pol faya ma tsikateye me tə bazlam i Yahuda hay na, ta səkah ha məndze tete sa.

Tsa na, Pol a gwadatay:

3 «Nej na, ndo i Yahuda. Tə wa ga ma gəma i Tarsis ka dala i Silisi. Na gal na, kanəj ma Zerozelem. Ndo nakə a dzengej aye na, Gamaliyel. Maa tətikenj məpay bəzay a bazlam mapala eye i bəba tətə kway hay kəkay na, neŋgeye. Na vəlay ha bo peteh a Mbəlom andza nəkurom neheye anəj bəgom aye.

4 Na gatay dəretsətseh a ndo neheye tə pay bəzay a Bəy Maduwej Yesu aye hus ka məkəde tay ha mədahanj eye. Na gəs tay ha haladzay. Kwa ŋgwas hay, na ye tay ha a daŋgay.

5 Bagwar i ndo məvəlaway wu a Mbəlom ta madugula hay ta sliye faya məhəle mbal ga, na tsik na, dedək. Ta watsa dərewel hay, ta vələj a həlay hərwi mede ha ka təv i malamar neheye nəteye Yahuda hay ma gəma i Damas aye. Ada na ye a dəma na, mata gəse ndo neheye faya ta pay bəzay a Yesu aye hərwi ada nə həlatay ahaya kanəj a Zerozelem məgatay dəretsətseh.

6 «Ahəl nakə nej faya na diye, nej bəse na ndisliye a Damas aye na, mazlambər məgər həpat. Kwayanə dza ydzay bagwar eye a mbəzlaw abəra mə mbəlom. A lawara ga a wuzlah tuwzik, a dəv dza ydzay haladzay.

7 Tsa na, na dəf ka dala. Na tsəne mətsike me, a ləvwə mə mbəlom, a gwedənejew: “Sol, Sol, nəkar faya ka geŋeye dəretsətseh andza niye na, hərwi mey?”

8 «Na tsətsah: “Nəkar way, Bəy Maduwej?”

«Mətsike me niye a mbədeŋew faya, a gwad: “Nej na, Yesu ndo i Nazaret nakə faya ka geye dəretsətseh aye.”

9 Ndo neheye faya ta lakiye ga ha aye ta ŋgatay a dza ydzay niye, ane tuk na, ta tsəne mətsike me i ndo nakə a tsikenew me aye bay.

10 «Na tsətsah naha faya, na gwaday: “Na giye na, kəkay, Bəy Maduwej?”

«Bəy Maduwej a gwedənejew faya: “Lətse, do a Damas. Ka ndisl naha a dəma na, ta tsikakeye wu nakə Mbəlom ma gwadakeye ge aye.”

11 Na lətse ka mbəlom na, na ŋgatay a dəre bay, hərwi dza ydzay nakə a dəv haladzay aye ka gulufen ha dəre. Ndo neheye faya ta lakiye ga ha aye, tə gəsən həlay, ti ye ga ha a Damas.

12 «Ma Damas na, ndoweye andaya məzele ŋgay Ananiyas. Neŋgeye ndo məpay naha faya a Mbəlom lele ada a rəhay ha gər a bazlam kway mapala eye lele. Yahuda neheye ma Damas aye ta rəhay ha gər lele.

13 A ye naha ka təv ga, a gwedənejew: “Sol malamar ga, dəre yak mâ həndək!” A tsik andza niye na, kwayanə dəre ga a həndək. Na ŋgatay a bo ŋgay eye tuk.

14 A gwedənejew sa: “Mbəlom i bəba tətə kway hay kə zla kar kurre hərwi ada kâ sər wu nakə a say ka giye aye ada kâ ŋgatay a ndo nakə mənese andaya faya təbey aye ada kâ tsəne mətsike me i ŋgay eye ŋgway andza nakə anəke kə ge bo tsiy aye.

15 Anəke nəkar ka tərə na, ndo məhəle mbal ŋgay. Mbəlom kə slər kar ha mədatay ha a ndo hay wu nakə ka tsəne aye tə wu nakə ka ŋgatay aye.

16 Anəke ka həba na, sa mey? Lətse ka mbəlom ta dzəhu6 kar ha a yam ada tsətsah faya mâ dzəna kar hərwi ada Mbəlom mâ bara fakaya abəra mezeleme.”

17 «Ma dəba eye na, na mbəda gər a Zerozelem. Na yawa a gay i mədəslay ha gər a Mbəlom, na dūwulaway me a Mbəlom. Pat wuray na, na ye a gay i mədəslay ha gər a Mbəlom. Neŋ faya na dūwuleye me na, məsine a geŋ.

18 Ma məsine ga niye na, na ŋgatay a Bəy Maduweŋ, a gwedeŋ: “Lətse, do abəra ma Zerozelem hərwi ndo neheye na, ta tsəniye bazlam yak nakə ka neŋ aye bay.”

19 «Na mbəday faya a Bəy Maduweŋ, na gwaɗay: “Dedək Bəy Maduweŋ, tə sər ha lele na yawa a gay i maduwule me hərwi məgəse tay ha ndo neheye tə dzala ha ka nəkar aye a danɗay ada mənɗeɓe tay ha.

20 Ahəl nakə təkəɗ na Etiyen, ndo mədə ha bazlam yak aye na, neŋ andaya dərmaɗ, a yeŋ a gər. Na həba ka peteked i ndo neheye təkəɗ na Etiyen aye.”

21 «Ane tuk na, Bəy Maduweŋ a gwedeŋ: “Do, na sləriye kar ha a gəma dərəŋ eye hay, ka təv i ndo neheye Yahuda hay bay aye.”»

### *Pol kame i bagwar i sidzew i Roma*

22 Ndo niye hay tə pay zləm a bazlam i Pol nakə faya ma tsikateye hus a ndisl ka bazlam nakə a gwaɗ «Na sləriye kar ka təv i ndo neheye Yahuda hay bay» aye. Tsa na, ta wuda ta magala, tə gwaɗ: «Dzum ha ndo nakay abəra mə dəma! Kəɗum na abəra mə dəma mədahan eye! Neŋgeye na, a ye ka bo ma ndziye ka bəra bay.»

23 Ta wuda haladzay, ta kal ha peteked tay a magərmbəlom. Tə həl bətekwew məkutse a magərmbəlom dadukdukwe.

24 Bəy i sidzew a zəba faya andza niye na, a gwaɗatay a sidzew hay: «Gəsum na, ada kâ yum ha a gay.» Tə gəs Pol, tə fələkwa ha a gay. Ti ye naha na, a satay mənɗeɓe na Pol hərwi məgay kutoŋ ka mətsike me, mâ ɗatay ha Yahuda hay ta wuda na, hərwi mey?

25 Tə dzawa Pol mata ndeɓe tuk na, Pol a gwaɗay a bagwar i sidzew niye: «Nəkar na, tsəved yak andaya mənɗeɓe ndo i Roma nakə ta gay sariya zuk bay aye ta mandalaɓa ɗaw?»

26 Bagwar i sidzew a tsəne bazlam i Pol na, a ye ka təv i bəy bagwar eye i sidzew hay, a ye a ɗay ha bazlam i Pol nakə a tsik aye. A gwaɗay: «Ka giye tebiye na, kəkay? Ndo nakay na, ndo i Roma.»

27 Tsa na, bagwar i bəy i sidzew niye a ye ka təv i Pol. A ye naha a tsətsah faya, a gwaɗay: «Tsiken ta dedek, nəkar na, ndo i Roma ɗaw?»

Pol a mbəday faya, a gwaɗay: «Ayaw! Neŋ ndo i Roma.»

28 Bəy i bagwar i sidzew niye a gwaɗ: «Neŋ na təra ndo i Roma na, na vəl suloy haladzay.»

Pol a mbəday faya, a gwaɗay: «Neŋ tə wa ga na, ndo i Roma ŋgway bəna na səkam ta suloy andza nəkar bay.»

29 Kwayaŋna ndo neheye maləva bo eye ta ndaɓiye Pol məgay kutoŋ ka mətsike me aye, ta həndzəd faya abəra. Bo i bagwar i bəy i sidzew eye a sər ha Pol neŋgeye ndo, a pay tsalalaw a ndo i Roma na, a dzəɗzar haladzay.

### *Pol kame i madugula i Yahuda hay*

30 Bagwar i bəy i sidzew niye a say məsəre ha Yahuda hay tə may ha mənese hərwi mey. Hərwi niye, tədəe eye na, a pəla ahaya tsalalaw abəra mə həlay a Pol. Tsa na, a zalatay a bagwar hay i ndo neheye tə vəlaway wu a Mbəlom aye tebiye. A hayatay gər. Tsa na, tə zla ahaya Pol, a lətse ha kame tay.



## 23

1 Pol a ndazl tay ha bagwar i Yahuda hay. Tsa na, a gwadatay: «Malamar ga hay, neñ na sər ha mändze ga ka tsəved i Mbəlom na, lele. Mədzal gər ga mapa eye na, ka neñgeye.»

2 Bagwar i ndo məvəlaway wu a Mbəlom məzele ɲgay Ananiyas, a tsəne na, a gwadatay a ndo neheye nəteye bəse ka təv i Pol aye: «Fumay ka bazlam.»

3 Pol a gwaday: «Mbəlom ma fakeye na, a nəkar. Ka ndza kanan ɲəgeñ sariya na, andza nakə bazlam mapala eye a tsikaka aye. Ane tuk na, nəkar eye düh faya ka nasiye ha bazlam i Mbəlom mapala eye hərwi ka vəlateye tsəved a ndo hay tã kəd ga.»

4 Ndo neheye nəteye bəse ka təv i Pol aye, tə gwaday a Pol: «Ka tsadəy a bagwar i ndo məvəlaway wu a Mbəlom na, kəkay!»

5 Pol a mbədətay faya, a gwadatay: «Malamar ga hay, na sər ha neñgeye bagwar i ndo məvəlaway wu a Mbəlom bay. Hərwi mawatsa eye mə Derewel i Mbəlom na, tə gwad: “Dada ka tsikiye wuray manasa eye ka bəy i gəma yak bay.\*”»

6 Pol a sər ha, ndo neheye mahaya gər aye na, siye hay Saduke hay, siye hay Farisa hay. Hərwi niye a wuda kələrra kame tay, a gwadatay: «Malamar ga hay, neñ na, ndo Farisa ada gwala ga hay na, Farisa hay. Ka gumeñgeye sariya anəke na, hərwi nakə na dzala ha ta dedek mədahañ hay ta lətseweye abəra ma mədahañ aye.»

7 Pol a ndəv ha bazlam ɲgay niye na, kwayaɲɲa Saduke hay ta Farisa hay tə pa bo ka məma ha ka bo mañgok mə walañ tay. Ma məhay gər tay niye na, mədzal gər tay a ɲəna.

8 Saduke hay nəteye tə gwad na, mədahañ hay ta lətseweye abəra ma mədahañ sa bay, gawla i Mbəlom hay andaya bay ada kwa məsəfəre andaya bay. Farisa hay i tay na, ta pa faya mədzal gər tay. Tə gwad wu neheye tebiye andaya.

9 Ta səkah ha mawude haladzay sa. Tsa na, siye i ndo mədzanğawa bazlam i Mbəlom mapala eye, nəteye ma bərək i Farisa hay dərmaç, hərəm tə lətse, tə gwad: «Nəmay na, nəmaa huta mənese kwa tsekweñ ka ndo nakay təbey. Ma giye maa tsikay me na, ağəna gawla i Mbəlom kəgəbay məsəfəre.»

10 Ta səkah hay məbetse me huwwa mə walañ tay sa. Bagwar i Bəy i sidzew a zəba faya na, ta kədiye na Pol, a vəlay madzadzere haladzay. Tsa na, a gatay wiyaw a sidzew hay, a gwadatay: «Dum, gəsum ahaya Pol abəra ma wuzlah tay ada kã yum ha a gay nakə a ndzawa mə dəma aye.»

11 Ta həvad eye niye na, Bəy Maduweñ a yaw a bəzay ha bo a Pol, a gwaday: «Dərev mā ye fakaya abəra bay, tete yak. Ka həl mbal ga ma Zerozelem. A señ kã həl mbal ga ma Roma dərmaç.»

### *A satay a Yahuda hay məkədə Pol*

12 Tədəe eye na, siye i Yahuda hay tə haya gər, tə ma ha ka bo bazlam. Tə mbada, tə gwad: «Nəmaa kəd na Pol bay na, nəmaa ndiye dəf bay, nəmaa siye yam bay. Kutoñ nəmaa kədiye na təday.»

13 Ndo neheye tə haya gər, tə ma ha ka bo bazlam aye na, ta ziye kuro kuro faç.

14 Tə həl bo, ti ye ka təv i bagwar hay i ndo neheye tə vəlaway wu a Mbəlom aye ta madugula hay. Ti ye naha, tə gwaday: «Nəmay na, nəmaa mbadaka kame i ndo hay. Nəmaa ndiye dəf bay, nəmaa siye yam bay. Kutoñ nəmaa kədiye na Pol təday ada nəmaa ndiye dəf, nəmaa siye yam.»

\* 23:5 Madayaw abəra ma Ezipt 22.27.

<sup>15</sup> Nəkurom ta bagwar i ndo mələve dala kway na, dum tsətsahum ka bagwar i bəy i sidzew, mâ zlakuma ahaya Pol a bəra. Gwadumay na, a samay mazəbe ada mətsəne bazlam nakə a tsikawa aye lele. Nəmay na, nəmaa ləviye bo lele, ta zla ahaya, ma ta ndisleweye kanəŋ na, nəmaa kəf na.»

<sup>16</sup> Ane tuk na, bazlam niye faya ta tsikiye na, wawa i malamar i Pol kə tsəne. A ye a gay i bagwar i bəy i sidzew nakə tə pa a dəma Pol aye. A ye naha, a day ha a Pol.

<sup>17</sup> Pol a tsəne andza niye na, a zalay a bəy i sidzew, a gwaday: «Laka ha wawa nakay ka təv i bagwar i bəy i sidzew hərwi bazlam ŋgay andaya a say məday ha.»

<sup>18</sup> Bəy i sidzew ti ye ta wawa niye. A laka ha ka təv i bagwar i bəy i sidzew. A ye naha a gwaday: «Nəmaa yaw ka təv yak na, Pol i danğay a zelen. Na ye ka təv ŋgay na, a gwedeŋ nâ lakaka ahaya wawa nakay hərwi wu andaya a say mədaka ha.»

<sup>19</sup> Tsa na, bagwar i bəy i sidzew niye hay a gəs na wawa niye abəra mə həlay. A ye ha kətsah abəra ka təv i ndo hay. A tsətsah faya, a gwaday: «Ka gwedeŋ na, kəkay?»

<sup>20</sup> Wawa niye a gwaday: «Yahuda hay ta haya gər, tə ma ha ka bo bazlam, tə gwad ta deyeweye, ta tsətsahiye naha fakaya Pol. Ka zlatay naha tədœ kame i məhay gər i bagwar i ndo mələve dala tay andza agəna ta zəbiye ka bazlam ŋgay nakə a tsikawa aye.

<sup>21</sup> Ane tuk na, ta yaw, ta tsətsah na, kâ təma tay na bay. Hərwi ndo hay mə walaŋ tay, ta ziye kuro kuro fad ta pay bo a gobo. Nəteye na, ta mbəda tsiy. Tə gwad ta ndiye daf bay, ta siye yam bay. Kutoŋ ta kədiye na Pol təday. Anəke na, nəteye mahaya gər eye tsiy, ta həba na, bazlam yak nəte ŋwen.»

<sup>22</sup> Bagwar i bəy i sidzew niye hay, a gwaday: «Kâ kəkəray bazlam nakay a ndəray sa bay.» Tsa na, a gwaday: «Do wu yak.»

### *Tə slər ha Pol ka təv i Felikus*

<sup>23</sup> Ma dəba eye na, bagwar i bəy i sidzew niye a zalatay a bəy i sidzew hay sulo, a gwadatay: «Hayumay gər a sidzew hay temerre sulo, ndo makukure pəles hay kuro kuro tasəla ada hasləka hay temerre sulo, ta həl suwal tay a həlay. Nəkurom tebiye ləvum bo lele ka mede a Sezare. Ka həlumeye bo ta bəre tsid i həvad.

<sup>24</sup> Ləvum ha bo tə pəles neheye ka zlumeye ha Pol aye. Ka deyumeye na, mâ ndisl ka təv i Felikus ndo mələve dala i Sezare na, wuray kwa tsekwerŋ mā gay bay.»

<sup>25</sup> Tsa na, bagwar i bəy i sidzew niye hay a watsatay dərəwel a həlay, a gwad:

<sup>26</sup> «Neŋ Kələd Lisiyas, na tsikaka naha me a nəkar Felikus.

<sup>27</sup> «Ndo nakay na sləraka naha na, Yahuda hay tə gəs na a satay məkəde na. Neŋ na tsəne neŋgeye ndo i Roma na, na zla na bazlam eye ka gər ga nəmay ta sidzew ga hay. Nəmaa təma ha, nəmaa gəs na nəmaa ye ha a gay may.

<sup>28</sup> Hərwi məsəre ha wu nakə ta kədiye na faya aye na, na zla, na ye ha kame i məhay gər i ndo mələve dala tay hay.

<sup>29</sup> Na ye ha, na pay zləm a bazlam tay eye na, tə tsik ka bazlam tay mapala eye. Gər i bazlam eye nakə dā mægweđe kə nas ada məkəde na faya aye kəgəbay mægəse na a danğay aye na, andaya bay.

<sup>30</sup> Ma dəba eye na, tə gwedeŋ Yahuda hay ta haya gər, ta ma ha ka bo bazlam. Hərwi niye, na ge mahonok bay, na sləraka naha bəse. Na gwadatay a ndo neheye tə may ha mənese aye na, tə ye naha tə wuda ka təv yak.»

<sup>31</sup> Sidzew hay tə ge andza nakə tə tsikatay aye. Tə zla Pol, ti ye ha ta həvad hus a gəma i Ançipatəris.

<sup>32</sup> Tədəcə eye na, sidzew neheye tə laka tay tə sik aye, tə gər tay ha. Ta mbəda gər a dəba, tə ma a təv nakə tə ndzawa mə dəma aye. Ndo makukure tə pələs ti ye ha Pol.

<sup>33</sup> Tə husa a Sezare na, ndo makukure pələs hay tə vələy dərrewel nakə tə vəlatay naha a həlay a Felikus ada tə vələy ha Pol a həlay.

<sup>34</sup> Bəy a təma dərrewel niye a dzaŋga. Tsa na, a tsətsah ka Pol, a gwaday: «Nəkar na, ndo i dala waray?»

Pol a dəy ha, a gwaday: «Nəj ndo i dala i Silisi.»

<sup>35</sup> Bəy a tsəne andza niye na, a gwaday: «Na gakeye na sariya yak na, ndo neheye tə maka ha mənese aye tə yaw təday.» Tsa na, a gwadatay a sidzew hay: «Dum ha Pol a gay nakə bəy Herod, bəy bagwar eye a ŋgar ahəl niye aye.»

## 24

### *Pol kame i Felikus*

<sup>1</sup> Ma dəba i məhəne zlam na, Ananiyas bagwar i ndo məvələway wu a Mbəlom ta siye i madugula i Yahuda hay ada ndoweje andaya tə zalay Tertulus, ndo məsəre gər i bazlam i sariya i bəy i Roma, ti ye a Sezare. Ti ye ka təv i bəy niye tə zalay Felikus aye, ta wuda ka Pol.

<sup>2</sup> Bəy a slər ndo ka Pol. Ti ye, tə zalay naha. Pol a yaw na, Tertulus a dazlay mənğay naha bazlam a gər a Pol. A gwaday a bəy: «Bəy bagwar eye, zay andaya məndze haladzay ka dala kway na, hərwi yak. Mələve i bəy yak nakə faya ka ləviye na, tə metsehe lele. Ka lambad tay ha wu hay lele hərwi madzəne dala kway.

<sup>3</sup> Hərwi wu neheye tebiye nəmaa huta aye na, nəmaa gaka sisə kwa ahəl waray ada kwa kəday. Nəmaa gaka sisə haladzay.

<sup>4</sup> «A seŋ məmətse kar ha haladzay bay. Ane tuk na, amboh hərwi ŋgwalak yak, pamay zləm ka bazlam may məndze tsekwej tey.

<sup>5</sup> Nəmaa sər ha, ndo nakay na, ndo mənese ha dala kway. Nəŋgeye na, bəy i ndo neheye faya ta pay bəzay a parasay i ndo neheye tə zalatay Nazaret hay aye. Nəŋgeye faya makwasatay ha gər a Yahuda hay tebiye ka məndzibəra.\*

<sup>6</sup> Ka pəla tsəved ka mənese ha gay i mədəslay ha gər a Mbəlom. Hərwi niye, nəmaa gəs na. [A samay məğay sariya andza bazlam may mapala eye,

<sup>7</sup> ane tuk na, Lisiyas bəy i sidzew a buwa famaya abəra ta gədaŋ a ŋgaha na.

<sup>8</sup> Tsa na, Lisiyas a gwadamay: “Dum ta wudum faya ka təv i bəy Felikus.” Nəmaa yaw ka təv yak na, hərwi məwude faya.] Tadə ka tsətsah faya bazlam na, nəkar tə gər yak ka səriye wu nakə nəmaa wuda ha faya aye na, dedək.»

<sup>9</sup> Yahuda hay dərmak tə gwad: «Bazlam niye na, dedək andza niye. Wu neheye tə sik ka Pol aye na, nəte.»

<sup>10</sup> Ta ndəv ha bazlam tay na, bəy a vələy tsəved a Pol ka mətsike me. A gay naha a Pol wiyaw tə həlay. Tsa na, Pol a dazlay a mətsike me, a gwad: «Na sər ha, nəkar na, ndo məge sariya ka dala kway kə ndza məve haladzay. Hərwi niye dərev ga kə ŋgwasa haladzay hərwi na huta tsəved məge sariya kame yak.

<sup>11</sup> Bəy, nəkar tə gər yak ka sliye faya matsətsəhe məndze ga ka ndo hay. Kə ge anəke na, ma ziye məhəne kuro gər eye sulo bay nakə na yaw a Zerozelem mata dəslay naha gər a Mbəlom aye.

<sup>12</sup> Ahəl nakə na ye a dəma aye na, nəmaa ge məhəmba kwa ta ndo hay bay ada kwa na pay me a ndo hay mə gay i mədəslay ha gər a Mbəlom bay. Ada kwa mə gay i maduwule me, kwa mə wuzlahğəna na pay me a ndo hay bay.

\* 24:5 Mata 2.23.

<sup>13</sup> Ndo neheye anəke nəteye faya ta ndərbəkiye na, wuray kəriye. Ta sla faya mətsike wu nakə ta dədiye ga ha ta sariya aye bay.

<sup>14</sup> Neŋ na, na dəkeye ha wu nakə na sər aye. Ta dedək, na pay bəzay a tsəved nakə nəteye tə gwad lele bay aye. Ane tuk na, neŋ faya na gay məsler na, a Mbəlom i bəba tətə may hay. Ada na dzala ha ka wu nakə mawatsa eye mə dərəwel i Musa ada nakə mawatsa eye mə dərəwel i ndo mədə ha bazlam i Mbəlom hay aye.

<sup>15</sup> Hərwi na sər ha ta dedək andza nəteye neheye tə sər ta dedək ndo neheye mənese andaya fataya bay aye ta ndo i mezeleme hay ta lətseweye abəra ma mədahaŋ.

<sup>16</sup> Hərwi niye, neŋ na vəliye ha bo ga məndze tsədaŋŋa kame i Mbəlom ada kame i ndo hay pat pat.

<sup>17</sup> «Na ndza mə slele məve haladzay, na ye a Zerozelem bay. Na ye a Zerozelem na, na zla madzəne a ndo ga hay ada hərwi məvəlay wu a Mbəlom.

<sup>18</sup> Tə ndzeŋ a gər mə gay i mədəslay ha gər a Mbəlom na, na ndəv ha məsler i məbere bo tsədaŋŋa tsiy. Ndo hay andaya bay ada magazləga andaya bay.

<sup>19</sup> Ane tuk na, siye i Yahuda neheye ka dala i Azi aye, nəteye andaya. Həbətədə ta huta fagaya mənese na, mata dayaw mawude fagaya ka təv yak na, nəteye.

<sup>20</sup> Kəgəbay mənese nakə na ge tə gəs ga faya, ti ye ga ha kame i bagwar i Yahuda hay aye na, ta tsikaka.

<sup>21</sup> Ma giye na, hərwi nakə na gwad ta magala kame tay: “Ka gəsoma ga ahaya kame kurom bəgom na, hərwi nakə neŋ na dzala ha ta dedək mədahaŋ hay ta lətseweye abəra ma mədahaŋ aye.”»

<sup>22</sup> Bəy Felikus na, a sər ha tsəved i məpay bəzay a Yesu lele. Hərwi niye, ka ndəv ha sariya bay, a gwadətay: «Lisiyas bəy i sidzew ki yaw na, na ndəviye ha sariya aye.»

<sup>23</sup> A gwadəy a bagwar i sidzew: «Pa na Pol a daŋgay, kə gay dərətəstəh bay, gəray tsəved a dzam ŋgay hay tə zəbay dərə.»

<sup>24</sup> A ndza məhəne tsekweŋ na, Felikus ta ŋgwas ŋgay Duruzel tə ndisl naha. Ŋgwas ŋgay na, dem i Yahuda hay. A slər ndo ka Pol, mə zalayaw ada mə yaw ka təv tay. Ki yaw, ka təkəratay ka məpe mədzal gər ka Yesu Kəriste, ta pay zləm.

<sup>25</sup> Tsa na, a dazlay mətsikatay ka məndze nakə ta ndziye mənese andaya fataya bay, ka məgay metsehe a bo ada ka sariya nakə Mbəlom ma gateye a ndo hay aye. Felikus a tsəne andza niye na, zluwer a gay. Tsa na, a gwadəy a Pol: «Anəke na, do wu yak, aza na huta həlay eye na, na zalakeye sa.»

<sup>26</sup> Felikus a dzala mə gər ŋgay ağəna Pol ma vəleye suloy. Hərwi niye a zalaway a Pol mətsike me.

<sup>27</sup> Tə ndza ka bo məve sulo na, ta məbədə ha Felikus ta Porsiyos Festus. Felikus na, neŋgeye a say mayatay a gər a Yahuda hay. Hərwi niye a gər ha Pol ma daŋgay.

## 25

### *Pol kame i bəy Festus*

<sup>1</sup> Ahəl nakə tə pa na Festus a bəy, a dazlay a məsler, a ge məhəne mahkar na, a həl bo abəra ma gəma i Sezare, a ye a Zerozelem.

<sup>2</sup> A ndisl a Zerozelem na, bagwar hay i ndo neheye tə vəlaway wu a Mbəlom aye ta bagwar i Yahuda hay ti ye ka təv ŋgay hərwi mawude ka Pol. Ta tsətsah faya, tə gwadəy:

<sup>3</sup> «Amboh, zlamay ahaya Pol a Zerozelem ka mäge sariya may kanañ.» Tə tsikay andza niye na, 6a ta nda faya me ada a satay mata kədə na ka tsəved.

<sup>4</sup> Ane tuk na, Festus a mbədatay faya, a gwadatay: «Pol na, neñgeye ma danğay mə gay ma Sezare. Anəke na, na giye mahonok bay, na ndziye məhəne tsekweñ na, na mbədiye gər a mətəgay.»

<sup>5</sup> A gwadatay sa: «Kə sakum na, bəy kurom hay tə peñ bəzay a Sezare. Tađə ndo nakay kə ge wu nakə lele bay aye na, tə ye naha, tə ge faya sariya.»

<sup>6</sup> Festus a ndza ma Zerozelem na, məhəne tsamahkar hus a məhəne kuro tsa. Tsa na, a mbəda gər a Sezare. Bəy i Yahuda hay tə pay bəzay. Tədoə eye na, a ye a təv mäge sariya. A gwadatay: «Dum, zlumenjəw Pol.»

<sup>7</sup> Pol a ye ka təv mäge sariya na, kwayañña Yahuda neheye ti yaw ma Zerozelem aye tə lawara na. Ta raw faya me ka mənese neheye a say a zlam mətsəne bay aye wal wal haladzay, ane tuk na, tə sla faya mətsike dedək ñgay eye bay.

<sup>8</sup> Ta ndəv ha mətsike bazlam tay niye hay na, Pol a ge ka bo abəra me, a gwadatay: «Na ge mənese kwa tsekweñ bay tebiye, kwa ka bazlam mapala eye i Yahuda hay, kwa ka gay i mədəslay ha gər a Mbəlom, kwa ka bəy i Roma eye, na ge mənese bay.»

<sup>9</sup> Festus a say neñgeye m̄a yatay a gər a Yahuda hay. Hərwi niye, a tsətsah ka Pol, a gwaday: «Ka deyekweye a Zerozelem na ta gakeye sariya yak mə dəma na, a saka dāw?»

<sup>10</sup> Pol a mbəday faya, a gwaday: «Neñ kame i sariya i bəy i Roma, tə ñgəneñ ha sariya ga na, kanañ. Kwa nəkar tə gər yak ka sər lele, na gatay mənese a Yahuda hay bay.

<sup>11</sup> Tađə na ge mənese nakə dā məkədə ga faya aye na, na may ha me a məməte wal bay. Ane tuk na, tađə maraw me i ndo neheye ta raw fagaya me andaya mə dəma bay na, ndəray ma sliye faya məvəlatay ga ha bay. Mata ge sariya ga na, bəy i Roma!»

<sup>12</sup> Festus a tsəne bazlam ñgay niye na, tə ma ha ka bo bazlam mə walañ tay ta ndo ñgay hay. Ma dəba eye, Festus a gwaday: «Ka gwad mata gaka sariya yak na, bəy i Roma ba! Ka diye ka təv ñgay dedək.»

<sup>13</sup> Ma dəba eye andza tsekweñ na, bəy bagwar eye nakə tə zalay Agərripa aye neñgeye ta malamar ñgay ñgwas eye, tə zalay Berenis, ti ye a Sezare mata zəbayaw dərə a Festus.

<sup>14</sup> Tə ndza mə dəma məhəne haladzay. Hərwi niye Festus a huta həlay eye məday ha labara i Pol a bəy bagwar eye. A gwaday: «Ndo wuray andaya kanañ Felikus a gər ha a danğay, na yaw na ndzay a gər.

<sup>15</sup> Na ye a Zerozelem na, bagwar hay i ndo neheye tə vəlaway wu a Mbəlom aye ta madugula i Yahuda hay ti ye naha ka təv ga, ta wuda faya, tə gwedəñ: “Gəs na ta sariya.”

<sup>16</sup> Ane tuk na, na mbəday faya, na gwadatay: “Dađa Roma hay ta kədiye ndo ze mədzatay ha gər a ndo neheye ta wuda faya aye bay. Tə dzatay ha gər ta ndo neheye ta raw faya me aye ada neñgeye dərmağ tađə dedək, dedək bay na, ma tiye mbal i gər ñgay.”

<sup>17</sup> Tsa na, nəmaa yaw ka bo dziye. Nəmaa yaw na, na mətsa ka wuray bay. Tədoə eye na, na ye ka təv mäge sariya. Tsa na, na slər ndo hay, na gwadatay: “Zalumay naha a Pol m̄a yaw.”

<sup>18</sup> Pol a yaw na, ndo neheye ta wuda faya aye ti ye naha. Ndo neheye ta wuda faya aye na, tə tsik faya wuray andza nakə na dzala aye bay.

<sup>19</sup> Wu nakə na tsəne aye, tə kədf wuway na, ka kule tay nakə tə paway bəzay aye. Ada sa na, ka ndo nakə tə zalay Yesu a mət aye na, Pol a gwadawa kə lətsew abəra ma mədahaŋ aye.

<sup>20</sup> Neŋ na, a geŋ wadəŋ wadəŋ, na sər mäge kəkay bay. Hərwi niye, na gwaday a Pol: “A saka na, takwa mata ge sariya i bazlam nakay ma Zerozelem kəla daw?”

<sup>21</sup> Ane tuk na, Pol a wudə andza niye bay. A gwad: “Mata ŋgəneŋ ha sariya ga na, bəy i Roma.” Aya ane, na gwadatay a sidzew hay: “Pum na a gay i daŋgay, tsəpum na hus a pat nakə na sləriye ha ka təv i bəy i Roma aye.”

<sup>22</sup> Agərīpa a tsəne andza niye na, a gwaday a Festus: «Neŋ dərma k a seŋ mətsəne bazlam i ndo niye tə zləm ga.»

Festus a mbəday faya, a gwaday: «Tədəcə na, ka tsəniye bazlam ŋgay.»

<sup>23</sup> Tədəcə eye na, Agərīpa ta malamar ŋgay Berenis ti ye naha ta ndo neheye tə patay naha bəzay aye. Bəy i sidzew hay, ndo neheye bagwar eye ma gəma niye aye tə patay naha bəzay. Ti ye naha tə fələkwa a gay i mäge sariya. Ti ye naha na, Festus a gwadatay a ndo ŋgay hay: «Dum, zalumayaw a Pol, mâ yaw.» Ndo niye hay ti ye, tə zalayaw a Pol. Pol a yaw ka təv tay.

<sup>24</sup> Tsa na, Festus a gwad: «A nəkar Agərīpa, bəy bagwar eye ada a nəkurom neheye tebiye kənaŋ aye. Ndo nakə Yahuda neheye ma Zerozelem aye ta Yahuda neheye kənaŋ aye ta wuda faya ka təv ga. Ta wuda faya, tə gwad neŋgeye na, mâ ndza sa bay, məkədə na.»

<sup>25</sup> Neŋ na, na huta faya mənese nakə də məkədə na aye bay. Ane tuk na, bo ŋgay eye tə gər ŋgay a gwad: “Bəy i Roma mâ ŋgəneŋ ha sariya ga.” Hərwi niye, na dzala na, na sləriye naha.

<sup>26</sup> Neŋ na, gər i bazlam eye nakə də na watsay naha a bəy i Roma na, na sər bay. Hərwi niye na slər naha kame kurom tebiye ada wene wene eye kame yak Agərīpa bəy bagwar eye. Tsətsah faya gər i bazlam eye. Ka tsətsah na, agəna neŋ dərma k na hutıye gər i bazlam nakə na tsikiye aye hərwi ada nā huta wu nakə na watsay naha a bəy i Roma aye.

<sup>27</sup> Na zəba faya məslərə ha ndo i daŋgay ka təv i bəy i Roma ze məsərə mənese ŋgay eye na, lele bay.»

## 26

### *Pol kame i Agərīpa*

<sup>1</sup> Agərīpa a gwaday a Pol: «Anəke na, na vələka tsəved ka mətsıke me abəra ka bo yak.»

Tsa na, Pol a zla həlay a mbəlom, andza məgwədə a say ma tsikiye me. A dazlay a mətsıke me abəra ka bo ŋgay. A gwaday a bəy Agərīpa:

<sup>2</sup> «A nəkar bəy Agərīpa, dərev ga kə ŋgwasa haladzay, hərwi na huta tsəved mətsıke me abəra ka bo ga bəgom kame yak hərwi bazlam neheye tebiye Yahuda hay tə ŋgeŋ naha a gər aye.

<sup>3</sup> Dərev ga a ŋgwasa wene wene eye na, hərwi nəkar ka sər məndze i Yahuda hay ada ta məkədə wuway nakə tə kədawa ka kule tay nakə tə paway bəzay tebiye aye na, ka sər. Neŋ faya na gakeye amboh, bazlam ga nakə na tsikiye na, pay zləm tey.

<sup>4</sup> «Yahuda hay tebiye tə sər məndze ga lele, kwa abəra ma wawa. Məndze ga mə walaŋ i gwala ga hay ma Tarsis ada ma Zerozelem, na ndza mə walaŋ tay ahl niye kəkay na, tə sər.

<sup>5</sup> Nəteye tə sər ga ha zla anəke bay, ta sliye faya məte mbəl i gər ga. Tadə a satay na, ta sliye faya mətsike dedək. Na pay bəzay a kule i Farisa nakə mawura bo aye.

<sup>6</sup> Ada anəke faya ta geñeye sariya na, hərwi nakə na pa mədzal gər ga ka wu nakə Mbəlom a tsik ahəl niye, a gwad ma vəlateye a bəba tətə hay həlay ɲgalak eye.

<sup>7</sup> Slala may hay kuro gər eye sulo ta pa mədzal gər tay ka wu nakə Mbəlom a gwad ma vəliye aye na, ta məgay məsler a Mbəlom tsekerkerre həvad ta həpat tebiye. Bəy Ağaripa, Yahuda hay ta raw fagaya me na, hərwi nakə na pa faya mədzal gər aye dərma.

<sup>8</sup> Nəkurom Yahuda hay, Mbəlom ma ta təmiye tay ha ndo hay abəra ma mədahan na, a sakum mədzele ha faya bay na, hərwi mey?

<sup>9</sup> «Nəñ tə gər ga, na dzala mäge vərəm ka bazlam i Yesu ndo i Nazaret andza nəkurom neheye ka dzalum aye dərma.

<sup>10</sup> Wu neheye tebiye na ge na, ma Zerozelem. Na huta gədan na, abəra ka təv i bagwar hay i ndo neheye tə vəlaway wu a Mbəlom aye. Na gəs ndo neheye tə paway bəzay a Yesu aye haladzay a danğay. Ahəl nakə tə gawatay sariya i məkədə tay ha aye na, na gwadawa faya yawa dərma.

<sup>11</sup> Na yawa a gay i mađuwule me hay wal wal, na gawatay dəretsətseh ada a seweñ məgatay kutoñ ada tã gər ha məpe mədzal gər ka Yesu. A ndeleñ fataya turtur haladzay. Na palawa tay ha, kwa ma gəma neheye dəreñ aye. Na yawa fataya mata gatay dəretsətseh.

<sup>12</sup> «Andza niye, na həl bo na ye a Damas ta gədan ada ta məsler nakə bagwar hay i ndo neheye tə vəlaway wu a Mbəlom aye tə slər ga ha aye.

<sup>13</sup> Bəy bagwar eye, ma giye magər həpat, neñ faya na diye a Damas nakə na ɲgatay a dzaydzay faya ma mbəzlaweye abəra mə mbəlom aye. A dəv na, a ze madəve i pat. Dzaydzay niye a lawara may ta ndo ga neheye faya ta lakiye ga ha aye.

<sup>14</sup> Nəmay tebiye nəmaa dəf ka dala. Tsa na, na tsəne mətsike me, a tsik tə bazlam i Yahuda hay. A gwad: “Sol, Sol, nəkar faya ka geñeye dəretsətseh andza niye na, hərwi mey? Nəkar faya ka giye gədan kurtsətsə andza sla nakə faya ma giye gədan ka sakwal i ndo nakə faya ma kədiye na aye.”

<sup>15</sup> «Na mbəday faya, na gwaday: “Nəkar eye na, way, Bəy Maduweñ?”

«Tsa na, Bəy Maduweñ a gwedeñ: “Nəñ na, Yesu nakə faya ka geye dəretsətseh aye.

<sup>16</sup> Ane tuk na, lətse. Lətse dzək tə sik yak lele. Na bəzaka ha bo na, hərwi matəre kar ha ndo i məsler ga ada ka diye ha wu neheye ka ɲgatay aye ada neheye ka ta ɲgateye aye.

<sup>17</sup> Na tsəpiye kar abəra ka Yahuda hay ada ndo neheye Yahuda hay bay aye. Na sləriye kar ha ka təv i ndo neheye Yahuda hay bay aye.

<sup>18</sup> Ka diye ka həndəkətatay na dəre tay hay hərwi ada tã yaw abəra ma ləvoñ, tã ye a dzaydzay, tã təmaw abəra ma gədan i Fakalaw, tã maw ka təv i Mbəlom hərwi tã təma məpəse ha mənese tay ada ta hutiyə təv məndze ka təv i Mbəlom andza ndo neheye tə pa mədzal gər tay ka neñ aye.”

<sup>19</sup> «Hərwi niye, Ağaripa bəy bagwar eye, na kərah wu nakə na ɲgatay a yaw mə mbəlom aye bay.

<sup>20</sup> Na də ha bazlam i Bəy Maduweñ ma Damas təday, ma dəba eye ma Zerozelem, ka dala i Yahuda tebiye, ada a ndo neheye Yahuda hay bay aye. Na tsikatay, tã gər ha mezeleme, tã yaw ka təv i Mbəlom, tã ge məsler nakə ma diye ha ta dedək ta gər ha mezeleme tay aye.



21 Anan, hərwi niye Yahuda hay tə gəs ga mə gay i mədəslay ha gər a Mbəlom ada a satay məkədə ga.

22 Na gay sisə a Mbəlom ka matsəpe ga, hus ka bəgom ney andaya faya na diye ha bazlam nğay kame i ndo məkətsa eye hay kwa kame i ndo bagwar eye hay. Wu neheye Musa ta ndo mədə ha bazlam i Mbəlom siye hay tə də ha parakka, ka wu nakə ma giye bo aye, ney na gər ha faya abəra kwa tsekwey bay.

23 Tə də ha, tə gwad: «Kəriste ma ta siye dəretsətseh, ma mətiye ada neygeye ma təriye makurre i ndo mələtsew abəra ma mədahəy. Ma dətatay ha dzaydzay i bazlam nğay a İsrayel hay ada a ndo neheye nəteye Yahuda hay təbey aye.»

24 Pol faya ma tsikiye andza niye na, Festus a tsik ta magala, a gwaday: «Gər a vuwaka dəw Pol? Məsəre wu yak nakə ka sər haladzay aye ka sər ha mətsike me ta tsəved eye sa bay dəw?»

25 Pol a gwaday: «Gər a vuwey bay nğalaka Festus. Na tsik düh na, bazlam neheye dedək aye ada bazlam neheye a tsəne bo aye.

26 Wu neheye na, bəy bagwar eye kə tsəne ada na tsikeye parakka, hərwi na sər ha ta dedək wu nakə neygeye a sər bay aye ada kə tsəne bay aye na, andaya bay. Hərwi wu neheye tebiye a ge bo aye na, ta məkal bay.

27 Nəkar, Ağəripa bəy bagwar eye, ndo mədə ha bazlam i Mbəlom neheye ahəl niye tə də ha bazlam i Mbəlom aye na, ka dzala ha ka bazlam tay niye tə də ha aye bədəw? Na sər ha, ka dzala ha.»

28 Ağəripa a gwaday a Pol: «Ka dzala na, na təriye ndo məpe mədzal gər ka Yesu hərwi bazlam nakay anəke aye tsa dəw?»

29 Pol a mbəday faya, a gwaday: «Anəke bəse, kwa aza bay. Faya na duwulay me a Mbəlom hərwi yak ada ta ndo neheye bəgom faya ta peyeye zləm tebiye aye kə tərüm andza ney. Ane tuk na, a sey na, tə dzawa kurom a danğay andza ney bay tey.»

30 Bəy Ağəripa, Festus, Berenis ada ta ndo neheye mandza eye ka təv tay aye tebiye tələtse.

31 Ahəl nakə nəteye faya ta deyeweye wu tay aye na, tə gwad nəte nəte mə walañ tay: «Ndo nakay na, kə ge wuray nakə də məkədə na kəgəbay məgəse na a danğay aye bay.»

32 Tsa na, Ağəripa a gwaday a Festus: «Ndo nakay tədə bə ka tsətsah a say bəy i Roma mə nğənanay ha sariya bəna, ha bə na, məgər ha.»

## 27

### *Tə slər ha Pol a Roma*

1 Ma dəba eye na, bəy a pamay pat mede ka dala i Itali ta kwalalañ i yam. Ahəl nakə pat eye a ndisl a dəma aye na, tə vəlay ha Pol ta ndo i danğay siye hay a həlay i bəy i sidzew wuray ada mə ye tay ha a Roma. Məzele i bəy i sidzew niye na, Zuliyus. Neygeye nəte mə walañ i sidzew neheye ta tsəpawa bəy i Roma aye dərmak.

2 Nəmaa tsal a kwalalañ i yam nakə a yaw abəra ma gəma i Adramite aye. Sləlah i yam faya ma diye ta wuzlahgəma i Azi neheye ka me i bəlay aye. Tsa na, nəmaa ye tuk. Nəmay ka bo dziye ta ndoweye andaya tə zalay Aristark, ndo i gəma i Tesalonik ka dala i Masedowan.

3 Tədcə eye na, nəmaa ndisl a gəma i Sidon. Nəmaa ndisl naha na, bəy i sidzew niye tə zalay Zuliyus, neygeye a gay gər a Pol lele. A vəlay tsəved a Pol mə ye, mə zəbatay dəre a dzam nğay hay ada tə vəlay wu hay, tə gay gər lele.

<sup>4</sup> Nəmaa həl bo abəra ka təv niye na, tə kwalalanı i yam sa. Nəmaa ye tə həlay i gula i Sipəre. Həbe nəmaa ye tə həlay i mənday, aya ane mətasl a vəlamay tsəved bay.

<sup>5</sup> Nəmaa tas ta dəlov nakə bəse ta gəma i Silisi ada ta gəma i Pamfeli aye ada nəmaa ndisl a gəma i Mira ka dala i Lisiya.

<sup>6</sup> Nəmaa ndisl naha a dəma na, bəy i sidzew niye a huta kwalalanı i yam nakə a yaw abəra ma Aləgazandari aye. Ma diye ka dala i Itali. Nəmaa mbəzlaw abəra ma nənğed, nəmaa tsal a dəma. Tsa na, nəmaa ye kwayanğa.

<sup>7</sup> Nəmaa ndza ka tsəved məhəne haladzay. Nəmaa ye tsəfetsəfe, nəmaa ndisl a wuzlahgəma i Kinidus na, ta gər eye. Nəmaa sla faya mede deder sa bay, mətasl a ma may ha a diye i həlay i gula. Nəmaa ye tə həlay i gula i Kəret nəmaa ndislə bəse ta gəma i Salmone. Kəret na, malawara eye ta yam.

<sup>8</sup> Mede kame na, mawura bo eye haladzay. Tsa na, nəmaa ndisl a təv eye andaya tə zalay Təv Nğwalak Eye Hay neheye ndo hay tə lətsawa ha a dəma kwalalanı i yam hay aye, bəse ta wuzlahgəma i Lase.

<sup>9</sup> Nəmaa ndza ka tsəved haladzay. Ahəl i mede may nakə faya nəmaa diye na, pat i daliyam i Yahuda hay ka mbərəm mede abəra mə dəma. Hərwi kə ndisl ka kiye niye andza niye na, ndəray ma diye tə kwalalanı i yam sa bay. Ta bəriye kwalalanı i yam tay hay ka dəkəl hərwi mətasl nakə a gawa haladzay yam a tsalawa ka bo dənğwala aye. Ta həbiye ka təv eye niye haladzay bəna ta dədiye a yam. Ane tuk na, Pol a zəba ka ndo niye hay a satay mələtse bay, ta diye kame na, a gatay dəf.

<sup>10</sup> A gwadətay: «Dzam ga hay, na zəba faya na, mede kway nakay faya ka deyekweye tə kwalalanı i yam aye na, mədze andaya mə dəma. Kwalalanı i yam ta wu neheye mə dəma tebiye aye na, ta nasiye. Ada nəkway dərma na, ağəna ka təməkweye bay, ka dzəkweye.»

<sup>11</sup> Ahəl nakə tə həl bo, ndo məbəle kwalalanı i yam ta ndo i kwalalanı i yam, tə gwad: «Takwa ha ka bo kame.» Bəy i sidzew niye a tsəne bazlam i Pol nakə a tsik aye na, kwa ka təma bay. A təma na, i ndo neheye tə gwad «Takwa ha ka bo» aye.

<sup>12</sup> Ada sa na, təv niye məndze mə dəma a həlay i mətasl na, lele bay, hərwi mətasl a gawa haladzay. Hərwi niye matsəla ndo hay tebiye na, a satay mede kame. A satay tadə ma giye bo na, ta ndisliye a Fenikis təv məpe bo i kwalalanı i yam nakə ma Kəret aye. Bəlay andaya na, ta diye i məgəma dəkdek tsa. Ta ndziye mə dəma təmad.

### *Mətasl bagwar eye*

<sup>13</sup> Mətasl a dazlay a mavəzle farfar. Mətasl nakə a yaw ma diye i Salawa aye. Tə dzala mə gər tay na, ta sliye faya məndislə a təv nakə ta ndisliye a dəma aye. Tə lətse ha bəre eye andaya mə kwalalanı i yam. Ti ye bəse ta tsakay i gəma i Kəret.

<sup>14</sup> Ane tuk na, kwayanğa mətsal bagwar eye a vəzl haladzay. Mətasl niye tə zalay na, mətasl nakə a yaw ma bəzay i gəma aye.

<sup>15</sup> A zla na kwalalanı i yam. Tə dza bo ka məmay ahaya gər a kwalalanı i yam a diye i mətasl nakə a yaw aye na, tə sla faya bay. Nəmaa gər ha, mətasl mə ye may ha.

<sup>16</sup> Nəmaa ye ta diye i Salawa i gəma wuray tə zalay Koda ma wuzlah i yam. Nəmaa zəzukw bo tsekwen abəra ka mətasl. Andza niye, nəmaa bər na, kwalalanı nakə wawa eye ta gər eye, merəbe gwetsek hərwi mə dze bay.

<sup>17</sup> Tə zla ahaya kwalalanı i yam niye tsekwen eye tə pa na ka gər i kwalalanı i yam bagwar eye. Tsa na, ləber andaya maləva bo eye, ta ndewed ka kwalalanı i yam bagwar eye. Ta dzədzar haladzay hərwi hewiyen andaya bəse ka tsakay i Libiya, kwalalanı i yam ma ta ndəfiye faya sik. Ka ndəf faya sik na,

ma dziye a yam. Hərwi niye tə kal ha tənqel wuray məbara eye ka kwalalaŋ i yam hərwi ada kwalalaŋ i yam mâ nğərzla faya.

<sup>18</sup> Huya, mətasl niye na, kə gər ha mavəzle bay, faya ma bəliye may ha ta gədaŋ haladzay. Tədöe eye na, tə pa bo ka məkutse tay ha wu hay abəra mə kwalalaŋ i yam a bəlay.

<sup>19</sup> Tədöe eye sa na, tə kuts ha ləber, peteked nakə faya ma diye ha kwalalaŋ i yam. Tə kuts ahaya tə həlay tay eye.

<sup>20</sup> Məhəne haladzay nəmaa nğatay a pat bay, a wurzla bay. Mətasl faya ma vəzliye ta gədaŋ huya. Nəmaa təmiye na, nəmaa pa faya mədzal gər may sa bay.

<sup>21</sup> Ta nda wu mənday bay məhəne haladzay. Pol a lətse kame tay, a gwadatay: «Dzam ga hay, ka tsənumeŋ na bazlam ga, ada ka yakwaw abəra ma Kəret bay na, ka sakweye dəretsətseh bay, wu kway hay ta dziye bay.

<sup>22</sup> Ane tuk na, anəke na, faya na gwadəkumeye dərev mâ ye fakuma abəra bay. Ndəray kwa nəte ma mətiye bay. Kwalalaŋ i yam kway na, ma dziye.

<sup>23</sup> Ta həvad nakay, gawla i Mbəlom ga nakə faya na geye məsler aye, ki yaw ka təv ga.

<sup>24</sup> A gwedeŋ: “Pol, kâ dzədzar bay! Bəy i Roma ma gakeye sariya yak. Mbəlom ma təmiye tay ha ndo neheye faya ka deyumeye ka bo dziye hərwi yak.”

<sup>25</sup> Dzam ga hay, dərev mâ ye fakuma abəra bay. Na sər ha ta dedək wu nakə Mbəlom a tsikeŋ aye na, ma giye bo.

<sup>26</sup> Ka təmakweye na, a dala eye andaya malawara eye ta yam.»

<sup>27</sup> Məhəne kuro gər eye fađ, mətasl niye faya ma diye may ha huya ka gər i bəlay i Mediterane. Ta magər həvad na, ndo məbəle kwalalaŋ i yam, tə sər ha nəteye faya ta həndzədiye bəse ta dala.

<sup>28</sup> Tə kal bəre məbara eye ka ləber a yam mələve ha zəbol i yam. Ta zəba faya na, zəbol nğay eye miter 40. Ti ye kame tsekweŋ sa na, ta dazlay a mələve. Ta zəba faya kwetsetsik yam niye na, miter 30.

<sup>29</sup> Ta dzədzar haladzay, tə gwad kwalalaŋ i yam ka ndaf sik ka hotokom na, ka dzakweye. Hərwi niye tə həl ləber hay fađ, tə bar ka tənqel hay fađ, tə kal tay ha ta dəba. Tsa na, ta duwulay me a mbəlom tay hay hərwi ada dəre mâ tsada.

<sup>30</sup> Ndo məbəle kwalalaŋ hay a satay mətəmaw abəra mə kwalalaŋ i yam. Ta pəla tsəved ka məzla ha kwalalaŋ niye wawa eye a yam ada tə gwad na, ta pəliye ha tənqel hay, ane tuk ta raw me ka məhute gər i bazlam hərwi məzlaw abəra mə kwalalaŋ ada mətəme.

<sup>31</sup> Pol a gwaday a bagwar i sidzew i Roma ta sidzew hay: «Tadə ndo neheye ta ndza ma kwalalaŋ i yam bay na, ka slumeye faya mətəme bay.»

<sup>32</sup> Tsa na, sidzew hay ta tərəts ha ləber neheye tə bar ha kwalalaŋ i yam nakə wawa aye, tə gər ha a ye ka gər i yam.

<sup>33</sup> Mazlambar dəre ma tsadiye na, Pol a zalatay a ndo hay tebiye ka mənde wu mənday, a gwadatay: «Bəgom, kə ge məhəne kuro gər eye fađ, faya ka həbumeye ze mənde wu mənday.

<sup>34</sup> Neŋ faya na gwadəkumeye, ndayum wu mənday hərwi kwa way a say mətəme. Andza niye, ndəray kwa nəte mə walaŋ kurom ma dziye bay, kwa məkwets i gər nğay ma dziye bay.»

<sup>35</sup> Ma dəba i bazlam niye hay na, Pol a zla wu mənday, a gay naha sisəe a Mbəlom kame i ndo hay tebiye. Tsa na, a nğənatay wu mənday\* niye a dazlay a mənde wu mənday.

\* 27:35 Məsler hay 2.42.

<sup>36</sup> Nəteye tebiye tə ma ha a bo dərev, tə nda wu mənday.

<sup>37</sup> Nəmay tebiye mə kwalalaŋ i yam na, temerre sulo tə kuro kuro tasəla gər eye məkwa.

<sup>38</sup> Ahəl nakə kwa way a nda wu mənday ka mərehe aye na, tə kuts ha siye i wu mənday a yam hərwi kwalalaŋ mâ mba ka gər i yam sa bay.

### *Kwalalaŋ i yam a hə6*

<sup>39</sup> Dəre a tsada na, ndo madzərweđe kwalalaŋ i yam ta sər ha nəteye ka waray bay. Ane tuk na, tə ŋgatay a təv laloŋ eye ta hewiyen eye. Tə gwad: «Tadə ma giye bo na, takwa ha a dəma, kwalalaŋ i yam mâ gərzla a dəma.»

<sup>40</sup> Tə pəla ha ləber neheye tə bar ka bəre mə huđ i yam aye. Tə gər ha bəre niye a yam. Ti ye naha tə pəla ləber neheye mazəva eye ka mayako nakə a may bo a kwalalaŋ i yam ka mədəy ha tsəved aye. Tə bar peteked ka mbəlom kame ŋgay eye ada mətasl mâ təhay lele. Ahəl nakə faya ta diye na, mətasl a təhatay ta gədan, a ye tay ha ka hewiyen niye.

<sup>41</sup> Ane tuk na, tə ndisl na, kwalalaŋ i yam a husa dənuts ka hewiyen. Kwalalaŋ i yam a sla faya məbəle sa bay. Me ŋgay eye a ye mbəzək a hewiyen, a sla faya madayaw abəra mə dəma sa bay. Tsa na, yam nakə a tsal ka bo aye, a bəl haladzay a hə6 ha dəba i kwalalaŋ niye.

<sup>42</sup> A satay həbe a sidzew hay məkədə ndo i danğay hay hərwi ada ndəray mâ təma ha bo tə mahuzluve bay.

<sup>43</sup> Ane tuk na, a say a bəy i sidzew i Roma mətəme ha Pol. A gatay me a sidzew hay ka məge wu nakə tə dzala aye. A gwađatay a ndo neheye tə sər mahuzluve aye, tâ lah mambəzle a yam ada tâ tas ka dala.

<sup>44</sup> A gwađatay a siye hay, tâ gəs həlay ka mayako kəgəbay ka wu neheye a həbaw abəra ka kwalalaŋ i yam aye, tâ patay bəzay. Kwa way a təmaw abəra ma bəlay na, andza nakay.

## 28

### *Pol ka dala nakə tə zalay Malta*

<sup>1</sup> Nəmaa təmaw abəra ma yam niye na, nəmaa tsal ka dəkəl na, nəmaa tsəne məzele i dala niye malawara eye ta yam. Tə zalay Malta.

<sup>2</sup> Ndo neheye mə dəma aye ta təma may lele. Ma dəba eye na, yam a pa, mətasl a ge tsiyiəbe haladzay. Tsa na, tə vat ako əŋgəh. Tə gwađamay: «Dumara, ndzum ka ako.»

<sup>3</sup> Pol a ye, a həlaw mayako, a pa ka ako. Azlakwa ma mayako niye na, palas mə dəma. Ako a vədəy na, a mbərzlaw abəra ma ako tsakwalak ka həlay i Pol, a naz na.

<sup>4</sup> Ndo i dala niye hay tə ŋgatay a palas niye məbala eye ka həlay i Pol aye na, tə gwad mə walaŋ tay: «Ndo nakay na, ta dedek ndo məkədə ndo hay. Kə təmaw abəra ma bəlay, ane tuk na, ma təmiye abəra ka sariya i Mbəlom bay.»

<sup>5</sup> Pol a gwatsaka ha palas niye abəra ka həlay a ako. Kwa tsekwen wurray kə wur faya bay tebiye.

<sup>6</sup> Ndo hay tə dzala na, həlay i Pol ma dəsliye kəgəbay ma dədiye abəra ka mbəlom, ma mətiye. Ta həba məndze haladzay na, wurray a gay a Pol bay. Tsa na, ta mbədə ha mədza gər tay, tə gwad: «Ndo nakay na, mbəlom!»

<sup>7</sup> Bagwar tay eye andaya ka dala eye niye, məzele ŋgay Publiyus. Gay ŋgay ta guvah ŋgay andaya bəse ta təv nakə nəmay mə dəma aye. Ndo niye a təma may tə məŋgwese eye a gay ŋgay. Nəmaa həna mə gay ŋgay məhəne mahkar.

<sup>8</sup> Bəba i Publiyus andaya, neŋgeye ŋgwalak eye bay, maraḅaraḅ ada zay a lohay. Pol a ye ka təv ŋgay, a pay həlay ka gər ada a dıwulay me a Mbəlom. Tsa na, a mbəl.

<sup>9</sup> Ndo i dāvats neheye ka dala niye tə tsəne na, ti ye ka təv i Pol. Pol a mbəl tay ha.

<sup>10</sup> Ndo hay tebiye tə bəzamay ha ta dedek ta rəhamay ha gər. Ahəl nakə nəmaa diye may aye na, tə vəlamay wu neheye ta gamay ŋgama ka tsəved aye.

### *Pol a ndisl a Roma*

<sup>11</sup> Nəmaa ndza mə dəma kiye mahkar na, nəmaa həl bo, nəmaa ye tə kwalalanj i yam nakə a yaw əbəra ka dala i Aləgəzəndəri aye. Məzele i kwalalanj i yam niye na, Diyoskur. Kwalalanj i yam nakay kə ndza kiye haladzay hərwi həlay niye həlay nakə ŋgwalak eye bay mətasl a gawa haladzay aye.

<sup>12</sup> Nəmaa ndisl a gəma i Sirakus na, nəmaa ndza mə dəma məhəne mahkar.

<sup>13</sup> Nəmaa lətse əbəra mə dəma, nəmaa ye ta tsakay i dəlov, nəmaa ye a gəma i Regiyo. Tədœ eye na, nəmaa həl bo, nəmaa ndisl a gəma i Pozoles. Nəmaa ndza ka tsəved na, məhəne sulo tsa, mətasl a təhamay.

<sup>14</sup> Ma gəma niye na, nəmaa ndzay a gər a ndo məpe mədzal gər hay ka Yesu. Tə zalamay, nəmaā ndza mə gay tay luma nəte. Ada nəmaa ye a Roma na, andza nakay.

<sup>15</sup> Malamar neheye ma Roma aye tə tsəne faya nəmaa diye naha na, ti yaw mədze gər tə nəmay. Ti ye hus a luma i Appiyus ada a təv nakə tə zalay Gay i Mbəlök Mahkar aye. Pol a ŋgatatay na, a gay sisœ a Mbəlom ada dərev a may naha.

<sup>16</sup> Nəmaa ndisl naha a Roma na, tə vəlay tsəved a Pol mâ ndza mə gay ŋgay wal tə sidzew nakə ma tsəpiye na aye.

### *Pol a da ha bazlam i Mbəlom*

<sup>17</sup> Ma dəba i məhəne mahkar na, Pol a zalatay a madugula i Yahuda neheye ma Roma aye t̄a ye ka təv ŋgay. Ti ye, tə haya gər ka təv ŋgay na, a gwadatay: «Malamar ga hay, tə gəs ga ma Zərozelem, tə vəlatay ga ha a həlay a Roma hay. Tə gəs ga na, na tsik wuray nakə ŋgwalak eye bay aye ka slala kway kəgəbay ka bazlam i bəba tətə kway hay mapala eye, na tsik faya wuray bay.

<sup>18</sup> Ndo neheye ti ye ga ha ka təv tay aye ta tsətsah fagaya bazlam na, a satay həbe məgər ga ha. Hərwi ta huta fagaya mənese nakə da məkədə ga faya aye bay.

<sup>19</sup> Ane tuk na, a satay a bəy i Yahuda hay bay. Hərwi niye, na gwad kutoŋ na diye ka təv i bəy i Roma. Neŋgeye ma geŋeye na sariya ga. Wal a seŋ məme tay ha mənese a gwala ga hay bay.

<sup>20</sup> Hərwi niye na zalakum na, a seŋ məŋgatakum ada mətsike me tə nəkurom. Ka sərum ha neŋ madzawa eye tə tsalalaw na, hərwi wu nakə İsrayel hay tə pa faya mədzal gər aye.»

<sup>21</sup> Madugula i Yahuda hay ta mbədəy faya, tə gwaday: «Nəmaa huta dərəwel nakə a yaw ma Yahuda a tsik ka nəkar aye bay. Ndəray nəte mə walaŋ i malamar kway hay ki yaw, kə tsikamay labara i wuray kəgəbay wu nakə ŋgwalak eye bay aye ka nəkar bay.

<sup>22</sup> Ane tuk na, a samay na, bo yak eye dāmay ha wu nakə ka dzala aye. Andza niye, nəmaa sər ha ndo hay kwa məŋgay andaya faya ta tsikiye wu nakə ŋgwalak eye bay aye ka ndo i Yesu neheye.»

<sup>23</sup> Madugula i Yahuda hay tə pay pat nakə ta dziye gər tə Pol aye, pat eye niye ta maweye a gay ŋgay. Pat eye a slaw na, ndo hay haladzay ti ye a gay

ηgay. Pol a ndza hway ka mədatay ha Bəy i Mbəlom ta gədan̄ ada a pəla tsəved tā təma bazlam nakə ma tsikateye ka gər i Yesu aye mə dərewel i Musa ada mə dərewel i ndo məde ha bazlam i Mbəlom hay.

<sup>24</sup> Siye i ndo hay na, ta təma bazlam i Pol nakə a tsik aye, ane tuk na, ndo mekeləŋ eye ta kərah mədzal ha.

<sup>25</sup> Ta kəf wuway haladzay mə walaŋ tay. A həlay nakə ta diye na, Pol a tsikatay bazlam nəte tsa, a gwadatay: «Wu nakə Məsəfəre Tsədan̄ŋa eye a tsikatay a bəba tətə kurom hay tə bazlam i Ezay ndo məde ha bazlam i Mbəlom aye na, dedək.

<sup>26</sup> Mbəlom a gwad:

“Do zəbaw ka ndo neheye ada gwadatay:

Ka tsənumeye lele,

ane tuk na, ka sərume ye bay.

Ka zəbumeye faya lele,

ane tuk na, ka ηgatume ye bay.

<sup>27</sup> Ndo neheye ta kula ha gər, a satay mətsəne bay.

Ta dərəzl na zləm,

ta dərəzl na dərə tay.

A satay mən̄gatay tə dərə tay bay,

a satay mətsəne tə zləm tay bay,

a satay məsəre tə gər tay bay.

A satay məmaw ka təv ga bay.

Hərwi niye, na mbəliye tay ha bay.\*»

<sup>28</sup> Pol a gwadatay sa: «Sərūm ha na, Mbəlom a sləraw Labara N̄gwalak eye i mətəme ha ndo neheye Yahuda hay bay aye. Nəte ye na, ta tsəniye na bazlam ηgay.»

[<sup>29</sup> Ma dəba i bazlam neheye na, Yahuda hay ti ye wu tay. Ahəl nakə faya ta diye na, faya ta kədiye wuway mə walaŋ tay.]

<sup>30</sup> Pol a ndza məve sulo mə gay nakə a vələwa faya suloy aye. A təmawa tay ha ndo neheye ti yawa ka təv ηgay aye tebiye.

<sup>31</sup> A dā ha labara i Bəy i Mbəlom ada a dā ha bazlam i Bəy Maduweŋ Yesu Kəriste a ndo hay. A tsikatay ta gədan̄ tə tsəb̄tsəb̄ eye, ndəray kə gay faya me bay.

\* 28:27 Ezay 6.9-10.

## Derewel nakə Pol a watsatay naha a Roma hay aye Məfələkwe

Ahəl nakə Pol a watsatay naha a ndo məpe mədzal gər hay ka Yesu ma Roma aye na, a ndəv ha mamahkar i mahəhele ngay. A say mede hus a Roma, təv nakə ki ye a dəma zuk bay aye. A say mede dərən a mægəma hus a Espayon hərwi məde ha Labara Ngwalak eye i Yesu (15.22-24). A watsa derewel ngay hərwi mələve ha bo tə mede ngay a Roma ada ta məde ha matətike ngay a ndo məpe mədzal gər neheye ma wuzlahgəma aye.

Derewel nakay na, gər i bazlam hay tebiye matsətsala eye ta labara i Pol nakə ma diye ha aye. Gər a gər i bazlam eye na, ananj: «Ndo nakə kə dzala ha ka Mbəlom aye na, Mbəlom ma təriye ha ngwalak eye ka dərə ngay, ada ma hutkiye sifa» (1.17).

Pol a səkah ha labara nakay ta tsəved wal wal mahkar:

Madədo 1 ka 8 faya ma tsikiye ka mədzepe mə walaŋ i marəhay ha gər a bazlam mapala eye ada məpe mədzal gər ka Mbəlom nakə Yesu Kəriste a tərə tsəved eye mawura bə eye bay.

Madədo 9 ka 11 a tsik ka mədzepe mə walaŋ i Israyel hay slala nakə Mbəlom a zla aye, ada ndo məpe mədzal gər hay ka Yesu.

Madədo 12 ka 15 faya ma tsikiye ka pendzeŋ i məndze mə walaŋ i məhay gər i ndo məpe mədzal gər hay ka Yesu Kəriste.

Derewel nakay a ndəv ta mətsike me haladzay (madədo 16).

<sup>1</sup> Maa watsa derewel nakay na, neŋ Pol, ndo mäge məsler i Yesu Kəriste. Mbəlom a zelen, a tərə ga ha ndo i maslaŋ ngay, a zla ga, a pa ga wal hərwi ada nā dā ha labara ngay ngwalak eye a ndo hay.

<sup>2</sup> Labara nakay ngwalak eye na, bə Mbəlom kə tsik ahəl niye kurre tə bazlam i ndo məde ha bazlam ngay hay, a gwad ma slərakwaweye ada ta watsa faya mə Derewel i Mbəlom.

<sup>3</sup> Labara nakay ngwalak eye a tsik na, ka wawa ngay, ahəl nakə a tərə ndo zezen, tə wa na ma gwala i Davit aye.

<sup>4</sup> Ahəl nakə a lətsew əbəra ma mədahaŋ aye na, Mbəlom a dā ha neŋgeye wawa ngay ta gədaŋ, neŋgeye Yesu Kəriste Bəy Maduweŋ kway ada a rah ta gədaŋ i Məsəfəre Tsədəŋŋa eye tebiye.

<sup>5</sup> Mbəlom a pa ga ndo i maslaŋ ngay na, tə həlay i Yesu Kəriste. A ge andza niye na, ta ngwalak ngay hərwi ada nā ye, nā dā ha bazlam ngay a ndo i gəma hay wal wal tebiye hərwi ada tā tərə ndo ngay hay ada tā rəhay ha gər. Andza niye, tā dəslay ha gər a məzele i Yesu Kəriste.

<sup>6</sup> Nəkurom ndo i Roma hay, nəkurom mə walaŋ i ndo neheye dərmaŋ, hərwi Mbəlom kə zalakum hərwi ada kə pumay bəzay a Yesu Kəriste.

<sup>7</sup> Na watsa naha derewel nakay na, a nəkurom neheye ma Roma aye tebiye. Mbəlom a wudā kurom haladzay. A zalakum na, hərwi ada kə tərūm ndo ngay hay.

Mbəlom Bəba kway ada Bəy Maduweŋ kway Yesu Kəriste tā pa fakuma ŋgama ada tā vələkum zay.

*A say a Pol mede a Roma*



<sup>8</sup> Makurre eye na, neŋ faya na gay naha sisœ a Mbəlom ga hərwi kurom tebiye. Maa vələŋ tsəved məgay naha sisœ na, Yesu Kəriste hərwi məpe mədzal gər kurom nakə ka dzalum ha ka Yesu Kəriste aye na, kə də a zləm ka mändzibəra tebiye.

<sup>9</sup> Huya ahal nakə faya na dūwulaway naha me a Mbəlom aye na, na dūwulaway naha me hərwi kurom. Wu nakə na tsik aye na, Mbəlom a sər ha na tsik dedek, neŋgeye nakə faya na giye məsler ŋgay tə dərev ga peteh, faya na diye ha Labara Ŋgwalak eye ka wawa ŋgay aye.

<sup>10</sup> Faya na dūwulay naha me huya m̄a vələŋ tsəved anəke ta gədan ŋgay hərwi ada n̄a ye naha a gay kurom tuk.

<sup>11</sup> Hərwi a seŋ haladzay məŋgatakum. A seŋ mədakum ha wu nakə Məsəfəre a vələŋ aye hərwi ada k̄a hutum gədan ka tsəved i Mbəlom.

<sup>12</sup> Kəgəbay nəkway tebiye ka vəlakweye a bo gədan nəte nəte mə walaŋ kway. Ka vəlumeneye gədan hərwi ka pum mədzal gər ka Kəriste ada na vəlakumeye gədan hərwi na pa mədzal gər ka Yesu dərmak.

<sup>13</sup> Malamar ga hay, sər um ha na, madzəga haladzay na dzala mede naha a gay kurom. Ane tuk na, hus anəke na huta tsəved bay. A seŋ na diye naha madzəne kurom mede kame kame ada k̄a gəlum andza faya na giye ta ndo neheye ma gəma siye hay aye.

<sup>14</sup> Mbəlom kə vələŋ məsler. Andza niye, kutoŋ na diye ha Labara Ŋgwalak eye kwa a way tebiye. Na dateye ha a ndo neheye ma wuzlahgəma aye ada a ndo neheye ma wuzlahgəma bay aye, na dateye ha a ndo neheye tə sər wu aye ada a ndo neheye tə sər wu bay aye.

<sup>15</sup> Hərwi niye a yeŋ a gər mede naha m̄əde ha Labara Ŋgwalak eye a nəkurom Roma hay tebiye dərmak.

<sup>16</sup> Hərwi neŋ faya na diye ha Labara Ŋgwalak eye ta məŋgese lele. Labara nakay na, gədan i Mbəlom mə dəma mətəme tay ha ndo neheye tə dzala ha ka Yesu Kəriste aye. A vəl tsəved i mətəme na, hərwi Yahuda hay təday ada hərwi slala mekeləŋ eye hay dərmak.

<sup>17</sup> Labara nakay ŋgwalak eye a dəkway ha na, ma kəkay nakə Mbəlom a təra ha ndo hay ŋgwalak eye ka dəre ŋgay aye. Ndo hay ta dzala ha ka Yesu Kəriste dəkdek tsa, tsəved mekeləŋ eye andaya bay. Andza nakə tə watsa mə Derewel i Mbəlom aye, tə gwad: «Ndo nakə kə dzala ha ka Mbəlom aye na, Mbəlom mə təriye ha ŋgwalak eye ka dəre ŋgay, ada ma hutiyə sifa.\*»

### *Kwa way mezeleme eye*

<sup>18</sup> Andza niye, Mbəlom faya ma də ahaya abəra mə mbəlom, neŋgeye ta mevel eye ka ndo neheye tebiye faya ta giye mezeleme ada tə dəslay ha gər bay aye. Ma gateye sariya hərwi wu tay neheye lele bay faya ta giye aye, ma dərəzlatay na tsəved a ndo hay ka məsəre dedek.

<sup>19</sup> Sariya mə gəsiye tay ha hərwi tsəved nakə ta sliye faya məsəre Mbəlom aye na, parakka mangaha eye bay, bo i Mbəlom eye kə dātay ha. Ane tuk na, ta pay bəzay a tsəved eye nakay bay.

<sup>20</sup> Ndəray kə ŋgatay a Mbəlom kwa nəte bay. Ane tuk na, kwa a həlay nakə a ge mändzibəra aye hus anəke na, wu neheye a ge tebiye faya ta dateye ha a ndo hay Mbəlom neŋgeye na, kəkay. Ta ŋgatay a wu neheye na, a sər bo parakka gədan ŋgay ma ndəviye dadə bay ada Mbəlom na, neŋgeye nəte ŋgweŋ. Ta sliye faya məgwede «Nəmaa sər bay» na, ta sliye faya mətsike bay.

<sup>21</sup> Kwa tadə tə sər Mbəlom andaya bəbay na, tə dəslay ha gər bay ada tə gay sisœ andza nakə həbē ta dəslay ha gər ada ta geye sisœ aye na, ta ge andza

\* 1:17 Habakuk 2.4.

niye bay. Faya ta dzaliye d̄uh na, ka wu nak̄a k̄ariye, n̄ateye mandza eye ma l̄avon̄, t̄a s̄ar wu lele eye hay sa bay.

<sup>22</sup> T̄a dzala m̄a ḡar tay na, ta tsah. Duh ḡar a vuwatay na, t̄a s̄ar bay.

<sup>23</sup> Mb̄alom nak̄a ta m̄azlaḅ eye ada ma m̄atiye d̄ada bay aye na, t̄a r̄ahay ha ḡar bay, t̄a ḡar ha. Duh ta r̄ahay ha ḡar na, a kule hay, a wu neheye t̄a ṅgar andza ndo zezen aye kwa tad̄a ndo hay ta m̄atiye. Siye hay andza d̄iyen̄ hay, siye hay andza wu i pesl hay, meken̄en̄ eye hay sa andza wu neheye t̄a va ta hud̄ aye.

<sup>24</sup> H̄arwi niye Mb̄alom a ḡar tay ha h̄arwi ada t̄a ge wu neheye lele bay aye andza nak̄a a yatay a ḡar m̄age haladzay aye. Andza niye faya ta giye wu neheye a ge horoy aye n̄ate n̄ate m̄a walan̄ tay.

<sup>25</sup> Ta ḡar ha Mb̄alom nak̄a dedek eye, t̄a pay b̄azay a maraw me. I tay na, faya ta d̄aslay ha ḡar a Mb̄alom nak̄a a ge wu hay tebiye aye bay, faya ta d̄aslay ha ḡar a wu neheye nen̄geye a ge aye ada ta geye m̄asler. H̄abe ta d̄aslay ha ḡar d̄uh na, a Mb̄alom, nen̄geye nak̄a h̄abe ta zambadeye huya aye. M̄a ge bo andza niye.

<sup>26</sup> H̄arwi niye Mb̄alom a ḡar tay ha h̄arwi ada t̄a ge wu neheye a ge horoy andza nak̄a a yatay a ḡar m̄age haladzay aye. ṅgwas hay ta ḡar ha m̄andze ta hasl̄aka hay, t̄a h̄anawa t̄a siye i ṅgwas hay. Niye na, wu nak̄a a yay a ḡar a Mb̄alom bay aye.

<sup>27</sup> Hasl̄aka hay d̄armak faya ta giye andza niye, t̄a ḡar ha ṅgwas hay, a yatay a ḡar haladzay m̄ah̄ane ta hasl̄aka siye hay. Hasl̄aka hay ta hasl̄aka hay faya ta giye wu neheye a ge horoy aye. Faya ta vahiyeye ka bo tay d̄arets̄atseh d̄a ka m̄anese tay nak̄a faya ta giye.

<sup>28</sup> Ndo neheye ta k̄arah Mb̄alom aye na, a satay m̄as̄ere na bay. Andza niye, Mb̄alom a ḡar tay ha h̄arwi ada t̄a dzala andza nak̄a a ye ka bo aye sa bay. Ta dzala swa. Andza niye ta giye wu neheye h̄abe m̄age bay aye.

<sup>29</sup> N̄ateye maraha eye t̄a wu neheye ṅgwalak eye bay aye, t̄a gawa d̄are ka wu i ndo hay, ta dz̄agurawa me ka ndo hay, t̄a gawa d̄are a ndo hay, t̄a k̄ad̄awa ndo hay, t̄a gawa magazl̄aga m̄a walan̄ tay, t̄a vawatay ḡar a ndo hay ta b̄ab̄arek, t̄a gawa sewed̄ a ndo hay, ta ṅḡelawatay b̄azay a siye i ndo hay.

<sup>30</sup> N̄ateye t̄a tsikawa wu neheye ṅgwalak eye bay aye ka ndo hay, n̄ateye t̄a naway d̄are a Mb̄alom, t̄a tsad̄awatay a siye i ndo hay, t̄a d̄aslaway ha ḡar a bo, t̄a gawa zlapay. N̄ateye pat pat t̄a dzalawa ts̄aved̄ wed̄eye hay ka m̄age mezeleme, ta r̄ahawatay ha ḡar a b̄aba tay ta may tay hay bay.

<sup>31</sup> Wu nak̄a ṅgwalak eye na, t̄a s̄ar sa bay, d̄arneh m̄a bazlam tay sulo, t̄a s̄ar mawud̄e ndo hay bay, ta sakateye naha a ndo hay bay.

<sup>32</sup> Duh n̄ateye na, t̄a s̄ar bazlam i Mb̄alom mapala eye. Bazlam i Mb̄alom mapala eye a gwad̄: Ndo neheye faya ta giye slala i wu neheye ṅgwalak eye bay aye huya na, ta vahaweeye ka bo m̄adahan̄ ka ḡar tay. Kwa andza niye b̄abay na, huya faya ta giye wu neheye ṅgwalak eye bay aye. Sa tsa na, faya ta giye wu naka a ze neheye aye. N̄ateye faya ta zambadat̄eye a ndo neheye faya ta giye wu neheye ṅgwalak eye bay andza n̄ateye aye. Faya ta v̄olateye ḡad̄an̄ ka m̄age huya!

## 2

### *Mb̄alom ma giye sariya ṅgay ta ts̄aved̄ eye*

<sup>1</sup> Ndo naka a gwad̄ n̄akar ndo m̄amay ha m̄anese a ndo hay aye, n̄akar eye na, way? S̄ar ha n̄akar eye ka t̄amiye ab̄era ka sariya i Mb̄alom bay. Tad̄a faya ka matay ha m̄anese a ndo hay na, bo yak eye faya ka may ha m̄anese a ḡar

yak, hārwi wu neheye ɲgwalak eye bay faya ta giye na, nəkar faya ka giye andza nətəye.

<sup>2</sup> Nəkway ka sarakwa ha Mbəlom ma gəsiye tay ha a sariya ndo neheye faya ta giye wu neheye ɲgwalak eye bay aye ada sariya ɲgay na, ta dedək.

<sup>3</sup> Nəkar nakə faya ka matay ha mənese a ndo hay hārwi wu neheye ɲgwalak eye bay faya ta giye ada bo yak eye faya ka giye andza nətəye na, ka gwad na, ka təmiye abəra ka sariya i Mbəlom wal daw?

<sup>4</sup> Mbəlom nənɲeɲe ɲgwalak eye, faya ma zliye ɲgatay, a sər mahəbe. Faya ka ɲgwaseye dala mə gər a Mbəlom tsukudu? A səmay naha a mezeleme yak na, hārwi məvəlaka tsəved ka məgərə ha mezeleme yak na, ka sər təbədew?

<sup>5</sup> Nəkar na, faya ka kuliye ha gər yak, ka kərah mambədə ha dərev yak. Andza niye bo yak eye tə gər yak faya ka vahaweye ka bo sariya i Mbəlom. Sariya ma gəsiye kar pat nakə Mbəlom ma diye ha, kə ge mevel ka ndo hay ada ma gateye sariya a ndo hay tebiye ta lele eye.

<sup>6</sup> «Kwa a way ma vəleye wu i merəbe ɲgay.\*»

<sup>7</sup> Zəba, ndo neheye faya ta paliye mäge ɲgwalak aye na, a satay Mbəlom mā zambadatay, a satay Mbəlom mā tsik fataya wu ɲgwalak eye, a satay Mbəlom mā vəlataɲ sifa nakə ma ndəviye bay aye. Mbəlom ma vəliye sifa nakə ma ndəviye bay aye na, a nətəye.

<sup>8</sup> Ane tuk na, siye i ndo hay na, ta rəhay gər a Mbəlom bay, a satay məpay bəzay a tsəved dedək eye bay, tə pay bəzay duh na, a wu nakə ɲgwalak eye bay aye. Nətəye na, Mbəlom ma giye fataya mevel, ma gateye dəretsətseh.

<sup>9</sup> Ndo neheye tebiye tə gawa mənese aye na, ta siye dəretsətseh, Mbəlom ma gateye dəretsətseh haladzay. Ma lahiye məgatay dəretsətseh na, a Yahuda hay təday ada ma dəba eye a slala i ndo siye hay dərmak.

<sup>10</sup> Ane tuk na, ndo neheye tebiye faya ta giye ɲgwalak eye na, Mbəlom ma vəlataɲ məzlaḅ, ma tsikiye fataya wu ɲgwalak eye, ma vəlataɲ zay. Ma vəlataɲ a ndo neheye tebiye, ane tuk na, ma lahiye ha na, a Yahuda hay təday ada ma dəba eye a slala i ndo siye hay dərmak.

<sup>11</sup> Andza niye Mbəlom na, a ɲgəna tay ha ka bo abəra ndo hay bay.

<sup>12</sup> Ndo neheye Yahuda hay bay aye, nətəye neheye tə sər bazlam i Musa mapala eye bay aye, faya ta giye mənese kəriye tsa. Ta mətiye kəriye andza niye tsa dərmak ze bazlam i Musa mapala eye. Yahuda hay, nətəye na, tə sər bazlam i Musa mapala eye. Ndo neheye faya ta nasiye ha bazlam i Musa mapala eye na, Mbəlom ma gateye sariya tə bazlam i Musa mapala eye.

<sup>13</sup> Mbəlom ma təriye ha ndo hay ɲgwalak eye hay kame ɲgay na, hārwi nakə faya ta pay zləm a bazlam i Musa dəkdek aye tsa bay. Ane tuk na, ma təriye tay ha ɲgwalak eye hay kame ɲgay na, ndo neheye faya ta rəhay ha gər a wu nakə bazlam i Musa mapala eye a tsik aye.

<sup>14</sup> Hārwi ndo neheye nətəye Yahuda hay bay aye na, tə sər bazlam i Musa mapala eye bay. Azlakwa bay, siye hay tə gawa tə gər tay wu nakə bazlam mapala eye a tsik aye. Faya ta giye andza niye kwa taday tə sər bazlam i Musa mapala eye bay bəbay na, faya ta diye ha, tə sər mäge wu ɲgwalak eye hay.

<sup>15</sup> Ahəl nakə faya ta giye andza niye na, faya ta diye ha na, Mbəlom kə watsa ada kə patay na bazlam i Musa mapala eye a dərev tay hārwi ta giye wu waray na, ta sər ha. Mədzal gər tay faya ta diye ha andza niye dərmak. Pat mekeleɲ eye hay na, tə sərawa ta ge wu ɲgwalak eye. A həlay mekeleɲ eye na, tə sər ta ge mənese.

\* 2:6 Zəba mə Dəmes hay 62.13; Dzeke hay 24.12.

<sup>16</sup> Wu neheye na tsik faya kanan aye na, ta zəbiye parakka pat nakə Mbəlom ma gateye sariya a ndo hay tə həlay i Yesu Kəriste. Ma giye sariya a ndo hay hərwi wu neheye maŋgaha eye mə dərev tay aye. Wu nakə na tsik kanan aye na, Labara Ņgwalak eye nakə faya na diye ha aye.

*Yahuda hay ta rəhay gər a bazlam mapala eye bay*

<sup>17</sup> Nəkurom Yahuda hay, ka sərūm nəkurom Yahuda hay, ka dzalum na, kwa mey faya ma diye lele hərwi nakə ka sərūm bazlam i Musa mapala eye, faya ka gumeye zlapay, tə məgwədə ka sərūm Mbəlom.

<sup>18</sup> Ka sərūm wu nakə a say a Mbəlom ndo hay tā ge aye, bazlam i Musa mapala eye kə dākum ha wu nakə űgwalak eye ta wu nakə űgwalak eye bay aye.

<sup>19</sup> Ka dzalum na, dəre andaya fakuma ba! Faya ka dumatəye ha tsəved a guluf hay. Ka dzalum na, nəkurom ka tərūm andza dzaydzay hərwi ndo neheye nəteye ma ləvon aye hərwi ada tā űgatay a dəre.

<sup>20</sup> Nəkurom ka dzalum na, ka dumatay ha wu a ndo neheye tə sər wuray bay bədaŋ? Ka dzalum sa na, faya ka tətikumateye a ndo neheye ta gəl ka tsəved i Mbəlom zuk bay aye. Ka dzalum andza niye na, hərwi nakə ka sərūm bazlam i Mbəlom mapala eye ba? Ka gwadum na, bazlam mapala eye kə dākum ha dedek hərwi ada kə sərūm.

<sup>21</sup> Faya ka tətikumateye wu hay a ndo hay, bo kurom eye ka tətikumay a gər kurom bay na, hərwi mey? Faya ka tsikumateye a ndo hay «Kā kəlum bay», bo kurom eye faya ka kəlumeye na, sa kəkay?

<sup>22</sup> Nəkurom faya ka gumateye me a ndo hay ka mäge madama, bo kurom eye faya ka gumeye! Faya ka gwadumatəye a ndo hay «Kā gum kule bay». Ada faya ka kəlumeye wu neheye ndo hay tə vələy a kule aye na, ma kəkay?

<sup>23</sup> Faya ka zlapumeye haladzay hərwi nakə ka sərūm bazlam i Mbəlom mapala eye aye, ane tuk na, faya ka nasumeye ha bazlam i Mbəlom mapala eye ada ndo hay ta tsikiye wu nakə űgwalak eye bay aye ka Mbəlom hərwi kurom sa na, ma kəkay?

<sup>24</sup> Andza nakə mawatsa eye mə Derewel i Mbəlom, a gwad: «Ndo neheye Yahuda hay bay aye faya ta tsaleye ka gər a Mbəlom hərwi kurom Yahuda hay.†»

<sup>25</sup> Nəkway Yahuda hay faya ka dəsakweye bo hərwi mədə ha na, nəkway ndo i Mbəlom hay. Faya na gwadiye: Tadə faya ka pumay bəzay a bazlam i Musa mapala eye lele na, mədəse bo nakə faya ka dəsəməye na, ma dzəniye kurom. Ane tuk na, tadə faya ka pumay bəzay a bazlam i Musa mapala eye bay na, mədəse bo nakə faya ka dəsəməye na, andza faya ka dəsəməye bay, ma dzəniye kurom sa bay.

<sup>26</sup> Tadə ndo neheye nəteye Yahuda hay bay aye tə dəs bo təbey, faya ta pay bəzay a bazlam i Musa mapala eye na, nəteye ka dəre i Mbəlom na, andza nəteye mədəsa bo eye.

<sup>27</sup> Nəkurom Yahuda hay, ta vələkum bazlam mapala eye a həlay. Ane tuk na, ka rəhumay ha gər bay ada ka gum mədəse bo. Ndo neheye nəteye Yahuda hay bay aye, kwa tadə nəteye mədəsa bo eye bay bəbay, ta pay bəzay a bazlam mapala eye na, ta gəsiye kurom a sariya.

<sup>28</sup> Yahuda nakə dedek eye na, way? Ndo nakə a dā ha neűgeye Yahuda hay tə slo i bo dəkdek aye dāw? A'ay! Mədəse bo dedek eye na, wuye mey tuk? Mədəse bo nakə ndo hay ta űgateye tə dəre aye dəkdek tsa bay.

† 2:24 Ezay 52.5.

<sup>29</sup> Duh Yahuda dedek eye na, ndo nakə Mbəlom ka mbəday ha dərev ŋgay aye. Mədəse bo dedek eye na, nakə Məsəfəre i Mbəlom faya ma giye mə dərev i ndo aye, bəna məsler i bazlam mapala eye andaya mə dəma bay. Slala i ndo nakay, maa zambaday na, Mbəlom bəna ndo hay bay.

### 3

<sup>1</sup> Kə ge andza niye na, ndo nakə Yahuda aye na, a ze ndo nakə Yahuda bay aye na, tə mey? Tadə ndoweye kə dəs bo na, ŋgama eye mə dəma na, mey?

<sup>2</sup> Faya na gwadakumeye: «Ma giye ŋgama haladzay ta tsəved mekeləŋ eye hay wal wal.» Mbəlom a vəl bazlam ŋgay na, a Yahuda hay təday.

<sup>3</sup> Ane tuk na, tadə siye i Yahuda hay ta kula ha gər tay na, niye na, ma sliye məgay me a Mbəlom ka mäge wu nakə a tsik aye daw?

<sup>4</sup> A'ay, andza niye bay tebiye, kwa tadə ndo hay tebiye maraw me eye hay na, Mbəlom ma giye wu nakə a tsik aye huya. Andza nakə tə watsa a Derewel i Mbəlom aye, tə gwad:

«Nəkar Mbəlom, ka tsik me na, ndo hay tebiye tə sər ha ka tsik na, dedek.

Tadə ta maka ha mənese na, ndəray ma sliye məgəse kar a sariya bay.\*»

<sup>5</sup> Agəla siye hay ta gwadiye, mənese nakə faya ka gakweye ma dzəniye tay ha ndo hay ka məsərə ha Mbəlom na, neŋgeye a ge mənese bay. Wu nakə ka mbədəkwateye faya na, wuye mey? Kə ge andza niye na, ka gwadakweye Mbəlom faya ma giye mənese bəna faya ma sakweye dəretsətseh bədaw? Wu nakə na tsik aye na, na tsik bazlam i ndo hay.

<sup>6</sup> A'ay, andza niye bay, Mbəlom neŋgeye ŋgwalak eye. Tadə neŋgeye ŋgwalak eye bay na, ma giye sariya a ndo i mändzibəra hay na, ma kəkay?

<sup>7</sup> Agəla siye hay ta gwadiye sa: «Tadə maraw me ga hay faya ta dzəniye ndo hay ka məsərə Mbəlom neŋgeye a tsik dedek na, ta zambadeye hərwiye. Kə ge andza niye na, nəkway ndo mäge mezeleme hay Mbəlom ma gəsiye kway a sariya na, hərwi mey?»

<sup>8</sup> Siye hay faya ta gwadiye: «Gakwa mənese hərwi ada t̄a ŋgatay parakka Mbəlom na, ŋgwalak eye, ma giye wuray daw?» Siye hay faya ta tsikiye wu nakə ŋgwalak eye bay aye fagaya, tə gwad neŋ eye na tsik andza niye. Nəteye d̄a nakə Mbəlom mā gəs tay ha a sariya aye.

#### *Ndo hay tebiye mezeleme eye hay*

<sup>9</sup> Andza niye, nəkway Yahuda hay na, ka zakwa tay ha siye i ndo hay daw? A'ay, kwa tsekweŋ bay. Ba na tsik tsiy, Yahuda hay ta siye i ndo hay tebiye mezeleme faya ma ləviye kway.

<sup>10</sup> Andza nakə tə watsa a Derewel i Mbəlom aye na, tə gwad:

«Ndəray nakə neŋgeye ŋgwalak eye kame i Mbəlom aye na, andaya bay, kwa nəte.

<sup>11</sup> Ndəray nakə a sər dedek aye na, andaya bay,

ndəray nakə faya ma pəliye Mbəlom aye na, andaya bay.

<sup>12</sup> Nəteye tebiye ta mbəday d̄aba a tsəved i Mbəlom, ta dze tebiye,

ndəray nakə faya ma giye ŋgwalak aye na, andaya bay, kwa nəte.†

<sup>13</sup> Wu nakə ma ndahwaweye abəra mə bazlam tay aye na, ŋgwalak eye bay andza wu nakə a zaw ma tsəvay nakə ta həndək faya abəra aye.

Ta dərneh tay na, faya ta vateye ha gər a ndo hay.‡

Ka təbələm tay na, muwar i d̄əd̄ə.§

<sup>14</sup> Faya ta vəlateye mezeleme a ndo hay huya,

\* 3:4 Dəmes hay 51.6. † 3:12 Dəmes hay 14.1-3, 53.2-4; Ekəliziyaŋ 7.20. ‡ 3:13 Dəmes hay 5.10.

§ 3:13 Dəmes hay 140.4.

ta tsikiye wu ɲɔwalak eye bay huya.\*

15 Tə sik tay hay na,  
ta hwiye ha ka məkəde ndo hay.

16 Tsəved tay nakə ta ye tə dəma aye na, ta nasiye ha wu hay tebiye,  
ada ta sateye dəretsətseh a ndo hay.

17 Tsəved i zay na, tə sər bay.†

18 Ta dzədzaray a Mbəlom bay tebiye.‡»

19 Na gwad ka sarakwa ha wu neheye tebiye bazlam i Mbəlom mapala eye faya ma tsikiye aye na, a tsik ka ndo neheye faya ta rəhay ha gər aye. Andza niye, ndəray ma sliye mambəde me abəra ka bo bay. Kwa way kə ge mənese kame i Mbəlom.

20 Hərwi niye ka dəre i Mbəlom na, ndəray nakə ɲɔwalak eye hərwi bazlam i Mbəlom mapala eye andaya bay. Bazlam i Mbəlom mapala eye faya ma diye ha mezeleme i ndo hay hərwi ada tā sər ha.

### *Ndo hay ta ndziye dedək eye hay kame i Mbəlom na, kəkay?*

21 Anəke na, tsəved i ndo hay ta təriye ɲɔwalak eye kame i Mbəlom aye na, kə ndohwaw parakka. Tsəved eye a ndohwaw na, abəra mə derewel i Musa bay. Ane tuk na, derewel i Musa ada ndo məde ha bazlam i Mbəlom hay ta tsik faya kurre.

22 Tsəved eye na, andza nakay: Ndo neheye tə dzala ha ka Yesu Kəriste, Mbəlom a təra tay ha dedək eye hay ka dəre ɲɔgay aye na, nəteye. Mbəlom a həndək tsəved nakay na, a ndo neheye tə dzala ha ka Yesu Kəriste aye tebiye bəna a Yahuda hay dəkdek bay. Mbəlom a ɲɔgana tay ha ka bo abəra ndo hay bay.

23 Hərwi ndo hay tebiye ta ge mezeleme, ta sliye məndze ma məzlaḅ i Mbəlom bay.

24 Ane tuk na, Mbəlom kə gatay ɲɔwalak kəriye, ka təra tay ha dedək eye kame ɲɔgay. A ge andza niye na, tə həlay i Yesu Kəriste nakə ma mbəliye tay ha abəra mə mezeleme aye.

25 Nəŋgeye na, Mbəlom a zla na ada mā mət hərwi ndo hay hərwi ada mā zla fataya abəra mezeleme tay tə bambaz ɲɔgay. Tsəved eye nakay Mbəlom a həndək na, hərwi ndo neheye tebiye ta dzaliye ha ka Yesu Kəriste aye. A ge andza niye na, hərwi ada ndo hay tā zəba nəŋgeye na, dedək. Mezeleme neheye ahəl niye ndo hay tə gawa aye na, Mbəlom a gawa ha andza a ɲɔgataway bay.

26 A tsikawa faya bay, a dəmawa. Ane tuk na, anəke na, faya ma datay ha a ndo hay, nəŋgeye na, dedək. Nəŋgeye a say mäge na, wu nakə dedək eye ada a say matəre tay ha ndo neheye tə pa mədzal gər tay ka Yesu Kəriste aye ndo dedək eye hay.

27 Kə ge andza niye na, wuray andaya nakə ka gakweye ha zlapay aye daw? A'ay, andaya bay! Mbəlom a təra kway ha dedək eye hay kame ɲɔgay na, hərwi nakə faya ka dzalakweye ha ka Yesu Kəriste aye bəna hərwi nakə ka pakway bəzay a bazlam mapala eye bay. Andza niye, wuray andaya nakə ka gakweye ha zlapay aye bay.

28 Andza niye, Mbəlom a təra tay ha ndo hay dedək eye hay kame ɲɔgay na, hərwi nakə faya ta dzaliye ha ka Yesu Kəriste aye dəkdek tsa bəna hərwi nakə tə pay bəzay a bazlam i Musa mapala eye aye bay.

\* 3:14 Dəmes hay 10.7. † 3:17 Ezay 59.7-8. ‡ 3:18 Dəmes hay 36.2.

<sup>29</sup> Mbəlom na, neŋgeye Mbəlom i Yahuda hay dəkdek bay, neŋgeye Mbəlom i ndo hay tebiye, kwa i Yahuda hay ada kwa i siye i ndo hay,

<sup>30</sup> hərwi Mbəlom na, nəte ŋgweŋ. Tadə Yahuda hay ta dzala ha ka Yesu Kəriste na, ma təriye tay ha dedek eye hay kame ŋgay. Hərwi ndo siye hay na, andza niye dərma, tadə ta dzala ha ka Yesu Kəriste na, ma təriye tay ha ndo i dedek eye hay kame ŋgay dərma.

<sup>31</sup> Məgwede na, Mbəlom a təra tay ha ndo dedek eye hay na, hərwi nakə tə dzala ha ka Yesu Kəriste aye, niye a say məgwede na, ndo hay tā pay bəzay a bazlam i Mbəlom mapala eye sa bay daw? A'ay, andza niye bay. Duh bazlam i Mbəlom mapala eye na, ka təmakweye na lele andza nakə a ye ka bo aye.

## 4

### *Mbəlom a təra ha Abraham ndo i dedek kame ŋgay*

<sup>1</sup> Dzalakwa ka Abraham bəba tətə kway təday. Ka gwadəkweye ka neŋgeye na, mey? A huta ka təv i Mbəlom na, mey?

<sup>2</sup> Tadə Mbəlom a təra ha ndo i dedek kame ŋgay hərwi nakə a gawa məsler ŋgwalak eye hay aye na, Abraham ma sliye faya məge zlapay. Ane tuk na, Abraham kə sla faya məzlepe kame i Mbəlom bay.

<sup>3</sup> Andza naka tə watsa a Derewel i Mbəlom aye na, tə gwad: «Abraham a dzala ha ka Mbəlom, hərwi niye Mbəlom a təra ha ndo i dedek kame ŋgay.\*»

<sup>4</sup> Sərūm ha na, tadə ndoweye kə ge məsler na, ta vəleye wu hərwi məsler ŋgay. Wu nakə ta vəleye na, merəbe ŋgay bəna ta vəleye kəriye bay.

<sup>5</sup> Tadə duh ndoweye kə dzala ha ka Mbəlom ada ma dzaliye mə gər ŋgay a gawa məsler neheye ŋgwalak eye bay aye na, Mbəlom a təra ha ndo i dedek kame ŋgay. Andza niye tsəved i Mbəlom andaya matəre ha ndo hay dedek eye kame ŋgay na, kəriye.

<sup>6</sup> Davit kə tsik andza niye dərma. A gwad ka ndo nakə Mbəlom a təra ha ndo i dedek kame ŋgay aye na, ka zəba ka məsler ŋgay hay bay. A gwad ndo neheye na, Mbəlom kə vəlatay mənɣwese.

<sup>7</sup> A gwad:

«Ndo neheye Mbəlom a pəsətay ha mezeleme tay na,  
maa huta mənɣwese na, nətəye.

Ndo neheye Mbəlom a mbatatay ha mənese tay aye na,  
maa huta mənɣwese na, nətəye.

<sup>8</sup> Ndo neheye Bəy Maduweŋ Mbəlom a pasla mənese tay bay aye na,  
maa huta mənɣwese na, nətəye.†»

<sup>9</sup> Ahəl nakə Davit a tsik andza niye na, andza məgwede maa huta mənɣwese na, ndo neheye tə dəs bo aye dəkdek tsa daw? A'ay, ndo neheye ta dəs bo bay aye ta hutiyə mənɣwese dərma. Ta dedek ka tsənakwa na, Mbəlom a təra ha Abraham ndo i dedek kame ŋgay na, hərwi nakə Abraham a pa mədzal gər ka neŋgeye, na gwad bədaw?

<sup>10</sup> Mbəlom a təra ha Abraham ndo i dedek kame ŋgay na, kəday? Neŋgeye madəsa bo eye tsukudu neŋgeye madəsa bo eye zuk bay daw? A həlay niye na, neŋgeye madəsa bo eye zuk bay!

<sup>11</sup> Mbəlom a təra ha ndo i dedek kame ŋgay na, ahəl nakə kə dəs bo zuk bay aye hərwi kə dzala ha ka Mbəlom. Ma dəba eye na, Mbəlom a gwaday «dəs bo». Mədəse bo nakə a dəs aye na, ŋgodgor nakə neŋgeye ndo i dedek kame i Mbəlom aye. Andza niye, Abraham neŋgeye bəba i ndo neheye ta dəs bo bay

\* 4:3 Madazlay i wu hay 15.6. † 4:8 Dəmes hay 32.1-2.



ada ta dzala ha ka Mbəlom aye. Mbəlom a pa tay ha nəteye dedək eye hay kame ŋgay andza nakə a pa Abraham ndo i dedək kame ŋgay aye.

<sup>12</sup> Sa na, Abraham neŋgeye bəba i ndo neheye madəsa bo aye. Ane tuk na, kutoŋ t̄a ge andza Abraham h̄arwi m̄adzal ha ka Mbəlom andza nakə neŋgeye a dzala ha kwa ah̄əl nakə k̄ə d̄as bo zuk bay aye.

### *Wu nakə Mbəlom a gwad ma vəliye aye*

<sup>13</sup> Mbəlom a gwad̄ay ah̄əl niye a Abraham ada a hulfe ŋgay na, ma vəlateye m̄andzib̄era. Mbəlom a tsik andza niye na, h̄arwi nakə Abraham a pay b̄əzay a bazlam mapala eye bay, a tsikay andza niye na, h̄arwi Abraham a dzala ha ka Mbəlom aye ada a t̄era ndo i dedək kame ŋgay na, andza niye.‡

<sup>14</sup> Tad̄ə ah̄əl niye ndo neheye t̄ə paway b̄əzay a bazlam mapala eye aye ta hut̄iye wu nakə Mbəlom a gwad̄ ma vəliye na, ndo neheye t̄ə dzala ka Mbəlom aye na, t̄ə dzala ha h̄arwi mey? Wu nakə Mbəlom a gwad̄ ma vəliye na, ma tariye wu k̄ariye.

<sup>15</sup> Andza niye, h̄arwi bazlam mapala eye a zlaw mevel i Mbəlom ka ndo hay h̄arwi ta pay b̄əzay bay. Tad̄ə bazlam mapala eye andaya bay na, nd̄aray andaya ma nasiye ha bazlam mapala eye bay.

<sup>16</sup> Wu nakə Mbəlom a gwad̄ ma vəliye, ma vəliye a ndo neheye t̄ə dzala ha ka neŋgeye aye. A ge andza niye na, h̄arwi m̄ədə ha ŋgwalak ŋgay ta m̄əv̄əle wu k̄ariye. A say m̄əv̄əle a hulfe i Abraham, a nəteye tebiye. A vəl na, a ndo m̄adzal ḡər neheye t̄ə pay b̄əzay a bazlam i Mbəlom mapala eye dek̄dek bay, ane tuk na, a siye i ndo neheye t̄ə dzala ha ka Mbəlom andza Abraham nakə a dzala ha aye d̄ərmak, h̄arwi Abraham na, b̄əba kway tebiye ma m̄adzal ḡər ka Mbəlom.

<sup>17</sup> Andza nakə t̄ə watsa a Derewel i Mbəlom aye na, Mbəlom a gwad̄ay a Abraham: «Na pa kar b̄əba i slala hay haladzay.» Neŋgeye b̄əba kway kame i Mbəlom h̄arwi nakə a dzala ha aye. Mbəlom nakə a mb̄əl ha ndo hay ab̄era ma m̄adah̄an̄ aye ada neŋgeye nakə a ge wu hay a dazlay ka k̄ariye, a tsik me na, wuye hay t̄ə ndohwaw.§

<sup>18</sup> Abraham neŋgeye na, a dzalawa ha huya ka Mbəlom. Kwa m̄a ge andza ts̄əved̄ eye nakay ada Mbəlom m̄a ge wu nakə a gwad̄ ma vəliye andaya sa bay b̄əbay na, Abraham a pa faya m̄adzal ḡər ŋgay ka Mbəlom huya. A t̄era b̄əba i slala hay haladzay na, andza niye.\* Andza nakə Mbəlom a tsikay, a gwad̄ay: «Hulfe yak hay ta giye haladzay.»

<sup>19</sup> Ah̄əl nakə Mbəlom a tsikay andza niye na, m̄əve i Abraham ma giye temerre. A s̄ər bo ŋgay na, ɓa andza mam̄eta eye ts̄iy, Sara ŋgwas ŋgay ma s̄liye faya m̄əwe sa bay. Ane tuk na, a dzalawa ha ka Mbəlom huya, k̄ə ye ḡər bay.

<sup>20</sup> A s̄ər ha lele ma hut̄iye wu nakə Mbəlom a gwad̄ ma vəleye. Ka dz̄ədza ha m̄adzal ḡər ŋgay bay. Duh m̄adzal ḡər nakə a dzala ha ka Mbəlom aye na, a vəlay ḡədan̄ ɓ̄əŋɓ̄an̄ ka ts̄əved̄ i Mbəlom ada a zambad̄away a m̄əzlaɓ i Mbəlom.

<sup>21</sup> A s̄ər ha lele ḡədan̄ i Mbəlom andaya ka m̄əge wu nakə a gwad̄ ma giye aye.

<sup>22</sup> H̄arwi niye Mbəlom a t̄era ha Abraham ndo i dedək kame ŋgay.†

<sup>23</sup> Wu nakə t̄ə watsa a Derewel i Mbəlom aye na: «Mbəlom ka z̄əba faya neŋgeye ndo i dedək kame ŋgay.» T̄ə watsa na, h̄arwi ŋgay dek̄dek bay,

‡ 4:13 Z̄əba m̄ə Madazlay i wu hay 12.2-3; 17.4-6; 22.15-18. § 4:17 Madazlay i wu hay 17.5. \* 4:18 Madazlay i wu hay 15.5. † 4:22 Z̄əba m̄ə Madazlay i wu hay 15.6.

<sup>24</sup> tə watsa hərwi kway dərmaḱ. Taḁə ka dzalakwa ha ka Mbəlom nakə a lətse ahaya Yesu Bəy Maduweŋ kway abəra mə walaŋ i mədahaŋ hay aye na, ma zəbiye fakwaya dedek eye hay kame ŋgay dərmaḱ.

<sup>25</sup> Yesu, neŋgeye Mbəlom a vəl a həlay i ndo hay hərwi ada m̄a mət hərwi mezeleme kway. Ma dəba eye Mbəlom a lətse ahaya abəra ma mədahaŋ hərwi ada m̄a pa kway dedek eye hay kame ŋgay.

## 5

### *Yesu kə vəlakway məsərə bo ta Mbəlom*

<sup>1</sup> Andza niye, Mbəlom ka təra kway ha dedek eye hay kame ŋgay hərwi faya ka dzalakweye ha ka neŋgeye. Anəke tuk na, nəkway mandza eye ta Mbəlom tə zay hərwi Bəy Maduweŋ kway Yesu Kəriste.

<sup>2</sup> Maa həndəkəkway na tsəved eye na, Yesu Kəriste hərwi ada Mbəlom m̄a gəkway ŋgwalak ŋgay hərwi faya ka dzalakweye ha ka neŋgeye. Ka lətsakwa duwirre bəŋbəŋ na, ka ŋgwalak ŋgay eye nakay ada ka ŋgalakakweye hərwi ka sərakwa ha Mbəlom ma ta vəlakweye məzlaḁ andza neŋgeye.

<sup>3</sup> Sa na, faya ka sakweye dəretsətseh na, dərev kway faya ma ŋgwasiye hərwi ka sərakwa ha dəretsətseh ma dzəniye kway ka məzle ŋgatay.

<sup>4</sup> Ka zlakwa ŋgatay na, ka hutakweye gədaŋ. Taḁə ka hutakwa gədaŋ na, ka pakweye mədzal gər ka Mbəlom, ma giye wu nakə a gwad ma giye.

<sup>5</sup> Taḁə ka pa faya mədzal gər andza niye na, ma təriye wu kəriye bay hərwi bə Mbəlom kə dəkway ha parakka a wuḁa kway haladzay. A dəkway ha na, tə həlay i Məsəfərə ŋgay Tsədaŋŋa eye nakə a vəlakway aye.

<sup>6</sup> Ayaw, ahəl niye gədaŋ kway andaya mətəmə ha gər kway bay. Ane tuk na, həlay eye nakə Mbəlom a pa aye, Kəriste a yaw a mət hərwi mezeleme kway.

<sup>7</sup> Ka sərakwa ha na, mawura bo eye haladzay nakə ndo ma təmiye məməte hərwi ndo nakə dedek eye, mawura bo eye. Taḁə ndoweje faya ma giye wu ŋgwalak eye na, agəna ma təmiye məməte hərwi ŋgay.

<sup>8</sup> Ane tuk na, Kəriste, neŋgeye kə mət hərwi kway. A mət na, ahəl nakə nəkway huya mə mezeleme aye. Andza niye Mbəlom a dəkway ha ma kəkay nakə a wuḁa kway aye.

<sup>9</sup> Ma məməte i Kəriste nakə a mət hərwi kway aye na, Mbəlom ka təra kway ha dedek eye hay tə bambaz ŋgay. Kə ge andza niye na, ka sərakwa ha dedek Kəriste ma təmiye kway ha hərwi ada Mbəlom m̄a gəs kway ta sariya bay.

<sup>10</sup> Ahəl niye nəkway ndo mane dəre i Mbəlom na, neŋgeye kə sər kway ha ka bo ta neŋgeye tə məməte i wawa ŋgay. Kə ge andza niye na, ka sərakwa ha ta dedek ma təmiye kway ka tor eye hərwi wawa ŋgay kə lətsew abəra ma mədahaŋ.

<sup>11</sup> Neŋgeye niye dəkdek tsa bay. Sa na, faya ka ŋgalakakweye ta Mbəlom hərwi maa ye kway ha məsərə kway ha ka bo ta Mbəlom na, neŋgeye. Wu nakə a ge aye na, hərwi Bəy Maduweŋ kway Yesu Kəriste.

### *Adam tə Yesu Kəriste*

<sup>12</sup> Maa zlaw mezeleme ka məndzibəra na, ndo nəte ŋgeweŋ, Adam. Hərwi mezeleme, ndo hay faya ta mətiye. Andza niye, mədahaŋ a zəvay a ndo zezeŋ ka məndzibəra tebiye, hərwi ndo hay tebiye ta ge mezeleme.

<sup>13</sup> Mezeleme andaya ka məndzibəra na, kurre kwa ahəl nakə Mbəlom kə vəlay bazlam mapala eye a Musa zək bay aye. A həlay niye bazlam mapala eye andaya zək bay na, Mbəlom kə pasla mezeleme i ndo hay bay.

<sup>14</sup> Ane tuk na, kwa kə ge bo andza niye bəbay na, madazlay ka Adam hus a həlay i Musa na, mədahaŋ a kədawa ndo hay tebiye. Kwa tadə ta gəsay me a Mbəlom andza Adam nakə kə ge bay aye na, tə mətawə huya.

Adam na, andza Yesu, ndo nakə ma deyeweje kame aye.

<sup>15</sup> Ane tuk na, nəteye niye sulo aye na, məsler tay wal wal. Mezeleme nakə Adam a ge aye na, wal andza ŋgama nakə Mbəlom a vəl aye bay. Dedek, ndo hay haladzay ta mət hərwi Adam nakə neŋgeye nəte a ge mezeleme aye. Ane tuk na, ŋgwalak i Mbəlom gədaŋ eye a ze kwa mey. Kə pa ŋgama haladzay ka ndo hay haladzay kəriye, kə gatay ŋgwalak tə həlay i ndo nəte, Yesu Kəriste.

<sup>16</sup> Wu nakə Mbəlom a vəl aye na, hohway ŋgay eye wal dərmak. Andza i mezeleme bay. Mezeleme nakə Adam a ge aye na, Mbəlom kə gəs na faya a sariya. Ane tuk na, Mbəlom faya ma vəliye ŋgwalak ŋgay a ndo hay, kwa tadə ta ge mezeleme haladzay bəbay na, faya ma təriye tay ha dedek eye hay kame ŋgay ada sariya ma gəsiye tay ha bay.

<sup>17</sup> Dedek, ndo nəte kə ge mezeleme ada mədahaŋ ka zəvatay a ndo hay tebiye hərwi ndo nakay nəte eye. Ane tuk na, ndo neŋged, Yesu Kəriste, neŋgeye a ge məsler mekelen. Hərwi ŋgay, Mbəlom kə vəl ŋgwalak ŋgay haladzay ada kə vəl məsəre bo, ndo hay ta sər bo ta neŋgeye. Andza niye, ta hutiyə sifa ka tor eye ada ta giye bəy tə Yesu Kəriste.

<sup>18</sup> Andza niye, sariya kə gəs ndo hay tebiye hərwi mezeleme i Adam. Yesu Kəriste, neŋgeye ndo nəte a ge ŋgwalak, andza niye a təma ahaya ndo hay tebiye abəra ma sariya, a vəlatay sifa.

<sup>19</sup> Zəbum, ndo hay haladzay tə ge mezeleme na, hərwi ndo nəte a kərah marəhay ha gər a Mbəlom. I ndo neŋged, andza niye. Ndo hay haladzay ta təriye dedek eye hay kame i Mbəlom na, hərwi nakə neŋgeye a rəhay ha gər a Mbəlom aye.

<sup>20</sup> Bazlam i Musa mapala eye a yaw na, hərwi ada mezeleme mə səkah. Ane tuk na, mezeleme a səkah məzəbe na, ŋgwalak i Mbəlom a səkah kame kame.

<sup>21</sup> Ahəl niye na, mezeleme a kədawa ndo hay ta gədaŋ. Anəkə na, ŋgwalak i Mbəlom andaya ta gədaŋ eye matəre ha ndo hay dedek eye hay kame i Mbəlom. Mbəlom a vəlakway ŋgwalak ŋgay niye na, hərwi mede kway ha a sifa nakə ma ndəviye bay aye tə həlay i Bəy Maduweŋ kway Yesu Kəriste.

## 6

### *Ndo neheje madzapa eye tə Yesu Kəriste aye nəteye ma sifa*

<sup>1</sup> Ayaw, ka gwadəkweye na, mey tuk? Niye na, andza məgwədə «Gakwa mezeleme hərwi ada Mbəlom mə səkah ha məvəle ŋgwalak kame kame» tsukudu, kəkay?

<sup>2</sup> Andza niye bay tebiye! Nəkway na, andza ka mətakwa, mezeleme ma sliye faya mələvakway gər sa bay. Ka ndzakweye mə mezeleme sa na, ma kəkay?

<sup>3</sup> Ahəl nakə ta dzəhuḅ kway ha a yam aye na, nəkway ka dzapakwa tə Yesu Kəriste. Andza məgwədə na, ka mətakwa ka bo tə neŋgeye. Ka sərūm təbədew?

<sup>4</sup> Ahəl nakə ta dzəhuḅ kway ha a yam aye na, ka tərakwa maməta eye hay tə neŋgeye ada ta tələka kway ha a mədahaŋ andza neŋgeye hərwi ada Bəba Mbəlom mə lətsakway ahaya abəra ma mədahaŋ andza nakə a ləte ahaya Kəriste abəra ma mədahaŋ ta məzlaḅ i gədaŋ ŋgay aye. Məmbəle kway ahaya nakə a mbəl kway ha aye na, a say kə hutakwa məndze nakə wədəye aye.

<sup>5</sup> Ayaw, ka tərakwa maməta eye hay andza neŋgeye mə madzəhuḅe nakə ta dzəhuḅ kway ha a yam aye. Andza niye nəkway ka dzapakwa tə neŋgeye. Kə ge andza niye na, ka lətsakwaweye abəra ma mədahaŋ andza neŋgeye nakə a lətsəw aye dərmak hərwī məndze ma məndze wədeye.

<sup>6</sup> Sərakwa ha na, ahəl nakə Kəriste a mət ka mayako mazləmbada eye na, Mbəlom ka dar mede kway nakə guram eye ka mayako mazləmbada eye dərmak, hərwī ada Mbəlom mā dze ha bo nakə a saway məge mezeleme aye ada kə tərakwa beke i mezeleme sa bay.

<sup>7</sup> Hərwī ndo nakə kə mət aye na, gədaŋ i mezeleme andaya faya sa bay.

<sup>8</sup> Ahəl nakə Kəriste a mət aye na, nəkway dərmak ka mətakwa. Kə ge andza niye na, ka dzalakwa ha nəkway tə neŋgeye ka ndzakweye ma sifa dərmak.

<sup>9</sup> Ka sərakwa ha Yesu Kəriste kə lətsəw abəra ma mədahaŋ, ma mətiye sa bay. Gədaŋ i mədahaŋ andaya faya sa bay.

<sup>10</sup> A mət na, a mət mə mezeleme i ndo hay, sik nəte ka ndəv. Anəke neŋgeye mandza eye tə dəre na, neŋgeye mandza eye hərwī Mbəlom.

<sup>11</sup> Tə nəkurom na, andza niye dərmak. Sərum ha na, ka mətum, gədaŋ i mezeleme andaya fakuma sa bay. Anəke nəkurom mandza eye i Mbəlom hərwī nəkurom madzapa eye tə Yesu Kəriste.

<sup>12</sup> Kə ge andza niye na, ka təmum mezeleme mā ge fakuma gədaŋ sa bay. Wu neheye ŋgwalak eye bay, a say a bor i bo kurom aye na, kə pumay bəzay bay. Sərum ha na, bo ma ndziye bay, ma mətiye.

<sup>13</sup> Ka vəlumay ha bo kurom a mezeleme mā gakum wu nakə ŋgwalak eye bay aye sa bay. Vəlumay ha bo kurom dūh na, a Mbəlom andza ndo neheye tə lətsəw abəra ma mədahaŋ aye. Vəlumay ha bo kurom peteh hərwī ada mā ge kurom ha məsler ka tsəved ŋgwalak eye.

<sup>14</sup> Andza niye, gədaŋ i mezeleme andaya fakuma sa bay hərwī ka pumay bəzay a bazlam i Musa mapala eye sa bay. Faya ka pumeye bəzay a ŋgwalak i Mbəlom nakə a gakum aye hərwī ada kə tərūm dedək eye hay kame ŋgay.

### *Nəkway na, beke i way?*

<sup>15</sup> Agəla ndəray ma gwadiye, nəmay faya nəmaa pay bəzay a bazlam mapala eye sa bay, nəmaa pay bəzay a ŋgwalak i Mbəlom. Kə ge andza niye na, tsəved kway andaya ka məge mezeleme sa daw? A'ay, andaya kwa tsekwen sa bay tebiye.

<sup>16</sup> Na gwad ka sərum ha tadə ka vəlumay ha bo kurom a ndoweye, ka gwadum ka rəhumay ha gər na, ka tərūm beke ŋgay. Tadə gədaŋ i mezeleme fakuma na, nəkurom ka tərūm beke i mezeleme faya ka vahumaweye məməte ka gər kurom. Tadə dūh ka rəhumay ha gər a Mbəlom na, ka tərūm beke ŋgay hay ada ma təriye kurom ha dedək eye hay kame ŋgay.

<sup>17</sup> Na gwad ahəl niye na, nəkurom beke i mezeleme bəda? Sisə a Mbəlom, anəke dūh na, ka rəhumay ha gər a Mbəlom. Ka təmum bazlam neheye ta tətikakum aye.

<sup>18</sup> Mbəlom kə təma kurom ahaya abəra ma beke i mezeleme, ka tərūm beke i Mbəlom dūh hərwī ada kə pumay bəzay a tsəved ŋgwalak eye.

<sup>19</sup> Na tsikakum ka beke hay na, hərwī ada kə tsənum lele hərwī wu neheye a wur bo aye ka slum faya mətsəne bay. Ahəl niye ka vələwum ha bo kurom peteh ka məge mənese, ka səkahawum ha məge mezeleme hay wal wal haladzay. Andza nakə ka gawum ahəl niye aye na, anəke vəlumay ha bo kurom peteh a Mbəlom hərwī ada kə gum wu nakə dedək eye. Andza niye mede kurom ma deye a gər a Mbəlom.

<sup>20</sup> Ahəl nakə nəkurom beke i mezeleme aye na, wuray a gakum kutorj ka mäge wu nakə a say a Mbəlom aye bay.

<sup>21</sup> A həlay niye ka gawum wu neheye ɲɣwalak eye bay a gakum horoy anəke aye na, wu nakə ka hutum mə dəma ma dʒəniye kurom aye na, wu waray? Wu neheye düh na, ta diye ha ndo a mədahaɲ.

<sup>22</sup> Anəke na, Mbəlom kə təma kurom ahaya abəra ma beke i mezeleme, ka tərüm beke i Mbəlom düh. Magogoy kurom nakə ka hutumeye na, məndze kurom ma təriye tsədaɲɲa ada ka hutumeye sifa nakə ma ndəviye bay aye.

<sup>23</sup> Tadə ndoweye kə ge mezeleme na, mezeleme ma diye ha a məməte hərwi magogoy i mezeleme na, məməte. Ane tuk na, Mbəlom neɲgeye ma vəliye sifa nakə ma ndəviye bay aye na, kariye. Ma vəlakweye hərwi nəkway madzapa eye ta Bəy Maduweɲ kway Yesu Kəriste.

## 7

### *Gədaɲ i bazlam mapala eye andaya fakwaya sa bay*

<sup>1</sup> Malamar ga hay, faya na tsikiye ka bazlam mapala eye. Na gwad nəkurom na, ka sərüm bazlam mapala eye bədaw? Ka sərüm ha bazlam mapala eye a ləvay gər a ndo na, ahəl nakə ndoweye tə dəre huya aye dəkdek tsa.

<sup>2</sup> Na dākum ha ta ɲɣwas nakə neɲgeye tə zal ɲgay aye. Ahəl nakə zal ɲgay andaya tə dəre mba aye na, tsəved ɲgay andaya məgar ha zal ɲgay, məzle zal mekelenj eye bay, hərwi bazlam mapala eye a ge me. Tadə zal ɲgay kə mət na, tsəved ɲgay andaya mede a gay i ndo mekelenj eye tuk, maga me eye sa bay.

<sup>3</sup> Tadə zal ɲgay kə mət zuk bay, a gər ha, a ye a zal mekelenj na, kə ge madama. Ane tuk na, tadə zal ɲgay kə mət na, neɲgeye tsiy barbarra. Kwa tadə ki ye a zal mekelenj bəbay na, kə nas ha bazlam mapala eye bay, kə ge madama bay.

<sup>4</sup> Malamar ga hay, i kurom bəbay andza niye dərmak. Bazlam mapala eye a ləva kurom sa bay, nəkurom kame ɲgay andza maməta eye hay, hərwi ahəl nakə Kəriste a mət aye na, ka mətum dərmak. Andza niye, nəkurom na, i ɲgay, neɲgeye nakə Mbəlom a lətse ahaya abəra ma mədahaɲ aye. Nəkurom i ɲgay hay hərwi ada kə gakwa wu ɲɣwalak eye hay a neɲgeye.

<sup>5</sup> Andza məgwede, ahəl niye ka gawakwa wu neheye a yakway a gər aye mba na, bazlam mapala eye a gwadawakway: «Wu nakay na, mezeleme.» Kə dəkway ha mezeleme andza niye na, nəkway a sawakway mäge wu niye düh. Wu neheye ɲɣwalak eye bay aye a yawa kway ha kame kame ada a yawa kway ha a məməte.

<sup>6</sup> Ahəl niye na, bazlam mapala eye a təra kway ha beke ɲgay hay, anəke na, nəkway kame ɲgay andza maməta eye hay. Mbəlom kə təma kway ahaya abəra mə həlay ɲgay. Anəke faya ka gakweye məsler i Mbəlom na, ta tsəved wədeye nakə Məsəfəre i Mbəlom a dəkway ha aye. Faya ka gakweye məsler ɲgay ta tsəved guram eye tə watsa mə bazlam mapala eye sa bay.

### *Bazlam mapala eye tə mezeleme*

<sup>7</sup> Nakay na, a say məgwede mey? Bazlam i Musa mapala eye na, wu nakə ɲɣwalak eye bay aye daw? A'ay, andza niye bay. Tadə bazlam mapala eye andaya bay na, na səriye mezeleme bay. Tadə bazlam mapala eye mā gwad: «Kə ge dəre ka wu i ndo bay\*» na, na səriye mezeleme niye bay.

<sup>8</sup> Ane tuk na, ahəl nakə bazlam mapala eye a deɲ ha mäge dəre ka mezeleme nakay aye na, mezeleme a huta fagaya tsəved, na dazlay mäge dəre ka wu hay

\* 7:7 Madayaw abəra ma Ezipt 20.17; Bazlam mapala eye masulo eye 5.21.

wal wal tebiye. Tađə bazlam mapala eye andaya bay na, mezeleme maməta eye.

<sup>9</sup> Ahəl niye na sər bazlam mapala eye zuk bay na, ka dərə ga na, neŋ mandza eye tə dərə. Ane tuk na, ahəl nakə na sər wu nakə a say a bazlam mapala eye ndo m̄a ge aye na, mezeleme a mbəl,

<sup>10</sup> ada ka dərə i Mbəlom na, na mət. Mbəlom a vəl bazlam mapala eye na, hərwi ada m̄a vəlatay sifa a ndo hay. Ane tuk na, neŋ na mət na, neŋgeye a mət ga ha.

<sup>11</sup> Ahəl nakə na tsəne bazlam mapala eye na, mezeleme a huta fagaya tsəved, a veŋ gər hərwi ada n̄a ge mənese ada andza niye n̄a mət hərwi mezeleme a kəd ga.

<sup>12</sup> Andza niye bazlam mapala eye a yaw na, mə həlay i Mbəlom ada bazlam ŋgay hay tebiye na, tsədanŋa. Wu nakə ŋgwalak eye bay aye na, andaya mə dəma bay.

<sup>13</sup> Yaw! Andza məgwede na, wu ŋgwalak eye kə kəd ga mədahan eye daw? A'ay, maa kəd ga na, bazlam mapala eye bay. Maa kəd ga düh na, mezeleme. Mezeleme a gəs ga tə wu nakay ŋgwalak eye a kəd ga ha mədahan eye. Andza niye hərwi ta sər ha mezeleme na, mezeleme dedek. Mezeleme neŋgeye ŋgwalak eye bay na, ka zəba parakka hərwi bazlam mapala eye.

### *Lele ta lele bay eye salamay ma ndo*

<sup>14</sup> Ka sərakwa ha bazlam mapala eye a yaw abəra ka təv i Mbəlom. Ane tuk na, neŋ na, ndo zezeŋ tsa, na təra andza beke i mezeleme.

<sup>15</sup> Wu nakə faya na giye na, na sər bay. Wu nakə a seŋ mäge aye na, na ge bay, faya na giye düh na, wu nakə a seŋ bay aye.

<sup>16</sup> Azlakwa tađə na wuda wu nakə na giye aye bay na, faya ma diye ha na sər bazlam mapala eye neŋgeye ŋgwalak eye.

<sup>17</sup> Mənese nakə faya na giye na, maa ge na, neŋ bay. Maa ge na, mezeleme nakə mə neŋ aye.

<sup>18</sup> Na sər ha wu ŋgwalak eye andaya mə neŋ bay. Na tsik na, mə bo ga nakə a saway mäge mezeleme aye. A seŋ ta dedek mäge wu lele eye, ane tuk na, na sla faya mäge bay.

<sup>19</sup> Wu ŋgwalak eye nakə a seŋ mäge aye a seŋ na giye bay. Faya na giye düh na, wu ŋgwalak eye bay nakə a seŋ mäge bay aye.

<sup>20</sup> Tađə na ge wu nakə a seŋ mäge bay aye na, andza məgwede maa ge na, neŋ bay. Maa ge na, mezeleme nakə mə neŋ aye.

<sup>21</sup> Andza niye, wu nakə neŋ faya na tsəniye mə bo ga aye na, andza nakay: A seŋ mäge ŋgwalak, ane tuk na, na sla faya mäge na, mənese dəkdek.

<sup>22</sup> Andza məgwede bazlam i Mbəlom mapala eye a yeŋ a gər ta dedek mə dərev ga.

<sup>23</sup> Ane tuk na, na zəba faya na, gədan mekelen eye andaya mə neŋ ada faya ma giye varam tə wu neheye ŋgwalak eye mə neŋ aye. Wu nakay ŋgwalak eye bay aye na, a təra ga ha beke i mezeleme.

<sup>24</sup> I ga na, dəretsətseh waray! Na mətiye, hərwi nakə bo ga mezeleme aye. Mata buwa ga ahaya abəra ka tsəved nakay ma diye ga ha a məməte aye na, way?

<sup>25</sup> Mata buwa ga ahaya na, Mbəlom tə həlay i Bəy Maduweŋ kway Yesu Kəriste. Na gay s̄is̄ə tə dərev ga peteh.

Andza niye, ta mədzal gər ga na, faya na rəhay ha gər a bazlam i Mbəlom mapala eye. Ane tuk na, bo ga a say n̄a pay bəzay düh na, a mezeleme.

## 8

*Məndze ta gədan i Məsəfəre Tsədanña eye*

<sup>1</sup> Andza niye, ndo neheye madzapa eye tə Yesu Kəriste aye na, Mbəlom ma gəsiye tay ha a sariya dāda bay.

<sup>2</sup> Andza niye hərwi gədan i Məsəfəre Tsədanña eye nakə a vəl sifa dedek eye tə həlay i Yesu Kəriste kə təma ga ahaya abəra ma gədan i mezeleme nakə ma diye ga ha a mədahañ aye.

<sup>3</sup> Bazlam i Musa mapala eye na, kə sla faya məvəle sifa bay hərwi nəkway ndo zezəñ, nəkway bəle eye hay, ka slakwa faya marəhay ha gər a bazlam mapala eye bay. Ane tuk na, wu nakə bazlam mapala eye a sla faya bay aye na, Mbəlom kə ge na. A ge na, a sləraw wawa ñgay ka məndzibəra ada a təra ha andza ndo, a ndzəkət bo ta nəkway ndo i mezeleme hay, hərwi ada mə mət hərwi mezeleme kway. Andza niye, Mbəlom a gəs na mezeleme nakə ndo hay faya ta giye a sariya.

<sup>4</sup> A ge andza niye na, hərwi ada kə tərakwa ñgwalak eye tebiye andza i bazlam mapala eye nakə a gwad həbə ka tərakweye aye. Niye na, ka gəkweye tə mede ka tsəved i Məsəfəre Tsədanña eye bəna ka tsəved nakə a yay a gər a bo kway aye bay.

<sup>5</sup> Ndo neheye faya ta giye andza niye na, a yay a gər a bo tay. Tə dzala na, huya ka wu nakə a yatay a gər aye. Ndo neheye faya ta ndziye andza nakə Məsəfəre Tsədanña eye a tətikatay aye na, nəteye faya ta dzaliye huya ka wu nakə a yay a gər a Məsəfəre Tsədanña eye.

<sup>6</sup> Ndo neheye faya ta dzaliye huya ka wu nakə a yay a gər a bo tay aye na, tsəved eye niye ma diye tay ha a məməte. Ane tuk na, ndo neheye faya ta dzaliye huya ka wu nakə a yay a gər a Məsəfəre Tsədanña eye na, Mbəlom ma vəlateye sifa nakə ma ndəviye bay ka tor eye ada ta məndze zay.

<sup>7</sup> Hərwi niye, ndo neheye faya ta dzaliye huya ka wu nakə a yay a gər a bo tay aye na, nəteye tə nay dəre a Mbəlom. Faya ta giye wu nakə bazlam i Mbəlom mapala eye a tsik aye bay. Ta sliye faya kwa tsekweñ marəhay ha gər bay.

<sup>8</sup> Ndo neheye faya ta giye wu nakə a yay a gər a bo tay aye huya na, ta sliye faya madayay a gər a Mbəlom bay.

<sup>9</sup> Nəkurom na, faya ka gumeye wu nakə a yay a gər a bo kurom aye bay. Nəkurom faya ka ndzumeye düh na, ka tsəved i Məsəfəre i Mbəlom, hərwi Məsəfəre i Mbəlom andaya mə nəkurom. Tadə ndoweye, Məsəfəre i Yesu Kəriste andaya mə neñgeye bay na, neñgeye ndo i Kəriste bay.

<sup>10</sup> Tadə Yesu Kəriste andaya mə nəkurom na, Məsəfəre ñgay ma vəlakumeye sifa nakə ma ndəviye bay hərwi ka tərüm ñgwalak eye hay ka dəre i Mbəlom. Andza niye, kwa bo kurom hay ta mətiye hərwi mezeleme.

<sup>11</sup> Mbəlom, neñgeye kə lətse ahaya Yesu Kəriste abəra ma mədahañ. Tadə Məsəfəre ñgay andaya mə nəkurom na, ta dedek ma mbəla kurom ahaya abəra ma mədahañ dərmak. Ma giye wu niye na, ta Məsəfəre ñgay nakay mə nəkurom aye.

<sup>12</sup> Kə ge andza niye na, malamar ga hay, gwedere andaya fakwaya. Slala i gwedere nakay na, məge məsler andza nakə a say a Məsəfəre Tsədanña eye, bəna məge wu nakə a say a bo kway aye bay.

<sup>13</sup> Tadə faya ka pumay bəzay a tsəved nakə a yakum a gər aye na, ta dedek ka mətumeye. Duh ka vəlumay ha bo a həlay i Məsəfəre Tsədanña eye hərwi



ada mâ mbatakum ha mezeleme nakə mə nəkurom aye na, ka ndzumeye ma sifa dedek eye.

14 Ndo neheye tebiye Məsəfəre i Mbəlom faya ma lakiye tay ha aye na, nəteye wawa i Mbəlom hay.

15 Məsəfəre niye Mbəlom a vəlakum aye na, neŋgeye ma təriye kurom ha beke hay bay, ka dzədzarumeye sa bay. Məsəfəre niye ma təriye kurom ha wawa i Mbəlom hay dūh. Ada ta Məsəfəre niye na, ka wudakweye, ka gwadəkweye: «Abba! Bəba!»

16 Məsəfəre Tsədanŋa eye, bo ŋgay eye faya ma tsikiye mə dərev kway na, ta dedek nəkway wawa i Mbəlom hay.

17 Kə ge nəkway wawa ŋgay hay na, ka hutakweye wu ŋgwalak eye hay neheye a gwad ma vəlateye a ndo ŋgay hay aye dərmak. Mata hute na, nəkway tə Kəriste tadə ka sakwa dəretsətseh andza neŋgeye dərmak. Andza niye, nəkway ta neŋgeye ka ndzakweye ma təv i məzlaḅ ŋgay.

### *Məzlaḅ nakə kame aye*

18 Na sər ha na, dəretsətseh nakə faya ka sakweye a həlay nakay anaŋ aye na, neŋgeye andza wu tsekweŋ eye kəriye. Neŋgeye andza məzlaḅ nakə Mbəlom ma vəlakweye aye bay.

19 Wu neheye tebiye Mbəlom a ge aye faya ta həbiye ndokndok. A satay haladzay mənŋatay a pat eye nakə Mbəlom ma bəziye ha wawa ŋgay hay mə dzaydzay aye.

20 Mbəlom ka təra tay ha wu neheye a ge aye wu kəriye. Wu neheye bo tay aye na, a satay andza niye bay. Mbəlom eye a say makəte tay ha. Ane tuk na, faya ma həbiye wu nakə ma giye bo aye huya.\*

21 A sər ha na, pat mekeleŋ eye ma təmiye wu neheye a ge aye tebiye. Wu neheye ta təriye andza beke hay sa bay, ta ziye sa bay, ta hutiyə məzlaḅ andza Wawa i Mbəlom hay, ta ndziye barbarra.

22 Ka sərakwa ka madazlay hus anəke, wu neheye tebiye Mbəlom a ge aye na, faya ta siye dəretsətseh. A wur fataya andza ŋgwas nakə ma wiye wawa aye.

23 Faya ma siye dəretsətseh na, wu neheye dəkdek bay. Nəkway dərmak, nəkway neheye Mbəlom a lah məvəlakway Məsəfəre ŋgay ada ma vəlakweye məzlaḅ sa aye na, faya ka sakweye dəretsətseh mə dərev kway hay. Faya ka həbakweye ndokndok Mbəlom mə təra kway ha wawa ŋgay hay, andza məgwədə mə mbəl kway ha abəra mə dəretsətseh.

24 Mbəlom kə təma kway ha. A təma kway ha na, ka dazlakway a məpe mədzal gər ka wu nakə ma vəlakweye kame aye. Tadə ndoweye kə dzala nəkway faya ka ŋgatakweye tə dəre kway wu neheye ka pakwa faya mədzal gər aye na, niye na, məpe faya mədzal gər sa bay ḅa wu neheye andaya mə həlay kway tsiy. Way nakə faya ma piye mədzal gər ka wu nakə kə huta tsiy aye? Ndəray andaya bay.

25 Ane tuk na, faya ka ŋgatakway a wu nakə ka pakwa faya mədzal gər aye bay. Andza niye, ka səmakway naha, ka həbakweye ndokndok!

26 Andza niye, Məsəfəre Tsədanŋa eye ma deyeweye ma dzəniye kway dərmak, hərwi nəkway bəle eye hay ka tsəved i Mbəlom. Ka sərakwa maduwulay me a Mbəlom ta tsəved aye bay. Məsəfəre tə gər ŋgay eye faya ma dūwuleye me a Mbəlom a bəram kway, faya ma dūwuleye me a Mbəlom

\* 8:20 Zəba mə Madazlay i wu hay 3.17.

tə dərev ɲgay peteh andza faya ma siye dəretsətseh, a ze ha wu nakə mətsike tə bazlam aye.

<sup>27</sup> Mbəlom a sər wu nakə mə dərev i ndo hay aye. A sər wu nakə Məsəfəre ma tsətsahiye faya aye dərmak hərwi Məsəfəre faya ma duwulay me a bəram i ndo ɲgay hay ada wu neheye a yay a gər a Mbəlom aye nakə faya ma duwuleye me aye.

<sup>28</sup> Ndo neheye ta wudə Mbəlom aye na, Mbəlom kə zalatay hərwi ada tā ge wu nakə a yay a gər aye. Ka sərakwa ha na, Mbəlom a ge məsler ta nəteye hərwi ada wu hay tebiye kə ndzatay a gər na, mā ge ɲgwalak eye.

<sup>29</sup> Ndo neheye Mbəlom a pala tay ha ahəl niye aye na, kə pa tay ha wal hərwi ada tā ndzəkit bo andza wawa ɲgay Yesu, hərwi ada Wawa ɲgay Yesu mā təra malkwara mə walaɲ i wawa ɲgay neheye haladzay aye.

<sup>30</sup> A pa tay ha wal dekdək tsa bay, kə zalatay dərmak hərwi ada tā təra ndo ɲgay hay. A zalatay dekdək tsa bay, ka təra ha ɲgwalak eye hay ka dəre ɲgay. Neɲgeye niye dekdək tsa bay, kə vəlatay məzlaḅ dərmak.

### *Mbəlom ma wudīye kway kame kame*

<sup>31</sup> Andza niye na, ka gwadəkweye faya sa mey? Kə ge Mbəlom neɲgeye tə nəkway na, ndəray ma sliye fakwaya bay!

<sup>32</sup> Mbəlom, neɲgeye kə təma ha wawa ɲgay dədəɲ eye bay. A sləra ahaya hərwi ada mā yaw mā mət hərwi kway tebiye. Mbəlom kə vəlakway wawa niye tuk na, ka dzalum na, ma vəlakweye wu hay tebiye bay daw? Ta dedək, ma vəlakweye siye i wu hay tebiye dərmak.

<sup>33</sup> Way nakə ma sliye məmatay ha mənese a ndo neheye Mbəlom a pala tay ha, a pa tay ha wal aye na, way? Ndəray andaya bay. Mbəlom eye tə gər ɲgay ka təra kway ha ɲgwalak eye hay ka dəre ɲgay.

<sup>34</sup> Way nakə ma sliye məgəse tay a sariya na, way? Ndəray andaya bay. Yesu Kəriste tə gər ɲgay eye kə mət hərwi kway, sa na, Mbəlom kə lətse ahaya abəra ma mədahaɲ, neɲgeye mandza eye tə həlay i mənday i Mbəlom. Neɲgeye, faya ma duwuleye me a Mbəlom hərwi kway.

<sup>35</sup> Way nakə ma ɲgəniye kway ha ka bo abəra tə Kəriste hərwi ada mā wudəkway sa bay na, way? Dəretsətseh daw, mədzal gər daw, madzəgur me nakə ta dzəguriye fakwaya me tsukudu, may daw, mətawak daw, məkəde nakə ta kədiye kway mədahaɲ eye daw?

<sup>36</sup> Andza nakə mawatsa eye mə Derewel i Mbəlom aye, a gwad:  
«Hərwi yak Mbəlom, nakə faya ta pəliye tsəved məkəde may kwa a həlay waray aye.

Ka dəre i ndo hay nəmay na, andza təbaɲ neheye ta zlatay dəy aye.†»

<sup>37</sup> Duh nəmaa ɲgwasa ka dəretsətseh neheye tebiye ta gədaɲ i ndo nakə a wudə may aye.

<sup>38</sup> Na sər ha ta dedək wuray andaya nakə ma ɲgəniye kway ha tə neɲgeye hərwi ada mā wudə kway sa bay aye na, andaya bay. Kwa mədahaɲ, kwa sifa, kwa gawla i Mbəlom hay ada kwa wu neheye ta gədaɲ eye mə mbəlom aye, kwa wu neheye anəke aye, ada kwa wu neheye ta deyeweye kame aye, kwa ndo neheye ta gədaɲ eye ka məndzibəra aye,

<sup>39</sup> kwa gədaɲ neheye ka magərmbəlom aye, kwa wu neheye ma bəd aye, kwa wu neheye tebiye Mbəlom a ge aye na, ta sliye faya maɲgəne kway ha ka bo abəra ta Mbəlom hərwi ada mā wudə kway sa bay aye na, ta sliye faya bay. Ka sərakwa ha niye na, hərwi Bəy Maduweɲ Yesu Kəriste.

† 8:36 Dames hay 44.23.

## 9

*Yahuda hay*

1 Wu nakə na tsikiye aye na, dedək, hərwi neŋ i Yesu Kəriste, na rawiye me bay. Məsəfəre Tsədəŋŋa eye faya ma deŋeye ha bazlam ga na, dedək ada mədzal gər ga bəbay andza niye.

2 Mevel a wur fagaya haladzay, faya ma geŋeye dəretsətseh huya,

3 hərwi gwala ga Yahuda hay. Nəteye na, malamar ga hay. Tadə tsəved andaya na, Mbəlom mâ vələŋ mezeleme ada mâ mbəl tay ha düh. A seŋ na, mâ vələŋ mezeleme, mâ ŋgəna ga ha ka bo abəra tə Yesu Kəriste hərwi madzəne tay.

4 Nəteye İsrayel hay, Mbəlom a pala tay hərwi ada tâ təra wawa ŋgay hay. Ka bəzatay ha məzlaḅ ŋgay. Kə ɓar dzam ta nəteye, kə vələtay bazlam mapala eye, kə datay ha tsəved i mədəslay ha gər, kə tsikatay wu nakə ma giye hərwi tay aye.

5 Nəteye ti yaw ma hulfe i Abraham ta wawa ŋgay hay. Kəriste dərmak ahəl nakə a təra ndo aye na, neŋgeye slala tay. Kəriste neŋgeye Mbəlom, a ləva wu tebiye. Zambadəkway ka tor eye! Mâ ge bo andza niye.\*

6 Na gwad na, wu nakə Mbəlom a gwad ma giye hərwi ndo neheye ka təra kəriye na, na tsik bay. Wu nakə a tsik aye na, kə ge bo. Ane tuk na, siye i ndo i İsrayel hay nəteye ndo i Mbəlom hay bay.

7 Wawa i Abraham hay na, haladzay, ane tuk na, nəteye tebiye wawa ŋgay hay dedək eye andza nakə a Mbəlom a tsik aye bay. Mbəlom a gwaday a Abraham ahəl niye: «Hulfe yak dedək eye ma deyeweye na, ma hulfe i wawa yak İzak.†»

8 Andza məgwede: Wawa i Abraham hay ta təra wawa i Mbəlom hay hərwi bəba tətə tay bay. Ta təra wawa i Mbəlom hay hərwi wu nakə Mbəlom a gwad ma vəliye aye dəkdek.

9 Wu nakə Mbəlom a gwad ma vələye aye na: «Aza həlay eye nakə na pa aye kə sla, na diye naha na, Sara kə wa wawa. Ma wiye wawa hasləka eye.‡»

10 Neŋgeye niye dəkdek bay. Rebeka andaya dərmak. Neŋgeye ŋgwas i bəba tətə kway İzak. Kə wa mawsa hay.

11-12 Mbəlom a gwaday: «Wawa bagwar eye ma geye məsler a malamar ŋgay wawa eye.» Ahəl nakə Mbəlom a tsik andza niye na, ta ge ŋgwalak bay, ta ge mənese bay. Rebeka kə wa tay zuk bay. Mbəlom a ge andza niye hərwi məde ha, a gawa wu na, andza nakə a say aye. Ma zliye ndo ŋgay mə walaŋ i ndo hay na, ma zliye hərwi məsler tay ŋgwalak eye bay.§

13 Andza nakə mawatsa eye mə Derewel i Mbəlom, Mbəlom a gwad: «Na wuda Zakob, ane tuk na, na kal ha Ezayu.\*»

14 Niye na, andza məgwede: Mbəlom a ge wu hay ta tsəved eye bay daw? A'ay, andza niye bay.

15 A gwaday a Musa ahəl niye: «Na geye ŋgwalak a ndo nakə a seŋ məgay ŋgwalak aye. Na sakay naha a ndo nakə a geŋ mə bo aye.†»

16 Mbəlom a zla ndo na, a zla na hərwi nakə a say məgay ŋgwalak aye dəkdek bəna hərwi nakə a say a ndoweye kəgəbay hərwi məsler ŋgay bay.

\* 9:5 Bəba tətə niye hay na, Abraham, İzak, Zakob ada wawa tay hay. † 9:7 Madazlay i wu hay 21.12. ‡ 9:9 Zəba mə Madazlay i wu hay 18.10-14. § 9:11-12 Zəba mə Madazlay i wu hay 25.23.

\* 9:13 Malasi 1.2-3. † 9:15 Madayaw abəra ma Ezipt 33.19.

<sup>17</sup> Mbəlom kə tsikay a Farawon dərmak ada mawatsa eye mə Derewel ŋgay, a gwad: «Na təra kar ha bəy na, hərwi ada ahəl nakə ka rəheŋ ha gər bay aye na, na bəziye ha gədaŋ ga a ndo hay tebiye ka nəkar ada məzele ga mâ dā a zləm kwa ka waray ka məndzibəra.†»

<sup>18</sup> Andza niye Mbəlom na, ma giye ŋwalak a ndo nakə a say aye. Ma kulay ha dərev a ndo nakə a say aye.

*Mbəlom na, andza ndo məŋgere gərwa*

<sup>19</sup> Agəla ndəray ma gwadiye: «Tadə kə ge andza niye na, Mbəlom faya ma matay ha maŋgok a ndo hay na, hərwi mey? Nəteye faya ta giye na, wu nakə bo ŋgay eye a pa hərwi tay aye.»

<sup>20</sup> Nəkar ndo zezeŋ kariye! Nəkar nakə faya ka tsətsahiye andza niye, ka may ha maŋgok a Mbəlom andza niye na, nəkar eye na, way? Səŋgəle i dodo ma sliye faya məgwaday a ndo nakə a ŋgar na aye: «Ka ŋgar ga andza niye hərwi mey?» na, ma tsikiye tətə dāw?

<sup>21</sup> Ndo nakə a ŋgar səŋgəle na, gədaŋ ŋgay andaya məge wu nakə a say aye ta dodo. Ma sliye faya maŋgəna ha dodo sulo, ma zliye neŋged, ma ŋgariye ha səŋgəle nakə ta giye ha məsler na, pat i magurlom aye. Neŋged na, ma ŋgariye ha səŋgəle nakə ta giye ha məsler pat pat aye.

<sup>22</sup> Ayaw, tadə kə say a Mbəlom məge andza ndo məŋgere gərwa na me yak andaya mə dəma dāw? A say na, ndo hay tâ sər ha neŋgeye ta mevel eye ada neŋgeye gədaŋ eye. Hərwi niye, ma zliye ŋgatay hərwi ndo neheye neŋgeye ta mevel eye fataya neheye həbe dā mədze tay ha abəra mə dəma aye.

<sup>23</sup> Mbəlom a ge andza niye na, hərwi ada ndo hay tâ sər ha neŋgeye məzlaḅ eye haladzay ada ma ŋgəniye məzlaḅ ŋgay niye a nəteye, a say məgatay ŋwalak. Ba kə ləva ha bo kurre hərwi ada tâ huta məzlaḅ ŋgay.

<sup>24</sup> Nəkway tebiye ndo neheye Mbəlom a pala matəre kway ha i ŋgay aye. A pala na, Yahuda hay dəkdek tsa bay. A pala nəteye ta siye i ndo hay dərmak.

<sup>25</sup> Andza nakə Mbəlom a tsik mə dərewel i Oze nakə a watsa, a gwad:

«Ndo neheye ahəl niye ndo ga hay bay aye na,  
na gwadateye: Nəkurom ndo ga hay,  
Slala nakə ahəl niye na wudā bay aye,  
na gwadateye: Na wudā kar.»

<sup>26</sup> Ada

«Ma təv nakə tə gwadətay a ndo hay:

“Nəkurom ndo ga hay bay”,

ta zalateye Wawa i Mbəlom nakə ta sifa aye.§»

<sup>27</sup> Ezay ndo məde ha bazlam i Mbəlom kə tsik ka gər tay dərmak, kə tsik ta magala, a gwad:

«Tadə Israyel hay kwa ta ge haladzay andza hewiyen ka me i bəlay na,  
sərum ha ndo neheye Mbəlom ma təmiye tay ha aye na, nəteye haladzay bay.

<sup>28</sup> Bəy Maduweŋ Mbəlom ma giye mahonok bay,

ma deyeweye ka məndzibəra ma giye wu nakə a tsik aye.\*»

<sup>29</sup> Andza Ezay nakay eye 6a kə tsik faya, a gwad:

«Tadə Bəy Maduweŋ Mbəlom Gədaŋ eye,  
mâ gər ha siye i gwala kway hay bay na,  
ka dzakweye andza ndo i Sodom hay ta Gomora hay.†»

† 9:17 Madayaw abəra ma Ezipt 9.16. § 9:26 Oze 2.1-3; 2.25. \* 9:28 Ezay 10.22-23. † 9:29 Madazlay i wu hay 19.23-28.

*Yahuda hay tə sər tsəved dedek eye bay*

<sup>30</sup> Andza mægweđe mey? Andza mægweđe na, ndo neheye nətəye Yahuda hay bay aye na, nətəye ta pəla tsəved matəre ɲɟwalak eye ka dərə i Mbəlom bay, ane tuk na, anəke ta təra ɲɟwalak eye ka dərə ɲɟay. Andza niye hərwi ta dzala ha ka neɲgeye.

<sup>31</sup> Tə dəd na, Yahuda hay nətəye ta pəla bazlam i Musa mapala eye məpay bəzay hərwi ada t̄a təra ɲɟwalak eye hay ka dərə i Mbəlom andza niye, ane tuk na, ta dəd ka tsəved.

<sup>32</sup> Tə dəd ka tsəved na, hərwi mey? Hərwi tə dzala na, ta təriye ɲɟwalak eye hay ka dərə i Mbəlom tə wu nakə bo tay eye tə gawa aye ada tə dzala ha ka Mbəlom bay. Hərwi niye ta kərah Yesu neɲgeye nakə andza kwar nakə ndo hay ta ndəfiye faya sik ta dəfiye,

<sup>33</sup> tə tsik faya mə Derewel i Mbəlom aye. Mə dərewel niye na, Mbəlom a gwad:

«Zəbum! Na piye kwar a wuzlahgəma i Zerozelem.

Ndo hay ta ndəfiye faya sik.

Hotokom nakə ndo hay ta dəfiye hərwi ɲɟay aye.

Ane tuk na, ndo nakə kə pa faya mədzal gər ɲɟay aye na,

wuray ma dzəmiye na dādā sa bay.\*»

**10**

<sup>1</sup> Malamar ga hay, a seɲ tə dərəv ga peteh, ndo ga hay t̄a yaw hərwi ada Mbəlom mā mbəl tay ha. Hərwi niye neɲ faya na dūwuleye me a Mbəlom haladzay.

<sup>2</sup> Na sər ha ta dedek a satay məpay bəzay a Mbəlom peteh. Ane tuk na, tsəved nakə dedek eye məpay bəzay a Mbəlom aye na, tə sər bay.

<sup>3</sup> Tsəved nakə Mbəlom ma təriye ha ndo ɲɟwalak eye kame ɲɟay aye na, tə sər bay. Ta pəla tsəved tay wal. Andza niye, tsəved nakə Mbəlom ma təriye tay ha ndo hay ɲɟwalak eye kame ɲɟay aye na, a satay bay.

<sup>4</sup> Na tsik andza niye na, hərwi ahəl nakə Kəriste a yaw aye na, ka ndəv ha bazlam mapala eye tebiye. A ge andza niye na, hərwi ada kwa way kə dzala ha ka neɲgeye na nətəye na, Mbəlom ma təriye tay ha ɲɟwalak eye hay kame ɲɟay.

*Mbəlom ma təmiye tay ha ndo neheye tə dzala ha ka neɲgeye aye*

<sup>5</sup> Musa tə gər ɲɟay kə watsa ka tsəved i məpay bəzay a bazlam mapala eye, ta tsəved eye nakay ndo ma təriye ɲɟwalak eye kame i Mbəlom. A watsa, a gwad: «Ndo nakə kə pay bəzay tebiye a bazlam mapala eye na, ma hutiyə sifa dedek eye tə neɲgeye.\*»

<sup>6</sup> Tsəved nakə ndo hay ta təra ɲɟwalak eye hay kame i Mbəlom hərwi nakə tə dzala ha ka neɲgeye aye na, wal. Mawatsa eye mə Derewel i Mbəlom, a gwad ka tsəved eye niye: «Ka tsətsah mə dərəv: “Mata tsele a mbəlom way?” bay.†» Andza mægweđe: Mata tsele məzalay naha a Yesu Kəriste hərwi ada mā mbəzlaw na, way?

<sup>7</sup> «K̄a tsik mə dərəv yak: “Mata mbəzle a təv i mədahaɲ hay ka dala way?” sa bay.‡» Andza mægweđe: Mata zalayaw a Yesu Kəriste hərwi ada mā yaw na, way? Ba kə lətsew abərə ma mədahaɲ tsiy.

‡ 9:33 Ezay 28.6. \* 10:5 Levitik 18.5. † 10:6 Bazlam mapala eye masulo eye 30.12. ‡ 10:7 Bazlam mapala eye masulo eye 30.14.

<sup>8</sup> Derewel i Mbəlom a gwad duh na: «Bazlam i Mbəlom neŋgeye bəse tə nəkar, neŋgeye dərəŋ bay, neŋgeye mə bazlam yak, neŋgeye mə dərəv yak.<sup>§</sup>» Bazlam eye neŋgeye nate nakə faya nəmay nəmaa datay ha a ndo hay aye, nəmay faya nəmaa gwadiye: «Dzalum ha ka Mbəlom.»

<sup>9</sup> Tadə ka tsik tə bazlam yak «Yesu Kəriste na, Bəy Maduweŋ» ada ka təma a dərəv yak Mbəlom kə lətse ahaya abəra ma mədahaŋ na, Mbəlom ma təmiye kar ha.

<sup>10</sup> Tadə ka dzalakwa ha ka Yesu tə dərəv kway na, ka tərakweye ŋwalak eye hay kame i Mbəlom. Tadə ka gwadakwa tə bazlam kway Yesu Kəriste Bəy Maduweŋ na, Mbəlom ma təmiye kway ha.

<sup>11</sup> Andza tə watsa mə Derewel i Mbəlom na, tə gwad: «Ndo nakə kə pa faya mədzal gər ŋgay aye na, wuray ma dzəmiye na dāda sa bay.\*»

<sup>12</sup> Mbəlom a tsikatay wu niye a nəteye tebiye. Wuray ka ŋgəna tay ha ka bo abəra Yahuda hay ta ndo neheye nəteye Yahuda hay bay aye bay. Bəy Maduweŋ neŋgeye Bəy Maduweŋ i ndo hay tebiye. Faya ma giye ŋwalak a ndo neheye faya ta duwuleye me aye tebiye.

<sup>13</sup> Andza mawatsa eye mə Derewel i Mbəlom na, tə gwad: «Kwa way ka duwulay me a Bəy Maduweŋ mā təma ha na, Bəy Maduweŋ ma təmiye ha.†»

<sup>14</sup> Ane tuk na, ta dzala ha ka neŋgeye bay tuk na, ta duwulay me na, kəkay? Ta tsəne labara ŋgay bay tuk na, ta dzaliye ha ka neŋgeye na, kəkay? Ndəray kə tsikatay bazlam ŋgay bay tuk na, ta tsəniye labara ŋgay na, kəkay?

<sup>15</sup> Ada tə slər ndo i maslaŋ hay bay tuk na, ndo i maslaŋ hay ta diye ta tsikateye na, kəkay? Andza mawatsa eye mə Derewel i Mbəlom na, a gwad: «Zəbum ma kəkay nakə ndo hay faya ta ŋgwasiye ta ndo neheye ti yaw məde ha Labara ŋwalak eye.‡»

<sup>16</sup> Ane tuk na, maa təma Labara ŋwalak eye na, ndo hay tsekweŋ tsa. Ezay ndo məde ha bazlam i Mbəlom a gwad: «Bəy Maduweŋ, maa təma bazlam yak nakə nəmaa dā ha aye na, way? Ndo hay haladzay bay.§»

<sup>17</sup> Andza niye, ndoweeye kə dzala ha na, kə tsəne təday. Ndoweeye kə tsəne labara i Yesu Kəriste na, andza məgwede ndəray kə tsikay təday.

<sup>18</sup> Kə ge andza niye na, na tsətsahiye: Ta dedek ndo i Israyel hay ta tsəne labara nakay bədaw? Ta tsəne. Andza mawatsa eye mə Derewel i Mbəlom, a gwad:

«Ta tsəne bazlam tay ka məndzibəra tebiye,

ada bazlam tay kə ndisl ka kokway i məndzibəra?\*

<sup>19</sup> Na tsətsahiye sa: Ta dedek ndo i Israyel hay ta sər ha bədaw? A satay masəre ha bay. Maa tsik ahəl niye təday na, Musa, a gwad:

«Mbəlom a gwad:

Nəkurom Israyel hay, na təriye kurom ha

kā gum dərə ka slala nakə kəriye a dəd dala bay aye.

Ka gumeye mevel,

hərwi slala i ndo neheye tə sər wuray bay aye.†»

<sup>20</sup> Ma dəba eye, Ezay ndo məde ha bazlam i Mbəlom kə tsik parakka, a gwad, Mbəlom a gwad:

«Ndo neheye ta pəlawə ga bay aye,

ta huta ga.

Na dā tay ha bo a ndo neheye,

§ 10:8 Bazlam mapala eye masulo eye 30.14. \* 10:11 Ezay 28.16. † 10:13 Zowel 3.5. ‡ 10:15

Ezay 52.7. § 10:16 Ezay 53.1. \* 10:18 Dəmes hay 19.5. † 10:19 Bazlam mapala eye masulo eye 32.21.

ta tsətsahawa ga bay aye.‡»

<sup>21</sup> Ka gər i Israyel hay na, Mbəlom a gwad:

«Na bəza ha həlay ga.

Hwapat neŋ faya na gateye wiyaw a ndo ga hay hərwi ada tã yaw.

Ane tuk na, ta rəheŋ ha gər bay, ta kərah ga.Š»

## 11

### *Mbəlom ma gəriye tay ha Yahuda hay bay*

<sup>1</sup> Yaw, faya na tsikakumeye: Kə ge andza niye na, andza məgwede Mbəlom kə kal tay ha ndo ŋgay hay daw? A'ay, kə kal tay ha bay. Neŋ tə gər ga, neŋ ndo i Israyel, na yaw abəra ma hulfe i Bendzameŋ. Neŋ slala i Abraham.

<sup>2</sup> Mbəlom kə gər tay ha ndo ŋgay hay bay tebiye. A pala tay ha na, zla anəke bay hərwi ada tã təra ndo ŋgay hay. Ka sərūm wu nakə tə watsa ka Eliya ndo məde ha bazlam i Mbəlom mə Derewel i Mbəlom aye bədaw? Eliya faya ma wudiye ka Israyel hay kame i Mbəlom. A gwad:

<sup>3</sup> «Bəy Maduweŋ, ndo neheye na, ta kəd ndo məde ha bazlam yak hay, ta mbəzl ha təv məvəlaka wu hay. Maa zəkaw na, neŋ nətə ŋgeweŋ ada a satay məkəde ga dərma\*.»

<sup>4</sup> Mbəlom, neŋgeye a mbəday faya na, kəkay? A gwaday: «A'ay, nəkar mehiyekeye bay. Na ləva ha bo ta ndo hay gwezem tasəla neheye ta peŋeye bəzay aye. Ta rəhay ha gər a kule i Ba'al təbey.†»

<sup>5</sup> Kwa ahəl kway nakə anəke aye na, andza niye dərma. Mbəlom a pala mə walaŋ i Israyel hay siye i ŋgal tsa. A pala tay na, hərwi a gatay ŋgwalak a ndo hay.

<sup>6</sup> Kə ge Mbəlom a gatay ŋgwalak hərwi məpele tay ha na, andza məgwede a pala tay ha hərwi məsler tay nakə tə ge aye bay. Kə ge Mbəlom a palawa ndo hay hərwi məsler tay na, ŋgwalak ŋgay ka təra ŋgwalak sa bay.

<sup>7</sup> Niye andza məgwede na, Israyel hay ta huta wu nakə faya ta pəliye bay. Mə walaŋ tay na, ndo ma ŋgal eye nakə Mbəlom a pala tay aye, nəteye na, ta huta na. Siye hay na, Mbəlom kə kula tay ha gər tay tŋgwa tŋgwa.

<sup>8</sup> Andza nakə mawatsa eye mə Derewel i Mbəlom aye na, a gwad:

«Mbəlom ka təra tay hay ada tã sər wuray bay.

Ka dərəzlatay ka dərə,

kə dəkətay na zləm hus ka bəgom ta ndziye andza niye.‡»

<sup>9</sup> Davit dərma a gwad:

«Wu mənday tay nakə ta ndiye mâ gəs tay

andza balay nakə a mbəzl wu aye,

tã dəd a dəma,

Mbəlom mâ satay dərətsətseh.

<sup>10</sup> Tã ge guluf,

ada tã ŋgatay a dərə sa bay!

Tã huta dərətsətseh huya

hərwi ada dərəv mâ ye fataya abəra!Š»

<sup>11</sup> Yaw! Na tsətsahiye sa: Ahəl nakə matədəkweŋ a ndzatay a Yahuda hay aye na, ta dəd mambəŋ daw? A'ay, ta dəd mambəŋ bay! Ane tuk na, Mbəlom a mbəl tay ha slala mekeleŋ eye hay na, hərwi nakə nəteye tə ge mezeleme aye.

‡ 10:20 Ezay 65.1. § 10:21 Ezay 65.2. \* 11:31 Bəy hay 19.10, 14. † 11:41 Bəy hay 19.18. ‡ 11:8

Bazlam mapala eye masulo eye 29.3; Ezay 6.10. § 11:10 Dəmes hay 69.23-24.



Mbəlom a ge andza niye na, hərwi ada Yahuda hay tâ ge sələk ka siye i slala mekeləŋ eye hay ada tâ pəla tsəved hərwi gər tay.

<sup>12</sup> Ahəl nakə İsrayel hay tə ge mezeleme aye na, Mbəlom a gatay ŋgwalak a siye i ndo hay ka məndzibəra. Ndo siye hay ta huta ŋgama haladzay mə həlay i Mbəlom hərwi Yahuda hay nəteye mətawak eye hay ka tsəved i Mbəlom. Kə ge Mbəlom a ge ŋgwalak a siye i slala mekeləŋ eye hay a həlay nakə Yahuda hay ta kərah marəhay ha gər a Mbəlom aye na, ahəl nakə aza Yahuda hay tebiye ta maweje ka təv ŋgay aye ta dedek ma piye fataya ŋgama, ma ziye.

*Bazlam nakə Pol a tsikatay a ndo neheje Yahuda hay bay aye*

<sup>13</sup> Na tsikiye anəke na, a nəkurom neheje Yahuda hay bay aye. Neŋ na, ndo i maslaŋ i Yesu. A sləra ga ahaya na, a nəkurom neheje Yahuda hay bay aye. Yaw, hərwi niye neŋ faya na ŋgalakiye ha ta məsler nakə a vələŋ aye.

<sup>14</sup> A seŋ tadə ma giye bo na, gwala ga hay tâ zəba faya andza niye, siye hay mə walaŋ tay tâ ge sələk ka ndo neheje Yahuda hay bay aye, tâ yaw hərwi ada Mbəlom m̄a təma tay ha ta məsler ga dərma.

<sup>15</sup> Ahəl nakə Mbəlom a gər tay ha Yahuda hay aye na, kə ma ha ka bo ndo i məndzibəra hay tə neŋgeje. Kə ge andza niye na, ahəl nakə aza Mbəlom ma ma tay ahaya Yahuda hay ka təv ŋgay sa aye na, wu eye ma giye na, kəkay? Niye ma vəliye sifa a ndo neheje ta mət aye.

<sup>16</sup> Tadə tə dəs peŋ, tə vəlay a Mbəlom na, andza məgwede peŋ eye tebiye i ŋgay dərma.\* Tadə zləlay i dərizl i gərdaf i ŋgay na, hawal eye hay i ŋgay dərma.

<sup>17</sup> İsrayel na, andza dərizl i gərdaf i tetədöz nakə Mbəlom a dəs faya abəra hawal eye hay aye. A dəs tay faya abəra na, a tapa<sup>†</sup> faya nəkar nakə Yahuda bay aye. Andza hawal i dərizl i gərdaf i kəsaf. Anəke faya ka ŋgasliye ha bo ta məse yam eye nakə a tsalaw ma zləlay i dərizl i gərdaf i tetədöz aye.

<sup>18</sup> Kə ge andza niye na, kâ kəts tay ha bay. Ka dəsłumay ha gər a bo kurom na, hərwi mey? Nəkurom na, hawal hay tsa. Gədaŋ i hawal hay a yaw na, abəra ma zləlay, bəna gədaŋ i zləlay a yaw abəra ma hawal hay bay.

<sup>19</sup> Agəla nəkar ka gwadije: «Ayaw, Mbəlom kə dəs siye i hawal hay hərwi ada m̄a tapa ga a dəma.»

<sup>20</sup> Ka tsik na, dedek. Mbəlom a dəs tay ha na, hərwi nakə ta dzala ka neŋgeje bay aye. I yak na, hərwi nakə nəkar ka dzala ha ka neŋgeje nakə a vələka təv niye aye. Kâ ge ha zlapay bay, dzədzaray düh a Mbəlom.

<sup>21</sup> Tadə Mbəlom ka həhar tay ha Yahuda hay kwa nəteye andza hawal dedek eye bəbay, ka dzala mə gər yak na, ma həhariye kar nəkar nakə a tapa kar mətepe mətepe aye bay na, hərwi mey?

<sup>22</sup> Tsəne! Mbəlom neŋgeje ŋgwalak eye ada neŋgeje mevel eye dərma. A ge mevel ka ndo neheje tə dəd abəra ka tsəved aye. Ane tuk na, nəkar na, ma giye ŋgwalak tadə huya faya ka pay bəzay hərwi nakə a gaka ŋgwalak aye dekdek. Tadə ka gum andza niye bay na, ma dəsiye kar dərma.

<sup>23</sup> Yahuda hay na, tadə ta ma ka tsəved, ta yaw ta dzala ha na, Mbəlom ma miye tay ha, ma tapiye tay ha. Faya na tsikakumeye ta dedek, gədaŋ ŋgay andaya məme tay ha.

<sup>24</sup> Nəkurom neheje Yahuda hay bay aye na, nəkurom hawal i dərizl i gərdaf i kəsaf hay neheje tə dəs tay ha abəra ka təv tay aye ada ti ye kurom ha mətepe

\* **11:16** Məpesle 15.19-21. † **11:17** Tə bazlam i Sara «greffer» na, mətepe hawal i dərizl i gərdaf mekeləŋ eye ka dərizl i gərdaf neŋged. Dərizl nakə tə tapa faya hawal i dərizl i gərdaf neŋged aye ma wiye hohway ŋgwalak eye.

ka dərizl i gərđaf ɲgwalak eye i guvah nakə a ndzawa ka təv tay bay aye. Tađə Mbəlom kə sla faya məge wu mawura bo eye andza niye na, ka dzalum na, ma niye tay ha Yahuda hay a təv tay nakə ahəl niye aye bay kəkay? Nəteye neheye hawal dedək eye hay aye.

### *Yahuda hay ta maweye ka tsəved i Mbəlom*

<sup>25</sup> Andza niye, malamar ga hay, a seɲ na, sərɲum ha bazlam nakay bagwar eye nakə Mbəlom a ɗa ha parakka, hərwi ada kâ dzalumay a gər kurom nəkurom ka tsahum bay. Siye hay mə walaɲ i Israyel hay ta kula ha gər tay ka Mbəlom. Ayaw! Andza niye, ane tuk na, ta ndziye huya andza niye bay. Ndo neheye Yahuda hay bay aye Mbəlom a pala tay ha aye tã dzala ha təday ada ndo i Israyel hay ta dzaliye ha.

<sup>26</sup> A həlay niye na, ndo i Israyel hay tebiye ta təmiye, andza nakə mawatsa eye mə Derewel aye na, Mbəlom a gwad:

«Ndo nakə ma təmiye tay ha ndo hay aye na,  
ma deyeweye abəra ma gəma i Zerozelem.

Ma mbatiye ha mezeleme i gwala i Zakob.

<sup>27</sup> Nakay na, dzam nakə na ɓariye ta nəteye  
a həlay niye na pəsətay ha mezeleme tay aye.‡»

<sup>28</sup> Yahuda hay ta kərah Labara ɲgwalak eye, ta təra ndo mənə ɗəre i Mbəlom. Andza niye hərwi ada Mbəlom mə mbəl kurom ha, nəkurom neheye Yahuda hay bay aye. Ane tuk na, Mbəlom a pala tay ha na, hərwi tã təra i ɲgay ada a wuda tay ha hərwi ɓa kə tsikatay a bəba tətə tay hay andza niye.

<sup>29</sup> Mbəlom kə zla ndoweye na, ada kə pa faya ɲgama na, ma mbədeye həlay a mədzal gər ɲgay bay.

<sup>30</sup> Nəkurom neheye Yahuda hay bay aye, ahəl niye na, nəkurom ka rəhumay ha gər a Mbəlom bay. Ane tuk na, anəke na, ka gumay mə bo a Mbəlom, hərwi Yahuda hay ta rəhay ha gər bay.

<sup>31</sup> I tay na, andza niye dərmaɲ. A həlay nakay anan eye, ta rəhay ha gər a Mbəlom bay ada ma gateye ɲgwalak ɗuh. Ane tuk na, andza niye hərwi ada nəteye dərmaɲ tã mbəda gər ka təv i Mbəlom ada tã gay mə bo a Mbəlom.

<sup>32</sup> Andza niye, Mbəlom kə gər ha kwa way tebiye hərwi ada tã rəhay ha gər bay. A ge andza niye na, hərwi ada nəteye tã gay mə bo tebiye.

### *Zambadəkway a Mbəlom*

<sup>33</sup> Ayaw! Mbəlom na, zlele eye mə wu hay tebiye! Metsehe ɲgay a ze kwa meye tebiye, a sər wu hay tebiye. Wu nakə a dzala mə ɗərev ɲgay aye na, a say məgwedə meye na, ndəray ma sliye məme ahaya abəra mə ɗəma bay, ndəray ma sliye məsəre wu nakə faya ma giye bay. Andza nakə mawatsa eye mə Derewel i Mbəlom aye, a gwad:

<sup>34</sup> «Wu nakə Mbəlom a dzala aye na, maa sər na, way?

Maa ɗay ha wu ka həlay a Mbəlom na, way?§»

<sup>35</sup> «Maa vəlay wu a Mbəlom nəte

hərwi ada Mbəlom ma vəleye a ɗəma na, way?\*

<sup>36</sup> Nəday andaya bay hərwi maa ge wu hay tebiye na, Mbəlom.

Nəgeye a tsəpa wu hay tebiye ada wu hay tebiye andaya na,

hərwi ada tã təra i ɲgay.

Zambadəkway ka tor eye. Mâ təra andza niye!

‡ 11:27 Ezay 59.20-21. § 11:34 Ezay 40.13. \* 11:35 Zob 41.11.

## 12

### *Mede i ndo mągay mąsler a Mbəlom*

<sup>1</sup> Malamar ga hay, na ɔakum ha hadzəgay nakə Mbəlom a gakway ɲgwalak aye. Hərwi niye, faya na gakumeye amboh: Vəlumay ha bo kurom peteh a Mbəlom andza vo'ar nakə tə kəɔaway a Mbəlom aye ada ka dayumeye a gər. Ane tuk na, nəkurom ka ndzumeye tə ɔəre. Nakay na, wu nakə a ye ka bo məɔəslay naha gər a Mbəlom aye.

<sup>2</sup> Kā pumay bəzay a ndo i məndzibəra hay bay. Mbəlom mā vəlakum mədzal gər wedeye hərwi ada mā mbəɔa ha ɔərev kurom. Təɔə ka gum andza niye na, ka sərume ye wu nakə a say a Mbəlom aye. Andza mągwede: Ka sərume ye wu nakə ɲgwalak eye, wu nakə a yay a gər aye, ada wu nakə a ye ka bo aye.

<sup>3</sup> Mbəlom kə geɲ ɲgwalak ɲgay kəriye, ka pa ga a məsler ɲgay. Hərwi niye neɲ faya na gwəɔakumeye a nəkurom tebiye: Kā ɔəslumay ha gər a bo kurom bay, sərur ha ɔuh nəkurom ta deɔek na, kəkay. Zəbum ka gəɔaɲ neheye Mbəlom a vəlakum aye, hərwi ada kwa way mā gay sariya a gər ɲgay ta tsəved eye.

<sup>4</sup> Kwa way bo ɲgay na, nəte, ane tuk na, vərezl hay faya wal wal haladzay ada vərezl eye niye hay kwa way ta məsler ɲgay wal.

<sup>5</sup> Nəkway neheye madzapa eye tə Yesu Kəriste aye na, andza niye. Nəkway haladzay, ane tuk na, nəkway madzapa eye nəte andza bo nəte. Nəkway tebiye madzapa eye ka bo i ndo nəte andza bo nəte andza vərezl neheye mazəva eye ka bo i ndo aye.

<sup>6</sup> Mbəlom kə vəlakway gəɔaɲ wal wal, andza nakə a say məvəlakway aye. Kə ge andza niye na, kwa way mā ge məsler ta gəɔaɲ nakə Mbəlom a vəlay aye. Təɔə Mbəlom a vəlaka gəɔaɲ məɔə ha bazlam ɲgay na, ɔa ha andza nakə ka sər Mbəlom a vəlaka gəɔaɲ aye.

<sup>7</sup> Təɔə Mbəlom a vəlaka gəɔaɲ ka madzəne ndo hay na, dzəna andza nakə a ye ka bo aye. Təɔə Mbəlom a vəlaka gəɔaɲ ka matətikatay wu a ndo hay na, tətikatay.

<sup>8</sup> Təɔə Mbəlom a vəlaka gəɔaɲ məmatay naha ɔərev a ndo hay na, matay naha ɔərev. Təɔə Mbəlom a vəlaka gəɔaɲ ka vəlatay wu a mətawak hay na, vəlatay tə ɔərev yak peteh. Təɔə Mbəlom a vəlaka gəɔaɲ ka məndzatay kame a ndo hay na, ge na məsler eye tə ɔərev yak peteh. Təɔə Mbəlom a vəlaka gəɔaɲ mągatay ɲgwalak a ndo hay na, gatay ta mąɲgwese.

<sup>9</sup> Wuɔum ndo hay tə ɔərev kurom peteh, ka wuɔum tay ha tə bazlam ɔekɔek tsa bay. Numay ɔəre a wu nakə ɲgwalak eye bay aye. Wuɔum wu nakə ɲgwalak eye.

<sup>10</sup> Wuɔum bo mə walaɲ kurom nəte nəte, andza nakə malamar hay ta wuɔa bo mə walaɲ tay aye. Rəhumay ha gər a siye i ndo hay mā ze bo kurom eye.

<sup>11</sup> Vəlum ha bo kurom ka mąge məsler. Kā gum səe bay. Vəlumay ha bo kurom peteh ka mąge məsler i Bəy Maduweɲ.

<sup>12</sup> ɲgwəsum hərwi məpe mədzal gər nakə ka pum ka wu nakə Mbəlom a gwəɔa məvəlakumeye aye. Ahəl nakə faya ka sumeye ɔəretsətseh aye na, zlum ɲgatay. Duwulumay me a Mbəlom huya, kə gərur ha bay.

<sup>13</sup> Dzənum tay ha ndo məpe mədzal gər hay ka Yesu neheye mətawak aye hay tə zlele kurom. Ndo neheye ti ye naha a gay kurom aye na, təmum tay ha lele.

<sup>14</sup> Tsətsahum ka Mbəlom, mā pa ɲgama ka ndo neheye faya ta sakumeye ɔəretsətseh aye, kə vəlumətatay mezeleme bay.

<sup>15</sup> ɲgwəsum ka bo ta ndo neheye faya ta ɲgwəsiye. Tuwum ka bo ta ndo neheye faya ta tuwiye.

<sup>16</sup> Ndzum ayaw tə ayaw mə walaŋ kurom. Kâ dəslumay gər a bo kurom bay, kwa məsler eye tsekweŋ bəbay na, kâ kərahum bay. Kâ dzalum mə gər kurom ka sərūm wu hay tebiye bay.

<sup>17</sup> Kâ mumay ha mənese a ndəray mənese ta mənese bay, pəlum dūh na, gum wu nakə kwa way a sər ŋgwalak eye aye.

<sup>18</sup> Tadə ka slumeye mäge wu nakə ka slumeye aye na, ndzum zay ta ndo hay tebiye.

<sup>19</sup> A nəkurom neheye na wudə kurom haladzay aye, ndo kə gakum mənese na, kâ məmumay ha a dəma bay. Gərūm ha Mbəlom mā gay sariya. Andza niye, mawatsa eye mə Derewel i Mbəlom na, Bəy Maduweŋ Mbəlom a gwad: «Mata ma ha mənese a ndo na, neŋ!»\*

<sup>20</sup> Ane tuk na, bazlam i Mbəlom a gwad: «Tadə may a wur ka ndo mənə dərə yak na, vəlay wu mənday, tadə yam a gay na, vəlay yam. Tadə ka ge andza niye na, andza faya ka hayiye zler i ako ka gər ŋgay.†»

<sup>21</sup> Ka gərūm ha mənese mā ŋgwasa fakuma bay. Ŋgwasum ka mənese tə mäge wu ŋgwalak eye hay dūh.

## 13

### *Rəhumatay ha gər a bəy i dala hay*

<sup>1</sup> Kwa way mā rəhay ha gər a bəy i dala hay hərwi ndo neheye tebiye ma bəy aye na, maa vəlatay na, Mbəlom ada maa pa tay ha a bəy na, neŋgeye.

<sup>2</sup> Yaw, ndoweye kə ge vəram ka bəy i dala hay na, a ge vəram ka wu nakə Mbəlom a bar aye. Ndo neheye faya ta giye andza niye na, faya ta vahaweye sariya ka gər tay.

<sup>3</sup> Ndo neheye faya ta giye wu ŋgwalak eye, ta dzədzariye ta bəy i dala hay bay. Mata dzədzere dūh na, ndo neheye faya ta giye wu ŋgwalak eye bay aye. Tadə a saka madzədzaratay a bəy i dala hay bay na, ge wu nakə ŋgwalak eye hərwi ada kâ yatay a gər lele.

<sup>4</sup> Andza niye, hərwi bəy i dala hay faya ta giye na, məsler i Mbəlom hərwi ada tâ dzəna kurom ka mäge ŋgwalak. Tadə dūh ka ge lele bay na, dzədzaratay a bəy i dala hay hərwi gədaŋ nakə Mbəlom a vəlatay na, a vəlatay kəriye bay. A vəlatay hərwi mabəz ha mevel i Mbəlom hərwi ada mā gatay dərətsətseh a ndo neheye faya ta giye mənese aye.

<sup>5</sup> Hərwi niye rəhumatay ha gər a bəy i dala hay. Ka rəhumatay ha gər na, hərwi nakə faya ta gakumeye dərətsətseh aye dəkdək aye bay. Rəhumatay ha gər hərwi ka sərūm ha mə dərev kurom niye na, tsəved ŋgwalak eye.

<sup>6</sup> Ka vəlumeye dzaŋgal na, hərwi niye dərmak, Mbəlom a pa ndo i bəy i dala hay hərwi ada tâ ge məsler nakay lele.

<sup>7</sup> Vəlumay a bəy i dala hay wu nakə tədē məvəlatay a nəteye aye. Vəlumatay dzaŋgal a ndo neheye faya ta tsakaliye. Wu nakə ta tsətsah fakuma məvələ aye na, vəlumatay. Rəhumatay ha gər lele hərwi nəteye na, tədē ka rəhumatay ha gar.

### *Mawudə siye i ndo hay na, marəhay gər a Mbəlom*

<sup>8</sup> Gwedere i ndo fakuma na, hamumay. Gwedere nakə ma mətsiye fakuma aye na, nəte. Gwedere niye na, wudum ndo hay huya. Ndo nakə a wudə ndo hay aye na, ka rəhay ha gər a bazlam i Mbəlom mapala eye tebiye.

\* 12:19 Bazlam mapala eye masulo eye 32.35. † 12:20 Dzeke hay 25.21-22.

<sup>9</sup> Ka sərūm bazlam i Mbəlom mapala eye a gwad: «Kā ge madama bay, kā kəɗ ndo bay, kā kəla bay, kā ge ɗəre ka wu i ndo hay bay.» Bazlam neheye mapala eye ada ta siye hay tebiye nəteye mə bazlam mapala eye nəte. A gwad: «Wuɗa ndo i maged yak ɗərmak andza ka wuɗa na gər yak.\*»

<sup>10</sup> Ndo nakə a wuɗa ndo aye na, ma geye mənese bay. Yaw, taɗə ka wuɗa ndo hay na, ka pay bəzay a bazlam i Mbəlom mapala eye tebiye.

<sup>11</sup> Gum andza niye, hərwi ka sərūm həlay nakay nəkway mə ɗəma aye. Anəke na, həlay nakə ka pədekumeye abəra ka məndzəhəre aye. Həlay nakə Mbəlom ma vəlakweye mətəme aye ka həndzəɗaw. Neŋgeye ɗəreŋ andza a həlay nakə ka dazlakway mədzal ha ka Yesu Kəriste aye sa bay.

<sup>12</sup> Mazlambar həvad mə ndəviye, ɗəre ma tsadiye, dzaydzay ma deyeweye. Mbəɗakway ɗəba a məsler i həvad. Həlakwa wu həlay neheye a ye ka bo məge ha məsler ta həpat aye.

<sup>13</sup> Mede kway mā ge ŋwalak eye andza i ndo neheye faya ta diye mə dzaydzay aye. Kā gakwa magurlom nakə ŋwalak eye bay aye bay ada kā kwayakwa bay. Madama tə wu neheye ŋwalak eye bay aye na, kā gakwa bay, gərakwa ha magazlaga ta məge sələk.

<sup>14</sup> Bəy Maduweŋ Yesu Kəriste mā təra andza wu həlay kurom. Kā pumay bəzay a wu neheye ŋwalak eye bay a sawakum hərwi mā yay a gər a bo kurom aye sa bay.

## 14

### *Kā may ha mənese a ndo bay*

<sup>1</sup> Təmum ndo nakə gəɗaŋ eye bay ka tsəved i Mbəlom aye, ada kā kəɗum wuway ka wu nakə a dzala mə ɗərev ŋgay aye bay.

<sup>2</sup> Agəna ndo mekeleŋ eye a dzala na, tsəved andaya mənɗe wu hay tebiye. Ane tuk na, ndo nakə gəɗaŋ ŋgay andaya ka tsəved i Mbəlom bay aye na, a nda ala i slambah tsa.

<sup>3</sup> Ndo nakə a nda wu hay tebiye aye na, mā may ha mənese a ndo nakə a nda siye i wu hay bay aye bay. Ada ndo nakə a nda wu hay tebiye bay aye na, mā may ha mənese a ndo nakə a nda wu hay tebiye aye bay hərwi Mbəlom ka təma na.

<sup>4</sup> Nəkar way nakə ka may ha mənese a ndo i məsler i ndo aye? Taɗə kə ge mənese na, mata tsikay faya na, ndo nakə a ləvay gər aye, ada kə ge lele na, mata tsikay faya na, huya ndo nakə a ləva na aye. Ma ɗədiye bay hərwi ndo nakə a ləva na aye ma sliye faya matsəpe na hərwi ada mā ɗəɗ bay.

<sup>5</sup> Ndo mekeleŋ eye hay tə dzala na, pat siye hay a ze pat siye. Ane tuk na, ndo siye hay i tay na, pat hay nəte tə ləva. Kwa way mā sər wu nakə a dzala mə ɗərev ŋgay aye lele.

<sup>6</sup> Ndo nakə a dzala pat nəte a ze ha siye i pat mekeleŋ eye hay na, a ge andza niye hərwi ada mā ɗəslay ha gər a Bəy Maduweŋ Yesu. Ndo nakə a nda wu hay tebiye aye na, a say məɗəslay ha gər a Bəy Maduweŋ Yesu hərwi a gay naha siɓe a Mbəlom. Ndo nakə a kərah mənɗe siye i wu hay aye na, a ge andza niye hərwi ada mā ɗəslay ha gər a Bəy Maduweŋ ɗərmak ada hərwi məgay naha siɓe a Mbəlom.

<sup>7</sup> Nɗəray kwa nəte a ndza hərwi mənɗe ŋgay bay ada nɗəray kwa nəte ma mətiye hərwi tə gər ŋgay eye bay.

\* **13:9** Zəba mə Madayaw abəra mə Ezipt 20.13-17; Bazlam mapala eye masulo eye 5.17-21; Levitik 19.18.

<sup>8</sup> Ahəl nakə nəkway tə dəre aye na, nəkway tə dəre hərwi mədəslay hay gər a Bəy Maduweŋ. Ahəl nakə ka mətakweye na, ka mətakweye hərwi mədəslay ha gər a Bəy Maduweŋ. Andza niye, kwa ma məndze tə dəre, kwa ma məməte na, nəkway i bəy Maduweŋ.

<sup>9</sup> Hərwi Yesu Kəriste kə mət ada kə lətsew abəra ma mədahaŋ hərwi ada mā təra Bəy Maduweŋ i mədahaŋ hay ada i ndo neheye tə dəre aye.

<sup>10</sup> Nəkar, ka may ha mənese a malamar yak na, hərwi mey? Ada nəkar ka zəba ka malamar yak andza ndo bay na, hərwi mey? Nəkway tebiye ka deyekweye kame i Mbəlom, ma gakweye sariya.

<sup>11</sup> Andza nakə mawatsa eye mə Derewel i Mbəlom aye na, Bəy Maduweŋ Mbəlom a gwad:

«Ta dedək neŋ faya na tsikakumeye,  
ndo hay tebiye ta deyeweye ta dəkweŋeye gurmets.

Kwa way ma tsikiye tə bazlam ka neŋ, neŋ Mbəlom.\*»

<sup>12</sup> Andza niye, kwa way ma diye ha wu nakə a ge aye. Bo ŋgay eye tə gər ŋgay eye ma diye ha kame i Mbəlom.

### *Kā kal ha malamar yak a mezeleme bay*

<sup>13</sup> Kə ge andza niye na, kā makwa ha mənese mə walaŋ kway bay. Wu neheye ka pum ka bo tərzlekeŋ aye dūh na, anaŋ: Kā pa wuray ka tsəved nakə malamar ma vəleye madəfe sik aye, kəgəbay ma dədiye ha a mezeleme aye bay.

<sup>14</sup> Neŋ madzapa eye tə Yesu Kəriste, hərwi niye na sər ha ta dedək wu nakə ŋgwalak eye bay aye na, andaya bay. Ane tuk na, tadə ndoweye kə dzala, wu nakay ŋgwalak eye bay aye na, mā nda bay. Wu neheye i ŋgay na, ta dedək ŋgwalak eye hay bay.

<sup>15</sup> Tadə ka dziye ha malamar yak tə wu nakə faya ka ndiye na, niye na, ka wuda ndo bay. Yesu Kəriste kə mət hərwi malamar yak. Hərwi niye kā dzəgəd ha malamar abəra ka tsəved i Mbəlom hərwi wu yak nakə ka ndiye bay.

<sup>16</sup> Ka dəre yak na, wu ŋgwalak eye. Ane tuk na, tadə ka sər ha ndo hay ta tsikiye fakaya wu nakə lele bay aye na, kā ge sa bay.

<sup>17</sup> Bəy i Mbəlom na, wu mənday ta wu məse bay. Bəy i Mbəlom dūh na, wu nakə Məsəfəre Tsədəŋŋa eye faya ma giye mə nəkway aye. Faya ma dzəniye kway ka mäge wu ŋgwalak eye, faya ma vəlakweye zay mə walaŋ kway, faya ma vəlakweye məŋgwese.

<sup>18</sup> Ndo nakə faya ma geye məsler andza niye a Yesu Kəriste aye na, a yay a gər a Mbəlom ada ndo hay ta rəhay ha gər dərmak.

<sup>19</sup> Kə ge andza niye na, gakwa gədaŋ mäge wu nakə ma dzəniye ndo hay ka məndze zay mə walaŋ kway aye. Ka gakweye wu nakə ma dzəniye tay siye i ndo ka məgəle ka tsəved i Mbəlom aye dərmak.

<sup>20</sup> Kā nas ha məsler i Mbəlom tə wu nakə faya ka ndiye aye bay. Ayaw, dedək tsəved andaya ka mənde wu hay tebiye, ane tuk na, tadə siye i ndo hay ta dədiye abəra ka tsəved i Mbəlom hərwi yak na, kā nda bay.

<sup>21</sup> Wu nakə ŋgwalak aye na, kwa mahəpəde slo, kwa məse guzom, kwa mey nakə ma diye ha malamar yak a mənese aye na, kā ge bay.

<sup>22</sup> Tadə ka dzala ka sliye faya mənde wu hay tebiye, kəgəbay tadə ka dzala ka sliye faya bay na, mā ndza mə dərev yak. Mata sərə ha na, nəkar ta Mbəlom dəkdek tsa. Ndo nakə a ge wu ada a ge tə mədzał gər eye sulo sulo bay na, dərev ŋgay məŋgwasa eye.

\* 14:11 Ezay 45.23.

<sup>23</sup> Ndo nakə mədzal gər ɲgay sulo sulo, kə gwad wu nakay mənɗe bay ka nda na, Mbəlom ma geye sariya hərwi kə pa na mədzal gər ɲgay peteh ka wu nakə ma giye aye bay. Wu nakə ndo a sər ha lele bay mədzal gər faya sulo sulo, kə ge ha ka bo na, kə ge mezeleme.

## 15

### *Ge wu nakə ma deyeteye a gər a siye i ndo hay aye*

<sup>1</sup> Nəkway neheye gədanj eye ka tsəved i Mbəlom aye na, kutoŋ dzənakwa ndo neheye bəle eye hay aye. Kā gakwa wu neheye a yay a gər a bo kway aye dekdek bay.

<sup>2</sup> Kwa way mâ ge wu nakə ma deyeteye a gər a siye i ndo hay aye hərwi mədzəne tay ha hərwi ada tâ gəl ka tsəved i Mbəlom.

<sup>3</sup> Yesu Kəriste, nengeye tə gər ɲgay ka pəla madayay a gər a bo ɲgay eye bay. Duh na, andza nakə tə watsa faya mə Derewel i Mbəlom aye, tə gwad: «Ndo hay ta tsada kar Mbəlom, ane tuk na, mətsede tay a daf na, ka neŋ. \*»

<sup>4</sup> Wu nakə tebiye tə watsa ahəl niye mə Derewel i Mbəlom aye, tə watsa na, hərwi ada mâ dakway ha dedek, hərwi ada kə pakwa mədzal gər ka wu nakə Mbəlom a gwad ma vəlakweye aye. Ka pakweye mədzal gər ka nengeye hərwi bazlam neheye mə Derewel i Mbəlom aye faya ma vəlakweye gədanj ada faya ma dzəniye ka məzle ɲgatay.

<sup>5</sup> Maa vəl gədanj ta məzle ɲgatay a ndo hay na, Mbəlom. Mâ vəlakum mədzal gər kurom nate ada gum andza i Yesu Kəriste nakə a tətikakum aye,

<sup>6</sup> hərwi ada nəkurom tebiye kə zambadumay a Mbəlom Bəba i Bəy Maduweŋ kway Yesu Kəriste tə dərev kurom peteh ada tə bazlam kurom nate.

### *Təmum bo nate nate mə walaŋ kurom*

<sup>7</sup> Təmum bo nate nate mə walaŋ kurom andza i Yesu Kəriste nakə a təma kurom aye. Gum andza niye, hərwi ada ndo hay tâ zambaday a Mbəlom.

<sup>8</sup> Faya na tsikakumeye dedek, Yesu Kəriste a təra ndo i məsler i Yahuda hay na, hərwi mədatay ha Mbəlom a raw me bay. A yaw na, hərwi ada wu neheye Mbəlom a gwad ma vəlateye a bəba tate ɲgay hay aye na, mâ ge bo.

<sup>9</sup> A yaw sa na, hərwi ada ndo neheye Yahuda hay bay aye tâ zambaday a Mbəlom hərwi ɲgwalak ɲgay nakə a gatay aye. Andza nakə mawatsa eye mə Derewel i Mbəlom aye, a gwad:

«Hərwi niye, na zambadakeye mə walaŋ i ndo neheye Yahuda hay bay aye, na zambadakeye ta dəmes. †»

<sup>10</sup> Bazlam i Mbəlom a gwad sa:

«Nəkurom neheye Yahuda hay bay aye, ɲgwasum ta ndo i Mbəlom hay. ‡»

<sup>11</sup> Ma təv mekeləŋ eye a gwad sa:

«Nəkurom neheye tebiye Yahuda hay bay, zambadumay a Bəy Maduweŋ Mbəlom. Nəkurom ndo hay tebiye,

zambadumay. §»

<sup>12</sup> Ezay ndo məde ha bazlam i Mbəlom a gwad dərmak:

«Ndəray ma deyeweye abəra ma hulfe i Zese.

Ma deyeweye ma təriye bəy i ndo neheye Yahuda hay bay aye.

Ndo neheye Yahuda hay bay aye ta piye mədzal gər tay ka neŋgeye. \*»

\* 15:3 Dəmes hay 69.10. † 15:9 2 Samuyel 22.50; Dəmes hay 18.50. ‡ 15:10 Bazlam mapala eye masulo eye 32.43. § 15:11 Dəmes hay 117.1. \* 15:12 Ezay 11.10.



13 Mbəlom a vəlawatay gədanj a ndo hay tə dzala ha ka neŋgeye. Mâ rah kurom ha ta mənğwese ada tə zay hərwi ka dzalum ha ka neŋgeye. Andza niye, kâ dzalakwa ha ka neŋgeye peteh ta gədanj i Məsəfəre Tsədanjja eye.

*Pol a tsik ka məsler ŋgay*

14 Malamar ga hay, neŋj tə gər ga na sər ta dedek faya ka gumeye wu nakə ŋgwalak eye, ka sərurum dedek lele ada ka slumeye faya mətşikataj me a zləm a siye i ndo hay,

15 ane tuk na, bazlam mekeleŋ eye na, na tsikakum naha ta məge me eye hərwi ada kâ mətsum ha gər bay. Na tsikakum naha andza niye na, hərwi ŋgwalak nakə Mbəlom a geŋj aye.

16 A zla ga, a pa ga ndo i məsler i Yesu Kəriste a walaŋj i ndo neheye Yahuda hay bay aye. A pa ga wal hərwi mədə ha Labara Ŋgwalak eye nakə a yaw abəra ka təv i Mbəlom aye. Na dətay ha a ndo neheye Yahuda hay bay hərwi ada tâ dzala ha ka neŋgeye ada tâ vəl ha bo tay peteh a Mbəlom andza vo'ar nakə tə kədaway a Mbəlom a yaway a gər aye. Məsəfəre Tsədanjja eye a pa tay ha i Mbəlom.

17 Kə ge andza niye na, na sliye faya manğeleke ta məsler i Mbəlom nakə faya na giye ma mədzepe tə Yesu Kəriste.

18 Tadə bazlam andaya mətšike na, na tsikiye ka wu nakə Yesu Kəriste a ge tə neŋj aye dəkdək tsa, hərwi ada nâ həlatay ahaya ndo neheye Yahuda hay bay aye kame i Mbəlom, ada tâ rəhay ha gər. A ge andza niye na, tə bazlam neheye na tsik aye ada tə wu neheye na ge aye.

19 Kə ge masuwayaŋj hay wal wal ada Məsəfəre i Mbəlom kə da ha gədanj ŋgay. Andza niye, na da ha kwa a ŋgay Labara Ŋgwalak eye i Yesu Kəriste a ndo hay. Na dazlay ma Zerozelem hus a gəma i Iliyiri.†

20 A seŋj mədə ha Labara Ŋgwalak eye a təv neheye ndo hay ta sər Yesu Kəriste zuk bay aye. Na ge andza niye na, hərwi a seŋj madəzle gay ka mədok i ndo mekeleŋ eye bay.

21 A seŋj düh na, andza nakə mawatsa eye mə Derewel i Mbəlom aye, a gwađ: «Ndo neheye ta tsikatay dađa ka neŋgeye bay aye na, nətəye ta ŋgateye.

Ndo neheye ta tsəne zuk bay aye na,  
nətəye ta tsəniye Labara Ŋgwalak eye.‡»

*A say a Pol mede a Roma*

22 Hərwi niye, a seweŋj haladzay mede naha a təv kurom, aya ane na ye naha bay.

23 Kə ndza məve haladzay nakə a seŋj mede naha mazəbakumaw dəre aye. Na huta həlay eye bay hərwi məsler. Anəke na, ma gəma neheye na, məsler ga ka ndəv.

24 Na diye naha, na ndziye ka təv kurom tsekweŋj hərwi ada kâ vəlumenj gədanj. Ma dəba eye na, na diye a gəma i Espayonj ada a seŋj na, ka dzənumeye ga hərwi mede a dəma.

25 Ane tuk na, anəke na, na diye a Zerozelem, na zlatay naha madzəne i ndo məpe mədzal gər hay ka Yesu təday,

26 hərwi ndo məpe mədzal gər hay ka Yesu neheye ka dala i Masedowan ta Akay§ aye, kə yatay a gər matsekele suloy hərwi madzəne tay ha ndo məpe mədzal gər hay ka Yesu neheye mətawak eye ma Zerozelem aye.

† 15:19 Iliyiri: Neŋgeye dala ta diye i tsakay i Gəres. ‡ 15:21 Ezay 52.15. § 15:26 Akay: Məzele guram eye i diye i Salawa i Gəres.

<sup>27</sup> Bo tay eye tə dzala lele ada dedək lele nakə tə ge andza niye aye. Yahuda hay ta ɲgəna tə siye i ndo hay wu neheye ɲgwalak eye Mbəlom a gwad ma vəlateye aye. Andza niye, ndo neheye Yahuda hay bay aye ta dzəna Yahuda hay tə wu nakə andaya fataya bay aye.

<sup>28</sup> Ahəl nakə na ndəv ha məsler nakay ada na ye məvəlatay wu nakə məsləratay naha aye tebiye na, na diye a Espayon. Na diye a dəma na, na diye naha a təv kurom təday.

<sup>29</sup> Na sər ahəl nakə na diye naha aye na, Yesu Kəriste ma rahiye kway ha tsisl tə ɲgama hərwi mede naha ga nakə na zəbakumaweye dəre aye.

<sup>30</sup> Malamar ga hay hərwi Bəy Maduweɲ kway Yesu Kəriste, ada hərwi wu nakə Məsəfəre Tsədanɲa eye a ge ada ka wudakwa bo nəte nəte mə walaɲ kway aye na, neɲ faya na gakumeye amboh: Duwulumay me a Mbəlom hərwi ga, duwulumay me tə dərev kurom peteh

<sup>31</sup> Hərwi ada ndo i Yahuda neheye tə sər Mbəlom bay aye tə seɲ dəretsətseh bay. Duwulumay me a Mbəlom sa hərwi ada ndo məpe mədzal gər hay ka Yesu neheye ma Zerozelem aye tə təma wu nakə na zlatay naha aye ta məɲgwese.

<sup>32</sup> Andza niye, tadə kə yay a gər a Mbəlom na, na diye ta məɲgwese eye. Ka ndzakweye dziye hərwi ada nā zəzukur bo.

<sup>33</sup> Mbəlom, neɲgeye nakə a vəl zay a ndo hay aye, mā ndza tə nəkurom. Mā ge bo andza niye.

## 16

### *Mətsike me i Pol a ndo hay*

<sup>1</sup> Anaɲ, neɲ faya na tsikakumeye naha ka malamar kway ɲgwas eye Fowebe faya ma diye naha. Neɲgeye faya ma giye məsler i Mbəlom mə walaɲ i məhay gər i ndo məpe mədzal gər hay ka Yesu neheye ma Seɲkəre aye.

<sup>2</sup> Kə ndisl naha a təv kurom na, təmum na lele hərwi neɲgeye i Bəy Maduweɲ dərmak. Təmum na andza nakə ndo məpe mədzal gər hay ka Yesu həbe ta giye aye. Dzənum na tə wu nakə hawa eye ma geye tebiye hərwi neɲgeye ka dzəna ndo hay haladzay, ka dzəna ga dərmak.

<sup>3</sup> Tsikumətatay ha me a Pərisil tə zal ɲgay Akelas. Nəteye tə neɲ, nəmay faya nəmaa giye məsler i Yesu Kəriste aye.

<sup>4</sup> Ahəl niye nəteye na, ta sər mədze ha məsəfəre tay hərwi ga. Na gatay sisə haladzay ada maa gatay sisə na, neɲ məhəgeye bay. Ndo məpe mədzal gər hay ka Yesu tebiye neheye Yahuda hay bay aye ta gatay sisə.

<sup>5</sup> Na tsikatay naha me a ndo neheye tə hayawa gər a gay tay hərwi məduwulay me a Mbəlom aye.

Na tsikay naha me a dzam ga Epenete. Maa lah mədzal ha ka Yesu Kəriste ka dala i Azi\* na, neɲgeye.

<sup>6</sup> Na tsikay naha me a Mari, neɲgeye a ge məsler haladzay hərwi kurom aye.

<sup>7</sup> Na tsikatay naha me a Andronikos ta Zuniyas. Nəteye na, ndo ga hay. Neɲ ta nəteye ta gəs may a danɲay. Ndo hay tə sər nəteye neheye sulo mə walaɲ i ndo i maslaɲ hay aye na, ta məzlaḅ eye. Maa lah məpe mədzal gər ka Yesu Kəriste na, nəteye bəna neɲ bay.

<sup>8</sup> Na tsikay naha me a Ampəliyatos, dzam ga, nəmay salamay mə həlay i Bəy Maduweɲ.

<sup>9</sup> Na tsikay naha me a Urban. Nəkway tə neɲgeye, faya ka gakweye məsler i Yesu Kəriste.

Na tsikay naha me a dzam ga Sitakis.

\* 16:5 Dala i Azi, anəke na, ma Turki.

<sup>10</sup> Na tsikay naha me a Apelles. Neŋgeye kə sa dəretsətseh hərwi Yesu Kəriste ada kə ndza 6əŋ6əŋ.

Na tsikatay naha me a ndo i gay i Aristobul.

<sup>11</sup> Na tsikay naha me a Herodiyon, ndo ga.

Na tsikatay naha me a ndo i gay i Narkise hay, nəteye i Bəy Maduweŋ.

<sup>12</sup> Tsikumenatay ha me a Tirifene ta Tirifoz, nəteye malamar kway ŋgwas eye hay neheye faya ta giye məsler i Mbəlom aye.

Na tsikay naha me a Perisid malamar kway ŋgwas eye nakə na wuda na aye. Faya ma giye məsler haladzay hərwi Bəy Maduweŋ.

<sup>13</sup> Tsikumenatay ha me a Rufus, ndo ŋgwalak eye ka tsəved i Bəy Maduweŋ.

Na tsikay ha me a may ŋgay dərma, neŋgeye andza may ga.

<sup>14</sup> Tsikumenatay ha me a Asinəkərit ta Fəleŋon ada a Hermes, a Patrobas ada Hermas ada a ndo mədzal gər neheye ta nəteye aye.

<sup>15</sup> Tsikumenatay ha me a Filologe ada a Zuli, ada a Nere ta malamar ŋgay dem eye.

Na tsikay naha me a Olimpas ada a siye i ndo məpe mədzal gər hay ka Yesu tebiye neheye ta nəteye aye.

<sup>16</sup> Tsikum a bo me nəte nəte lele mə walaŋ kurom. Məhay gər i ndo məpe mədzal gər hay ka Yesu Kəriste ta tsikakum naha me tebiye.

### *Mandəve i bazlam i Pol*

<sup>17</sup> Malamar ga hay, neŋ faya na gakumeye amboh: Gumay metsehe a ndo neheye faya ta tsikiye wu ŋgwalak eye bay aye ka wu nakə ka tətikum aye. Andza niye, faya ta ŋgəniye tay ha ndo hay ada faya ta diye tay ha ka tsəved nakə ŋgwalak eye bay aye. Ka ndzum ta nəteye bay.

<sup>18</sup> Slala i ndo neheye andza niye tə ge na, ndo i maslaŋ i Bəy Maduweŋ kway Yesu Kəriste bay, faya ta giye duh na, wu nakə a yatay a gər aye. Faya ta səpatiye ndo hay tə bazlam tay neheye ləfedede aye. Andza niye, faya ta vatay gər a ndo neheye tə sər mənese bay aye.

<sup>19</sup> Nəkurom na, ndo mədzal gər hay ka Yesu Kəriste tə sər ma kəkay nakə ka rəhumay ha gər a Bəy Maduweŋ aye. Dərev ga ka ŋgwas haladzay hərwi kurom ada a seŋ na, tərūm metsehe eye hay hərwi ada kə gum wu ŋgwalak eye ada kə gum mənese bay.

<sup>20</sup> Mbəlom faya ma vəliye zay huya a ndo hay. Mazlambar ma ndərasliye na gədaŋ i Fakalaw, ma piye na a huđ i sik kurom.

Bəy Maduweŋ kway Yesu Kəriste m̄a pa fakuma ŋgama.

<sup>21</sup> Timote nakə faya ma giye məsler tə neŋ aye kə tsikakum naha me. Ndo gay hay Lukiyus, Zason, ada Sosipater ta tsikakum naha me dərma.

<sup>22</sup> Maa watsa derewel nakay na, neŋ Tertiyus† ndo məwetse wu nakə a say a Pol aye. Na tsikakum naha me ta məzele i Bəy Maduweŋ.

<sup>23</sup> Neŋ Pol faya na gwadəkumeye, Gayus kə tsikakum naha me dərma. Neŋ mandza eye mə gay ŋgay ada ndo məpe mədzal gər hay ka Yesu tebiye tə yawaw mađuwulay naha me a Mbəlom mə gay ŋgay. Erast ndo məgay gər a suloy i wuzlahgəma ada malamar kway Kartus ta tsikakum naha me.

[<sup>24</sup> Bəy Maduweŋ kway Yesu Kəriste m̄a pa fakuma ŋgama ka nəkurom tebiye.]

<sup>25</sup> Zambadəkway a Mbəlom! Neŋgeye nəte ŋgweŋ ta gədaŋ hərwi ma vəlakumeye gədaŋ 6əŋ6əŋ ka tsəved ŋgay andza Labara ŋgwalak eye nakə faya

† 16:22 Tertiyus na, ndo məwetse derewel i Pol.

na datay ha a ndo hay ka gər i Yesu Kəriste aye. Labara Nḡwalak eye nakay kə da ha parakka bazlam nakay maḡgaha eye ahəl niye aye.

<sup>26</sup> Ane tuk na, anəke na, Mbəlom kə da ha parakka ada faya ta diye ha ka gər i wu nakə ndo məde ha bazlam i Mbəlom hay tə watsa ka gər i Kəriste aye. Andza niye, bazlam nakay kə da a zləm a slala hay tebiye andza i Mbəlom neḡgeye ma ndziye ka tor eye a gwad tā tsəne hərwi ndo hay tā dzala ha ada tā rəhay ha gər aye.

<sup>27</sup> Mbəlom na, neḡgeye Mbəlom nəte ḡweḡ. Neḡgeye tə gər ḡgay a tsah. Zambadakway hərwi wu neheye a ge tə həlay i Yesu Kəriste aye. Mā ge bo andza niye!

## **Makurre i derewel i Pol nakə a watsatay naha a Koriñte hay aye Məfələkwe**

Pol a pa məhay gər i ndo mədzal gər hay ka Yesu ma Koriñte ahəl i mahəhele ɲgay məsulo eye. Koriñte na, wuzlahgəma nakə ka dala i Gəres zlele eye aye, zlele eye hərwi təv mələtse i kwalalaɲ i yam hay sulo. Beke hay mə dəma haladzay ada ndo i mətawak hay. Ndo haladzay məndze tay na, swa tsa.

Ahəl niye na, Koriñte hay tə pay bəzay a kule kwa waray waray.

Pol a tsəne labara tay (zəba 1.11 ta 7.11). Ndo məpe mədzal gər hay ka Yesu ma Koriñte, mədzal gər tay madzadzə eye tə gər i bazlam hay wal wal.

Mə madədo 1 ka 4, Pol a tsik ka ndo məpe mədzal gər neheye ma Koriñte aye ada ka ndo neheye a datay ha Labara Ƴgwalak eye i Yesu Kəriste aye.

Ma madədo 5.1 ka 11.16, Pol a datay naha ka gər i bazlam hay

Ka 11.17 ka 14.40, Pol faya ma tsikiye ka məndze mə walaɲ i məhay gər i ndo məpe mədzal gər hay ka Yesu.

Madədo 15 faya ma tsikiye na, Mbəlom a lətse ahaya Yesu abəra ma mədahaɲ, ada pat mekeleɲ eye mədahaɲ hay ta lətseweye abəra ma mədahaɲ dərmak.

Andza derewel siye neheye Pol a watsa aye, nakay anaɲ eye a ndəv ta labara hay ada ta mətsike me a ndo hay (madədo 16).

### *Pol a tsikatay naha me a ndo neheye ma Koriñte aye*

<sup>1</sup> Maa watsakum naha derewel nakay na, neɲ Pol nakə Mbəlom a zla ga hərwi ada nā təra ndo i maslaɲ i Yesu Kəriste aye. A zla ga na, hərwi a yay a gər. Nəmay ta malamar kway Sosten, nəmaa tsikakum naha me.

<sup>2</sup> Nəmaa watsakum naha a məhay gər i ndo məpe mədzal gər hay ka Yesu Kəriste neheye ma gəma i Koriñte aye. Nəkurom na, Mbəlom kə pala kurom, kə pa kurom a həlay i Yesu Kəriste. A zalakum na, hərwi ada kâ tərūm ndo ɲgay hay, andza a zalatay a ndo neheye tebiye mandza eye kwa ka waray ka waray faya ka dūwulumeye me a Bəy Maduweɲ kway Yesu Kəriste aye. Neɲgeye na, Bəy Maduweɲ kway tebiye.

<sup>3</sup> Mbəlom Bəba kway ta Bəy Maduweɲ kway Yesu Kəriste tā pa fakuma ɲgama ada tā vəlakum zay.

### *Wu neheye lele Yesu a vəlatay aye*

<sup>4</sup> Neɲ faya na gay naha siŋce a Mbəlom huya hərwi kurom, hərwi kə pa fakuma ɲgama hərwi nakə nəkurom madzapa eye tə Yesu Kəriste aye.

<sup>5</sup> Ayaw dedek! Ahəl nakə ka dzapum ta neɲgeye na, Mbəlom kə vəlakum wu neheye ɲgwalak eye hay tebiye. Andza niye, Mbəlom kə vəlakum tsəved ka məsəre wu neheye dedek eye ada ka slum faya məda ha wu neheye a ndo hay.

<sup>6</sup> Andza niye hərwi ahəl nakə nəmaa dakum ha bazlam i Yesu Kəriste aye na, ka təumum tə dərev kurom bəɲbəɲ lele.

<sup>7</sup> Hərwi niye wu neheye Mbəlom faya ma vəlatəye a ndo ɲgay hay aye na, wuray kwa tsekweɲ a kətsakum bay, a nəkurom neheye faya ka həbum pat nakə Bəy Maduweɲ kway Yesu Kəriste ma maweye aye.

<sup>8</sup> Mbəlom neŋgeye, ma dzəniye kurom ta gədanj bəŋbəŋ hus ka mandəve eye, hərwi ada pat nakə Bəy Maduweŋ kway Yesu Kəriste ma maweye na, wuray kwa tsekweŋ ma dədiye kurom ha a sariya bay.

<sup>9</sup> Kā dzədzarum bay, maa zalakum na, bo i Mbəlom eye ŋgway hərwi ada kə tərūm nəkurom madzapa eye ta wawa ŋgay Yesu Kəriste Bəy Maduweŋ kway. Ada tadə Mbəlom kə tsik, kə gwad ma giye na, ma giye ta dedek andza nakə a tsik aye.

### *Ndo mape mədzał gər hay ka Yesu ma Korinthe ta ŋgana*

<sup>10</sup> Malamar ga hay, neŋ faya na gakumeye naha amboh ta gədanj i Bəy Maduweŋ kway Yesu Kəriste, bazlam kurom mǎ tərā na, nəte. Kā ŋgənum ha bo mǎ walaŋ kurom bay. Dərev kurom mǎ tərā nəte ada mədzał gər kurom mǎ tərā nəte dərmak.

<sup>11</sup> Malamar ga hay, na tsik andza niye na, hərwi ndo neheye mǎ gay i Kəlowe aye ta yaw ka təv ga. Ti yaw tə gwedeŋ na, məkədə wuway andaya mǎ walaŋ kurom haladzay.

<sup>12</sup> A seŋ məgwadəkum na, mey? A seŋ məgwadəkum na, kwa way mǎ walaŋ kurom faya ma tsikiye wu mekeleŋ eye hay wal wal. Siye hay tə gwad: «Nəmay na, ndo məpay bəzay a Pol.» Siye hay tə gwad: «Nəmay ndo məpay bəzay a Apolos.» Siye hay tə gwad: «Nəmay na, ndo məpay bəzay a Piyer.» Ndo mekeleŋ eye tə gwad: «Nəmay na, ndo məpay bəzay a Kəriste.»

<sup>13</sup> Tə tsik andza niye na, Kəriste mǎŋgəna eye wal wal dāw? Ta dar ka mayako mazlələmbadā eye hərwi kurom na, neŋ Pol bay na gwad bədāw? Ta dzəhuḅ kurom ha a yam na, ta mǎzele ga bay na gwad bədāw?

<sup>14</sup> Na gay sisə a Mbəlom hərwi na dzəhuḅ ndəray a yam kwa nəte mǎ walaŋ kurom bay. Ane tuk na, na dzəhuḅ a yam na, Kərispus ta Gayus dəkdek tsa.

<sup>15</sup> Andza niye ndəray mǎ walaŋ kurom ma sliye faya mǎtsike ta dzəhuḅ ha a yam ta mǎzele ga na, andaya bay.

<sup>16</sup> Ayaw dedək ŋgway! Na dzəhuḅ Sitefanas a yam ta ndo i gay ŋgay hay dərmak. Tadə ndo mekeleŋ eye andaya na dzəhuḅ ha a yam na, na sər sa bay.

<sup>17</sup> Kəriste kə sləra ga ahaya madzəhuḅə tay ha ndo hay a yam bay. A gwedeŋ: «Do dātay ha Labara ŋgwalak eye a ndo hay.» A gwedeŋ sa: «Kā tsik tə metsehe i ndo zezeŋ bay.» Tadə na tsikawa tə metsehe i ndo zezeŋ na, mǎməte ŋgay nakə a mət ka mayako mazlələmbadā eye na, ma təriye wu kəriye. Ma giye ŋgama bay.

### *Gədanj tə metsehe i Mbəlom*

<sup>18</sup> Labara i mǎməte i Yesu nakə ta dar na ka mayako mazlələmbadā eye a tərā ka ndo neheye faya ta dziye na, wu kəriye. Ma giye ŋgama bay. Ane tuk na, nəkway neheye Mbəlom ma təriye kway ha aye na, ka sərakwa bazlam niye na, gədanj i Mbəlom.

<sup>19</sup> Andza nakə tə watsa mǎ Derewel i Mbəlom na, Mbəlom a gwad: «Na ta dziye ha metsehe i ndo neheye ta tsah aye.

Na ta kərāhiye ndo neheye tə gwad nəteye ndaraw eye hay aye.\* »

<sup>20</sup> Kə ge andza niye na, ndo i mǎndzibərə neheye tə gwad: «Ta tsah aye na, metsehe tay eye mǎŋgay tuk? Ndo neheye tə dzaŋgawa bazlam mapala eye i Yahuda hay aye na, wu tay neheye tə sər aye na, ma dzəniye tay ha kame i Mbəlom dāw? Ndo neheye tə sər mǎtsike me haladzay aye na, mǎsərə mǎtsike me tay ma dzəniye tay ha kame i Mbəlom dāw?» Mbəlom kə dā ha, mǎsərə wu i ndo i mǎndzibərə hay na, wu nakə kəriye. Ma giye ŋgama bay.

\* 1:19 Ezay 29.14.

<sup>21</sup> Ndo i mändzibəra hay ta ɲgatay a wu nakə Mbəlom a ge tə metsehe ɲgay aye. Ane tuk na, ta sər na bay. Hərwi niye, neɲgeye na, faya ma giye məsler tə bazlam neheye faya nəmaa diye ha aye. Nəteye na, tə gwad: «Bazlam neheye na, wu kəriye. Ma giye ɲgama bay.» Ane tuk na, a yay a gər a Mbəlom mətəme tay ha ndo neheye tə dzala ha ka bazlam niye hay.

<sup>22</sup> Yahuda hay, nəteye a satay məɲgatay a masuwayaɲ hərwi ada nakə ta səriye ha bazlam neheye na, dedək aye. Gərek hay na, a satay məsərə Mbəlom tə metsehe tay eye wu tay.

<sup>23</sup> Ane tuk na, nəmay faya nəmaa diye ha na, Yesu Kəriste. Nəmaa dawa ha, nəmaa gwadawa: «Kəriste na, ta dar na ka mayako mazləmbada eye.» Yahuda hay tə tsəne na, ta təma bay, a ndalatay, ada ndo neheye Yahuda hay bay aye tə gwad: «Bazlam niye na, bazlam nakə kəriye. Ma giye ɲgama bay.»

<sup>24</sup> Ane tuk na, ndo neheye Mbəlom a zalatay, a təra tay ha ndo ɲgay hay, kwa Yahuda hay, kwa ndo neheye Yahuda hay bay aye na, ta zəba faya andza wu kəriye təbey. Tə sər ha Yesu Kəriste na, neɲgeye gədaɲ i Mbəlom ada neɲgeye faya ma diye ha metsehe i Mbəlom.

<sup>25</sup> Tadə ndo hay ta dzala, ta gwad: «Wu nakə Mbəlom a ge aye, wu kəriye» na, ta sər ha wu nakə tə gwad: «Wu kəriye na, a ze metsehe tay duh.» Tadə tə dzala ta gwad: «Mbəlom na, gədaɲ ɲgay andaya bay» na, ta sər ha məsler ɲgay nakə tə gwad gədaɲ eye bay aye na, a ze gədaɲ tay duh.

<sup>26</sup> Malamar ga hay, nəkurom neheye Mbəlom a zalakum aye na, nəkurom wu hay tey? Ka dərə i ndo i mändzibəra hay na, ndo i metsehe andaya mə walaɲ kurom haladzay bay. Ndo i gədaɲ andaya haladzay mə walaɲ kurom bay ada ndo neheye tə da a zləm aye andaya mə walaɲ kurom haladzay bay sa.

<sup>27</sup> Mbəlom a pala duh na, ndo neheye ndo i mändzibəra hay tə gwad fataya ta tsah bay aye hərwi ada tə təra ndo ɲgay hay. A pala tay ha na, hərwi məpatay horoy a dərə a ndo neheye tə gwad ta tsah aye. Ada Mbəlom a pala ndo neheye ndo i mändzibəra hay tə gwad fataya nəteye bəle eye hay na, hərwi məpatay horoy a dərə a ndo i gədaɲ hay.

<sup>28</sup> Mbəlom a pala na, ndo kəriye hay tsa, ta zəba fataya andza wu kəriye mədəva zləm tay andaya bay. A ge andza niye na, hərwi ada mədze tay ha ndo neheye lele tə da a zləm aye.

<sup>29</sup> Mbəlom a pala slala i ndo neheye andza niye na, hərwi ada ndəray mə dəslay ha gər a bo kame ɲgay bay.

<sup>30</sup> Maa dzapa kway ha tə Yesu Kəriste na, Mbəlom nəte ɲgeweɲ. Hərwi niye Mbəlom a dəkway ha metsehe ɲgay tə həlay i Yesu. Andza məgwede na, Mbəlom a təra kway ha ndo ɲgwalak eye hay na, tə həlay i Yesu Kəriste. Ada a tamakway ahaya abəra mə mezeleme na, tə həlay i Yesu Kəriste ada ka tərakwa ndo ɲgay hay.

<sup>31</sup> Andza nakə tə watsa mə Derewel i Mbəlom na, tə gwad: «Ndo nakə a say məge zlapay aye na, mə ge zlapay tə wu nakə Bəy Maduweɲ a ge aye.†»

## 2

### *Pol a da ha Yesu Kəriste*

<sup>1</sup> Malamar ga hay, neɲ eye ahəl niye na ye naha a gay kurom mədakum ha wu i Mbəlom nakə maɲgaha eye na, na tsik bazlam neheye a da me aye bay ada na tsik wuray tə metsehe i ndo hay bay.

<sup>2</sup> Ahəl nakə na ye naha a gay kurom zuk bay aye na, na gwad: «Na ye naha na tsikiye na, ka Yesu Kəriste dekdək. Na tsikiye wuray mekeləɲ eye bay.

† 1:31 Zəba ma Zeremi 9.22-23.



Na tsikiye wene wene eye na, ka mämäte ngay nakə tə dar na ka mayako mazlälmbada eye.»

<sup>3</sup> Ahäl nakə neñ ka təv kurom aye na, gədanj ga andaya bay, zluwer a genj ada na dzədzar haladzay.

<sup>4</sup> Ahäl nakə na dākum ha bazlam i Mbəlom aye na, na tsikakum tə metsehe i ndo neheye tə gwad ta tsah aye hərwi məvakum gər bay. Ane tuk na, Məsəfəre i Mbəlom a dākum ha ta gədanj i Mbəlom bazlam ga nakə na tsikakum aye na, dedek.

<sup>5</sup> Hərwi niye, ka pum mədzal gər kurom ka Yesu Kəriste na, hərwi ka ngatamay a gədanj i Mbəlom bəna, a metsehe i ndo hay bay.

<sup>6</sup> Ndo neheye ta sara ka tsəved i Mbəlom aye na, nəmaa tətikatay metsehe i Mbəlom. Ane tuk na, metsehe i ndo i mändzibəra hay bay ada metsehe i bəy tay neheye faya ta ləviye mändzibəra aye bay. Nəteye na ta dziye.

<sup>7</sup> Sadzək bay, metsehe nakə na dākum ha aye na, metsehe i Mbəlom. Ahäl niye na, mangaha eye, ndo hay tə sər bay. Ahäl nakə kə ge mändzibəra zuk bay aye na, 6a kə ləva ha bo hərwi mətəme kway ha hərwi ada kə yakwa a təv mändze ngay nakə ta dəslay ha gər aye.

<sup>8</sup> Metsehe niye na, ndəray kwa nəte mə walañ i ndo neheye tə ləva mändzibəra aye ta sər metsehe niye bay. Tadə ta sər na, ta dəriye Bəy Maduweñ kway ka mayako mazlälmbada eye bay. Neñgeye na, məzla6 ngay a ze kwa mey tebiye.

<sup>9</sup> Wu niye Mbəlom a ge na, andza nakə mawatsa eye mə Derewel i Mbəlom aye, a gwad:

«Wu nakə Mbəlom a ləva ha bo hərwi ndo neheye ta wudə Mbəlom aye na\*, a ze wu neheye ndo hay ta ngatay bay aye tebiye  
ada nakə ta tsəne bay kwa wu nakə ta dzala faya bay aye.»

<sup>10</sup> Mbəlom a da ha metsehe niye na, a nəmay ta gədanj i Məsəfəre ngay. Məsəfəre na, a sər wu hay tebiye. Kwa wu nakə Mbəlom a dzala mə gər ngay aye na, a sər.

<sup>11</sup> Maa sər mədzal gər i ndo mekeleñ eye na, way? Ndo məsəre na andaya bay. Maa sər na, məsəfəre ngay eye ngway. I Mbəlom na, andza niye dərmak. Maa sər mədzal gər i Mbəlom na, Məsəfəre ngay eye ngway, ndo mekeleñ eye a sər bay.

<sup>12</sup> Məsəfəre nakə Mbəlom a vəlakway a nəkway aye na, a yaw abəra ma ndo i mändzibəra hay bay. Məsəfəre na, i Mbəlom eye ngway. Mbəlom a vəlakway na, hərwi ada kə sərakwa wu neheye a vəlakway ta ngwalak ngay aye tebiye.

<sup>13</sup> Nəmay, nəmaa tsikawa wu neheye na, nəmaa tsikawa tə metsehe i ndo zezəñ bay. Bazlam may hay ti yaw na, ma Məsəfəre. Andza niye, nəmaa dawa ha na, wu neheye a tsik ka Məsəfəre aye a ndo neheye Məsəfəre niye andaya mə dərev tay aye.

<sup>14</sup> Ndo nakə Məsəfəre i Mbəlom andaya mə dərev ngay bay aye na, ma sliye faya matəme dedek neheye Məsəfəre faya ma datay ha a ndo hay aye bay. A tsəne bay, a dzala mə gər ngay na, wu kəriye hay, neheye ma giye ngama bay aye, bəna tadə ndoweye Məsəfəre andaya mə dərev ngay bay na, ma sliye faya matsəne bay.

<sup>15</sup> Ndo nakə Məsəfəre i Mbəlom mə dərev ngay aye na, a sər tay ha ka bo abəra wu hay tebiye. Tadə ngwalak eye hay kwa ngwalak eye bay na, a sər. Ane tuk na, ndo hay na, ta sliye faya məsəray naha ka wu nakə ma dzaliye aye bay.

\* 2:9 Ezay 64.3.

16 Niye na, andza nakə mawatsa eye mə Derewel i Mbəlom aye, a gwad: «Wu nakə Mbəlom a dzala aye na, maa sər na, way? Maa day ha wu ka həlay a Mbəlom na, way?»†»

Ane tuk na, nəmay neheye Məsəfəre i Mbəlom mə dərev may aye na, nəmaa dzalawa gər na, andza i Yesu Kəriste nakə ma dzaliye dərmak.

### 3

#### *Ndo mədzal gər hay na, i Yesu*

1 Malamar ga hay ahəl nakə neñ tə nəkurom aye na, na tsikawakum wu andza nakə na tsikateye a ndo neheye Məsəfəre i Mbəlom mə dərev tay aye bay. Na tsikawakum na, andza a ndo i məndzibəra hay hərwi nəkurom ka tsəved i Yesu Kəriste na, andza wawa ndəriz hay.

2 Na tətikakum wu neheye a wur bo bay aye bəna, na tətikakum wu neheye a wur bo aye bay. Nəkurom ka tərur na, andza wawa ndəriz neheye ta vəlateye wah dəkdək, ta sliye faya mənde dəf zuk bay aye.

3 Hərwi nəkurom na, huya andza ndo neheye faya ta dzaliye ka wu i məndzibəra aye. Nəkurom faya ka gumeye sələk ka ndo mekeleñ eye hay. Nəkurom faya ka gumeye məkədə wuway mə walañ kurom. Kə ge faya ka gumeye andza niye na, nəkurom ndo i məndzibəra hay mba huya bədaw? Ta dedək nəkurom na, andza nəteye.

4 Siye hay tə gwad tə peñ bəzay na, a neñ Pol, siye hay tə gwad tə pay bəzay na, a Apolos. Kə ge faya ka tsikumeye andza niye na, nəkurom ka tərur andza ndo i məndzibəra hay!

5 Apolos na, way? Ada neñ na, way tey? Nəmay na, ndo i məsler i Mbəlom tsa. A slər naha may ka təv kurom hərwi mədakum ha bazlam ɲgay hərwi ada kə dzalom ha ka Kəriste. Kwa way ma giye na, məsler nakə Mbəlom a day ha məge aye.

6 Neñ na, na zəv. Apolos neñgeye a mbəday yam. Ane tuk na, ndo məgəle ha na, bo i Mbəlom eye ɲgway.

7 Andza niye, ndo nakə a zəv wu aye ta ndo nakə a mbəday yam aye na, nəteye salamay tə sla wuray bay. Mbəlom nəte ɲgweñ neñgeye a sla məge wu, hərwi neñgeye a sla faya məgəle ha wu.

8 Ndo nakə a zəv wu aye ta ndo nakə a mbəday yam aye na, wuray ka ɲgəna tay ha ka bo abəra bay. Ane tuk na, Mbəlom ma vəliye kwa a way merəbe ɲgay andza nakə ma hutiyeye aye.

9 Neñ ta Apolos na, nəmay madzapa eye nəte ma məsler i Mbəlom. Nəkurom na, ka tərur andza guvah i Mbəlom. Nəkurom andza gay i Mbəlom dərmak.

10 Mbəlom kə vəleñ tsəved ta ɲgwalak ɲgay hərwi madazlay a məsler ɲgay tə nəkurom. Neñ na təra andza ndo nakə a sər madəzle gay, a sər məsler ɲgay lele aye. Ahəl nakə na dazlay a məge məsler i Mbəlom mə gay kurom aye na, na pa naha mədok aye andza nakə Mbəlom a vəleñ faya tsəved nə ge aye. Anəke ndo siye ha faya ta dəzliye faya. Kwa way mə ge metsehe, mə dəzl faya gay na, lele.

11 Mədok i gay niye na, Yesu Kəriste. Mbəlom a pa na andza mədok. Ndəray ma sliye faya məpe naha mədok mekeleñ eye sa bay.

12 Ka mədok niye na, ndo siye hay ta dəzliye faya gay ta gura, siye hay ta dəzliye ta bəre, ndo siye hay ta dəzliye tə kwar neheye tsakala eye haladzay aye. Ndo siye hay na, ta dəzliye faya ta mayako, siye hay ta guzer ada siye hay ta dəzliye ta gwawəkəw.

† 2:16 Ezay 40.13.

13 Pat nakə Mbəlom ma gateye sariya ŋgay a ndo hay aye na, kwa way məsler ŋgay ma bəziye parakka lele hərwi pat eye niye na, ako ma bəziye ha məsler kwa i way. Kwa way ma ŋgateye a məsler ŋgay, kwa lele kwa lele bay, ma ŋgateye.

14 Gay i ndo nakə a dəzl aye, ako ka təma na bay na, ma hutiyə merəbe ŋgay.

15 Ane tuk na, ndo nakə ako ka təma na gay nakə a dəzl aye na, ma hutiyə merəbe ŋgay bay. Mbəlom ma təmiye ha. Ane tuk na, neŋgeye ma təmiye andza ndo nakə a təməw abəra ma ako i gay aye.

16 Nəkurom tebiye na, gay i mədəslay ha gər a Mbəlom, ada Məsəfəre ŋgay mandza eye mə nəkurom na, ka sərūm təbədew?

17 Tadə ndoweye kə nas ha gay i mədəslay ha gər a Mbəlom na, Mbəlom ma kədiye na ndoweye dərmak hərwi gay i mədəslay ha gər a Mbəlom na, tsədaŋŋa. Gay eye niye Mbəlom mandza eye mə dəma aye na, nəkurom.

18 Ndəray mā vay gər a bo ŋgay bay. Tadə ndoweye mə walaŋ kurom kə dzala neŋgeye a tsah andza ndo i məndzibəra hay na, mā gər ha. Mā təra ka dərə i ndo hay duh na, andza a tsah bay tebiye. Kə ge andza niye na, ma hutiyə metsəhe lele eye.

19 Na tsik andza niye na, hərwi wu neheye ndo i məndzibəra hay tə dzala, tə gwad nəteye ta tsah aye na, ka dərə i Mbəlom na, wu kəriye. Andza nakə məwatsa eye mə Derewel i Mbəlom aye na, tə gwad: «Mbəlom ma gəsiye tay ha ndo i metsəhe hay ma balay i wewer tay nakə tə ŋga ka bo aye.\*»

20 Ma təv mekeləŋ eye tə gwad sa: «Bəy Maduweŋ a sər mədzal gər i ndo i metsəhe hay. A sər ha nəteye na, wu kəriye.†»

21 Hərwi niye neŋ faya na tsikakumeye, ndəray mā zlapa tə wu nakə ndo mekeləŋ eye a ge aye bay. Sərūm ha na, wu hay tebiye na, i kurom duh.

22 Neŋ Pol, Apolos ada Piyer, nəmay na, i kurom hay tebiye. Kwa məndzibəra, sifa, məməte i kurom tebiye. Wu neheye anəke ta wu neheye kame aye na, i kurom tebiye dərmak.

23 Nəkurom na, ndo i Yesu Kəriste hay ada Kəriste, neŋgeye i Mbəlom.

## 4

### *Ndo i maslaŋ i Kəriste hay*

1 Sərūm ha, nəmay na, ndo mäge məsler i Yesu Kəriste hay. Mbəlom a vəl wu ŋgay neheye maŋgaha eye ahəl niye na, a nəmay hərwi ada nəməā dətay ha a ndo hay.

2 Ndo nakə ndo i gay ŋgay a gəray ha wu ŋgay hay, wu kurre a say ka neŋgeye mā təra na, ndo i dedək.

3 Neŋ na, tadə faya ka ŋgəlu meŋeye bəzay ka wu na, kwa tsekweŋ wuray a geŋ mə bo haladzay bay. Kwa tadə siye i ndo hay faya ta ŋgəleŋeye bəzay neŋ ndo i dedək tsukuđu neŋ ndo i dedək bədaw na, niye na, wuray a geŋ mə bo bay dərmak. Kwa neŋ eye na geye sariya a gər bay.

4 Neŋ na, na sər wuray nakə mə neŋ na may ha mənese a gər ga aye bay. Ane tuk na, andza məgwede mənese andaya fagaya təbey aye bay. Mata ge sariya i gər ga na, Mbəlom bəna ndo hay bay.

5 Hərwi niye həlay eye kə ndislew zuk bay na, kə gum sariya ka siye i ndo bay. Pat nakə Bəy Maduweŋ Yesu ma maweye na, ma bəziye ha wu neheye anəke ma ləvoŋ aye parakka mə dzaydzay. Wu nakə ndo hay tə dzala mə gər tay aye na, ma bəziye dərmak. Pat eye niye na, Mbəlom ma zambədeye kwa a way hərwi məsler nakə a ge aye. Tadə a ge haladzay na, Mbəlom

\* 3:19 Zob 5.13. † 3:20 Dəmes hay 94.11.

ma zambadeye haladzay. Tađa a ge tsekweñ na, Mbəlom ma zambadeye tsekweñ.

<sup>6</sup> Malamar ga hay, na đakum ha wu neheye ka neñ ta Apolos aye na, hərwi madzəne kurom hərwi ada kâ tătikum wu nakə mə đəma aye. A señ na, pumay bəzay a bazlam i Mbəlom lele. Andza niye, kâ gum zlapay ta ndo siye hay bay ada kâ kətsum tay ha ndo siye hay bay.

<sup>7</sup> Nəkar nakə ka dzala mə gər yak, ka ze siye i ndo hay aye na, nəkar way? Maa vəlaka wu hay tebiye na, Mbəlom bəđaw? Tađa maa vəlaka Mbəlom na, ka giye ha zlapay andza ka huta wu niye hay ta gədañ yak na, hərwi mey?

<sup>8</sup> A'əhəñ! Nəkurom na, ka hutum wu hay tebiye ba! Ka tərüm ndo neheye zlele eye tsiy ka tsəved i Mbəlom aye na gwad! Ka gwadum nəkurom na, bəy hay. Nəmay na, bəy eye hay təbey. Tađa nəkurom bəy eye hay ka đəre i Mbəlom ta dedek na, hađe lele hərwi ada nəmay ndo i maslañ i Kəriste hay nəmaa sliye faya matəre bəy hay dərmaç.

<sup>9</sup> Nəmay na, ndo i maslañ i Yesu Kəriste hay, ane tuk na, a ge fagaya ka đəre ga na, andza nəmay ma đəba i siye i ndo hay duk ma təv nakə lele bay aye. Nəmay na, ndo neheye tə gəs tay ha tə gatay sariya, ta diye tay hay mata kəde tay ha kame i ndo hay aye. Na tsik andza niye na, hərwi nəmay ka đəre i ndo i məndzibəra hay ada kwa ka đəre i gawla i Mbəlom hay tebiye na, andza ndo məge đəretsətseh hay hərwi ada ndo i məndzibəra ada kwa gawla i Mbəlom hay tã zəba famaya andza wu məge həbad.

<sup>10</sup> Andza niye nəmay na, andza ndo i matərakahañ hay. Nəkurom ka dzalum na, ka tsahum hərwi nəkurom madzapa eye tə Kəriste. Ndo hay tə dzala na, nəmay bəle eye hay, ane tuk na, nəkurom ka gwadum nəkurom gədañ eye hay. Nəmay na, ndo hay tə kəts may, nəkurom na, faya ta rəhakumeye ha gər.

<sup>11</sup> Hus anəke bəgom, may a wur famaya, yam a gamay dərmaç. Peteked may manasa eye hay. Faya ta gameye đəretsətseh haladzay, gay may andaya məhəne mə đəma bay, nəmaa təra ndo madzəda eye hay.

<sup>12</sup> Nəmaa ge məsler ta gədañ may hərwi məhute wu məndaç.\* Ndo hay faya ta tsadəmeye na, nəmaa đuwulay me a Mbəlom hərwi ada mã pa fataya ŋgama. Ahəl nakə ndo hay faya ta gameye đəretsətseh aye na, nəmaa ndza tete, nəmaa matay ha a đəma bay.

<sup>13</sup> Ndo hay faya ta tsikiye famaya wu lele bay eye na, nəmaa tsikatay bazlam ləfedede eye duh. Ndo hay tə dzala nəmay ka đəre i ndo i məndzibəra hay na, andza kwasukwalay kəriye. Hus bəgom tə dzala na, nəmay nəmaa təra andza wu neheye ndəluə eye ndo hay ta fadiye, ta kutsiye ha a pesl aye.

### *Pol a tsikatay me a wawa ŋgay hay*

<sup>14</sup> Wu nakə na watsa kahañ aye na, na watsakum hərwi məpakum horoy a đəre ka wu nakə ka gumeye bay. Na watsa andza nakay na, hərwi nəkurom wawa ga neheye na wuda kurom haladzay aye. A señ məđakum ha metsehe.

<sup>15</sup> Kwa tađa ndo hay wal wal haladzay ta đakum ha məpay bəzay a Yesu Kəriste bəbay na, bəba kurom hay haladzay bay. Bəba kurom na, nəte. Neñ na təra bəba kurom na, hərwi maa đakum ha Labara Ŋgwalak eye na, neñ ada nəkurom ka pum mədzal gər ka Yesu Kəriste.

<sup>16</sup> Bəba kurom na, neñ sa, faya na gakumeye amboh, tərüm andza neñ.

<sup>17</sup> A señ na, gum andza niye. Hərwi niye na sləriye naha Timote ka təv kurom hərwi ada mã ye naha mã makum ahaya a gər mede ga ka tsəved i Yesu Kəriste. Wu nakə ma diye naha ma tətikakumeye na, wu nakə na tətikawatay

\* 4:12 Məsler hay 18.3.

a ndo hay kwa ka waray aye. Tsənum! Timote na, nenɣeye wawa ga, na wuɗa na haladzay. Ada nenɣeye na, ma giye məsler i Bəy Maduweŋ Yesu ta tsəved eye lele.

<sup>18</sup> Na sər ha, siye i ndo hay ta zəba faya na ye naha ka təv kurom zuk bay na, tə dzala na, na diye naha sa bay, hərwi niye faya ta dəslay gər a bo tay.

<sup>19</sup> Ane tuk na, tadə Bəy Maduweŋ kway kə vələŋ tsəved na, na diye naha bəse. Na ndisl naha na, na səriye ha ndo neheye faya ta giye zlapay aye na, na zəbiye fataya təday. Na səriye ha ta tsikawa na, bazlam kəriye tsa tsukuɗu ta huta gədaŋ i Mbəlom ɗaw?

<sup>20</sup> Na tsik andza niye na, hərwi mələve i Bəy i Mbəlom nakə ma ləviye. A sər bo na, ma gədaŋ bəna mə bazlam hay kəriye dekdək tsa bay.

<sup>21</sup> A sakum na, wuye mey? Ahəl nakə aza na diye naha aye na, a sakum nā zla naha mandalaɗa ka həlay hərwi makəte kurom ha ɗaw? Kəgəbay ka mbəɗumeye ha ɗərev kurom ada neŋ na diye naha tə bazlam ləfedede eye hərwi məɗakum ha na, na wuɗa kurom ɗaw?

## 5

### *Wu nakə a ge horoy mə walaŋ i ndo məpe mədzal gər hay ka Yesu aye*

<sup>1</sup> Na tsənawa wu hay ka nəkurom. Ndo hay tə gwad na, faya ka gumeye wu nakə lele bay aye. Kwa ndo neheye tə sər Mbəlom bay aye na, faya ta giye slala i wu niye bay. Tə gwedeŋ na, ndo ta həna ta ŋgwas i bəba ŋgay.\*

<sup>2</sup> Ada ka ɗəslumay ha gər a bo ɗuh na, kəkay? Tuwum ɗuh hərwi mənese kurom. Ndo nakə faya ma giye andza niye ka gərūm ha na, kəkay?

<sup>3</sup> Neŋ na, na ge na sariya eye tsiy andza nəkway ka bo dziye. Neŋ mə walaŋ kurom bay, ane tuk na, ɗərev ga mandza eye tə nəkurom.

<sup>4</sup> Na ge sariya nakay ta gədaŋ i Bəy Maduweŋ kway Yesu. Wu nakə na tsikakumeye naha aye na, hayum gər ada ɗərev ga ma ndziye tə nəkurom. Gədaŋ i Bəy Maduweŋ kway Yesu ma ndziye tə nəkurom ɗərmak.

<sup>5</sup> Ahəl nakə ka hayum gər aye vələumay ha ndo niye a həlay i Fakalaw hərwi ada Fakalaw mā nas ha slo i bo ŋgay. Mā nas ha slo i bo ŋgay na, hərwi ada Mbəlom mā təma ha pat nakə Bəy Maduweŋ kway Yesu ma maweye.

<sup>6</sup> Ka ɗəslumay ha gər a bo na, hərwi mey? Məɗəslay ha gər a bo na, lele bay. «Gəde tsekweŋ a kwasa ha wu tebiye» na, ka sərūm təbədew? Andza niye mezeleme tsekweŋ na, ma nasiye wu na, ka sərūm təbədew?

<sup>7</sup> Zlum na mezeleme niye andza gəde abəra mə walaŋ kurom hərwi ada kə tərūm tsədaŋŋa andza wu nakə gəde faya bay aye. Na sər ha ta dedək, Mbəlom ka tara kurom ha tsədaŋŋa hərwi kə kəɗ təbaŋ hərwi ada kə hatsakwa magurlom i Pak ta nenɣeye. Təbaŋ eye niye na, Yesu Kəriste nakə a mət hərwi kway aye.†

<sup>8</sup> Hatsakwa magurlom lele. Ane tuk na, hatsakwa magurlom tə makwala weɗeye, gəde mā ge mə ɗəma bay. Tərakwa ndo neheye tsədaŋŋa eye. Pakway bəzay a tsəved i Mbəlom tə ɗərev kway peteh‡. Gərakwa ha mäge wu neheye lele bay tebiye. Wu niye hay na, andza gəde niye.

<sup>9</sup> Mə ɗerewel ga nakə na watsakum naha ahəl niye na, na gwadaɗakum: «Kā ndzum dziye ta ndo neheye faya ta giye madama aye bay.»

<sup>10</sup> Na tsik andza niye na, ka ndo i məndzibəra hay bay. Hərwi ndo mäge madama hay, ndo i bor hay, məkal hay ada ndo mäge kule hay, nəteye ndo

\* 5:1 Levitik 18.8; Bazlam mapala eye masulo eye 23.1. † 5:7 Madayaw abəra ma Ezipt 13.7; 12.21.

‡ 5:8 Madayaw abəra ma Ezipt 12.15-20; Bazlam mapala eye masulo eye 16.3.

i mändzibëra hay. Məñgədatay hərwi mədzepe ta nəteye bay na, haße ka deyumeye abëra ma mändzibëra.

<sup>11</sup> A'ay! Wu nakə na watsa aye na, na watsa düh na, ka ndo məpay bəzay a Yesu Kəriste. Tađə ndoweye kə gwad neñgeye ndo məpay bəzay a Yesu Kəriste ada faya ma giye madama, faya ma giye bor ka wu i ndo, faya ma giye kule, faya ma tsikiye wu lele bay eye ka ndo hay, faya ma kwaiye ta guzom, faya ma kəliye wu hay na, kâ ndzum ka təv manəte aye ta neñgeye bay. A həlay nakə nəkurom mandza eye ka mändzibëra mba aye na, tsəved andaya ka ñgənumeye ta nəteye aye bay.

<sup>12</sup> Mata ge sariya i ndo neheye tə pay bəzay a Yesu Kəriste bay aye na, neñ tədew? Nəkurom dərmaç na, ka gumateye sariya na, a ndo neheye ka hayawum gər dziye.

<sup>13</sup> Mata ge sariya a ndo neheye tə pay bəzay a Yesu Kəriste bay aye na, Mbəlom. Gum andza nakə mawatsa eye mə Derewel i Mbəlom na, a gwad: «Həharum na ndo nakə faya ma giye wu nakə lele bay aye abëra mə walañ kurom.Ş»

## 6

### *Ndo məpay bəzay a Yesu Kəriste hay ta wuda ka bo bay*

<sup>1</sup> Tađə faya ka tarumeye mə walañ kurom na, ka yawum ka təv i ndo məge sariya neheye tə sər Mbəlom bay aye na, ka gum andza niye hərwi mey? Mata ñgənakum ha sariya düh na, ndo məpe mədzal gər hay ka Yesu.

<sup>2</sup> Mata gatay sariya a ndo neheye tə sər Mbəlom bay aye na, ndo məpe mədzal gər hay ka Yesu na, ka sərüm təbədew? Kə ge düh mata gatay sariya a ndo neheye tə sər Mbəlom bay aye nəkurom tuk na, ada ka sərüm məge sariya i wu neheye tsekweñ tsekweñ aye bay na, kəkay?

<sup>3</sup> Mata gatay sariya kwa a gawla i Mbəlom hay nəkway na, ka sərüm təbədew? Kə ge andza niye na, ka ñgənakweye ha sariya a bo ka mändzibëra bəna kemey?

<sup>4</sup> Tađə ka tarum mə walañ kurom na, ka diyumeye ha ka təv i ndo neheye tə sər Mbəlom bay aye na, kəkay? Nəteye na, wuray kə dzapa kurom ha kwa tsekweñ bay. Ane tuk na, a sakum tâ ñgənakum ha sariya na, ma kəkay?

<sup>5</sup> Horoy a gakum təbədew? Ndo nakə a tsah ma tsikakumeye me a zləm aye na, andaya mə walañ kurom ndo məpay bəzay a Yesu Kəriste hay təbədew?

<sup>6</sup> Ndo məpay bəzay a Yesu ma wudiye ka malamar nakə faya ma pay bəzay a Yesu andza neñgeye na, lele bay. Ada kwa ka təv i ndo neheye tə sər Mbəlom bay aye ka wudawum.

<sup>7</sup> Ka wudumeye ka bo mə walañ kurom na, lele bay. Ka wudum ka bo mə walañ kurom na, ka dəđum abëra ka tsəved i Mbəlom. Ka sakumay naha a ndo neheye faya ta gakumeye mənese aye. Tađə ta kəlakum na wu kurom na, gəsüm dərev, kâ wudum fataya bay.

<sup>8</sup> Ane tuk na, ka gəsüm dərev bay, faya ka gumateye wu lele bay eye a siye ndo hay düh. Faya ka kəlumeye wu i ndo hay, kwa nəteye malamar kurom hay ka tsəved i Mbəlom bəbay na, faya ka kəlumeye tay ha.

<sup>9</sup> Ndo neheye faya ta giye lele bay eye ta diye a Bəy i Mbəlom bay na, ka sərüm təbədew? Kâ vumay gər a bo kurom bay. Sərüm ha na, ndo neheye faya ta giye madama, ta giye kule, faya ta həniye ta ñgwas i ndo hay ada ndo neheye tə zla hasləka ta təra ha andza ñgwas eye,

<sup>10</sup> ndo makæle wu i ndo hay, ndo mæge dære ka wu i ndo, ndo mækway eye hay, ndo mætsadåtay a ndo hay, ndo mabuwe siye i ndo hay ta gədan, slala i ndo neheye tebiye na, ta diye a Bəy i Mbəlom bay.

<sup>11</sup> Ahəl niye na, siye i ndo hay mə walaŋ kurom tə gawa wu neheye lele bay aye. Ane tuk na, Məsəfəre i Mbəlom nakə faya ka dəsłakweye ha gər aye kə pəsakum ha mezeleme kurom ada kə bara kurom. Kə pala kurom hərwi ada kə tərūm ndo i Mbəlom hay. Ka təra kurom hay tsədanŋa kame i Mbəlom. A ge andza niye na, hərwi ka pum mədzał gər ka Bəy Maduweŋ Yesu Kəriste.

### *Bo na, hərwi mazambaday a Mbəlom*

<sup>12</sup> Ndo siye hay mə walaŋ kurom tə dzala mə gər tay na: «Tsəved andaya ka mæge wu hay tebiye.» Ane tuk na, wu tebiye lele hərwi kurom bay. «Tsəved andaya ka mæge wu hay tebiye.» Ane tuk na, a seŋ matəre beke i wu bay.

<sup>13</sup> Ka gwadum sa: «Mbəlom a ge wu mənday na, hərwi huɗ, a ge huɗ hərwi wu mənday dərmaɗ.» Ayaw dedek, ane tuk na, Mbəlom ma dziye tay ha sulo tay eye tebiye. Mbəlom a lambaɗ bo na, hərwi mæge ha madama bay. A lambaɗ na, hərwi ada kə dəsłakway ha gər a Bəy Maduweŋ kway dūh, hərwi neŋgeye faya ma tsəpiye bo kway.

<sup>14</sup> Mbəlom kə lətse ahaya Bəy Maduweŋ kway Yesu abəra ma mədahaŋ. Mə lətsakway ahaya abəra ma mədahaŋ ta gədan ŋgay dərmaɗ. Ka lətsakweye abəra ma mədahaŋ tə slo i bo kway tebiye.

<sup>15</sup> Nəkurom siye i bo i Yesu Kəriste na, ka sərūm təbədew? Na sliye faya mabuwe siye i bo i Yesu məwəlay ha a ŋgwas mæge madama daw? A'ay, ma giye bo andza niye bay!

<sup>16</sup> Ka sərūm bədaw? Ndowne kə wəlay ha bo ŋgay a ŋgwas mæge madama na, nəteye sulo ta təra bo nəte. Andza nakə tə watsa mə Derewel i Mbəlom, Mbəlom a gwad: «Ndo hay sulo na, ta təriye bo nəte.\*»

<sup>17</sup> Ane tuk na, ndo nakə kə wəlay ha bo ŋgay a Bəy Maduweŋ Yesu aye na, neŋgeye ta Bəy Maduweŋ, dærev tay nəte.

<sup>18</sup> Hərwi niye, kə gum madama bay. Siye i wu neheye ndo hay faya ta giye na, bo tay madzapa eye tə wu niye hay bay. Ane tuk na, ndo nakə faya ma giye madama aye na, a gay wu nakə lele bay aye a bo ŋgay.

<sup>19</sup> Bo kurom na, gay i mədəsłay ha gər a Məsəfəre Tsədanŋa eye na, ka sərūm bədaw? Mbəlom a wəlakum Məsəfəre Tsədanŋa eye ada ma ndziye mə dærev kurom. Maa ləwəy gər a bo kurom hay na, bo kurom eye bay. Maa ləwəy gər na, Mbəlom.

<sup>20</sup> Mbəlom a mbəda kurom ahaya tə wu nakə tsakala eye haladzay aye. Hərwi niye dəsłumay ha gər a Mbəlom tə bo kurom.

## 7

### *Bazlam i mæzle bo*

<sup>1</sup> Anəke na, na mbədakumeye naha ka bazlam kurom nakə ka watsumeŋew a dərewel aye. Ayaw! Tadə hasłəka kə zla ŋgwas bay na, kə ge lele.

<sup>2</sup> Ane tuk na, lele eye na, hasłəka mə zla ŋgwas ada ŋgwas mə ye a zal hərwi ada tə ge madama bay.

<sup>3</sup> Hasłəka mə kərah məhəne ta ŋgwas ŋgay bay, ŋgwas dərmaɗ mə kərah məhəne tə zal ŋgay bay.

<sup>4</sup> Bo i ŋgwas na, i ŋgay eye ŋgway bay. Bo ŋgay na, i zal ŋgay dərmaɗ. Bo i hasłəka bəbay na, i ŋgay eye ŋgway bay. Bo ŋgay na, i ŋgwas ŋgay dərmaɗ.

\* 6:16 Madazlay i wu hay 2.24.



<sup>5</sup> Andza niye, haslaka ta ngwas ngay na, tã kãrah ha a bo mähöne bay. Tadã agäna nõtëye salamay ta gwad yaw na, ta sliye faya mähöne bay mändze tsekweñ tsa härwi maduwulay me a Mbälom. Kã ndzum wal wal mändze haladzay bay, Fakalaw ma ta vakumeye gër härwi nakã ka gumay metsehe a bo kurom bay aye.

<sup>6</sup> Wu nakã na tsikakum ka mæzle bo aye na, na tsikakum na, gum tã kutorñ bay. Tadã ka gum andza nakay na, ka gum mænese bay.

<sup>7</sup> Tadã neñ na, na gwadiye ngama ndo hay tebiye tã ndza andza neñ ze ngwas. Ane tuk na, ta dedek ma giye lele bay härwi Mbälom a vël ngwalak kwa a way andza nakã a say mäge aye. Ndo siye hay a vëlatay gëdanj mæpay bæzay ta ngwas. Ndo mekelëñ eye hay tã sër mändze ze ngwas ta gëdanj i Mbälom.

<sup>8</sup> Anãke, neñ faya na tsikakumeye a näkurom madakway i ngwas ta näkurom neheye ka zlum ngwas zuk bay aye. Neñ faya na gwadakumeye: Lele na, ndzum andza neñ. Kã zlum ngwas bay, näkurom ngwas hay bæbay kã yum a zal bay.

<sup>9</sup> Ane tuk na, kã ge ka mbumeye faya mändze tãta bay na, haslaka mã zla ngwas, ngwas mã ye a zal. Ngama haslaka mã zla ngwas, ngwas därmak mã zla zal ta bæmalã nakã bor i bo ma gæsiye kurom aye.

<sup>10</sup> Anãke faya na tsikateye a ndo neheye nõtëye ta ngwas tay hay aye, kægäbay nõtëye tã zal tay hay aye. Maa tsik bazlam nakay na, neñ mahägeye bay. Maa tsik na, Bëy Maduweñ Yesu Kãriste. A gwad: Ngwas mã gër ha zal ngay bay.

<sup>11</sup> Kã ge ngwas eye kã gër ha zal ngay na, mã zla zal mekelëñ eye bay. Tadã kã ge a say zal sa na, mã ma ta dëba ka tøv i zal kurre eye tã ma ka bo. Haslaka därmak mã hãhar na ngwas ngay bay.

<sup>12</sup> Anãke na tsikateye naha a ndo mekelëñ eye hay nakã agäna ngwas kã dzala ha ka Yesu bay nõtëye mandza eye aye. Maa tsik na, neñ bëna Bëy Maduweñ Yesu bay. Faya na tsikiye: Tadã ndoweye ngwas ngay kã dzala ha ka Yesu zuk bay na, tadã ka tãma mändze tã neñgeye na, mã hãhar na bay.

<sup>13</sup> Härwi ngwas nakã kã dzala ha ka Yesu aye na, andza niye därmak. Tadã zal ngay kã dzala ha ka Yesu bay ada tadã a say mändze ta ngwas ngay na, ngwas mã kãrah mändze mæ gay ngay bay.

<sup>14</sup> Na tsik andza niye na, härwi zal ngay nakã kã dzala ha ka Yesu zuk bay aye na, neñgeye i Mbälom härwi ngwas nakã a dzala ha ka Yesu aye. Härwi ngwas nakã kã dzala ha ka Yesu zuk bay aye na, andza niye därmak. Kã ge zal mapä gër eye ka Yesu na, ngwas ngay na, i Mbälom därmak. Tadã kã ge andza niye bay na, wawa tay ta tãriye andza ndo neheye tã sër Mbälom bay aye. Ane tuk na, wawa tay hay nõtëye ta tãra andza niye bay, Mbälom kã pa tay hay a walañ i ndo ngay hay.

<sup>15</sup> Kã ge ndoweye kã dzala ha ka Yesu bay, tadã a say mægër ha ndo neñged na, mã ye. Tadã kã gër ha, ki ye ngway na, haslaka kægäbay ngwas, mã dzala wuray bay. Härwi ngay na, mænese andaya bay. A yay a gër a Mbälom härwi ada kã ndzum zay.

<sup>16</sup> A näkar ngwas mapä gër eye ka Yesu, tadã Mbälom ma tãmiye ha zal yak härwi yak na, ka sër daw? A näkar zal mapä gër eye ka Yesu, tadã Mbälom ma tãmiye ha ngwas yak härwi yak na, ka sër daw? Ka sër bay tebiye.

### *Ndzum andza nakã Mbälom a zalakum aye*

<sup>17</sup> Ane tuk na, kwa way mã pay bæzay a tsæved nakã Bëy Maduweñ a vëlay aye ada mã ndza andza nakã ahël niye a zalayaw härwi ada mã pay bæzay

aye. Wu nakay na tsikakum aye na, wu nakə neŋ faya na tətikateye a ndo hay ma məhay gər i ndo məpe mədzal gər hay ka Yesu aye.

<sup>18</sup> Tadə Mbəlom a zalaka nəkar madəsa bo eye na, ndza madəsa bo eye. Kə ge tadə Mbəlom a zalaka nəkar madəsa bo eye bay na, kâ gwad «Na dəsiye bo» bay.

<sup>19</sup> Agəna nəkar madəsa bo eye, kəgəbay agəna nəkar madəsa bo eye bay na, kame i Mbəlom na, nəte. Wu nakə ma giye ŋgama mə dəma aye na, andaya bay. Wu nakə ma dzəniye kame i Mbəlom aye na, marəhay ha gər a bazlam i Mbəlom mapala eye.

<sup>20</sup> Kwa nəkar kəkay, kəkay na, Mbəlom a zalaka ka məndze andza niye.

<sup>21</sup> Agəna Mbəlom a zalaka ahəl niye nəkar beke eye na, mâ dzəma kar bay. Ane tuk na, tadə ka hutiiye tsəved matəre ndo barbarra eye ka ləviye gər yak aye na, lele dərmak sa tsa.

<sup>22</sup> Na gwad tadə nəkar beke eye kâ dzəma wuray bay na, hərwi tadə ahəl niye Bəy Maduweŋ Yesu Kəriste a zalaka nəkar beke eye na, sər ha Bəy Maduweŋ Yesu Kəriste kə təma kar ahaya abəra ma beke i mezeleme. Sa na, ndo nakə beke eye bay Bəy Maduweŋ Yesu Kəriste a zalay ka məpay bəzay aye na, ka təra beke i Kəriste.

<sup>23</sup> Nəkurom tebiye, kwa beke kwa beke eye hay bay, Mbəlom a mbəfa kurom ahaya na, tə wu nakə tsakala eye haladzay aye. Nəkurom na, ndo ŋgay hay. Hərwi niye kâ pumay bəzay a mədzal gər i ndo hay andza nakə beke hay faya ta pay bəzay a ndo i gay tay hay aye bay.

<sup>24</sup> Malamar ga hay, neŋ faya na tsikakumeye. Kwa way mâ ndza andza nakə ahəl niye Mbəlom a zalay aye. Mâ ndza kame i Mbəlom na, andza niye.

### *Ndo neheye ta zla bo zuk bay aye*

<sup>25</sup> Anəke na, neŋ faya na tsikiye ka hasləka neheye ta zla ŋgwas zuk bay ada tə dem neheye ta ye a zal zuk bay aye. Wu nakə na tsikiye aye na, Bəy Maduweŋ Yesu a tsiken bay. Na tsikiye na, wu nakə na dzala mə gər ga aye tsa. Ane tuk na, ka slumeye məpe faya mədzal gər hərwi neŋ na, ndo dedək eye kame i Mbəlom ta gədan i Bəy Maduweŋ Yesu.

<sup>26</sup> Na zəba ka dəretsətseh nakə faya ka sakweye a həlay nakay anəke aye, na dzala na, lele məndze andza nakə tə ndzawa aye.

<sup>27</sup> Kə ge ka zla ŋgwas tsiy na, kâ həhar na bay. Tadə ka zla ŋgwas zuk bay na, ndza andza niye, kâ pəla tsəved ka məzle ŋgwas bay.

<sup>28</sup> Ane tuk na, kwa tadə hasləka kə zla ŋgwas bəbay na, kə ge mənese bay. Tadə dem kə zla zal na, kə ge mənese bay dərmak. Ane tuk na, sərur ha na, ndo neheye ta ŋgwas tay hay aye kəgəbay tə zal tay hay aye na, faya ta siye dəretsətseh haladzay ka məndzibəra. Hərwi niye na gwad lele məndze ze məzle ŋgwas kəgəbay ze məzle zal hərwi ada kâ hutakwa dəretsətseh bay.

<sup>29</sup> Malamar ga hay, gər i bazlam nakə a seŋ mətsikakum aye na, anan: Həlay nakə Mbəlom a vələkway aye na, mazlambar ma slaweye. Hərwi ma dazlay anəke hus mede kame na, ndo neheye ta zla ŋgwas aye ta ndza ka tsəved i Mbəlom andza i ndo neheye ta zla ŋgwas bay aye.

<sup>30</sup> Ndo neheye faya ta tuwiye na, tâ gay məsler a Mbəlom andza nəteye faya ta tuwiye bay aye. Ndo neheye faya ta ŋgwasiiye na, tâ gay məsler a Mbəlom andza nakə nəteye faya ta ŋgwasiiye bay aye. Ada ndo neheye faya ta səkəmiye wu hay aye na, tâ zəba faya ka wu nakə ta səkəmiye andza wu kəriye.

<sup>31</sup> Ndo neheye faya ta giye məsler tə wu i məndzibəra aye na, tâ ndza andza nakə nəteye faya ta giye ha məsler tə wu niye hay bay aye, hərwi məndzibəra nakay anan mandza eye anəke na, ma ndəviye.

<sup>32</sup> A seņ na, kâ dzalum wuray bay. Ndo nakə ɲgwas andaya faya bay aye na, ma piye mædzal gər ɲgay tebiye ka mæsler i Bəy Maduweŋ Yesu. Ma giye andza niye na, hərwi neŋgeye mâ yay a gər a Bəy Maduweŋ Yesu.

<sup>33</sup> Ndo nakə ta ɲgwas aye neŋgeye, ma dzaliye na, ka wu i mændzibəra. A say mæge na, wu nakə a yay a gər a ɲgwas ɲgay aye.

<sup>34</sup> Andza niye mædzal gər ɲgay na, sulo. ɲgwas na, andza niye dərma. ɲgwas nakə zal ɲgay andaya bay aye tə dem nakə ki ye a zla zal zuk bay ta pa mædzal gər tay ka mæsler i Bəy Maduweŋ Yesu. A satay mævəlay ha dərəv tay tə bo tay a Mbəlom. ɲgwas nakə zal ɲgay andaya neŋgeye a dzala na, ka wu i mændzibəra, a say mæge wu nakə a yay a gər a zal ɲgay aye.

<sup>35</sup> Na tsikakum andza niye hərwi madzəne kurom dūh bəna hərwi mægakum me bay. A seņ dūh na, mede kurom mâ ge lele ada kâ pumay bəzay a Bəy Maduweŋ tə dərəv kurom peteh.

<sup>36</sup> Anəke na tsikiye na, ka gawla ta mædel ɲgay. Tadə gawla a zəba faya a say mædel ɲgay ka zal ada ma geye mənese na, tã zla bo. Tã ge mənese bay.

<sup>37</sup> Ane tuk na, tadə gawla kə dzala ta dedək dūh ma zliye mædel ɲgay bay na, ada tadə a dzala tə dərəv ɲgay peteh ndəray a gay me ka mæzle bay, bo ɲgay eye a dzala ɲgway ada ma sliye mændze tətə na, a ge niye na, lele.

<sup>38</sup> Andza niye, ndo nakə kə zla dahəlay aye na, kə ge lele. Ndo nakə kə zla dahəlay bay aye na, kə ge lele haladzay sa tsa.

<sup>39</sup> ɲgwas tə zal ɲgay ta ndziye na, huya. Tadə zal ɲgay kə mət na, ma sliye faya mæzle zal mekeleŋ eye andza nakə a say aye. Ane tuk na, lele eye ma zliye na, ndo məpa gər eye ka Yesu.

<sup>40</sup> Neŋ na dzala, mâ ndza mahəŋgeye, hərwi ma ta ndziye ma sifa ta məŋgweŋ eye ma ziye nakə neŋgeye tə zal aye dūh. Wu nakə na tsik aye na, sər ha maa dēŋ ha na, Məsəfəre i Mbəlom.

## 8

### *Wu nakə makəday a kule aye*

<sup>1</sup> Matsətsehe kurom nakə ka tsətsahum hərwi slo nakə ta tawal ha kule aye na, ta dedək nəmaa sər ha tebiye andza nakə ka tsikum aye. Ane tuk na, məsəre wu na, ndo hay ta dəslay ha gər a bo. Duh wu nakə ma dzəniye ndo hay hərwi ada kâ yakwa kame kame aye na, mawudə bo nakə ka wudəkweye bo nəte nəte mə walaŋ kway aye.

<sup>2</sup> Tadə ndoweŋe kə dəslay ha gər a bo ada a dzala mə gər ɲgay neŋgeye, a sər wu hay na, niye a bəz ha na, a sər wu hay andza nakə a say a Mbəlom aye zuk bay.

<sup>3</sup> Ane tuk na, ndo nakə ma dəslay ha gər bo ɲgay andza niye təbey aye na, a wuda Mbəlom dūh. Mbəlom a sər ha, a gwad: «Ndo nakay na, ndo ga.»

<sup>4</sup> Slo nakə ta tawal ha kule aye na, ka həpədəkweye bay tsukudu ka həpədəkweye daw? Wu nakə neŋ na dzala aye na, anaŋ: Ka sərakwa ha kule na, wu dedək eye bay. Ka sərakwa ha Mbəlom na, nəte ɲgweŋ bəna siye hay andaya bay.

<sup>5</sup> Dedək, siye i ndo hay tə gwad na, mbəlom hay andaya haladzay ma magərmbəlom ada ka mændzibəra. Ka nəteŋe na, dedək mbəlom hay andaya haladzay ada bəy maduweŋ hay andaya haladzay.

<sup>6</sup> Ane tuk na, kwa andza niye bəbay na, nəkway ka sərakwa Mbəlom na, nəte ɲgweŋ tsa. Neŋgeye Bəba kway. Wu neheŋe ka mændzibəra aye tebiye a yaw na, mə həlay ɲgay. A ge kway na, hərwi ada kâ tərakwa ndo ɲgay hay. Bəy

kway na, nāte tsa dārmak. Neŋgeye na, Yesu Kāriste. Wu hay tebiye ti yaw na, mā hālay ŋgay, ka hutakwa sifa wedeeye na, tē hālay ŋgay.

<sup>7</sup> Ane tuk na, siye i ndo mape mādzaḷ gār hay ka Yesu ta sār ha, sifa andaya mā kule hay bay na, ta sār ha bay. Ahāl nakā nāteye faya ta hāpādiye slo i kule aye, tē dzala mā gār tay andza huya kule na, mbālom dedek. Ta huta gādaŋ ka tsāved i Mbālom zuk bay. Tē dzala mā gār tay, tadā ta hāpāf slo i kule na, ta ge mānese.

<sup>8</sup> Azlakwa bay, ka sarakwa ha wu mānday na, ma tēriye kway ha ndo ŋwalak eye hay kame i Mbālom bay. Kwa tadā ka ndayakwa, ma dzāniye kway bay. Kwa tadā ka ndayakwa bay, ma giye wuray kwa tsekweŋ bay dārmak.

<sup>9</sup> Nākurom, ka sārūm ha ka slumeye faya mānde wu nakā a sakum aye tebiye. Ane tuk na, gum metsehe, bāna ndo neheye ta huta gādaŋ ka tsāved i Mbālom zuk bay aye na, ta dziye abāra ka tsāved hārwi kurom.

<sup>10</sup> Zābum tēday, nākar nakā ka sār dedek aye, tadā ndo nakā gādaŋ ŋgay andaya zuk bay kē ŋgataka nākar māndza eye mā gay i mateweḷe kule faya ka hāpādiye slo nakā ta tawal ha kule aye, nākar ka dzala na, ma hāpādiye dārmak bādaw?

<sup>11</sup> Hārwi niye wu nakā ka ge hārwi ka sār aye na, ma nasiye ha ndo niye gādaŋ andaya bay aye. Ane tuk na, sār ha neŋgeye na, malamar yak nakā Yesu Kāriste a mat hārwi ŋgay aye.

<sup>12</sup> Tadā ka ge andza niye na, ka nasay a malamar yak nakā bāle eye, ka nasay ha mādzaḷ gār ŋgay. Ka nasay na, a malamar yak dekdek bay, sār ha mānese nakā ka ge aye na, ka bo i Kāriste eye ŋgway.

<sup>13</sup> Hārwi niye tadā slo nakā na hāpādiye ma diye ha malamar ga a mānese na, na hāpādiye slo dāda sa bay, hārwi a seŋ malamar mā dāf abāra ka tsāved bay.

## 9

### *Pol a dā ha māndze ŋgay*

<sup>1</sup> Zābum ka māndze ga tēday, neŋ na, na lēva gār ga! Neŋ, ndo i maslaŋ i Yesu na, ka sārūm bādaw? Neŋ na ŋgatay a Yesu Bāy Maduweŋ kway tē dāre ga! Nākurom tebiye ka pum mādzaḷ gār ka Bāy Maduweŋ na, hārwi nakā na ge māsler ŋgay mā walaŋ kurom aye bādaw?

<sup>2</sup> Kwa tadā ka dāre i ndo mekelēŋ eye hay neŋ ndo i maslaŋ i Yesu bay bābay na, nākurom ka sārūm ha. Ka pum mādzaḷ gār ka Yesu Kāriste na, hārwi nakā na dākum ha Labara ŋwalak eye bādaw? Maa bāz ha neŋ ndo i maslaŋ i Bāy Maduweŋ kway na, nākurom.

<sup>3</sup> Hārwi ndo neheye ta meŋeye ha mānese aye na, na gwadateye faya kākay? Na tsikateye faya,

<sup>4</sup> neŋ na sla dā nākurom ka vālumeneye wu mānday hārwi māsler nakā faya na giye bādaw?

<sup>5</sup> Neŋ na sla māzle ŋgwas nakā mapa gār aye ka Yesu, neŋ ta ŋgwas ga nāmaa hāhaliye salamay andza i Piyer tē siye i ndo i maslaŋ i Yesu hay ada andza i malamar i Yesu Kāriste hay tēbāfaw?

<sup>6</sup> Sa na, nākurom ka dzalum mata ge māsler hārwi māhute ha wu mānday a gār may na, nāmay ta Barnabas dekdek dāw?

<sup>7</sup> Tadā ndoweeye neŋgeye ma sidzew na, ma pāliye wu mānday a gār ŋgay dāw? A'ay! Andza niye bay. Ndo māfāte kē fāt, hohway eye kē nah na, ma ndiye. Ndo mātsākure gānaw na, ma dātsiye wah eye ma siye bādaw?

8 Wu neheye na tsik aye na, mædzal gær i ndo zezen dekdek tsa bay. Kwa bazlam i Musa mapala eye a tsik faya na, andza niye dærmak.

9 Mawatsa eye mæ dærewel i Musa na, a gwad: «Ahæl nakæ sla ma giye mæsler ma guvah aye na, kâ pay wu ka bazlam bay, gær ha mâ hæpæd wu mænday.\* » Ka dzalum, Mbælom a tsik na, ka sla dekdek dedek daw?

10 Mbælom a tsik nakay na, ka nəmay. Ayaw, tæ watsa bazlam neheye ahæl niye na, hærwi may. Ndo nakæ faya ma fætiye na, mâ pa mædzal gær ta dedek ma hutiiye madagær ŋgay. Ndo nakæ faya ma kæzliye daw aye, mâ pa mædzal gær ta dedek ma hutiiye wu mænday.

11 Ah lele! Nəmay na, nəmaa dækum ha bazlam i Mbælom andza nakæ ta slaga hulfe a guvah aye. Ka dzalum tadæ nəmaa hutiiye wu neheye ka mændzibæra aye abæra mæ hælaiy kurom na, lele bædaw?

12 Tadæ ta dedek siye i ndo hay faya ta tsætsahiye fakuma wu neheye ta ndiye na, ka dzalum nəmay nəmaa tsætsah na, lele dærmak bædaw? Kwa tadæ andza niye bəbay na, nəmaa tsætsah wuray abæra mæ hælaiy kurom bay. Dæretsæseh neheye a ndzamay a gær tebiye nəmaa dæma hærwi a say mæge wu nakæ ma ŋgæræzliye na Labara Ŋgwalak eye i Yesu Kæriste bay.

13 Særum ha na, ndo neheye faya ta giye mæsler mæ gay i mædæslay ha gær a Mbælom aye na, faya ta hutiiye wu mænday tay mæ dæma. Ndo neheye tæ kædaway naha wu a Mbælom ma tæv mævælaiy wu a Mbælom aye na, tæ hutawa wu mænday tay mæ dæma dærmak.

14 Ndo neheye faya ta diye ha Labara Ŋgwalak eye na, andza niye dærmak. Bæy Maduweŋ kway Yesu a gwad ndo hay ta vælæteye wu a ndo neheye faya ta diye labara ŋgay aye.†

15 Kwa tadæ andza niye bəbay na, neŋ na tsætsah fakuma wuray bay. Wu nakæ na watsa aye na, na watsa hærwi ada kâ slærumenjew wu bay. Tæ bəmalæ nakæ na tsætsahiye fakuma wu aye na, ŋgama nâ mæt. Ndæray mâ nesen ha mæŋgwese ga bay.

16 Labara ŋgwalak eye nakæ faya na diye ha aye na, ma vælæŋeye tsæved mæge ha zlapay bay. Maa geŋ faya kutoŋ na, Yesu. Na da ha bay na, dæretsæseh ka gær ga.

17 Tadæ neŋ eye na dzalay a gær ga na datay ha labara wedeye a ndo hay na, hæbe ta vælæŋeye meræbe ga. Ane tuk na, andza niye bay! Mæsler eye nakay na, neŋ na zla tæ gær ga bay. Na giye na, hærwi Mbælom a vælæŋ hærwi ada nâ ge.

18 Kæ ge andza niye na, meræbe ga na, wuye mey? Meræbe ga na, faya na diye ha Labara Ŋgwalak eye kæriye, faya na tsætsahiye tâ vælæŋ faya wu bay. Na sliye faya matsæsehe ndo tâ vælæŋ wu hærwi Labara Ŋgwalak eye nakæ faya na diye ha aye. Ane tuk na, a seŋ bay.

19 Na ndziye na, na læva gær ga, ndæray ma sliye faya mælæveŋ gær bay. Ane tuk na, na tæra beke hærwi ndo hay tebiye na, tæ gær ga eye hærwi ada tâ yaw tâ pa mædzal gær ka Bæy Maduweŋ Yesu.

20 Neŋ mæ walaŋ i Yahuda hay na, na ndziye andza næteye hærwi ada nâ hælata ahaya ka tæv i Bæy Maduweŋ Yesu. Bazlam i Musa mapala eye na, gædanj ŋgay andaya fagaya bay. Ane tuk na, neŋ mæ walaŋ i ndo neheye ta ræhay ha gær a bazlam mapala eye na, na giye andza næteye hærwi ada nâ hælata ahaya ka tæv i Bæy Maduweŋ.

\* 9:9 Bazlam mapala eye masulo eye 25.4. † 9:14 Zæba mæ Mata 10.10; Luka 10.7.

21 Ahəl nakə neŋ mə walaŋ i ndo neheye tə sər bazlam i Musa mapala eye bay na, na ndziye andza nəteye hərwi ada nâ həlata ahaya ka təv i Bəy Maduweŋ dərmak. Andza məgwede neŋ na, na rəhay ha gər a bazlam i Mbəlom mapala eye təbey. A'ay! Neŋ faya na rəhay gər hərwi faya na rəhay ha gər a Kəriste.

22 Ahəl nakə neŋ ta ndo neheye ta huta gədaŋ ka tsəved i Mbəlom zuk bay aye na, na ndziye andza nəteye hərwi ada na dzəniye tay ha tã huta gədaŋ ka təv i Bəy Maduweŋ. Ahəl nakə neŋ ta ndo hay tebiye aye na, na ndziye andza nəteye. Na giye wu nakə na sər aye tebiye hərwi ada nâ təma tay ha siye hay.

23 Wu neheye na ge tebiye aye hərwi ada Labara Ņgwalak eye mǎ ye kame kame. Mbəlom mǎ pa fagaya űgama, ka neŋ ta ndo űgay siye hay.

### *Matətike i ndo mahway hay*

24 Sərum ha na, ahəl nakə ndo hay ta hwiye na, ndo mahway nəteye haladzay ta hwiye. Ane tuk na, mata ze ndo siye hay na, ndo nəte tsa, ma hutiyə merəbe i mahway űgay. Neŋ faya na gwadəkumeye: Gum gədaŋ andza ndo mahway hay hərwi ada kǎ hutum merəbe kurum dərmak.

25 Ndo neheye a satay mahway lele aye na, ta gəriye ha wu hay wal wal haladzay. Ta tətikiye, ta ndudiye ha mbəle tay hay lele nakə ada ndo ma sliye faya mazay a ndo neŋged aye ada ma hutiyə merəbe űgay aye. Ane tuk na, merəbe űgay niye ta vəleye ma ndziye bay, ma nasiye bəse. Nəkway na, nəkway ka tətikakweye mahway kame i Mbəlom hərwi ada kǎ hutakwa merəbe nakə ma nasiye dǎda bay aye.

26 Hərwi niye neŋ na, na hwiye andza ndo nakə ma hwiye so tsa bay aye. Neŋ bəbay na, andza ndo nakə faya matətikiye məgay duzl a ndo nakə faya ta tətikiye salamay, həlay űgay a ma a zay bay aye. Neŋ na, andza ndo naka ma feye a mətasl kafats kəriye bay.

27 Neŋ eye na geye dəretsətseh a bo ga tə həlay ga eye ada ma gəseŋeye mə hərwi ada pat naka Mbəlom ma ndəviye ha mǎndzibərə aye na, neŋ ndo mǎde ha bazlam űgay a ndo hay nâ təra ndo i dəba bay.

## 10

### *Israyel hay mə makukulek*

1 Malamar ga hay, wu nakə a ge bo ahəl niye ta bəba tətə kway hay aye, a seŋ na, mǎ makumaw a gər. Mbəlom kə dərəzl tay ha nəteye tebiye tə makukulek. Nəteye tebiye ta tas ta bəlay nakə tə zalay Bəlay Ndozza aye.\*

2 Nəteye tebiye Mbəlom ka dzəhu6 tay ha mə makukulek ada ma dəlov hərwi ada tã təra nəteye madzapa eye tə Musa.

3 Nəteye tebiye ta nda wu mǎnday eye nəte nakə a yaw mə mbəlom aye†,

4 ada nəteye tebiye ta sa yam eye nəte nakə Mbəlom a vəlatay aye dərmak. Yam nakay na, yam nakə a gəzaw abərə ma hotokom aye.‡ Maa vəlatay hotokom niye na, Mbəlom. Hotokom eye niye na, Kəriste ada a laka tay ha.

5 Kwa tadə ta űgatay a masuwayaŋ nakə Mbəlom a ge aye bəbay na, həlay a vay a ndo hay tə gawa wu nakə a yay a gər a Mbəlom bay aye. Hərwi niye ndo hay ta mət tolololo mə kəsaf kwa ka waray.§

6 Wu neheye na, ta gakweye daf. Ta vəlakweye matətike hərwi ada bor i bo kway mǎ ye kway ha ka məge mǎnese andza nəteye bay.\*

\* 10:1 Madayaw abərə ma Ezipt 13.21-22, 14.22-29. † 10:3 Madayaw abərə ma Ezipt 16.4-35.

‡ 10:4 Məpesle 20.8-11. § 10:5 Məpesle 14.16, 23, 29-30. \* 10:6 Məpesle 11.4, 34.

<sup>7</sup> Siye hay mə walañ tay tə dəslay ha gər a kule. Andza niye, tə watsa a dərewel i Mbəlom na, tə gwad: «Ndo hay tə ndza, tə nda wu mənđay ada tə sa wu məsay. Tsa na, tə lətse hərwi mäge həbađ tə mədəslay ha gər a kule.†» Nəkurom na, kâ tərüm ndo i kule hay andza nəteye təbey.

<sup>8</sup> Kâ gakwa madama andza siye i ndo neheye mə walañ tay aye bay. Nəteye tə mət ada Mbəlom a kəđ tay ha pat eye nəte gwezem kuro kuro sulo gər eye mahkar hərwi nakə tə ge madama aye.‡

<sup>9</sup> Nəkway na, kâ dzakwa ha Mbəlom andza siye i ndo neheye mə walañ tay tə dza ha Mbəlom aye bay. Dəđə a dza tay ha ada ta mət hərwi nakə tə ge andza niye aye.

<sup>10</sup> Kâ guñguzum ka Mbəlom andza siye i ndo neheye mə walañ tay, ta guñguzay a Mbəlom aye bay. Nəteye niye na, gawla i Mbəlom nakə a kədawa ndo hay aye kə kəđ tay ha hərwi nakə ta guñguz aye.

<sup>11</sup> Wu neheye tebiye a ge bo aye na, məgatay dəf a ndo hay hərwi ada tâ ge metsehe. Tə watsa na wu neheye a Dərewel i Mbəlom na, hərwi ada kâ tətikakwa wu neheye, nəkway neheye mandza eye mə həlay nakə mazlambər mənđzibəra ma ndəviye aye.

<sup>12</sup> Hərwi niye, ndo nakə a dzala mə gər ŋgay neñgeye malətsa eye duwirre lele aye na, mâ ge metsehe bəna ma ta dəđiye.

<sup>13</sup> Wu neheye Fakalaw ma dziye kurom ha aye na, wu neheye faya a dzawa tay ha ndo hay aye huya. Mbəlom na, ma dzəniye kway andza nakə a tsik aye. Təđə Fakalaw kə say ma dziye kurom ha na, tə wu nakə ma ziye gədañ kurom aye na, Mbəlom ma vəleye tsəved bay. Mbəlom ma vəlakumeye gədañ məsəmay naha a mədze i fakalaw nakə ma dziye kurom ha aye.

<sup>14</sup> Malamar ga neheye na wuđə kurom haladzay aye, hərwi niye neñ faya na gwədəkumeye: Mbəđumay dəba a mədəslay ha gər a kule.

<sup>15</sup> Na tsik niye na, a nəkurom ndo neheye ka dzalum gər lele aye. Dzalum gər ka wu nakə na tsikakum aye na, dedək tsukudu dedək bəđaw?

<sup>16</sup> Ahəl nakə nəkway faya ka ndayakweye wu mənđay i Bəy Maduweñ ka təv manəte eye ada ahəl nakə ka gawakway naha siśe a Mbəlom hərwi məse wu nakə ka sawakwa ma gəvet aye na, nəkway tə Yesu Kəriste madzapa eye hərwi bambaz ŋgay bəđaw? Ahəl nakə ka ŋgənakweye peñ ada faya ka ndayakweye§ aye na, nəkway madzapa eye tə bo i Yesu Kəriste bəđaw?

<sup>17</sup> Nəkway haladzay, ane tuk na, ka tərakwa andza bo nəte hərwi ka ŋgənakwa peñ eye nəte.

<sup>18</sup> Mum ahaya mədzal gər kurom ka Israyel hay təday. Tə kədawa wu hay ka təv məvəlay wu a Mbəlom. Ndo neheye ta həpədawa slo niye na, nəteye madzapa eye ta Mbəlom.

<sup>19</sup> A señ məgwədə na, mey? Andza məgwədə kule tə slo ŋgay niye na, wu lele eye hay dəw?

<sup>20</sup> A'ay, andza niye bay! Ane tuk na, sərum ha ndo neheye tə sər Mbəlom bay tə kəđ aye na, tə kədatay a fakalaw hay bəna a Mbəlom bay. A señ na, nəkurom ka dzapum tə fakalaw hay duh bay!

<sup>21</sup> Ka zlumeye gəvet i Bəy Maduweñ Yesu Kəriste ka sumeye ha wu məsay ada ka mbəđumeye bo vərələh ka zlumeye gəvet i fakalaw hay ka sumeye. Sulo sulo na, ma giye bo bay. Ka ndayumeye wu mənđay i Bəy Maduweñ i Yesu Kəriste ada ka mbəđumeye bo vərələh ka ndayumeye i fakalaw hay dərmağ na, ma giye bo bay.

† 10:7 Madayaw abəra ma Ezipt 32.6.

‡ 10:8 Zəba mə Məpesle 25.1-9.

§ 10:16 Luka 22.19; 1

Koriñte hay 11.23-26.



<sup>22</sup> Ka gakwa andza niye bay bəna mandala eye fakwaya a Bəy Maduwej kway. Ka dzalum na, ka zakwa ha neŋgeye ta gədan daw?

*Gum wu nakə ma dzəniye siye i ndo hay aye*

<sup>23</sup> Ndo siye hay mə walaŋ kurom tə dzala mə gər tay na: «Tsəved andaya ka məge wu hay tebiye.» Andza niye, ane tuk na, wu siye hay ma dzəniye kurom bay. Ndo neheye tə dzala na: «Tsəved andaya ka məge wu hay tebiye.» Ane tuk na, wu siye hay ma dzəniye kway mede kame kame ka tsəved i Mbəlom bay.

<sup>24</sup> Kwa way m̄ pəla na, wu nakə ma dzəniye ndo hay aye. K̄ pəlum wu nakə ma dzəniye bə kurom eye dəkdek tsa bay. Pəlum wu nakə ma dzəniye ndo hay aye.

<sup>25</sup> Tadə a sakum masəkəme slo mə luma na, wuray kwa tsekwej m̄ gakum faya me bay, səkəmmum, həpədum.

<sup>26</sup> Sərum ha na, tə watsa a Derewel i Mbəlom tə gwad: «Məndzibəra tə wu nakə mə dəma tebiye aye na, i Mbəlom Bəy Maduwej.\*»

<sup>27</sup> Tadə ndo nakə kə dzala ha ka Yesu Kəriste bay aye, kə zalaka a gay ŋgay ka mände wu mənday, kə yaka a gər mede na, do. Ka ye naha ta wəlaka wu mənday na, nda. Ka ndiye wu mənday nakay na, faya ka giye mənese tsukudu faya ka giye lele du na, m̄ dzəma kar bay.

<sup>28</sup> Ane tuk na, tadə kə tsikaka, a gwadaka «Nakay slo i kule» na, k̄ həpəd bay. Ka həpəd na, ka nasay ha mədzal gər i ndo niye.

<sup>29</sup> Na tsik niye na, ka wu nakə neŋgeye ma dzaliye mə gər ŋgay aye bəna hərwi mədzal gər yak bay.

Agəna ndoweye ma gwadiye: «Neŋ na, tsəved ga andaya mände wu tebiye. Ka gwedeŋeye: “K̄ nda bay, ka ta nasay ha mədzal gər i ndo mekeləŋ eye” na, hərwi mey?»

<sup>30</sup> Tadə na gay naha sisə a Mbəlom hərwi wu mənday na, na ndiye. Ka meŋeye ha mənese na, hərwi mey?»

<sup>31</sup> Wu nakə a seŋ mətsikakum aye na, anaŋ: Tadə faya ka ndayumeye wu mənday kwa tadə ka sumeye wu məsəy, tadə ka gumeye kwa wu waray na, gum wu nakə ndo hay ta zambadəy ha a Mbəlom aye.

<sup>32</sup> K̄ gum wu nakə ma dadiye tay ha siye i ndo hay abəra ka tsəved aye bay. Kwa Yahuda hay, kwa ndo neheye nəteye Yahuda hay bay aye, kwa siye i məhay gər i ndo məpe mədzal gər hay ka Yesu, k̄ dādum ha ndəray kwa nəte abəra ka tsəved bay.

<sup>33</sup> Gum andza neŋ nakə faya na giye aye. Wu nakə faya na giye tebiye a seŋ na, m̄ yatay a gər a ndo hay tebiye. Na dzala ka wu nakə ma dzəniye neŋ eye bay. Duŋ na dzala ka wu nakə ma dzəniye ndo hay aye təday hərwi ada Mbəlom m̄ təma tay ha.

## 11

<sup>1</sup> Tərum andza neŋ nakə na təra andza Yesu Kəriste aye.

*Hasləka hay ta ŋgwas hay kame i Mbəlom*

<sup>2</sup> Neŋ faya na zambadakumeye naha hərwi faya ka dzalumeye ka bazlam ga kwa a həlay waray, ada faya ka pumeye bəzay na, andza nakə na tətikakum aye.

<sup>3</sup> A seŋ na, sərum ha dərma. Yesu Kəriste na, ka gər i hasləka hay tebiye. Hasləka na, ka gər i ŋgwas ada Mbəlom na, ka gər i Yesu Kəriste.

\* 10:26 Derewel dames hay 24.1.

<sup>4</sup> Tadə hasləka ma dūwuleye me a Mbəlom agəna ma tsikiye kame i ndo hay bazlam neheye Mbəlom a day ha aye, kə zla dzagwa abəra mə gər bay na, kə tsaday a Yesu Kəriste nakə bəy ηgay aye.

<sup>5</sup> I ηgwas na, ahəl nakə faya ma dūwuleye me a Mbəlom agəna ma tsikiye kame i ndo hay bazlam neheye Mbəlom a day ha aye, kə ndza kəriye ze məbere dərəkəd a gər na, ka tsaday a hasləka nakə bəy ηgay aye. A ge horoy andza i ηgwas nakə mahəza gər eye.

<sup>6</sup> Nğwas nakə a say məbere dərəkəd a gər bay aye na, wal wal tə mədase abəra ka məkwetse bay. Tadə ηgwas kə dəs abəra ka məkwets ηgay kəgəbay a həz na gər na, ka sərakwa niye na, wu nakə ma geye horoy aye. Kə ge andza niye na, m̄ gər ha gər kəriye bay, m̄ ɓar a dəma dərəkəd.

<sup>7</sup> Tadə hasləka ma dūwulay me a Mbəlom na, m̄ zla dzagwa abəra mə gər hərwi Mbəlom a ge na na, ka mandzakit bo ηgay. Ma bəziye ha məzlaɓ i Mbəlom nakə a ze wu hay tebiye aye. Ane tuk na, ηgwas ma bəziye gadan̄ i hasləka.

<sup>8</sup> Sərum ha, Mbəlom a ge hasləka na, a ge tə bo i ηgwas bay. A ge ηgwas dūh na, tə bo i hasləka.

<sup>9</sup> Sa na, Mbəlom a ge hasləka hərwi ηgwas bay. A ge ηgwas dūh na, hərwi hasləka.

<sup>10</sup> Kə ge andza niye na, ηgwas hay t̄ ɓar dərəkəd a gər hərwi məde ha na, faya ta rəhay ha gər a zal tay hərwi ada m̄ ndalatay a gawla i Mbəlom ha bay dərmaɓ.

<sup>11</sup> Kwa ka təra andza niye bəbay na, nəkway neheye madzapa eye ta Bəy Maduweñ Yesu Kəriste aye na, ka sərakwa ha ηgwas na, a ndzay ka həlay na, a hasləka. Hasləka bəbay na, a ndzay ka həlay na, a ηgwas.

<sup>12</sup> Mbəlom a ge ηgwas na, tə bo i hasləka. Nğwas nakə Mbəlom a ge aye bəbay a wa hasləka. K̄ mətsakwa ha gər bay, maa vəl wu tebiye na Mbəlom.\*

<sup>13</sup> Wu nakay na, bo kurom eye tsikumen̄ tey. Tadə ηgwas ma diye a məhay gər mata dūwulay me a Mbəlom gər kəriye na, lele daw? Kə ge lele na, tsikumen̄.

<sup>14</sup> Ndo hay tebiye kwa ka waray tə sər tadə hasləka kə gər ha məkwets ηgay ndzəvawwa, i ηgay na, horoy.

<sup>15</sup> Nğwas na, tadə kə gər ha məkwets ηgay zəbol eye na, lele haladzay dūh. Mbəlom a vəlay məkwets ηgay m̄ ge zəbol eye na, hərwi ada m̄ ηgahay na gər, m̄ ndza ndozlayzlayya bay.

<sup>16</sup> Tadə a say a ndoweye məkədə wuway ka bazlam nakay sa na, sərums ha nəmay nəmaa sər na, andza nakay ada siye i ndo məpe mədzal gər hay ka Yesu tə sər tsəved mekelən̄ eye wal bay.

### *Dafi Bəy Maduweñ Yesu*

*Mata 26.26-29; Markus 14.22-25; Luka 22.15-20*

<sup>17</sup> Wu mekelən̄ eye andaya nakə na dākumeye ha aye. Neñgeye na, na gākumeye naha faya sisce bay. Tadə na makum ha mañgok na, hərwi ahəl nakə ka hayum gər mədəslay ha gər a Mbəlom aye na, wu nakə lele eye na, ka gawum bay. Duh ka gawum na, wu nakə lele bay aye.

<sup>18</sup> Hərwi wu nakə kurre na tsəne, tə tsiken̄ aye na, wuye mey? Tə gweden̄: Ka hayum gər hərwi mədəslay ha gər a Mbəlom na, ka ηganawum bo mə walan̄ kurom təv wal wal. Na dzala na, ma giye andza niye dedek tsukuđu?

\* 11:12 Zəba mə Madazlay i wu hay 1.26-27 ada 2.18-23.

19 Manğəne bo niye na, mâ ge andaya dedək ngway hərwi ada ndo hay tâ ngatay a ndo neheye nətəye faya ta pay bəzay a Yesu tə dərev tay peteh aye.

20 Ane tuk na, ahəl nakə ka hayum gər aye, ka ndayawum na, daf i Bəy Maduweŋ† bay.

21 Kwa way a dzalawa na, ka wu mənday ngay dəkdek tsa, a hway faya bəse ka mənde. Hərwi niye ndo siye hay tə ndzawa tə may ada siye hay nətəye tə kwayawa.

22 Tadə faya ka gumeye andza niye na, ka ndayum wu mənday kurom eye mətəgay kurom eye hay bədaw? A sakum matəre ha siye i ndo məpe mədzal gər hay ka Yesu wu kəriye na, hərwi mey? Ka gumeye tay ha ndo i mətəwak hay andza niye na lele daw? Na gwadəkumeye naha tebiye na, mey? Ka dzalum na, na zambadəkumeye daw? A'ay! Duh na zambadəkumeye bay.

23 Bazlam neheye na tətəkakum aye na, maa tətiken na Bəy Maduweŋ Yesu ada na dəkum ha. Ahəl niye ta həvad, ta ta giye faya daf na, a zla peŋ,

24 a gay naha sisə a Mbəlom. Ma dəba eye na, a ngəna ha peŋ niye, a gwad: «Nakay na, bo ga, mavəla eye hərwi kurom. Gum ha andza nakay huya hərwi ada kâ dzalum ha ka neŋ.»

25 Andza niye dərma, ta ndəv ha mənde wu mənday na, a zla gəvet, a gwad: «Wu mase nakay na, bambaz ga nakə Mbəlom ma bəriye Dzam Wədəye ta ndo hay aye. Ahəl nakə ka sumeye na, gum ha andza nakay anəke aye hərwi ada kâ dzalum ha ka neŋ.»

26 Bazlam i Bəy Maduweŋ neheye tə dā ha na, pat pat ahəl nakə faya ka ndayum peŋ andza nakay ada faya ka sumeye wu mase na, nəkurom faya ka dumatay ha a ndo hay parakka, Bəy Maduweŋ kə mət hərwi mətəme kway ha.

27 Hərwi niye ndo nakə kə nda peŋ i Bəy Maduweŋ i Yesu ada kə sa wu mase i Bəy Maduweŋ ka rəhay ha gər bay na, niye na, andza məgwede kə ge mənese ka slo i bo ada ka bambaz i Bəy Maduweŋ Yesu.

28 Andza niye kwa way kə say mənde peŋ ada mase wu mase na, mâ tsətsahay a mədzal gər ngay lele təday. Tadə wuray andaya bay na, mâ nda ada mâ sa.

29 Hərwi ndo nakə kə nda peŋ ada kə sa wu mase i Bəy Maduweŋ, tadə ka rəhay ha gər a bo i Bəy Maduweŋ bay, kə ge mənese ada sariya ma gəsiye na.

30 Hərwi niye ndo kurom hay haladzay nətəye dāvats eye hay, siye hay ta ge bəle, ada siye hay ta mət.

31 Tadə ka tsətsahakwa ka mədzal gər kway təday na, həbə Mbəlom ma gəsiye kway a sariya bay.

32 Ane tuk na, Bəy Maduweŋ Mbəlom ma gəkweye sariya ada faya ma vəkəweye dərətsətseh na, hərwi ada pat i sariya nakə ma ta giye sariya ka ndo i məndzibəra hay aye na, nəkway kâ dədəkwa a sariya andza siye i ndo hay bay.

33 Malamar ga hay, ahəl nakə ka hayumeye gər hərwi mənde wu mənday i Bəy Maduweŋ aye na, həbum siye i ndo kurom hay tâ yaw təday.

34 Tadə ndoweye may a wur faya na, mâ ndayaw wu mənday mətəgay təday bəna, ahəl nakə ka hayum gər ka təv manəte eye na, Mbəlom ma gəsiye kurom a sariya hərwi wu neheye faya ka gumeye aye.

Wu siye hay na, ahəl nakə na ye naha aye na, na tsikakumeye.

† 11:20 Daf i Bəy Maduweŋ: Zəba ka mede 23 hus ka 26, ada Korinthe manəte eye 10.16.

## 12

### *Gədanj neheye Məsəfəre Tsədanjña eye ma vəlateye a ndo hay aye*

<sup>1</sup> Malamar ga hay, anəke na, na tsikakumeye naha ka gədanj neheye wal wal Məsəfəre Tsədanjña eye ma vəlateye a ndo hay aye. A seŋ na, sərūm ha lele.

<sup>2</sup> Sərūm ha, ahəl niye ka pum mədzal gər ka Yesu Kəriste zuk bay aye na, ka dəslawumay ha gər a kule mandək eye hay. Gədanj i fakalaw a yawa kurom ha ka matewele kule hay.

<sup>3</sup> Hərwi niye a seŋ na, sərūm ha ndo nakə a tsik me ta gədanj i Məsəfəre i Mbəlom aye na, neŋgeye ma sliye faya məgwede: «Mbəlom m̄a vəlay mezeleme a Yesu» na, ma tsikiye bay. Kə ge ta gədanj i Məsəfəre Tsədanjña bay na, ndəray ma sliye faya məgwede: «Yesu neŋgeye Bəy Maduweŋ kway» na, ma tsikiye tətə bay.

<sup>4</sup> Məsəfəre Tsədanjña eye na, nəte ŋgweŋ, ane tuk na, faya ma vəliye gədanj hay a ndo hay wal wal hərwi mäge wu hay.

<sup>5</sup> Məsler neheye Bəy Maduweŋ a vəlateye a ndo hay hərwi ada t̄a ge aye na, məsler eye niye hay wal wal haladzay dərmak, ane tuk na, Bəy Maduweŋ Yesu neŋgeye na, nəte ŋgweŋ.

<sup>6</sup> Tsəved andaya hərwi mäge ha məsler hay wal wal haladzay dərmak, ane tuk na, maa vəl gədanj eye a ndo hay na, Mbəlom nəte ŋgweŋ.

<sup>7</sup> Mbəlom faya ma bəziye ha gədanj i Məsəfəre ŋgay kwa m̄a way tebiye. Faya ma bəziye ha na, ta tsəved wal wal hərwi ada kwa way m̄a dzəna ndo siye hay.

<sup>8</sup> Ndo siye hay Məsəfəre a vəlatay gədanj ka mətsike bazlam i metsehe. Ndo siye hay, Məsəfəre a dətat wu hay ada a vəlatay gədanj mətsike parakka. Nəteye tebiye, maa ge məsler m̄a nəteye na, Məsəfəre eye nəte.

<sup>9</sup> Ndo mekeləŋ eye na, Məsəfəre a vəlay gədanj ka m̄ape mədzal gər ka Yesu Kəriste ta dedək eye. Ndo neŋged na, Məsəfəre a vəlay gədanj məmbəle ha ndo hay abəra ma dəvats. Maa vəl gədanj niye na, Məsəfəre eye nəte ŋgweŋ.

<sup>10</sup> A vəlatay a ndo siye hay gədanj i mäge masuwayaŋ. Siye a vəlatay gədanj m̄ədə ha bazlam i Mbəlom nakə a tsikatay aye. Siye hay a vəlatay gədanj məsəre ha ka bo abəra Məsəfəre Tsədanjña eye ta məsəfəre ŋgwalak eye bay aye. Ndo siye hay a vəlatay gədanj mətsike bazlam i gəma neheye t̄ə sər bay aye. Ndo mekeləŋ eye hay a vəlatay gədanj məma ha bazlam neheye ndo mekeləŋ eye t̄ə tsik aye.

<sup>11</sup> Maa ge məsler niye na, Məsəfəre eye nəte. Neŋgeye nəte ŋgweŋ nakə a vəl wu neheye tebiye aye. A ŋgəna gədanj hay wal wal kwa a way andza nakə a say aye.

### *Ndo m̄ape mədzal gər hay ka Yesu na, andza bo i ndo nəte*

<sup>12</sup> Zlakwa mandzək̄it bo eye t̄ə bo i ndo. Ka sərakwa ha bo i ndo na, nəte. Ane tuk na, wu siye hay wal wal andaya ka bo ŋgay. Kwa hawal hay haladzay ka bo i ndo bəbay na, bo ŋgay na, nəte ŋgweŋ. I Yesu Kəriste bəbay na, andza niye dərmak.

<sup>13</sup> Nəkway tebiye Mbəlom ka dzəhuḅ kway ha na, ta gədanj i Məsəfəre ŋgay hərwi mat̄əre kway ha bo nəte. Kwa Yahuda hay, kwa neheye nəteye Yahuda bay aye, kwa beke hay, kwa neheye nəteye beke hay bay aye. Ada nəkway tebiye ka hutakwa na, Məsəfəre eye nəte, a rah kway ha andza ka sakwa wu məse.

<sup>14</sup> Hawal hay ka bo i ndo na, nəte tsa bay. Nəteye haladzay.

<sup>15</sup> Kwa sik m̄a gwad: «Neŋ wal abəra ka bo hərwi neŋ na, həlay bay.» Kwa kə tsik andza niye bəbay na, neŋgeye huya ka bo.

16 Tadə kwa zləm mâ gwad: «Nej wal abəra ka bo hərwi nej na, dəre bay.» Kwa kə tsik andza niye bəbay na, neŋgeye huya ka bo.

17 Tadə bo i ndo na, dəre dekdək tsa na, ma tsaniye wu hay ma kəkay? Tadə bo i ndo na, zləm dekdək tsa na, wu ma zeye ma kəkay?

18 Ane tuk na, Mbəlom a ge bo i ndo na, andza niye bay. Duh a ge wu neheye ka bo aye tebiye ada a pa na ka membre ka membre andza nakə a say aye.

19 Tadə Mbəlom mâ ge ndo sədok nətə tsa, kə ge faya wu mekeləŋ eye bay na, niye na, ka təra bo daw?

20 Ane tuk na, andza niye bay. Hawal hay andaya ka bo haladzay, ane tuk na, bo na, nətə ŋweŋ.

21 Tadə kə ge andza niye na, dəre ma sliye faya məgwadəy a həlay: «A seŋ kar bay» na, ma sliye faya mətsike bay! Gər dərmak ma sliye faya məgwadəy a sik: «A seŋ kar bay» na, ma sliye faya mətsike bay!

22 Duh wu nakə ka bo ka dzala mə gər yak bəle eye na, azlakwa bay kutoŋ nətəye andaya.

23 Hawal neheye fakwaya ka dəslakwatay ha gər bay aye na, nəkway faya ka gakwateye gər lele duh. Hawal neheye faya ka ŋgahakweye abəra ka dəre i ndo hay aye na, nətəye na, faya ka gakwateye metsehe haladzay.

24 Hawal neheye ka bo kway dəre a ŋgatay aye na, ŋgama andaya məngehe tay ha aye bay. Mbəlom eye tə gər ŋgay a ge bo i ndo hay na, tə dəslay ha gər a hawal neheye tə dəslaway ha gər bay aye.

25 A ge andza niye na, hərwi ada bo mâ ŋgəna wal wal bay. A say duh na, hawal neheye ka bo aye tə dzəna bo nətə nətə mə walaŋ tay.

26 Tadə hawal nətə ka bo kway faya ma giye dəretsəseh na, neŋgeye tə siye hay tebiye faya ta giye dəretsəseh dərmak. Tadə faya ka dəslakway ha gər a hawal neŋged nətə na, neŋgeye tə siye hay tebiye dərmak ta ŋwasiye.

27 Nəkurom na, nəkurom tebiye ka manətə eye bo i Yesu Kəriste. Kwa way neŋgeye hawal i bo i Yesu Kəriste.

28 Mə walaŋ i ndo məpe mədzal gər hay ka Yesu na, Mbəlom a pa tay ha ndo hay hərwi ada tə ge məsler ŋgay hay wal wal. A lah məpele təday na, ndo i maslaŋ hay. Masulo eye a pala ndo məde ha bazlam ŋgay hay. Mamahkar eye a pala siye hay hərwi ada tə tətikatay bazlam ŋgay a ndo hay. A pala ndo mekeləŋ eye hay dərmak hərwi ada tə ge masuwayaŋ. Siye hay ndo məmbəle tay ha ndo hay. Siye hay a vəlatay gədaŋ ka madzəne ndo hay. Siye hay a vəlatay gədaŋ mandze tay kame a ndo hay. Siye hay sa na, mətsike bazlam i gəma hay wal wal neheye tə sər bay aye.

29 Andza nakə ka ŋgatumay aye na, Mbəlom a pa tay ha tebiye nətəye ndo i maslaŋ i Yesu daw? Tebiye ndo məde ha bazlam i Mbəlom daw? Tebiye ndo matətikatay bazlam i Mbəlom a ndo hay daw? Tebiye ta giye masuwayaŋ daw?

30 Tebiye ta mbəliye ha ndo hay abəra ma dəvats daw? Tebiye ta tsikiye me tə bazlam i gəma neheye ndo hay tə sər bay daw? Tebiye ta miye ha bazlam daw? A'ay! Ma giye bo andza niye bay.

31 Ane tuk na, pəlum wu neheye ŋgwalak eye hay Məsəfəre ma vəlatəye a ndo aye hərwi ada kə hutum.

Anəke na, na dəkuməye ha tsəved lele eye sa, nakə a ze siye hay haladzay hərwi ada kə yum tə dəma.

<sup>1</sup> Kwa tadə na sər mətsike me tə bazlam i gəma hay tebiye, kwa bazlam i gawla i Mbəlom hay, na wudə ndo hay bay na, na təra andza bəre nakə ta fay na, a ləve ndoy ndoy kəriye tsa aye, kəgəbay andza mendelenj nakə a gatay zləm a ndo hay aye.

<sup>2</sup> Tadə kwa gədanj ga andaya mədə ha bazlam i Mbəlom, tadə kwa na sər wu hay tebiye, tadə kwa gədanj ga andaya mətsəne wu i Mbəlom neheye manğaha eye, kwa ta mədzał gər ga nakə na dzala ha ka Mbəlom aye na gwaday ha a mahamba «Lətse, do abəra kananj» ada kə lətse, ki ye, ane tuk na, tadə na wudə ndo hay bay na, neñ na, wuray kəriye.

<sup>3</sup> Kwa tadə na ŋənatay wu ga hay a ndo i mətawak hay, kwa tadə na təma t̄a kal ga ha a ako na dul a dəma hərwi mədzał gər, tadə na wudə ndo hay bay na, wuray ma geñeye ŋgama kwa tsekweñ bay tebiye.

<sup>4</sup> Ndo nakə a wudə ndo hay aye na, ma giye ŋgatay, ma gateye ŋgwalak a ndo hay, ma giye səlak bay, ma giye zlapay bay, ma dəsłay ha gər a bo bay.

<sup>5</sup> Ndo nakə a wudə ndo hay aye na, ma giye wu nakə a ge horoy aye bay, a pəlay wu a gər ŋgay dekdek bay, wu a ndalay bay, a ge zəgəle ta ndo hay bay.

<sup>6</sup> Ndo nakə a wudə ndo hay aye na, mənese a yay a gər bay, ane tuk na, dərev ŋgay a ŋgwasa d̄uh na, tə wu neheye ŋgwalak eye.

<sup>7</sup> Ndo nakə a wudə ndo hay aye na, a səmay naha a dəretsətseh kwa a həlay waray, kwa kədəy a dzala ha ka Mbəlom huya, pat pat a pa mədzał gər ŋgay na, ka təv i Mbəlom. Neñgeye mandza eye pat pat bəñbəñ.

<sup>8</sup> Mawudə bo na, a dze təbey. Bazlam i Mbəlom neheye ndo hay tə dawatay ha a ndo hay aye na, ta ndəviye. Həlay eye ma slaweye, bazlam i gəma neheye faya ka tsikakweye ta ndəviye. Məsəre wu hay neheye ka sərakwa anəke aye ta ndəviye dərma.

<sup>9</sup> Ma ta giye andza niye hərwi ka sərakwa wu hay tebiye bay. Bazlam i Mbəlom nakə ka dəwakwa tay ha a ndo hay aye bəbay na, ka sərakwa tebiye zuk bay.

<sup>10</sup> Ane tuk na, aza ahəl nakə Mbəlom ma dəkway ha wu neheye ŋgwalak eye dedək aye na, wu neheye ka sərakwa tebiye bay aye ta dziye.

<sup>11</sup> Tsənum! Ahəl niye neñ wawa eye mba na, na tsikawa me andza wawa hay. Na tsənawa wu andza wawa hay. Anəke na təra ndo bagwar eye na, məndze ga andza i wawa hay sa bay.

<sup>12</sup> Anəke na, ka ŋgatakway a wu hay lele zuk bay andza ka zəbakwa dəre a malam. Pat eye ma slaweye ka ŋgatakweye parakka tə dəre kway. Anəke na sər wu hay tebiye zuk bay. Pat eye niye na, na səriye wu kwetseh kwetseh andza nakə Mbəlom a sər ga ha kwetseh kwetseh aye dərma.

<sup>13</sup> Wu neheye ta ndəviye bay aye na, ananj nəteye mahkar: Mədzał gər nakə ka dzalakwa ha Mbəlom aye, məpe mədzał gər ka wu nakə ka ta hutakweye ka təv ŋgay aye ada mawudə bo nakə ka wudakwa ndo hay aye. Ane tuk na, maa ze wu neheye tebiye na, mawudə bo.

## 14

*Siye i bazlam neheye a tsik ka gədanj neheye Məsəfəre ma vələteye a ndo hay aye*

<sup>1</sup> Rəzłumay a gər matəre təday na, ndo mawudə ndo hay. Pəlum tə dərev kurom peteh gədanj neheye Məsəfəre ma vələteye a ndo hay aye hərwi ada k̄a hutum. Gədanj nakə k̄a pəlum aye a ze siye hay tebiye aye na, mədə ha bazlam i Mbəlom nakə a tsikakum aye.

<sup>2</sup> Tadə ndoweye a tsik bazlam i gəma neheye a sər bay aye na, a tsikatay na, a ndo hay bay. A tsikay na, a Mbəlom hərwi ndo hay tə tsənay na bay. A tsik ta gədan i Məsəfəre, wu i Mbəlom neheye mənğaha eye.

<sup>3</sup> Ane tuk na, ndo nakə a dətay ha bazlam i Mbəlom tə bazlam i gəma nğay aye na, neŋgeye a tsikatay a ndo nğay hay. Bazlam nğay niye hay na, ma vəlatəye gədan. Wu nakə faya ma tsikateye, ma mateye naha dərəv hərwi ada tã gəl, tã ye kame kame.

<sup>4</sup> Ndo nakə a tsik bazlam i gəma neheye ndo hay tə sər bay aye na, a dzəna na, bo nğay eye nğway. Ndo nakə a dā ha bazlam i Mbəlom tə bazlam i gəma nğay aye na, neŋgeye dūh faya ma vəlatəye gədan a ndo məpe mədzal gər hay ka Yesu mahaya gər eye tebiye.

<sup>5</sup> A seŋ nəkurom tebiye kã tsikum me tə bazlam i gəma hay. Ane tuk na, kutoŋ ndo məma ha mã ge andaya tə bazlam i gəma nğay hərwi ada ndo məpe mədzal gər hay ka Yesu tebiye tã gəl ada tã ye kame kame. Kə ge andza niye bay na, ndo nakə ma diye ha bazlam aye a ze ndo nakə ma tsikiye bazlam i gəma neheye a sər bay aye.

<sup>6</sup> Malamar ga hay, tadə na ye naha a gay kurom, na tsikakum me tə bazlam i gəma neheye ka sər um bay aye na, na gakumeye nğama na, ma kəkay? Tadə na dākum ha wu i Mbəlom nakə mənğaha eye bay, na dākum hay siye i wu hay bay, na dākumeye ha bazlam i Mbəlom bay ada na tətikiye kurom ha bay na, na dzəna kurom ka wuray kwa tsekweŋ bay tebiye!

<sup>7</sup> Dzalum ka wu i məhetse hay təday, andza ndərloy ta gandzaval. Tadə ndo mafe ta fa təfə təfə bay na, ndo hay ta səriye məpaka naha faya bay.

<sup>8</sup> Məfə fagam bəbay na, andza niye dərma. Tadə ağəna gəma ta gəma neŋged ta giye vərəm ada tadə ndo məfə fagam i mede a vərəm kə fa na tə dəma bay na, ndəray ma diye a vərəm niye bay.

<sup>9</sup> I kurom dərma, andza niye. Tadə faya ka tsikumeye bazlam i gəma neheye ndəray a sər bay aye na, ndo hay ta tsəniye wu nakə ka tsikum aye na, ma kəkay?

<sup>10</sup> Bazlam i gəma hay wal wal andaya ka məndzibəra. Bazlam i gəma hay tebiye a satay məgwede wu andaya.

<sup>11</sup> Ane tuk na, tadə ndoweye kə tsiken me tə bazlam i gəma nakə na sər bay aye na, neŋgeye mbəzlew kame ga ada neŋ dərma andza mbəzlew kame nğay.

<sup>12</sup> Andza niye, neŋ faya na gwadākumeye pəlum tə dərəv kurom peteh gədan neheye Məsəfəre ma vəlatəye a ndo hay aye hərwi ada kã hutum haladzay. Ane tuk na, wu nəte na, wudum wene wene eye na, wu nakə ma dzəniye tay ha ndo məpe mədzal gər hay ka Yesu məgəle ada ma ye kame kame aye.

<sup>13</sup> Hərwi niye ndo nakə a sər mətsike bazlam i gəma aye na, mã dūwulay me a Mbəlom hərwi ada Məsəfəre mã vəlay gədan məmatay ha a ndo hay tə bazlam nakə ndo hay tə tsəniye aye.

<sup>14</sup> Tadə faya na dūwulay me a Mbəlom tə bazlam i gəma nakə na sər bay aye na, məsəfəre ga neŋgeye faya ma dūwuliye me a Mbəlom. Dedek, ane tuk na, metsehe ga andaya mə dəma bay.

<sup>15</sup> Kə ge andza niye na, na giye na, kəkay? Na dūwulay me a Mbəlom ta məsəfəre ga tə bazlam i gəma neheye na sər bay aye. Ane tuk na, na dūwulay me a Mbəlom tə metsehe ga tə bazlam neheye na tsəne aye hərwi ada nã tsəne. A seŋ məge dəmes ta məsəfəre ga tə bazlam neheye na tsəne bay aye ada a seŋ məge dəmes tə metsehe ga dəmes neheye na tsəne aye.



16 Tadə kə ge andza niye bay, nəkar i yak faya ka gay naha sisœ a Mbəlom tə bazlam neheye ka sər bay aye tuk na, ada ndo neheye tə sər wu niye hay bay aye na, ta mbədiye faya «amen» na, ma kəkay? Nəteye tə tsəne wu nakə ka tsik aye bay.

17 Məgay naha sisœ yak niye ka gay naha a Mbəlom aye na, lele, ane tuk na, ma giye ŋgama a ndo neŋged bay.

18 Neŋ faya na gay naha sisœ a Mbəlom hərwi na tsik bazlam neheye na sər bay aye na, na ze kurum ha tebiye.

19 Ane tuk na, ahəl nakə neŋ ta ndo məpe mədzal gər hay ka Yesu mahaya gər eye na, ŋgama na tsikatay gər i bazlam hay zlam neheye ta tsəniye andza niye na, na tətikiye tay ha ndo hay tə bəmalə nakə na tsikateye gər i bazlam hay gwezem kuro vədvdəd haladzay tə bazlam neheye tə sər bay aye.

20 Malamar ga hay, ka dzalam gər ka wu hay andza wawa ndəriz hay bay. Duh dzalam gər na, andza nəkurom bagwar eye hay. Ta təv i mənese na, tərurum andza wawa ndəriz hay. Nəteye na, tə sər məge mənese bay.

21 Tə watsa mə Derewel i Mbəlom na, Bəy Maduweŋ a gwad: «Neŋ na sləriye naha ndo i gəma neŋged hay ka təv i ndo ga hay. Ta tsikateye bazlam ga tə bazlam i gəma mekeləŋ eye. Kwa na ge andza niye bəbay na,

ndo hay ta peŋeye faya zləm wal bay.\* »

22 Hərwi niye mətsike me tə bazlam neheye tə sər bay aye na, faya ma bəzatay ha wu a ndo neheye tə pa mədzal gər ka Yesu Kəriste bay aye. Ndo neheye faya ta diye ha bazlam i Mbəlom aye na, faya ma bəzatay ha wu a ndo neheye ta dzala ha ka Yesu aye na, Mbəlom andaya ta nəteye bəna a ndo neheye ta pa mədzal gər ka Mbəlom bay aye bay.

23 Andza niye, ahəl nakə ndo məpe mədzal gər hay ka Yesu tebiye mahaya gər eye, tadə nəkurom tebiye faya ka tsikumeye tə bazlam i gəma neheye ndo hay tə sər bay aye, ndo məpe mədzal gər ka Yesu neheye tə sər wuray bay aye kəgəbay ndo neheye ta dzala ha ka Yesu bay aye, ta ye naha na, ta gwadiye gər a vuwakum.

24 Ane tuk na, tadə duh nəkurom tebiye faya ka dumeŋe ha bazlam i Mbəlom tə bazlam i gəma nakə ndo hay tə sər aye na, ndo neheye ta dzala ha ka Yesu zuk bay aye ada ndo neheye ta dzala ha ka Yesu tə sər wuray bay aye, ta ye naha na, ta səriye ka mənese tay. Wu nakə ta tsəniye tebiye aye na, ma gateye hiyew mə dərev tay.

25 Wu neheye maŋgaha eye tə dzala mə gər tay aye na, ma ndohwaweŋe parakka. Tsa na, ta dəkweŋe gurmets a Mbəlom, ta dəslyay ha gər ada ta tsikiye parakka tə bazlam tay, ta gwadiye Mbəlom andaya mə walaŋ kurom ta dedək.

26 Malamar ga hay, ka gakweŋe na, kəkay? Ka hayum gər na, ndoweŋe ma giye dəmes, ndo neŋged ma tətikateye bazlam i Mbəlom a ndo hay, ndo neŋged ma tsikiye wu nakə maŋgaha eye Mbəlom a dəy ha aye, ndo neŋged neŋgeŋe na, ma tsikiye me tə bazlam i gəma neheye ndo hay tə sər bay aye, ada ndo neŋged ma miye ha parakka wu nakə a tsik tə bazlam i gəma nakə ndo hay tə sər bay aye. Wu nakə faya ka gumeye tebiye na, gum hərwi ada ndo məpe mədzal gər hay ka Yesu tə gəl.

27 Tadə ndo hay andaya a satay mətsike me tə bazlam i gəma neheye ndo a sər bay aye na, ndo sulo kəgəbay maħkar ta tsik tsa, mə ze ndo hay maħkar bay, ada tə tsik na, nəte ta nəte. Ada ndoweŋe mə ma ha wu nakə tə tsik aye.

28 Tadə ndəray andaya məma ha bay na, tə ndza tətə. Tə dzala mə gər tay ada tə tsikay a Mbəlom.

\* 14:21 Zəba ma Ezay 28.11-12.

<sup>29</sup> Ndo mæde ha bazlam i Mbəlom hay na, ndo hay sulo kəgəbay mahkar tɑ tsik me tsa. Ndo siye hay tɑ pay zləm a wu nakə ta tsikiye aye, a yaw abəra ka təv i Mbəlom dedek tsukudu dedek bədaw?

<sup>30</sup> Tadə ndoweye faya ma diye ha bazlam i Mbəlom, tsa na, Mbəlom a dɑ ha wu wedeye a ndo nenjed mə walaŋ kurom na, ndo nakə kurre faya ma tsikiye me aye mɑ gər ha mətsike hərwi ada ndo nenjed mɑ tsik me.

<sup>31</sup> Nəkurom tebiye ka slumeye mæde ha bazlam i Mbəlom, ane tuk na, tsikum me nəte ta nəte hərwi ada nəkurom tebiye kɑ tətikum wu ada kɑ vəlumatay gədaŋ a ndo siye hay.

<sup>32</sup> Ndo nakə gədaŋ i Məsəfəre andaya faya mæde ha bazlam i Mbəlom aye na, a sər məgay metshe a gədaŋ eye niye dərmak.

<sup>33</sup> Andza niye hərwi wu nakə ma diye ta tsəved eye bay na, a yay a gər a Mbəlom bay. Nenjeye a say düh na, ndzakwa ta tsəved eye lele tə zay.

Ŋgwas hay tɑ ge na, andza ŋgwas neheye ma məhay gər i ndo məpe mədzal gər hay ka Yesu aye tebiye.

<sup>34</sup> Ka hayum gər ka təv manəte eye na, tɑ ndza təte, tɑ tsik me bay. Nəteye na, tsəved tay andaya mətsike me bay. Ŋgwas hay na, tɑ rəhay gər a hasləka hay andza nakə mawatsa eye mə Derewel i Mbəlom aye.

<sup>35</sup> Tadə wu andaya nakə ta tsəne bay aye ada a satay matsətsehe aye na, tɑ tsətsah ma məhay gər bay, tɑ tsətsah ka zal tay hay mətagay. Ŋgwas ma tsikiye me ma məhay gər i ndo məpe mədzal gər hay ka Yesu na, lele bay.†

<sup>36</sup> Ah! Ka dzalum na, bazlam i Mbəlom a yaw abəra mə gay kurom ba! Kəgəbay ka dzalum na, maa tsəne bazlam nakay na, nəkurom dəkdek ba!

<sup>37</sup> Tadə ndoweye kə dzala mə gər ŋgay kə huta gədaŋ i mæde ha bazlam i Mbəlom kəgəbay gədaŋ mekelenj i Məsəfəre, mɑ sər ha wu nakə na watsa kanaŋ aye na, maa tsik gum andza niye na, Bəy Maduweŋ kway.

<sup>38</sup> Tadə ndoweye kə sər wu nakə na watsa aye, bazlam i Bəy Maduweŋ bay na, nəmay dərmak nəmaa təma na bay.

<sup>39</sup> Malamar ga hay vəlumay ha dərəv kurom ka mapəle mæde ha bazlam i Mbəlom ada kɑ gumatay me a ndo hay mətsike me tə bazlam i gəma hay bay.

<sup>40</sup> Ane tuk na, gum wu hay tebiye ta lele eye. Gum ta tsəved eye dərmak.

## 15

### *Yesu Kəriste kə lətsew abəra ma mədahaŋ*

<sup>1</sup> Malamar ga hay, anəke a seŋ na, məmakum ahaya a gər Labara Ŋgwalak eye nakə na dākum ha ahəl niye aye. Ka təkum a dərəv kurom, ka dzalum ha faya lele.

<sup>2</sup> Labara niye ŋgwalak eye na, nakə Mbəlom ma təmiye kurom ha aye tadə faya ka dzalumeye huya andza nakə na tsikakum aye. Tadə faya ka gumeye andza niye bay na, ka dzalum ha faya ta dedek bay.

<sup>3</sup> Na tətikakum na, wu nakə Yesu Kəriste a tətikenj aye. Wu nakə a ze kwa me tebiye na lah matətikakum aye na, Yesu Kəriste kə mət hərwi mezeleme kway andza nakə tə watsa mə Derewel i Mbəlom aye.

<sup>4</sup> A mət na, tə pa na a tsəvay. Məhəne sulo mamahkar eye na, kə lətsew abəra ma mədahaŋ andza nakə tə watsa mə Derewel i Mbəlom aye.

<sup>5</sup> Ahəl nakə a lətsew abəra ma mədahaŋ aye na, a bəzay ha bo a Piyer ada a bəzatay ha bo a siye i gawla ŋgay neheye kuro gər eye sulo aye.

† 14:35 1 Korinthe hay 11.5.

<sup>6</sup> Ada ka bəzətatay ha bo a ndo məpe mədzal gər hay ka Yesu ta ziye temerre zləm, nəteye tebiye tə ɲgatay a həlay manəte eye. Siye hay ta mət tsiy, ane tuk na, siye hay haladzay nəteye andaya tə dəre.

<sup>7</sup> Ma dəba eye a bəzay ha bo a Yakuba ada a bəzay ha bo a ndo i maslaɲ siye hay tebiye dərmak.

<sup>8</sup> Tsa na, məduk i duk eye a bəzəɲ ha bo a neɲ dərmak. Pat eye niye neɲ na tərə na, andza wawa nakə tə wa na kə ndisl a kiye i məwe ɲgay bay aye.

<sup>9</sup> Neɲ na, wawa eye tsekweɖeɖeɲ mə walaɲ i ndo i maslaɲ i Yesu hay. Neɲ na sla ɖa tə zeleɲ ndo i maslaɲ i Yesu bay hərwi na gatay ɖəretsətseh a məhay gər i ndo məpe mədzal gər hay ka Yesu.

<sup>10</sup> Ane tuk na, Mbəlom kə geɲ ɲgwalak ɲgay nakə na tərə ndo i maslaɲ ɲgay andza nakay anaɲ ka ɲgatumeɲ anəke aye. ɲgwalak i wu nakə a geɲ aye na, ka tərə kəriye bay. Duh na ge ha məsler haladzay a ze siye i ndo i maslaɲ i Yesu hay. Ane tuk na, gədaɲ nakə na ge ha məsler aye na, i ga bay. Maa pa fagaya ɲgama na, Mbəlom. Maa ge məsler mə neɲ na, neɲgeye.

<sup>11</sup> Andza niye, kwa taɖə maa tsikakum Labara ɲgwalak eye niye na, neɲ, kwa maa tsik na, siye i ndo i maslaɲ i Yesu hay, nəmay tebiye nəmaa tsikiye labara ɲgwalak eye andza nakə na tsikakum aye ada nakə ka dzalum ha aye.

### *Mbəlom ma ta lətsiye tay ahaya ndo hay abəra ma mədahaɲ*

<sup>12</sup> Labara ɲgwalak eye nakə nəmaa a tsik aye na, Yesu Kəriste kə lətsew abəra ma mədahaɲ. Kə ge andza niye tuk na, ada ndo siye hay mə walaɲ kurom tə gwad, ndo hay ta lətseweye abəra ma mədahaɲ bay na, ma kəkay?

<sup>13</sup> Taɖə ta ɖeɖək ndo hay ta lətseweye abəra ma mədahaɲ bay na, andza məgwede Yesu Kəriste bəbay kə lətsew abəra ma mədahaɲ bay bəna mey?

<sup>14</sup> Taɖə neɲgeye kə lətsew abəra ma mədahaɲ bay na, andza məgwede bazlam i Mbəlom nakə nəmaa ɖa ha aye na, ka tərə wu kəriye. Ada mədzal gər kurom nakə ka dzalum ha Yesu aye na, ma giye ɲgama bay.

<sup>15</sup> Taɖə kə ge andza niye na, andza məgwede nəmay faya nəmaa rawiye me ka Mbəlom hərwi nəmay faya nəmaa tsikateye a ndo hay na, Mbəlom kə lətse ahaya Yesu Kəriste abəra ma mədahaɲ. Ane tuk na, taɖə ndo hay ta lətseweye abəra ma mədahaɲ bay na, Mbəlom neɲgeye kə lətse ahaya Yesu Kəriste abəra ma mədahaɲ bay.

<sup>16</sup> Taɖə Mbəlom ma lətsa tay ahaya ndo hay abəra ma mədahaɲ bay na, Yesu Kəriste dərmak, Mbəlom kə lətse ahaya abəra ma mədahaɲ bay.

<sup>17</sup> Taɖə Yesu Kəriste kə lətsew abəra ma mədahaɲ bay na, mədzal gər kurom nakə ka dzalum ha aye, ma giye ɲgama bay ada nəkurom na, huya mə mezeleme.

<sup>18</sup> Andza məgwede ndo neheye ahəl niye tə mət ta dzala ha ka Kəriste aye na, ta dze hele hele.

<sup>19</sup> Taɖə ka pakwa mədzal gər kway ka Yesu Kəriste hərwi ada mə dzəna kway ka məndzibəra ɖeɖək tsa ada wuray andaya kame bay na, ndo hay ta tuwiye fakwaya haladzay ma ziye ha i ndo siye hay.

<sup>20</sup> Ane tuk na, ta ɖeɖək Kəriste kə lətsew abəra ma mədahaɲ. Maa lah mələtsew abəra ma mədahaɲ na, neɲgeye. A ɖa ha na, siye i ndo neheye tə mət aye, ta lətseweye abəra ma mədahaɲ dərmak.

<sup>21</sup> Maa zlaw məməte ka məndzibəra na, ndo nəte. Andza niye, maa həndəkətatay tsəved a ndo hay mələtsew abəra ma mədahaɲ na, ndo nəte dərmak.

<sup>22</sup> Ndo hay tebiye ta mətiye hərwi nəteye gwala i Adam hay. Andza niye, ndo neheye nəteye madzapa eye tə Yesu Kəriste aye na, ta ta hutiiye sifa.

<sup>23</sup> Ane tuk na, ma giye bo na, ka membre ka membre. Maa lah mælətsew kurre na, Yesu Kəriste. Pat nakə kə maw aye na, ndo ŋgay hay ta lətseweye abəra ma mədahaŋ tuk.

<sup>24</sup> Ma dəba eye na, Yesu Kəriste ma bəbazliye tay ha gədan i məsəfəre neheye lele bay eye tebiye ada ta bəy tay hay tebiye ada ta gədan i bəy i dala hay tebiye. Tsa na, məndzibəra ma ndəviye. Ma dəba eye ma vəlay ha bəy a həlay i Bəba Mbəlom.

<sup>25</sup> Andza mægweđe na, Kəriste ma ləviye təmad hus a pat nakə Mbəlom ma piye tay ha ndo mənə dəre ŋgay a həlay ŋgay aye.

<sup>26</sup> Maduk i duk i ndo mənə dəre nakə Mbəlom ma dziye ha aye na, məməte.

<sup>27</sup> Ka sər kwa ha na, hərwi tə watsa mə Ɔerewel i Mbəlom na, tə gwad: «Mbəlom kə pa wu hay tebiye a həlay i Wawa ŋgay.\*» Mbəlom a tsik bazlam niye hay na, bo i Mbəlom eye neŋgeye ma ndziye mə həlay i Wawa ŋgay bay hərwi maa pa siye i wu hay a həlay i Wawa ŋgay na, bo ŋgay eye.

<sup>28</sup> Mbəlom kə pa wu hay tebiye a həlay i wawa ŋgay na, Wawa ma rəhay ha gər a Mbəlom nakə a pa wu hay a həlay ŋgay tebiye aye. Andza niye Bəba Mbəlom ma ləviye wu hay tebiye ada ndo zezəŋ tebiye.

<sup>29</sup> Dzalum ka ndo neheye faya ta dzəhuɓiye bo a yam hərwi ndo neheye ta mat tsiy aye. Maa gatay ŋgama mə dəma na, wuye mey? Tadə ta dedək ndo hay ta lətseweye abəra ma mədahaŋ bay na, ndo niye hay ta dzəhuɓawa bo a yam a bəram tay na, hərwi mey?

<sup>30</sup> Tadə ndo hay ta lətseweye abəra ma mədahaŋ bay na, nəmay nəmaa siye dəretətseh pat pat na, hərwi mey?

<sup>31</sup> Malamar ga hay, pat pat neŋ na, na mawa veket veket abəra ma məməte. Wu nakə faya na tsikakumeye dedək. Na tsikakum na, ta dedək, neŋ faya na ŋgwasiye hərwi kurom. Məŋgwese ga na, hərwi nəkurom ta nəmay tebiye, nəkway madzapa eye ta Bəy Maduweŋ kway Yesu Kəriste.

<sup>32</sup> Ma gəma i Efez na, nəmaa ge magazləga ta ndo hay haladzay andza ta wu i peŋl neheye sewed hay haladzay aye. Tadə na dzala ka wu i məndzibəra na, dəretətseh nakay ma giye ŋgama daw? Tadə ndo hay ta lətseweye abəra ma mədahaŋ bay na, na tsikiye andza ndo wuray a gwad: «Ndayakwa wu mənday haladzay ada sakwa wu məse haladzay hərwi mazlambar ka mətakweye.†»

<sup>33</sup> Kā vumay gər a bo kurom bay. Sərum ha, tadə faya ka həhalumeye ta ndo neheye faya ta giye mənese aye na, nəkurom dərmak ka gumeye mənese.

<sup>34</sup> Kā tərur ndo i matarakahaŋ hay bay. Kā gum mənese bay. Na zəba faya na, siye i ndo hay mə walaŋ kurom tə sər Mbəlom bay. Na tsik andza niye na, hərwi ada horoy mə gakum.

### *Bo nakə ma lətseweye abəra ma mədahaŋ aye*

<sup>35</sup> Agəla ndoweye ma tsətsahiye, ma gwadiye: «Ndo hay ta lətseweye abəra ma mədahaŋ na, ma kəkay? Ndowneye kə lətsew na, bo ŋgay ma təriye na, kəkay?»

<sup>36</sup> Ndowneye ka tsətsah andza niye na, neŋgeye matarakahaŋ eye. Dzala təday! Ka sləga hulfe a guvah ma mətiye ada ma ndzohwiye.

<sup>37</sup> Ada ka sləga na, wuye mey? Ka pa a bəd na, wu mandzohwa eye tsiy ta slambah eye bay. Ka sləga na, wur eye, agəna daw, agəna hulfe i wu mekeləŋ.

<sup>38</sup> Dərizl i gərdaf ma ndzohwiye andza nakə a say a Mbəlom aye. Dərizl i gərdaf i hulfe kwa waray waray na, wal wal.

\* 15:27 Dames hay 110.1. † 15:32 Zəba ma Ezay 22.13.

<sup>39</sup> I wu neheye tə səfəra eye na, andza niye dərmaḱ. Mbəlom a ge bo tay na, wal wal. Bo i ndo zezeŋ na, wal, bo i wu i pesl hay wal, bo i diyeŋ hay wal, ada bo i kələf hay wal dərmaḱ.

<sup>40</sup> Wu neheye ka maḡərmbəlom aye ta wu neheye ka məndzibəra aye, nəteye na, wal wal dərmaḱ. Məle tay nakə tə le aye na, wal wal, nəte bay.

<sup>41</sup> Madəve i pat na, wal abəra ka madəve i kiye dərmaḱ. Ada madəve i kiye wal abəra ka madəve i wurzla. Kwa mə walaŋ i wurzla hay bəbay na, madəve tay na, wal wal.

<sup>42</sup> Ahəl nakə Mbəlom mata lətse ahaya ndo abəra ma mədahaŋ aye na, ma giye na, andza niye dərmaḱ. Bo i ndo na, andza hulfe dərmaḱ. Ta pa mədahaŋ a tsəvay na, ma ziye. Mbəlom kə lətse ahaya ndo niye abəra ma mədahaŋ na, bo ŋgay ma ndziye ka tor eye.

<sup>43</sup> Tə la na mədahaŋ a bəd na, gədaŋ mə dəma bay, a le bay. Ahəl nakə ma lətseweye na, ma təriye gədaŋ eye, ma liye haladzay.

<sup>44</sup> Bo nakə tə pa na a bəd andza hulfe aye na, wu i məndzibəra. Ane tuk na, ahəl nakə ma lətseweye abəra ma mədahaŋ aye na, ma hutiyə bo nakə Məsəfəre mavəla eye.

Bo i məndzibəra andaya na gwad ba! Sərum ha na, ka ta hutakweye bo nakə Məsəfəre ma vəliye dərmaḱ.

<sup>45</sup> Tə watsa mə Derewel i Mbəlom na, tə gwad: «Adam na, ndo nakə kurre Mbəlom a vəlay məsəfəre aye.» Ndo nakə a yaw duk ma dəba aye na, Kəriste. Neŋgeye na, ndo nakə ma vəliye sifa a ndo hay tə həlay i Məsəfəre.<sup>‡</sup>

<sup>46</sup> Wu nakə Məsəfəre a vəl aye na, makurre eye nakə ndo hay tə ŋgatay aye bay. Tə ŋgatay təday na, a bo i məndzibəra ada ma dəba eye ta ŋgateye a bəmalə nakə Məsəfəre a vəl aye.

<sup>47</sup> Makurre i ndo na, Adam, neŋgeye i məndzibəra. Mbəlom a ge neŋgeye na, ta bətekwew. Ndo neŋged na, Məsəfəre. A yaw abəra mə mbəlom.

<sup>48</sup> Ndo i məndzibəra hay bo tay na, andza i Adam nakə Mbəlom a ge na ta bətekwew aye. Andza niye dərmaḱ, ndo neheye ta ndziye mə mbəlom aye, ta təriye andza ndo nakə a mbəzlaw mə mbəlom aye.

<sup>49</sup> Anəke na, ka ndzəkitakwa bo ta ndo nakə Mbəlom a ge ta bətekwew aye. Kame mba na, ka ndzəkitakweye bo ta ndo nakə a mbəzlaw mə mbəlom aye dərmaḱ.

<sup>50</sup> Malamar ga hay, neŋ faya na tsikakumeye, ndo zezeŋ ma sliye faya mede a Bəy i Mbəlom tə slo i bo ŋgay bay. Hərwi wu nakə ma ziye na, ma sliye faya məndze tə wu nakə ma ndziye ka tor eye bay.

<sup>51</sup> Tsənum! Na tsikakumeye wu nakə maŋgaha eye Mbəlom a deŋ ha aye. Ka mətakweye tebiye kway eye bay. Ane tuk na, nəkway bo kway ma mbədiye.

<sup>52</sup> Ka məndəve i məndzibəra na, ta fiye tolom. Ta fa na, kwayaŋna ka mətsike me niye na, bo kway ka mbada. Ta fa tolom na, ndo neheye ta mət tsiy aye ta lətseweye abəra ma mədahaŋ tə bo nakə ma ziye bay aye. Nəkway neheye tə dəre aye, Mbəlom ma vəlakweye bo wedeye dərmaḱ.

<sup>53</sup> Andza məgwede, bo kway nakə ma mətiye ada ma ziye na, kutoŋ ma təriye bo nakə ma mətiye bay ada ma ziye bay aye.

<sup>54</sup> Ahəl nakə bo nakə ma mətiye ada ma ziye ka təra bo nakə ma mətiye sa bay ada ma ziye sa bay aye na, wu nakə tə watsa mə Derewel i Mbəlom aye ma bəziye tuk. Tə watsa na: «Məməte andaya sa bay. Mbəlom kə dze ha tebiye.»

<sup>55</sup> «Nəkər məməte, ehey! Gədaŋ yak eye məngay tuk?»

Səmbər yak eye nakə ka mbalawa tay ha ndo hay aye na, məŋgay tuk?<sup>§</sup>

56 Məməte na, a huta gədan məgay wu nakə lele bay aye a ndo hay hərwi mezeleme. Mezeleme a huta gədan na, hərwi bazlam i Mbəlom mapala eye.

57 Ane tuk na, gakway sisə a Mbəlom hərwi kə vəlakway gədan məngwese ka mezeleme kwa ka məməte ta gədan i Bəy Maduwey kway Yesu Kəriste.

58 Malamar ga hay neheye na wudə kurom haladzay aye, hərwi niye ndzum bəybəy lele, kə yum gər bay. Rəzlumay a gər a məsler i Bəy Maduwey Yesu pat pat tə dərev kurom peteh. Ka sərüm ha məsler nakə ka gumeye ta gədan ɲgay aye na, ma təriye kəriye bay.

## 16

### *Ta tsakal suloy hərwi madzəne tay ha ndo məpe mədzal gər hay ka Yesu*

1 Anəke na, na tsikakumeye naha ka suloy nakə ka tsakalumeye hərwi madzəne tay ha ndo məpe mədzal gər hay ka Yesu neheye ma Zerozelem aye. Gum andza nakə na tsikatay a ndo məpe mədzal gər hay ka Yesu neheye ma Galat aye.

2 Pat i luma i sidzew hay na, kwa way way tsakalum dala andza nakə ka hutum, Mbəlom a vəlakum aye. Pum na hərwi ada pat nakə na ye naha aye na, ka tsakalumeye sa bay.

3 Na ye naha na, ka tsikumeneye ndo neheye ka palum tay ha hərwi ada tə ye ha suloy nakə ka tsakalum, ta diye ha a Zerozelem aye na, na watsateye derewel a həlay.

4 Tadə kə ge lele ney nā ye dərmak na, nəmaa diye dziye.

### *Pol ma diye a Korinthe*

5 Na diye naha ka təv kurom na, na diye ta Masedowan.

6 Ağəna na ye naha na, na ndziye tsekwey ka təv kurom, ağəna a həlay i mətaşl na, na ndziye ka təv kurom. Ma dəba eye na diye abəra ka təv kurom, na diye kwa ka waray na, ka dzənumeye ga.

7 Na diye naha ka təv kurom na ndziye tsekwey tsa, na diye gwa na, a sey andza niye bay. Tadə kə yay a gər a Bəy Maduwey na, a sey ka ndzakweye ka təv manəte eye məndze haladzay.

8 Ane tuk na, na ndziye kanan ma Efez təmad hus a magurlom i Penjektok\*,

9 hərwi Mbəlom ka həndekəy na tsəved lele ka məge məsler bagwar eye kanan. Ada ndo mənə dəre ga hay andaya haladzay.

10 Timote ki ye naha ka təv kurom na, təmum na tə həlay sulo sulo hərwi ada mā ndza ta məngwese eye lele mə walaɲ kurom. Hərwi neygeye ndo məge məsler i Bəy Maduwey andza ney nakə faya na giye.

11 Ndəray mā gay wuray bay. Dzənum na duh hərwi ada mā gər kurom ha tə zay ada mā maw ka təv ga. Neɲ ta ndo siye hay faya nəmaa həbiye na kanan.

12 Malamar kway Apolos na, na tsikay madzəga haladzay, na gwaday na, neygeye tə siye i malamar hay tə ye naha ka təv kurom tey. Ane tuk na, a say mede naha anəke zuk bay. Aza kə huta həlay eye kame mba na, ma diye naha.

### *Mandəve i bazlam*

13 Ndzum tsezlezleɲɲe tə metsehe lele. Tərüm ndo gədan eye ka tsəved i Mbəlom bəybəy lele. Kā dzədzarum bay. Dərev kurom mā ndza ta gədan eye.

14 Wu nakə ka gumeye tebiye aye na, gum tə mawudə bo nakə ka wudumeye ha ndo hay aye.

\* 16:8 Penjektok na, tə bazlam i Gərek. Magurlom i gərndzahosl. Tə gawa magurlom eye na, məhəne 50 ma dəba i Pak. I ndo məpe mədzal gər hay ka Yesu na, magurlom i məhute Masəfəre Tsadəɲa eye.

<sup>15</sup> Malamar ga hay, ka sərüm Sitefanas ta ndo i gay ñgay hay tebiye. Sərüm ha, maa lah mæpe mædzal gər ka Yesu Kəriste ma gəma i Akay† na, nətəye. Ta vəl ha gər tay ka mæge mæsler i Mbəlom hərwi madzəne tay ha ndo mæpe mædzal gər hay ka Yesu. Neñ faya na gakumeye naha amboh,

<sup>16</sup> Slala i ndo neheye faya ta giye mæsler i Mbəlom mə walañ kurom aye na, rəhumatay ha gər. Rəhumatay ha gər a ndo neheye faya ta rəzleye a gər mæge mæsler i Mbəlom dziye aye dərmaḱ.

<sup>17</sup> Dərev ga kə ñgwasa haladzay hərwi nakə Sitefanas ta Fortunatus ada ta Akayəkus ti yaw ka təv ga aye. Na ñgatatay na, andza na ñgatakum a nəkurom tebiye.

<sup>18</sup> Ta meñ naha dərev andza tə makum naha dərev a nəkurom aye dərmaḱ. Slala i ndo neheye andza nakay aye na, rəhawumatay ha gər.

<sup>19</sup> Ndo mæpe mædzal gər hay ka Yesu neheye tə hayawa gər ka təv ga kanañ ka dala i Azi‡ aye ta tsikakum naha me. Akelas ta Pərisil tə siye i ndo mæpe mædzal gər hay ka Yesu neheye tə hayawa gər a gay tay aye, ta tsikakum naha me lele ta mæzele i Yesu Kəriste.

<sup>20</sup> Siye i ndo mæpe mædzal gər hay ka Yesu neheye kanañ aye tebiye ta tsikakum naha me dərmaḱ.

Tsikum me a bo nətə nətə mə walañ kurom ta mægəse bo kurop kurop lele.

<sup>21</sup> Neñ Pol na tsikakum naha me dərmaḱ. Nakay na, neñ na watsakum naha tə həlay gay eye.

<sup>22</sup> Ndo nakə a wudə Bəy Maduweñ kway Yesu bay aye na, Mbəlom mə vəlay mezeleme. *Maranata*§, andza mægweḱe Bəy Maduweñ may, dara!

<sup>23</sup> Bəy Maduweñ kway Yesu mə pa fakuma ñgama.

<sup>24</sup> Nəkurom tebiye na wudə kurom huya hərwi nakə nəkway tebiye madzapa eye tə Yesu Kəriste aye.

---

† 16:15 Akay na, mæzele guram i diye i Salawa i Geres. ‡ 16:19 Dala i Azi anəke na, Turki. § 16:22 Maranata: Mæzele i wu tə bazlam i Gerek. Yesu ta ndo neheye tə pa mædzal gər kurre eye tə ndzawa ma gəma i Yahuda hay tə tsikawa bazlam eye nakay.



## Masulo i d̄erewel i Pol nak̄a a watsatay naha a Korinthe hay aye M̄af̄al̄akwe

A ḡasaw ab̄ara ka makurre i d̄erewel i Pol nak̄a a watsatay naha a Korinthe hay aye na, labara hay ti yaw ab̄ara ma Korinthe ada ta watsayaw d̄erewel hay a Pol̄ada Pol d̄armak k̄a watsatay naha (2.3). M̄andze i Pol ta ndo i Korinthe hay ŋgalak eye sa bay. Ma ta diye a d̄ama na, a watsatay naha h̄arwi malembede ha wu nak̄a a ye bay aye.

M̄a mad̄ado 1 ka 7 na, Pol faya ma tsikiye me ab̄ara ka bo ŋgay,

M̄a mad̄ado 8 ka 9, Pol a ts̄atsah wu h̄arwi ndo m̄ape m̄adzal ḡar neheye m̄atawak eye hay ma Zerozelem aye.

M̄a mad̄ado (10 ka 13) na, Pol a tsik ka mat̄are ndo i maslan̄ i Yesu K̄ariste na, k̄akay wal wal sulo. Ndo hay andaya faya ta diye ha labara mekel̄en eye wal ab̄ara ka b̄amal̄a i Pol (11.3-4).

Pol a h̄ana ha ḡar tsekweŋ h̄arwi faya ma h̄abiye, ma hut̄iye ḡadan̄ ŋgay na, m̄a h̄alay i Mb̄alom. Pol ka ts̄atsah t̄a d̄aslay ḡar bay, t̄a v̄alay wu na, ka ts̄atsah bay. A d̄a ha Labara Ngwalak eye i Yesu na, k̄ariye.

### *Pol a tsikatay naha me*

<sup>1</sup> Maa watsakum naha d̄erewel nakay na, neŋ Pol. Neŋ ndo i maslan̄ i Yesu K̄ariste h̄arwi a say a Mb̄alom. Neŋ ta Timote malamar kway n̄amaa tsikakum naha me a m̄ahay ḡar i ndo m̄ape m̄adzal ḡar hay ka Yesu neheye ma gama i Korinthe aye ada a siye i ndo m̄ape m̄adzal ḡar hay ka Yesu neheye ka dala i Akay\* aye.

<sup>2</sup> Mb̄alom B̄aba kway ta B̄ay Maduweŋ kway Yesu K̄ariste t̄a pa fakuma ŋgama ada t̄a v̄alakum zay.

### *Mb̄alom ma matay naha d̄arev a ndo neheye faya ta siye d̄arets̄atseh aye*

<sup>3</sup> Zambad̄akway a Mb̄alom B̄aba i B̄ay Maduweŋ kway Yesu K̄ariste. Neŋgeye faya ma gateye ŋgalak a ndo hay huya, ma matay naha d̄arev pat pat aye.

<sup>4</sup> Kwa k̄ad̄ay ah̄al nak̄a n̄amay m̄a d̄arets̄atseh aye na, a v̄alawamay ḡadan̄ h̄arwi ada n̄amay n̄amaa sliye faya m̄amatay naha d̄arev a siye i ndo neheye faya ta siye d̄arets̄atseh aye andza nak̄a Mb̄alom a dz̄ana may aye d̄armak.

<sup>5</sup> Andza niye, Yesu K̄ariste k̄a sa d̄arets̄atseh haladzay ada n̄amay d̄armak n̄amaa siye d̄arets̄atseh haladzay. Mb̄alom b̄abay ma v̄alameye ḡadan̄ haladzay d̄armak h̄arwi n̄amay madzapa eye t̄a Yesu K̄ariste.

<sup>6</sup> Tad̄a n̄amay faya n̄amaa siye d̄arets̄atseh k̄aḡabay tad̄a Mb̄alom faya ma v̄alameye ḡadan̄ na, h̄arwi ada k̄a t̄arum ḡadan̄ eye hay ada Mb̄alom m̄a t̄ama kurom ha. Andza niye ka slumeye faya m̄as̄amay naha a d̄arets̄atseh nak̄a n̄amay faya n̄amaa s̄amay naha aye d̄armak.

<sup>7</sup> N̄amaa s̄ar ha ta ded̄ek ka ndzumeye b̄ar̄b̄ar̄ ka ts̄aved̄ i Mb̄alom. N̄amaa s̄ar ha Mb̄alom ma makumeye naha d̄arev andza nak̄a neŋgeye faya ma mameye naha d̄arev aye, h̄arwi faya ka sumeye d̄arets̄atseh andza n̄amay neheye faya n̄amaa siye d̄arets̄atseh aye d̄armak.

\* 1:1 Akay na, m̄azele guram eye i diye i Salawa i Ḡares.

<sup>8</sup> Ayaw, malamar may hay, a samay na, sərüm ha d̄əretsətseh nakə nəmaa sa ka dala i Azi aye. Nəmaa sa d̄əretsətseh haladzay, a ze may gadañ. Nəmaa dzala na, tsiy nəmaa mətiye.

<sup>9</sup> Ayaw, ta dedek nəmaa dzala mə d̄ərev may na, nəmaa mətiye. Azlakwa Mbəlom a ge andza niye na, h̄ərwi ada nəmaâ pa mədzal gər may ka gadañ may bay, d̄uh nəmaâ pa mədzal gər may na, ka Mbəlom n̄əte ŋgweñ. Neñgeye na, ma mbəla tay ahaya ndo hay abəra ma mədahañ.

<sup>10</sup> Ada ma buwa may ahaya abəra mə d̄əretsətseh i mədahañ nakə haladzay nəmaa mətiye ha haḃe aye, ada ma buwa may ahaya abəra mə d̄əretsətseh siye hay d̄ərmak. Nəmaa piye mədzal gər may, nəmaa sər ha ma buwa may ahaya abəra mə d̄əretsətseh siye hay sa.

<sup>11</sup> Nəkurom d̄ərmak d̄uwulumay me a Mbəlom. Andza niye, tadə ndo hay haladzay faya ta d̄uwuliye me a Mbəlom h̄ərwi may na, ndo hay haladzay ta gay naha sis̄e d̄ərmak h̄ərwi ŋgwalak ŋgay nakə ma ta gamay aye.

*Pol ka mbəda ha wu nakə haḃe a say m̄əge aye*

<sup>12</sup> Wu nakə nəmaa ŋgalakiye ha aye na, anañ; Nəmaa sər ha mə d̄ərev mede may kame i ndo hay tebiye na, dedek, nəmay ndo i dedek hay andza nakə a say a Mbəlom aye. Mede may niye lele wene wene eye na, kame kurom. Gədañ may nakə nəmaa ndza ha andza niye aye na, a yaw abəra mə metsehe i ndo i m̄əndzibəra hay bay. Ane tuk na, Mbəlom a dzəna may ta ŋgwalak ŋgay.

<sup>13</sup> Wu nakə nəmaa watsakum naha aye na, a wur bo bay, ka slumeye faya m̄əsəne.

<sup>14</sup> Wu andaya nakə ka ts̄ənum i ŋgal aye. Ane tuk na, ka ta ts̄ənumeye tebiye. Wu eye na, anañ; Ka ta ŋgalakumeye may ha andza nəmay d̄ərmak nəmaa ta ŋgalakiye kurom ha pat i B̄əy Maduweñ Yesu nakə ma maweye aye.

<sup>15</sup> Na sər ha ta dedek, h̄ərwi niye na gwad haḃe a señ na diye naha a gay kurom t̄əday ada na h̄əndz̄ədiye kame. Na maweye na, ta t̄əv kurom d̄ərmak h̄ərwi ada n̄ə dzəna kurom masulo eye.

<sup>16</sup> Andza m̄əgwede, na dzala na, na diye naha a gay kurom t̄əday ada na diye ka dala i Masedowan ada na maweye ta t̄əv kurom. Ada aza na mb̄ədiye gər, nakə na diye ka dala i Yahuda aye na, haḃe ka dz̄ənumeye ga.

<sup>17</sup> Ahəl nakə na gwad̄akum na giye andza niye aye na, na ts̄ikakum ta d̄ərneh sulo d̄aw? A'ay, tadə na gwad̄ na giye wu nakə na həl faya bo m̄əge aye na, na giye andza i ndo i m̄əndzibəra hay d̄aw? Na gwadiye ayaw ada a'ay sulo sulo bay.

<sup>18</sup> Mbəlom, neñgeye ndo məh̄əle mbal ga. Wu nakə nəmaa ts̄ikakum aye na, ayaw ada a'ay sulo sulo bay.

<sup>19</sup> H̄ərwi neñ, Silas ta Timote nəmay nəmaa da ha mə walañ kurom na, Wawa i Mbəlom Yesu K̄əriste. Ayaw ta a'ay sulo sulo mə neñgeye bay. M̄ə neñgeye na, ayaw dekdek huya.

<sup>20</sup> Ada wu nakə tebiye Mbəlom a gwad̄ ma vəlakweye, maa ts̄ikakway ta dedek na, neñgeye. H̄ərwi niye ka gwad̄akwa «amen» na, ta neñgeye h̄ərwi ada ndo hay t̄ə d̄əslay ha gər a Mbəlom.

<sup>21</sup> Sa na, maa vəlamay gədañ na, Mbəlom eye t̄ə gər ŋgay t̄ə həlay i Yesu K̄əriste ada ma vəlakumeye gədañ d̄ərmak. Maa pala kway na, neñgeye.

<sup>22</sup> K̄ə pakway M̄əsəf̄əre ŋgay a d̄ərev kway h̄ərwi məde ha na, nəkway ndo ŋgay hay. Andza niye a da ha na, ma ta vəlakweye siye i wu neheye a gwad̄ ma vəliye aye.

<sup>23</sup> K̄ə ge na raw me na, Mbəlom m̄ə k̄əd̄ ga. Na ye naha a gay kurom a Koriñte sa bay na, h̄ərwi a señ d̄ərev m̄ə wur fakuma bay.

<sup>24</sup> Nəmay na, nəmaa gakumeye kutoŋ ka məpe mədzal gər bay. Nəmaa sər ha ka pum mədzal gər bəŋbəŋ ka Yesu Kəriste tsiy. Duh na, nəmaa giye məsler ka təv manəte eye tə nəkurom hərwi ada dərev kurom mâ ŋgwasas.

## 2

<sup>1</sup> Andza niye, na diye naha ka təv kurom zuk bay hərwi na dzala na, na ta wurakumeye ha dərev sa tsa.

<sup>2</sup> Tadə na wurakum ha dərev na, neŋ dərmak dərev ma wuriye fagaya. Ndəray andaya ma ŋgwesəŋeye ha dərev bay, hərwi nəkurom tebiye dərev ma wuriye fakuma.

<sup>3</sup> Hərwi niye nakə na watsakum naha dərewel neŋgeɗ niye aye na, ada na ye naha ka təv kurom sa bay aye. Na watsakum naha na, hərwi ada nā ndisl naha na, ka wurumeŋeye ha dərev bay. Hərwi mata ŋgwesəŋ ha dərev na, nəkurom. Azlakwa duh na sər kurom ha tebiye, na sər tadə dərev ga maŋgwasas eye na, nəkurom dərmak dərev kurom maŋgwasas eye.

<sup>4</sup> Ahəl nakə neŋ na watsakum naha dərewel niye na, ta mətuwe eye haladzay. Na watsa ta mədzal gər eye hərwi dərev a wur fagaya dɔkdɔk haladzay. Na watsakum naha na, hərwi məwurakum ha dərev bay. Ane tuk na, na watsakum naha na, hərwi ada kâ sərums ha, na wuɗa kurom haladzay.

### *Pol a pəsay mənese a ndo nakə a nasay aye*

<sup>5</sup> Ndoweye kə wurakum ha dərev na, a wureŋ ha dərev a neŋ bay, a nəkurom tebiye, siye hay kə ndalatay haladzay, siye hay tsekweŋ. Ane tuk na, a seŋ mətsike faya ka zal bay.

<sup>6</sup> Matsəla ndo hay haladzay ta kəta na ndo niye, kə sla ɗa andza niye.

<sup>7</sup> Anəke duh na, pəsumas ha mənese ŋgay ada vəlumay gədaŋ ta məmay naha dərev, bəna ma ta mətiye ta mevel.

<sup>8</sup> Hərwi niye neŋ faya na gwadəkumeye naha amboh, pəsumas ha mənese ŋgay hərwi ada mâ sər na, ka wuɗum na.

<sup>9</sup> Dərewel niye na watsakum naha aye na, hərwi a seŋ məsəre ha faya ka rəhumay ha gər a bazlam ga ŋgway ɗaw?

<sup>10</sup> Ka pəsumas ha mənese a ndo niye na, neŋ dərmak na pəsay ha. Neŋ na, kə ge wu andaya məpəsay ha na, na pəsay ha. Na pəsay ha na, hərwi kurom, kame i Kəriste.

<sup>11</sup> Na ge andza niye na, hərwi ada Fakalaw mâ ŋgwasas fakwaya bay. Hərwi wu nakə a say məge aye na, ka sərakwa ha lele.

### *Pol ma gəma i Tərowas*

<sup>12</sup> Na həl bo, na ye a gəma i Tərowas mata ɗa ha Labara ŋgwalak eye nakə a tsik ka Kəriste aye mə ɗəma. Na ndisl naha a ɗəma, na zəba faya na, Bəy Maduweŋ Yesu kə hənɗekeŋ na tsəved vototo lele.

<sup>13</sup> Ane tuk na, mədzal gər ga mandza eye wadəŋ wadəŋ hərwi na huta na malamar kway Titus mə ɗəma bay. Hərwi niye, na gər tay ha ndo məpe mədzal gər neheye ma gəma i Tərowas aye, na ye ka dala i Masedowan.

### *Yesu a vəlakway gədaŋ ada kâ mbakwa ka wu hay*

<sup>14</sup> Ane tuk na, zambadəkway a Mbəlom! Maa ye may ha kame kame məsle ka wu hay huya na, neŋgeye, hərwi nəmay madzapa eye tə Kəriste. Andza niye faya ma diye ha Kəriste a ndo hay kwa ka waray ka waray tebiye tə nəmay, ma zatay a ndo hay andza mal nakə a ze huŋŋa aye.

<sup>15</sup> Nəmay na, andza mal nakə a ze huŋŋa lele Kəriste ma vəlay naha a Mbəlom aye. Mal eye niye a zatay a ndo neheye Mbəlom ma təmiye tay ha aye ada ndo neheye ta dziye aye.

<sup>16</sup> Hərwi ndo neheye faya Mbəlom ma təmiye tay ha na, a zatay lele ada Mbəlom ma vəlatəye sifa. Hərwi ndo neheye faya ta dziye, mal niye a zatay i tay na, məmətə ada faya ta mətiye hərwiye kame i Mbəlom. Mata sle faya məge məsler nakay na, way?

<sup>17</sup> Nəmay na, ndo neheye Mbəlom a slər may ha mata ge məsler aye. Nəmay na, andza ndo neheye ta tərə ha bazlam i Mbəlom andza wu i tsakala aye bay. Maa slər may ha na, Mbəlom. Nəmaa də ha bazlam ɲgay ta dedək kame ɲgay hərwi nəmay madzapa eye tə Yesu Kəriste.

### 3

#### *Məsler i ndo i Dzam Wedəye hay*

<sup>1</sup> Nəmay faya nəmaa dazleye a mədəslay ha gər a bo may dəw? Kəgəbay t̄a watsamay dərəwel a həlay hərwi məbəzakum ha na, nəmay ndo i maslaɲ i Yesu Kəriste hay dəw? Kəgəbay nəmaa tsətsah fakuma dərəwel hərwi məbəzatay ha a ndo mekeləɲ eye hay dəw? Ndo siye hay na, tə gawa andza niye. Ane tuk na, nəmay andza nəteye təbey.

<sup>2</sup> Dərəwel may na, nəkurom nakə Kəriste a watsa a dərev kurom aye. Kwa way ma sliye məsərə ada mədənge.

<sup>3</sup> Ta dedək nəkurom na, dərəwel nakə Kəriste a watsa ada a slər tə həlay may aye. A watsa na, ta yam i wu nakə tə watsawa ha wu aye bay. A watsa na, ta Məsəfərə i Mbəlom neɲgeye nakə ta sifa aye. A watsa na, ka beleler i kwar bay, a watsa a dərev i ndo zezeɲ.\*

<sup>4</sup> Nəmaa gwad nəkurom dərəwel i Kəriste na, hərwi Yesu Kəriste kə də may ha kame i Mbəlom maa ge məsler tə həlay may na, neɲgeye.

<sup>5</sup> Nəmaa sər ha, nəmay tə gər may nəmaa sla məge məsler ta gədaɲ may bay. Maa vəlamay gədaɲ ka məge na, Mbəlom.

<sup>6</sup> Maa vəlamay gədaɲ matərə ndo məge məsler, hərwi mədatay ha bazlam i Dzam Wedəye na, neɲgeye. Dzam nakay wedəye na, andza bazlam mapala eye nakə tə watsa ahəl niye aye bay. Ane tuk na, ka rəhakway ha gər na, a Məsəfərə Tsədəɲɲa eye. Bazlam mapala eye nakə tə watsa ahəl niye na, ma diye tay ha ndo hay a mədahaɲ. Məsəfərə Tsədəɲɲa eye na, ma vəliye sifa ka tor eye.

<sup>7</sup> Ahəl niye Mbəlom a watsa bazlam ɲgay mapala eye ka beleler i kwar ada ahəl nakə a gawa aye wu niye na, ndo hay ta ɲgatay a məzla6 ɲgay.† Da'ar i Musa ka wuzl dəre hərwi məzla6 ɲgay. İsrayel hay ta sla faya mazəbe ka da'ar ɲgay bay, a dəv haladzay. Ada azlakwa dzaydzay niye na, ma ndziye huya bay. Ada tadə bazlam mapala eye nakə ma diye tay ha ndo hay a mədahaɲ ka bəz ha məzla6 i Mbəlom a ndo hay ahəl nakə a yaw aye düh tuk na,

<sup>8</sup> ada məsler i Məsəfərə Tsədəɲɲa eye ma bəziye ha məzla6 i Mbəlom ma ziye ha tebiye düh!

<sup>9</sup> Bazlam mapala eye kə gəs tay ha ndo hay a sariya. Ada tadə bazlam mapala eye ma gəsiye kway a sariya, faya ma bəzakway ha məzla6 i Mbəlom tuk na, ada Dzam Wedəye nakə ma təriye kway ha ndo i dedək kame i Mbəlom aye, ma bəzakway ha məzla6, ma ziye ha düh.

<sup>10</sup> Ka slakweye faya məgwədə na, wu nakə a bəzawa ha məzla6 i Mbəlom ahəl niye faya ma mbatiye hərwi Dzam Wedəye a ze Dzam Guram eye haladzay ta məzla6.

\* **3:3** Zəba mə Madayaw abərə ma Ezipt 24.12; Zeremi 31.29-35; Ezekiyel 11.19; 36.26-27. † **3:7** Zəba mə Madayaw abərə ma Ezipt 34.29-35.

<sup>11</sup> Ta dedek Dzam Guram eye nakə Mbəlom a vəl hərwi mändze tsekweŋ, ka bəzakway ha məzlaḅ. Ada tadə andza niye na, Dzam Wedeye nakə ma ndziye huya aye a ze na dūh.

<sup>12</sup> Nəmaa tsik parakka kame i ndo hay tebiye na, hərwi nəmaa pa mədzal gər ka wu neheye.

<sup>13</sup> Musa ahəl niye na, ka tək na dərə ŋgay tə peteked hərwi məzlaḅ i Mbəlom nakə ka da'ar ŋgay aye ada a say na, Israyel hay tã ŋgatay a məzlaḅ nakay ma ndziye bay, ma mbatiye aye. Ane tuk na, nəmay nəmaa giye andza neŋgeye təbey.

<sup>14</sup> I Israyel hay ahəl niye na, tə sla faya mətsəne wu neheye a say məgwede mey na, tə tsəne bay. Bəgom kwa gwala hay tay bəbay andza niye dərmak. Faya ta dzaŋgiye dərəwel i Dzam Guram eye na, tə tsəne bay andza ta mbuza na metsehe tay tə peteked nakə Musa a mbuzawa ha dərə ŋgay aye. Peteked niye andaya ka dərə huya. Say ndo nakə neŋgeye madzapa eye tə Yesu Kəriste aye.

<sup>15</sup> Ayaw, kwa bəgom, ta dzaŋgiye dərəwel i Musa na, ta tsəniye bay, andza peteked kə mbuzatay na mədzal gər.

<sup>16</sup> Ane tuk na, kwa kəday tadə ndoweye ka mbəda bo ka təv i Bəy Maduweŋ na, peteked niye ma dziye.<sup>‡</sup>

<sup>17</sup> Andza niye hərwi Bəy Maduweŋ ta Məsəfəre Tsədəŋŋa eye nəteye madzapa eye. Təv nakə Məsəfəre i Bəy Maduweŋ mə dəma aye na, ndo hay ta təmaw abəra ma beke. Nəteye beke i bazlam mapala eye sa bay.

<sup>18</sup> Andza niye nəkway neheye ka dzalakwa ka neŋgeye na, peteked ka mbuzakway na dərə sa bay, faya ka ŋgatakweye a məzlaḅ i Bəy Maduweŋ Yesu ada faya ka tərakweye andza neŋgeye kame kame. Andza niye məzlaḅ ŋgay faya ma səkahiye mə nəkway kame kame. Anan məsler nakə Məsəfəre i Bəy Maduweŋ faya ma giye aye.

## 4

### *Nəkway bəle eye hay, Mbəlom neŋgeye gədanj eye*

<sup>1</sup> Mbəlom kə gamay ŋgwalak haladzay. A vəlamay məsler nakay a həlay. Hərwi niye nəmaa zliye faya abəra mədzal gər may bay tebiye.

<sup>2</sup> Nəmaa kərəh məsler neheye ndo hay tə ŋgahawa faya bo, a ge horoy aye. Nəmaa səpatiye ndo hay bay, nəmaa dzapiye ha bazlam i Mbəlom tə maraw me bay. Duh nəmay faya nəmaa diye ha dedek parakka kame i Mbəlom. A samay na, ndo hay tebiye tã sər ha, bazlam nakə faya nəmaa tsikiye na, dedek.

<sup>3</sup> Siye hay na, tə tsəne Labara ŋgwalak eye nakə faya nəmaa tsikateye a ndo hay aye bay. A təra fataya na, andza dərə tay mambuza eye tə peteked. Kwa andza niye bəbay, sərur na, hərwi ndo neheye nəteye faya ta dziye dəkdek tsa.

<sup>4</sup> Tə dzala ha bay na, hərwi Fakalaw neŋgeye ndo mələve mändzibəra ka guluf tay ha mədzal gər hərwi ada tã dzala ha ka Labara ŋgwalak eye bay. Hərwi a say tã ŋgatay a dzaydzay niye faya ma dəviye ka nəteye bay. Dzaydzay niye a yaw na, abəra ma Labara ŋgwalak eye ada Labara ŋgwalak eye faya ma dəkweye ha məzlaḅ i Kəriste. Neŋgeye, ka ŋgatay na, ka ŋgatay a Mbəlom.

<sup>5</sup> Ahəl nakə nəmay faya nəmaa diye ha Labara ŋgwalak eye na, nəmaa tsik ka bo may eye bay, nəmaa dā ha Yesu Kəriste neŋgeye Bəy Maduweŋ. Nəmay na, nəmay ndo məgakum məsler hərwi Yesu.

<sup>‡</sup> 3:16 Zəba mə Madayaw abəra ma Ezipt 34.34.

6 Ahəl niye Mbəlom a ge mändzibəra na, a gwad: «Dzaydzay mâ däv ma ləvonj.\*» Maa vəl dzaydzay nakə ma dəviye mə dərev may aye na, Mbəlom eye nəte. A ge andza niye na, hərwi ada nəmaaŋ ngatay a məzlaḅ ngay nakə a däv dzaydzay ka dəre Yesu Kəriste aye.

7 Nəmay bəle eye hay andza gah i dodó. Ane tuk na, Mbəlom a pa zlele nakay ngwalak eye na, a dərev may. Mbəlom a ge andza niye na, hərwi ada ndo hay tâ ngatay a gədanj bagwar eye i Labara Njwalak eye a yaw abəra ma nəngeye bəna, ma nəmay bay.

8 Nəmaa sa dəretsətseh hay wal wal. Ane tuk na, ta ndəvamay ha məsəfəre bay. Nəmaa dzala gər ka bo, ane tuk na, həlay kə kədamay bay.

9 Ndo hay ta həhar may, ane tuk na, Mbəlom kə gər may ha bay. Ta kal may ha ka dala, ane tuk na, nəmaa mət bay.

10 Ta pəla tsəved məkədə may mədahanj eye andza Yesu nakə tə kəd na aye. Ane tuk na, nəmay andaya ta sifa ada niye a dā ha na, Yesu nəngeye andaya ta sifa.

11 Pat pat ahəl nakə nəkway ka mändzibəra mba aye, ta pəliye tsəved məkədə kway hərwi faya ka pakweye bəzay a Yesu. Andza niye ta sliye faya mənġatay a sifa i Yesu mə bo may.

12 Andza niye, nəmay na, mə dəretsətseh i mədahanj huya. Ada hərwi niye nakə ka hutum sifa nakə ma ndəviye bay aye.

13 Tə watsa mə Derewel i Mbəlom na, tə gwad: «Na dzala ha ka Mbəlom, hərwi niye faya na tsikiye.†» Nəmay dərmak nəmaa dzala ha ka Mbəlom, hərwi niye nəmay dərmak nəmaa tsikiye.

14 Maa lətse ahaya Yesu abəra ma tsəvay na, Mbəlom. Ka sərakwa ha ma ta lətsakway ahaya abəra ma tsəvay dərmak hərwi mata ndze tə nəngeye.

15 Mbəlom a vələmay məsler nakay na, hərwi madzəne kurom hərwi ada Mbəlom mâ tama tay ha ndo hay haladzay ta ngwalak ngay kame kame. Andza niye ndo hay ta səkahiye haladzay hərwi məgay naha sisə a Mbəlom ada mazambadəy.

### *Həbakwa wu nakə ndəray kwa nəte kə ngatay dāda bay aye*

16 Hərwi niye, mədzal gər na, faya huya. Ka sərakwa bo kway faya ma giye bəle tsekweŋ tsekweŋ. Ane tuk na, gədanj andaya mə dərev kway. Pat pat Mbəlom faya ma vələkweye gədanj wədəye hərwi məpay bəzay a tsəved ngay.

17 A seŋ məgwədə dəretsətseh neheye faya ka sakweye anəke aye na, ta ndəviye. Hərwi dəretsətseh neheye na, ka hutakweye məzlaḅ bagwar eye. Məzlaḅ niye na, a ze wu hay tebiye ada ma ndziye ka tor eye. Ka sərakwa ha dəretsətseh neheye na, tsekweŋ tsa.

18 Andza niye, ka pakwa mədzal gər kway na, ka wu i Mbəlom bəna ka wu i mändzibəra bay, hərwi wu i mändzibəra hay na, ta ndziye huya bay. Wu neheye ta ndziye huya aye na, wu neheye mə mbəlom ka ngatakway bay aye.

## 5

1 Ka sərakwa ha bo kway ma ndziye huya bay. Bo kway na, andza madzawadzawa nakə ma nasiye bəse aye. Sa na, kwa tadə madzawadzawa kway nakə kananj aye kə nas bəbay na, Mbəlom ma vələkweye a dəma mekeleŋ eye mə mbəlom. Na tsik na, ka bo kway. Ka mətakwa na, Mbəlom ma vələkweye bo mekeleŋ eye mə mbəlom, ma ndziye ka tor eye.

\* 4:6 Madazlay i wu hay 1.3. † 4:13 Dəmes hay 116.10.

<sup>2</sup> Bo kway nakə wedeye mə mbəlom aye a yakway a gər haladzay, dərev a ndalakway dokdök, a sakway Mbəlom mâ pakway ka bo neŋgeye niye wedeye.

<sup>3</sup> Tadə ka fələkwakwa a dəma na, ka ndzakweye mə bo niye wedeye ka tor eye, məsəfəre ma həhaliye kəriye ze bo bay.

<sup>4</sup> Anəke nəkway huya mə madzawadzawa na, faya ka sakweye dəretsətseh ada faya ka tuwakweye. Niye na, a sakway Mbəlom mâ zla fakwaya abəra wal bay. Ane tuk na, a sakway mâ kalakway nakə bo wedeye ka gər aye. Andza niye sifa wedeye ma mbədiye kway ha ka mətakweye sa bay.

<sup>5</sup> Maa ge məsler mə nəkway hərwi ada kâ hutakwa bo wedeye na, Mbəlom. Kə vələkway Məsəfəre ŋgay. Andza niye ka sərakwa ha ma giye wu mekeləŋ eye hərwi kway dərma.

<sup>6</sup> Hərwi niye kwa kəday ka gəsakweye dərev bəŋbəŋ lele. Ane tuk na, ka sərakwa ha, ahəl nakə nəkway huya tə bo nakay aye na, nəkway mandza eye dərəŋ tə Yesu Bəy Maduweŋ.

<sup>7</sup> Andza məgweđe ka ŋgatakway tə dərə kway zuk bay. Ane tuk na, ka ndzakweye andza niye na, hərwi ka dzalakwa ha ka neŋgeye.

<sup>8</sup> Ta dedək, ka gəsakweye dərev bəŋbəŋ lele. A sakway na, kâ gərakway ha bo nakay ada kâ deyekweye ka təv i Bəy Maduweŋ.

<sup>9</sup> Ada kwa tadə nəkway mandza eye ka təv ŋgay zuk bay, kwa tadə ka deyekweye mata ndze ka təv ŋgay bəbay, a sakway na, mäge wu nakə a yay a gər aye.

<sup>10</sup> Hərwi nəkway tebiye ka deyekweye kame i Yesu Kəriste hərwi ada mâ ŋgənakway ha səriya. Ma vələkweye magogoy a nəkway tebiye, kwa way ma hutiyə ka məsler ŋgay nakə a ge ka məndzibəra aye. Tadə ka gakwa wu ŋgalak eye na, ma vələkweye magogoy kway. Tadə ka gakwa wu lele eye bay na, ma vələkweye magogoy lele bay aye.

*A say a Mbəlom məme kway ha ka bo tə neŋgeye tə həlay i Yesu*

<sup>11</sup> Hərwi niye nəmaa rəhay ha gər haladzay a Bəy Maduweŋ. Nəmay faya nəmaa giye məsler hərwi ada ndo hay tâ təma bazlam i Mbəlom. Mbəlom na, a sər may ha lele ada na dzala na, nəkurom ka sərüm ga ha mə dərev kurom.

<sup>12</sup> A samay mäge zlapay kame kurom bay. Duh nəmay faya nəmaa dəkumeye ha tsəved nakə ka ŋgalakumeye may ha aye, hərwi ada tadə ndo hay faya ta mamay ha manğok na, ka sərümeye mambədatay faya. Nəteye ta ŋgalakiye na, tə wu neheye dərə a ŋgatay aye. Ta zəba dərə a dərev tay bay.

<sup>13</sup> Ka dzalum mə gər kurom na, gər a vuwamay dāw? Kə ge ka dərə kurom gər a vuwamay na, hərwi nəmaa vələy ha bo may a Mbəlom peteh. Tadə kə ge nəmay tə metsehe may na, sərüm ha niye na, hərwi madzəne kurom.

<sup>14</sup> Məsler neheye tebiye nəmaa ge aye na, hərwi nəmaa sər ha Kəriste a wuda may. Mawudə bo ŋgay nakə a wuda may aye na, a gamay kutoŋ mede kame. Nəmaa sər ha ta dedək neŋgeye kə mət hərwi ndo gədem. Ka dərə i Mbəlom na, ndo hay gədem ta mət tə neŋgeye.

<sup>15</sup> Kə mət hərwi ndo hay gədem hərwi ada ndo neheye ta sifa aye tâ ge wu nakə a satay a nəteye bay, ane tuk na, tâ ge wu nakə a say aye. A mət na, hərwi tay ada Mbəlom a lətse ahaya abəra ma tsəvay hərwi tay.

<sup>16</sup> Hərwi niye, anəke na, nəmay nəmaa zəbiye ka ndo hay andza ndo zəreŋ tsa bay. Ahəl niye kwa tadə nəmaa zəba ka Yesu Kəriste andza niye bəbay na, anəke nəmaa giye andza niye sa bay.

<sup>17</sup> Kwa way kə dzapa tə Yesu Kəriste na, ka təra bo wedeye. Ndo guram eye kə dze, andaya sa bay, ka təra ndo wedeye.



<sup>18</sup> Maa ge mäsler niye tebiye na, Mbəlom. A sləraw Yesu Kəriste na, hərwi ada mā makway ha ka bo tə neñgeye. Mbəlom a vəlamay mäsler mede məhəlatay ahaya ndo hay ada tā ma ka bo tage neñgeye.

<sup>19</sup> Andza məgwədə Mbəlom a ge mäsler tə həlay i Yesu Kəriste hərwi a say ndo hay gədem tā ma ka bo tə neñgeye. Ma paslatay na mənese tay sa bay, ada nəmay a slər may ha hərwi məhəlaw ndo hay ada tā ma ka bo tə neñgeye.

<sup>20</sup> Maa slər may ha na, Yesu Kəriste ka mədə ha bazlam ɲgay. Maa zalakum tə bazlam may na, Mbəlom eye tə gər ɲgay. Faya nəmaa gəkumeye amboh hərwi Yesu Kəriste, təmum məmə ka təv i Mbəlom.

<sup>21</sup> Yesu Kəriste kə ge mezeleme dāda bay, ane tuk na, Mbəlom a zla mezeleme kway a pa faya. Mbəlom a ge andza niye na, hərwi kway hərwi ada ka dzapakwa tə Kəriste na, ma təriye kway ha ndo ɲgwalak eye ka dəre ɲgay.

## 6

### *Pol a da ha neñgeye ndo i maslaɲ i Mbəlom*

<sup>1</sup> Anəke nəmay faya nəmaa ge ka bo mäsler ta Mbəlom ka təv manəte eye. Andza niye faya nəmaa gəkumeye amboh na, Mbəlom kə pa fakuma ɲgama haladzay, kə nasum ha ɲgama niye kəriye bay.

<sup>2</sup> Mbəlom a gwad na:

«Ahəl nakə həlay i mäge ɲgwalak ada həlay i mətəme tay ha ndo hay aye na, na tsəne amboh yak ada na dzəna kar.\*»

Malamar ga hay tsənun! Anəke na, həlay nakə a say Mbəlom məgakway ɲgwalak aye, ada a say mətəme tay ha ndo hay anəke.

<sup>3</sup> A samay mäge wu kəriye nakə ma dzəgədiye tay ha ndo hay abəra ka tsəved i Mbəlom aye bay, hərwi a samay tā tsadəy a mäsler may bay.

<sup>4</sup> Duh mə wu neheye faya nəmaa giye tebiye na, faya nəmaa diye ha nəmay ndo mäge mäsler i Mbəlom hay. Kwa tadə faya nəmaa siye dəretsətseh waray waray, kwa tadə faya ta ɲgədfətsiye may, nəmaa dəma andza niye.

<sup>5</sup> Tə ndabawa may, tə gəsawa may a danɲay, tə sutawa famaya ndo hay, madagar a gawamay haladzay, nəmaa hutawa məndzəhəre bay, marəzle a gawamay, nəmaa ndzawa hwapat ze wu mənday dərmak.

<sup>6</sup> Nəmaa ndzawa ma məndze may na, tsadəɲɲa, nəmaa sər dedək, nəmaa zlawa ɲgatay, dərev may lele kame i ndo hay, Məsəfəre Tsadəɲɲa eye mə dərev may, nəmaa wudə tay ha ndo hay tə dərev may peteh.

<sup>7</sup> Nəmaa dəwatay ha a ndo hay na, bazlam dedək eye, Mbəlom a vəlamay gədan. Andza niye nakə nəmaa də ha nəmay ndo i mäsler i Mbəlom aye. Nəmay ndo i dedək hay, ada niye andza wu həlay hərwi mäge vərəm ta ndo mənə dəre may ada hərwi mäge ka bo abəra dərmak.

<sup>8</sup> Ndo siye hay faya ta rəhamay gər, siye hay faya ta tsikiye famaya wu nakə lele bay aye. Ndo mekelən eye faya ta zambadəməye, siye faya ta tsadəməye. Ta zəba famaya andza ndo i maraw me hay, nəmay ndo i dedək hay duh.

<sup>9</sup> Ta zəba famaya andza ndəray a sər may ha bay, azlakwa ndo hay tebiye tə sər may ha. Tə dzala mə gər tə gwad faya nəmaa ndziye huya bay, nəmaa mətiye. Ane tuk na, zəba! Nəmay ta sifa may lele. Tə gawamay dəretsətseh, ane tuk na, nəmaa mət bay.

<sup>10</sup> Mə wu neheye a ndalawamay aye bəbay na, dərev may faya ma ɲgwasiye huya. Ka dəre i ndo hay na, nəmay mətawak eye hay, ane tuk na, nəmay faya nəmaa təriye tay ha ndo hay zlele eye hay ka tsəved i Mbəlom. Andza nəmay

\* 6:2 Eza 49.8.

na, wuray andaya kwa tsekwenj tábey, dúh ta dedek eye wu hay tebiye na, i may.

<sup>11</sup> A nakurom Korinthe hay, nēmaa tsikawakum wu na, parakka. Wu nakə dərev may aye na, nēmaa ŋgaha na bay.

<sup>12</sup> Nəmay na, nēmaa wudá kurom lele. Maa wudá may bay na, nakurom.

<sup>13</sup> Faya na tsikakumey me na, andza na tsikatay me a wawa ga hay. Neŋ faya na gwadákumey: Tsikumamay wu nakə mə dərev kurom aye. Wudum may andza nakə nēmaa wudá kurom aye.

### *Ndo məpe mədzal gər ka Yesu na, mâ rəhay ha gər a Mbəlom*

<sup>14</sup> Ká dzapum ta ndo neheye ta dzala ha ka Yesu bay aye bay. Wu nakə tsədəŋŋa ta wu nakə tsədəŋŋa bay aye ta dzapiye na, ma kəkay? Dzaydzay ta ləvəŋ ta dzapiye na, ma kəkay?

<sup>15</sup> Yesu Kəriste ta Fakalaw ta dzapiye na, ma kəkay? Ndo neheye ta dzala ha ka Yesu aye ta ndo neheye ta dzala ha ka Yesu bay aye, ta dzapiye na, ma kəkay?

<sup>16</sup> Mata dzepe tay ha gay i mədəsley ha gər a Mbəlom ta kule na, wuye mey? Gay i məvəlay wu a Mbəlom na, nəkway. Mbəlom neŋgeye ma ndziye ka tor eye. Andza nakə a gwad:

«Na ndziye mə walaŋ i ndo ga hay,  
na həhaliye mə walaŋ tay,  
ta dəsleŋeye ha gər a neŋ,  
ta təriye ndo ga hay.†»

<sup>17</sup> Hərwi niye Bəy Maduweŋ a gwadatay a ndo ŋgay hay:

«Dumara abəra mə walaŋ tay,  
ká ndzum ka təv manəte eye bay.  
Wu nakə tsədəŋŋa bay aye na,  
ká tətalum faya bay.

Ka gum andza niye na,  
neŋ na təmiye kurom.‡»

<sup>18</sup> «Na təriye bəba kurom  
ada nakurom ka tərumeye wawa ga hasləka eye hay ada wawa ga dem  
eye hay.

Maa tsik na, Bəy Maduweŋ Mbəlom bagwar eye.§»

## 7

<sup>1</sup> Dzam ga neheye na wudá kurom haladzay aye, wu neheye Mbəlom a tsik ahəl niye a gwad ma giye na, i kway. Kə ge andza niye na, bo kway mâ ndza tsədəŋŋa ka dəre i Mbəlom. Gərakwa ha wu neheye mə dərev kway lele bay aye. Mede kway mâ ge lele, rəhakway ha gər a Mbəlom lele.

### *Məŋgwese i Pol*

<sup>2</sup> Ká kərahum mawude may sa bay. Nēmaa gay mənese a ndəray bay, ndəray kə dze abəra ka tsəved i Mbəlom hərwi may bay, nēmaa zla wu i ndəray tə məvay gər bay.

<sup>3</sup> Ká dzalum mə gər kurom na tsik niye na, hərwi məpakum horoy a dəre bay. Niye na, andza nakə na lah mətsike aye, nēmaa wudá kurom haladzay. Wuray andaya nakə ma sliye məŋgəne may ha abəra ta nakurom aye bay. Kwa tadə mədahan, nəkway dziye, kwa tadə sifa, nəkway dziye.

† 6:16 Levitik 26.12; Ezekiyel 37.27. ‡ 6:17 Ezay 52.11. § 6:18 2 Samuyel 7.14; Ezay 43.6; Zeremi 31.9; Oze 2.1.

<sup>4</sup> Na sər ha nəkurom ndo i dedək hay, dərev ga maŋgwasə eye haladzay hərwi kurom. Na sa dəretsətseh haladzay ane tuk na, dərev kə ye fagaya abəra bay. Dərev ga a ŋgwasə düh, dərev ga maraha eye ta maŋgwesə.

<sup>5</sup> Ayaw nəmaa sa dəretsətseh na, haladzay. Kwa ahəl nakə nəmaa ndislew kanaŋ a Masedowan aye na, nəmaa huta tsəved ka mazəzukwe bo kwa tsekweŋ bay tebiye. Wu mawura bo eye a ndzawamay ka tsəved wal wal haladzay. Ndo hay tə wiyawa famaya wu tə magazləga. Mə dərev may bəbay nəmay mandza eye tə mədzal gər eye, nəmaa dzədzar.

<sup>6</sup> Ane tuk na, ahəl nakə ndo hay ta ge bələ aye na, maa matay naha dərev na, Mbəlom. A mamay naha dərev na, tə madayaw i Titus nakə a yaw aye.

<sup>7</sup> Maa mamay naha dərev na, madayaw i Titus dekdək tsa bay. A mamay ha dərev na, tə wu nakə Titus a tsikamay aye. A gwadamay na, ka mumay naha dərev. A gwadamay sa na, a sakum maŋgeteŋ, mevel a wur fakuma hərwi wu neheye lele bay ka gum aye. Ada sa faya ka dzənumeye ga haladzay ta mäge fagaya abəra me ka təv i ndo mane dəre ga hay. Na tsəne andza niye na, dərev ga a səkah ta maŋgwesə.

<sup>8</sup> Na sər ha dərewel nakə na lah məwatsakum naha aye na, kə vəlakum mədzal gər.\* Ane tuk na, na watsa andza niye kemey na, kə ndelenə bay. Dedək ŋgway, hafe na, ma ndeleneye hərwi na sər ha, na vəlakum mäge mevel tsakway tə dərewel ga nakə na watsakum naha aye.

<sup>9</sup> Anəke düh na, dərev ga kə ŋgwasə hərwi dərewel nakay na watsakum naha aye. Dərev ga a ŋgwasə na, hərwi nakə na vəlakum mäge mevel aye bay. Dərev ga a ŋgwasə na, hərwi wu kurom neheye ka gawum lele bay aye a ndalakum ada nakə ka gərūm ha mezeleme kurom aye. Wu nakə a ndalakum aye, ka dəre i Mbəlom na, lele hərwi ada kə gərūm ha mezeleme kurom. Andza niye, tə dərewel nakə nəmaa watsakum naha aye na, nəmaa gakum wuray kwa tsekweŋ bay tebiye.

<sup>10</sup> Ndo weye kə ge mevel hərwi nakə a say a Mbəlom aye na, mäge mevel ŋgay niye ma mbədiye ha mədzal gər ŋgay ka wu ŋgwalak eye ada andza niye Mbəlom ma təmiye ha abəra ma mənese. Slala i mäge mevel niye na, ma vəlakweye madzədzere bay! Slala i mäge mevel nakə ndo i məndzibəra hay ta giye na, ma kədiye ndo.

<sup>11</sup> Dedək, mevel kurom nakə ka gum aye na, a yay a gər a Mbəlom. Anəke na, zəbum faya ma kəkay nakə a mbədə aye! Anəke na, ka vəlum ha bo kurom ka mədzal ha andza nakə a ye ka bo aye. Faya ka dūmeye ha na, ka wudum mənese bay, ka gum mevel ka bo kurom eye hərwi wu niye. Ka dzədzarum hərwi wu nakə ma ta ndzakumeye a gər aye. A sakum mə dərev kurom maŋgeteŋ haladzay. A sakum mäge wu nakə a say a Mbəlom aye ada tə məpəray a ndo nakə a ge mənese aye. Ka dūm ha ta tsəved wal wal parakka hərwi nakə həlay kurom andaya mə wu niye sa bay aye.

<sup>12</sup> Andza niye, dərewel nakay na watsa naha aye na, na watsa naha hərwi ndo nakə a ge mənese aye dekdək tsa bay. Na watsa naha hərwi ndo nakə tə gay mənese aye bay. Ane tuk na, na watsakum naha na, hərwi ada kə sərūm ha lele kame i Mbəlom na, ka wudum may tə dərev kurom peteh.

<sup>13</sup> Hərwi niye anəke na, dərev kə mamay naha.

Dərev kə mamay naha dedək. Wu mekelenə eye ma ze nakay na, andaya sa. Dərev may a ŋgwasə haladzay na, hərwi Titus nakə dərev ŋgay maŋgwasə eye hərwi nəkurom tebiye kurom eye ka mumay naha dərev aye.

<sup>14</sup> Dərev ga a ŋgwasə na, hərwi na ŋgalak kurom ha kame ŋgay. Na ŋgalak na, kəriye tsa bay. Wu nakə nəmaa tsikawakum aye na, dedək huya. Andza niye

\* 7:8 Zəba ma 2 Koriñte hay 2.3.

manjeleke nakə nəmaa ɲgalak kurom ha kame i Titus aye bəbay na, dedək. A ge bo a dəma andza nakə nəmaa tsikakum aye.

<sup>15</sup> Ahəl nakə a ye naha ka təv kurom aye na, ka təmum na tə marəhay ha gər tə madzədzaray haladzay. Nəkurom tebiye ka rəhumay ha gər. A sər ha faya, faya ma səkahiye ha mawude kurom.

<sup>16</sup> Dərev ga kə ɲgwasə haladzay hərwi na sər ha, nəkurom ndo i dedək hay.

## 8

### *Madzəne hərwi ndo neheye tə pa mədzal gər ka Yesu ma Zerozelem aye*

<sup>1</sup> Malamar ga hay, a samay na, sərūm ha wu nakə ndo məpe mədzal gər hay ka Yesu tə ge ka dala i Masedowan aye. Tə ge wu niye hərwi nakə Mbəlom a ge məsler ma nəteye aye.

<sup>2</sup> Ta sa dəretsətseh haladzay. Ane tuk na, kwa nəteye mə dəretsətseh ada kwa nəteye mətawak eye hay bəbay na, dərev tay maɲgwasə eye haladzay. Ta vəl suloy haladzay hərwi məsler i Mbəlom duh.

<sup>3</sup> Neɲ faya na gwadəkumeye, ta vəl haladzay andza nakə tə sla faya məvəle aye. Tə vəl na, haladzay a ze gədaɲ tay tebiye. Ndəray ka tsətsah fataya bay, ane tuk na, ti yaw

<sup>4</sup> ta tsətsah ta amboh. Tə gwadəmay: «Vəlumamay tsəved hərwi ada nəmaā dzəna ndo məpe mədzal gər hay ka Yesu neheye ma Zerozelem aye.»

<sup>5</sup> Wu nakə tə ge aye na, a ze wu nakə nəmaa dzala fataya aye. Təday na, ta vəl ha bo tay a Bəy Maduweɲ Yesu ada ta vəl ha bo tay hərwi may andza nakə a say a Mbəlom aye.

<sup>6</sup> Hərwi niye nəmaa tsətsah ka Titus, nəmaa gwadəy mā mbəda naha gər ka təv kurom hərwi ada məsler i məvəle wu nakə a dazlay mə walaɲ kurom aye na, mā ye naha mā ndəv ha.

<sup>7</sup> Nəkurom ka tsəved i Mbəlom na, zlele eye hay haladzay. Ka pum mədzal gər kurom ka Kəriste peteh, ka sərūm dedək i Mbəlom, ka vəlumay ha bo a Mbəlom tebiye, ka wudum may haladzay, faya ka dume ye ha labara i Yesu lele. Hərwi niye gum məsler niye lele eye tə dərev kurom peteh mā ze i siye ndo hay.

<sup>8</sup> Wu nakə na tsikakum aye na, na gakum kutoɲ ka məvəle suloy bay. Andza niye bay, na gwadəkum na, ndo siye hay a satay haladzay məvəle. Na tsikakum andza niye na, hərwi a seɲ məsəre ha nəkurom tə gər kurom ka wudum siye i ndo hay ta dedək ɲgway dāw.

<sup>9</sup> Nəkurom ka sərūm ha ɲgwalak i Bəy Maduweɲ kway Yesu Kəriste nakə a ge hərwi kurom aye. Neɲgeye na, zlele eye, ane tuk na, kə gər ha zlele, ka tərə ndo i mətawak hərwi kurom. Ka tərūm zlele eye hay mə dərev kurom na, hərwi nakə a tərə ha bo ndo i mətawak aye.

<sup>10</sup> Na tsikakumeye wu nakə na dzala hərwi suloy aye, niye lele hərwi kurom. Dəz na, nəkurom ka lahum, a sakum matsekele suloy niye ada maa dazlay a məsler niye kurre na, nəkurom.

<sup>11</sup> Anəke hərwi kurom na, lele nakə ka ndəvumeye ha məsler niye aye. Gum tə gər kurom andza nakə ka gum ahəl niye ka dazlumay aye ada ndəvum ha məge. Vəlūm andza nakə ka slum faya məvəle aye.

<sup>12</sup> Hərwi tadə ka vəlumeye wu a Mbəlom ta maɲgwesə andza nakə ka hutum aye na, Mbəlom ma təmiye. Wu nakə andaya fakuma bay aye na, ma tsətsahiye fakuma bay.

13 Kâ dzalum mæ gær kurom na, na zliye dæretsæseh abæra ka ndo siye hay ada na piye fakuma ŋgiyats hærwi ada næteye zay zay ada nækurom ka sumeye dæretsæseh na, andza niye bay. A seŋ na, lævum hærdeðe.

14 Anæke na, wu kurom andaya haladzay. Lele na, vølumatay a ndo neheye i tay andaya bay aye. Tadæ pat mekeleŋ eye i kurom kæ ge andaya bay na, i tay kæ ge andaya haladzay na, næteye ta vælakumeye. Andza niye ka lævumeye hærdeðe.

15 Ma tæriye na, andza nakæ tæ watsa a Derewel i Mbælom, tæ gwad: «Ndo neheye tæ hæl ka zal aye na, andaya fataya ka zal bay. Ndo neheye tæ hæl tsekweŋ aye na, wuray a kætsay bay.\*»

*Titus tæ siye i ndo mæpe mædzal gær hay ka Yesu tiye a Koriñte*

16 Titus na, kæ vøl ha bo ŋgay hærwi madzæne kurom andza næmay neheye a samay madzæne kurom aye. Maa ge andza niye mæ dærev ŋgay na, Mbælom. Hærwi niye næmaa gay naha siæc haladzay a Mbælom.

17 Titus ka tæma matsæsehe may nakæ næmaa gwaday mâ mbæða naha gær a tæv kurom aye. Ma mbæðiye naha gær na, hærwi nakæ næmaa gwaday mâ ye naha aye dekdæk tsa bay. Bo ŋgay eye tæ gær ŋgay a dzala mede naha a tæv kurom hærwi a say madzæne kurom haladzay.

18 Næmaa slæriye tay naha næteye sulo ta ndo nengeð. Ndowne ye niye na, ndo mæpe mædzal gær ka Yesu Kæriste ta zambadaway ha haladzay hærwi a dæwa ha Labara Ŋgwalak eye i Yesu a ndo hay lele.

19 Næmaa slær naha nengeye na, hærwi niye dekdæk tsa bay. Mæhay gær i ndo mæpe mædzal gær hay ka Yesu Kæriste tæ zla nengeye hærwi ada næmaâ hæhal salamay. Ma dzæniye may ka matsekele suloy nakæ hærwi madzæne ndo mæpe mædzal gær hay ka Yesu aye. Ŋgwalak i mæsler nakay na, ma sækahiye mæðsley ha gær a Bøy Maduweŋ nakæ ta dæsley ha gær aye ada ma diye ha na, a samay madzæne ndo hay.

20 Madzæne niye ka tsakalakweye na, haladzay ada næmaa giye metsehe a gær bæna agæna ndo hay ta ta mamay ha mænese, ta gwadiye næmaa gay gær lele bay.

21 A samay mæge wu nakæ lele ka dære i Bøy Maduweŋ dekdæk tsa bay. Næmaa giye lele ka dære i ndo hay dærmak.

22 Næmaa slæriye naha malamar mekeleŋ eye ta diye naha dziye sa. Nengeye na, næmaa zæba ka mændze ŋgay madzæga haladzay. Kæ vøl ha bo ŋgay peteh ka mæsler i Mbælom. Anæke na, kæ vøl ha bo ŋgay sa tsa, hærwi a sær ha mede kurom ka tsæved i Mbælom na, lele.

23 Titus na, næmaa hæhalawa salamay, næmaa gawa mæsler salamay hærwi madzæne kurom. Malamar neheye siye sulo aye na, mæhay gær i ndo mæpe mædzal gær hay ka Yesu Kæriste tæ slær tay naha ka tæv kurom. Ndo hay ta dæsley ha gær a Kæriste hærwi tay.

24 Dumatay ha a ndo neheye na, ka wuðum tay ha. Ndo mæpe mædzal gær hay ka Yesu Kæriste neheye tæ slær tay naha ta tsæniye. Ta tsæne andza niye na, ta særiye ha bazlam neheye ŋgwalak eye næmaa tsik fakuma aye na, deðek.

## 9

*A say a Pol tâ hayay gær a madzæne hærwi malamar hay*

1 Hærwi madzæne nakæ mæsleratay naha a ndo mæpe mædzal gær hay ka Yesu neheye ma Zerozelem aye na, ma giye ŋgama bay nakæ na watsakumeye naha dærewel aye.

\* 8:15 Madayaw abæra ma Ezipt 16.18.

<sup>2</sup> Hərwi na sər ha, a sakum madzəne tay ha. Na ɲgalak kurom ha ka təv i Masedowan hay, na gwadətay: «Ndo neheye ka dala i Akay\* na, nəteye maləva bo eye ka məvəle zla dəz dzəy. A satay madzəne ndo məpe mədzal gər hay ka Yesu neheye ka dala i Yahuda aye.» Ndo i Masedowan hay tə tsəne na, ndo siye hay haladzay mə walaɲ tay ta səkah ha tsuɓtsuɓ a dərev tay madzəne tay ha dərmaɲ.

<sup>3</sup> Na sləriye malamar neheye mahkar aye ka təv kurom hərwi ada kâ ləvum ha bo tə madzəne andza nakə na tsik, na gwad ka gumeye. Ahəl nakə nəmaa ndisl naha ka təv kurom aye na, wu nakə na ɲgalak kurom hay aye ma təriye dedək, nəmaa ndzay naha a gər nəkurom maləva bo eye məvəle.

<sup>4</sup> Bana tadə na ye naha ta ndo neheye ka dala i Masedowan aye nəmaa ndzay a gər a madzəne niye ka ləvum ha bo bay na, horoy ma geɲeye kame tay haladzay. Hərwi na mbərəm maɲgeleke kurom ha, na gwadətay na, na sər ha ta dedək ta hayay gər a madzəne niye, azlakwa bay. Ane tuk na, horoy ma ta giye wene wene kame tay na, a nəkurom.

<sup>5</sup> Hərwi niye na dzala na, na gwad lele na tsətsahiye ka Titus tə siye i malamar neheye sulo aye tā leheɲ kame mede naha ka təv kurom. A seɲ na, tā ye naha, tā dzəna kurom ka məge wu nakay ɲgwalak eye ka gwadum ka vələmeye. Andza niye, ahəl nakə na ndisl naha aye na, ɓa nəkurom maləva bo eye tsiy. Niye ma diye ha na, ndərəy kə gakum kutoɲ ka məvəle bay. Ka vələm na, tə dərev kurom peteh.

<sup>6</sup> Sərum ha na, tadə ndoweye kə gay dərə a hulfe ɲgay, ka sləga tsekweɲ na, ma ta dziye tsekweɲ dərmaɲ. Tadə ndoweye ka sləga hulfe ɲgay haladzay na, ma ta dziye haladzay dərmaɲ.

<sup>7</sup> Kwa way mâ vəl andza nakə a dzala məvəle mə dərev ɲgay aye. Kâ vələm tə mədzal gər sulo sulye bay ada ndərəy mâ gakum faya kutoɲ ka məvəle bay. Ane tuk na, vələm tə maɲgwese, hərwi Mbəlom a wudə na, ndo nakə ma vəliye ta maɲgwese aye.

<sup>8</sup> Hərwi Mbəlom neɲgeye na, ma sliye faya məpe fakuma ɲgama ta tsəved mekeleɲ eye wal wal haladzay hərwi ada wuray kwa tsekweɲ mâ kətsakum bay. Wu ma giye andaya fakuma haladzay hərwi məge ha məsler ɲgwalak eye tebiye.

<sup>9</sup> Ka tərumeye na, andza nakə tə watsa mə Dərewel i Mbəlom aye, tə gwad: «Ndo nakə a vəl həlay lele a ndo i mətawak hay aye na, ɲgwalak ma ndziye faya ka tor eye.†»

<sup>10</sup> Maa vəl hulfe a ndo hay ada maa vələtay wu mənday hərwi ada tā nda na, Mbəlom. Ma vələkumeye hulfe dərmaɲ, ma səkahakumeye ha haladzay hərwi ada ndo siye hay ta hutiye haladzay abərə mə həlay kurom. Wu nakə ka vələmeye na, Mbəlom ma tələkiye a dəma həlay ɲgay hərwi ada ɲgwalak i məsler kurom mâ vəl hohway haladzay ka tsəved ɲgay.

<sup>11</sup> Ma piye fakuma ɲgama haladzay hərwi ada kâ vələm həlay a ndo siye hay. Andza niye, ndo hay haladzay ta gay naha sişə a Mbəlom haladzay hərwi wu nakə ka vələmeye na, nəmaa zla tay naha aye.

<sup>12</sup> Sərum ha suloy nakə ka tsakalumeye, ka dzalum mə gər kurom ma dzəniye na, ndo məpe mədzal gər hay ka Yesu dəkdek daw? A'ay! Ma vələteye gədaɲ a ndo məpe mədzal gər hay ka Yesu ka məgay naha sişə a Mbəlom haladzay hərwiye.

<sup>13</sup> Məvəle wu kurom nakə ka vələmeye kəriye aye ma diye ha ta dedək nəkurom na, ka təmum Labara ɲgwalak eye i Kəriste ada ka rəhumay ha

\* 9:2 Zəba ma 2 Korinje hay 1.1 ada ka bazlam nakə tə watsa faya aye. † 9:9 Dames hay 112.9.

gær. Ndo hay ta zambafeyə a Mbəlom dərmaκ hərwi nakə ka vəlumatay wu kurom tə dərəv kurom pətəh ada ka vəlumatay a ndo siye hay dərmaκ.

<sup>14</sup> Madzəne kurom nakə ka slərumatay naha aye na, ma diye ha Mbəlom kə gakum ŋgwalak ŋgay haladzay. Ndo hay ta ŋgatay andza niye na, ta wudiye kurom haladzay, ta dūwulay me a Mbəlom hərwi kurom.

<sup>15</sup> Zambafakway a Mbəlom hərwi wu nakə a vəlakway aye na, andza niye andaya bay, a ze wu hay tebiye.

## 10

### *Pol a tsik ka ndo neheye ta ŋgalaway bəzay a məsler ŋgay aye*

<sup>1</sup> Neŋ Pol, a seŋ mətsikakum naha ka bo ga. Faya na gwadəkumeye naha amboh hərwi ndo siye hay mə walaŋ kurom nəteye faya ta gwadiye: «Ahəl nakə neŋgeye mandza eye mə walaŋ kway aye na, a hənawa ha gær. Ane tuk na, ahəl nakə ki ye abəra ka təv kway aye na, ma ŋgəzəzəweye fakwaya tuk, andza a dzədzar tə nəkway sa bay.» Neŋ na, a seŋ na geye ŋgwalak a ndo dūh, na tsikiye me ləfədədə andza Kəriste.

<sup>2</sup> Na gakumeye naha amboh, mbədum ha mede kurom hərwi ada ahəl nakə na ye naha ka təv kurom aye, kə gumenj kutoŋ ka matərakum bay. Ndo hay andaya mə walaŋ kurom ta gwadiye famaya na, nəmay faya nəmaa giye məsler andza ndo neheye tə sər Mbəlom bay aye. Slala i ndo niye hay na, na sliye faya mədatay ha gədaŋ ga.

<sup>3</sup> Dədək, nəmay na, ndo zezeŋ hay. Ane tuk na, vərəm nakə nəmaa giye na, andza i ndo i məndzibəra hay bay.

<sup>4</sup> Wu i həlay neheye nəmaa giye ha vərəm aye na, wu i həlay i ndo i məndzibəra hay bay. Duh ma vələmay wu i həlay niye hay na, Mbəlom hərwi mambəzl ha lar i ndo mane dərə i Mbəlom neheye tə pawə bo a dəma aye. Wu i həlay niye hay na, gədaŋ eye hay. Nəmaa nasiye ha mədzal gær tay neheye tə dzalawa lele bay aye.

<sup>5</sup> Nəmaa mbatiye ha bazlam i ndo neheye tə dəsławay ha gær a bo tay aye, faya ta dərəzlatay na tsəvedə ndo hay hərwi ada tə sər Mbəlom sa bay aye. A samay mambədə ha wu nakə ndo hay faya ta dzaliye mə dərəv tay aye hərwi ada tə rəhay ha gær a Kəriste.

<sup>6</sup> Ka dūmamay ha, nəkurom ka rəhumamay ha gær na, nəmay maləva bo eye məpəratay a siye i ndo neheye tebiye ta rəhamay ha gær bay aye.

<sup>7</sup> Zəbum na, ka wu nakə parakka aye. Tadək ndoweye kə dzala ta dədək neŋgeye ndo i Kəriste na, mə sər ha nəmay dərmaκ nəmay ndo i Kəriste hay.

<sup>8</sup> Gədaŋ nakə Bəy Maduweŋ a vəleŋ aye, kwa faya na ŋgalakiye ha ka zal na, horoy ma geŋeye bay, hərwi Bəy Maduweŋ a vəleŋ hərwi ada nə dzəna kurom bəna, nə nas kurom ha bay.

<sup>9</sup> Ndəray mə dzala na, a seŋ məpe naha fakuma zluwer tə dərəwel nakə na watsakum naha aye. A'ay, andza niye bay.

<sup>10</sup> Hərwi ndo siye tə gwad: «Pol a watsakway dərəwel hay na, wu neheye a watsa a dəma aye a wur bo haladzay ada a tsik ta gədaŋ. Ane tuk na, ahəl nakə neŋgeye mə walaŋ kway aye na, neŋgeye bələ eye, bazlam ŋgay neheye ma tsikiye bəbay na, bazlam kəriye.»

<sup>11</sup> Ndo neheye faya ta tsikiye andza niye aye tə sər na, wu nakə nəmaa watsa a dərəwel may hay, ahəl nakə aza nəmay mə walaŋ kurom aye nəmaa tsikiye andza nakə nəmaa watsakum naha aye.

<sup>12</sup> Ndo neheye tə gwadəy a gær tay na, nəteye bagwar eye hay, nəmay na, nəmaa slə məgwədə nəmaa ləva ta nəteye bay. Nəmaa ləviye ha bo may ta



nəteye bay. Ta zəba ka bo tay na, andza ndəray andaya ma dəba tay sa bay. Tə ləva ha bo tay na, ka bo tay eye wu tay. Nəteye matərahəñ eye hay.

<sup>13</sup> Gəma nakə Mbəlom kə vələmay bay aye na, nəmaa ŋgalakiye ha bay. Nəmay na, nəmaa ŋgalakiye ta gəma nakə Mbəlom a vələmay aye. Ada nəkurom eye na, ma gəma eye nakə Mbəlom a vələmay aye.

<sup>14</sup> Ahəl nakə nəmaa ye naha ka təv kurom aye na, nəmaa zay ha a təv i məsler nakə Mbəlom a vələmay aye bay. Maa lah mede naha hus a gay kurom mədakum ha Labara Ŋgwalak eye i Kəriste na, nəmay.

<sup>15</sup> Nəmay na, nəmaa giye zlapay ta məsler nakə ndo siye hay tə ge aye bay. Məsler i ndo niye hay na, nəmay andaya mə dəma bay. Ane tuk na, nəmaa pa mədzal gər may na, ka nəkurom. A samay na, mədzal gər kurom mǎ səkah kame kame hərwi ada nəmaâ sla faya masəkah ha məsler may mə walañ kurom. Ane tuk na, nəmaa zay ha tə gər a təv i məsler nakə Mbəlom a gwadamay gum aye bay.\*

<sup>16</sup> Ma dəba eye na, nəmaa sliye faya məhute tsəved mede məde ha Labara Ŋgwalak eye a ndo neheye ta tsəne bay aye, a gəma dərən eye abəra ka gəma i Koriñte. Nəmay na, a samay mäge zlapay ta təv i məsler nakə Mbəlom a vələtay a ndo siye hay ada nəteye ta giye aye bay.

<sup>17</sup> Ane tuk na, tə watsa mə Derewel i Mbəlom, tə gwad: «Ndo nakə a say mäge zlapay aye na, mǎ ge zlapay tə wu nakə Bəy Maduwerə a ge aye.†»

<sup>18</sup> Hərwi ndo neheye tə dəslay ha gər a bo tay aye na, Mbəlom ma təmiye tay bay. Mbəlom ma təmiye na, ndo neheye bo ŋgay eye faya ma dəslatay ha gər aye.

## 11

### *Pol ta ndo neheye tə dawa ha bazlam i Mbəlom tə maraw me aye*

<sup>1</sup> Anəke na, zlum ŋgatay, na tsikiye me andza gər mavuwe. Ta dedək zlumən ŋgatay.

<sup>2</sup> Neñ faya na giye sələk hərwi kurom andza nakə Mbəlom a ge sələk hərwi kurom neheye a wudə kurom aye. Nəkurom ka tərūm na, andza dem nakə a señ na vəliye na, a ndo nəte aye. Andza mǎgwədə a Yesu Kəriste. A señ na, mǎ ndza tsədanñja nakə na vəleye.

<sup>3</sup> Neñ faya na dzədzariye haladzay hərwi ağəna ndəray ma vakumeye gər hərwi ada kǎ pumay bəzay a Yesu Kəriste tə dərəv kurom peteh sa bay. Hərwi nəkurom ka sərūm dədə a yaw a səpat na Hawa ta bəbərək ŋgay.

<sup>4</sup> Na tsik andza niye na, hərwi ndo məde ha bazlam i Mbəlom tə maraw me eye ta ye naha a gay kurom, ka vəlumateye tsəved tə tətikakum. Bazlam nakə ta tsikiye ka Yesu aye na, wal wal abəra ka bəmalə may. Məsəfəre nakə tə tsik faya aye, Məsəfəre Tsədanñja eye nakə ka hutakwa ahəl niye aye bay, ada faya ta diye ha Labara Ŋgwalak eye nakə nəkurom ka dzalum ha aye bay. Kwa andza niye bəbay na, faya ka zlumeye ŋgatay.

<sup>5</sup> Ka dzalum na, ndo neheye nəteye bagwar i ndo i maslañ hay ta dedək. Azlakwa dūh neñ na ze tay ha.

<sup>6</sup> Dedək, neñ na, na sər mətsike me lele nakə ma deyete a gər a ndo hay andza nəteye təbey. Ane tuk na, məsərə wu i Mbəlom na, nəmaa dākum ha parakka sik haladzay.

<sup>7</sup> Ahəl niye na dākum ha Labara Ŋgwalak eye i Mbəlom na, na tsətsah fakuma suloy bay. Na həna ha gər ga ka dala na, hərwi kurom hərwi ada nǎ dzəna kurom ka tsəved i Mbəlom. Duh na ge andza niye na, mənese dāw?

\* 10:15 Zəba ma Roma hay 15.17-21. † 10:17 Zəba ma 1 Koriñte hay 1.31.

<sup>8</sup> Ahəl nakə neñ faya na giye mäsler mə gay kurom aye, na təma ndo məpe mädzal gər hay ka Yesu Kəriste tə sləreñew suloy. Na təra tay ha nəteye düh mətawak eye hay hərwi ada nā dzəna kurom.

<sup>9</sup> Ahəl nakə neñ mə gay kurom aye na, kwa hawa i wu hay a geñ bəbay, na tsətsah fakuma wuray bay. Kə ge wu andaya fagaya bay na, ndo məpe mädzal gər neheye ka dala i Masedowan ti yaw tə vəleñ. A həlay nakə hawa i wu a geñ aye na, na gakum dəretsətseh bay tebiye ada dādā ma señeye matsətsehe fakuma wu bay.

<sup>10</sup> Na giye zlapay hərwi na təma fakuma abəra suloy dādā bay, ndəray ma sliye faya madərəzleñ ka bazlam bay. Na giye ha zlapay kwa ka waray ka dala i Akay.\* Wu nakə na tsik aye, na tsik na, dedək ta məzele i Yesu Kəriste nakə mə neñ aye.

<sup>11</sup> Na ge andza niye na, hərwi nakə na wudā kurom bay aye dāw? A'ay, Mbəlom a sər ha na wudā kurom.

<sup>12</sup> Wu nakə faya na giye na, na giye andza niye huya hərwi ada ndo i maslañ i Mbəlom neheye tə dāwa ha bazlam i Mbəlom tə maraw me aye tə huta tsəved ka məge zlapay ta mäsler tay nakə tə gwad faya ta giye andza nəmay aye bay.

<sup>13</sup> Ndo niye hay na, nəteye ndo i maslañ hay ta dedək eye bay. Nəteye faya ta vateye gər a ndo hay ta mäsler tay niye, ta mbəda ha bo tay andza ndo i maslañ i Kəriste.

<sup>14</sup> Wu niye na, mā gakum wadəñ wadəñ bay. Kwa Fakalaw bəbay a mbəda ha bo andza gawla i Mbəlom nakə a dəv dzaydzay aye.

<sup>15</sup> Tadə Fakalaw faya ma giye andza niye na, mā gakum wadəñ wadəñ bay. Ndo i mäsler ñgay hay ta mbəda ha bo hərwi ada tə ndzək it bo ta ndo neheye faya ta tətikateye tsəved nakə dedək eye a ndo hay aye. Pat nakə mändzibəra ma ndəviye aye na, Mbəlom ma pərateye ka wu tay nakə tə ge aye.

### *Pol a zlapa tə dəretsətseh ñgay neheye a sa aye*

<sup>16</sup> Na masiye ha, na tsikakumeye sa, ndəray mā dzala neñ na, gər mavuwe bay. Tadə ka dzalum mə gər kurom gər a vuweñ na, təmum andza niye hərwi ada neñ nā sla faya məge zlapay dərmaç andza nakə ka vəlawumatay tsəved a gər mavuwe hay aye.

<sup>17</sup> Wu nakə na tsikiye na, na tsikiye andza nakə a say a Bəy Maduweñ aye bay. Ahəl nakə na giye zlapay aye na, ta dedək na tsikiye me andza gər mavuwe.

<sup>18</sup> Na zəba faya na, ndo hay haladzay faya ta giye zlapay andza ndo neheye tə sər Mbəlom bay aye. Neñ dərmaç na giye andza nəteye.

<sup>19</sup> Ka gwadum nəkurom na, ka tsahum ba? Ka zalumatay a gər mavuwe hay ta mädzal gər kurom.

<sup>20</sup> Ka vəlumatay tsəved a ndo hay tə təra kurom ha andza beke hay, ta səpatiye fakuma abəra wu kurom hay ta bəbərek, tə vakum gər, tə zəba fakuma andza wu kəriye ada tə fakum. Ka vəlumatay tsəved andza niye.

<sup>21</sup> Ah! Neñ na, horoy a geñ haladzay. Neñ bəle eye, na gakum andza niye təbey.

Anəke na tsikiye me andza gər mavuwe. Na giye zlapay tə wu nakə ndo siye hay faya ta giye ha zlapay aye dərmaç.

<sup>22</sup> Tə gwad nəteye na, Hebrəe hay. Neñ dərmaç ndo i Hebrəe. Tə gwad nəteye İsrayel hay. Neñ dərmaç ndo i İsrayel. Nəteye slala i Abraham. Neñ dərmaç slala ñgay.

\* 11:10 Zəba ma 2 Koriñte hay 1.1.

<sup>23</sup> Nəteye ndo mäge mäsler i Yesu Kəriste. Neñ na ze tay ha. Na tsikiye andza neñ ndo i matərakahanj. Na ge mäsler tə mawura bo eye a ze i tay. Tə gəsawa ga a danğay madzəga haladzay, a ze i tay, ta ndaβa ga madzəga haladzay, a ze i tay, na sər məməte madzəga haladzay, a ze i tay.

<sup>24</sup> Madzəga zləm Yahuda hay ta ndaβa ga ta mandalaβa, tə ndaβawa ga na, kuro kuro mahkar gər eye tsid.†

<sup>25</sup> Madzəga mahkar, Roma hay ta kəf ga, sik nəte ta kal ga tə kwar hərwi məkəde gay. Madzəga mahkar kwalalanj i yam ka bətuk may ha a hud i yam. Sik nəte ta həpat kwa ta həvad, na həna mə hud i yam.

<sup>26</sup> Sik haladzay ahəl nakə faya na həhaliye na, na sa dəretsətseh hərwi mazaw nakə ma zliye ga aye, na sa dəretsətseh hərwi məkal hay ta zlenj zay haladzay, na sa dəretsətseh hərwi ndo neheye nəteye Yahuda hay bay kwa tə həlay i Yahuda gwala ga hay, ta pəreñ haladzay. Na sa dəretsətseh haladzay kwa ma wuzlahgəma, kwa mə kəsaf, kwa ka gər i bəlay. Ndo neheye tə gwaday a gər tay nəteye ndo məpay bəzay a Yesu Kəriste ta genj dəretsətseh haladzay.

<sup>27</sup> Na ge mäsler haladzay ta gədanj ada na sa dəretsətseh, madzəga haladzay na hutawa tsəved ka məndzəhəre bay, madzəga haladzay na ndzawa ze mände wu mənday ada ze məse yam, mətasl a gawerj ada na hutawa petekəd məpe ka bo bay.

<sup>28</sup> Dəretsətseh siye hay andaya, ane tuk na, na tsikiye sa bay. Na tsikiye ka wu mekeleñ eye dəkdək. Ma mədzal gər na, na dzalawa ka ndo məpe mədzal gər hay ka Yesu Kəriste huya. Na dzalawa fataya pat pat.

<sup>29</sup> Tadə ndoweye kə ge bəle ka tsəved i Mbəlom na, a wur fagaya haladzay andza maa ge bəle na, neñ. Tadə ndoweye kə dəd a mezeleme na, a wur fagaya haladzay andza faya ta fəkiye ga ta ako.

<sup>30</sup> Tadə na giye zlapay na, na giye zlapay tə bəle ga.

<sup>31</sup> Mbəlom Bəba i Bəy Maduwerj Yesu Kəriste, mazembədə nakə ndo hay ta zambadəye, tā zambadəy. Neñgeye a sər ha na raw me bay.

<sup>32</sup> Ahəl niye ahəl nakə neñ ma Damas aye na, bəy bagwar eye i gəma niye tə zalay Aretas. A pa bəy hərwi mələve wuzlahgəma. Bəy a pay ndo hay ka tsəved hərwi məgəse ga. Gəma niye na, malawara eye ta zled.

<sup>33</sup> Ane tuk na, ndo məpe mədzal gər hay ka Yesu tə pa ga a kəteh, tə βar faya ləβer. Tə zla ga ahaya abəra tə mavavar. Tə mbəzla ga ahaya sərəhəhə abəra ma wuzlahgəma niye. Na təmaw abəra mə həlay i bəy niye.‡

## 12

### *Pol a sər ha gədanj i Yesu Kəriste*

<sup>1</sup> Kutoñ na giye zlapay huya. Na sər ha ma giye ŋgama kwa tsekwerj bay tebiye. Ane tuk na, anəke na tsikiye ka wu nakə Yesu Kəriste a bəzeñ ha ma məsine aye.

<sup>2</sup> Na sər ndoweye andaya madzapa eye tə Yesu Kəriste. Kə ndza ma giye məve kuro gər eye fəd, Mbəlom a zla na a mbəlom ka təv ŋgay. Agəna Mbəlom a bəzay ha ma məsine, agəna ki ye tə slo i bo ŋgay ta dedək, Mbəlom nəte ŋgwerj a sər.

<sup>3</sup> Ayaw! Mbəlom kə zla na ndo niye a mbəlom ka təv ŋgay. Agəna məsine a gay, agəna ki ye ta dedək, maa sər na, Mbəlom.

<sup>4</sup> Ahəl nakə neñgeye mə dəma aye na, kə tsəne wu nakə ndo zezeñ ma sliye mətsike bay aye. Ta vəl faya tsəved a ndo hay ka mətsike bay.

† 11:24 Zəba mə Bazlam mapala eye masulo eye 25.3. ‡ 11:33 Zəba mə Məsler hay 9.23-25.

<sup>5</sup> Na giye zlapay na, ta ndo niye, ane tuk na, ka wu neheye tebiye a zäben däre a neñ aye na, na giye zlapay tã bäle ga dëkdëk tsa.

<sup>6</sup> Tađã a señ mage zlapay na, na tsikiye me andza gər mavuwe bay, wu nakã na tsikiye na, ma tãriye dedëk. Ane tuk na, na giye zlapay bay hãrwi a señ bay nakã ndo ta rãheñye ha gər hãrwi wu neheye na giye ha zlapay aye. A señ tã rãheñ ha gər ðuh na, hãrwi bazlam neheye ñgwalak eye hay tã tsãne abãra mã bazlam ga aye ada tã ñgatay a mede ga.

<sup>7</sup> Hađe na, na giye zlapay hãrwi wu nakã Mbãlom a bãzeñ ha aye. Ane tuk na, Mbãlom a vãleñ nakã ma wuriye fagaya mã bo aye hãrwi ada nã ge zlapay sa bay. Mbãlom a geñ wu niye na, tã hãlay i ndo i maslan i Fakalaw nakã a slãraw hãrwi mãndeđe ga hãrwi ada nã ge zlapay bay.

<sup>8</sup> Madzãga mahkar na ðuwulay naha me a Bãy Maduweñ hãrwi ada mã zla fagaya abãra dãretsãtseh nakay.

<sup>9</sup> Ane tuk na, Bãy Maduweñ a gwedeñ: «Ñgwalak ga na, ðã kar. Hãrwi gãdan ga ma zãbiye na, ahãl nakã nãkar bãle aye.» Kã ge andza niye na, ðãrev ga mañgwasa eye haladzay. Neñ faya na ñgalakiye hãrwi gãdan i Kãriste mandza eye mã neñ.

<sup>10</sup> Hãrwi niye ðãrev ga mañgwasa eye hãrwi nakã neñ bãle eye. Kwa tađã faya ta tsedeñeye, kwa tađã faya ta pãreñeye, kwa tađã dãretsãtseh siye hay faya ta ndzeñeye a gər, kwa tađã wu hay ta zeñ gãdan, na sãr ha faya na giye dãretsãtseh hãrwi Kãriste ada ðãrev ga mañgwasa eye hãrwi ahãl nakã neñ bãle eye na, Kãriste ma vãleñeye gãdan ñgay.

### *Pol a dzala ka ndo mape mãdzal gər hay ka Yesu neheye ma Koriñte aye*

<sup>11</sup> Na tsik me andza gər mavuwe, ane tuk na, maa geñ kutoñ na, nãkurom. Na zambãday a bo ga na, hãrwi nãkurom ka zambãdum ga ha bay. Hađe mata zembede ga ha na, nãkurom na gwãd bãdaw? Neñ wuray kãriye, ane tuk na, ndo i maslan kurom neheye ka gwãdum nãteye bagwar eye hay haladzay aye na, ta ze ga ha bay.

<sup>12</sup> Nãkurom ka sãrum ahãl nakã neñ mã gay kurom aye na, na ge mãsler ta mãzle ñgatay mã dãretsãtseh ada Mbãlom kã ge masuwayañ wal wal haladzay tã hãlay ga. Masuwayañ neheye a ðã ha na, neñ ndo i maslan ñgay ta dedëk.

<sup>13</sup> Na ge wu hay mã gay i ndo mape mãdzal gər hay ka Yesu Kãriste siye hay ada na ge mã gay kurom bay na, andaya ðaw? Wu andaya nãte tsa nakã na ge mã gay kurom bay aye. Na tsãtsah fakuma: «Ndayum ga ha wu mãnday» bay. Kã ge na gakum lele bay na, pãsum ga ha!

<sup>14</sup> Anãke na, mazlambar na diye naha a gay kurom mamahkar eye. Na ye naha na, na tãmiye ka vãlumen wu wal bay. Wu nakã a señ aye na, ðãrev kurom bãna wu kurom hay bay. Andza i wawa hay ta bãba tay hay. Maa vãlatay wu a bãba hay na, wawa tay hay bay. Ðuh maa vãlatay wu a wawa hay na, bãba tay hay.

<sup>15</sup> Kwa tađã na dziye ha wu ga tebiye, kwa tađã na vãliye ha mãsãfãre ga peteh hãrwi madzãne kurom na, a yeñ a gər haladzay. Ass! Ka wudum ga sa bay na, hãrwi nakã na wuđã kurom ka zal aye ðaw?

<sup>16</sup> Na gwãd ka sãrum ha na tsãtsah fakuma vãlumen wu bay! Ane tuk na, ndo siye hay mã walañ kurom tã gwãd: «Pol neñgeye bãbãrek eye, faya ma vakweye gãr.»

<sup>17</sup> Na vakum gãr na, ma kãkay? Na vakum gãr na, ta ndo nãte mã walañ i ndo neheye na slãr tay naha a gay kurom aye tsukudũ, ma kãkay?

18 Na tsətsah ka Titus mâ ye naha a gay kurom. Na slər naha malamar mekeləŋ eye nakə ka sərūm na aye tã ye naha salamay.\* Ti ye naha na, Titus kə vakum gər hərwi məzle suloy kurom dāw? Titus tə neŋ, nəmay salamay mədzal gər may nətə bədaw ada faya nəmaa zəŋgaliye tsəved eye nətə bədaw?

19 Wu nakə nəmaa watsa a dərəwel nakay aye na, agəna ka dzalumeye na watsakum naha hərwi məge me abəra ka bo may kame kurom. Nəmaa tsik na, kame i Mbəlom hərwi nəmay ndo i Kəriste hay. Nəkurom malamar may neheye nəmaa wudā kurom haladzay aye, nəmaa tsikakum wu neheye tebiye na, hərwi a samay madzəne kurom hərwi ada kã gəlum ka tsəved i Mbəlom.

20 Dərev faya ma diye fagaya abəra hərwi na dzala agəna ahəl nakə na ye naha a gay kurom aye, na ndzakumeye a gər nəkurom ka tsəved nakə lele bay aye. Mede kurom ma deyeŋeye a gər bay. Tadə kə ge andza niye na, mede ga ma deyakumeye a gər bay. Agəla na ndzakumeye a gər na, faya ka tərūmeye mə walaŋ kurom, faya ka gumeye ka bo sələk mə walaŋ kurom, faya ka gumeye ka bo mevel, faya ka ŋgənumeye bo, faya ka tsikumeye wu nakə lele bay aye ka ndo hay, faya ka nasumeye ha məzele i ndo siye hay, faya ka dəsulumeye ha gər a bo kurom ada faya ka gumeye wu neheye a ye ta tsəved nakə ŋgwalak eye bay aye.

21 Agəna ahəl nakə na ye naha a gay kurom sa aye na, dərev ga ma ŋgwasiye kame i Mbəlom sa bay. Na dzədzar hərwi na ye naha na, agəna na ndzeyə a gər a ndo i mezeleme hay haladzay mə walaŋ kurom ta gər ha mezeleme bay. Agəla nətəye huya ta giye wu nakə lele bay aye, nətəye faya ta giye madama, faya ta giye wu neheye lele bay aye tebiye. Kə ge andza niye na, na ta tuwiye hərwi tay.

## 13

### *Mandəve i bazlam*

1 Aza na diye naha a gay kurom na, mamahkar eye. Nəmaa giye sariya ka ndo neheye faya ta giye mənese aye ada nəmaa giye andza nakə tə watsa mə Dərəwel i Mbəlom, tə gwad: «Ta ŋgəniye sariya i wu hay tebiye na, ndo məhəle mbal hay sulo kəgəbay mahkar tã ge andaya bəna sariya ma ŋgəniye bay.\*»

2 Mede nakə na ye naha masulo aye na, 6a na tsikatay a ndo neheye faya ta giye mənese ada a ndo siye hay tebiye dərma. Anəke na, na ye naha zuk bay. Na masakumeye naha mətsike wu nakə na tsikakum aye. Aza na ye naha na gəriye ndəray kwa nətə bay tebiye.

3 Maa tsik me tə bazlam ga Kəriste dāw na, na gwad a sakum məsərə ha bədaw? Ka ta sərūmeye ha! Nəŋgeye na bəle eye kame kurom bay, ma giye məsler mə walaŋ kurom ta gədan.

4 Ahəl nakə ta dar na ka mayako mazləlmbadā eye na, dedək nəŋgeye bəle eye. Ane tuk na, kə lətsew abəra ma mədahaŋ, nəŋgeye andaya ta gədan i Mbəlom. Nəmay na, nəmay madzapa eye ta nəŋgeye. Nəmaa haniye ha gər hərwi matərə bəle eye hay. Ane tuk na, aza nəmaa ye naha a gay kurom na, nəmaa bəziye ha nəmay ta məsəfərə ta sifa ŋgay, nəmaa giye məsler ta gədan i Mbəlom.

5 Tsətsahumay a gər kurom, zəbum ka məndze kurom, nəkurom mandza eye andza ndo məpe mədzal gər hay ka Yesu ŋgway dāw? Yesu Kəriste andaya

\* 12:18 Pol kə tsik ka malamar niye tsiy. Zəba 2 Koriñte hay 8.22. eye masulo eye 19.15; Mata 18.16; 1 Timote 5.19; Hebrəe 10.28.

\* 13:1 Zəba mə Bazlam mapala

mə nəkurom na, ka sərum ha bədfaw? Kə ge andza niye bay na, ka dədumeye abəra ka tsəved.

<sup>6</sup> Ane tuk na, kwa kəkay kəkay bəbay na, ka sərumeye ha ta dedek nəmay na, nəmaa dəd abəra ka tsəved bay. Nəmay na, ndo i maslanj i Yesu hay ta dedek.

<sup>7</sup> A samay ndo hay tã gwad famaya, nəmaa ge məsler lele mə gay kurom bay. Wu nakə a samay aye na, nəmaa duwulay naha me a Mbəlom hərwi ada kã gum mənese sa bay. Kwa tadə ndo hay tã gwad nəmaa ge məsler lele mə gay kurom bay na, wu nakə a samay aye na, kã gum ŋwalak.

<sup>8</sup> Nəmaa tsik andza niye na, hərwi nəmaa sliye faya mənese ha bazlam dedek eye bay. Nəmaa sliye faya mäge na, wu nakə dedek eye dəkdek.

<sup>9</sup> Tadə nəkurom gədanj eye ka tsəved i Mbəlom, kwa tadə nəmay bəle eye hay na, dərəv may faya ma ŋwasiye huya. Nəmaa duwulay naha me a Mbəlom hərwi ada mã dzəna kurom ka mægəle ka tsəved ŋgay.

<sup>10</sup> Hərwi niye na watsakum naha dərəwel nakay ka bo abəra anəke na, hərwi ada nã ye naha ɓa ka tsətsahum məpəse me tsiy na, na tərakumeye sa bay. Ta dedek Mbəlom kə vələnj tsəved ka matərakum hərwi ada nã nas kurom ha duh bay, ane tuk na, hərwi ada nã dzəna kurom ka mægəle kame kame.

<sup>11</sup> Malamar ga hay, anəke na, na ndəv ha bazlam ga kananj! Pəlum mægəle ka tsəved i Mbəlom, vələm gədanj a bo mə walanj kurom nəte nəte, ndzum ayaw ayaw mə walanj kurom, ndzum ka təv manəte eye tə zay. Ada Mbəlom, neŋgeye nakə a wudā ndo hay aye ada faya ma vələteye zay a ndo hay aye, ma gakumeye gər.

<sup>12</sup> Tsikum me a bo lele mə walanj kurom nəte nəte andza malamar hay. Ndo məpay bəzay a Mbəlom hay tebiye kananj ta tsikakum naha me.

<sup>13</sup> Bəy Maduweŋ kway Yesu Kəriste mã pa fakuma ŋgama. Mbəlom mã rahakum ha dərəv kurom tã mawudə bo ŋgay. Məsəfərə Tsədanjja eye mã dzapakum ha dərəv kurom hay nəte nəte.

## Derewel **nakə Pol a watsatay naha a** **Galat hay** **aye** **Məfələkwe**

Derewel i Pol nakə a watsatay naha a Galat hay aye na, a tsikatay naha a məhay gər i ndo məpe mədzal gər hay ka Yesu neheye ta diye i tsakay i Turki nakə anəke aye. Pol a pa gay i mađuwule me a həlay mahəhele ngay masulo eye ta mahkar eye. Ma dəba ngay na, ndo mekeləy eye hay ti yaw tə labara wal abəra ka bəmalə i Pol.

Ma Galat na, slala i ndo hay wal wal: Yahuda neheye ta təra ndo məpe mədzal gər hay ka Yesu aye tə siye i ndo neheye ti yaw abəra mə kule mekeləy eye mə dəma andza ma təv siye hay dərmak.

Pol faya ma gwafateye na, ka ta ndziye ta Mbəlom na, məndze yak mā ge lele ada ngwalak eye. A tsik niye na, tə gər i bazlam hay wal wal mahkar.

Ka madədo 1 ta 2 na, a təkər wu nakə a ge bo ka gər ngay aye.

Ka madədo 3 ta 4, Pol a ge me abəra ka labara ngay ta mətsike wu nakə a tsik ma Dzam Guram eye aye.

Ka madədo 5 ta 6. Pol a dā ha ma kəkay nakə ndo məpe mədzal gər hay ka Yesu Kəriste, nəteye ta təmaw abəra ma beke i bazlam mapala eye.

<sup>1</sup> Maa watsakum naha derewel nakay na, ney Pol. Ney ndo i maslan i Yesu. Ney ndo i maslan i ndo hay bay, maa slər ga ha na, ndo hay bay. Maa slər ga ha na, Yesu Kəriste eye tə gər ngay ta Mbəlom Bəba kway nakə a lətse ahaya abəra ma mədahanj aye.

<sup>2</sup> Malamar siye hay tə ney kananj tebiye nəmaa tsikakum naha me a nəkurom ndo məpe mədzal gər hay ka Yesu Kəriste neheye mahaya gər eye ka dala i Galat aye.

<sup>3</sup> Mbəlom Bəba kway ta Bəy Maduwej kway Yesu Kəriste tā pa fakuma ngama ada tā vəlakum zay.

<sup>4</sup> Bəy Maduwej Yesu Kəriste kə vəl ha gər ngay, a mət na, hərwi ada Mbəlom mā pəsakway ha mezeleme kway hərwi ada wu i məndzibəra neheye lele bay aye tā ge bəy ka gər kway sa bay. A ge na, andza nakə a say a Mbəlom Bəba kway mā ge aye.

<sup>5</sup> Zambadəkway a Mbəlom ka tor eye. Mā ge bo andza niye!

### *Labara ngwalak eye na, nəte ngwej*

<sup>6</sup> Wu nakə nəkurom faya ka gumeye na, a geñ hərəbəkka! Mbəlom kə zalakum hərwi kâ tərūm ndo ngay hay ada kə gakum ngwalak kəriye tə həlay i Yesu Kəriste. Ane tuk na, nəkurom faya ka mbədumeye dəba ta bəse tsa, ka pumeye bəzay a labara mekeləy eye nakə ka dzalum mə gər kurom ngwalak eye, ane tuk na, ngwalak eye bay.

<sup>7</sup> Labara ngwalak eye na, nakə na tsikakum aye bəna, mekeləy eye nakə a yaw abəra ka təv i Mbəlom sa aye na, andaya bay. Na tsikakum andza niye na, hərwi ndo hay andaya faya ta kwasakumeye ha mədzal gər, a satay mənese ha ada mambəda ha Labara Ngwalak eye i Kəriste.

<sup>8</sup> Tadə ndoweye a tsikakum labara mekeləy eye wal abəra ka bəmalə nakə nəmaa tsikakum aye, kwa tadə nəmay, kwa tadə gawla i Mbəlom na, Mbəlom mā vəlay mezeleme.



<sup>9</sup> Ba nəmaa tsikakum tsiy, ada anəke na maseye mətsikakum naha sa. Tadə ndoweye kə tsikakum labara mekelej eye wal abəra ka bəmalə nakə ka tsənum aye na, Mbəlom mā vəlay mezeleme.

<sup>10</sup> Ka dzalum mə gər kurom na tsik andza niye na, hərwi ada ndo hay tâ dəslej ha gər daw? A'ay! Andza niye bay. A seŋ na, Mbəlom neŋgeye mâ dəslej ha gər. Ka dzalum mə gər kurom na, a seŋ neŋ nâ yatay a gər a ndo hay daw? A'ay! Tadə a seŋ nâ yatay a gər a ndo hay sa na, na sliye faya matəre ndo i məsler i Kəriste bay.

*Pol a da ha ma kəkay nakə a təra ndo i maslaŋ i Yesu Kəriste aye*

<sup>11</sup> Malamar ga hay, sərūm ha na, Labara Nŋwalak eye nakə faya na diye ha aye, a yaw abəra mə bazlam i ndo hay bay.

<sup>12</sup> Na tsəne abəra ka ndo hay bay, ada maa tətiken na, ndo hay wal bay sa tsa. Yesu Kəriste eye tə gər ŋgay a deŋ ha.\*

<sup>13</sup> Mede ga nakə ahəl niye aye na paway bəzay a kule i Yahuda ma kəkay na, ka tsənum. A həlay niye na, na gawatay dəretsətseh a məhay gər i ndo məpe mədzal gər hay ka Yesu ka zal naha haladzay. Na pəlawə tsəved ka mədze tay ha.

<sup>14</sup> Mə walaŋ i ndo neheye məve may nətə aye na, na ze tay ha siye i ndo may hay tə məpay bəzay a kule may Yahuda hay. Na vəlaway ha bo ga peteh a kule i bəba tətə may hay.

<sup>15</sup> Ane tuk na, Mbəlom kə zla ga. A zla ga na, kwa ahəl nakə ta wa ga zuk bay aye. Kə geŋ ŋwalak ŋgay, a zelen hərwi ada nâ ge məsler ŋgay a həlay nakə a yay a gər aye.

<sup>16</sup> A bəzeŋ ha wawa ŋgay mə neŋ hərwi ada nâ da ha Labara Nŋwalak eye nakə a tsik ka neŋgeye a ndo neheye nətəye Yahuda hay bay aye. Ahəl nakə a bəzeŋ ha aye na, nəmaa ge faya mahəmba ta ndəray bay.

<sup>17</sup> Na ye a Zerozelem mata tsike me ta ndo neheye nətəye tə leheŋ matəre ndo i maslaŋ i Yesu hay aye na, na ye ka təv tay bay. Na ye duh kwayaŋŋa, na ye ka dala i Arabi. Ma dəba aye, na maw na ye a Damas.

<sup>18</sup> Məve mahkar a ye abəra mə dəma na, na ye a Zerozelem hərwi ada nâ ŋgatay a Piyer. Nəmaa ndza ta neŋgeye na, məhəne kuro gər eye zlam tsa.†

<sup>19</sup> Na ŋgatay na, a Yakuba malamar i Bəy Maduweŋ kway Yesu Kəriste bəna, na ŋgatay a ndo i maslaŋ i Yesu mekelej eye bay.

<sup>20</sup> Mbəlom a sər wu nakə na tsik aye na, dedək, na raw me bay.

<sup>21</sup> Ma dəba eye na ye ka dala i Siri ada a Silisi.

<sup>22</sup> Ahəl niye na, məhay gər i ndo məpe mədzal gər hay ka Yesu Kəriste neheye ka dala i Yahuda aye na, tə sər ga ha zuk bay.

<sup>23</sup> Tə tsənawa wu neheye siye i ndo hay tə tsikawa fagaya, tə gwadawa: «Ndo nakə ahəl niye a gawa kway dəretsətseh aye na, ka mbəda. Duh anəke faya ma diye ha Labara Nŋwalak eye a ndo hay tuk. Ahəl niye na, a pəlawə tsəved ka mədze ha ndo neheye tə dzala ha ka Yesu aye.»

<sup>24</sup> Ta zambafay a Mbəlom hərwi ga.

## 2

*Ta təma Pol ma Zerozelem*

<sup>1</sup> Ma dəba i məve kuro gər eye fad na, neŋ ta Barnabas, nəmaa ye a Zerozelem sa. Na zla na Titus ka həlay dərmak.

\* **1:12** Zəba mə Məsler hay 9.3-6. † **1:18** Sefas na, məzele i Piyer ndo i maslaŋ i Yesu Kəriste.

<sup>2</sup> Na mbəda gər a dəma na, hərwi Mbəlom ka bəzeŋ ha, a gwedeŋ «do». Na ndisl naha a dəma na, nəmaa haya gər ta bagwar i ndo məpe mədzal gər hay ka Yesu əzad abəra ka ndo hay mahəmeye. Na datay ha Labara Nğwalak eye nakə faya na datay ha a ndo neheye nəteye Yahuda hay bay aye. Ağəna ta dzaliye na, məsler ga nakə ahəl niye ta məsler ga nakə faya na giye a təra kəriye.

<sup>3</sup> Titus nakə nəmaa ye salamay aye na, neŋgeye ndo i Gərek, ane tuk na, ta gay kutoŋ ka mədəse bo hərwi məpay bəzay a bazlam i Musa mapala eye na, ta gay bay.

<sup>4</sup> Ane tuk na, ndo i maraw me hay tə yaw a walaŋ may ta bəbərek tay, a satay mə dəs bo. Tə fələkwaw ta məkal hərwi mazəbe ka tsəved kway nakə ka ləvəkwa gər kway hərwi nəkway madzapa eye tə Yesu Kəriste aye. A satay na, kə tərakwa beke i bazlam i Musa mapala eye sa.

<sup>5</sup> Ane tuk na, nəmaa vəlatay tsəved kwa tsekweŋ bay tebiye. A samay na, Labara Nğwalak eye mə ye kame huya ta dedək nakə ada ka tsənumeye dərmak aye.

<sup>6</sup> Ndo neheye tə gwad nəteye bagwar eye hay aye, kwa tadə nəteye bagwar eye hay, kwa tadə nəteye bagwar eye hay bay, məndəre ga mey tey. Ka dəre i Mbəlom ndo hay na, tə ləva nəte. Ahəl nakə faya na tsikiye wu nakə na dawa ha a ndo hay aye na, ndo neheye bagwar eye ta səkeheŋ ha faya wuray ka bazlam ga nakə na dawa ha aye bay.

<sup>7</sup> Azlakwa bay tə sər ha duh na, Mbəlom kə vəleŋ Labara Nğwalak eye, a gwedeŋ do ta datay ha a ndo neheye nəteye Yahuda hay bay aye andza nakə a tsikay ahəl niye a Piyer, a gwaday do ta datay ha a Yahuda hay aye.

<sup>8</sup> Tə sər ha Mbəlom nakə a vəlay gədaŋ a Piyer ada a təra ha ndo i maslaŋ i Yahuda hay aye na, neŋgeye Mbəlom nakə a vəleŋ gədaŋ ada a slər ga ha ka təv i ndo neheye nəteye Yahuda hay bay aye na, huya neŋgeye.

<sup>9</sup> Yakuba ta Piyer ta Yuhana na, ndo məpe mədzal gər hay ka Yesu tə sər ha nəteye ndo məndzatay kame, tə sər ha ta dedək Mbəlom kə vəleŋ məsler nakay a həlay. Hərwi niye tə gəseŋ həlay a neŋ ada a Barnabas. Andza məgwede nəmay tebiye bazlam may nəte. Andza niye nakə nəmay tebiye bazlam may a ye ka bo ta nəteye aye. Nəmay nəmaa diye ka təv i ndo neheye nəteye Yahuda hay bay aye ada nəteye na, ta giye məsler mə walaŋ i Yahuda hay.

<sup>10</sup> Wu nakə ta tsətsah famaya nəmaa giye na, nəte tsa. Wu niye na, na vəl ha bo ga ka məge dərmak. Tə gwadamay nəmaə dzəna ndo i mətawak neheye mə walaŋ i ndo məpe mədzal gər hay ka Yesu ma Zerozelem aye.

### *Pol a may ha maŋgok a Piyer ma Aŋtiyos*

<sup>11</sup> Ma dəba eye na, Piyer a yaw a Aŋtiyos, na gay me kame i ndo hay hərwi a ge wu nakə lele bay aye.

<sup>12</sup> Kurre na, neŋgeye ta ndo məpe mədzal gər hay ka Yesu neheye nəteye Yahuda hay bay aye tə ndayawa wu mənday ka təv manəte eye. Aza ma dəba eye na, Yakuba a sləraw ndo hay a təv may. Ahəl nakə tə ndislew, Piyer a ŋgatatay na, a dazlay madayaw abəra mə walaŋ tay, kə nda wu mənday ta nəteye sa bay. A dzədzar ta ndo neheye tə gwad ndo hay tebiye tə dəs bo aye.

<sup>13</sup> Siye i Yahuda neheye tə pa mədzal gər ka Yesu andza Piyer aye dərmak. Kwa bo i Barnabas eye tə gər ŋgay a ge andza niye dərmak. Tə ge ta məvatay gər.

<sup>14</sup> Na zəba faya na, tə pay bəzay a dedək i tsəved i Labara Nğwalak eye bay na, na tsikay a Piyer kame tay tebiye, na gwaday: «Nəkar ndo i Yahuda, ane tuk na, məndze yak nakə ka ndza kanaŋ aye na, andza ndo neheye nəteye

Yahuda hay bay aye. Ka ndza andza nakar Yahuda hay bay. Kə ge andza niye na, a saka ndo neheye nateye Yahuda hay bay aye tā ndza andza nateye Yahuda hay na, hərwi mey?»

*Ka təmakweye na, ta məpe mədzal gər kway ka Yesu Kəriste*

<sup>15</sup> Nəkway na, tə wa kway Yahuda hay bəna nəkway ndo i slala i siye i ndo neheye tə sər bazlam i Mbəlom mapala eye bay aye bay.

<sup>16</sup> Ane tuk na, kwa andza niye bəbay na, ka sarakwa ha ndəray ma sliye matəre tsədanja kame i Mbəlom bay, say ndo nakə kə pa mədzal gər ngay ka Yesu Kəriste aye. Bəna ndo nakə faya ma pay bəzay a bazlam i Musa mapala eye na, ma təriye tsədanja bay. Nəkway bəbay ka dzalakwa ha ka Yesu Kəriste nakə ada Mbəlom a təma kway andza ndo neheye nateye ngwalak eye kame ngay aye. Bəna hərwi nakə ka pakway bəzay a bazlam i Musa mapala eye bay. Ndəray ma sliye faya matəre ngwalak eye kame i Mbəlom hərwi nakə faya ma pay bəzay a bazlam i Musa mapala eye bay.\*

<sup>17</sup> Andza niye, nəmay Yahuda hay a samay matəre ngwalak eye hay kame i Mbəlom na, hərwi nakə nəmaa pa mədzal gər may ka Yesu Kəriste aye. Kə ge nəmay andza niye na, nəmaa təra andza ndo neheye ka zalakway ndo i mezeleme hay hərwi faya ta pay bəzay a bazlam i Musa mapala eye sa bay aye. Niye na, andza məgwede Kəriste faya ma diye may ha a mezeleme daw? Kwa tsekweŋ andza niye duh bay!

<sup>18</sup> Maga eye na, andza nakay duh: Tadə ndoweye kə gər ha məpay bəzay a bazlam i Musa mapala eye hərwi nakə ma təriye ha ngwalak eye bay aye, ada ma dəba eye a mbəda gər məpay bəzay sa, a zəba faya andza wu nakə ngwalak eye sa. Niye a ge na, wu nakə a yay a gər a Mbəlom bay aye.

<sup>19</sup> Neŋ na mət na, hərwi bazlam i Musa mapala eye. Neŋ kame ngay na, andza ndo nakə maməta eye aye. A ge bo andza niye na, hərwi ada nā ge andaya ta sifa kame i Mbəlom. Ahəl nakə ta dar na Kəriste ka mayako mazləmbada eye na, neŋ madzapa eye tə neŋgeye, nəmaa mət ka bo salamay.†

<sup>20</sup> Neŋ na, sifa nakə anəke na ndziye ha aye na, i ga bay, mandza eye mə neŋ na, Kəriste. Məndze ga nakə na ndziye ka məndzibəra anəke aye na, na ndziye hərwi nakə na dzala ha ka neŋgeye Wawa i Mbəlom nakə a wuda ga aye ada a vəl ha gər ngay hərwi ga aye.

<sup>21</sup> Neŋ na, dāda na kərahiye ngwalak i Mbəlom nakə a geŋ aye ta məme a bazlam i Musa mapala eye bay. Tadə ta dedək ndoweye ma təriye tsədanja kame i Mbəlom hərwi faya ma pay bəzay a bazlam i Musa mapala eye na, niye na, Kəriste a mət kəriye, kə ge ngama bay. Duh andza niye bay!

### 3

*Bazlam i Musa mapala eye ta məpe mədzal gər ka Yesu*

<sup>1</sup> Nəkurom Galat hay, maa zla fakuma abəra metsehe na, mey? Maa ndzək kurom way? Na dəkum ha parakka lele hərwi ada kə tsənum ma kəkay nakə Yesu Kəriste a mət ka mayako mazləmbada eye.

<sup>2</sup> Na tsətsahiye fakuma wu nate. Məsəfəre Tsədanja eye nakə Mbəlom a vəlakum aye na, a vəlakum na, hərwi nakə faya ka pumay bəzay a bazlam

\* **2:16** Dəmes hay 143.2; Roma hay 3.20, 23. † **2:19** Ahəl niye hərwi madayay a gər a Mbəlom ada matəre ngwalak eye kame ngay na. Pol a paway bəzay a bazlam i Musa mapala eye. A pa mədzal gər ka Yesu Kəriste na, a zəba faya bazlam i Musa mapala eye ma təriye ha ndo ngwalak eye bay. Hərwi niye a gər ha məpay bəzay a bazlam i Musa mapala eye.

i Yahuda hay mapala eye daw? A'ay, Mbəlom a vəlakum Məsəfəre Tsədanŋa eye na, hərwi nakə ka tsənum Labara Ŋgwalak eye ada ka dzalum ha faya aye, na gwad ba?

<sup>3</sup> Metsehe andaya fakuma bay na, hərwi mey? Ka dazlumay ahəl niye na, ta gədan i Məsəfəre Tsədanŋa eye. Nəke a sakum mandəv ha ta gədan kurom eye na, ma kəkay?

<sup>4</sup> Wu neheye tebiye a ndzakum a gər aye ka dzalum na, kəriye tsa daw? Ta dedək ma təriye kəriye tsa bay.

<sup>5</sup> Mbəlom a vəlakum Məsəfəre ŋgay ada a ge masuwayan hay mə walaŋ kurom na, hərwi nakə ka pumay bəzay a bazlam i Yahuda hay mapala eye daw? A'ay, a ge na, hərwi nakə ka pumay zləm a Labara Ŋgwalak eye ada ka pum mədzal gər kurom ka Kəriste aye.

<sup>6</sup> Wu nakə bazlam i Mbəlom a tsik ka Abraham aye na, məmum ahaya a gər, a gwad: «Abraham a dzala ha ka Mbəlom, hərwi niye Mbəlom a tərə ha ndo i dedək kame ŋgay.\* »

<sup>7</sup> Niye na, andza məgwede, wawa i Abraham dedək eye hay na, ndo neheye tə dzala ha ka Mbəlom aye.

<sup>8</sup> Tə watsa kurre mə Derewel i Mbəlom, a gwad: «Mbəlom ma təmiye ndo neheye nəteye Yahuda hay bay aye, ma piye tay ha nəteye ŋgwalak eye hay kame ŋgay. Niye na, hərwi ta dzala ha ka nəngeye.» Abraham a tsəne Labara Ŋgwalak eye nakay na, kurre. Mbəlom a gwad: «Na piye ŋgama ka ndo i mändzibəra hay tebiye hərwi yak.†»

<sup>9</sup> Andza nakə ahəl niye Mbəlom a pa ŋgama ka Abraham hərwi nakə a dzala ha ka Mbəlom aye na, Mbəlom ma piye ŋgama ka ndo neheye tebiye tə dzala ha ka nəngeye andza niye dərmak.

<sup>10</sup> Ndo neheye tə dzala, tə gwad ta təriye ŋgwalak eye hay kame i Mbəlom ta məge wu nakə bazlam i Musa mapala eye a tsik aye na, Mbəlom ma vəlateye mezeleme. Andza niye, tə watsa a Derewel i Mbəlom na, a gwad: «Ndowe ye kə pay bəzay a wu neheye mawatsa eye mə Derewel i Musa aye pat pat bay na, Mbəlom ma vəleye mezeleme.‡»

<sup>11</sup> Ka sərakwa ha bazlam i Musa mapala eye ma sliye matəre ha ndo ŋgwalak eye kame i Mbəlom bay. Ka sərakwa ha na, hərwi tə watsa mə Derewel i Mbəlom na, tə gwad: «Ndo nakə kə dzala ha ka Mbəlom aye na, Mbəlom ma təriye ha ŋgwalak eye ka dəre ŋgay, ada ma hutiyə sifa.§»

<sup>12</sup> Ane tuk na, məpay bəzay a bazlam i Musa mapala eye na, wal ta məpe mədzal gər ka Mbəlom. Duh andza nakə tə watsa a Derewel i Mbəlom aye na, tə gwad: «Ndo nakə kə pay bəzay tebiye a bazlam mapala eye na, ma hutiyə sifa dedək eye tə nəngeye.\* »

<sup>13</sup> Andza niye Mbəlom a vəlakway mezeleme na, hərwi nakə ka pakway bəzay a bazlam i Musa mapala eye peteh bay aye. Ane tuk na, Kəriste a yaw, a zla təv mändze kway hərwi ada Mbəlom mə vəlay mezeleme a nəngeye a bəram kway. A ge andza niye na, a səkəma kway ahaya hərwi ada Mbəlom mə vəlakway mezeleme sa bay. Andza nakə tə watsa a Derewel i Mbəlom aye, tə gwad: «Ndo nakə ta dar na ka mayako aye na, Mbəlom kə vəlay mezeleme.†»

<sup>14</sup> Yesu Kəriste a ge andza niye na, hərwi ŋgama nakə Mbəlom a tsikay a Abraham kurre a gwaday «na ta vəlakeye» na, ndo neheye nəteye Yahuda hay bay aye ta hutiyə tə həlay i Yesu Kəriste dərmak. A ge andza niye na,

\* 3:6 Madazlay i wu hay 15.6. † 3:8 Madazlay i wu hay 12.3. ‡ 3:10 Bazlam mapala eye masulo eye 27.26. § 3:11 Habakuk 2.4. \* 3:12 Levitik 18.5; Roma hay 10.5. † 3:13 Bazlam mapala eye masulo eye 21.23.

hərwi ada nəkway kâ hutakwa Məsəfəre nakə Mbəlom a tsik kurre a gwad ma vəlakweye hərwi nakə ka pakwa mədzal gər kway ka neŋgeye aye.

*Bazlam i Musa mapala eye ma nasiye ha wu nakə Mbəlom a gwad ma vəliye aye bay*

<sup>15</sup> Malamar ga hay, na dākumeye ha wu nakay tə wu neheye ka ŋgatawakway pat pat aye. Tadə ndo hay sulo tə ndza ka təv manəte eye, tə ma ha ka bo bazlam ada tə ɓar dzam mə walaŋ tay na, ndo andaya ma sliye faya məpəla tay ha dāw? Ndəray ma sliye faya masəkah ha faya wuray bay dərmak.

<sup>16</sup> Dzam nakə Mbəlom a ɓar aye dərmak andza niye. Mbəlom a tsik kurre, a gwad ma vəliye wu neheye na, a Abraham. Kə tsik, a gwad ma vəliye a hulfe ŋgay dərmak. Ta watsa mə Derewel i Mbəlom, Mbəlom ma vəliye wu neheye a Abraham ada a hulfe ŋgay hay na, andza niye bay. Tə tsik bazlam niye na, ka hulfe nətə tsa. Hulfe niye na, Kəriste.‡

<sup>17</sup> Wu nakə a seŋ mətsike aye na, anaŋ: Mbəlom a ɓar dzam ta Abraham kurre. Ma dəba i məve temerre faɗ tə kuro kuro mahkar na, Mbəlom a vəl bazlam mapala eye a Musa. Andza niye, bazlam i Musa mapala eye ma sliye məpəle ha dzam nakə Mbəlom a ɓar ta Abraham kurre aye bay, wu nakə a tsik, a gwad ma vəliye na, ma sliye faya məneşe ha bay.

<sup>18</sup> Tadə Mbəlom ma vəliye wu a ndo hay hərwi nakə faya ta pay bəzay a bazlam i Musa mapala eye na, andza məgwede ma vəliye hərwi kə gwad ma vəliye sa bay. Ane tuk na, Mbəlom a pa ŋgama ka Abraham na, hərwi nakə a tsikay kurre a gwadaɗy ma ta giye andza niye aye.

*Mbəlom a vəlakway bazlam mapala eye na, hərwi mey*

<sup>19</sup> Tadə kə ge andza niye na, Mbəlom a vəl bazlam mapala eye a Yahuda hay na, hərwi mey? Mbəlom a vəlamay na, hərwi ada kâ sərakwa ha wu neheye lele bay kame ŋgay aye. A vəl na, ka təmad eye hus ahəl nakə hulfe i Abraham ki yaw aye, ndo nakə Mbəlom a gwad ma ta vəleye wu niye aye. Ma dəba eye na, gədanj i bazlam mapala eye andaya sa bay. Mbəlom a vəl bazlam mapala eye a gwala ŋgay hay na, hərwi ada tã yaw, tã ɗay ha a Musa ada Musa mã datay ha a Yahuda hay.‡

<sup>20</sup> Ndo məma ha bazlam neŋgeye na, mə walaŋ i bərək hay sulo huya, ane tuk na, ahəl nakə Mbəlom a gwadaɗy a Abraham na ta vəlakeye wu aye na, a ge neŋgeye mahəŋgeye bəna ndəray andaya mə walaŋ tay bay.\*

<sup>21</sup> Andza məgwede na, wu nakə Mbəlom a gwad ma vəliye na, a say a bazlam mapala eye bəɗaw? A'ay, andza niye bay. Tadə kə ge bazlam mapala eye nakə Mbəlom a vəl aye ma vəliye sifa a ndo hay na, haɓe ma sliye məge tay ha ndo hay ŋgwalak eye hay kame i Mbəlom, ane tuk na, bazlam mapala eye andaya andza niye bay.

<sup>22</sup> Azlakwa dūh tə watsa mə Derewel i Mbəlom na, tə gwad: Ndo i məndzibəra hay tebiye nətəye mə həlay i mezeleme. A ge andza niye na, hərwi ada Mbəlom mã vəl wu nakə a gwad ma vəlateye a ndo neheye tə pa mədzal gər tay ka Yesu Kəriste aye. A vəlatay na, hərwi nakə tə dzala ha ka Yesu Kəriste aye tsa.

<sup>23</sup> Ahəl niye na, tsəveɗ andaya hərwi ada ndo hay tã dzala ha ka Yesu zuk bay, bazlam i Musa mapala eye a ləva kway. Bazlam i Musa mapala eye a ləva kway hus a həlay nakə Mbəlom a dākway ka tsəveɗ i mədzal ha ka Kəriste aye.

‡ 3:16 Madazlay i wu hay 12.7. § 3:19 Ka kule i Yahuda hay na, Mbəlom a ɗay ha bazlam ŋgay mapala eye a Musa tə həlay i gawla ŋgay hay. Musa neŋgeye ndo məme ha mə walaŋ i gawla i Mbəlom hay ta Yahuda hay. \* 3:20 Zəba mə Bazlam mapala eye masulo eye 6.4.

<sup>24</sup> Andza niye, bazlam i Musa mapala eye a tæra andza ndo matsæpe kway hus a hælai nakæ Kæriste ma deyeweye aye. Bazlam mapala eye a tæra ahæl niye na, andza niye, hærwi ada Kæriste ki yaw na, ka tærakweye ngwalak eye hay kame i Mbælom. Niye na, hærwi ka dzalakwa ha ka neŋgeye.

<sup>25</sup> Anæke na, Mbælom ka hændækakway tsæved i mædzal ha ka Kæriste, bazlam i Musa mapala eye ma tsæpiye kway sa bay.

<sup>26</sup> Anæke na, nækurom madzapa eye tæ Yesu Kæriste, nækurom tebiye wawa i Mbælom hay hærwi ka dzalum ha ka neŋgeye.

<sup>27</sup> Neheye tebiye tæ dzapa tæ Kæriste mæ madzæhuþe tay ha nakæ ta dzæhuþ tay ha aye na, ta mbæda, mændze tay a ndzækit bo i Kæriste.

<sup>28</sup> Tadæ agæna nækar Yahuda, kægæbay nækar Yahuda bay na, ma giye wuray bay. Tadæ nækar beke, kægæbay beke bay na, ma giye wuray bay. Kwa tadæ nækar haslakæ eye, kwa tadæ nækar ngwas eye, ma giye wuray bay. Nækurom tebiye næte hærwi nækurom madzapa eye tæ Yesu Kæriste.

<sup>29</sup> Kæ ge nækurom madzapa eye tæ Kæriste na, andza mægweðe nækurom dærmak ma hulfe i Abraham. Ka ta hutumeye wu neheye tebiye Mbælom a tsik ahæl niye a gwad ma væleye a Abraham ada a hulfe ngay hay aye.

## 4

<sup>1</sup> Wu nakæ a seŋ mætsikakum aye na, anarj: Maga eye na, andza wawa nakæ ma ndiye gay i bæba ngay aye. Ahæl nakæ neŋgeye wawa eye mba kwa tadæ wu i bæba ngay tebiye i ngay bæbay na, neŋgeye andza beke.

<sup>2</sup> Ahæl nakæ neŋgeye wawa eye mba aye na, ndo hay ta geye gær, ta geye gær a wu ngay hay dærmak hus a mæpesle hælai i bæba ngay nakæ ma ndisliye a dæma aye.

<sup>3</sup> I kway andza niye dærmak. Ahæl nakæ nækway andza wawa hay mba aye na, nækway beke i mæsæfære neheye ngwalak eye bay neheye faya ta læviye mændzibæra aye.

<sup>4</sup> Ane tuk na, ahæl nakæ mæpesle i hælai i Mbælom a ndisl a dæma aye na, a slæraw wawa ngay. Ngwas a wa na. A pay bæzay a bazlam i Musa mapala eye lele.

<sup>5</sup> Hærwi ada mâ tæma tay ha ndo neheye næteye beke i bazlam i Musa mapala eye ada kâ tærakwa wawa i Mbælom hay.

<sup>6</sup> Wu nakæ ka særakweye ha ta dedek nækway wawa ngay hay aye na, anarj: Mbælom a slæraw Mæsæfære i wawa ngay a dærev kway. Mæsæfære niye faya ma zaleyæ a Mbælom mæ dærev kway, «*Abba, Bæba ga.*»

<sup>7</sup> Andza niye, nækurom beke i fakalaw hay sa bay, nækurom wawa i Mbælom hay düh. Sa tsa na, ka hutumeye wu neheye ma vælateye a wawa ngay hay aye dærmak hærwi nækurom wawa ngay hay.

### *A say a Pol na, Galat hay tâ ma ka tsæved ngwalak eye*

<sup>8</sup> Ahæl niye Mbælom neŋgeye way ta dækum ha zuk bay na, nækurom beke i wu hay wal wal ada wu niye hay na, Mbælom nakæ dedek aye bay.

<sup>9</sup> Anæke na, ka særum Mbælom, a seŋ mægweðe düh na, Mbælom a sær kurom. Ass! Ka mbædumeye gær mæpay bæzay a wu neheye kæriye gædan andaya mæ dæma bay aye sa na, ma kækay? A sakum matære beke i wu neheye sa na, hærwi mey?

<sup>10</sup> Ka pum mædzal gær kurom na, ka mæhæne hay, ka kiye hay, mæve hay, neheye tebiye hælai eye kæ sla a dæma na, ka gawum magurloom.

<sup>11</sup> Mændze kurom na, a dzædzar ga ha. Agæna mæsler ga nakæ na ge mæ walaŋ kurom aye na, a tæra kæriye.

12 Malamar ga hay, neŋ na tɛra andza nɛkurom neheye Yahuda hay bay aye. Neŋ faya na gakumeye amboh, tɛrum andza neŋ. Ka gumenŋ mɛnese kwa tsekweŋ bay.

13 Nɛkurom ka sɛrum ha makurre eye bo a geŋ nakɛ na ndza mɛ walaŋ kurom hɛrwi mɛdakum ha Labara Ngwalak eye aye.

14 Dɛvats ga kɛ sakum dɛretsɛtseh haladzay. Ane tuk na, kwa andza niye bɛbay na, ka zɛbum fagaya andza wu kɛriye wal bay, ka hɛharum ga bay. Duh ka tɛmum ga lele andza neŋ na, gawla i Mbɛlom, ada ka tɛmum ga sa na, andza neŋ na, Yesu Kɛriste eye tɛ gɛr ŋgay.

15 A hɛlay niye na, dɛrev kurom kɛ ŋgwasa haladzay. Ada dɛrev kurom a ŋgwasa anake sa bay na, hɛrwi mey? Ahɛl niye neŋ tɛ gɛr ga na sɛr ha tadɛ tsɛved andaya mɛŋgwede na dɛre kurom na, atay na, ka ŋgwadum ka vɛlumenŋ.

16 Anɛke ka zlum ga andza ndo mɛne dɛre kurom na, hɛrwi nakɛ na tsikakum dedek aye dɛw?

17 Ndo neheye tɛ tsik me ada ta mbɛda ha Labara Ngwalak eye na, tɛ ge mɛsler ta tsɛtsɛb eye mɛ walaŋ kurom. Ane tuk na, wu nakɛ tɛ dzala faya mɛge aye na, lele bay. Faya ta giye andza niye na, hɛrwi ada kɛ gɛrum ga ha ada kɛ gum tsɛtsɛb ka mɛpatay bɛzay a nɛteye.

18 Lele haladzay nakɛ ndo hay ta giye tsɛtsɛb hɛrwi ndo siye hay aye. Tadɛ ta giye andza niye huya na, lele. Tadɛ nɛkway dziye kɛgɛbay neŋ dɛrenŋ tɛ nɛkurom na, a seŋ ndzum tɛ neŋ huya.

19 Nɛkurom na, wawa ga neheye na wuda kurom haladzay aye. Neŋ andza ŋgwas nakɛ faya ma wiye wawa aye. Faya na siye dɛretsɛtseh ada ma wuriye fagaya andza niye hus ka tɛv nakɛ mɛdzal gɛr kurom ka tɛra andza i Kɛriste aye.

20 A seŋ tɛ dɛrev ga pɛteh mede naha ka tɛv kurom anɛke hɛrwi ada nɛ sɛr mɛtsikakum wu neheye. Dɛrev faya ma diye fagaya abɛra hɛrwi kurom.

### *Agar ta Sara*

21 A nɛkurom neheye a sakum mɛpay bɛzay a bazlam i Musa mapala eye, tsikumenŋ: Ka tsɛnum wu nakɛ Derewel i Musa a tsik aye tɛbɛdew.

22 Tɛ watsa mɛ Derewel i Mbɛlom na, tɛ gwad: Abraham na, wawa ŋgay hay sulo. Neŋged na, beke a wa, wawa neŋged ŋgwas nakɛ beke eye bay aye a wa. ŋgwas nakɛ beke eye aye na, tɛ zalay Agar. ŋgwas nakɛ beke eye bay aye na, tɛ zalay Sara.\*

23 Wawa i beke na, tɛ wa ta mɛdzal gɛr i slo i bo tay, ane tuk na, wawa i ŋgwas nakɛ beke eye bay aye a wa na, hɛrwi wu nakɛ Mbɛlom a tsikay a Abraham kurre, a gwadɛy na vɛlakeye aye.†

24 Bazlam nakay na, a say mɛdakway ha wu andaya. ŋgwas neheye sulo aye na, a ndzakit ha bo ta dzam neheye Mbɛlom a ɛar aye. Agar, ŋgwas beke eye na, a ndzakit bo ta dzam nakɛ Mbɛlom a ɛar tɛ Musa mɛ mahɛmba i Sinay aye. Wawa neheye ta wiye tay ma dzam niye na, nɛteye beke i bazlam i Musa mapala eye.

25 Agar na, neŋgeye andza mahɛmba i Sinay nakɛ ka dala i Arabi aye. Neŋgeye na, andza gɛma i Zerozelem nakɛ anɛke aye darmak hɛrwi gɛma niye ta ndo neheye tebiye nɛteye mɛ dɛma aye na, nɛteye beke i bazlam i Musa mapala eye.‡

\* 4:22 Zɛba mɛ Madazlay i wu hay 16.15; 21.2. † 4:23 Zɛba mɛ Madazlay i wu hay 17.16. ‡ 4:25 Kanaŋ Zerozelem na, andza mɛpay bɛzay a kule i Yahuda hay.



<sup>26</sup> Ane tuk na, Zerozelem nakə mə mbəlom aye na, neŋgeye andza ŋwas nakə beke eye bay aye. Maa təra andza may kway na, neŋgeye.

<sup>27</sup> Maga eye na, andza nakə tə watsa mə Derewel i Mbəlom aye, tə gwad: «Nəkar ŋwas dəlay eye,

ka wa wawa nəte bay aye,

dərev yak mā ŋwasa,

nəkar nakə dəretsətseh i məwe wawa kə zlakazay nəte bay aye, wuda ta mənɣwese eye,

hərwi ŋwas nakə zal ŋgay a gər ha aye na,

ma ta hutiiye wawa hay haladzay

abəra ka ŋwas nakə mandza eye tə zal ŋgay aye.»

<sup>28</sup> Malamar ga hay, nəkurom na, wawa dedek eye hay andza i Mbəlom nakə a tsik kurre aye. Neŋgeye na, andza nakə Mbəlom a tsikay a Abraham kurre a gwaday nakə Sara ma ta wiye Izak aye. §

<sup>29</sup> A həlay niye na, wawa nakə tə wa ta mədzal gər i slo i bo aye na, a saway dəretsətseh a wawa nakə tə wa ta gədan i Məsəfəre Tsədanŋa eye. A həlay nakay anake eye na, huya andza niye dərmak.

<sup>30</sup> Ane tuk na, tə watsa mə Derewel i Mbəlom na, tə gwad kəkay? «Həhar na ŋwas nakə beke eye ta wawa ŋgay hərwi wawa i beke ma ndiye wu i bəba ŋgay bay. Mata nde na, wawa i ŋwas nakə beke eye bay aye.\*»

<sup>31</sup> Malamar ga hay, nəkway na, wawa i beke bay, nəkway wawa i ŋwas nakə beke eye bay aye.

## 5

### *Kâ tərüm beke i bazlam i Musa mapala eye bay*

<sup>1</sup> Kəriste kə təma kway ahaya abəra mə bazlam i Musa mapala eye hərwi ada kâ tərakwa beke i wuray sa bay. Ndzum bəŋbəŋ, kâ vəlumay tsəved a ndəray tâ təra kurom ha beke i wuray bay.

<sup>2</sup> Neŋ Pol, faya na tsikakumeye: Tadə a sakum ndo hay tâ dəs kurom na, niye na, andza məgwede wu nakə Kəriste a ge hərwi kurom aye ma giye ŋgama bay.

<sup>3</sup> Neŋ faya na masakumeye ha sa, tadə ndoweye kə dəs bo na, kutoŋ mâ pay bəzay a bazlam i Musa mapala eye tebiye.

<sup>4</sup> Nəkurom ndo neheye ka dzalum mə gər kurom ka tərümeye ŋgwalak eye hay kame i Mbəlom hərwi nakə faya ka pumeye bəzay a bazlam i Musa mapala eye na, ka ŋgənum, ka zum a bo tə Kəriste dəreŋ. Ka hutumeye ŋgwalak i Mbəlom sa bay.

<sup>5</sup> Nəmay na, nəmaa pa faya mədzal gər may, Mbəlom ma ta təriye may ha ŋgwalak eye hay hərwi nəmaa vəl ha dərev may a Kəriste. Nakay na, wu nakə faya nəmaa həbiye ta gədan i Məsəfəre Tsədanŋa aye.

<sup>6</sup> Tadə ndoweye madzapa eye tə Yesu Kəriste, tadə agəna neŋgeye madəsa bo eye, agəna madəsa bo eye bay na, ma giye wuray bay. Wu bagwar eye na, nakə ka dzalakweye ka neŋgeye aye. Məpe mədzal gər kway ka neŋgeye ma vələkweye gədan mawude siye i ndo hay.

<sup>7</sup> Ahəl niye na, ka yawum kame kame ta mäge wu nakə lele aye. Maa gakum me ka mäge wu neheye dedek aye na, way?

<sup>8</sup> Ndo nakə a səpat kurom, a say gum andza niye na, Mbəlom nakə a zalakum kâ tərüm ndo ŋgay hay aye bay.

<sup>9</sup> Ndo hay tə gwaɖawa na: «Ka kuts gəɖe ka wu tsekwenj na, ma kwasiye ha wu niye tebiye. \*»

<sup>10</sup> Hərwi nəkway na, madzapa eye ta Bəy Maduwenj Yesu Kəriste. Neŋ na sər ta dedek ka təmumeye andza i ga, ka dzalumeye andza neŋ. Na sər ha ndo faya ma zlakumeye naha mawesewes aye na, kwa way Mbəlom ma gəsiye na a sariya.

<sup>11</sup> Malamar ga hay, neŋ na, taɖə na ɖawa ha bazlam i Mbəlom huya, ada na gwaɖawatay a ndo hay ɖəsum bo na, Yahuda hay ta geŋeye ɖəretsətseh bay. Ada bazlam nakə na tsikiye ka madere i Kəriste nakə ta dar na ka mayako mazləmbaɖa eye aye na, ma ndalateye bay. Ane tuk na, na tsikawa andza niye bay.

<sup>12</sup> Ndo neheye faya ta kwasakumeye ha gər aye na, a seŋ na, t̄a ye t̄a t̄ara andza vo'ar neheye mahəla kudes aye.

<sup>13</sup> Malamar ga hay, nəkurom na, Mbəlom a zalakum hərwi ada k̄a təmumaw abəra ma beke i bazlam i Musa mapala eye. Ka ləvumeye gər kurom andza niye, k̄a gwaɖumay a gər kurom ka gumeye wu nakə a say a bor i bo kurom aye bay. Duh na, dzənum bo n̄ate n̄ate ta mawuɖe bo.

<sup>14</sup> Wu nakə bagwar eye mə bazlam i Musa mapala eye na, andza nakay: «Wuɖa ndo i m̄ageɖ yak ɖərmak andza ka wuɖa na gər yak.†»

<sup>15</sup> Taɖə ɖuh faya ka gumeye andza wu i pesl hay, ka dzumeye bo ada ka gumeye mbəlak a bo na, gum metsehe bəna, ka nasumeye ha bo n̄ate n̄ate kurom eye.

### *Məsəfəre Tsəɖaŋŋa eye tə ɖərev i ndo zezən*

<sup>16</sup> Wu nakə a seŋ mətsikakum aye na, anaŋ: Vəlumay tsəved a Məsəfəre Tsəɖaŋŋa eye mə ɖakum ha tsəved. Taɖə ka gum andza niye na, ka pumay bəzay a tsəved neheye lele bay bo kurom a wuɖa aye sa bay.

<sup>17</sup> Məsəfəre Tsəɖaŋŋa eye a wuɖa wu neheye lele bay a say a bo i ndo m̄age aye bay, ada bo i ndo nakə a kula ha gər ka Məsəfəre Tsəɖaŋŋa eye. N̄ateye neheye sulo aye faya ta giye v̄aram. Hərwi niye ka slumeye m̄age wu nakə a sakum m̄age aye bay.

<sup>18</sup> Ane tuk na, taɖə Məsəfəre Tsəɖaŋŋa eye faya ma ɖakumeye ha tsəved na, bazlam i Musa mapala eye a ləva kurom sa bay.

<sup>19</sup> Ka sərakwa wu neheye a say a bor i bo kway aye. A say m̄age na, wu neheye anaŋ aye: M̄age madama, m̄age wu nakə lele bay aye ada m̄age wu nakə a ge horoy aye.

<sup>20</sup> Ta tawal kule, t̄e ge madaŋ, ndo hay t̄e nay ɖəre bo n̄ate n̄ate mə walaŋ tay, faya ta t̄əriye a bo, ta sələk, wu a ndalatay, t̄e dzala na, bo tay ɖekɖek, ta ŋgəna ka bo abəra ndo hay, me a ye tay ka bo bay.

<sup>21</sup> T̄e ge ɖəre ka wu i ndo hay, t̄e kwaya, t̄e ge wu nakə a ye ka bo m̄age bay aye, ada faya ta giye wu siye andza nakay haladzay. Ba na gakum ɖaf, an̄eke na maseye sa. Ndo neheye faya ta giye slala i wu neheye na, ta fələkwiye a Bəy i Mbəlom bay.

<sup>22</sup> Wu nakə a yaw ma Məsəfəre Tsəɖaŋŋa eye andza hohway i gərɖaf aye anaŋ: Məsəfəre a vəl mawuɖe bo, m̄əŋgwese, zay, m̄əsəmay naha, ŋgwalak, lele, dedek,

<sup>23</sup> m̄əndze ləfedede, m̄age metsehe a bo. Ndo neheye faya ta giye andza nakay aye na, sariya ma gəsiye tay ha bay.

\* **5:9** Wu nakə t̄e zalay gəɖe kanaan aye, mandək̄it bo i ndo neheye ta səpat tay ha Galat hay aye.

† **5:14** Levitik 19.18.

<sup>24</sup> Ndo neheye nateye i Yesu Kəriste aye na, ta kərah bor i bo tay ada ta mədzal gər nakə lele bay aye, andza ta dar tay ha wu niye hay ka mayako mazzləmbada eye.

<sup>25</sup> Məsəfəre Tsədanŋa eye kə vələkway sifa. Kutoŋ mata ləve kway na, neŋgeye.

<sup>26</sup> Kā dəslakway ha gər a bo kway bay, kâ ndalakway ha dərev a siye i ndo hay bay, kâ gakwa sələk ka siye i ndo hay bay.

## 6

### *Dzənakwa bo*

<sup>1</sup> Malamar ga hay, tadə ka ndzumay a gər a ndo faya ma giye mənese, mata may bo mâ maw ka tsəved na, nakurom neheye Məsəfəre i Mbəlom faya ma lakiye kurom ha aye. Ane tuk na, gum na, ta ləfedede eye. Neŋ faya na tsikiye kwa a way kurom eye: Ge metsehe hərwi ada kâ dəd a mənese bay dərmak.

<sup>2</sup> Dzənum bo nate nate mə walaŋ kurom ka wu nakə ma mbiye kurom haladzay aye. Tadə ka gum andza niye na, ka gumeye wu nakə Kəriste a gwadakum gum aye.

<sup>3</sup> Hərwi tadə ndoweye ka zəba ka bo ŋgay andza bagwar eye azlakwa bay neŋgeye wuray kəriye na, niye neŋgeye faya ma səpatiye gər ŋgay.

<sup>4</sup> Kwa way mâ zəba ka mede ŋgay, neŋgeye lele tsukudu lele bədaw na, mâ zəba faya. Tadə ka zəba ka mede ŋgay lele na, dərev ŋgay mâ ŋgwasa ta məsler nakə faya ma giye aye bəna ma ŋgwasiye hərwi nakə a ze ndo ŋged aye bay.

<sup>5</sup> Kwa way mâ ge tə həlay ŋgay eye məsler nakə Mbəlom a vəlay aye.

<sup>6</sup> Ndo naka faya ma tətikatəye bazlam i Mbəlom a ndo hay aye na, a ye ka bo na, ndo niye hay tã vəlay wu tsakway abəra mə wu tay hay dərmak.

<sup>7</sup> Sərum ha lele, Mbəlom ma gəriye ha ndo nakə ma ŋgwasiye faya aye bay. Wu nakə ndo a sləga aye na, ma dziye na, neŋgeye.

<sup>8</sup> Tadə ndoweye kə ge wu nakə a yay a gər a bor i bo ŋgay aye na, magogoy ŋgay nakə ma hutie na, mədahaŋ. Ane tuk na, tadə duh a ge wu nakə a yay a gər a Məsəfəre Tsədanŋa eye na, ma hutie sifa nakə ma ndəviye bay aye mə həlay i Məsəfəre Tsədanŋa eye.

<sup>9</sup> Kə ge andza niye na, gakwa ŋgwalak huya, kâ gərakwa ha bay hərwi tadə ka gərakwa ha bay na, həlay eye ma ndisleweye ka hutakweye wu ŋgwalak eye.

<sup>10</sup> Hərwi niye anəke na, həlay eye andaya, gəkwatay ŋgwalak a ndo hay tebiye. Wene wene eye na, a ndo neheye ta dzala ha ka Yesu Kəriste aye.

### *Mandəve i bazlam*

<sup>11</sup> Zəbum ka wu nakə faya na watsakumeye naha anəke aye, faya na watsakumeye naha dogolum eye vərzləzla tə həlay ga eye.

<sup>12</sup> Ndo neheye a satay məgakum kutoŋ ka mədəse bo aye na, a satay ndo hay tã zambadatay hərwi məsler tay. Faya ta giye andza niye na, hərwi ada dəretsətseh mâ ndzatay a gər bay dəkdək tsa. Ndo hay faya ta sateye dəretsətseh na, a ndo neheye faya ta rəzleye a gər a məde ha məməte i Yesu Kəriste aye.

<sup>13</sup> Kwa ndo neheye mədəsa bo eye hay aye na, faya ta rəhay ha gər a bazlam i Musa mapala eye bay. Ane tuk na, a satay na, dəsum bo hərwi ada ta giye ha zlapay tə nakurom.

<sup>14</sup> Neŋ na, na giye zlapay tə wuray bay, na giye zlapay duh na, ta məməte i Bəy Maduweŋ Yesu Kəriste nakə ta dar na ka mayako mazzləmbada eye dəkdək tsa. Hərwi məməte ŋgay na, wu i mändzibəra hay ta təra ka dəre ga

wu kəriye. Wu neheye na, andza ta dar tay ha ka mayako mazlɛmbada eye. Neŋ dərmaƙ na, andza ndo nakə a mət ka mayako mazlɛmbada eye ada a gər ha wu i mändzibəra hay aye.

<sup>15</sup> Hərwi kwa tadə ndoweye maɗəsa bo eye, kwa maɗəsa eye bay na, ma giye wuray bay. Wu nakə bagwar eye na, Mbəlom kə vɛlakway sifa wedeye.

<sup>16</sup> Ndo neheye tebiye faya ta pay bəzay a tsəved wedeye, andza maɗwede ndo neheye nəteye ndo i Mbəlom hay ta dedek aye, Mbəlom mâ vɛlatay zay ada mâ gatay ŋwalak.

<sup>17</sup> Kame na, ndaray mâ kweseŋ gər sa bay, hərwi neŋ na, vavay ka bo ga, a ɗa ha neŋ na, i Yesu.

<sup>18</sup> Malamar ga hay, Bəy Maduweŋ kway Yesu Kəriste mâ pa fakuma ŋgama. Mâ ge bo andza niye.

## Derewel **nakə** Pol a watsatay naha a Efez hay aye Məfələkwə

Derewel nakay tə watsatay naha a Efez hay aye na, mawatsa eye hərwi ndo hay haladzay ka dala i Azi, nakə anəke tə zalay Turki aye. Pol a watsa ahəl nakə neŋgeye ma daŋgay aye (3.1; 4.1). Derewel eye a hayay gər ada a dzapa ha maduk i duk i məsənəke i Pol nakə a sənəkata y məhay gər i ndo məpe mədzal gər hay ka Yesu aye. A watsa na, a ndo məpe mədzal gər neheye nəteye Yahuda hay bay aye.

Mədzal gər nakə ŋgwalak eye wene wene aye mə derewel i Pol nakay a watsatay a Efez hay aye na, wu nakə a say a Mbəlom məge aye.

Ma madədo 1 ka 3, Pol a rəzlay a gər mətsike ka mədzepe nəte kə ge bo, hərwi Yesu kə vəl ha məsafəre ŋgay ka mayako mazləmbada eye. Ndo məpe mədzal gər hay neheye Yahuda hay bay aye ta Yahuda hay tə dzapa nəte.

Ma madədo 4 ka 6, Pol faya ma mataya ahaya a zləm a ndo məpe mədzal gər hay ka Yesu, mədzepe nəte, ada zay nakə Mbəlom a vəlatay aye.

### *Pol a tsikatay naha me*

<sup>1</sup> Maa watsakum naha derewel nakay na, neŋ Pol ndo nakə Mbəlom a zla hərwi ada nā təra ndo i maslaŋ i Yesu Kəriste aye. Na watsa naha derewel nakay na, a nəkurom ndo məpe mədzal gər hay ka Yesu neheye ma gəma i Efez, ka dzalum ha ka Yesu Kəriste tə dərev kurom lele ada nəkurom madzapa eye tə Yesu Kəriste aye.

<sup>2</sup> Mbəlom Bəba kway ta Bəy Maduweŋ kway Yesu Kəriste tā pa fakuma ŋgama ada tā vəlakum zay.

### *Ŋgama i Mbəlom a ze wu hay tebiye*

<sup>3</sup> Zambadəkway a Mbəlom Bəba i Bəy Maduweŋ kway Yesu Kəriste! Ka zambadəkweye na, hərwi kə pa fakwaya ŋgama ta ŋgwalak i wu neheye tebiye ta ndziye ka tor eye mə mbəlom aye. A vəlakway na, hərwi nəkway madzapa eye tə Yesu Kəriste.

<sup>4</sup> Ahəl nakə Mbəlom kə ge məndzibəra zuk bay aye na, nəkway neheye madzapa eye tə Yesu Kəriste aye na, 6a Mbəlom kə pala kway. A pala kway na, hərwi ada kə tərakwa ndo ŋgay hay tsədaŋŋa eye hay ada kə tərakwa kame ŋgay na, mənese m̄a ge andaya fakwaya bay.

<sup>5</sup> Neŋgeye a wuda kway haladzay. Ba kə tsik kurre, a gwad ma təriye kway ha wawa ŋgay hay tə həlay i Yesu Kəriste. Niye na, a yay a gər a neŋgeye məge andza niye.

<sup>6</sup> Zambadəkway a Mbəlom hərwi ŋgwalak ŋgay nakə a gakway aye na, a ze wu hay tebiye aye. Ŋgwalak ŋgay nakə a gakway haladzay aye tə həlay i felik i wawa ŋgay niye a wuda na haladzay aye.

<sup>7</sup> Kə təməkway ahaya abəra mə həlay i Fakalaw tə bambaz\* i wawa ŋgay niye nəkway madzapa eye tə neŋgeye. Andza məgwədə na, kə pəsəkway ha mezeleme kway. Andza niye, a dakway ha na, kə gakway ŋgwalak haladzay.

\* 1:7 «Tə bambaz ŋgay», andza məgwədə ta məməte ŋgay nakə tə kəf na ka mayako mazləmbada eye aye.

<sup>8</sup> Kə rah kway ha ta ɲɟwalak ɲɟay na, haladzay. Andza məgweɗe na, kə ɗakway ha metsehe ɲɟay. A ɗakway ha na, hərwi ada kâ sərakwa wu nakə a say aye.

<sup>9</sup> Kə ɗakway ha wu nakə maɲgaha eye kurre a say məge tə həlay i Yesu Kəriste aye. Wu neheye a ge na, ta ɲɟwalak ɲɟay, anəke na, kə ɗa ha.

<sup>10</sup> Wu niye Mbəlom ma ta ndəviye ha aye na, pat nakə həlay ɲɟay eye ma ndisliye a ɗama aye. Ma hayatay gər a wu hay tebiye. Wu neheye mə mbəlom aye ta wu neheye ka mändzibəra aye tebiye. Ma piye tay ha a həlay i Yesu Kəriste hərwi ada mâ tara bəy.

<sup>11</sup> Mbəlom a ge wu hay tebiye na, andza nakə a say məge aye. Kə pala kway kurre andza nakə a yay a gər aye hərwi ada kâ dzapakwa tə Kəriste. Kə vəlakway wu nakə a tsik kurre a gwad ma vəlakweye.

<sup>12</sup> A vəlakway na, hərwi ada ndo hay tâ zambaday a neɲgeye nakə bagwar eye ta məzlaɓ eye hərwi may neheye nəmaa lah məpe mədzal gər may ka Yesu Kəriste aye.

<sup>13</sup> Nəkurom ɗərmak na, nəkurom madzapa eye tə Yesu Kəriste. Ka tsənum bazlam dedek eye. Ka tsənum na, Labara ɲɟwalak eye i mətəme nakə Mbəlom a təma kurom ha aye, ka dzalum ha ka Yesu Kəriste. Ma mədzepe nakə ka dzapum tə Yesu aye na, Mbəlom kə vəlakum Məsəfəre Tsəɗaɲɲa eye andza nakə a tsik kurre, a gwad ma vəlakumeye. Məsəfəre Tsəɗaɲɲa eye niye a vəlakum aye na, andza ɲɟodgor nakə tə ge ka ɗa'ar ma ɗiye ha na, nəkurom ndo ɲɟay hay.

<sup>14</sup> A vəlakum Məsəfəre ɲɟay niye ka bo abəra təmad na, hərwi ada kâ sərakwa ha ta dedek ma ta vəlakweye siye i wu neheye ɲɟwalak eye hay kame mba. Ka hutakweye wu niye hay na, ahəl nakə Mbəlom ma ta təmiye kway ha ka tor eye. Zambadəkway a neɲgeye, Mbəlom nakə bagwar eye ta məzlaɓ eye.

### *Pol a ɗuwulay me a Mbəlom hərwi ndo i Efez hay*

<sup>15</sup> Hərwi niye neɲ faya na gay naha siɓe a Mbəlom hərwi kurom. Neɲ faya na gay naha siɓe a Mbəlom na, hərwi mey? Hərwi na tsəne kəkay nakə nəkurom faya ka dzalumeye ha ka Bəy Maduweɲ Yesu kame kame ada kəkay nakə ka wuɗum ndo məpe mədzal gər hay ka Yesu aye ɗərmak. Ayaw! Na tsəne wu niye hay andza niye na,

<sup>16</sup> ahəl nakə neɲ faya na ɗuwulaway naha me a Mbəlom aye na, na gaway naha siɓe a Mbəlom pat pat hərwi kurom.

<sup>17</sup> Na ɗuwulay naha me na, a Mbəlom Bəba kway nakə ta məzlaɓ eye haladzay aye. Neɲgeye Mbəlom nakə Bəy Maduweɲ kway Yesu Kəriste faya ma geye məsler aye. Na ɗuwulay naha me sa na, hərwi ada mâ ɗakum ha metsehe ɲɟay hərwi ada mâ bəzakum ha bo, kâ səkahum ha məsəre na lele.

<sup>18</sup> Faya na ɗuwulay naha me sa na, mâ həndəkakum na mədzal gər kurom lele ada ka dzalumeye ka wu nakə a zalakum faya ma vəlakumeye aye lele. Neɲ faya na ɗuwulay naha me na, hərwi ada kâ sərɒm ha kəkay wu nakə ma ta vəlakumeye na, ɲɟwalak eye haladzay a ze wu hay tebiye. Wu niye ma vəlakumeye na, ma vəlakumeye tə siye i ndo ɲɟay hay tebiye.

<sup>19</sup> Neɲ faya na tsətsahiye faya na, ka sərɒm gəɗaɲ ɲɟay nakə a ze ha gəɗaɲ i wu hay tebiye aye ada ka sərɒm ha gəɗaɲ ɲɟay niye faya ma giye məsler ma nəkway neheye ka dzalakwa ha ka neɲgeye na, kəkay.

<sup>20</sup> Gəɗaɲ ɲɟay niye na, nəte tə bəmalə nakə a ge məsler tə Yesu Kəriste ahəl nakə a lətse ahaya abəra ma məɗahaɲ aye. Yesu a lətsew abəra ma məɗahaɲ na, Mbəlom Bəba a gwaday: «Ndza ka təv lele eye tə həlay i mənday ga.»

<sup>21</sup> Ma tæv niye Yesu a ndza a dæma aye na, nenŋeeye bøy ka gær i gawla i Mbælom hay ta bøy tay eye hay tebiye, ada ka gær i siye i wu neheye gædan tay andaya mæ mbælom aye tebiye. Nenŋeeye ka gær i ndo neheye kwa mæzele tay kækay kækay eye tebiye. Mæde a zlæm ŋgay na, a ze mæzele neheye ka mændzibæra nakay anæke aye ada tæ bæmalæ nakæ ma deyeweye kame aye.

<sup>22</sup> Mbælom a hæl wu hay tebiye, a pa na a hud'i sik ŋgay. A zla, a pa na nenŋeeye bøy ka gær i wu hay tebiye, a gwadáy: «Nækær na, bøy i ndo ga hay tebiye.»

<sup>23</sup> Ndo ŋgay hay na, ta tæra andza bo i Yesu. Nŋwalak i wu neheye lele eye hay tebiye aye na, faya ma vølateye a ndo ŋgay hay ada nenŋeeye na, ŋwalak i wu i Mbælom tebiye andaya mæ nenŋeeye.

## 2

### *Mbælom a vøl sifa tæ hølay i Kæriste*

<sup>1</sup> Ahæl niye nækurom kame i Mbælom na, andza mamæta eye hay hærwi mænese tæ mezeleme kurom neheye ka gawum aye.

<sup>2</sup> Ka pawumay bæzay huya na, a mede i ndo i mændzibæra hay. Ka pawumay zlæm a bøy i fakalaw nakæ nenŋeeye mandza eye ma magærmæbælom aye. Maa ge mæslær ma ndo neheye tæ pay naha faya a Mbælom bay hus anæke aye na, nenŋeeye.

<sup>3</sup> Nækway tebiye ahæl niye na, nækway andza næteye dærmak. Ka gawakwa wu neheye lele bay a say a bor i bo kway aye hay. Bor i bo kway a yawa kway ha ka mæge wu neheye lele bay aye hay kame kame. Ka dzalawakwa na, ka mæge wu neheye a say a bor i bo kway aye. Haæ sariya i Mbælom ma gæsiye kway andza ndo neheye ta dzala ha ka Yesu Kæriste tæbey aye na, hærwi bor i bo kway.

<sup>4</sup> Ane tuk na, anæke na, andza niye sa bay. Mbælom, nenŋeeye na, ka gækway mæ bo haladzay. A wudá kway haladzay.

<sup>5</sup> Kwa nækway andza mamæta eye hay hærwi nakæ faya ka gækweye wu neheye lele bay aye hay na, kæ vølakway sifa wedeeye. Kæ dzapa kway ha tæ Yesu Kæriste hærwi nakæ a wudá kway haladzay aye. A tæma kway ha na, kæriye.

<sup>6</sup> Sa na, a lætsækway ahaya abæra ma mædahan dziye tæ Yesu Kæriste hærwi nakæ nækway madzapa eye tæ Yesu Kæriste aye. Ada kæ vølakway tæv mændze a nækway tage Yesu Kæriste mæ mbælom.

<sup>7</sup> Andza niye, kæ gækway wu lele eye haladzay tæ hølay i Yesu Kæriste. A ge andza niye na, hærwi a say mædatay ha a ndo neheye ta deyeweye kame mba aye. Næteye ta sær ha dærmak ŋwalak ŋgay nakæ a vøl haladzay aye na, kæriye.

<sup>8</sup> Mbælom a tæma kurom ha abæra mæ mezeleme na, kæriye ta mædzal gær nakæ a vølakum ka dzalum ha ka nenŋeeye. A gækum ŋwalak ŋgay na, kæriye

<sup>9</sup> bæna, hærwi mæslær neheye faya ka gumeeye lele eye hay bay. A gækum ŋwalak ŋgay kæriye na, hærwi ada ndaray mâ dæslay ha gær a bo ŋgay bay.

<sup>10</sup> Hærwi niye maa gækway na, nenŋeeye. A vølakway sifa wedeeye na, tæ hølay i Yesu Kæriste hærwi ada kæ gækwa wu lele eye hay huya. Mbælom a læva ha bo tæ wu niye lele eye hay na, kurre hærwi ada kæ pækway bæzay a tsæved lele eye.

### *Ka tærakwa næte na, tæ Kæriste*

<sup>11</sup> Hærwi niye nækurom ahæl niye kækay na, mâ makumaw a gær. Nækurom na, Yahuda hay bay, slala kurom wal. Yahuda hay tæ zalawakum na, ndo neheye ta dæs bo tæbey aye. Næteye tæ gwadaway a gær tay na, næteye madæsa



eye hay. Ane tuk na, tə tsik na, ka wu nakə ndo hay faya ta geye a bo tay, däre a ngatay aye dekdek tsa.

<sup>12</sup> Məmun ahaya a mədzal gər kurom, ahəl niye na, ka sərüm Kəriste bay. Mə walaŋ i Yahuda hay na, nəkurom mbəlok eye hay. Mbəlom na, kə ɓar dzam ta ndo ngay hay. Ma dzam niye a ɓar ta ndo ngay hay eye na, a tsik a gwaɗ ma vələteye wu na, kurre. Ane tuk na, nəkurom mə dəma bay, nəkurom mbəlok eye hay. Wuray andaya nakə ka pum faya mədzal gər kurom aye bay. Nəkurom ka mändzibəra nakay, ane tuk na, nəkurom dərəŋ ta Mbəlom.

<sup>13</sup> Ahəl niye na, nəkurom dərəŋ ta Mbəlom. Anəke na, nəkurom madzapa eye tə Yesu Kəriste. Nəkurom bəse ta Mbəlom tuk hərwi Yesu Kəriste. Neŋgeye ka mbəda ha bambaz ngay hərwi kurom.

<sup>14</sup> Neŋgeye ndo i zay. Ka hutakwa mändze zay mə walaŋ kway na, hərwi ngay. Bəna, ahəl niye na, Yahuda hay ta ndo neheye nəteye Yahuda hay təbey aye na, nəteye maŋgəna eye. Ane tuk na, neŋgeye kə gaw ngwalak ngay, ka təra kway ha nəte. Ahəl niye na, mənə däre a bo andaya mə walaŋ kway, a ngəna kway ha ka bo abəra andza dzal. Ahəl nakə a mət aye na, ka mbəzl ha dzal aye niye.

<sup>15</sup> Kə mbata ha bazlam mapala eye i Yahuda hay nakə a gwaɗawa: «Kā ge nakay bay» kəgəbay «Ge nakay» aye. A ge andza niye na, hərwi mədzepe tay ha Yahuda hay ta ndo neheye nəteye Yahuda hay bay aye. Nəteye maŋgəna eye sulo sa bay, nəteye nəte hərwi nəteye madzapa eye nəte ta neŋgeye. Nəteye tebiye ta təra slala wedeye. A vələtay mändze zay a walaŋ tay na, andza niye.

<sup>16</sup> Mənə däre nakə mə walaŋ tay aye na, kə mbata ha ta məməte ngay. Mənə däre andaya sa bay. Ta təra slala nəte na, hərwi ngay. Kə sər tay ha ka bo nəteye tebiye tage Mbəlom.

<sup>17</sup> Kəriste ki yaw ka mändzibəra, kə da ha labara wedeye ka gər i mändze zay mə walaŋ i ndo hay ta Mbəlom. Mändze zay niye na, i kurom neheye dərəŋ ta Mbəlom aye ada i may neheye nəmay bəse ta Mbəlom aye.

<sup>18</sup> Yahuda hay ta ndo neheye nəteye Yahuda hay bay aye, nəkway sulo kway eye tebiye ka hutakwa tsəved mahəndzəde ka təv i Mbəlom tə həlay i Yesu Kəriste ta gədan i Məsəfəre Tsədanŋa eye nəte ngweŋ.

<sup>19</sup> Kə ge andza niye na, nəkurom mbəlok eye hay sa bay. Nəkurom madurloŋ hay sa bay. Nəkurom na, wawa i dala niye hay nəkurom andza siye i ndo məpe mədzal gər hay ka Yesu. Nəkurom mə gay i Mbəlom andza nəteye.

<sup>20</sup> Nəkurom na, ka tərüm kwar neheye ta dəzliye ha gay aye. Matəra mədok eye na, ndo i maslaŋ hay ta ndo məde ha bazlam i Mbəlom hay. Kəriste na, neŋgeye kwar nakə ma vəleye gədan a gay aye.

<sup>21</sup> Gay niye a gəl kame kame, a mbəzl bay na, hərwi ngay. Gay niye a təra na, gay i mədəslay ha gər a Mbəlom. Mbəlom ma ndziye na, mə dəma.

<sup>22</sup> Nəkurom neheye madzapa eye tə Yesu Kəriste aye na, kə həl kurom ta siye i ndo hay, ka təra kway hay tebiye andza kwar i mədəzle gay. Gay niye na, Məsəfəre i Mbəlom ma ndziye mə dəma.

### 3

*A say a Mbəlom na, Pol mā datay ha labara ngay a ndo neheye nəteye Yahuda hay bay aye*

<sup>1</sup> Hərwi niye neñ Pol, neñ faya na dıwulay naha me a Mbəlom pat pat hərwi kurom. Neñ ma daŋgay na, hərwi məsler i Yesu Kəriste nakə faya na giye hərwi madzəne nəkurom neheye Yahuda hay bay aye.

<sup>2</sup> Ka tsənum Mbəlom kə vələñ məsler hərwi ada nā ge hərwi kurom bədfaw? Na huta na, hərwi ɲgwalak ɲgay.

<sup>3</sup> Mbəlom kə deñ ha wu nakə maŋgaha eye kurre aye andza nakə na lah məwatsakum naha faya tsekweñ aye.

<sup>4</sup> Ka dzaŋgum na, ka sərume ye ha kəkay nakə neñ na sər wu nakə maŋgaha eye ka gər i Kəriste kurre aye lele tuk.

<sup>5</sup> Ahəl niye na, Mbəlom kə datay ha wu nakə maŋgaha eye andza nakə anəke aye bay. Ane tuk na, anəke na, a slərəw Məsəfəre ɲgay hərwi ada mā datay ha wu niye maŋgaha eye parakka. A dā ha na, a ndo i maslañ ɲgay hay, ada a ndo məde ha bazlam ɲgay neheye a pala tay ha aye.

<sup>6</sup> Wu niye Mbəlom a dā ha aye na, nəkurom neheye Yahuda hay bay aye na, Mbəlom ma vəlakumeye dziye ta Yahuda hay. Nəkurom ta Yahuda hay nəkurom ka tərüm slala nəte. Wu nakə Mbəlom a gwađ ma ta vəliye a ndo neheye nəte ye madzapa eye tə Yesu Kəriste aye ma vəlakumeye na, dziye ta Yahuda hay. Wu neheye tebiye na, maa dā ha Labara ɲgwalak eye.

<sup>7</sup> Mbəlom a geñ ɲgwalak ɲgay, a zla ga məge məsler ɲgay hərwi ada nā dā ha labara ɲgay ɲgwalak eye a ndo hay. A ge andza niye na, ta gədañ ɲgay.

<sup>8</sup> Neñ mə walañ i ndo məpe mədzal gər hay ka Yesu na, na sla wuray kwa tsekweñ bay tebiye. Kwa andza niye bəbay na, Mbəlom kə geñ ɲgwalak ɲgay a neñ hərwi ada nā datay ha a ndo neheye nəte ye Yahuda hay bay aye ɲgama nakə a yaw mə həlay i Yesu Kəriste aye. ɲgama niye na, haladzay. Ndo hay ta sliye faya məsəre tebiye bay, hərwi ka zal naha.

<sup>9</sup> Mbəlom a vələñ tsəved ka mədatay ha a ndo hay wu nakə a tsik ahəl niye maŋgaha eye, ma ta giye bo na, kəkay. Mbəlom neŋge ye ndo məge wu hay tebiye kə pa na wu niye maŋgaha eye hus ahəl nakay anañ aye. Anəke na, kə ndohwaw a dzaydzay parakka tuk.

<sup>10</sup> Anəke na, Mbəlom kə dā ha mə walañ i ndo ɲgay hay hərwi ada gawla ɲgay hay ta bəy tay hay mə mbəlom tā zəba fataya tā sər ha metsehe ɲgay ka gər i wu hay wal wal tebiye.

<sup>11</sup> Andza niye, a ge na, andza nakə a tsik a gwađ ma giye na, ahəl nakə məndzibəra andaya zuk bay aye. A ge na, tə həlay i Yesu Kəriste Bəy Maduweñ kway.

<sup>12</sup> Anəke nəkway na, nəkway madzapa eye tə Kəriste. Faya ka dzalakweye ha faya. Ka dzədzarakweye sa bay, ka hutakwa tsəved mahəndzəde ka təv i Mbəlom tə həlay i Yesu Kəriste.

<sup>13</sup> Hərwi niye neñ faya na gakumeye amboh. Dərev mā ye fakuma abəra hərwi dəretsətseh nakə neñ faya na siye hərwi kurom aye bay. Duh dəretsətseh nakay faya na siye na, ma dzəniye kurom haladzay.

### *Mawude bo i Kəriste nakə a wuda kway aye*

<sup>14</sup> Hərwi niye neñ faya na dəkweye naha gurmets a Mbəlom Bəba kway.

<sup>15</sup> Neŋge ye na, Bəba i slala hay tebiye mə mbəlom ada ka məndzibəra ta dedek.

<sup>16</sup> Neñ faya na dıwulay naha me hərwi ada Məsəfəre ɲgay mā vəlakum gədañ. Ta gədañ i Məsəfəre ɲgay nakə ma vəlakumeye aye na, ka ɲgəlumeye ha bo lele ka tsəved ɲgay. Hərwi neŋge ye na, gədañ aye haladzay, wu hay tebiye mə həlay ɲgay.

17 Neŋ faya na dūwulay naha me sa na, hārwi ada Yesu Kāriste mā ndza mā dārev kurom hay ta mādzał gār kurom nakə ka dzalum ha faya aye. Neŋ faya na dūwulay naha me na, hārwi ada kâ wudum bo nāte nāte mā walaŋ kurom. Tađə ka wudum bo nāte nāte mā walaŋ kurom na, ka hutumeye gədaŋ andza dərizl i gərdaf nakə mapa zləlay eye lele aye ada andza gay nakə ta dāzl ka mādok nakə mapa eye lele aye.

18 Andza niye, nakurom ta ndo mape mādzał gār hay ka Yesu siye hay ka mbumeye faya māsəre ha kəkay nakə Yesu Kāriste a wudā kurom aye. Kwa ka yum na, a ŋgay, kwa ka tsalum na, a gəma, kwa ka mbəzłumaw ka dala, kokway i mawudə bo ŋgay andaya təbey.

19 Neŋ faya na dūwulay naha me na, hārwi ada kâ sərūm ha neŋgeye a wudā kurom. Mawudə bo ŋgay nakə a wudā kway aye na, ka slumeye māsəre tebiye bay. Andza niye, Mbəlom na, wuray a kətsay bay. Ma rahiye kurom ha ta wu neheye neŋgeye maraha eye.

20 Neŋgeye na, ma sliye faya mäge wu hay tebiye a ze wu nakə ka tsətsahakwa faya mā gəkway aye haladzay. Kwa wu nakə ka dzalakwa mā gəkway aye na, a ze. Faya ma giye na, ta gədaŋ ŋgay nakə faya ma giye məsler mā nəkway aye.

21 Tā zambadāy a Mbəlom hārwi wu nakə a ge ta ndo ŋgay hay ada tə Yesu Kāriste aye kame kame ka tor eye. Mā təra andza niye!

## 4

### *Dzapakwa nāte*

1 Neŋ nakə ma daŋgay hārwi məsler i Bəy Maduweŋ kway Yesu Kāriste aye, faya na gakumeye naha amboh hārwi ada mede kurom mā təra na, andza i Mbəlom nakə a zalakum ka mäge aye.

2 Andza mægweđe rāhumay ha gār a ndo hay kwa kəđay. Məsəre me mā ge mā walaŋ kurom. Złum ŋgatay ka təv i wu hay tebiye. Wudum bo nāte nāte mā walaŋ kurom ada sakumay naha a bo nāte nāte mā walaŋ kurom.

3 Rəzłumay a gər, məndze kurom mā ge nāte, metsehe nāte andza nakə Məsəfəre Tsədaŋŋa eye a dzapa kurom ha aye. Ndzum tə zay mā walaŋ kurom hārwi ada kâ ndzum nakurom madzapa eye nāte.

4 Ndo mape mādzał gār hay ka Yesu ta təra na, bo i Yesu Kāriste nāte. Məsəfəre i Mbəlom bəbay na, nāte. Wu neheye Mbəlom a zalakum faya aye na, nāte dərmał.

5 Bəy Maduweŋ kway na, nāte. Mape mādzał gār kway nakə ka pakwa ka Mbəlom aye nāte. Madzəhuəbe nakə ta dzəhuəb kway ha a yam aye na, nāte.

6 Mbəlom na, neŋgeye nāte ŋweŋ. Neŋgeye na, Bəba i ndo hay tebiye. Neŋgeye a ləva wu hay tebiye. Faya ma giye məsler mā walaŋ kway tebiye. Neŋgeye mā walaŋ i ndo ŋgay hay.

7 Nəkway tebiye Kāriste kə vələkway gədaŋ wal wal ka mäge məsler ŋgay.

8 Andza nakə mawatsa eye mā bazlam i Mbəlom aye na, a gwad: «Ahəl nakə a ŋgwasa ka ndo məne dāre ŋgay hay aye na,

kə tsal a mbəlom,

kə həl tay ha ndo neheye magəsa eye hay.

Tsa na, a vəlatay ndaraw a ndo hay ka məndzibəra. \*

9 A gwad: «Kə tsal a mbəlom» na, andza mægweđe mey? A tsal a mbəlom na, dūh a lahaw mambəzław hus ka dala təday.

\* 4:8 Matsika eye andza mā Dames hay 68.19.

<sup>10</sup> Ndo niye a mbəzlaw aye na, neŋgeye ndo nakə a tsal a mbəlom a gər eye dərən hərwi ada mâ təra ha wu hay tebiye lele.

<sup>11</sup> Maa vəl ndaraw a ndo hay na, neŋgeye. Siye hay a vəlatay ndaraw matəre ndo i maslan ŋgay hay, siye hay ndo mədə ha bazlam i Mbəlom hay, siye ndo mədə ha labara wədəye a ndo hay ada ndo mekelən eye hay ndo mətəsəkure tə matatikatay bazlam i Mbəlom a ndo hay.

<sup>12</sup> A ge andza niye na, hərwi ada tã dzəna tay ha siye i ndo ŋgay neheye tã dzala ha aye ka mäge məsler i Mbəlom ada ndo niye hay ta təra bo ŋgay aye na, tã gəl.

<sup>13</sup> A ge andza niye na, nəkway tebiye ka dzapakwa nətə hərwi mədzał gər kway nakə ka dzalakwa ha ka Yesu Kəriste Wawa i Mbəlom aye na, nətə. Ada ka sərakwa na sa. Andza niye ka gəlakweye, ka tərakweye ndo neheye masəra eye ka tsəved i Mbəlom aye. Ka tərakweye ndo lele hay andza Kəriste.

<sup>14</sup> Ka tərakwa andza niye na, nəkway wawa hay sa bay. Ndo məvay gər a ndo hay tə maraw me tay ta dziye kway ha abəra ka tsəved i Mbəlom tə matətike tay niye hay andza mətəsl nakə ma bəliye ha kwalalan i yam ka gər i yam vuv afən vuv afən aye sa bay.

<sup>15</sup> Duh na, tsikakwatay dedək a ndo hay. Gakwa wu hay tebiye tə mawudə bo nətə nətə mə walaŋ kway. Ka gakwa andza niye na, ka gəlakweye hus ka matəre andza Kəriste, neŋgeye nakə ka gər i ndo neheye tebiye aye.

<sup>16</sup> Maa hayay gər a ndo hay tebiye na, neŋgeye hərwi ada tã dzapa nətə andza vərəzl i bo i ndo nakə a zəv ha bo ka təv manətə aye. Tadə siye faya ta giye məsler tebiye na, bo ma gəliye. Andza niye, ndo məpe mədzał gər hay ka Yesu ta wudə bo nətə nətə mə walaŋ tay na, ta diye kame kame.

### *Sifa wədəye ka təv i Yesu*

<sup>17</sup> Wu nakə na tsikakumeye naha aye na, ta məzele i Bəy Maduweŋ kway. Na tsikakumeye naha na, wuye mey? Neŋ faya na gwadəkumeye naha amboh ta amboh, kã pumay bəzay a mede i ndo neheye tə sər Mbəlom bay aye sa bay. Nətəye tã dzala na, ka wu nakə ma giye ŋgama bay aye.

<sup>18</sup> Mədzał gər tay na, ləvon. Nətəye kame i Mbəlom na, mbəlok eye hay. Sifa nakə ma ndəviye bay ka tor aye na, ta huta bay hərwi ta kula ha gər tay tɔŋgwa tɔŋgwa andza kwar. Tə sər tsəved i Mbəlom bay.

<sup>19</sup> Horoy a gatay sa bay. Tə vəlay ha bo tay na, ka mäge wu neheye lele bay aye hay. Wu neheye a ge horoy aye na, faya ta giye ta mənŋgwese.

<sup>20</sup> Nəkurom, ka tətikum ka gər Kəriste na, andza niye bay.

<sup>21</sup> Ka rəhumay ha gər na, a neŋgeye bədaw? Nəkurom neheye madzapa eye tə neŋgeye na, ta tətikakum dedək. Dedək niye ta tətikakum aye na, Yesu.

<sup>22</sup> Ta tətikakum na, gərūm ha mədzał gər kurom neheye kurre aye. Gərūm ha mede kurom nakə ahəl niye aye. Mede kurom niye na, ma nasiye kurom ha hərwi bor i wu neheye lele bay aye ta vakumeye gər.

<sup>23</sup> Məsəfəre i Mbəlom mâ mbədəkum ha dərəv kurom ada dzalum ka wu lele eye hay.

<sup>24</sup> Pumay bəzay na, a mede wədəye. Mede wədəye niye na, maa mbədə ha mə nəkurom na, Mbəlom hərwi ada mâ təra andza i ŋgay. Mede niye na, dedək eye, a yay a gər a Mbəlom. Mənese andaya kwa tsekweŋ mə dəma bay.

<sup>25</sup> Hərwi niye kã rawum me bay. Kwa way mâ tsikay a ndo na, dedək hərwi nəkway madzapa eye na, nətə andza hawal i bo neheye wal wal madzapa eye ka bo eye nətə aye.

<sup>26</sup> Wuray kə ndalakum na, kã gum mezeleme bay. Pat mâ dəf ka wu nakə a ndalakum aye bay, səfum ha dərəv kurom.

<sup>27</sup> Kâ vəlumay tsəved a Fakalaw bay.

<sup>28</sup> Məkal hay tâ kəla sa bay. Duh na, tâ ge məsler lele tə həlay tay hərwi ada tâ huta wu hərwi məvəlatay a mətawak hay dərmak.

<sup>29</sup> Bazlam nakə ma nasiye ha ndo hay aye na, mâ ndohwaw abəra ma təbəlem kurom bay. Tsikum düh na, bazlam nakə ma dzəniye siye i ndo hay məgəle ka tsəved i Mbəlom aye. Tsikum na, wu neheye a ye ka bo mətsike, ma dzəniye tay ha ndo neheye faya ta pay zləm a bazlam kurom aye.

<sup>30</sup> Kâ gumay dəretsətseh a Məsəfəre i Mbəlom Tsədanjə eye kwa tsekweŋ bay tebiye. Mbəlom a ge fakuma ŋgodgor na, ta Məsəfəre<sup>†</sup> niye. Andza məgwədə na, nəkurom ndo ŋgay hay. A dakum ha sa na, pat nakə həlay aye kə slaw na, ma təmiye kurom ha ka tor eye tuk.

<sup>31</sup> Zlum na dəgum abəra mə dərev kurom. Kâ gum mevel bay, wu mâ ndalakum bay. Gərum ha mətsal bo, kâ tsadum a bo bay. Kâ gum sewed kwa tsekweŋ bay tebiye.

<sup>32</sup> Tərum düh na, kwakwad eye hay kame i ndo hay. Gumatay ŋgwalak a ndo hay. Pəsum ha a bo mənese mə walaŋ kurom nəte nəte andza nakə Mbəlom a pəsakum ha tə Kəriste aye.

## 5

### *Ndo məpe mədzal gər hay ka Yesu ta ndziye na, mə dzaydzay*

<sup>1</sup> Nəkurom na, wawa i Mbəlom hay. Mbəlom a wudə kurom haladzay. Kə ge andza niye na, tərum andza neŋgeye.

<sup>2</sup> Ma məndze kurom tebiye na, wudum ndo hay andza Kəriste nakə a wudə kway, a mət hərwi kway aye. Məməte nakə a mət aye andza wu nakə a tsəhən ada a ze huŋŋa lele tə vəlay a Mbəlom, a yay a gər haladzay aye.

<sup>3</sup> Anəke na, nəkurom na, ndo məpe mədzal gər hay ka Yesu. Kâ gum madama kwa tsekweŋ bay. Wu neheye a ge horoy məge aye na, kâ gum bay. Kâ gum dəre ka wu i ndo hay bay. Ka gər i wu neheye na, kwa tsekweŋ kâ tsikum bay.

<sup>4</sup> Bazlam neheye a ge horoy aye ada tə bazlam neheye matərakahaŋ aye na, a ye ka bo mətsike mə walaŋ kurom bay. Kwa məge mahəmba neheye lele bay aye na, kâ gum bay. Duh na, gumay naha sisə a Mbəlom hərwi wu nakə a ge aye.

<sup>5</sup> Sərum ha na, ndo neheye faya ta giye madama aye ta ndo neheye faya ta giye siye i wu neheye lele bay aye na, ta hutiyə mede a Bəy i Mbəlom ta Kəriste bay. Ndo neheye faya ta giye dəre ka wu i ndo hay aye ta hutiyə mede a bəy i Mbəlom bay hərwi wu neheye a yatay a gər a ze Mbəlom. Niye andza nəteye faya ta dəslay ha gər na, a kule.

<sup>6</sup> Ndo hay tâ vakum gər tə bazlam neheye kəriye bay. Dərev ma ta ndaleyə a Mbəlom hərwi bazlam niye hay lele bay aye. Mbəlom ma ta giye mevel ka ndo neheye ta rəhay ha gər bay aye.

<sup>7</sup> Kâ dzapum ta ndo niye hay bay tebiye.

<sup>8</sup> Ahəl niye na, nəkurom ma ləvoŋ. Anəke na, nəkurom mə dzaydzay hərwi nəkurom madzapa eye ta Bəy Maduweŋ Yesu. Ndzum na, andza ndo neheye nəteye mandza eye mə dzaydzay aye.

<sup>9</sup> Na tsik andza niye na, hərwi dzaydzay faya ma vəliye wu neheye ŋgwalak eye ta wu neheye mənese mə dəma bay aye ada dedək eye.

<sup>10</sup> Gum gədan məsəre na, wu neheye a yay a gər a Bəy Maduweŋ aye. Ada gum na, wu niye hay.

<sup>†</sup> 4:30 Zəba ma Efez hay 1.13.

11 Məsler i ndo neheye faya ta giye ma ləvonj aye na, kâ tələkum a dəma həlay kurom bay. Wu nakə faya ta giye na, ɲgwalak eye andaya mə dəma kwa tsəkweŋ bay tebiye. Duh na, wu tay neheye lele bay faya ta giye na, dumatay ha parakka.

12 Wu neheye faya ta giye ta məkal aye na, a ge horoy mətsike faya.

13 Tadə ta da ha wu niye hay parakka na, nəteye kəkay na, ndo hay ta ɲgateye,

14 hərwi wu nakə a bəz parakka ta həpat aye na, ma təriye dzaydzay. Hərwi niye tə gwad:

«Nəkar nakə mandzahəra eye, pədeke abəra ka məndzəhəre,  
lətse abəra mə walaŋ i mədahaŋ hay,  
hərwi ada Kəriste mə vəlaka dzaydzay.»

15 Kə ge andza niye na, gumay metsehe a mede kurom. Ndo neheye tə sər wuray bay aye na, kâ pumay bəzay a mede tay bay. Duh pumay bəzay na, andza ndo neheye ta tsah aye.

16 Həlay nakay anaŋ aye na, həlay nakə lele bay aye. Kâ dzum ha həlay kəriye bay, gum ɲgwalak huya.

17 Hərwi niye kâ tərūm andza ndo neheye ta tsah təbey aye bay, duh pumay zləm na, a wu nakə Bəy Maduweŋ kway a say kâ gum aye.

18 Kâ kwayum ta guzom bay. Məkweye na, ma nasiye ha sifa kurom. Duh na, Məsəfəre i Mbəlom mə rahakum a dərev pat pat.

19 Zambadumay a Mbəlom ta dəmes nəte nəte mə walaŋ kurom. Gum dəmes kwa waray waray neheye Məsəfəre i Mbəlom a vəlakum aye. Gum dəmes niye hay mə walaŋ kurom. Zambadumay a Bəy Maduweŋ tə dərev kurom tebiye.

20 Gumay naha sisə a Bəba Mbəlom hərwi wu hay tebiye. Gumay naha sisə na, tə məzele i Bəy Maduweŋ Yesu Kəriste. Gumay naha sisə pat pat.

### *Məndze i ɲgwas hay tə zal tay hay*

21 Rəhumay ha gər kwa a way nəte nəte mə walaŋ kurom hərwi nəkurom faya ka pumay naha faya a Kəriste.

22 Nəkurom ɲgwas hay, rəhumay gər a zal kurom hay andza nakə a say a Bəy Maduweŋ kway Yesu aye.

23 Hərwi zal na, neŋgeye bəy eye ka gər i ɲgwas andza nakə Yesu Kəriste neŋgeye bəy ka gər i məhay gər i ndo məpe mədzal gər hay ka Yesu aye. Neŋgeye ma mbəliye tay ha məhay gər i ndo məpe mədzal gər hay. Məhay gər i ndo məpe mədzal gər hay na, bo ɲgay.

24 Kə ge andza niye na, ɲgwas hay tə rəhatay ha gər a zal tay hay lele andza nakə məhay gər i ndo məpe mədzal gər hay ta rəhay ha gər a Yesu Kəriste aye.

25 Nəkurom zal hay, wudum ɲgwas kurom hay haladzay andza nakə Yesu Kəriste a wuda məhay gər i ndo məpe mədzal gər hay ada a mət hərwi tay aye.

26 A ge andza niye na, hərwi mə təra tay ha tsədəŋŋa kame i Mbəlom. Neŋgeye a təd yam, a bara tay ha hərwi ada tə təra tsədəŋŋa ta labara ɲgay.\* Andza niye, a pala tay ha wal, nəteye ta təra i Mbəlom.

27 A say ndo məpe mədzal gər hay ka Yesu tə yaw kame ɲgay na, ta mədəslatay ha gər nakə ta dəslatay ha gər aye. Tə təra na, tsədəŋŋa, ndəluə

\* 5:26 Məbere tsədəŋŋa ta yam: Zəba ma Ezekiyel 36.25; Titus 3.5, ada labara: Zəba ma Yuhana 15.3.

kwa tsekweŋ mâ ge andaya fataya bay. Tâ tæra ka dære i ndo na, lele. Mænese mâ ge andaya fataya bay, ada kwa vavay mâ ge andaya fataya bay.

<sup>28</sup> Andza niye nækuroŋ zal hay dærmak wuðum ŋgwas kurom hay andza nakæ ka wuðum bo kurom aye. Ndoweŋe ka wuða ŋgwas na, a wuða bo ŋgay.

<sup>29</sup> Ndæray andaya nakæ ma geye dæretsæseh a bo ŋgay aye na, andaya bay. Kwa way na, ma geye gær a bo ŋgay ta wu mæday lele andza Yesu Kæriste nakæ faya ma gateye gær a mæhay gær i ndo mæpe mædzal gær hay aye.

<sup>30</sup> Neŋgeŋe faya ma gakweŋe gær hærwi nækway na, hawal i bo ŋgay.

<sup>31</sup> Hærwi niye bazlam i Mbæloŋ a gwad na: «Hærwi niye haslæka ma gæriŋe ha bæba ŋgay ta may ŋgay, ta ndziŋe ta ŋgwas ŋgay. Næteŋe sulo ta tæriŋe bo næte.†»

<sup>32</sup> Bazlam nakay na, kæ dakway ha wu nakæ ŋgwalak eye lele haladzay. Nen na tsik na, ka gær i Kæriste ta mæhay gær i ndo mæpe mædzal gær hay ka Yesu.

<sup>33</sup> Bazlam neheŋe na, hærwi kurom dærmak. Kwa way mâ wuða ŋgwas ŋgay andza nakæ a wuða bo ŋgay aye. Ŋgwas hay ræhumatay gær a zal kurom hay.

## 6

### *Mændze i wawa hay ta bæba tay hay*

<sup>1</sup> Wawa hay, nækuroŋ ka tærum madzapa eye ta Bæy Maduweŋ Yesu. Gæsumatay me a bæba ta may kurom hay hærwi andza niŋe na, lele.

<sup>2</sup> Bazlam i Mbæloŋ mapala eye næte a gwad: «Ræhay ha gær a bæba yak ta may yak.» Niŋe na, makurre i bazlam i Mbæloŋ mapala eye a tsik ahæl niŋe a gwad na ta væliŋe wu aye.

<sup>3</sup> Wu nakæ a gwad: «Ma ta væliŋe, ta dæfæ ka ræhay ha gær aye na, wu tebiŋe ma giŋe lele hærwi yak. Ka ndziŋe ka mændzibæra haladzay.\*»

<sup>4</sup> Nækuroŋ bæba i wawa hay, kâ gumatay wu mandala eye a wawa kurom hay bay. Duh na, gumatay gær lele. Tætikumatay ada kætum tay andza nakæ Bæy Maduweŋ Yesu a dæ ha aye.

### *Beke ta ndo i gay tay hay*

<sup>5</sup> Nækuroŋ beke hay, ræhumatay ha gær a ndo i gay kurom hay ka mændzibæra nakay. Gæsumatay me ada dzædzarumatay. Gum mæsler tæ dærev kurom næte. Niŋe na, ka ræhumay ha gær na, a Kæriste.

<sup>6</sup> Kâ gum mæsler ka tæv dære tay dækdek tsa bay. Kâ gum mæsler hærwi ada tâ dæslakum ha gær dækdek tsa bay. Duh na, gum wu neheŋe a yay a gær a Mbæloŋ aye tæ dærev kurom næte hærwi nækuroŋ na, ndo i mæsler i Kæriste.

<sup>7</sup> Gumatay mæsler na, ta ŋgwalak andza nakæ faya ka gumeŋe mæsler na, a Bæy Maduweŋ aye bæna andza nakæ ka gumeŋe a ndo hay aye bay.

<sup>8</sup> Kwa nækar na, beke, kwa nækar beke eye bay, sær ha na, ta dæfæ faya ka giŋe mæsler lele eye na, Bæy Maduweŋ ma ta hamakeŋe a dæma.

<sup>9</sup> Nækuroŋ ndo i gay i beke hay, gumatay ŋgwalak a beke kurom hay dærmak. Kâ gumatay dæretsæseh bay. Særum ha nækuroŋ ta beke kurom hay na, nækuroŋ i Mbæloŋ næte bæna wal wal bay. Neŋgeŋe na, a ŋgæna tay ha ka bo bæra ndo hay tæbey.

### *Mæhæle wu hælŋe i Mbæloŋ*

<sup>10</sup> Wu nakæ na ndævakumeŋe naha mætsikakum aye na, ndzum madzapa eye ta Bæy Maduweŋ Yesu. Tærum gædanŋe eye hay hærwi gædanŋe ŋgay na, a ze kwa meŋe tebiŋe.

† 5:31 Madazlay i wu hay 2.24.

\* 6:3 Zæba ma mæ Madayaw abæra mæ Ezipt 20.12; Bazlam mapala eye masulo eye 5.16.



<sup>11</sup> Dzəwudum bo ta wu həlay i Mbəlom neheye a pakum aye tebiye hərwi ada Fakalaw mâ sla fakuma məvakum gər bay. Ka ndzumeye duwirre, ma sliye fakuma bay.

<sup>12</sup> Vəram nakə ka gəkweye na, ka gəkweye ka ndo hay bay. Ka gəkweye na, ta məsəfəre neheye lele bay aye hay ada ta bəy tay hay, ta neheye nəteye faya ta ləviye məndzibəra nakay manasa eye tə mezeleme aye. Ada ka gəkweye vərəm sa na, tə wu neheye lele bay aye, nəteye ta gədanj eye ma magərmbəlom aye.

<sup>13</sup> Hərwi niye, həlum wu i həlay i Mbəlom neheye a pakum a həlay aye tebiye hərwi ada pat i vərəm kə ndislew na, kə hwayum bay, ka gumeye vərəm hus ka mandəve nğay eye. Andza niye, ta sliye fakuma bay.

<sup>14</sup> Hərwi niye, ləvum bo. Tərüm ndo dedək eye hay. Wu neheye dedək eye hay aye na, andza petekəd nakə ka bərumeye ha bəzihud aye. Pumay bəzay a tsəved i Mbəlom hərwi tadə ka gum andza niye na, a təra andza petekəd i bəre nakə ka pumeye ka bo aye. Ma təkiye kurom abəra ka wu neheye lele bay aye hay.

<sup>15</sup> Ləvum bo pat pat ka mədə ha Labara Nğwalak eye nakə ma vəlatəye zay a ndo hay aye. Niye na, andza təhərak neheye ka pumeye a sik aye, hərwi ada ka ndzumeye ka tsəved i Mbəlom bənjbənj lele.

<sup>16</sup> Ma məsler kurom nakə ka gumeye tebiye aye na, pum mədzal gər kurom ka Bəy Maduweñ Yesu. Niye na, andza ka zlum nğaram a həlay. Səmbər i Fakalaw neheye ma mbaliye kurom ha aye ta ndziye fakuma bay. Kwa tadə səmbər niye hay ta ako eye faya bəbay na, nğaram ma mbatiye ha.

<sup>17</sup> Mətəme nakə Mbəlom a təma kurom ha aye na, andza mbəramdaw nakə ka pumiye a gər aye hərwi matəke na gər. Pum a gər ada zlum bazlam i Mbəlom. Nəngəye na, andza məslalam nakə Məsəfəre ma vəlakumeye, ka gumeye ha vərəm aye.

<sup>18</sup> Duwulumay me a Mbəlom tə dərev kurom tebiye pat pat. Gumay amboh ta gədanj i Məsəfəre Tsədanjəna eye. Kə ndzahərüm bay, kə gərüm ha maduwulay me a Mbəlom bay. Duwulumay me a Mbəlom pat pat hərwi ndo məpe mədzal gər hay ka Yesu tebiye.

<sup>19</sup> Duwulumay naha me a Mbəlom hərwi ga dərmak hərwi ada Mbəlom mâ vələnj wu nakə na tsikiye ada nâ də ha Labara Nğwalak eye nakə Mbəlom a dənj ha aye. Nâ də ha na, tə madzədzar eye bay.

<sup>20</sup> Kwa neñ ma danğay bəbay na, neñ ndo məsləre i Kəriste hərwi bazlam wədəye nakə faya na diye ha aye. Duwulumay me a Mbəlom hərwi ada nâ dzədzar bay, nâ də ha labara wədəye parakka andza nakə a say a Mbəlom nâ də ha aye.

### *Mandəve i bazlam*

<sup>21</sup> Tisik məlamar kway nakə na wudə aye na, nəngəye tə neñ faya nəmaa giye məsler i Bəy Maduweñ salamay. Faya ma giye məsler i Bəy Maduweñ tə marəhay ha gər ta dedək eye. Neñ mandza eye kənanj kəkay na, ma diye naha ma tsikakumeye.

<sup>22</sup> Neñ faya na sləriye naha ka təv kurom na, hərwi ada kə sərüm ha nəmay mandza eye kənanj na, kəkay, ada mâ makum ha dərev.

<sup>23</sup> Mbəlom Bəba ta Bəy Maduweñ Yesu Kəriste tə vəlatay zay a məlamar hay tebiye. Tə vəlatay mawudə bo, hərwi ada tə wudə bo nəte nəte mə walañ tay ada tə pa mədzal gər ka Yesu Kəriste huya.

<sup>24</sup> Mbəlom mâ pa nğama ka ndo neheye ta wudə Bəy Maduweñ kway Yesu Kəriste ka tor eye.

## Derewel nakə Pol a watsatay naha a Filipi hay aye Məfələkwe

Pol a pa məhay gər i ndo məpe mədzal gər hay ka Yesu a gəma i Filipi na, ahəl i mahəhele ŋgay masulo eye. Məhay gər niye na, makurre i məhay gər nakə Pol a pa ka dala i Erop aye.

Derewel i Pol faya ma diye ha ndo i Filipi hay tə Pol, məndze tay a ye lele. A say a Pol masəkah ha, mâ ge gədan eye lele. Ane tuk na, neŋgeye ma danğay. Faya ma siye dəretsətseh hərwi nakə kə gatay a gər a Filipi hay bay aye. A tsikatay mawudə bo ŋgay nakə a wudə tay ha aye.

A tsikatay sa na, wu nakə faya ma dzəmiye na aye. Hərwi ndo siye hay faya ta diye ha Kəriste ta tsəved nakə ŋgwalak eye bay aye. A satay masəpete tay ha (1.15-17; 2.21, 18). Pol faya ma dzaliye məsləre ndo neheye tə gawa ka bo məsler aye a Filipi hərwi t̄a ye, t̄a vələtay gədan ada mətsəne labara tay (2.19-30).

Ndo məpe mədzal gər hay ka Yesu ma Filipi ta slər wu kəriye a Pol (4.10-20).

Pol a tsikatay a Filipi hay ka sifa ta məməte i Yesu (2.6-11). Pol a gər ha wu nakə haḃe ma hutıye (3.3-10). Pol a təma məse dəretsətseh hərwi məpay bəzay a Yesu Kəriste. Neŋgeye ma danğay, ada maləva bo eye hərwi məvəle ha sifa ŋgay. Pol a tsikatay a Filipi hay t̄a pay bəzay a mede ŋgay (3.17; 4.9).

Pol a vələtay gədan a Filipi hay t̄a ndza huya ma mənğwese.

<sup>1</sup> Maa watsa naha dərewel nakay na, neŋ Pol ta Timote, nəmay ndo i məsler i Yesu Kəriste hay. Nəmaa tsikatay naha me a bagwar hay, a ndo mədzəne kurom hay ada a ndo məpe mədzal gər hay tebiye hay ka Yesu Kəriste ma Filipi.

<sup>2</sup> Mbəlom Bəba kway ta Bəy Maduweŋ kway Yesu Kəriste t̄a pa fakuma ŋgama ada t̄a vələkum zay.

### *Pol a gaway naha sisə a Mbəlom*

<sup>3</sup> Kwa kəday na dzalawa fakuma na, na gaway naha sisə a Mbəlom. Na gaway naha sisə pat pat hərwi kurom.

<sup>4</sup> Ahəl niye na dūwulaway me pat pat hərwi kurom na, dərev ga mənğwasa eye haladzay.

<sup>5</sup> Na gaway naha sisə a Mbəlom na, hərwi ka dzapakwa nəte ka məde ha Labara ŋgwalak eye. Ka dazlumay mədzəne ga na, pat niye kurre ka tərūm ndo məpe mədzal gər hay ka Yesu hus anəke aye.

<sup>6</sup> Maa dazlay məge məsler lele eye mə dərev kurom hay na, Mbəlom. Na sər ta dedək, neŋgeye na, ma gəriye ha ka manawa eye bay. Ma ndəviye ha məsler eye niye na, a pat nakə Yesu Kəriste ma maweye aye.

<sup>7</sup> Wu nakə na dzala andza niye hərwi kurom aye na, lele. Hərwi ka yumenğ a gər haladzay. Sa na, hərwi nəkurom tebiye tage neŋ Mbəlom kə gəkway ŋgwalak hərwi ada k̄a dzənum ga, kwa anəke neŋ ma danğay. Ada ahəl nakə na tsikawa labara i Yesu Kəriste kame i ndo məge sariya hay ada na dawatay ha labara nakay na, Labara ŋgwalak eye dedək.

<sup>8</sup> Mbəlom a sər na tsik na, na wudə kurom t̄ə dərev nəte. Na raw me bay, na tsik na, dedək. Mawudə bo aye niye na wudə kurom haladzay eye a yaw na, mənğay? A yaw na, ka t̄əv i Yesu Kəriste.

<sup>9</sup> Na dúwulaway naha me a Mbəlom hərwi kurom na, hərwi ada mawuđe bo i Mbəlom nakə ka wuđum bo mə walaŋ kurom aye, mâ səkah kame kame. Andza niye ka sərume ye dedək i Mbəlom, ada ka sərume ye ha ka bo bəra wu lele eye hay ta lele bay eye hay,

<sup>10</sup> Hərwi ada ka slumeye faya məzle wu neheye ŋgwalak eye hay. Andza niye pat nakə Kəriste ma maweye na, ka ndzumeye tsədaŋŋa, mənese fakuma bay.

<sup>11</sup> Nəkurom na, ka tərume ye ndo mäge wu neheye ŋgwalak eye ta gədaŋ i Yesu Kəriste. Ka gum andza niye na, ndo hay ta zambəde ye a Mbəlom ada ta dəslay ha gər.

### *Yesu na, a ze wu hay tebiye*

<sup>12</sup> Malamar ga hay, a seŋ na, sər um ha lele wu neheye tə ndzeŋ a gər kanaŋ aye na, düh ta dzəna məde ha Labara ŋgwalak eye.

<sup>13</sup> Hərwi niye sidzew neheye tebiye faya ta tsəpiye gay i bəy bagwar eye ta siye i ndo hay tebiye tə sar hay neŋ ma daŋgay na, hərwi nakə faya na giye məsler i Yesu Kəriste aye.

<sup>14</sup> Sa na, məgəse nakə tə gəs ga a daŋgay aye na, ka səkahata y ha mədza l gər ka Bəy Maduweŋ kway. Madzədzere kwa tsekweŋ andaya mə dərev tay sa bay. Faya ta diye ha bazlam i Mbəlom a ndo hay kame kame düh.

<sup>15</sup> Ane tuk na, siye hay mə walaŋ tay faya ta diye ha bazlam i Kəriste na, hərwi faya ta giye fagaya səlak. A satay maze ga ha. Ndo mekeleŋ eye hay na, tə da ha bazlam i Kəriste na, tə dərev nəte.

<sup>16</sup> Nəte ye tə ge andza niye na, hərwi ta wuđa ga. Tə sər ha maa sləra ga ahaya kanaŋ na, Mbəlom. A sləra ga ahaya na, hərwi ada nā tsikatay, nā dātay ha Labara ŋgwalak eye i Yesu na, Labara ŋgwalak eye dedək.

<sup>17</sup> Siye i ndo niye hay na, faya ta diye ha bazlam i Yesu Kəriste a ndo hay dərmak. Ayaw dedək ŋgway, ane tuk na, tə ge andza niye na, a satay maze ga, tə tsikawa tə dərev nəte eye dedək bay. A satay masəkeheŋ ha dəretsətseh kanaŋ ma daŋgay.

<sup>18</sup> Ane tuk na, niye na, ma ndeleŋeye daw? Ma ndeleŋeye bay. Kwa tadə tə tsik na, tə dərev nəte eye bay, kwa tə tsik na, tə dərev lele eye sadzak, na sər tə da ha na, bazlam i Kəriste. Neŋ na, dərev ga ma ŋgwasiye. Ayaw, ta dedək na ŋgwasiye huya kame kame andza nakay.

<sup>19</sup> Hərwi na sar ha na, wu neheye ta dzəniye ga mətəme ga ha hərwi faya ka dūwulumeye me hərwi ga ada Məsəfəre i Yesu Kəriste ma dzəniye ga.

<sup>20</sup> Wu nakə na wuđa haladzay aye ada na pa faya mədza l gər aye, faya na həbiye na, horoy ma ta geŋeye dadə bay. Dərev ga ta gədaŋ eye lele. Ada a seŋ na, kwa anəke, kwa kəday ndo hay tə dəslay gər a Yesu Kəriste hərwi ga. Kwa tadə neŋ andaya tə dəre, kwa tadə na mət na, tə dəslay gər andza niye.

<sup>21</sup> Hərwi tadə neŋ tə dəre mba na, na zambəde ye a Yesu Kəriste. Tadə kwa na mət bəbay na, na hutiy e magogoy ga.

<sup>22</sup> Ane tuk na, tadə kə ge andza niye, neŋ andaya tə dəre mba na, na giye məsler nakə ma dzəniye ndo hay aye. Mə walaŋ i bazlam neheye sulo aye na, a geŋ gərəŋ gərəŋ. Na zliye mə walaŋ eye wuray na, na sər bay.

<sup>23</sup> Wu neheye sulo aye na, ta ŋgəneŋ ha mədza l gər. A seŋ ha bə na, nā gər ha məndzibəra nakay. Na diye mata ndze tə Kəriste mə mbəlom. Andza niye ka neŋ na, ŋgwalak eye haladzay. A ze ha məndze nakə ka məndzibəra aye.

<sup>24</sup> Ane tuk na, məndze ga nakə na ndziye tə dəre aye na, ma giye ŋgama haladzay hərwi madzəne kurom.

<sup>25</sup> Ada na zəba faya na, ŋgwalak eye na, andza niye düh. Hərwi na sər ta dedək na ndziye ka məndzibəra mba. Ka ta ndzakweye ka təv manəte eye

tage năkurom. Ka ndzakweye ka tăv manăte eye na, na dzăniye kurom ka mede kame kame ka tsăved i Mbălom, hărwi ada đărev kurom mâ ge lanlan ka tsăved i Mbălom.

<sup>26</sup> Andza niye, ta găr ga ha abăra ma đanğay, na ye naha ka tăv kurom na, ka zambadumeye a Yesu Kăriste hărwi ga.

### *Măge đăretsătseh hărwi Yesu*

<sup>27</sup> Ŋgwalak eye na, mede kurom mâ ge lele hărwi ada ndo hay tâ zăba fakuma, faya ka pumeye bəzay na, a bazlam i Kăriste dedek. Ayaw! A seŋ kwa tadă na ye naha ka tăv kurom kăgəbay kwa na ye naha bay na, nă tsăne năkurom mandza eye na, bazlam kurom năte. Ada sa na, faya ka gumeye gədan tă đărev kurom năte andza ndo măge vərəm hay hărwi ada Labara Ŋgwalak eye i Yesu mâ ye kame kame.

<sup>28</sup> Kă dzədzarumatay a ndo măne đăre kurom bay tebiye. Tadă ka dzədzarumatay bay na, ta səriye ha lele năteye kame i Mbălom na, ta dze. Ane tuk na, năkurom na, Mbălom kə mbəl kurom ha. Mata bəzatay ha niye na, Mbălom.

<sup>29</sup> Hărwi Mbălom a gakum ŋgwalak na, ada kă dzalum ha ka Kăriste đekdek tsa bay. A gakum ŋgwalak na, hărwi ada kă gum đăretsătseh hărwi ŋgay đərmak.

<sup>30</sup> Năkurom ka ŋgatumay a vərəm nakə na ge ahəl niye aye. Anəke na, faya ka tsənumeye neŋ faya na giye andza niye huya. Aya! Năkurom đərmak ka gumeye vərəm nakə neŋ faya na giye.

## 2

### *Tərum na, andza Yesu*

<sup>1</sup> Năkurom ka sərūm ha năkurom madzapa eye năte tă Yesu Kăriste. Andza niye neŋgeye ma vəlakumeye gədan ka đărev kurom hay. Mawudə bo ŋgay nakə a wudă kurom aye na, ma makumeye naha đărev segey. Sərūm ha năkurom madzapa eye năte ta Məsəfəre Tsədanŋa eye. Ada ka wudum bo mə walaŋ kurom năte năte bəđaw? Ndo hay tă gakum mə bo, na gwad ba?

<sup>2</sup> Kə ge andza niye na, wudum bo mə walaŋ kurom năte năte. Mədzal găr kurom mâ ge năte. Məndze kurom mâ ge năte, ada bazlam kurom mâ ge năte mâ ye ka bo ayaw ayaw. Tadă ka gum andza niye na, đărev ga ma ŋgwasiiye, ma deyeŋeye a găr kurah kurah.

<sup>3</sup> Kă dzalum ka bo kurom đekdek tsa bay. Kă đəslumay ha găr a bo bay. Duh na, hənūm ha găr kurom. Zăbum ka siye i ndo hay na, ndo neheye lele ta ze kurom aye.

<sup>4</sup> Kwa way mâ gay ŋgwalak a ndo hay. Kă pəlumay wu lele eye a găr kurom đekdek tsa bay. Ka gum wu neheye tebiye andza nakay na, đărev ga ma rahiye tă mənğwese.

<sup>5</sup> Đărev kurom mâ tăra na, andza i Yesu Kăriste.

<sup>6</sup> Kwa Yesu năteye năte ta Mbălom bəbay na,  
kə ləva ha găr ŋgay ta Mbălom bay.

<sup>7</sup> Duh na, kə găr ha tăv məndze nakə lele eye,  
ka tăra ndo i məsler.

Tə wa na andza ndo zezeŋ nakə tə wa na aye đərmak.

Ahəl nakə a tăra ndo zezeŋ aye na,

<sup>8</sup> a hana ha găr ŋgay.

A gəsay me a Mbălom hus ka məmăte sa!  
Məməte ŋgay niye a mət aye na,

ta dar na ka mayako mazlɛmbaɗa eye.

<sup>9</sup> Hərwi niye, Mbəlom a pa na ka gər i wu hay tebiye.

Kə pa faya məzele nakə a ɗa zɛm a ze məzele i wu hay tebiye aye.

<sup>10</sup> A ge andza niye na, hərwi ada wu hay tebiye kwa mə mbəlom, kwa kanan ka mändzibəra, kwa ma bəd

ta tsəne məzele i Yesu na, nəteye tebiye tɑ yaw tɑ ɗəkway gurmets.

<sup>11</sup> Kwa way ma tsikiye tə bazlam ηgay Yesu Kəriste na,

Bəy Maduwerη ka gər i wu hay tebiye.

Andza niye ta zambaɗeye a Bəba ηgay Mbəlom ɗərmak.

### *Mede i ndo mape madzal gər hay a Yesu ka mändzibəra*

<sup>12</sup> Nəkurom dzam ga neheye na wuda kurom haladzay aye, Yesu Kəriste a gəsay me a Mbəlom kəkay na, nəkurom ka sərɛm ha lele. Andza niye, nəkurom ɗərmak gəsɛmay me a Mbəlom. Ahəl niye neη ka təv kurom na, ka rəhawumay ha gər. Kwa anəke neη andaya ka təv kurom sa bay bəbay na, səkahum ha marəhay ha gər kame kame. Andza mægweɗe na, mətəme nakə Mbəlom a təma kurom ha aye na, gum məsler eye tə həlay kurom eye ɗərmak. Ka gumeye na, tə madzədzere i Mbəlom.

<sup>13</sup> Hərwi Mbəlom faya ma giye məsler mə ɗərev kurom hərwi ada kɑ wudum wu neheye a yay a gər aye ada ma vələkumeye gəɗaη hərwi ada kɑ gum wu neheye a yay a gər aye ɗərmak.

<sup>14</sup> Ma məsler kurom nakə ka gumeye tebiye na, kɑ sum me bay, kɑ tərɛm a bo bay,

<sup>15</sup> hərwi ada ka ndzumeye tsəɗaηηa mənese fakuma bay, ada ka tərɛmeye wawa i Mbəlom neheye ta giye mənese bay aye. Nəkurom mandza eye na, mə walaη i ndo neheye faya ta səpatiye ndo hay aye. Tə pay bəzay i tay na, a tsəweɗ nakə lelebay aye. Nəkurom ka ndzumeye mə walaη tay na, andza wurzla neheye ta ɗəv dzaydzay ka magərmbəlom aye.

<sup>16</sup> Ada sa na, ka tsikumateye bazlam nakə ma vəliye məsəfəre a ndo hay aye. Taɗə ka gum andza niye na, pat nakə Yesu Kəriste ma maweye na, na ta zɛlapiye haladzay kame ηgay hərwi kurom. Na ta zɛlapiye hərwi kurom na, hərwi na ta səriye ha məsler nakə na ge mawura bo eye na, ka təra kəriye bay.

<sup>17</sup> Madzal gər kurom nakə ka dzalum ha ka Mbəlom aye na, a təra wu nakə ka kəɗawumay a Mbəlom kəriye aye. Agəla ta kəɗiye ga na, ma təriye mambəɗe ha bambaz andza wu kəriye niye ka kəɗawumay a Mbəlom aye ɗərmak. Kə ge andza niye na, ma deyeηeye a gər haladzay, na ηgwasiye tage nəkurom tebiye.

<sup>18</sup> Nəkurom ɗərmak na, mā yakum a gər, ηgwasakwa ka bo tage neη.

### *Pol a slər Timote ta Epafrodit*

<sup>19</sup> Taɗə kə say a Bəy Maduwerη kway Yesu na, na sər ha mazlambar na slərakum naha Timote, hərwi ada kə maw ka təv ga na, nəkurom mandza eye kəkay na, ma ɗeηeye ha, ada ma meηeye ha ɗərev andza nakə ma diye naha ma makumeye naha ɗərev aye ɗərmak.

<sup>20</sup> Kanaη na, ndo andaya madzal gər may nəte andza neηgeye na, andaya bay, say neηgeye nəte ηgweη. Ta ɗeɗək neηgeye na, a say madzəne kurom.

<sup>21</sup> Ndo siye hay tebiye tə dzala na, ka bo tay ɗəkɗək tsa bəna, tə dzala ka məsler i Yesu Kəriste bay.

<sup>22</sup> Ka sərɛm ha Timote na, ka bəz ha neηgeye ɗa kə sla. Neη tə neηgeye, nəmay salamay nəmaa ɗawa ha Labara Nəwalak eye. Faya ma dzəniye ga ka mäge məsler andza wawa nakə faya ma dzəniye bəba ηgay aye.

<sup>23</sup> Andza niye a seŋ na slərakumeye naha. Ane tuk na, na həbiye ta ɲɣənən ha sariya ga təday.

<sup>24</sup> Neŋ dərmak, na sər ha ta dedək Bəy Maduweŋ ma vəleŋeye tsəved hərwi mede naha ka təv kurom.

<sup>25</sup> Nəkurom ka sərüm ha malamar kway Epafrodit, ndo məsləre kurom nakə ka slərumeye hərwi ada mǎ dzəna ga tə wu neheye andaya fagaya bay aye na, neŋ tə neŋgeye nəmaa ge məsler salamay. Nəmaa ge məsler ta gədaŋ tə neŋgeye salamay hərwi bazlam i Mbəlom. Na dzala anəke na, ɲgama mǎ ma naha ka təv kurom.

<sup>26</sup> Kə gay wadəŋ wadəŋ haladzay hərwi a tsəne tə gwad ka tsənum neŋgeye kə dəd a dəvats. Hərwi niye hawa kurom eye a gay haladzay, a say mede naha mənɣatakum.

<sup>27</sup> Andza nakə ka tsənum aye na, dedək kə dəd a dəvats, ka bərəzl. Ane tuk na, a gay mə bo a Mbəlom. Mbəlom kə mbəl ha. Maa gay mə bo a Mbəlom na, neŋ dərmak. Mbəlom a mbəl ha na, andza a mbəl ha na, neŋ, hərwi ada dəretsətseh mekeleŋ eye mǎ yaw fagaya bay.

<sup>28</sup> Hərwi niye, a seŋ mǎ ma naha ta bəse ka təv kurom, hərwi ada ahəl nakə ka ɲgatumay na, ka ɲgwasumeye, ada neŋ nǎ dzala wuray sa bay.

<sup>29</sup> Ayaw! Ki ye naha na, təmum na lele. Təmum na tə mənɣwese, hərwi neŋgeye na, malamar kurom ka tsəved i Bəy Maduweŋ. Slala i ndo andza nakay na, dəsłumay ha gər.

<sup>30</sup> Na tsik andza niye na, hərwi neŋgeye na, a zəkaw tsekweŋ ma mətiye hərwi məsler i Kəriste. Neŋgeye a zla na, təv mǎndze kurom. Kə sər mǎdze ha məsəfəre ɲgay hərwi ada mǎ dzəna ga andza nakə tadə nəkurom kanan na, ka dzənumeye ga aye.

### 3

#### *Matəre tsədaŋɲa kame i Mbəlom na, kəkay?*

<sup>1</sup> Malamar ga hay wu nakə na ndəvakumeye naha mətsike aye na, anan: ɲgwasum hərwi nəkurom na, ndo i Bəy Maduweŋ hay. Na diye gər məwatsakum naha wu nakə bə na watsakum naha tsiy aye bay. Na masakumeye naha məwetse sa, ma dzəniye kurom hərwi ada wuray mǎ gakum bay.

<sup>2</sup> Gum metsehe kame i ndo neheye faya ta giye məsler ɲgwalak eye bay aye. Nəteye faya ta kwasatay ha gər a ndo hay ta mǎgwedə dəsüm bo.

<sup>3</sup> Ta dedək mədəsa bo eye na, nəkway bəna, nəteye bay. Maa təra ndo i Mbəlom hay na, nəkway. Nəkway sa na, ka dūwłakway naha me a Mbəlom ta gədaŋ i Məsəfəre Tsədaŋɲa eye, ada ka zambadawakway a Yesu Kəriste. Nəkway na, ka pakway zləm a wu nakə ndo zezeŋ ma giye bay.

<sup>4</sup> Tadə kə ge wu i ndo zezeŋ faya ma giye lele na, ha bə neŋ dərmak na piye faya zləm. Tadə ndoweye kə gwadəy a gər ɲgay lele məpay zləm a wu i ndo zezeŋ nakə ma giye na, neŋ na sər ha, i ga nakə na tsikiye na, ma ziye i ɲgay.

<sup>5</sup> Hərwi neŋ na, ndo i Yahuda dədaŋ eye. Mawa ga na, Yahuda hay. Sa na, neŋ wawa i Israyel hay, ada tə wa ga ma gwala i Bəndzameŋ. Ahəl nakə tə wa ga, na həna məhəne tasəla matsamahkar eye na, tə dəs bo ga. Tadə ta tsətsahiye fagaya ka gər i bazlam i Yahuda hay mapala eye na, neŋ mə walan i Farisa hay.

<sup>6</sup> Neŋ na, na pay bəzay a kule i Yahuda hay lele. Na təkay dəre tə tsəbtsəb eye hus ka məgatay dəretsətseh a məhay gər i ndo məpe mǎdzal gər hay ka Yesu Kəriste. Tadə bazlam i Yahuda hay mapala eye mǎ təra ha ndo lele kame i

Mbəlom na, na sliye faya haḅe mægwaḁakum neŋ na, mənese andaya kwa tsekweŋ faɣaya bay.

<sup>7</sup> Wu niye hay na zəbawa faya ahəl niye na, andza magogoy ga. Ane tuk na, na sər ha wu niye ŋgama andaya mə dəma bay hərwi ada nâ huta mədzepe tə Yesu Kəriste duh.

<sup>8</sup> Ayaw! Na mbəḁay dəba a wu niye hay tebiye na, hərwi na sər ha Yesu Kəriste na, Bəy Maduweŋ ga. Niye na, a ze wu hay tebiye. Na mbəḁay dəba a wu hay tebiye na, hərwi Yesu Kəriste. Na zəba ka wu niye hay na, andza mandzak hərwi ada nəmaā dzapa tə Yesu Kəriste

<sup>9</sup> ada nâ ndza mə həlay ŋgay. Na gwadiye neŋ lele kame i Mbəlom hərwi nakə na rəhay ha gər a bazlam i Yahuda hay mapala eye na, daḁa na tsikiye bay. Wu nakə a tərə ga ha lele kame i Mbəlom aye na, nakə na pa mədzal gər ka Yesu Kəriste aye. Maa tərə ga ha ndo lele eye na, Mbəlom hərwi na dzala ha ka neŋgeye.

<sup>10</sup> Wu nakə a yeŋ a gər haladzay aye na, nəte ŋgweŋ tsa. A seŋ na, məsəre Yesu ta gədaŋ ŋgay nakə a lətse ahaya abəra ma mədahaŋ aye. A seŋ sa na, məse dəretsətseh andza neŋgeye nakə a sa dəretsətseh aye, na mətiye andza neŋgeye nakə a mət aye dərmak.

<sup>11</sup> Andza niye hərwi ada taḁə kəkay kəkay bəbay na, Mbəlom ma ta mbəla ga ahaya abəra ma mədahaŋ.

### *Mahway hərwi məhute wu nakə kame aye*

<sup>12</sup> Kwa wu neheye na tsik tebiye aye na, na gwadiye na huta tsiy na, na tsikiye bay. Ada mægweḁe neŋ lele na sla tsiy na, na tsikiye bay. Duh na, na giye gədaŋ mede kame kame hərwi ada nâ huta tay ha wu niye hay a həlay ga. Na giye andza niye na, hərwi Yesu Kəriste kə zla ga a hud i həlay ŋgay. Na tərə ndo ŋgay.

<sup>13</sup> Ayaw malamar ga hay, wu niye hay na tsik aye ta tərə i ga tsiy na, na tsikiye zuk bay. Ane tuk na, wu nakə na giye na, nəte ŋgweŋ tsa. Na gər ha wu neheye ma dəba ga aye tebiye. Duh na giye gədaŋ na, mede kame kame hərwi ada nâ huta wu nakə kame aye.

<sup>14</sup> Andza niye neŋ faya na hwiye ndirndir ka məndisle ka kokway nakə na ndisliye a dəma aye. Na hwiye na, mata hute magogoy ga nakə Mbəlom a zeleŋ faya ma ta vəleŋ aye. Magogoy aye niye ma ta vəleŋ aye na, mede mata ndze tage neŋgeye hərwi Yesu Kəriste.

<sup>15</sup> Nəkway neheye məsəra eye hay ka tsəveḁ i Mbəlom aye na, mədzal gər kway mā ge na, andza niye. Taḁə ndoweye kə dzala wu mekeleŋ eye wal na, Mbəlom ma bəzakumeye ha parakka.

<sup>16</sup> Wu nakə bagwar eye ka gakweye na, zəŋgalakwa tsəveḁ nakə ka zəŋgalakwa hus anəke aye. Kā gərakwa ha bay.

<sup>17</sup> Nəkurom malamar ga hay, nəkurom tebiye zəŋgalum na, təv sik ga. Zəbum ka mede i ndo neheye mede tay lele andza mede may nakə nəmaadəkum ha aye.

<sup>18</sup> Hərwi ndo siye hay haladzay mede tay faya ma bəziye ha, nəteye na, faya ta neye dəre a Kəriste nakə a mət ka mayako mazləlmbaḁa eye. Wu neheye na, bā na tsikakum madzəga haladzay. Na məsakumeye ha mətsikakum sa. Faya na tsikakumeye naha anəke na, tə mətuwe eye.

<sup>19</sup> Pat nakə məndzibəra ma ndəviye na, Mbəlom ma dziye tay ha. Mbəlom ma dziye tay ha, hərwi ta wuḁa məpay bəzay a Mbəlom təbey. Tə pay bəzay i tay na, a wu neheye mevel tay a wuḁa aye. Faya ta giye wu nakə a ge horoy aye, bo tay aye na, a ye tay a gər haladzay. Tə dzala na, ka wu i məndzibəra dekdek tsa.



<sup>20</sup> Nəkway na, ka pəlakweye məge wu niye hay təbey. Nəkway gay kway na, mə mbəlom. Nəkway faya ka həbakweye ndo mətəme ha ndo, Bəy Maduweŋ kway Yesu Kəriste nakə ma mbəzlaweeye mə mbəlom mata dzəgər tage nəkway aye.

<sup>21</sup> Ki yaw na, ma mbəfəkweye ha bo kway nakay bəle eye hərwi ada bo kway mâ tərə gədanj eye andza bo ŋgay. Ma giye wu nakay ta gədanj nakə ma giye ha məsler hərwi məpe tay ha wu hay tebiye a huvo ŋgay.

## 4

### *Mətsikatay me a zləm a ndo hay*

<sup>1</sup> Kə ge andza niye na, malamar ga hay, ndzum ta gədanj eye bəŋbəŋ lele mə həlay i Bəy Maduweŋ kway. Nəkurom na, ka yumenj a gər haladzay. Hawa kurom a geŋ, a seŋ məŋgatakum. Dərev ga faya ma ŋgwasiye haladzay tə nəkurom. Nəkurom ka tərūm na, magogoy i məsler ga nakə na ge aye.

<sup>2</sup> A nəkurom Evodi ta Siŋtis neŋ faya na gwadəkumeye amboh, ndzum na, ayaw ayaw, bazlam kurom mâ ge nətə, hərwi nəkurom mandza eye na, mə həlay i Bəy Maduweŋ kway.

<sup>3</sup> A nəkar dzam ga nakə faya ka gameye məsler i Mbəlom nətə aye. Neŋ faya na gwadəkəye naha dərmak, dzəna tay ha ŋgwas niye hay, tâ ndza ayaw ayaw mə walanj tay. Hərwi neŋ tage nətəye na, nəmaa ge vərəm haladzay hərwi ada Labara Ŋgwalak eye mâ ye kame kame, ndo hay tâ tsəne. Məsler niye nəmaa ge aye na, nəmay tebiye tage ŋgwas niye hay tage Kələnenj ada ta ndo siye hay, nəmaa ge ka bo məsler dziye. Nətəye tebiye tay aye, Mbəlom kə watsa məzele tay a derewel ŋgay nakə a watsa a dəma məzele i ndo neheye ta huta sifa aye.

<sup>4</sup> Ŋgwasum pat pat hərwi nəkurom mandza eye na, mə həlay i Bəy Maduweŋ kway Yesu Kəriste. Neŋ faya na gwadəkumeye sa: Ŋgwasum.

<sup>5</sup> Ndo i mändzibərə hay tebiye ta zəba ka mede kurom na, faya ka təmum ndo hay lele ada faya ka gumateye ŋgwalak. Sərūm ha na, mazlambar Bəy Maduweŋ kway kə ndzew. Mâ mətsakum gər bay.

<sup>6</sup> Wuray kwa tsekweŋ mâ dzəma kurom bay tebiye. Duh na, tsətsahum wu nakə a sakum ada andaya fakuma bay aye ka Mbəlom. Tsətsahum na, ta məgay naha amboh, mâ dzəna kurom ada gumay naha sisə dərmak.

<sup>7</sup> Yawa! Ka gum andza niye na, Mbəlom ma vəlakumeye mändze zay mə dərev kurom hay. Zay niye ma vəlakumeye na, a ze wu nakə ndo hay ta sər aye. Neŋgeye na, ma tsəpiye dərev kurom ta mədzal gər kurom hay hərwi ada wuray kwa tsekweŋ mâ gakum bay. Hərwi nəkurom na, mandza eye mə həlay i Yesu Kəriste.

<sup>8</sup> Malamar ga hay, wu nakə a zəkaw na ndəvakumeye naha mətsike aye na, anəŋ: Dzalum na, ka wu neheye ŋgwalak aye hay, nakə ndo hay ta dəslay gər aye, wu neheye dedək eye, a wu neheye ka rəhakway ha gər aye, a wu neheye maraw me andaya mə dəma bay aye, a wu neheye tsədəŋŋa aye, a wu neheye a yatay a gər a ndo hay aye ada a wu neheye ta zambadaway aye. Gumatay metsehe na, a wu neheye anəŋ aye.

<sup>9</sup> Gum məsler na, tə wu neheye na tətikakum aye, wu neheye ka təmum aye, wu neheye ka tsənūm mə bazlam ga na tsikakum aye, ada wu neheye kə ŋgatumay tə dəre kurom neŋ na ge aye. Ka pumay bəzay na, Mbəlom nakə ma vəlakweye mändze zay aye na, ma ndziye tə nəkurom.

### *Pol a gatay sisə a Filipi hay hərwi madzəne nakə tə sləray naha aye*

<sup>10</sup> Na gay sisə a Bəy Maduweŋ kway Yesu Kəriste ada dərev ga kə ŋgwasa haladzay hərwi ka dzalumaw fagaya sa. Həbe kurre na, ka dzalum fagaya

ngway. Ane tuk na, ka hutum həlay eye madzəne ga ada kə ndza haladzay nakə ka dzənum ga bay aye.

<sup>11</sup> Na tsik andza niye na, hərwi nakə wu andaya fagaya bay aye na, bay. Hərwi kwa tadə wu andaya, kwa andaya bay na, na tətik mändze tə mənğwese eye.

<sup>12</sup> Na sər mändze ma mətawak, na sər mändze mə wu nakə ndasassa aye. Na sənəka mändze ta mənğwese eye kwa mə dəretsətseh waray waray. Na sənəka mərəhe ta wu mənday ada na sənəka mändze tə may. Na sənəka mändze tə wu haladzay ada tə wu tsekweŋ eye.

<sup>13</sup> Na sliye faya madəme wu neheye tebiye na, ta gədan i Yesu Kəriste nakə a vələŋ aye.

<sup>14</sup> Kwa tadə andza niye bəbay na, madzəne nakə ka dzənum ga anəke ahəl nakay anan j neŋ mə dəretsətseh aye na, ka gum lele.

<sup>15</sup> Nəkurom ndo i Filipi hay, sərur ha na, ahəl nakə na dazlay mədəkum ha Labara Nğwalak eye kurre hüs ahəl nakə na lətse, na ye abəra ma Masedowan aye na, maa dzəna ga na, nəkurom dəkdək bəna, siye i ndo məpe mədzał gər hay ka Yesu na, ta vələŋ wuray bay.

<sup>16</sup> Ahəl nakə neŋ ma wuzlahgəma i Tesalonik aye na, 6a sik haladzay ka slərurmeŋ naha wu nakə andaya fagaya bay aye.

<sup>17</sup> Neŋ faya na pəliye tsəved ada ka vəlumeŋ wu bay. Na tsik andza niye düh na, dərev kə nğwasa hərwi na sər ha Mbəlom ma piye fakuma nğama hərwi madzəne nakə ka vəlumeŋ aye.

<sup>18</sup> Na nğatay a wu nakə ka sləruma ahaya Epafrodit aye. Ka vəlumeŋew na, haladzay, wuray a kətseŋ sa bay. Wu neheye ka vəlumeŋew aye na, lele andza wu kəriye nakə tə fəkaway naha a Mbəlom a ze huŋŋa a yay a gər haladzay aye.

<sup>19</sup> Mbəlom na, məzla6 eye, a ləva wu hay tebiye, wuray a kətsay bay. Neŋgeye ma vəlakumeye wu nakə a kətsakumeye tebiye. Ma vəlakumeye na, tə həlay i Yesu Kəriste.

<sup>20</sup> Ndo hay tâ zambaday a Mbəlom Bəba kway ka tor eye. Mâ təra andza niye.

<sup>21</sup> Tsikumataŋ me a ndo məpe mədzał gər hay ka Yesu tebiye tə məzele i Yesu Kəriste. Malamar neheye ka təv ga kanan j aye ta tsikakum naha me dərmak.

<sup>22</sup> Siye i ndo məpe mədzał gər hay ka Yesu tebiye ta tsikakum naha me dərmak. Maa tsikakum naha me wene wene eye na, ndo neheye ma bədgay i bəy i Roma aye.

<sup>23</sup> Bəy Maduweŋ kway Yesu Kəriste mâ pa fakuma nğama.

## Derewel **nakə Pol a watsatay naha a** **Kolosi hay** **aye** **Məfələkwe**

Kolosi na, wuzlahgəma nakə ta diye i mægəma i Azi aye, bəgom na, tə zalay Turki. Pol ki ye a dəma, mata zəbatayaw dəre a ndo məpe mədzal gər hay ka Yesu dāda bay. Maa pa məhay gər i ndo məpe mədzal gər hay ka Yesu a dəma na, Epafəras nəte mə walaŋ i ndo neheye tə gawa ka bo məsler aye (1.7; 4.12).

Pol a tsəne ndo hay faya ta səpatiye tay ha ndo məpe mədzal gər hay ka Yesu ma gəma i Kolosi, a watsa tay naha derewel.

Gər i bazlam eye anaŋ: Kəriste ma təmiye tay ha ndo hay abəra ma gədaŋ i ndo məne dəre.

Pol a dazlay kəreh mə derewel ŋgay (1.1–2.5), dəmes mazambaɗay a Kəriste hərwi andza neŋgeye Bəy Maduweŋ i məndzibəra ada i ndo məpe mədzal gər hay (1.15–20). Ka ndzay a gər a dəmes na, maɗuwule me andaya ka gər i Kolosi hay (1.3–14). Ma dəba i dəmes na, Pol a ma ahaya a zləm vərəm ŋgay nakə a ge hərwi ndo məpe mədzal gər hay aye (1.24–2.5).

Ma dəba eye, Pol a gwadaɗay a Kolosi hay tā ge metsehe (2.6–23).

Ka mənɗəve eye na, derewel nakay faya ma vəlatəye gədaŋ ka mənɗe ma sifa weɗəye mə walaŋ i ndo hay, ma bəɗgay tay hay ada ma mənɗeɗe ta ndo hay (3.1–4.6).

Derewel nakay a ndəv ta mətsike me (4.7–18).

<sup>1</sup> Neŋ Pol nakə Mbəlom a zla ga hərwi ada nā təra ndo i maslaŋ i Yesu Kəriste aye. Neŋ ta Timote malamar kway, nəmaa watsakum naha derewel nakay.

<sup>2</sup> Nəmaa watsa naha na, a nəkurom ndo məpe mədzal gər hay ka Yesu neheye ma Kolosi aye. Nəkurom malamar may neheye maɗzapa eye tə Yesu Kəriste, nəkurom faya ka puməye bəzay a neŋgeye aye. Mbəlom Bəba kway mā pa fakuma ŋgama ada mā vəlakum zay.

<sup>3</sup> Nəmaa ɗuwulaway naha me a Mbəlom Bəba i Bəy Maduweŋ kway Yesu Kəriste hərwi kurom. Pat pat nəmaa ɗuwulaway naha me andza niye, nəmaa gaway naha sisəe hərwi kurom.

<sup>4</sup> Nəmaa gaway naha sisəe hərwi nəmaa tsəne na, nəkurom faya ka dza-luməye ha ka Yesu Kəriste ada ka wuɗum ndo məpe mədzal gər hay ka Yesu tebiye ɗərmak.

<sup>5</sup> Ka gum andza niye na, hərwi ka pum mədzal gər kurom ka wu neheye Mbəlom a ləva ha bo, ma ta vəlakuməye mə mbəlom aye. Tə ɗakum ha wu nakə Mbəlom a gwad ma ləviye ha bo hərwi kurom aye na, ahəl nakə ka tsənum Labara ŋgwalak eye niye dedek aye.

<sup>6</sup> Labara nakay ŋgwalak eye faya ma diye a zləm ka məndzibəra tebiye, faya ma vəliye hohway andza gərɗaf nakə a wa hohway aye ada a gəl kame kame aye. Andza niye, faya ma diye kame kame mə walaŋ kurom kwa a pat nakə ka tsənum kurre aye, nakə Mbəlom kə pa fakuma ŋgama ta dedek aye hus bəgom.

### *Mətsike me*

<sup>7</sup> Maa lah məɗakum ha Labara ŋgwalak eye nakay na, Epafəras. Neŋgeye na, dzam may, nəmay ta neŋgeye faya nəmaa giye məsler i Yesu Kəriste ka bo

dziye. Neŋgeye faya ma giye mäsler i Yesu Käriste tə dərev ŋgay peteh, faya ma giye mäsler mə gay kurom na, a bəram may.

<sup>8</sup> Maa tsikamay ma kəkay nakə Məsəfəre i Mbəlom a vələkum gədanj ka mawuđe siye i ndo kurom hay aye na, neŋgeye.

<sup>9</sup> Hərwi niye kwa a pat nakə nəmaa tsəne labara kurom aye na, nəmaa gər ha mađuwulay naha me a Mbəlom hərwi kurom bay. Nəmay faya nəmaa duwulay naha me a Mbəlom na, m̄a dākum ha wu nakə a yay a gər aye parakka ada k̄a sərūm, k̄a hutum metsehe nakə Məsəfəre ŋgay ma vəliye aye, ada k̄a tsənum wu neheye ka tsəved ŋgay aye.

<sup>10</sup> Tə metsehe niye na, ka slumeye mändze andza nakə a say a Bəy Maduweŋ Yesu Käriste aye ada ka gumeye wu neheye tebiye a yay a gər aye. Ka gumeye wu neheye ŋgwalak eye wal wal tebiye ada ka səkahumeye məsəre Mbəlom kame kame.

<sup>11</sup> Nəmay faya nəmaa duwulay naha me sa na, hərwi ada m̄a vələkum gədanj ŋgay nakə a ze kwa mey aye hərwi ada k̄a ndzum bəŋbəŋ lele, hərwi ada ka səmumeye naha tə zayzay nakə mə dərev kurom aye ada dərev kurom ma ŋgwasiye dərmaκ.

<sup>12</sup> Gumay sisə a Mbəlom nakə a vələkum gədanj aye hərwi ada k̄a hutum wu nakə a ləva ha bo hərwi ndo ŋgay hay ka təv nakə dzaydzay ŋgay a dəv aye.

<sup>13</sup> Mbəlom bəba kway kə mbəl kway ha hərwi ada k̄a təmakwaw abəra ma bəy i ləvonj, a pa kway a təv i mələve bəy i mändərkwasla i wawa ŋgay.

<sup>14</sup> A mbəđakway ahaya abəra mə həlay i Fakalaw na, tə həlay i wawa ŋgay niye ada a pəsəkway ha mənese kway hay dərmaκ.

### *Dəmes i mazambađay a Käriste Bəy Maduweŋ i mändzibəra*

<sup>15</sup> Ndəray andaya kə ŋgatay a Mbəlom bay,  
ane tuk na, Yesu Käriste nakə ndo hay tə ŋgatay aye na, a ndzəkət bo Mbəlom,

Mbəlom neŋgeye kəkay na, faya ma dəkweye ha.

Neŋgeye bagwar eye ka gər i wawa i Mbəlom hay tebiye.

A ze wu neheye tebiye Mbəlom a ge aye.

<sup>16</sup> Hərwi Mbəlom a ge wu hay tebiye na, tə həlay ŋgay,  
wu neheye mə mbəlom aye ta wu neheye ka dala aye,  
wu neheye dəre a ŋgatay aye

ta wu neheye dəre a ŋgatay bay aye.

Wu neheye ta gədanj eye hay mə mbəlom aye,  
kwa bəy i gawla i Mbəlom hay ada bagwar tay dərmaκ  
Mbəlom a ge tə həlay ŋgay.

Wu neheye tebiye na, Mbəlom a ge tay ha tə həlay i wawa ŋgay  
ada wu neheye a ge tebiye aye na, i ŋgay hay.

<sup>17</sup> Neŋgeye na, andaya kwa ahəl nakə Mbəlom kə ge mändzibəra zuk bay aye,  
wu hay tebiye na, mə həlay ŋgay ada maa gəs tay ha ka təv manəte eye na, neŋgeye.

<sup>18</sup> Neŋgeye bəy i məhay gər i ndo məpe mədzal gər hay.  
Maa ləva tay na, neŋgeye andza gər nakə a ləvay gər a bo aye.  
Ndo məpe mədzal gər hay ka Yesu na, andza bo ŋgay.

Makurre na, neŋgeye,  
maa lətsəw abəra ma mədahanj kurre na, neŋgeye,  
nakay na, andza məgwəđe neŋgeye ka gər i ndo hay tebiye ada ka gər i wu hay tebiye.

- <sup>19</sup> Wu neheye tebiye mæ dærev i Mbəlom aye na, mæ dærev i Kəriste tebiye dərma, hərwi a yay a gər andza niye.
- <sup>20</sup> A say a Mbəlom na, wu hay tebiye tã sər bo ta neŋgeye tã hələy i wawa ŋgay, wu neheye ka dala aye ada wu neheye mæ mbəlom aye, ada mændze zay andaya ma wuzlah i ndo hay tã neŋgeye.  
A ge niye na, tã bambaz i wawa ŋgay nakə ta dar na ka mayako mazləmbada eye.
- <sup>21</sup> Ahəl niye nəkurom na, dərəŋ ta Mbəlom, nəkurom ndo mæne dære ŋgay hay, hərwi ka dzalawum ka wu neheye lele bay aye, ka gawum wu neheye lele bay aye.
- <sup>22</sup> Ane tuk na, anəke na, Mbəlom kə ma kurom ahaya ka təv ŋgay ta məmæte i wawa nakə a tərã ndo zezəŋ a mət aye. A ge andza niye na, hərwi ada kã ndzum tsədəŋŋa, ka slumeye faya mələtse kame i Mbəlom mənese kwa tsekweŋ andaya fakuma bay. Ndərəy ma sliye faya məmækum ha mənese bay.
- <sup>23</sup> Lele na, dzalum ka Yesu huya ada ndzum bəŋbəŋ, kã dagwarum bay, pum mædzal gər kurom ka wu neheye ka tsənum ma Labara Ŋgwalak eye. Labara Ŋgwalak eye nakay na, ta tsikay kwa a way ka mændzibərə nakay. Neŋ Pol, ndo i mæsler i Mbəlom hərwi mædatay ha a ndo hay dərma.

### *Mæsler nakə Mbəlom a vəlay a Pol aye*

- <sup>24</sup> Anəke na, dærev faya ma ŋgwasie hərwi dæretsətseh nakə faya na siye hərwi kurom aye. Andza nakə Yesu Kəriste a sa dæretsətseh ahəl niye aye na, bo ga faya ma siye dæretsətseh dərma hərwi məhay gər i ndo mæpe mædzal gər hay ka Yesu. Nətəye na, andza bo ga. Na siye dæretsətseh andza niye na, hərwi ada mæsler ŋgay mã ndäv.
- <sup>25</sup> Mbəlom a zla ga, a pa ga ndo i mæsler kurom na, a gwedəŋ nã tsik bazlam ŋgay tebiye a nəkurom.
- <sup>26</sup> Ahəl niye na, bazlam nakay maŋgaha eye, ndo hay tã sər bay, anəke na, kə ndohwa ahaya parakka a ndo ŋgay hay.
- <sup>27</sup> A say a Mbəlom mædatay ha a ndo ŋgay hay na, wu nakə a say mæge aye na, ŋgwalak eye haladzay, ma dzəniye ndo hay tebiye. Bazlam nakay a ndzawa maŋgaha eye nakə anəke a ndohwaw parakka a dzaydzay aye na, Yesu Kəriste mæ dærev kurom. Hərwi niye, pum mædzal gər kurom ka mændze ta Mbəlom ma təv nakə ta dəslyay ha gər aye.
- <sup>28</sup> Faya nəmaa diye ha na, Yesu Kəriste eye nakay. Faya nəmaa gatay daf a ndo hay, ada faya nəmaa tətikatəye wu hay tã metsəhe nakə Mbəlom a vəl aye. A samay na, ndo neheye tebiye madzapa eye tã Yesu Kəriste aye na, tã tərã masəra gər eye hay.
- <sup>29</sup> Hərwi niye neŋ faya na ŋgəliye ha bo haladzay ka mæge mæsler ta gədan i Yesu Kəriste nakə a vələŋ hərwi ada nã ndäv ha mæge mæsler.

## 2

- <sup>1</sup> A seŋ na, sərũm ha na ge mæsler haladzay hərwi kurom Kolosi hay, hərwi ndo i Lawdise hay ada hərwi siye i ndo neheye ta ngeŋeŋ zuk bay aye.
- <sup>2</sup> Faya na giye andza niye na, hərwi məmækum naha dærev ada kã wudũm bo nətə nətə mæ walaŋ kurom ada kã dzapum nətə. A seŋ sa na, sərũm wu nakə Mbəlom a bəzakway ha parakka aye hərwi ada kã ndzum bəŋbəŋ mæ dəma. Sa na, ada kã tərũm ndo i zlele hay ka tsæved ŋgay. Wu nakə Mbəlom a dækum ha aye na, Yesu Kəriste.

<sup>3</sup> Neŋgeye na, ma hændəkakweye tsæved hærwi ada kâ hutakwa metsehe ada kâ sarakwa wu hay. Metsehe nakay na, lele haladzay, ma sækamiye bo ta suloy bay.

<sup>4</sup> Na tsik andza niye na, hærwi ada ndəray mâ vakum gər tə bazlam læfedede eye bay.

<sup>5</sup> Sərum ha na, kwa neŋ dəreŋ tə nəkurom bəbay na, faya na dzaliye huya ka nəkurom. Dərev ga faya ma ŋgwasiye hærwi faya ka gumeye wu hay ta tsæved eye ada hærwi nakə ka dzalum ha ka Kəriste aye, nəkurom mandza eye bəŋbəŋ lele.

### *Gum metsehe ta ndo masəpete ndo hay*

<sup>6</sup> Ka təmum Yesu Kəriste ka təra Bəy Maduweŋ kurom. Hærwi niye mede kurom mâ ge na, andza nakə a yay a gər a neŋgeye aye.

<sup>7</sup> Ndzum mə həlay ŋgay andza dərızl i gərdaf nakə a pa zləlay ŋgay a bəd haladzay aye. Dum kame kame, dzalum ha peteh ka neŋgeye huya andza nakə ta tətikakum aye. Gumay naha sisə haladzay a Mbəlom huya.

<sup>8</sup> Gum metsehe, ndəray mâ vakum gər tə metsehe nakə ma giye ŋgama bay aye bay. Metsehe niye na, a yaw abəra ma ndo hay ada ma məsəfəre neheye lele bay ka mändzibəra aye bəna abəra mə Kəriste bay.

<sup>9</sup> Ka pumateye zləm a nəteye bay na, hærwi mede i Mbəlom na, tebiye mə bo i Yesu Kəriste.

<sup>10</sup> Tadə nəkurom madzapa eye tə Kəriste na, Mbəlom kə rah kurom ha tə Məsəfəre ŋgay. Kəriste na, bəy ka gər i wu hay tebiye ada ka gər i bəy tay hay.

<sup>11</sup> Ka hutum mədəse bo na, hærwi nakə ka dzapum tə Kəriste aye. Mədəse bo niye na, mədəse bo nakə tə həlay i ndo zezeŋ aye bay. A yaw na, mə Yesu Kəriste. A zla fakuma abəra wu nakə ma diye kurom ha a mənese aye na, ta neŋgeye.

<sup>12</sup> Ahəl nakə ta dzəhuḅ kurom ha a yam aye na, andza nakə tə la kurom ka bo tə Kəriste aye. A həlay niye ka tsalumaw abəra ma yam na, andza nakə nəkurom tə Kəriste ka ləsumaw abəra ma mədahaŋ aye hærwi ka dzalum ha Mbəlom na, gədaŋ ŋgay andaya mələtse kurom ahaya abəra ma mədahaŋ andza naka a lətse ahaya Yesu Kəriste abəra ma mədahaŋ aye.

<sup>13</sup> Ahəl niye nəkurom na, andza mədahaŋ hay hærwi ka gawum mezeleme ada hærwi nakə Yesu Kəriste kə dəs kurom bay aye. Anəke na, Mbəlom kə lətse kurom ahaya abəra ma mədahaŋ tə Yesu Kəriste ada kə pəsakway ha mezeleme kway.

<sup>14</sup> Ahəl niye na, sariya kə gəs kway hærwi wu nakə Mbəlom a tsik aye na, ka gakwa bay. Ane tuk na, Mbəlom kə zla fakwaya abəra mezeleme nakə ka gər kway aye, kə hama gwedere nakə fakwaya aye, andza a dar na ka mayako mazzləmbada eye.

<sup>15</sup> Ahəl nakə Yesu Kəriste a mət ka mayako mazzləmbada eye na, a zla gədaŋ abəra ka fakalaw hay ada ta bəy tay hay tebiye. A həhal tay ha kame i ndo hay tebiye, a patay horoy a däre.

<sup>16</sup> Tadə kə ge andza niye na, ndəray kwa nəte mâ gakum me hærwi wu mənday kəgəbay hærwi wu məse na, ndəray mâ gakum me bay. Ndəray kə gwadakum gum magurlom i məhəne siye hay, i wur kiye kəgəbay i pat i mazzəzukw bo na, kâ təmum bay.

<sup>17</sup> Wu neheye na, andza mezek, a dətay ha a ndo hay wu nakə ma deyeweye kame aye. Wu dedek eye nakə a dā ha na, bo i Yesu Kəriste eye.

<sup>18</sup> Kâ gərumatay tsæved a ndo hay tã səpat kurom tə bazlam kəriye abəra ka magogoy kurom bay. Ndo niye hay faya ta gwadiye kutoŋ məgay dəretsətseh

a bo, ada mädəslatay ha gər a gawla i Mbəlom hay. Nəteye faya ta tsikiye na, ka wu nakə tə ɲgatay ma məsine aye. Slala i ndo neheye na, faya ta dəslay ha gər a bo kəriye tsa, tə dzala i tay na, ka wu neheye ka mändzibəra aye.

<sup>19</sup> Nəteye madzapa eye tə Kəriste bəy tay sa bay. Matəra andza gər na, nəngeye ada ndo məpe mädzal gər hay ka Yesu na, bo ɲgay. Ndo neheye madzapa eye tə nəngeye na, ta hutiiye gədaŋ mə həlay ɲgay, maa dzapa tay ha ka təv manəte eye na, nəngeye. Ta gəliye, ka tsəved ɲgay andza nakə a yay a gər a Mbəlom aye. Ma piye tay ha ndo ɲgay hay ka təv manəte eye hərwi ada nəteye tebiye tā dzapa andza bo i ndo nəte a zəv ka təv manəte eye tə mbəle hay ada ta slo i bo hay.

<sup>20</sup> Nəkurom ka sərūm ha, ka mətum ka bo tə Kəriste. Andza niye, fakalaw hay ta ləviye kurom sa bay. Tadə kə ge andza niye tuk na, ada ka ndzum andza nəkurom ndo i mändzibəra hay sa kəkay? Faya ka pumay bəzay a wu neheye tə gwad:

<sup>21</sup> «Kā zla wu nakay bay», «kā ndzaka wu nakay bay», «kā tətal ka wu nakay bay» aye na, ma kəkay?

<sup>22</sup> Maa tətik bazlam neheye mapala eye na, ndo hay dəkdek tsa. Wu neheye tebiye na, ta dziye ahəl nakə ndo hay ta giye ha məsler aye.

<sup>23</sup> Ka madazlay, ndo hay tə dzala mə gər tay bazlam neheye mapala eye na, ta vəliye metsehe hərwi tə gwad, tə ge kutoŋ hərwi məpay bəzay a kule tay, marahay gər ka dala ada məgay dəretsətseh a bo. Ane tuk na, neŋ na ɲgatay na, kule tay ma dzaniye ndo hərwi ada m̄ gay metsehe a bor i bo ɲgay kwa tsekweŋ bay tebiye.

### 3

#### *Yesu Kəriste ka təra kway ha wədəye hay*

<sup>1</sup> Nəkurom ka sərūm ha na, ka mbəlūmaw abəra ma mədahaŋ tə Kəriste. Yesu Kəriste mandza eye tə həlay i məndaŋ i Mbəlom anəke. Hərwi niye, pum mädzal gər kurom ka wu neheye mə mbəlom aye.

<sup>2</sup> Dzalum ka wu nakə mə mbəlom aye huya, kā dzalum ka wu neheye ka mändzibəra aye bay.

<sup>3</sup> Nəkurom ka sərūm ha ka mətum, Mbəlom kə lətse kurom ahaya abəra ma mədahaŋ. Sifa kurom wədəye mə həlay i Kəriste, Mbəlom kə pa na ka təv ɲgay.

<sup>4</sup> Sifa kurom dedek eye na, Kəriste. Ahəl nakə ma maweye na, nəkurom tə nəngeye ka mumaweye dərmak ta məzlaḅ ɲgay.

<sup>5</sup> Hərwi niye gərūm ha məge wu neheye lele bay ka mändzibəra aye. Gərūm ha məge madama, mede nakə lele bay aye na, gərūm ha, bor i bo kurom m̄ ge bəy ka gər kurom bay, wu neheye lele bay aye na, kā pəlūm bay, kā gum dəre ka wu hay bay hərwi tadə faya ka gumeye dəre ka wu hay na, ka dəsłumatay ha gər a ze Mbəlom.

<sup>6</sup> Mbəlom ma ta gəsiye ndo neheye ta rəhay ha gər bay aye a sariya na, hərwi wu neheye anaŋ aye.

<sup>7</sup> Ahəl niye na, nəkurom ka gawum andza niye, wu neheye lele bay eye tə ləvawakum gər.

<sup>8</sup> Anəke na, gərūm ha wu neheye tebiye. Kā gum mevel bay, dərev m̄ ndalalum bay, kā gumatay sewed a siye i ndo hay bay, kā tsikum wu neheye lele bay aye ka ndo hay bay, bazlam neheye a ye ka bo mətsike bay aye na, kā tsikum bay.

<sup>9</sup> Kā rawum me ka bo mə walaŋ kurom bay, hərwi ka gərūm ha mede kurom nakə ahəl niye aye ada tə wu neheye ka gawum ahəl niye aye.



<sup>10</sup> Ka hutum mede nakə wedeye duh. Maa wəlakum mede nakay wedeye na, Mbəlom. Neŋgeye faya ma təriye ha wedeye pat pat hərwi ada mā təra andza neŋgeye, hərwi ada kâ sərūm na lele.

<sup>11</sup> Hərwi niye wuray andaya ma ŋgəniye kurom ha wal wal bay. Yahuda hay ta slala mekeləŋ eye hay nəteye nəte, ndo neheye ma dəsə bo eye hay ta ndo neheye ma dəsə bo eye bay aye nəteye nəte, ndo neheye mə kəsaf hay aye ta ndo neheye ma tərakahan aye hay nəteye nəte, beke hay ta ndo neheye beke hay bay aye wuray ka ŋgəna tay ha ka bo abəra bay. Nəteye tebiye nəte hərwi Kəriste a ləva tay ha ada neŋgeye mə dərev i ndo hay tebiye.

<sup>12</sup> Mbəlom a pala kurom na, hərwi ada kâ tərūm ndo ŋgay hay, a wu dā kurom. Hərwi niye, gum wu neheye anaj aye: Sakumay naha a ndo hay, gumatay ŋgwalak a ndo hay, rəhum ha gər kurom, tərūm ndo ləfedede eye hay, ada tərūm ndo məzle ŋgatay dərma.

<sup>13</sup> Sakumay a bo nəte nəte mə walaŋ kurom. Ta dā ndoweye kə gakum mənese na, pəsūmay ha. Pəsūm ha bo nəte nəte mə walaŋ kurom andza nakə Bəy Maduweŋ a pəsakum ha aye.

<sup>14</sup> Wene wene eye na, wudūm bo nəte nəte mə walaŋ kurom hərwi ta dā ka gum andza niye na, ka ndzumeye ka təv mənəte eye tə dərev nəte.

<sup>15</sup> Zay nakə Kəriste ma wəlakumeye mā gəs dərev kurom bəŋbəŋ. Mbəlom a zalakum na, hərwi ada kâ tərūm nəte ada kâ hutum zay. Gumay sisə huya.

<sup>16</sup> Pūm bazlam i Kəriste a dərev kurom lele. Dzalum ka bazlam i Kəriste huya. Tətikum a bo nəte nəte mə walaŋ kurom. Dūm ha a bo nəte nəte mə walaŋ kurom. Zambadūmay a Mbəlom ta dəmes hay wal wal ada ta dəmes nakə Məsəfəre Tsədanŋa eye a wəlakum aye. Gumay dəmes a Mbəlom, gumay naha sisə ta məŋgwese.

<sup>17</sup> Wu nakə ka gumeye ada ka tsikumeye tebiye na, gum andza nakə ndo i Bəy Maduweŋ Yesu hay ta giye aye. Gumay sisə a Bəba kway Mbəlom ta məzele ŋgay.

*Ndo məpe mədzal gər hay ka Yesu ta ndziye mə walaŋ i ndo hay na, kəkay*

<sup>18</sup> Nəkurom ŋgwas hay, rəhumatay gər a zal kurom hay lele, hərwi a yay a gər a Bəy Maduweŋ kway andza nakay.

<sup>19</sup> Nəkurom hasləka hay wudūm ŋgwas kurom hay, kâ ŋgərəzum fataya bay.

<sup>20</sup> Nəkurom wawa hay, rəhumatay gər a bəba kurom tə may kurom mə wu hay tebiye hərwi a yay a gər a Bəy Maduweŋ kâ gum andza niye.

<sup>21</sup> Nəkurom bəba i wawa hay, kâ ndalumatay ha dərev a wawa kurom hay bay. Ka gumatay andza niye na, dərev ma diye fataya abəra.

<sup>22</sup> Nəkurom beke hay, rəhumatay ha gər a ndo i gay kurom hay ka məndzibəra mə wu hay tebiye. Kâ rəhumatay ha gər ka dərə tay dəkdək tsa hərwi ada tâ zambadəkum bay. Duh gum məsler tə dərev kurom peteh andza ndo neheye faya ta dəslay ha gər a Mbəlom aye.

<sup>23</sup> Məsler neheye ta wəlakumeye tebiye aye na, gum tə dərev kurom peteh andza nakə ka gumay məsler a Bəy Maduweŋ Yesu aye, bəna məsler i ndo hay dəkdək bay.

<sup>24</sup> Sərūm ha na, mata wəlakum magogoy i məsler kurom na, Bəy Maduweŋ. Ma wəlakumeye wu nakə a pa na mə mbəlom hərwi ndo ŋgay hay aye. Ndo i gay kurom nakə faya ka gumeye məsler aye na, Yesu Kəriste.

<sup>25</sup> Ndo neheye faya ta giye mənese aye na, Mbəlom ma ta pərateye hərwi mənese nakə faya ta giye. Neŋgeye a ŋgəna tay ha ka bo abəra ndo hay bay.

## 4

1 Nəkurom ndo i gay hay bəbay, gumatay gər a beke kurom hay lele, kâ zəbum fataya andza wu kəriye bay. Sərum ha nəkurom bəbay ndo i gay kurom andaya mə mbəlom.

*Duwulumay me a Mbəlom pat pat ada tərūm ndo metsehe eye hay*

2 Duwulumay me a Mbəlom huya. Kâ gum bəle mə mađuwule me bay, gumay sisə a Mbəlom.

3 Duwulumay me a Mbəlom hərwi may dərmak hərwi ada Mbəlom mâ händəkamay na tsəved lele ka məde ha bazlam ngay a ndo hay, ada nəmaâ dā tay ha wu i Kəriste neheye manğaha eye mâ zəba dzaydzay. Ka sərūm ha neŋ ma danğay na, hərwi wu nakay.

4 Duwulumay me a Mbəlom hərwi ada nâ dā ha parakka andza nakə kutoŋ na giye aye.

5 Gumay metsehe a mede kurom, mede kurom mâ ge kame i ndo neheye ta təma Yesu Kəriste bay aye na, ngwalak eye. Kâ nasum ha həlay eye bay, kwa kəday dzənum tay ha.

6 Bazlam kurom mâ ge na, ləfedəde. Mâ ge na, andza sluwal. Sərūm ha tađə ka mbəduমেye ka bazlam tay na, mbəduumatay faya ta tsəved eye lele.

*Mətsike me*

7 Tisik, malamar kway nakə ka wuđum na haladzay ma mədzepe tə Kəriste aye, neŋgeye faya ma giye məsler i Kəriste tə dərev ngay peteh, neŋ tə neŋgeye nəmay faya nəmaa giye məsler pat pat hərwi Bəy Maduweŋ. Neŋ mandza eye kəkay na, ma dəkumeye ha.

8 Na sləriye naha na, hərwi ada kâ sərūm ha nəmay mandza eye na, kəkay. Ki ye naha na, ma makumeye naha dərev dərmak.

9 Na sləriye tay naha neŋgeye tə Onezim malamar kway. Neŋgeye dərmak faya ma pay bəzay a Yesu Kəriste tə dərev ngay peteh. Neŋgeye a yaw ma təv kurom. Ta ye naha na, ta tsikakumeye wu nakə faya ma giye bo kanan aye tebiye.

10 Aristark nakə nəmay salamay ma danğay aye, kə tsikakum naha me. Markus, wawa i malamar i Barnabas kə tsikakum naha me dərmak. Tađə ki ye naha ka təv kurom na, təmum na lele. Ba na tətikakum wu nakə ka gumeye tsiy.

11 Yesu ndo nakə tə zalay Zustus aye kə tsikakum naha me dərmak. Mə walaŋ i ndo neheye faya ta giye məsler hərwi Bəy i Mbəlom tə neŋ kanan aye na, Yahuda mekeleŋ eye hay bay, say ndo neheye mahkar aye. Nəteye faya ta dzəniye ga haladzay.

12 Epafəras nakə a yaw abəra ka təv kurom aye, kə tsikakum naha me. Neŋgeye ndo i məsler i Yesu Kəriste. Pat pat, neŋgeye faya ma rəzlay a gər mađuwulay naha me a Mbəlom hərwi kurom. Neŋgeye faya ma duwulay naha me a Mbəlom na, hərwi ada kâ ndzum bəŋbəŋ lele, kâ tərūm ndo masara eye hay ka tsəved i Mbəlom, ada kâ sərūm wu nakə a yay a gər a Mbəlom kâ gum aye tebiye.

13 Ta dedək na sər neŋgeye faya ma giye məsler haladzay hərwi kurom ada hərwi ndo məpe mədzal gər hay ka Yesu neheye ma Lawdise ada neheye ma Hiyerapolis\* aye dərmak.

14 Luka, doktor kway nakə ka wuđakwa na haladzay aye ada Demas, ta tsikakum naha me dərmak.

\* 4:13 Lawdise ta Hiyerapolis na, hudğay neheye tə mbay naha a Kolosi.

<sup>15</sup> Tsikumenjatay ha me a ndo mæpe mædzal gær hay ka Yesu neheye ma Lawdise aye. Tsikumay me a Nimfa ada a ndo mæpe mædzal gær hay ka Yesu neheye tæ hayawa gær a gay ŋgay aye.

<sup>16</sup> Ka dzaŋgum na ðerewel nakay na, slærumatay naha a mæhay gær i ndo mæpe mædzal gær hay ka Yesu neheye ma Lawdise aye hærwi ada tå dzaŋga dærmak. Nækurom dærmak, ðerewel nakæ na slæratay naha a mæhay gær i ndo mæpe mædzal gær hay ka Yesu neheye ma Lawdise aye na, tå slærakum naha hærwi ada kâ dzaŋgum dærmak.

<sup>17</sup> Gwadumay a Arsip na, mâ ŋgæla ha bo ka mæsler i Bøy Maduweŋ Yesu Kæriste nakæ a vælay aye, mâ ndæv ha.

<sup>18</sup> Neŋ Pol, bo ga eye na watsakum naha mætsike me ga nakay tæ hæløy ga eye. Na tsikakum naha me. Må mætsakum gær bay, neŋ na, ma danŋay.

Mbælom mâ pa fakuma ŋgama.

## Makurre i d̄erewel i Pol nakə a watsatay naha a Tesalonik hay aye Məfələkwe

Pol a pa gay i maduwule me a Tesalonik na, a həlay i mahəhele ŋgay masulo eye. A ye a Tesalonik na, a yaw abəra ma Filipi. Tesalonik na, ta diye bəzay i Gəres ka dala i Masedowan. Tesalonik na, wuzlahgəma, ta səkəmwawa ha wu hay mə dəma. Mbəzlew hay mə dəma haladzay, wene wene eye na, Yahuda hay. Yahuda siye hay ta təma məsənəke i Pol bay, ta həhar na. Pol a watsa tay a Tesalonik neheye ta təma məpe mədzal gər ka Yesu Kəriste aye.

Madədo 1 ka 3 faya ma tsikakweye ka məndze i Tesalonik hay tə Pol.

Madədo 4 ada 5, Pol faya ma vəlateye gədanj mede kame kame ma məndze i ndo məpe mədzal gər hay ka Yesu. A mbədatay naha ka metsehe nakə ma kwasatay ha mədzal gər aye.

### *Mətsike me*

<sup>1</sup> Maa watsakum naha d̄erewel nakay na, neŋ ta Silas ada ta Timote. Nəmaa watsakum naha a məhay gər i ndo məpe mədzal gər hay ka Yesu neheye ma Tesalonik aye. Nəkurom na, ndo i Mbəlom Bəba kway ada ndo i Bəy Maduweŋ Yesu Kəriste hay. Mbəlom m̄a pa fakuma ŋgama ada m̄a vəlakum zay.

### *Pol a gay sisə a Mbəlom hərwi mede i ndo məpe mədzal gər ha ka Yesu*

<sup>2</sup> Nəmay faya nəmaa gay naha sisə a Mbəlom pat pat hərwi kurom kwa a həlay waray. Ahəl nakə nəmaa d̄uwulaway naha me a Mbəlom aye na, nəmaa d̄uwulaway naha me hərwi kurom tebiye.

<sup>3</sup> Ahəl nakə nəmaa d̄uwulaway naha me a Mbəlom aye na, nəmaa dzalawa ka məsler kurom nakə faya ka gumeye hərwi ka dzalum ha ka Yesu Kəriste aye. Faya nəmaa dzaliye sa na, nəkurom faya ka ŋgəlumeye ha bo ka məsler ta gədanj hərwi nakə ka wədum Yesu Kəriste ada nəkurom mandza eye bəŋbəŋ lele hərwi nakə faya ka təkumeye d̄əre a Bəy Maduweŋ kway Yesu Kəriste aye.

<sup>4</sup> Malamar ga hay, nəmaa sər ha, Mbəlom a wud̄a kurom. A pala kurom na, hərwi ada k̄a tərūm ndo ŋgay hay.

<sup>5</sup> Nəmaa sər ha hərwi ahəl nakə nəmaa d̄akum ha Labara Ŋgwalak eye na, nəmaa tsik tə bazlam d̄ekd̄ek tsa bay, nəmaa tsik ta gədanj i Məsəfəre Tsədanjŋa eye. Nəmaa sər ha lele wu nakə nəmaa tsik aye na, d̄ed̄ek. Ahəl nakə nəmay mə gay kurom aye na, ka sarum ha mede may. Nəmay faya nəmaa giye andza niye na, hərwi madzəne kurom.

<sup>6</sup> Nəkurom na, ka dazlumay a məpay bəzay a mede may ada a bəmalə i Bəy Maduweŋ kway. Ahəl nakə ka təmum bazlam i Mbəlom aye na, ka sum d̄əretsətseh haladzay hərwiye, ane tuk na, d̄uh d̄ərev kurom kə ŋgwasa hərwi bazlam nakay ta gədanj i Məsəfəre Tsədanjŋa eye.

<sup>7</sup> Andza niye faya ka bəzumatay ha tsəved lele eye a ndo məpe mədzal gər hay ka Yesu neheye tebiye ka dala i Masedowan ada ma Akay\* aye, ta sər ha ma kəkay məndze tay nakə ta ndziye aye.

<sup>8</sup> Hərwi kurom, ndo hay haladzay ma Masedowan ada ma Akay ta tsəne labara i Bəy Maduweŋ kway, ane tuk na, nəteye d̄ekd̄ek bay. Sa na, ndo hay

\* 1:7 Akay: Məzele i Gəres nakə tə zalaway ha guram eye.

kwa ka waray ta tsəne ka mədzal gər kurom nakə ka dzalum ha ka Mbəlom aye. Wuray andaya nakə nəmay nəmaa səkahiye ha faya aye bay.

<sup>9</sup> Nəteye tə bazlam tay faya ta tsikiye fakuma, ma kəkay nakə ka təmum may lele ahəl nakə nəmay mə gay kurom aye. Faya ta tsikiye sa, ka mægər ha kule hay, ka pumay bəzay a Mbəlom nakə dedek eye, nenğeyə ta sifa aye.

<sup>10</sup> Tə sər ha nəkurom faya ka həbumeye wawa nğay nakə ma deyeweye mə mbəlom aye. Wawa niye na, Yesu nakə Mbəlom a mbəl ahaya abəra ma mədahaŋ aye. Nenğeyə ma buwiye kway abəra ma mevel i Mbəlom nakə ma ndziye ka ndo i mezeleme hay aye. Ma giye na, pat i sariya nğay nakə ma slaweye aye.

## 2

### *Məsler i Mbəlom nakə Pol a ge ma Tesalonik aye*

<sup>1</sup> Malamar ga hay, nəkurom ka sərur ha tə gər kurom mede may nakə nəmaa ye naha a gay kurom aye na, kəriye tsa bay.

<sup>2</sup> Ka sərur ha nəmaa sa dəretsətseh haladzay ma Filipi təday, ta tsadamay. Ahəl nakə nəmaa ndisl naha a gay kurom aye na, ndo mənə dəre may hay ta samay dəretsətseh huya ane tuk na, Mbəlom kə mamay naha dərev hərwi ada nəmaā dākum ha Labara Nğwalak eye nakə a yaw abəra ka təv nğay aye.

<sup>3</sup> Ahəl nakə nəmaa gatay amboh a ndo hay ka matəme bazlam i Mbəlom aye na, nəmaa raw me bay, wu nakə lele bay aye na, andaya ma mədzal gər may bay, nəmaa vay gər a ndəray bay.

<sup>4</sup> Duh nəmaa tsik na, wu neheye Mbəlom a gwadamay dūm ha aye hərwi a zəba famaya na, nəmaa a yay a gər. A vəl Labara Nğwalak eye a həlay may na, hərwi ada nəmaā dātay ha a ndo hay. Nəmaa diye ha na, hərwi ada nəmaā yatay a gər a ndo hay bay. Ane tuk na, hərwi ada nəmaā yay a gər a Mbəlom nenğeyə nakə a sər dərev may aye.

<sup>5</sup> Nəkurom ka sərur ha lele dāda nəmaa tsikakum wu hərwi məvakum gər bay ada dāda ki yamayaw a mədzal gər nəmaa tsikakum wu hərwi ada kə vəlumamay bay. Wu nakə na watsa kanaŋ aye na, Mbəlom a sər ha dedek.

<sup>6</sup> Nəmaa pəla ndo hay tā zambadamay bay, kwa nəkurom, kwa siye i ndo hay, a samay andza niye bay.

<sup>7</sup> Həbə na, nəmaa ləvakum gər hərwi nəmay na, ndo i maslaŋ i Yesu Kəriste hay, ane tuk na, a samay andza niye bay. Duh nəmaa ndza mə walaŋ kurom ta ləfedede eye andza may i wawa hay nakə ma gatay gər a wawa nğay hay aye.

<sup>8</sup> Nəmaa wuda kurom haladzay. Hərwi niye, ahəl nakə nəmay ka təv kurom aye na, a samay mədākum ha Labara Nğwalak eye nakə a yaw abəra ka təv i Mbəlom aye. Ada nenğeyə niye dəkdek bay, a samay məvəle ha məsəfəre may hərwi kurom, hərwi ka yumamay a gər haladzay.

<sup>9</sup> Malamar ga hay, kə mətsum ha gər ta məsler nakə nəmaa ge mawura bo eye mə gay kurom aye bay. Nəmaa ge məsler kwa ta həvad, kwa ta həpat hərwi ada nəmaā tsətsah fakuma wu mənday bay. Andza niye, nəmaa dā ha Labara Nğwalak eye i Mbəlom ze matsətsehe fakuma wuray.

<sup>10</sup> Nəkurom ndo məpe mədzal gər hay ka Yesu, ka sərur ha mede may ahəl nakə nəmay mə walaŋ kurom aye na, lele ada dedek eye ada Mbəlom a sər ha dərma. Ndəray ma sliye mətsike famaya wuray bay.

<sup>11</sup> Ka sərur ha, nəmay ta nəkurom andza bəba ta wawa nğay hay.

12 Nəmaa vəlakum gədanj. Nəmaa gawakum amboh hərwi ada mede kurom mâ yay a gər a Mbəlom, neŋgeye nakə a zalakum hərwi ada kâ fələkum a bəy ŋgay, ma təv nakə ŋgwalak eye haladzay aye.

13 Nəmay faya nəmaa gay naha sisə a Mbəlom huya sa na, hərwi ahəl nakə nəmaa dākum ha bazlam i Mbəlom aye na, ka pum faya zləm. Ka tənum, ka sərūm ha ta dedek bazlam nakay a yaw abəra ka təv i Mbəlom bəna bazlam i ndo zezeŋ bay. Ayaw ta dedek bazlam nakay a yaw na, mə həlay i Mbəlom. Faya ma giye məsler mə nəkurom neheye ka dzalum ha ka Yesu Kəriste aye.

14 Malamar hay nəkurom ka tərūm andza məhay gər i ndo məpe mədzal gər hay ka Yesu neheye ma dala i Yahuda nəteye madzapa eye tə Yesu Kəriste aye. Yahuda hay ta satay dəretsətseh ada anəke ndo i gəma kurom hay ta sakum dəretsətseh dərmak andza i tay.

15 Yahuda neheye na, ta kəd ndo mədə ha bazlam i Mbəlom neheye ahəl niye aye, ta kəd Bəy Maduweŋ kway sa. Ta həharawa may dərmak. Nəteye na, tə yay a gər a Mbəlom bay tebiye, nəteye ndo mənay dəre a ndo hay tebiye.

16 Andza niye, nəmaa dətay ha bazlam i Mbəlom a ndo siye neheye nəteye Yahuda hay bay aye hərwi ada Mbəlom mâ təma tay ha na, a satay bay. Anəke na, ta rah ha ka mənese tay nakə tə gawa aye tebiye, ada kə ndalay a Mbəlom fataya, sariya ŋgay ma gəsiye tay ha.\*

### *A say a Pol mambəde gər a Tesalonik*

17 Malamar hay, nəmay na, ahəl nakə nəmaa ye abəra ka təv kurom, nəmaa gər kurom ha aye na, hawa kurom a gawamay haladzay, a samay məŋgatakum. Tə dəre na, nəmay dəreŋ ta nəkurom. Ane tuk na, dərev may mandza eye na, tə nəkurom huya. Nəmaa pəla tsəved madzəga haladzay mede naha məŋgatakum.

18 A samay mambəde naha gər ka təv kurom. Neŋ Pol tə gər ga, na tsik sik haladzay nakə a seŋ mede naha aye. Ane tuk na, Fakalaw ka dərəzlamay na tsəved.

19 Ayaw, məpe mədzal gər may ta məŋgwese may na, hərwi kurom. Nəkurom magogoy may nakə nəmaa ŋgalakiye kurom ha kame i Bəy Maduweŋ Yesu Kəriste pat nakə ma maweye aye.

20 Ayaw, ta dedek nəmaa ŋgalakiye kurom ha ada dərev may ma ŋgwasiye hərwi kurom.

## 3

1 Ahəl nakə nəmaa tsəne labara kurom sa bay aye na, nəmaa sla faya məgəse dərev sa bay. Nəmaa gwad nəmaa sləriye naha Timote ka təv kurom. Nəmay na, nəmaa ndziye ma Aten mahəmeye təmad.

2 Ka sərūm ha Timote neŋgeye malamar kway. Neŋgeye ta nəmay faya nəmaa giye məsler i Mbəlom. Nəmay ta neŋgeye faya nəmaa diye ha Labara ŋgwalak eye i Yesu Kəriste. Nəmaa slər naha ka təv kurom hərwi ada mâ dzəna kurom ada mâ makum naha dərev ada nakə kâ ndzum 6əŋbəŋ ka tsəved i Mbəlom aye,

3 hərwi ada dəretsətseh nakə faya ma ndzakumeye a gər aye mâ dze kurom ha ta dəba bay. ʼBa ka sərūm ha a ye ka bo ka sakweye dəretsətseh andza niye.

4 Ahəl nakə nəmay ka təv kurom, dəretsətseh ka ndzakway a gər zuk bay aye na, nəmaa tsikakum, nəmaa gwadəkum aza dəretsətseh ma deyeweye ada kə ndislew andza nakə ka sərūm aye.

5 Hərwi niye na sla faya madəme sa bay. Na slər naha Timote ka təv kurom hərwi ada nâ tsəne labara kurom. Agəna nəkurom faya ka dzalumeye ha

\* 2:16 Zəba ma Roma hay 11.28-32.

huya ka Yesu Kəriste kəgəbay aɡəna Fakalaw kə vakum ɡər. Tadə kə ge andza niye na, məsler nakə nəmaa ge mə walaŋ kurom aye na, ka tərə kəriye.

<sup>6</sup> Ane tuk na, anəke Timote nakə a ye naha ka təv kurom aye, kə maw ka təv may. Kə tsikamay labara hay ɲɡwalak eye ka nəkurom. A ɡwad na, nəkurom faya ka dzalumeye ha ka Yesu Kəriste huya ada ka wudum bo nəte nəte. A ɡwad sa na, ka pum may a mədzal ɡər kurom, a sakum mənɡatamay andza nəmay nakə a samay mənɡatakum aye dərma.

<sup>7</sup> Andza niye malamar may hay, dərətsətseh faya ma ndzameye a ɡər haladzay ada ndo hay faya ta kwasameye ɡər haladzay. Ane tuk na, ahəl nakə Timote a maw a tsikamay labara kurom aye na, kə mamay naha dərəv hərwi nəkurom faya ka dzalumeye ha ka Yesu Kəriste huya.

<sup>8</sup> Anəke na, dərəv may kə ɲɡwasa hərwi nəkurom mandza eye bəɲbəɲ mə həlay i Bəy Maduweɲ.

<sup>9</sup> Kwa nəmaa gay naha sisəe a Mbəlom ma kəkay na, kə sla bay, hərwi dərəv may kə ɲɡwasa haladzay hərwi kurom.

<sup>10</sup> Nəmay faya nəmaa duwulay naha me ta həpat ta həvad hərwi ada mə vəlamay tsəved nəmaā ye naha mazəbakumaw dərə ada matətikakum wu nakə ka sərūm zuk bay aye hərwi ada kə səkahum ha mədzal ɡər ka Yesu Kəriste.

<sup>11</sup> Mbəlom Bəba kway tə ɡər ɲgay eye ta Bəy Maduweɲ kway Yesu tā vəlamay tsəved mede naha ka təv kurom.

<sup>12</sup> Bəy Maduweɲ mə ɡəl ha mawudə bo kurom nakə ka wudum bo mə walaŋ kurom aye kame kame ada kə wudum ndo hay tebiye kame kame andza nakə nəmay nəmaa wuda kurom aye.

<sup>13</sup> Andza niye, mə vəleye ɡədan a dərəv kurom hay hərwi ada mənese mə ge andaya mə nəkurom bay ada kə tərūm tsədanɲa kame i Bəba kway Mbəlom pat nakə Bəy Maduweɲ Yesu ma maweye aye. Mata maw na, neɲgeye ta ndo ɲgay hay tebiye.

## 4

### *Mede nakə a yay a ɡər a Mbəlom aye*

<sup>1</sup> Malamar ɡa hay, wu nakə nəmaa ndəvakumeye naha mətsike aye na anay: Ahəl niye nəmaa tətikakum mede nakə a yay a ɡər a Mbəlom aye. Nəmaa sər ha mede kurom na, andza niye. Anəke nəmay, nəmaa ɡakumeye amboh ta məzele i Bəy Maduweɲ kway Yesu, pumay bəzay a mede kurom niye kame kame.

<sup>2</sup> Ka sərūm ha mede nakə nəmaa ɡwadakum pumay bəzay ta ɡədan i Bəy Maduweɲ kway Yesu aye.

<sup>3</sup> Wu nakə a say a Mbəlom aye na, tərūm tsədanɲa. Andza məɡwede na, kə gum madama bay.

<sup>4</sup> Kwa way mə walaŋ kurom tā ndza ta ɲɡwas ɲgay salamay ka tsəved nakə a yay a ɡər a Mbəlom aye, ndo hay tā ɲɡəlakum bəzay bay.

<sup>5</sup> Kə ɡərūmay ha bo a bor i bo kurom bay. Maa ge andza niye na, ndo neheye tə sər Mbəlom bay aye.

<sup>6</sup> Ndəray mə gay mənese a ndo ta təv i ɲɡwas bay, mə vay ɡər kwa tsekweɲ bay. Sərūm ha na, Bəy Maduweɲ kway ma vəlateye dərətsətseh a ndo neheye ta giye slala i mənese nakay aye. Nəmaa ɡakum daf, 6a nəmaa tsikakum.

<sup>7</sup> Mbəlom kə zalakway. Ane tuk na, a zalakway na, hərwi ada kə ɡakwa madama bay. Neɲgeye a zalakway hərwi ada kə ndzakwa tsədanɲa.



<sup>8</sup> Hərwi niye, ndoweye ka kərah bazlam neheye na, a kərah bazlam i ndo hay bay. A kərah na, Mbəlom, neŋgeye nakə a vəlakum Məsəfəre Tsədanŋa eye.

<sup>9</sup> Malamar ga hay, wuray andaya nakə na watsakumeye naha sa ka mawude siye i ndo i Yesu hay aye na, andaya bay, hərwi bo i Mbəlom eye tə gər ŋgay ka tətikakum, wudum bo nəte nəte mə walaŋ kurom.

<sup>10</sup> Ayaw, ta dedək ka wudum ndo məpe mədzal gər hay ka Yesu neheye ka dala i Masedowan aye tebiye. Ane tuk na, faya nəmaa gakumeye amboh, gum andza niye kame kame.

<sup>11</sup> Pəlum na, məndze nakə səkeffe aye. Kā tələkum me kurom a wu i ndo siye hay bay. Gum məsler tə həlay kurom eye andza nakə ɓa nəmaa tsikakum aye.

<sup>12</sup> Taɗə ka gum andza niye na, ndo neheye ta dzala ha ka Yesu Kəriste zuk bay aye na, ta rəhakumeye ha gər ada ka rəkumeye wu mənday wal bay.

### *Bəy Maduweŋ Yesu ma maweye*

<sup>13</sup> Malamar ga hay, a samay məgəre kurom ha ze məsəre wu ka bazlam i ndo neheye ta mət aye bay. Hərwi a samay na, ɗərev mā ye fakuma abəra bay andza ndo neheye faya ta həbiye madayaw i Yesu təbey aye.

<sup>14</sup> Taɗə azlakwa ka sarakwa ha Yesu kə mət ada kə lətsew abəra ma mədahan, sərūm ha ndo neheye tə mət ɓa ta dzala ha ka Yesu aye na, Mbəlom ma lətse tay ahaya abəra ma mədahan, ma hayatay gər ka təv i Yesu.

<sup>15</sup> Wu nakə nəmaa tsikakumeye anəke aye na, Bəy Maduweŋ kway kə ɗa ha. Pat nakə ma maweye na, nəkway neheye tə ɗəre ka məndzibəra aye ka lahakwatəye kame a ndo neheye ta mət aye bay.

<sup>16</sup> Pat eye niye na, Mbəlom ma vəlatəye tsəved a gawla ŋgay hay, bəy i gawla i Mbəlom hay ma zaliye ta magala. Tsa na, tolom i Mbəlom ma ləviye ada Bəy Maduweŋ kway Yesu Kəriste, bo ŋgay eye ma mbəzlaweye abəra mə mbəlom. Ndo neheye tə mət ɓa ta dzala ha ka neŋgeye na, nəteye ta lahiye mələtsew abəra ma mədahan,

<sup>17</sup> tsa na, Mbəlom ma hayakweye gər a nəkway neheye huya tə ɗəre aye hərwi ada nəkway tage nəteye kə hayakwa gər ma pazlay. Nəkway tebiye ka dzakweye gər ta Bəy Maduweŋ kway ka məgər mbəlom. Ka ndzakweye huya ta Bəy Maduweŋ kway ka təv manəte eye.

<sup>18</sup> Hərwi niye, mum ha ɗərev a bo tə bazlam neheye nəte nəte mə walaŋ kurom.

## 5

### *Nɗəray a sər pat i məmaw i Yesu bay*

<sup>1</sup> Malamar hay, ka bazlam i pat kəgəbay həlay i məmaw i Bəy Maduweŋ na, nəmaa watsakumeye naha na, ma ɗzəniye kurom bay,

<sup>2</sup> hərwi bo kurom eye ka sərūm ha ma maweye andza məkal nɗəray ma səriye faya bay.

<sup>3</sup> A həlay nakə ndo hay ta gwadiye: «Gəma may mandza eye zay, wuray andaya ma gameye bay.» A həlay niye na, ɗəretsətseh ma dazleye tuk, ta dzaliye faya bay. Tsəved andaya mətəme abəra mə ɗəma bay. Ma giye na, andza ŋgwas nakə məwe wawa a dazlay, məwure ŋgay eye a dazlay kwayanŋa aye.

<sup>4</sup> Malamar ga hay, nəkurom na, andza ndo neheye nəteye ma ləvon aye bay. Pat eye niye mā ndzakum a gər andza məkal bay.

<sup>5</sup> Hərwi nəkurom tebiye ndo neheye tə yawa mə dzaydzay ta həpat aye. Nəkway na, andza ndo neheye tə yawa ta həvad ma ləvonj aye bay.

<sup>6</sup> Hərwi niye, kâ ndzahərakwa andza siye hay bay. Nəkway düh ndzakwa tsezlezlenjje ada gakway metsehe a bo kway.

<sup>7</sup> Ndo neheye tə ndzahərawa aye na, tə ndzahərawa ta həvad ada tə kwayawa na, ta həvad dərmak.

<sup>8</sup> Nəkway na, ndo neheye mandza eye mə dzaydzay aye, nəkway ka həhalakwa ma ləvonj bay. Hərwi niye, gəkway metsehe a bo, dzalakwa ha ka Yesu Kəriste huya ada wudakwa bo nəte nəte. Niye na, andza ka pakwa ka bo peteked i bəre hərwi ada wuray mâ gəkway bay. Həbakwa pat nakə Mbəlom ma təmiye kway ha hərwi məpe faya mədzal gər kway na, andza mbəramdaw i bəre nakə tə pawa a gər a həlay i vərəm aye.

<sup>9</sup> Mbəlom a pala kway na, hərwi ada mâ vələkway dəretsətseh bay. A pala kway düh na, hərwi ada mâ təma kway ha tə həlay i Bəy Maduwej kway Yesu Kəriste.

<sup>10</sup> A mət na, hərwi kway hərwi ada nəkway ta neñgeye kâ ndzakwa ka təv manəte eye. Kwa ta də ka mətakwa tsiy, kwa ta də nəkway tə dərə mba, pat nakə ma maweje na, nəkway tə neñgeye, ka ndzakweye ka təv manəte eye.

<sup>11</sup> Hərwi niye, mum ha dərəv a bo mə walañ kurom ada dzənum bo hərwi ada kâ hutum gədanj andza nakə bə faya ka gumeye anəke aye.

### *Mandəve i bazlam*

<sup>12</sup> Malamar hay, faya nəmaa gəkumeye amboh, rəhumay ha gər a ndo neheye faya ta giye məsler i Mbəlom mə walañ kurom aye. Bəy Maduwej a pa tay ha kame kurom hərwi ada tã tətikakum tsəved ngay.

<sup>13</sup> Rəhumatay ha gər lele ada wudum tay ha haladzay hərwi faya ta giye məsler i Mbəlom. Ndzum zay mə walañ kurom.

<sup>14</sup> Malamar hay, faya nəmaa gəkumeye amboh, tsikumatay faya a ndo i səe hay, mumatay naha dərəv a ndo neheye zluwer a gatay aye ada məmatay bo a ndo neheye bəle aye hay, zlum ngatay kwa ka way tebiye.

<sup>15</sup> Gum metsehe, ndərəy mâ ma ha sewed tə sewed bay. Gum gədanj kwa kədəy hərwi ada kâ gum düh na, wu ngwalak eye hay mə walañ kurom ada a ndo hay tebiye.

<sup>16</sup> Ndzum na, pat pat ma mənğwese.

<sup>17</sup> Duwulumay me a Mbəlom pat pat.

<sup>18</sup> Kwa a həlay waray, gumay naha sisəe a Mbəlom. Ananj wu nakə nəkurom ndo neheye madzapa eye tə Yesu Kəriste a say a Mbəlom kâ gum aye.

<sup>19</sup> Kâ kərahumay ha tsəved a Məsəfəre Tsədanjja ka mətsike me bay.

<sup>20</sup> Ka ta rəsum na bazlam i ndo mədə ha bazlam i Mbəlom hay bay.

<sup>21</sup> Dzədzamum tay ha wu neheye ta tsikiye tebiye təday ada pum wu nakə lele eye a dərəv kurom.

<sup>22</sup> Kâ gum mənese bay tebiye.

<sup>23</sup> Mbəlom tə gər ngay neñgeye nakə a vəl zay aye, mâ təra kurom ha tsədanjja eye hay. Mâ tsəpa məsəfəre kurom ta mədzal gər kurom tə bo kurom tebiye hərwi ada a həlay nakə Bəy Maduwej kway Yesu Kəriste ma maweje na, ndərəy mâ ngələlakum bəzay ta təv i wuray kwa tsekwej bay.

<sup>24</sup> Mbəlom a zalakum na, hərwi ada kâ tərur ndo ngay hay. Neñgeye ma giye andza niye hərwi wu nakə kə tsik aye na, ma giye.

<sup>25</sup> Malamar hay, duwulumay me a Mbəlom hərwi may dərmak.

<sup>26</sup> Tsikumatay me a ndo məpe mədzal gər hay ka Yesu tebiye lele.

<sup>27</sup> Na gakum amboh ta mæzele i Bøy Maduweŋ kway: Dzaŋgum dærewel nakay kame i siye i ndo mæpe mædzal gær hay ka Yesu tebiye.

<sup>28</sup> Bøy Maduweŋ kway Yesu Kæriste mâ pa fakuma ŋgama.

## **Masulo i d̄erewel i Pol nakə a watsatay naha a Tesalonik hay aye Məfələkwe**

Derewel nakay masulo eye a masay a gər i bazlam nakə a tsik mə d̄erewel nakə makurre eye. Həlay eye faya ma diye a d̄əba, gər faya ma kwasateye a ndo məpe mədzal gər hay hərwi Bəy Maduweŋ Yesu kə maw zuk bay. Ma Tesalonik na, siye hay tə gwad pat i məmaw i Bəy Maduweŋ kə ndislew (2.2). Siye hay ta kərah məge məsler (3.6-12).

Mə d̄erewel nakay na, Pol faya ma səkahiye ha məsənəke ŋgay. Məpe mədzal gər ka Yesu ma mbatiye ha labara i ndo zezeŋ bay. Ma mbatiye ha wu mawura bo eye ta d̄əretsətseh wal bay. Pat nakə Yesu ma maweye na, mənese ma dziye (1.5-9). Anəke na, mənese faya ma giye məsler ta məkal (2.1-12). Pol a tsik faya andza ndo nakə tə zalay «ndo i sewed» aye. Nəŋgeye na, gədanj nakə a hayay gar a gədanj sewed eye hay tebiye aye.

### *Mətsike me*

<sup>1</sup> Maa watsakum naha d̄erewel nakay na, neŋ Pol, Silas ada ta Timote. Nəmaa watsakum naha a məhay gər i ndo məpe mədzal gər hay ka Yesu neheye ma Tesalonik aye, nəkurom i Mbəlom Bəba kway ada i Bəy Maduweŋ kway Yesu Kəriste.

<sup>2</sup> Mbəlom Bəba kway ta Bəy Maduweŋ kway Yesu Kəriste t̄a pa fakuma ŋgama ada t̄a vələkum zay.

### *Bəy Maduweŋ ma gateye sariya a ndo i məndzibəra hay*

<sup>3</sup> Malamar ga hay, a ye ka bo nəmaâ gay naha sişce a Mbəlom hərwi kurom pat pat. A ye ka bo nəmaâ ge andza niye hərwi faya ka səkahumeye ha məpe mədzal gər kurom ka nəŋgeye ada nəkurom tebiye, kwa way a wud̄a siye i ndo hay kame kame dərma.

<sup>4</sup> Hərwi niye ahəl nakə nəmay ta siye i məhay gər i ndo məpe mədzal gər hay ka Yesu na, nəmaa tsikawa fakuma ta məŋgwese hərwi ndo hay faya ta gakumeye d̄əretsətseh, faya ta nakumeye d̄əre, ane tuk na, ka hwayum bay. Ka səmumay ha, faya ka dzalumeye ha ka Yesu Kəriste. Nəmay faya nəmaa ŋgalakiye kurom ha.

<sup>5</sup> Wu nakay faya ma diye ha parakka Mbəlom ma giye sariya ada sariya ŋgay na dedək. Ka gum d̄əretsətseh andza niye na, hərwi ada k̄a tərūm ndo məfələkwe a Bəy i Mbəlom. Hərwi niye nakə faya ka sumeye d̄əretsətseh aye.

<sup>6</sup> Dedək, Mbəlom na giye na, wu nakə dedək eye, ma gateye d̄əretsətseh a ndo neheye ta gakumeye d̄əretsətseh aye.

<sup>7</sup> Nəkurom ndo neheye anəke faya ka sumeye d̄əretsətseh aye na, Mbəlom ma vələkumeye zay ada ta nəmay dərma. Ma giye andza niye na, a həlay nakə Bəy Maduweŋ kway ma mbəzləweye mə mbəlom aye. Gawla ŋgay gədanj eye hay ta laka ahaya.

<sup>8</sup> Bəy Maduweŋ kway ma deyeweye ma dərneh i ako, ma gateye d̄əretsətseh a ndo neheye tə sər Mbəlom bay ada ta kərah Labara ŋgwalak eye i Bəy Maduweŋ Yesu kway aye.

<sup>9</sup> Ta siye d̄ar̄ets̄atseh. Ta dziye ka tor eye, Mb̄elom ma d̄ar̄ezlateye a ts̄aved h̄arwi ada t̄a yaw ka t̄av i B̄ay Maduweŋ bay. Ta sliye m̄andze ma m̄azla6 nak̄a a ze kwa mey aye bay.

<sup>10</sup> Wu nakay ma giye bo na, pat nak̄a B̄ay Maduweŋ ma maweye. Ndo ŋgay hay ta zambadeye. Ndo neheye ta dzala ha ka nen̄geye tebiye ta d̄aslay ha ḡar. Ka d̄aslumeye ha ḡar d̄armak h̄arwi ka t̄amum bazlam nak̄a n̄amaa d̄akum ha aye.

<sup>11</sup> H̄arwi niye, n̄amay faya n̄amaa d̄uwulay naha me a Mb̄elom huya h̄arwi kurom. N̄amaa d̄uwulay naha me na, h̄arwi ada k̄a ndzum andza neheye a zalatay aye. N̄amaa d̄uwulay naha me h̄arwi ada m̄a dz̄ana kurom ka m̄age wu neheye ŋgwalak eye tebiye a sakum hab̄e m̄age aye ada m̄asler nak̄a ka gumeye h̄arwi m̄adzal ḡar ka Yesu aye. N̄amaa gwadeye: M̄a dz̄ana kurom ta ḡad̄aŋ ŋgay.

<sup>12</sup> Andza nakay, ndo hay ta zambadeye a m̄ezele i B̄ay Maduweŋ kway Yesu h̄arwi kurom ada ndo hay ta zambad̄akumeye h̄arwi ŋgay d̄armak. Wu nakay ma giye na, h̄arwi Mb̄elom ta B̄ay Maduweŋ kway Yesu K̄ariste ta piye fakuma ŋgama.

## 2

### *Wu nak̄a ma lahiye m̄age kame aza Yesu ma maweye aye*

<sup>1</sup> Malamar hay, a seŋ m̄atsike ka pat i m̄amaw i B̄ay Maduweŋ kway Yesu K̄ariste ada i m̄ahay ḡar kway kame ŋgay. Faya n̄amaa gwad̄akumeye naha,

<sup>2</sup> k̄a dz̄adzum ha m̄adzal ḡar kurom b̄ase t̄a wu nak̄a siye hay t̄a gwad̄ pat nak̄a B̄ay Maduweŋ ma maweye k̄a husaw aye bay. Kwa tad̄a ndo i maslaŋ hay ta tsik, kwa tad̄a ka ts̄enum ab̄era ka ndo neheye faya ta d̄iye ha bazlam i Mb̄elom, k̄aḡabay t̄a gwad̄ maa watsa andza niye na, neŋ, k̄a dz̄adzarum bay.

<sup>3</sup> Nd̄eray m̄a vakum ḡar kwa tsekweŋ bay tebiye. Pat eye k̄a husaw zuk bay h̄arwi ma husaweye na, ndo hay haladzay ta ḡariye ha ts̄aved i Mb̄elom t̄aday, ndo i sewed̄ nak̄a Mb̄elom ma kaliye ha a ako aye ma deyeweye t̄aday. Tsa na, pat eye ma husaweye tuk.

<sup>4</sup> Ndo i sewed̄ niye ma gateye me a ndo hay ka m̄ad̄aslay ha ḡar kwa tad̄a a Mb̄elom, kwa a mey, ma gwadateye k̄a d̄aslumay ha ḡar bay. Ma gwadateye nen̄geye na, a ze kwa mey tebiye. Ma f̄al̄akwiye kwa a gay i m̄ad̄aslay ha ḡar a Mb̄elom, ma ndziye m̄a d̄ama, ma gwadiye nen̄geye Mb̄elom.\*

<sup>5</sup> Ah̄al nak̄a neŋ m̄a gay kurom aye na, na tsikakum wu neheye, k̄a m̄atsakum ḡar d̄aw?

<sup>6</sup> An̄ake wu ka d̄ar̄ezlay na ts̄aved̄ ada ka s̄arum wu nak̄a a d̄ar̄ezlay na ts̄aved̄ aye. Aza h̄alay eye k̄a sla na, ndo i sewed̄ niye ma ndohwaweye parakka.

<sup>7</sup> Sewed̄ nakay faya ma giye m̄asler m̄a walaŋ i ndo hay, ane tuk na, nen̄geye maŋgaha eye, ada ma ndziye maŋgaha eye hus a h̄alay nak̄a ndo mad̄ar̄ezlay na ts̄aved̄ ma ḡariye ha mad̄ar̄ezlay na ts̄aved̄ aye.

<sup>8</sup> Tsa na, ndo i sewed̄ ma ndohwaweye parakka. Ma d̄aba i wu nakay na, B̄ay Maduweŋ Yesu ma maweye ta ḡad̄aŋ ŋgay. Ma k̄adiye na ab̄era m̄a d̄ama ta ḡad̄aŋ i m̄as̄af̄ere ŋgay nak̄a ma v̄azlaweye m̄a bazlam ŋgay aye.

<sup>9</sup> Ndo i sewed̄ niye ma deyeweye na, ta ḡad̄aŋ i Fakalaw. Ma giye masuwayaŋ hay wal wal, ma gateye h̄ar̄fab̄akka a ndo hay. Ma vateye ḡar a ndo hay t̄a wu niye ma giye.

<sup>10</sup> Ma giye wu neheye ŋgwalak eye bay aye wal wal tebiye ada ma vateye ḡar a ndo neheye ta kutsiye tay ha a ako nak̄a d̄ad̄a ma mbatiye bay aye. Ta

\* 2:4 Zaba ma Daniyel 11.36; Ezekiyel 28.2.

dziye andza niye hærwi ta wuða dedek bay, ta kæräh. Tadä ta tæma na, Mbælom ma tæmiye tay ha haße.

<sup>11</sup> Hærwi niye, Mbælom ma slæriye fataya ndo mævatay gær gædan eye hærwi ada tå velay ha mædzal gær tay a maraw me.

<sup>12</sup> Mbælom a ge andza niye na, hærwi ada sariya mâ gæs tay ha ndo neheye ta tæma dedek bay aye ada ta wuða mæge mænese aye.

### *Ndzum ka tsæved i Mbælom bæŋbæŋ*

<sup>13</sup> Nækurom malamar may hay nakæ Mbælom a wuða kurom aye, kutoŋ næmaa gay naha sisce a Mbælom pat pat hærwi kurom, bæna Mbælom a pala kurom kwa ahæl nakæ mændzibæra andaya zuk bay aye hærwi mætæme kurom ha. A tæma kway ha ta gædan i Mæsæfære Tsædanŋa eye nakæ a tæra kurom ha ndo mæpe mædzal gær hay ka Yesu aye. Mbælom a tæma kurom ha na, hærwi ka dzalum ha ka wu nakæ dedek aye.

<sup>14</sup> Mbælom a zalakum na, ahæl nakæ næmaa ðakum ha Labara Nŋwalak eye i Yesu Kæriste aye. A say na, kâ hutum mæzla6 i Bøy Maduweŋ kway Yesu Kæriste dærmak.

<sup>15</sup> Hærwi niye malamar ga hay, ndzum dæwerwerre bæŋbæŋ lele, dzalum ka wu neheye næmaa tætikakum aye huya, kwa tadä næmaa tætikakum tæ bazlam kwa tadä næmaa watsakum naha a dærewel, pum na a mædzal gær kurom.

<sup>16</sup> Faya na dūwulay naha me a Bøy Maduweŋ kway Yesu Kæriste tæ gær ŋgay eye ada a Mbælom Bæba kway nakæ a wuða kway aye. Ta ŋgwalak ŋgay, faya ma makweye naha dærev huya ada faya ma dzæniye kway ka mædzal gær kway, ka wu nakæ ŋgwalak eye ma deyeweye kame aye.

<sup>17</sup> Mâ makum naha dærev ada mâ vælakum gædan ka mæge wu neheye ŋgwalak eye hay huya ada ka mætsike wu neheye ŋgwalak eye hay huya.

## 3

### *Duwulumay me a Mbælom hærwi may*

<sup>1</sup> Malamar hay, nakay na, wu nakæ næmaa ndæviye ha mætsikakum aye. Duwulumay me a Mbælom hærwi may hærwi ada bazlam i Bøy Maduweŋ Yesu mâ ye kame bæse base ada ndo hay tå ræhay ha gær andza nækurom neheye ka ræhumay ha gær aye dærmak.

<sup>2</sup> Duwulumay me a Mbælom hærwi may hærwi ada mâ tsæpa may abæra ka ndo i sewed hay, hærwi a say a siye hay matæme bazlam i Mbælom nakæ næmaa tsikiye bay.

<sup>3</sup> Ane tuk na, Bøy Maduweŋ na, a mbæðay hæløy a bazlam ŋgay bay. Ma dzæniye kurom ada kâ tærum gædan eye hay ada ma tsæpiye kurom abæra ka Fakalaw.\*

<sup>4</sup> Bøy Maduweŋ kway faya ma dzæniye may ka mæge fakuma mædzal gær. Næmaa sær ha na, faya ka gumeye wu nakæ næmaa tsikakum aye ada ka gumeye huya.

<sup>5</sup> Bøy Maduweŋ kway mâ dzæna kurom hærwi ada kâ særum ha ma kækay nakæ Mbælom a wuða kurom aye ada kâ sæmumay naha a dæretsætseh andza Yesu Kæriste nakæ a sæmay naha aye.

### *Kwa way mâ ge mæsler*

<sup>6</sup> Malamar hay, faya næmaa tsikakumeye ta mæzele i Bøy Maduweŋ kway Yesu Kæriste, faya næmaa gwadakumeye na, kâ ndzum ka tæv i ndo mæpe

\* 3:3 2 Tesalonik hay 2.3.

mədzal gər hay ka Yesu neheye sə eye bay, hərwi ta kərah wu neheye nəmaa tətikakum aye.

<sup>7</sup>Nəkurom ka sərüm ha tə gər kurom eye wu nakə ka gumeye hərwi məpay bəzay a mede may aye. Hərwi ahəl nakə nəmay mə gay kurom aye na, nəmay sə eye hay dāw?

<sup>8</sup>Nəmaa nda wu mənday i ndo mekeləy eye hay kəriye bay, nəmaa səkəm məsəkəme. Nəmaa ge məsler tə madagər eye həvad ta həpat hərwi wu mənday may hərwi ada nəmaā vəlakum dəretsətseh hərwi wu mənday bay.

<sup>9</sup>Nəmaa ge məsler andza niye na, nakə tsəved may andaya matsətsehe fakuma wu mənday bay aye bay. Ane tuk na, nəmaa ge düh na, hərwi mədākum ha wu nakə kə gum aye.

<sup>10</sup>Ahəl nakə nəmay mə gay kurom aye na, nəmaa tsikakum, nəmaa gwadākum: Tadə ndoweye kə ge məsler bay na, kə vəlumay wu mənday bay.

<sup>11</sup>Nəmaa tsikakum naha andza niye na, hərwi nəmaa tsəne tə gwadə ndo mekeləy eye hay mə walaŋ kurom na, sə aye hay. A satay məge məsler bay, ane tuk na, faya ta ndapiye a bazlam i ndo hay.

<sup>12</sup>Faya nəmaa tsikatəye naha a ndo niye hay, faya nəmaa gatay naha me ta məzele i Bəy Maduweŋ kway Yesu Kəriste. Gum məsler ta tsəved eye hərwi məhute wu mənday tə həlay kurom aye.

<sup>13</sup>Malamar hay, nəkurom na, gum wu ŋgwalak eye andza niye, kə yum gər bay.

<sup>14</sup>Tadə ndoweye ka rəhay ha gər a wu nakə nəmaa watsa a dərəwel nakay aye bay na, zəbum faya, nəkurom ta neŋgeye kə dzapum ka məge wu hay dziye bay hərwi ada horoy mə gay.

<sup>15</sup>Ane tuk na, kə zəbum faya andza ndo mənə dərə kurom bay. Tsikumay me düh ta tsəved eye hərwi neŋgeye malamar kurom huya.

### *Mandəve i bazlam*

<sup>16</sup>Bəy Maduweŋ Yesu bo ŋgay eye ndo məvəle zay, mə vəlakum zay huya pat pat kwa həlay waray waray. Bəy Maduweŋ Yesu mə ndza tə nəkurom tebiye.

<sup>17</sup>Neŋ Pol na tsikakum naha me, neŋ na watsa tə həlay ga eye. Na pawa ŋgodgor ka dərəwel ga hay tebiye na, andza nakay. Nakay na, məwetse ga.

<sup>18</sup>Bəy Maduweŋ kway Yesu Kəriste mə pa fakuma ŋgama tebiye.



## Makurre i d̄erewel i Pol nakə a watsay naha a Timote aye Məfələkwə

Məzele i Timote ka ndzele a gər ma d̄erewel i ndo i maslan̄ hay ada mə d̄erewel hay i Pol. Timote a lakawa ha Pol ka məge məsler. Kə laka ha Pol a mahəhele hay haladzay. Pol kə slər ha a t̄əv mawura bo haladzay, a Tesalonik ada Korin̄te.

Pol a watsay d̄erewel a Timote sulo. Pol a watsa d̄erewel neheye na ɓa m̄ədok i m̄əp̄e m̄ədzal gər ka Yesu mapa eye t̄siy. A zəkaw anəke na, m̄əp̄e tay ha gay i maɗuwule me hay lele ada mat̄əra ha m̄əp̄e m̄ədzal gər ḡədan̄ eye.

Makurre i d̄erewel a v̄əlatay ḡədan̄ a ndo m̄ədzal gər hay ka Yesu, a ndo neheye t̄ə kalatay kame a ndo hay aye, ada a Timote.

Siye i ndo m̄əp̄e m̄ədzal gər ka Yesu faya ta s̄ənəkateye wu lele bay aye a ndo hay (1.3-7; 4.1-4; 6.3-5).

Pol faya ma tsikateye me a zləm h̄ərwi m̄əd̄əslay ha gər a Yesu ada t̄ə maɗuwule me (m̄əd̄ədo 2). A ɗa ha d̄ərmak, ndo neheye t̄ə kalay kame a gay i maɗuwule me hay ta ndziye na, ma kəkay (m̄əd̄ədo 3).

B̄əba i Timote na, ndo Ḡərek ada may ŋgay dem i Yahuda hay. Faya ma ɗay ha a Timote ma kəkay nakə ma gateye gər a ndo hay aye (m̄əd̄ədo 4 ka 6).

<sup>1</sup> Maa watsa d̄erewel nakay na, neŋ Pol, neŋ ndo i maslan̄ i Yesu K̄əriste. Ndo nakə a pa ga ndo i maslan̄ aye na, Mb̄əlom ndo m̄ət̄əme kway ha t̄ə Yesu K̄əriste nakə a ge wu nakə ka pakwa faya m̄ədzal gər aye.

<sup>2</sup> Na watsaka naha a n̄əkar Timote. N̄əkar na, andza wawa ga dedek eye h̄ərwi ka dzala ha ka Yesu K̄əriste.

Mb̄əlom B̄əba kway t̄ə Yesu K̄əriste B̄əy Maduweŋ kway t̄ə pa fakaya ŋgama, t̄ə gaka ŋgwalak ada t̄ə v̄əlaka zay.

### *Ndo i parasay hay*

<sup>3</sup> A seŋ na, ndza ma Efez andza nakə na tsikaka kurre ah̄əl nakə na gər kar ha, na ye ka dala i Masedowan aye. Ndza mə ɗəma h̄ərwi ada k̄a gatay me a ndo neheye faya ta t̄ətikateye maraw me a ndo hay aye, t̄ə gər ha.

<sup>4</sup> Gwadatay na, t̄ə v̄əlay ha bo tay a wurmbez hay ada a m̄ək̄əde wuway ka b̄əba t̄əte tay hay bay. Niye na, ma ḡəliye ha m̄ək̄əde wuway k̄əriye, ma dz̄əniye wu nakə a say a Mb̄əlom aye bay. Wu nakay ka s̄ərakwa ha na, h̄ərwi ka dzalakwa ha ka neŋgeye.

<sup>5</sup> Ka tsikakwateye andza niye na, h̄ərwi ada t̄ə wuɗa ndo hay. Kə satay mawuɗe ndo hay na, ɗ̄ərev tay m̄a t̄əra ts̄əɗan̄ŋa lele, t̄ə ge wu ŋgwalak eye ɗ̄ek̄ɗ̄ek̄ ada t̄ə dzala ha ka Mb̄əlom lele. Niye na, ta wuɗa ndo hay.

<sup>6</sup> Ndo mekeleŋ eye hay na, ta dze ab̄əra ka ts̄əveɗ, ta gər ha wu ŋgwalak eye. Duh faya ta tsikiye wu neheye ma giye ŋgama bay aye.

<sup>7</sup> A satay mat̄ətikatay bazlam i Mb̄əlom mapala eye a ndo hay, faya ta t̄ətikaye ta ḡədan̄. Ane tuk na, bo tay eye t̄ə ts̄əne wu nakə faya ta tsikiye bay ada faya ta t̄ətikateye a ndo hay aye bay.

<sup>8</sup> Taɗə ndowe ye kə pay b̄əzay a bazlam i Mb̄əlom mapala eye ta ts̄əveɗ eye na, ka s̄ərakwa ha na, lele.

<sup>9</sup> Tsənakwa wu nakə na tsikiye: Mbəlom a vəl bazlam mapala eye na, hərwi ndo neheye faya ta giye ɲgwalak aye bay. Mbəlom a vəl dūh na, hərwi ndo neheye faya ta giye wu nakə lele bay aye, ndo neheye ta rəhay gər a Mbəlom bay aye, ada hərwi ndo neheye tə kəts na Mbəlom aye. Mbəlom a vəl bazlam mapala eye na, hərwi ndo neheye faya ta giye mənəse aye, ndo neheye tə yay a gər a Mbəlom bay aye, ndo neheye ta kərah wu hay i Mbəlom aye. Mbəlom a vəl bazlam mapala eye sa na, hərwi ndo neheye ta kədiye bəba tay ta may hay aye, ada ndo neheye ta kədiye siye i ndo hay aye dərmak,

<sup>10</sup> ada ndo mäge madama hay, ndo neheye tə zlawə siye i haslaka hay ta tərəwa ha andza ɲgwas tay ayé, ndo neheye ta səkamawa ndo hay hərwi matəre tay ha beke aye, ndo neheye tə dəsa wa parasay aye, ndo neheye tə mbadawa tə maraw me aye. Mbəlom a vəl bazlam mapala eye na, hərwi siye i wu neheye lele bay ta nasiye ha wu nakə lele faya ma tətikakweye aye.

<sup>11</sup> Matətike nakay a yaw na, abəra ma Labara ɲgwalak eye nakə Mbəlom, ndo i məzlaḅ, a vələŋ a həlay aye. Labara ɲgwalak eye niye a dā ha Mbəlom bagwar eye, neŋgeye nakə ma ndziye ma təv ɲgwalak eye huya aye.

### *Pol a zambaday a Mbəlom hərwi ɲgwalak ɲgay*

<sup>12</sup> Na gay sisəe a Yesu Kəriste Bəy Maduweŋ kway hərwi nakə a zla ga andza ndo i dedek. Na gay sisəe sa hərwi ka təra ga ha ndo i məsler ɲgay. Maa vələŋ gədaŋ ka mäge məsler na, neŋgeye.

<sup>13</sup> Ahəl niye na, na tsalaway ka gər a Mbəlom, ada ta zlapay ga na, na gawatay dəretsətseh a ndo ɲgay hay haladzay hərwi nakə na dzala ha ka neŋgeye bay aye. Ane tuk na, Yesu neŋgeye na, kə geŋ ɲgwalak hərwi wu nakə na gawa aye na, na sər bay.

<sup>14</sup> Bəy Maduweŋ kway Yesu Kəriste kə pa fagaya ɲgama haladzay. Anəke na dzala ha ka neŋgeye ada kə vələŋ gədaŋ ka mawudé siye i ndo hay.

<sup>15</sup> Mezeleme nakə neŋ na ge aye na, a ze i ndo siye hay tebiye. Yesu Kəriste a yaw ka məndzibəra na, hərwi ada mâ təma tay ha ndo i mezeleme hay. Anaŋ bazlam nakay na, dedek, ndo hay gədem tâ təma a dərev tay.

<sup>16</sup> Ane tuk na, Yesu Kəriste a geŋ ɲgwalak na, hərwi ada mâ dətay ha a ndo hay neŋgeye ndo məzle ɲgatay. A dā ha na, a geŋ ɲgwalak a neŋ nakə na ze ndo hay tə mezeleme aye. A bəzatay ha niye hərwi məvəlatay gədaŋ a ndo neheye ta dzaliye ha faya aye ada ta hutiyə sifa nakə ma ndəviye bay aye.

<sup>17</sup> Ndo hay tâ dəslay gər a Bəy Mbəlom nakə ma ndziye ka tor eye. Neŋgeye Mbəlom nəte ɲgweŋ. Ndəray a ɲgatay bay. Zambadumay ka tor eye. Amen!

### *Pol a vələy gədaŋ a Timote*

<sup>18</sup> Timote, nəkar na, andza wawa ga, na gəraka ha bazlam nakay a həlay yak andza nakə ndo i maslaŋ hay tə tsik fakaya aye. Bazlam neheye tə tsik aye tâ təra i yak na, andza wu həlay hərwi ada kə ge vərəm nakə ɲgwalak aye.

<sup>19</sup> Vələy dərev yak a Mbəlom huya ada ge na, wu nakə ɲgwalak eye. Siye i ndo mekeleŋ eye hay ta kərah tsəved nakay ɲgwalak eye. Hərwi niye ta dzala ha ka wu neheye dedek aye sa bay.

<sup>20</sup> Mə walaŋ i ndo niye hay na, Himene ta Aləgəzandər. Nəteye na, na vələy tay ha a həlay a Fakalaw\* hərwi ada tâ tətik metshe lele eye ada tâ tsalay ka gər a Mbəlom sa bay.

\* 1:20 A say məgwədə a ndo məwetse dərəwel nakay na: «Na həhar tay abəra mə walaŋ i ndo hay.»

## 2

### *Mađuwulay me a Mbəlom na, kəkay?*

<sup>1</sup> Makurre i wu nakə a seŋ mətsikatay a ndo hay aye na, anarj: Tsətsahum ka Mbəlom, duwulumay me, gumay amboh tə məgay naha sisə hərwi ndo hay tebiye.

<sup>2</sup> Duwulumay me a Mbəlom hərwi bəy hay ada hərwi ndo neheye faya ta ləviye ndo hay aye tebiye hərwi ada kâ ndzakwa zay madzədzere kwa tsekweŋ mâ ge andaya bay, ada kâ rəhakway ha gər a Mbəlom, ada mede kway mâ tərə ŋwalak eye kame ŋgay.

<sup>3</sup> Mađuwulay me a Mbəlom hərwi ndo hay na, lele ada a yay a gər a Mbəlom ndo mətəme kway ha.

<sup>4</sup> A yay a gər haladzay hərwi a say na, ndo hay tebiye tã təma ada a say tã sər dedək.

<sup>5</sup> Bazlam nakay na, hərwi ndo hay tebiye. Hərwi Mbəlom na, nəte ŋweŋj ada ndo mə walaŋ i Mbəlom ta ndo hay na, nəte ŋweŋj. Nəŋgeye ndo zezeŋ, ndo zezeŋ eye niye na, Yesu Kəriste.

<sup>6</sup> A yaw na, kə vəl ha məsəfəre ŋgay masəkəmatay ahaya ndo hay. A đa ha na, a həlay nakə ŋwalak eye, a say a Mbəlom ndo hay tebiye tã təma aye.

<sup>7</sup> Mbəlom a slər ga ha, na tərə ndo i maslaŋ ŋgay hərwi ada nã đa ha wu nakay a ndo hay. A gwedeŋj tətikatay a ndo neheye Yahuda hay bay aye bazlam ŋgay nakə dedək eye ada tã dzala ha. Na tsik na, dedək, na đəs parasay bay.

<sup>8</sup> A seŋ na, hasləka hay kwa ka waray tã duwulay me a Mbəlom, tã duwulay naha me a Mbəlom tə dərev tsəđanŋa eye. Tã ge mevel ka ndo bay, tã kəd wuway ka wu bay.

<sup>9</sup> A seŋ na, ŋgwas hay tã pa ka bo petekəd andza nakə a ye ka bo məpe aye. Petekəd nakə ndo hay ta giye faya đəre aye na, tã pa ka bo bay. Tã gay metsehe bo tay. Tã mətsa ka matərdə gər lele hərwi ada tã zəba fataya bay. Tã pa ka bo wu i maslawə neheye tsakala eye haladzay aye bay, kwa petekəd neheye tsakala eye haladzay aye tã pa ka bo bay.

<sup>10</sup> Məsler nakə lele aye mâ tərə məlembədə bo tay đuh. Ŋgwas neheye tə gwad faya ta rəhay gər a Mbəlom aye na, tã ge andza niye.

<sup>11</sup> Ahəl nakə faya ta tətikiye mə gay i mađuwule me aye na, ŋgwas hay tã tsik me bay, tã ndza đikđik. Tã đəslay ha gər a ndo matətike ndo hay.

<sup>12</sup> Na vəlatay tsəved a ŋgwas hay ka matətikatay a hasləka hay bay ada tã ləvay gər a hasləka hay bay. Tã ndza đikđik,

<sup>13</sup> hərwi Mbəlom a lah məge na, Adam təday, ada ma đəba eye a ge Hawa.

<sup>14</sup> Sa na, Fakalaw ka səpat Adam bay. Ane tuk na, a səpat na, ŋgwas. Maa kərah marəhay ha gər a Mbəlom na, ŋgwas.

<sup>15</sup> Kwa mâ ge andza niye bəbay, ŋgwas ta wiye wawa ada Mbəlom ma təmiye tay ha. Ane tuk na, tã dzala ha ka Mbəlom huya, tã wuda ndo hay, tã tərə ŋwalak eye ka đəre i Mbəlom, tã gay metsehe a bo tay.

## 3

### *Madugula hay i ndo i Kəriste hay*

<sup>1</sup> Bazlam nakə na tsikiye na, dedək. Ndo nakə ka pəla matəre madugula i ndo i Kəriste hay aye na, a say məge məsler ŋwalak eye.

<sup>2</sup> Madugula i ndo i Kəriste na, mede ŋgay mâ ge ŋwalak eye, hərwi ada ndo hay tã may ha mənese ka gər wuray kwa tsekweŋ bay. Ŋgwas ŋgay mâ ge nəte

ngwenj. Mâ kwaya ta guzom bay. Mâ gay metsehe a bo ngay, mâ ge wu neheye ngwalak eye, mâ tãma mbelok hay a gay ngay ada mâ sər matatikatay wu a ndo hay dərma.

<sup>3</sup> Mâ tãra beke i guzom bay, mâ tãra ndo i terengez bay, mâ tãra dũh na, ndo lãfedede, mâ tsala bo ta ndo hay bay, mâ ge bor i dala bay.

<sup>4</sup> Mâ sər mægay gər a ngwas ngay ta wawa ngay hay, mâ gəl tay ha wawa ngay hay lele, wawa ngay hay tã rəhay ha gər.

<sup>5</sup> Tadã ndoweye kã sər mægay gər a ndo i gay ngay hay bay na, ma səriye mægatay gər a məhay gər i ndo mape mədzał gər hay ka Yesu na, ma kəkay?

<sup>6</sup> Ahəl nakã ka pumeye ndo mâ tãra madugula aye na, kã pum ndo nakã a dzala ha ka Yesu Kərıste anake aye bay. Ma ta dəslay ha gər a bo. Kã ge andza niye na, sariya ma gəsiye na andza nakã ma gəsiye Fakalaw aye.

<sup>7</sup> Ndo nakã ma tãriye madugula i ndo i Kərıste hay aye na, mede ngay mâ yatay gər a ndo neheye ta dzala ha ka Yesu bay aye dərma. Kã ge andza niye bay na, horoy ma geye kame tay ada Fakalaw ma mbəzliye na a balay ngay.

*Ndo mäge məsler mə walañ i ndo i Kərıste hay*

<sup>8</sup> Mede i ndo hay mäge məsler mə walañ i ndo i Kərıste hay na, mâ ge lele. Dərneh mâ ge mə bazlam tay sulo bay, tã tãra beke i guzom bay, tã ge mavaha i dala bay.

<sup>9</sup> Tã tãma bazlam nakã Mbəlom a dã ha aye tã dərev tay peteh.

<sup>10</sup> Ka pumeye tay ha a məsler na, zəbum ka mede tay lele təday. Kã ge mede tay lele na, pum tay ha tã tãra ndo mäge məsler hay.

<sup>11</sup> Mede i ngwas tay hay mâ ge lele dərma. Tã tsik wu nakã lele bay aye ka ndo hay bay, tã kwaya ta guzom bay, tã ge na, wu neheye dedek aye huya.

<sup>12</sup> Ndo mäge məsler mâ tãra na, zal i ngwas nate, mâ gatay gər a wawa ngay hay ta ndo i gay hay lele.

<sup>13</sup> Tadã ndo mäge məsler ta ge məsler lele na, ndo hay ta dəslatay ha gər. Ta sliye faya mädẽ ha bazlam i Yesu Kərıste parakka hərwi ta dzala ha faya lele.

*Wu bagwar eye nakã Mbəlom a dã ha aye*

<sup>14</sup> Na dzala na, na miye naha ka tøv yak bəse. Ane tuk na, na watsaka naha wu neheye na,

<sup>15</sup> hərwi kwa tadã na ye naha bay na, dərıwel nakay ma dakeye ha ndo i gay i Mbəlom hay ta ndziye kəkay na, ka səriye ha. Ndo i gay i Mbəlom na, ndo neheye tã dzala ha faya aye, neñgeye tã däre eye. Bazlam dedek eye malatsa eye faya andza mädok i gay.

<sup>16</sup> Ta dedek, bazlam nakay na, bagwar eye haladzay. Manğaha eye ahəl niye, ane tuk na, Mbəlom kã dəkway ha. Faya ma dəkway ha kəkay nakã ka ndzakweye ka tsəved i Mbəlom aye. Ndərıy ma sliye faya mahəmbər na bay. A tsik na, ka Yesu Kərıste:

A tãra ndo zezeñ aye.

Məsəfäre Tsədəñña eye kã dã ha,

neñgeye mənese andaya faya bay.

Gawla i Mbəlom hay ta ngatay.

Ndo hay ta dã ha bazlam ngay a ndo neheye nateye Yahuda hay bay aye.

Ndo hay kwa waray ka mändzibəra ta dzala ha,

Mbəlom kã zla a gəma, ka vəlay məzlab.

<sup>1</sup> Məsəfəre Tsədanŋa eye kə tsik parakka, a gwad: Aza kame na, ndo məkelen eye hay ta gəriye ha mədzele ha ka Yesu. Ta rəhatay ha gər a məsəfəre neheye ŋgwalak eye bay ta rawiye me aye. Ta pay bəzay a matətike neheye tə yaw abəra ka fakalaw hay aye.

<sup>2</sup> Ndo neheye faya ta tətikateye wu neheye a ndo hay aye na, dərneh mə bazlam tay sulo, faya ta dəsiye parasay. Mədzal gər tay kə nas andza wu nakə ako a fəka na aye.

<sup>3</sup> Ndo neheye na, faya ta gwadateye a ndo hay məzle ŋgwas na, lele bay. Faya ta giye me ka mände wu siye hay sa dərma. Ane tuk na, Mbəlom, neŋgeye a ge wu neheye na, hərwi ada ndo neheye ta dzala ha ka Kəriste ada tə sər dedək aye, tã nda ada tã gay sisə.

<sup>4</sup> Andza niye, hərwi wu nakə Mbəlom a ge tebiye aye na, lele. Wu mənday kwa waray ka kərahum mände bay, ndayum tsa ada kã gumay naha sisə a Mbəlom.

<sup>5</sup> Wu mənday tebiye na, lele hərwi bazlam i Mbəlom ada hərwi mađuwule me kway nakə faya ka đuwulakweye me aye.

### *Ndo məge məsler i Yesu Kəriste lele eye*

<sup>6</sup> Tadə ka tətikatay wu neheye a ndo mədzal gər hay ka Yesu Kəriste na, ka təriye ndo məge məsler i Yesu Kəriste lele eye ada ka hutiyə gədan hərwi bazlam i Mbəlom nakə ka dzalakwa ha aye ada hərwi matətike nakə faya ka pay bəzay lele aye.

<sup>7</sup> Wurmbəz neheye kəriye a yay a gər a Mbəlom bay aye na, kã pay zləm bay. Mede yak mã səkah matəre kame andza nakə a say a Mbəlom aye.

<sup>8</sup> Tadə ndoweye ma giye həbad hərwi matətədə ha mbəle ŋgay aye na, ma geye ŋgama tsekwen a bo ŋgay. Ane tuk na, tadə mede ŋgay lele andza nakə a say a Mbəlom aye na, ma geye ŋgama na, haladzay, hərwi a sər ma dzəniye na anəke ma sifa nakə ka məndzibəra aye ada ma sifa nakə ma hutiyə ka tor eye.

<sup>9</sup> Bazlam nakay na, bazlam dedək eye. Lele na, kwa way mã təma tə dərev ŋgay peteh.

<sup>10</sup> Hərwi niye ka vəlakway ha gədan kway ka məge məsler, ka ŋgəlakwa ha faya bo sah lele na, hərwi ka pakwa faya mədzal gər kway ka Mbəlom, neŋgeye nakə ta sifa aye. Neŋgeye ndo mətəme tay ha ndo hay tebiye, ma təmiye ha wene wene eye na, ndo neheye tə dzala ha ka Kəriste aye.

<sup>11</sup> Datay ha ada kã tətikatay wu nakay a ndo hay.

<sup>12</sup> Ndəray mã kəts kar hərwi nəkar wawa eye segey bay. Duh nəkar na, bəzətatay ha a ndo məpe mədzal gər hay ka Yesu ta ndziye na, kəkay. Bazlam yak nakə ka tsikiye na, mã təra bazlam lele eye, mede yak mã ge lele, wuđa ndo hay, dzala ha ka Yesu ada ndza na, tsədanŋa.

<sup>13</sup> Dzaŋga Derewel i Mbəlom pat pat kame i ndo hay. Datay ha ada kã tətikatay hus a pat nakə aza na ye naha aye.

<sup>14</sup> Kã gay məsəfəra a gədan nakə Mbəlom a vəlaka aye bay. A vəlaka na, ahəl nakə ndo hay tə də ha wu nakə Mbəlom a tsik ka nəkar aye ada madugula hay tə pa faya həlay tay aye.\*

<sup>15</sup> Pay gər na, a məsler neheye anəŋ aye. Vəlay ha bo yak tebiye hərwi ada ndo hay tã ŋgatay faya ka diye kame kame ka tsəved i Mbəlom.

\* **4:14** Məpe həlay ka ndo: Məzle ndo ka məge məsler mə walaŋ i ndo.

<sup>16</sup> Gay metshehe a mede yak, gay metshehe a wu nakə faya ka tətikatəye a ndo hay aye ada ndza bəŋbəŋ lele. Tadə ka ge andza niye na, ka təmiye ha bo yak eye ada ndo neheye faya ta pay zləm a bazlam yak aye dərmak.

## 5

### *Mede i ndo məpe mədzał gər hay ka Yesu*

<sup>1</sup> Ahəl nakə nəkurom ka təv manəte eye ta ndo guram aye na, kâ may ha mənese bay, tsikay ta tsəfetsəfe eye andza nengeye na, bəba yak. Tsikatay me a gawla hay andza nəteye malamar yak hay.

<sup>2</sup> Tsikatay me a mama hay andza nəteye may yak hay. Ada a dem hay bəbay andza nəteye malamar yak hay. Dərev yak mâ ge kame tay na, tsədanŋa.

<sup>3</sup> Gatay gər a madakway i ŋgwas neheye nəteye madakway i ŋgwas hay ta dedek, ndo məgatay gər andaya bay aye.

<sup>4</sup> Tadə madakway i ŋgwas wawa ŋgay kəgəbay wawa i wawa ŋgay andaya na, gər ha wawa hay tâ tətik marəhatay ha gər a ndo tay hay təday. Andza məgwedə tâ gay gər a may tay andza nakə bəba tay hay tə gawatay gər ahəl niye aye. Andza niye na, a yay a gər a Mbəlom.

<sup>5</sup> Madakway i ŋgwas nakə nengeye mahəngeye, ndəray ŋgay andaya məgay gər bay ada nengeye kə pa mədzał gər ka Mbəlom, faya ma duwulay naha me a Mbəlom huya ta həpat kwa ta həvad hərwi ada mâ dzəna na.

<sup>6</sup> Ane tuk na, madakway i ŋgwas nakə a gər ha bo ŋgay kwa a way tsa aye na, nengeye mandza eye ma sifa, ane tuk na, andza nengeye maməta eye.

<sup>7</sup> Datay ha a ndo hay na, tâ gatay gər a bəba tay hay hərwi ada ndəray mâ matay ha mənese bay.

<sup>8</sup> Tadə ndoweye kə gay gər a ndo ŋgay hay bay, na tsik wene wene eye na, ka ndo i gay ŋgay hay, kə gər ha tsəved i Yesu Kəriste. Nengeye lele bay a ze ndo nakə kə dzala ha ka Yesu bay aye.

<sup>9</sup> Watsa a dərewel na, məzele i madakway i ŋgwas nakə məve ŋgay kə ndisl a məve kuro kuro məkwa aye dekdek ada nakə a zla zal nəte aye.

<sup>10</sup> Ndo hay tâ sər ha məsler ŋgay neheye a gawa aye na, ŋgwalak eye. Kə gatay gər a wawa hay lele ada ka təma mbəlok hay a gay ŋgay lele. Sa na, kə baratay na sik i ndo məpe mədzał gər hay ka Yesu\* ada ka dzəna ndo neheye mə dəretsətseh aye. Kə ge məsler lele huya. Kə ge andza niye na, watsa məzele ŋgay.

<sup>11</sup> Madakway i ŋgwas neheye dahəlay aye na, kâ watsa məzele tay a dərewel bay. Hərwi ka watsa məzele tay agəna ma sateye mede a zal sa, ta gəriye ha məpay bəzay a Yesu Kəriste.

<sup>12</sup> Ta ge andza niye na, sariya ma gəsiye tay ha hərwi ta nas wu nakə tə tsik, tə gwad: Ta ndziye mahəteye aye.

<sup>13</sup> Kwa tadə ta zla zal bay, ka watsa məzele tay na, ta giye məsler sa bay, ta həhaliye ka gay ka gay. Ta dzəguriye me, ta bəbələteye wuray a ndo hay. Ta tsikiye bazlam nakə ka zəbatay naha bay aye.

<sup>14</sup> Hərwi niye a seŋ na, madakway i ŋgwas neheye dahəlay eye hay aye na, tâ ye a zal sa, tâ wa wawa hay, tâ gay gər a bədgay tay hərwi ada ndo neheye tə nakway dərə aye tâ huta wuray mətsike fakwaya bay.

<sup>15</sup> Na tsik andza niye na, hərwi siye i madakway i ŋgwas hay ta gər ha tsəved i Mbəlom, tə pay bəzay a Fakalaw.

\* **5:10** Məbere sik na, andza məgwedə: Matame mbəlok.

<sup>16</sup> Tadə ɲɠwas nakə faya ma pay bəzay a Yesu Kəriste, madakway i ɲɠwas andaya mə gay na, neɲgeye mā dzəna na. Madakway i ɲɠwas niye andza niye na, məhay gər i ndo məpe mədzal gər hay ka Yesu ta dzəniye na bay. Məhay gər i ndo məpe mədzal gər hay ka Yesu ta dzəniye na, madakway i ɲɠwas neheye ndəray tay andaya bay aye.

<sup>17</sup> Madugula neheye nəteye faya ta gateye gər lele a ndo məpe mədzal gər hay ka Yesu aye na, rəhumatay ha gər lele. Rəhumatay ha gər wene wene eye a ndo neheye faya ta vəliye ha gədaɲ tay ka məde ha bazlam i Mbəlom ada ka matətikatay a ndo hay aye.

<sup>18</sup> Hərwi mawatsa eye mə Derewel i Mbəlom, a gwad: «Ahəl nakə sla ma giye məsler ma guvah aye na, kâ pay wu ka bazlam bay, gər ha mā həpəd wu mənday.†». A gwad sa: «Ndo məge məsler na, lele tâ vəlay wu i madagər ɲgay.‡»

<sup>19</sup> Tadə ndoweeye ki yaw ka təv yak mətsikaka wu nakə lele bay aye ka madugula i ndo məpe mədzal gər hay ka Yesu na, kâ pay zləm bay. Ka ta pay zləm na, tsəne abəra ka ndo hay sulo kəgəbay ka ndo mamahkar eye təday ada ka pateye zləm.

<sup>20</sup> Tsikatay faya a ndo neheye faya ta giye mənese aye kame i ndo hay tebiye hərwi ada ndo siye hay tâ dzədzar məge mənese dərmak.

<sup>21</sup> Neɲ faya na gakeye amboh kame i Mbəlom, kame i Yesu Kəriste ada kame i gawla i Mbəlom neheye a pala aye, amboh rəhay ha gər a wu nakə na tsikaka aye. Kâ ɲgəna tay ha ka bo abəra ndo hay bay, kâ matay bo a ndo siye hərwi aɲəna nəteye ndo yak hay aye bay.

<sup>22</sup> Tadə a saka məzle ndo ka məge məsler mə gay i maɲuwule me na, zəba ka mede ɲgay lele təday nakə ada ka piye həlay ka gər ɲgay aye. Kâ tələka həlay yak a mezeleme i ndo siye hay bay. Ndza na tsədaɲɲa.§

<sup>23</sup> Kâ sa yam dəkdek bay, sa guzom tsekweɲ hərwi huɲ yak nakə a wurawa fakaya aye hərwi ada huɲ mā wur fakaya sa bay.

<sup>24</sup> Ndo siye hay kwa tadə ta ye kame i sariya zuk bay na, mezeleme tay a zəba parakka mə dzaydzay. Ka ndo siye hay, ta sariye ha mezeleme tay na, ma dəba i sariya.

<sup>25</sup> Məsler ɲɠwalak eye hay na, nəteye mə dzaydzay dərmak. Tadə ta ndohwaw bəse a dzaydzay zuk bay na, ta sliye məndze huya maɲgaha eye bay.

## 6

<sup>1</sup> Ndo neheye nəteye beke aye hay na, tâ rəhatay ha gər a ndo i gay tay hay hərwi ada ndo hay tâ tsik wu nakə lele bay aye ka məzele i Mbəlom bay ada ka wu neheye faya ka tətikakwatəye a ndo hay aye bay.

<sup>2</sup> Tadə ndo i gay i beke hay nəteye ndo məpe mədzal gər hay ka Kəriste, kwa tadə nəteye malamar hay ma məpe mədzal gər ka Kəriste bəbay na, tâ kərah marəhatay ha gər a ndo i gay tay hay bay. Kwa nəteye tebiye tə ləva kame i Mbəlom na, ta giye məsler tay lele duh ma ziye nakə kurre aye hərwi ndo neheye faya ta gateye məsler aye na, nəteye ndo məpe mədzal gər hay ka Yesu ada Mbəlom a wuɲa tay.

*Ndo neheye zlele eye hay dedək aye*

Tətikatay wu neheye a ndo hay, vəlatay gədaɲ.

† 5:18 Bazlam mapala eye masulo eye 25.4. ‡ 5:18 1 Korinje hay 9.9; Mata 10.10; Luka 10.7. § 5:22 Zəba ma 1 Timote 4.14.



<sup>3</sup> Taɗa ndoweye ka tɔtik wu mekelen eye, ada ka tɔma bazlam neheye dedek aye i Bɔy Maduwen kway Yesu Kɔriste bay, ada a tɔma wu nakɔ faya ka tɔtikakwateye a ndo hay ka mede nakɔ lele eye kame i Mbɔlom aye bay sa na,

<sup>4</sup> nenjeyeye ndo mɔdɔslay ha gɔr a bo, a sɔr wuray bay tebiye. A sɔr na, mɔkɔde wuway dekdɔk tsa, ma giye magazlɔga ka wu hay. Hɔrwi niye ndo neheye faya ta pay zlɔm aye na, ta giye sɔlɔk, ta wuɗiye mɔkɔde wuway a bo, ta tsadiye a bo, ta dzalateye naha wu neheye lele bay aye a gɔr a ndo hay.

<sup>5</sup> Ta kɔdiye wuway huya hɔrwi mɔdzal gɔr hay lele bay, ada hɔrwi tɔ sɔr dedek sa bay. Tɔ dzala mɔ gɔr tay agɔna, taɗa ta pay bɔzay a tsɔved i Mbɔlom na, ta hutiyeye suloy.

<sup>6</sup> Ta dedek taɗa ka pay bɔzay a tsɔved i Mbɔlom na, nɔkar zlele eye, dɔrev yak ma njwasiye tɔ wu nakɔ andaya fakaya aye.

<sup>7</sup> Ka yakwaw ka mɔndzibɔra na, ka zlakwaw wuray ka hɔlay bay, ka makweye na, ka zlakweye wuray ka hɔlay bay dɔrmak.

<sup>8</sup> Taɗa wu mɔnday kway tɔ peteked kway andaya na, niye na, da kway.

<sup>9</sup> Ndo neheye a satay mɔtɔre ndo i zlele hay aye na, ta dɔdiye a masɔpete i Fakalaw andza tɔ dɔd a balay. Ta wuɗa wu neheye kɔriye ma nasiye tay ha ndo hay aye ada neheye ta dziye tebiye aye.

<sup>10</sup> Mawuɗe suloy na, ma zlaweye slala i wu neheye lele bay aye tebiye. Siye i ndo hay ta gɔr ha tsɔved i Mbɔlom hɔrwi a satay suloy ka zal, ada hɔrwi niye ta huta dɔretsɔtseh mɔ dɔrev.

### *Mandɔve i bazlam*

<sup>11</sup> Ane tuk na, nakar na, ndo i Mbɔlom, wu neheye tebiye lele bay aye na, kɔ tɔlɔka hɔlay yak a dɔma bay. Ge gɔdan, hɔrwi ada kɔ tɔra lele kame i Mbɔlom, pay bɔzay a tsɔved njay, dzala ha huya ka nenjeyeye, wuɗa siye i ndo hay lele, sɔmay naha a wu hay ada tɔra ndo lafedede eye.

<sup>12</sup> Ge vɔram njwalak eye ka tsɔved i Mbɔlom. Gɔs sifa i Mbɔlom nakɔ ma ndɔviye bay aye hɔrwi Mbɔlom a zalaka na, ka nenjeyeye ada ka da ha parakka ahɔl niye kame i ndo hay haladzay wu nakɔ njwalak eye ka dzala ha aye.

<sup>13</sup> Nenj faya na tsikakeye kame i Mbɔlom nakɔ ma vɔliye sifa a wu hay tebiye aye ada kame i Yesu Kɔriste nakɔ a da ha wu njwalak eye parakka kame i Ponjos Pilat aye,

<sup>14</sup> nenj faya na tsikakeye, rɔhay ha gɔr a wu nakɔ na tsikaka aye, kɔ nas ha bay, gay metsɔhe a mɔndze yak hɔrwi ada ndo hay tɔ maka ha mɔnese bay hus a pat nakɔ Bɔy Maduwen kway Yesu Kɔriste ma maweye aye.

<sup>15</sup> Ma maweye na, a hɔlay njwalak eye. Maa ge ha andza niye na, Mbɔlom. Mbɔlom na, gɔdan tebiye mɔ hɔlay njay, nenjeyeye Mbɔlom nɔte njwenj, nenjeyeye mandza eye ma mɔngwese, nenjeyeye Bɔy ka gɔr i bɔy hay, nenjeyeye Bɔy Maduwen ka gɔr i bɔy maduwen hay,

<sup>16</sup> nenjeyeye nɔte njwenj nakɔ ta sifa huya aye, nenjeyeye mandza eye mɔ dzaydzay. Dzaydzay njay a dɔv haladzay, ndɔray ma sliye mahɔndzɔde naha faya bay. Ndɔray dɔda kɔ njgatay bay, ndɔray ma sliye mɔngatay bay sa. Ndo hay tɔ dɔslay ha gɔr. Ma ndziye huya. Mɔ ge andza niye.

### *Mɔtsike me a zlɔm a ndo i zlele hay*

<sup>17</sup> Ndo neheye zlele eye hay ka mɔndzibɔra nakay aye na, gwadɔtay tɔ dɔslay ha gɔr a bo bay, zlele ma ziye kɔriye. Tɔ pa faya mɔdzal gɔr tay bay. Tɔ pa mɔdzal gɔr tay duh na, ka Mbɔlom nakɔ ma vɔlakweye wu hay tebiye hɔrwi ada kɔ njwasakwa aye.

<sup>18</sup> Gwafatay na, ta ge wu ngwalak eye hay, ta ge wu ngwalak eye hay haladzay. Gwafatay na, ta vel wu ta mangwese eye, ta vel wu a siye i ndo hay.

<sup>19</sup> Tadafaya ta giye andza niye na, ta hayay gar a wu tay hay a tav ngwalak eye harwi ada ta huta sifa dedek eye. Maga eye na, andza ndo nakapana naha madok i gay ngay kurre aye.

<sup>20</sup> Timote, gay gar a wu nakambelom a pa a halay yak aye. Bazlam neheye ndo hay ta tsikiye kariye na, ka tsik adama bay. Wu nakaneteye ta zalay ndaraw aye, ane tuk na, ndaraw dedek eye bay.

<sup>21</sup> Na tsik andza niye harwi siye hay ta dzala ha ka wu nakafaya ka dzalakweye faya aye sa bay, harwi ta gwaf ta huta ndaraw eye nakay.

Mbelom ma pa fakuma ngama.

## Masulo i dɛrewel i Pol nakə a watsay naha a Timote aye Məfələkwe

Masulo i dɛrewel nakay Pol a watsay a Timote aye, maraha eye tə maduk i duk i bazlam neheye Pol a tsikay a Timote aye. Pol nənɣeye ma danɣay (2.9), ndo hay haladzay ta mbəday dɛba (1.15; 4.10-16). A sər ha mazlambər ma mətiye (4.6). A gwaday a Timote ndo məleke ha ma məsler, a wudə na andza wawa, ka dzameye gər dɛdɛ sa.

Derewel nakay faya ma makweye ahaya a zləm məndze i Pol: Məsler nɣay, məsənəke nɣay, dɛretsetseh nɣay hay hərwi Labara Nɣwalak eye. A vələy gədan a Timote ka məsəmay naha a dɛretsetseh ma məsler i Kəriste (2.1-13). A gwaday mə dɛ ha bazlam i Mbəlom ta tsəved eye lele (2.14-15). Hərwi niye, Timote mə nɣəday a məkədə wuway, mə mbəday dɛba a ndo neheye faya ta giye wu neheye nɣwalak eye bay aye, mə pay bəzay na, a mede i Pol. Mə hənay gər ada mə ge na, wu nakə Pol ta ndo siye hay tə sənəkətatay a ndo hay aye.

Wu neheye mawatsa eye na, ta dzəniye kway ka matətike wu dedek eye (3.16).

### *Mətsike me i Pol*

<sup>1</sup> Maa watsa dɛrewel nakay na, neɣ Pol, neɣ ndo i maslan i Yesu Kəriste andza nakə a say a Mbəlom aye. A slər ga ha hərwi ada nə dɛ ha bazlam i sifa nakə Mbəlom a gwad ma vələteye a ndo neheye madzapa eye tə Yesu Kəriste aye.

<sup>2</sup> Na watsaka naha a nəkar Timote. Nəkar na, na wudə kar haladzay andza wawa ga. Mbəlom Bəba kway tə Yesu Kəriste Bəy Maduweɣ kway tɛ pa fakaya nɣama, tɛ gaka nɣwalak ada tɛ vələka zay.

### *Pol a may naha dɛrev a Timote*

<sup>3</sup> Neɣ faya na gay naha siɛe a Mbəlom hərwi yak. Neɣ faya na geye məsler tə dɛrev tsədanɣa eye andza i bəba tətə ga neheye tə gaway məsler aye. Ahəl nakə na dɛwulaway naha me a Mbəlom aye na, na dɛwulaway naha me hərwi yak huya ta həvad kwa ta həpat.

<sup>4</sup> Hələy nakə ka tuwa aye na, kə mətsen gər bay.\* A seɣ haladzay mənɣataka hərwi ada dɛrev ga mə rah ta mənɣwese.

<sup>5</sup> Na mətsa ha gər ta məpe mədzal gər yak nakə ka pa peteh ka Yesu Kəriste aye bay. Təday na, mama yak Lowis nakə a dzala ha ka Yesu Kəriste ada may yak Enise. Ayaw! Na sər ha ta dedek ka dzala ha ka Yesu dərmaɣ.

<sup>6</sup> Hərwi niye, neɣ faya na gwadaɣeye sa: Kɛ gay masəfaya a wu nakə Mbəlom a vələka gədan məge aye bay. A vələka na, ahəl nakə na pa fakaya həlay aye. Vələy ha dɛrev yak pətəh ka məge.†

<sup>7</sup> Kɛ dzədzar bay hərwi Məsəfəre Tsədanɣa eye nakə Mbəlom a vələkway aye na, mə təriye kway ha ndo i zluwer hay bay. Duh ma vələkweye gədan məge məsler i Mbəlom ada tə mawudə siye i ndo hay ada tə məgay metsehe a bo kway.

\* 1:4 Timote a tuwa ahəl nakə Pol a ye faya abəra a gər ha ma Efez aye. Zəba ma 1 Timote 1.3. † 1:6 Zəba ma 1 Timote 4.14; 5.22.

<sup>8</sup> Hərwi niye zluwer mâ gaka mæde ha bazlam i Bəy Maduweŋ kway bay. Neŋ ma danğay na, hərwi ŋgay, ane tuk na, kâ ge horoy tə neŋ kame i ndo hay bay. Duh təma mase dæretsətseh hərwi mæde ha Labara Ŋgwalak eye andza neŋ dərma. Ge andza niye ta gədan nakə Mbəlom ma vələkeye.

<sup>9</sup> Mbəlom na, kə təma kway ha, a zalakway hərwi ada kâ tərakwa ndo ŋgay hay. A zalakway na, hərwi nakə ka gakwa məsler ŋgwalak eye bay, a təma kway ha hərwi a say məpe faya ŋgama. Andza mægwede na, kwa ahəl nakə məndzibəra andaya zuk bay aye 6a kə ləva ha bo məvəle kway ŋgama tə həlay Yesu Kəriste.

<sup>10</sup> Anəke na, ka bəz ha ŋgama nakə a vələkway aye parakka hərwi Yesu Kəriste ndo mətəme ha ndo ki yaw. Neŋgeye na, kə zla na gədan i mədahan, a da ha na, tadə ka təmakwa Labara Ŋgwalak eye na, ka hutakweye sifa nakə ma ndəviye bay ka tor eye.

<sup>11</sup> I ga na, Mbəlom a pa ga ndo i maslan hərwi ada nâ da ha Labara Ŋgwalak eye a ndo hay ada nâ tətikatay.

<sup>12</sup> Hərwi niye nakə neŋ faya na siye dæretsətseh ma danğay aye. Ane tuk na, horoy a geŋ bay hərwi na sər Yesu Kəriste. Na dzala ha ka neŋgeye ada na sər ha ta dedek ma sliye faya matsəpe Labara Ŋgwalak eye nakə a vələŋ aye. Ma tsəpiye na hus a pat bagwar eye nakə ma deyeweye aye.

<sup>13</sup> Tsikatay a siye i ndo hay bazlam dedek eye nakə na tsikaka aye, kwa tsekweŋ kâ mbəday həlay bay. Ka tsikiye na, dzala ha ka Yesu Kəriste ada wuda ndo hay. Ge andza niye ta gədan nakə a yaw mə Yesu Kəriste aye.

<sup>14</sup> Kâ vələy tsəved a ndəray mâ mbəday həlay a labara ŋgwalak eye nakə Mbəlom a vələka aye bay, tsəpa na ta gədan i Məsəfəre Tsədanŋa eye nakə mə dərev kway aye.

<sup>15</sup> Nəkar ka sər ha ndo məpe mədzal gər hay ka Yesu neheye ka dala i Azi aye nəteye ta gər ga ha ŋgwedek. Figelas ta Hermogenas nəteye mə walaŋ tay dərma.<sup>‡</sup>

<sup>16</sup> Ane tuk na, Onezifor na, a mawen naha dərev, horoy kə gay kame i ndo hay hərwi nakə neŋ ma danğay aye bay. Bəy Maduweŋ kway mâ gay ŋgwalak a ndo i gay ŋgay hay.

<sup>17</sup> Ahəl nakə a ndislew kanaŋ a wuzlah gay i Roma aye na, kə pəla təv nakə neŋ mə dəma aye puk puk lele hus a huta ga.

<sup>18</sup> Bəy Maduweŋ kway Yesu mâ gay ŋgwalak pat nakə ma ta gateye sariya a ndo hay aye. Ka sər ha dərma ahəl nakə neŋ ma Efez aye na, ka dzəna ga haladzay.

## 2

### *Sidzew i Yesu Kəriste*

<sup>1</sup> Wawa ga, nəkar na, vələy tsəved a ŋgwalak nakə Yesu Kəriste a vələka aye mâ təra kar ha gədan aye.

<sup>2</sup> Ahəl niye ka tətik bazlam i Mbəlom na, abəra ka neŋ. Bazlam nakə na da ha kame i ndo hay haladzay aye na, zla na tətikatay a siye i ndo neheye dedek aye dərma hərwi ada nəteye tâ sla faya matətikatay a ndo siye hay kame sa.

<sup>3</sup> Tadə dæretsətseh kə ndzaka a gər hərwi Yesu Kəriste na, səmay naha andza sidzew nakə lele eye a səmay naha a dæretsətseh aye.

<sup>‡</sup> 1:15 Dala nakə Roma hay tə zalay Azi aye na, neŋgeye bəgom ka dala nakə tə zalay Turki aye.

4 Tadə ndoweƷe ma diƷe a vərəm, tadə a say neŋgeƷe mɑ Ʒay a gər a bəƷ ƷƷay na, ma kərəhiƷe məsler i ndo neheƷe kəriƷe. I Ʒak na, mɑ tərɑ andza niƷe dərmaƷ.

5 Sər ha dərmaƷ na, tadə ndoweƷe faya ma hƷiƷe mahƷay i mata ndisle kame na, tadə ka hƷay ta tsəved eye bay na, ta vələƷe wu i merəbe ƷƷay bay.

6 Ndo i məfəte hay bəbaj, mata lehe məhute hohƷay eye na, ndo nakə a ge məsler haladzay aƷe təday.

7 Dzala ka wu neheƷe faya na tsikakeƷe kanaƷ aƷe, hərwi tadə ka dzala ha faya na, BəƷ MaduƷer ma vələkeƷe gədaƷ ka mətsəne wu nakə faya na tsikakeƷe tebiƷe.

8 Yesu Kəriste mɑ makaw a gər. NeŋgeƷe a Ʒaw na, abərə ma gwala i Davit. Kə lətsəw abərə ma mədahaƷ. AnaƷ Labara ƷƷwalak eye nakə faya na dətay ha a ndo hay aƷe.

9 NeƷ faya na siƷe dərətsətseh ada tə gəs ga a daƷƷay na, hərwi labara nakay ƷƷwalak eye. AƷaw, neƷ na, ta peƷ tsalalaw andza ndo məge zlərƷek. Ane tuk na, bazlam i Mbəlom na, ta Ʒay tsalalaw bay. Faya ma diƷe kame kame huya.

10 Hərwi niƷe neƷ faya na səmay naha a dərətsətseh tebiƷe. NeƷ faya na səmay naha hərwi ndo neheƷe Mbəlom a pala tay ha aƷe hərwi ada nəteƷe tā huta tsəved nakə Yesu Kəriste ma mbəliƷe tay ha aƷe ada tā Ʒe a bəƷ ƷƷay nakə a le haladzay aƷe ada tā ndza mə dəma ka tor eye.

11 Sa tsa na, kutoƷ kɑ səmay naha hərwi bazlam neheƷe na tsikakeƷe naha na, bazlam dedək eye hay:

Tadə ka mətakwa tə neŋgeƷe na,<sup>\*</sup>  
ka ta ndzakƷeƷe ma sifa tə neŋgeƷe dərmaƷ.

12 Tadə ka səmakwa naha a dərətsətseh na,  
ka ta tərakƷeƷe baƷƷar i bəƷ tə neŋgeƷe.  
Ane tuk na, tadə ka gwadəkwa ka sərakwa na bay na,  
ma ta gwadiƷe a sər kƷay bay dərmaƷ.

13 Tadə ka tərakwa kame ƷƷay ndo dedək eye hay bay na,  
neŋgeƷe na, ma ndziƷe ndo i dedək  
hərwi bo ƷƷay eye ma sliƷe faya mənese ha bo ƷƷay bay.

#### *Ndo məge məsler i Mbəlom dedək eye*

14 Matay ha wu neheƷe na tsik aƷe a zləm a siƷe i ndo hay tebiƷe hərwi ada tā dzala ha faya. Tsikatay ta gədaƷ kame i Mbəlom, tā tərɑ a bo ka gər i bazlam hay bay, tā gər ha hərwi bazlam niƷe hay na, ta gateƷe ƷƷama kƷa tsekƷer bay. Duh ma nasiƷe ha dərəv i ndo neheƷe faya ta Ʒay zləm aƷe.

15 Nəkar na, ƷƷəla ha bo ka məndze andza nakə a say a Mbəlom aƷe. Tərɑ ndo məge məsler nakə a ge horoy ta məsler ƷƷay bay aƷe, andza məƷƷede a dɑ ha bazlam dedək eye a ndo hay ta tsəved eye.

16 Bazlam neheƷe i məkəde wuƷay kəriƷe a Ʒay a gər a Mbəlom bay aƷe na, kɑ tsik a dəma bay. Ndo neheƷe faya ta kədiƷe wuƷay andza niƷe aƷe na, faya ta dziƷe abərə ka tsəved i Mbəlom kame kame duh.

17 Bazlam tay faya ma səkahiƷe andza mbələk nakə faya ma ƷoƷƷoƷiƷe. Himene ta Filete nəteƷe mə ƷalaƷ i ndo niƷe hay.

18 Ta gər ha tsəved dedək eye, tə gwad na, 6a Mbəlom kə lətsa tay ahaya ndo hay abərə ma mədahaƷ. Andza niƷe ndo siƷe hay ta gər ha tsəved i Mbəlom hərwi tay.

\* 2:11 Zəba ma Roma hay 6.5, 8.

<sup>19</sup> Ane tuk na, dedek i Mbəlom ma mbədiye bay. Nenġeje andza mədok i gay nakə ma ndziye bəŋbəŋ aye. Tə watsa ka mədok niye, tə gwad: «Bəy Maduweŋ a sər ndo ŋgay hay.†» Tə watsa dərmak, tə gwad: «Kwa way ka gwad nenġeje ndo i Bəy Maduweŋ na, mâ ge mənese sa bay.»

<sup>20</sup> Ka sər ha mə gay i ndo i zlele na, wu maŋgara eye wal wal andaya. Siye hay tə ŋgar ta gura kəgəbay ta bəre. Siye hay na, ta tsətsad mayako ada siye hay tə ŋgar ta dodo i gərwa. Tə ge ha məsler tə wu neheye na, ta tsəved wal wal. Neheye tə ŋgar ta gura aye kəgəbay ta bəre aye na, tə ge ha məsler pat i maġurlom dəkdek. Siye hay tə ge ha məsler kwa waray waray pat pat.

<sup>21</sup> A tsik nakay na, ka nəkway. Tadə ndoweje kə gər ha mäge mənese tebiye na, Mbəlom ma vəleye məsler ŋgay wal ma təriye andza wu nakə tə ŋgar ta gura kəgəbay ta bəre aye. Ndo i gay ŋgay ma piye na wal hərwi a sər mäge məsler i ndo i gay ŋgay tebiye.

<sup>22</sup> Bor i wu neheye lele bay a satay a gawla hay mäge aye na, kâ ge bay, hway wu yak abəra mə wu niye hay. Ge wu nakə ŋgwalak eye tə dərev yak peteh, pa mədzał gər yak bəŋbəŋ ka Yesu, wuda ndo hay, ndza tə zay ta ndo neheje dərev tay tsədaŋŋa eye ada faya ta dūwulay naha me a Bəy Maduweŋ aye.

<sup>23</sup> Tadə ndo hay faya ta kədiye wuway ka wu nakə ma giye ŋgama bay ada ka wu i matərakahaŋ na, kâ tsik a dəma təbey hərwi ka sər məkədə wuway niye hay ma ndəviye na, tə matəre.

<sup>24</sup> Ane tuk na, ndo nakə faya ma giye məsler i Bəy Maduweŋ aye na, kutoŋ mâ tara ta ndo hay bay. Mâ gatay ŋgwalak a ndo hay tebiye, mâ sla faya matətike a ndo hay lele, mâ səmay naha a wu nakə ndo hay ta tsikiye faya aye.

<sup>25</sup> Tadə agəna ndo mənə dəre yak hay ta təma wu nakə ŋgwalak eye bay na, datay ha ta ləfedede eye. Agəna Mbəlom ma vəlateye tsəved ka məgəre ha mezeleme tay hərwi ada tâ sər bazlam dedek eye.

<sup>26</sup> Kwa tadə Fakalaw kə gəs tay andza a mbəzl tay ha a bəlay hərwi ada tâ ge wu nakə a say aye bəbay na, agəna ta maweye ka mədzał gər ŋgwalak eye hərwi mətəmaw abəra mə həlay ŋgay.

### 3

#### *Ndo hay ta gəriye ha Mbəlom ka mandəve i məndzibəra*

<sup>1</sup> Sər ha wu nakə faya na tsikakeje kənaŋ aye: Ka maduk i duk i məhəne hay na, dərətsətseh ma giye andaya haladzay.

<sup>2</sup> A həlay niye ndo hay ta wudiye bo tay eye dəkdek, ta wudiye suloy, ta giye zlapay, ta dəsłay ha gər a bo tay, ta tsadiye Mbəlom, ta tsənateye zləm a bəba tay hay bay, ta gateje siśe a ndo neheje faya ta dzəniye tay ha aye bay, ta rəhay ha gər a wu i Mbəlom hay bay,

<sup>3</sup> ta wudiye siye i ndo neheje mə gay tay aye bay, ta sakatay naha a ndo hay bay, ta tsikiye wu nakə lele bay aye ka ndo hay, ta səriye i tay na, məgay dərətsətseh a ndo hay, ta wudiye wu lele eye bay,

<sup>4</sup> ta giye daf ka ndo siye hay, ta giye wu hay ze mədzele faya, ta dəsłay ha gər a bo tay haladzay, ta wudiye na, wu nakə a yatay a gər a bo tay aye a ze Mbəlom.

<sup>5</sup> Ta ndzəkitiye bo ndo i Mbəlom hay ane tuk na, ta təmiye gədaŋ i Mbəlom hərwi ada tâ huta mede ŋgwalak eye na, ta wudiye bay. Nəkar na, kâ ndza ka təv tay bay.

† 2:19 Zəba ma Məpesle 16.5.

<sup>6</sup> Siye hay mə walaŋ tay anəke faya ta fələkwiye a gay i ndo hay. Faya ta fələkwiye ta tsəfətsəfe eye, ta vateye gər a ŋgwas neheye bəle eye hay aye hərwi ada tã tãma bazlam tay. Ŋgwas neheye ta ge mezeleme haladzay, faya ta pay bəzay a wu neheye wal wal a yatay a gər aye.

<sup>7</sup> Ta wudã matətike wu hay ane tuk na, tã sər mətšəne wu nakə dedək eye bay.

<sup>8</sup> Ndo neheye na, faya ta kərahiye bazlam dedək eye andza Zanes ta Zambəres ahəl niye ta kərah bazlam i Musa\* aye. Mədzal gər tay kə nas, tã dzala ka Mbəlom ta dedək bay.

<sup>9</sup> Ane tuk na, ta diye kame sa bay hərwi mäge wu i matərakahaŋ tay niye hay ma zəbiye mə dzaydzay kame i ndo hay haladzay parakka andza i Zanes ta Zambəres nakə ahəl niye ndo hay tã sər ka matərakahaŋ tay nakə tã gawa aye.

### *Ndza bəŋbəŋ mə wu nakə ka tətik aye*

<sup>10</sup> Nəkar na, ka sər wu nakə na tətikawatay a ndo hay aye lele, mede ga kəkay na, ka ŋgatay, ka sər wu nakə a seŋ mäge ma məsler ga aye, ada ma kəkay na pa mədzal gər ga ka Mbəlom aye ka sər ha. Ka sər dərmak kəkay nakə faya na zliye ŋgatay ada ma kəkay na wudã ndo hay aye, ada ma kəkay neŋ mandza eye bəŋbəŋ aye, ka sər.

<sup>11</sup> Ka sər kəkay nakə ndo hay tã geŋ dəretsətseh ada ma kəkay na sa dəretsətseh ma wuzlahgəma i Aŋtiyos, ma wuzlahgəma i Ikoniyom ada ma wuzlahgəma i Listəre aye. Ayaw! Ndo hay ta seŋ dəretsətseh haladzay, ane tuk na, Bəy Maduweŋ kway kə tãma ga ha abəra mə wu neheye tebiye.

<sup>12</sup> Ta dedək ndo neheye tebiye a satay mədzepe tã Yesu Kəriste ada mändze andza nakə a say a Mbəlom aye na, ndo hay ta sateye dəretsətseh.

<sup>13</sup> Ndo i sewed hay ta ndo neheye faya ta vatay gər a ndo hay aye mändze tay ma nasiye kame kame, ta vay gər a bo tay ada ta vatay gər a siye i ndo hay dərmak.

<sup>14</sup> Nəkar na, ndza bəŋbəŋ mə wu nakə ka tətik aye ada nakə ka tãma tã dərəv yak peteh aye. Ndza bəŋbəŋ lele hərwi matətikaka way na, ka sər.

<sup>15</sup> Sər ha na, ka sər Derewel i Mbəlom kwa ahəl nakə nəkar wawa eye mba aye. Derewel i Mbəlom niye na, ma vəlakeye tsəved ka məhute metsəhe hərwi ada tadə ka dzala ha ka Yesu Kəriste na, Mbəlom ma mbəliye kar ha.

<sup>16</sup> Wu nakə tebiye tã watsa a Derewel i Mbəlom aye na, a yaw mə bazlam i Mbəlom. Derewel nakay ma dzəniye kway ka matətike wu nakə dedək aye, tadə faya ka gəkweye mənese na, ma dəkweye ha, ma kətiye kway, ma tətikakweye hərwi ada kã gəkwa wu lele eye.

<sup>17</sup> Məsəfəre i Mbəlom a ge andza niye na, hərwi ada ndo i Mbəlom mã təra neŋgeye maləva bo eye hərwi ka tãma a dərəv ŋgay wu nakə tebiye a say mede mata ge ha məsler ŋgwalak eye aye.

## 4

### *Mədə ha bazlam i Mbəlom*

<sup>1</sup> Neŋ faya na tsətsahiye fakaya, dã ha Labara Ŋgwalak eye. Na tsətsah fakaya kame i Mbəlom tã Yesu Kəriste. Neŋgeye ma gateye sariya a ndo neheye ta mət aye ada a ndo neheye nəteye tã dərə aye tebiye. Na tsətsah fakaya andza niye na, hərwi na maweye ada ma təriye bəy.

\* **3:8** Zanes ta Zambəres: Mə kule i Yahuda hay tã zalawatay a maharam i Ezipt hay andza niye. Zəba mə Madayaw abəra ma Ezipt 7.11, 22.



<sup>2</sup> Da ha bazlam i Mbəlom, rəzlay a gər huya kwa a həlay lele eye ada kwa a həlay nakə lele bay aye. Tadə ndo hay faya ta giye mənese na, tsikatay faya, tsikatay tã gər ha mənese, matay naha dərev, tətikatay ta ləfedede eye,

<sup>3</sup> hərwi həlay eye ma ndisleweye ndo hay ta pay zləm a ndo neheye ta tətikateye wu neheye dedek eye bay aye. Duh ta wudiye na, mäge wu neheye lele bay aye ada andza niye ta pəliye ndo matətike hay haladzay ada ta tsikateye wu nakə a yatay a gər a zləm tay mətsəne aye.

<sup>4</sup> Ta peye zləm a wu nakə dedek eye sa bay, ta peye zləm duh na, a ndo i maraw me hay.

<sup>5</sup> Ane tuk na, nəkar na, gay metsehe a bo yak huya, səmay naha a dərətsətseh, dətay ha Labara Nğwalak eye a ndo hay, ge məsler nakə Mbəlom a vələka a həlay aye tebiye.

<sup>6</sup> Neñ na, na təra andza wu kəriye nakə ta vəleye a Mbəlom aye. Həlay nakə ta kədiye ga, na gəriye ha məndzibəra aye mazlambar kə ndislew.

<sup>7</sup> Na gay məsler a Yesu Kəriste tə dərev ga peteh andza ndo nakə a nğəla ha bo ka mabəbazl bo seh lele aye. Na ndəv ha wu nakə Mbəlom a vələñ a gwedəñ ge aye andza ndo nakə a ndəv ha mahway aye. Wu neheye ka dzalakwa ha faya na, na gər ha kwa tsekweñ bay tebiye.

<sup>8</sup> Anəke na, Mbəlom kə ləva ha bo ta magogoy ga mə mbəlom hərwi neñ kame nğay mənese kwa tsekweñ andaya fagaya bay. Bəy Maduweñ kway, neñgeye nakə ma gateye sariya dedek eye a ndo hay ma ta vələñeye magogoy ga pat naka ma ta gakeye sariya aye. Ma ta vələñeye a neñ dəkdek bay, ma ta vələteye a ndo neheye tebiye faya ta həbiye na aye.

### *A say a Pol Timote mā ye ka təv nğay*

<sup>9</sup> Ge gədañ hərwi ada kã yaw ka təv ga bəse,

<sup>10</sup> hərwi Demas kə gər ga ha. A wuda wu neheye ka məndzibəra aye, hərwi niye ki ye nğway a Tesalonik. Kəreskenes neñgeye na, ki ye a Galat ada Titus na, ki ye a Dalmatiya.

<sup>11</sup> Maa zəkaw ka təv ga na, Luka mahəñgeye. Aza ka deyeweye na, dumara ta Markus salamay hərwi ma sliye faya madzəne ga ka məsler.

<sup>12</sup> Tisik i nğay na, na slər ha a gəma i Efez.

<sup>13</sup> Ahəl nakə ka deyeweye na, do a gəma i Tərowas, zleñ ahaya peteked i mətasl ga nakə na gəray ha a həlay i Karpus aye. Həl ahaya dərəwel hay dərmaç, ane tuk na, a señ wene wene eye na, neheye tə ge ta mbal aye.

<sup>14</sup> Aləgəzandər ndo məvədə wu kə geñ sewed haladzay. Bəy Maduweñ kway ma ta may ha a dəma magogoy i məsler nğay.

<sup>15</sup> Nəkar na, ge metsehe bəna agəna ma pəliye fakaya tsəved məgaka sewed dərmaç hərwi kwa tsekweñ a wuda bazlam kway bay.

<sup>16</sup> Pat makurre eye nakə ti ye ga ha kame i sariya, na ge me abəra ka bo na, ndəray ki ye naha mata meñ bo bay, tə gər ga ha. Mbəlom mā pəsətay ha.

<sup>17</sup> Ane tuk na, Bəy Maduweñ kway, neñgeye na, kə gər ga ha bay, kə vələñ gədañ hərwi ada nã dā ha bazlam nğay parakka, nã hambər faya abəra kwa tsekweñ bay. Ada ndo i gəma hay wal wal haladzay ta tsəne. Bəy Maduweñ kə təma ga ahaya abəra mə bazlam i zil.\*

<sup>18</sup> Ada na sər na, Bəy Maduweñ ma ta təmiye ga ha abəra mə wu neheye tebiye lele bay aye, ada ma tsəpiye ga hərwi ada nã ye a bəy nğay a mbəlom. Zambadakway ka tor eye. Mā ge bo andza niye!

### *Mətsike me*

\* 4:17 Zəba ma Dəmes hay 22.22.

<sup>19</sup> Tsikatay ha me a Pərisil ta Akelas. Tsikay ha me a ɲgwas i Onezifor ta wawa ɲgay hay.

<sup>20</sup> Erast, neɲgeye na, ma ndziye ma gəma i Koriɲte. Tərofime na, na gər ha ma gəma i Melet hərwi neɲgeye dāvats eye.

<sup>21</sup> Ge gədaɲ madayaw ka təv ga kanaɲ ta bəse, ahəl nakə həlay i mətasl ka dazlay zuk bay aye. Ebulus, Pudenes, Kolodiya, Linus ada tə siye i ndo məpe mədzal gər hay ka Yesu neheye kanaɲ aye ta tsikaka naha me.

<sup>22</sup> Bəy Maduweɲ mâ tsəpa kar huya. Mâ pa fakuma ɲgama tebiye!

## Derewel nakə Pol a watsay naha a Titus aye Məfələkwe

Titus neŋgeye ndo məleke ha Pol ma məsler. Ahəl nakə Pol mə həlay nakə mawura bo ta ndo i Korinṭe hay aye na, Titus kə ge məsler ɲɠwalak eye haladzay. Pol a watsay naha derewel nakay na, neŋgeye ma Kəret, dala naka malawara eye ta yam aye. Mə dəma na, a matay bo a ndo məpe mədzal gər hay ka mändze lele.

Pol a may ha a zləm a Titus ka lele i mändze i ndo məkalay kame a ndo məpe mədzal gər hay (1.5-16). A tsikay me a zləm ka gər i mändze ta slala i ndo hay wal wal: Ta ndo neheye guram eye hay, dahəlay hay, gawla hay, beke hay (2.1-15). Yesu Kəriste a vəl ha sifa ɲgay na, hərwi mətəme tay ha ndo hay abəra ma mənese kwa waray waray (2.14). Mədok i sifa wədeye i ndo məpe mədzal gər hay mapa eye na, ka neŋgeye.

### *Mətsike me*

<sup>1</sup> Maa watsa derewel nakay na, neŋ Pol, ndo i məsler i Mbəlom, ada ndo i maslaŋ i Yesu Kəriste. Mbəlom a zla ga, hərwi ada nā tsikatay bazlam ɲgay a ndo ɲgay neheye a pala tay ha aye. Na tsikateye na, ada tā dzala ha ka Mbəlom, tā sər dedək. Hərwi dedək na, ma dəkweye ha mede nakə a yay a gər a Mbəlom aye.

<sup>2</sup> Na giye andza niye na, hərwi ada ndo hay tā sər ha ta huta sifa nakə ma ndəviye bay aye. Mbəlom neŋgeye na, a raw me təbey. A gwad ma vəlakweye na, kwa ahəl nakə kə ge mändzibəra zuk bay aye.

<sup>3</sup> A da ha na, ahəl ɲgay nakə a ndisl a dəma aye. A dəkway ha wu nakə a gwad ma vəlakweye na, tə bazlam i ndo neheye a slər tay ha hərwi ada tā da ha bazlam ɲgay aye. Mbəlom neŋgeye ndo mətəme kway ha kə vəleŋ bazlam nakay a həlay, a gwedeŋ: «Tsikatay a ndo hay dərmak.»

<sup>4</sup> Titus, na watsaka naha derewel nakay na, a nəkar. Nəkar na, andza wawa ga, hərwi mədzal gər may nəte ka Yesu.

Mbəlom Bəba kway, tə Yesu Kəriste, ndo mətəme kway, tā pa fakaya ɲgama ada tā vəlaka zay.

### *Məsler nakə Titus faya ma giye ka dala i Kəret aye*

<sup>5</sup> Na gər kar ha ka dala i Kəret na, hərwi ada kâ lambad tay ha wu neheye a ze naha malemede aye. Sa na, ada kâ ye a walaŋ i gəma hay, kâ pala ndo hay ada tā təra madugula hay, nəte nəte, tā dzəna ndo mədzal gər hay aye. Ge na, andza nakə na tsikaka aye.

<sup>6</sup> Madugula na, tā ɲgəlatay bəzay bay. Mâ ge na, zal i ɲgwas nəte. Wawa ɲgay hay tā dzala ha ka Yesu. Mede tay mâ ge lele, hərwi ada ndo hay tebiye tā zəba fataya na, ta ge mənese bay. Tâ gəsay me a bəba tay lele.

<sup>7</sup> Andza niye madugula na, ndo hay tā ɲgəlay bəzay bay. Hərwi məsler nakə ma giye na, məsler i Mbəlom. Neŋgeye na, mâ dəslay ha gər a bo ɲgay bay. Mâ ge mevel bay, mâ kwaya bay, mâ kəf bo ta ndo hay bay, mâ ge bor i dala bay.

<sup>8</sup> Duh neŋgeye na, mâ təma ndo hay a gay ɲgay lele, mâ wuɗa na, mäge wu lele eye, mâ təra ndo masəra gər eye lele, mâ təra ndo i ɲɠwalak, mâ təra ndo mə pay naha faya a Mbəlom, mâ gay metsehe a bo ɲgay lele.

<sup>9</sup> Mâ pa a dɔrev ŋgay na, bazlam dedek eye, andza nakə ka tətikakwatay a ndo hay aye. Tadə kə ge andza niye na, ma sliye faya məvəlatay gədan a ndo hay tə bazlam nakay. Sa na, ma sliye faya mədatay ha mənese i ndo neheye tə gwad bazlam nakay lele bay aye parakka.

<sup>10</sup> Na tsik andza niye na, hərwi ndo hay andaya haladzay mə walaŋ i ndo mədzal gər hay ta təma bazlam i ndo təbey. Nəteye faya ta tsikiye na, bazlam nakə ma dzəniye ndo hay bay aye. Faya ta vateye gər a ndo hay. Ndo mæge wu niye hay wene wene eye na, Yahuda hay.

<sup>11</sup> Madugula hay, tã gatay me, tã ŋgəraz ka ndo niye hay. Hərwi nəteye na, faya ta nasiye ha bədgay i ndo siye hay. Faya ta tətikiye a ndo hay na, wu neheye a ye ka bo matəfike bay aye. Faya ta giye andza niye na, məhute ha dala tsa.

<sup>12</sup> Ndo andaya mə walaŋ i Kəret hay, neŋgeye na, kəliŋ tay. A gwad: «Kəret hay na, maraw me eye hay, sewed eye hay andza wu i pəsl hay. Nəteye səe eye hay. Tə dzala i tay na, ka wu mənday tsa.»

<sup>13</sup> Kəliŋ tay niye a tsik na, dedek.

Hərwi niye, tsikatay faya lele hərwi ada tã dzala ha ka Yesu.

<sup>14</sup> Tsikatay faya dərmaƙ hərwi ada tã pay zləm a wurmbez i Yahuda hay sa bay. Tã pay bəzay a bazlam i ndo neheye ta kərah məpay bəzay a dedek i Mbəlom aye bay.

<sup>15</sup> Tadə ndoweye tsədanŋa ka təv i Mbəlom na, wu hay tebiye tsədanŋa hərwi ŋgay dərmaƙ. Ndo neheye dɔrev tay lelebay ada ta dzala ha ka Mbəlom bay aye na, wu tebiye ta giye na, lelebay, hərwi mədzal gər tay na, kə nas. Ada faya ta giye wu nakə lelebay aye na, horoy a gatay bay.

<sup>16</sup> Nəteye tə gwaday a gər tay na, tə sər Mbəlom. Azlakwa duh wu neheye faya ta giye na, faya ma bəziye ha na, tə sər Mbəlom bay. Nəteye na, tə pay naha faya a Mbəlom bay. Faya ta giye wu nakə a say a Mbəlom bay aye. Wu nakə lele aye na, tə mba faya mæge bay.

## 2

### *Məpay naha faya a Mbəlom na, kəkay?*

<sup>1</sup> Titus, nəkar na, tsikatay dedek i Mbəlom a ndo hay.

<sup>2</sup> Gwadatay a bagwar hay na, tã kwaya bay. Tã ge na, wu neheye dā ndo hay ta rəhay ha gər aye. Tã gay metsehe a bo tay lele, tã dzala ha ka Mbəlom ta dedek, tã wuda ndo hay tə dɔrev tay peteh. Dəretsətseh kə ndzatay a gər na, tã zla ŋgatay.

<sup>3</sup> Tsikatay a ŋgwas bagwar eye hay andza niye dərmaƙ, hərwi ada tã ge na, wu neheye a yay a gər a Mbəlom aye. Tã ŋgəlay bəzay a ndo bay, tã təra beke i guzom bay. Gwadatay na, tã tətikatay wu nakə lele aye a ndo hay.

<sup>4</sup> Tadə tã ge andza niye na, ta tətikiye tay ha ŋgwas neheye dahəlay aye hay, ta wudiyə zal tay hay ta wawa tay hay na, kəkay.

<sup>5</sup> Ta tətikiye tay ha hərwi ada tã gay metsehe a bo tay dərmaƙ, tã ge madama bay, tã ge məsler mə gay tay hay lele, tã ge na, məsler lele eye, tã gəsətay me a zal tay hay. Tadə ta ge andza niye na, ndo hay ta tsikiye wuray ka bazlam i Mbəlom bay.

### *Gawla hay*

<sup>6</sup> Tsikatay a gawla hay andza niye dərmaƙ, gwadətay tã gay metsehe a bo tay.

<sup>7</sup> Nəkar dərmak na, ge wu neheye lele eye dekdək, hərwi ada gawla hay tâ tətik mede yak. Ka tətikateye wu na, tətikatay tə dərev nəte. Tətikatay na, wu nakə ada ndo hay ta rəhakeye ha gər aye.

<sup>8</sup> Tətikatay na, wu nakə dedək aye, ada ndaray ma sliye faya məmaka ha manese bay. Andza niye, horoy ma gateye a ndo mənə dəre yak hay, hərwi ta huta bazlam neheye lelebay aye bay.

### *Beke hay*

<sup>9</sup> Beke hay na, gwadatay tâ gəsətatay me a ndo i gay tay hay huya. Tâ mbatsatay me a ndo i gay tay hay bay, ada wu neheye ta giye na, mâ yatay a gər a ndo i gay tay hay.

<sup>10</sup> Tâ ge mavaha bay dərmak. Duh tâ ge na, wu lele eye hay, hərwi ada ndo i gay tay hay tâ sər ha na, nəteye dedək eye. Tadə tâ ge andza niye na, bazlam neheye faya ka tətikakweye ka gər i Mbəlom ndo mətəme kway ha aye na, ndo hay ta zambadəye.

### *Mahəbe məmaw i Yesu*

<sup>11</sup> Ndo hay tâ ge na, wu nakə na tsik aye hərwi Mbəlom ka bəzatay ha a ndo hay neŋgeye na, a wudā ndo hay hərwi ada tâ təma.

<sup>12</sup> Mbəlom a tətikakway andza niye na, kâ gərakwa ha mede kway nakə a yay a gər bay aye, ada kâ pakway bəzay a wu i məndzibəra neheye faya ta səpətiye kway aye bay. Duh ahəl nakə nəkway mandza eye ka məndzibəra mba na, gakway metsehe a bo kway. Gakwa na, wu dedək eye ada nakə a yay a gər a Mbəlom aye.

<sup>13</sup> Gakwa andza niye ada təkakway dəre a pat lele eye nakə ndo mətəme kway Yesu Kəriste ma deyeweye ta məzlaḅ i Mbəlom kway. Neŋgeye na, Mbəlom bagwar eye.

<sup>14</sup> A vəl ha gər ŋgay hərwi ada kâ təkakwaw abəra mə mezeleme, ada kâ tərakwa tsədəŋna kame ŋgay. Andza niye ka tərakwa ndo ŋgay hay, ada ka wudəkwa məge wu neheye ŋgwalak aye pat pat.

<sup>15</sup> Anəŋ andza nakay, nəkar na, tətikatay wu nakə na watsa aye. Vələtatay gədan, tsikatay faya a ndo neheye tə pay zləm a bazlam yak bay aye. Tətikatay ta məzlaḅ nakə Mbəlom ma vəlakeye. Ndo hay tâ təra kar ha bay.

## 3

### *Mede nakə a yay a gər a Mbəlom aye*

<sup>1</sup> Tsikatay a ndo məpe mədzal gər hay ka Yesu na, tâ rəhatay ha gər a bəy i dala hay tebiye. Tâ ge wu nakə bəy hay ta tsikateye. Tâ wudā na, məge ŋgwalak huya.

<sup>2</sup> Gwadatay na, tâ ŋgəlay bəzay a ndo bay, tâ təra a bo bay. Duh na, tâ təra ndo masəra me eye hay, tâ dəslatay ha gər a ndo hay tebiye dərmak.

<sup>3</sup> Tsikatay andza niye hərwi ahəl niye nəkway dərmak na, ka sərakwa gər bay, ka rəhakwatay ha gər a ndo hay bay, ka dzakwa tsəved, ka gawakwa na, wu neheye a yawakway a gər aye ta wu neheye ka wudawakwa aye. Ahəl niye na, nəkway lele eye hay bay tebiye. Ka gawakwa dəre ka wu i ndo hay. Ndo hay tə nawakway dəre ada nəkway dərmak ka nawakwatay dəre.

<sup>4</sup> Kwa ka gawakwa andza niye bəbay na, Mbəlom ndo mətəme kway ha, ka bəzakway ha neŋgeye ndo məgay ŋgwalak a ndo hay ada a wudā tay ha haladzay.

<sup>5</sup> Andza məgwedə, a təma kway ha na, kəriye. A təma kway ha na, hərwi ŋgwalak kway hay daw? A'ay! A təma kway ha na, hərwi ka gəkway mə bo. A

barakway na mezeleme kway na, hārwi ada kâ wakwa bo masusulo eye ta gədan̄ i Məsəfəre Tsədən̄na eye ada kâ hutakwa məsəfəre wədeye.

<sup>6</sup> Mbəlom kə rah kway ha ta Məsəfəre Tsədən̄na eye tə həlay i Yesu Kəriste ndo məmbəle kway.

<sup>7</sup> A ge andza niye na, hārwi ada kâ hutakwa sifa nakə ma ndəviye bay aye, ka sərakwa Mbəlom ma vəlakweye. Kə vəlakway ha n̄gwalak n̄gay, hārwi ada kâ tərakwa tsədən̄na eye hay kame n̄gay.

*Mətsikay me a zlam a Titus*

<sup>8</sup> Bazlam nakay na tsikaka aye na, ta dedək eye. A seŋ na, ka tətikateye a ndo hay huya, hārwi ada ndo neheye tə dzala ha ka Mbəlom aye, t̄a ge məsler lele eye hay. An̄n̄ wu nakə n̄gwalak aye ada lele ma dzəniye tay ha ndo hay aye.

<sup>9</sup> Məkəde wuway nakə ma giye n̄gama bay aye na, kâ həndzəd̄faya bay. Təd̄ə faya ta kədiye wuway ka bəba tətə may hay na, kâ ye a dəma bay. Kâ tərā ta nətəye bay. Kwa faya ta kədiye wuway ka bazlam i Musa mapala eye na, kâ tsik a dəma bay hārwi wu niye hay na, kəriye, ta dzəniye ndo hay bay.

<sup>10</sup> Ndo nakə ma n̄gəniye tay ha ndo məpe mədzal gər hay ka Yesu na, tsikay faya. Təd̄ə kə gər ha bay na, tsikay faya masulo eye sa. Kə tsəne bay na, m̄a ndza mə walan̄ i ndo məpe mədzal gər hay ka Yesu sa bay.

<sup>11</sup> Nəkar, ka sər ha, slala i ndo niye hay na, kə dze a bəra ka tsəved̄. Nətəye na, ndo i mezeleme hay. Ada faya ta bəziye ha tə həlay tay eye nətəye ndo i mezeleme hay.

<sup>12</sup> An̄n̄ na sləriye naha Artemas kəgəbay Tsik ka təv yak mba. Kə ndisl naha ka n̄gatay na, pəla tsəved̄ madayaw mədzəgər tə neŋ a gəma i Nikopolis. Na dzala na, na ta ndziye mə dəma hus a mandəve i həlay i mətasl.

<sup>13</sup> Dzəna Zenas ndo məge sariya, ta Apolos. Dzəna tay ha, lele. Ahəl nakə ta həndzədiye ta diye kame aye na, dzəna tay ha, wu m̄a kətsatay bay.

<sup>14</sup> Ndo neheye tə dzala ka Yesu andza nəkway na, t̄a tətik məge n̄gwalak dərmak hārwi ada t̄a dzəna ndo neheye wu a kətsatay aye. Təd̄ə ta ge andza niye na, mede tay ma təriye kəriye bay.

<sup>15</sup> Ndo neheye nəmay dziye na, ta tsikaka naha me. Tsikatay me a dzam kway neheye tə dzala ha ka Mbəlom aye dərmak.

Mbəlom m̄a pa fakuma n̄gama tebiye.

## Derewel nakə Pol a watsay naha a Filimonj aye Məfələkwe

Filimonj na, dzam i Pol. Pol a day ha Labara Ngwalak eye, a təra ndo məpe mədzal gər ka Yesu. Filimonj neŋgeye zlele eye. Beke hay andaya mə gay ŋgay. Ndo nakə tə zalay Onezim aye na, beke i Filimonj. A hway ŋgway abəra mə gay i Filimonj. A ndzay a gər a Pol ma danḡay. Neŋgeye dərmak a təra ndo məpe mədzal gər ka Yesu. Pol a maya ahaya Onezim a Filimonj, a watsayaw dərewel a həlay. Filimonj ma təmiye na Onezim na, ma kəkay?

Derewel nakə Pol a watsay a Filimonj aye na, hərwi ndo neheye tə hayawa gər a gay ŋgay aye dərmak (mede 2).

Mə dərewel na, Pol a gwaḡay a Filimonj mâ təma na Onezim andza malamar ŋgay nakə a wuda na haladzay aye. Andza niye, ndo neheye beke hay bay aye, beke hay, nəteye malamar hay mə Kəriste. Ane tuk na, Pol kə gay kutonj a Filimonj bay. A say na, Filimonj mâ dzala tə gər ka wu nakə ma giye aye.

Labara i mawuḡe bo a ge məsler ka məndze i ndo nəte ada ka məndze i ndo hay tebiye.

### *Mətsike me*

<sup>1</sup> Maa watsa dərewel nakay na, neŋ Pol. Neŋ ma danḡay hərwi məge məsler i Yesu Kəriste. Maa watsa na, nəmay ta malamar kway Timote. Nəmaa watsa naha a nəkar dzam may Filimonj. Hərwi nəkar na, ka dzapakwa nəte ka məsler i Bəy maduweŋ kway Yesu Kəriste.

<sup>2</sup> Tsikatay me a Afiya ta Arsip neŋgeye nakə sidzew i Yesu tə neŋ ka tsəved i Mbəlom aye. Ada kâ tsikatay ha me a siye i ndo neheye ti yawa naha a gay yak mata duwulay me a Mbəlom aye tebiye dərmak.

<sup>3</sup> Mbəlom Bəba kway ta Bəy Maduweŋ kway Yesu Kəriste tâ pa fakuma ŋgama ada tâ vələkum zay.

<sup>4</sup> Ahəl nakə faya na giye amboh a Mbəlom aye na, na gaway naha sisəe a Mbəlom hərwi yak huya.

<sup>5</sup> Hərwi na tsəne na, nəkar ka wuda ndo məpe mədzal gər hay ka Yesu ta dedək ada ka pa mədzal gər yak na, ka Bəy Maduweŋ kway Yesu.

<sup>6</sup> Neŋ faya na duwuleye me a Mbəlom hərwi ada mədzepe kway nakə ka dzapakwa ta ndo məpe mədzal gər hay ka Yesu aye hərwi nakə ka dzala ha ka Yesu aye ma dzəniye kway. Ma dzəniye kway hərwi ada kâ sarakwa ha wu neheye Mbəlom a vələkway lele aye hay tebiye. A vələkway tə həlay i Yesu Kəriste.

<sup>7</sup> Malamar ga Filimonj! Dərev ga kə ŋgwasa haladzay ada ka vələŋ gədanj haladzay dərmak hərwi ka wuda siye i ndo məpe mədzal gər hay ka Yesu ada faya ka vələteye gədanj sa tsə.

### *Pol a gay amboh a Filimonj hərwi Onezim*

<sup>8</sup> Hərwi niye, neŋ faya na gwaḡakeye amboh ka məge wu nakə na tsikakeye anəke aye. Neŋ na, ndo i maslanj i Yesu Kəriste. Na sliye faya mətsikaka ta gədanj ka wu nakə ka giye.



<sup>9</sup> Ane tuk na, na tsikakeye andza niye bay. Na dzala dɔh na, mɔgaka amboh hɔrwi ka wuda ndo hay. Neɲ Pol na, neɲ guram eye ada neɲ anɔke madarɔzla eye ma danɲay hɔrwi mɔsler i Yesu Kɔriste nakay faya na giye aye.

<sup>10</sup> Neɲ faya na gakeye amboh hɔrwi Onezim. Neɲgeye na, kɔ dzala ka Yesu, ka tɔra andza wawa ga kanaɲ ma danɲay. Neɲ na tɔra bɔba ɲgay.

<sup>11</sup> Ahɛl niye na, kɔ gaka mɔsler sa bay. Ane tuk na, anɔke na, ma gakeye mɔsler sa, a nɔkar ada a neɲ dɔrmak.

<sup>12</sup> Anɔke na, na slɔrakeye naha ka tɔv sa. Ma diye naha andza maa ye naha ka tɔv yak na, neɲ.

<sup>13</sup> Hɔbe a seɲ na, mɔ ndza ka tɔv ga kanaɲ ma danɲay hɔrwi ada mɔ dzɔna ga a bɔram yak nakɔ tadɔ nɔkar ka tɔv ga na, ka dzɔniye ga aye.

<sup>14</sup> Ane tuk na, na sliye faya mɔge andza niye ze nɔkar mɔgwede faya ayaw bay na, na sliye faya bay. Na sliye faya mɔgaka kutoɲ mɔgwadaka geɲ ɲgwalak bay. A seɲ na, dzɔna ga tɔ mɔdzal gɔr yak.

<sup>15</sup> Agɔna a say a Mbɔlom Onezim mɔ ye a tɔv aye mɔ ndzaw tsekweɲ andza nakay hɔrwi ada mɔ ma naha ka tɔv yak ada ka ndzawumeye salamay ka tor eye.

<sup>16</sup> Anɔke na, neɲgeye andza beke sa bay. A ze beke. Neɲgeye malamar may nakɔ dedek eye ma mɔdzepe tɔ Yesu Kɔriste. Neɲ na, na wuda na haladzay. Nɔkar dɔrmak ka wudiye na ma ziye i ga ada neɲgeye malamar yak ka tsaved i Bɔy Maduweɲ andza nɔkar.

<sup>17</sup> Tadɔ ka zɔba fagaya neɲ dzam yak dedek na, tɔma na Onezim tɔ hɔlay sulo sulo eye a gay yak andza ka tɔma na, neɲ.

<sup>18</sup> Tadɔ kɔ nasaka ha wu yak ada agɔna wu yak andaya faya a saka mɔ maka ha na, tsikeɲ, neɲ eye na hamakeye na.

<sup>19</sup> Maa watsa bazlam neheye na, neɲ Pol tɔ hɔlay ga aye: Na hamakeye. Ane tuk na, na hamakeye sa bay hɔrwi sɔr ha, maa tsikaka bazlam i Mbɔlom nakɔ ka huta ha mɔsɔfɔre aye na, neɲ.

<sup>20</sup> Amboh malamar ga, neɲ faya na gakeye amboh tɔ mɔzele i Bɔy Maduweɲ. Geɲ wu nakɔ lele eye, meɲ ha dɔrev tey hɔrwi nɔmay tebiye may aye ka dzapama ka Yesu Kɔriste.

<sup>21</sup> Derewel nakay na watsaka naha na, na sɔr ha wu nakɔ na tsɔtsah naha fakaya aye na, ka giye ma ziye nakɔ na tsɔtsah aye.

<sup>22</sup> Onezim ki ye naha ka tɔma na na, lɔva ha bo tɔ gay nakɔ na ta hɔniye mɔ dɔma aye dɔrmak hɔrwi na dzala na, Mbɔlom kɔ tsɔne amboh kurom nakɔ faya ka gumeye. Ma vɔleɲeye tsaved mede naha ka tɔv kurom sa.

### *Mandɔve i mɔtsike me i Pol*

<sup>23</sup> Epafɔras neɲgeye nakɔ tɔ neɲ salamay kanaɲ ma danɲay hɔrwi mɔsler i Yesu Kɔriste aye kɔ tsikaka naha me.

<sup>24</sup> Markus, Aristark, Demas ta Luka nɔteye neheye ti yawaw ka tɔv ga ada faya nɔmaa giye mɔsler i Mbɔlom dziye, ta tsikaka naha me dɔrmak.

<sup>25</sup> Bɔy Maduweɲ kway Yesu Kɔriste mɔ pa fakuma ɲgama.

## Derewel **nakə tə watsatay naha a** **Hebrœ hay** **aye** **Məfələkwe**

Derewel nakə tə watsatay naha a Hebrœ hay aye na, məzele i ndo məwetse andaya faya bay. A tsikatay me a way hay na, kə də ha bay. Ndo məwetse eye na, ndo Garek, a sər Dzam Guram eye léle. A watsatay naha na, a Yahuda neheye tə dzala ha ka Yesu aye. Nəteye ta ge bəle məpe mədzal gər ka Yesu, a gatay tsəbtsəb sa bay. Siye hay a satay mägəre ha məpe mədzal gər. Hərwi niye, ndo məwetse derewel nakay a say masəkahatay ha matətike nakə tə huta ada məvəlatay gədanj.

Tə Kəriste nakə Mbəlom a sləraw aye, ndo hay ta dzapa ta Mbəlom (1.1-2.18).

Ndo hay ta sliye faya mahəndzəde ka Mbəlom hərwi ŋgwalak nakə Kəriste a ge aye (3.1-5.10).

Ndo məwetse derewel nakay kə də ha haladzay ma kəkay nakə Yesu neŋgeye bagwar i ndo məvəlay wu a Mbəlom i ndo məpe mədzal gər hay ka tor eye andza Melkisedek.

Məpe mədzal gər i bəba tətə hay məvəla eye hərwi məde ha a ndo məpe mədzal gər hay nakay na, ma vələteye gədanj ka mətese abəra mə dəretsətseh hay ada tə masəpete neheye anəke aye (11-12.13). Ma dazlay ka 12.14, məndəve i derewel nakay faya ma diye ha kəkay nakə ndo məpe mədzal gər hay ta sliye faya məndze ta Mbəlom aye, ta ndo siye, ada mäge məhay gər i ndo neheye dedək aye.

### *Mbəlom a tsikatay me a ndo hay tə bədiday i Wawa ŋgay*

<sup>1</sup> Ahəl niye na, Mbəlom kə tsikatay me a bəba tətə kway hay madzəga haladzay ada ta tsəved mekeleŋ eye wal wal haladzay tə bazlam i ndo məde ha bazlam ŋgay hay.

<sup>2</sup> Mbəlom a tsikawa andza niye hus a həlay kway nakay maduk i duk eye. Anəke a tsik bazlam ŋgay duh na, ta bədiday i Wawa ŋgay. Mbəlom a ge məndzibəra ahəl niye tə həlay i Wawa ŋgay, a zla neŋgeye hərwi ada mə ləva wu hay tebiye.

<sup>3</sup> Ta ŋgateye a məzlaḅ i Mbəlom na, mə neŋgeye. Neŋgeye a ndzəkət bo Bəba Mbəlom. Wu hay tebiye andaya hərwi ŋgay. Kə ta tsəved nakə Mbəlom ma bariye mezeleme abəra ka ndo hay aye hərwi ada tā huta tsəved matəre tsədanjja. Ma dəba eye na, a tsal a mbəlom, a ye naha a ndza tə həlay i mənday i Mbəlom neŋgeye nakə a ləva wu hay tebiye aye hərwi ada tā ləva tə neŋgeye.

<sup>4</sup> Andza nakay, Mbəlom a də ha Wawa ŋgay na, bagwar eye, a ze gawla i Mbəlom hay, andza nakə məzele niye Mbəlom a vəlay a ze i gawla i Mbəlom hay aye.

<sup>5</sup> Mbəlom kə tsikay dādā a gawla ŋgay nəte:

«Nəkar wawa ga.

Bəgom neŋ na təra Bəba yak.»

Kə tsik ka gawla ŋgay nəte:

«Neŋ na təriye bəba ŋgay,

neŋgeye ma təriye wawa ga\*» bay.

\* 1:5 2 Samuyel 7.14.

<sup>6</sup> Ane tuk na, ahəl nakə Mbəlom faya ma sləraweye Wawa ŋgay felik eye ka məndzibəra na, a gwad:

«Gawla i Mbəlom hay tebiye tā dəslay ha gər.»

<sup>7</sup> Ka gər i gawla i Mbəlom hay na, Derewel i Mbəlom a gwad:

«Nəteye na, ndo i maslan ŋgay hay.

A tərə tay ha andza mətasl, nəteye andza dərneh i ako.»

<sup>8</sup> Ane tuk na, ka gər i Wawa i Mbəlom na, mawatsa eye mə Derewel i Mbəlom a gwad:

«Nəkar na, Mbəlom, ka ləviye bəy yak ka tor eye.

Ka ləviye ndo yak hay ta ŋwalak.

<sup>9</sup> Wu nakə ŋwalak eye na, ka wuda.

Wu nakə ŋwalak eye bay aye na, a yaka a gər bay tebiye.

Hərwi niye Mbəlom, Bəba yak Mbəlom, kə zla kar

ada kə pa kar bagwar eye ka ze ndo neheye nəkurom ka bo dziye aye

ada kə vəlakway mənḡwese.»

<sup>10</sup> Derewel i Mbəlom a gwad sa:

«Bəy Maduweŋ, ka madazlay i wu tebiye maa ge məndzibəra na, nəkar.

Nəkar tə həlay yak eye ka ge magərmbəlom.

<sup>11</sup> Wu neheye tebiye ka ge aye ta dziye.

Ane tuk na, nəkar na, ka ndziye ka tor eye.

Wu neheye tebiye ta giye guram andza peteked.

<sup>12</sup> Ka pađiye tay ha andza ta pađiye peteked guram eye.

Nəteye ta mbəđiye andza peteked a mbəđa,

ane tuk na, nəkar na, ka mbəđiye bay,

sifa yak ma ndəviye dāđa bay.<sup>†</sup>»

<sup>13</sup> Dāđa Mbəlom kə tsikay a gawla ŋgay:

«Dara, ndza tə həlay i mənday ga,

hus a pat nakə neŋ, na piye tay ha ndo məne dərə yak hay a huđ i sik yak aye<sup>‡</sup>» na,

kə tsikay nəte bay.

<sup>14</sup> Gawla i Mbəlom hay nəteye na, way hay? Nəteye məsəfəre neheye faya ta geye məsler a Mbəlom aye, ma sləriye tay ha məmatay bo a ndo neheye faya ma təmiye tay ha aye.

## 2

### *Kā gakway masəfaya a wu nakə Mbəlom a tsik aye bay*

<sup>1</sup> Hərwi niye, gakway metsehe a bazlam neheye ka tsənakwa aye lele huya hərwi ada kā dzakwa tsəved bay.

<sup>2</sup> Bazlam neheye gawla i Mbəlom hay tə yaw tə tsik aye na, gədan eye haladzay.\* Ndo neheye tə nas ha ada ta rəhay gər bay aye na, Mbəlom kə gatay sariya dā ka mənese tay.

<sup>3</sup> Kə ge Mbəlom kə gatay sariya na, ka gwadum na, tadə ka gakway masəfaya a tsəved ŋwalak eye nakə ka təkəweye ha aye na, ma gakweye sariya bađaw? Tadə ka gakway masəfaya na, ta dedək ka təkəweye bay. Maa lah məde ha Mbəlom ma təmiye kway ha ma kəkay na, Bəy Maduweŋ. Ndo neheye tə tsəne aye na, maa tsikakway bazlam neheye dedək na, nəteye.

<sup>†</sup> 1:12 Dəmes hay 102.26-28. <sup>‡</sup> 1:13 Dəmes hay 110.1. \* 2:2 A tsik ka bazlam mapala nakə Mbəlom a vətay a Israyel hay mə mahamba i Sinay aye.

4 Bo i Mbəlom eye tə gər ŋgay, kə da ha bazlam neheye na, dedək ta masuwayaŋ wal wal tebiye ada Məsəfəre Tsədəŋŋa eye a vəl gədaŋ a ndo hay ka mage wu hay wal wal andza nakə a say aye.

*Yesu kə da ha tsəved nakə ma təmiye kway ha aye*

5 Mbəlom a pa hərwi mələve məndzibəra wedeye nakə ma deyeweye na, gawla i Mbəlom hay bay.

6 Azlakwa bay, mawatsa eye mə Derewel i Mbəlom na, ndoweye a gwad:  
«Ndo neŋgeye na, way tey Mbəlom,  
nakə ka dzaliye ka neŋgeye aye?

Ndo zezeŋ way nakə ka dzaliye faya, ka geye gər aye?

7 Hərwi həlay tsekweŋ, ka pa tay ha ndo zezeŋ hay a huvo i gawla i Mbəlom hay.

Ma daba eye na, ka vəlay məzlaḅ ta mədəslay ha gər.

8 Ka pa wu hay tebiye a huḍ i sik ŋgay mâ ləva.†»

Kə ge Mbəlom kə pay wu hay tebiye mâ ləva na, niye na, andza məgwede wuray andaya nakə kə pay bay aye na, andaya bay. Ane tuk na, anəke faya ka ŋgatakweye faya ma ləviye wu hay tebiye zuk bay.

9 Ane tuk na, ka ŋgatakway a Mbəlom kə kəts ha Yesu abəra ka gawla i Mbəlom hay həlay tsekweŋ. Anəke na, Mbəlom kə vəlay məzlaḅ ada ta mədəslay ha gər hərwi nakə kə sa dəretsətseh ada kə mət aye. Niye na, ta ŋgwalak i Mbəlom nakə Yesu a mət hərwi ndo hay tebiye aye.

10 Mbəlom a ge wu hay tebiye. A ge tay ha na, hərwi ŋgay eye ŋgway. A say məhəle ndo hay haladzay a təv ŋgay nakə ta məzlaḅ aye, nəteye na, wawa ŋgay hay. Andza niye kə yay a gər matəre ha Yesu ŋgwalak eye hərwi mətəme tay ha tə dəretsətseh ŋgay ada ta məməte ŋgay, hərwi mata de kame tay mətəme tay ha na, Yesu.

11 Maa təra ha ndo hay ŋgwalak eye kame i Mbəlom na, Yesu ada nəteye neheye a təra tay ha ŋgwalak eye hay aye na, bəba tay nəte. Hərwi niye horoy ma geye məzalataŋ malamar ga hay bay.

12 A gwad:

«Na dətəy ha məzele yak a malamar ga hay

Na zambadakeye mə walaŋ i ndo hay mahaya gər eye.‡»

13 A gwad sa:

«Neŋ, na dzaliye ha ka Mbəlom.»

A gwad sa:

«Neŋ kənaŋ ta wawa neheye Mbəlom a peŋ tay aye.§»

14 Wawa neheye a tsik fataya aye na, nəteye tebiye slo ada bambaz. Neŋgeye dərmak ka təra ndo zezeŋ andza nəteye hərwi ada mâ mət ada andza niye ma giye ha bəle ta ndo nakə gədaŋ i məməte mə həlay ŋgay aye, andza məgwede Fakalaw.

15 Yesu a ge andza niye na, hərwi zluwer mâ gəs tay ha ndo hay hərwi məməte bay. Ahəl niye tə ndzawa huya andza beke hay hərwi zluwer a gawatay, ane tuk na, anəke Yesu kə təma tay ha.

16 Ka sarakwa ha a yaw məmatay bo a gawla i Mbəlom hay bay, a yaw məmatay bo na, a wawa i huḍ i Abraham hay.

17 Andza niye, kutoŋ ka təra andza malamar ŋgay hay mə wu hay tebiye. A ge niye na, hərwi ada mâ təra bagwar i ndo məvələway wu a Mbəlom nakə ma gateye ŋgwalak a ndo hay ada ma pay naha faya a Mbəlom aye, hərwi ada

† 2:8 Dəmes hay 8.5-7. ‡ 2:12 Dəmes hay 22.23. § 2:13 Ezay 8.17-18.

mâ vël ha gër ñgay hærwi mäheme mezeleme i ndo hay ada mäsäre tay ka bo ndo hay ta Mbälom.

<sup>18</sup> Anäke na, ma sliye mämätay bo a ndo neheye Fakalaw faya ma səpatiye tay aye hærwi ahël niye Fakalaw ka səpat na ada kə say dæretsətseh.

### 3

#### *Yesu bagwar eye a ze ha Musa*

<sup>1</sup> Malamar ga hay, Mbälom a pala kurom na, ada kâ tərüm ndo ñgay hay. Hærwi niye pum mädzal gër kurom ka Yesu. Nengeye ndo nakə Mbälom a slaraw aye hærwi ada mâ tæra bagwar i ndo mävälaway wu a Mbälom ka wu neheye ka pakwa faya mädzal gër aye.

<sup>2</sup> Maa pa na ka mäge mäsler nakay na, Mbälom ada kə pay naha faya a Mbälom mä wu nakə a ge aye, andza Musa nakə a pay naha faya a Mbälom ma mäsler nakə a gawa aye hærwi ndo i gay i Mbälom hay tebiye.\*

<sup>3</sup> Ngwalak eye mädäslay ha gër haladzay a Yesu abära ka Musa andza nakə ta däslyay ha gër haladzay na, a ndo nakə a dæzl gay aye bəna a gay bay.

<sup>4</sup> Gay tebiye madæzl na, ndo. Ane tuk na, ndo nakə a dæzl wu hay tebiye na, Mbälom.

<sup>5</sup> Aya Musa nengeye kə pay naha faya a Mbälom ma mäsler nakə a ge tebiye mä gay i Mbälom aye. Ane tuk na, nengeye na, ndo i mäsler i Mbälom dëkdëk tsa. Mäsler ñgay na, mädätay ha a ndo hay wu neheye Mbälom ma tsikiye mba kame aye.

<sup>6</sup> Kæriste na, nengeye wawa nakə ma ləvay gër a gay i Bəba ñgay Mbälom aye. Nəkway na, ndo ñgay hay. Tadə ka pakwa faya mädzal gër kway bəñbəñ ada ka pakwa mädzal gër kway ka wu neheye ta məñgwese hus ka mandəve aye na, nəkway dərmağ gay ñgay.

#### *Mbälom faya ma ləviye ha bo ta təv mazəzukuw bo hærwi ndo neheye ta pa faya mädzal gër aye*

<sup>7</sup> Hærwi niye Məsəfäre Tsədəñña eye a gwad:  
«Bəgom tadə ka tsənum mäsike me i Mbälom na,

<sup>8</sup> kâ kulum ha gër kurom,  
andza i bəba tətə kurom neheye ahël niye tə kula ha gër tay ka Mbälom aye bay.

A həlay niye na, nəteye mä makulkwandah məve kuro kuro fad,  
tə ge vərəm ka Mbälom ada ta dza ha Mbälom.

<sup>9</sup> Mbälom a gwad: “Kwa ta ñgatay lele a wu neheye na ge aye bəbay na,  
ta dza ga ha məve kuro kuro fad.

<sup>10</sup> Hærwi niye na ge mevel ka nəteye.  
Na gwad: Mädzal gër tay ka dzədza,  
ta tsəne wu nakə a señ aye bay.

<sup>11</sup> Kə ndeləñ ada na mbađa:

Ta fäləkwiye dāda a təv ga nakə na ləvatay ha bo ta zəzukuwiye bo mə dāma aye bay.†”»

<sup>12</sup> Malamar ga hay, gum metsehe! Ndo nakə mädzal gër ñgay ñgwalak eye bay aye, a dzala ha ka Yesu bay aye na, mâ ge andaya mä walañ kurom bay. Ndo nakə a dzala ha ka Yesu sa bay aye ma gəriye ha Mbälom nakə ta sifa aye.

\* 3:2 Məpesle 12.7. † 3:11 Dəmes hay 95.7-11.

<sup>13</sup> Ane tuk na, bəgom a say a Mbəlom mətsikakum me sa. Vəlum a bo gədaŋ pat pat mə walaŋ kurom hərwi ada Fakalaw mā səpat kurom ka mäge mənese bay, ada kâ kulum ha gər kurom bay.

<sup>14</sup> Tađə nəkway huya faya ka gakweye gər a wu neheye ka pakwa faya mədzal gər ka madazlay hus ka mandəve i məsəfəre kway na, ta dedək nəkway ndo i Kəriste hay.

<sup>15</sup> Andza nakə tə gwad:

«Bəgom, tađə ka tsənum mətsike me i Mbəlom na,  
kâ kulum ha gər kurom bay  
andza ahəl nakə bəba tətə kurom hay tə ge vərəm ka Mbəlom aye bay.»

<sup>16</sup> Ndo neheye tə tsəne mətsike me i Mbəlom ada tə ge faya vərəm aye na, way hay? Na gwad ndo neheye tə yaw abəra mə Ezipt tə pay bəzay a Musa aye bədaŋ?

<sup>17</sup> Mbəlom a ge mevel məve kuro kuro fađ ahəl niye na, hərwi way hay? A ge mevel ka ndo neheye tə ge mənese aye na gwad ba? Hərwi niye tə mət mə makulkwandah.

<sup>18</sup> Mbəlom a mbada a gwad: «Ta fələkwiye dađa a təv ga nakə na ləvatay ha bo ta zəzukwiye bo mə dəma aye bay.» A tsik andza niye na, ka way hay? Na gwad ka ndo neheye ta kərah marəhay ha gər aye ba?<sup>‡</sup>

<sup>19</sup> Andza niye, nəmaa zəba faya Mbəlom a vəlatay tsəved məfələkwe a dəma bay na, hərwi nakə ta dzala ha ka Mbəlom bay aye.

## 4

<sup>1</sup> Ba Mbəlom kə tsik a gwad ka fələkwakweye a mazəzukw bo ŋgay. Ane tuk na, dzədzarakwa hərwi ada ndəray mə walaŋ kurom mā mətsa abəra ka məfələkwe a dəma bay. Wu nakə Mbəlom a gwad ma giye na, ma giye huya.

<sup>2</sup> Nəkway na, ka tsənakwa Labara Ŋgwalak eye nakay andza nakə ahəl niye bəba tətə kway hay tə tsəne aye dərmak. Ane tuk na, labara nakay kə gatay ŋgama bay hərwi ta dzala ha faya bay.

<sup>3</sup> Mata fələkwe a mazəzukw bo i Mbəlom niye na, nəkway neheye ka dzalakwa ha aye. Mbəlom a gwad:

«Kə ndeleŋ ada na mbada,

ta fələkwiye dađa a təv ga nakə na ləvatay ha bo ta zəzukwiye bo mə dəma aye bay.»

Azlakwabay Mbəlom a ndəv ha məsler ŋgay kwa a həlay nakə a ge məndzibəra aye.

<sup>4</sup> Mawatsa eye mə Dərewel i Mbəlom, tə tsik ka məhəne matasəla eye: «Məhəne məkwa na, Mbəlom a ndəv ha məsler ŋgay, məhəne matasəla eye a zəzukw bo.\*»

<sup>5</sup> Ma təv mekeleŋ eye Mbəlom a gwad sa: «Ta fələkwiye dađa a təv ga nakə na ləvatay ha bo ta zəzukwiye bo mə dəma aye bay.»

<sup>6</sup> Ndo neheye tə tsəne Labara Ŋgwalak eye kurre aye tə fələkwa a mazəzukw bo bay na, hərwi ta kərah marəhay ha gər a Mbəlom. Ta dedək təv mazəzukw bo andaya anaŋ, ndo mekeleŋ eye hay ta fələkwiye a dəma.

<sup>7</sup> Hərwi niye Mbəlom a pa pat mekeleŋ eye, a zalay «bəgom». A tsik ka pat eye nakay na, məve haladzay tə bazlam i Davit, bazlam neheye 6a ka watsakwa tsiy aye, a gwad:

«Bəgom tađə ka tsənum mətsike me i Mbəlom na,  
kâ kulum ha gər kurom bay.»

<sup>‡</sup> 3:18 Zəba mə Məpesle 14.1-35; Dəmes hay 95.11.

\* 4:4 Madazlay i wu hay 2.2.

<sup>8</sup> Tadə Zozowe kə ndisl tay ha bəba təte kway hay a mazəzukw bo nakə dedek aye na, haḅe Mbəlom ma tsikiye ka pat mekeleŋ eye bay.

<sup>9</sup> Andza mægweḁe mazəzukw bo mekeleŋ eye andaya hərwi ndo i Mbəlom hay. A ndzəkɪt bo mazəzukw bo i məhəne matasəla eye.

<sup>10</sup> Mbəlom a ndəv ha məsler ŋgay na, a zəzukw bo. I kway bəbay andza niye dərma. Ndo kə huta tsəved məfələkwe a mazəzukw bo i Mbəlom na, ma giye məsler sa bay, məsler ŋgay ka ndəv.

<sup>11</sup> Hərwi niye, ŋgələkwa ha bo ka məhute tsəved məfələkwe a mazəzukw bo niye. Kə ge andza niye na, gakwa metsehe lele ndəray m̄a dəḁ hərwi a kərah marəhay ha gər a Mbəlom andza bəba təte kway hay aye bay.

<sup>12</sup> Bazlam i Mbəlom na, ma vəliye sifa a ndo hay, gədaŋ eye haladzay. A dəs wu a ze ha maslalam nakə a dəs diye sulo sulo aye. Bazlam i Mbəlom a ye a bo kway hus a huḁ eye. A dəs ndo hus ka maŋgəne ha sifa i məsəfəre ada hus ka maŋgəne ha təv mazəve ta dözoz. Faya ma diye ha wu nakə ma mədzal gər i ndo aye.

<sup>13</sup> Wuray andaya maŋgaha eye ka dərə i Mbəlom bay. Wu neheye a ge tebiye aye na, a ŋgatay, a sər tay ha nəte ta nəte tebiye. Kə dakway ha wu hay tebiye na, kame ŋgay.

### *Mbəlom a pa Yesu bagwar i ndo məvələy wu a Mbəlom*

<sup>14</sup> Andza niye, nəkway na, bagwar i ndo məvələway wu a Mbəlom kway andaya ka gər i wu hay tebiye. Neŋgeye na, Yesu Kəriste Wawa i Mbəlom. Kə tsal ka təv i Mbəlom. Hərwi niye ndzakwa tə wu nakə ka dzalakwa ha faya aye ḅəŋḅəŋ lele.

<sup>15</sup> Bagwar i ndo məvələway wu a Mbəlom kway na, a sər ha bəle kway. Neŋgeye na, kə ŋgatay a dərətsətseh wal wal andza nəkway ada ta dza ha. Ane tuk na, kə ge mezeleme bay.

<sup>16</sup> Hərwi niye həndzədakwa ka təv i Mbəlom, zluwer m̄a gakway bay. Neŋgeye ma gateye ŋgwalak a ndo hay. Həndzədakwa ka təv ŋgay hərwi ada k̄a gakway mə bo ada m̄a gakway ŋgwalak ŋgay. Niye na, ma makweye bo ahəl i dərətsətseh.

## 5

<sup>1</sup> Bagwar i ndo məvələway wu a Mbəlom tebiye Mbəlom a pala tay ha na, mə walaŋ i ndo hay. A pa tay ha hərwi ada tā gay məsler hərwi ndo hay ada tā vələy naha wu kəriye ada tā kəḁay naha wu a Mbəlom hərwi mezeleme nakə ndo hay tə ge aye.

<sup>2</sup> Ndo neheye tə sər tsəved ŋgwalak eye bay aye ada faya ta giye mezeleme aye na, bagwar i ndo məvələy wu a Mbəlom tə sər mäge ŋgwalak hərwi tay hərwi bo tay eye bəle eye andza nəteye dərma.

<sup>3</sup> Hərwi niye kutoŋ m̄a kəḁay naha wu a Mbəlom hərwi mezeleme ŋgay eye dərma, ma kədiye hərwi mezeleme i siye i ndo hay dəkḁek bay.

<sup>4</sup> Ndəray ma sliye məḁəslay ha gər a bo, məzle bo ŋgay matəre ha bagwar i ndo məvələy wu a Mbəlom bay. Maa zal na, Mbəlom andza nakə ahəl niye a zalay Aron aye.

<sup>5</sup> Tə Yesu Kəriste na, andza niye dərma. Kə zla bo ŋgay eye kə dəslay ha gər a bo matəre bagwar i ndo məvələway wu a Mbəlom bay. Maa zalay na, Mbəlom, a gwaday:

«Nəkar wawa ga.

Bagom neŋ na təra Bəba yak.\* »

\* 5:5 Dəmes hay 2.7.



<sup>6</sup> Ma tæv mekelenj eye a gwaday:

«Ka ndziye ndo mævəlay wu a Mbəlom huya andza Melkisedek.†»

<sup>7</sup> Ahəl nakə Yesu ka məndzibəra aye na, a sər ha Mbəlom ma sliye faya mələtse ahaya abəra ma mədahaŋ. Ka duwulay naha me a Mbəlom ta mətuwe eye ada ta mawude eye ta magala hərwi a say marəhay ha gər dərmak. Mbəlom kə tsənyay na kə lətse ahaya abəra ma mədahaŋ hərwi ka rəhay ha gər.

<sup>8</sup> Nənġeye na, Wawa i Mbəlom. Kwa andza niye bəbay na, tə dəretsətseh nakə a sa aye kə tətik marəhay ha gər a Mbəlom.

<sup>9</sup> Ahəl nakə məsler ŋgay a ndəv aye na, a təra ndo nakə ma təmiye tay ha ndo neheye ta rəhay ha gər aye hərwi ada tā huta sifa nakə ma ndəviye bay ka tor eye aye.

<sup>10</sup> Mbəlom a pa na bagwar i ndo mævəlaway wu a Mbəlom andza Melkisedek.

### *Marava i mægər ha məpe mədzał ka gər Yesu*

<sup>11</sup> Ka gər i wu nakay na, wu hay andaya haladzay a samay mətsike. Ane tuk na, a wur bo mədakum ha hərwi zləm kurom dəreŋ mətsəne.

<sup>12</sup> Nəkurom i kurom na, həlay eye kə sla da hərwi ada bo kurom eye kə tətikumətay wu a siye i ndo hay aye hərwi nəkurom ka tətikum wu hay zla anəke bay. Ane tuk na, a sakum tā tətikakum wu neheye ka tətikum kurre ka bazlam i Mbəlom aye sa. Ka sərurum mənde dəf andza bagwar hay zuk bay, nəkurom andza wawa ndəriz neheye a satay məse wah aye.

<sup>13</sup> Ndo nakə faya ma siye wah huya aye na, nənġeye wawa ndəriz huya. Mbəlom a təra kway ha ŋwalak eye kame ŋgay ma kəkay na, a sər zuk bay.

<sup>14</sup> Daf nakə dedək aye na, i bagwar hay. Nətəye na, ta ŋəliye ha bo ka matətike hərwi manġəne tay ha ka bo abəra wu ŋwalak eye tə wu neheye ŋwalak eye bay aye.

## 6

<sup>1</sup> Kə ge andza niye na, takwa kame, zakwa ha wu neheye kurre ka gər i Kəriste aye, pakway bəzay a wu neheye bagwar eye. Ba ka pakwa mədok i gay tsij, ka pakwa wədəye sa bay. Bazlam i matsətsehe məpəse ha mezeleme hərwi wu neheye ŋwalak eye bay ta diye ha ndo a məməte aye, bazlam i mədzele ha ka Mbəlom,

<sup>2</sup> bazlam i madzəhuḃe ndo a yam, bazlam məpe həlay ka gər i ndo hay,\* bazlam i mələtsew abəra ma mədahaŋ ada bazlam i sariya, wu neheye tebiye na, nəmaa dzaliye faya matətikakum sa bay.

<sup>3</sup> Gərakwa ha wu neheye, takwa kame. Ta gədaŋ i Mbəlom na, ka gakweye.

<sup>4</sup> Ndo neheye tə ma ta dəba aye, ta mawəye ka matsətsehe məpəse ha mezeleme na, ma giye bo sa daw? Nətəye na, ta ŋgatay a dzaydzay i Mbəlom, wu nakə Mbəlom a vələtay a ndo hay aye, kə vələtay dərmak, ta huta Məsəfəre Tsədaŋŋa eye a dərev tay dərmak.

<sup>5</sup> Ta ndzaka metsəhane i bazlam i Mbəlom, ta sər ha gədaŋ i məndzibəra nakə ma deyewəye kame aye.

<sup>6</sup> Ada duh tə dəf abəra ka tsəved i Mbəlom na, tsəved tay andaya məmatay ahaya ka matsətsehe məpəse ha mezeleme sa bay hərwi a təra andza ta dar Wawa i Mbəlom ka mayako mazləłmbada eye sa ada tə vələtay tsəved a siye i ndo hay mətsaday.

† 5:6 Dəmes hay 110.4. \* 6:2 Zəba ma 1 Timote 4.14.

<sup>7</sup> Guvah nakə yam faya ma piye a dəma aye tadə wu mənday kə ge bo lele hərwi madzəne ndo neheye tə fət aye na, niye na, andza məgwede Mbəlom kə pa ŋgama ka guvah nakay.

<sup>8</sup> Tadə duh maa ndzohw a dəma guzer ta dak na, guvah niye ma giye ŋgama bay. Mazlambər Mbəlom ma vəleye mezeleme. Ma dziye ha abəra mə dəma ta ako.

<sup>9</sup> Dzam ga neheye na wudə kurom haladzay aye, kwa tadə nəmaa tsik andza niye bəbay na, nəmaa sər ta dedək nakuro m faya ka pumeye bəzay a tsəved ŋgwalak eye, tsəved nakə Mbəlom ma təmiye kurom ha aye.

<sup>10</sup> Mbəlom na, nəngeye ŋgwalak eye, ma mətsiye ha gər ta məsler nakə ka gum aye bay. Andza məgwede, ka mumatay bo a siye i ndo məpe mədzal gər hay ka Yesu, ka mawumatay bo andza niye huya. Ka gum niye na, hərwi nakə ka wudum Mbəlom aye ada ma mətsiye ha gər bay.

<sup>11</sup> A samay na, kwa way m̄a ge andza niye huya hus ka mandəve eye, k̄a gər um ha bay hərwi ada k̄a hutum wu nakə ka pum faya mədzal gər aye.

<sup>12</sup> A samay na, k̄a tər um ndo i s̄e hay bay. Duh tər um andza ndo neheye t̄a pa mədzal gər tay b̄əŋb̄əŋ ka Mbəlom aye. Mata hute wu nakə Mbəlom a gwad ma vəliye na, nəteye.

*Wu nakə Mbəlom kə tsik aye na, ma giye bo*

<sup>13</sup> Ahəl nakə Mbəlom a gwaday a Abraham na vəlakeye wu aye na, kə mbada ma giye andza nakə a tsik aye. Ndəray andaya nakə a ze Mbəlom aye nakə ma mbadiye kame ŋgay aye bay. A mbada ta məzele ŋgay.<sup>†</sup>

<sup>14</sup> A gwad: «Ta dedək, na piye fakaya ŋgama, ta dedək na vəlakeye wawa hay haladzay.»

<sup>15</sup> Abraham kə zla ŋgatay, ka həba, hərwi niye kə huta wu nakə Mbəlom a gwad ma vəleye aye.

<sup>16</sup> Ndo hay t̄ə mbadawa na, ta mbadiye ta məzele i ndo nakə bagwar eye a ze tay aye, məmbede niye ma ndəviye ha wu nakə m̄ə walaŋ i ndo hay aye.

<sup>17</sup> Hərwi niye Mbəlom kə mbada dər mak. A say na, ndo neheye a gwad ma vəlatəye wu aye na, t̄a sər ha ma mbədəye həlay d̄ada a wu nakə a gwad ma vəliye aye bay, ma p̄aliye ha bay.

<sup>18</sup> Andza niye, wu hay sulo neheye ma p̄aliye bo bay aye. Wu nakə Mbəlom a gwad ma vəliye ada wu nakə a mbada aye, Mbəlom ma sliye maraw me kwa tsekweŋ bay. Nəkway neheye ka hwayakwa ka t̄əv i Mbəlom m̄əŋgehe bo ka t̄əv ŋgay aye na, kə vəlakway ḡədaŋ haladzay hərwi ada k̄a pakwa mədzal gər kway huya ka wu nakə Mbəlom a gwad ma vəlakweye aye.

<sup>19</sup> Wu nakə ka pakwa faya mədzal gər kway aye na, a ḡəs kway b̄əŋb̄əŋ lele ka dagwarakweye abəra kame i Mbəlom bay andza b̄əre nakə t̄ə l̄ətsawa ha kwalalaŋ i yam aye. Hərwi niye, ka deyekweye ta peteked nakə a t̄ək na t̄əv ts̄ədaŋŋa eye aye, ka f̄ələkwa kweye a huđ eye.

<sup>20</sup> Maa lah məf̄ələkwe a dəma na, Yesu. A ye kame i Mbəlom na, hərwi kway. Ka t̄əra bagwar i ndo məv̄əlaway wu a Mbəlom andza Melkisedek ka tor eye.

## 7

<sup>1</sup> Melkisedek nakay, nəngeye b̄əy i Salem. Nəngeye bəbay i ndo məv̄əlay wu a Mbəlom bagwar eye. A həlay eye andaya Abraham a ye a v̄əram. A sla ka b̄əy hay haladzay. Ahəl nakə faya ma maweye na, Melkisedek a ye mədzəgər ta Abraham. A pa ŋgama ka Abraham.

<sup>†</sup> 6:13 Madazlay i wu hay 22.16-17.

<sup>2</sup> Abraham a vëlay wu hay a Melkisedek. Wu neheye kuro a huta ma vëram aye na, a zla nôte a vëlay. Melkisedek eye nakay na, andza mægweðe bøy nakæ ma giye ngwalak aye. Neņgeye bøy nakæ a wudá mändze zay\* ta ndo hay aye hærwi neņgeye bøy i Salem. Salem na, andza mægweðe «zay».

<sup>3</sup> Ndëray a sër wuray ka gër i bəba ngay bay. Kwa may ngay hay ta bəba tətë ngay hay dərmaḱ andza niye. Madazlay ngay eye andaya bay, mandəve ngay aye andaya bay. A ndzakit bo Wawa i Mbəlom hærwi neņgeye ndo məvəlay wu a Mbəlom ka tor eye.

<sup>4</sup> Zəbum ka Melkisedek, neņgeye bagwar eye. Abraham bəba tətë kway a zla wu nakæ a hutaw ma vëram aye, a ngəna ha kuro. A zla nôte a vëlay.

<sup>5</sup> Wawa i huð i Levi na, siye hay ndo məvəlay wu a Mbəlom. Bazlam i Musa mapala eye a gwafatay: «Dum ka təv i ndo hay hærwi ada tā vəlakum wu nôte mə wu tay neheye kuro aye.†» Sərum ha na, ndo neheye tə huta wu neheye na, mə həlay i malamar tay hay, ada nəteye tebiye na, wawa i huð i Abraham.

<sup>6</sup> Melkisedek neņgeye na, slala i Levi bay, ane tuk na, ahəl nakæ Abraham a vëlay wu nôte mə wu hay kuro aye, Abraham nakæ Mbəlom a gwadəy ma piye faya ngama aye na, Melkisedek a pa faya ngama bəna Abraham a pa ngama ka Melkisedek bay.

<sup>7</sup> Azlakwa bay ka sərakwa ha lele, maa pa ngama ka ndo na, ndo bagwar eye.

<sup>8</sup> Ndo neheye ma slala i Levi ta təma wu nôte mə wu hay kuro abəra ka malamar tay hay, nəteye na, ta mətiye. Melkisedek na, ma ndziye huya andza nakæ bazlam i Mbəlom a tsik aye.

<sup>9</sup> Ka slakweye faya mægweðe na, Levi ka təma abəra ka siye i ndo hay wu nôte mə wu hay kuro, kə vëlay a Melkisedek dərmaḱ tə həlay i Abraham.

<sup>10</sup> Andza mægweðe Abraham a vëlay wu nôte mə wu hay kuro a Melkisedek na, hulfe i Levi na, andaya mə huð ngay tsiy. Andza niye, ka slakweye faya mægweðe Levi neņgeye dərmaḱ kə vëlay wu nôte mə wu hay kuro a Melkisedek.

### *Bagwar i ndo məvəlay wu a Mbəlom mekeleņ eye andza Melkisedek*

<sup>11</sup> Mbəlom a vəl bazlam mapala eye na, a həlay a hulfe i Levi, nəteye neheye ndo məvəlay wu a Mbəlom aye. Ane tuk na, məsler tay i məvəlay wu a Mbəlom ma sliye mandəve ha wu nakæ a say aye bay. Tadə məsler tay ma sliye matəre ha ndo hay ngwalak eye ka däre i Mbəlom na, haðe ndo məvəlay wu a Mbəlom neņged andza Melkisedek ma deyeweye sa bay. Ndo məvəlay wu a Mbəlom andza Aron haðe ma sliye.

<sup>12</sup> Tadə Mbəlom ka mbədəy həlay a slala i ndo məvəlay wu a Mbəlom, ka sərakwa ha bazlam i Musa mapala eye ma mbədīye dərmaḱ.

<sup>13</sup> Azlakwa anəke na, slala i ndo məvəlay wu a Mbəlom a mbədə. Bøy Maduweņ kway Yesu nakæ faya ka tsikakweye faya kanan aye na, a yaw abəra ma slala mekeleņ eye wal. Ndëray nôte ma slala ngay andaya ndo məvəlay wu a Mbəlom bay.

<sup>14</sup> Ka sərakwa ha Bøy Maduweņ kway, neņgeye ma slala i Yahuda. Ahəl nakæ Musa a tsik ka ndo neheye tə vəlaway wu a Mbəlom aye na, kə tsik ka gër i slala nakay təbey.

<sup>15</sup> Wu nakæ a dā ha bazlam nakay parakka aye anaņ: Ndo məvəlay wu a Mbəlom mekeleņ eye ki yaw, neņgeye na, andza Melkisedek.

\* 7:2 Madazlay i wu hay 14.17-20. † 7:5 Zəba mə Məpesle 18.21.

<sup>16</sup> Nengeye a tæra bagwar i ndo mævəlay wu a Mbəlom na, hærwi slala nakə nətəye ndo neheye tæ vəlaway wu a Mbəlom aye bay. Nengeye na, bagwar i ndo mævəlay wu a Mbəlom ta gədanj i sifa nakə ma ndəviye bay aye.

<sup>17</sup> Andza nakə mawatsa eye mə Derewel i Mbəlom, Mbəlom a gwad:  
«Ka ndziye ndo mævəlay wu a Mbəlom huya andza Melkisedek.‡»

<sup>18</sup> Mbəlom kə mbata ha bazlam mapala eye nakə ahəl niye aye hærwi bəle eye, ma dzəniye ndo hay bay.

<sup>19</sup> Bazlam i Musa mapala eye na, a sla matəre ha ndo hay ŋgwalak eye ka dəre i Mbəlom bay. Ane tuk na, anəke na, wu mekelenj eye andaya a ze ha bazlam neheye mapala eye. Wu andaya nakə ma vəkəweye tsəved lele eye hærwi mändisle ka təv Mbəlom aye. Wu eye niye na, Yesu. Ka pakwa faya mədzal gər na, ka nengeye.

<sup>20</sup> Wu mekelenj eye na, ahəl nakə Mbəlom ma piye Yesu bagwar i ndo mævəlay wu a Mbəlom aye na, a mbada taday. Ahəl nakə slala i Levi hay ta tæra ndo mævəlay wu a Mbəlom aye na, tæ mbada andza niye bay.

<sup>21</sup> Ane tuk na, i Yesu na, Mbəlom kə mbada, a gwad:  
«Nenj Mbəlom na mbədəye həlay bay,

na mbada ka ndziye ndo mævəlay wu a Mbəlom huya.§»

<sup>22</sup> Nakay andza mægweđe na, dzam nakə Mbəlom a ɓar tæ nəkway aye na, lele a ze ha dzam nakə a ɓar ahəl niye aye. Andza niye, maa dakway ha ta dedek Mbəlom kə ɓar dzam tæ nəkway na, Yesu.

<sup>23</sup> Wu mekelenj eye andaya wal sa. Ndo neheye tæ vəlaway wu a Mbəlom ma slala i Levi aye na, nətəye haladzay hærwi tæ mətawa, tæ gərawa ha məsler tay.

<sup>24</sup> Ane tuk na, i Yesu na, andza niye təbey, nengeye ma ndziye ka tor eye, ma ndziye ndo mævəlay wu a Mbəlom huya ka tor eye.

<sup>25</sup> Hærwi niye, nengeye na, gədanj andaya mətəme ha ndo neheye faya ta diye kame i Mbəlom tə həlay ŋgay aye kwa kəday hærwi nengeye ma ndziye ka tor eye. Faya ma duwuleye naha me a Mbəlom huya hærwi tay.

<sup>26</sup> Nengeye na, bagwar i ndo mævəlaway wu a Mbəlom nakə dəfənj eye gədanj ŋgay andaya madzəne kway aye. Nengeye na, tsədanja, mənese andaya mə nengeye bay, kə ge mezeleme təbey. Nengeye andza ndo mäge mezeleme hay bay, Mbəlom a pa na wal. Mbəlom a pa na mə mbəlom ka gər i wu hay tebiye.

<sup>27</sup> Siye i bagwar hay i ndo mævəlaway wu a Mbəlom, nətəye neheye na, ta kədaway wu a Mbəlom pat pat. Tə kədaway naha hærwi mezeleme tay eye təday ada ta kəday naha hærwi mezeleme i ndo siye hay. Yesu na, nengeye a ge andza niye təbey. Nengeye a vəlay naha wu a Mbəlom hærwi ndo hay sik nətə tsa tæ məvəle ha gər ŋgay. I ŋgay na, da andza niye.

<sup>28</sup> Bagwar i ndo neheye tæ vəlaway wu a Mbəlom aye neheye bazlam i Musa mapala eye a pa aye, ndo hay tsa, nətəye tə gawa mezeleme. Ane tuk na, ahəl nakə Mbəlom a mbada aye, bazlam nakay kə zla təv i bazlam i Musa mapala eye, a pa bagwar i ndo mævəlaway wu a Mbəlom na, Wawa ŋgay. Nengeye na, ka tæra ŋgwalak eye peteh ka tor eye.

## 8

### *Yesu nengeye bagwar i ndo mævəlay wu a Mbəlom dedek eye*

<sup>1</sup> Bazlam nakə ta dedek bagwar eye a sakway mətəsike aye na, ananj: Bagwar i ndo mævəlaway wu a Mbəlom andaya andza nakay. Nengeye na, i kway.

‡ 7:17 Dəmes hay 110.4. § 7:21 Dəmes hay 110.4.

Nenġeje mandza eye ka tæv mändze i Bøy mæ mbælom, tæ hælaj i mändaj i Mbælom Bøy Maduwej ka gær i wu hay tebiye mæ mbælom.

<sup>2</sup> Nenġeje bagwar i ndo mævəlay wu a Mbælom a ge mæsler na, ma tæv nakæ tsəfaŋja Mbælom mandza eye mæ dəma aye. Ahəl niye ndo neheye tæ vəlaway wu a Mbælom aye tæ gawa mæsler na, mæ madzawadzawa i mädəslay ha gær a Mbælom nakæ ndo a lambad aye. Ane tuk na, tæv nakæ Yesu faya ma giye mæsler mæ dəma aye na, mæ mbælom, tæv nakæ dədəŋ eye. Maa ge na, Bøy Maduwej bana ndo zezej bay.

<sup>3</sup> Bagwar i ndo mævəlaway wu a Mbælom tebiye, kwa way tæ pa na hærwi mævəlay naha wu kəriye ada məkəday naha wu a Mbælom. Bagwar i ndo mævəlay wu a Mbælom kway bəbay na, wu andaya nakæ mǎ vəlaj naha a Mbælom aye dərmak.

<sup>4</sup> Kæ ge nenġeje ka mändzibəra na, ma təriye ndo mævəlay wu a Mbælom bay hærwi neheye ka mändzibəra aye 6a faya ta vəleye wu a Mbælom aye nəteye andaya tsiy andza nakæ bazlam i Musa mapala eye a tsik aye.

<sup>5</sup> Ahəl nakæ Musa ma lambadiye madzawadzawa niye aye, Mbælom a gwadəy: «Zəba faya lele, do lambad gay nakæ ka lambadiye na, andza nakæ na bəzaka ha mæ mahamba aye.» Ndo mævəlay wu a Mbælom neheye na, ta ge mæsler mæ gay eye nakay. Ane tuk na, gay nakay na, mandzəkət bo i bəmalə nakæ dədəŋ eye mæ mbælom aye.\* <sup>6</sup> Andza nakay ka zəbakwa ka mæsler i Kəriste na, a ze ha mæsler i ndo mævəlaway wu a Mbælom neheye. Nenġeje ma miye tay ha ka bo ndo hay ta Mbælom hærwi ada Mbælom mǎ 6ar dzam nakæ a ze dzam nakæ ahəl niye hærwi wu nakæ Mbælom a gwad ma vəliye ma mæbere dzam nakay aye na, a ze wu neheye ahəl niye aye haladzay.

<sup>7</sup> Tadə mæbere dzam† nakæ makurre eye mənese andaya faya bay aye na, Mbælom ma bəriye dzam masulo eye bay.

<sup>8</sup> Ane tuk na, ka zəbakwa faya na, a sla wuray bay hærwi Mbælom faya ma matay ha mənese a ndo hay. A gwadətay: «Tsənum, maa tsik me na, neŋ Bøy Maduwej.

Həlay eye ma deyeweye  
na bəriye dzam wedeye  
ta slala i Israyel hay ada ta slala i Yahuda hay.

<sup>9</sup> Dzam nakæ na bəriye aye na,  
andza nakæ na 6ar ta bəba tətə tay hay bay.

A həlay nakæ na həla tay ahaya tæ hælaj ga eye abəra mæ Ezipt aye na,  
bo tay eye tæ gær tay ta nas ha Dzam Guram eye nakæ na 6ar ta nəteye aye.  
Hærwi niye na gær tay ha.

Maa tsik bazlam andza nakay na, neŋ Bøy Maduwej.

<sup>10</sup> Bøy Maduwej Mbælom a gwad:

Dzam nakæ na bəriye ta ndo i Israyel hay aye a həlay niye na, anarj:  
Na piye bazlam ga mapala eye a dərev tay,  
na watsiye bazlam ga mapala eye a mädzal gær tay,  
na təriye Mbælom tay  
ada nəteye ta təriye ndo ga hay.

<sup>11</sup> Ndəray andaya ma diye ma tətikateye a ndo siye aye, ma gwadiye:  
“Dumara, sərum Bøy Maduwej eye”, andaya bay,  
hærwi ndo hay tebiye ta səriye ga,  
kwa bagwar hay, kwa neheye makətsa eye hay aye.

<sup>12</sup> Na pəsətay ha mənese tay,  
tæ mezeleme tay, ma meŋaweye a gær sa bay.‡»

\* 8:5 Madayaw abəra ma Ezipt 25.40.  
Zeremi 31.31-34.

† 8:7 Zəba mæ Madayaw abəra ma Ezipt 24.3-8.

‡ 8:12

<sup>13</sup> Mbəlom a tsik ka məbere Dzam Wedəye na, andza mægweđe Dzam Guram eye gədan ɲgay andaya sa bay. Ka sərakwa ha wu nakə ka təra guram eye ada ma dzəniye ka wuray sa bay aye na, mazlambar ma dziye.

## 9

### *Tsəved dedek eye hərwi mədəslay ha gər a Mbəlom*

<sup>1</sup> Ma dzam nakə kurre aye na, bazlam mapala eye hay andaya, neheye ta dətay ha a ndo hay tsəved i mədəslay ha gər a Mbəlom aye. Təv andaya dərma nakə ndo hay ta lambad hərwi maɟuwulay me a Mbəlom mə dəma aye.

<sup>2</sup> Gay niye ta lambad na, tə peteked. Gay kurre eye na, tə zalay təv tsədəɲɲa eye. Tə pa a dəma lalam bagwar eye ta hawal eye hay tasəla ta ako eye fataya ada tabal tə peɲ mapa eye faya nakə tə vəlaway faya wu a Mbəlom aye.

<sup>3</sup> Peteked a ɲgəna ha tsəlak niye ta tsəlak neɲged nakə kame aye. Tə zalay a tsəlak niye na, təv nakə a ze siye hay tebiye ta tsədəɲɲa aye.

<sup>4</sup> Tə pa a təv niye na, wu nakə tə ɲgar ta gura tə fəkawa faya wu nakə a ze huɲɲa aye. Tə pa a dəma zlaɲgatsa dərma. Zlaɲgatsa niye na, mambuza eye tebiye ta gura, tə zalay zlaɲgatsa i məbere dzam. Ma zlaɲgatsa niye sərə i gura andaya mə dəma dərma. Ma sərə eye niye na, makwala nakə tə zalay *man*\* aye mə dəma. Sakwal i Aron nakə a dūda, a pa slambah aye mə dəma dərma, tə beleler hay sulo neheye Mbəlom a watsa faya bazlam mapala eye hay ahəl nakə a ɟar dzam ta ndo ɲgay hay aye.

<sup>5</sup> Ka gər i zlaɲgatsa niye na, ta lambad wu hay sulo, tə pa faya. Tə zalatay a wu niye hay na, *kerubin* hay, faya ta dətay ha məzlaɟ i Mbəlom a ndo hay. Ta həndək ha gwezleviyek tay hərwi mədərəzle na təv nakə tə vəlaway naha faya wu a Mbəlom hərwi ada Mbəlom mə pəsətay ha mezeleme i ndo neheye tə ge aye. Ane tuk na, na diye ha wu neheye pendek anəke bay.

<sup>6</sup> Wu niye hay malambada eye tsiy na, ndo neheye tə vəlaway wu a Mbəlom aye ti yawa pat pat a gay makurre, tə gawa məsler tay pat pat mə dəma.

<sup>7</sup> Tsəlak masulo eye maa yawa a dəma na, bagwar i ndo məvəlaway wu a Mbəlom nəte ɲgewɲ. A yawa a dəma na sik nəte ka məve. Ma diye a dəma na, kutoɲ ma zliye bambaz i gəna w a həlay ma vəleye a Mbəlom hərwi ada Mbəlom mə pəsay ha mənese nakə a ge aye ada nakə siye i ndo hay tə ge ta mədzal gər tay bay aye.

<sup>8</sup> Məsəfərə Tsədəɲɲa eye faya ma ɟakway ha tə wu neheye na, kə ge tsəlak makurre andaya huya na, tsəved nakə ndo hay ta diye ha a təv nakə a ze siye i təv hay ta tsədəɲɲa aye na, mahəndəka eye bay.

<sup>9</sup> Mandzək it bo i wu neheye a ɟa ha na, wu neheye ti yaw anəke aye. Faya ma ɟakway ha na, wu neheye ta vəleye a Mbəlom aye, tə bambaz i gəna w nakə ta vəleye aye ta sliye faya matəra ha ɟərev i ndo hay ɲgwalak eye hay ka ɟərə i Mbəlom bay.

<sup>10</sup> Wu neheye faya ta tətikakweye na, ka gər i wu mənday, wu məsay ada ka gər i məbere wu hay na, kəkay ɟəkɟək tsa. Wu neheye na, wu i ndo i məndzibərə ɟəkɟək, ma ndziye tsekweɲ tsa hus a pat nakə Mbəlom ma mbədiye ha wu hay tebiye aye.

<sup>11</sup> Anəke na, Kəriste ki yaw tsiy. Neɲgeye bagwar i ndo məvəlaway wu a Mbəlom. Wu neheye ɲgwalak eye faya ka hutakweye na, ka hutakwa mə həlay ɲgay. Neɲgeye ki ye a təv nakə bagwar eye a ze madzawadzawa i

\* **9:4** *Man* na, makwala nakə Mbəlom a vəlatay a Israyel mə makulkwandah aye. Zəba ma Madayaw abəra ma Ezipt 16.13-15; 31.

mədəslay ha gər a Mbəlom nakə ahəl niye aye, təv niye na, lele haladzay. Ma lambad təv niye na, ndo hay bay, andaya ka mändzibəra bay.

<sup>12</sup> Kəriste ki ye a təv niye, kə fələkwa a təv nakə a ze siye hay tə tsədanŋa aye. Kə zla bambaz i vo'ar tə bambaz i wawa i sla ka həlay bay. Duh a fələkwa a dəma na, a zla bambaz ŋgay eye nakə a mbəda ha aye, a ye sik nətə ka ndəv. Andza niye kə təma kway ahaya abəra mə mezeleme ka tor eye.

<sup>13</sup> Ahəl niye na, tə kədawa vo'ar hay, merisla hay, ta gwatsakawa bambaz eye ka ndo neheye nətəye tsədanŋa kame i Mbəlom bay aye. Tə kədawa sla wawa eye dərma, tə dulawa na, ada bətekwew maləməts eye na, tə fadawa ka ndo hay. Andza niye, ndo neheye tə ge mənəse aye na, bo tay ka təra tsədanŋa andza nakə a say a bazlam tay mapala eye.

<sup>14</sup> Kə ge andza niye na, bambaz i Yesu Kəriste a ze ha ta gədan bədaw? Kəriste, neŋgeye na, kə ge mezeleme bay, kə zla bo ŋgay, kə vəlay a Mbəlom ta gədan i Məsəfəre Tsədanŋa eye. Məsəfəre niye ma ndziye na, ka tor eye. Bambaz ŋgay a təra ha dərəv kway tsədanŋa hərwi ada wu neheye ŋgwalak eye bay ta diye kway ha a mədahan aye na, kə gakwa sa bay. Ane tuk na, kə gakwa duh na, məsler i Mbəlom, neŋgeye nakə ma ndziye ka tor eye aye.

<sup>15</sup> Hərwi niye Kəriste, neŋgeye ndo məsəre tay ha ka bo ndo hay ta Mbəlom hərwi Mbəlom kə ɓar Dzam Wedəye ta nətəye. Hərwi niye, ndo neheye Mbəlom a zalatay aye na, ta hutiyə wu neheye ŋgwalak eye Mbəlom a gwad mə vəlateye aye. Ta hutiyə ka tor eye. Ma giye bo na, hərwi Kəriste kə mət hərwi ndo neheye tebiye ta nas ha Dzam Guram eye tə mezeleme tay aye. Ahəl nakə a mət aye kə təma tay ahaya abəra mə mezeleme.

<sup>16</sup> Tadə ndoweye a gwad: «Na mət na, ŋgənum ha wu ga hay» na, ndo niye mā mət təday ada ta ŋgəniye ha.

<sup>17</sup> Ahəl nakə kə mət aye na, bazlam ŋgay ma hutiyə gədan. Tadə ndoweye andaya tə dərə na, wu nakə a gwad aza ka ŋgənumeye ha aye na, ta ŋgəniye ha zuk bay.

<sup>18</sup> Hərwi niye, kwa dzam makurre a ge bo na, ta mbəda ha bambaz təday bəna ma giye bo bay.

<sup>19</sup> Ahəl niye na, Musa a dətay ha bazlam mapala eye nakə Mbəlom a vəlay aye a ndo hay aye təday. Tsa na, a zla bambaz i sla wawa eye, i vo'ar a dzapa ha ta yam. A zla hawal ta guguman ndozza eye a tələkə ha a bambaz, a gwatsaka ka dərəwel i bazlam mapala eye ada a gwatsaka ka ndo hay tebiye.

<sup>20</sup> Ahəl nakə faya ma gwatsakiye na, a gwad: «Nakay na, bambaz nakə Mbəlom a ɓar ha dzam ta nəkurom aye. A gwadəkum rəhumay ha gər:†»

<sup>21</sup> Musa ka gwatsaka bambaz ka madzawadzawa i mədəslay ha gər a Mbəlom niye ta lambad tə peteked aye dərma, ada ka gwatsaka ka wu neheye tə gawa ha məsler hərwi mədəslay ha gər a Mbəlom aye tebiye.

<sup>22</sup> Andza nakə bazlam mapala eye a tsik aye na, matsəla wu hay tebiye ta gwatsakawa faya bambaz ada mā təra tsədanŋa. Ta mbəda ha bambaz bay na, Mbəlom ma pəsiye ha mezeleme bay.

### *Bambaz i Kəriste ma bariye ha mezeleme i ndo hay*

<sup>23</sup> Tsəved nakə Musa a tətikawatay a ndo hay ahəl niye na, mandzəkət bo i wu neheye dedək eye mə mbəlom aye. Kuton lele mā təra ha wu hay tebiye tsədanŋa andza nakə bazlam i Musa a tsik aye. Ane tuk na, hərwi matəre wu neheye dedək eye mə mbəlom aye tsədanŋa na, kuton məvəle wu nakə a ze bambaz i gənaw aye.

† 9:20 Madayaw abəra ma Ezipt 24.3-8.



<sup>24</sup> Siye i ndo məvələway wu a Mbəlom ti yawa a gay i gugumanj nakə ndo hay ta lambad aye ada gay niye na, mandzəkkit bo i təv nakə Mbəlom mə dəma aye dədek tsa. Ane tuk na, Kəriste, neŋgeye na, ki ye a təv nakə Mbəlom mandza eye mə dəma aye, neŋgeye kame i Mbəlom hərwi kway.

<sup>25</sup> Bagwar i ndo məvələway wu a Mbəlom a yawa a təv nakə a ze siye hay tə tsədəŋŋa aye na, ka məve, ka məve, a yawa a zlawə bambaz i gənaŋw ka həlay bəna bambaz ŋgay eye bay. Kəriste na, a vəl ha bo ŋgay, neŋgeye a vəl ha bo ŋgay sik nəte bəna ka məve ka məve andza bagwar i ndo məvələway wu a Mbəlom bay. <sup>26</sup> Tadə mā ge andza niye, kwa ka gər nakə Mbəlom a ge məndzibəra aye na, həbe atay ma siye dəretsətseh haladzay. A yaw a həlay nakay ka mandəve eye sik nəte, a vəlay ha bo ŋgay a Mbəlom hərwi ada mā zla mezeleme abəra ka ndo hay ka tor eye.

<sup>27</sup> Kwa way ma mətiye sik nəte, ma dəba eye na, Mbəlom ma geye sariya.

<sup>28</sup> Andza niye, Kəriste bəbay a mət sik nəte. A vəlay ha bo ŋgay a Mbəlom hərwi məzle mezeleme abəra ka ndo hay. Ma maweye sik nəte. Ma maweye na, hərwi məzle mezeleme abəra ka ndo hay sa bay. Ane tuk na, ma maweye hərwi mətəme tay ha ndo neheye faya ta həbiye na aye.

## 10

<sup>1</sup> Bazlam i Musa mapala eye na, mezek i wu neheye ŋgwalak eye faya ka hutakweye aye. Nəteye na, wu niye hay bay. Ndo hay tə kədəway wu a Mbəlom hərwi mahəndzədə tə neŋgeye, tə kədəway wu a Mbəlom ka məve ka məve, ane tuk na, a sla faya matəre tay tsədəŋŋa kame i Mbəlom bay.

<sup>2</sup> Tadə ndo hay ta təra tsədəŋŋa hərwi nakə tə kədəway wu a Mbəlom ta dedek aye na, həbe ta gəriye ha məkədəy wu a Mbəlom. Hərwi atay mezeleme tay kə bara sik nəte ka ndəv, mezeleme tay a matayaw a gər bay.

<sup>3</sup> Ane tuk na, dūh məkədə wu neheye tə kədəway a Mbəlom aye na, mezeleme tay a matayaw a gər ka məve ka məve,

<sup>4</sup> hərwi bambaz i merisla ta vō'ar a sla məbere mezeleme bay.

<sup>5</sup> Hərwi niye, ahəl nakə Kəriste mazlambar ma deyeweye ka məndzibəra aye na, a gwadaya a Mbəlom:

«A saka tã kədəka gənaŋw hay bay,  
tã vəlaka wu mekelenj eye bay.

Ane tuk na, ka vəlenj bo hərwi ada nã vəlaka.

<sup>6</sup> Məkədə gənaŋw hərwi məfəkaka naha  
ada məkədə wu hərwi məpəse ha mezeleme na,  
a yaka a gər bay.

<sup>7</sup> Aya, na gwadaka:

Neŋ ananj Mbəlom, na yaw ka məndzibəra na, hərwi ada nã ge wu nakə a saka aye,

andza nakə mawatsa eye ka gər ga mə dərəwel i bazlam mapala eye aye.\*»

<sup>8</sup> Wu nakə Kəriste a lah mətsike aye na, a gwad: «A saka tã kədəka gənaŋw hay bay, tã vəlaka wu mekelenj eye bay. Məkədə gənaŋw hərwi məfəkaka naha ada məkədə wu hərwi məpəse ha mezeleme na, a yaka a gər bay.» Kwa wu neheye a pay bəzay a bazlam mapala eye bəbay na, a yay a gər a Mbəlom bay. <sup>9</sup> Kəriste a gwad sa: «Neŋ ananj na yaw ka məndzibəra na, hərwi ada nã ge wu nakə a saka aye.» Andza niye, a mbata ha Dzam Guram eye, a vəl a dəma tsəved wedeye.

\* 10:7 Dəmes hay 40.7-9.

<sup>10</sup> Ka tərakwa tsədanŋa kame i Mbəlom hərwi Yesu Kəriste a ge wu nakə a yay a gər a Mbəlom aye ada a vəl ha bo sik nəte da ka tor eye.

<sup>11</sup> Ndo neheye tə vəlaway wu a Mbəlom aye, nəteye tebiye malətsa eye pat pat ka mäge məsler tay pat pat. Tə kədaway wu huya a Mbəlom. Ane tuk na, wu neheye tə kədawa aye na, tə sla məmbete ha mezeleme i ndo hay bay.

<sup>12</sup> Yesu Kəriste na, a vəl bo ŋgay eye sik nəte hərwi məzle mezeleme abəra ka ndo hay ka tor eye. Tsa na, a ndza tə həlay i mənday i Mbəlom.

<sup>13</sup> Anəke na, nəngeye faya ma həbiye Mbəlom m̄a pa ndo mane dəre ŋgay hay a hud i sik ŋgay.

<sup>14</sup> Andza niye, a vəl ha bo ŋgay sik nəte ka tor eye, a təra ha ndo ŋgay hay tsədanŋa kame i Mbəlom. A pa tay ha wal hərwi ŋgay. A təra tay ha ŋgwalak eye hay ka tor eye.

<sup>15</sup> Məsəfəre Tsədanŋa eye faya ma dəkweye ha dərmak parakka wu neheye na, dedək. A gwad təday na:

<sup>16</sup> «Bəy Maduweŋ Mbəlom a gwad:

“Dzam nakə na bəriye ta ndo ga hay a həlay niye aye na, anan:

Na piye bazlam ga mapala eye a dərev tay,

na watsiye bazlam ga mapala eye a mədzal gər tay.”»

<sup>17</sup> Tsa na, a gwad sa:

«Na ma ahaya mezeleme tay a mədzal gər ga sa bay,

kwa məsler neheye tə ge ŋgwalak eye bay aye.†»

<sup>18</sup> Mbəlom kə pəsətay ha mezeleme i ndo hay tsiy na, məvəlay wu hay a Mbəlom ma dzəniye hərwi məzle mezeleme abəra ka ndo hay sa bay.

### *Həndzədakwa ka təv i Mbəlom*

<sup>19</sup> A nəkurom malamar ga hay, ka hutakwa tsəved məfələkwe a təv nakə a ze siye hay tə tsədanŋa aye na, hərwi bambaz i Yesu nakə a mbədə ha aye.

<sup>20</sup> Yesu ka ŋgurada ha petekəd nakə kame kway aye. Ka həndəkakway tsəved wəfəye, nakə ka slakweye məfələkwe a dəma aye. Tsəved nakay wəfəye na, ka hutakweye ha sifa. Petekəd nakə a ŋgurada ha aye na, andza mägweđe bo nakə ta dar na ka mayako mazləlmbada eye aye.

<sup>21</sup> Andza niye, i kway na, bagwar i ndo məvəlay wu a Mbəlom andaya a ləvay gər a gay i Mbəlom.

<sup>22</sup> Kə ge andza niye na, həndzədakwa ka təv i Mbəlom tə dərev dedək eye, ta mape mədzal gər gədan eye ka Mbəlom, hərwi Yesu ka təra kway ha tsədanŋa tə bambaz ŋgay ada kə bara kway ta yam tsədanŋa eye.

<sup>23</sup> Tsikakwa parakka huya nəkway ka pakwa mədzal gər ka wu nakə Mbəlom a tsik aye, k̄a dzədzakwa ha mədzal gər kway bay, hərwi wu nakə a gwad ma giye na, huya ma giye andza nakə a tsik aye.

<sup>24</sup> Pəlakwa tsəved nakə ka vəlakweye ha gədan a bo nəte nəte mə walan kway aye hərwi ada k̄a wudakwa bo kame kame ada k̄a gakwa wu neheye ŋgwalak eye.

<sup>25</sup> K̄a gərakwa ha məhay gər andza ndo siye hay bay. Duh na, vəlakwa a bo gədan nəte nəte mə walan kway, wene wene eye hərwi ka sərūm ha pat nakə Yesu Kəriste ma maweye aye na, mazlambar bəse.

<sup>26</sup> Ka sərakwa dedək i Mbəlom. Hərwi niye tadə faya ka gakweye mezeleme huya ada ka sərakwa lele ŋgwalak eye bay na, sərakwa ha wu mekelən eye andaya neheye ta sliye faya məvələ hərwi məmbete ha mezeleme aye na, andaya sa bay tebiye.

† 10:17 Hebræ hay 8.8-12.

<sup>27</sup> Tadá ndoweye ká ge mánese andza niye na, má dzédzar hárwi Mbəlom ma geye sariya. Sariya niye na, a ge zluwer haladzay, ako gadan eye ma fákiye ndo neheye ta rəhay ha gər a Mbəlom bay aye.

<sup>28</sup> Ka sərúm ha tadá ndoweye ka rəhay gər a bazlam i Musa mapala eye bay, tadá ndo hay sulo kəgəbay mahkar ta tsik ta dedək kə ge mánese na, ta kədiye na ta sakay naha bay.<sup>‡</sup>

<sup>29</sup> Tadá kə ge tə bazlam i Musa andza niye na, dərətsətseh i ndo nakə a zəba ka Wawa i Mbəlom andza wuray kəriye aye na, ma ziye nakay bədaw? Nəngeye na, kə nas ha bambaz i məbərə dzam nakə a təma ahaya abəra mə mezeleme aye dərma. Faya ma tsadəye a Məsəfərə Tsədənəna nakə faya ma dəkweye ha nğwalak i Mbəlom aye.

<sup>30</sup> Ka sərakwa ndo nakə a gwad:

«Mata gatay dərətsətseh a ndo neheye ta kərah marəheñ ha gər aye na, nən. Na hamateye a dəma wu tay neheye nğwalak eye bay tə ge aye.»

A gwad sa:

«Nən, Bəy Maduweñ na gateye sariya a ndo ga hay.Š»

<sup>31</sup> Mbəlom na, a vəl sifa. Andza niye, tadá sariya kə gəs ndoweye kame i Mbəlom na, dərətsətseh i ndo niye ma ziye wu hay tebiye.

<sup>32</sup> Mum ahaya a gər ma kəkay wu nakə a ge bo tə nəkurom ahəl niye ka nğatumay makurre eye a dzaydzay i Mbəlom aye. A həlay niye na, ta sakum dərətsətseh haladzay. Ane tuk na, ka səmumay naha a wu hay tebiye.

<sup>33</sup> A həlay siye na, ta tsadakum kame i ndo hay, ta sakum dərətsətseh. A həlay siye ka yum a dərətsətseh i ndo neheye tə satay dərətsətseh aye dərma.

<sup>34</sup> Ka sum ka bo dərətsətseh dziye ta ndo neheye tə gəs ha tay a dangay aye. Ahəl nakə ndo hay ta buwa fakuma abəra wu kurom hay aye na, ka səmumay naha ta mənğweye eye, hərwi ka sərúm ha wu kurom hay nğwalak eye andaya a ze siye i wu hay tebiye, ta ndziye ka tor eye.

<sup>35</sup> Hərwi niye, ká gərúm ha məpe mədzal gər kurom abəra ka Mbəlom bay, hərwi tadá ka rəzłumay a gər huya na, Mbəlom ma vəlakumeye magogoy haladzay.

<sup>36</sup> Wu nakə a ye ka bo aye na, səmumay naha ada ká gum wu nakə a yay a gər a Mbəlom aye, hərwi ada ká hutum wu nakə a gwad ma vəlakumeye aye.

<sup>37</sup> Hərwi niye, Mbəlom a gwad:

«A zəkaw həlay tsekweñ ndo nakə ma deyeweye na, ma deyeweye, ma gaweye mahonok bay.

<sup>38</sup> Ndo nakə nəngeye nğwalak eye ka dərə ga aye, kə dzala ha ka nən na, ma ndziye ma sifa ka tor eye.

Ane tuk na, tadá kə ma ta dəba na, nəngeye a yeñ a gər sa bay.\*»

<sup>39</sup> Nəkway na, ndo neheye tə ma ta dəba ada tə dze aye bay. Duh nəkway na, ndo neheye tə pa mədzal gər tay ka Mbəlom aye. Andza niye, ka hutakweye sifa ka tor eye.

## 11

### *Ndo neheye ahəl niye tə pa mədzal gər ka Mbəlom aye*

<sup>1</sup> Məpe mədzal gər ka Mbəlom na, məsər ha ta dedək wu neheye faya ka təkakweye dərə aye na, ka hutakweye. Kwa tadá ka nğatakway tə dərə kway bay bəbay na, ka sərakwa ha ta dedək andaya.

<sup>‡</sup> 10:28 Zəba mə Bazlam mapala eye masulo eye 19.15.    § 10:30 Bazlam mapala eye masulo eye 32.35-35.    \* 10:38 Habakuk 2.3-4.

<sup>2</sup> Ndo neheye ahəl niye ta dzala ha ka Mbəlom andza niye. Hərwi niye ta yay a gər a Mbəlom.

<sup>3</sup> Hərwi məpe mədzal gər kway ka Mbəlom na, ka sərakwa ha kwetseh kwetseh Mbəlom a ge wu hay tebiye tə bazlam ŋgay nakə a tsik aye. Andza magwede wu neheye tebiye faya ka ŋgatakweye ka məndzibəra aye na, tə yaw abəra mə wu neheye dərə i ndo zezen a ŋgatay bay aye.

<sup>4</sup> Hərwi məpe mədzal gər ŋgay ka Mbəlom na, Abel a kəday wu a Mbəlom a ze ha wu i Kayin nakə a vəlay a Mbəlom aye. Mbəlom ka zambaday. A gwad neŋgeye ndo ŋwalak eye kame ŋgay, hərwi Mbəlom ka təma wu nakə a kəday aye. Kwa Abel kə mət bəbay, faya ta tsikakweye labara ŋgay huya hərwi nakə a dzala ha ka Mbəlom aye.\*

<sup>5</sup> Hərwi məpe mədzal gər ŋgay ka Mbəlom na, Henok kə mət bay, Mbəlom a zla na a mbəlom. Ndəray kə ŋgatay a Henok sa bay hərwi Mbəlom kə zla na. Bazlam i Mbəlom a gwad na, ahəl nakə Mbəlom kə zla na Henok zuk bay aye na, Henok a yay a gər a Mbəlom.†

<sup>6</sup> Ze mədzal ha ka Mbəlom na, ndəray ma sliye madayay a gər a Mbəlom bay. Ndo nakə a say mahəndzəde ka təv i Mbəlom aye mā dzala ha faya neŋgeye andaya. Mā sər ha na, neŋgeye faya ma vəlateye magogoy a ndo neheye ta pəliye na aye.

<sup>7</sup> Hərwi mədzele ha ka Mbəlom na, Nuhu a rəhay ha a gər a bazlam i Mbəlom. Mbəlom kə tsikay kurre ka wu neheye ta giye bo aye kurre. Ndəray kə ŋgatay dāda a wu niye hay bay, ane tuk na, ka rəhay ha gər a wu nakə Mbəlom a tsikay aye. A lambad kwalalan i yam bagwar eye andza nakə Mbəlom a tsikay aye, a fələkwa a dəma ta ndo i gay ŋgay hay tebiye, ta təma Məpe mədzal gər nakə a pa ka Mbəlom aye a dā ha mede i siye i ndo hay na, ŋwalak eye bay hərwi ta pa mədzal gər ka Mbəlom bay.‡

<sup>8</sup> Hərwi məpe mədzal gər ŋgay ka Mbəlom na, Abraham a rəhay ha gər a Mbəlom aye, a lətse a ye a gəma nakə Mbəlom a gwad ma vəleye, ma təriye i ŋgay aye. Kwa kə ŋgatay a gəma eye bay bəbay na, ki ye a dəma.§

<sup>9</sup> Hərwi məpe mədzal gər ŋgay ka Mbəlom na, a ndza ma gəma nakə Mbəlom a gwad ma vəleye aye. A ndza ma dəma na, neŋgeye madurəŋ eye, a ndzawa mə gay nakə ta lambad ta guguman aye. Hulfe ŋgay Izak ta Zakob nəteye neheye Mbəlom a gwad ma vəlateye gəma niye aye dərma kə tə ndzawa mə dəma na, mə gay nakə ta lambad ta guguman aye dərma kə.

<sup>10</sup> Abraham a ge andza niye na, a təkay dərə a gəma nakə ma ndziye 6əŋ6əŋ\* ma dəfiye bay aye. Maa ləva ha bo ta gəma niye na, bo i Mbəlom eye ŋgway, maa dəzl na, neŋgeye.

<sup>11</sup> Hərwi məpe mədzal gər ŋgay ka Mbəlom na, Sara kwa neŋgeye guram eye tsiy bəbay na, kə huta gədan məwe wawa. A sər ha ta dedək wu nakə Mbəlom a gwad ma vəleye na, ma vəleye.†

<sup>12</sup> Hərwi niye Abraham, neŋgeye guram eye tsiy kə wa wawa ada wawa i hud ŋgay hay ta wa bo haladzay andza wurzla neheye ka magərmbəlom aye ada andza hewiyeŋ mə magayam a pasla bo bay.

<sup>13</sup> Ndo neheye tebiye tə mət ma məpe mədzal gər ka Mbəlom aye, nəteye na, ta huta wu nakə Mbəlom a gwad ma vəliye bay. Ane tuk na, tə sər wu neheye Mbəlom a gwad ma giye aye na, ma giye bo. Hərwi niye dərev tay a ŋgwas.

\* **11:4** Zəba mə Madazlay i wu hay 4. 3-10. † **11:5** Zəba mə Madazlay i wu hay 5.18-14. ‡ **11:7** Zəba mə Madazlay i wu hay 6.9-9.29. § **11:8** Zəba mə Madazlay i wu hay 12.1. \* **11:10** A tsik na, Zerozelem wedeye, zəba ka mede 16 ada ma Hebræ hay 12.22. † **11:11** Zəba mə Madazlay i wu hay 18.10.

Tə tsik parakka nəteye na, madurlon eye hay, gay tay andaya ka məndzibəra bay.‡

14 Ndo neheye tə tsik andza niye na, tə də ha nəteye faya ta həbiye gəma tay a nəteye.

15 Ta dzala ka təv nakə ti yaw abəra mə dəma aye bay. Ta də ta dzala andza niye na, ta pəliye tsəved məme a təv nakə ti yaw abəra mə dəma aye.

16 Ane tuk na, andza niye bay, duh ta pəla na, təv nakə a ze ha nəngeye nakə ma dəba aye, andza məgwede nakə mə mbəlom aye. Hərwi niye a yay a gər a Mbəlom tā zalay Mbəlom tay. Andza niye, kə ləvatay ha bo ta gəma.

17 Hərwi məpe mədzal gər ngay ka Mbəlom na, Abraham a vəlay Izak a Mbəlom. A say a Mbəlom mazəbe ka mədzal gər i Abraham. Hərwi niye a tsətsah faya mə vəlay Izak. Abraham a təma məge andza niye. Ane tuk na, 6a Mbəlom kə gwadəy ma hutie wu.

18 Mbəlom a gwaday: «Hulfe yak dedek eye ma deyeweye na, ma hulfe i wawa yak Izak. §»

19 Abraham a dzala: «Mbəlom na, gədan ngay andaya mələtse ahaya Izak abəra ma mədahan.» Ta dedek a təra andza Izak kə mət ada kə lətsew abəra ma mədahan.

20 Hərwi məpe mədzal gər ngay ka Mbəlom na, Izak a pa ngama ka Zakob ta Ezayu. A tsik ka wu nakə ma giye bo ta nəteye kame aye.\*

21 Hərwi məpe mədzal gər ngay ka Mbəlom na, Zakob ma mətiye na, a pa ngama ka wawa i Yusufa hay, nəte ta nəte. A lətse ta donjwar, a dəslay naha gər a Mbəlom. †

22 Hərwi məpe mədzal gər ngay ka Mbəlom na, Yusufa ma mətiye na, a tsikatay a Israyel hay, a gwadatay kame na: «Ka deyumeye abəra mə Ezipt.» Ada aza ta giye ha ta mətasl ngay hay kəkay na, kə tsikatay. ‡

23 Hərwi məpe mədzal gər tay ka Mbəlom na, bəba i Musa hay ahəl nakə tə wa na Musa aye na, tə ngaha na kiye mahkar. Ta zəba faya na, wawa tay a le haladzay. Ta dzədzaray a bazlam i bəy nakə a tsik aye bay. §

24 Hərwi məpe mədzal gər ngay ka Mbəlom na, ahəl nakə Musa a ge gawla aye na, a say ta gwaday: «Musa nəngeye wawa i dem i bəy i Ezipt» na, a say bay.

25 A zay ha məse dəretsətseh ta ndo i Mbəlom hay tə bəmalə nakə ma ndziye ma mənəgwese tsekwen ada ka rəhay gər a Mbəlom bay aye.\*

26 A sər ha, a zay ha ndo hay tā tsadəy andza nakə tə tsadəy a Kəriste aye tə bəmalə nakə ma hutie zlele i gəma i Ezipt aye. A dzala andza niye na, hərwi faya ma təkay dəre a wu nakə Mbəlom a gwad ma vəleye aye.

27 Hərwi məpe mədzal gər ngay ka Mbəlom na, Musa a ye abəra ma Ezipt. Ka dzədzaray a mevl i bəy bay. Kə ndza 6ən6ənj andza ma ngateye a Mbəlom, ndo nakə ndəray a ngatay dəda tə dəre bay aye.

28 Hərwi məpe mədzal gər ngay ka Mbəlom na, a dazlay a məge magurlom i Pak aye. A gwadatay a ndo i Israyel hay tā gwatsaka bambaz ka məged tay hərwi ada gawla i Mbəlom ki yaw ma kədiye malkwara i wawa hasləka eye i ndo i Ezipt hay na, mə kəd malkwara tay hasləka eye hay bay. †

‡ 11:13 Zəba mə Madazlay i wu hay 23.4. § 11:18 Zəba mə Madazlay i wu hay 21.12; 22.1-14.

\* 11:20 Zəba mə Madazlay i wu hay 27.1-40. † 11:21 Zəba mə Madazlay i wu hay 47.29-31. ‡ 11:22

Zəba mə Madazlay i wu hay 50.24. § 11:23 Zəba mə Madayaw abəra ma Ezipt 2.1-2. \* 11:25 Zəba

mə Madayaw abəra ma Ezipt 4.19-23. † 11:28 Zəba mə Madayaw abəra ma Ezipt 12.21.

29 Hərwi məpe mədzal gər tay ka Mbəlom na, İsrayel hay tə tas abəra mə Bəlay Ndozza eye. Ahəl nakə ndo i Ezipt hay a satay mətese dərmak aye na, bəlay a ma ka bo a həl tay ha tebiye.‡

30 Hərwi məpe mədzal gər i İsrayel hay ka Mbəlom na, zled i gəma i Zeriko a mbəzl. Ndo i İsrayel hay tə tawa na gəma niye məhəne məkwa matasəla eye na, zled niye a mbəzl.§

31 Hərwi məpe mədzal gər ɲgay ka Mbəlom na, Rahab ɲgwas nakə a gawa madama, ta kəd na bay andza ndo i Zeriko neheye ta rəhay gər a Mbəlom təbey aye hərwi ka təma tay ha İsrayel neheye ti ye mata zəbaw Zeriko ta məkal aye.\*

32 Na tsikiye na, sa mey? Həlay eye a sla mətsikakum ka gər i Zedeyon†, Barak‡, Somsoɲ§, Zefte\*, Davit, Samuyel ada ta ndo məde ha bazlam i Mbəlom na, həlay eye andaya bay.

33 Nəteye dərmak, hərwi məpe mədzal gər tay ka Mbəlom na, tə ge vəram ta gəma siye hay, ada ta sla ka gəma niye hay aye. Ta ge wu nakə dedək eye, ta huta wu nakə Mbəlom a gwad ma vəlatəye aye, ta dərəzlay ka bazlam a zil hay hərwi ada tə gatay wuray bay.

34 Ta mbata ha ako nakə faya ma fəkiye ta gədan haladzay aye. Ahəl nakə a satay a ndo hay məkəde tay ha ta maslalam aye na, ta təma fataya abəra. Ta ge bəle, ane tuk na, Mbəlom kə vəlatay gədan. Nəteye slagama eye hay, ta həhar sidzew i bərakəzan hay.

35 ɲgwas hay ta ɲgatatay a ndo tay neheye tə mət aye sa, nəteye ta sifa aye. Ndo siye hay tə satay dəretsətəh. Həbe ta gwad nəmaa gəriye ha məpay bəzay a Mbəlom. Ane tuk na, a satay mətəme bay, a satay məməte mə dəretsətəh hərwi ada Mbəlom mə lətsa tay ahaya abəra ma mədahan ada tə huta sifa ɲgwalak eye a ze nakay.†

36 Ndo siye hay sa na, tə ɲgwasə fataya, tə ndafa tay ha ta mandalafa, tə dzawa tay ha tə tsalalaw, ta dərəzl tay ha a gay i danɲay. Andza niye, ta səmay naha bəɲbəɲ.

37 Siye i ndo mekeləɲ eye hay tə kəd tay ha tə kwar. Siye hay ta dəs tay ha ka bo abəra morkotsok. Siye hay tə kəd tay ha ta maslalam. Siye hay gay tay andaya bay, ta dzədzawa so, nəteye mətəwak eye hay. Tə pawa ka bo mbal i təban hay ta məkwets i wak hay. Ndo hay ta hərəwatay ha, tə gəwatay dəretsətəh.

38 Ta dzədzawa mə makulkwandah, ada mə mahəmba hay, tə hənawa ma lar hay ada mə bəd hay. Ndo neheye na, ta ye ka bo ta məndzibəra nakay bay.

39 Ndo neheye tebiye nəteye ta pa mədzal gər ka Mbəlom ada andza niye nəteye tə yay a gər a Mbəlom. Kwa andza niye bəbay na, ta huta wu nakə Mbəlom a gwad ma vəlatəye a ndo hay aye bay,

40 hərwi Mbəlom kə dzala ada kə pa hərwi kway wu ɲgwalak eye a ze i siye i ndo neheye tə huta aye. A say a Mbəlom tə təra ɲgwalak eye ka bo dziye tə nəkway.

## 12

### *Melkisedek ndo məvəlaway wu a Mbəlom*

‡ 11:29 Zəba mə Madayaw abəra ma Ezipt 14.21-31. § 11:30 Zəba mə Zozowe 6.12-21. \* 11:31 Zozowe 6.12-21. † 11:32 Zəba mə Ndo i sariya hay 6.11. ‡ 11:32 Zəba mə Ndo i sariya hay 4.6.

§ 11:32 Zəba mə Ndo i sariya hay 13. \* 11:32 Zəba mə Ndo i sariya hay 11.1. † 11:35 Zəba ma 1 Bəy hay 17.17-24; 2 Bəy hay 4.18-37.

<sup>1</sup> Nækway na, ndo neheye tebiye tã pawa mædzal gær ka Mbælom ta lawara kway, faya ta ðakway ha ma kækay nakã nækway bəbay ka pakweye mædzal gær ka Mbælom aye. Hærwi niye, kalakwa ha ka bo abəra wu neheye tebiye faya ta gakweye me ka mede kame aye ada ta mezeleme nakã ma miye kway ha ta ðəba aye, ada hwayakwa mahway nakã Mbælom a gwadəkway hwayum aye, madagær mâ gakway bay.

<sup>2</sup> Zəbakwa kame ka Yesu. Nəngeye nakã a vəkakway tsəved ka pakwa faya mædzal gær ka nəngeye aye, mata laka kway ha hus ka mandəve eye na, nəngeye. Ka təma məməte ka mayako mazləlmbadã eye. Horoy kə gay məməte ka mayako mazləlmbadã eye bay hærwi a sər ha ðərev ma ŋgwasieye ta mənɣwese nakã Mbælom a ləva ha bo hærwi ŋgay aye. Anəke nəngeye mandza eye tə həlay i mənday i təv məndze i bəy i Mbælom.

<sup>3</sup> Dzalum ka nəngeye lele ma kækay nakã ndo i mezeleme hay tã nay ðəre aye ada ma kækay nakã a səmay naha a ðəretsətseh nakã tã say aye. Dzalum ka nəngeye hærwi ada ðərev mâ ye fakuma abəra bay, ada kã gum bəle bay.

<sup>4</sup> Ka gumeye vərəm tã mezeleme, ane tuk na, hus ka məməte bay. Aya ane ðərev mâ ye fakuma abəra bay.

<sup>5</sup> Ka mətsum ha gær tã bazlam neheye Mbælom a tsikakum hærwi məmākum naha ðərev aye ðaw? A tsikakum me andza bəba ma tsikeye me a wawa ŋgay, a gwad:

«Wawa ga, Bəy Maduwerŋ Mbælom kã tsikaka ka makəte na,

kã zəba faya andza wu kəriye bay.

Kə maka ha mənɣok na,

ðərev mâ ye faka abəra bay,

<sup>6</sup> hærwi faya ma tsikateye ka makəte na,

a ndo neheye a wudã tay aye.

Ma ndəbiye na,

ndo neheye tebiye ta təra wawa ŋgay hay aye.\* »

<sup>7</sup> Andza niye, səmunay naha a ðəretsətseh bəŋbəŋ hærwi ada kã sərurum wu nakã Mbælom a kəta kurom ha aye. Dəretsətseh nakay a ða ha na, Mbælom kə həl kurom hærwi ada kã tərurum wawa ŋgay hay. Wawa andaya nakã bəba ŋgay ma tsikeye ka makəte bay aye na, andaya ðaw? Andaya bay!

<sup>8</sup> Mbælom faya ma kətiye wawa ŋgay hay tebiye. Tadã kã tsikakum ka makəte bay na, nəkururom wawa ŋgay hay bay, nəkururom madazla hay.

<sup>9</sup> Bəba hay ka məndzibəra nakay, ta kəta kway ada ka rəhakwa tay ha gær. Ada sadzək ka rəhakway ha gær a Bəba kway nakã mə mbælom aye bədaw? Tadã ka rəhakway ha gær na, ka hutakweye sifa.

<sup>10</sup> Bəba kway hay ka məndzibəra, nətəye ta kətiye kway na, həlay tsekwen tsa andza nakã ta zəba faya lele aye. Ane tuk na, Bəba kway nakã mə mbælom aye, nəngeye ma kətiye kway hærwi ada mâ dzəna kway ada ka tərakwa tsəðanŋa andza nəngeye huya.

<sup>11</sup> A həlay nakã faya ta kətiye kway aye na, a wur fakwaya, mənɣwese andaya mə ðərev kway bay. Aza kame, ndo neheye ta təma makəte aye na, ta giye wu nakã a yay a gær a Mbælom aye ada ðərev tay ma ndziye zay.

### *Matətike ta mäge ðaf*

<sup>12</sup> Kə ge andza niye na, ndudum ha həlay kurom neheye madagær eye hay aye, gurmets kurom tã ge bəle bay.

\* 12:6 Dzeke hay 3.11-12.



13 Lambadum tsæved fehe lele hærwi sik kurom hay hærwi ada ndo neheye faya ta dzægadasliye na, sik tay mâ sakah mænese bay, ane tuk na, tâ mbæl.

14 Gum gədan mändze zay ta ndo hay tebiye, gum gədan ada mede kurom mâ yay a gər a Mbəlom. Kə ge andza niye bay na, ndəray ma ŋgateye a Bəy Maduweŋ bay.

15 Gum metsehe, ndəray mâ kərah ŋgwalak i Mbəlom bay. Gum metsehe, ndəray mə walaŋ kurom mâ təra andza dərizl i gərdaf nakə təleŋe, a ndzohw faya ma gəliye, ma kwasateye gər a ndo hay aye bay. Slala i ndo niye ma nasiye ha siye i ndo hay mə walaŋ kurom.

16 Gum metsehe, ndəray mə walaŋ kurom mâ ge wu nakə ŋgwalak eye bay aye bay. Rəhumay ha gər a wu i Mbəlom. Kā tərūm andza Ezayu nakə hærwi daf sik nəte na, a səkəm ha magedze ŋgay aye bay.

17 Ka sərūm ha ma dəba eye na, a say mambəde ha mədzał gər i bəba ŋgay ada mâ pa faya ŋgama. Ane tuk na, bəba ŋgay a kərah. Ezayu a pəla tsəved kwa ta mətuwe bəbay na, wewer mekelen eye andaya hærwi mambəde ha wu nakə a ge aye bay.†

18 Sərūm ha təv nakə nəkurom malətse faya kame i Mbəlom aye na, andza mahəmba nakə ahəl niye Israyel hay tə lətse faya tə lamay tə həlay aye bay. Ta ŋgatay a ako faya ma təmiye zləkəd zləkəd, ta ŋgatay a ləvon, dərə a zəba bay, ta ŋgatay a mətasł nakə a vəzl ta gədan aye.

19 Ta tsəne maləve i tołom, ta tsəne maləve i mətsike me i Mbəlom. Tə tsəne maləve i mətsike me niye na, tə ge amboh mətsike me niye mâ tsikatayaw sa bay,

20 hærwi wu nakə a tsikatay aye na, tə sla faya məsəmay naha bay. Mbəlom a gwadətay: «Ndowey kə lamay a mahəmba nakay, kwa maa lamay gənow, kwa way kalum na tə kwar ada kədum na.»‡

21 Wu neheye Mbəlom a bəzatay ha aye na, ka dzədzar tay ha. Kwa Musa, a gwad: «Zluwer a geŋ, na dzədzariye.Š»

22 I kurom na, andza niye bay! Nəkurom i kurom ka həndzədum na, ka mahəmba i Siyon, gəma i Mbəlom nakə ma vəliye sifa aye, Zerozelem nakə mə mbəlom aye. Gawla i Mbəlom hay haladzay mahaya gər eye mə dəma məge magurlom, ma pasliye bo bay.

23 Nəkurom ka hayum gər ta siye i malkwara hay\*, Mbəlom kə watsa mazele tay a dərəwel mə mbəlom. Ka həndzədum ka təv i Mbəlom, neŋgeye ndo məgatay sariya a ndo hay tebiye. Ka həndzədum ta ndo neheye nəteye ŋgwalak eye ka dərə i Mbəlom ada Mbəlom a təra tay ha tsədanŋa aye.

24 Nəkurom ka həndzədum ka Yesu. Neŋgeye ka həndzəd tay ha ka bo ndo hay ta Mbəlom hærwi ada Mbəlom mâ ɓar Dzam Wədeye ta nəteye. Ka həndzədum ka bambaz i Yesu nakə a gwatsaka fakuma aye. Bambaz eye niye faya ma tsikakweye ka wu nakə a ze ha bambaz i Abel faya ma tsikakweye aye.

25 Kə ge andza niye na, gum metsehe. Kā kərahum məpay zləm a bazlam i ndo nakə ma tsikakumeye aye bay. Ahəl niye na, ta kərah məpay zləm a ndo nakə a dawatay ha bazlam i Mbəlom ka mändzibəra aye. Nəteye niye ta təma abəra mə dərətsətseh bay. Nəkway neheye faya ka pakway zləm a mətsike

† 12:17 Zəba mə Madazlay i wu hay 25.29-34. ‡ 12:20 Madayaw abəra ma Ezipt 19.12-13. Š 12:21

Zəba mə Madayaw abəra ma Ezipt 19.12; Bazlam mapala eye masulo eye 9.19. \* 12:23 Malkwara hay na, a ɗa ha gawla i Yesu Kəriste hay. Zəba mə Madayaw abəra ma Ezipt 4.22.

me nakə a yaw mə mbəlom aye, ka kərahakwa na, ka slakweye faya mətəme abəra mə dəretsətseh sa bay.

<sup>26</sup> Ahəl niye mətəsike me i Mbəlom a bəlawa ha dala. Ane tuk na, anəke kə tsik, a gwad: «Sik nətə sa na, ma bəliye ha dala dəkdek sa bay ta magərmbəlom aye dzay.†»

<sup>27</sup> Bazlam neheye a gwad «sik nətə sa» aye na, a dəkway ha parakka wu neheye tə ge aye tebiye ta bəliye, ta dziye hərwi ada wu neheye ta bəliye təbey aye na, ta ndziye.

<sup>28</sup> Kə ge andza niye na, gakway sisœ a Mbəlom hərwi ka hutakweye bəy ŋgay nakə ndəray ma bəliye ha dāda bay aye. Zambadəkway andza nakə a yay a gər aye, dəsəkway ha gər ada rəhakway ha gər.

<sup>29</sup> Hərwi ta dedək Mbəlom na, neŋgeye andza ako nakə ma təmiye wu hereyew hereyew aye.

## 13

### *Mede nakə a yay a gər a Mbəlom aye*

<sup>1</sup> Nəkurom ndo məpe mədzał gər hay ka Yesu, wudum bo nətə nətə mə walaŋ kurom huya.

<sup>2</sup> Təmum mbəlök hay a gay kurom lele, kə mətsum ha gər bay. Siye hay ta təma mbəlök hay a gay tay ze məsəre ha, mbəlök niye hay na, gawla i Mbəlom hay.

<sup>3</sup> Dzalum ka ndo neheye ma danğay aye andza nəkurom ka bo dziye ma danğay. Dzalum ka ndo neheye ndo hay faya ta sateye dəretsətseh aye andza nəkurom dərmał faya ka sumeye dəretsətseh.

<sup>4</sup> Dəslumay ha gər a məzle bo i zal ta ŋgwas. Zal ta ŋgwas ŋgay tə ge madama bay. Sərum ha na, Mbəlom ma gateye sariya a ndo mäge madama hay ada a ndo neheye ta zla ŋgwas zuk bay kwa a ndo neheye ta zla zal zuk bay faya ta giye madama aye.

<sup>5</sup> Kə gum bor i suloy bay, dərɛv kurom mā ŋgwas tə bəmalə nakə andaya fakuma aye. Hərwi Mbəlom a gwad:

«Na gakeye masəfaya dāda bay,  
na gəriye kar ha dāda bay.\*»

<sup>6</sup> Hərwi niye, ka slakweye faya mətəsike tə dərɛv kway peteh:

«Bəy Maduweŋ Mbəlom ma dzəniye ga huya,  
na dzədzareye a wuray kwa tsekweŋ bay.

Ndəray ma sliye məgeŋ wuray bay.†»

<sup>7</sup> Dzalum ka bagwar kurom neheye tə dəkum ha bazlam i Mbəlom kurre aye. Zəbum ka mede tay ada ka məmətə tay nakə tə mət aye. Pum mədzał gər kurom ka Mbəlom andza nətəye tə pa mədzał gər ka Mbəlom aye dərmał.

<sup>8</sup> Yesu Kəriste ka mbəda bay. Neŋgeye kurre eye, anəke, ada kame, Yesu a mbəda təbey.

<sup>9</sup> Kə təmum ndo siye hay tə səpat kurom abəra ka tsəved i dedək ta matətike wu wədəye hay wal wal bay. Kə təmum wu nakə ta tsikakuməye bay hərwi maa vəlay gədan a dərɛv i ndo na, ŋgwalak i Mbəlom bəna wu mənday ma vəleye gədan a dərɛv i ndo bay. Ndo neheye tə pay bəzay a bazlam mapala eye nakə a tsik ka wu mənday aye na, bazlam eye neheye mapala eye ka dzəna tay ha kwa tsekweŋ bay.

† 12:26 Aze 2.6. \* 13:5 Zəba mə Bazlam mapala eye masulo eye 31.6, 8; Zozowe 1.5. † 13:6 Dəmes hay 118.6.

<sup>10</sup> Ndo mævələway wu a Mbəlom neheye tə kədəway wu a Mbəlom mə madzawadzawa i mədəslay ha gər a Mbəlom nakə ta lambad ta gugumanj aye na, ta sliye faya mände wu nakə nəkway ka vəlakway a Mbəlom ma təv kway nakə ka vəlawakway faya wu a Mbəlom aye bay.

<sup>11</sup> Hərwi i tay na, ahəl nakə ta kədəway naha wu a Mbəlom aye na, bagwar i ndo mævələway wu a Mbəlom ma zliye bambaz eye, ma diye ha a təv nakə a ze siye hay tə tsədəŋŋa aye, ma vəleye a Mbəlom hərwi ada Mbəlom mā pəsətay ha mezeleme tay. Slo eye na, ti ye ha abəra mə wuzlahgəma tə dul na.<sup>‡</sup>

<sup>12</sup> Hərwi niye Yesu bəbay a mət na, ti ye abəra mə wuzlahgəma.<sup>§</sup> Ka mbədə ha bambaz ŋgay hərwi məbere mezeleme i ndo hay.

<sup>13</sup> Kə ge andza niye na, kə pakway bəzay a kule i Yahuda hay bay, takwa abəra mə wuzlahgəma, takwa ka təv ŋgay. Təmakwa ndo hay ta tsədəkway andza nakə tə tsaday aye dərmak.

<sup>14</sup> Ka mändzibəra nakay na, gəma kway andaya ka ndzakweye mə dəma ka tor eye bay. Faya ka təkakweye dərə a gəma nakə ka ndzakweye mə dəma ka tor eye.

<sup>15</sup> Zambadakway a Mbəlom huya hərwi wu nakə Yesu a ge aye. Ka zambadakweye ta mətstike me tə bazlam kway. Kwa kədəy, da ha neŋgeye bagwar eye. Niye na, wu nakə faya ka vəlakweye aye. Andza məgwədə ka zambadakweye a məzele ŋgay.

<sup>16</sup> Sa na, kə mətsum ha gər ta məgatay ŋgwalak a siye i ndo hay bay, ŋgənum a bo wu kurom hay ta nəteye. Kə mətsum ha gər bay hərwi məvəle wu neheye andza wu kəriye na, a yay a gər a Mbəlom.

<sup>17</sup> Rəhumatay ha gər a bagwar kurom hay, gum wu nakə tə gwədəkum gum aye. Nəteye na, ta gakumeye gər hərwi Mbəlom ma tsətsahiye fataya ma kəkay nakə faya ta gakumeye gər aye. Ka rəhumatay ha gər na, ta giye məsler tay ta mənğwese eye, mevel ma gateye bay. Mevel kə gatay na, niye na, ma dzəniye kurom sa bay tebiye.

<sup>18</sup> Duwulumay me a Mbəlom hərwi may huya. Nəmaa sər ha ta dedək dərəv may tsədəŋŋa, a samay mäge wu ŋgwalak eye huya.

<sup>19</sup> Neŋ faya na tsətsahiye naha fakuma wene wene eye na, duwulumay me a Mbəlom hərwi ada nā ma naha a təv kurom ta bəse.

### *Mandəve i bazlam*

<sup>20</sup> Maa vəlakway zay a dərəv na, Mbəlom. Maa lətse ahaya Bəy Maduweŋ Yesu abəra ma mədəhar na, neŋgeye. Ka təra ha Yesu ndo mətəkure bagwar eye, kə mət hərwi kway təbaŋ ŋgay hay. Mbəlom kə zla bambaz ŋgay, kə bər ha dzam ta nəkway ka tor eye.

<sup>21</sup> Mbəlom mā vəlakum gədaŋ mə wu ŋgwalak eye hay tebiye hərwi ada kə gum wu nakə a yay a gər aye. Mā ge məsler ŋgay mə nəkway tə həlay i Yesu Kəriste hərwi ada kə gakwa wu nakə a yay a gər aye. Ndo hay tā zambadaya a Mbəlom ka tor eye! Mā ge andza niye!

### *Mətstike me*

<sup>22</sup> Malamar ga hay, na watsakum naha dərəwel nakay hərwi mævələkum gədaŋ. Neŋ faya na gakumeye naha amboh, pum bazlam neheye a dərəv kurom hərwi na watsakum naha na, tsekweŋ tsa.

<sup>23</sup> Sərūm ha, malamar kway Timote neŋgeye ma daŋgay sa bay. Tadə kə ndislew ka təv ga bəse, ahəl nakə na diye mazəbakumaw dərə aye na, nəmaa diye naha salamay.

‡ 13:11 Zəba Levitik 16.27. § 13:12 Zəba Yuhana 19.17-20.

<sup>24</sup> Tsikumataɣ ha me a ndo neheye baɣwar kurom aye ada a ndo mæpe mædzal gær hay ka Yesu tebiye. Ndo mæpe mædzal gær hay ka Yesu neheye ti yaw ma Itali aye ta tsikakum naha me dærmak.

<sup>25</sup> Mbælom mâ pa ŋgama ka nækurom tebiye.

## Derewel nakə Yakuba a watsa aye Məfələkwe

Mə derewel i Yakuba na, matətike ta məvələ gədan̄ a ndo məpe mədzal gər hay ka Yesu neheye nəteye man̄gəna gər eye ka mändzibəra tebiye aye. Yakuba a watsa derewel nakay na, a Yahuda neheye tə pa mədzal gər ka Yesu aye.

Derewel i Yakuba faya ma tsikateye a ndo məpe mədzal gər hay ka Yesu ka metsehe (1.2-8; 3.13-18). Andza niye, ta sliye faya mändze bəḅəḅə kame i wu nakə ma dziye ha ndo zezen̄ aye: Dəretsətseh i mändzibəra (1.2-4), mawudə matəre zlele eye (1.9-11; 5.1-6); mawudə məge mənese (1.2-18; 4.1-9), mədəslyay ha gər a bo (4.13-16). Derewel nakay faya ma gwadiye: Məpe mədzal gər ka Mbəlom na, faya ma diye ha ndo ka məge metsehe (2.14-26), məgay metsehe a bo ada mändze bəḅəḅə kame i mənese (zəba ma 3.1-12).

Yakuba a watsa derewel nakay na, a ndo neheye zlele eye bay aye (zəba ma 2.6). Derewel nakay faya ma gwadateye ta kəts ndo i mətawak hay bay (2.1-13). A gwad zlele na, lele bay hərwi nakə ndo i zlele hay tə ge ha məsler tə dāma bay aye (5.1-6).

### *Mətsike me*

<sup>1</sup> Neḅ Yakuba, ndo i məsler i Mbəlom ta Bəy Maduweḅ Yesu Kəriste.

Na tsikakum naha me a nəkurom ndo i Mbəlom neheye ka mändzibəra tebiye aye.

### *Mbəlom ma vəliye metsehe a ndo neheye tə dzala ha faya aye*

<sup>2</sup> Malamar ga hay, dəretsətseh hay waray waray i mədze nakə ta dziye kurom ha, ta ndzakum a gər na, dərev kurom m̄ ḅwasə haladzay,

<sup>3</sup> hərwi ka sərum ha na, təd̄ə ka pum mədzal gər kurom ka Mbəlom huya ada faya ka səmumay naha a mədze nakə ta dziye kurom ha aye na, ka ndzumeye bəḅəḅə lele.

<sup>4</sup> Ndzum bəḅəḅə hus ka mandəve eye hərwi ada ka tərumeḅe masəra gər eye hay mə wu hay tebiye ada wuray m̄ kətsakum bay, wu nakə lele bay aye m̄ ge andaya mə dərev kurom bay.

<sup>5</sup> Təd̄ə ndoweye mə walaḅ kurom metsehe ḅgay andaya hala bay na, m̄ tsətsah ka Mbəlom hərwi ada Mbəlom m̄ vəlay. Mbəlom a vəlawə kwa a way tə dərev ḅgay peteh, ma kərahiye ha a ndo bay, ta dedek ma vəliye metsehe a ndo nakə ka tsətsah faya aye.

<sup>6</sup> Ane tuk na, təd̄ə ndoweye ma tsətsahiye wu ka Mbəlom na, m̄ sər ha ta dedek Mbəlom ma vəleye, m̄ dzala gər faya sulo sulo bay hərwi ndo nakə mədzal gər ḅgay sulo sulo aye na, neḅgeye andza dəlov nakə wekit wekit mətasl a bəl kwa a diye wuray wuray tebiye aye.

<sup>7</sup> Slala i ndo nakay andza niye m̄ dzala mə gər ḅgay Bəy Maduweḅ ma vəleye wu bay,

<sup>8</sup> hərwi mədzal gər ḅgay sulo sulo ka Mbəlom, mədzele gər ḅgay ka wu nəte bay.

*Ndo i mətawak hay ta ndo i zlele hay*

<sup>9</sup> Ndo nakə mətawak eye faya ma pay bəzay a Yesu Kəriste aye na, dərev ɲgay mâ ɲgwasa hərwi Mbəlom ka səkah ha.

<sup>10</sup> Ndo nakə zlele eye faya ma pay bəzay a Yesu Kəriste aye na, dərev ɲgay mâ ɲgwasa dərmak hərwi Mbəlom kə ma ha ka dala. A sər ha na, ma dziye andza məvurze i guzer nakə a ɓəta bəse aye.

<sup>11</sup> Pat kə zla faya abəra ɲgulak na, ma kuliyə ha guzer, məvurze hay ta kutsiyə ada məle tay kə nas. Andza niye, ndo i zlele ma dziye tə məsler ɲgay hay tebiye andza guzer neheye tə ɓəta kəriye tsa aye.

### *Mbəlom ma dziye ha ndo bay*

<sup>12</sup> Məɲgwese ma ndziye ka ndo nakə a səmay naha a mədze neheye tə dza ha aye. Kə səmay a mədze neheye na, Mbəlom ma vəleye magogoy ɲgay, andza məgwede sifa nakə a gwad ma vəliye a ndo neheye a wuɗa tay ha aye.

<sup>13</sup> Tadə məsəpete kə ndzay a gər a ndoweye na, mâ gwad «Maa səpat ga na Mbəlom» bay hərwi ndəray ma sliye məsəpete Mbəlom ka mäge mənese bay, ada Mbəlom a səpat ndo a mənese bay dərmak.

<sup>14</sup> Kwa way a ge mənese na, ta bor i bo ɲgay nakə lele bay a səpat na ka mäge mənese aye.

<sup>15</sup> Wu neheye lele bay a dzala mə gər ɲgay aye, ma dəba i məndze tsekwen na, ma giye parakka. Mezeleme niye ka səkah haladzay na, ma diye ha a məməte.

<sup>16</sup> Malamar ga neheye na wuɗa kurom haladzay aye, ndəray mâ vakum gər bay.

<sup>17</sup> Wu neheye ɲgwalak eye tebiye ti yaw abəra ka təv i Mbəlom, wu neheye lele eye na, i Mbəlom Bəba kway nakə a ge pat tə wurzla hay aye. Mbəlom na, a mbəda bay, a mbəda andza pat nakə a mbəda ma gəriye kurom ha a ləvonj aye bay.

<sup>18</sup> A vəlakway sifa tə bazlam ɲgay dedək eye. A ge niye na, tə dərev hərwi ada kâ tərakwa kurre eye hay mə walaŋ i wu neheye a ge aye.

### *Pumay zləm a bazlam i Mbəlom ada gum wu nakə a tsik aye*

<sup>19</sup> Malamar ga neheye na wuɗa kurom haladzay aye, dzalum ka wu nakay anan aye: Ndzum tsezlezleŋŋe ka məpay zləm a wu neheye siye i ndo hay ta tsikiye aye, ane tuk na, kâ tsik me bəse tsa bay, zla həlay eye təday ada kâ ge mevel bəse bay dərmak,

<sup>20</sup> Hərwi ndo nakə ma giye mevel aye na, ma sliye faya mäge wu nakə a yay a gər a Mbəlom aye bay.

<sup>21</sup> Hərwi niye, zlum na wu neheye lele bay tebiye abəra mə dərev kurom, kâ gum mezeleme sa bay. Rəhum ha gər kurom ka dala kame i Mbəlom, ada pumay zləm a bazlam nakə a pa a dərev kurom aye. Bazlam nakay na, gədanj ɲgay andaya mətəme ha məsəfəre kurom.

<sup>22</sup> Kâ tərūm ndo məpay zləm a wu nakə Mbəlom a tsik aye dekdək bay, gum wu nakə a tsik aye dərmak. Ndo nakə a pay zləm dekdək tsa kə ge na faya məsler eye bay na, a vay gər a bo ɲgay.

<sup>23</sup> Tadə ndoweye a pay zləm a bazlam nakay ada kə ge wu nakə a tsik aye bay na, neŋgeye andza ndo nakə a zəba ka dərə ɲgay mə malam, neŋgeye kəkay na, a ɲgatay.

<sup>24</sup> A zəba ka dərə ɲgay lele na, a ye ɲgway. Neŋgeye kəkay na, a mətsa ha gər tə mazəbe ɲgay.

<sup>25</sup> Ndowneye ka zəba dərə a bazlam i Mbəlom mapala eye, kə ge ha məsler tə wu nakə a tsik aye na, Mbəlom ma piye faya ɲgama. Mâ pay zləm dekdək tsa

ada mâ mætsa ha gær bay. Ane tuk na, ðuh mâ ræhay ha gær. Mbælom ma piye faya ngama hærwi bazlam nakay mapala eye ngwalak eye, neŋgeye gædan eye hærwi mætæme kway ha abæra mæ mezeleme.

<sup>26</sup> Tadæ ndoweje kæ dzala neŋgeye ndo mæpay bæzay a Mbælom, kæ gay metsehe a ðærneh ngay bay faya ma tsikiye wu neheje lele bay aye huya na, a vay gær a bo ngay, mæpay bæzay a Mbælom ngay niye ma giye ngama kwa tsekweŋ bay. Bazlam ngay neheje faya ma tsikiye ta tæra kærkiye.

<sup>27</sup> Mæpay bæzay a Mbælom ta lele eye nakæ a yay a gær a Mbælom aye na, mægatay gær a wur mætawak hay, a madakway i ngwas neheje faya ta siye ðæretsætseh aye. Mâ gay metsehe a bo ngay hærwi ada wu i mændzibæra neheje lele bay aye ta ye ha a mezeleme bay.

## 2

### *Ndo hay tebiye kame i Mbælom na, næte*

<sup>1</sup> Malamar ga hay, nækurom na, ka dzalum ha ka Bæy Maduweŋ kway Yesu Kæriste. Neŋgeje bagwar eye a ze wu hay tebiye ta mæzlaß, ka ngatakway a Mbælom na, ma neŋgeje. Hærwi niye, kâ ngænum ha ka bo abæra ndo hay bay.

<sup>2</sup> Agana ndo andaya, a pa ka bo peteked neheje tæ le aye, a pa wu a wur hælaj neheje tæ væð ta gura eye, a ye naha a mæhay gær kurom. Ndo ngeð na, mætawak eye peteked ngay neheje ka bo aye lele bay.

<sup>3</sup> Nækurom ka ðæslumay ha gær na, a ndo nakæ a pa ka bo peteked neheje tæ le aye, ka gwadumay: «Amboh, dara, ndza ka dzaŋga ngwalak eye.» Ndo nakæ mætawak eye na, ka gwadumeye: «Lætse mælætse» kægabay ka gwadumeye «Ndza kanan ka dala.»

<sup>4</sup> Tadæ ka gum andza niye na, ka ngænum tay hay ka bo abæra ndo hay bæðaw? Ka gumay sariya a ndo næte mæ walaŋ i ndo niye hay bæðaw? Wu neheje ka dzalum aye na, lele bay.

<sup>5</sup> Malamar ga neheje na wuða kurom haladzay aye, tsænum lele, ka særum tæbæðew Mbælom a pala ndo neheje mætawak eye ka mændzibæra aye na, hærwi ada tâ pa mædzal gær ka Yesu Kæriste ada tâ huta zlele nakæ deðek eye, a pala tay hærwi ada tâ fælakwa a Bæy i Mbælom nakæ a gwad ma zliye, ma væliye a ndo neheje ta wuða na aye.

<sup>6</sup> Ane tuk na, nækurom ðuh faya ka kætsumeye tay ha ndo i mætawak hay. Maa gawakum ðæretsætseh na, ndo i zlele hay na gwad ðuh ba? Maa vahawa kurom kame i sariya na, næteje.

<sup>7</sup> Maa tsik wu nakæ lele bay aye ka mæzele ngwalak eye i Yesu Kæriste nakæ tæ zalakum ha aye na, ndo i zlele hay.

<sup>8</sup> Tadæ ka ræhumay ha gær a bazlam i Mbælom mapala eye nakæ tæ watsa mæ Derewel i Mbælom aye na, ka gum lele. Bazlam nakay mapala eye a gwad: «Wuða ndo i mægeð yak ðærmak andza ka wuða na gær yak.\*»

<sup>9</sup> Ane tuk na, tadæ ka ngænum tay ha ka bo abæra ndo hay na, ka gum mænese, bazlam mapala eye ma gæsiye kurom hærwi nakæ ka ræhumay ha gær bay aye.

<sup>10</sup> Kwa tadæ ndoweje ka ræhay ha gær a bazlam i Mbælom mapala eye tebiye, ane tuk na, kæ nas ha næte ka ræhay ha gær bay na, niye na, andza mægwede kæ nas tebiye.

\* 2:8 Levitik 19.18.



11 Hərwi Mbəlom nakə a gwad: «Kâ ge madama bay†» aye na, a gwad, «Kâ kədgər i ndo bay‡» dərma, ane tuk na, tadə ka kəndə na, kwa ka ge madama bay na, ka nas ha bazlam i Mbəlom mapala eye.

12 Hərwi niye faya na gwadəkumeye, sərüm ha, mə wu neheye ka tsikum-eye ada mə wu neheye ka gumeye na, Mbəlom ma gəkumeye sariya, ma tsətsahiye tadə nəkurom ka rəhumay ha gər a bazlam nakay gədan̄ ŋgay andaya mətəme kurom ha aye.

13 Tadə ndoweye kə sakay naha a siye i ndo hay bay na, ahəl nakə Mbəlom ma giye sariya aye ma sakay naha bay dərma. Ane tuk na, tadə ka sakay naha a ndo hay na, Mbəlom ma gəsiye kar a sariya bay.

### *Məpe mədzal gər ka Yesu ta məge məsler*

14 Malamar ga hay, tadə ndoweye kə tsik tə bazlam kə dzala ha ka Mbəlom, ane tuk na, kə ge wu nakə Mbəlom a tsik aye bay na, ma dzəniye na ma kəkay? Mədzal ha andza nakay na, ma təmiye ha bay.

15 Ağəna siye i ndo məpay bəzay a Yesu Kəriste hay andaya, petekəd andaya fataya bay, may a wur fataya dərma.

16 Tadə ndo mə walaŋ kurom a gwadətay: «Dum tə zay. Mbəlom mâ vəlakum petekəd ta wu mənday», ane tuk na, kə vəlatay wu bay na, ŋgama eye mey?

17 Mədzal ha ka Mbəlom na, andza niye dərma. Tadə ndoweye kə gwad kə dzala ha ka Mbəlom, ane tuk na, kə ge məsler ŋgwalak eye bay na, mədzal gər ŋgay ka Mbəlom kə mət.

18 Ağəla ndoweye ma gwadiye «Ndo ŋged faya ma dzaliye ha ka Mbəlom, ndo ŋged faya ma giye məsler ŋgwalak eye.» Na məbədeye faya na, bəzəŋ ha ma kəkay nakə faya ka dzaliye ha ka Mbəlom aye ada faya ka giye məsler ŋgwalak eye bay. Ada neŋ na bəzakeye ha məsler ga neheye ŋgwalak eye hərwi ada kâ ŋgatay neŋ faya na dzaliye ha ka Mbəlom.

19 Ka dzala ha Mbəlom andaya nəte ŋgewəŋ. Ka ge lele. Kwa məsəfəre neheye lele bay aye ta dzala ha dərma, ada hərwi niye faya ta dzədzariye.

20 Nəkar ndo i mətərakahaŋ! A saka tâ daka ha mədzal gər ka Mbəlom ze məge məsler ŋgwalak eye na, ma giye ŋgama bay na, ka sər təbədew?

21 Bəba tətə kway Abraham a tərə tsədan̄ŋa kame i Mbəlom na, ta tsəved waray? A tərə tsədan̄ŋa na, tə wu nakə a ge aye bədaw? A zla wawa ŋgay Izak məkəday naha a Mbəlom.

22 Anəke ka sər ha mədzal ha ka Mbəlom ada ta məge məsler ŋgwalak eye hay ti ye ka bo salamay. A ge ha andza niye na, kə vəlay ha dərəv ŋgay peteh a Mbəlom.

23 Wu nakay a ge bo na, andza nakə tə watsa mə Derewel i Mbəlom, a gwad: «Abraham a dzala ha ka Mbəlom, hərwi niye Mbəlom a tərə ha ndo i dedək kame ŋgay. §» Tə zalay «dzam i Mbəlom.»

24 Ka sərüm ha na, ndo a tərə tsədan̄ŋa kame i Mbəlom na, hərwi nakə a ge məsler ŋgwalak eye hay aye dərma bəna ta mədzal gər dəkdək bay.

25 Ta Rahab ŋgwas məge madama bəbay andza niye. Ndo məslərə i Yahuda ti ye a gay ŋgay na, ka dzəna tay ha. Kə dətay ha tsəved mekeleŋ eye hərwi ada tâtəma. Hərwi məsler ŋgay nakə a ge andza niye aye na, ka tərə ndo tsədan̄ŋa eye kame i Mbəlom.\*

† 2:11 Madayaw abəra ma Ezipt 20.14, Bazlam mapala eye masulo eye 5.18. ‡ 2:11 Madayaw abəra ma Ezipt 20.13, Bazlam mapala eye masulo eye 5.17. § 2:23 Madazlay i wu hay 15.6. \* 2:25 Zozowe 2.1-21.

<sup>26</sup> Andza niye, tađə məsəfəre ki yaw abəra ma ndo na, ndoweye niye kə mət. Mədzal ha ka Mbəlom na, andza niye dərmak. Tađə ndoweye kə ge məsler ɲgalak eye hay bay na, mədzal gər ɲgay ka Mbəlom kə mət.

### 3

#### *Gumay metsehe a dərneh kurom*

<sup>1</sup> Malamar ga hay, kâ tərūm tebiye kurom eye ndo matətike tay ha ndo hay bay. Sərūm ha nəmay neheye nəmaa tətikateye a ndo hay aye ta gameye sariya ma ziye i ndo siye hay.

<sup>2</sup> Nəkway tebiye faya ka gakweye mənese. Tađə ndoweye faya ma tsikiye me ze mäge mənese na, neɲgeye ndo i dedək. Kə sla đa məgay metsehe a bo ɲgay.

<sup>3</sup> Dzalum ka pələs təday. Ka pakway bəre a bazlam a pələs na hərwi ada mâ rəhakway ha gər ada ma zəɲgaliye tsəved nakə a sakway aye.

<sup>4</sup> Zəbum ka kwalalaɲ i yam bagwar eye. Kwa tađə bagwar eye hay bəbay ada mətasl faya ma vəzliye ta gədaɲ ma diye ha bəbay na, ndo faya ma geye metsehe tə wuye andaya tsekweɲ hərwi ada mâ ye a təv nakə a say aye.

<sup>5</sup> Dərneh i ndo na, andza niye dərmak. Kwa neɲgeye tsekweɲ bəbay na, ma sliye mədəslay ha gər a bo tə wu bagwar eye hay.

Zəbum! Ako tsekweɲ na, ma təmiye kəsaf bagwar eye tebiye təlmed təlmed.

<sup>6</sup> Dərneh i ndo bəbay andza ako. Mənese i məndzibəra na, mə đəma, mə bo kway. Faya ma nasiye ha bo tebiye. Ma vatiye ako nakə ma dziye ha məsəfəre i ndo tebiye. Ako niye a yaw na ma ako nakə ma mbatiye bay ka tor eye.

<sup>7</sup> Ndo hay ta sliye faya məgay metsehe a wu hay tebiye, ta sliye faya ka wu i pesl hay, diyeɲ hay, dədə hay ada tə kələf dərmak.

<sup>8</sup> Ane tuk na, ndo hay ta sliye faya məgay metsehe a dərneh bay. Neɲgeye na, wu nakə lele bay aye. A sla faya məndze səkeffe bay. Neɲgeye maraha eye ta muwar nakə ma kədiye ndo aye.

<sup>9</sup> Ta dərneh na, ka zambadakweye ha a Mbəlom Bəba kway, ada ka vəlakweye tay ha mezeleme a ndo neheye a ge ka mändzəkkit bo ɲgay aye dərmak.

<sup>10</sup> Bazlam i mazambadəy a Mbəlom ta məvələ mezeleme a ndo a yaw mə huf i bazlam eye nəte. Malamar ga hay, mâ təra andza niye bay.

<sup>11</sup> Yam nakə a tsəhən aye ta yam nakə hərwak hərwak aye ta ɲgəzaweye ma bədiyem eye nəte đaw?

<sup>12</sup> Malamar ga hay, sərūm gurov ma sliye faya məwe tetədəz đaw? Werepezl ma sliye faya məwe gurov đaw? Yam nakə a tsəhən aye na, ma ɲgəzaweye yam nakə a tsəhən bay aye bay.

#### *Metsehe nakə a yaw abəra ka təv i Mbəlom aye*

<sup>13</sup> Ndo i metsehe andaya mə walaɲ kurom đaw? Ndo i ndaraw andaya đaw? Mâ bəzay ha metsehe ɲgay ta mäge məsler ɲgalak eye hay ada mâ hənə ha gər ɲgay ka dala.

<sup>14</sup> Ağəna nəkurom sələk eye, ada dərev kurom dūwekeke, ada faya ka dzalumeye ka bo kurom eye dəkdək tsa dərmak. Tađə kə ge andza niye na, kâ ɲgalakum bay ada kâ rawum me ka dedək bay.

<sup>15</sup> Slala i metsehe niye na, a yaw abəra ka təv i Mbəlom bay, nakay na, i məndzibəra. Məsəfəre i Mbəlom andaya mə đəma bay, wu i ndo zezeɲ hay, a yaw mə həlay i Fakalaw.

<sup>16</sup> Tadā ndo hay sələk eye hay ada faya ta dzaliye ka bo tay eye dekdək na, wu hay ta diye ka bo ta tsəved eye sa bay ada slala i wu neheye lele bay aye ta ndohwaweye dərmaḱ.

<sup>17</sup> Ane tuk na, metsehe nakə a yaw abəra ka təv i Mbəlom aye na, wal. Neŋgeye na, tsədanja, a vəl mändze zay mə walaŋ i ndo hay, neŋgeye ləfedede, a sara ha gər tonḡwa tonḡwa bay, a sakay naha a ndo hay, a ge na, məsler ŋḡwalak eye huya, a ŋəna tay ha ka bo abəra ndo bay, dərneh mə bazlam ŋgay sulo təbey.

<sup>18</sup> Ndo neheye ta wuḡa mändze zay aye na, faya ta dzəniye siye i ndo hay ka məhute mändze zay. Wu nakə faya ta giye na, ma giye lele. Ma giye andza ta sləga wu a guvah ada tə dza wu nakə a ndzohw aye.

## 4

### *Kā gum dzam ta mändzibəra bay*

<sup>1</sup> Mətsal bo tə matəre mə walaŋ kurom na, a yaw mənḡay? Na gwad hərwi nakə bor i bo kurom hay faya ta tsaliye bo mə nəkurom aye.

<sup>2</sup> A sakum wu hay, ada ka hutum bay na, nəkurom maləva bo eye ka məkəde ndo hay. Ka gumeye däre ka wu hay ane tuk na, ka slumeye faya məhute bay. Hərwi niye faya ka tərumeye ada faya ka tsalumeye bo mə walaŋ kurom aye. Ka hutumeye wu nakə a sakum aye bay hərwi ka tsətsahum ka Mbəlom hərwi ada mə vəlakum bay.

<sup>3</sup> Kwa tadā ka dūwulumay me a Mbəlom hərwi ada mə vəlakum, ma vəlakumeye bay hərwi ka dūwulumay me ta tsəved lele aye bay, ka tsətsahum wu neheye ka gum faya däre aye.

<sup>4</sup> Nəkurom ka tərūm andza ŋḡwas neheye faya ta giye madama aye. Sərūm ha, tadā ndoweye ka wuḡa wu i mändzibəra na, neŋgeye ndo mənə däre i Mbəlom. Ndo nakə a say məpay bəzay a wu i mändzibəra aye na, ka təra ndo mənə däre i Mbəlom.

<sup>5</sup> Nəkurom ka dzalum wu nakə tə watsa a Dərewel i Mbəlom aye na, ka təra wu kəriye daw? A gwad: «Məsəfəre nakə Mbəlom a pa a bo kway aye na, sələk eye.»

<sup>6</sup> Sa na, ma vəlakweye ŋgama nakə a ze wu tebiye aye. Andza nakə tə watsa a Dərewel i Mbəlom aye na, «Mbəlom ma kərəhiye ndo neheye ta dəslay ha gər a bo aye, ane tuk na, ma vəliye ŋgama a ndo neheye tə həna ha gər aye.\*»

<sup>7</sup> Hərwi niye, rəhumay gər a Mbəlom. Səmumay naha a Fakalaw, ma hwayakumeye.

<sup>8</sup> Həndzədūm ka təv i Mbəlom, ma həndzədīye tə nəkurom dərmaḱ. Nəkurom neheye faya ka gumeye mezeleme aye, barum na həlay kurom. Nəkurom neheye mədzal gər sulo sulo aye, zlum na mezeleme abəra mə dərev.

<sup>9</sup> Ndzum tsokodokkwa hərwi mezeleme kurom hay, ada tuwum. Kā ŋḡwasum dūh bay, tuwum. Dərev kurom mə ŋḡwasa sa bay, ane tuk ndzum tsokodokkwa.

<sup>10</sup> Hənum ha gər kurom kame i Mbəlom hərwi ada mə səkah kurom ha.

### *Kā gum sariya ka ndo bay*

<sup>11</sup> Malamara ga hay, kā tsikum wu nakə lele bay aye ka ndo hay bay. Ndo faya ma tsikiye wu nakə lele bay ka ndo aye ada faya ma giye faya sariya aye na, a tsik wu nakə lele bay ka bazlam mapala eye ada faya ma giye faya

\* 4:6 Dzeke hay 3.34.

sariya dərma. Azlakwa tadə faya ka giye sariya ka bazlam mapala eye na, faya ka rəhay ha gər, faya ka giye faya sariya dəkdek tsa.

<sup>12</sup> Maa vəl bazlam mapala eye a ndo hay na, Mbəlom nəte ɲgweɲ. Ndo mäge sariya na, neŋgeye nəte ɲgweɲ. Maa sla mətəme tay ha ndo hay na, neŋgeye nəte. Maa sla mədze tay ha na, neŋgeye nəte ɲgweɲ. A nəkar, ka dzala nəkar na, way nakə ka gateye sariya a ndo hay aye.

### *Kā dəsłumay gər a bo bay*

<sup>13</sup> Pumay zləm a wu nakə na tsikiye, nəkurom neheye faya ka gwadumeye: «Bəgom kəgəbay tədə na, nəmaa diye a wuzlah gay, nəmaa ndziye mə dəma məve nəte hərwi məhute suloy haladzay.»

<sup>14</sup> Ane tuk na, nəkurom na, ka sərüm wu nakə ma giye bo tədə aye bay. Məsəfəre kurom na, andza makukulek nakə məndze tsekweɲ ka ɲgateye, tsa na, ma dziye sa aye.

<sup>15</sup> Ka gwadumeye duh na: «Tadə kə yay a gər a Mbəlom na, nəmaa ndziye tə dəre, nəmaa giye wu nakay kəgəbay wu taday.»

<sup>16</sup> Ane tuk na, faya ka ɲgalakumeye, ka ɲgalakumeye tə bazlam kurom neheye faya ka tsikumeye aye. Mäge andza niye lele bay.

<sup>17</sup> Andza niye sərüm ha na, ndoweye a sər mäge ɲgwalak ada kə ge na bay na, kə ge mənese.

## 5

### *Nəkurom ndo i zlele hay, gum metsehe*

<sup>1</sup> Gum metsehe nəkurom ndo i zlele hay, tuwum bo kurom ta magala hərwi dəretsəsh neheye faya ta həbiye kurom aye.

<sup>2</sup> Zlele kurom hay ta ze, petekəd kurom hay bəbay mətul hay ta nda.

<sup>3</sup> Gura kurom hay ta suloy kurom na, reŋgez kə nas tay ha, reŋgez ma makumeye ha mənese hərwi nəkurom həzay eye. Bo kurom ma ta nasiye dərma, andza ta fəkiye ta ako. Ka hayumay gər a zlele a həlay nakay anə məndzibəra mazlambar ma ndəviye aye.

<sup>4</sup> Ka vumatay gər a ndo neheye tə ge məsler ma guvah kurom aye, ka vəlumatay wu i merəbe tay bay. Tsənum kəkay nakə faya ta tuweye naha bo a Mbəlom hərwi ada mə dzəna tay ha aye. Ndowne neheye tə gakum məsler aye na faya ta tuwiye ada Bəy Maduweɲ Mbəlom Gədan eye faya ma tsəniye.

<sup>5</sup> Ka ndayum bəra tə zlele kurom ka məndzibəra, ka pumay bəzay na, wu neheye tə yakum a gər aye. Ka ndawum wu mənday haladzay, ka gəlawum tetəp tetəp andza sla nakə ta kədiye.

<sup>6</sup> Ka gasum tay ha ndo neheye ta gakum wuray bay aye a sariya, ka kədum tay ha. Nəteye na, ta ge fakuma gədan bay.

### *Zlum ɲgatay ada duwulum me*

<sup>7</sup> Malamar ga hay, zlum ɲgatay hus a həlay nakə Bəy Maduweɲ ma maweye fakwaya aye. Zəbum ka ndo məfəte hay təday. Ndo məfəte na, ma həbiye wu i guvah ɲgay hay ta məzle ɲgatay. Ma həbiye na, ka madazlay i makurre i yam məpe hus ka maduk i duk i yam nakə tsiy ma piye sa bay aye.

<sup>8</sup> Nəkurom dərma, zlum ɲgatay. Ndzum bəɲbəɲ hərwi pat i məmaw i Bəy Maduweɲ kway mazlambar faya ma ndisleweye.

<sup>9</sup> Malamar ga hay, kə gunguzum wuray a bo bay hərwi ada Mbəlom mə gəs kurom a sariya bay. Tsənum, ndo nakə ma giye sariya aye mazlambar faya ma ndisleweye, neŋgeye malətsa eye ka həlay maged.

<sup>10</sup> Malamar ga hay, dzalum ka ndo mæde ha bazlam i Mbəlom neheye ahəl niye tə tsik me ta mæzele i Mbəlom aye. Ta sa dəretsətseh ada ta zla ŋgatay. Nəkurom dərmak, zlum ŋgatay andza nəteye.

<sup>11</sup> Zəbum, ndo neheye Mbəlom a pa fataya ŋgama hərwi nakə tə səmay naha a dəretsətseh aye. Ka tsənum labara i Zob nakə a səmay naha a wu hay ahəl nakə dəretsətseh a ndzay a gər aye.\* Ma dəba eye na, ka sərūm ha wu nakə Mbəlom a vəlay aye.† Ta dedək Mbəlom na, a sakay naha a ndo hay, ma gateye ŋgwalak.

<sup>12</sup> Malamar ga hay, bazlam bagwar eye anan; Mə wu hay tebiye na, kə mbaɖum bay. Kə mbaɖum ta magərmbəlom bay, kə mbaɖum ta dala bay, kə mbaɖum tə wu mekeleŋ eye bay. Lele na, ayaw kurom mā ndza ayaw. A'ay kurom mā ndza a'ay. Tsikum andza niye hərwi ada Mbəlom mā gəs kurom a sariya bay.

<sup>13</sup> Taɖə ndo andaya mə walaŋ kurom faya ma siye dəretsətseh na, mā dūwulay me a Mbəlom. Taɖə ndo andaya mə walaŋ kurom dərev ŋgay faya ma ŋgwasiye na, mā gay naha dəmes a Mbəlom, mā zambaɖay.

<sup>14</sup> Taɖə ndo andaya dəvats eye mə walaŋ kurom na, mā zalatay a madugula i ndo məpe mədzal gər ka Yesu hay hərwi ada tā faɖa faya mal ta mæzele i Bəy Maduwerŋ Yesu ada tā dūwulay me a Mbəlom hərwi ŋgay.

<sup>15</sup> Taɖə ka dūwulay me a Mbəlom ada kə dzala ha Mbəlom kə tsəne maɖuwule me ŋgay na, ma dzəniye na. Bəy Maduwerŋ ma mbəliye ha. Taɖə kə ge mezeleme na, Mbəlom ma pəsay ha dərmak.

<sup>16</sup> Hərwi wu nakay, neŋ faya na gwaɖumeye, ɖum ha a bo mezeleme kurom hay mə walaŋ kurom nəte nəte, ada dūwulumay me a Mbəlom hərwi ndo siye hay dərmak hərwi ada Mbəlom mā təma kurom ha. Maɖuwule me i ndo nakə tsəɖanŋa kame i Mbəlom aye na, gəɖan eye haladzay.

<sup>17</sup> Dzalum ka Eliya nakə ahəl niye aye. Neŋgeye na, ndo andza nəkway. Ka dūwulay me a Mbəlom tə dərev ŋgay peteh hərwi ada yam mā pa bay.‡ Yam kə pa ka dala niye bay məve mahkar ta kiye məkwa.

<sup>18</sup> Ma dəba eye na, a dūwulay me a Mbəlom hərwi ada yam mā pa sa. Mbəlom a paw yam ada wu hay ta ndzohwaw dərmak.§

<sup>19</sup> Malamar ga hay, taɖə ndoweye mə walaŋ kurom kə dze abəra ka tsəved i Mbəlom, tsa na, ndo ki ye kə ma ahaya ka tsəved na,

<sup>20</sup> sərūm ha ndoweye nakə ka dzəna ndo i mezeleme hərwi ada mā gər ha mezeleme aye na, ma təmiye ha ndo i mezeleme niye abəra ma məɖahan. Kwa taɖə mezeleme ŋgay haladzay bəbay na, Mbəlom ma pəsay ha.

\* 5:11 Zob 1.1-2.10. † 5:11 Zob 42.10-17. ‡ 5:17 Zəba mə 1 Bəy hay 17.1. § 5:18 Zəba mə 1 Bəy hay 18.1, 41-46.

## Makurre i derewel nakə Piyer a watsa aye Məfələkwe

Piyer a watsa derewel na, a ndo məpe mədzal gər neheye ma gəma zlam ka dala i Roma ta diye i tsakay ada ta diye i bəzay i mbəlom i Azi nakə tə zalay anəke Turki aye. Nəteye mandza eye mə dəma andza mbəzlew hay hərwi nəteye ndo məpe mədzal gər hay ka Yesu (1.1; 2.11). Ta zəba fataya andza ndo hay bay, tə dəsawa fataya parasay kəriye ada tə gawatay dəretsətseh.

Piyer a watsa hərwi məvəlatay gədanj ka məpe mədzal gər ada ka wu nakə tə pa faya mədzal gər aye, a vələtay gədanj ka məndze andza ndo neheye Mbəlom a pala tay aye.

Piyer a watsa a ndo neheye mede tay andza i bəba tətə tay hay sa bay ada andza i ndo tay hay sa bay (1.13–2.4). A dətay ha a ndo məpe mədzal gər hay ka Yesu (2.4–10). Ta sliye məsəmay naha a wu neheye mawura bo aye (1.3, 13, 21; 3.15).

Mbəlom a lətse ahaya Yesu abəra ma mədahanj. Mədok i ndo məpe mədzal gər hay na, nəngeye (4.12–19). Ma məndze mə walanj i ndo hay na, mawudə bo, məhəne ha gər nəte ta nəte a bo, faya ma lakiye tay ha ndo məkalay kame a ndo hay, gawla hay ada ta hawal i ndo siye hay ka tsəved ɲgwalak eye (5.1–7; 1.22–2.3). Slala i məndze andza nakay na, faya ma dətəye ha a ndo i bəra hay ta sliye faya mətsədə tay a ndo məpe mədzal gər hay ka Yesu bay.

### *Mətsike me*

<sup>1</sup> Maa watsa derewel nakay na, neɲ Piyer, ndo i maslanj i Yesu Kəriste. Na watsakum naha a nəkurom ndo i Mbəlom neheye ka ɲgənum gər kuye kuye, nəkurom anəke mandza eye madurlonj eye hay ka dala i Poɲtus, ka dala i Galat, ka dala i Kapados, ka dala i Azi ada ka dala i Bitini aye.

<sup>2</sup> Kurre ahəl niye 6a Mbəlom a sər wu nakə ma giye hərwi kurom aye. A pala kurom na, mata tərə ndo ɲgay hay ta gədanj i Məsəfərə ɲgay hərwi ada kâ rəhumay ha gər a Yesu Kəriste hərwi ada tã gwatsaka fakuma bambaz ɲgay. Niye na, ka tərume ye tsədanjja kame i Mbəlom.

Mbəlom mâ səkah ha məpe fakuma ɲgama haladzay ada mâ vələkum zay kame kame.

### *Mbəlom ma vələkweye sifa nakə ma ndəviye bay aye*

<sup>3</sup> Zambadəkway a Mbəlom, Bəba i Bəy Maduweɲ kway Yesu Kəriste hərwi ka gakway mə bo. Hərwi niye a vələkway sifa wedəye tə həlay i Yesu Kəriste hərwi nakə Yesu Kəriste a lətsew abəra ma mədahanj aye. Hərwi niye ka sərakwa ha ka lətsakwawəye abəra ma mədahanj dərmak.

<sup>4</sup> Ka sərakwa ha ka hutakweye wu nakə ɲgwalak eye Mbəlom ma vələkweye a nəkway ndo ɲgay hay aye mə mbəlom. Wu niye ma ndziye na, huya. Ma nasiye bay, ma kuliye andza guzer bay.

<sup>5</sup> Nəkurom neheye ka pum mədzal gər kurom ka Mbəlom aye na, Mbəlom faya ma tsəpiye kurom ta gədanj ɲgay hərwi ada ndo hay tebiye tã sər ha parakka, ahəl nakə məndzibəra ma ndəviye na, Mbəlom ma təmiye kurom ha.

<sup>6</sup> Hərwi niye ɲgwasum haladzay. Kwa tadə faya ka suməye dəretsətseh ta tsəved wal wal a həlay tsekweɲ bəbay na, ɲgwasum haladzay.

<sup>7</sup> Kwa gura nakə ma nasiye bəbay aye na, ndo hay tə zlawə, tə pawə na a ako hərwi mədze ha neŋgeye lele daw. Andza niye dərmak məpe mədzal gər kurom nakə ka pum ka Mbəlom aye na, a ze gura ada ta dziye ha dərmak. Mədze niye faya ta dziye kurom ha aye na, hərwi ada tā ŋgatay a mədzal gər kurom nakə ka pum ka Mbəlom aye na, ka dzalum ha tə dərev kurom peteh. Hərwi niye, ahəl nakə Yesu Kəriste ma maweye na, ndo hay ta dəslakumeye ha gər, ta zambadakumeye, ta vəlakumeye məzlaḥ.

<sup>8</sup> Kwa ka ŋgatamay a Yesu Kəriste tə dəre kurom zuk bay bəbay na, ka wudum na tsiy. Kwa ka ŋgatamay anəke bay bəbay na, ka dzalum ha faya. Hərwi niye dərev kurom maraha eye ta məŋgwese haladzay, ndo ma sliye faya matakəre bay tebiye.

<sup>9</sup> Ka hutum məŋgwese niye na, hərwi Mbəlom ma təmiye kurom ha. Nakay na, magogoy i mədzal gər kurom nakə ka pum ka Yesu aye.

<sup>10</sup> Ahəl niye na, ndo məde ha bazlam i Mbəlom ta rəzlay a gər a mapəle ma kəkay nakə Mbəlom ma təmiye tay ha ndo hay aye. Wu niye lele eye Mbəlom a gwad ma vəlakumeye na, ta datay ha a ndo hay kurre.

<sup>11</sup> Məsəfəre i Kəriste nakə mə dərev tay aye kə datay ha kurre, a gwadatay: Kəriste ma siye dəretsətseh, ma dəba eye na, ma hutiyə mədəslay ha gər nakə ndo hay ta dəslay gər aye. Ndo i məsləŋ i Mbəlom neheye ta pəla hərwi ada tā sər ha wu neheye ma giye bo na, ahəl waray ada ma təriye na, ma kəkay.

<sup>12</sup> Mbəlom a datay ha ka bo abəra, mata ŋgatay a wu neheye na, nəteye bay. Ane tuk na, wu niye hay na, i kurom. Anəke ndo neheye faya ta dəkumeye ha Labara Ŋgwalak eye na, ta tsikakum wu neheye. Tə tsikakum na, ta gədan i Məsəfəre Tsədəŋŋa eye nakə Mbəlom a sləraw mə mbəlom aye. Kwa gawla i Mbəlom hay bəbay a satay məsəre wu neheye hay dərmak.

### *Ndo hay ta ge wu nakə a yay a gər a Mbəlom aye*

<sup>13</sup> Hərwi niye, ləvum ha bo ta mədzal gər kurom na, ka məge məsler i Mbəlom. Gumay metsəhe a bo kurom lele, pum mədzal gər kurom ka ŋgwalak i wu nakə Mbəlom ma vəlakumeye pat nakə Yesu Kəriste ma maweye aye.

<sup>14</sup> Gəsumay me a Mbəlom huya andza wawa neheye tə gəsawatay me a bəba tay hay aye. Ahəl niye, ka sərūm bazlam i Mbəlom zuk bay na, ka pumay bəzay a wu nakə lele bay aye. Anəke kâ mum a dəma sa bay.

<sup>15</sup> Mbəlom nakə a zalakum kâ tərūm ndo ŋgay hay aye na, neŋgeye tsədəŋŋa. Nəkurom dərmak tərūm tsədəŋŋa mə wu nakə faya ka gumeye tebiye.

<sup>16</sup> Hərwi tə watsa mə Dərewel i Mbəlom, a gwad: «Tərūm tsədəŋŋa, hərwi neŋ tsədəŋŋa.\*»

<sup>17</sup> Ahəl nakə faya ka dūwulumay me a Mbəlom aye na, ka zalawumay Bəba. Kə ge andza niye na, rəhumay ha gər. Mede kurom mā ge lele a həlay nakə nəkurom ka məndzibəra aye hərwi neŋgeye a ge sariya a ndo na, ka wu ŋgay nakə a ge aye.

<sup>18</sup> Ka sərūm ha Yesu ka mbəda kurom ahaya tsəlok abəra mə kule i bəba kurom neheye a ge ŋgama bay ta tətikakum aye. A mbəda kurom ahaya abəra mə kule niye na, tə wu nakə andza suloy ma nasiye aye bay.

<sup>19</sup> Ane tuk na, a təma kurom ahaya na, tə bambaz i Yesu Kəriste nakə a ze wu hay tebiye aye. Neŋgeye a ndzəkət bo na, andza vo'ar i təbən wawa eye nakə tə kəday a Mbəlom mənese kwa tsekwenj andaya faya bay tebiye.

<sup>20</sup> Kurre ahəl niye Mbəlom kə ge məndzibəra zuk bay aye na, ḡa kə zla na. Ka məndəve i məndzibəra nakə anəke ma ndəviye aye na, Mbəlom a dəkum ha parakka, hərwi ada mā təma kurom ha.

\* 1:16 Levitik 19.2.



<sup>21</sup> Ka dzalum ha ka Mbəlom na, hərwi ɲgay nakə a təma ahaya abəra ma mədahaŋ ada a vəlay məzlaḅ aye. Andza niye, ka pum mədzal gər kurom na, ka Mbəlom ada ka sərüm ha neŋgeye ma təmiye kurom ha.

### *Wudum bo*

<sup>22</sup> Ka tərüm tsədaŋŋa na, hərwi nakə ka rəhumay ha gər a wu neheye dedək Mbəlom a da ha aye ada ka wudum siye i ndo neheye faya ta pay bəzay a Mbəlom aye. Faya na gwadakumeye: Wudum bo huya tə dərev kurom tsədaŋŋa peteh.

<sup>23</sup> Sərüm ha, ka wum bo wedeye na, ta gədan i bazlam i Mbəlom nakə ma vəliye sifa a ndo hay ada ma nasiye daḁa bay aye. Ka tərüm Wawa i Mbəlom nakə daḁa neŋgeye ma mətiye bay aye. Neŋgeye na, andza nəkway neheye ka mətakweye aye bay.

<sup>24</sup> Tə watsa mə Derewel i Mbəlom na, a gwad:  
«Ndo hay tebiye ta ndzəkit bo na, andza guzer.

Məle tay a ndzəkit bo andza məvurze.

Guzer kə kula na, məvurze ɲgay eye a kalawa.

<sup>25</sup> Ane tuk na, bazlam i Mbəlom na, ma ndziye ka tor eye.†»

Bazlam i Mbəlom niye na, Labara ɲgwalak eye nakə tə dəkum ha aye.

## 2

### *Mbəlom a pala kurom na, hərwi ada kə tərüm i ɲgay*

<sup>1</sup> Hərwi niye zlum na mənese abəra mə dərev kurom, kə vumatay gər a ndo hay bay, dərneḥ m̄a ge m̄a bazlam kurom sulo bay, kə gum dəre ka wu i ndo hay bay, kə ɲgələmay bəzay a ndo bay.

<sup>2</sup> Tərüm na, andza wawa ndəriz. Nəteye na, ta wuda məse wah pat pat. Andza niye, nəkurom dərmak wudum bazlam i Mbəlom pat pat hərwi ada kə gələm ada Mbəlom m̄a təma kurom ha tebiye.

<sup>3</sup> Andza niye dedək, hərwi tə watsa, tə gwad: «Ka ndzakum Bəy Maduweŋ Mbəlom na, neŋgeye lele. \*»

### *Ndo məpe mədzal gər hay na, nəteye i Mbəlom*

<sup>4</sup> Həndzədum ka təv i Bəy Maduweŋ Yesu Kəriste. Neŋgeye na, kwar nakə ma vəliye sifa aye. Ndo hay tə kal ha, tə gwad mə gər tay neŋgeye wu nakə ma giye ɲgama bay aye. Duh neŋgeye na, kwar lele eye nakə Mbəlom a zla, a ze kwar hay tebiye.

<sup>5</sup> Nəkurom dərmak, tərüm andza kwar neheye ta sifa aye hərwi ada Mbəlom m̄a həl kurom, m̄a dəzl ha gay nakə Məsəfəre ma ndziye mə dəma aye. Ma təriye kurom ha ndo neheye tə vəlaway wu a Mbəlom aye hərwi ada kə gumay məsler tə dərev kurom peteh. A yay a gər andza niye hərwi Yesu Kəriste.

<sup>6</sup> Hərwi niye tə watsa mə Derewel i Mbəlom, Mbəlom a gwad:  
«Tsənum! Na zla ɲgwalak i kwar nakə ta dəzliye ha gay aye,

na piye na a gəma i Siyoŋ.

Na dəzliye faya gay ga.

Ndo nakə kə dzala ha aye na,

wuray ma dzəmiye na daḁa sa bay.†»

<sup>7</sup> Nəkurom neheye ka dzalum ha aye, i kurom na, wu ɲgwalak eye. Ane tuk na, hərwi ndo neheye ta dzala ha bay aye na, andza niye təbey. Hərwi tə watsa mə Derewel i Mbəlom na, tə gwad:

«Kwar nakə ndo madəzle gay hay tə zla, tə kal ha aye na, azlakwa ɲgwalak i kwar nakə ta dəzliye ha aye duh.»

8 Tə watsa mə Derewel i Mbəlom sa na, tə gwad:

«Kwar niye na, ndo hay ta ndəfiye faya sik.

Hotokom nakə ndo ta dəfiye hərwi ɲgay aye.†»

Ta ndəfiye faya sik na, hərwi nakə ta kərah bazlam i Mbəlom aye. A ge bo andza nakay na, hərwi ka madazlay na, a say a Mbəlom andza niye.

9 Nəkurom na, slala nakə Mbəlom a zla aye. Nəkurom ka tərūm ndo neheye tə vəlaway wu a Mbəlom neheye ta geye məsler a Bəy bagwar aye, nəkurom na, slala nakə Mbəlom a pa na hərwi ɲgay aye. Nəkurom na, slala i Mbəlom i ɲgay eye ɲgway. A zalakum, a həla kurom ahaya abəra ma ləvonj, a pa kurom a dzaydzay ɲgay nakə a ze kwa wu hay tebiye aye hərwi ada kə dūm ha wu neheye bagwar eye a ge aye.

10 Ahəl niye na, nəkurom ndo i Mbəlom hay bay. Ane tuk na, anəke nəkurom ka tərūm ndo ɲgay hay. Ahəl niye na, ka gumay mə bo a Mbəlom bay. Ane tuk na, anəke na, ka gumay mə bo, ka təmum na tuk.

### *Tərūm ndo məgay məsler a Mbəlom*

11 Dzam ga neheye na wudə kurom haladzay aye, mə mətsakum gər bay, nəkurom ka məndzibəra na, mbəlok hay, gay kurom andaya kanan bay. Hərwi niye nej faya na gakumeye amboh, wu neheye lele bay a say a bor i bo kurom aye na, kə gum sa bay. Hərwi slala i wu neheye aye na, ta nasiye ha məsəfəre kurom.

12 Anəke nəkurom na, mandza eye mə walaɲ i ndo neheye tə sər Mbəlom bay aye. Gumay metsəhe a məndze kurom lele huya hərwi ada kwa tadə ta tsik fakuma wu nakə lele bay aye na, ta ɲgateye a wu neheye lele faya ka gumeye pat pat aye ada ta zambadəye a Mbəlom pat nakə ma deyeweye ka təv tay aye.

13 Nəkurom neheye ka wudūm Bəy Maduweɲ kway Yesu Kəriste aye na, rəhumay ha gər a ndo neheye faya ta ləviye məndzibəra aye. Rəhumay ha gər a bəy bagwar eye nakə a ləva ndo hay tebiye aye.

14 Rəhumatay ha gər a bəy i dala neheye bəy bagwar eye a pa tay ha aye. A pa tay ha na, hərwi ada tə gatay dərətətəseh a ndo neheye faya ta giye wu nakə lele bay aye ada ta zambadəteye a ndo neheye faya ta giye ɲgwalak aye.

15 A say a Mbəlom na, gum wu nakə ɲgwalak aye hərwi ada ndo i matərahəɲ hay, nəteye neheye tə sər wuray bay faya ta ɲgəlakumeye bəzay aye, tə dərəzl ka bazlam.

16 Tərūm na, andza ndo neheye nəteye tə ləva gər tay aye. Ane tuk na, ka dzalum anəke nəkurom ka ləvum gər kurom, ka slumeye faya məge mənese na, andza niye bay. Ndzum məndze i ndo məgay məsler a Mbəlom hay.

17 Rəhumatay ha gər a ndo hay tebiye, wudūm siye i malamar kurom neheye faya ta pay bəzay a Yesu aye. Dəslumay ha gər a Mbəlom, rəhumay ha gər a bəy bagwar eye dərmaɲ.

### *Pumay bəzay a mede i Yesu Kəriste*

18 Nej faya na tsikakumeye a nəkurom neheye faya ka gumeye məsler i ndo siye hay aye, rəhumatay ha gər a ndo i gay kurom hay. Rəhumatay ha gər tə dərəv kurom peteh. Kə rəhumatay ha gər na, a ndo neheye faya ta

† 2:8 Zəba mə Dəmes hay 118.22; Ezay 8.14. Ndo hay ta dəfiye faya hərwi ta kərah mədzal ha ka bazlam i Mbəlom, ada ma ta ndzatay a gər nakay.

gakumeye ɲɣwalak aye dekdɛk tsa bay. Rəhumatay ha gər kwa a ndo neheye faya ta gakumeye wu nakə lele bay aye.

<sup>19</sup> Hərwi niye taɗa ka səmumay naha a dəretsətseh nakə faya ta gakumeye kəriye hərwi ka pum mədzal gər kurom ka Mbəlom aye na, lele. Kwa taɗa ka gum wuray bay na, niye na, wu nakə a yay a gər a Mbəlom aye.

<sup>20</sup> Taɗa ka gum mənese, ada tə ndaɓa kurom faya na, kwa taɗa ka səmumay naha a dəretsətseh na, mata zambadakum na, way? Ane tuk na, taɗa tə gakum dəretsətseh hərwi ɲɣwalak nakə ka gum aye ada ka səmumay naha na, ka gum niye na wu nakə lele a yay a gər a Mbəlom aye.

<sup>21</sup> Mbəlom a zalakum hərwi məge andza nakay. Hərwi bo i Yesu Kəriste eye tə gər ɲgay kə sa dəretsətseh hərwi kurom. Neɲgeye a ɗakum ha tsəved hərwi ada kə pumay bəzay andza i ɲgay.

<sup>22</sup> Neɲgeye na, kə ge mənese ɗaɗa bay tebiye, kə vay gər a ndəray ɗaɗa bay.

<sup>23</sup> Ndo hay ta tsaday, ane tuk na, neɲgeye kə tsadatay a ɗama bay. Tə gay dəretsətseh na, kə gwad ma gateye a ɗama sewed a ndo hay bay. Duh a vəlay ha bo ɲgay a həlay a Mbəlom nakə ma ɲganiye ha sariya ta dedek aye.

<sup>24</sup> Yesu Kəriste, bo ɲgay eye kə zla na mezeleme kway ka gər ɲgay, ta dar na ka mayako mazləmbada eye hərwi ada mezeleme mâ ləva kway sa bay andza nakə a sla faya mələvay gər a mədahan hay sa bay aye. A ge andza niye na, ada kə ndzakwa ma mənɗze nakə a yay a gər a Mbəlom. Mbəlak neheye tə gay aye na, kə təma kurom ha.

<sup>25</sup> Ahəl niye nəkurom ka tərūm andza təɓaɲ neheye faya ta dzadziye aye. Ane tuk na, anəke na, ka mumaw, faya ka pumay bəzay a ndo nakə ma tsəkuriye kurom ada ma tsəpiye məsəfəre kurom aye.

### 3

#### *Məndze i hasləka hay ta ɲgwas tay hay*

<sup>1</sup> Andza niye, nəkurom ɲgwas hay dərmak kwa way mâ rəhay ha gər a zal ɲgay. Taɗa ka gum andza niye na, zal kurom neheye ta dzala ha ka bazlam i Mbəlom bay aye na, ta mbədiye ha ɗərev tay. Kwa ka tsikumatay bazlam i Mbəlom bay bəbay na, ta dzaliye ha ka Mbəlom hərwi mede i ɲgwas tay nakə lele aye.

<sup>2</sup> Zal kurom hay ta zəbiye ka mede kurom na, lele tsəɗaɲɲa mənese andaya bay ada faya ka rəhumatay ha gər lele.

<sup>3</sup> Kə ndədikum gər ka malembede bo tsa bay: Andza matərdə gər, kəgəbay malembede bo ta zele, ta dasay hay məpe a həlay, kəgəbay məpe ka bo peteked neheye tə le haladzay aye.

<sup>4</sup> Duh məle kurom mâ zəbaw na, abəra mə ɗərev kurom hay. Zlum ɲgatay ada rəhum ha gər kurom, hərwi slala i məle niye na, ma nasiye ɗaɗa bay, a yay a gər a Mbəlom haladzay.

<sup>5</sup> Ahəl niye ɲgwas məpe mədzal gər hay ka Mbəlom ta lambad bo tay na, andza niye. Nəteye na, ta rəhawtatay ha gər a zal tay hay.

<sup>6</sup> Sara a gawa na, andza niye, a rəhaway ha gər a zal ɲgay Abraham. A zalaway «bəy maduweɲ ga.» Taɗa faya ka gumeye wu lele, ka dzadzərumeye a wuray kwa tsekweɲ bay na, anəke nəkurom ka tərūm dem ɲgay hay.

<sup>7</sup> Nəkurom hasləka hay dərmak ndzum ta ɲgwas kurom ta mədzele fataya. Sərūm ha, nəteye na, bəle eye hay. Rəhumatay ha gər hərwi sifa nakə Mbəlom ma vəliye kəriye na, ma vəliye a nəkurom ta nəteye dziye. Ka gum andza niye na, ahəl nakə ka dūwulumay naha me a Mbəlom aye na, ma tsənəkumeye na.

*Ləvum bo hərwi dəretsətseh*

8 Mandäve i bazlam ga anañ na ndəvakumeye naha: Nəkurom tebiye ndzum na, mədzal gər kurom nəte, sakumay naha a bo mə walañ kurom nəte nəte, wufum bo mə walañ kurom nəte nəte hərwi nəkurom ta malamar hay. Gumatay ngwalak a ndo mekelen eye dərma, rəhumatay ha gər dərma.

9 Kā mum ha sewed tə sewed bay. Tadə ndoweye kə tsadakum na, kə tsadumay a dəma bay. Duh gwadumay: «Mbəlom mâ pa fakaya ngama.» Hərwi Mbəlom a zalakum na, ka mäge andza niye hərwi ada kə hutum ngama ngay.

10 Tə watsa mə Derewel i Mbəlom, tə gwad:

«Tadə ndoweye a say mändze nakə lele aye

ada a say mändze ma mənğwese na,

kutoñ mâ gər ha mətsike wu nakə lele bay aye

ada mâ gər ha mədəse parasay ka ndo.

11 Mâ gər ha mäge mənese tebiye, mâ ge ngwalak duh,

mâ pəla tsəved nakə ma vəliye mändze zay mə walañ i ndo mekelen eye hay aye.

12 Hərwi Mbəlom faya ma tsəpiye ndo neheye faya ta giye ngwalak aye.

Faya ma tsənatay na mađuwule me tay.

Ndo neheye faya ta giye mənese aye na, a say mənğatatay bay.\* »

13 Tadə nəkurom faya ka pəlumeye mäge ngwalak tə dərev kurom peteh na, ndoweye nakə ma gakumeye sewed aye na, way?

14 Kwa tadə faya ta gakumeye dəretsətseh hərwi wu neheye ngwalak aye faya ka gumeye na, Mbəlom ma piye fakuma ngama hərwi niye. Kā dzədzarumatay a ndo neheye faya ta gakumeye sewed aye bay, dərev mâ ye fakuma abəra bay.

15 Duh pum mədzal gər kurom na, ka Kəriste nəte ngwen, nənğeye Bəy Maduwen kurom. Ndzum nəkurom maləva bo eye huya məmbədətay faya a ndo neheye ta tsətsah fakuma, ka pum mədzal gər kurom ka Yesu Kəriste hərwi mey aye.

16 Dumatay ha na, ta ləfedədə eye, rəhumatay ha gər dərma. Dərev kurom mâ ndza na, tsədanña huya, hərwi ada, kwa tadə ndo hay faya ta tsikiye wu nakə lele bay aye fakuma, horoy ma gateye hərwi faya ta tsadakumeye ka mede kurom ka tsəved i Kəriste ngwalak eye.

17 Tadə a yay a gər a Mbəlom andza niye na, sum dəretsətseh hərwi wu neheye lele faya ka gumeye duh tə bəmalə nakə ka sumeye dəretsətseh hərwi wu neheye ka gumeye lele bay aye.

18 Yesu Kəriste, bo ngay eye tə gər kə mət sik nəte hərwi mezeleme kurom hay. Nənğeye nakə mənese andaya faya bay aye, kə mət hərwi ndo neheye faya ta giye mezeleme aye hərwi ada mâ həl kway ka təv i Mbəlom. Ta kəd na, ane tuk na, Məsəfəre Tsədanña eye kə mbəl ha.

19 Ta gədan i Məsəfəre Tsədanña eye niye na, a ye a dətay ha bazlam i Mbəlom a məsəfəre neheye nəteye ma danğay aye.

20 Məsəfəre niye hay na, neheye ahəl niye ta təma bazlam i Mbəlom bay aye. Mbəlom ka həba tay ha haladzay, kə gəs dərev ahəl nakə Nuhu a lambad kwalalañ i yam aye. Ndo neheye ti ye a dəma aye na, nəteye hala bay. Mbəlom a təma tay ha abəra ma yam na, nəteye tsamahkar tsa.

21 Yam niye a dā ha na, madzəhuḅe ndo hay nakə ta dzəhuḅiye tay ha a yam aye. Mata təme kurom ha na, madzəhuḅe niye, ma təmiye kurom ha abəra mə mezeleme. Ta dzəhuḅiye kurom ha na, andza nakə ka barawum ka bo abəra ndəluḅ aye bay. Ka tsətsahakweye ka Mbəlom na, mâ barakway na mezeleme

\* 3:12 Dəmes hay 34.13-17.

abəra mə dərev. Madzəhuβe nakə ta dzəhuβiye kway a yam ma təmiye kway ha aye na, hərwi Yesu Kəriste nakə a lətsew abəra ma mədahaŋ aye.

<sup>22</sup> Yesu Kəriste kə tsal ka təv i Mbəlom, neŋgeye mandza eye tə həlay i mənday i Mbəlom. Neŋgeye bəy ka gər i gawla i Mbəlom hay ada ka gər i wu neheye ta gədaŋ eye tebiye.

## 4

### *Mbəlom mâ təra bəy kurom*

<sup>1</sup> Ka sərakwa ha Yesu Kəriste kə sa dəretsətseh haladzay. Hərwi niye nəkurom dərmak ndzum maləva bo eye məse dəretsətseh, hərwi ndo nakə kə sa dəretsətseh haladzay aye na, ma giye mezeleme sa bay.

<sup>2</sup> Madazlay anəke a həlay nakay nəkurom mandza eye ka məndzibəra na, mede kurom mâ yay a gər a Mbəlom. Bor i bo mâ ge bəy ka gər kurom bay.

<sup>3</sup> Ka ndzum ahəl niye haladzay ka mäge wu neheye ndo neheye tə sər Mbəlom bay, ta wudə mäge aye. Anəke na, da kâ gum sa bay. Ahəl niye na, ka gawumay metsehe a bo kurom bay, nəkurom sələk eye hay, ka kwayum, ka gawum magurlom haladzay mənde ha wu mənday, ka sawum guzum, ka dəsławumay gər a kule nakə ma nasiye ha bazlam i Mbəlom mapala eye.

<sup>4</sup> Anəke na, ndo neheye tə sər Mbəlom bay aye tə gawa wu neheye na, kâ ndzawum ta nəteye sa bay. Tə ŋgatakum andza niye na, a gatay hərβaβəkka, tə tsadəkum.

<sup>5</sup> Ane tuk na, pat mekeleŋ Mbəlom ma lətsiye tay ha kame ŋgay hərwi ada tâ da ha wu nakə tə ge aye. Hərwi neŋgeye maləva bo eye məgatay sariya a ndo neheye nəteye tə dəre aye ada a ndo neheye ta mət aye dərmak.

<sup>6</sup> Hərwi ndo neheye tə mət, ahəl niye nəteye ka məndzibəra aye na, Mbəlom kə gatay sariya andza i ndo neheye tebiye a gatay aye. Ahəl nakə tə mət aye na, Kəriste kə ye kə datay ha Labara Ŋgwalak eye hərwi ada tâ ndza andza Mbəlom.

### *Məndze i ndo məpe mədzal gər hay mə walaŋ tay*

<sup>7</sup> A zaw hala sa bay məndzibəra ma ndəviye. Hərwi niye ndzum tsezle- zleŋŋe, gumay metsehe a bo kurom hərwi ada kâ slum faya mađuwulay me a Mbəlom.

<sup>8</sup> Wu nakə bagwar eye a ze wu hay tebiye aye na, mawudə bo. Wudum bo nəte nəte mə walaŋ kurom huya tə dərev kurom peteh, hərwi kwa tadə «mezeleme andaya mə walaŋ kurom haladzay bəbay na, ka pəsumeye ha a bo. »

<sup>9</sup> Ndo hay ta ye naha a gay kurom na, təmum tay ha ta məŋgwese lele, kâ gum fataya magum bay.

<sup>10</sup> Mbəlom kə gakum ŋgwalak tə wu hay wal wal. Kə vəlay kwa a way gədaŋ ka mäge wu hay wal wal, ka madzəne ha siye i ndo hay. Kwa way mâ ge ta tsəved eye lele.

<sup>11</sup> Tadə Mbəlom a vəlay a ndoweye gədaŋ i mətsike bazlam na, mâ tsik bazlam nakə a yaw abəra ka təv i Mbəlom aye. Tadə Mbəlom a vəlay a ndoweye gədaŋ i madzəne ndo hay na, mâ dzana ndo hay ta gədaŋ i Mbəlom. Gum andza niye hərwi ada ndo hay tâ zambaday a Mbəlom ka gər i wu hay tebiye hərwi Yesu Kəriste. Neŋgeye na, məzlaβ eye ada gədaŋ eye ka tor eye. Amen!

### *Məse dəretsətseh hərwi məpe mədzal gər ka Yesu*

\* 4:8 Zəba ma Dzeke hay 10.12; Yakuba 5.20.

<sup>12</sup> Dzam ga neheye na wudá kurom haladzay aye, dǎretsǎtseh neheye faya ka sumeye na, má gakum wadəŋ wadəŋ bay. Wu neheye tǎ ndzakum a gǎr hǎrwi mǎde ha ka pum mǎdzal gǎr kurom ka Mbǎlom ta dedek. Ka dzalum andza a yaw fakuma wedeye bay.

<sup>13</sup> A hǎlay nakǎ nǎkurom mǎ dǎretsǎtseh aye na, ŋgwasum hǎrwi ka tǎmum dǎretsǎtseh i Kǎriste. Ngwasum andza niye, hǎrwi ada pat nakǎ ka ŋgatumay a mǎzlaḅ ŋgay tǎ dǎre kurom aye na, ka hutumeye mǎŋgwese bagwar eye a ze wu hay tebiye.

<sup>14</sup> Tadǎ ndo hay faya ta tsadakumeye hǎrwi nǎkurom ndo i Kǎriste hay na, Mbǎlom ma piye fakuma ŋgama. Tadǎ faya ka sumeye dǎretsǎtseh andza niye na, Mǎsǎfǎre i Mbǎlom nakǎ gǎdanǎ eye a ze wu hay tebiye aye ma ndziye tǎ nǎkurom.

<sup>15</sup> Tadǎ ndoweye mǎ walaŋ kurom faya ma siye dǎretsǎtseh hǎrwi nakǎ a ge mǎnese, agǎna a kǎd ndo, agǎna a kǎla, agǎna a pa tay ha ka bo ndo hay na, slala i dǎretsǎtseh niye na, lele bay. Mǎ ge andaya andza niye mǎ walaŋ kurom bay.

<sup>16</sup> Ane tuk na, tadǎ faya ma siye dǎretsǎtseh hǎrwi nakǎ neŋgeye ndo mǎpay bǎzay a Yesu Kǎriste aye na, horoy má gay bay. Má gay naha sisǎe a Mbǎlom dǎh hǎrwi ndo hay tǎ zalay ta mǎzele i Kǎriste aye.

<sup>17</sup> Hǎlay nakǎ Mbǎlom ma ŋgǎniye ha sariya a ndo hay aye na, kǎ husaw. Ma lahiye mǎgatay sariya na, a ndo ŋgay hay tǎday. Kǎ ge ma lahiye mǎgakway sariya a nǎkway ndo ŋgay hay tǎday na, ada i ndo neheye ta dzala ha ka Labara Ngwalak eye bay aye na, kǎkay?

<sup>18</sup> Tǎ watsa mǎ Derewel i Mbǎlom, tǎ gwad:  
«Tadǎ ndo mǎpe mǎdzal gǎr ta tǎmiye tǎ mawura bo eye na,  
ada mata ndzatay a gǎr a ndo i mezeleme hay na, mey?†»

<sup>19</sup> Kǎ ge andza niye na, ndo neheye faya ta siye dǎretsǎtseh hǎrwi a yay a gǎr a Mbǎlom aye na, tǎ ge ŋgwalak huya. Ta gǎray ha mǎsǎfǎre tay tebiye a hǎlay i Mbǎlom nakǎ a ge tay ha aye ada ma giye wu nakǎ a tsik aye huya.

## 5

### *Mǎndze i ndo mǎpe mǎdzal gǎr hay ka Yesu*

<sup>1</sup> Anǎke na, neŋ na tsikatay naha a madugula neheye mǎ walaŋ kurom aye. Neŋ dǎrmak na, madugula eye andza nǎkurom. Na ŋgatay a dǎretsǎtseh i Yesu Kǎriste. Neŋ tǎ nǎkurom ka hutakweye mede a tǎv i mǎzlaḅ i Kǎriste nakǎ Mbǎlom ma bǎziye ha aye. Hǎrwi niye faya na gakumeye amboh:

<sup>2</sup> Gumatay gǎr a ndo i Mbǎlom neheye a pakum a hǎlay aye lele. Gumatay gǎr lele andza nakǎ ndo mǎtsǎkure gǎnaw ma gatay gǎr a tǎbaŋ ŋgay hay aye. Gumatay gǎr tǎ dǎrev kurom peteh andza nakǎ a say a Mbǎlom aye bǎna andza nakǎ ndo hay tǎ gakum faya kutoŋ aye bay. Vǎlum ha dǎrev kurom ka mǎge mǎsler nakay tebiye, kǎ gum hǎrwi nakǎ faya ta vǎlakumeye faya suloy aye bay.

<sup>3</sup> Kǎ lǎvum tay ha ndo neheye Mbǎlom a pa tay ha a hǎlay kurom aye ta gǎdanǎ bay. Dǎh na, pumay bǎzay a mede nakǎ lele aye ada má dǎtay ha tsǎved nakǎ ta pakumeye bǎzay lele aye.

<sup>4</sup> Tadǎ ka gum andza niye na, pat nakǎ Yesu Kǎriste ndo mǎgakway gǎr tebiye, ma deyeweye na, ma vǎlakumeye magogoy nakǎ ma ndziye ka tor eye, a ze wu hay tebiye aye.

### *Mǎtsike me a zlǎm a ndo mǎpe mǎdzal gǎr hay tebiye*

† 4:18 Dzeke hay 11.31.

<sup>5</sup> Nəkurom gawla hay, rəhumatay ha gər a madugula hay. Neŋ faya na tsikakumeye a nəkurom tebiye, rəhumay ha gər a bo nəte nəte mə walaŋ kurom. Dzənum bo nəte nəte mə walaŋ kurom hərwi tə watsa mə Dərewel i Mbəlom, tə gwad:

«Mbəlom ma kərahiye ndo neheye ta dəslay ha gər a bo aye,

ane tuk na, ma vəliye ŋgama a ndo neheye tə həna ha gər aye.\* »

<sup>6</sup> Hərwi niye rəhum ha gər kurom kame i Mbəlom hərwi neŋgeye gədaŋ eye ka gər i wu hay tebiye. Ka gum andza niye na, ma səkahiye kurom ha a həlay nakə a say aye.

<sup>7</sup> Gərumay ha mədzal gər kurom tebiye a həlay ŋgay hərwi neŋgeye ma gakumeye gər lele.

<sup>8</sup> Tsəpum bo kurom, ndzum tsezlezleŋŋe lele. Hərwi Fakalaw ndo mənə dəre kurom faya ma həhaliye andza zil nakə ma ŋgərəziye, faya ma pəliye wu mənday aye. <sup>9</sup> Kā dzədzarumay bay, ndzum bəŋbəŋ ma məpe mədzal gər nakə ka pum ka Mbəlom aye. Sərum ha kwa ka waray ka məndzibəra, malamar kurom hay faya ta siye slala i dəretsətseh nakay.

<sup>10</sup> Dədək nəkurom faya ka sumeye dəretsətseh anəke. Məndze tsekweŋ ma dəba eye na, Mbəlom nakə faya ma gəkweye ŋgwalak huya aye ma lambadiye kurom ha, ma vəlakumeye gədaŋ. Ma vəlakumeye gədaŋ ka məndze bəŋbəŋ ka gər i wu hay tebiye. A zalakum na, hərwi ada kā yum mata ndze tə Kəriste ma mədəslay gər ŋgay nakə ta dəslay ka tor eye.

<sup>11</sup> Neŋgeye na, gədaŋ ŋgay ma ndziye ka tor eye. Mā təra andza niye!

### *Məndəve i bazlam*

<sup>12</sup> Madzəna ga ka məwatsakum naha dərewel nakay na, Silas. I ga na, neŋgeye malamar dədək eye ka tsəved i Mbəlom. Na watsakum naha dərewel nakay na, məvəlakum gədaŋ ada hərwi məgwadəkum na, ta dədək Mbəlom kə gəkway ŋgwalak andza nakə na tsikakum aye. Kā gərum ha ŋgwalak i Mbəlom niye bay.

<sup>13</sup> Ndo məpe mədzal gər hay ka Yesu neheye nəteye kənaŋ ma Babilon, Mbəlom a pəla tay ha andza nəkurom aye, ta tsikakum naha me. Markus wawa ga, kə tsikakum naha me dərmak.†

<sup>14</sup> Gəsum həlay a bo nəte nəte mə walaŋ kurom ta məgəse bo təmbolok təmbolok lele, məfa ha na, ka wudum bo.

Mbəlom mā vəlakum zay a nəkurom neheye mə həlay i Kəriste aye tebiye.

\* 5:5 Dzeke hay 3.34. † 5:13 Ka Piyer Babilon na, wuzlahgəma i Roma. Wawa ga: Andza məgwədə Markus gawla i Piyer, a wuda na andza wawa ŋgay.



## Masulo i d̄erewel nakə Piyer a watsa aye Məfələkwe

Piyer a watsa d̄erewel nakay na, a ndo məpe mədzal gər hay ka Yesu tebiye. Mə dəna na, Piyer a tsik andza ma gəriye tay ha. A gwad həlay i məməte ngay mazlambar (1.13). A watsa na, hərwi ada ndo məpe mədzal gər ka Yesu t̄a ma ahaya məsənəke ngay nakə a sənəkata yaye a gər.

Derewel nakay faya ma tsətsahiye fataya, t̄a pa na wu ngwalak eye nakə a yaw ma məpe mədzal gər aye (madədo 1). Faya ma giye v̄eram ta ndo neheye faya ta sənəkateye maraw me a ndo hay (madədo 2). Faya ma tsikiye ka gər i pat i Yesu nakə ma mawe yaye (madədo 3).

Hərwi məvəlatay gədan̄ ma məpe mədzal gər na, d̄erewel i ndo məde ha bəzlam i Mbəlom hay i Dzam Guram eye andaya ka ndo məpe mədzal gər hay. Ta huta məsənəke i ndo məhəle mbal i Yesu Kəriste (3.2). A həlay nakə Piyer a watsa d̄erewel ngay masulo eye na, ndo hay t̄ə sər siye i d̄erewel i Pol neheye a watsa aye (3.15). T̄a dazlay mətsəne ada t̄ə məma ahaya wu nakə ta tsəne mə d̄erewel nakay mahəyak eye tsa bay (1.20) ada t̄a dzala faya lele (3.16). Madzəne i ndo məpe mədzal gər ta Məsəfəre Tsədan̄na eye na, lele haladzay.

### *Mətsike me i Piyer*

<sup>1</sup> Maa watsakum naha d̄erewel nakay na, neŋ Simoŋ Piyer ndo i məsler ada ndo i məslar̄ i Yesu Kəriste. Maa slər ga ha na, neŋgeye. Na watsa naha d̄erewel nakay na, a nəkurom neheye ka pum mədzal gər ka Yesu andza nakə nəmay nəmaa dzala ha faya aye. Niye na, ma dzəniye kurom andza nəmay. Yesu Kəriste a ge wu niye na, i kway tebiye hərwi neŋgeye ndo i dedek. Neŋgeye na, Mbəlom, neŋgeye ndo mətəme kway ha dərmak.

<sup>2</sup> Mbəlom m̄a pa fakuma ngama ada m̄a v̄əlakum zay kame kame andza nakə k̄a sərūm Mbəlom ta Bəy Maduweŋ kway Yesu kame kame.

### *Hutum gədan̄na ada mede kurom m̄a ge lele*

<sup>3</sup> Yesu a v̄əlakway tsəved̄ka məsəre Mbəlom nakə a zalakway aye, hərwi ada k̄a ndzakwa t̄ə neŋgeye ma t̄əv̄ ngay nakə ta d̄əslay ha gər ada k̄a pakway bəzay a mede ngay aye. Neŋgeye ta məzlaḅ eye haladzay, k̄ə v̄əlakway wu neheye a sakway aye tebiye hərwi ada k̄a hutakwa sifa wede yaye ada k̄a pakway bəzay a mede nakə a yay a gər a Mbəlom aye.

<sup>4</sup> Andza niye, a v̄əlakway wu bagwar eye neheye a tsik ahəl niye, a gwad ma v̄əlakumeye aye. Nəteye na, lele haladzay wuray andaya andza niye bay tebiye. A ge andza niye na, hərwi ada t̄ə wu neheye a gwad ma v̄əliye na, k̄a t̄əmum abərə ka bor i bo neheye ka m̄əndzibərə ta dziye ha ndo hay aye, ada k̄a ndzum andza neŋgeye tsədan̄na.

<sup>5</sup> Hərwi niye neŋ faya na gwadumeye: Pəlum tsəved̄ta gədan̄, məpe mədzal gər kurom nakə ka pum ka Yesu Kəriste aye na, səkahum ha mede nakə lele aye dərmak. Mede kurom ki ye lele na, t̄ərūm ndo neheye t̄ə sər wu neheye a say a Mbəlom aye.

<sup>6</sup> Ka sərūm wu neheye a say a Mbəlom aye na, gum metsehe a bo kurom. Ka gumay metsehe a bo kurom na, ndzum bəŋbəŋ ta gədan̄. Ka ndzum bəŋbəŋ ta gədan̄ na, rəhumay ha gər a Mbəlom.

<sup>7</sup> Ka rəhumay ha gər a Mbəlom na, wuɖum bo nəte nəte mə walaŋ kurom andza nəkurom ta malamar hay. Ka wuɖum bo mə walaŋ kurom andza malamar hay na, wuɖum ndo hay tebiye dərmaɖ.

<sup>8</sup> Taɖə faya ka gumeye wu neheye haladzay na, məsəre kurom nakə ka sərɔm Bəy Maduweŋ kway Yesu Kəriste aye na, ma təriye kəriye bay ada məndze kurom nakə ka ndzumeye na, ma bəziye ha wu lele aye hay.

<sup>9</sup> Ane tuk na, ndo neheye nəteye faya ta giye wu neheye təbey aye na, ta ndzəkɪt bo andza guluf hay. Mbəlom kə pəsətay ha mezeleme tay neheye ta gawa ahəl niye na, ta mətsa ha gər.

<sup>10</sup> Malamar ga hay Mbəlom kə pala kurom ada kə zalakum. Gum gədaŋ hərwi ada kə pumay bəzay a Yesu lele huya. Taɖə faya ka gumeye andza niye na, ka dədumeye abəra ka tsəved i Mbəlom dɔdɔ bay.

<sup>11</sup> Andza niye ta dedek, Mbəlom ma həndakakumeye abəra ma maged hərwi ada kə fələkum a təv mələve i Bəy Maduweŋ kway Yesu Kəriste ndo mətəme kway. Bəy ŋgay ma ndziye ka tor eye.

<sup>12</sup> Hərwi niye, kwa wu neheye ka sərɔm bəbay na, na makum ahaya a gər pat pat ada kə ndzum bəŋbəŋ ma dedek nakə ta tətikakum aye.

<sup>13</sup> Ane tuk na, taɖə neŋ andaya tə dərə ka məndzibəra mba na, lele haladzay nakə na makum ahaya wu neheye a gər hərwi ada kə ndzum tsezlezleŋɛ.

<sup>14</sup> Na sər ha i ga na, a zəkəŋaw hala sa bay, na gəriye ha məndzibəra nakay, andza nakə Bəy Maduweŋ Yesu Kəriste a deŋ ha ahəl niye aye.

<sup>15</sup> Na pəliye tsəved eye tebiye hərwi ada pat naka neŋ andaya sa bay aza na mət aye ka hutumeye tsəved ka məma ahaya wu neheye a gər.

### *Mbəlom kə ɖakway ha Yesu na, wawa ŋgay*

<sup>16</sup> Ahəl niye na, nəmaa ɖakum ha kəkay nakə Bəy Maduweŋ Yesu Kəriste a yaw ta gədaŋ aye. Wu neheye nəmaa tsikakum aye na, andza neheye wurmbez kəriye a yaw abəra ma mədzal gər i ndo zezeŋ aye bay. Ane tuk na, nəmay ɖa nəmaa ŋgatay a gədaŋ ŋgay tə dərə may.

<sup>17</sup> Ahəl nakə Mbəlom a vələy məzlaɖ nakə a ze wu hay tebiye aye na, nəmay andaya ka təv eye dərmaɖ. Mbəlom, neŋgeye ndo i gədaŋ, a ze kwa mey tebiye, a gwad: «Nakay na, wawa ga, na wuɖa na haladzay, a yeŋ a gər haladzay.»

<sup>18</sup> Mətsike me niye a tsənew mə mbəlom aye na, nəmaa tsəne. Nəmaa tsəne na, hərwi nəmay tage Bəy Maduweŋ Yesu dziye mə mahəmba tsədaŋɛna eye.\*

<sup>19</sup> Andza niye, səkahakwa ha mədzal ha ka bazlam i ndo məɖe ha bazlam i Mbəlom nakə tə tsik aye. Hədzakumay zləm ka mətsəne bazlam tay hərwi bazlam tay niye na, andza lalam nakə a dəv ma ləvoŋ dzaydzay aye. Pumay zləm huya hus a həlay nakə pat eye ma sləlaweye aye. Həlay niye na, bamta, andza məgwede Kəriste ma maweye. Tsa na, ka ŋgatumeye a wu hay parakka.

<sup>20</sup> Lele na, sərɔm ha wu nakay lele. Wu neheye ahəl niye ndo məɖe ha bazlam i Mbəlom hay tə tsik ada tə watsa a Derewel i Mbəlom aye na, ndəray ma sliye faya mətsəne tə metsehe ŋgay bay, Məsəfəre Tsədaŋɛna eye mə dzəna na ka mətsəne.

<sup>21</sup> Bazlam neheye ndo i maslaŋ hay tə tsikawa aye na, ta tsik dɔdɔ tə metsehe tay bay. Maa vələwatay gədaŋ na, Məsəfəre Tsədaŋɛna eye hərwi ada tə diye ha wu neheye tə tsənew abəra ka təv i Mbəlom aye.

## 2

### *Məge metsehe hərwi ndo i maraw me hay*

\* 1:18 Zəba mə Mata 17.1-5; Markus 9.2-7; Luka 9.28-35.

<sup>1</sup> Ahəl niye na, ndo neheye tə gwaf nəteye ndo mæde ha bazlam i Mbəlom aye nəteye andaya mə walaŋ i ndo mæpe mædzal gər hay ka Yesu. Anəke ma təriye andza niye dərma, ndo mæde ha bazlam i Mbəlom ta parasay eye ta ndohwaweye mə walaŋ kurom, ta tətikakumeye matətike neheye lele bay aye, ta nasiye ha sifa i ndo hay aye. Tə matətike tay niye hay na, ndo hay ta kərahiye mæpe mædzal gər ka Yesu Kəriste nakə nəngeye Bəy Maduweŋ kway nakə ahəl niye a təma tay ha abəra mə mezeleme tay aye. Ta mæge andza niye na, nəteye faya ta vahaweye ka bo dərətsətseh mǎ gəs tay ha. Ma bəbazliye tay ha bəse.

<sup>2</sup> Ndo hay haladzay ta ta peye bəzay a tsəved tay nakə lele bay aye. Hərwi niye ndo hay ta tsikiye wu nakə lele bay aye ka tsəved i Mbəlom hərwi tay.

<sup>3</sup> Hərwi nəteye na, wu i siye i ndo hay a gatay dərə haladzay. Ta vakumeye gər ada ta zliye fakuma abəra wu kurom hay tə maraw me tay. Ba kwa ahəl niye Mbəlom ndo məgatay sariya a ndo hay faya ma həbiye tay ha ta sariya hərwi mædze tay ha. Pat mædze tay ha abəra mə dəma helele na, mazlambar.

<sup>4</sup> Ahəl niye gawla i Mbəlom neheye tə gawa mezeleme aye na, Mbəlom kə gər tay ha tǎ ge andza niye tsa bay. Kə gəs tay ha, kə kuts tay ha a bəf nakə kutsik bagwar eye. Ta ndziye mə ləvoŋ nakə zenzen aye hus a pat i mæge sariya.

<sup>5</sup> Ndo neheye ahəl niye tə gawa mezeleme aye na, Mbəlom kə gər tay ha andza niye bay, kə pa yam nakə a rah ka mændzibəra aye. A dze tay ha ndo neheye ta rəhay ha gər bay aye. A təma ha na, Nuhu nakə a dawa ha tsəved dedək i Mbəlom nakə a tsətsah aye tə siye i ndo hay tasəla.\*

<sup>6</sup> Gəma neheye tə zalay Sodom ta Gomora aye na, Mbəlom kə gəs tay ha ndo neheye mə dəma aye a sariya. Kə fəka tay ha hurdək hurdək ta ako. Andza niye, a dā ha na, ma gateye sariya a ndo neheye ta rəhay ha gər bay aye andza niye dərma.†

<sup>7</sup> Lot nəngeye na, ndo ŋwalak eye, Mbəlom kə təma ahaya abəra ma Sodom. Wu neheye lele bay ndo neheye tə gawa aye na, Lot kə sa dərətsətseh mə dərəv ŋgay haladzay hərwi tay.

<sup>8</sup> Lot, nəngeye nakə ndo ŋwalak eye a ndzawa mə walaŋ tay pat pat. A ŋgataway a wu neheye ŋwalak eye bay tə gawa aye, a tsənəwa bazlam tay neheye ŋwalak eye bay aye. Wu neheye a ndalaway mə dərəv ŋgay hərwi nəngeye na, ndo ŋwalak eye.

<sup>9</sup> Wu neheye ahəl niye, faya ta dəkway ha na, Mbəlom a sər tsəved nakə ma təmiye tay ha ndo ŋgay hay hərwi ada tǎ təma abəra ka dərətsətseh aye. Faya ma dəkway ha sa, a sər tsəved nakə ma piye tay ha ndo neheye ŋwalak eye bay aye hərwi ada mǎ gatay dərətsətseh pat i sariya.

<sup>10</sup> Mbəlom ma gateye dərətsətseh wene wene eye na, a ndo neheye faya tə gawa wu neheye ŋwalak eye bay huya a say a dərəv tay ada ta kərahawa gədaŋ i Mbəlom aye.

Ndo neheye faya ta tətikateye maraw me a ndo hay ta dzədzaray a wuray bay, tə pay zləm a bazlam i ndo kwa tsekweŋ bay, ta rəhay ha gər a gawla i Mbəlom hay neheye ta məzlaḅ aye bay, faya ta tsadateye.

<sup>11</sup> Kwa gawla i Mbəlom eye neheye ta ze ndo i maraw me neheye ta gədaŋ, ta tsadateye a ndo i maraw me hay kame i Mbəlom bay, ta ŋgwasə fataya bay.

<sup>12</sup> Ndo neheye faya ta giye na, wu nakə ma giye ŋgama bay aye. Nəteye na, andza wu i pesl neheye ta gəsiye ada ta kədiye tay ha aye. Nəteye faya ta

\* 2:5 Zəba mə Madazlay i wu hay 6.1-7.24. † 2:6 Zəba mə Madazlay i wu hay 19.24.

tsadateye kəriye a wu neheye bo tay eye tə sər bay aye. Ta dedək ta mətiye andza wu i pəsl hay.

<sup>13</sup> Mbəlom ma vələteye dəretsətseh hərwi nakə tə satay dəretsətseh a siye i ndo hay aye. A satay na, mäge wu neheye ɲgwalak eye bay aye ada tə gawa na, kwa ta həpat ɲgəray ɲgəray. Ahəl nakə nəkurom mandza eye dziye na, nəkurom ta nəteye ka ndayawum wu hay dziye, mede tay a gakum horoy. Faya ta vakumeye gər ada niye na, a yatay a gər.

<sup>14</sup> Dəre tay nduzla maraha eye ta mäge madama, mäge mezeleme a yatay a gər haladzay, dāda tə ye gər ka mäge mezeleme bay. Tādā ta ɲgatay a ndo neheye bəle eye ka tsəved i Mbəlom aye na, ta vateye gər hərwi ada tə ge mezeleme. I tay na, huya mäge dəre ka wu hay. Mbəlom 6a kə vələtay mezeleme.

<sup>15</sup> Ta gər ha tsəved i Mbəlom, faya ta pay bəzay na, a tsəved tay, faya ta giye na, wu nakə Balam wawa i Bosor a gawa aye, a wudā mäge mənese hərwi ada mǎ huta suloy.

<sup>16</sup> Balam, ndo mǎde ha bazlam i Mbəlom a ge mezeleme, ada Mbəlom a tsikay me tə bazlam i zungo. Zungo na, a tsikawa me bay. A tsik me ta bədiday i ndo zezen, a gay me a ndo mǎde ha bazlam i Mbəlom niye ada a ndzay ka tsəved hərwi ada mǎ ge wu i gər mavuwe ɲgay niye sa bay.<sup>‡</sup>

<sup>17</sup> Ndo i maraw me neheye faya ta vateye gər a ndo hay aye, nəteye andza bədiyem neheye ta sakwa aye, nəteye andza pazlay neheye mətasl faya ma həliye tay ha tsekeke a paw yam bay aye. Mbəlom kə ləva ha bo ta təv tay ma ləvəɲ zəɲzəɲ eye dəre a zəba mǎ dāma bay.

<sup>18</sup> Faya ta giye zlapay tə mawude ha ta magala tə bazlam neheye ta ge ɲgama bay aye, nəteye faya ta dziye bo ka masəpete ndo neheye ti yaw abəra mǎ walaɲ i ndo neheye tə sər tsəved i Mbəlom bay aye, a satay tə yaw ka təv tay tə ge andza nəteye neheye faya ta giye andza nakə a say a bo tay aye.

<sup>19</sup> Faya ta gwadateye a ndo neheye na, ka ndzumeye barbarra, ka ləvumeye gər kurom. Ane tuk na, ndo i maraw me neheye nəteye na, beke i mezeleme, tə ləva gər tay bay hərwi wu nakə a ləvay gər a ndo aye na, ndo niye neɲgeye beke i wu niye.

<sup>20</sup> Tādā ndoweyə ki yaw kə sər Yesu Kəriste Bəy Maduweɲ ada ndo mətəme kway ha ada kə gər ha wu neheye ɲgwalak eye bay ma nasiye ha ndo hay aye ada mǎndze tsekweɲ a ma faya ka mäge wu neheye ɲgwalak eye bay aye, wu neheye ta ləvay gər sa na, i tay a həlay i mǎndəve mǎndze ɲgay lele bay ma ziye nakə kurre aye.

<sup>21</sup> Ta sər tsəved nakə a ye a dedək aye. Ane tuk na, ta gər i bazlam i Mbəlom mapala eye nakə ta tətikatay aye. Həbe meeneɲ ɲgama tə sər tsəved niye bay.

<sup>22</sup> Wu nakə a ndzatay a gər a ndo neheye na, andza dzeke kway nakə a tsik, a gwad: «Kəra a vənaha wu nakə a nda aye, tsa na, a ma faya a nda sa.» Tə gwad dərmak: «Tə bara gadaraw ada ndəlū6 mǎ ge faya bay, tsa na, a ma mǎkele ha bo a ndəlū6 sa.Š»

### 3

#### *Yesu Kəriste ma maweyə*

<sup>1</sup> Dzam ga hay, nakay na, masulo i dərewel nakə na watsakum naha aye. Na watsakum naha na, hərwi məmakum ahaya a gər wu nakə ka sərūm tsiy aye, hərwi ada kǎ dzalum ka wu neheye ka tsəved ɲgwalak eye.

<sup>‡</sup> 2:16 Zəba mǎ Məpesle 31.16.    Š 2:22 Dzeke hay 26.11.

<sup>2</sup> A seŋ na, kâ mætsum ha gər tə bazlam neheye ndo mæde ha bazlam i Mbəlom hay tə tsikawa ahəl niye aye bay. Mumawa ahaya a gər bazlam i Bəy Maduweŋ kway Yesu Kəriste ndo mətəme kway ha nakə a tsikakum ka gumeye ha məsler aye. A tsik na, tə bazlam i ndo i maslaŋ ŋgay neheye a slərakum naha aye.

<sup>3</sup> Wu bagwar eye nakə na tsikakumeye na, a həlay məndzibəra ma ndəviye na, ndo hay ta deyeweye, ta ŋwasiye fakuma. Ta ndziye na, məpay bəzay a bor i bo tay neheye ŋgwalak eye bay aye dekdek.

<sup>4</sup> Ta gwadiye: «Yesu Kəriste a gwad ma maweye bədaw? Neŋgeye mənŋgay anəke? Bəba kway hay ta mət, kə maw bay. Wu hay tebiye ka məndzibəra andaya andza ahəl nakə Mbəlom a ge məndzibəra aye. Wuray tsa ka mbəda bay.»

<sup>5</sup> Ndo neheye faya ta tsikiye andza niye na, a satay mətəne Mbəlom kə tsik ahəl niye, a ge magərmbəlom ta dala tə bazlam ŋgay, a ge dala ta yam a ŋgəna ha ka bo abəra ta dala ta yam na, a satay mətəne bay.\*

<sup>6</sup> A bəbazl tay ha ndo hay ahəl niye na, ta yam nakə a rah ka məndzibəra aye.†

<sup>7</sup> Mbəlom a gwad sa na, magərmbəlom ta dala neheye anəke aye, ma ndəviye tay ha tebiye ta ako, a gər tay ha na, ka təmad. Ma ndəviye tay ha na, pat nakə ma giye sariya a ndo hay ada ma dziye tay ha ndo i mezeleme hay aye.

<sup>8</sup> Dzam ga neheye na wuɗa kurom haladzay aye. Wu andaya nəte kâ mætsum ha gər bay. Ka ɗəre i Mbəlom na, məhəne nəte na, andza məve gwezem, məve gwezem na, andza məhəne nəte.

<sup>9</sup> Ndo siye hay tə dzala, Mbəlom na, mahonok eye, wu nakə a tsik kurre a gwad ma giye na, ma giye na bay. Ma giye andza niye bay, duh faya ma həbiye kurom. Faya ma vələkumeye həlay eye hərwi ada kâ gərurum ha mezeleme kurom hərwi a say ndəray mâ dze bay. A say duh na, ndo hay tebiye tâ mbəda ha mede tay.

<sup>10</sup> Pat i Bəy Maduweŋ Yesu Kəriste ma deyeweye na, andza məkal ndəray ma səriye ka bo bay. Pat eye niye na, magərmbəlom ma ləviye haladzay ŋguyats ŋguyats ŋguyats, ma dziye. Ako ma təmiye tay ha wu neheye ka magərmbəlom aye tebiye hereyew hereyew, dala tə wu neheye mə ɗəma aye tebiye ta dziye.

<sup>11</sup> Kə ge wu niye hay tebiye ta dziye andza niye na, gumay metsehe a mede kurom, ndzum tsədaŋna ada rəhumay gər a Mbəlom mə wu hay tebiye.

<sup>12</sup> Faya ka həbumeye pat nakə Mbəlom ma deyeweye. Gum wu nakə ka slumeye faya mäge aye hərwi ada pat eye niye mâ ndislew bəse. Pat eye niye na, magərmbəlom ma təmiye ada ma dziye hele hele. Ako ma təmiye tay ha wu hay tebiye, wuray kwa tsekweŋ ma zəkaweye bay.

<sup>13</sup> Ane tuk na, Mbəlom a gwad ma giye magərmbəlom weɗeye ta dala weɗeye. Mə ɗəma na, ndo hay tebiye ta giye wu ŋgwalak eye. Nakay na, wu nakə faya ka həbakweye aye.‡

<sup>14</sup> Hərwi niye dzam gay hay, neŋ faya na gwadəkumeye faya ka həbumeye madayaw i Bəy Maduweŋ sa na, gum gədaŋ hərwi ada mede kurom mâ ge ŋgwalak eye. Andza niye, ki yaw na, ma ŋgatakumeye mənese andaya fakuma bay ada ka ndzumeye zay tə neŋgeye.

<sup>15</sup> Sərum ha na, Bəy Maduweŋ kway Yesu Kəriste a maw bəse bay na, hərwi a say ndo hay tâ huta tsəved ka mæde ha mənese tay hərwi ada tâ

\* 3:5 Zəba mə Madazlay i wu hay 1.6-9; 7.11. † 3:6 Madazlay i wu hay 7.11. ‡ 3:13 Zəba ma Ezay 65.17; 66.22.

təma. Malamar kway Pol nakə ka wudakwa na aye, mə derewel ɲgay nakə a watsakum naha, ka tətikakum wu neheye dərmak. A watsa na tə metsehe nakə Mbəlom a vəlay aye.

<sup>16</sup> Mə derewel ɲgay neheye a watsa aye tebiye faya ma watsiye ka bazlam nakay andza niye. Mə derewel ɲgay neheye a watsa aye na, wu hay andaya mə dəma neheye a wur bo mətsəne aye. Ndo neheye ta tsah bay, mədzal gər a kətsatay na, faya ta mbəday həlay a bazlam neheye. Faya ta mbəday həlay andza nakə ta mbəday a siye i bazlam neheye mə Derewel i Mbəlom aye. Tə məge andza niye na, faya ta vahaweye sariya i Mbəlom ka gər tay.

<sup>17</sup> Dzam ga hay, nəkurom na, ka sərūm wu neheye tsiy. Hərwi niye, neɲ faya na gwadəkumeye, gum metsehe hərwi ada ndo neheye ta rəhay ha gər a Mbəlom bay aye na, t̄a vakum gər abəra ka t̄əv nakə nəkurom mandza eye faya b̄əɲb̄əɲ aye mede kurom ha a mənese tay bay.

<sup>18</sup> Səkahum ha məsəre Bəy Maduwen kway Yesu Kəriste ndo mətəme kway ha ada məsəre ɲgwalak nakə a vəlakway aye ada ɲgama nakə a vəlakway aye.

Kwa way mâ dəslay ha gər, kwa anəke hus ka tor eye. Amen!

## Makurre i derewel nakə Yuhana a watsa aye Məfələkwe

Derewel neheye mahkar ma Dzam Wedeye, ndo hay tə sər maa watsa na, Yuhana. Makurre i derewel neheye mahkar aye na, kə da ha ndo nakə a watsa aye bay. Ndo məwetse derewel masulo eye ta mamahkar eye a da ha bo andza «madugula». Neŋgeye ndo məkalay kame a gay i maduwule me, ndo hay ta hənəy ha gər lele. A watsa derewel nakay na, a nəteye.

Makurre i derewel tə watsay a way na, kə da ha bay. Masulo eye i ŋgay a watsay a «məhay gər i ndo məpe mədzal gər hay ka Yesu nakə ka tərə may i wawa hay, Mbəlom a zla kar aye», andza məgwede a bərək i ndo məpe mədzal gər hay ka Yesu ada ta hawal ŋgay hay. A watsa mamahkar eye a ndo məpe mədzal gər nakə tə zalay Gayus aye. Neŋgeye ma bərək i ndo neheye bazlam andaya mə walaŋ tay aye. Derewel neheye mahkar aye tə watsa hərwi ndo neheye tə sər Labara Ŋgwalak eye nakə Yuhana a watsa aye.

### *Bazlam nakə a tsik ka ndo nakə ma vəliye sifa aye*

<sup>1</sup> Ndo nakə nəmaa watsakum naha ka gər ŋgay aye na, kwa ahəl niye məndzibəra andaya zuk bay aye na, neŋgeye andaya. Nəmay na, nəmaa tsəne tə zləm may, nəmaa ŋgatay tə dəre may, nəmaa ndazl na ada nəmaa lamay tə həlay may hay. Neŋgeye na, ndo nakə tə zalay bazlam i Mbəlom aye. Maa vəl sifa a ndo hay na, neŋgeye.

<sup>2</sup> Ndoweye niye tə zalay bazlam i Mbəlom ma vəliye sifa a ndo hay aye na, ka bəz ha bo parakka, nəmaa ŋgatay. Nəmaa tsikakum na, wu nakə nəmay nəmaa ŋgatay aye, ada nəmaa dəkum ha na, bazlam niye ma vəliye sifa nakə ma ndəviye bay aye. Ahəl niye na, neŋgeye ka təv i Bəba Mbəlom. Anəke na, Mbəlom ka bəzakway ha.

<sup>3</sup> Wu nakə nəmaa ŋgatay tə dəre may ada nəmaa tsəne tə zləm may aye na, nəmaa dəkumeye naha a nəkurom dərmak hərwi ada nəmay tə nəkurom kə dzapakwa nəte. Mədzepe nakə ka dzapakwa nəte aye na, ka dzapakwa na, ta Bəba kway Mbəlom ada tə Yesu Kəriste wawa ŋgay.

<sup>4</sup> Nəmaa watsakum naha wu neheye na, hərwi ada mə yay a gər a dərev kway kurah kurah lele.

### *Ndo nakə faya ma giye mezeleme aye na, ma ndziye ka təv i Mbəlom bay*

<sup>5</sup> Bazlam nakə nəmaa tsəne, Yesu Kəriste a tsikamay aye ada nəmaa dəkum ha aye na, Mbəlom na, neŋgeye dzaydzay. Ləvoŋ andaya mə neŋgeye təbey.

<sup>6</sup> Tadə ka gwadəkwa nəkway madzapa eye nəte ta Mbəlom. Ane tuk na, faya ka gəkweye mənese huya na, niye na, andza məgwede faya ka rawakweye me. Sa tsa na, faya ka zəŋgalakweye tsəved nakə lele bay aye.

<sup>7</sup> Tadə düh nəkway mə dzaydzay andza Mbəlom nakə neŋgeye mə dzaydzay aye na, niye na, andza məgwede nəkway nəte nəte madzapa eye. Bambaz i Yesu Wawa i Mbəlom kə barakway na mezeleme hərwi ada kə tərəkwa tsədanŋa.

<sup>8</sup> Tadə ka gwadəkwa nəkway faya ka gəkweye mezeleme təbey na, niye na, faya ka vakweye gər a bo kway. Kə ge andza niye na, dedək andaya mə dərev kway bay.



<sup>9</sup> Duh na, dakway ha mezeleme kway a Mbəlom. Neŋgeye na, Mbəlom nakə dedek aye. Wu nakə a tsik a gwad ma giye na, ma giye na. Andza niye, ma pəsakway ha mezeleme kway, ma təriye kway ha tsədanŋa kame ŋgay.

<sup>10</sup> Tadə ka gwadakwa dāda ka gakwa mezeleme bay na, niye na, ka tərakwa ha Mbəlom andza neŋgeye ndo i maraw me. Bazlam ŋgay na, dāda ka pakwa a mədzal gər kway bay.

## 2

<sup>1</sup> A nəkurom wawa ga hay, wu neheye na watsakum naha aye na, hərwi ada kā gum mezeleme bay. Ane tuk na, tadə ndəray kə ge mezeleme na, sərūm ha ndo məmakway bo andaya ka təv i Bəba kway Mbəlom. Ndoweye niye na, Yesu Kəriste. Neŋgeye dāda ma giye mezeleme bay.

<sup>2</sup> Neŋgeye na, a mat andza wu nakə tə vələwa kəriye hərwi ada Mbəlom mā pəsakway ha mezeleme kway aye. Mbəlom ma pəsakway ha na, mezeleme kway dekdək bay. Ma pəsətay ha mezeleme i ndo hay ka məndzibəra tebiye dərma.

### *Bazlam mapala eye wedeye*

<sup>3</sup> Tadə ka gakwa wu nakə Mbəlom a tsikakway aye na, niye na, faya ma bəzakway ha, ka sərakwa na ta dedek.

<sup>4</sup> Tadə ndoweye kə gwad na sər Mbəlom, ane tuk na, ka rəhay ha gər a bazlam i Mbəlom mapala eye bay na, neŋgeye ndo i maraw me. Dedek andaya mə neŋgeye bay.

<sup>5</sup> Duh ndo nakə faya ma rəhay ha gər a bazlam i Mbəlom mapala eye na, maa wuda Mbəlom peteh na, neŋgeye. Andza niye ka sərakweye ha na, nəkway mə həlay ŋgay.

<sup>6</sup> Tadə ndoweye kə gwad neŋgeye mandza eye mə həlay i Mbəlom na, məndze ŋgay mā tər andza i Yesu.

<sup>7</sup> Dzam ga neheye na wuda kurom haladzay aye, wu nakə na watsakum naha aye na, wu nakə wedeye dāda ka tsənum bay aye bay. Duh wu nakə na watsakum naha aye na, neŋgeye nətə bəna, wal bay. Ka tsənum na, kurre ahəl niye ka təmum bazlam i Yesu aye. Ayaw! Wu nakay guram eye na, bazlam nakə bə ka tsənum tsiy aye.

<sup>8</sup> Kwa andza niye bəbay na, wu nakə na watsakum naha aye na, andza bazlam wedeye. Maa bəzakway ha mede niye wedeye na, Yesu. Nəkurom dərma mede kurom na, wedeye. Andza niye ləvon faya ma ndəviye. Dzaydzay nakə dedek eye ka dazlay a mandəv.\*

<sup>9</sup> Tadə ndoweye kə gwad neŋgeye mandza eye mə dzaydzay ada neŋgeye faya ma nay dərə a malamar ŋgay ndo məpe mədzal gər ka Mbəlom na, sərūm ha neŋgeye na, mandza eye ma ləvon huya.

<sup>10</sup> Ane tuk na, tadə ndoweye ka wuda malamar ŋgay na, neŋgeye mandza eye mə dzaydzay. Wu nakə ma dədiye ha ndo abəra ka tsəved i Mbəlom aye na, andaya mə dərəv ŋgay kwa tsekweŋ bay tebiye.

<sup>11</sup> Ane tuk na, ndo nakə faya ma nay dərə a ndo aye na, neŋgeye hus anəke ma ləvon. Wu nakə faya ma giye tebiye, faya ma giye na, ma ləvon. Faya ma diye a ŋgay na, a sər bay. A ŋgatay a dərə bay hərwi neŋgeye ma ləvon.

### *Kā gum dərə ka wu i məndzibəra bay*

<sup>12</sup> A nəkurom wawa ga hay, na watsakum naha na, a nəkurom: Na watsakum naha na, hərwi Mbəlom kə pəsakum ha mezeleme kurom. A pəsakum ha na, hərwi Yesu Kəriste.

\* 2:8 Zəba ma Yuhana 13.34.

- <sup>13</sup> A nəkuroom madugula hay, na watsakum naha na, a nəkuroom.  
Na watsakum naha na, ndo nakə andaya kwa məndzibəra andaya zuk bay na, ka sərūm na.  
A nəkuroom gawla hay, na watsakum naha na, a nəkuroom dərmaκ.  
Nəkuroom na, ka ŋwasum ka Fakalaw.
- <sup>14</sup> Ayaw! Wawa ga hay, na watsakum naha na, a nəkuroom.  
Nəkuroom na, ka sərūm Bəba kway Mbəlom.  
A nəkuroom madugula hay, na watsakum naha na, a nəkuroom.  
Na watsakum naha na, nəkuroom ka sərūm ndo nakə kwa ahəl niye məndzibəra andaya zuk bay aye na, neŋgeye andaya.  
A nəkuroom gawla hay, na watsakum naha na, a nəkuroom.  
Nəkuroom na, bazlam i Mbəlom mə dərev kurom.  
Ka hutum gədaŋ, ka ŋwasum ka Fakalaw dərmaκ.
- <sup>15</sup> Kā pumay bəzay a mede i ndo i məndzibəra hay bay. Kā wuɖum wu i məndzibəra bay. Taɖə ndoweye ka wuɖa wu neheye ka məndzibəra aye na, sərūm ha neŋgeye na, a wuɖa Bəba kway Mbəlom bay.
- <sup>16</sup> Ndo neheye faya ta giye wu i məndzibəra aye, nəteye na, kəkay? Nəteye na, faya ta giye wu nakə a yay a gər a bo tay aye. Wu nakə dərə tay kə ŋgatay aye na, a satay məhute. Sa na, faya ta giye ha zlapay tə wu tay niye hay. Wu niye hay məge andza niye na, Mbəlom ka tətikakway bay. Məge wu niye hay andza niye na, i məndzibəra.
- <sup>17</sup> Sərūm ha na, məndzibəra faya ma ndəviye ada tə wu neheye ndo hay ta wuɖa aye tebiye ta ndəviye dərmaκ. Ane tuk na, ndo nakə faya ma giye wu nakə a say a Mbəlom aye na, neŋgeye ma ndziye ka tor eye.

*Gum metsehe ta ndo neheye ta kərah Yesu Kəriste aye*

- <sup>18</sup> Wawa ga hay, mazlambar məndzibəra ma ndəviye. Nəkuroom na, ka tsənūm ndo mənə dərə i Kəriste andaya bagwar eye ma deyeweye. Azlakwa ndo mənə dərə i Kəriste hay haladzay ta yaw anəke. Hərwi niye ka sarakwa mazlambar məndzibəra ma ndəviye.†
- <sup>19</sup> Ahəl niye ndo neheye na, nəkway nəte. Ane tuk na, ta təra ndo kway hay ta dedek bay. Ti yaw abəra mə walaŋ kway na, hərwi nakə ta təra ndo kway hay ta dedek bay aye. Taɖə nəteye ndo kway hay, ka dzapakwa nəte na, ta gəriye kway ha bay. Ta ndziye mə walaŋ kway. Wu nakay a ge bo andza nakay na, hərwi ada mā sər bo parakka nəteye ndo kway hay bay.
- <sup>20</sup> Nəkuroom na, Kəriste kə vəlakum məsəfərə ada nəkuroom tebiye na, ka sərūm dedek i Yesu.
- <sup>21</sup> Na watsakum naha na, hərwi nakə ka sərūm dedek i Yesu bay aye daw? Na watsakum naha na, hərwi məgwadəkum duh na, ka sərūm. Ka sərūm ha na, maraw me andaya kwa tsekweŋ ma dedek bay.
- <sup>22</sup> Ndo i maraw me niye bagwar eye neŋgeye na, way? Ndo i maraw me niye bagwar eye na, ndo nakə a gwad Yesu na, Kəriste bay aye. Ndo mənə dərə i Kəriste na, neŋgeye. Neŋgeye nakə a kərah Yesu Wawa i Mbəlom aye na, a kərah Bəba Mbəlom dərmaκ.
- <sup>23</sup> Taɖə ndoweye ka kərah Wawa i Mbəlom na, a kərah na, Bəba Mbəlom dərmaκ. Ane tuk na, taɖə ndoweye ka təma Yesu Wawa i Mbəlom na, ka təma Bəba Mbəlom.
- <sup>24</sup> Nəkuroom na, dzalum ka bazlam i Yesu nakə ka tsənūm kurre ka mada-zlay i bazlam i Yesu nakə ka tsənūm aye. Gum gədaŋ duh na, ka bazlam nakə ka tsənūm kurre ka madazlay aye, mə ndza mə dərev kurom. Taɖə bazlam neheye ka tsənūm kurre ka madazlay aye andaya mə dərev kurom na, nəkuroom dərmaκ ndzum mə həlay i Yesu ada mə həlay Bəba ŋgay Mbəlom.

† 2:18 2 Tesalonik hay 2.3-4.

<sup>25</sup> Wu nakə Yesu a gwad ma vəkəweye na, anan: A gwad, ma vəkəweye sifa nakə ma ndəviye bay aye.

<sup>26</sup> Wu nakay na watsakum naha na, hərwi məgakum daf. Na gakum daf na, hərwi ndo neheye a satay məvakum gər aye.

<sup>27</sup> Nəkurom na, Kəriste kə vəkəlakum Məsəfəre. Məsəfəre niye na, mandza eye mə dərev kurom. Hərwi niye nəkurom na, ka pəlumeye ndo matətikakum wu mekeleŋ eye sa bay. Ba Məsəfəre andaya mə dərev kurom tsiy. Məsəfəre na, ma tətikiye kurom ha ka gər i wu hay tebiye. Ada wu neheye faya ma tətikakumeye na, dedek bəna, mənese mə dəma təbey. Ndzum mə həlay i Yesu Kəriste andza nakə Məsəfəre a tətikakum aye.

<sup>28</sup> Wawa ga hay, ndzum mə həlay i Yesu Kəriste. Ka ndzumeye mə həlay ŋgay na, hərwi ada pat nakə ma maweye na, kə dzədzarakwa bay ada horoy mə gakway kame ŋgay bay.

<sup>29</sup> Ka sərūm ha Yesu na, neŋgeye ndo i dedek. Sərūm ha dərmak na, ndo nakə faya ma giye wu nakə dedek aye na, neŋgeye ka təra wawa i Mbəlom.

### 3

#### *Nəkway ka tərakwa na, wawa i Mbəlom hay*

<sup>1</sup> Zəbum ka mawudə bo i Mbəlom nakə a wudə kway aye na, hadzəgay! A gwad nəkway na, ka tərakwa wawa ŋgay hay. Ta dedək nəkway ka tərakwa wawa ŋgay hay. Ane tuk na, ndo i məndzibəra hay ta sər ha nəkway wawa i Mbəlom hay bay. A ge andza niye na, hərwi nəteye tə sər Bəba kway Mbəlom bay.

<sup>2</sup> A nəkurom dzam ga neheye na wudə kurom haladzay aye, nəkway anəke na, wawa i Mbəlom hay tsiy. Kame aza ka tərəkweye na, kəkay? Ka tərəkweye kəkay na, Mbəlom ka bəzakway ha zuk bay. Ane tuk na, ka sərakwa ha aza Kəriste kə maw na, ka ŋgatakweye parakka. Tsa na, ka tərəkweye andza neŋgeye.

<sup>3</sup> Ada kwa way kə pa mədzal gər ŋgay ka Kəriste matəre andza neŋgeye na, mə ge mənese bay andza neŋgeye nakə a ge mənese bay aye.

<sup>4</sup> Tadə ndoweye kə ge mezeleme huya na, a ge vərəm ka Mbəlom. Hərwi məge mezeleme huya na, məge vərəm ka Mbəlom.

<sup>5</sup> Nəkurom ka sərūm ha Yesu Kəriste a yaw ka məndzibəra hərwi məzle na mezeleme i ndo hay. Neŋgeye na, kə ge mezeleme kwa tsekweŋ bay tebiye.

<sup>6</sup> Ndo nakə neŋgeye mə həlay i Yesu Kəriste aye na, ma giye mezeleme sa bay. Ndo nakə faya ma giye mezeleme huya na, dadə kə ŋgatay a Yesu Kəriste bay. A sər na bay dərmak.

<sup>7</sup> Tadə kə ge andza niye na, wawa ga hay, kə vəlumatay tsəved kwa a way tə vakum gər bay. Ndo nakə faya ma giye wu nakə dedək aye huya na, neŋgeye ndo i dedək andza Yesu Kəriste nakə neŋgeye ndo i dedək aye.

<sup>8</sup> Ane tuk na, ndo nakə faya ma giye mezeleme huya na, neŋgeye wawa i Fakalaw hərwi Fakalaw a ge mezeleme na, kwa anəke bay. Hərwi niye Wawa i Mbəlom a yaw ka məndzibəra na, mədze ha məsler i Fakalaw.

<sup>9</sup> Ndowneye ka təra wawa i Mbəlom na, ma giye mezeleme huya sa bay. Ma giye mezeleme huya sa bay na, hərwi məsəfəre nakə Mbəlom a vəlay aye na, gədan eye. Faya ma giye məsler mə dərev ŋgay. Ma sliye faya məge mezeleme huya bay hərwi neŋgeye ka təra wawa i Mbəlom.

<sup>10</sup> Ta səriye ha ka bo abəra wawa i Mbəlom hay ta wawa i Fakalaw hay na, kəkay? Ta səriye hay na, tadə ndoweye kə ge wu neheye lele bay, ada a wudə malamar ŋgay hay bay aye na, neŋgeye ka təra wawa i Mbəlom bay.

*Wudum bo nate nate ma walan kurom*

11 Bazlam nakə kurre ka tsənum aye na, wudum bo nate nate ma walan kurom.

12 Nəkway na, kâ tərakwa andza Kayin bay.\* Neŋgeye wawa i Fakalaw. Kə kəd malamar ŋgay mədahan eye. A kəd na na, hərwi mey? A kəd malamar ŋgay na, hərwi məsler ŋgay nakə a gawa na, lele bay. Ane tuk na, məsler i malamar ŋgay na, lele.†

13 Malamar ga hay, tadə ndo i məndzibəra hay ta nakum dəre na, mâ gakum wadəŋ wadəŋ bay.

14 Anəke nəkway ka sərakwa na, nəkway andza ndo neheye maməta eye sa bay. Ane tuk na, nəkway ka huta kwa sifa wədeye nakə ma ndəviye bay aye tsiy. Ka sərakwa ha na, kəkay? Ka sərakwa na, hərwi ka wudakwa malamar kway hay. Tadə ndowe ye ka wuda malamar ŋgay hay bay na, neŋgeye huya andza ndo nakə maməta eye.

15 Tadə ndowe ye kə nay dəre a malamar ŋgay na, neŋgeye a təra andza ndo məkəde ndo hay. Ka sərurum ndo məkəde ndo hay na, kə huta sifa nakə ma ndəviye bay aye bay.

16 Ka sərakwa mawude bo na, ma kəkay? Ka sərakwa na, Yesu Kəriste a wuda kway, a vəl ha məsəfəre ŋgay hərwi kway. Andza niye nəkway dərma k wəlakwa ha məsəfəre kway hərwi malamar kway hay.

17 Tadə ndowe ye wu ŋgay andaya ada kə sər ha malamar ŋgay andaya nakə wu andaya faya bay, ka kərah məvəlay na, ma sliye magwede «Na wuda Mbəlom» daw? Ma sliye faya mətsike bay!

18 Wawa ga hay, tadə ka gwadakwa ka wudakwa bo na, ta dedək dzənakwa bo nate nate ma walan kway. Bəna ka tsikakwa tə bazlam dekdək tsa bay.

19 Tadə ka gakwa andza niye na, ka sərakwe ye ha 6a nəkway faya ka pakwe ye bəzay a tsəved i dedək. Ada andza niye dərev kway ma dzədzariye bay, ma ndziye zayzay kame i Mbəlom.

20 Kwa tadə dərev kway faya ma dəkway ha ka gakwa mezeleme bəbay na, dərev kway ma dzədzariye bay, ma ndziye zayzay kame ŋgay, hərwi Mbəlom na, bagwar eye a sər kway ha a ze dərev kway.

21 Andza niye dzam ga neheye na wuda kurom haladzay aye, tadə dərev kway kə da ha nəkway ka gakwa mezeleme bay na, kâ deyekwa kame i Mbəlom tə madzədzere aye sa bay.

22 Tadə ka tsətsahakwa faya wu kwa wuye mey na, ma vəlakwe ye hərwi nəkway faya ka rəhakwe ye ha gər a bazlam ŋgay andza faya ka gakwe ye wu nakə a yay a gər aye.

23 Bazlam nakə a gwadəkway rəhakway ha gər aye na, anan: Dzalakwa ha ka Yesu Kəriste Wawa i Mbəlom ada wudakwa bo nate nate ma walan kway andza nakə Mbəlom a tsikakway aye.

24 Ndo nakə ka rəhay ha gər a bazlam ŋgay aye na, neŋgeye mandza eye mə həlay i Mbəlom. Mbəlom dərma k mandza eye ka gər ŋgay. Ka sərakwa ha Mbəlom mandza eye tə nəkway na, kəkay? Ka sərakwa ha na, ta Məsəfəre ŋgay nakə a vəlakway aye.

## 4

*Məsəre ha Məsəfəre i Mbəlom na, kəkay?*

\* 3:12 Madazlay i wu hay 4.8. † 3:12 Zəba ma 1 Yuhana 2.13.

<sup>1</sup> Dzam ga neheye na wuɗa kurom haladzay aye, kâ pumay zləm a bazlam i ndo neheye tã gwad nãteye na, Məsəfəre i Mbəlom andaya fataya aye bəse tsa bay. Ane tuk na, ka sərume ye ha ta dedək tadə Məsəfəre i Mbəlom andaya fataya na, gumay metsehe a bazlam tay lele. Na tsikakum andza niye na, hərwi ndo neheye tã gwad nãteye ndo mädə ha bazlam i Mbəlom aye nãteye andaya ka mändzibəra tsiy.

<sup>2</sup> Ka sərume ye ha tadə ndoweye Məsəfəre i Mbəlom andaya faya ma kəkay na, anañ; Tadə ndoweye kə də ha parakka Yesu Kəriste na, a yaw abəra ka təv i Mbəlom, a təra ndo zezen na, neŋgeye na, Məsəfəre nakə a yaw abəra ka təv i Mbəlom aye andaya faya.

<sup>3</sup> Ane tuk na, tadə ndoweye ka təma Yesu andza niye bay na, Məsəfəre nakə mə dərev ŋgay aye na, Məsəfəre nakə a yaw abəra ka təv i Mbəlom bay aye. Məsəfəre niye na, mäsəfəre i ndo mäne dəre i Kəriste. Ba ka mbərurum mätšəne na, ndo mäne dəre i Kəriste ma deyeweye. Anəke na, ki yaw, neŋgeye andaya ka mändzibəra.\*

<sup>4</sup> Nəkurom na, wawa ga hay, nəkurom wawa i Mbəlom hay. Ka slum ka ndo maraw me niye hay hərwi Məsəfəre nakə mə dərev kurom aye na, neŋgeye gədanj eye a ze na, mäsəfəre i ndo i mändzibəra hay.

<sup>5</sup> Ndo maraw me niye hay, nãteye na, faya ta tsikiye na, ka wu nakə a yatay a gər a ndo i mändzibəra hay ada ndo i mändzibəra hay faya ta pateye zləm na, a nãteye.

<sup>6</sup> Nəkway na, ka tərakwa wawa i Mbəlom hay. Ndo nakə a sər Mbəlom aye na, ma pay zləm a bazlam may. Ane tuk na, ndo nakə ka təra wawa i Mbəlom bay aye na, ma pay zləm a bazlam may bay. Tadə ndoweye mə dərev ŋgay na, mäsəfəre dedək eye kəgəbay mäsəfəre i maraw me na, ka sərakweye ha na, andza niye.

### *Maa vəl mawuɗe bo na, Mbəlom*

<sup>7</sup> Dzam ga neheye na wuɗa kurom haladzay aye, wuɗakwa bo nãte nãte mə walaŋ kway huya. Hərwi mawuɗe bo nakə ka wuɗakweye bo aye a yaw na, abəra ka təv i Mbəlom. Tadə ndoweye ka wuɗa ndo hay na, niye a də ha na, neŋgeye ka təra wawa i Mbəlom ada a sər Mbəlom dərmak.

<sup>8</sup> Ndowneye ka wuɗa ndo hay bay na, a sər Mbəlom bay. Ka sərakwa ha na, hərwi mawuɗe bo i Mbəlom nakə a wuɗa kway aye na, huya.

<sup>9</sup> Mbəlom a bəzakway ha parakka a wuɗa kway na, kəkay? A bəzakway ha a wuɗa kway na, a sləraw wawa ŋgay niye felik eye ka mändzibəra hərwi ada kã ndzakwa huya tã neŋgeye ma sifa nakə a vəlakway aye.

<sup>10</sup> Matəra mawuɗe bo na, mey? Maa lah mawuɗe Mbəlom na, nəkway daw? A'ay! Maa lah mawuɗe kway na, Mbəlom. Ada a sləraw wawa ŋgay na, a mət andza wu nakə tã vəlawa kəriye hərwi ada mã pəsakway ha mezeleme kway hay.

<sup>11</sup> Dzam ga neheye na wuɗa kurom haladzay aye, kə ge Mbəlom a wuɗa kway andza niye na, nəkway dərmak wuɗakwa bo nãte nãte mə walaŋ kway.

<sup>12</sup> Mbəlom na, dāda ndəray kə ŋgatay bay. Ane tuk na, kwa andza niye bəbay na, wuɗakwa bo nãte nãte mə walaŋ kway. Niye a bəz ha na, Mbəlom neŋgeye tã nəkway. Ada faya ma bəziye sa na, ka wuɗakwa Mbəlom peteh andza naka a say aye.

<sup>13</sup> Ka sərakwa ha nəkway mə həlay i Mbəlom ada neŋgeye tã nəkway na, kəkay? Ka sərakwa ha na, hərwi kə vəlakway Məsəfəre ŋgay.

\* 4:3 Zəba ma 1 Yuhana 1.18.

<sup>14</sup> Bəba Mbəlom kə sləraw wawa ŋgay hərwi mətəme ndo i məndzibəra hay. Nəmaa ŋgatay tə dəre may, nəmaa dətatay ha a ndo hay, bazlam nakay na, dedək.

<sup>15</sup> Tadə ndoweye kə gwad̄ Yesu Wawa i Mbəlom na, Mbəlom nənḡeye tə nənḡeye. Nənḡeye dərmaḡ na, mandza eye mə həlay i Mbəlom.

<sup>16</sup> Nəmay na, nəmaa sər ha Mbəlom a wudā kway, ada nəmaa dzala ha dərmaḡ.

Mawudē bo i Mbəlom nakə a wudā kway aye na, huya. Andza niye ndo nakə ka wudā ndo hay huya aye na, nənḡeye ma ndziye mə həlay i Mbəlom. Mbəlom dərmaḡ nənḡeye tə nənḡeye.

<sup>17</sup> Ka sərakwa ha ka wudakwa Mbəlom peteh na, kəkay? Ka sərakwa ha na, pat naka Mbəlom ma gateye sariya a ndo hay aye na, ka dzədzarakweye bay. Ka dzədzarakweye bay na, hərwi məndze kway nakay ka ndzakweye ka məndzibəra aye na, andza Yesu.

<sup>18</sup> Tadə ka sərakwa ha Mbəlom a wudā kway na, ka dzədzarakweye sa bay. Hərwi mawudē bo i Mbəlom nakə a wudā kway aye na, ma zliye fakwaya a bəra madzədzere niye tebiye. Wu nakə ndo hay ta dzədzaray aye na, sariya i Mbəlom. Andza niye tadə ndoweye ka dzədzar na, mawudē bo i Mbəlom ma giye məsler mə dərev ŋgay andza nakə a say a Mbəlom aye bay.

<sup>19</sup> Ka wudakwa Mbəlom ada ka wudakwa ndo hay na, hərwi Mbəlom a lah mawudē kway.

<sup>20</sup> Tadə ndoweye kə gwad̄ na wudā Mbəlom ada faya ma nay dəre a malamar ŋgay na, nənḡeye ndo i maraw me. Kə ŋgatay a malamar ŋgay na, a wudā na bay. Mbəlom na, a ŋgatay bay ada ma wudīye na na, kəkay?

<sup>21</sup> Wu nakə Kəriste a gwad̄akway gum aye na, mey? A gwad̄akway na, ndoweye ka wudā Mbəlom na, mā wudā malamar ŋgay dərmaḡ.

## 5

### *Ŋgwasakwa ka wu i məndzibəra*

<sup>1</sup> Kwa way kə dzala ha ka Yesu, nənḡeye na, Kəriste Wawa i Mbəlom. Ada kwa way ka wudā bəba i wawa hay na, a wudā wawa ŋgay hay dərmaḡ.

<sup>2</sup> Ka sərakwa ha nəkway ka wudakwa wawa i Mbəlom hay na, kəkay? Ka sərakwa ha na, ka wudakwa Mbəlom ada faya ka rəhakway ha gər a bazlam ŋgay mapala eye nakə a tsik aye.

<sup>3</sup> Tadə ka wudakwa Mbəlom ta dedək na, andza məgwedē bazlam ŋgay mapala eye nakə a tsikakway rəhumay ha gər aye na, ka rəhakweye ha gər. Bazlam ŋgay hay mapala eye na, ma wurakweye bo haladzay məpay bəzay bay.

<sup>4</sup> Hərwi kwa way nənḡeye ka təra wawa i Mbəlom na, kə sla ka wu i məndzibəra. Ka slakwa faya na, kəkay? Ka slakwa faya na, hərwi ka dzalakwa ha ka Yesu Kəriste.

<sup>5</sup> Mata sle ka wu i məndzibəra na, way? Mata sle faya na, ndo neheye tə dzala ha tə gwad̄ Yesu na, nənḡeye Wawa i Mbəlom aye.

### *Wu neheye tə dā ha Yesu na, Wawa i Mbəlom aye*

<sup>6</sup> Yesu Kəriste na, ki yaw kə mbəzla a yam nakə ta dzəhuḡ ha a dəma aye ada ta mbəda ha bambaz ŋgay. A yaw na, a mbəzla a yam nakə ta dzəhuḡ ha a dəma aye dəkdek tsa bay. Ta dzəhuḡ ha a yam ada ta mbəda ha bambaz ŋgay. Maa bəzakway ha wu neheye dedək na, maa d̄akway ha na, Məsəfəre i Mbəlom. Nənḡeye na, wu nakə faya ma tsikatēye a ndo hay aye na, dedək.\*

\* 5:6 Ndo məwetse derewel nakay a tsik ka madzəhuḡe i Yesu a yam ta məməte ŋgay.

<sup>7</sup> Maa ðakway ha Yesu Wawa i Mbəlom na, wu hay mahkar.

<sup>8</sup> Wu niye hay mahkar aye na, Məsəfəre, yam tə bambaz. Wu neheye mahkar aye ta təra na, nəte.

<sup>9</sup> Tadə ka təmakwa wu nakə ndo hay ta diye ha ka gər i wu neheye tə ngatay aye na, ka təmakweye bazlam i Mbəlom dərma hərwi bazlam ngay nakə a ða ha aye na, a ze i ndo hay. Maa ðakway ha wu niye hay ka gər i wawa ngay na, Mbəlom eye ngway.

<sup>10</sup> Ndowne kə dzala ha ka Wawa i Mbəlom na, neŋgeye a sər mə gər ngay wu neheye Mbəlom a ða ha aye na, dedək. Ane tuk na, ndowne kə dzala ha ka Mbəlom bay na, a təra ha Mbəlom ndo i maraw me. A təra ha Mbəlom ndo i maraw me na, hərwi a kərah wu nakə Mbəlom a ða ha ka gər i wawa ngay aye.

<sup>11</sup> Wu nakə Mbəlom a ðakway ha aye na, wuye mey? A ðakway ha na, kə vəlakway sifa nakə ma ndəviye bay aye. Sifa niye a vəlakway aye na, tə həlay i wawa ngay.

<sup>12</sup> Ndo nakə neŋgeye mandza eye nəte tə Wawa i Mbəlom aye na, kə huta sifa niye. Ndo nakə neŋgeye mandza eye nəte ta Wawa i Mbəlom bay aye na, neŋgeye kə huta sifa niye bay.

### *Sifa nakə Mbəlom a vəl aye*

<sup>13</sup> Wu neheye na watsakum naha aye na, a nəkurom neheye ka dzalum ha tə məzele i Wawa i Mbəlom aye. Na watsakum naha na, hərwi ada kə sərur ha na, ka hutum sifa nakə ma ndəviye bay aye.

<sup>14</sup> Ahəl nakə nəkway kame ngay aye na, madzədzere andaya mə dərev kway bay. Ka sərakwa ha ta dedək wu nakə ka tsətsahakweye faya tadə a yay a gər na, ma tsənakweye na.

<sup>15</sup> Tadə ka sərakwa ha faya ma tsənakweye na wu nakə faya ka tsətsahakweye tebiye na, ka sərakwa ha ba kə vəlakway wu nakə ka tsətsahakwa aye tsiy.

<sup>16</sup> Tadə ndowne kə ngatay a malamar ngay faya ma giye mezeleme nakə ma diye ha a məməte bay aye na, mə duwulay me a Mbəlom hərwi ndo niye hərwi ada Mbəlom mə vəl aye sifa. Na tsik na, hərwi ndo neheye faya ta giye mezeleme nakə ma diye tay ha a məməte təbey aye dekdek tsa. Na tsik na, hərwi ndo neheye faya ta giye mezeleme nakə ma diye tay a məməte aye bay. Hərwi mezeleme nakə ma diye tay ha ndo hay a məməte aye na, andaya.

<sup>17</sup> Tadə ndowne kə ge mənese wuray wuray na, a ge na, mezeleme. Ane tuk na, mezeleme hay tebiye ma diye ha ndo a məməte bay.

<sup>18</sup> Ka sərakwa ha kwa way ka təra wawa i Mbəlom na, ma giye mezeleme huya sa bay, hərwi Yesu Wawa i Mbəlom faya ma tsəpiye na ada Fakalaw ma sliye faya məgay wuray bay.†

<sup>19</sup> Ka sərakwa ha nəkway na, mə həlay i Mbəlom. Siye i ndo hay tebiye ka məndzibəra na, Fakalaw a ləva tay ha.

<sup>20</sup> Ka sərakwa ha Wawa i Mbəlom ki yaw ka məndzibəra na, kə həndəkakway na mədzal gər kway hərwi ada kə sərakwa Mbəlom nakə neŋgeye dedək aye. Nəkway mandza eye mə həlay i Mbəlom nakə dedək aye ada nəkway mandza eye mə həlay i wawa ngay Yesu Kəriste. Neŋgeye na, Mbəlom nakə dedək aye. Maa vəlakway sifa nakə ma ndəviye bay aye na, neŋgeye.

<sup>21</sup> Wawa ga hay, kə pumay bəzay a kule i ndo neheye faya ta zambaday aye bay.

† 5:18 Zəba ma 1 Yuhana 2.13.



## Masulo i derewel nakə Yuhana a watsa aye

### *Mətsike me*

<sup>1</sup> Neŋ madugula i gay i mađuwule me, na tsikaka naha me na, a nəkar məhay gər i ndo məpe mədzal gər hay ka Yesu nakə ka təra may i wawa hay, Mbəlom a zla kar aye. Na tsikatay naha me a wawa yak hay dərmak. Na wuda tay ha na, haladzay. Maa wuda tay ha na, neŋ dekdək bay. Ndo neheye tebiye tə sər bazlam nakə a tsik ka gər i Mbəlom nakə dedək aye, ta wuda kurom dərmak.

<sup>2</sup> Na wuda kurom na, hərwi bazlam niye dedək aye mandza eye mə dərev kway ada ma ndziye mə dərev kway na, ka tor eye.

<sup>3</sup> Mbəlom Bəba kway ada wawa ŋgay Yesu Kəriste tā pa fakuma ŋgama. Ta sakakweye naha ada ta vəlakweye zay. Nəkway neheye faya ka pakweye bəzay a bazlam nakə dedək aye ada ka wudakwa bo nəte nəte mə walaŋ kway aye na, ka hutakweye wu niye hay.

### *Dedək tə mawude bo*

<sup>4</sup> Dərev ga kə ŋgwasa haladzay hərwi na tsəne na, siye hay mə walaŋ i wawa yak hay faya ta pay bəzay a tsəved nakə dedək aye. Faya ta giye na, wu neheye Mbəlom Bəba kway a gwad gum aye.

<sup>5</sup> A nəkar may ga nakə na wuda kar haladzay aye. Wu nakə a seŋ məgwadaka aye na, anaŋ: Wudakwa bo nəte nəte mə walaŋ kway. Bazlam nakay na watsaka naha aye na, bazlam wəfəye nakə ka tsənum dađa bay aye bay. Na tsikaka naha na, wu nakə 6a ka tsənakwa ahəl niye aye.

<sup>6</sup> Tađə ka wudakwa Mbəlom na, andza məgwede faya ka gakweye wu nakə Mbəlom a tsikakway aye. Mbəlom a gwadakum na, wudum bo nəte nəte mə walaŋ kurom huya. Nakay na, bazlam nakə ka tsənum ahəl niye kurre ka madazlay i bazlam i Mbəlom nakə ka tsənum aye.

<sup>7</sup> Na tsikakum andza niye na, hərwi mey? Na tsikakum andza niye na, hərwi ndo masəpete ndo hay nəteye andaya ta yaw haladzay ka məndzibəra. Nətey na, Yesu Kəriste ka təra ndo zezeŋ, ki yaw ka məndzibəra na, ta təma təbey. Ndo nakə faya ma tsikiye andza niye na, neŋgeye ndo mənə dəre i Kəriste. Neŋgeye ndo masəpete ndo hay.

<sup>8</sup> Hərwi niye, gum metsehe bəna, məsler kurom nakə ka gum tebiye aye mə təra kəriye bay. Duh gum metsehe hərwi ada ka hutumeye wu i madagər kurom nakə Mbəlom a gwad ma vəlakumeye.

<sup>9</sup> Sərum ha na, ndoweye kə pay bəzay a bazlam i Kəriste nakə a tətikakway aye bay, ane tuk na, a ye a səkah ha faya bazlam mekeləŋ eye hay wal na, ndoweye niye mandza eye mə həlay i Mbəlom bay. Ndo nakə faya ma pay bəzay huya a bazlam i Yesu neheye a tətikakway na, neŋgeye na, mandza eye mə həlay i Mbəlom Bəba kway ada mə həlay i wawa ŋgay Kəriste.

<sup>10</sup> Hərwi niye faya na tsikakumeye: Tađə ndoweye ki ye naha a walaŋ kurom faya ma tətikakumeye bazlam nakə wal abəra ka bazlam i Kəriste nakə a tətikakum aye na, ka təmum na mə ye naha a walaŋ kurom bay. Kwa mətsikay me, kâ tsikumay me bay.

<sup>11</sup> Ndowneye kə tsikay me a slala i ndo niye na, neŋgeye dərmak faya ma pay bəzay ka məge mənese nakə faya ma giye.

*Mandave i bazlam hay*

<sup>12</sup> A seŋ məwatsakum naha wu hay haladzay ha6e, ane tuk na, a seŋ məwatsakum naha a 6erewel bay. Na dzala na, na diye naha ka t6v kurom ada wu nak6 a seŋ mətsikakum aye na, ka tsikakweye t6 bazlam h6rwi ada d6rev kway m6 ngwasa lele kurah kurah.

<sup>13</sup> M6hay g6r i ndo neheye a t6ra malammar yak nak6 Mb6lom a zla na aye na, wawa ŋgay hay ta tsikaka naha me.

## Mamahkar i dɛrɛwɛl nakə Yuhana a watsa aye

### *Mətsike me*

<sup>1</sup> Neŋ nakə madugula i gay i maɖuwule me aye, na watsaka naha a nəkar Gayus dzam ga nakə na wuda kar peteh aye.

<sup>2</sup> A nəkar dzam ga nakə na wuda kar haladzay aye, neŋ faya na duwulay me a Mbəlom na, wu hay tebiye tā tɛra lele hɛrwi ada bo yak ta məsəfɛre ta ndziye kame i Mbəlom zayzay lele.

### *Yuhana a dəslay ha gər a Gayus*

<sup>3</sup> Dɛrɛv ga kə ŋgwasa haladzay hɛrwi malamar hay ma mədzal gər ka Mbəlom, ti yawaw kanaan, tə tsikenj ka gər yak na, tə gwad: Nəkar na, faya ka pay bəzay a tsəved i dedek tə dɛrɛv yak nəte. Na sər ha nəkar na, faya ka giye andza niye huya.

<sup>4</sup> Na tsəne wawa hay faya ta pay bəzay a tsəved i dedek na, dɛrɛv ga kə ŋgwasa haladzay. Dada wuray kwa nəte kə yeŋ a gər andza niye andaya bay.

<sup>5</sup> A nəkar dzam ga nakə na wuda kar haladzay aye, nəkar na, faya ka giye wu lele eye. Faya ka dzəniye tay ha malamar kway neheye ka tsəved i Mbəlom aye. Kwa neheye ti yawa naha mbəlok eye hay bəbay na, faya ka dzəniye tay hay.

<sup>6</sup> Ndo neheye ka gatay gər aye na, nəteye ti yaw kanaan tə dəsłaka ha gər haladzay kame i ndo məpe mədzal gər hay. Tə gwad ka wuda tay ha na, haladzay. Neŋ faya na gakeye amboh, dzəna tay pat pat hɛrwi ada təv tay nakə ta diye aye na, tā ye kame kame. Dzəna tay na, andza nakə a yay a gər a Mbəlom aye.

<sup>7</sup> Mede tay nakə faya ta diye na, hɛrwi ada tā ge məsler i Yesu Kəriste. Ane tuk na, ndo neheye tə pay bəzay a Yesu Kəriste bay aye na, tā zla fataya abəra wuray bay.

<sup>8</sup> Hɛrwi niye nəkway ndo mədzal gər ka Mbəlom na, dzənakwa tay ha slala i ndo niye hay hɛrwi ada nəkway ta nəteye kə gakwa məsler dziye ta dedek.

### *Diyotərif ta Demetəriyos*

<sup>9</sup> Na watsa naha dɛrɛwɛl a məhay gər i ndo məpe mədzal gər hay ka Yesu neheye ka təv kurom aye. Ane tuk na, Diyotərif na, a say məpe zləm ka wu nakə na tsik aye bay, hɛrwi neŋgeye a wuda matəre bagwar eye kame i ndo hay.

<sup>10</sup> Na ye naha na, na diye ha mənese ŋgay nakə faya ma giye kame i ndo hay andza neŋgeye nakə faya ma dəsiye fagaya parasay aye. Neŋgeye a ge na, wu neheye dɛkɛk tsa bay. Ndo məpe mədzal gər hay ka Yesu ti yawa a gay ŋgay na, a wuda matəme tay bay. Ndo mekelɛj eye hay a satay matəme ndo məpe mədzal gər hay ka Yesu na, a gatay me, faya ma həhariye tay ha ndo neheye a satay matəme ndo məpe mədzal gər hay ka Yesu aye.

<sup>11</sup> A nəkar dzam ga nakə na wuda kar haladzay aye, ka pay bəzay a mede i ndo niye hay faya ta giye mənese aye bay. Duh pay bəzay na, a mede i ndo neheye faya ta giye wu lele eye. Ndo nakə faya ma giye wu lele eye huya na, neŋgeye ka tɛra wawa i Mbəlom. Ane tuk na, ndo nakə faya ma giye wu neheye lele bay aye hay huya na, neŋgeye a sər Mbəlom zuk bay.

<sup>12</sup> Demetəriyos na, kwa way a tsik faya a gwad: Demetəriyos na, faya ma giye wu nakə lele aye. Nəmay dərmak nəmaa gwad faya na, neŋgeye lele. Ada ka sər ha wu nakə nəmaa tsik aye na, dedek.

*Mandəve i bazlam hay*

<sup>13</sup> Wu hay andaya haladzay a seŋ mətsikaka naha, ane tuk na, a seŋ məwatsaka naha ka dərewel bay.

<sup>14</sup> Na dzala na, neŋ eye na diye naha bəse ka təv yak mazəbaka dəre ada wu nakə a seŋ mətsikaka aye na, ka tsikameye lele.

<sup>15</sup> Zay mâ ndza fakaya! Dzam yak neheye kanan ta wuda kar haladzay aye, ta tsikaka naha me. Tsikatay ha me a dzam kway hay tebiye nəte ta nəte.

## Derewel nakə Yuda a watsa aye Məfələkwe

Derewel i Yuda mawatsa eye na, hərwi ndo məpe mədzal gər hay tebiye ka Yesu. Derewel nakay a ndzəkıt bo i derewel i Piyer masulo eye. Yuda faya ma giye gədanj ka ndo neheye ta sənəkateye parasay a ndo hay aye ada mede tay lele bay aye. Ka slakweye mələve ha ka bo mede 6 hus ka 13 ta 2 Piyer madədo 2.

Yuda a ge məsler ta Dzam Guram eye. A həlaw məsənəke hay abəra mə dəma hərwi ndo məpe mədzal gər hay ka Yesu a həlay ɲgay aye. A ge məsler tə gər i bazlam neheye mə derewel i Yahuda hay andaya mə Derewel i Mbəlom bay aye (mede 9, 14 ada 15).

Yuda a watsa tə bazlam mandala eye ma kəkay Mbəlom ma pərateye a ndo neheye tə kal ha labara i mawudə bo ɲgay aye (mede 3 hus ka 13). Ane tuk na, a gwad mā sakatay ada mā mamatay bo ka mətəme abəra ka mevel i Mbəlom (mede 22-23).

<sup>1</sup> Neɲ Yuda, ndo i məsler i Yesu Kəriste ada neɲ malamar i Yakuba. Na watsakum naha a nəkurom neheye Mbəlom a wudə kurom aye. Neɲgeye a zalakum hərwi ada kə tərüm ndo ɲgay hay, ada Yesu Kəriste ma tsəpiye kurom.

<sup>2</sup> Gumay mə bo a Mbəlom huya, mā vəlakum zay ada mā bəzakum ha mawudə bo ɲgay.

### *Ndo i maraw me hay*

<sup>3</sup> Miya malamar ga hay, həbe na dzala məwatsakum naha ka gər i Mbəlom a təma kway ha na, kəkay ɲgway? Ane tuk na, na watsakum eye naha ənəke tə kutoɲ hərwi na zəba faya na, lele məwatsakum naha. Na watsakum eye naha na, hərwi mə vəlakum gədanj ka məge gədanj ma dedək i Mbəlom nakə ka dzalum ha aye. Sərüm ha na, Mbəlom a vəlatay wu neheye a ndo ɲgay hay. Wu neheye na, ta mbədiye bay ka tor eye.

<sup>4</sup> Na tsik andza niye na, hərwi ndo neheye tə sər Mbəlom bay aye ta gəđ naha a walaɲ kurom ta bəbəkək tay. Ndo niye hay na, ɲgwalak i ndo hay bay. Nətəye faya ta pəliye tsəved ka mambəđay həlay a ɲgwalak i Mbəlom nakə a ge kway aye. Tə gwad na: «Mbəlom kə vəlamay tsəved ka məge kwa mey. Kwa wuray wuray na, nəmaa ləviye gər may.» Andza niye ta kərah Yesu Kəriste bəy nakə ma ləviye kway aye. Ahəl niye kurre ta watsa a Derewel i Mbəlom, slala i ndo niye hay na, sariya i Mbəlom ma ta gəsiye tay ha.

<sup>5</sup> Kwa ka sərüm ha wu neheye kurre bəbay na, a seɲ məmakum ahaya a gər. Mbəlom a təma tay ahaya İsrayel hay a bəra ka dala i Ezipt ahəl niye na, kəkay? Ane tuk na, ndo siye hay ta təma bazlam ɲgay bay. Hərwi niye, Mbəlom kə kəđ tay ha a bəra mə dəma mə walaɲ tay.\*

<sup>6</sup> Sa na, gawla i Mbəlom hay dərmak siye hay mə walaɲ tay a satay təv məndze nakə Mbəlom a vəlatay aye bay, tə gər ha. Hərwi niye Mbəlom a dzawa tay ha tə saselek, ka ndərzəl fataya a ləvonj zəɲzəɲ eye. Ta ndziye mə dəma ka tor eye. Ta həbiye pat i sariya i Mbəlom nakə bagwar aye ma ta gateye a ndo hay tebiye aye.

\* 1:5 Zəba mə Məpesle 14.

<sup>7</sup> Gəma neheye tə zalatay Sodom ta Gomora ada ta gəma neheye tə mbatay naha aye na, mǎ mǎtsakum gər bay dərmaḱ. Ndo i gəma niye hay na, tə gawa mezeleme andza i gawla i Mbəlom niye hay. Tə gawa na, wu neheye lelebay aye wal wal haladzay, wu neheye a ye ka bo i ndo zenʒen ma giye bay aye. Mbəlom kə kal fataya ako nakə ma mbatiye dǎdǎ bay aye. Andza niye, Mbəlom a dǎ ha na, ada ndo hay tǎ ge andza nakay sa bay.<sup>†</sup>

<sup>8</sup> Ndo neheye tə gǎd naha a walaḅ kurom aye na, faya ta giye andza ndo i gəma i Sodom ta Gomora hay dərmaḱ. Faya ta nasiye ha bo tay ta wu neheye lelebay aye, hǎrwi məsine neheye faya ma gatay aye. A satay Mbəlom mǎ ləvatay gər bay. Faya ta tsadiye tay ha gawla i Mbəlom hay.

<sup>9</sup> Kwa Misel neḅgeye nakə bəy ka gər i gawla i Mbəlom hay aye bəbay na, kə ge andza nəteye dǎw? Hǎrwi ahəl niye ta tǎra tə Fakalaw ka mədahaḅ i Musa na, kə tsaday a Fakalaw bay. Ane tuk na, a gwaday a Fakalaw na: «Mbəlom mǎ gaka dǎretsətseh!»

<sup>10</sup> Ane tuk na, ndo neheye nəteye na, faya ta tsadiye a wu neheye tə sər bay aye. Nəteye na, tə dzala gər bay andza wu i pesl hay. Faya ta giye wu neheye a yay a gər a bo tay aye. Wu niye hay faya ta giye andza niye na, ma dziye tay ha dūh.

<sup>11</sup> Waawayah! Dǎretsətseh ka gər tay hǎrwi ta vələy tsǎved a mezeleme mǎ ge fataya bəy andza Kayin.<sup>‡</sup> Faya ta giye sewed hǎrwi ada tǎ huta dala andza Balam nakə a ge ahəl niye aye.<sup>§</sup> Faya ta naseye a Mbəlom andza Kore nakə a ge ahəl niye Mbəlom a dze ha aye.\* Nəteye na, ta dziye andza niye dərmaḱ.

<sup>12</sup> Ahəl nakə faya ka ndayumeye wu mǎnday ka tǎv manəte eye na, nəteye mǎ walaḅ kurom na, andza ndaluḅ nakə ka peteked aye. Wu mǎnday nakə tə ndayawa aye na, ta tǎra ha magurlom i məse guzom. Tə dzala na, ka bo tay dekdek, horoy a gatay bay. Nəteye na, andza pazlay nakə tǎrwenihhe zenʒen aye. Mǎtasl a vǎzl na, a həl na tsekek, kə pa yam bay. Nəteye na, andza dǎrizl i gǎrdaf neheye tə wa bay aye. Kwa hələy i məwe hohway kə sla bəbay na, tə wa bay. Nəteye sa na, andza dǎrizl i gǎrdaf neheye tə ḅgwad tay ha ta zlələy tay hay dzay aye. Ta mət tsadək tsadək.

<sup>13</sup> Nəteye sa na, andza yam nakə mə magayam faya ma viye ta gǎdan kutokutokuto aye. Mezeleme tay na, a zəba parakka andza madǎrsəsam nakə yam a gər ha aye. Nəteye na, andza wurzla neheye tə ḅgwad ədzid tə gər ha tǎv mǎndze tay aye. Mbəlom ka lambadətay tǎv ma ləvonʒ zəḅzəḅ eye. Ta ndziye mǎ dǎma ka tor eye.

<sup>14</sup> Ahəl niye Henok neḅgeye nakə maməkwa ma gawla i Adam aye na, kə tsik kurre ka gər i ndo neheye. A gwad: «Anaḅ Bəy Maduwerḅ ma deyeweye ta gawla ḅgay hay haladzay gǎdǎbille.

<sup>15</sup> Ma deyeweye na, ma gateye sariya a ndo i mǎndzilbǎra hay tebiye. Ma gǎsiye tay ha ndo neheye tə sər Mbəlom bay aye ta sariya. Ma gǎsiye tay ha na, hǎrwi wu neheye tə gay lelebay aye, ada hǎrwi bazlam neheye lelebay tə tsik faya aye.»

<sup>16</sup> Henok a tsik andza niye na, ka nəteye. Nəteye na, faya ta guḅguziye huya. Faya ta wudiye ka bo. Faya ta giye na, wu neheye a say a dǎrev tay aye. Faya ta dǎslay ha gər a bo tay. Faya ta vatay gər a ndo hay hǎrwi ada ndo hay tǎ tǎma bazlam tay.

### *Yuda a vǎlatay gǎdan a ndo mǎdzal gər hay*

<sup>†</sup> 1:7 Zəba mə Madazlay i wu hay 19.1-29. <sup>‡</sup> 1:11 Zəba mə Madazlay i wu hay 4.3-8. <sup>§</sup> 1:11 Zəba mə Mǎpesle 31.16. \* 1:11 Zəba mə Mǎpesle 16.1-35.

<sup>17</sup> A nəkuroom malamar ga hay, wu neheye ndo i maslanj i Bəy Maduweŋ kway Yesu Kəriste tə ɗakum ha ahəl niye tə gwaɗ ma ta giye bo aye na, mā makumaw a gər.

<sup>18</sup> Tə gwaɗawakum na: «Ahəl nakə mazlambar Yesu ma deyeweye na, ndo hay ta giye andaya ta ŋgwasiye ka ndo mape mɗzal gər hay ka Yesu. Nəteye na, tə sər Mbəlom bay. Faya ta giye wu nakə a say a mɗzal gər tay aye.»

<sup>19</sup> Andza niye nəteye na, ndo neheye ta ŋgəniye tay ha ndo mape mɗzal gər hay ka Yesu. Tə dzala i tay na, ka wu i mɗndzibəra, Məsəfəre i Mbəlom andaya mə nəteye bay.

<sup>20</sup> Nəkuroom dzam ga hay na, gum gədaŋ hərwi ada kâ dzənum bo mə walaŋ kurom. Pum mɗzal gər kurom huya ka bazlam neheye ka dzalum ha faya aye. Bazlam neheye na, ti yaw abəra ka təv i Mbəlom. Duwulum me na, ta gədaŋ i Məsəfəre Tsədaŋŋa eye.

<sup>21</sup> Mbəlom na, a wuda kurom. Ndzum mə həlay ŋgay. Nəkway na, pakwa mɗzal gər kway ka Bəy Maduweŋ kway Yesu Kəriste. Ma bəzakweye ha na, ka gakway mə bo ada ma vələkweye sifa nakə ma ndəviye bay aye.

<sup>22</sup> Dzənum tay ha ndo neheye mɗzal gər tay mɗdzadza eye.

<sup>23</sup> Ndo mekeleŋ eye hay na, faya ta vahiyə bo tay a sariya i Mbəlom. Təmum tay ha hərwi ada sariya i Mbəlom mə gəs tay bay. Siye i ndo mekeleŋ eye hay andaya nəteye ta gakum mə bo dərmak. Ane tuk na, gum metsehe bəna, ka ta dəɗumeye a mezeleme tay. Kâ hɗndzəɗum ka wu tay hay bay. Kwa petekeɗ tay niye hay tə gawa ha ka bo mezeleme aye na, kâ tətalum faya bay tebiye.

### *Zambadəkway a Mbəlom*

<sup>24</sup> Zambadəkway a Mbəlom hərwi neŋgeye ma sliye faya mahəbe kurom ada kâ dəɗum abəra ka tsəved ŋgay bay. Neŋgeye na, ma bariye fakuma abəra mezeleme kurom hay, ma təriye kurom ha tsədaŋŋa. Ma diye kurom ha ka təv ŋgay. Ka ta lətsumeye kame ŋgay ka təv i mələve i bəy ŋgay. Ka ta ŋgwasumeye haladzay.

<sup>25</sup> Zambadəkway a Mbəlom na, neŋgeye nəte ŋwenj. Ada maa təma kway ha tə həlay i Bəy Maduweŋ kway Yesu Kəriste na, neŋgeye. Ndo hay tebiye tã zambaday, kwa way mə dəslay ha gər a gədaŋ ŋgay. Neŋgeye na, Bəy Bagwar eye ma ndziye ka tor eye. Andza niye zla ka madazlay hus ka bəgom, ada ka tor eye. Ma təriye andza niye. Amen!



## Məsine i Yuhana Məfələkwe

Ndo məwetse dərewel nakay a watsa na, ka mandəve i makurre i məve temerre ma dəba i Yesu Kəriste. Ahəl niye na, a say a bəy i Roma tã dəslay ha gər andza mbəlom. Siye i ndo məpe mədzal gər hay ta sa dərətsətseh hərwi nakə tə pa mədzal gər tay ka Yesu aye. Ane tuk na, siye hay ta huta gədan bay.

Dərewel i Məsine i Yuhana a ge məsler ka mələve ha ka bo wu hay ada ta mandzəkıt bo i wu hay. Hələy a vay ti yaw na abəra Dzam Guram eye. Məpesle wu hay tə məzəbe i wu hay a dā wu nakə ka ndəv kə rah lele aye.

Madazlay i Məsine i Yuhana (1.1–3.22) na, mə dāma dərewel hay mawatsa eye tasəla.

Ka madədo 4 hus 20 na, tə zla na Yuhana a mbəlom. Ka madədo 4 hus ka 11, a dā ha ma kəkay nakə Yesu a vəl tsəved mahəndəke ada mətsəne dərewel hay i Dzam Guram eye aye. Madədo 12 hus ka 20 faya ma diye ha ka vərəm bagwar eye ka gədan i mənese.

Madədo 21 ta 22 tə dā ha mäge wu wedefeye nakə Mbəlom faya ma ləviye ha bo aye.

<sup>1</sup> Dərewel nakay a tsik ka wu nakə Mbəlom a dāy ha a Yesu Kəriste aye. Mbəlom a dātay ha na, hərwi ada m̄a dātay ha a ndo i məsler hay wu nakə ma ta giye bo aye. Yesu Kəriste a slər gawla ηgay ka təv i ndo i məsler ηgay Yuhana ma məsine hərwi məday ha wu nakay.

<sup>2</sup> Tsa na, Yuhana a tsik wu nakə gawla i Mbəlom a dāy ha aye kame i ndo hay tebiye. Andza məgwede nakə a tsik aye na, bazlam i Mbəlom ada maa dā ha wu neheye a tsik dedek na, Yesu Kəriste.

<sup>3</sup> Mbəlom ma piye ηgama ka ndo nakə a dzaŋga dərewel nakay kame i ndo hay tebiye aye. Ada ndo neheye tə tsəne ada ta rəhay ha gər aye na, Mbəlom ma piye fataya ηgama dərma. Hərwi sər ha na, wu neheye ma ta giye bo aye na, mazlambar kə ndzew.

*Yuhana a tsikatay naha me a məhay gər i ndo məpe mədzal gər hay ka Yesu wal wal tasəla aye*

<sup>4-5</sup> Maa watsa naha dərewel nakay na, neŋ Yuhana. Na watsa naha na, a məhay gər i ndo məpe mədzal gər hay ka Yesu neheye wal wal təv tasəla ka dala i Azi aye.

Mbəlom m̄a pa fakuma ηgama ada m̄a vələkum məndze zay. Neŋgeye andaya kwa ka madazlay, neŋgeye andaya anəke, ada neŋgeye ma maweye sa. Məsəfare ηgay neheye tasəla malətsa eye hay kame i təv məndze i bəy ηgay aye tə Yesu Kəriste, tã pa fakuma ηgama ada tã vələkum zay. Yesu Kəriste neŋgeye ndo məhəle mbal ta dedek eye, neŋgeye makurre i wawa nakə tə lah məwe aye, neŋgeye a lah mələtsew abəra ma mədahan makurre aye ada neŋgeye bəy ka gər i bəy i məndzibəra hay tebiye.

Yesu Kəriste, neŋgeye a wuda kway, kə mət hərwi kway. Kə təmakway ahaya abəra mə mezeleme tə bambaz ηgay.

<sup>6</sup> Ka deyewekweye tə neŋgeye dziye a mələve i bəy ηgay, ka ta ləvakweye tə neŋgeye dziye. Nəkway tə neŋgeye ka təra kway ha ndo məvələy wu a Mbəlom hərwi mäge məsler i Bəba ηgay. Ndo hay tã zambadāy a Yesu Kəriste, gədan tebiye a yaw na, mə neŋgeye ka tor eye. M̄a təra andza niye!

<sup>7</sup> Zəbum dərə: Yesu ma deyeweye na, ma pazlay,

Kwa way tebiye ma ηgateye,

kwa ndo neheye tə slaka na ta suwal aye, ta ɲgateye.\*

Slala hay tebiye ka mändzibəra ta tuwiye hərwi ɲgay.

Ma ta giye na, ta dedek andza niye. Mâ təra andza niye!

<sup>8</sup>Bəy Maduweŋ Mbəlom a gwad: «Maa dazlay a wu tebiye na, neŋ, maa ndəv ha wu hay tebiye na, neŋ gwa.»

Neŋgeye gədan eye ka gər i wu hay tebiye. Neŋgeye andaya kwa ka madazlay, neŋgeye andaya anəke, ada neŋgeye ma maweye sa.

### *Məsine i Yuhana*

<sup>9</sup>Maa watsakum naha dərəwel nakay na, neŋ Yuhana malamar kurom. Neŋ tə nəkurom nəkway madzapa eye tə Yesu Kəriste. Andza niye, neŋ faya na siye dərətətseh andza nəkurom dərma. Nəkway tebiye faya ka səmakway naha. Andza niye, kə pa kway a təv mələve i bəy ɲgay.

Neŋ na, ta gəs ga. Ti ye, tə kal ga ha a gəma nakə malawara eye ta yam tə zalay Patmos aye. Tə kal ga ha a dəma na, hərwi na dawa ha bazlam i Mbəlom. Na gwadawa, maa dəkway ha tsəved dedek eye na, Yesu.

<sup>10</sup>Pat wuray, na zəba dərə na, neŋ mə həlay i Məsəfəre Tsədanŋa eye. Pat eye niye na, pat i luma i sidzew. Tsa na, na tsəne mətsike me ma dəba ga andza tolom. A tsik me ta magala ɲgəlakəka.

<sup>11</sup>A gwedəŋ: «Wu nakə ka ɲgatay aye na, watsa na ka dərəwel. Ka watsa na, sləratay naha a məhay gər i ndo məpe mədzal gər hay ka Yesu neheye təv wal wal tasəla aye. Ma gəma i Efez, ma Simirne, ma Pergam, ma Tiyatir, ma Sardes, ma Filadelfi ada ma Lawdise.»

<sup>12</sup>Na tsəne bazlam niye andza niye na, na mbəda dərə a dəba, na gwad na zəbiye naha ka ndo nakə a tsikerjew me aye. Tsa na, na ɲgatay naha a lalam hay tasəla mavəda eye ta gura, ako mavata eye faya nəte nəte tay eye.

<sup>13</sup>Ma wuzlah i wu niye hay na, na ɲgatay naha a wu eye malətsa eye, a ndəkət bo andza ndo. Suwal i peteked ka bo kutsik ada məbərə bo eye mə dərəv ɲgəts tə wu nakə tə vəd ta gura aye.

<sup>14</sup>Məkweŋ ɲgay a dəv herre andza guguman, dərə ɲgay bəbay na, andza dərneh i ako.

<sup>15</sup>Sik ɲgay hay na, a dəv andza bərə nakə tə pa ako aye. Bədiday ɲgay a ləv andza i yam nakə a vaw abərə mə mahəmba aye.

<sup>16</sup>Mə həlay ɲgay na, wurzla hay tasəla. Maslalam matasla eye hepepe diye sulo sulo faya ma deyeweye abərə mə bazlam ɲgay. Dərə ɲgay andza pat nakə a wur ta magərhpət aye.

<sup>17</sup>Na ɲgatay na, na dəd abərə ka mbəlom kame ɲgay tsədək tsədək andza na mət. Ane tuk na, a pa fagaya həlay i mənday ɲgay. Tsa na, a gwedəŋ: «Kā dzədzar bay, maa dazlay a wu hay tebiye na, neŋ ada maa ndəv ha wu hay tebiye na, neŋ.

<sup>18</sup>Neŋ na, ndo nakə ma ndziye ta sifa aye. Na mət ane tuk na, na lətsew abərə ma mədahan. Neŋ na ndziye ka tor eye. Neŋ na, gədan eye abərə ka mədahan ada neŋ gədan eye ka təv mändze i mədahan hay.

<sup>19</sup>Wu nakə ka ɲgatay tebiye aye na, watsa na. Watsa tay ha wu neheye faya ma giye bo anəke aye tə bəmalə nakə ma giye bo kame tebiye aye.

<sup>20</sup>Wurzla neheye tasəla ka ɲgatay mə həlay ɲgay aye ada lalam hay tasəla mavəda eye ta gura, andza məgwədə mey na, na dakeye ha. Sər ha, wurzla neheye tasəla aye na, gawla i Mbəlom neheye a pa tay ha ada tə tsəpa ndo məpe mədzal gər hay ka Yesu niye hay təv wal wal tasəla aye. Lalam neheye

\* 1:7 Zakari 12.10; Yuhana 19.37.

tasəla mavəda eye ta gura aye a da ha na, ndo məpe mədzal gər hay ka Yesu eye neheye təv wal wal tasəla aye.»

## 2

*Derewel nakə Yesu a sləratay naha a məhay gər i ndo məpe mədzal gər hay neheye ma gəma i Efez aye*

<sup>1</sup> Ndo niye a gwedej sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu neheye ma gəma i Efez aye, gwadatay:

«Maa tsik bazlam eye na, nej Yesu ndo nakə wurzla hay tasəla mə həlay i mənday nğay aye ada neğgeye faya ma həhəliye ma wuzlah i lalam neheye tasəla tə vəd ta gura, ako fataya aye.»

<sup>2</sup> A gwadatay na: «Na sər ha məsler kurom, na sər ha ka gum məsler ta gədan haladzay ada ka səmumay naha a dəretsətseh. Na sər ha sa na, ka vəlumatay tsəved a ndo i sewəd hay a walañ kurom bay. Ndo neheye tə gwəd nəteye na, ndo i maslañ hay, ane tuk na, nəteye ndo i maslañ ga hay bay. Ka zəbum fataya lele, ka sər um ha nəteye na, ndo i parasay hay.

<sup>3</sup> Nəkurom faya ka səmumay naha a dəretsətseh haladzay hərwi ga, ka yum gər bay.

<sup>4</sup> «Ane tuk na, na zəba faya na, mənese andaya mə walañ kurom. Ka wudum ga andza nakə ahəl niye sa bay.

<sup>5</sup> Dzalum ka məndze kurom nakə ahəl niye aye, zəbum dəre təday ka dədu, ka mum ta dəba. Gər um ha mezeleme kurom, ndzum andza nakə ka gawum ahəl niye kurre aye. Tadə ka gər um ha mezeleme kurom bay na, na diye naha na miye ha fakuma abəra lalam nakə mavəda eye ta gura ako faya aye.

<sup>6</sup> «Ane tuk na, nej faya na zambadəkumeye hərwi wu mekeleñ hərwi ka numay dəre a məsler i ndo i Nikolas hay andza nej nakə na nay dəre aye.

<sup>7</sup> «Ndo neheye zləm andaya fataya aye na, tã pay zləm a wu nakə Məsəfəre Tsədanña ma tsikiye a məhay gər i ndo məpe mədzal gər hay ka Yesu aye. Ndo neheye ta səmay naha, ta nğwasa ka dəretsətseh aye na, na vəlateye hohway i gərdaf nakə ma guvah i Mbəlom ma vəlateye sifa a ndo hay aye, ta ndiye.\*»

*Derewel nakə Yesu a sləratay naha a məhay gər i ndo məpe mədzal gər hay neheye ma gəma i Simirne aye*

<sup>8</sup> Ndo niye a gwedej sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu neheye ma gəma i Simirne aye. Maa tsik bazlam nakay na, nej Yesu. Maa dazlay a wu hay tebiye na, nej ada maa ndəv ha wu hay tebiye na, nej. Na mət ada na lətsew abəra ma mədahañ.

<sup>9</sup> «Na sər ha dəretsətseh kurom, na sər ha nəkurom mətawak eye hay. Ane tuk na, nəkurom zlele eye hay duh. Wu neheye lele bay ndo hay faya ta tsikiye fakuma aye na, na sər ha dərmak. Ndo neheye faya ta tsikiye fakuma aye na, tə gwəd nəteye Yahuda hay. Ane tuk na, nəteye Yahuda hay bay, nəteye ndo i Fakalaw hay.

<sup>10</sup> «Mazlambar ka sumeye dəretsətseh, ane tuk na, kã dzədzarum bay. Tsəne! Mazlambar Fakalaw ma gəsiye siye i ndo hay mə walañ kurom na piye tay ha a danğay hərwi madzədzam kurom. Ka sumeye dəretsətseh məhəne kuro. Kwa ta kədiye kurom bəbay na, səmumay naha, kã gər um ha mədzal gər

\* 2:7 Madazlay i wu hay 2.8-9.

abəra ka Mbəlom bay. Andza niye, na vəlakumeye magogoy kurom na, sifa nakə ma ndəviye bay aye.

<sup>11</sup> «Ndo neheye zləm andaya fataya aye na, tâ pay zləm a wu nakə Məsəfəre Tsədanña eye ma tsikateye a məhay gər i ndo məpe mədzal gər hay ka Yesu aye: Ndo neheye ta səmay naha, ta ɲgwasa ka dəretsətseh aye na, ta mətiye məməte masulo eye sa bay.»

*Derewel nakə Yesu a sləratay naha a məhay gər i ndo məpe mədzal gər hay neheye ma gəma i Pergam aye*

<sup>12</sup> Ndo niye a gwedəɲ sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu neheye ma gəma i Pergam aye.

«Maa tsik bazlam nakay na, neɲ Yesu ndo nakə maslalam faya matasla eye hepepe diye sulo aye.

<sup>13</sup> Təv nakə nəkurom mandza eye mə dəma aye na, na sər. Nəkurom mandza eye ma təv nakə Fakalaw neɲgeye bəy eye mə dəma aye. Kwa ahəl nakə tə kəf Anɲipas ndo nakə a tsikawa bazlam ga kame i ndo hay tebiye neɲgeye ndo ga aye na, ka gərūm ga ha bay, ka pum mədzal gər kurom ka neɲ huya. Tə kəf na mə walaɲ kurom ma gəma kurom ma təv nakə Fakalaw mandza eye mə dəma aye, ada dūh huya faya ka dūmeye ha parakka neɲ na, bəy kurom.

<sup>14</sup> «Ane tuk na, na zəba faya na, mənese hay andaya mə walaɲ kurom. Ndo hay andaya mə walaɲ kurom faya ta pay bəzay a matətike i Balam nakə ahəl niye aye. † A tətikay a Balak ma dzəgədiye tay ha Israyel hay a mənese. A vatay gər hərwi ada tâ həpəf slo i kule, ada tâ ge madama dərmak.

<sup>15</sup> Siye hay mə walaɲ kurom faya ta giye andza niye dərmak. Nəteye faya ta pay bəzay a wu nakə ndo i Nikolas hay‡ faya ta tətikiye.

<sup>16</sup> «Mbədum ha mede kurom. Tadə ka mbədum ha mede kurom bay na, na diye naha mazlambar ka təv kurom ta maslalam nakə ma deyeweye abəra mə bazlam aye, na giye ha vəram ka ndo kurom niye hay.

<sup>17</sup> «Ndo neheye zləm andaya faya aye na, tâ pay zləm a wu nakə Məsəfəre Tsədanña eye ma tsikateye a məhay gər i ndo məpe mədzal gər hay ka Yesu aye.

«Ndo neheye ta səmay naha, ta ɲgwasa ka dəretsətseh aye na, na vəlateye dəf nakə dādā ndo hay ta ɲgatay bay aye. Na vəlateye kwar herre eye, məzele wedəye mawatsa eye ka kwar eye niye. Məzele niye na, ndaray a sər bay. Mata səre na, ndo nakə ka təma na a həlay aye.»

*Derewel nakə Yesu a sləratay naha a məhay gər i ndo məpe mədzal gər hay neheye ma gəma i Tiyatir aye*

<sup>18</sup> Ndo niye a gwedəɲ sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu neheye ma gəma i Tiyatir aye.

«Maa tsik bazlam nakay na, Wawa i Mbəlom. Dəre ɲgay na, andza dərneh i ako. Sik ɲgay hay a dəv andza bəre nakə tə pa ako aye.

<sup>19</sup> «Na sər ha məsler kurom hay. Na sər ha ka wudum ndo hay ada faya ka pumeye mədzal gər kurom ka neɲ huya. Na sər ha faya ka səmumeye naha a dəretsətseh. Na sər ha na, faya ka dzənumeye siye i ndo hay dərmak ada wu nakə faya ka gumeye anəke aye na, a ze nakə ahəl niye aye.

† 2:14 Zəba mə Məpesle 31.16, 22.1–25.9. ‡ 2:15 Məsine i Yuhana 2.6.

20 «Ane tuk na, na zəba faya na, mənese andaya mə walaŋ kurom. Nğwas niye tə zalay Zizabel aye na, ka vəlumay tsəved məndze mə walaŋ kurom. A gwad neŋgeye na, ndo məde ha bazlam i Mbəlom. Ane tuk na, neŋgeye faya ma vateye gər a ndo i məsler ga hay, neŋgeye faya ma tətikateye mäge madama ada ka mahəpəde slo i kule.

21 Na paslay həlay eye hərwi ada mâ mbəda ha mede nğay, ane tuk na, a say bay, neŋgeye faya ma giye madama huya.

22 «Hərwi niye, na vəleye dəretsətseh haladzay, ma siye dəretsətseh ka təv məhəne nğay. Ndo neheye tə gawa madama dziye na, ta siye dəretsətseh haladzay dərmak. Tadə ta gər ha mezeleme tay ada ta gər ha mezeleme tay bay na, ta mətiye.

23 Na bəbazliye tay ha wawa nğay hay hərwi ada məhay gər i ndo məpe mədzal gər hay ka Yesu ma gəma wal wal tebiye tã sər ha na, wu nakə ndo hay faya ta dzaliye mə gər tay ada wu nakə a yatay a gər aye, neŋ na sər ha tebiye. Nəkurom tebiye na vəlakumeye magogoy kurom na, dā ka məsler nakə ka gum aye.

24 «Ane tuk na, nəkurom siye neheye ma gəma i Tiyatir ka pumay zləm a bazlam i nğwas niye təbey aye, wu nakə ndo hay tə zalay wu mənğaha eye i Fakalaw aye na, nəkurom ka sərur təbey. A nəkurom na, bazlam mekeləŋ eye andaya nakə na tsikakumeye bay.

25 Wu nəte na, pum na wu nakə ka tətikumeye a gər bəŋbəŋ lele hus a pat nakə na maweye.

26 «Ndo neheye ta səmay naha, ta nğwasa ka dəretsətseh aye ada faya ta giye wu nakə a yeŋ a gər aye hus ka mandəve i məndzibəra na, na vəlateye gədaŋ ka slala i ndo hay tebiye.

27 Na vəlateye gədaŋ andza gədaŋ nakə Bəba a vələŋ aye dərmak. Ta ləviye ndo hay ta gədaŋ, ta bəbazliye tay ha ndo i sewed hay andza ndo nakə ma həbiye tay ha guram i səŋgəle hay ndəslof ndəslof aye.

28 Na vəlateye bamtaŞ nakə a dəv ta mbəlomda aye dərmak.

29 «Ndo nakə zləm andaya faya aye na, mâ pay zləm a wu nakə Məsəfəre Tsədaŋna eye ma tsikateye a məhay gər i ndo məpe mədzal gər hay ka Yesu aye.»

### 3

*Derewel nakə Yesu a sləratay naha a məhay gər i ndo məpe mədzal gər hay neheye ma gəma i Sardes aye*

1 Ndo niye a gwedəŋ sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu neheye ma gəma i Sardes aye.

«Maa tsik bazlam nakay na, neŋ Yesu ndo nakə Məsəfəre i Mbəlom tasəla mə həlay nğay aye ada wurzla hay tasəla mə həlay nğay aye dərmak. Na sər wu nakə faya ka giye aye. Ndo hay faya ta dəslakumeye ha gər tə gwad ka hutum sifa, azlakwa duh nəkar andza maməta eye.

2 «Pədəkum, gum gədaŋ bəna ka mətəumeye tsədək tsədək hərwi na zəba faya məsler kurom ka dəre i Mbəlom na, tsədaŋna zuk bay.

3 Dzalum na, ka wu nakə ka tsənum ahəl niye aye ada ka təmum bazlam i Mbəlom na, ma kəkay aye ada mbədum ha mede kurom. Niye na, pum na a dərev kurom. Tadə ka pədəkum bay na, sərur ha na diye naha ka təv kurom.

Ane tuk na, na diye naha a həlay waray na, ka sərume ye ha bay. Na diye naha andza məkal.

<sup>4</sup> «Ane tuk na, ndo siye hay andaya mə walaŋ kurom ma gəma i Sardes, nəte ye ta ge ndəluḅ ka peteked tay təbey. Nəte ye na, tə yeŋ a gər lele. Ta piye peteked herre eye ka bo ada nəmaa diye ka bo dziye.

<sup>5</sup> «Andza niye, na kalate ye ka bo peteked herre eye a ndo nehe ye tə səmay naha tə ŋgwasa ka dəretsətseh aye. Ta watsa məzele tay a derewel nakə tə watsa a dāma məzele i ndo nehe ye ta huta sifa aye. Dada na mbatiye ha məzele tay abəra mə derewel nakay bay. Na diye tay ha kame i Bəba ga Mbəlom ada kame i gawla ŋgay hay, nəte ye i ga hay.

<sup>6</sup> «Ndo nakə zləm andaya faya na, mā pay zləm a wu nakə Məsəfəre Tsədanŋa eye ma tsikate ye a məhay gər i ndo məpe mədzal gər hay ka Yesu aye.»

*Derewel nakə Yesu a sləratay naha a məhay gər i ndo məpe mədzal gər hay nehe ye ma gəma i Filadelfi aye*

<sup>7</sup> Ndo niye a gwedəŋ sa: «Watsa bazlam nakay, sləray naha a gawla i Mbəlom nakə faya ma tsəpiye məhay gər i ndo məpe mədzal gər hay ka Yesu nehe ye ma Filadelfi aye.

«Maa tsik bazlam nakay na, neŋ Yesu ndo nakə a yaw abəra ka təv i Mbəlom ada neŋge ye na, a raw me təbey. Kəle i bəy Davit na, mə həlay ŋgay. Tadə ka həndək abəra ma məged na, ndəray andaya ma sliye faya madərəzl na bay. Tadə ka dəərəzl na məged na, ndəray ma sliye faya mahəndəke na bay.

<sup>8</sup> «Na sər wu nakə faya ka gumeye aye. Na sər ha gədan kurom na, tsekwen tsa, ada azlakwa ka gum wu nakə a yeŋ a gər aye həbe bədaw? Ka rəhumay ha gər a bazlam ga, ka gwadum nəkurom na, ndo ga hay. Na həndək abəra ma məged hərwi kurom, ndəray ma sliye faya madərəzle na bay.

<sup>9</sup> Tsənum, anaŋ wu nakə na giye ta ndo nehe ye nəte ye ndo i Fakalaw hay aye. Faya ta tsikiye tə bazlam, tə gwad nəte ye Yahuda hay, ane tuk na, nəte ye Yahuda hay bay, ta raw me dəkdək tsa. Na gate ye kutoŋ, tā yaw tā dəkwakum gurmets. Ta səriye ha na, na wuda kurom.

<sup>10</sup> Nəkurom na, ka səmumay naha a bazlam ga andza nakə na tsikakum səmumay naha aye. Hərwi niye, neŋ na tsəpiye kurom hərwi ada kə yum a dəretsətseh bay. Dəretsətseh nakay ma diye kwa ka way, ma dziye tay ha ndo i məndzibəra hay tebiye.

<sup>11</sup> Mazlambar na maweye. Pum wu nakə ka tətik aye bəŋbəŋ a gər hərwi ada mā buwa fakuma abəra magogoy kurom bay.

<sup>12</sup> «Ndo nehe ye tə səmay naha, tə ŋgwasa ka dəretsətseh aye na, na piye tay ha a gay i mədəslay ha gər a Mbəlom ga andza sik i galak nakə tə lawa a wuzlah i gay aye, ta ndziye ka tor eye. Wuray andaya nakə ma həharatay ahaya abəra mə dāma aye bay. Na watsiye məzele i Mbəlom ga ka nəte ye, tə məzele i gəma i Mbəlom ga. Gəma niye na, Zerozelem wedeye. Mbəlom ma sləraweye abəra mə mbəlom. Na watsiye məzele ga wedeye ka ndoweye nehe ye dərmak.

<sup>13</sup> «Ndo nakə zləm andaya faya na, mā pay zləm a wu nakə Məsəfəre Tsədanŋa eye ma tsikate ye a məhay gər i ndo məpe mədzal gər hay ka Yesu aye.»

*Derewel nakə Yesu a sləratay naha a məhay gər i ndo məpe mədzal gər hay nehe ye ma gəma i Lawdise aye*

<sup>14</sup> Ndo niye a gwedəŋ sa: «Watsa bazlam nakay, sləray naha a gawla i Mbəlom nakə faya ma tsəpiye tay ha məhay gər i ndo məpe mədzal gər hay ka Yesu nehe ye ma Lawdise aye.

«Maa tsik bazlam nakay na, neŋ Yesu ndo nakə tə zalay “Mâ təra andza niye” aye. Faya ma diye ha wu nakə Mbəlom a ge aye, maraw me andaya mə bazlam ŋgay kwa tsekweŋ bay. Mbəlom a ge wu hay tebiye na, tə həlay ŋgay.

<sup>15</sup> «Na sər wu nakə faya ka gumeye. Nəkurom hiyatsatsa bay ada laluh laluh wal bay sa. Ka ndzumeye mə wuzlah eye ganğəlanğəlanğə andza niye na, a yeŋ a gər bay.

<sup>16</sup> Nəkurom hiyatsatsa bay ada laluh laluh kəgəbay daduk daduk wal bay sa, nəkurom mandza eye ma wuzlah eye andza niye sa na, na vənahiye kurom ahaya abəra mə bazlam ga.

<sup>17</sup> «Ka gwađum nəkurom na, zlele eye, ka hutum wu hay tebiye, wuray a kətsakum bay. Ane tuk na, nəkurom dəretsətseh eye hay, ka gum mə bo. Nəkurom mətawak eye hay peteked andaya fakuma bay, nəkurom guluf eye hay na, ka sərurum bay.

<sup>18</sup> Hərwi niye, neŋ faya na tsikakumeye wu nakə ka gumeye. Səkənum gura nakə ta lambad ta ako, a dəv wuzl wuzl haladzay aye. Dumara, səkənum mə gay ga hərwi ada kâ tərurum zlele eye hay ta dedek. Dumara, səkənum peteked herre eye, kâ pum ka bo. Andza niye horoy ma gakumeye sa bay hərwi nəkurom bo kəriye sa bay. Səkənum sidem i dəre, mâ dzəna kurom hərwi ada kâ ŋgatamay a wu hay sa.

<sup>19</sup> «Neŋ na, ndo neheye na wuda tay ha aye na, na ŋgərəziye fataya, na dətay ha metsehe. Kə ge andza niye na, mbəđum ha mede kurom, pumeŋ bəzay tə dərev kurom peteh.

<sup>20</sup> Tsənum, na ləsiye ka həlay i məged ada na zaliye. Ndo nakə kə tsəne bəđidəy ga aye ada ka həndəkəŋ na məged na, na fələkwıye a gay ŋgay, nəmaa ndiye dəf salamay.

<sup>21</sup> «Ndo neheye ta səmay naha, ta ŋgwasa ka dəretsətseh aye na, na vəlateye tsəved hərwi ada tə yaw, nəmaa ndziye ka təv məndze i bəy ga, andza neŋ na səmay naha, na ŋgwasa ka dəretsətseh aye, ada neŋ ta Bəba ga, nəmay ndziye mə bəy ŋgay.

<sup>22</sup> «Ndo nakə zləm andaya faya na, mâ pay zləm a wu nakə Məsəfəre Tsədanğəna eye ma tsikateye a məhay gər i ndo məpe mədzal gər hay ka Yesu aye.»

## 4

### *Məged mahəndəka eye mə mbəlom*

<sup>1</sup> Ma dəba eye na, na ŋgatay a wu mekeləŋ.

Na ŋgatay a məged mahəndəka eye mə mbəlom, na tsəne bəđidəy i ndo nakə a ləv andza tolom a tsikeŋ me meeneŋ aye sa. A gwedeŋ: «Tsəlaw a gəma kənanğ hərwi ada na dəkeye ha wu nakə ma giye bo kame mba aye.»

<sup>2</sup> Kwayaŋğəna Məsəfəre Tsədanğəna eye a yaw a zla ga. Tsa na, na ŋgatay a təv məndze i bəy mə mbəlom. Ndoweye mandza eye faya.

<sup>3</sup> Ndo niye mandza eye na, da'ar ŋgay a wuzl dəre andza kwar nakə ŋgwalak eye, tə zalay *zaspə* ada *sardowan* aye. Kulay a lawara na təv məndze i bəy niye tuwzik. Kulay niye na, a wuzl dəre andza kwar ŋgwalak eye, tə zalay *emerod* aye dərmak.

<sup>4</sup> Təv məndze hay kuro kuro sulo gər eye fad dandahtahha tə lawara na təv məndze i bəy niye. Madugula hay kuro kuro sulo gər eye fad mandza eye hay faya. Peteked neheye ka bo tay aye na, kwedek kwedek. Kwa way tə dzagwa i bəy mə gər. Dzagwa niye hay na, tə ŋgar ta gura.



<sup>5</sup> Mawutseǰe i mbəlom a wutseǰew abəra ma təv məndze i bəy niye. Maləve i mbəlom a ləvwaw abəra mə dəma dərma. Kame i təv niye na, wuye hay andaya tasəla andza lalam, ako faya a dəv haladzay. Wu niye hay tasəla andza lalam aye, nəteye na, məsəfəre neheye tasəla mandza eye kame i Mbəlom aye.

<sup>6</sup> Kame i təv məndze i bəy niye na, wuye andaya andza dəlov, a wuzl dəre andza malam, dəre a ye abəra mə dəma kwetseh kwetseh.

Wu hay fad tə lawara na təv məndze i bəy a wuzlah. Wu niye hay na, wu neheye ta məsəfəre tay aye. Ta dəba, dəre andaya fataya ada ta diye i me dəre andaya fataya, ɲgurti ɲgurti.

<sup>7</sup> Wu niye makurre aye na, a ndzəkkit bo zil, masulo eye a ndzəkkit bo vo'ar i sla wawa eye, mamahkar eye na, da'ar ɲgay a ndzəkkit bo ndo zezeɲ ada mafad eye a ndzəkkit bo matsəv nakə faya ma tsəviye aye.

<sup>8</sup> Wu neheye fad aye na, kwa way ta gwezleviyek eye hay faya məkwa məkwa. Ka gwezleviyek niye hay dəre hay fataya haladzay ta dəba eye kwa tə huǰ eye ndotsndotsta. Ta həpat kwa ta həvad faya ta giye dəmes huya, tə gər ha bay. Ma dəmes tay niye na, tə gwad:

«Bəy Maduweɲ Mbəlom nəkar na, tsədaɲɲa  
kwa mənese andaya ka təv yak bay,  
nəkar gədaɲ eye ka gər i wu hay tebiye,

nəkar andaya kwa ahəl niye, nəkar andaya anəke, ada ka deyeweje.»

<sup>9</sup> Andza niye, wu neheye fad aye na, tə gawa dəmes ada ta zambadaway a Mbəlom nakə mandza eye ka təv məndze i bəy ɲgay aye ada a neɲgeye nakə ma ndziye ka tor eye. Tə dəslay ha gər, tə gay sisə.

<sup>10</sup> Ahəl nakə tə gawa ha andza niye na, madugula neheye kuro kuro fad aye ta dəkwawa gurmets kame i Mbəlom, neɲgeye nakə mandza eye ka təv məndze i bəy ɲgay aye ada neɲgeye mandza eye ka tor eye. Tə dəsławay ha gər, ta tsakwawa dzagwa i bəy niye hay mə gər tay aye tə pawa kame ɲgay, tə gwad:

<sup>11</sup> «Bəy Maduweɲ may Mbəlom,  
nəkar na, ka sla da,

ndo hay tā dəsłaka ha gər,

tā zambadaka ta defek

ada gədaɲ a yaw na, mə həlay yak.

Hərwi maa ge wu hay tebiye na, nəkar,

wu neheye a ge bo na,

hərwi a saka wu neheye tebiye tā ge andaya.»

## 5

### *Ta zambaday a ndo nakə a təra andza wawa i tədaɲ i Mbəlom aye*

<sup>1</sup> Tsa na, na ɲgatay a dərəwel mə həlay i ndo nakə mandza eye ka təv məndze i bəy aye. Dərəwel niye na, məgəsa eye mə həlay i mənday. Tə watsa faya wu na, diye sulo sulo. Tə paǰa na ka bo. Tə gəs na tə wu məgəse dərəwel təv tasəla hərwi ada mə həndək bay.

<sup>2</sup> Ma dəba eye na ɲgatay a gawla i Mbəlom gədaɲ eye, a tsətsah ta magala, a gwad: «Way nakə ɲgwalak eye kame i Mbəlom kə sla da məpələ faya abəra wu məgəse dərəwel ada ma həndəkkiye na aye na, way?»

<sup>3</sup> Ane tuk na, ndəray kwa nəte nakə ma sliye faya məhəndəke ada ma zəbiye ka wu nakə mə dəma aye na, andaya bay tebiye. Mə mbəlom, ka dala, mə bəǰ, kwa ka waray, ndəray andaya bay.

<sup>4</sup> Na tuwa haladzay hərwi ndəray andaya ɲɟwalak eye kame i Mbəlom nakə ma sliye mahəndəke dərəwel ada ma zəbiye a dəma dərə aye na, andaya kwa nəte bay.

<sup>5</sup> Ane tuk na, nəte mə walaɲ i madugula neheye kuro kuro sulo gər eye faɖ aye a gwedeɲ: «Kâ tuwa bay, zəba dərə: Zil nakay na, a yaw abəra ma gwala i Yahuda, neɲgeye gwala i Davit. Neɲgeye kə ɲɟwasa ka wu hay tebiye, ma pəliye ha wu məgəse dərəwel neheye tasəla aye ada ma həndəkiye na dərəwel.»

<sup>6</sup> Tsa na, na ɲɟatay a ndoweje, neɲgeye malətsa eye ma wuzlah i təv məndze i bəy. Madugula neheye kuro kuro sulo gər eye faɖ aye tə wu neheye faɖ aye tə lawara na a wuzlah. A ndzəkɪt bo na, wawa i təbən, andza ta kəd na ahəl niye nəte. Dəram ka gər ɲɟay tasəla ada dərə andaya faya tasəla dərmak. Dərə neheye tasəla aye na, məsəfəre neheye kame i Mbəlom aye, Mbəlom faya ma sləriye tay ha ka məndzibəra tebiye.

<sup>7</sup> Wawa i təbən niye a ye ka təv i ndo nakə mandza eye ka təv məndze i bəy aye. A ye naha na, a təma na dərəwel abəra mə həlay i mənday ɲɟay.

<sup>8</sup> A təma faya abəra dərəwel niye na, wu neheye faɖ aye ta madugula neheye kuro kuro sulo gər eye faɖ aye ta dəkw gurmets kame ɲɟay. Nəteye niye tebiye kwa way ta gandzaval mə həlay ada ɲɟwalak i gandayah hay mavəda eye ta gura andaya fataya dərmak maraha eye hay tə wu eye andaya tə pawa faya ako na, a ze hunɲa. Wu niye a ze hunɲa eye na, maɖuwule me i ndo məpe mədzal gər hay ka Yesu neheye ta dūwulaway naha me aye.

<sup>9</sup> Tə ge dəmes wedəye. Ma məge dəmes tay nakə faya ta giye na, tə gwad: «Nəkar na, ka sla dā matəme dərəwel nakay  
ada mahəndəke na wu nakə tə gəs ha aye dedək.

Hərwi ta kəd kar andza wawa i təbən nakə tə kədaway a Mbəlom aye,  
ada ka səkəmatay ahaya ndo hay abəra mə mezeleme tə bambaz yak,  
ka həlatay ahaya ka təv i Mbəlom.

Kwa nəteye na, gwala waray,  
kwa tə tsik me i gəma waray,  
kwa slala waray,  
kwa nəteye mandza eye ma gəma waray,  
nəkar ka həlatay ahaya ka təv i Mbəlom.

<sup>10</sup> Ka təra tay ha ndo yak hay, nəkar ka ləvateye gər.

Ka təra tay ha ndo məvəlay wu a Mbəlom  
hərwi ada tə gay məsler a Mbəlom,  
ada nəteye ta təriye bəy ka məndzibəra tebiye.»

<sup>11</sup> Tsa na, na ɲɟatay a gawla i Mbəlom hay, gwezem gwezem haladzay ma pasliye bo bay. Tə lawara na təv məndze i bəy ada wu neheye faɖ aye ta madugula neheye kuro kuro sulo gər eye faɖ aye telelewiw a wuzlah. Na tsəne dəmes tay.

<sup>12</sup> Tə gawa dəmes ta magala, Tə gwad:  
«Wawa i təbən nakə tə kəd na aye na,  
gədan tebiye mə həlay ɲɟay,  
zlele tebiye na, i ɲɟay,  
a sər wu hay tebiye,  
neɲgeye gədan eye.

Neɲgeye na, kə sla ndo hay  
tə dəslyay ha gər ada tə zambaday.  
Zəba faya təday, neɲgeye na, məzlaḅ eye.»

<sup>13</sup> Tsa na, na tsəne məge dəmes i wu neheye tebiye Mbəlom a ge aye. Wu neheye mə mbəlom aye, neheye ka məndzibəra aye, neheye ma bəd aye, neheye ma dəlov aye, tə gawa dəmes tay eye, tə gwad:

«Zambadəkway a ndo nakə neŋgeye mandza eye ka təv məndze i bəy aye ada a ndo nakə neŋgeye andza wawa i təbaŋ aye,

dəslakwatay ha gər.

Gədaŋ tebiye a yaw na, abəra ma nəteye.

Zəba, nəteye na, məzlaḅ eye hay ka tor eye.»

<sup>14</sup> Wu neheye fad aye ta mbəda faya tə gwad: «Mā təra andza niye!» Madugula neheye kuro kuro sulo gər eye fad aye na, ta dəkw gurmets kame i ndo neheye nəteye mandza eye ka təv məndze i bəy aye ada tə dəslatay ha gər.

## 6

### *Wawa i təbaŋ a dazlay a məpəle ha wu neheye tasəla tə bar ha dərewel aye*

<sup>1</sup> Ahəl nakə Wawa i təbaŋ a təma dərewel a həlay, a dazlay məpəle ha wu neheye tasəla tə bar ha dərewel aye na, na ŋgatay. A pəla ha nəte. Tsa na, na tsəne mətsike me abəra mə walaŋ i wu neheye fad aye, mətsike me ŋgay niye a ləv andza mələve i mbəlom, a gwad: «Dara!»

<sup>2</sup> Tsa na, na ŋgatay a pəles kudəkudək eye. Ndo mandza eye faya, tə lalaŋ eye mə həlay. Tə pay dzagwa i bəy a gər. Mata sle ka wu hay tebiye na, neŋgeye. A ye məge vərəm ada ma ŋgwasaweye fataya.

<sup>3</sup> Wawa i təbaŋ niye a pəla ha masulo i wu neheye tə bar ha dərewel aye. Na tsəne mətsike me abəra mə walaŋ i wu neheye fad aye, masulo eye mə walaŋ tay, a gwad sa: «Dara!»

<sup>4</sup> Tsa na, pəles neŋged a yaw. Pəles niye na, a zəba ndozza andza ako. Ndo nakə mandza eye faya aye na, tə vələy gədaŋ ka məzle vərəm, maye ha ka məndzibəra hərwi ada ndo hay tā kəd bo. Tə vələy maslalam bagwar eye a həlay.

<sup>5</sup> Tsa na, Wawa i təbaŋ a pəla ha mamahkar i wu neheye tə bar ha dərewel aye. Tsa na, na tsəne mətsike me a tsənew abəra mə walaŋ i wu neheye fad aye, mamahkar eye mə walaŋ tay a wuda, a gwad sa: «Dara!» Kwayaŋŋa, na ŋgatay a pəles a zəba zəŋzəŋ. Ndo nakə mandza eye faya aye na, agwada mə həlay ŋgay.

<sup>6</sup> Na tsəne mələve i wu mə walaŋ i wu neheye fad aye andza mətsike me i ndo. A gwad: «Suloy nakə tə ge faya məsler hwapat aye a sla wuray bay. Ta səkəmiye daw agwada nəte tsa. Tadə bale na, ta səkəmiye agwada mahkar.» A gwad sa: «I mal ta guzum na, ka nas ha bay.»

<sup>7</sup> Wawa i təbaŋ a pəla ha mafad i wu neheye tə bar ha dərewel aye. Tsa na, na tsəne mətsike me a tsənew abəra mə walaŋ i wu neheye fad aye, mafad eye mə walaŋ tay a wuda, a gwad: «Dara!»

<sup>8</sup> Tsa na, na ŋgatay a pəles mekeləŋ eye a yaw. Mazəbe ŋgay eye na, a zəba kulah kulah andza gəŋgis. Ndo nakə mandza eye faya aye na, məzele ŋgay Mədəhaŋ nakə ma kədiye ndo hay aye. Ndo nakə tə zalay Təv Məndze i Mədəhaŋ hay aye na, faya ma pay bəzay. Ta ŋəna ha məndzibəra fad. Tə vələtay nəte ada tə vələtay faya gədaŋ hərwi ada tā bəbazl tay ha ndo hay abəra mə dəma. Ta bəbazliye tay ha ta maslalam ada siye hay ta mətiye tə may, siye hay ta mətiye ta dəvats ada wu i peşl hay ta bəbazliye tay ha.

<sup>9</sup> Wawa i təbaŋ a pəla ha mazlam i wu neheye tasəla tə bar ha dərewel aye. Tsa na, na ŋgatay a ndo neheye tə kəd tay ha ahəl niye aye ma huvo i təv

məvələy wu a Mbəlom aye. Ndo neheye tə kədf tay ha ahəl niye na, hərwi ta təma bazlam i Mbəlom ada hərwi nakə tə dəwa ha parakka aye.

<sup>10</sup> Ta wuda ta magala, tə gwad: «Bəy Məduweñ may nəkar na, tsədañña. Nəkar ka tsik na, dedek huya. Ndo neheye ka məndzibəra tə kədaw may aye, ka gateye sariya na, kəday? Ka gateye dəretsətseñ na, kəday?»

<sup>11</sup> Tsa na, nəteye tebiye tə pa fataya peteked küdeküdek eye. Tə gwadatay: «Həbum tsekweñ təmad təday, hərwi nəkurom tebiye kurom eye ka ndəvumaw zuk bay. Ndo mekeleñ eye hay andaya, nəteye malamar kurom neheye faya ta gay məsler a Mbəlom aye. Kuton ndo hay ta kədiye tay ha təday andza nəkurom neheye tə kədaw kurom aye dərmak.»

<sup>12</sup> Wawa i təbañ niye a pəla ha maməkwa i wu neheye təsəla tə ƒar ha ƒerewel aye. Kwayañña a pəla faya abəra na, məndzibəra a ƒəl haladzay dzeki6 dzeki6. Pat a mbəda andza peteked zeñzeñ eye i mətuwe mədahañ. Kiye na, a təra ndozza andza bambaz.

<sup>13</sup> Wurzla hay tə kutsaw abəra ma magərmbəlom ƒəramama ka dala andza madaƒalak i gurow neheye mətasl a kutsa ahaya abəra mə gərdaf aye.

<sup>14</sup> Magərmbəlom a dze tatəh andza tə pada ƒerewel. Dala neheye malawara eye ta dəlov aye ti ye abəra ka təv məndze tay hay. Mahəmba hay tə lətse abəra ka təv tay hay, ti ye a təv eye.

<sup>15</sup> Ndo neheye ka məndzibəra aye tə ñgaha bo tebiye, ta hway, tə ñgaha bo a bədf hay ada tə tsal a mahəmba mata ñgehe bo a lar. Beke hay ta ndo neheye nəteye beke hay bay aye, nəteye tebiye ta hway tə ñgaha bo. Kwa bəy hay ada bagwar hay, kwa bəy i sidzew hay, kwa ndo i zlele hay ta gədañ eye hay aye, nəteye tebiye ta hway.

<sup>16</sup> Tə zalatay ka bo a mahəmba ada a hotokom hay, tə gwad: «Mbəzlumaw famaya ada kâ ñgahum may tey, hərwi ada ndo nakə mandza eye ka təv məndze i bəy aye mâ ñgatamay bay. Sa na, hərwi ada Wawa i təbañ mâ gəs may ta sariya bay,

<sup>17</sup> hərwi həlay i məgəse ndo hay a sariya kə ndislew. Pat eye niye na, ndəray andaya məsəmay naha bay.»

## 7

### *Gawla i Mbəlom a ge ñgodgor ka ndo i Mbəlom hay ka da'ar*

<sup>1</sup> Ma dəba eye na, na ñgatatay a gawla i Mbəlom hay ƒad, nəteye malətsa eye ka kokway i məndzibəra ƒad. Faya ta geye me a mətasl neheye ƒad ka kokway i məndzibəra hərwi ada tā vəzl ka məndzibəra bay ada tā lamay a dala bay, kwa a dəlov, kwa a gərdaf hay, tā lamay bay.

<sup>2</sup> Na ñgatay a gawla i Mbəlom neñged, a yaw mə bəzay. Mə həlay ñgay na, wu məge ha ñgodgor ka ndo i Mbəlom hay, i Mbəlom nakə neñgeye ma ndziye ka tor eye. A zalatay a siye i gawla i Mbəlom neheye ƒad aye hərwi Mbəlom a vəlatay gədañ ka mənese ha dala ta yam. A zalatay ta magala,

<sup>3</sup> a gwadatay: «Kâ nasum ha dala, yam ada ta dərizl i gərdaf hay zuk bay. Həbum, nəmaa giye ñgodgor i Mbəlom ka ndo i məsler i Mbəlom hay təday.»

<sup>4</sup> Tsa na, ndo neheye tə ge fataya ñgodgor aye nəteye nday na, tə tsikeñ. Nəteye gwezem temerre tə kuro kuro ƒad gər eye ƒad. Ndo neheye na, ti yaw ma gwala i İsrayel hay tebiye.

<sup>5</sup> Gwala i Yahuda nəteye 12 000, gwala i Ruben 12 000, gwala i Gad 12 000,

<sup>6</sup> gwala i Aser 12 000, gwala i Naftali 12 000, gwala i Manase 12 000,

<sup>7</sup> gwala i Simeyən 12 000, gwala i Levi 12 000, gwala i Isakar 12 000,

<sup>8</sup>gwala i Zabulon 12 000, gwala i Yusufa 12 000, gwala i Bendzamenj 12 000. Ndo neheye tebiye ta ge fataya ŋgodgor i Mbəlom aye.

*Ndo neheye haladzay ti yaw ma slala hay wal wal aye*

<sup>9</sup>Ma dāba eye na, na ŋgatay a ndo hay haladzay mbərzəzza, ma pasliye bo bay. Ti yaw abəra ma gəma neheye ka məndzibəra aye tebiye. Ti yaw na, kwa abəra ma gəma waray, kwa ma gwala waray, kwa ma slala waray, kwa neheye tə tsik me i gəma waray waray aye. Nəteye tebiye kame i təv məndze i Bəy kame i Wawa i təbən. Nəteye tebiye tə peteked kwedek kwedek eye ka bo ada nəteye tebiye ta hawal i gərdaf nakə tə zalay təbən aye mə həlay tay hərwi mazabaday a Mbəlom.

<sup>10</sup>Ta wuda ta magala, tə gwad:

«Mandza eye ka təv məndzay i bəy na, Mbəlom kway ada Wawa i təbən, maa mbəl may ha na, nəteye.»

<sup>11</sup>Gawla i Mbəlom hay tebiye, tə lawara na təv məndze i bəy ada madugula neheye kame i Mbəlom aye ada ta wu neheye fad aye, tə lawara tay ha a wuzlah. Tsa na, ta dəkway gurmets, tə dəslyay ha gər a Mbəlom.

<sup>12</sup>Tə gwad:

«Ayaw, m̄a t̄era andza niye!

Məzlaḅ na, mə həlay i Mbəlom kway,  
neŋgeye a sər wu, neŋgeye gədan eye.  
Gakway sisə, dəslyakway ha gər,  
zabadakwa ha ka tor eye.

Zəbum, neŋgeye na, bagwar eye dedek! Amen!»

<sup>13</sup>Nəte mə walaŋ i madugula neheye kuro kuro sulo gər eye fad aye, a tsətsah fağaya, a gwedeŋ: «Ka sər tay ha ndo neheye tə peteked kwedek kwedek eye ka bo aye daw? Ti yaw na, mənğay?»

<sup>14</sup>Na mbədəy faya, na gwadəy: «ŋgalaka, neŋ na sər bay. Maa sər dūh na, nəkar bədaw?»

A mbədəŋ faya, a gwedeŋ: «Neheye na, ndo neheye tə səmay naha a d̄əretsətseh bagwar eye. Nəteye na, ta bara na peteked tay hay hərwi ada m̄a t̄era kwedek kwedek tə bambaz i Wawa i təbən.

<sup>15</sup>Hərwi niye nakə nəteye mandza eye kame i təv məndze i bəy Mbəlom huya aye.

Faya ta zabadəye mə gay ŋgay pat pat, ta həpat kwa ta həvad.

Ndo nakə mandza eye ka təv məndze i bəy aye,  
faya ma gateye gər.

<sup>16</sup>Nəteye na, may ma gateye sa bay,  
yam ma gateye sa bay dərma.

Pat ma wuriye fataya sa bay,  
wuray kwa tsekweŋ ma fəkiye tay ha andza pat sa bay,  
kwa wu waray ma wuriye fataya sa bay,

<sup>17</sup>hərwi Wawa i təbən niye ma wuzlah i təv məndze i bəy niye  
ma t̄əriye ndo m̄ətsəkure tay.

Ma diye tay ha ka yam nakə ma vəliye sifa aye.  
Mbəlom ma takadətay na yam d̄əre abəra ka d̄əre.»

## 8

*Wawa i təbən a pəla ha maduk i duk i matasəla i wu nakə tə bər ha d̄erewel aye*

<sup>1</sup> Ma dəba eye na, Wawa i təḅaŋ a zla dərewel niye sa, a pəla ha faya abəra maduk i duk i wu nakə matasəla eye a zəkaw aye. A pəla ha na, wu hay tebiye mə mbəlom tə ndza dəfik hus a mənit kuro kuro mahkar.

<sup>2</sup> Tsa na, na ŋgatay a gawla i Mbəlom hay tasəla, nəteye malətsa eye kame i Mbəlom aye. Tə vəlatay tolom hay tasəla.

<sup>3</sup> Gawla i Mbəlom neŋged andaya ta gəse mə həlay. Gəse niye na, maŋgara eye ta gura. Gəse niye maŋgara eye ta gura eye na, tə fəkaway a dəma wu nakə a ze huŋŋa eye a Mbəlom. Neŋgeye na, a yaw a lətse ka tsakay i təv nakə tə fəkaway naha faya wu a Mbəlom aye. Ta pay a dəma wu nakə tə fəkawa aye haladzay, mə fəka hərwı ada geŋgis eye ada mađuwule me i ndo məpe mədzal gər hay ka Yesu t̄a tsal, t̄a husa ka təv i Mbəlom. A fəka wu niye ka təv məfəke wu nakə tə fəkaway naha faya wu a Mbəlom kame i təv məndze i Mbəlom.

<sup>4</sup> Geŋgis i wu niye faya ma fəkiye, a yaw abəra mə həlay i gawla i Mbəlom, a tsal ka təv i Mbəlom. Andza niye, mađuwule me i ndo məpe mədzal gər hay ka Yesu a husa ka təv i Mbəlom, Mbəlom a tsəne.

<sup>5</sup> Tsa na, a zla gəse niye maŋgara eye ta gura eye, a zla ako ma təv nakə tə fəkaway naha faya wu a Mbəlom aye. A pa na a gəse, a rah ha. Tsa na, a kala ahaya ka məndzibəra. A kala ahaya na, maləve i mbəlom a ləv haladzay, mawutsede hay ta wutsede ada dala a bəl haladzay dzekiḅ dzekiḅ.

### *Tolom hay tasəla*

<sup>6</sup> Tsa na, gawla i Mbəlom neheye tasəla aye, tə ləva bo ta tolom hay hərwı məfe.

<sup>7</sup> Tsa na, makurre a fa tolom ŋgay. A fa na, ndzalala, ako, bambaz, tə dzapa ka bo. Tə kutsaw ka məndzibəra. Kwayaŋŋa məndzibəra a ŋgəna ka bo abəra təv mahkar, nəte ŋgay eye a təma təlmed təlmed. Dərizl i gərdaf hay, ada guzer ŋgədiz eye, ta təma tebiye heriyew heriyew.

<sup>8</sup> Masulo i gawla i Mbəlom a fa tolom ŋgay. A fa na, tə zla wuye bagwar eye andza mahəmba i ako, faya ma təmiye. Tə kal ha a bəlay bagwar eye. Bəlay niye a ŋgəna mahkar, neŋged nəte a təra bambaz.

<sup>9</sup> Mamahkar i wu neheye nəteye mandza eye ma yam niye a təra bambaz aye tə mət tebiye. Kwalalanj i yam hay tebiye tə nas ma təv eye niye.

<sup>10</sup> Gawla i Mbəlom mamahkar eye a fa tolom ŋgay. A fa na, wurzla bagwar eye a ŋgwadədud, a kalaw abəra ka magərmbəlom. A təma zləkəd zləkəd andza dərneħ i ako. A dəfka dəlov neheye ta ŋgəna mahkar aye ada ka bədiyem hay, a nas tay ha.

<sup>11</sup> Wurzla niye na, məzele ŋgay Duwekeke. Neŋged na, a təra duwekeke. Ndo neheye ta sa yam niye na, ta mət haladzay hərwı a ge duwekeke.

<sup>12</sup> Gawla i Mbəlom mafad eye a fa tolom ŋgay. A fa tolom ŋgay niye na, a kəd tay ha pat ta kiye ada tə wurzla hay. Nəteye na, andza mədəsa eye hay təv mahkar. Təv nakə tə kəd a dəma aye na, a zəba zəŋzəŋ. Andza niye nəteye ta dəv lele sa bay. Həpat ta həvad ta ŋgəna təv mahkar. Diye i pat neŋged nəte na, a dəv ta həpat sa bay ada diye i kiye neŋged nəte bəbay na, a dəv ta həvad sa bay.

<sup>13</sup> Na zəba dəre na, na ŋgatay a matsəv faya ma tsəviye ka magərmbəlom. A wuda ta gədan, a gwad: «Waaw! Gadzi bo kurom i mey, gadzi bo kurom i mey, nəkurom ndo i məndzibəra hay na, ka hutumeye dəretsətseh. Siye i gawla i Mbəlom mahkar na, ta fa tolom tay zuk bay. Ahəl nakə aza ta fa aye na, dəretsətseh ma deyeweye ka məndzibəra haladzay.»

## 9

<sup>1</sup> Gawla i Mbəlom mazlam eye a fa tolom ɲgay. A fa tolom ɲgay niye na, na ɲgatay a wurzla a dədəw abəra ma magərmbəlom ka dala. Tsa na, tə vəlay kəle i mahəndəke abəra ka bəd nakə kutsik bagwar eye fakalaw hay mandza eye mə dəma aye.

<sup>2</sup> Wurzla niye a həndək abəra mə dəma na, geɲgis a ndohwaw abəra mə dəma andza zler i ako. Geɲgis niye a dərəzl ka pat tekədəgəm, dərə a zəba bay tebiye zəɲzəɲ.

<sup>3</sup> Tsa na, dzaray a bətsakwaw abəra ma geɲgis niye ka dala. Tə vəlatay gədaɲ i mədze ndo andza hərdədə hay.

<sup>4</sup> Tə gwadətay: «Kâ həpədum guzer bay, kâ nasum ha dərizl i gərdaf bay, wu neheye tə ndzohwaw aye tebiye kâ nasum tay ha bay. Gumatay dərətsətseh na, a ndo neheye ɲgədgər i Mbəlom ka da'ar tay bay aye.»

<sup>5</sup> Tə vəlatay tsəved ka məkədə ndo hay mədahaɲ eye bay. Tə gwadətay: «Gumatay dərətsətseh.» Tə gateye dərətsətseh na, kiye zlam. Dərətsətseh niye na, andza məwure i hərdədə.

<sup>6</sup> A həlay niye na, ndo hay ta pəliye məməte ada tâ mət hərwi ada dərətsətseh mâ gatay sa bay. Ane tuk na, ta hutiyə məməte bay. Məməte ma deyete ye a gər haladzay, ane tuk na, ta hutiyə məməte bay mədahaɲ ma hwiye fataya abəra.

<sup>7</sup> Dzaray niye hay ta ndzəkit bo andza pəles neheye tə gawa vəram aye. Wuye hay ka gər tay andza dzagwa i bəy nakə tə ɲgar ta gura aye. Da'ar tay a ndzəkit bo i ndo zezən.

<sup>8</sup> Məkwets tay na, zəbol eye andza məkwets i ɲgwas hay, ada zler tay hay andza zler i zil.

<sup>9</sup> Tə bər dərəv tay hay tə wuye andza petekəd i vəram tə ɲgar ta bəre aye. Gwezleviyek tay hay tə ge zləm huwwa andza muta i pəles neheye nəte ye haladzay faya ta diye a vəram aye.

<sup>10</sup> Hutel fataya andza hutel i hərdədə hay ada ta dzatay ha a ndo hay ta hutel niye hay dərma. Mata vəlatay gədaɲ ka mədzatay a ndo hay kiye zlam na, hutel tay niye hay.

<sup>11</sup> Bəy tay na, gawla nakə a ləvay gər a bəd nakə kutsik bagwar eye Fakalaw mandza eye mə dəma aye. Tə zalay tə bazlam i Yahuda hay na, Abaddəɲ. Tə bazlam i Gərek bəbay tə zalay Apoliyəɲ. Andza məgwede: Nəɲgeye ndo məbəzle wu hay.

<sup>12</sup> Dərətsətseh makurre eye ki ye abəra mə dəma. Siye dərətsətseh hay sulo ta deyewe ye sa.

<sup>13</sup> Gawla i Mbəlom məməkwa eye a fa tolom ɲgay. Na tsəne mətsike me a tsənew abəra ka dərəm i təv nakə tə fəkaway naha faya wu a Mbəlom aye wal wal fəd. Təv nakə tə fəkaway naha faya wu a Mbəlom niye mənğara eye ta gura, mapa eye kame i Mbəlom.

<sup>14</sup> A gwadəy a gawla i Mbəlom məməkwa eye: «Pəla tay ha gawla niye hay fəd tə bər tay ha ka me i dəlov bagwar eye niye tə zalay Efrat aye.»

<sup>15</sup> Gawla neheye fəd tə tsik fataya aye na, Mbəlom a patay məpeslə həlay hərwi ada tâ ge məsler ma məve eye niye, ma kiye eye niye, ma məhəne eye niye ada ma bəre eye niye. Andza niye a həl tay ha na, hərwi ada tâ ɲgəna ha məndzibəra təv mahkar. Təv nəte na, ta bəbazl abəra mə dəma ndo hay kədəts. Kwayaɲɲa ahəl nakə mətsike me niye a gwadəy a gawla i Mbəlom «Pəla tay ha» aye na, gawla i Mbəlom niye a ye, a pəla tay ha.



<sup>16</sup> Tsa na, sidzew hay haladzay ti yaw, nəteye mandza eye ka pəles hay. Nəteye nday na, ta tsikenj. Nəteye na, gwezem temerre sulo madzəga gwezem.

<sup>17</sup> Ma məsine ga na, na ŋgatay a pəles hay ada ta ndo neheye mandza eye fataya aye. Nəteye na, peteked i vəram ka bo slala mahkar. Siye hay ndozza andza ako, siye hay a zəba mbəlommbəlom, siye hay a zəba kudewawa kudewawa. Gər i pəles niye hay ta ndzəkit bo andza gər i zil. Ako ta genjis eye a ndohwaw abəra mə bazlam tay hay ada tə wu eye andaya a təmawa wafafa andza wur i asana.

<sup>18</sup> Dəretsətseh neheye wal wal mahkar aye a kədf tay ha ndo hay. A kədf tay ha na, ma təv nakə a ŋgəna ha mahkar a zla nəte aye. Dəretsətseh neheye wal wal mahkar aye na, ako, genjis ada tə wu nakə a təma andza wur i asana aye. Tə ndohwaw abəra mə bazlam i pəles hay, ta bəbazl tay ha ndo hay.

<sup>19</sup> Andza niye, maa vəl gədanj a pəles hay ka məge wu nakə lele bay aye a ndo hay na, bazlam tay. Ane tuk na, hutel tay hay tə gawatay dəretsətseh a ndo hay dərmak. Hutel tay hay na, a ndzəkit bo dədf, gər fataya andza gər i dədf, tə dzawa tay ha ndo hay.

<sup>20</sup> Siye i ndo neheye ta zəkaw aye ta mət tə dəretsətseh neheye mahkar aye bay, nəteye huya ta gər ha mezeleme tay bay. Nəteye faya ta dəslay ha gər a fakalaw ada a kule neheye bo tay aye tə ŋgar aye. Faya ta ŋgariye kule niye hay ta gura, siye hay ta bəre, tə kwar, tə mbəzew ada siye hay ta lambad ta mayako. Wu neheye na, tə ŋgatay a dərə bay, tə tsəne wuray kwa tsekwenj bay, ta həhal bay. Ane tuk na, nəteye faya ta dəslatay ha gər huya.

<sup>21</sup> Ndo neheye dərmak nəteye faya ta kədiye ndo hay huya. Ta gər ha məge masuwayanj bay. Nəteye madanj eye hay ada ta məge madama, nəteye faya ta kəliye. Nəteye faya ta giye huya andza niye, ta gər ha mezeleme bay.

## 10

### *Gawla i Mbəlom tə dərəwel wawa eye*

<sup>1</sup> Ma dəba eye na, na ŋgatay a gawla i Mbəlom mekelən eye, gədanj eye haladzay, a mbəzlaw mə mbəlom. Peteked ŋgay nakə ka bo aye na, pazlay. Kulay a lawara na gər ŋgay həndits. Da'ar ŋgay a wuzl dərə andza pat. Sik ŋgay hay andza dərneh i ako.

<sup>2</sup> Dərəwel wawa eye mə həlay ŋgay, mahəndəka eye. A pa na sik i həlay i mənday ŋgay ka gər i bəlay. Sik i həlay i gula na, a pa na, ka dala.

<sup>3</sup> A wuda ta mağala. Mawude ŋgay niye na, a ləv andza manjəreze i zil. A wuda andza niye na, na tsəne maləve i mbəlom madzəga tasəla hərwi mambədaw faya.

<sup>4</sup> Na tsəne maləve i mbəlom niye na, həbe a seŋ məwetse wu nakə a tsik aye. Ane tuk na, na tsəne mətsike me mekelən eye mə mbəlom, ndoweye a gwad: «Kə watsa wu nakə maləve i mbəlom a tsik aye bay. Bazlam neheye na, ndəray mə sər bay.»

<sup>5</sup> Gawla i Mbəlom niye a pa na sik ŋgay nəte ka gər i bəlay, neŋged ka dala aye na, a zla həlay i mənday a mbəlom,

<sup>6</sup> a mbada ta məzele i Mbəlom, hərwi Mbəlom na, ma ndziye ka tor eye, kə ge magərmbəlom tə wu neheye mə dəma aye tebiye, kə ge məndzibəra tə wu neheye mə dəma aye tebiye, kə ge bəlay tə wu neheye mə dəma aye tebiye. Gawla i Mbəlom niye a mbada na, a gwad: «Wu nakay ma giye bo kwayanjə anəke.»

<sup>7</sup> A gwad sa: «Aza gawla i Mbəlom matasəla eye kə fa tolom ɲgay na, Mbəlom ma ndəviye ha wu ɲgay neheye maɲgaha eye, ma giye andza nakə a tsikatay a ndo i məsler neheye ta da ha bazlam ɲgay aye.»

<sup>8</sup> Ndo nakə a tsikenew me mə mbəlom aye, a gwedenew sa: «Do, zla dərewel niye mahəndəka eye mə həlay i gawla i Mbəlom nakə malətsa eye, sik ɲgay nəte ka gər i bəlay, nenğed ka dala aye.»

<sup>9</sup> Na ye ka təv i gawla i Mbəlom niye, na həndzəd naha ka təv ɲgay, na gwaday: «Vələɲ dərewel wawa eye niye.»

A gweden: «Zla, həpəd. Ka həpədiye na, ma tsəhəniye fakaya mə bazlam andza wum. Ane tuk na, ka sədaka na a huɖ na, ma təriye sərəkeke.»

<sup>10</sup> Tsa na, na zla dərewel niye mə həlay i gawla i Mbəlom aye, na həpəd. A tsəhən mə bazlam ga andza wum. Na sədaka na a huɖ na, a tərə ɲgway sərəkeke.

<sup>11</sup> Tsa na, tə gweden sa: «Ka diye ha bazlam i Mbəlom nakə ma tsikiye ka slala wal wal aye, ka gəma hay, ka bəy tay hay aye. Kwa neheye tə tsik bazlam i gəma hay wal wal aye, ka diye ka datay ha.»

## 11

### *Ndo məhələ mbal i Mbəlom hay sulo*

<sup>1</sup> Ma dəba eye na, tə vələɲ sakwal andza wu mələve wu nakə tə ləvawa ha aye. Tsa na, tə gweden: «Lətse, do ta ləva na gay i məvəlay wu a Mbəlom ta təv məvəlay wu a Mbəlom. Pasla tay ha ndo neheye tə dəsəlayay ha gər a Mbəlom mə dəma aye.»

<sup>2</sup> Ane tuk na, kə ləva na dalabəra eye nakə ma bəra aye bay, gər ha andza niye hərwi Mbəlom ka mbərəm məvəlatay ha a ndo neheye tə sər na bay aye. Ta mbəzliye ha gəma niye tsədəɲɲa, gay i Mbəlom mə dəma aye ma kiye kuro kuro fad gər eye sulo.

<sup>3</sup> Na sləriye tay ha ndo neheye sulo ta tsikiye ka neɲ aye. Ta piye ka bo peteked i mətuwe mədahaɲ, ta diye ta diye ha bazlam a həlay niye. Andza məgwədə na, ta diye ha məhəne gwezem temerre sulo tə kuro kuro məkwa.»

<sup>4</sup> Nətəye na, dərizl i gərɖaf ha sulo, tə zalatay *olive*, lalam hay sulo dərmaɲ. Nətəye kame i Bəy Maduwerɲ nakə faya ma ləviye məndzibəra aye.\*

<sup>5</sup> Tadə ndo mənə dərə tay hay a satay məgatay wu ɲgwalak eye bay aye na, ako ma ndohwaweye abəra mə bazlam tay, ma bəbazliye tay ha ndo mənə dərə tay niye hay. Ndo mənə dərə tay hay ta mət na, andza niye, tsəved andaya mətəme bay.

<sup>6</sup> Ahəl nakə faya ta diye ha bazlam ga aye, ta sliye faya mətsikay me a yam: «Kə pa bay» hus a pat nakə ta ndəv ha aye. Ta sliye faya mətsikay me a yam hərwi ada mə tərə bambaz. Ta sliye faya məvəlatay dərətsətseh a ndo i məndzibəra hay wal wal andza nakə a satay aye.

<sup>7</sup> Ane tuk na, ahəl nakə aza ta ndəv ha mətsike bazlam i Mbəlom aye na, wu i pesl eye andaya ma tsalaweye fataya ma bəd naka kutsik bagwar eye, ma giye fataya varam. Ma sliye fataya, ada ma kədiye tay ha.

<sup>8</sup> Mədəhaɲ tay na, ndəray ma liye bay. Ta ndziye ka dala barbarra eye, ma wuzlahgəma bagwar eye nakə tə kəd mə dəma Bəy Maduwerɲ tay aye. Məzele i gəma niye hay na, Sodom ta Ezipt.

<sup>9</sup> Mədəhaɲ tay na, ndo hay ka məndzibəra ma gwala hay wal wal ta deyeweye, kwa slala ka waray ka waray aye, kwa ndo neheye tə tsik bazlam

\* 11:4 Zəba mə Zakari 4.1-14.

i gəma waray waray aye, kwa gəma hay, ta zəbiye ka mədahaŋ tay məhəne mahkar tə məzaw. Ta kərahiye ndo hay tã la tay ha bay.

<sup>10</sup> Ma deyete ye a gər a ndo i mändzibəra hay haladzay hərwi ta kəf tay ha ndo neheye sulo aye. Ta giye magurlom, ta vəliye a bo wu kəriye. Ta ŋgwasiye hərwi ndo məde ha bazlam i Mbəlom neheye sulo aye ta gatay dəretsətseh a ndo i mändzibəra hay haladzay tə bazlam i Mbəlom nakə faya ta diye ha aye.

<sup>11</sup> Ahəl nakə məhəne mahkar ta məzaw a ye abəra mə dəma na, Mbəlom a vəzl məsəfəre ŋgay a ndo neheye sulo aye hərwi ada tã huta sifa. Mbəlom a vəzl a dəma məsəfəre ŋgay na, tə lətse ka mbəlom. Ndo neheye tebiye tə ŋgatatay aye na, ta dzədzar haladzay.

<sup>12</sup> Tsa na, ndo neheye sulo aye tə tsənew mətsike me bagwar eye mə mbəlom, a gwadatay: «Tsalumaw kanaŋ a gəma.» Tsa na, pazlay a ŋgaha tay ha, tə tsal a mbəlom, ndo mənə dərə tay hay faya ta zəbiye fataya.

<sup>13</sup> Kwayaŋŋa a həlay niye dala a bəl haladzay dzekiḍ dzekiḍ. Gəma a ŋgəna kuro, nəte ŋgay eye a mbəzl hele hele. Ndo hay gwezem tasəla ta mət hərwi dala nakə a bəl aye. Siye i ndo neheye nəteye ta mət təbey aye na, ta dzədzar haladzay, ta zambadəy a Mbəlom nakə mə mbəlom aye.

<sup>14</sup> Andza niye, dəretsətseh masulo eye ki ye abəra mə dəma. Dəretsətseh mamahkar eye ma deyeweye.

### *Tolom matasəla eye*

<sup>15</sup> Ma dəba eye na, gawla i Mbəlom matasəla eye a fa toloom ŋgay. Mətsike me bagwar eye hay ta ləvaw mə mbəlom, tə gwad:

«Bəy Maduweŋ kway Mbəlom ta Kəriste ŋgay

ta pa mələve i bəy tay ka mändzibəra.

Mbəlom ma ləviye ka tor eye.»

<sup>16</sup> A ndəv ha mətsike me na, madugula neheye kuro kuro sulo gər eye fad mandza eye ka təv mändze i bəy kame i Mbəlom aye tə dəkw gurmets kame i Mbəlom, tə dəslay ha gər.

<sup>17</sup> Tə gwad:

«Bəy Maduweŋ Mbəlom bagwar eye,

nəkar andaya anəke ada nəkar andaya ahəl niye.

Nəmaa gaka sisəe hərwi gədan yak,

hərwi ka həl ka pa wu hay tebiye a həlay yak,

ka dā ha nəkar na, bəy.

<sup>18</sup> Siye i slala i ndo neheye ta təra ndo yak hay bay aye na, ta ge mevel ka nəkar haladzay.

Anəke na, həlay eye kə slaw nəkar ka giye fataya mevel.

Həlay i məge sariya ka mədahaŋ hay kə slaw.

Həlay nakə ka vəlateye wu i merəbe a ndo i məsler yak neheye faya ta dā ha bazlam yak aye.

Ka vəlateye wu i merəbe tay a ndo yak hay tebiye,

kwa a ndo neheye makətsa bo eye,

kwa a ndo neheye bagwar eye,

ka vəlateye a ndo neheye faya ta rəhakeye ha gər eye tebiye.

Ndo neheye faya ta nasiye ha mändzibəra aye na,

ka bəbazliye tay ha hele hele.»

<sup>19</sup> A ndəv ha mətsike na, gay i mədəslay ha gər a Mbəlom a həndək mə mbəlom tuwaŋ. Zlaŋgatsa nakə dərəwel i məbere dzam mə dəma aye na, andaya mə gay eye niye. Anəke na, kwa way kə ŋgatay. Mawutsede hay ta wutsede wutsid wutsid. Maləve i mbəlom ka ŋgərəz, dala kə bəl ada ndzalala hay ta kutsaw haladzay.

## 12

*Ngwas ta gədam bagwar eye*

<sup>1</sup> Ma dəba eye na, wuye a mbəzlaw mə mbəlom, a ge masuwayan. Na ngatay a ngwas eye andaya, peteked ngay nakə ka bo aye na, pat. Kiye mə huđ i sik ngay. Peteked nakə a bar a gər aye na, wurzla hay kuro gər eye sulo, peteked ngay niye a bar a gər aye na, andza dzagwa i bəy.

<sup>2</sup> Ngwas eye niye na, ta wawa mə huđ, faya ma wiye ada neŋgeye faya ma ndalamiye ha. Neŋgeye faya ma wudiye ka bo hərwi i wur faya.

<sup>3</sup> Wu mekeləŋ eye a ge masuwayan haladzay, a mbəzlaw abəra mə mbəlom sa. Wu niye na, bagwar eye a zəba ndozza andza ako, a ndzəkit bo gədam. Gər ngay hay tasəla, hərikke hərikke tə dzagwa i bəy hay tasəla. Dəram hay andaya faya kuro. <sup>4</sup> Wurzla neheye ka magərmbəlom aye, a ngəna ha təv mahkar. A zla diye nətə, a ngwad tay ha ta hutel ngay ada a kutsa tay ahaya ka dala. A lətse ka təv i ngwas niye faya ma wiye wawa aye, kə wa na, ma zliye wawa niye ma həpədiye.

<sup>5</sup> Ngwas niye a wa wawa hasləka eye. Ma təriye bəy nakə ta gədan eye ma ləviye gəma hay wal wal aye tebiye. A wa na wawa niye na, tə zla na kwayanğa tə hway ha ka təv i Mbəlom ada kame i təv məndze i bəy ngay.

<sup>6</sup> Ane tuk na, ngwas niye a hway a kəsaf a təv nakə Mbəlom a ləvay ha bo aye. Mbəlom ma geye gər mə dəma. Ma ndziye məhəne gwezem ta temerre sulo tə kuro kuro məkwa.

<sup>7</sup> Tsa na, tə ge vərəm mə mbəlom. Misel, gawla i Mbəlom, ta gawla ngay hay tə ge vərəm ta gədam. Gədam ta gawla ngay hay tə ge vərəm ta nətəye dərmak.

<sup>8</sup> Ane tuk na, Misel ta gawla ngay hay tə sla fataya, ta həhar tay ha. Ta vələtay tsəved məndze mə mbəlom sa bəy.

<sup>9</sup> Tə kala ahaya gədam niye bagwar eye a bəra. Neŋgeye na, guram i dədəcə nakə ahəl niye a vawatay gər a ndo i məndzibəra hay aye. Tə zalay na, bəy i məsəfəre neheye lele bəy aye. Məzele ngay mekeləŋ eye na, Fakalaw. Tə kala ahaya abəra mə mbəlom ka dala ta gawla ngay hay tebiye.

<sup>10</sup> Ma dəba eye na, na tsənew mətsike me a ləvaw mə mbəlom, a gwad: «Anəke na, Mbəlom kə təma may ha.

A da ha na, neŋgeye a ze wu hay tebiye,

bəy na, neŋgeye.

Anəke na, ka ngatakway a Kəriste ngay

ka bəz ha gədan ngay

hərwi ta kala ahaya ndo nakə a həlawatay na sik a malamar kway hay aye.

A həlawa fataya me ka təv i Mbəlom ta həvad ta həpat, pat pat.

<sup>11</sup> Ane tuk na, nətəye na, ta sla faya.

Tə sla faya na, hərwi Wawa i təban a mbəda tay ahaya tə bambaz ngay.

Tə sla faya sa na, hərwi bazlam i Mbəlom nakə tə dətay ha a ndo hay aye.

Tə vəl ha məsəfəre tay na, andza niye.

<sup>12</sup> Hərwi niye məngwese m̄a ge andaya mə mbəlom

ada ta nəkurom neheye hay mə dəma aye, ngwasum tuk.

Nəkurom dala ta bəlay mata hute dərətsətseh na, nəkurom

hərwi Fakalaw kə mbəzla naha ka təv kurom,

dərev a ndalay haladzay.

Hərwi a sər ha məndze ngay na, a zəkayaw tsekweŋ.»

<sup>13</sup> Gədam niye bagwar eye a zəba dərə ta kala ahaya mə mbəlom na, a pa bo ka mahəhere ngwas niye a wa wawa hasləka eye.

<sup>14</sup> Ane tuk na, tə pay gwezleviyek sulo andza i matsəv hərwi ada mâ tsəv ha a kəsaf a təv nakə Mbəlom a ləvay ha bo aye. Mbəlom ma geye gər, ma ndziye mə dəma məve mahkar tə məzaw. Ma ndziye na, ma təv nakə gədam ma sliye məgəse na bay aye.

<sup>15</sup> Gədam niye a vənahaw yam abəra mə huf haladzay andza dəlov, hərwi ada yam mâ pay bəzay a ɲgwas niye ada mâ zla na.

<sup>16</sup> Ane tuk na, dala ka dzəna na ɲgwas niye. A ta ka bo bəra tsədək. Tsa na, a sa dəlov niye faya ma ndohwaweye abəra mə bazlam i gədam aye.

<sup>17</sup> Gədam a ɲgatay andza niye na, dərev a ndalay ka ɲgwas niye haladzay. A mbəda gər a dəba, a ye a ge vərəm ta wawa i ɲgwas niye hay. Wawa niye hay na, ndo neheye faya ta rəhay ha gər a bazlam i Mbəlom mapala eye ada faya ta diye ha bazlam i Yesu aye.

<sup>18</sup> Gədam niye a ye, a ndza ka me i bəlay.

## 13

### *Wu i pesl hay*

<sup>1</sup> Tsa na, na ɲgatay a wu i pesl wuray a ndohwaw abəra ma bəlay. Gər hay faya tasəla ada dəram hay faya kuro. Ka dəram neheye tebiye na, dzagwa i bəy faya hərrikke hərrikke. Ka gər neheye tasəla aye na, tə watsa fataya məzele nakə lele bay aye, i mətsalay ka gər a Mbəlom.

<sup>2</sup> Wu i pesl niye na, a ndzəkkit bo dəvar. Sik ɲgay hay andza sik dərleɲge. Bazlam ɲgay andza bazlam i zil. Gədam a vəlay gədan ɲgay haladzay a wu i pesl niye. Tsa na, a vəlay tsəved mâ ye, mâ ndza ka təv mədze i bəy ɲgay.

<sup>3</sup> Na zəba ka wu i pesl niye, gər ɲgay nəte na, andza ta gay mbəlak. Kə sər məməte ha. Ane tuk na, mbəlak ɲgay niye a paha. Wu i pesl niye a gatay a ndo i məndzibəra hay andza masuwayaɲ. Ndo hay ta dazlay məpay bəzay.

<sup>4</sup> Nəteye tebiye tə dəslay ha gər a gədam dərmak hərwi nakə a vəlay gədan a wu i pesl niye aye. Tə dəslay ha gər a wu i pesl dərmak, tə gwad: «Gədan eye andza wu i pesl nakay na, way? Mata sle məge vərəm ta neɲgeye na, way? Ndəray andaya andza neɲgeye bay.»

<sup>5</sup> Tə vəlay tsəved a wu i pesl niye ka məge zlapay kame i ndo hay ada ka mətsalay ka gər a Mbəlom. Tə vəlay tsəved ka məge andza niye na, kiye kuro kuro fad gər eye sulo.

<sup>6</sup> A dazlay a mətsalay ka gər a Mbəlom. A tsalay ka gər a məzele i Mbəlom ada a təv nakə Mbəlom mandza eye mə dəma aye. Ada a neheye mandza eye mə mbəlom aye dərmak.

<sup>7</sup> Ta vəlay tsəved ka məge vərəm ka ndo məpe mədzal gər hay ka Yesu dərmak ada mâ ɲgwas fataya. Ta vəlay gədan ka mələve kwa gwala waray waray, mələve kwa slala waray waray, kwa ndo neheye tə tsik bazlam i gəma waray waray aye ada ka gəma hay tebiye.

<sup>8</sup> Ndo i məndzibəra hay tebiye ta dəslay ha gər. Maa zəkaw na, ndo neheye tə watsa məzele tay a dərewel nakə tə watsa a dəma məzele i ndo neheye ta huta sifa aye. Nəteye tə watsa məzele tay na, kwa ahəl nakə ta ge məndzibəra zuk bay aye. Dərewel nakay na, i Wawa i təbər nakə tə kəd na ahəl niye aye.

<sup>9</sup> Ndo nakə zləm andaya faya hərwi mətsəne na, mâ pay zləm a wu nakə na tsikiye lele.

<sup>10</sup> Mbəlom a gwad: «Ndo nakə tə wa na hərwi ada ndo mənə dəre ɲgay tâ gəs na na, ta gəsiye na dedek.» Tadə Mbəlom kə gwad: «Tâ kəd na ta maslalam» na, ta kədiye ta maslalam dedek. Kə ge andza niye na, ndo məpe mədzal gər

hay ka Yesu tâ səmay naha, tâ gər ha tsəved i Mbəlom bay. Andza niye, ta ndziye bəŋbəŋ.

<sup>11</sup> Ma dəba eye na, na ŋgatay a wu i pesl mekeleŋ eye a ndohwaw abəra ma bəf. Dəram ka gər ŋgay sulo andza wawa i təbən. Ane tuk na, a tsik me andza i gədam.

<sup>12</sup> Gədan ŋgay andaya andza i wu i pesl nakə kurre aye. A gawa wu neheye a ge masuwayan aye kame i wu i pesl nakə a tsalaw ma bəlay aye. A gatay kutoŋ a ndo i məndzibəra hay ada a wu siye hay tebiye, a gwadətay: «Dəslumay ha gər a wu i pesl nakə mbələk ŋgay a paha aye.»

<sup>13</sup> Kə ge wu neheye a ge masuwayan aye haladzay. Kə ge wu nakə ada ako m̄a mbəzlaw abəra m̄a mbəlom aye. A yaw ka məndzibəra, ndo hay tebiye ta ŋgatay

<sup>14</sup> a vatay gər a ndo i məndzibəra hay hərwi ta vəlay tsəved ka mäge wu neheye a ge masuwayan aye kame i wu i pesl nakə kurre aye. A gwadətay: «Gum kule hərwi mədəslay ha gər a wu i pesl nakə kurre tə gay mbələk ta maslalam, ane tuk na, kə mət bay aye.»

<sup>15</sup> Wu i pesl niye masulo eye a huta gədan mavəzle məsəfəre a kule niye a ndzakit bo andza wu i pesl aye hərwi ada m̄a tsik me, ada ma sliye faya məkədə ndo neheye ta kərah mədəslay ha gər aye.

<sup>16</sup> A gatay kutoŋ a ndo hay tebiye, wawa hay, bagwar hay, kwa ndo i zlele hay, kwa a ndo i mətawak, kwa beke hay, kwa a ndo neheye beke eye hay bay aye, a gatay kutoŋ ka matəme ŋgodgor ka həlay i mənday kəgəbay ka da'ar aye.

<sup>17</sup> Ndo nakə ŋgodgor niye andaya faya bay aye na, ma sliye faya məsəkəme wu kəgəbay məsəməke ha wu bay. Ŋgodgor niye na, məzele i wu i pesl niye ada məpesle wu i məzele ŋgay.

<sup>18</sup> Ane tuk na, ndo hay tâ ge metsehe lele. Ndo nakə a tsah aye na, lamba niye a say mägweđe mey na, ma sliye faya məsəre. Lamba niye a da ha na, ndo zezeŋ hay. Lamba niye na, temerre məkwa tə kuro kuro məkwa gər eye məkwa.

## 14

### *Dəmes nakə ndo i Mbəlom hay ta giye aye*

<sup>1</sup> Na zəba dəre sa na, na ŋgatay a Wawa i təbən malətsa eye ka mahəmba nakə tə zalay mahəmba i Siyon aye. Nəŋgeye ta nəteye, məzele ŋgay ta məzele i Mbəlom Bəba ŋgay mawatsa eye ka da'ar. Ndo niye hay na, nəteye gwezem temerre tə kuro kuro fad gər eye fad (144 000).

<sup>2</sup> Tsa na, na tsəne mətsike me a tsənew m̄a mbəlom. A ləv andza yam nakə a vaw m̄a mahəmba aye. A ləv andza maləve i mbəlom. Mətsike me nakə na tsəne aye a ləv lele andza faya ta fiye gandzaval.

<sup>3</sup> Maa ge dəmes niye na, ndo neheye gwezem temerre tə kuro kuro fad gər eye fad (144 000) na ŋgatay aye. Nəteye malətsa eye kame i təv məndze i bəy Mbəlom, kame i madugula hay ada kame i wu neheye fad nəteye ta məsəfəre aye. Nəteye faya ta giye dəmes weđeeye. Dəmes niye ndəray ma sliye faya mäge bay. Maa ge dəmes niye na, ndo neheye Mbəlom a mbədətay ahaya abəra ka məndzibəra aye dəkdək tsa.

<sup>4</sup> Nəteye na, tsədəŋŋa mənese kwa tsekweŋ andaya fataya bay. Ta ge madama bay. Nəteye na, Wawa i təbən ma diye kwa a ŋgay na, tə paway bəzay. Mə walan i ndo i məndzibəra hay Mbəlom a mbəl ha na, nəteye hərwi ada tâ təra i ŋgay ada i Wawa i təbən.

<sup>5</sup> Ta raw me dāda bay, mənese andaya fataya kwa tsekweñ bay.

### *Gawla i Mbəlom hay mahkar*

<sup>6</sup> Tsa na, na ŋgatay a gawla i Mbəlom neñged faya ma tsəviye ka magərmbəlom. Faya ma deyeweye məde ha Labara Nğwalak eye nakə ma ndziye ka tor eye. Ma diye ma dātay ha a ndo i gəma hay tebiye, a gwala hay tebiye, a ndo neheye tə tsik me i gəma waray waray aye tebiye ada slala hay tebiye.

<sup>7</sup> Gawla i Mbəlom niye a tsikatay ta magala, a gwadātay: «Rəhumay ha gər a Mbəlom, zambadumay, hərwi həlay məgatay sariya a ndo hay kə slaw. Dəslumay ha gər. Maa ge magərmbəlom ta dala ada ta yam hay na, neñgeye.»

<sup>8</sup> Tsa na, na ŋgatay a gawla i Mbəlom masulo eye a yaw ma dəba i gawla i Mbəlom nakə kurre aye sa, a gwad: «Ka ndəv tsiy! Babilon gəma bagwar eye ma mbəzliye, ta dedək ka mbəzl hele hele. Ka bəz ha mənese ŋgay nakə a yay a gər andza guzom aye, ka bəz ha kwa a gwala waray waray.»

<sup>9</sup> Gawla i Mbəlom mamahkar eye a yaw sa. A tsik ta magala, a gwad: «Ndo neheye faya ta dəslay ha gər a wu i pesl niye a tsalaw ma bəlay aye ada faya ta dəslay ha gər a kule i wu i pesl niye, neheye ta təma ŋgodgor i wu pesl niye ka da'ar tay ada ka həlay tay aye na,

<sup>10</sup> Mbəlom ma gateye dəretsətseh. Gəse tay na, Mbəlom ma rahateye ha tə dəretsətseh. Ndo neheye ta diye na, a ako ada a wuye a təma wafafa andza asana. Ta siye dəretsətseh kame i gawla i Mbəlom hay ada kame i Wawa i təbañ.

<sup>11</sup> Geñgis i ako nakə faya ma gateye dəretsətseh huya aye ma ndəviye dāda bay. Nəteye tə dəslay ha gər na, a wu i pesl ada a kule i wu i pesl. Ta təma ŋgodgor ŋgay ka bo tay. Ta hutiiye mazəzukw bo dāda bay. Ta həpat, ta həvad, ta siye dəretsətseh.»

<sup>12</sup> Nəkurom ndo məpe mədzal gər hay ka Yesu, nəkurom neheye faya ka rəhumay ha gər a bazlam i Mbəlom mapala eye aye ada ka pum mədzal gər kurom ka Yesu aye, səmumay naha.

<sup>13</sup> Na tsəne mətsike me a tsənew mə mbəlom, a gwedəñ: «Dəzlay a məwetse anəke, do ha kame kame ndo neheye tə pa mədzal gər ka Bəy Maduweñ aye ada neheye tə mət ma məpe mədzal gər ka Bəy Maduweñ aye. Nəteye na, Mbəlom ma ta piye fataya ŋgama.»

Məsəfəre Tsədəñña eye a mbəda faya, a gwad: «Ayaw, andza niye. Məsler tay na, ka ndəv, tə zəzukw bo hərwi hohway i məsler tay a da ha na, nəteye lele.»

### *Wu nakə ma ta ndzatay a gər a ndo hay ahəl nakə məndzibəra ma ndəviye*

<sup>14</sup> Na zəba däre sa na, na ŋgatay a pazlay kwedək kwedək. Wuye andaya ka pazlay niye. Wu niye na, a ndzəkkit bo ndo zezəñ. Dzagwa i bəy nakə tə ŋgar ta gura aye mə gər ŋgay. Bembek mə həlay ŋgay. Bembek niye na, matasla eye lele hepepe.

<sup>15</sup> Gawla i Mbəlom mekeleñ eye a yaw abəra mə gay i mədəslay ha gər a Mbəlom. A wuda ta magala, a gwaday a ndo niye mandza eye ma pazlay aye: «Zla bembek yak ada dza ha daw, hərwi wu kə nah ka dala, kə sla mədze.»

<sup>16</sup> Tsa na, ndo nakə mandza eye ma pazlay aye a kal ha bembek ŋgay ka dala, a dəs na wu nakə ka məndzibəra aye tebiye.

### *Mbəlom ma ta gateye dəretsətseh a ndo i sewed hay*

<sup>17</sup> Tsa na, na ŋgatay a gawla i Mbəlom neñged mə mbəlom. A yaw abəra mə gay i Mbəlom. Bembek mə həlay, matasla eye hepepe dərmak.



<sup>18</sup> Gawla i Mbəlom neŋgeɗ a yaw abəra ka təv nakə tə fəkwaway naha faya wu a Mbəlom aye. Neŋgeye na, a ləvay gər a ako. A yaw a zalay a gawla i Mbəlom nakə bembek matasla eye hepepe mə həlay ŋgay aye ta magala, a gwaɗay: «Zəba ka hohway i dərizl i gərɗaf neheye ka məndzibəra aye, ta nah. Zla bembek yak, do ta dəs.»

<sup>19</sup> Andza niye, gawla i Mbəlom niye a kal ha bembek ŋgay ka dala, a ye a dəs hohway i wu neheye abəra ka dala. A həl hohway niye hay, a ye a kwats ha ka təv nakə bagwar eye ta sləratawa a dəma hohway hay hərwi maditse yam eye nakə mə dəma aye. Təv niye a ɗa ha na, mevel i Mbəlom.

<sup>20</sup> Təv nakə ta sləratawa a dəma hohway hay aye na, dərəŋ ta wuzlahgəma. Ahəl nakə faya ta ditsiye na, maa ŋgəzaw abəra mə dəma na, bambaz duh. A va tuwwa andza yam nakə faya ma viye mə magayam aye. A va na, kilomiter temerre mahkar. Taɗə pələs m̄a lətse a dəma na, ma zəbaweye abəra mə dəma bay. Mata zəbaw na, gər eye dekdək.

## 15

### *Gawla i Mbəlom hay tasəla tə dərətsətseh hay tasəla*

<sup>1</sup> Ma dəba eye na, na ŋgatay a wu mekeleŋ eye a ge masuwayaŋ mə mbəlom. A gər hərɓaɓəkka. Na ŋgatay a gawla i Mbəlom hay tasəla, kwa way dərətsətseh nəte nəte mə həlay tay. Neheye na, maduk i duk i dərətsətseh hay hərwi ta ndəviye ha na, mevel i Mbəlom.

<sup>2</sup> Tsa na, na ŋgatay a wu eye andza bəlay a wuzl dərə andza malam, ako mə dəma dərma. Na ŋgatatay a ndo neheye tə sla ka wu i pesl niye aye ada nəteye ta dəslay ha gər a kule ŋgay təbey aye. Nəteye ta kərəh matəme ŋgodgor i məpesle wu i məzele ŋgay nakə tə zalay məpesle wu aye. Nəteye malətsa eye ka me i bəlay niye a dəv andza malam aye. Nəteye na, ta gandzaval neheye Mbəlom a vəlatay aye mə həlay.

<sup>3</sup> Nəteye faya ta giye dəmes andza i Musa ndo i məsler i Mbəlom nakə a gawa ahəl niye aye ta dəmes i Wawa i təbaŋ. Tə gwaɗawa:

«Bəy Maduweŋ Mbəlom, nəkar gədaŋ eye ka gər i wu hay tebiye,  
məsler yak na, bagwar eye ada lele haladzay.

Nəkar Bəy i gəma hay tebiye,

wu neheye faya ka giye na, mənese kwa tsekweŋ andaya mə dəma bay  
ada nəkar na, ndo i dedək.

<sup>4</sup> Ndo hay tebiye ta dzədzaraka, Bəy Maduweŋ.

Ndəray ma kərəhiye mazambadaka bay.

Ndo nakə tsəɗaŋŋa eye na, nəkar nəte ŋgweŋ.

Ndo i gəma hay wal wal ta deyeweye kame yak  
ta dəslakeye ha gər

hərwi ndo hay tebiye ta ŋgatay a wu nakə faya ka giye na,  
mənese kwa tsekweŋ mə dəma bay.»

<sup>5</sup> Ma dəba eye, na zəba dərə na, na ŋgatay naha a madzawadzawa i məɗəslay ha gər a Mbəlom mə mbəlom məhəndəka eye tuwaŋŋa, gay nakə ta kərəw tə peteked, ndo hay ta Mbəlom tə dzawa gər a dəma aye andaya mə dəma.

<sup>6</sup> Na ŋgatatay naha a gawla i Mbəlom hay tasəla kwa way tə dərətsətseh nəte nəte mə həlay tay tə ndohwaw abəra mə gay i məɗəslay ha gər a Mbəlom. Ka bo tay na, peteked lele eye a dəv herre niye. Nəteye na, məbara bo eye mə dərəv ta gura.

<sup>7</sup> Wu nəte mə walaŋ i wu neheye ɗaf ta məsəfərə aye na, a ye naha a vəlatay gəse neheye tə vəɗ ta gura aye a gawla i Mbəlom neheye tasəla aye, kwa way

nəte nəte. Gəse neheye tasəla aye maraha eye ta mevel i Mbəlom nakə ma ndziye ka tor eye aye.

<sup>8</sup> Gengis a tsalaw, a rah a gay i mədəslay ha gər a Mbəlom. Gengis niye a yaw na, hərwi məzla6 i Mbəlom ada hərwi ngay. Ndəray kwa nəte kə sla faya məfələkwe a gay bay hus dəretsətseh neheye tasəla mə həlay i gawla i Mbəlom hay aye ta ndəviye təday.

## 16

### *Dəretsətseh hay tasəla ma gəse*

<sup>1</sup> Ma dəba eye na, na tsəne mətsike me a tsənew abəra mə gay i mədəslay ha gər a Mbəlom niye ngələkəka ta magala, a gwadatay a gawla i Mbəlom hay tasəla: «Dum naha kutsum ha mevel i Mbəlom neheye maraha eye ma gəse ka məndzibəra aye. Kutsum ha na, tasəla tebiye.»

<sup>2</sup> Tsa na, makurre a ye a kuts ha wu nakə ma gəse ngay aye ka məndzibəra. A kuts ka dala kwayanğa na, mbəlak neheye lele bay wene wene aye ada a wur haladzay aye a zəba ka ndo neheye ngodgor i wu i pesl andaya fataya ada tə dəslaway ha gər a kule aye.

<sup>3</sup> Gawla i Mbəlom masulo eye a ye a kuts ha wu nakə ma gəse ngay aye a bəlay. Yam niye a təra andza bambaz i mədahanj. Wu neheye ma yam niye aye tə mət tebiye.

<sup>4</sup> Gawla i Mbəlom mamahkar eye a ye a kuts ha wu nakə ma gəse ngay aye a dəlov ada a bədiyem hay. Ta təra bambaz dərmak.

<sup>5</sup> Na tsəne, gawla i Mbəlom nakə a tsəpawa yam aye, a zambadəy a Mbəlom, a gwad:

«Tsədanğa na, nəkar nəte ngwerj.

Nəkar andaya anəke ada ahəl niye nəkar andaya huya.

Ka ge na sariya nakay na, ta tsəved eye.

<sup>6</sup> Ndo neheye ta kəd ndo mədə ha bazlam yak hay ada ta ndo yak hay.

Ka vəlatay bambaz hərwi ada tə sa andza nakə a ye ka bo aye.»

<sup>7</sup> Tsa na, na tsəne mətsike me a tsənew abəra ma təv nakə tə fəkaway naha faya wu a Mbəlom aye, a gwad:

«Ayaw dedek Bəy Maduwerj,

nəkar na, Mbəlom gədanj eye ka gər i wu hay tebiye,

nəkar na, ndo i dedek.

Ka giye sariya a ndo hay na, huya ta tsəved eye.»

<sup>8</sup> Mafad i gawla i Mbəlom a kuts ha wu nakə ma gəse ngay aye ka pat. Tsa na, a vəlay gədanj a pat ka məwure haladzay andza ako hərwi ada mə fəka ndo hay.

<sup>9</sup> Ane tuk na, ahəl nakə pat niye a fəka tay aye na, ta gər ha mezeleme tay bay. Ta kəma mazambadəy a Mbəlom bay. Tə tsalay ka gər duh hərwi maa sləraw fataya dəretsətseh niye hay na, neŋgeye.

<sup>10</sup> Gawla i Mbəlom mazlam eye a kuts ha wu nakə ma gəse ngay ka təv i bəy i wu i pesl niye. Ləvonj tekədəgəm a ge ma təv mələve bəy ngay. Ndo hay faya ta həpədiye zler haladzay hərwi faya ta siye dəretsətseh.

<sup>11</sup> Ane tuk na, ta gər ha mezeleme tay bay. Wu tay neheye lele bay tə gawa aye na, ta gər ha mezeleme bay. Nəteye faya ta tsəleye ka gər a Mbəlom nakə

neŋgeye mə mbəlom aye hərwi mbəlak tay ada hərwi dəretsətseh tay nakə faya ta siye aye.

<sup>12</sup> Ma dəba eye gawla i Mbəlom maməkwa eye a ye a kuts ha wu nakə ma gəse ŋgay aye a magayam bagwar eye nakə tə zalay Efrat aye. Yam i magayam niye a sakwa hərwi ada bəy neheye ta deyewe ye abəra mə bəzay ta hutiiye tsəved mətese mata ge vərəm.

<sup>13</sup> Tsa na, na ŋgatay a məsəfəre neheye ŋgwalak eye bay hay aye mahkar. Nəteye na, andza makombodok hay. Neŋged na, a ndohwaw abəra mə bazlam i gədam, neŋged a ndohwaw abəra mə bazlam i wu i pesl, neŋged a ndohwaw abəra mə bazlam i ndo nakə a gwad neŋgeye ndo məde ha bazlam i Mbəlom aye.

<sup>14</sup> Məsəfəre neheye ti yaw na, abəra mə fakalaw, tə gawa masuwayaŋ. Tə yawa a gay i bəy i məndzibəra hay tebiye, tə hayawa tay gər hərwi məge vərəm ka Mbəlom gədaŋ eye ka gər i wu hay tebiye pat nakə mə bəziye ha gədaŋ ŋgay aye.

<sup>15</sup> Yesu a gwad: «Gum metsehe bəna, na diye naha na, andza məkal, ka sərume ye ka bo bay. Məŋgwese ma ndziye ka ndo nakə mandza eye tə peteked ŋgay ka bo aye. Neŋgeye mandza eye tsezlezleŋne hərwi ada ahəl nakə na diye naha neŋgeye ze peteked bay ada horoy mā gay kame i ndo hay bay.»

<sup>16</sup> Məsəfəre neheye mahkar aye, tə hayatay gər a bəy hay na, a təv eye andaya Yahuda hay tə zalay Harmagedoŋ.

<sup>17</sup> Ma dəba eye na, gawla i Mbəlom matasəla eye a kuts wu nakə ma gəse ŋgay aye a magərmbəlom. Matsike me a tsənew abəra ka təv mələve i bəy Mbəlom mə gay ŋgay məvəlay wu, a gwad: «Ka ndəv.»

<sup>18</sup> Kwayaŋŋa mawutsədə i Mbəlom a wutsədə, mbəlom a ləv ŋgwezləts. Dala a bəl dzekiḱ dzekiḱ. Kwa ahəl nakə a ge ndo hay aye na, dala kə bəl dāda andza niye bay, a ze ha siye tebiye.

<sup>19</sup> Dala a ta ka bo bəra ndzadədə, gəma bagwar eye a ŋgəna mahkar ada siye i gəma neheye ka məndzibəra aye tebiye ta mbəzl dərmak. Babilon gəma bagwar eye a mayaw a gər a Mbəlom na, andza niye. A vəlay wu məse nakə a tsəhan bay aye ada a gwadaŋ: «Sa, ndəv ha abəra mə dəma.»

<sup>20</sup> Dala neheye malawara eye ta yam aye tə dze a hud i yam tebiye ada mahamba zəbol eye ta mbəzl bərəm bərəm.

<sup>21</sup> Ndzalala bagwar eye hay həbəlagəmgəm, tə mba haladzay tə kutsaw mə mbəlom ka ndo hay. Ndo hay tə tsalay ka gər a Mbəlom hərwi faya ta siye dəretsətseh ta ndzalala. Dəretsətseh niye na, lele bay wene wene aye, a ze ha siye tebiye.

## 17

### *Bazlam i ŋgwas nakə a gawa madama aye*

<sup>1</sup> Ma dəba eye na, gawla i Mbəlom nəte mə walaŋ i gawla i Mbəlom neheye tasəla kwa way ta gəse mə həlay aye, a yaw ka təv ga, a gwedeŋ: «Dara hərwi ada nə bəzaka ha ŋgwas nakə a dā zləm, a gawa madama ma siye dəretsətseh. ŋgwas məge madama niye a dā ha na, gəma nakə ta dəzl bəse ta magayam hay wal wal haladzay aye.

<sup>2</sup> Bəy i məndzibəra hay ta ge mezeleme ta neŋgeye ada ndo i məndzibəra hay ta sa guzom ŋgay. Ta kwaya, ta ge mezeleme dərmak.»

<sup>3</sup> Tsa na, Məsəfəre Tsədaŋŋa eye a yaw ka təv ga, a zla ga a ye ga ha a kəsaf. Ahəl nakə neŋ mə kəsaf aye na, na ŋgatay a ŋgwas mandza eye ka wu i pesl ndozza. Gər ŋgay hay tasəla, dəram ka gər niye hay kuro. Ka bo ŋgay na,

məzele hay mawatsa eye faya haladzay. Məzele neheye hay lele bay aye, faya ta tsaleye ka gər a Mbəlom.

<sup>4</sup> Nğwas niye na, peteked ka bo ndozza andza bəre nakə a dəv haladzay aye, tə wu i maslawə, gura, ada tə kwar neheye lele haladzay aye. Gəse i gura mə halay nğay. Gəse niye na, maraha eye tə wu neheye nğwalak eye bay aye. Andza məgwede tə mezeleme nakə a gawa aye.

<sup>5</sup> Ta watsa məzele ka da'ar nğay. Məzele nğay niye a da wu manğaha eye, andza məgwede: «Babilon bagwar i gəma, neñgeye maya i nğwas neheye tə gawa madama aye ada tə wu nğwalak eye bay ka məndzibəra aye.»

<sup>6</sup> Na zəba faya na, nğwas niye kə sa bambaz i ndo məpe mədzal gər hay ka Yesu. Tə kəd tay ha na, hərwi tə gwadawa parakka Yesu neñgeye Bəy Maduweñ, ada nğwas niye kə kwaya tə bambaz tay.

Na nğatay andza niye na, a geñ hərbaəbəkka.

<sup>7</sup> Gawla i Mbəlom niye a gwedeñ: «A gaka hərbaəbəkka na, hərwi mey?» A gwad: «Tsəne, na dəkeye ha wu nakə manğaha eye ka nğwas nakay aye ada ka wu i pesl nakə mandza eye faya aye. Wu i pesl niye na, gər hay faya tasəla ada dəram hay kuro.

<sup>8</sup> Wu i pesl niye ka nğatay kurre na, neñgeye andaya tə dəre. Ane tuk na, anəke na, neñgeye andaya sa bay. Ma tsalaweye abəra ma bəd nakə kutsik bagwar eye aye. Ahəl nakə kə tsalaw aye na, Mbəlom ma dziye ha abəra mə dəma. Kwa ahəl nakə Mbəlom kə ge məndzibəra zuk bay aye na, Mbəlom kə watsa məzele a dərewel nakə tə watsa a dəma məzele i ndo neheye ta huta sifa aye. Siye i ndo hay andaya neheye kə watsa məzele tay a dərewel bay aye. Ndo neheye məzele tay mə dərewel bay aye ta nğatay a wu i pesl niye na, ma gateye hərbaəbəkka hərwi a ndzawa neñgeye na, andaya, anəke na, neñgeye andaya sa bay ada pat mekeleñ eye na, ma maweye mba.»

<sup>9</sup> A gwedeñ sa: «Ndo hay tə huta metsəhe hərwi matsəne wu neheye. Gər i wu i pesl neheye tasəla aye na, a da ha mahəmba hay tasəla nakə nğwas niye mandza eye faya aye dərmak. A da ha bəy hay tasəla.

<sup>10</sup> Mə walañ tay na, bəy hay zlam mələve i bəy tay ka ndəv. Neñged nəte na, neñgeye andaya faya mə ləviye bəy nğay. Matasəla eye na, həlay nğay eye kə slaw zuk bay. Aza həlay nğay kə slaw na, mə ndziye həlay tsekweñ tsa.

<sup>11</sup> Wu i pesl nakə ahəl niye neñgeye tə dəre aye ada anəke neñgeye andaya tə dəre sa bay na, neñgeye na, matsamahkar i bəy. Neñgeye mə walañ i bəy neheye tasəla aye dərmak. Ahəl nakə aza kə ndohwaw aye na, Mbəlom mə kədiye na hele hele.

<sup>12</sup> «Dəram neheye kuro ka nğatay aye na, a da ha bəy hay kuro ta deyeweye. Ta yaw zuk bay. Mbəlom mə vəlateye gədañ hərwi ada nəteye ta wu i pesl niye ta ləviye mələve bəy bəre nəte.

<sup>13</sup> Bəy neheye kuro aye mədzal gər tay na, nəte. Ta geye məsler a wu i pesl ta gədañ tay peteh hərwi ada mə ləva bəy nğay.

<sup>14</sup> Ta giye vəram ta Wawa i təbañ. Wawa i təbañ mə sliye fataya hərwi neñgeye na, Bəy Maduweñ ka gər i bəy Maduweñ hay. Neñgeye Bəy a ze bəy hay tebiye. Ndo nğay hay faya ta pay bəzay na, tə dərev tay peteh. Neñgeye a pala tay ha, a zalatay ada ta pay bəzay. Andza niye ta nğwasiye fataya tə neñgeye.»

<sup>15</sup> Gawla i Mbəlom niye a gwedeñ sa: «Magayam nakə ka nğatay nğwas niye a gawa madama mandza eye ka tsakay aye na, andza məgwede: Slala hay, ndo hay mbərzəzza haladzay, gəma hay, ndo neheye tə tsik kwa bəzlam i gəma waray waray aye.

<sup>16</sup> Dəram neheye kuro ka ŋgatay aye ta wu i pesl niye dərmak, ta neye dəre a ŋgwas niye. Ta buwiye wu hay tebiye abəra mə həlay i ŋgwas niye hərwi ada mā ndza bo kəriye. Ta gəsiye na ada ta həpədiye na. Siye nakə ka zəkaw aye na, ta kaliye ha a ako, ta fəkiye na abəra mə dəma hurdoək hurdoək.

<sup>17</sup> Bəy neheye kuro mədzal gər tay nəte aye ada tə gay məsler a wu i pesl niye hərwi ada mā ləva bəy ŋgay na, maa ge ha andza niye na, Mbəlom. Mbəlom a ge andza niye hərwi ada tā ge wu nakə a say aye. Wu i pesl ma ləviye bəy ŋgay hus ka wu nakə Mbəlom a tsik ahəl niye mā ge bo.

<sup>18</sup> Ŋgwas nakə ka ŋgatay aye na, bagwar i gəma nakə ma ləviye bəy i mändzibəra hay tebiye.»

## 18

### *Gəma i Babilon ka mbəzl*

<sup>1</sup> Ma dəba eye na, na ŋgatay a gawla i Mbəlom nenjed sa, faya ma mbəzlaweye abəra mə mbəlom. Gədanj ŋgay na, bagwar eye haladzay. Ada mədəve ŋgay nakə a dəv aye na, a dəv dzaydzay ka mändzibəra.

<sup>2</sup> A wuda ta magala, a gwad: «Babilon gəma bagwar eye ka mbəzl, Babilon ka mbəzl hele hele. Ka təra təv mändze i məsəfəre neheye lele bay aye. Məsəfəre lele bay eye hay kwa waray waray nəteye mandza eye mə dəma. Diyej neheye lele bay aye, a satay a ndo hay bay aye nəteye mə dəma.\*

<sup>3</sup> Babilon ka mbəzl hərwi kə vəlay ha bo ka məge mezeleme. Ndo i gəma hay wal wal tebiye ta sa guzom ŋgay ada bəy hay ka mändzibəra ta ge mezeleme ta nengeye. Ndo i tsakala hay ka mändzibəra ta təra zlele eye hay ta wu neheye a yatay a gər a ndo hay ka zal aye.»

<sup>4</sup> Na tsəne mətsike me mekeləj eye a tsənew mə mbəlom sa, a gwad:  
«Nəkurom ndo ga hay, dumara abəra mə walaŋ tay  
bəna ka tələkum həlay a mənese  
ka ta sumeye dəretsətseh andza nəteye dərmak.

<sup>5</sup> Dumara abəra mə walaŋ tay  
hərwi mənese tay a pasla bo bay haladzay  
ada Mbəlom kə mətsa ha gər bay.

<sup>6</sup> Gumatay dəretsətseh andza nakə nəteye tə gatay a ndo hay aye.

Wu nakə tə gatay a ndo hay aye na, gumatay mā ze niye.  
Tadə nəteye tə vəlay guzom a ndo gəse nəte na,  
rahumatay ha gəse sulo.

<sup>7</sup> Gumatay dəretsətseh haladzay hərwi ada dərev mā ndalatay.  
Tə gwad nəteye gədanj eye hay haladzay ada tə ndayawa wu mənday lele.  
Tə gwaday a gər tay sa na, nəteye bəy bagwar eye hay.

Tə gwad gəma tay na, ma giye dəretsətseh andza madakway i ŋgwas təbey,  
dada mədahaŋ ma ndzateye a gər təbey.

<sup>8</sup> Hərwi niye, dəretsətseh ma deyeweye fataya na, ka nəte eye.

Dəvats, mədahaŋ ada mändərzanj ta deyeweye a gəma tay pat eye nəte  
hərwi Bəy Maduwerj Mbəlom nengeye Mbəlom bagwar eye.

Mata ge sariya na, nengeye.

<sup>9</sup> «Ahəl nakə bəy hay ka mändzibəra, neheye tə gawa mezeleme ta gəma niye ta geŋgis i ako nakə faya ma təmiye gəma niye na, ta tuwiye haladzay, ta giye dəmes i mədahaŋ hərwi ahəl niye nəteye mandza eye ma wiya.

<sup>10</sup> Ta diye, ta lətsiye dərenj hərwi zluwer ma gateye tə dəretsətseh niye. Ta gwadiye:

\* 18:2 Zəba mə Bazlam mapala eye masulo eye 14.3-21.

“Waawayah! Waawayah!

Nəkar Babilon gəma bagwar eye nakə gədan yak a gawa andaya aye,  
ka mbəzl hele hele bəre nəte na, kəkay?”

11 «Ndo i tsakala hay ka məndzibəra ta tuwiye ada ta giye dəmes i mədahan dərmak hərwi gəma nakə a təma aye, ndəray kwa nəte andaya mə dəma sa bay. Ndəray andaya masəkəme wu i tsakala tay bay?

12 Wu niye hay na, gura ta bəre, kwar lele eye hay wal wal, ada peteked ndozza eye, peteked ɲgwalak eye hay wal wal. Wu neheye ndo i tsakala hay ta səkəmawa ha aye na, dərizl i gərdaf neheye lele haladzay ada tə wu neheye ta lambad tə zler i bəgəne aye ada ta mayako lele eye hay. Ta lambad ta bəre, tə kwar.

13 Ndo niye hay ta səkəmawa ha mal nakə a ze hunja aye wal wal dərmak ada ta slambah neheye a ze lele aye. Ta səkəmawa ha guzom ada mal, bəle ada gufa, sla hay, təban hay, pəles hay, muta i pəles hay ada beke hay andza məgwede ndo zezen hay. Ane tuk na, ndəray andaya masəkəme fataya abəra wu niye hay sa bay.

14 «Tə tuwa, tə gwafatay a ndo i gəma niye hay: “Wu neheye a yawakum a gər aye ta təma ta ako. Zlele kurom tə wu kurom lele eye hay andaya sa bay, ka hutumeye sa bay.”

15 Ndo i tsakala neheye ta təra zlele eye hay tə masəkəme ha wu ma gəma niye aye na, ta lətsiye dərən ta gəma niye. Zluwer a gatay tə dərətsətseh bagwar eye. Ta tuwiye haladzay ada ta giye dəmes i mədahan.

16 Ta gwadiye: “Waawayah, waawayah, gəma bagwar eye ka mbəzl. Nəngəye a ndzawa na, andza ɲgwas nakə a pa ka bo peteked ndozza aye ada tə peteked neheye zler i mətul zler i mətul ada tə siye peteked lele eye haladzay aye. A pawə ka bo wu i maslawə, tə ge ta gura, tə kwar neheye lele aye.

17 Wu hay tebiye a təma andza niye tsa düh!”

«Ndo neheye faya ta diye tə kwalalan i yam ada ta bagwar tay hay, ndo i tsakala neheye ti yawa a tsekene tə kwalalan i yam ada ta ndo neheye tebiye nəteye mə kwalalan i yam aye, ti ye tə lətse dərən.

18 Ta zəba dərə, tə ɲgatay a gəngis i ako nakə faya ma təmiye gəma niye na, ta wuda ta magala, tə gwad: “Gəma andaya andza gəma nakay bagwar eye bay.”

19 Tə tuwa, tə ge dəmes i mədahan, tə kuts bətekwew a gər dəslis dəslis. Ta wuda, tə gwad: “Waawayah, waawayah, gəma bagwar eye ka mbəzl. Anə gəma nakə ndo neheye tə kwalalan i yam aye ta huta zlele na, mə həlay ɲgay. Bəre nəte tsa na, a mbəzl na, kəkay?”

20 «Nəkurom neheye mə mbəlom aye ɲgwasum! Gəma ka təma! Nəkurom ndo məpe mədzal gər hay ka Yesu, nəkurom ndo i maslan i Yesu hay ada nəkurom ndo mədə ha bazlam i Mbəlom hay, ɲgwasum hərwi Mbəlom kə gay sariya ka wu nakə a gakum aye.»

21 Ma dəba eye na, gawla i Mbəlom gədan eye, a ye a zla kwar bagwar eye andza ber i maləgəre, a kal ha a bəlay. Tsa na, a gwad: «Ta kaliye ha Babilon gəma bagwar eye andza niye, dadə ta ɲgateye sa bay.

22 Ndo hay ta tsəniye dadə mədze gandzaval ma Babilon, məge dəmes, məfe fagam, məfe tolom sa bay. Wuray kwa tsekwen ma giye andaya ma Babilon sa bay. Ndo malembede wu hay ta giye andaya sa bay, maləgəre nakə a ləwawa abəra ma təv kurom aye na, ndo hay ta tsəniye sa bay.

23 Lalam kurom hay ta dəviye dzaydzay ka niye sa bay. Ta tsəniye mabəbəle wuray huwwa i ndo məzle dahəlay hay mə gay kurom sa bay. Ahəl niye ndo i tsakala kurom hay ta ze ha siye i ndo i tsakala hay ka məndzibəra tebiye. Ka

vatay gər a ndo hay kwa mənğay ta madañ kurom. Hərwi niye nəkurom ka nasumeye andza niye.

<sup>24</sup>Mbəlom a ɲgatay a bambaz i ndo mæde ha bazlam ɲgay hay, ada a bambaz i ndo ɲgay hay. Bambaz i ndo neheye ka mændzibəra tebiye tə kəf tay ha aye na, ka gər tay.»

## 19

<sup>1</sup>Ma dəba eye na, na tsəne mətsike me a tsənew mə mbəlom andza ndo hay haladzay ta tsikiye me. Tə gwad:

«Hələluya! Zambadumay a Mbəlom.

Maa təma tay ha ndo hay na, neɲgeye.

Neɲgeye məzlaḅ eye, neɲgeye gədañ eye a ze kwa mey.

<sup>2</sup>Neɲgeye na, ndo i dedək,

a ge sariya ɲgay a ndo hay na, ta dedək.

Kə gas na maya i ɲgwas neheye tə gawa madama aye.

ɲgwas niye na, kə nas tay ha ndo hay ka mændzibəra tebiye tə wu neheye lele bay aye.

Mbəlom kə vəlay dəretsətseh a ɲgwas niye

hərwi nakə a kəf ndo i məsler ɲgay hay aye.»

<sup>3</sup>Ma dəba eye, tə ma faya sa, tə gwad:

«Zambadumay a Mbəlom.

Geɲgis nakə a tsalaw abəra ma gəma niye aye na,

ma ndəviye bay, ma tsalaweye huya andza niye.»

<sup>4</sup>Tsa na, madugula hay kuro kuro sulo gər eye fad ada wu neheye fad aye ta dəkw gurmets kame i təv mændze niye Mbəlom mandza eye faya aye ada tə dəslay ha gər, tə gwad: «Hələluya! Nəkar Mbəlom bagwar eye.»

### *Magurlom i məzle dahəlay*

<sup>5</sup>Na tsəne mətsike me a tsənew abəra ma təv mændze i bəy eye, a gwad:

«Zambadumay a Mbəlom kway,

nəkurom ndo məge məsler ɲgay hay,

nəkurom neheye ka rəhumay ha gər ta dedək,

kwa wawa hay kwa bagwar hay.»

<sup>6</sup>Na tsəne mətsike me neɲged a tsənew sa andza ndo hay haladzay mbərzəzza faya ta tsikiye me. A tsənew sa na, andza mazaw bagwar eye nakə a vaw ka mahəm̄ba aye. A tsənew andza maləve i mbəlom bagwar eye dərmak. Neɲ faya na piye faya zləm na, mətsike me niye a gwad:

«Nəkar Mbəlom bagwar eye

hərwi Bəy Maduweñ Mbəlom kway na, gədañ eye.

Maa lava wu hay tebiye na, neɲgeye.

<sup>7</sup>ɲgwasakwa, dərev kway mâ ge lanlan lele.

Zambadakway hərwi həlay eye kə slaw.

Wawa i təfañ ma zliye dahəlay.

Dahəlay maləva bo eye tsiy, faya ma həbiye.

<sup>8</sup>Ta vəlay tsəved məpe ka bo peteked nakə tsədañña,

ndəlub kwa tsekweñ andaya faya bay aye,

ada nakə a dəv haladzay pəzləd pəzləd aye.

ɲgwalak ɲgwalak i peteked niye a da ha na,

wu neheye ɲgwalak eye ndo məpe madzal gər hay ka Yesu tə ge aye.»

<sup>9</sup>Tsa na, gawla i Mbəlom eye andaya a gwedeñ: «Watsa a derewel na, mənğwese mə ndziye ka ndo neheye tə zalatay a magurlom i məzle dahəlay



i Wawa i təbaŋ aye.» Gawla i Mbəlom niye a gwedeŋ sa na: «Bazlam neheye anaŋ aye na, dedek. A yaw na, abəra mə bazlam i Mbəlom.»

<sup>10</sup> Na tsəne andza niye na, na dəkw gurmets kame ŋgay hərwi mədəslay ha gər, ane tuk na, a gwedeŋ: «Kâ ge andza niye bay. Neŋ dərmak na, ndo i məsler i Mbəlom andza nəkar ada andza malamar yak neheye tə pa mədzal gər tay ka bazlam i Yesu nakə a dā ha aye. Dəslay ha gər dūh na, a Mbəlom.»

Maa vətlatay gədaŋ a ndo i maslaŋ i Mbəlom na, bazlam nakay.

### *Vəram bagwar eye*

<sup>11</sup> Ma dəba eye na, na ŋgatay magərmbəlom mahəndəka eye tuwaŋŋa. Pəles herre eye malətsa eye mə dāma ada ndoweye andaya mandza eye faya tuŋŋa, tə zalay na, ndo i dedek ada ndo nakə a ge wu ta tsəved aye. Ma giye sariya ada ma giye vərəm ta dedek.

<sup>12</sup> Dəre ŋgay a dəv andza dərneh i ako. Kə pa dzagwa i bəy a gər haladzay. Ta watsa faya məzele. Ndaray a sər məzele niye bay, maa sər na, neŋgeye nəte.

<sup>13</sup> Kələmedze ŋgay nakə ka bo aye na, bambaz faya haladzay. Məzele ŋgay na, bazlam i Mbəlom.

<sup>14</sup> Slala i sidzew hay wal wal mə mbəlom tə pay bəzay. Nəteye mandza eye ka pəles herre eye hay. Peteked tay hay ka bo na, herre kwa tsekweŋ ndəluḅ faya bay dərmak.

<sup>15</sup> Maslalam matasla eye hepepe, a yaw abəra mə bazlam ŋgay. Ta maslalam niye na, ma həhariye tay ha ndo neheye ta təma bazlam ŋgay bay aye. Ma təriye bəy ta gədaŋ eye ka gər tay. Ma mbərəsliye tay ha mbərəsl mbərəsl andza hohway neheye ta mbərəslawa tay ha hərwi mədītsaw abəra mə dāma yam aye. A dā ha niye na, mevel i Mbəlom bagwar eye.

<sup>16</sup> Ta watsa məzele ŋgay ka peteked ŋgay ada ka gwas ŋgay. Tə watsa na, tə gwad: «Neŋgeye na, bəy ka gər i bəy hay tebiye. Bəy Maduweŋ ka gər i bəy maduweŋ hay tebiye.»

<sup>17</sup> Tsa na, na ŋgatay a gawla i Mbəlom neŋged malətsa eye ka pat. A wuda ta magala, a zalatay a diyeŋ neheye faya ta tsəviye ta magərmbəlom aye, a gwadatay: «Hayum gər, dumara ndayum bagwar i magurlom nakə Mbəlom a da aye.

<sup>18</sup> Dumara həpədum slo i mədahaŋ i bəy hay, həpədum slo i mədahaŋ i sidzew hay tə slo i bəy tay hay. Həpədum slo i pəles hay tə slo i ndo neheye tə tsalawa faya aye ada tə slo i ndo hay tebiye, kwa slo i beke hay, kwa i ndo neheye nəteye beke hay bay aye, kwa i bagwar hay, kwa i wawa hay.»

<sup>19</sup> Tsa na, na ŋgatay a wu i pesl niye ada ta bəy i məndzibəra hay. Sidzew tay hay tə haya gər hərwi məge vərəm ta ndo nakə a tsal ka pəles herre eye ada ta sidzew ŋgay hay.

<sup>20</sup> Ahəl nakə ta dazlay a vərəm aye na, ndo niye tə sidzew ŋgay hay tə gəs na wu i pesl ta ndo nakə a gwad neŋgeye ndo məde ha bazlam i Mbəlom, azlakwa neŋgeye ndo məde ha bazlam i Mbəlom bay aye. Maa ge masuwayaŋ kame i wu i pesl na, neŋgeye. Andza niye, a vatay gər a ndo hay ka matəme ka bo tay ŋgodgor i wu i pesl ada ka mədəslay ha gər a kule nakə a ge aye. Ahəl nakə tə gəs wu i pesl ta ndo niye a gwad neŋgeye ndo məde ha bazlam i Mbəlom aye na, tə kuts tay ha a dəlov i ako tə dəre. Ako niye a təma na, andza dəlov a təma andza gufa i wur i kudamasara.

<sup>21</sup> Sidzew i wu i pesl hay na, ndo niye tə pəles aye a kəf tay ha ta maslalam nakə a yawaw abəra mə bazlam ŋgay aye. Diyeŋ hay tebiye, tə yaw tə nda mədahaŋ tay, tə rah.

## 20

### *Bazlam nakə a tsik ka məve gwezem aye*

1 Ma dəba eye na, na ngatay a gawla i Mbəlom faya ma mbəzlaweye abəra mə mbəlom, kəle mahəndəke abəra ma bəđ nakə kutsik bagwar eye mə həlay ngay. Tsalalaw bagwar eye a mba haladzay mə həlay ngay dərma.

2 A ye naha, a gəs gədam. Gədam niye na, dəđə, andza məgweđe Fakalaw nakə a vaway gər a ndo hay ahəl niye aye. Gawla i Mbəlom niye a gəs, a dzawa na. Ma ndziye madzawa eye məve gwezem.

3 Gawla i Mbəlom a dzawa na Fakalaw niye na, a kal ha a bəđ nakə kutsik bagwar eye, a dərəzl faya. A dərəzl faya na, lele tə kəle madərəzle hərwi ada mā vatay gər a ndo hay ka məndzibəra sa bay. Ma dəba i məve gwezem na, ta pəliye ha, ane tuk na, ma ndziye tsekweñ tsa.

4 Ma dəba eye na, na ngatay a təv məndze hay i bəy, ndo hay mandza eye faya. Mbəlom kə vələtay gəđəñ ka məgatay sariya a ndo hay. Na ngatay a məsəfəre i siye i ndo məpe mədzal gər hay ka Yesu dərma. Ndo hay tə dəs fataya abəra gər ahəl niye dəđəde hərwi nakə tə pa mədzal gər tay ka Yesu aye ada hərwi nakə tə dawa ha bazlam i Mbəlom aye. Nəteye na, ta dəslay ha gər a wu i pesl niye bay, ta dəslay ha gər a kule ngay bay, ngəđgor ngay andaya fataya ka da'ar təbey kwa ka həlay andaya bay. Na ngatay na, nəteye tə dərə. Nəteye tə Yesu Kəriste ta ndziye ma bəy məve gwezem.

5 Niye na, tə lah mələtsew abəra ma mədahañ aye. Siye i ndo hay na, ta lətseweye zuk bay. Ta lətseweye na, məve gwezem ma ndəviye abəra mə dəma təday.

6 Məngwese ka ndo niye hay tə lah mələtsew aye. Mbəlom kə pa tay ha wal. Məməte masulo eye ma siye fataya məgatay wuray sa bay. Ta təriye na, ndo neheye tə vələway wu a Mbəlom ada a Yesu Kəriste. Nəteye tə Kəriste ta ndziye ma bəy məve gwezem.

### *Mbəlom a sla ka Fakalaw*

7 Fakalaw kə ndza madzawa eye məve gwezem na, ta gəriye ahaya abəra ma bəđ.

8 Kə ndohwaw abəra ma bəđ na, ma diye mata vatay gər a ndo hay ma gəma hay wal wal sa. Tə zalatay a gəma niye hay na, Gog ta Magog.\* Ma hayatay gər ka təv manəte eye hərwi ada tə ge vərəm ta Mbəlom. Nəteye na, haladzay wurkenkene andza hewiyen nakə mə magayam aye.

9 Na ngatay na, tə ndohwaw tsid tsid ti ye kwa a ngay, ti ye tə lawara təv i ndo məpe mədzal gər hay ka Yesu andza məgweđe gəma nakə Mbəlom a wuđə haladzay aye. Ane tuk na, ako a mbəzlaw fataya mə mbəlom, a təma tay ha təlmed təlmed.

10 Fakalaw niye a vatay gər na, tə gəs na tə kal ha a dəlov i ako. Mə dəma na, gufa i kuđamasara wafafafa faya ma təmiye. Tə kal ha na, a təv nakə 6a tə lah məkal ha a dəma wu i pesl ta ndo nakə a gwad neñgeye ndo məde ha bazlam i Mbəlom aye. Andza niye, ta siye dərətsətseh həpat ta həvad ka tor eye mə dəma.

### *Maduk i duk i sariya*

11 Ma dəba eye na, na ngatay a təv məndze i bəy a zəba herre. Ndo andaya mandza eye faya. Məndzibəra ta magərmbəlom tə dze abəra kame ngay, ta ngatateye sa bay.

\* 20:8 Zəba mə Ezekiyl 38-39.

<sup>12</sup> Tsa na, na ngatay a ndo neheye tə mət aye tebiye, kwa bagwar hay, kwa wawa hay. Nəteye malətsa eye kame i təv məndze i bəy. Tsa na, ndoweye a həndək dərewel hay. Ta həndək dərewel mekeləŋ eye dərmak. Nəŋgeye na, ta watsa a dəma məzele i ndo neheye tə huta sifa nakə dedək aye. Ma dəba eye ta həndək dərewel niye hay na, Mbəlom a gatay sariya a ndo neheye tə mət aye. A gatay sariya na, tədə tədə ka wu tay neheye tə ge aye, tə watsa na a dərewel niye hay aye.

<sup>13</sup> Ndo neheye tə mət ma bəlay aye tə ndohwaw tebiye abəra ma bəlay. Mədəhaŋ neheye ma bəd ma təv məndze i mədahaŋ hay aye tə ndohwaw abəra mə dəma tebiye. Mbəlom a gatay sariya tebiye tədə tədə ka məsler tay.

<sup>14</sup> Tsa na, tə kal ha məməte ta təv məndze i mədahaŋ hay a dəlöv i ako. Dəlöv i ako niye na, təv nakə ndo hay ta mətiye mə dəma masulo aye.

<sup>15</sup> Tadə ndoweye məzele ngay andaya mə dərewel i ndo neheye ta huta sifa aye bay na, ta kal ha a dəlöv i ako niye dərmak.

## 21

### *Magərmbəlom wədeye ta məndzibəra wədeye*

<sup>1</sup> Ma dəba eye na, na ngatay a magərmbəlom wədeye ta məndzibəra wədeye. Magərmbəlom makurre eye ta məndzibəra makurre eye ta dze. Ada bəlay andaya sa bay kə dze.

<sup>2</sup> Na ngatay naha a gəma tsədəŋŋa eye, gəma niye na, Zerozelem wədeye nakə faya ma mbəzlaweye abəra ka təv i Mbəlom aye. Gəma niye na, a lambad bo, a le haladzay andza dahəlay nakə a lambad bo lele ma diye a gay i zal aye.

<sup>3</sup> Na tsəne mətsike ma tsənew abəra ka təv məndze i bəy ta magala, a gwad: «Zəbum, Mbəlom kə ge gay ngay a walaŋ i ndo hay, ma ndziye tə nəteye. Ta təriye ndo ngay hay. Nəŋgeye Mbəlom nəte ngweŋ ma ndziye tə nəteye.

<sup>4</sup> Ma takadiye na yam dərə tay. Ta mətiye sa bay tebiye. Wuraŋ ma ndalateye sa bay. Ta tuwiye sa bay, wuraŋ ma wuriye fataya sa bay. Wu guram eye hay ta dze.»

<sup>5</sup> Tsa na, ndo nakə mandza eye ka təv məndze i bəy aye, a gwad: «Zəba, na giye wu hay tebiye wədeye hay.» Tsa na, a gwedəŋ: «Watsa wu nakay hərwi bazlam neheye na, dedək, makəraw me kwa tsekweŋ andaya mə dəma bay.»

<sup>6</sup> A gwedəŋ sa: «Ka ndəv. Maa dazlay a wu tebiye na, nəŋ, maa ndəv ha wu hay tebiye na, nəŋ gwa. Nəŋ makurre i wu hay tebiye ada nəŋ mandəve i wu hay tebiye. Ndo nakə yam a gay aye na, na vəleye yam kəriye. Yam niye a ngəzaw ma bədiyem. Yam niye na, yam nakə ma vəlateye sifa a ndo hay aye.

<sup>7</sup> Ndo nakə kə ngwasa ka dərətsətseh aye na, na vəleye wu neheye tebiye. Na təriye Mbəlom ngay, nəŋgeye ma təriye wawa ga.

<sup>8</sup> Ane tuk na, ndo i takazay hay, ndo neheye ta dzala ha ka Yesu bay aye, ndo neheye dərəv tay lele bay aye, ndo məkədə gər i ndo hay, ndo məge madama hay, madaŋ hay, ndo məpay bəzay a kule hay, ndo i parasay hay, nəteye dūh ta diye na, a dəlöv i ako. Gufa i kudamasara nakə a təma wafafafa aye mə dəma. Ta mətiye məməte masulo aye na, mə dəma.»

### *Zerozelem wədeye*

<sup>9</sup> Ma dəba eye na, gawla i Mbəlom a yaw ka təv ga. Nəŋgeye nəte mə walaŋ i gawla i Mbəlom neheye tasəla ta gəse mə həlay tay aye neheye maduk i duk i dərətsətseh mə dəma maraha eye. A yaw na, a gwedəŋ: «Dara, na dəkeye ka dahəlay nakə Wawa i təbaŋ ma zliye aye.»

<sup>10</sup> Tsa na, Məsəfəre Tsədəŋŋa eye a yaw ka gər ga ada kwayaŋŋa gawla i Mbəlom niye a zla ga, a ye ga ha a mahəmba bagwar eye sololololo.

A dəŋ ka Zerozelem gəma tsədaŋŋa eye, faya ma mbəzlaweye abəra ma magərmbəlom, a mbəzlaw abəra ka təv i Mbəlom.

<sup>11</sup> Gəma niye na, a dəv dzaydzay andza kwar lele eye, a wuzl dəre andza malam. Maa wuzl dəre niye na, məzlaḅ i Mbəlom.

<sup>12</sup> Tə lawara na gəma niye na, ta zled. Zled niye madəzla eye dabasəm eye ada zəbol eye dərmak. Tə ge faya məged i məfələkwe a dəma na, kuro gər eye sulo, ada gawla i Mbəlom kwa way ka məged neheye kuro gər eye sulo aye. Ka məged niye hay na, tə watsa faya məzele kuro gər eye sulo i slala i Israyel hay.

<sup>13</sup> Gəma niye na, hawal faḁ. Ka hawal niye hay faḁ aye na, məged faya mahkar mahkar. Mahkar ta diye i bəzay, mahkar ta diye i pat mədəde ada mahkar ta diye i tsakay, mahkar ta diye i Salawa.

<sup>14</sup> Tə pa mədok i zled i gəma niye tə kwar bagwar eye hay kuro gər eye sulo. Ka kwar niye hay nəte nəte tə watsa faya məzele i ndo i maslan i Wawa i təbaŋ kuro gər eye sulo.

<sup>15</sup> Gawla i Mbəlom nakə faya ma tsikeneye me aye na, sakwal i gura mə halay. Sakwal niye na, hərwi mələve ha wu hay. A ye, a ləva ha gəma, məged eye hay ada zled i gəma eye.

<sup>16</sup> Hawal i gəma niye faḁ na, tə ləva ta ze a bo bay. Gawla i Mbəlom a ləva na gəma eye ta sakwal ŋgay niye. Zəbol ŋgay eye na, gwezem kuro gər eye sulo. Zlabatam ŋgay eye tə solololo ŋgay eye andza niye dərmak.

<sup>17</sup> Ma dəba eye, gawla i Mbəlom a ləva zled niye. Solololo ŋgay eye temerre tə kuro kuro faḁ gər eye faḁ. A ləva na, andza nakə ndo hay tə ləvawa wu aye.

<sup>18</sup> Ta dəzl zled niye na, tə kwar nakə tə zalay *zaspə* aye. Gəma niye na, ta dəzl ta gura lele dəre a tsara ha andza malam.

<sup>19</sup> Tə wurkatsa na mədok i zled niye na, tə kwar neheye wal wal a le haladzay aye. Kwar eye niye hay na, tə zalatay *zaspə*. Masulo eye na, tə zalay *safir*, mamahkar eye tə zalay *apate*, mafad eye tə zalay *emerod*,

<sup>20</sup> mazlam eye tə zalay *sardowan*, maməkwa eye tə zalay *kornalin*, matasəla eye tə zalay *kərisolite*, matsamahkar eye tə zalay *beril*, matsid eye tə zalay *topaz*, makuro eye tə zalay *kərisopəras*, makuro gər eye nəte tə zalay *hisinṭe*, makuro gər eye sulo tə zalay *ametiste*.

<sup>21</sup> Wu i məged niye kuro gər eye sulo eye i kwar, tə zalay *perəl*, a le haladzay. Təv məhay gər i gəma niye na, ta ndərat faya na, gura lele dəre a tsara ha aye.

<sup>22</sup> Na ŋgatay a gay i mədəslay ha gər a Mbəlom ma gəma niye bay hərwi Bəy Maduweŋ Mbəlom bagwar eye ada Wawa i təbaŋ nəteye wu tay ma təv maduwule me.

<sup>23</sup> Na zəba dəre na, pat ta kiye ta təriye kəriye ma gəma niye hərwi dzaydzay i Mbəlom a dəv mə dəma. Wawa i təbaŋ neŋgeye a vəl dzaydzay ma gəma niye.

<sup>24</sup> Slala hay wal wal ka məndzibəra ta həhaliye ma təv dzaydzay ŋgay ma gəma niye. Bəy i məndzibəra hay ta fələkwiye a dəma tə zlele tay hərwi məvəlay wu a Mbəlom.

<sup>25</sup> Məged i gəma niye ma ndziye na, tuwaŋŋa hwapat ta dərəzliye na bay. Ta dərəzliye na dāda bay hərwi həvaḁ andaya sa bay.

<sup>26</sup> Ta zliye zlele tə wu neheye lele aye ka məndzibəra, ta fələkwiye ha a gəma niye hərwi məvəlay a Mbəlom.

<sup>27</sup> Wu neheye lele bay aye ta sliye faya mede a dəma bay. Ndo neheye dərəv tay manasa eye ada ndo i parasay ta fələkwiye a dəma bay dərmak. Mata fələkwe a dəma na, ndo neheye tə watsa məzele tay a dərəwel i Wawa i təbaŋ aye. Maa huta sifa dedək eye na, nəteye.

## 22

<sup>1</sup> Ma dəba aye na, gawla i Mbəlom niye a dəŋ ka magayam wuray yam mə dəma. Yam eye niye na, ma vəliye sifa a ndo hay. A wuzl dəre andza malam ada a yaw na, abəra ka təv məndze i bəy i Mbəlom ta Wawa i təbən.

<sup>2</sup> A va ma wuzlah i tsəved i gəma niye. Ka tsakay i yam niye na, dərizl i gərdaf nakə ma vəliye sifa a ndo hay aye kə ndzohwaw. A ndzohwaw na, diye sulo sulo. Ka məve nəte na, a wa sik kuro gər eye sulo. Ka kiye na, a wa sik nəte. Slambah eye hay na, sidem. Ma mbəliye tay ha slala i ndo hay wal wal tebiye.

<sup>3</sup> Wu neheye Mbəlom a vəlawatay mezeleme aye na, ma giye andaya ma gəma niye bay. Mata ge andaya ma gəma niye na, təv məndze i bəy i Mbəlom ta Wawa i təbən. Ndo ŋgay hay ta dəsleye ha gər.

<sup>4</sup> Nəteye na, ta ŋgateye a dəre ŋgay, ta watsiye məzele ŋgay ka da'ar tay.

<sup>5</sup> Həvad ma giye andaya sa bay, lalam hay tə pat ta təriye kəriye hərwi Bəy Maduweŋ Mbəlom bo ŋgay eye ma dəvateye dzaydzay. Ada nəteye na, ta ndziye ma bəy ka tor eye.

<sup>6</sup> Ma dəba eye na, gawla i Mbəlom a gwedeŋ: «Bazlam neheye na, dedək, maraw me andaya kwa tsekweŋ mə dəma bay. Bəy Maduweŋ Mbəlom a vəlatay Məsəfəre ŋgay a ndo mədə ha bazlam ŋgay hay hərwi ada tã da ha bazlam ŋgay. A sləraw gawla ŋgay hərwi ada mâ yaw mâ dətay ha a ndo i məsler ŋgay hay wu nakə mazlambar ma deyeweye kame aye.»

*Yesu ma maweye*

<sup>7</sup> Yesu a gwad: «Tsənum, mazlambar na miye naha bəse. Mbəlom ma piye ŋgama ka ndo neheye faya ta rəhay ha gər a wu nakə mə dərewel nakay aye hərwi a yaw na, abəra ma Məsəfəre i Mbəlom.»

<sup>8</sup> Neŋ Yuhana, na tsəne wu neheye tə zləm ga, na ŋgatatay tə dəre ga. Ahəl nakə na tsəne aye ada na ŋgatatay aye na, na kal ha bo kame i gawla i Mbəlom nakə a bəzeŋ ha aye hərwi mədəslay ha gər.

<sup>9</sup> Ane tuk na, a gwedeŋ: «Kã ge andza niye bay. Neŋ na, ndo i məsler i Mbəlom andza nəkar ada andza malamar yak neheye nəteye ndo mədə ha bazlam i Mbəlom hay aye ada andza siye i ndo neheye faya ta rəhay ha gər a bazlam neheye mə dərewel nakay aye. Kã dəslyay ha gər na, a Mbəlom.»

<sup>10</sup> A gwedeŋ sa: «Mbəlom kə dã ha wu nakə ka watsa a dərewel nakay aye. Ka ŋgaha na bazlam neheye bay, dətay ha a ndo hay hərwi wu neheye ta giye bo na, bəse.

<sup>11</sup> Neŋ faya na gwadətəye a ndo neheye ta wuda wu nakə lele bay aye. Tadə a sakum məge mənese na, dum ha kame kame andza niye huya. A nəkurom neheye dərev kurom manasa eye, tadə a sakum matere andza niye na, dum ha kame kame andza niye huya. Ndo nakə faya ma giye wu nakə a say a Mbəlom aye na, mâ ge lele huya. Ndo nakə faya ma pay bəzay a Mbəlom aye na, mâ pay bəzay a Mbəlom andza niye huya.»

<sup>12</sup> Ma dəba aye na, Yesu a gwedeŋ sa: «Tsəne, na miye naha bəse. Na həliye naha wu hay ka həlay hərwi ada nã vəl kwa a way merəbe i məsler ŋgay.

<sup>13</sup> Maa dazlay a wu tebiye na, neŋ, maa ndəv ha wu hay tebiye na, neŋ gwa. Neŋ makurre i wu hay tebiye ada neŋ mändəve i wu hay tebiye

<sup>14</sup> «Məŋgwese ma ndziye ka ndo neheye ta bariye peteked tay hay tsədəŋŋa eye. Nəteye ta hutiyə tsəved məfələkwe a gəma niye. Nəteye na, ta hutiyə tsəved mände hohway i dərizl i gərdaf nakə ma vəliye sifa a ndo hay aye.

<sup>15</sup> Ndo neheye ta təra andza kəra aye ada madəŋ hay ta ndo neheye tə gawa mezeleme aye, nəteye na, ta ndziye ma bəra. Ndo məkədə gər i ndo

hay dərmak ada ta ndo neheye tə dəslaway ha gər a kule aye, ndo neheye tə vəlaway ha bo tay a maraw me aye, nəteye tebiye ta ndziye ma bəra, ta fələkwiye dəda a gəma niye bay.

<sup>16</sup> «Nəj Yesu, na slər naha gawla i Mbəlom ga na, hərwi ada mâ ye, mâ dākum ha wu neheye a məhay gər i ndo məpe mədzal gər hay ka Yesu neheye wal wal təv tasəla aye. Nəj na, ndo nakə faya ka həbumeye ma deyeweye abəra ma gwala i Davit aye. Nəj na, bamta i dərə mətsədə nakə a dəvawa ta mekedə aye.»

<sup>17</sup> Məsəfərə Tsədənna eye ta dahəlay, tə gwad: «Dara.» Nəkurom neheye faya ka tsənumeye wu neheye, gwadum: «Dara.»

Nəkurom neheye yam a gākum aye, dumara sum yam nakə ma vəliye sifa a ndo hay aye. Ta vəliye kəriye a ndo neheye a satay məse aye.

### *Mandəve i bazlam*

<sup>18</sup> Nəj Yuhana faya na gateye dəf a ndo neheye faya ta tsəniye wu neheye mə dərəwel nakay aye. Tadə ndoweye ka səkah ha wu ka bazlam neheye mə dərəwel nakay aye na, Mbəlom ma səkaheye ha dərətsətseh nakə ka dzaŋgum mə dərəwel nakay aye.

<sup>19</sup> Tadə ndoweye kə zla wu abəra mə bazlam i Mbəlom na, Mbəlom ma həliye hohway i dərizl i gərdaf nakə ma vəliye sifa a ndo hay aye abəra ka bəmalə ŋgay. Ma hutiyə təv ma gəma i Mbəlom bay. Ba dərəwel nakay kə tsik ka hohway ta gəma niye tsiy.

<sup>20</sup> Yesu a gwad ka wu neheye tebiye na, dedək aye, ma gwadiye: «Ayaw, na miye naha bəse.»

Ayaw Bəy Maduweŋ ga Yesu, dara.

<sup>21</sup> Yesu Bəy Maduweŋ kway mâ pa fakuma ŋgama tebiye.